


El Nuevo Testamento
en mixe de
Guichicovi



New Testament in Mixe, Isthmus (MX:mir:Mixe, Isthmus)

El Nuevo Testamento en mixe de Guichicovi
New Testament in Mixe, Isthmus (MX:mir:Mixe, Isthmus)

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Isthmus

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 4 Mar 2019 from source files dated 22 Dec 2018
4e564219-157f-5807-b810-47a15308b8b8

Contents

San Mateo	1
San Marcos	51
San Lucas	88
San Juan	139
Hechos	183
Romanos	244
1 Corintios	275
2 Corintios	298
Gálatas	314
Efesios	321
Filipenses	330
Colosenses	335
1 Tesalonicenses	340
2 Tesalonicenses	346
1 Timoteo	349
2 Timoteo	356
Tito	361
Filemón	364
Hebreos	366
Santiago	382
1 Pedro	387
2 Pedro	395
1 Juan	400
2 Juan	405
3 Juan	406
Judas	407
Apocalipsis	409

San Mateo

¹ Yaa jaduñ myiñ cujaay nebiaty ja'a Jesús yhap tieedyhajxy jecy xiøhajty. Abraham xiøhajty ja'a jawyinhájtäbä. David xiøhajty ja'a cujecy jaac miiñäbä.

² Ja'a Abraham yhuung, Isaac je'e xiøhajty. Ja'a Isaac yhuung, Jacob je'e xiøhajty. Ja'a Jacob yhuung tu'ug, Judá je'e xiøhajty. May ja'a Judá ja'a piuhya'ay hñajty miøødä.

³ Ja'a Judá yhuunghajxy, Fares hajxy xiøhajty møødä Zara. Ja'a Fares tiajhajxy, Tamar je'e xiøhajty. Ja'a Fares yhuung, Esrom je'e xiøhajty. Ja'a Esrom yhuung, Aram je'e xiøhajty. ⁴ Ja'a Aram yhuung, Aminadab je'e xiøhajty. Ja'a Aminadab yhuung, Naasón je'e xiøhajty. Ja'a Naasón yhuung, Salmón je'e xiøhajty. ⁵ Ja'a Salmón yhuung, Booz je'e xiøhajty. Ja'a Booz tiaj, Rahab je'e xiøhajty. Ja'a Booz yhuung, Obed je'e xiøhajty. Ja'a Obed tiaj, Rut je'e xiøhajty. Ja'a Obed yhuung, Isaí je'e xiøhajty. ⁶ Ja'a Isaí yhuung, David je'e xiøhajty. Mänitä David tiägøøyy gobiernähajpä. Mänitä Urías yajyagho'cä mänaa ja'a tsip jiadyijän. Coó ja'a Urías yho'cy, mänitä David ja'a Urías tio'oxiøjc wyiingpøjcä. Mänitä David yaghuungpaaty. Salomón ja'a yhuung hajxy yajxøhajty.

⁷ Ja'a Salomón yhuung, Roboam je'e xiøhajty. Ja'a Roboam yhuung, Abías je'e xiøhajty. Ja'a Abías yhuung, Asa je'e xiøhajty. ⁸ Ja'a Asa yhuung, Josafat je'e xiøhajty. Ja'a Josafat yhuung, Joram je'e xiøhajty. Ja'a Joram yhuung, Uzías je'e xiøhajty. ⁹ Ja'a Uzías yhuung, Jotam je'e xiøhajty. Ja'a Jotam yhuung, Acáz je'e xiøhajty. Ja'a Acáz yhuung, Ezequías je'e xiøhajty. ¹⁰ Ja'a Ezequías yhuung, Manasés je'e xiøhajty. Ja'a Manasés yhuung, Amón je'e xiøhajty. Ja'a Amón yhuung, Josías je'e xiøhajty. ¹¹ Ja'a Josías yhuung tu'ug, Jeconías je'e xiøhajty. Jimä Jeconías ja'a piuhya'ay hñajty miøødä. Mänitä judíoshajxy hadsip yajnøcxä jäguem Babilonia-naaxooty.

¹² Jim hajxy chánaadiaacpøjcy Babilonia. Jimä Jeconías ja'a yhuung yajxøhajty Salatiel. Ja'a Salatiel yhuung, Zorobabel je'e xiøhajty. ¹³ Ja'a Zorobabel yhuung, Abiud je'e xiøhajty. Ja'a Abiud yhuung, Eliaquim je'e xiøhajty. Ja'a Eliaquim yhuung, Azor je'e xiøhajty. ¹⁴ Ja'a Azor yhuung, Sadoc je'e xiøhajty. Ja'a Sadoc yhuung, Aquim je'e xiøhajty. Ja'a Aquim yhuung, Eliud je'e xiøhajty. ¹⁵ Ja'a Eliud yhuung, Eleazar je'e xiøhajty. Ja'a Eleazar yhuung, Matán je'e xiøhajty. Ja'a Matán yhuung, Jacob je'e xiøhajty. ¹⁶ Ja'a Jacob yhuung, José je'e xiøhajty. Coó ja'a María yhuung hñajty tøø myiñ tøø quia'ay, ja'a Jesúsahajpä, mänitä José ja'a María wyiingpøjcy. Ja'a Jesús, Cristo je'e xiøhajty; paady yaa quiejxä hädaa yaabä naaxwiin maa højtscøxpän.

¹⁷ Nämajmacts ja'a Jesús ja'a yhap ja'a tieedy hñajty miøødä, møødä Abraham møødä David. Y jaac nämajmacts ja'a yhap ja'a tieedy hñajty miøødä, møødä Salomón møødä Jeconías. Mänitä judíoshajxy yajnøcxä Babilonia-naaxooty. Y jaac nämajmacts ja'a Jesús ja'a yhap ja'a tieedy hñajty miøødä, møødä Salatiel møødä José. Mänitä Cristo myiñguiahy.

¹⁸ Yaa jaduñ myiñ cujaay nebiä Jesucristo myiñguiahyän. Ja'a Jesucristo tiaj, María hñajty je'e xiøhaty. Tøø hñajty tiödiägø'øy coó ja'a Maríaahajxy hñajty piøga'añ møødä José. Pero cajnä hajxy hñajty piøcyñä, mänitä María quiähxø'cy coó hñajty yhuungmøødä. Ja'a Dioshespírituhaam hñajty tøø yhuungpaady. ¹⁹ Jaduhñ ja'a judíoshajxy hñajty quiuhdujthaty, coó ja'a to'oxiøjc yhuungpáadät jabiøcy, mänitä jaduñ yhøxmátsänät. Pero miøødä ja'a José hojiot hñajty; cabä María hñajty ñäxø'øwø'øwa'añ. Mänitä José wyiinmahñdyhajty coó ja'a María yhøxmádsät hamee'ch, nebiä María jaduñ quia'a yajtsähdiúnät. ²⁰ Yhuuc wiinmahñdyhajpy ja'a José hñajty, mänitä miaaho'cy. Mänitä Diosmoonsä wyiinhijsy cuma'ayhaam. Tsajpootyp hñajty chooñ. Mänitä José ñämaayyä:

—José, David miich hijty mhaphajpy mdeedyhajpy. Ca'a mdajy ca'a mmay. Hoy jaduñ coó ja'a María mwiingpøgät. Dioshespírituhaam jaduñ tøø yhuungpaady.

²¹ Ya'ayhäna'c jaduñ yhuunghadaamby, ja'a Jesúsajpä. Coo ja'a quiu'ug ja'a piojpä quiädieey yajñahwa'adsaanä, paady jaduñ xiøhata'añ Jesús.

²²⁻²⁵ Coo ja'a José mia'abiädø'cy, mänit quiudiuuñ neby hänajty tøø ñäma'ayíjäm ja'a Diosmóonsäm. Mänitá María wyiingpøjcy. Pero cab hajxy ñimiøødmaawä høxtä coonä ja'a María ja'a Jesús yajmiññä. Ja'a coobhuung, je'eds jaduñ miingahw. Jesús jaduñ xiøhajty. Coo ja'a Jesús jaduñ myiññguiahy, tøjiajt ja'a Diosmädia'agy jaduñ nebiä Diosmädia'agy-yajwa'xpähajxy jecy quiujahyyän:

Huungpaadaamb ja'a cäxyihäna'c tu'ug.

Ya'ayhäna'c yhuunghadaamby.

Jue'e xiøhata'añ, Emanuel.

Je'eduhñ ñänøømby coo ja'a Dios hajxy xmiøødhájtäm.

2

¹ Ja'a Jesús, jim jaduñ myiññguiahy maa ja'a cajpt jaduñ xiøhatiän Belén, jim Judeanaaxooty. Ja'a Herodes, je'e hänajty tuumb gobiernä. Jim je'e hänajty chäna'ay maa ja'a mõjcajptän Jerusalén. Mänitá jäya'ayhajxy jim näje'e miejch maa ja'a Heródesän. Jäguem hajxy hänajty tøø choon maa ja'a xøø piädsømiän. Madsa'ahøxtaabiä hajxy hänajty wiädity. ² Mänit hajxy yajtøøyy:

—Maa ja'a judíos guiobiernähajxy, ja'a tøø myiñ tøø quiá'ayäbä. Jäguem højts ja'a miadsa'a tøø nnäheebøøyyä, jim maa ja'a xøø piädsømiän. Paady højts yaa tøø nmiñ tøø nmech neby højts jaduñ nwiingudsähgø'owät.

³ Coo ja'a gobiernä Herodes jaduñ miädoyhajty møødä Jerusalénpä-jäya'ayhajxy nägøxiä, mänit hajxy tiägøøyy tajpä maabiä. ⁴ Mänitá Herodes miøjyaaxy ja'a teedy-wiindsøn hajxy møødä ley-yajnahixøøbiähajxy. Mänitá Herodes yajtøøyy:

—Maa ja'a Cristo myina'añ quia'awa'añ, ja'a Dios quiexaambiä.

⁵ Mänit hajxy yhadsooyy:

—Beléncajptóotiäc jaduñ myina'añ quia'awa'añ yaa Judeanaaxooty. Ja'a Diosmädia'agy-yajwa'xpä jecy cujahy nebiä Dios miänaañän:

⁶ Ja'a cajpt jaduñ xøhajpä Belén, jim Judeanaaxooty,

jimä wiindsøn tu'ug myina'añ quia'awa'añ;

je'eçh ja'a ngu'ug xyhane'emáañäp, ja'a judíoshajxy; paadiä Beléncajpt jaduñ yajmábaada'añii nebiä mõjcajptän.

⁷ Mänitá Herodes miøjyaaxy hamee'ch ja'a madsa'ahøxtaabiähajxy. Mänitá Herodes yajtøøyy:

—Mäduhnajtä ja'a madsa'a quiähxø'tsohñ.

⁸ Coo ja'a Herodes tøyhajt miooyyä, mänitá miänáangumbä:

—Nøcx ja'a pigäna'c hajxy jim yajtøw Belén. Naxy hajxy hoy mdehm yajtøwät. Coo mbáadät, mänitøch hajxy min xyhawaanä, nébiøch jim nøcxy nwiingudsähgøøbiä.

⁹⁻¹⁰ Mänitá madsa'ahøxtaabiähajxy tiu'ubøjcy. Jim hajxy ñøcxy Belén nebiä Herodes hänajty tøø miäna'añän. Mänitá madsa'a hajxy jadähooc yhjxcumbä, ja'a hajxy hänajty tøø yhuug hijxpä jäguem maa ja'a xøø piädsømiän. Mänit hajxy jiaançh tehñ xioondaacy. Mänitá madsa'a hajxy piadu'ubøjcy. Mänitá madsa'a jim tøyyä tiänaaxiøjpy maa ja'a pigäna'c-huung hänajty yhitiän naaxyp. Tøyyä ja'a madsa'a hänajty quiuhajnaxy maa hänajty quio'na'ayän. ¹¹ Mänitá madsa'ahøxtaabiähajxy tiøjtägøøyy. Jimä regalo hajxy hänajty miøødä caajäooty. Mänitá pigäna'c-huung hajxy yhjxy møødä tiaj María. Mänitá pigäna'c hajxy wyiinjjcädaacy; wyiingudsähgøøyy hajxy jaduñ. Mänitá quiaajä hajxy yaghawaach. Mänitá oro hajxy yajpädsøomy møødä poom møødä mirraperfume. Pa'agxuu'p je'e; tsow ñøcxy. Mänitá pigäna'c hajxy jaduñ ñä'a mooyy. ¹² Mänit hajxy wyiimbijnä. Mänit hajxy ñøcxy maa ja'a quiajpthajxiän. Wiingtuum hajxy ñøcxøøñä; cab hajxy jim ñaxøøñä maa ja'a Heródesän. Hix, tøø hajxy hänajty yhawáañäxä cuma'ayhaam coo hajxy jim quia'a naxøøñät.

¹³ Coo ja'a madsa'ahøxtaabiähajxy hänajty tøø wyiimbijnä, mänitä José ja'a Diosmoonsä tu'ug wyiinhijxy cuma'ayhaam, ja'a tsajpootypä. Mänitä José ñämaayyä:

—José, pädø'øg. Nøcx hajxy jim Egiptonaaxooty møødä mhuung møødä mdo'oxy. Jim hajxy mmähmó'øwät høxtä coonä nhawáanämät coo hajxy mwiimbídät. Paady hajxy mbäyø'øgät neby yø'ø mhuung xquia'a yaghó'cät. Ja'a Herodes, xyhøxta'awáanäp yø'ø mhuung jaduñ; xyajyagho'ogáanäp jaduñ.

¹⁴ Mänitä José piädø'cy. Mänitä Joséhajxy jim jiaančh nøcxy Egipto møødä yhuung møødä tio'oxy. Mänitcoods hajxy tiehm tiu'ubøjcy. ¹⁵ Jim hajxy hänajty miähmó'øwa'añ Egipto. Høxtä ja'a Herodes hó'ogäp, mänit hajxy hänajty wyiimbijtägatsa'añ. Jequiän ja'a Diosmädia'agy-yajwa'xpä hänajty tu'ug tøø quiujaay nebiä Dios miänaañ: “Nhøxyaaxpädsømämbiöch ja'a nhuung jii by Egiptonaaxooty.” Y coo ja'a Joséhajxy jim jiaančh nøcxy Egipto, tøjiajt ja'a Diosmädia'agy jaduñ.

¹⁶ Coo ja'a Herodes ñajuøyy coo hänajty tøø wyiinhøñii ja'a madsa'ahøxtaabiädøjc, mänitä Herodes jiootma'ty. Mänitä Herodes ja'a pigäna'c yajyagho'cä nägøxiä, pønjaty ja'a mejtsjumøjtpä hänajty ca'a yaghabejpnä, ja'a hajxy hänajty tsänaabiä Belén møødä Belén mäwiingón. Hix, tøø hänajty mejtsjumøjt yhijnä coo ja'a madsa'a quiähxø'tsohñ, ja'a madsa'ahøxtaabiädøjc-hajxy hänajty tøø yhiäbä. ¹⁷⁻¹⁸ Jaduhñ ja'a Diosmädia'agy tiøjiajcumbä nebiä Jeremías hänajty jecy tøø quiujaayän:

Jim maa xiøhatiän Ramá,

jimä Raquel ja'a yhuung ñäjøyy ñaxuu'ch.

Coo ja'a yhuung yaghó'cäxä, paady quia'a jootcapxmøcpøgaanä.

Ja'a Jeremías, je'e ja'a Diosmädia'agy jecy yajwa'x.

¹⁹ Coo ja'a Herodes yho'nä, jimnä ja'a Joséhajxy hänajty Egiptonaaxooty. Mänitä José ja'a Diosmoonsä tu'ug wyiinhjxcumbä cuma'ayhaam, ja'a tsajpootypä. Mänitä José ñämaayyä:

²⁰ —Pädø'øg, wiimbit hajxy møødä mhuung møødä mdo'oxy. Nøcx hajxy Israelnaaxooty. Tøø jäya'ayhajxy yho'nä, ja'a mhuung hajxy hijty xyagho'ogáanäbä.

²¹ Mänitä Joséhajxy piädø'cy møødä yhuung møødä tio'oxy. Mänit hajxy jim jiaančh nøcxy Israelnaaxooty. ²² Mänitä José miädoyhajty coo Arquelao hänajty guiobiernähajjnä jim Judeanaaxooty maa ja'a tieedy Herodes hänajty tøø guiobiernähatiän. Mänitä José chähgøyy. Cab hänajty jim ñøcxaanä Judeanaaxooty. Wiingtuum hajxy ñøcxy Galileanaaxooty, nebiä José hänajty tøø yhawáanäxän cuma'ayhaam. ²³ Coo hajxy jim miejch Galileanaaxooty, mänit hajxy jim chänaadiaacpøjcy maa ja'a cajpt xiøhatiän Nazaret. Coo hajxy jim chänaadiaacpøjcy, tøjiajt ja'a Diosmädia'agy jaduñ maa jaduñ myiñän cujaay coo ja'a Jesús hänajty ñäma'awa'añii coo jim choñ Nazaret. Ja'a Diosmädia'agy-yajwa'xpähajxy jaduñ jecy cujahy.

3

¹ Cujecy ja'a Juan ja'a mäyajnäbejpä jim miejch Judeanaaxooty pactuum. Ja'a Diosmädia'agy hänajty yajwa'xyp. ² Mänitä Juan tiägøyy mädiaacpä. Mänit miänaañ:

—Najtshixø'øw ja'a mhaxøøgcuhdujt hajxy; habaadáannäp jaduñ coo ja'a Dios ja'a miäjaa yajcähxø'øga'añ.

³ Ja'a Isaías, ja'a Diosmädia'agy jecy yajwá'xäbä, je'e hänajty jaduñ jecy tøø quiujaay: Jimä jäya'ay tu'ug yaaxwädity pactuum:

“Najtshixø'øw ja'a mhaxøøgcuhdujt hajxy, nebiä mwiindsón hajxy hoy mjøbhíxät; hoy hajxy jaduñ mwiingudsähgø'øwät.”

Ja'a Juan jaduñ nänøømä.

⁴ Ja'a Juan, camellopøjt hänajty wyithajpy; wajhac hänajty wiøønhajpy. Chu'chp mu'u hänajty je'e; yhuucypy cunaaxmøjtsiinnøø hänajty. ⁵ Majiäya'ay ja'a Juan hänajty ñämečhii. Jerusalén hajxy hänajty näje'e choñ. Näje'e hajxy hänajty chohmbä Judeanaaxooty møødä Jordánmøjnøøbaha. Yhamädoowhidáanäp ja'a Juan miädia'agy

hajxy hānajtj. ⁶ Mānitā piojpä quiädieey hajxy ñāgapxy. Mānitā hajxy jim̄ yajnābejtā ja'a Juárezm̄ maa ja'a Jordānm̄ojn̄ōjān.

⁷ Mānitā Juan yhijsy coo hānajtj ñāmečhii ja'a fariseoshajxy nām̄ay m̄ōōdā saduceoshajxy. Ja wi'li ñābetaamb̄ hajxy hānajtj je'ebā. Ja'a fariseoshajxy, hoy hajxy hānajtj jiaančh̄ teh̄m̄ quiudiuñ̄ ja'a Moisés miādia'agy. Ja'a saduceoshajxy, wiingā cuhdujt hajxy hānajtj miōōdā; cab hajxy hānajtj miāna'añ̄ coo hajxy jiuyp̄iōjtāgatsa'añ̄. Mānitā Juan miānaañ̄:

—Hay, m̄ojcu'u, caj mijts hoguiuhdujt mn̄ā'āgādā m̄ōōdā. Paady hajxy m̄ja wi'li ñābetaamb̄ nebiā Dios hajxy jaduhñ̄ xquia'a yajcumādōwāt, túhm̄āts. ⁸ Hoy hajxy mwādītāt neby hajxy jaduhñ̄ myajcāhxō'ōgāt coo ja'a mhaxōōgcuhdujt hajxy hānajtj tōō m̄jaančh̄ najtshixō'ōy. ⁹ Cab hajxy jaduhñ̄ mmānā'anāt: “Abrahāmhōch hijty nhaphajpy ndeedyhajpy, pād̄y hōch ja'a Dios jaduhñ̄ xquia'a yajcumādōwā'añ̄.” Mānitā Dios jaduhñ̄ xyajñāhwā'adsāt coo ja'a mhaxōōgcuhdujt hajxy mn̄ajtshixō'ōwāt, ca'a jie'eguiōxpā coo ja'a Abraham hajxy hijty mhaphaty m̄deedyhaty. ¹⁰ Pōñ̄ hoy ca'a wādijp, jaduhñ̄ māv̄iñāts je'e nebiā quepychaajān, ja'a ca'a tōōmhajpā. Piuxaam̄by hajxy je'e; m̄ānit hajxy ñō'oga'añ̄. Paady hajxy hoy mwādītāt nebiā Dios hajxy jaduhñ̄ xquia'a yajcumādōwāt. ¹¹ Tōyhajt mijts nyajnābety nōōhaam neby hajxy jaduhñ̄ myajcāhxō'ōgāt coo ja'a mhaxōōgcuhdujt hajxy tōō mn̄ajtshixō'ōy. Pero xii jāya'ay tu'ug jiaac miñ̄ hōxhaam; je'eds māv̄ōjñābā ja'a Dioshēsp̄iritu hajxy xm̄io'owaamb̄. Xyajñāhwa'ads xyajcuhwa'adsaamb̄ hajxy jaduhñ̄. Maas m̄ōcā cuhdujt je'e miōōdā quejeečh̄ hōōch. Cābōch cuhdujt nn̄ā'āgā m̄ōōdā ni weēñ̄tiā maa jaaya'aguiōxpān. ¹² Ja'a jāya'ayhajxy, coo ja'a trigo hajxy hānajtj tōō tiexy, tōgooty hajxy nōcxy piāda'agy. Pero ja'a trigohac, naax̄wiin je'e quia'ay. Jaduhñ̄ māv̄iñāts jāya'ayhajxy quia'awa'añ̄ haxōōgtuum, ja'a yhaxōōgcuhdujt hajxy ca'a najtshixō'ōwaamb̄. Cōjxta'axiōō hajxy jiiby chaāchpōga'añ̄.

¹³ Mānitā Jesús miejch maa ja'a Juan hānajtj miāyajnābetiān jim̄ maa ja'a Jordānm̄ojn̄ōjān. Galilea ja'a Jesús hānajtj tōō chooñ̄. Nābetaamb̄ hānajtj je'ebā. ¹⁴ Mānitā Juan ja'a Jesús ñāmaayy:

—Cab jaduhñ̄ yhahixō'ōy coočh̄ miičh̄ nyajnābētāt; maas hoy hijty jaduhñ̄ coočh̄ miičh̄ cu xyajnābejty.

¹⁵ Mānitā Jesús miānaañ̄:

—Hōōch̄ yajnābējtāc̄ neby jaduhñ̄ ngudiūunāmāt nebiaty ja'a Dios xyhanēhm̄ām.

Mānitā Juan jaduhñ̄ miānaañ̄:

—Ween nyajnābētāt.

¹⁶ Mānitā Jesús ñābejty. Mānit je'e tiō'ōdspādsōōmy. Mānitā tsajt yhawaach. Mānitā Jesús ja'a Dioshēsp̄iritu yhijsy coo hānajtj miānacy nebiā palomān, coo hoy yhāñāaguiāda'agy ja'a Jesús quiuhduum. ¹⁷ Mānitā Dios jim̄ quiapxy tsajpootyp:

—Hōōch̄ nHuung yō'ō. Njaančh̄ teh̄m̄ chōjpiōch̄ jaduhñ̄. Jaančh̄ teh̄m̄ jiootcūjc-hōch̄ nñijjāwō'ōyii ja'a nHuungcōxpōch̄.

4

¹ Mānitā Dioshēsp̄iritu ja'a Jesús wioonōcxy pactuum. Jim̄ā Jesús hānajtj jia wi'li ñāma'awa'añ̄ii ja'a m̄ojcu'ugóngām coo haxōōḡ jiatcō'ōwāt.

² Juxychāgui'xxōō ja'a Jesús hānajtj jim̄ tōō yhity jaguiay. Ni xōōm ni coods hānajtj tōō quia'a cay. Mānit yāho'pōjcā. ³ Mānitā Jesús ñāmejtsā ja'a m̄ojcu'ugóngām. Ja wi'li yagjatcō'ōwāanāp̄ ja'a Jesús hānajtj haxōōḡ. Mānitā m̄ojcu'ugong miānaañ̄:

—Pō miičh̄ ja'a Dios tōyhajt xyHuunghajp, nāma'aw yō'ō tsaā coo ween chaj-caagyquiojy.

⁴ Mānitā Jesús yhadsooyy:

—Jaduhñ̄ ja'a Diosmādia'agy miāna'añ̄: “Ca'a quiaaguiāhajtīā ja'a jāya'ayhajxy miād-sānaaby hādaa yaabā naax̄wiin; m̄ōōdā Diosmādia'agy hajxy miādsāna'ay.”

⁵ Mānitā m̄ojcu'ugong ja'a Jesús wioonōcxy jim̄ Jerusalén. Ja'a Dioscajpt je'e jim̄. Mānitā Jesús miōōdwiimbejtā ja'a m̄ojtsajtōjcuhduum. ⁶ Mānit ñāmaayyā:

—Pø miičh ja'a Dios tøyhajt xyHuunghajp, cuhdøpxna_x jii. Caj miičh nej mjádät. Jaduh_n ja'a Diosmädia'agy miäna'añ:

Ja'a Dios ja'a mioonsä hane'emaamb, ja'a hajxy jim tsajpootypä coo miičh xcwieendähädät.

Xcheh_nhidaamb miičh hajxy nej miičh tsaajooty jaduh_n mga'a cuhnébät.

⁷ Mänitä Jesús yhadsooyy:

—Pero nøm ja'a Diosmädia'agy miänaambä: “Cabä Dios ja'a mWiindsøn mjøj-capxó'owät.”

⁸ Mänitä møjcu'ugong ja'a Jesús wioonócxcumbä maa ja'a tunän, ja'a jaančh teh_m quiøxpä. Mänitä Jesús yajnahixøoyy ja'a naax ja'a cajpt cøxiä hädaa yaabä naaxwiin, coo ja'a jäya'ayhajxy miøjjä jiaančhä. ⁹ Mänitä Jesús ñämaayyä:

—Høøch nje'e yø'øduh_n cøxiä mäduh_ntiä jii quiähxø'ogy. Cooch miičh jijna'a xwyiingudsähgø'owät, mänitäs yø'ø ngøxy mó'owät.

¹⁰ Mänitä Jesús yhadsooyy:

—Jäwa'ads miičh jim, møjcu'u. Jaduh_n ja'a Diosmädia'agy miäna'añ: “Dios hajxy mwiingudsähgø'owäp, ja'a hajxy mWiindsøn_nhajpiä. Cab jaduh_n wiingpä mwiingud-sähgø'owät.”

¹¹ Mänitä møjcu'ugong wyiimbijnä; nidiuh_m ja'a Jesús miähmøoyy. Mänitä Jesús ñägädaacä ja'a Dios mióonsäm ja'a tsajpootypä. Mänitä je'e piuhbejtä.

¹² Coo ja'a Jesús miädoyhajty coo ja'a Juan hänajty tøø chumyii, mänitä jim ñøcxy Galileanaaxooty. ¹³ Mänitä Jesús jim ñaxøoyy maa ja'a Nazaretcajptän, pero cab jim miähmøoyy. Mänitä jim chänaadiaacpøjcy maa ja'a cajpt jaduh_n xiøhatiän Capernaum. Jimäts je'e Galileamejypia'a maa ja'a Zabulón yhap yhoc-hajxy chäna'ayän. Jimä Neftalí ja'a yhap yhoc-hajxy chänaabiä. ¹⁴ Coo Ja'a Jesús jim chänaadiaacpøjcy Capernaum, tøjiajt ja'a Diosmädia'agy jaduh_n nebiä Isaías hänajty jecy tøø quiujaayän, ja'a Diosmädia'agy jecy yajwá'xäbä:

¹⁵ Ja'a naax maa ja'a Zabulón yhap yhoc-hajxy chäna'ayän, maa ja'a Neftalí yhap yhoc-hajxy chänaabiän,

jimä tu'u ñaxø'øy mejypia'a, jim Galilea, jim maa ja'a ca'a judíoshajxy chäna'ayän.

¹⁶ Ja'a jäya'ayhajxy hijty haxøøgwädijpä, tøø ja'a piojpä quiädieey hajxy yajnahwáatsäxä. Ja'a jäya'ayhajxy hijty haxøøgwädijpä, tøø ja'a piojpä quiädieey hajxy yajnahwáatsäxäbä.

¹⁷ Mänitä Jesús tiägøoyy yajwiingapxøobiä ja'a Diosmädia'agy. Mänitä miänaañ:

—Najtshixø'ow ja'a mhaxøøgcuhdujt hajxy. Habaadäännäp jaduh_n coo ja'a Dios ja'a miäjaa yajcähxø'oga'añ.

¹⁸ Jimä Jesús hänajty miejypia'ayo'oy maa ja'a Galileamejjiän. Mänitä jäya'ay metsc yhijxy, ja'a Simón, ja'a xøhajpä Pedro, møødä piuhya'ay Andrés. Hacxmats hajxy hänajty tiuunghajpy. Jimä yhacxjoh_md hajxy hänajty miejypiäda'aga'añ. ¹⁹ Mänitä Simónhajxy ñämaayyä ja'a Jesúsäm:

—Jam hajxy wädijtäm. Jue'e mijts mduunghajpy, hacxmats; wiingtuung mijts nmo'owaamby. Nyajnahixø'owaamby mijts nebiä jäya'ay hajxy myajwiingapxø'owät ja'a Diosmädia'agy.

²⁰ Tuunä je'eduh_n ñä'ä mänaañ, mänitiä ja'a yhacxjoh_md hajxy ñajtswidsooyy; mänitä ja'a Jesús hajxy piadu'ubøjcy.

²¹ Mänitä Jesús jiaag hädaacy mejypia'a. Mänitä Zebedeo yhijxy møødä yhuunghajxy, ja'a Jacobo møødä Juan. Jiiby hajxy hänajty yhäna'ay barcojooty. Yhacxjoh_md hajxy hänajty yhaxodsøby. Mänitä Jesús ja'a Jacobo miøjyaaxy møødä Juan. ²² Tuunä hajxy jaduh_n ñä'ä mädooyy, mänitiä hajxy piädsøomy barcojooty; mänitä ja'a Jesús hajxy piadu'ubøjcy; yajmähmøoyy ja'a tieedy hajxy jiiby barcojooty.

²³ Mänitä Jesús tiägøoyy wädijpä cajpt-cajpt jim Galilea. Mädia'agy-yajwa'xpä jaduh_n wiädijty coo ja'a Dios ja'a miäjaa yajcähxø'oga'añ. Homiädyyii cajptä hänajty ñøcxy, jiiby hänajty yajnahixø'øy maa ja'a judíos chajtøjc-hajxiän. May ja'a jäya'ay yajmøcpøjcy.

Homiädyii pa'amä jaduñ yajnajxy. ²⁴ Mänitä mädia'agy jaduñ wiädiyty ja'a Jesúscøxpä jim maa jaduñ xiøhatiän Siria. Mänitä pa'amjäya'ayhajxy yajmejtsä maa ja'a Jesúsän, pønjaty ja'a møjcu'u møød, møød pønjaty ja'a pojpa'am møød. Mänitä Jesús ja'a pa'amjäya'ay quiøxy yajmøcpøjcy. ²⁵ Mänitä Jesús piadu'ubøjcä ja'a majiäya'ay. Jim Galilea hajxy hänajty näje'e chooñ. Näje'e hajxy hänajty chooñ maa ja'a majc-hagajptän, näje'e Jerusalén, møødä Judea møødä Jordánmøjnøø'awiimb.

5

¹ Coo ja'a Jesús ja'a majiäya'ay yhijxy, mänit ñøcxy tunguhduum. Mänit yhøxtaacy naaxwiin. Mänit ñämejtsä ja'a jiamiødhajxy. ² Mänit tiägøøyy yajnähiøøbiä. Mänit miänaañ:

³ —Jootcujc hajxy jaduñ yhida'añ pønjaty jaduñ yajpejxp. Paady hajxy jootcujc yhida'añ, coo hajxy jim ñøcxa'añ maa ja'a Diosän.

⁴ Jootcujc hajxy jaduñ yhida'añ pønjaty jootmayhajp. Paady hajxy jootcujc yhida'añ, coo ja'a Dios hajxy quiapxmøcpøga'añijäm.

⁵ Jootcujc hajxy jaduñ yhida'añ pønjaty mee'xxieemy hidaamb. Paady hajxy jootcujc yhida'añ, coo ja'a Dios hajxy mio'owa'añijäm nebiaty ja'a Dios tøø yajwiinwaanø'øy.

⁶ Jootcujc hajxy jaduñ yhida'añ pønjaty ja'a jioot tsojp coo hajxy hoy quiudiünät. Puhbedaanäp hajxy jaduñ Diósäm.

⁷ Jootcujc hajxy jaduñ yhida'añ pønjaty hojioot møød. Paady hajxy jootcujc yhida'añ, coo ja'a Dios hajxy ñäxuudsa'añijäm.

⁸ Jootcujc hajxy jaduñ yhida'añ pønjaty haxøøgwiinmahñdy ca'a møød. Paady hajxy jootcujc yhida'añ, coo ja'a Dios hajxy yhixa'añ.

⁹ Jootcujc hajxy jaduñ yhida'añ pønjaty capxcuhgådaacp maa ja'a tsip piädø'øguiän. Paady hajxy jootcujc yhida'añ, coo ja'a Dios hajxy yhuunghada'añijäm.

¹⁰ Tsaächpøjp ja'a jäya'ayhajxy näje'e coo hoguiuhdujt hajxy miøødä; pero jootcujc hajxy jaduñ yhida'añ. Paady hajxy jootcujc yhida'añ, coo hajxy jim ñøcxa'añ maa ja'a Diosän.

¹¹ Jootcujc hajxy mhida'añ, hoy ja'a jäya'ayhajxy hänajty xjia nämä'ay haxøøg, hoy ja'a jäya'ayhajxy hänajty xjia tuna'añ haxøøg, hoy ja'a jäya'ayhajxy hänajty xjia nähøønø'øwa'añ hoñejpiä ja'a høøchcøxpä.

¹² Jaanä jaduñ hajxy jecy tøø chaächpøjpä, ja'a Diosmädia'agy hajxy jecy yajwá'xäbä. Pero xoonäda'ag hajxy, jootcugø'øw hajxy; jimä hoybä weenbä hajxy mjaançh tehñ piada'añ jim tsajpootyp.

¹³ Ja'a caan, coo ja'a tiaamdspä tiägøyyät, cab jaduñ mänaa tiaamdsøñät. Tøø jaduñ mia'ady. Mänitä jäya'ayhajxy yhøxwøjy, mänit hajxy yajteeni. Jaduñ mäwíinäts mijts nebiä caanän hädaa yaabä naaxwiin; coo ja'a Diosmädia'agy hajxy mnajtshixø'øwät, mmá'adäp hajxy jaduñ.

¹⁴⁻¹⁶ Ja'a cajpt, ja'a tunguhduum hijpä, caj mänaa yhiixtägoyyii. Y coo ja'a cera hajxy ño'ogy, cab hajxy jaduñ ñähjujpety cachpa'c. Caj pues. Jiiby hajxy jaduñ piäda'agy cøxp maa ja'a ceratoyøhñdiän, nebiä jäya'ayhajxy nägøxiä quiudøø'xøjät jiiby tøgooty. Jaduñ mäwíinäts mijts, hoy hajxy mwädítät nebiä jäya'ay hajxy jaduñ xyhíxät coo hajxy hänajty hoy mwädity. Mänitä jäya'ayhajxy wyiingudsähgø'øwät ja'a nDeedyhájtäm jim tsajpootyp.

¹⁷ Páadyhøch yaa tøø nmiñ tøø nmech hädaa yaabä naaxwiin nébiøch mijts jaduñ nyajnähiøø'øwät nebiä Diosmädia'agy hajxy hamuumdu'joot mgudiünät, ja'a Moisés jecy quiujáhyyabä, ja'a Diosmoonsähajxy yajwá'xäbä, ja'a hajxy hädaa yaabä naaxwiimbä. Cábøchä Diosmädia'agy nyajcuhdägoyya'añ. Cab hajxy jaduñ mmáná'anät cooch nyajcuhdägoyya'añ. ¹⁸ Tøyhájtøch mijts nnäma'ay, mäduhñtiä ja'a tsajtwiing miähmø'øwa'añ, mäduhñtiä hädaa yaabä naaxwiin miähmø'øwa'añ, cabä Diosmädia'agy quiuhdägoyya'añ, ni weeñtiä, ni tu'lí'xytiädä, høxtä coonä hänajty tøø quiøxy habejnä.

¹⁹ Pønjaty ja'a Diosmädia'agy jaduñ cudiumb, pønjaty ja'a wiinghäna'c jaduñ yajnähiøøby coo hajxy quiudiüumbät, je'eds hajxy møj jaançh päda'agáanäp coo ja'a Dios

ja'a miäjaa yajcähxø'øga'añ. Pero pøn̄jaty ja'a Diosmädia'agy ni weeñtiä ca'a cudiuumb, pøn̄jaty ja'a wiinghäna'c yajnahixøøby coo hajxy quia'a cudiünät, cab hajxy je'e mõj jaančh piäda'aga'añii coo ja'a Dios ja'a miäjaa yajcähxø'øga'añ. ²⁰ Mijts høch jaduhñ nnämaaby, cabä ley-yajnahixøøbiädøjc-hajxy hoy wiädity ni ja'a fariseodøjc-hajxy. Coo mijts maas hoy mwädítät, mäniit hajxy jim̄ mnócxät cøxp maa ja'a Diosän. Pø cab hajxy hoy mwädita'añ, cab hajxy jim̄ mnócxät.

²¹ 'Tøø hajxy mmädoyhaty nebiä mhap mdeedyhajxy hijty jecy miäna'añän: "Ca'a hajxy mjäya'ay-yagho'ogy coo ja'a cuduung hajxy xyajcumädówät." ²² Pero høøch mijts nnämaaby, pøn̄ ja'a miäjøøn miädøjc mäjootma'p, je'eds cumädowaamb maa ja'a cuduungän. Pøn̄ ja'a miäjøøn miädøjc nähwaambejp, je'eds cumädowaamb maa ja'a gobiernän. Pøn̄ ja'a miäjøøn miädøjc nämaaby coo je'e quiuhmañø'oy, je'eds jiiby ca'awaamb haxøøgtuum, maa ja'a jøøn mänaa quia'a pi'ichän.

²³ 'Entonces, coo hajxy hänajty tii mänaa myoxa'añ jiiby tsajtøgooty maa ja'a altarän, y coo hajxy mäniit mjahmiédsät coo ja'a mmäjøøn mmädøjc hajxy hänajty tøø xmiädsi-bø'oy hotyiguioxpä, ²⁴ jim̄ hajxy mnajtsconó'owät altarwiinduum, tijaty hajxy hänajty myoxaamby. Mäniit hajxy jim̄ mnócxät maa ja'a mmäjøønän maa ja'a mmädøjcän, neby hajxy jaduhñ myajtødiägó'owät. Mäniit hajxy mwiimbídät. Mäniit hajxy mnøcxtägátsät maa ja'a altarän. Mäniit hajxy myóxnät.

²⁵ 'Coo pøn̄ hänajty mänaa xñäxø'owø'owa'añ maa ja'a cuduungän, jayøjp myajtødiägó'owät tu'haamnøcxpä. Coo jim̄ mga'a yajtødiägó'owät tu'haamnøcxpä, mäniit hajxy xyajmédsät cuduungwiinduum. Mäniit cuduung xyajcø'ødägó'owät ja'a policia-hajxy. Mäniit hajxy xchúmat. ²⁶ Jiiby jaduhñ mmähmø'owät pujxtøgooty. Cab jaduhñ mdsoj pädsómät. Mäniit jaduhñ mbädsómät coo hänajty pedyii tøø mniyhøxjuubiädsomyii. Tøyhajt jaduhñ.

²⁷ 'Tøø hajxy mmädoyhaty coo jäya'ayhajxy hijty jegyhajty miäna'añ coo hajxy mga'a tu'udägóyyät. ²⁸ Pero høøch mijts jaduhñ nnämaaby, coo pøn̄ wiingto'oxiøjc mänaa yhadsoy, nä'ägädä tu'udägooby je'eduhñ.

²⁹⁻³⁰ 'Coo tii hoyhadsojnä mhíxät, cab jim̄ mmøjhée'pnät ni mga'a nähdónät. Jaduhñ mnibiäda'agóøjat nebiä wiindspän nebiä cøøducpä. Pø caj, jiiby hajxy mga'awa'añ haxøøgtuum.

³¹ 'Jaduhñä jäya'ayhajxy hijty jegyhajty miänaambä: "Coo pøn̄ ja'a tio'oxiøjc mänaa yhøxmádsät, mäniit haguipøjnocy quiøø'tsnät." ³² Pero høøch mijts jaduhñ nnämaaby, coo pøn̄ tio'oxiøjc mänaa yhøxmádsät, y cabä tio'oxiøjc hänajty nej tøø jiatcø'oy, coo ja'a to'oxiøjc wiingya'adiøjc jøjpøgó'owät, pues tu'udägóyyäp ja'a to'oxiøjc jaduhñ. Ja'a ya'adiøjc, ja'a hänajty jawyiin tøøbä yhøxmáchäbä, je'edsä pojpa møød. Y ja'a ya'adiøjc tøø jiaac jøjpøgó'oyäbä, jaanä tu'udägooby je'ebä.

³³ 'Jaduhñä jecyjiäya'ayhajxy hijty ñäma'ayii: "Pø tøø ja'a Dios hajxy mnäma'ay hamuumdu'joot coo hajxy hotyijä mgudiuna'añ, tsipcøxp hajxy jaduhñ mgudiünät." ³⁴⁻³⁶ Pero høøch mijts nnämaaby coo hajxy tii mga'a yajwiinwaanø'owät nä'ä nägoobä. Coo hajxy hänajty tii myajwiinwaanø'owa'añ, cabä tsajpootypä hajxy mgapxpáadät, ni ja'a naaxwiimbä, ni ja'a Jerusalén, ni ja'a mgopc-hajxy. Hix, paadiä tsajpootypä hajxy mga'a capxpáadät je'eguiøxpä coo ja'a Dios jim̄ yhäña'ay. Møød hädaa yaabä naaxwiin hajxy mga'a capxpáatpät je'eguiøxpä coo ja'a Dios yajtánaabiety. Møødä Jerusalén hajxy mga'a capxpáatpät je'eguiøxpä coo je'e Dyioscajptä. Møødä mhamdsoo copc hajxy mga'a capxpáatpät je'eguiøxpä coo ja'a mguhwaay hajxy hoy mga'a yajpó'owät, ni hajxy hoy mga'a yagjiñó'owät. ³⁷ Jaduhyyä hajxy mmáná'anät pø tøyhajt, pø caj. Coo hajxy waamb mjaac mäná'anät, ja'a mõjcu'ugong hajxy jaduhñ xyajmänaamb.

³⁸ 'Tøø hajxy hijty mmädoyhaty nebiä jäya'ayhajxy hijty jegyhajty miäna'añ: "Coo pøn̄ cøxypänejpä xñä'ä tünät, myaghawiimbídäp jaduhñ." ³⁹ Pero høøch mijts nnämaaby: cab jaduhñ myaghawiimbídät; coo pøn̄ xyhala'pø'ogät tu'nax, mjaac yégäp jaduhñ ja'a tu'naxpä, ween xjiaac hala'pø'ogy. ⁴⁰ Coo pøn̄ mänaa xñäxø'owø'owät, coo ja'a mgamiixy hänajty xpiøgaanä, myégäp jaduhñ møødä mnähgäjén. ⁴¹ Coo pøn̄ hänajty tii

xyajtsømnøcxa'añ tu'kilómetro hadsip, mejtskilómetro mnä'ägä tsømnøcxät. ⁴² Coo pøn hänajty tii xmiäyujwa'ana'añ, mmó'owäp jaduhñ. Tsipcøxp jaduhñ hotyijä mmó'owät.

⁴³ Tøø hajxy hijty mmädoyhajpä nebiä jäya'ayhajxy hijty jegyhajty miänaambä: "Hoy ja'a mmägu'ughajpä mdsoc mba'häyówät; pero ja'a mmädsip, mmähänhädäp je'e."

⁴⁴ Pero høøch mijts nnämaaby: ca'a mmähänhaty pønjaty jaduhñ xmiädsiphajp. Hoy hajxy mnänómät pønjaty haxøøg xñänøømb. Mnäxúudsäp hajxy pønjaty xmiähänhajp. Mänuu'xta'ag ja'a Dios hajxy coo ween mio'oy ja'a hoyhajt ja'a weenhajt pønjaty xwyiinwohm̄b xyhawohm̄b, pønjaty xyhäyoowhijxp. ⁴⁵ Jaduhñä Dios hajxy hoy xyhuunghädät, ja'a jim̄ hijpä tsajpootyp. Jaayá'ayäts jaduhñ yajxøøhaamb maa ja'a jäya'ay hoybän chaads jim̄ maa ja'a jäya'ay ca'awiindøybän. Jaayá'ayäts jaduhñ yajtuub maa ja'a jäya'ay hoybän chaads jim̄ maa ja'a jäya'ay ca'awiindøybän. ⁴⁶ Cab hajxy tii mbáadät nä'ä tægø'øbä coo ja'a mmägu'ughajpähajtii mmøødnijootpaadóøjät. Høxtä ja'a yajnähju-udiuutpäðøjc-hajxy niçhojc nibia'häyóowäp. Pero coo ja'a mmädsip hajxy mmée'xät, mänitä Dios hajxy xyhuunghädät. ⁴⁷ Cab jaduhñ ñejpiä coo ja'a mmägu'ughajpä hajxy mmøødnijootpaadyii. Hopiønä ñijootpaadyii, hoy ja'a Diosmädia'agy hajxy quia'a ja mabøcy. Pero coo ja'a mmädsip hajxy mmée'xät, hoy hajxy mgudiuñ. ⁴⁸ Ja'a nDeedyhajtäm, ja'a jim̄ tsajpootypä, jaançh tehñ ñä'ägä hoy je'eduhñ yhity. Hoy hajxy jaduhñ mbahjxpät.

6

¹ 'Näje'e ja'a jäya'ayhajxy jia wi'i yajcumaya'añ, paady hajxy jaduhñ ñibiäda'agyii nebiä hojiäya'ayän. Pero cab jaduhñ yhooyä coo hajxy jaduhñ yajcumáyät. Cab hajxy jaduhñ mbahix̄ mbadúnät. Coo hajxy jaduhñ mbahix̄ mbadúnät, cabä Dios hajxy xyhuunghädät, ja'a jim̄ tsajpootypä. ² Jii jäya'ayhajxy näje'ebä, coo ja'a häyoobäya'ay ja'a xädø'øñ hajxy hänajty tøø mio'oy, mänit hajxy tiägø'oy mädiaacpä jiiby tsajtøgooty møøð jim̄ tu'haam. Paady hajxy jaduhñ miädia'agy, yajcumayaamb hajxy jaduhñ maa ja'a cu'ugän. Pero cabä Dios hajxy jaduhñ quiumayíjäm, je'eguiøxpä coo hajxy hänajty jim̄ tøø yajcumay maa ja'a cu'ugän. ³ Pero mijts, coo ja'a häyoobäya'ay xädø'øñ hajxy hänajty tøø mmo'oy, cab hajxy waamb mmäná'anät. Ni pøn hajxy mga'a hawáanät, ni ja'a mmägu'ughajpähajxy. ⁴ Hamee'ch ja'a xädø'øñ hajxy jaduhñ myégät. Dios hajxy jaduhñ xyhix̄äp; mänit hajxy jaduhñ xyhuunghädät.

⁵⁻⁶ 'Jii jäya'ayhajxy näje'ebä, täna'a ja'a Dios hajxy naxy pia'ya'axy jiiby tsajtøgooty møøð jim̄ maa ja'a tu'uxeñän. Pero cabä Dios hajxy tu'joot pia'ya'axy. Nä'ä yajcumayaamb hajxy jaduhñ maa ja'a cu'ugän. Pero cabä Dios hajxy jaduhñ quiumaya'añíjäm. Tøyhajt jaduhñ. Pero mijts, hamee'ch ja'a Dios hajxy mba'yá'axät. Xyhix̄äp xmiädówäp hajxy je'eduhñ; mänit hajxy xyhuunghädät.

⁷⁻⁸ 'Ja'a jäya'ay ja'a Diosmädia'agy hajxy ca'a mabøjpä, cab hajxy ñajuø'oy waambaty ja'a Dios hajxy jia pa'ya'axy. Ja capxp hajxy jaduhñ ja naañ ja tsojc. Paady hajxy jaduhñ jia capxy cooc tyijy ja'a Dios hajxy jaduhñ miädowa'añíjäm. Pero mijts, cab hajxy jaduhñ mbahix̄ mbadúnät. Hix̄, jäguemiä ja'a Dios ñajuø'oy tijaty hajxy hänajty myajmaajijpy. ⁹ Jaduhñä Dios hajxy mba'yá'axät:

Teedy, jim̄ miiçh mdsäna'ay tsajpootyp;

ween miiçh ja'a cu'ughajxy xwyiingudsähgø'oy.

¹⁰ Ween ja'a mmäjaa miñ yaa myajcähxø'ogy hädaa yaabä naaxwiin.

Ween ja'a jäya'ay ja'a mmädia'agy hajxy yaa xquiudiuunä hädaa yaabä naaxwiin, neby jim̄ xquiudiuunän tsajpootyp.

¹¹ Højts ja'a caayyøøc huucøøc móoyyác jabom-jabom.

¹² Højts ja'a nbojpä ngädieey méé'xác neby højts tøø nmämee'xiän ja'a højts tøø xñägädieeyø'yäbä.

¹³ Ca'a højts xyajcädieey; pero pädáacác højts hodiium neby højts jaduhñ nga'a cädieeyät.

Miiçh hanehm̄b; miiçh ja'a mäjaa mmøøð; miiçh møj jaançh homiänaajä. Amén.

¹⁴ 'Coo mijts jaduñ mmámée'xät ja'a hajxy tøø xñägädieeyø'öyäbä, mänitä Dios hajxy jaduñ xmiée'xpät, ja'a nDeedyhájtäm ja'a jim tsánaabiä tsajpootyp. ¹⁵ Pero coo wiinghäna'c hajxy jaduñ mga'a mämée'xät, cabä Dios ja'a mbojpa mgädieey hajxy jaduñ xmiée'xät.

¹⁶ 'Jii jäya'ayhajxy näje'e, coo hajxy hänäjty yhayuuhada'añ, jaduñ hajxy ñibiä-da'agyii nebiä jootmayhajpän. Paady hajxy jaduñ ñibiäda'agyii, jaduñ hajxy quiähxø'oga'añ jäya'awyiinduum coo hajxy hänäjty yhayuuhaty. Tøyháthøch mijts nnäma'ay, cab hajxy jaduñ tii piaada'añ. ¹⁷ Pero mijts, cab hajxy jaduñ mnibiä-da'agøøjät nebiä jootmayhajpän. Coo hajxy hänäjty mhayuuhada'añ, yajxon hajxy mniyhonøøjät mniwyiimbujøøjät. ¹⁸ Jaduñ hajxy mga'a yajcähxø'øgät maa ja'a cu'ugän pø mhayuuhajp hajxy hänäjty. Hamee'ch ja'a Dios hajxy jaduñ xyhíxät, ja'a ca'a cähxø'pä. Jaaya'ay hajxy jaduñ xmiø'owaamb ja'a hoyhajt ja'a weenhajt.

¹⁹ 'Cabä mjoot hajxy yaa mbädá'agät tijaty yaabä naaxwiin. Haagä ma'adaamb jaduñ cøxiä mäduhñtiä hädaa yaabä naaxwiin. Y jaançh tehñ wiädijp ja'a mee'tspähajxy. ²⁰ Pero jaduñ hajxy mwiinmahñdyhädät neby hajxy hoy mwädítät. Jaduñ hajxy jootcujc mhídät jim tsajpootyp; caj pøn jim xyagjootmayhädät. ²¹ Pøn jaduñ ja wi'i miäyøøhadaamb hädaa yaabä naaxwiin, jimä jioot hajxy jaduñ piäda'agy maa ja'a xädø'øñän. Pero pøn hoy wäditaamb, jimä jioot jaduñ piäda'agy maa ja'a Diosän.

²² 'Pø mmøødä howyiinmahñdy hajxy, mänit hajxy hoy mwädítät nebiä Dios choquiän. ²³ Pero pø cabä mwiinmahñdyhajxy yhooyä, cab hajxy hoy mwädítät nebiä Dios jia tsoquiän.

²⁴ 'Cabä wiindsøn hoy metsc mmøødtúnät. Mxøøghadaamb by tu'ug; jatu'ugpä jaduñ mdsogaamb by. Hoy ja'a miädia'agy jaduñ mgudiunaanä. Jaanä jaduñduhmbä, coo ja'a mjoot mbädá'agät maa ja'a xädø'øñän, cabä Dios jaduñ hoy mwiingudsähgø'owät.

²⁵ 'Jadúhñäts mijts nnäma'ay, ca'a hajxy mwi'i tiajy mwi'i miay tijaty hajxy mnäjyghädäp, tii hajxy mwithädäp. Maas tsoobaatp ja'a juyhajt jaduñ quejee ja'a cay, y maas tsoobaatp ja'a ni'x jaduñ quejee ja'a wit. ²⁶ Høxtahmdsä muuxyhajxy, cab hajxy ñi'iby tiuñ, cab hajxy tii piäda'agy tsehxyooty. Pero ja'a nDeedyhájtäm ja'a jim tsajpootypä, je'eds jaduñ yagjøø'xp yajpøjp. Y mmaas tsoobaatp mijts quejee ja'a muuxyhajxy. ²⁷ Ni pøn jaduñ hamdsoo quia'a yajnijiugyhadøøjät.

²⁸ 'Cabä wit hajxy mnädaj mnämáyät. Høxtahmdsä pøjy hujts, cab tii tiuñ. ²⁹ Pero maas yajxon je'e quejee ja'a rey Salomón hijty; jaançh tehñ yajxon ja'a Salomón hijty jegyhajty ñibiäda'agyii. ³⁰ Ja'a pøjy hujts, yajxon ja'a Dios jaduñ tøø quiunuu'xy. Y häyaa jaboom hajxy jaduñ ño'oga'añ. Y mijts, xmiaas cunuu'xaamb mijts ja'a Dios, hoy hajxy mga'a ja mæbøcy. ³¹ Ca'ads hajxy mdajy mmay; ca'a hajxy mwi'i miäna'añ: "Tii ngäayyamb, tii nhúucämb, tii mwithájtämb." ³² Yø'øduhmbä hajxy yhøxtaaby ja'a Dios hajxy ca'a wiingudsähgøøbiä. Pero ja'a nDeedyhájtäm jim tsajpootypä, ñajuøøby je'eduhñ coo mijts myajmaajiaty. ³³ Mhøxtá'awäp hajxy jayøjp neby hajxy hoy mwädítät, neby hajxy jaduñ jim mnøcxät maa ja'a Diosän. Jaduñä Dios chocy. Mänit hajxy jaduñ cøxiä xmió'owät. ³⁴ Ca'a hajxy mwi'i tiajy mwi'i miay ja'a jaboomgøxpä; ween hamdsoo yhuuc habaady. Mädyöyä ja'a tsaächpä hajxy xpiaada'añ ja'a jäda'agøxpä.

7

¹ 'Cabä wiinghäna'c hajxy mnähójät, coo ja'a Dios hajxy jaduñ xñä'a yajcumädówät. ² Jaduñ hajxy xyajcumädówät nej mijts wiinghäna'c hänäjty tøø mnähøjjiän. ³⁻⁴ Coo ja'a mmägu'ughajpä weeñtiä quiädieéyät, y coo miich hänäjty maas hanaxiä tøø mgädieey, cab jaduñ yhawiinmatsä coo ja'a mmägu'ughajpä waamb mnämá'awät. ⁵ Mänitä mmägu'ughajpä jaduñ hawiinmats mwiingapx mjøjcaxø'owät, coo miich hänäjty tøø myajniñähwa'açhii.

⁶ 'Cabä jäya'ay hajxy hadsip mnämá'awät coo ja'a Diosmädia'agy hajxy miäböğät. Pø cab hajxy jaduñ miädowa'añ, ca'a hajxy hadsijpc mduñ, coo hajxy jaduñ nä'a jootmá'adät.

⁷⁻⁸ 'Coo ja'a Dios hajxy tii mmäyujwá'anät, mänit hajxy jaduhñ xmió'owät; coo hajxy mmänuu'xtá'agät, mänit hajxy jaduhñ xpiuhbédät.

⁹ 'Coo ja'a mhuung ja'a tsajcaagy xmiäyujwa'añ, je'eds jaduhñ mmooby, túhmäts. Cabä tsaa mmo'oy. ¹⁰ Y coo hacx jaduhñ xmiäyujwa'añ, je'eds jaduhñ mmooby, túhmäts. Cabä tsahñdy mmo'oy. ¹¹ Hoorä, je'edsä mhuung hajxy mmooby ja'a hoybä, hoy mijts mja haxøøgjäya'ayä. Pero ja'a nDeedyhájtäm jim tsajpootypä, hojiäya'ay je'e. Xmio'owaamb ja'a hoyhajt hajxy jaduhñ coo hajxy mmäyujwá'anät.

¹² 'Jaduhñäts mijts ja'a jäya'ayhajxy mnäxúu'tspät nej mijts myajnäxuudsä'añän. Jaduhñä Moisés jecy miänaañ coo hajxy ngudiúunämät. Jaduhñ hajxy jecy miänaambä, ja'a Diosmädia'agy hajxy jecy yajwá'xäbä.

¹³⁻¹⁴ 'Hamäjaa jim mnöcxät Dioswiinduum. Jaduhñ mäwínäts jim nebiä xu'udstu'ujän; cab hajxy jaduhñ nämay piaady. Pero coo jiiby mhädá'agät haxøøgtuum, cab jaduhñ yhamäjaajä. Jaduhñ mäwínäts je'e nebiä möjtu'ujän; nämay hajxy jiiby yhäda'agy.

¹⁵ 'Mnigwieendähadóøjöp hajxy maa ja'a jäya'ayhajxy tyijy Diosqueypän. Nä'ä hõhndaacp hajxy jaduhñ. Jaduhñ hajxy ñibiäda'agyii nebiä mäbõjpän, pero cab hajxy tiehm miäböcy; jaanč tehñ quia'awiindøy hajxy jaduhñ. ¹⁶ Haxøøg hajxy jiatcø'øy; jaduhñ hajxy mhøxcábät coo haxøøgwiinmahñdy hajxy miøødä. Jaduhñ mäwínäts hajxy je'e nebiä hujts nebiä haptiän. Ja'a wädsats, cab jaduhñ tiøømhaty nebiä tsaatypän. Ja'a hapy, cab jaduhñ tiøømhaty nebiä piidsän. ¹⁷⁻¹⁸ Mädyii quepychaa hoy, hoy tiøømhaty; mädyii ca'a hoy, cab hoy tiøømhaty. ¹⁹ Mädyii quepychaa jaduhñ hoy ca'a tømhapj, piujxyp hajxy jaduhñ; mänit hajxy ño'ogy. ²⁰ Ja'a jäya'ayhajxy haxøøg jatcøøbiä, jaduhñ mäwínäts hajxy je'e nebiä quepychaa hoy ca'a tømhapjän. Jaduhñ hajxy mhøxcábät coo haxøøgwiinmahñdy hajxy miøødä.

²¹ 'Nämäyhøch ja'a jäya'ayhajxy xjia nämä'ay: "Wiindsón." Pero cab hajxy nägøxiä jim tiägø'øwa'añ Dioswiinduum jim tsajpootyp. Pønjátyhøch ja'a nDeedy ja'a miädia'agy xquiudiúunäp, je'eds jim tægø'øwaamb. ²² Coo ja'a naaxwiimbä hänajty wyiimbida'añ, mänitøch hajxy nämay xjia nämä'awa'añ: "Wiindsón, tøø hõjts ja'a Diosmädia'agy nyajwa'xy ja'a miič mmäjaagøxpä; tøø hõjts ja'a möjcu'u ngøxy yajpäyø'ogy ja'a miič mmäjaagøxpä; tøø hõjts ja'a hoy-yagjuøøñäjatypä may nyajcähxø'ogy ja'a miič mmäjaagøxpä." ²³ Mänitøch hajxy nnämä'awa'añ: "Cábøch mijts mänaa tøø nhixyhaty. Jua'ads hajxy jim; haxøøg ja'a mwiinmahñdyhajxy jaduhñ."

²⁴ 'Põnhøch nmädia'agy xmiädóowäp, coo jaduhñ quiudiúnät nébiøch nhane'emiän, jaduhñ mäwínäts je'e nebiä jäya'ay ja'a tiøjc tøø quiojjiän tsaawiing. ²⁵ Mänit com tiuuyy. Mänitä möjnøø quiomgådaacy. Mänitä tøjc møc miøjpojpejty. Pero cabä tøjc ñä'a jity, je'eguiøxpä coo tsaawiing quiojjiä. ²⁶ Pero põnhøch nmädia'agy tøø xquia'a cudiuunä nébiøch nhane'emiän, jaduhñ mäwínäts je'e nebiä jäya'ay ca'a jajpän. Jiibiä tiøjc quiojy tsabiu'ujooty. ²⁷ Mänit com tiuuyy. Mänitä möjnøø quiomgådaacy. Mänitä tøjc miøjpojpejty møc. Mänit piuumy.

²⁸ Mänitä Jesús miädiaacpädøøyy. Mänitä jäya'ayhajxy yagjuøøyy nebiaty ja'a Jesús hänajty tøø yajnähixø'øy. ²⁹ Jaduhñ hänajty yajnähixø'øy nebiä möjcu'udjtmøødpän. Ja'a cu'ug wyiindsøn hajxy, cab hajxy hänajty jiaty jaty.

8

¹ Tunguhduum ja'a Jesús hänajty tøø yajnähixø'øy. Mänit miänajnä. Mänit majiäya'ay piadu'ubøjcä. ² Mänit pa'amjäya'ay Jesús ñämejch. Haxøøgpa'am hänajty miøød. Mänitä Jesús wyiinjiicädaacä, wyiingudsähgøøyyä. Mänit ñämaayyä:

—Wiindsón, pø chojpy ja'a mjoot jaduhñ, hóyhøch jaduhñ xyajnähwa'ads xyajcu'uhwá'adsät.

³ Mänitä Jesús ja'a mähdijc ñähdoon. Mänit ñämaayy:

—Chójpjøch ja'a njoot jaduhñ; tøø jaduhñ mnähwa'ačh mguhwa'ačh.

Mänitä ja'a mähdijc jiaanč nähwaach jiaanč cuhwaach. ⁴ Mänitä Jesús miänaañ:

—Huuc mäadow, ca'a pøn mnä'ägädä hawaanä. Nøcx jim Jerusalén maa ja'a teediän. Jim myajcähxø'ögät coo tøø mnähwa'aäch coo tøø mguhwa'aäch. Jimä xädø'øñ mguyoxø'øwät nebiä Moisés jecy yhanehmiän. Jaduhnä hijxtahnd myajcähxø'ögät coo tøø mnähwa'aäch coo tøø mguhwa'aäch.

⁵ Mänitä Jesús miehch maa ja'a cajpt hänajty xiøhatiän Capernaum. Coo quiajptägøøyy, mänit ja'a Jesús ja'a soldadowiindsøn ñämejch. ⁶ Mänit Jesús ñämaayyá:

—Jímhøch ja'a nmoonsä tu'ug quio'na'ay tøgooty. Tøø ja'a tiecy miucy. Hanaxiä jaduhnä chaaçhpøcy tehngajnä.

⁷ Mänitä Jesús miänaañ:

—Nøcxy nhuuc yaghoyø'øy.

⁸ Mänitä soldadowiindsøn yhadsooyy:

—Pero Wiindsøn, cab jaduhnä yhahixø'øy coo miich jiiby mdägø'øwät maaäch ndøgootiän, je'eguiøxpä coo miich mmøjjä mjaančhä. Nägooyyä miich jaduhnä mmäná'anät cooäch nmoonsä yhoyø'øwät, pues hoyø'øwäp. ⁹ Hané'emyhøch nhity; jímhøch nwiindsøn bä, y jímhøch nsoldado. Coočhä nsoldado tu'ug nnämä'awät coo homiaajä ñøcxät, nõcxäp jaduhnä; y cooäch nnämä'awät coo myínät, mínäp jaduhnä. Y coočhä nmoonsä waamb nnämä'awät, quiudiünäp jaduhnä.

¹⁰ Mänitä Jesús jiaanč tehñ yagjuøøyy. Mänit ñämaayy ja'a hajxy hänajty pawädijpä:

—Cábøčhä nmägunaaxhajxy jaduhnä miäböcy neby yø'ø craa miäböquiän, y jäguem yø'ø chooñ. Tøyhajt jaduhnä. ¹¹ Coo ja'a Dios ja'a miäjaa hänajty yajcähxø'øga'añ, mänit hajxy hänajty nämay miedsa'añ, ja'a hajxy hänajty mäböjpä. Wiinduhmyhagajpt hajxy hänajty choona'añ. Mänit hajxy hänajty miøødhida'añijäm ja'a Abraham møødä Isaac møødä Jacob. ¹² Pero ja'a judfoshajxy ca'a mäböjpä, cab hajxy hänajty jim quiooda'añ Dioswiinduum. Jiiby hajxy jaduhnä quiuhjuipnaxa'añii mõjcu'uhaam maa yhagoodsän. Jiiby hajxy jaduhnä chaaçhpøga'añ tehngajnä.

¹³ Mänitä Jesús ja'a soldadowiindsøn ñämaayy:

—Nøcx maa ja'a mdøjcän. Tøø jaduhnä mmäböcy, tøø ja'a nmoonsä jaduhnä yhoyø'øy. Mänitä ja'a mioonsä jiaanč hoyøøyy.

¹⁴ Mänitä Jesús ñøcxy maa ja'a Pedro tiøjcän. Jiibiä Pedro miøødhoc hänajty quio'na'ay tomiøød. ¹⁵ Mänitä Jesús ja'a tadjäya'ay ja'a quiø'ø ñahdoonä. Mänitä tiøy tiøjch. Mänitä tadjäya'ay piädø'cy. Mänit tiägøøyy mayhajtuumä ja'a Jesúscøxpä.

¹⁶ Coo quioodsøøyy, mänitä pa'amjäya'ayhajxy may yajmejtsä maa ja'a Jesúsän. Tøø hajxy hänajty näje'e miačhii ja'a mõjcu'ujäm. Mänitä Jesús quiapxy. Manityä hajxy yhøxmajtsä ja'a mõjcu'ujäm. Jaduhnä pa'amjäya'ayhajxy quiøxy yajmøcpøjcä; ja'a Jesús jaduhnä yajmøcpøjc. ¹⁷ Tøjiajt ja'a Diosmädia'agy jaduhnä maa jaduhnä myiñän cujaay, mänaa ja'a Isaías jecy miäna'añän: “Jaaya'ay ja'a nba'amhájtäm tøø xyajñhwáatsäm tøø xyajcuhwáatsäm.” Ja'a Isaías, je'eds ja'a Diosmädia'agy jaduhnä jecy yajwa'x.

¹⁸ Coo ja'a Jesús yhiyxy coo hänajty cujc tøø piäda'agyii ja'a majiäya'ay, mänit miänaañ coo hajxy ñáxät mejyhawiimb møødä jiamiøødhajxy. ¹⁹ Cajnä hajxy hänajty tiu'ubøcyñä, mänitä Jesús jäya'ay tu'ug ñämejtsä. Yajñähixøøby hänajty je'ebä maa ja'a tsajtøjcän. Mänitä Jesús ñämaayyá:

—Wiindsøn, miñ nhuuc jamiøødhaty. Homiaajä mnøcxät, quipxy nbawädítät.

²⁰ Mänitä Jesús yhadsooyy:

—Ja'a xøøgaa, jimä jiut je'e; ja'a muuxy, jimä pie'eñ je'e; pero høøch, ja'a Diosquexypä, cáböch ndøjc maaäch nboox nhäñá'awät.

²¹ Mänitä Jesús ja'a jiamiøød tu'ug miänaañ:

—Wiindsøn, mänitøch miich nbadu'ubøga'añ coočhä ndeedy hänajty tøø yho'nä, cooäch hänajty tøø nyajnaaxtägøøñä.

²² Mänitä Jesús yhadsooyy:

—Ween ja'a mjujy ja'a mmägu'ughajxy yajnaaxtägø'øy. Cábøch ja'a nmädia'agy hajxy xpianøcxaanä. Pero miich, ween quipxy nwädíjtäm.

²³ Mänitä Jesúshajxy tiägøøyy barcojooty mөөдä jiamioødhajxy. Tiu'ubøjnä hajxy barcojooty. ²⁴ Mänitä poj mөc piädø'cy, hөxtä cugujjøøyy ja'a nөө jii by barcojooty. Pero tөө ja'a Jesús hänajty miaaho'nä. ²⁵ Mänit hoy yuxyijäm ja'a miägu'ughajpä tu'ug. Mänit ñämaayyä:

—Wiindsón, hөjts yajnahwáatsäc. Cham hөjts nnөөho'ogø'owa'añ.

²⁶ Mänitä Jesús yhadsooyy:

—Tii hajxy coo mwi'i chähgø'øy. Cábøch mijts ja'a nmädia'agy hajxy jaduñ xñä'a mäbøjcä, paady hajxy mdsähgø'øy.

Mänit piädø'cy. Mänitä poj jiojcunäma'awøøyy mөөдä mejy coo quia'a míinnät. Mänit jaduñ yuungøøyy. Caj ñä'ägädä pojnä. ²⁷ Mänitä miägu'ughajpähajxy yagjuøøyy. Mänit hajxy ñiñämaayyä:

—Nebiäda'a jaduñ coo miädia'agy miäbøjcäxä hөxtä ja'a poj mөөдä mejy.

²⁸ Mänitä Jesúshajxy jim miejch mejyhawiimb maa ja'a naax hänajty xiøhatiän Gadara. Jimä cabäsantä hänajty tu'ug. Mänitä Jesús jäya'ay nämetsc ñämejtsä. Jim hajxy hänajty tөө choon maa ja'a cabäsantän. Tөө hajxy hänajty miaçhii ja'a mөjcu'ujäm. Jaanch tehñ quia'awiindøyy hajxy hänajty ñibiäda'agyii. Ni pøn hajxy hänajty quia'a yajnaxa'añ maa ja'a tu'ujän. ²⁹ Mänitä Jesús tiägøøyy wiinguyaaxøøyyäbä:

—Jesús, tii hөjts xwia'ana'añ, miich Dioshuung. Cajnä yhabaady coo hөjts xya-jcumädówät.

Ja'a mөjcu'uhajxy jaduñ mänaañ, ca'a jiäya'ayä.

³⁰ Jim mayhädsøm hänajty wiädity tunwiinmänac jäguemjuøøby. ³¹ Mänitä Jesús miänuu'xtaacä ja'a mөjcu'uhajxy:

—Pø xyajpädsømamb hөjts yaa maa hädaa jäya'ayän nämetscä, na'añ hөjts jii by nhuuc tägø'øy maa yø'ø hädsøm jioodootyhajxiän.

³² Mänitä Jesús miänaañ:

—Nөcx hajxy jii by tägø'ow.

Mänitä mөjcu'uhajxy ñähwaach ja'a jäya'ay nämetspä. Mänitä hädsøm hajxy ñämejch. Cөjx ja'a hädsømhajxy wyiinmänacpäyø'ogy. Cөjx hajxy quiuhcahnaxy naaxøjpcøxp. Mejjiooty hajxy hoy quiuga'awø'øy. Cөjx hajxy jii by yho'ogy mejjiooty.

³³ Mänitä hädsømgüeendähajpähajxy chähgø'øbäyø'cy. Coo hajxy jim miejch maa ja'a cajptän, mänit hajxy miädiaacy nebiaty hajxy hänajty tөө yhixy, coo ja'a mөjcu'uhajxy hänajty tөө ñähwa'açh ja'a jäya'ay nämetspä. ³⁴ Cөjx ja'a cu'ughajxy ñөcxy päyø'øguiä maa ja'a Jesúsän. Coo ja'a Jesús hajxy piaaty, mänit hajxy miänuu'xtaacy coo ja'a Jesús jim choonät maa ja'a ñaaxhajxiän.

9

¹ Mänitä Jesúshajxy tiägøøguiumbä barcojooty, ñajxtägajch hajxy jadähooc mejyhawiimb maa ja'a quiajpthajxiän. ² Mänitä tecymiucypiä tu'ug quiøømiejtsä tsaajiooty maa ja'a Jesúsän. Ja'a mähdiøjc ja'a miägu'ughajpähajxy jaduñ cøømiejtsä. Coo ja'a Jesús yhiyxy coo hajxy hänajty miäböcy, mänitä Jesús ja'a mähdiøjc ñämaayy:

—Huong, jootcugø'ow; tөө ja'a mbojpä mgädieey xñähwa'açh.

³ Jimä ley-yajnahixøøbiädøjc hänajty näje'e tiäna'ay ja'a Jesús ñähmøjc. Coo hajxy jaduñ miädooyy nebiä Jesús miänaañän, mänit hajxy näje'e quiopcooty tiägøøyy mädiaacpä: “Capxtägooby hädaa craa jaduñ maa ja'a Dioscøxpän.” ⁴ Ñajuøøby ja'a Jesús hänajty neby hajxy hänajty miädia'agiän quiopcooty. Mänit miänaañ:

—Tii haxøøgwiinmahñdy hajxy coo mmøødhaty mgopcooty. ⁵ Mädyii mädi-a'agy maas tsip, coöch hädaa mähdiøjc nnämä'awät: “Tөө ja'a mbojpä mgädieey xñähwa'açh”, tögä maas tsip jaduñ coöch nnämä'awät: “Tänaayyø'og, yo'oyø'og.”

⁶ Nyajcähxø'ögáambiøch coöchä cuhdujt jaduñ nmөөдä hädaa yaabä naaxwiin coöchä pojpä cädieey nyajnahwá'adsät, hөөch ja'a Diosquexypä.

Mänitä Jesús ja'a tecymiucypiä ñämaayy:

—Tänaayyø'og, widsø'og yø'ø mdsaa, nөcxnä maa ja'a mdøjcän.

⁷ Mänitā tecymiucyipiä tiänaayyø'cy. Mänit ñøcxnä maa ja'a tiøjcän. ⁸ Coo ja'a cu'ughajxy jaduhñ yhiixy coo ja'a tecymiucyipiä tøø yhojø'ø, mänit hajxy chähgøøbiøjcy. Mänitā Dios hajxy wyiingudsähgøøyy, je'eguiøxpä coo ja'a Jesús ja'a mäjaa hänajty tøø mio'oyii, ja'a Diosquexypä. Cab hajxy hänajty ñajuø'ø pø Dioshuung hänajty je'e, ja'a Jesús.

⁹ Mänitā Jesús jim chohñ. Mänitā jäya'ay tu'ug yhiixy, ja'a xøhajpä Mateo. Jimā Mateo hänajty yhäña'ay maa hänajty yajñähjuudiu'udiän. Mänitā Mateo ñämaayyā:

—Jam quipxy wädjätäm.

Mänitā Mateo tiänaayyø'cy. Mänit ja'a Jesús piadu'ubøjcy.

¹⁰ Jimā Jesús hänajty quiaiy tøgooty møødä miägu'ughajpähajxy. Mänitā yajñähjuudi-uutpähajxy may miejch mägaabiä, møødä jäya'ayhajxy ca'a panøcxpä ja'a judfos quiuhdujt. Mänitā Jesús hajxy tiägøøyy møødcaabiä. ¹¹ Jimā fariseoshajxy hänajtypä, ja'a hajxy hänajty hoy jaanč tehñ pianøcxpä ja'a Moisés miädia'agy. Mänitā fariseoshajxy miänaañ:

—Tii yø'ø mwiindsøn coo miøødcay ja'a yajñähjuudiutpähajxy møødä cubojpä cugädieeyhajxy —nømä Jesús miägu'ughajpähajxy ñämaayyā.

¹²⁻¹³ Miädoow ja'a Jesús jaduhñ. Mänit miänaañ:

—Pøn jaduhñ møc, caj yajtsooyø'ø; pøn jaduhñ pa'ammøød, je'eds jaduhñ yajtsooyøøby. Jaduhñ mäwíinøch høøch nebiä mädsøoyøøbiän. Páadyhöch yaa tøø nmiñ tøø nmech, nébiøch ja'a cubojpä cugädieeybähajxy nnämä'awät coo ja'a yhaxøøgwíinmahñdy hajxy ween ñajtshixø'ø. Ja'a hojiäya'ayhajxy, cábøch hajxy je'e waamb nnäma'awa'añ. Nøcx hajxy habøc tii ja'a Diosmädia'agy jaduhñ ñänøømby: “Chójpíøch ja'a njoot jaduhñ coo hojiøot hajxy mmøødhädät; cábøch jaduhñ nmänaañnä coo animal hajxy myóxät maa ja'a høøchcøxpän.”

¹⁴ Mänitā Jesús ñämejtsä ja'a Juan mäyajnäbejpä miägu'ughajpähajxy. Mänitā Jesús miäyajtøøwä:

—Tii miič mmägu'ughajpähajxy jaguiay quia'a nä'ägädä hida'añ. Naxy højts jaguiay tu'xøjaty nhity tähoocjaty; jaduhñ højts ja'a Dios nwiingudsähgø'ø. Jaanä jaduhñä fariseoshajxy yhiijpä jaguiay.

¹⁵ Mänitā Jesús yhadsooyy:

—Coo ja'a jäya'ayhajxy mänaa piøcy yhu'ugy, cabä woyba wichpä hajxy jiø'ø xiiuüch. Xoonäacp hajxy jaduhñ, je'eguiøxpä coo ja'a jamiø'ød jyijä. Jaduhñ mäwíinøch høøch nebiä jamiø'ødän. Páadyhöch nmägu'ughajpähajxy jaguiay quia'a hity. Habaadaamb jaduhñ coöch yaa ndsoonaannä; mänit hajxy mäbøcypä jaguiay yhida'añ.

¹⁶ Cab jaduhñ pøn tucwit yhagøyyø'ø jemywyithaam. Múgäp ja'a jemywyit jaduhñ y maas hanaxiä ja'a tucwit jaduhñ quiøødsät. ¹⁷ Jaanä jaduhñduhmbä, cabä pøn jemyvyino quiudemø'ø y tucwajhacxujiooty. Cøødsäp ja'a wajhacxuy jaduhñ y høxyógäp ja'a vino jaduhñ. Haagä tägóyyäp ja'a wajhacxuy jaduhñ møødä vino. Pero jiibiä jemyvyino hajxy quiudemø'ø maa ja'a wajhacxuy jemybiän. Jaduhñ ni mädyii quia'a tägóyyät.

¹⁸ Cajnä ja'a Jesús hänajty miädiaacpädø'ø, mänitā tsajtøjcwíindsøn tu'ug miejch. Mänitā Jesús wyiingo'naaguiädaacä. Mänit ñämaayyā:

—Naamhó'ogyhøchä nhuung ja'a to'oxypä. Coo miič nøcxy mnähdoñ, mänit jiuypíøjtägätsät.

¹⁹ Mänitā Jesús piädø'cy. Mänit jaaya'ay miøødtu'ubøjcy møødä Jesús miägu'ughajpähajxy. ²⁰⁻²¹ Jimā tajjäya'ay hänajty tu'ug høxhaam pianøcxy. Pa'ammøød hänajty je'e. Majmetscjumøjt ja'a ñø'ty hänajty tøø wyi'i xiee'xy, weenjaty weenjaty. Jaduhñä tajjäya'ay hänajty miädia'agy quiopcooty: “Nägóoyyøch ja'a wyitpa'a nnähdoonät, mänitøch nmøcpógät.” Coo ja'a Jesús ja'a tajjäya'ay jiäguyohdiägøøyyä, mänitā wyitpa'a ñähdoonäxä. ²² Mänitā Jesús yhee'pwiimbijty, Mänit ja'a tajjäya'ay yhiixy. Mänit miänaañ:

—Huung, jootcugø'øw; tøø jaduhñ mmøcpøcy, je'eguiøxpä coo tøø mmäbøcy.

Mänitiä ja'a tadjäya'ay miöcpöjcy. ²³ Mänitä Jesúshajxy jim miejch maa ja'a tsajtöjcwindsón tiöjcän. Jiibiä xuuxpädöjch-hajxy hänajty yho'ogyjiäya'awyiinxu'uxy. Jiibiä jäya'ayhajxy hänajty wyi'i yhaamhaty. ²⁴ Mänitä Jesús miänaañ:

—Pädsöm hajxy jiiby. Cab yø'ø tøø yho'ogy, nä'ä maab yø'øduhñ.

Mänitä Jesús ñäxiicä. ²⁵ Cøjx hajxy jaduhñ piädsömy. Mänitä Jesús tiöjtägøøyy. Mänitä to'oxyhäna'c quiø'ømajch. Mänitä to'oxyhäna'c yhäñaayyø'cy. ²⁶ Mänitä mädia'agy wiädijty wiinduhmyhagajpt coo ja'a to'oxyhäna'c tøø yagjujyipiögyii.

²⁷ Coo ja'a Jesúshajxy jim chohñ, mänitä wiindshajxy nämetsc piadu'uböjcy yáaxäp:

—Højts näxúu'tsác. David miich hijty mhaphajpy mdeedyhajpy.

²⁸ Coo ja'a Jesús tiöjtägøøyy, mänitä wiindshajxy miäwiingooñ. Mänitä Jesús miänaañ:

—Nej, mmäbøjpy hajxy jaduhñä coochä mäjaa nmøødä coo hajxy nyaghijxø'ögädä.

Mänit hajxy miänaañ:

—Wiindsón, nmäbøjpy højts.

²⁹ Mänitä Jesús ja'a wiinds wyiinhajxy ñähdoonä. Mänitä Jesús miänaañ:

—Ween hajxy mhijxø'ogy coo hajxy tøø mmäböcy.

³⁰ Mänit hajxy yhijxø'cy. Mänitä Jesús miänaañ:

—Ca'a pøn hajxy mnä'ägädä hawaanä.

³¹ Coo ja'a wiindshajxy jim chohñ, mänit hajxy tiägøøyy mädia'agy-yajwädijpä coo hajxy tøø yaghijxø'ogyii ja'a Jesúsäm.

³² Mänitä huum tu'ug yajmejtsä maa ja'a Jesúsän. Tøø hänajty miačhii ja'a möjcu'ujäm.

³³ Mänitä Jesús ja'a möjcu'u jiiby yajpäyø'cy. Mänitiä ja'a huum quiapxø'cy. Yagjuøøyy ja'a jäya'ayhajxy jaduhñ. Mänit hajxy miänaañ:

—Ni mänaa jaduhñ pøn tii quia'a yagjadyii nebiä hädaajän yaa Israelnaaxooty.

³⁴ Mänitä fariseoshajxy miänaañ:

—Paady yø'øya'ay ja'a möjcu'u yajpäyø'ogy, coo ja'a möjcu'ugong miäjaa miøødhajtä.

³⁵ Cøjx ja'a Jesús wiädity wiinduhmyhagajpt. Homiaajä hänajty wiädity, jiiby hänajty yajnähihö'oy tsajtögooty coo ja'a Dios ja'a miäjaa möbädajp yajcähxø'oga'añ. Yajnajxyp hänajty homiädyyii pa'amä. ³⁶ Näxuu'chp ja'a Jesús ja'a majiäya'ay hänajty. Jaduhñ mäwiinäts hajxy hänajty nebiä meegän, ja'a cajpä wyiindsón. Nebiä tögowiädijpä hajxy hänajty je'e. Nebiä jootmayhajpä hajxy hänajty je'e. ³⁷ Mänitä Jesús ñämaayy ja'a miägu'ughajpähajxy:

—Yø'ø majiäya'ayhajxy, hoy jaduhñ coochä nmädia'agy hajxy xmiäböjçät. Pero cab højts nnämäyyäm, højts ja'a mädia'agy nyajwá'xämbä. ³⁸ Mänuu'xta'ag ja'a Dios hajxy coo ween ja'a mägu'ughajpä hajxy xjiaac móoyyämät, neby højts ja'a mädia'agy hajxy xmiøødyajwá'xämät.

10

¹ Mänitä Jesús ja'a miägu'ughajpä miøjyaaxy ja'a nämajmetspä. Mänitä cuhdujt miooyy coo ja'a möjcu'u hajxy yajpäyø'ögät, coo homiädyyii pa'amä hajxy yajnáxät.

² Jaduhñä nämajmetspähajxy hänajty xiøhaty: Simón Pedro møødä piuhya'ay Andrés; ja'a Zebedeo yhuunghajxy, Jacobo møødä Juan; ³ Felipe; Bartolomé; Tomás; Mateo ja'a yajnähuudiutpä; Jacobo, ja'a Alfeo yhuung; Lebeo Tadeo; ⁴ Simón ja'a cananista; Judas Iscariote, ja'a Jesús hänajty yajyagho'ogáañäbä.

⁵ Mänitä Jesús ja'a nämajmetspähajxy quiejxy mädia'agy-yajwa'xpä. Mänit ñämaayy:

—Ca'a hajxy jim mnøcxy maa ja'a ca'a judfoshajxy chäna'ayän, y ca'a hajxy jim mnøcxy Samarianaaxooty. Yaayyä hajxy jaduhñ mwädítät, yaa Israelnaaxooty.

⁶ Ja'a jäya'ayhajxy yaabä, jaduhñ mäwiinäts hajxy je'e nebiä meeg tögowiädijpä.

⁷ Mnägäpxäp hajxy jaduhñ coo ja'a Dios ja'a miäjaa möbädajpä yajcähxø'oga'añ.

⁸ Myajnáxäp hajxy homiädyyii pa'amä møødä haxøogpa'am. Myagjujyipiögäp ja'a ho'ogyjiäya'ay hajxy. Myajpäyø'ögäp ja'a möjcu'u hajxy. Nnä'ä móobiöch mijts hädaa cuhdujt; cáböch mijts nyagjuya'añ; jaduhñ mijtspä, cab hajxy myagjúubiät.

⁹ Cabä xädø'øñ hajxy mgónät ni weeñtiä. ¹⁰ Cabä morral hajxy mwídsät. Tu'uquüä camiixy hajxy mwídsät. Cabä cø'øg hajxy mejtstehng mmänócxät. Cabä cuhdajt hajxy mgábät. Jim hajxy mmägaya'añ mmähu'uga'añ maa hajxy hánajty mhamejsta'aga'añän.

¹¹ 'Coo hajxy maa mgajptägó'owät, jimä jäya'ay hajxy mhøxtá'awät ja'a hojioot-møødpä; jim hajxy mhamejstá'agät. Jiiby hajxy mhídät høxtä coonä hajxy hánajty mdu'ubøga'añ. ¹² Coo hajxy mdøjtägó'owät, mänit hajxy myajpóo'xät. ¹³ Coo hajxy jaduhñ xyajtøjtägó'owät hamuumdu'joot, mänit hajxy jaduhñ quiunuu'xóøjät ja'a Diósäm; pø caj, cab hajxy jaduhñ quiunuu'xóøjät. ¹⁴ Coo hajxy jaduhñ xquia'a nä'ägä jøjpøgó'owät, coo ja'a mmädia'agyhajxy xquia'a nä'ägä mädóowät, mänit hajxy jim mdsóonät. Mänitä mdecy hajxy mwiinwop mwiinxídät, nebiä hijxtahñd jaduhñ miähmó'owät coo mijts jaduhñ tøø xquia'a yajtøjtägó'oy. ¹⁵ Tøyhájtäts mijts nnäma'ay, coo yhabáadät coo ja'a jäya'ayhajxy quiumädowa'añ, maas hanaxiä yø'ø cajpt jaduhñ quiumädowa'añ quejee ja'a Sodomacajpt møødá Gomorracajpt.

¹⁶ 'Maaçh mijts nwiinguexiän, haxøøgwiiinmahñdy ja'a jäya'ayhajxy jim miøød. Paady hajxy nähix hahixø'ø mnibiäda'agóøjät. Mee'xxieemy hajxy jaduhñ mwädítät. ¹⁷ Mniyajcopcø'owóøjáp mijts. Xyajcø'ødägó'owäp mijts maa ja'a tuungmøødpän. Mänitäts hajxy xwyiinwop xjiøjwóbät maa ja'a chajtøgooty hajxiän. ¹⁸ Høxtä jim hajxy xyajmedsa'añ maa ja'a gobiernä wyiinduumhajxiän, møød jim maa ja'a ca'a judíos wyiinduumhajxiän. ¹⁹ Pero coo hajxy jaduhñ xyajmédsät maa ja'a wyiinduumhajxiän, cab hajxy mdaj mmáyät waambaty hajxy hánajty mmädia'aga'añ. Coo jaduhñ yhabáadät, mänitä Dios jaduhñ xyhawáanät waambaty hajxy jaduhñ mmáná'anät. ²⁰ Cab hajxy hamdsoo mmädia'aga'añ. Dioshespírituhaam hajxy jaduhñ mmädia'aga'añ.

²¹ 'Haxøøg jaduhñ jiada'añii. Hamdsoo hajxy ñiñáhanuu'xø'owa'añii ja'a tu'que'-expä-jäya'ay. Jaduhñ ja'a tieedyhajxy jiatcø'owaambä møødá yhuunghajxy. ²² Ja'a høøchcøxpä mijts ja'a jäya'ayhajxy nägøxiä xmiähahñhada'añ. Pøn jaduhñ mee'xtujp cøjxta'axiøø, je'eds jaduhñ mähmø'owaamb hodium. ²³ Coo mijts hajxy xchaaçhtiúnät mädu'ughagajpt, mänit hajxy mbäyó'øgät, mänit hajxy mnócxät wiingtuum. Tøyhájtäts mijts nnäma'ay, cooçh hánajty ngäda'aga'añ, høøch ja'a Diosquexypä, cahnä cajpt hajxy hánajty mwiinwädityñä maa ja'a judíoshajxy chäna'ayän.

²⁴ 'Cabä pøn jaduhñ jiaty nebiä wyiindsøn jiatian. ²⁵ Coo hajxy jaduhñ mjádät nebiä mwiindsøn hajxy jiatian, jootcuyc hajxy jaduhñ mhídät. Cooçh jäya'ayhajxy jaduhñ tøø xñäma'ay: "Møjcu'u", jaduhñ mijts hajxy xñäma'awaambä.

²⁶ 'Cabä cu'ug hajxy mdsähgó'owät. Nebiaty hajxy jaduhñ jiatcø'oy hamee'ch, cähxø'øgaamb jaduhñ. ²⁷ Waambátyhöch mijts hamee'chhaam nnajtscapxóøyyäm, majiäya'ayhagujc hajxy myajcapxó'owät. ²⁸ Cab hajxy mdsähgó'owät pøn ja'a mnaaxni'x hajxy xyaghó'cäp; cabä mháañämä hajxy jaduhñ xyaghó'cät. Ja'a Dios hajxy mdsähgó'owäp; je'edsä cuhdajt jaduhñ møød coo hajxy jiiby xquiéxät haxøøgtuum. Jiiby ja'a mnaaxni'x hajxy quiuhdägóyyät møødá mháañämähajxy.

²⁹ 'Ja'a muuxyhuunghajxy, coo hajxy quia'ay, yhiixyp ja'a nDeedyhájtäm hajxy jaduhñ, hoy hajxy quia'a ja tsowä. ³⁰ Jaaná jaduhñ mijts xyhiixpä, høxtä xñajuóøyyäp mijts naag mijts mguhwaay. ³¹ Cabä jäya'ay hajxy mdsähgó'owät; hix, mmaas tsoobaatp mijts quejee ja'a muuxyhajxy.

³² 'Pønjátyhöch ja'a nmädia'agy xmiøødyajtu'ugøøby maa ja'a cu'ugwiinduumän, mänitöch ja'a miädia'agyhajxy nmøødyajtu'ugø'owaambä maaçhä nDeedy wyiinduumän jim tsajpootyp. ³³ Pero pønjátyhöch jaduhñ tu'ugmädia'agy tøø xquia'a møødhity maa ja'a cu'ugwiinduumän, ni høøch jaduhñ tu'ugmädia'agy nga'a møødhidaambä maaçhä nDeedy wyiinduumän jim tsajpootyp.

³⁴ 'Cooçh yaa tøø ngäda'agy, paadiä jäya'ayhajxy jaduhñ ñimiädsibø'owa'añii ja'a høøch nmädia'agyquiøxpä. Cab hajxy jootcuyc yhida'añ. ³⁵⁻³⁶ Tu'tøjc hajxy jaduhñ ñimiädsibø'owa'añii, møødá tiaj møødá tieedy, møødá ñøøx møødá miajc, møødá jiaxie'eb møødá xiocy.

³⁷ 'Põnä tñaj põnä tieedy maas tsojp quejeech hõõch jaduñ xchocy, cábõch ja'a nmädia'agy hoy xpianõcxät. Y põnä ñõõx põnä miajc maas tsojp quejeech hõõch jaduñ xchocy, ni je'ech ja'a nmädia'agy hoy xquia'a panõcxäbät. ³⁸ Põnä jioot tsojp coõch hõõch xpianõcxät, pero cabä jioot jaduñ chocy coo chaachpõgät nébiõch jaduñ ndsaaçhpõga'añän, cábõch nmädia'agy jaduñ hoy xpianõcxät. ³⁹ Põnä jiugyhajt jaduñ ja wi'i yaghoyõ'õwaamb, tägõyyäp ja'a jiugyhajt jaduñ. Pero põnä jiugyhajt najtshixõ'õwaamb ja'a hõõchcõxpä, je'eds hodium nõcxaamb.

⁴⁰ 'Põñ mijts jaduñ xchojp, jaduñ mäwínõch hõõch xchojpä. Y põñhõch hõõch jaduñ xchojp, jaduñ mäwínädsä Dios jaduñ chojpä, ja'açh tõõ xquiéxiäbä. ⁴¹ Ja'a Diosquexyhajxy, hodium hajxy ñõcxa'añ. Jaanä jim hajxy ñõcxaambä põñ jaduñ tsojp ja'a Diosquexy. Paady hajxy chogyii coo hajxy jaduñ Dyiosquexiä. Jaanä jim hajxy ñõcxaambä hodium põñ jaduñ tsojp ja'a hojiäya'ay. ⁴² Coõ hädaa häyoobäya'ay tõchñõõ ñä'a mo'owõõjät je'eguiõxpä coõch jaduñ xpianõcxy, mäñit jaaya'ay piäda'agõõjät hodium, ja'a nõõ tõõ yéquiäbä. Tehm tiõyhajt jaduñ.

11

¹ Coõ ja'a Jesús ja'a jiamiõõdhajxy yajwiingapxõõbiädõõyy, mäñit jim chohñ. Mäñit tiägõõyy yajñahixõõbiä maa ja'a cajpt mäwiingonän.

² Ja'a Juan, tsumyhäñäaby hñajty je'e. Coõ miädoyhajty coõ ja'a Cristo hñajty wiädity yajñahixõõbiä, mäñitä miägu'ughajpä metsc quiejxy maa ja'a Jesúsän. ³ Mäñitä Jesús hajxy miäyajtõõyy:

—Nej, miiçh ja'a Crístoja, ja'a Dios jaduñ quiexaambiä, tõgä wiinghäna'c je'eja.

⁴ Mäñitä Jesús yhadsooyy:

—Nõcx ja'a Juan hajxy hawaanä neby hajxy xii mhix mmädoyy. ⁵ Nõcx hajxy yajmõõdmädia'ag coõ ja'a wiindshajxy tõõ yhihxõ'õgy, coõ ja'a tecymia'adpähajxy tõõ yo'oyõ'õgy, coõ ja'a haxõõgpa'ammõõdpähajxy tõõ ñähwa'açh, coõ ja'a cuhñatpähajxy tõõ miädoowõ'õgy, coõ ja'a ho'õgyjiäya'ayhajxy tõõ jiuypioõcy, coõ ja'a häyoobäya'ayhajxy tõõ yajmõõdmädia'agyii ja'a Diosmädia'agy. ⁶ Jootcujc hajxy jaduñ yhity ja'açh nmädia'agy hajxy hamuumdu'joot tõõ xmiäbõjcbä.

⁷ Coõ ja'a Juan miägu'ughajpähajxy wyiimbijty, mäñitä Jesús ja'a cu'ug tiägõõyy mõõdmädiaacpä ja'a Juancõxpä.

—Coõ hajxy tõõ mhoy pactuum, ja'a Juan miädia'agy hajxy hñajty mmädowäänäp, túhmäts. Cabä tsajcapy pojyu'xpä hajxy hoy mhixy. Caj pues, paady hajxy jim tõõ mhoy coõ ja'a Juan ja'a miädia'agy hajxy hñajty mmädowaanä. ⁸⁻⁹ Diosquexy je'e, paadiä miädia'agy hajxy hoy tõõ mmädoowä, hoy ja'a howyit hñajty quia'a ja mõõdä nebiä mäyõõjaya'ayhajxy miõõdän. Tõyhajt jaduñ coõ ja'a Juan ja'a Diosmädia'agy yajwiingapxõ'õy. Pero ja'a Diosmädia'agy hajxy nä'a jaac yajñahixõõbiä, je'edsä cuhdujt hajxy maas may tõõ mio'oyii ja'a Diõsäm. ¹⁰ Ja'a Diosmädia'agy jecy mädiäacäbä, Juan je'e. Nõmä Dios jecy miänään coõ ja'a quiugexy hñajty jayõjp quiexa'añ maa ja'a cu'ugän, ween yajwiinxiic yajwiingapxõ'õy coõ ja'a yhaxõõgcuhdujt hajxy ñajtshixõ'õwät. Hõxháamhõch hñajty ngäda'aga'añ. Jayõjp ja'a Juan jiaançh quejxä; hõxháamhõch njaançh cädaacy. ¹¹ Ni põñ jaduñ jäda'ahaty quia'a mäbaady hädaa yaabä naaxwiin nebiä Juan mäyajnäbejpä ja'a cuhdujt miõõdän. Tõyhajt jaduñ. Pero coõch hñajty tõõ nho'nä, coõch hñajty tõõ nnõcxtägach maaçh nhuuc tsohmän, põñjaty ja'a Diosmädia'agy mäbõgaamb ja'a hõõchcõxpä, maas mayyä cuhdujt hajxy hñajty miõõdhada'añ quejee ja'a Juan miõõdä, hoy ja'a mõjcuhtajt hajxy hñajty quia'a ja mõõdä.

¹² 'Coõ ja'a Juan tiägõõyy mäyajnäbejpä, hõxtä je'enä jäda'anäbaadyñä, nägõ'õ nädécypä ja'a jäya'ayhajxy jia wi'i tiägõ'õwa'añ maa ja'a Dios wyiinduumän. ¹³⁻¹⁴ Ja'a Diosquexyhajxy jecypä, jaduñ hajxy jecy miänään coõ ja'a Dios ja'a miäjaa yajcähxõ'õga'añ. Jaduñä Moisés miädia'agy miänaambä. Pero jayõjpac ja'a Elías hijty myina'añ. Y

coo ja'a Juan tøø miech, Elías je'e, pø mwijnjuø'øwaamby hajxy jaduhñ. ¹⁵ Pøñ mädohnd møød, ween miädoy.

¹⁶ Pänébiøch jäya'ayhajxy nyajmäbáadät ja'a jäda'ahatypä. Cab hajxy tii yho-jiäwø'øwa'añ. Jaduhñ mäwfinäts hajxy je'e nebiä pigäna'c wiinhecpän. Coo hajxy naxy miech häyø'pä tøjpa'c, mänitä miäbigäna'c hajxy ñäma'ay: ¹⁷ “Tøø højts nja xu'uxy, pero cab hajxy tøø mhech. Tøø højts hojiøøñä nja høy, pero cab hajxy tøø mjø'øy.” ¹⁸ Coo ja'a Juan miehch, cab hänäjty quiaya'añ yhu'uga'añ. Mänit mijts mnänøømy coo je'e quiu'umañøöbiä. ¹⁹ Mänitøch nbasejtpä, høøch ja'a Diosqueexpä. Mänitøch ndägøøyy caabiä huucpä. Jaduhñhöch mijts xñänøømbä coöch nwi'i quiaya'añ coöch nwi'i yhu'uga'añ, coöchä cubojpä cugädieeybä nmägu'ughaty møødä yajñähuuduutpädøjc. Pero yajcähxø'øgaamby ja'a Dios jaduhñ ja'a wyiinmahñdyhaam coöch ja'a tøyhajt jaduhñ nmøødä.

²⁰ Mänitä Jesús tiägøøyy hamänajpä. Ja'a cajptjäya'ayhajxy jaduhñ hojjä, ja'a hajxy hänäjty tsänaabiä maa ja'a Jesús ja'a hoy-yagjuøøñäjatypä hänäjty tøø jia yajcähxø'øguiän. Paady jaduhñ yhamänajty, coo yhaxøøgwiinmahñdy hajxy hänäjty tøø quia'a najtshixø'øy. Mänitä Jesús miänaañ:

²¹ —Haxøøg mijts mjada'añ mhabeta'añ, mijts yaa tsänaabiä Corazín møødä Betsaida. Ja'a jecyjäya'ayhajxy hijty jim tsänaabiä Tiro møødä Sidón, coo hajxy häxøpy tøø yhixy ja'a hoy-yagjuøøñäjatypä nej mijts tøø mja hixiän, tøø ja'a yhaxøøgwiinmahñdy hajxy häxøpy najtshixø'øy. ²² Tøyhajt jaduhñ, coo ja'a Dios yaghabáadät, maas haxøøgtuum mijts jaduhñ xpiäda'aga'añ quejee ja'a jäya'ayhajxy jim jecy tsänäayyabä Tiro møødä Sidón. ²³ Y mijts jim tsänaabiä Capernaum, mja wi'i yajcumayaamb hajxy jaduhñ. Pero cabä Dios hajxy jaduhñ xquiumaya'añ. Ja'a jecyjäya'ayhajxy hijty jim tsänaabiä Sodoma, coo ja'a hoy-yagjuøøñäjatypä hajxy häxøpy tøø yhixy nej mijts tøø mja hixiän, cab hajxy häxøpy tøø quiuhdägoy. ²⁴ Tøyhajt jaduhñ, coo ja'a Dios yaghabáadät, maas haxøøgtuum mijts xpiäda'aga'añ quejee ja'a jäya'ayhajxy jim jecy tsänäayyabä Sodoma.

²⁵ Mänitxøø ja'a Jesús miänaañ:

—Teedy, miich nba'yaaxyp. Miich jim häñaaby tsajpootyp; miich yaa Dioshajp maa hädaa yaabä naaxwiinän. Dioscujú'uyäp coo ja'a tøyhajt tøø myajñähixø'øy ja'a hajxy tii ca'a jajpä. Caj tøø myajñähixø'øy ja'a hajxy tyijy jajpä. ²⁶ Tøyhajt jaduhñ, Teedy, je'eguiøxpä coo miich mjoot jaduhñ chocy.

²⁷ Mänitä Jesús miänängumbä:

—Tøøchä nDeedy ja'a tøyhajt xquiøxy yajcø'ødägø'øy. Cábøch pøñ xyhixyhaty, høøch ja'a Dioshuung. Tøyhajt jaduhñ. Jagóoyyøch nDeedy xyhixiä. Y cábøch ja'a nDeedy pøñ xyhixyhajtä. Jagóoyyøch jaduhñ nhixiä, høøch ja'a Dioshuung. Nyajñähdjábøch pøñjátyhöch nDeedy hixyhádäp. ²⁸⁻³⁰ Mijts, pøñ jaduhñ ca'a mee'xtugaamb neby hajxy hijty mguhdujthatiän, høøch nguhdujt habøjcäc. Hojióothøch nmøød; cábøch nyajcumaya'añ. Mänitäts ja'a hoybä weenbä hajxy mbáadät. Cábøch ja'a jemchpä mapxypä jaduhñ nbäda'aga'añ.

12

¹ Mänitxøø ja'a Jesús hajxy hänäjty wiädity trigoni'ibyquijc poo'xxiøøjooty. Yähó'cäp ja'a Jesús jiamiøødhajxy hänäjty. Mänit hajxy tiägøøyy trigotøjpä. ² Coo ja'a fariseoshajxy jaduhñ yhixy, mänitä Jesús hajxy ñämaayy:

—Huug hix, xiidsä mmägu'ughajpä trigo hajxy wyi'i tiøjy. Cabä cuhdujt jaduhñ myiñ coo hajxy tii ndúunämät ja'a poo'xxiøøjooty.

³ Mänitä Jesús miänaañ:

—Nej, cahnä ja'a Diosmädia'agy hajxy mgapxiä. Jim jaduhñ myiñ cujaay coo ja'a Davidhajxy yäho'pøjcä. ⁴ Mänit hajxy tiägøøyy Diostøgooty. Mänitä Diostsajcaagy hajxy quiaayy, ja'a teedyhajxy hänäjty tøø quiuyoxø'øyäbä. Cabä cuhdujt hänäjty pøñ miøødä coo hajxy quiáyät ni ja'a Davidhajxy. Jagooyyä teedy ja'a cuhdujt hajxy hänäjty miøødä coo hajxy quiáyät. ⁵ Jaduhñ cujaay myiimbä maa ja'a Moisés miädia'aguiän coo

ja'a teedyhajxy tsajtøgootypä quia'a nä'ägädä poo'xy ja'a poo'xxiøøjooty; y cab jaduhñ ñejpiä. ⁶ Y høøch, maas móc-høch ja'a cuhdujt jaduhñ nmøødä quejee ja'a tsajtøjc. ⁷ Caj mijts mwiinjuø'øy waamb ja'a Diosmädia'agy jaduhñ miäna'añ: "Mänáambøch jaduhñ coo hojiot hajxy mmøødhádät; cáboch jaduhñ nmäna'añ coo animal hajxy myóxät ja'a høøchcøxpä." Coo hajxy jaduhñ mwiinjuø'øwät, cabä jäya'ay hajxy nä'ä nägoodä mwiingapxépédät. ⁸ Høøch ja'a Diosquexypä, nmøødhøch cuhdujt jaduhñ høxtä maa ja'a poo'xxiøøbaadiän.

⁹ Mänitä Jesús jim chohñ. Mänit tiägøøyy tsajtøgooty. ¹⁰ Jiibiä mähdiøjc hänäjty tu'ug; cø'ødø'øds hänäjty tu'nax. Jiibiä fariseoshajxy hänäjty näje'e tiänaabiä. Mänitä Jesús miäyajtøøwä:

—Nej, hoy jaduhñ coo ja'a pa'amjäya'ay myajmøcpøgät ja'a poo'xxiøøjootiä.

Paadiä fariseoshajxy jaduhñ miänaañ, yhøxtaaby ja'a wiinmahñdy hajxy hänäjty nebiä Jesús hajxy yajtsumøøjät. Coo ja'a Jesús ja'a pa'amjäya'ay yajmøcpøgät ja'a poo'xxiøøjooty, mänitä Jesús hajxy hänäjty yajtsuma'añii. ¹¹ Mänitä Jesús yhadsooy:

—Hoy pues. Coo pøn mieeg quiuga'awø'øy nøøjutjooty ja'a poo'xxiøøjooty, mänit hajxy nøcxy yajpædsømy, túhmäts. ¹² Y maas tsoobaatp ja'a jäya'ay quejee ja'a meeg. Hoy jaduhñ coo jäya'ay mnäxúudsät ja'a poo'xxiøøjooty.

¹³ Mänitä Jesús ja'a mähdiøjc ñämaayy:

—Xajtøw yø'ø mgø'ø.

Mänit xiajtøøyy. Mänit miäbaaty nebiä tu'ugpän. ¹⁴ Mänitä fariseoshajxy tiøjpædsømy. Mänit hajxy quiojyquiapxyhajty nebiä Jesús hajxy yaghó'ogät.

¹⁵ Coo ja'a Jesús jaduhñ miädoyhajty, mänit jim chohñ. Mänitä jäya'ay may piadu'ubøjcy. Mänitä Jesús ja'a pa'amjäya'ay yajmøcpøjcy nägøxiä. ¹⁶ Mänit jaduhñ miänaañ coo hajxy quia'a nägápaxät pøn je'e. ¹⁷ Jaduhñsä tiøjiajty nebiä Isaías jecy miänaañän, ja'a Diosquexypä. Dios jaduhñ mänaamb:

¹⁸ Høøchä nmoonsä hädaa, ja'aäch tøø nwiimbíyyäbä.

Ndsójpjøch jaduhñ. Jootcújc-høch nnijiäwø'øyii yø'øgøxpä.

Nbäda'agáambiøch ja'a nhEspíritu maa yø'øjän.

Høøch nguhdujt jaduhñ xyajwiingapxø'øwáañäp maa ja'a jäya'ayhajxy nägøxiän.

¹⁹ Caj chiptuna'añ; caj ya'axa'añ caj jioga'añ.

Hahuum jaduhñ wiädita'añ cajptooty.

²⁰⁻²¹ Jiootcapxmøcpøgaamby pøn hobiä nejpiä mæbøjp.

Mæbøgáañäxäp ja'a miädia'agy ja'a jäya'ayhajxy nägøxiä.

Mänit jaduhñ tiägø'øwa'añ hoyhanehmbä.

²² Mänitä mähdiøjc tu'ug yajmejtsä maa Jesúsän. Wiindsä mähdiøjc hänäjty, møød hänäjty yhuumä, møød ja'a møjcu'uba'am hänäjty miøødä. Mänitä Jesús jaduhñ yajnähwaach, yaghijxø'cy, yajcapxø'cy. ²³ Mänitä jäya'ayhajxy nägøxiä yagjuøøyy. Mänit hajxy ñiñämaayyä:

—Nej, David yhap yhocäda'a yø'øduhñä.

²⁴ Coo ja'a fariseoshajxy jaduhñ miädooyy, mänit hajxy miänaañ:

—Coo yø'ø craa ja'a møjcu'uwiinmahñdy jaduhñ miøødä, paadiä møjcu'uba'am jaduhñ yajnähwa'aäch.

²⁵ Ñajuøøbiä Jesús hänäjty nebiä fariseoshajxy hänäjty wyiinmahñdyhaty. Mänit miänaañ:

—Coo ja'a tu'hagajtpä jäya'ayhajxy ñimiädsibø'øwøøjät, cuhdägóyyäp ja'a quia-jpthajxy jaduhñ. Y coo ja'a tu'ugtøgootypä jäya'ayhajxy ñimiädsibø'øwøøjät, cab hajxy hoy yhjñät tu'ugtøgooty. ²⁶ Jaaná jaduhñduhmbä, coo ja'a møjcu'uhajxy ñimiädsibø'øwøøjät, tægóyyäp ja'a wyiinmahñdyhajxy jaduhñ. ²⁷ Hoorä, mijts jaduhñ mänaamb cooch ja'a møjcu'uba'am nyajnähwa'aäch ja'a møjcu'uwiinmahñdyhaam. Coo häxøpy jiaduhñä, maa mijts ja'a mjamiøød ja'a wiinmahñdy hajxy piaady coo ja'a møjcu'uba'am hajxy yajnähwa'aäch. Hamdsoo hajxy myajcähxø'øgy coo ja'a tøyhajt hajxy mga'a møødä.

²⁸ Pero hөөч, Dioshespírituháamhөч ja'a mөjcu'uba'am nyajnáhwa'aäch. Cähxө'p jaduhñ coo төө yhabaatná coo ja'a Dios ja'a miäjaa yajcähxө'öga'añ.

²⁹ 'Coo ja'a mөjcu'u xquia'a yajmäjädá'agät, cabä miäjaa jaduhñ mbөjçät.

³⁰ 'Pөnhөч jaduhñ xquia'a mөөdpädө'p, hөөч nmädsip je'e. Y pөnhөч jaduhñ xquia'a mөөdtuumb, xmiähanhájпөч je'e.

³¹⁻³² 'Je'eguiөxpөч mijts jaduhñ nnäma'ay, coo pөñ jaduhñ tiu'udägöyyät, hoy jaduhñ ñähwá'adsät, hóyhөч jaduhñ xjia nänөmy, hөөч ja'a Diosquexypä. Pero coo pөñ jaduhñ ñänömät ja'a Dioshespíritu, cab jaduhñ mänaa ñähwa'adsa'añ.

³³ 'Mhөxcábäp hajxy jaduhñ pөñ ja'a howyiinmahñdy mөөd; je'eds hoy wädijp. Pөñ ja'a howyiinmahñdy ca'a mөөd, cab hoy wiädity. ³⁴ Jaduhñ mäwíinäts mijts hajxy mjatcө'өy nebiä tsahñdiän. Paadiä hoybä hajxy mga'a mädia'aga'añ, coo ja'a haxөөгwiinmahñdy hajxy mmөөdä. Haagä mgopcooty ja'a mmädia'agyhajxy jaduhñ chohñda'agy. ³⁵ Jaaya'ay hojiäya'aybä, hoy jaduhñ quiapxy miädia'agy je'eguiөxpä coo ja'a howyiinmahñdy miөөdä quiopcooty. Pero jaaya'ay ca'a hoybä, haxөөг jaduhñ quiapxy miädia'agy je'eguiөxpä coo ja'a haxөөгwiinmahñdy miөөdä quiopcooty.

³⁶ Chaaäch mijts nnäma'ay, coo jaduhñ yhabáadät coo ja'a Dios hänäjty yajnáhdija'añ, mänitä Dios hajxy xmiäyajtөwa'añ waambaty hajxy hänäjty төө mgapxtägoy, hoy hajxy jaduhñ төө mja nä'ä wiingapxnaxy. ³⁷ Pө haxөөг hajxy hänäjty төө mmädia'agy, mänitä Dios hajxy xpiäda'aga'añ haxөөгtuum. Pө hoy hajxy hänäjty төө mmädia'agy, mänitä Dios hajxy xpiäda'aga'añ hodiium.

³⁸ Mänitä Jesús ñämaayyä ja'a fariseohajxy näje'e mөөdä ley-yajnáhixөөbiähajxy:

—Wiindsön, höjts ja'a hijxtahñd huuc yaghíjxäc ja'a hoy-yagjuöñbä.

³⁹ Mänitä Jesús yhadsooyy:

—Ja'a jäya'ayhajxy jäda'ahatypä, haxөөг hajxy jiatcө'өy; cabä Dios hajxy chocy. Ja'a hijxtahñd hajxy mja wi'i yhixaamby. Jagooyyä hajxy jaduhñ mhixa'añ nebiä hijxtahñd jecy quiähxө'quiän ja'a Jonáscөxpä, ja'a Dios jecy quiéjxäbä. ⁴⁰ Ja'a ballenajoodooty ja'a Jonás yhiyty tэгөөгxөө tэгөөгtsuhm. Jaduhñäts hөөч nhidaambä naaxjutjooty tэгөөгxөө tэгөөгtsuhm, hөөч ja'a Diosquexypä. ⁴¹ Coo ja'a Jonás jaduhñ piädsөөmy ballenajoodooty, mänitä Diosmädia'agy hoy yajwa'xy maa ja'a cajpt hänäjty xiөhatiän Nínive. Coo hajxy jim miädooyy, mänitä hajxy miäböjcy. Mänitä yhaxөөгwiinmahñdy hajxy ñajtshixөөyy. Y cabä Jonás möjtuunг hijty jaduhñ jiaty mөөdä. Maas möjtúunгhөч nmөөdä hөөч. Pero cábөч nmädia'agy hajxy xmiädowaanä, ja'a jäya'ayhajxy jäda'ahatypä. Coo jaduhñ yhabáadät coo hajxy hänäjty yajnáhdija'añii, mänitä hajxy ñäma'awa'añii coo hajxy jaduhñ piäda'agöjät haxөөгtuum. Ja'a jecyjiäya'ayhajxy jaduhñ mäna'anaamb, ja'a hajxy hijty jegyhajty tsänaabiä Nínive. ⁴² Jaduhñdsä to'oxiөjc miäna'anaambä, ja'a jecy gobiernähájtäbä jäguemnaax ja'a jөөmbojmänajpä. Mänitä Salomón hoy miämädoowhity, je'eguiөxpä coo ja'a Salomón hänäjty jiaanч tehñ quiuhwijjiä. Y cabä Salomón ja'a möjtuunг hijty jiaty mөөdä. Maas möjtúunгhөч nmөөdä hөөч. Pero cábөч nmädia'agy hajxy xmiädowaanä, ja'a jäya'ayhajxy jäda'ahatypä.

⁴³⁻⁴⁵ 'Ja'a jäya'ayhajxy jäda'ahatypä, haxөөгwiinmahñdy hajxy miөөd. Y coöч nmädia'agy hajxy xquia'a mäböjçät, maas haxөөг hajxy jaduhñ jiädät. Jaduhñ mäwíinäts hajxy jiädät nebiä jäya'ay mөjcu'umөөdpän. Coo ja'a mөjcu'u jiiby piädsömät maa jaaya'ay quiopcän, mänitä poo'xtaact nөcxy jäguemduum yhөxta'ay maa ja'a тө'өdsnähgapän. Coo ja'a poo'xtaact jim quia'a páadät, mänitä miäna'ana'añ: “Mejor nnä'ägä nөcxtägächhөч maaч nhuuc tshömbän.” Coo jaduhñ wyiimbídät, mänitä jäya'ay quiopc jaduhñ piäatät nebiä yajwa'adstөjcän, ja'a yajxon төө pie'edyíjábä. Mänitä jiamiөөd nөcxy juxtujc jiaac woy, ja'a maas haxөөгpä. Mänitä hajxy nägөxiä tiägө'өy maa jaaya'ay quiopcootiän. Y maas haxөөг jaaya'ay jaduhñ jiada'añ quejee hijty yhity.

⁴⁶ Jimnä ja'a Jesús ja'a cu'ug hänäjty miөөdmädia'agyñä, mänitä tiajhajxy miejch mөөdä piuhya'ayhajxy. Jim hajxy miähmөөyy төba'am. Ja'a Jesús hajxy hänäjty miөөdmädia'agaamby. ⁴⁷ Mänitä Jesús hoy ñäma'ayii:

—Xiidsä mdaj xmiøødmädia'aga'añ tøba'am møødä mbuhya'ayhajxy.

⁴⁸ Mänitä Jesús yhadsooyy:

—Põnhøch ndajhajpy; põnhøch nbuhya'ayhajpy.

⁴⁹ Mänitä jiamiøød ñädsiiwøøyy. Mänit miänaañ:

—Høøch ndaj yø'ø; høøch nbuhya'ay yø'ø. ⁵⁰ Põnhøch ja'a nDeedy miädia'agy xquiudiúunäp ja'a tsajpootypä, jaduhñ mäwíinäts hajxy je'e nébiøch nbuhya'ayän, nébiøch nbuhdo'oxiän, nébiøch ndajján.

13

¹ Mänitxøø ja'a Jesús jim chohñ tøgooty. Mänit jim miejch mejypia'a. Hoy jim yhäñaaguiäda'agy. ² Mänitä jäya'ay may miejch maa ja'a Jesús hánajtiän. Mänitä Jesús tiägøøyy barcojooty. Hoy jii by yhöxta'agy. Cøjxä jäya'ayhajxy jim miähmø'øy pu'uwiing. ³ Mänitä Jesús tiägøøyy jajnähxøøbiä madiu'u. Mäbaadyhaam jaduhñ jajnähxøøyy. Mänit miänaañ:

—Mänitä jäya'ay tu'ug tiu'ubøjcy niippä. ⁴⁻⁸ Coo ja'a tøømd tiägøøyy wøjpä, näje'e ja'a tøømd quiahy tu'haam, näje'e quiahy tsaanähgøxp, näje'e quiahy haptiooty, näje'e quiahy maa ja'a hoñaaxän. Ja'a jim cáhwäbä tu'haam, jajpädø'c ja'a muuxyhajxy je'e. Ja'a jim cáhwäbä tsaanähgøxp, paquiä jaduhñ jia mujxy, je'eguiøxpä coo ja'a naax quia'a jaty cøøcä. Coo quiøxxøøjøøyy, mänitä tiøøch, coo ja'a tyicts hánajty quia'a møødä. Ja'a cáhwäbä haptiooty, ja mujx jaduhñ. Ja yee'c jaduhñ, pero cabä ñä'ä tøømbejty. Hix, ja'a hapy je'e xaam. Y ja'a cáhwäbä maa ja'a hoñaaxän, may jaduhñ tiøømhajty, näje'e mägo'xhaam, näje'e tægøøghii'xhaam, näje'e hii'xmajc-haam. ⁹ Pøñ jaduhñ wiinjuøøby, weenç hädaa nmädia'agy xmiäbøjcä.

¹⁰ Mänitä Jesús ñámejtsä ja'a jiamiøødhajxy. Mänit miäyajtøøwä:

—Tii ja'a cu'ug coo jajnähxø'øy jajmäbaadyhaam.

¹¹ Mänitä Jesús yhadsooyy:

—Tøø mijts ja'a Dios xyajwiinjuø'øy nebiaty yhane'emy. Cab hijty jajwiinjuø'øy. Y yø'ø cu'ughajxy, cab hajxy hoy wyiinjuø'øwa'añ. ¹² Pøñ madiu'u jaduhñ møød, maas may jaduhñ mio'owa'añii. Pero pøñ weentiä møød, pøgáanäxäp je'e mäduhñtiä jim miøødä. ¹³ Páadyhøch jaduhñ nmädia'agy jajmäbaadyhaam. Jia wi'i yhee'py hajxy, cab hajxy tii yhixy. Jia wi'i miämädoowhijpy hajxy, cab hajxy wyiinjuø'øy, neby hajxy tii quia'a mädoybän.

¹⁴ 'Tøjjajp jaduhñ yø'øya'aguiøxpahajxy nebiä Isafas jecy miänaañän, ja'a hijty jegyhajty wädiipä Diosquexy:

Mmädowaamby hajxy jaduhñ, cab hajxy mwiinjuø'øwa'añ;

Mheebaamby hajxy, cab hajxy mhixa'añ.

¹⁵ Tøø hädaa jäya'ayhajxy quiuhxexy;

nebiä cuhnatpän, nebiä wiimbi'idspän hajxy jaduhñ ñibiäda'agyii neby hajxy jaduhñ quia'a wiinjuø'øwät,

nébiøch nmädia'agy hajxy xquia'a mäbøjcät.

Cooch nmädia'agy hajxy xmiäbøjcät,

mänitøch hajxy jaduhñ nyajnähwá'adsät.

¹⁶ 'Jootcujc jaduhñ mhity je'eguiøxpä coo hajxy jaduhñ mhixy, coo hajxy jaduhñ mmädoy. ¹⁷ Tøyháthøch mijts nnäma'ay, may ja'a Diosquexyphajxy, may ja'a hojjäya'aybähajxy jia hixaañ nej mijts cham mhixiän. Jia mädowaan hajxy nej mijts cham mmädoyän.

¹⁸ 'Huuc mädo w hajxy waamb ja'a niippä cwieento miädia'agytiägø'øy. ¹⁹ Näje'e ja'a jäya'ayhajxy, coo ja'a Diosmädia'agy hajxy miädoy nebiä Dios yhane'emiän, cab hajxy wyiinjuø'øy. Mänitä Diosmädia'agy hajxy piøjcäxä ja'a møjcu'ugong. Jaduhñ mäwíinäts hajxy je'e nebiä tøømd quiahyän tu'haam. ²⁰⁻²¹ Näje'e ja'a Diosmädia'agy hajxy hamuumdu'joot yhuuc ja mäböcy. Pero coo hajxy chaächtiiñii ja'a Diosmädia'agyquiøxpä, mänit hajxy piädsøømnä. Jaduhñ mäwíinäts hajxy je'e nebiä tøømd

quiahyän tsaanähgøxp. Paquiä jaduñ tiø'øch je'eguiøxpä coo ja'a tyicts quia'a hity. ²² Näje'e ja'a Diosmädia'agy hajxy yhuuc ja mädooy. Pero jiaanč tehñ jiahmiejchp hajxy jaduñ hädaa yaabä naaxwiimbä. Jiaanč tehñ yhadsojpy ja'a xädø'øñ hajxy, paadia Diosmädia'agy hajxy hoy quia'a panøcxa'añ. Jaduñ mäwíinäts hajxy je'e nebiä tøømd quiahyän haptiooty. ²³ Näje'e ja'a Diosmädia'agy hajxy hoy wyiinjuø'øy. Hoy hajxy jaduñ pianøcxy hamuumdu'joot. Jaduñ mäwíinäts hajxy je'e nebiä tøømd quiahyän hoñaaxooty.

²⁴ Mänitä Jesús tiägøøguiumbä mädiaacpä yajmäbaadyhaam:

—Coo ja'a Dios yhane'emy, jaduñhøch nyajmäbaada'añ nebiä tu'jäya'ay hodiøømd tøø wiøjjiäbän maa ja'a ñaaxän. ²⁵ Mänitcoods hajxy quiøxy maaho'cy. Mänitä miädsip ja'a cizañatøømd hoy wiøjy maa ja'a trigotøømd hänajty tøø wiøjjiän. ²⁶ Tu'cuhdujt ja'a trigo miujxy møødä cizaña. Coo ja'a trigo xiäbaajøøyy, mänitä cizaña quiahxø'pä. ²⁷ Mänitä jäya'ay hoy ñäma'ayijäm ja'a mioonsähajxy: “Wiindsøn, hodiøømd miich mwøj, túhmäts. Pämaadä yø'ø cizañahujts tøø chooñ.” ²⁸ Mänitä wyiindsøn miänaañ: “Nmädsiphøchäda'a jaduñ tøø jiatcø'øy.” Mänitä mioonsä miänaañ: “Nej, nõcxäp højts yø'ø cizañahujts nwixiä.” ²⁹ Mänitä wyiindsøn miänaañ: “Caj, cab hajxy mwíxät coo ja'a trigo jaduñ ñä'a mädäð'øgø'owät. ³⁰ Ween yhity; ween tu'cuhdujt yeegy. Coo ja'a trigopux jaduñ yhabáadät, mänitøch nmoonsä nguexa'añ, weenä cizañahujts hajxy jayøjp quiøxy yajpäðø'øgy. Ween hajxy quiøxy haxoch. Mänit hajxy jaduñ ñó'ogät. Mänitä trigo hajxy ñähmädsät. Mänit hajxy piädá'agät tsehxooty.”

³¹ Mänitä Jesús tiägøøguiumbä mädiaacpä yajmäbaadyhaam:

—Coo ja'a Dios yhane'emy, jaduñhøch nyajmäbaada'añ nebiä mostazapajcän. Jim tu'jäya'ay tøø ñi'iby maa ja'a ñaaxän. ³² Tøyhajt jaduñ coo ja'a mostazapajc jiaanč tehñ chayyä. Pero coo yeegy, cruty jaduñ jiaty nebiä quepychaajän. Mäðøyyä ja'a muuxyhajxy nøcxy jim mia'ay yhaajiooty.

³³ Mänitä Jesús miänáangumbä yajmäbaadyhaam:

—Coo ja'a Dios yhane'emy, jaduñhøch nyajmäbaada'añ nebiä to'oxiøjc ja'a tsaj-caagyooy yajmäðijø'yäbän harinajooty tägøøgquixøhñdy. Mänit jaduñ cøxiä yajmäyäbicø'øy.

³⁴ Jaduñä Jesús ja'a cu'ug yajnähiøøyy haagä yajmäbaadyhaam. ³⁵ Jaduñds tiøjiajty nebiä Diosquexypä jecy quiujahyyän: Mäbaadyháamhøch nmädia'aga'añ. Nyajcähxø'ogáambiøch mädyiijaty hänajty yu'uçhtium hijp mänaa hädaa yaabä naaxwiin yhawijy tiøø'xta'aguiän; cahnä quiahxø'øgyñä.

³⁶ Mänitä Jesús ja'a cu'ughajxy quiejxwiimbijty. Mänit tiøjtägøøyy. Mänit ja'a jiamioødhajxy miejch. Mänitä Jesús hajxy ñämaayy:

—Højts capxwíjjäc ja'a cizañahujtsøxpä.

³⁷ Mänitä Jesús miänaañ:

—Høøch ja'a Diosquexypä, jaduñ mäwíinhøch høøch nebiä jaaya'ay hodiøømd tøø wiøjjiäbän. ³⁸ Y hädaa yaabä naaxwiin, jaduñ mäwíinäts hädaa nebiä naaxän maa ja'a hodiøømd wiøjjiän. Jaaya'ayhajxy hanéhmäbä ja'a Diósäm, jaduñ mäwíinäts hajxy je'e nebiä hodiøømdän. Jaaya'ayhajxy hanéhmäbä ja'a møjcu'ugong, jaduñ mäwíinäts hajxy je'ebä nebiä cizañahujtsän. ³⁹ Y ja'a møjcu'ugong, jaduñ mäwíinäts je'e nebiä jaaya'ay ja'a cizañahujts tøø wiøjjiäbän. Coo ja'a naaxwiimbä wyiimbida'añ, jaduñ mäwíinäts je'e nebiä trigo hajxy yajpäðø'quiän møødä cizañahujts. Y ja'a Dios ja'a mioonsähajxy tsajpootypä, jaduñ mäwíinäts hajxy je'e nebiä jaaya'ay ja'a trigo hajxy yajpäðø'quiän. ⁴⁰ Coo ja'a naaxwiimbä jaduñ wyiimbida'añ, jaduñ mäwíinäts je'e nebiä cizañahujts hajxy ño'quiän. ⁴¹ Mänitøch nmoonsä nhane'ema'añ coo hajxy ween nøcxy yajpäðø'my pønjaty ja'a haxøøgwiinmahñdy møød, møødä pønjaty jaduñ ja wi'i yhadugaamb ja'a Diosmädia'agy. Jim hajxy yajpäðø'ma'añii maač hänajty nhane'ema'añän, høøch ja'a Diosquexypä. ⁴² Mänit hajxy hänajty quiujuipø'owa'añii

jøonjooty. Jiiby hajxy jiø'øwa'añ xiuudsa'añ. ⁴³ Ja'a hajxy jaduhñ howiädijpä, jaančh tehñ miøj jaančh tehñ jiaančh hajxy yhida'añ maa ja'a Tieedyhajxy yhane'ema'añ. Pø jii mmädohndhajxy, mmädówäp hajxy jaduhñ.

⁴⁴ 'Coo ja'a Dios ja'a miäjaa yajcähxø'øga'añ, jaduhñ mäwínäts je'e nebiä jäya'ay maxiädø'ñ tiajø'øyäbän naaxpa'c. Coo pøn piáadät, mänitä tiajøødiägatsa'añ. Xoon-da'agaamb jaduhñ. Mänit nøcxy tioogy tijaty jim miøød. Mänitä naax nøcxy jiuy maa ja'a maxiädø'ñ tøø piaadiän.

⁴⁵ 'Coo ja'a Dios ja'a miäjaa yajcähxø'øga'añ, jaduhñ mäwínäts je'e nebiä perlatsaa-hajuubiän, ja'a jaančh tehñ yajxonbä. Ja'a perlatsaa, pic je'e møød pioobä. ⁴⁶ Coo jaduhñ tu'ug piáadät jaančh tehñ chowbä, mänit nøcxy tioogy tijaty jim miøød. Mänitä perlatsaa nøcxy jiuy.

⁴⁷ 'Coo ja'a Dios ja'a miäjaa yajcähxø'øga'añ, jaduhñ mäwínäts je'e nebiä hacxjohmd hajxy piädá'aguiäbän mejjiooty coo hacx hajxy hñajty jiooma'añ madiu'u. ⁴⁸ Coo ja'a hacxjohmd jaduhñ yhúdsät, mänit hajxy yhøxwohmädsømy. Mänitä hacx hajxy wyiimbiy ja'a hojiatypä. Mänit hajxy piäda'agy cachjooty. Mänitä ca'a hojiatypä hajxy ñøøga'adsø'øy. ⁴⁹ Jaduhñ mäwínäts jiada'añ coo ja'a naaxwiimbä wyiimbida'añ. Mänitä Dios ja'a mioonsähajxy wyiimbiwa'añ ja'a hojiäya'aybä. ⁵⁰ Pøn ca'a hojiäya'ay, je'e hajxy cujuipø'øwáanäp jøonjooty. Jiiby hajxy jiø'øwa'añ xiuudsa'añ.

⁵¹ Mänitä Jesús miänaañ:

—Nej, mwiinjuøøby hajxy jaduhñä.

Mänit hajxy yhadsooyy:

—Wiindsøn, nwiinjuøøby højts jaduhñ.

⁵² Mänitä Jesús miänángumbä:

—Coo ja'a ley-yajnähxøøbiähajxy tiägø'øwät habøjpä nebiä Dios yhane'emiän, mejt-stu'u ja'a mädia'agy jaduhñ jiada'añ møødä jecypiä møødä jemybiä. Jaduhñ mäwínäts je'e nebiä cudøjc madiu'u miøødhátiäbän, møødä jemybiä møødä jecypiä.

⁵³ Coo ja'a Jesús jaduhñ miädiaacpäðøoyy, mänit jim chohñ. ⁵⁴ Mänit miehch maa ja'a yhamdsoo cajptän. Mänit tiägøøyy yajnähxøøbiä tsajtøgooty. Mänitä jäya'ayhajxy jiaančh tehñ yagjuøøyy. Mänit hajxy miänaañ:

—Maa yø'ø wiinmahñdiäda'a tøø yhabøcy. Nebiä hoy-yagjuøøñäjatypä jaduhñ yajcähxø'øgy. ⁵⁵ José yhuung yø'ø, yø'ø tsejtpä pujxpä. María ja'a tiaj xiøhaty. Jue'e piuhya'ayhajxy xiøhaty, Jacobo, José, Simón, møødä Judas. ⁵⁶ Yaa hajxy chána'ay maa højts ngajptän møødä piuhdo'oxyhajxy. Pämaadä yø'ø wiinmahñdy yø'øduhmä tøø yajtsoon.

⁵⁷ Mänitä Jesús miädia'agy quia'a mäbøjcäxa. Mänitä Jesús miänaañ:

—Homiaajä ja'a Diosquexy wiädity, cumáayyap jaduhñ. Pero cab jim quiumayii maa yhamdsoo naax maa yhamdsoo tøjcän.

⁵⁸ Cabä Jesús ja'a hoy-yagjuøøñäjatypä jim jiaty yajcähxø'cy, je'eguiøxpä coo ja'a miädia'agy hñajty quia'a mäbøjcäxä.

14

¹ Mänitä Herodes miädoyhajty coo ja'a Jesús hñajty jim wiädity. Ja'a Herodes, jim hñajty je'e guiobnadorhaty Galileanaaxooty. ² Mänitä Herodes ja'a mioonsä ñämaayy:

—Juan mäyajnäbejpäda'a je'e. Tøøda'a jiuypioøcy. Paadiä møcmäjaa jiaančh tehñ miøødä.

³⁻⁴ Tøø ja'a Herodes ja'a Juan hñajty yajtsumyii. Tøø ja'a Juan hñajty quiø'øxochii cadenahaam. Paadiä Juan jaduhñ chuümä coo ja'a Herodes hñajty tøø ñäma'ay coo jaduhñ quia'a hoyyä coo ja'a Herodes ja'a piuhya'ay tio'oxiøjc miøødtsänáayyät. Jue'e ja'a Herodes piuhya'ay hñajty xiøhaty, Felipe. Jue'e ja'a Felipe tio'oxiøjc hñajty xiøhaty, Herodías. ⁵ Jaduhñä Herodes hñajty tiajy miay coo ja'a Juan hñajty yagho'oga'añ. Pero jaančh tehñ chähgøøby ja'a Herodes hñajty. Ja'a cu'ug hñajty chähgøøby

je'leguixpá coo ja'a cu'ughajxy hánajty miána'añ coogá Juan ja'a Diosmädia'agy hánajty yajwa'xy.

⁶ Mänitá Herodes jiumøjt jaduñ piejtá. Jimá Herodes hánajty yháña'ay mөөdä pawoy pawichpähajxy. Mänit hajxy tiägøoyy wiinhéjtsäbä. Ja'a Herodías yhuung jaduñ tägøoyy hejtspä. Mänitá Herodes xioonndaacy nägø'ø nädecypiä. ⁷ Mänitá Herodes ja'a quixy yajwiinwaanøoyy:

—Hotyijä miich xmiäyujwá'anät, nmó'owäbøch miich jaduñ.

⁸ Mänitá quixy ja'a tiaj hoy yhawaanä. Mänitá tiaj jaduñ miánaañ coo ja'a Juan mäyajnäbejpä quiopc jaduñ miäyujwá'anät. Mänitá quixy ja'a Herodes hoy ñäma'ay:

—Høøchä Juan mäyajnäbejpä quiopc móoyyác texyjooty.

⁹⁻¹⁰ Mänitá Herodes jootmadiägøoyy nägø'ø nädecypiä. Pero tøø hánajty miána'añ jäya'awyiinduum coog hánajty yega'añ hotyijatiä. Mänit yhanehmy coo ja'a Juan quiopc yhöxpújxäxät jiiby pujxtøgooty. ¹¹ Mänitá Juan quiopc yajnøcxäxä texyjooty maa ja'a Herodeshajiän. Mänitá quixy miooyy. Mänitá quixy ja'a tiaj hoy mio'oy.

¹² Mänitá Juan ñäxäwa'ay yo'tuc hoy quiøoyyäxä; ja'a Juan miägu'ughajpähajxy jaduñ hoy quiø'oy. Mänitá Juan hajxy hoy yajnaaxtägø'oy. Mänitá Jesús hajxy hoy yhawaanä cooc ja'a Juan hánajty tøø yagho'ogyii.

¹³ Coo ja'a Jesús jaduñ miädoyhajty cooc ja'a Juan tøø yagho'ogyii, mänit jim choñ barcojooty nidiuhm. Mänit ñøcxy hanidiuhmduum. Mänitá cu'ughajxy miädoyhajty cooc ja'a Jesús hánajty jim tøø choñ. Mänitá Jesús hajxy piadu'ubøjcy cajptooty. Tegy-yo'oy hajxy pianøcxy. Jayøjp hajxy jim miejch maa ja'a Jesús hánajty ñøcxiän. Mänitá Jesús piamejch høxhaam. ¹⁴ Coo ja'a Jesús piädsøomy barcojooty, mänitá majiäya'ay yhijxy. Mänit ñäxuu'ch. Mänitá pa'amjäya'ay yajmøcpøjcy. ¹⁵ Mänittsuo ja'a Jesús miägu'ughajpähajxy piamejch. Mänitá Jesús hajxy ñämaayy:

—Tøø chuujø'oy y cabä tøjc yaa. Quejxwiimbit yø'ø jäya'ayhajxy; weenä caagy hajxy nøcxy jiuu cajptooty.

¹⁶ Mänitá Jesús miánaañ:

—Caj, ween hajxy yhity. Mijts jaduñ ween myajcáyät.

¹⁷ Mänit hajxy yhadsooyy:

—Cab højts tii nmөөdä. Jagooyyä højts ja'a tsajcaagy mägooxyä nmөөdä chaadsä hacx metscä.

¹⁸ Mänitá Jesús miánaañ:

—Mäminxä yø'ø.

¹⁹ Mänitá Jesús ja'a majiäya'ay ñämaayy coo hajxy ween yhöxta'agy mөөwyiing. Mänitá tsajcaagy quiøøchooyy mөөdä hacx. Mänit yuughee'py cøxp. Mänit miánaañ:

—Dioscujú'uyäp.

Mänitá Jesús ja'a tsajcaagy yhaguidøoyy. Mänitá miägu'ughajpähajxy miooyy. Mänit hajxy hoy yajwa'xy majiäya'ayhagujc. ²⁰ Nägøxiä hajxy jaduñ quiaayy cu'uxiä. Mänitá Jesús miägu'ughajpähajxy tsajcaagyhagujc hajxy yajpädø'cy majmejtscach. ²¹ Nämägooxmil hajxy quiaayy haagä ya'adiøjc. Hawiingä to'oxiøjc-hajxy mөөdä pigäna'c-hajxy.

²² Mänitá Jesús ja'a miägu'ughajpähajxy ñämaayy coo hajxy ween tiägø'oy barcojooty, coo hajxy ween ñøønaxø'ogy. Mänitá Jesús ja'a majiäya'ayhajxy quiejxwiimbijty. ²³ Mänitá Jesús ñøcxy nidiuhm tunñähgøxp Diospa'yaaxpä. Coo quioodsøoyy, jimnä Jesús hánajty nidiuhm tunñähgøxp. ²⁴ Ja'a Jesús ja'a miägu'ughajpähajxy, mejyquijc hajxy hánajty tøø miech barcojooty. Møc hajxy hánajty jijcubøjø'oy; paadiä nøø hánajty miøjjäd-seembejty barcomøjc. ²⁵ Coodsnä Jesús tiu'ubøjcy tegy-yo'oy. Mejywyiing jaduñ yohy. Mänit miejch maa ja'a miägu'ughajpähajiän. ²⁶ Coo ja'a Jesús hajxy yhijxy coo hánajty yo'oy mejywyiing, mänit hajxy chähgøøbiøjcy. Mänit hajxy chähgø'øyaaxy:

—Haañämäda'a yø'ø.

²⁷ Mänitá Jesús miánaañ:

—Ca'a hajxy mdsähgø'oy. Høøch ja'a Jesús.

²⁸ Mänitá Pedro miánaañ:

—Wiindsón, pø miičh ja'a Jesús, høøch huuc hanéhmac cooch jim mnócxät yo'oy maa miičhän.

²⁹ Mänitä Jesús yhadsooyy:

—Minxä.

Mänitä Pedro piädsømy barcojooty. Mänit tiägøøyy yohbiä mejywyiing. Jim hänajty ñocxa'añ maa ja'a Jesúsän. ³⁰ Coø jiäwøøyy coø møc piojy, mänit chähgøøbiøjcy. Mänit tiägøøyy quiimbä. Mänit yaaxy:

—Wiindsón, høøch yajpädsømac.

³¹ Mänitiä ja'a Jesús ja'a Pedro quiø'ø miajtsä. Mänit miänaañ:

—Caj miičh mhuuc mäbøjpä. Tiičh nmädia'agy coø xquia'a mäbøjcä.

³² Coø ja'a Jesús tiägøøyy barcojooty møødä Pedro, mänitä poj yuungøøyy. ³³ Mänitä Jesús hajxy wyiinjjcädaacy. Mänitä Jesús hajxy ñämaayy:

—Tøyhajt miičh mDioshuungä.

³⁴ Mänit hajxy miejch mejyhawiimb maa hänajty xiøhatiän Genesaret. ³⁵ Coø ja'a Jesús yhøxcajpä ja'a jäya'ayhajxy jimä, mänitä mädia'agy tiägøøyy wädijpä coø ja'a Jesús jim tøø miech Genesaret. Mänitä pa'amjäya'ayhajxy may yajmejtsä maa ja'a Jesúsän.

³⁶ Mänitä Jesús hajxy miänuu'xtaacy coø ja'a wyitpa'a hajxy ween ñähdoonä. Coø hajxy jaduhñ ñähdoon, mänit hajxy miøcpøjcy.

15

¹ Mänitä Jesús ñämejtsä ja'a fariseoshajxy näje'e møødä ley-yajnähiøøbiähajxy näje'e. Jerusalén hajxy hänajty choon. Mänitä Jesús hajxy miäyajtøøyy:

² —Yø'ø mmägu'ughajpähajxy, tii ja'a cuhdujt hajxy coø quia'a cudiuñ nebiä jecyjiäya'ayhajxy xyajmämhøøyyäm. Ja'a jecyjiäya'ayhajxy, cø'øbujp hajxy hijty coø hajxy hänajty quiaya'añ. Jaduhñ hajxy hijty quiuhdujthaty. Pero yø'ø mmägu'ughajpähajxy, cab hajxy jaduhñ quiuhdujthaty.

³ Mänitä Jesús yhadsooyy:

—Pero mijts, cabä Dios miädia'agy hajxy myajtuunä. Ja'a mhamdsoo cuhdujt hajxy myajtuumby. ⁴ Ja'a Dios jaduhñ mänaañ coø ja'a ndaj ndeedy hajxy nwiingudsähgøøyyämät. Jaduhñ miänaambä, coø pøn ja'a tiaj ja'a tieedy haxøøg ñänömät, tsipcøxp jaduhñ yho'oga'añ. ⁵⁻⁶ Pero wiing mijts mmänaambä. Mijts jaduhñ mänaamb coø jaduhñ yhooyä coø ja'a mdaj ja'a mdeedy jaduhñ mnämä'awät: “Cábøchä xädø'øñ nmøødä cooch mijts nbuhbédät. Tøøchä Dios ngøxy mo'oy mäduhñtiä mijts hijty nmo'owa'añ.” Coø hajxy jaduhñ mmäna'añ, cabä Diosmädia'agy hajxy hänajty myajtuñ. Ja'a mhamdsoo cuhdujt hajxy hänajty myajtuumby. ⁷ Jaduhñ mäwíinäts mijts mnibiäda'agyii nebiä hoyhäna'cän. Pero cab hajxy mhoyhäna'cä. Mijtsøxypä ja'a Isaías Diosquexypä jecy miänaañ:

⁸ Nä'ä mänaamb hajxy jaduhñ cooc tyijy hajxy xwyiingudsähgø'øy hamuumdu'joot.

⁹ Xiøøbä hajxy jaduhñ ñä'ä mäna'añ;

cábøch nmädia'agy hajxy xñä'ä panøcxä.

Yhamdsoo wiinmahñdy hajxy yajwiinhixøøby,

nømä Dios miäna'añ.

¹⁰ Mänitä Jesús jäya'ay may miøjyaaxy. Mänit miänaañ:

—Huuc mädown hajxy, huuc wiinjuø'øw hajxy. ¹¹ Mädyiijaty tægøøby mhaawjooty, cab jaduhñ xyajtägóyyät. Je'eduhñ xyajtägóyyäp mädyiijaty pädsøømb mhaawjooty.

¹² Mänitä Jesús ñämaayyä ja'a miägu'ughajpähajxy:

—Cabä fariseoshajxy yhojiäwø'øy coø jaduhñ tøø mmäna'añ.

¹³ Mänitä Jesús yhadsooyy:

—Mädyiijatyhøch nDeedy tsajpootypä tøø quia'a päda'agy, cab jaduhñ yhojø'øwa'añ.

¹⁴ Weends yø'ø fariseoshajxy yhity. Jaduhñds hajxy wiädity nebiä haagä wiindspän coø hajxy ñibiawoyii. Nämetsc hajxy nøcxy wiocca'ay.

¹⁵ Mänitä Pedro ja'a Jesús ñämaayy:

—Cab højts ndu'jootwiinjuø'øy. Højts capxwíjjäc.

¹⁶ Mänitä Jesús miänaañ:

—Nej, ni mijts tii mga'a wiinjuø'oyñä. ¹⁷ Jaduhnds je'e, mädyijaty tægøøby mhaawjooty, jiiby jaduhn yhäda'agy mjoodooty. Mänitä jaduhn piädsøømdägach. ¹⁸ Pero mädyijaty jaduhn pädsøømb mhaawjooty, jiiby jaduhn chohnda'agy mgopcooty. Je'eduhñ xyajtägóyyäp. ¹⁹ Haagä jiiibiä haxøøgwiinmahñdy chohnda'agy mgopcooty hoñä'a mädyiibä. Je'eduhñ xøhajt ja'a haxøøgwiinmahñdy, ja'a jäya'ay-yagho'ogyiibä, møødä meečiibä, møød coo wiingjäya'ay tio'oxiøjc mmøødtsänáayyät, møød coo mhøhnda'agät, møød coo häna'c haxøøg mnänómät. ²⁰ Je'eds jaduhn xyajtägóyyäp. Pero coo mgáyät jaguiø'øbuju, cab jaduhn ñejpiä; cab jaduhn xyajtägóyyät.

²¹ Mänitä Jesús jim chohñnä. Mänit ñøcxnä Canaán maa ja'a cajpt hänajty xiøhatiän Tiro møødä Sidón. ²² Mänitä Jesús tajjäya'ay tu'ug ñämejtsä. Jim hänajty chäna'ay Canaán. Mänitä Jesús ñämaayyä:

—Wiindsøn, miičh ja'a David hijty mhaphajpy mdeedyhajpy. Høøch näxúu'tsäc. Tøøch ndo'oxyhuung miächii ja'a møjcu'u. Hanaxiä jaduhn chaächtiuñii —nøm je'e yaaxy.

²³ Cabä Jesús yhadsooyy. Mänitä ñämaayyä ja'a miägu'ughajpähajxy:

—Huuc quejxwiimbit yø'ø tajjäya'ay. Tsaächyáaxäp jaduhn xpiawädjätäm.

²⁴ Mänitä Jesús yhadsooyy:

—Yáayyøchä Dios tøø xquiexy maa hädaa judíoshajxiän. Cábøch wiingtuum tøø xquiexy.

²⁵ Mänitä tajjäya'ay ja'a Jesús wyiinjiicädaacy. Mänit ñämaayy:

—Wiindsøn, tunä mayhajt. Høøch puhbéjtäc.

²⁶ Mänitä Jesús yhadsooyy:

—Cab jaduhn yhooyä coöchä huc tsajcaagy nmó'owät mädyii ja'a pigäna'c-hajxy quiayaamby.

Ja'a judíos Jesús yajmäbaat nebiä pigäna'cän. Ja'a ca'a judíoshajxy, je'eduhñ yajmäbaat nebiä hucän. ²⁷ Mänitä tajjäya'ay miänaañ:

—Tøyhajt jaduhn. Pero quiaaby ja'a huc ja'a tsajcaagyhawaagy coo jim quia'ay maa ja'a wyiindsøn ja'a mieexän.

²⁸ Mänitä Jesús miänaañ:

—Tøyhájthøch miičh nmädia'agy xmiäbøjcä. Weenä mhuung miøcpøcy.

Mänitiä ja'a yhuung jiaančh møcpøjcy.

²⁹ Mänitä Jesús jim chohñnä. Mänit ñøcxnä maa ja'a mejypia'ajän, ja'a xøhajtä Galilea. Mänit hoy piety tunnähgøxp. Mänit yhøxtaacy. ³⁰ Mänitä jäya'ay may miejch maa ja'a Jesúsän, møødä pa'amjäya'ay, møødä cø'ømucypiä tecymiucypiä, møødä wiindspä, møødä huumbä. Mänitä Jesús yajmäbaadøoyy. ³¹ Mänitä jäya'ayhajxy yagiuøoyy coo hajxy jaduhn yhiixy coo ja'a huumbähajxy tøø quiapxø'øgy, coo ja'a cø'ømucypiahajxy tøø yhooyø'øgy, coo ja'a tecymiucypiahajxy tøø yo'oyø'øgy, coo ja'a wiindspähajxy tøø yhiixø'øgy. Mänit hajxy miänaañ coogä Dios miøjjä jiaančhä.

³² Mänitä Jesús miøjyaaxy ja'a miägu'ughajpä. Mänit miänaañ:

—Nnäxúu'chpøch yø'øya'ayhajxy. Tægøøgxøøjøch hajxy tøø xpiawädity, y cabä caayyøøc hajxy miøødä. Cábøch hajxy nguejxwiimbida'añ jaguiay maa tiøjcän coo hajxy maa tiu'ugädáwät.

³³ Mänitä Jesús ja'a miägu'ughajpähajxy miänaañ:

—Pero maadsä cay hajxy jaduhn nnä'a páatämät maa yø'øya'aguiøxphajxiän. Pactu-umäda'la yaa.

³⁴ Mänitä Jesús miäyajtøoyy ja'a miägu'ughajpähajxy:

—Naag tsajcaagy hajxy jii mmøødä.

Mänit hajxy yhadsooyy:

—Juxtujc, chaadsä hacxhuung mejtstägøøg.

³⁵ Mänitä Jesús miänaañ coo ja'a jäya'ayhajxy yhøxtä'agät naaxwiin. ³⁶ Mänitä tsajcaagy quioondsooyy møødä hacxhuung. Mänitä Dios ñämaayy:

—Dioscujú'uyäp.

Mänitä Jesús ja'a miägu'ughajpä ja'a tsajcaagy hajxy yajnäguidøøyy mөөдä hac-huung. Mänit hajxy yajwa'xtägajch maa ja'a jäya'ayhajxiän. ³⁷ Mänit hajxy quiaaayy cu'uxiä nägøxiä. Mänitä Jesús miägu'ughajpä ja'a tsajcaagyhaguijc hajxy yajpädø'cy juxtujcach. ³⁸ Nämädaaxmil ja'a ya'adiøjc-hajxy quiaaayy. Pagaayy ja'a to'oxiøjc-hajxypä mөөдä pigäna'c-hajxy. Pero cab jaduñ yajnuø'oy nänaagä hajxy hänajty je'ebä. ³⁹ Mänitä Jesús ja'a jäya'ayhajxy quiejxwiimbijty. Mänit tiägøøyy barcojooty. Mänit ñöcxy Magadánnaaxooty.

16

¹ Mänitä Jesús nämejtsä ja'a fariseoshajxy näje'e mөөдä saduceoshajxy. Mänitä Jesús nämaayyä coo hijxtahñd ween yajcähxø'ogy jim tsajpootyp. Paady hajxy jaduñ miänaañ coo ja'a Jesús hajxy hänajty jia wi'li jiojcapxø'owa'añ. ² Mänitä Jesús yhadsooyy:

—Coo hänajty chuujø'oy, mänit hajxy naxy mmäna'añ: “Wa'ads ja'a tsajt; wa'ads jaboom yhida'añ.” ³ Y coo hänajty jiojø'oy, mänit hajxy naxy mmäna'añ: “Tøø wyiimbøcy; tu'uwaamb.” Mnajuøøby hajxy jaduñ nebiä tsajt yhida'añ, pero cabä hijxtahñd hajxy mwiinjuø'oy ja'aäch chaa nyajcäxø'piä. Ja'a jäya'ayhajxy jäda'ahatypä, haxøøg hajxy jiäya'ayhajnä; cabä Dios hajxy chocy. ⁴ Hijxtahñd hajxy jaduñ yujwaamby, pero cab hajxy mio'owa'añii. Jagooyyä hajxy jaduñ yaghixa'añii nebiä Jonás jecy jiajty yhabejtiän.

Mänitä Jesús jim jiäwaach. Mänit jim tiu'ubøjcy.

⁵ Mänitä Jesús hajxy miejyñajxy. Pero jiahdiägooyy ja'a quiaayyøøc hajxy, ja'a Jesús miägu'ughajpähajxy. ⁶ Mänitä Jesús miänaañ:

—Huuc mäadow hajxy. Cabä fariseos chajcaagychooyhajxy yhooyä, ni ja'a saduceos chajcaagychooyhajxy quia'a hoyyä.

⁷ Mänitä miägu'ughajpähajxy tiägøøyy mädiaacpä:

—Paady jaduñ miäna'añ, coo ja'a caayyøøc hajxy nga'a jahmiéjtsäm.

⁸ Ñajuøøby ja'a Jesús hänajty nebiaty hajxy hänajty miädia'agy. Mänit miänaañ:

—Tii hajxy jaduñ coo mwi'li miädia'agy coo ja'a caayyøøc hajxy mga'a mөөдä. Cábøchä nmädia'agy hajxy jaduñ xñä'ägädä mäbøjcä. ⁹ Cahnøch nmädia'agy hajxy xwyiinjuøøyyä. Cab hajxy jaduñ mjahmiejtsnä nébiøch ja'a mägooxpä tsajcaagy nyajnäwa'xøøyyän ja'a nämägooxmilpä jäya'ay, y coo hajxy maguiach myajpädø'cy. ¹⁰ Ni jaduñ hajxy mga'a jahmiejtsnä nébiøch ja'a juxtujpä tsajcaagy nyajnäwa'xøøyyän ja'a nämädaaxmilpä jäya'ay, y coo hajxy maguiach myajpädø'cumbä. ¹¹ Cooch jaduñ nmänaañ coo ja'a fariseos chajcaagychooyhajxy quia'a hoyyä, coo ja'a saduceos chajcaagychooyhajxy quia'a hoyyä, cábøch tsajcaagychooy hänajty ndehm ñänøømy. Pero caj mijts mwiinjuøøyy.

¹² Mänit hajxy wyiinjuøøñä tii Jesús hänajty miädiaacpy. Ca'a chajcaagychooyä hänajty tiehm miädiaacpy, ja'a hajxy yajtsajcaagyquiojpiä. Jaduñ hänajty miädia'agy cooc ja'a fariseos miädia'agyhajxy quia'a hoyyä, cooc ja'a saduceos miädia'agyhajxy quia'a hoyyä.

¹³ Mänitä Jesús hajxy jim miejch maa ja'a cajpt hänajty xiøhatiän Cesarea de Filipo. Mänitä Jesús miäyajtøøyy ja'a miägu'ughajpähajxy:

—Waambátyhöch ja'a cu'ughajxy xñänømy pøñhöch høøch ja'a Diosquexypä.

¹⁴ Mänit hajxy yhadsooyy:

—Näje'e ja'a cu'ughajxy miäna'añ cooc miich mJuan mäyajnäbejpä; näje'e hajxy miänaambä cooc miich mhElíasä; näje'e hajxy miänaambä cooc miich mJeremíasä, ja'a Diosmädia'agy jecy yajwá'xäbä; näje'e hajxy miänaambä cooc miich mDiosquexiä.

¹⁵ Mänitä Jesús miänaañ:

—Mijtsäts, wáambøch mijts xñänøømbä.

¹⁶ Mänitä Simón Pedro miänaañ:

—Miičh je'e ja'a Cristo. Miičh ja'a Dios tøø xquiexy, ja'a jim tsajpootypä. MDioshuung miičh.

¹⁷ Mänitä Jesús yhadsooyy:

—Miičh Simón, Jonás miičh xyhuunghajp. Caj miičh pøn tøø xyhawaanä cooçh nDioshuungä. Ja'a nDéedyhøch tøø xyhawaanä, ja'a jim tsajpootypä. Paady miičh hoyhajt weenhajt mbaada'añ. ¹⁸ Miičh jaduhñ nnämaaby coo miičh mxøhata'añ Pedro; je'edu'un ñänøømby “tsaa.” Miičhcøxpøch ja'a jäya'ay ja'a nmädia'agy hajxy may xmiäbøgaanä. Hoy hajxy cu jia ho'og, cab hajxy jaduhñ quiuhdägoyya'añ. Cøjxta'axiøø hajxy jim yhida'añ tsajpootyp. ¹⁹ Nmo'owäämbiøch miičh cuhdujt cooçh miičh nmädia'agy xyajwá'xät nébiøch ja'a jäya'ay ja'a nmädia'agy hajxy jaduhñ xmiäbøjçät. Dios jaduhñ xñajtsapxø'owäänäp nebiaty ja'a jäya'ayhajxy mhané'emät coo hajxy jaduhñ ween quiudiuñ, coo ja'a yhaxøøgwiiinmahñdy hajxy ñajtshixø'owät.

²⁰ Mänitä Jesús ja'a miägu'ughajpä yhanehmy coo hajxy ween quia'a mädia'agy coo je'e Cristo.

²¹ Mänitxøø ja'a Jesús tiägøøyy hawäänäbä ja'a miägu'ughajpähajxy cooc hänajty jim ñøcxa'añ Jerusalén, cooc hänajty jim yajtsaächpøga'añijäm ja'a martuumädøjc møødä teedywiindsønñhajxy møødä ley-yajñähixøøbiädøjc. Mänit miänaambä cooc hänajty yagho'oga'añii, pero cumáaxcäc hänajty jiuypioğa'añ.

²² Mänitä Pedro ja'a Jesús yajwooduuty. Mänitä Jesús wyiingugapxøøyyä:

—Wiindsøn, cab jaduhñ yhooyä miäbaada coo jaduhñ mjädät mhabétät.

²³ Mänitä Jesús wia'wiimbijty. Mänitä Pedro yhojjä:

—Jua'ads jim, møjcu'u. Náxyhøch miičh xjiøjcapxø'øy. Jaduhñ miičh mwiinmahñdy nebiä jäya'ayhajxy wyiinmahñdyhatiän. Caj miičh mwiinmahñdy tiuhñä nebiä Dios wyiinmahñdiän.

²⁴ Mänitä Jesús ñämaayy ja'a miägu'ughajpä:

—Pønñhøch nmädia'agy jaduhñ xpiadu'ubøgäänäp, weenä yhamdsoo cuhdujt ñajtshixø'øy; ween jaduhñ chaaçhpøjpät nébiøch ndsaaçhpøga'añän; weençh nmädia'agy xjiøjtägøøyyä. ²⁵ Pøn yhamdsoo wiinmahñdy ja wi'i yaghidaamb, cuhdägoyyaamb je'e. Pero coo pøn jaduhñ yhó'ogät ja'a høøchcøxpä, nä'ägä hodium je'e nøcxy miäh-mø'owa'añ. ²⁶ Coo pøn jaduhñ quiuhdägóyyät, hoy jaduhñ yaa tøø jia mäyøøhaty hädaa yaabä naaxwiin, caj tii piaada'añ. Cabä jiuçyhajt jaduhñ piaadaannä, homiäduhñtiä xädø'øñ cu jia yec.

²⁷⁻²⁸ Cädaactägatsáambøch yaa, høøch ja'a Diosquexypä. Ja'a Diosmóonsøch nmøødäcäda'agaamby, ja'a hajxy jim tsajpootypä. Møødhøch nDeedy quiuhdujt jaduhñ ngädaactägatsa'añ. Mänitøch ja'a jugyhajt hänajty njaac mo'owa'añ pønjaty hänajty hoy tøø wiädity. Pero pønjaty hänajty hoy tøø quia'a wädity, je'eds hajxy hänajty yajcumädowäänäp. Mänitøch ndägø'owa'añ hanehmbä. Tøyhajt mijts nnäma'ay, cooçh hänajty ngädaactägatsa'añ, mänitøch hajxy näjë'eyyäm xyhixa'añ, ja'a hajxy yaa tänaabiä. Cajnä hajxy hänajty yho'ogyñä.

17

¹ Cudädujxøø ja'a Jesús ja'a Pedro wioonøcxy tunnähgøxp møødä Jacobo møødä Jacobo yhuch Juan. Nämädaaxc hajxy jaduhñ ñøcxy møødä Jesús. ² Mänitä Jesús wiing jiajty maa ja'a Pedro wyiinduumhaxiän. Jaduhñdsä wyiin jiojp cøjx jiaty nebiä haambän. Mänitä wyit hobioob jiajty. ³ Mänitä Moisés hajxy ñäguehxtøø'xy møødä Elías. Mänitä Jesús hajxy tiägøøyy møødmädiacpä. Coo hajxy yhixä, ⁴ mänitä Pedro ja'a Jesús ñämaayy:

—Wiindsøn, hoyøøyy jaduhñ coo højts yaa tøø nbéjtäm. Pø chojpiä mjoot jaduhñ, ween højts tøjquemyhuung tægøøg nhuuc hädiuñ ja'a mijtsçøxpä cøjtu'ug; tu'ug miičh mje'e, tu'ug ja'a Moisés jie'e, tu'ug ja'a Elías jie'e.

⁵ Mädiaaccujc ja'a Pedrohajxy ñähgädaacpejtä ja'a näma'a. Hajajp ja'a näma'a hänajty. Mänit hajxy miädooyy quiapxy näma'ajooty:

—Høøch nHuung hädaa; njaančh teh̄m chójpiøch. Xyagjootcugóøbiøch. Huuc mädoowä ja'a miädia'agy hajxy.

⁶ Coo ja'a Pedrohajxy jaduh̄n miädooyy, mänit hajxy miägutscädaacy naaxwiin.

⁷ Mänit hajxy ñähdoonä ja'a Jesús. Mänit hajxy ñämaayyá:

—Pädø'øg hajxy; ca'a hajxy mdsähgø'øy.

⁸ Mänit hajxy piädø'cy. Mänit hajxy yhiwxwädijty. Cab hajxy pøn yhihxy; jagooyyá ja'a Jesús hajxy nidiuh̄m yhihxy.

⁹ Mänit hajxy miänajcy tunnähgøxp. Mänitä Jesús ja'a Pedro ñämaayy:

—Cab hajxy pøn mhawáanät nebiaty hajxy jim̄ tøø mhixy tunnähgøxp, høxtä cóonøch hánajty tøø njujypiøjtägach, høøch ja'a Diosquexypä.

¹⁰ Mänitä Jesús hajxy miäyajtøoyy:

—Yø'ø ley-yajnáhixøøbiädøjc, tii hajxy coo miäna'añ cooc ja'a Elías miejtsø'øga'añ.

¹¹ Mänitä Jesús yhadsooyy:

—Tøyhajt jaduh̄n coo ja'a Elías hijty miejtsø'øga'añ. Mänit hijty cøxiä wiinä yaghoyø'øwa'añ. ¹² Pero mijts jaduh̄n nnämaaby coo ja'a Elías tøø jia hoy; pero caj yhøxcajpä. Jaduh̄n tiuunä nebiä jäya'ay jioothajxy chojquiän. Jaduh̄nčh hajxy xchaačhtiunaambä, høøch ja'a Diosquexypä.

¹³ Mänitä Pedrohajxy wyiinjuøøñä coo ja'a Jesús ja'a Juan mäyajnäbejpä hánajty miädia'agy.

¹⁴ Mänitä Jesúshajxy miejch maa ja'a jäya'ayhajxy miayyän. Mänitä tu'jäya'ay ja'a Jesús wyiinjiicädaacy. Mänitä Jesús ñämaayyá:

¹⁵ —Wiindsøn, høøch nhuung näxúu'tsác. Mayhooc jaduh̄n tøø quiäday pojmoød. Hanaxiä jaduh̄n chaačhpøcy. Naxy jioøngädawø'øy; naxy ñøøgädawø'øy. ¹⁶ Yaačh tøø nja yajmech maa miich mmägu'ughajpädøjcän, pero cab hajxy hijty yajnáhwa'adsa'añ.

¹⁷ Mänitä Jesús miänaañ:

—Caj mijts mnä'ägä mäbøcy. Cábøch nmee'xtugaannä coöch mijts njaac møødhídät. Mämín ja'a pigäna'c yaa.

¹⁸ Mänitä Jesús ja'a møjcu'u yhojy. Mänitiä ja'a pigäna'c ñähwaach.

¹⁹ Mänitä Jesús hawiing ñämaayyá ja'a miägu'ughajpädøjc.

—Tii højts ja'a møjcu'u hijty coo nga'a yajpädsøma'añ.

²⁰ Mänitä Jesús yhadsooyy:

—Caj mijts hijty mnä'ägädä mäbøcy. Tøyhajt mijts nnäma'ay, coo hajxy jaduh̄n mmäböögät howieñtiä, mänit hajxy hotyijjä mjádät. Høxtáhmäts yø'ø tun, coo yø'ø tun hajxy mnämä'awät: “Jua'ads jim̄, nøcx wiingtuum”; mänitäts yø'ø tun jiaančh jäwá'adsät. Hotyijjä hajxy jaduh̄n mjádät coo hajxy tøyhajt mmäböögät. ²¹ Mänitä møjcu'u hajxy myajpädsømät coo ja'a Dios hajxy mba'yá'axät, coo hajxy mhamajtsc-hádät.

²² Jimä Jesús hajxy hánajty wiädity Galileanaaxooty. Mänitä Jesús miänaañ:

—Xyajcø'ødägø'øwáambøch ja'a cu'ughajxy, høøch ja'a Diosquexypä. ²³ Mänitøch hajxy xyagho'øga'añ. Pero cudägøøgxøøch njujypiøjtägatsa'añ.

Mänitä miägu'ughajpädøjc-hajxy jiootmadiägøoyy.

²⁴ Mänitä Jesúshajxy miejch Capernaum. Mänitä Pedro miäyajtøowä ja'a yajnáhjuudi-uutpädøjc:

—Nej, cabä mwiindsøn hajxy ñähjuudiu'udy maa ja'a tsajtøjcänä.

²⁵ Mänitä Pedro yhadsooyy:

—Ñähjuudiuutyp pues.

Mänitä Pedro tiøjtägøoyy maa ja'a Jesús hánajty yhäña'ayän. Mänitä Jesús ja'a Pedro ñämaayy:

—Simón, nej miich mmäna'añ, ja'a gobiernähajxy, pøn hajxy yajnáhjuudiuutyp, yhamdsoo cu'ug, tøgä wiingjäya'ay.

²⁶ Mänitä Pedro yhadsooyy:

—Wiingjäya'ay hajxy yajnáhjuudiuutyp.

Mänitä Jesús miänaañ:

—Entonces, cabä yhamdsoo cu'ug hajxy yajnahjuudiu'udy. ²⁷ Pero cábøch pøn nyagjootma'ada'añ. Nøcx mejypia'a. Jiibiä xuhñdy mnøwobó'owät. Coö hacx mxúyät, mänit myajpädsómät. Jiibiä xädø'øñ mbaada'añ hacxhaawjooty. Mädyhadaamb jaduñ coö nämetsc nyajniñähjuudiúutamät. Mänitäts nøcxy mnähjuudiu'udy.

18

¹ Mänitä Jesús miägu'ughajpäðjc-hajxy miejch maa ja'a Jesús wyiinduumän. Mänitä Jesús miäyajtøwä:

—Pønjaty ja'a mõjtuung mõød maa ja'a Dios yhane'emiän.

² Mänitä Jesús ja'a pigäna'c tu'ug miøjyaaxy. Mänitä pigäna'c cujc piädaacä. ³⁻⁴ Mänitä Jesús miänaañ:

—Ja'a pigäna'c-hajxy, cabä mõjtuung hajxy ñiyhøxtáayyächä. Pøn ja'a mõjtuung yaa niyhøxtáayyächäp hädaa yaabä naaxwiin, cab jim tiägø'owa'añ maa ja'a Dios wyiinduumän. Pero pøn ja'a mõjtuung jaduñ ca'a høxtaaby, nebiä hädaa pigäna'c jaduñ quia'a høxta'ayän, je'eds ja'a mõjtuung jaduñ jim paadaamb maa ja'a Dios yhane'emiän. Tøyhajt jaduñ. ⁵ Pøn jaduñ mägu'ugpógäp hädaa pigäna'c jaduñbä maa ja'a høøhcøxpän, jaduñ mäwíinhøch høøch xmiägu'ughaty.

⁶ 'Hädaa pigänä'c-høch nmädia'agy hajxy xmiäbøjcäbä, coö hajxy pønjaty jìj-capxø'owøjät, maas hoy hit jaduñ coö ja'a mäjøjcapxøbiä paan yajyo'xodsø'owøjät y coö miejjiäwipø'owøjät hagamduum. ⁷ Hanaxiä hajxy yaa chaaçhpøcy ja'a hajxy hädaa yaabä naaxwiin tsänaabiä. Paady hajxy chaaçhpøcy coö ja'a jøjcapxøbiä hajxy piaady. Pero Dios jaduñ yajcumädowaamb ja'a mäjøjcapxøbiä.

⁸⁻⁹ 'Coo tii hoyhadsojnä mhíxät, cab jim mmøjhée'pnät ni mga'a nähdonät. Jaduñ mnibiäda'agøjät nebiä wiindspän, nebiä cø'øducpän. Pø caj, jim haxøøgtuum mga'awa'añ.

¹⁰ 'Ca'a yø'ø pigäna'c hajxy mxøøghaty. Cueendähájtäp hajxy jaduñ. Ja'a Diosmoon-sähajxy ja'a Dioswiinduumbä, je'edsä pigäna'c hajxy cueendähajp. ¹¹ Høøch mõjhajp. Yaaçh tøø ngäda'agy hädaa yaabä naaxwiin nébiøch ja'a jäya'ayhajxy nyajnahwá'adsät coö hajxy hijty quiuhdägoyya'añ.

¹² 'Tsøc mädiáacäm. Jii tu'jäya'ay meeg mägo'x miøødä. Coö tu'ug tiägóyyät, mänit nøcxy yhøxta'ay. Jimä meeghajxy miähmø'øy tunhøjx, ja'a hajxy tøø quia'a tägóyyäbä. ¹³ Y coö piädät, mänit xioonnda'aga'añ nägø'ø nädecypiä. Tøyhajt jaduñ. ¹⁴ Jaduñ mäwíinäts je'e neby højts nDeedyhájtäm ja'a jim tsajpootypä; cabä jioot chocy coö ni mädyii pigäna'c quia'a cuhdägóyyät.

¹⁵ 'Coo ja'a mmäjøøn coö ja'a mmäðjc jaduñ xmiägädiéeyät, mänit hamee'ch mmägäpax mhané'emät. Coö jaduñ xmiäbøjcät, mänit jaduñ yhoyó'owät. ¹⁶ Pero coö jaduñ xquia'a mäbøjcät, mänitä jäya'ay mmøjyá'axät mejtstägøøg neby hajxy jaduñ tiestigohädät waambaty hajxy hänajty mmädia'agy. ¹⁷ Y coö ni jaduñ quia'a mäbøgät, mänitäts ja'a hermanodøjc mhawáanät. Y coö ni jaduñ quia'a mäbøgät, mänit hajxy mbuhwá'adsät.

¹⁸ 'Tøyhajt mijts nnäma'ay coö ja'a Diosmädia'agy hajxy yaa myajwá'xät hädaa yaabä naaxwiin nebiä jäya'ayhajxy jaduñ hoy yhídat. Dios hajxy jaduñ xyhané'emäp nebiaty hajxy mmädiá'agät.

¹⁹ 'Jaduñ mijts nnämaabiä, coö hajxy nämetsc mnøcxät tu'ugmädia'agy hädaa yaabä naaxwiin, y coöçh nDeedy hajxy homiädyiibä xmiäyujwáanät ja'a jim tsajpootypä, mänit jaduñ xmió'owät. ²⁰ Coö hajxy nämetsc nädägøøg tiu'ugmúgät maa ja'a høøhcøxpän, jímhøch jaduñ nhidaambä cujc.

²¹ Mänitä Pedro ja'a Jesús ñämaayy:

—Wiindsøn, coöçh nmäjøøn coöçh nmäðjc jaduñ xmiägädiéeyät, naaghóoc-høch jaduñ nmämée'xät. Nej, mädyä jaduñ coöçh juxtujc-hooc nmämée'xädä.

²² Mänitä Jesús yhadsooyy:

—Cab jaduñ miädøyyä. Cunaaghooc hänajty xmiägädieey, mänit mmämée'xät.

²³ 'Neby hajxy hoy mwiinjuø'owät nebiä Dios yhane'emiän. Tsøc yajmäbáatäm nebiä rey tu'ugän. Mänitä rey wyiinmahñdyhajty coo ja'a mioonsähajxy ñuu'xycápät. ²⁴ Naamnä hánajty ñuu'xycapxtsooñ coo ja'a mioonsä tu'ug miejch. Mamyillón hánajty miänuu'xyhadyii. ²⁵ Pero cabä mioonsä xädø'øñ hánajty miøødä neby jaduhñ yajñähwá'adsät. Mänitä rey miänaañ coo ween tioogøøjät møødä yhuung møødä tio'oxy, møødä chømy møødä tiajy, cøxiä nebiä ñuu'xy jaduhñ ñähwá'adsät. ²⁶ Mänitä rey wyiinjjcädaacä ja'a mióonsäm. Mänit miänuu'xtaacä: "Wiindsøn, mee'x. Cøxáambøch nyega'añ." ²⁷ Mänitä wyiindsøn hojiot ñä'ä møødhajty. Mänit miänaañ coo tø ñähwá'äch, coo ween yhawa'adspädsømy. ²⁸ Coo ja'a moonsä jim chohñ, mänitiä miämoonsä tu'ug piaaty. Mejtsmil tægøøgmil hánajty miänuu'xyhadyii. Mänitä miämoonsä yo'mämadsøyy. Mänit miänaañ: "Høøch móoyyác mäduhñtiøch miičh xmiänuu'xyhaty." ²⁹ Mänit wyiinjjcädaacä. Mänit miänuu'xtaacä: "Mee'x, cøxáambøch nyega'añ." ³⁰ Pero cabä craa hojiot ñä'ä møødhajty. Mänitä mähdiojcy yajtsuumä. Jiiby jaduhñ yhida'añ pujxtøgooty høxtä coonä quiøxy yégät. ³¹ Coo ja'a moonsädøjc-hajxy yhijxy, ja'a hajxy hánajty jaac jimä, mänit hajxy jiootmabiojcy. Mänitä wyiindsøn hajxy hoy yhawaanä nebiaty hánajty tøø jiaty tøø yhabety. ³² Mänitä rey ja'a mioonsä miøjyaaxy, ja'a hánajty tøø ñähwá'ächäbä. Mänit miänaañ: "Haxøøghäna'c miičh. Tøøch miičh cøxiä nyajñähwá'äch mäduhñtiøch miičh hijty xmiänuu'xyhaty. Páadyhöch miičh tøø nyajñähwá'äch, cooçh miičh tøø xmiänuu'xta'agy. ³³ Jaduhñ miičh mmämoonsä cu mnäxuu'ch nébioch miičh tøø nnäxuučhän." ³⁴ Hoyhoy ja'a rey jaduhñ yhawa'andaacy. Mänit miänaañ coo ja'a mioonsä quiumädówät høxtä coonä hánajty tøø yajñähwá'äch mäduhñtiä hánajty miänuu'xyhadyii. ³⁵ Jaduhñch nDeedy mijts xyajcumädowaambä, ja'a jim tsajpootypä, coo ja'a mmäjøøn coo ja'a mmädøjc hajxy mga'a mämée'xät hamuumdu'joot.

Mänitä Jesús jaduhñ miädiaacmaayy.

19

¹ Mänitä Jesús jim chohñ Galilea. Mänit jim ñøcxy Judeanaaxooty. Jimäts je'e Jordán-møjnøøhawiimb maa ja'a xøø piädsømiän. ² Mänitä jäya'ayhajxy may piadu'ubøjcy. Mänit hajxy yajmøcpøjcä ja'a Jesúsäm.

³ Mänitä Jesús ñämejtsä ja'a fariseoshajxy näje'ebä. Mänitä Jesús hajxy miäyajtøyy: —Nej, hoy jaduhñ coo jäya'ay ja'a tio'oxiojcy nä'ä nägoobä yhöxmädsädä.

Paady hajxy jaduhñ miänaañ, jia jøjcapxø'øwaan ja'a Jesús hajxy jaduhñ. ⁴ Mänitä Jesús yhadsooyy:

—Nej, cajnä ja'a Diosmädia'agy hajxy mgapxyñä. Jiiby jaduhñ myiñ coo ja'a Dios jäya'ay jecy quiunuu'xy ya'adio'oxy. ⁵ Paadiä ya'adiojcy ja'a tiaj ja'a tieedy hajxy ñähgueecnä, coo ja'a to'oxiojcy hajxy wyiingpøjnä. Nämetsc hajxy jaduhñ ñimioødt-säna'awáañänä. ⁶ Jaduhñ hajxy yhidaannä nebiä tu'que'expän. Cab jaduhñ yhooyä coo hajxy myajniyhøxmadsøøjät pønjaty ja'a Dios jaduhñ tøø quiunuu'xy coo hajxy ñimioødtsäna'awøøjät —nømä Jesús miänaañ.

⁷ Mänitä Jesús hajxy miäyajtøøgumbä:

—Tii ja'a Moisés jaduhñ coo miänaañ coo ja'a to'oxiojcy yhöxmadsøøjät cuhdujthaam.

⁸ Mänitä Jesús miänaañ:

—Coo ja'a mgopc-hajxy jaduhñ wyl'i xiexä, paadiä Moisés hajxy jaduhñ xquiuhdujt-mooyy coo ja'a mdo'oxiojcy hajxy mhøxmädsät. Pero cabä Dios jaduhñ quiunuu'xy. ⁹ Cab jaduhñ yhooyä coo wiingto'oxiojcy mwiingpøjtägätsät, pø nä'ä nägoobä ja'a mdo'oxiojcy hánajty tøø mhøxmach. Ni jaduhñ quia'a hoyyä coo høxmachtio'oxiojcy mwiingpøgät.

¹⁰ Mänitä Jesús ñämaayyä ja'a miägu'ughajpähajxy:

—Maas hoyyäda'a jaduhñ coo mga'a nä'ägädä pøgät.

¹¹ Mänitä Jesús miänaañ:

—Cab hajxy nägøxiä wyiinjuø'øwa'añ hädaaduhmbä. Jayooyyä hajxy jaduhñ wyiinjuø'øwa'añ pønjaty ja'a Dios jaduhñ tøø yajwiinjuø'øy. ¹² Näje'e ja'a ya'adiojcy-hajxy

ma'ad myiñguia'ay; paady hajxy quia'a ñibiogyii. Näje'e hajxy yajtsucy. Coö ja'a Dios hajxy wyiingudsähgø'øwa'añ, paady hajxy näje'e quia'a nibiogyii. Pøñ jaduñ mee'xtugaamb, ween miee'xtucy.

¹³ Mänitä pigäna'c-hajxy näje'e wiomejtsä maa ja'a Jesús wyiinduumän nebiä Jesús ja'a hoyhajt jaduñ mió'owät. Pero cabä Jesús ja'a miägu'ughajpähajxy jaduñ yhojjiäwøyy. Mänit hajxy yhojja, ja'a pigäna'c hajxy hänajty tøø wioméchébä. ¹⁴ Mänitä Jesús miänaañ:

—Caj, wénehöch ja'a pigäna'c-hajxy xñämech. Ca'a hajxy mhojy. Coö ja'a Diosmädia'agy hajxy jaduñ mmäbögät nebiä pigäna'c-hajxy miäbøquiän, mänitä Dios hajxy jaduñ xyhuunghädät.

¹⁵ Coö ja'a Jesús ja'a pigäna'c-hajxy hänajty tøø mio'oy ja'a hoyhajt, mänit jim chohñ.

¹⁶ Mänitä Jesús jäya'ay tu'ug ñämejtsä. Mänit miäyajtøwä:

—Wiindsøn, tii hoyböch ndúnäp nébiöch njugyhádat cøjxta'axiøø nebiä Dios jiugyhätian.

¹⁷ Mänitä Jesús yhadsooyy:

—Tiičh ja'a hoybä coö xmiäyajtøy. Caj pøñ jaduñ yhojy; jagooyyä Dios jaduñ yhojy. Pø chojpy ja'a mjoot jaduñ coö mjugyhádat cøjxta'axiøø nebiä Dios jiugyhätian, mgudiúnäp ja'a Diosmädia'agy jaduñ.

¹⁸ Mänitä craa miänaañ:

—Mädyiibä.

Mänitä Jesús yhadsooyy:

—Caj mjäya'ay-yaghó'ogät; caj mméedsät; caj pøñ mnähøønó'owät; ¹⁹ mwiingudsähgø'øwäp ja'a mdaj ja'a mdeedy; mmøødnijootpaadøøjäp ja'a mmäjøøn ja'a mmädøjc hamuumdu'joot.

²⁰ Mänitä craa miänaañ:

—Tøøch jaduñ ngøxy cudiuñ. Múutsnøch hänajty coöch jaduñ ngudiuundsöhñ. Tijátyhöch jaduñ nga'a cudiuumyñä.

²¹ Mänitä Jesús miänaañ:

—Pø mjaančh cudiuñaamby hoy yajxón, nøcx yø'ø mje'e cøxy toog. Mänitä häy-oobädøjc mnä'ä mó'owät cøxiä. Jaduñ jim mdägø'owät tsajpootyp. Mänitøch jaduñ xpiadu'ubögät.

²² Coö ja'a craa jaduñ miädooyy, mänit jaduñ jiootmadiägøyy. Hix, mäyøø ja'a craa hänajty. Mänit wyiimbijnä.

²³ Mänitä Jesús ñämaayy ja'a miägu'ughajpähajxy:

—Nä'ägä tøyhajt mijts nnäma'ay, tsip jaduñ coö mäyøøhäna'c jim ñócxät tsajpootyp.

²⁴ Tøyhajt jaduñ, cab jaduñ jiaty tsipä coö ja'a camello ñáxät xuhñdyjutjooty. Maas tsip coö mäyøøhäna'c jim ñócxät tsajpootyp.

²⁵ Coö hajxy jaduñ miädooyy, mänit hajxy yagjuøyy. Mänit hajxy ñimiäyajtøwä:

—Pønds jaduñ nähwá'adsäp.

²⁶ Mänit hajxy wyiinhee'ppejtä ja'a Jesúsäm. Mänitä Jesús miänaañ:

—Cabä jäya'ayhajxy jaduñ ñä'ä jájpät; pero hotyijä ja'a Dios jaduñ jiaty.

²⁷ Mänitä Pedro miänaañ:

—Wiindsøn, tøø højts cøxiä nnähgue'egy nhøxyo'oy. Tøø højts miičh nbadu'ubøjnä. Tii højts jaduñ nbaadaamby.

²⁸ Mänitä Jesús yhadsooyy:

—Nä'ägä tøyhajt mijts nnäma'ay, coö ja'a xøøwiimbä naaxwiimbä cøxiä jieemdägät-sät, mänitøch jim nøcxy nhøxta'aga'añ maa ja'a Dios wyiinduumän, høøch ja'a Diosquexypä. Jímhöch nhane'ema'añ. Y mijts, jim hajxy jaduñ nøcxy mhøxta'agaambä pønjátyhöch yaa tøø xpiawädity. Cødu'ug häñaabiejt hajxy jim mbaada'añ, majmetspä. Jim mijts ja'a judíoshajxy mhane'ema'añ, ja'a majmetsc-hagajtpä. ²⁹ Pønjaty ja'a tiøjc jaduñ tøø ñähgue'egy ja'a høøchcøxpä, o ja'a piuhya'ay ja'a piuhdo'oxy, o ja'a tiaj ja'a tiedy, o ja'a yhuung ja'a tio'oxy, o ja'a ñaax, majiäduhñtiä piaattägatsa'añ, y cøjxta'axiøø jiugyhada'añ nebiä Dios jiugyhätian. ³⁰ Ja'a hajxy mõjtuungmøødpä

jäda'ahaty, nämay ja'a tiuung hajxy yajtägoyya'añ; y ja'a møjtuung hajxy jäda'ahaty ca'a mөөdpä, nämay hajxy miøjtuungpaada'añ.

20

¹ 'Maa ja'a Dios yhane'emiän, tsөc yajmäbáatäm nebiä cudsaa^upcamän tu'ug. Jopy jaduhñ tiu'ubөjcy moonsähөxtaabiä, pөñ jaduhñ miөөdtúnäp ja'a chaatypcamjooty. ² Coө piaaty, mänit hajxy quiojyquiapxtiuuñ coө ja'a xiөөhajxy jiu^uyaanäxä mägooxmiljaty. Mänit hajxy quiejxä tuumbä maa ja'a tsaatypcamän. ³ Mөj^upetyxiөө ja'a cudsaa^upcam tiu'ubөj^ucumbä moonsähөxtaabiä. Mänitä jäya'ay jim yhijxy maa halaplaazän. Nämetsc nädägөөghajxy hänäjty jim tiäna'ay. Cabä tuung hajxy hänäjty miөөdä. ⁴ Mänit hajxy ñämaayyä: "Jam hajxy cudún maach ndsaatypcamän. Nä'ä mädoyyäjuөbyhöch jaduhñ njuya'añ." Mänit hajxy ñөcxy cuduumbä. ⁵ Mänitä cudsaa^upcam yhöoguiumbä moonsähөxtaabiä cujyxiөөho'ogy. Mänit yhöoguiumbä mänacyxiөө. ⁶ Mөjmänacyxiөө tiu'ubөj^ucumbä. Jimä jäya'ay yhijxy halaplaaz. Cabä tuung hajxy hänäjty miөөdä. Mänit hajxy ñämaayyä: "Tii mijts coө myaajä. Tii hajxy yaa coө mwi'i xiunaxy." ⁷ Mänit hajxy miänaañ: "Cab höjts pөñ waamb tөө xñäma'ay." Mänit hajxy ñämaayyä: "Jam hajxy cudún maach nnaaxootiän. Nä'ä mädoyyäjuөbyhöch jaduhñ njuya'añ." ⁸ Coө chuujөөy, mänitä cudsaa^upcam ja'a moonsäwiindsön möjhajpä ñämaayy: "Mmөjyá'axäp yө'ө moonsähajxy. Mänit hajxy mmäjúyät. Pөnjaty hөxhaam tөө jiaac tägө'өy cuduumbä, je'eds hajxy jawyiin mmäjuuchóonäp. Y pөnjaty jawyiin tägөөy cuduumbä, je'eds hajxy hөxhaam mmäjúyäp." ⁹ Mänit hajxy yajmäjuuyy. Jawyiin hajxy yajmäjuuyy ja'a hajxy hänäjty tөө tiägö'өyäbä mänacyxiөө. Pedyii hajxy jaduhñ miooyyä mägooxmiljaty. ¹⁰ Ja'a hajxy hänäjty tөө tiägö'өyäbä jayөjp, jaduhñ hajxy hänäjty tiajy miay coө hajxy maas majiaty mio'owa'añii. Pero jaduhñ hajxy mióoyyäbä mägooxmiljaty. ¹¹ Coө hajxy jaduhñ yajmäjuuyy tu'cuhdujtä, paadiä cudsaa^upcam hajxy miäjootma'ty. ¹² Mänit hajxy miänaañ: "Yө'ө häna'c-hajxy hөxhaam tөө jiaac tehñ tiägö'өyäbä, tu'höräyyä hajxy jaduhñ ñä'ä tuuñ. Pero jaduhñ miich tөө mmäjuy neby höjts tөө xmiäjúyyän. Cab jaduhñ yhoyyä. Tөө höjts tu'xөө nmee'xtucy. Jaanch tehñ yhan jaduhñ. Hamäjaa höjts jaduhñ tөө nmänaxy." ¹³ Mänitä cudsaa^upcam yhadsooyy: "Mägu'ughajpä, cábөch miich tөө nyajniwyyiindoyii. Jaduhñ ngojyquiapxtiuunäm coöch miich mägooxmil nmo'owa'añ. ¹⁴ Chaadsä mmäjuhñdy. Nөcxnä. Chójpöch njoot jaduhñ coöch yө'ө craa nmó'owät nébiөch miich tөө nmo'oyän, yө'ө craa hөxhaam tөө jiaac tägө'өyäbä. ¹⁵ Nej, cábөch ja'a cuhdujt jaduhñ nmөөdä coöch nxädö'өн jaduhñ nyajwá'xät nébiөch njoot choquiän. Tөгä paady jaduhñ mjootma'adiä, coöch hojioot nmөөdä." ¹⁶ Pөnjaty hөxhaam tägөөby, copc-hadaamb je'e. Pөnjaty jawyiin tägөөby, hөxhaamө'owaamb je'ebä. Nämay hajxy jaduhñ tөө jia möjya'axyii, pero näweeñtiä hajxy tөө wyiimbiyii.

¹⁷ Mänitä Jesúshajxy jim chohñ, ñөcxy hajxy Jerusalén. Nämay ja'a cu'ughajxy hänäjty ñөcxy. Tu'haamnөcxpä ja'a Jesúshajxy yohwia'xy mөөdä miägu'ughajpädөjc-hajxy nämajmetspä. Mänitä Jesús miänaañ:

¹⁸ —Yam hajxy nnөcxäm Jerusalén. Höөch ja'a Diosquexypä, jimhöch häna'c xyajcө'ödägө'өwa'añ maa ja'a teedywiindsөñhajxiän, maa ja'a ley-yajnahixөөbiädөjc-hajxiän. Jimhöch hajxy xyajyagho'oga'añii. ¹⁹ Mänitөch hajxy xyajcө'ödägө'өwa'añ maa ja'a jäya'ayhajxiän, ja'a jäguemnaaxtsohmbä. Mänitөch hajxy xwyiinwoona'añ. Mänitөch hajxy xwiobho'oga'añ. Mänitөch hajxy xmiөjpahbeda'añ cruzcөxp. Pero cudägөөgxөөch jaduhñ njujypioğa'añ coöch hänäjty tөө nho'ogy.

²⁰ Jaduhñä Jesús miägu'ughajpähajxy hänäjty xiөhaty metscä, Jacobo mөөdä Juan. Zebedeo ja'a tieedyhajxy hänäjty xiөhaty. Coө ja'a Jesúshajxy hänäjty ñөcxy Jerusalén, jimä Jacobo tiajhajxy hänäjty piawädijpä. Mänit miejch maa ja'a Jesús wyiinduumän. Mänitä Jesús wyiinjjcädaacä, miäyujwaanä ja'a mayhajt.

²¹ Mänitä Jesús miänaañ:

—Tii mayhájthөch jaduhñ ndúnäp.

Mänitä tadjäya'ay yhadsooyy:

—Coo miich hänajty tøø mgoody maa mhane'ema'añän, mänit mhané'emät cooçh nhuunghajxy yaghøxta'agøøjät hahooyhaampiä møødä hanajtyhaampiä maa miich mwiinduumän.

²² Mänitä Jesús ja'a nämajmetspä ñämaayy:

—Cab hajxy jaduhñ mnajuø'øy tii hajxy jaduhñ myujwaamby. Nej, hoy hajxy jaduhñ mjada'añ mhabeta'añä nébiøch jaduhñ njada'añ nhabeta'añän.

Mänit hajxy yhadsooyy:

—Hoy pues.

²³ Mänitä Jesús miänaañ:

—Nä'ägä tøyhajt jaduhñ coo mijts jaduhñ mjadaambä mhabetaambä nébiøch njada'añ nhabeta'añän. Pero cáboch cuhdujt jaduhñ nmøødä coo hajxy jim mhøxtá'agät maäch nwiinduumän, hahooyhaampiä møødä hanajtyhaampiä. Pønjátyhøch ja'a nDeedy jaduhñ tøø yajnähdiij, je'eds jaduhñ jim høxta'agaamb maäch nwiinduumän.

²⁴ Coo ja'a Jesús miägu'ughajpådøjc-hajxy jiaac mädooyy ja'a jaac nämajcpä, mänitä Jacobo hajxy miäjootma'ty møødä Juan. ²⁵ Mänitä Jesús jiämioød quiøxy møyjaaxy. Mänit miänaañ:

—Mnajuøøby hajxy coo ja'a gobiernahajxy yhane'emy maa hajxy tiuñän. Ja'a hajxy møjtuungmøødpä, je'eds hajxy maas hanehmb. ²⁶ Pero mijts, cab hajxy jaduhñ mhane'e-ma'añ. Pøn ja'a møjtuung jaduhñ tsojp maa mijtsän, tsipcøxp ja'a miägu'ughajpä piuhbédät. ²⁷ Y jaanä jaduhñduhmbä, pøn jaduhñ yajcumayaamb maa mijtsän, tsipcøxp ja'a miägu'ughajpä yajtunøøjät. ²⁸ Høøch ja'a Diosquexypä, puhbéjpoçh jaduhñ tøø ngäda'agy. Cáboch jaduhñ nyajpuhbeda'añ. Páadyhøch yaa tøø ngäda'agy nébiøch ja'a jäya'ay jaduhñ may nnähho'tú'udät.

²⁹ Tøø hajxy hänajty quiody maa ja'a cajpt hänajty xiøhatiän Jericó. Coo hajxy quiajptpædsøømy, mänitä jäya'ayhajxy may piadu'ubøjcy. ³⁰ Jimä wiindspähajxy hänajty quiuhxna'ay tu'uba'a nämetscä. Coo ja'a Jesús hajxy miädooyy ñajxy, mänit hajxy yaaxy:

—Wiindsøn, miich ja'a David jecy mhaphajt mdeedyhajt. Højts näxúu'tsäc.

³¹ Mänit hajxy yhojjä ja'a cú'ugäm, ween hajxy jaduhñ yhamoñ. Pero cab hajxy miäbøjcy. Mänit hajxy tehngajnä yáaxy:

—Wiindsøn, miich ja'a David jecy mhaphajt mdeedyhajt. Højts näxúu'tsäc.

³² Mänitä Jesús tiänaaxiøjpy. Mänitä wiindspähajxy miøjjaaxy:

—Tii mayhajt hajxy jaduhñ mdsojpy.

³³ Mänit hajxy yhadsooyy:

—Højts yaghixó'cäc.

³⁴ Mänit hajxy ñäxuu'tsä. Mänit hajxy wyiingudsiiwøøyyä. Mänit hajxy jiaançh hijxø'cy. Mänitä Jesús hajxy piadu'ubøjcy.

21

¹ Mäwiingoomb ja'a Jesús hajxy hänajty jim Jerusalén. Mänit hajxy miejch maa ja'a cajpt hänajty xiøhatiän Betfagé, jim mädooyyä maa ja'a Olivostunän. ² Mänitä Jesús ja'a miägu'ughajpä nämetscä ñämaayy:

—Nøcx hajxy maa yø'ø cajpt ximhaampiän. Jimä burrataj hajxy mbaada'añ cuxoch møødä yhuung. Mmäguejó'øwäp hajxy jaduhñ. Mänit hajxy yaa mwitsmínät. ³ Coo hajxy pøn waamb xñámá'awät, jaduhñ hajxy mnámá'awät coo ja'a wiindsøn jaduhñ yajmaajiaty, coo hajxy mänit mmoodiägatsa'añ.

⁴ Jaduhñds tiøjiajty nebiä Diosmädia'agy-yajwa'xpä jecy quiujahyyän:

⁵ Jaduhñdsä cu'ug hajxy mhawáanät ja'a hajxy jim tsänaabiä Jerusalén:

“Huuc heeb hajxy, xiidsä mgobiernä hajxy jaduhñ xñägoody burrohuungnähgøxp møødä burrataj.

Cab jaduhñ yajcumaya'añ.”

⁶⁻⁷ Mänitä burrataj hajxy hoy wyich møødä burrohuung, neby hajxy hänajty tøø ñäma'ayijän. Mänitä Jesús miägu'ughajpä wyithajxy yagjäbe'enøøyy ja'a burrohuung.

Mänitá Jesús yajpejty. ⁸ Jimá cu'ughajxy hánajty may tøø yhamugø'øy. Mänitá wyit hajxy ye'py tu'haam maa ja'a Jesús hánajty ñaxø'øwa'añän. Ja'a jäya'ayhajxy näje'ebä, mänitá hujtshaa'x hajxy hoy ñäbuxy. Mänitá hujtshaa'x hajxy hoy ñajtswidso'øy tu'haam. ⁹ Mänit hajxy nägøxiä tiägøøyy hayaaxpä:

—¡Viva ja'a rey David yhap yhoc! Tsøg hajxy wiingudsähgøøyyäm, ja'a Dios tøø quiéxiabä. Weenä Dios jim wyiingudsähgøøyyi tsajpooty.

¹⁰ Mänitá Jesús hajxy quioo'ty Jerusalén. Coø hajxy tiägøøyy cajpooty, mänitá cu'ughajxy tiägøøyy haamhjäpä. Mänit hajxy nämay ñimiäyjtøøwä:

—Pøn jäya'ay yø'øduhñ.

¹¹ Mänit hajxy yhadsooyy:

—Jesús yø'ø. Nazaret choon Galileanaaxooty. Ja'a Diosmädia'agy jaduhñ yajwa'xyp.

¹² Mänitá Jesús tiägøøyy Diostsajtøgooty. Jiibiä jäya'ayhajxy hánajty may jiuydiooy. Mänit hajxy yhøxquejxpädsøømä. Mänitá xädø'øñguiuwijtspädøjc ja'a mieexä hajxy yajtsitø'cäxä møødä palomatoø'pädøjc ja'a yhäñaabiejthajxy. ¹³ Mänitá Jesús miänaañ:

—Jaduhñ myiñ cujaay maa ja'a Diosmädia'aguiän: “Jue'eçh ndøjc hajxy xwiáanät cooçh hajxy jaduhñ jiiby xpia'yá'axät.” Dios jaduhñ mänaañ; pero mijts jaduhñ mwa'añ meedsøhñdy podøhñdy.

¹⁴ Mänitá Jesús ñámejtsä ja'a wiindspä møødä tecymia'adpä. Jiiby hajxy hánajty ñä'ägä hity tsajtøgooty. Mänit hajxy yajmøcpøjcä yajmäbaadøøyyä. ¹⁵ Jiibiä pigäna'c-hajxy hánajty wyi'i ya'axy tsajtøgooty: “¡Viva ja'a rey David yhap yhoc!” Ja'a teedywiindsøn hajxy møødä ley-yajnahixøøbiädøjc-hajxy, coø hajxy yhiyxy nebiä Jesús ja'a hoy-yagjuøøñajaty pä hánajty yajcähxø'øguiän, coø hajxy miädooyy coø pigäna'c-hajxy hánajty wyi'i ya'axy, mänit hajxy yhawa'andaacy. ¹⁶ Mänitá Jesús ñämaayyä:

—Nej, mmädooby jaduhñ waambaty hajxy ya'axiä.

Mänitá Jesús yhadsooyy:

—Jexio'ch, nmädøobiøch jaduhñ. Pero mijts, nej, cajnä hajxy jaduhñ mmädoyhatyñä nebiä Diosmädia'agy myiñän cooc ja'a Dios jaduhñ tøø miäna'añ coo ja'a pigäna'c-hajxy ween yhøy maa ja'a Diosøxpän.

¹⁷ Mänitá Jesús hajxy jim chohñ. Mänit hajxy ñøcxy maa ja'a cajpt hánajty xiøhatiän Betania. Jim hajxy jaduhñ chuunajxy.

¹⁸ Coø jioøøyy, mänitá Jesús hajxy wyiimbijty. Yähó'cäp hajxy hánajty. ¹⁹ Tu'haamnøcxpä piids hajxy jaduhñ piaaty. Pero cabä tii tøøm hánajty miøødä. Haagä haay hánajty je'e. Mänitá Jesús ja'a piids ñämaayy:

—Ni mänaa miiçh mga'a tøømbejtägatsaannä.

Mänitiä ja'a piids jaduhñ jiaançh tøøch. ²⁰ Coø ja'a Jesús miägu'ughajpähajxy jaduhñ yhiyxy, mänit hajxy jiaançh tehñ yagjuøøyy. Mänitá Jesús miäyajtøøwä:

—Neby yø'ø piids jaduhñ paquiä jiaançh tøøch.

²¹ Mänitá Jesús yhadsooyy:

—Nä'ägä tøyhájthøch mijts nnäma'ay, coø hajxy hamuumdu'joot mjaançh mabøgät, hotyijä hajxy jaduhñ mjädät, nébiøch yø'ø piids jaduhñ tøø nyajtø'øçhän. Coø yø'ø tun hajxy jaduhñ mnämä'awät: “Jua'ads jim, nøcx mejjiooty tægø'øw”, mänit jaduhñ jiaançh tægø'øwät. ²² Pø mjaançh mabøjp hajxy jaduhñ, coø ja'a Dios hajxy tijaty mmäyujwá'anät, mänit hajxy jaduhñ xmió'owät.

²³ Mänitá Jesús tiägøøyy tsajtøgooty. Mänit tiägøøyy yajnahixøøbiä. Mänitá teedywiindsøn hajxy miejch møødä martuumädøjc. Mänitá Jesús miäyajtøøwä:

—Pøn miiçh cuhdujt tøø xmió'oy coo miiçh yaa mhané'emät.

²⁴ Mänitá Jesús yhadsooyy:

—Cooçh mijts ja'a tøyhajt xmió'owät nébiøch mijts chamñ nmäyajtøwa'añän, mänitøch mijts ja'a tøyhajt nmoodiägätsät pøn høch ja'a cuhdujt tøø xmió'oy cooçh yaa mhané'emät. ²⁵ Pønä Juan jaduhñ quejx mäyajnäbejpä, Dios tøgä jäya'ayä.

Cab hajxy ñä'a hadsooyy. Mänit hajxy tiägøøyy yajcapxiøøbiä:

—Coo hajxy nhadsóowämät coo ja'a Dios quiejxy, mänit hajxy xmiäyajtøwáanäm tii ja'a Juan miädia'agy hajxy coo tøø nga'a mäbøjcam. ²⁶ Ni jaduñ quia'a hoyyá coo hajxy nhadsóowämät coo jäya'ay jaduñ quiejxy; cabä cu'ughajxy jaduñ yhojiäwø'øwät. Jaduñ hajxy miäna'añ cooc ja'a Juan Dyiosquexiä.

²⁷ Mänitä Jesús ñämaayyá:

—Cab højts nnajuø'øy.

Mänitä Jesús miänaañ:

—Cábøch nnägäpaxaambä põñhöch ja'a cuhdujt tøø xmio'oy cooñ yaa nhané'emät.

²⁸ Mänitä Jesús miänaañ:

—Chaads mijts cuento tu'ug nyajmøødmädia'aga'añ. Jii jäya'ay hijty tu'ug; metscä yhuung hänajty. Mänitä yhuung ñämaayy tu'ug: “Huong, nøcx jim huuc tuñ maäch ndsaatypcamän.” ²⁹ Mänitä yhuung yhadsooyy: “Cábøch nnøcxa'añ.” Pero mänit wyiinmahñdyhajty jadähooc coo jaduñ ñøcxáangumbä. ³⁰ Mänitä yhuung tu'ug ñämáaguiumbä coo ñøcxät tuumbä. Mänit yhadsooyy coo ñøcxa'añ. Pero cab jaduñ ñä'a nøcxy. ³¹ Mädyii craa jaduñ cudiuun nebiä tieedy hänajty tøø miäna'añ.

Mänit hajxy yhadsooyy:

—Ja'a jawyiinhajpä.

Mänitä Jesús miänaañ:

—Nä'ägä tøyháthøch mijts nnäma'ay, jawyiin ja'a yajñahjuudiutpådøjc-hajxy tiägø'øwa'añ Dioswiinduum møødä cuhhindo'oxiøjc-hajxy. Pero mijts, høxhaam mijts mdägø'øwa'añ. ³² Ja'a Juan mäyajñabejpä, hoy mijts xjia yajñahixøøyy neby hajxy hoy mwädítät, cab hajxy mmäbøjcy. Ja'a yajñahjuudiutpådøjc-hajxy møødä cuhhindo'oxiøjc-hajxy, je'eds hajxy jaduñ mäbøjc. Hoy mijts mja hijxy coo hajxy miäbøjcy, caj mijts mwiiinmahñdyhajty jadähooc coo hajxy mmäbøjpat.

³³ 'Chaads mijts cuento tu'ug nyajmøødmädia'agáangumbä. Jii jäya'ay hijty tu'ug naaxmøød. Mänitä tsaatypcam quiojy. Mänit curaa piädaacy. Mänitä tsaatyñøøx-ee'xøhñdy ñädajøøyy tsaajooty. Mänitä häña'awøhñdy cøxp quiojy.

'Mänitä wiingjäya'ay ja'a tsaatypcam hajxy yaghajoodiujcä. Mänitä cudsatypcam jim chohñ, ñøcxy jäguem. ³⁴ Coo ja'a tsaatyptuc yhabaaty, mänitä cudsatypcam miejt-stägajch. Mänitä mioonsä quiejxy coo ja'a tsaatyp hajxy yajmédsät mäduhñtiä hajxy hänajty mio'owa'añii. ³⁵ Mänitä mioonsähajxy miájtsäxä; ja'a naaxhajoodiujpähajxy jaduñ mämajts. Wojpä mähdiøjc tu'ug; yagho'cä tu'ugpä; ca'tsä tu'ugpä. ³⁶ Mänitä cudsatypcam ja'a mioonsä quiejxy maas may. Jaanä jaduñ hajxy yhayoowhíjxäbä.

³⁷ 'Mänitä yhamdsoo huung jaduñ quiejxy coo tyijy jaduñ wyiingudsähgøøyyäxät. ³⁸ Pero coo yhuung jaduñ yhíjxäxä, mänitä naaxhajoodiujpähajxy ñiñämaayyá: “Coo yø'ø craa ja'a tieedy yhó'ogät, mänit yø'ø craa ja'a tsaatypcam miämähmø'øwa'añ. Tsøg hajxy yaghó'cäm. Mänit højts ja'a tsaatypcam jaduñ nmämähmøøyyämät.” ³⁹ Mänit hajxy jiaançh majch. Mänit hajxy yhøxjuijpædsøømy. Mänit hajxy yagho'cy. ⁴⁰ Hoorä, coo ja'a cudsatypcam jaduñ miédsät, nebiä naaxhajoodiujpähajxy tiuna'añii.

⁴¹ Mänit hajxy yhadsooyy:

—Yagho'tägatsaanäp hajxy jaduñ je'eguiøxpä coo hajxy quia'awiindøyyä. Mänitä wiingjäya'ay ja'a naax yaghajoodiuga'añ, põñä tsaatyp jaduñ yegaamb coo ja'a tsaatyp-tuc yhabaadät.

⁴² Mänitä Jesús miänaañ:

—Nej, cajnä ja'a Diosmädia'agy hajxy mgapxyñä maa jaduñ myiñän cujaayä:

Ja'a tsaa mädyii ja'a tøjcojpähajxy quia'a nä'ägä cumaayy, je'e nä'ägä tuundsohñ.

Dios jaduñ pädaac, paady højts njaançh tehñ yagjuø'øy.

(Jesús jaduñ hamdsoo niyajmäbaatä nebiä tsaajän je'eguiøxpä coo hänajty quia'a tsocy quia'a mee'xyíijäm ja'a cu'ug. Pero mo'owáanäp ja'a Jesús ja'a mõjtuung ja'a hodiung hänajty.) ⁴³ Paady, xpiøgáanäp ja'a mguhdujt hajxy coo hajxy jim mdägø'øwät Dioswiinduum. Wiingjäyá'ayäts jaduñ tägø'øwaamb põnjaty jaduñ howiädijp. ⁴⁴ Pøñ

jaduhñ cá'awäp yø'ø tsaanähgøxp, tågóyyäp jadahñ. Y coo pøn jadahñ ñähgahbedøøjät yø'ø tsáajäm, jaaná tågóyyäp je'ebä.

⁴⁵ Coo ja'a teedywiindsønñhajxy jadahñ miädooyy møødä fariseodøjc-hajxy, mänit hajxy ñajuøøyy coo hajxy hñajty tøø miädia'agyii ja'a Jesúsäm. ⁴⁶ Mänitä teedywiindsønñ ja'a Jesús hajxy jia madsaañ; cab hajxy ñä'ä majch je'eguiøxpä coo ja'a cu'ug hajxy hñajty chähgø'øy; hiñ, jadahñä cu'ughajxy hñajty miäna'añ cooc ja'a Jesús ja'a Diosmädia'agy hñajty yajwa'xy.

22

¹ Mänitä Jesús tiägøøguiumbä mädiaacpä. Mänit miänaañ:

² —Maa ja'a Dios yhane'emiän, jadahñ mäwíinäts je'e nebiä rey tu'ugän. Yajpøgaamby ja'a yhuung hñajty je'e. Yagjadáanäp ja'a cay ja'a hu'ug hñajty je'e. ³ Mänitä mioonsähajxy quiejxy woobä wijtspä; pero cabä jäya'ayhajxy hñajty ñøcxa'añ mägaabiä. ⁴ Mänitä rey ja'a mioonsä quiejxcumbä. Mänit miänaañ: “Nøcx hajxy nämä'aw coo ja'a cay ja'a hu'ugy tøø quiøönä, coochä waj tøø nyajyagho'ogyii ja'a ni'xpä. Tøø ja'a cayiibä yhabaady; weends hajxy min quiaiy.” ⁵ Pero cabä jäya'ayhajxy ñä'ägädä mabøjcy. Tu'jäya'ay ñøcxy maa ja'a quiamän; tu'jäya'ay ñøcxy too'pä. ⁶ Mänitä rey mioonsähajxy miäjtäxä ja'a jäya'ayhajxy hñajty jaac jimä. Mänit hajxy yaghäyoowhijxy; yagho'cä hajxy jadahñ. ⁷ Mänitä rey yhawa'andaacy. Mänitä soldadohajxy quiejxä mäyagho'pä. Ja'a hajxy hñajty tøø mioonsäyagho'oguiäbä, je'e hajxy nøcxy yagho'ogyii; møødä quiajpthajxy nøcxy ñó'cäxä. ⁸ Mänitä rey ja'a mioonsähajxy ñämaayy: “Tøø jadahñ yhabaady coochä nhuung jadahñ piøga'añ. Pero ja'a jäya'ayhajxy tøø nja woy tøø nja wíchäbøch, cab hajxy hawiinmats myínät. ⁹ Nøcx hajxy wow wits pønjaty hajxy mbaatyp jim tu'haam.” ¹⁰ Mänitä mioonsähajxy hoy wioy wyich nägøxiä, pønjaty hajxy jadahñ piaatyp, møødä hojiäya'ay møødä haxøøgjäya'ay. Mänitädsä tøjc jadahñ yhuuch.

¹¹ Mänitä rey tiøjtägøøyy woybä wichpä hijxpä. Mänitä craa tu'ug yhiixä, cabä wyit hñajty yhooyä. ¹² Mänit ñämaayy: “Mägu'ughajpä, cab yø'ø mwit yaa hawiinmäts mmädägø'owät maa ja'a pøc jadahñ jiadyiijän.” Pero cabä craa ñä'ä hadsoowiimbijty. ¹³ Mänitä rey ja'a mioonsä ñämaayy, ja'a hajxy hñajty texycøøbiä: “Cø'øxots tecyxiots yø'ø craa. Mänit hajxy mhøxjuijpäsómät maa wyiingoodsän. Jim jadahñ jiø'owa'añ xiuudsä'añ.” ¹⁴ Nämäy hajxy jia møjya'axa'añii, pero näweeñtiä hajxy jadahñ wyiimbiwa'añii.

¹⁵ Mänitä fariseoshajxy jim chohñ. Mänit hajxy quiojyquiapxytieuñ coo ja'a Jesús hajxy jøjcapxø'owa'añ neby hajxy jadahñ yajnähdsómät. ¹⁶ Mänitä miägu'ughajpähajxy quiejxy møødä Herodes miägu'ughajpähajxy. Mänitä Jesús hajxy ñämaayy:

—Wiindsønñ, nnajuøøby højts coo miich ja'a tøyhajt myecy, coo ja'a Diostu'u myajñähixø'øy. Caj miich mmøjpäda'agy nebiaty ja'a cu'ughajxy miädia'agy; caj miich mmøjpäda'agy pøn tyijy møjcuहुdujtmøød. ¹⁷ Højts capxwíjjäc. Nej, hähixøøby jadahñ coo ja'a gobiernä xädø'øñ mmó'owädä, ja'a jim tsänaabiä Roma.

¹⁸ Ñajuøøbiä Jesús hñajty coo hñajty jia jøjcapxø'owa'añii. Mänit miänaañ:

—Haxøøg mijts mwíinmahñdyhajxy, hoy hajxy mja nibiäda'agyii nebiä hojiäya'ayän. Tiiçh hajxy coo xjia jøjcapxø'owa'añ. ¹⁹ Tsøgä xädø'øñ tu'ug huuc híjxäm.

Mänitä Jesús wa'xçiädø'øñ miooyy. ²⁰ Mänit miänaañ:

—Pøn yahähädiuunnaxy hädaaduhñ; pøn xiøø hädaaduhñ.

²¹ Mänit hajxy yhadsooyy:

—Ja'a gobiernä.

Mänitä Jesús miänaañ:

—Mmó'owäbä gobiernä hajxy mädyii je'e jie'e; y mmó'owäbä Dios hajxy mädyii je'e jie'e.

²² Coo hajxy jadahñ miädooyy, mänit hajxy yagjuøøyy. Mänit hajxy wyiimbijnä.

²³ Mänitxøø ja'a saduceodøjc-hajxy näje'e miehch maa ja'a Jesúsän. Jaduhñ hajxy hänäjty miäna'añ cooc tyijy hajxy nga'a jujypiøjtägatsáanäm. Mänitä Jesús hajxy ñämaayy:

²⁴ —Wiindsón, ja'a Moisés jecy mänaañ, coo ja'a pøcy-ya'adiøjc yho'ogät, ja'a cajpä yhuung, mänitädsä piuhya'ay ja'a yaamgto'oxy wyiingpøgät, nebiä yaamgto'oxy jaduhñ yhuungpáadät ja'a ya'adiøjcøxpä, ja'a tøø yho'oguiäbä. ²⁵⁻²⁶ Bueno, näjxutujc hajxy hijty tu'que'ex, haagä ya'adiøjc. Ja'a coobhuung, jayøjp jaduhñ piøjcy; mänit yho'cy. Cabä yhuung hänäjty. Mänitädsä jiädsømy ja'a yaamgto'oxy wyiingpøjcy. Mänitäs je'e yho'cumbä. Mänitädsä miädägøøgpä jaduhñ jiäjcumbä. Jaduhñ hajxy nägøxiä jiajty møødä miäjxutujcpä. ²⁷ Mänitä to'oxiøjc yho'pä høxhaam. ²⁸ Bueno, coo hajxy jaduhñ jiuujypiøgät, mädyii tehñ tiøybä hänäjty to'oxiøjc-hadaamb, ja'a näjxutujcpä puhya'ayhajxy, ja'a hajxy hänäjty tøø jia pøquiäbä.

²⁹ Mänitä Jesús yhadsooyy:

—Caj mijts ja'a tøyhajt mnä'ägädä møødä. Cabä Diosmädia'agy hajxy mhixiä ni ja'a Diosmäjaa. ³⁰ Coo ja'a jäya'ayhajxy jiuujypiøga'añ, cab hajxy hänäjty piøga'añ, ni cabä yhuung hajxy hänäjty yajpøga'añ. Jaduhñ hajxy yhida'añ nebiä Diosmoonsähajxiän, ja'a hajxy jim tsajpootypä. ³¹ Hamdsoo ja'a Dios hajxy jaduhñ tøø xñäma'ay cujaayhaam coo ja'a jäya'ayhajxy jiuujypiøga'añ: ³² “Xwyiingudsähgøøbiøch ja'a Abraham møødä Isaac møødä Jacob.” Hoorä, wiingudsähgøøyap ja'a Dios ja'a jujcyjiäya'ayhájxiäm. Cab jaduhñ wyiingudsähgøøyii ja'a ho'ogyjiäya'ayhájxiäm.

³³ Coo ja'a cu'ughajxy jaduhñ miädooyy nebiä Jesús hänäjty yajnähiø'øy, mänit hajxy yagjuøoyy.

³⁴ Coo ja'a fariseoshajxy jaduhñ miädoyhajty coo ja'a Jesús quia'a yajmäjädaacy ja'a saduceos, mänitä fariseoshajxy yhamugøoyy. ³⁵ Jimä fariseo hänäjty tu'ug; ley-yajnähiøøby hänäjty je'e. Ja'a Jesús hänäjty jøjcapxø'øwáanäp. Mänitä Jesús miäyajtøøwä:

³⁶ —Wiindsón, mädyii cuhdujt maas møj maa ja'a ley myiñän.

³⁷ Mänitä Jesús yhadsooyy:

—“Wiingudsähgøøw ja'a nDioshajtäm hamuumdu'joot; mæbøjcä ja'a miädia'agy; mjahmiédsäp cøjxta'axiøø.” ³⁸ Hädaa cuhdujt, jawyiin jaduhñ myiñ maa ja'a leyän y maas møj jaduhñ. ³⁹ Jaanä jaduhñ ja'a miämetspä miänaambä: “Møødnijootpaadøø ja'a mmäjøøn ja'a mmädøjc hamuumdu'joot.” ⁴⁰ Hädaa cuhdujt metspä, ja'a ley yhøjx tiecy jaduhñ møødä cøxiä mäduhñtiä ja'a Diosmädia'agy-yajwa'xpähajxy tøø miädia'agy.

⁴¹ Jimnä ja'a fariseoshajxy hänäjty tiäna'ayñä. ⁴² Mänitä Jesús miäyajtøoyy:

—Waamb mijts mmäna'añ ja'a Cristocøxpä. Pøn je'e yhaphajpy tieedyhajpy.

Mänit hajxy yhadsooyy:

—David yhap yhoc je'eduhñ.

⁴³ Mänitä Jesús miänaañ:

—Pero ja'a Dioshèspíritucøxpä ja'a David ja'a Cristo ñämaayy: “Wiindsón.” Jaduhñä David miänaañ:

⁴⁴ Tøøchä Dios ja'a nWiindsón xñämaayyä:

“Häña'aw yaa hahooyhaamby høxtä coonä ja'a mmädsip jaduhñ quia'a mäjädá'agät”, nømä Dios miänaañ.

⁴⁵ Bueno, pø tøø ja'a David ja'a Cristo ñäma'ay: “Wiindsón”, nébiäts jaduhñ yhaphat yhoc-hädät.

⁴⁶ Caj pøn waamb ñä'ägädä hadsooyy. Y cabä Jesús waamb miäyajtøøwänä høxtä coonä hänäjty yho'oga'añ.

23

¹ Mänitä Jesús ja'a cu'ug ñämaayy møødä jiamiøødhajxy:

² —Ja'a ley-yajnähiøøbiädøjc møødä fariseoshajxy, cuhdujtmo'oy hajxy jaduhñ coo ja'a Moisés miädia'agy hajxy yajnähiøøyyä. ³ Mgudiúnäp hajxy jaduhñ waambaty hajxy xñäma'ay. Pero cab hajxy mbahíxät nebiaty hajxy jiatcø'øy. Cabä yhamdsoo

mädia'agy hajxy quiudiuñ. ⁴ Hanaxiä hajxy tsipjaty yajnähið'ø;y; y mänaamb hajxy jaduhñ coo ja'a cu'ug tsipcøxp quiudiúnät. Pero cab hajxy hamdsoo quiudiuñ. ⁵ Jaančh tehñ yajcumayaamb hajxy maa ja'a cu'ugwiinduumän. Paadiä nocyquiuaaybä hajxy yajxón yajniwyiinnähgopxodsø'yii; paady hajxy yajniuið'ø;xodsø'yii. Paadiä wit hajxy piägø'ø;y ja'a høxyoñbä. ⁶ Coo hajxy maa miägay, häña'awaamb hajxy hänäjty maa ja'a meexäteecän. Y coo hajxy ñøcxy tsajtøgooty, häña'awaamb hajxy hänäjty maa ja'a häñaabiejt yajxonbän. ⁷ Coo hajxy maa wiädity cajtooty, yajwiingudsähgø'ø;waamb hajxy hänäjty maa ja'a cu'ugän. Yajnäma'awaamb hajxy hänäjty: “Wiindsøn.”

⁸ Pero mijts, cab hajxy mmänä'anät coo ja'a cu'ug hajxy xñämä'awät: “Wiindsøn.” Tu'ugä mWiindsøn hajxy jaduhñ; ja'a Cristo je'e. Jaduhñ hajxy mnijiäwø'øwøjät nebiä tu'que'expän. ⁹ Cab hajxy pøn mnämä'awät: “Teedy”, hädaa yaabä naaxwiimbä. Tu'ugä mDeedyhajxy jim cøxp. ¹⁰ Cab hajxy mmänä'anät coo pøn xñämä'awät coo hajxy xquiopc-hädät. Tu'jaya'ay hajxy jaduhñ xyhané'emät; ja'a Cristo je'e. ¹¹ Pøn jaduhñ puhbejp ja'a jamiøødhajxy, je'edsä mõjtuung jaduhñ paadaamb maa mijtsän. ¹² Hiñ, pøn jaduhñ yajcumayaamb, cabä mõjtuung jaduhñ piaada'añ. Pero pøn jaduhñ ca'a yajcumayaamb, je'edsä mõjtuung jaduhñ paadaamb.

¹³ Mänitä ley-yajnähiðøbiädøjc-hajxy ñämaayyä mõødä fariseoshajxy:

—Jaduhñ mijts mnibiäda'agyii nebiä hoyhäna'cän; pero cab hajxy mhoyhäna'cä. Haxøøg hajxy mjada'añ mhabeta'añ. Cab hajxy jim mdägø'ø;wa'añ maa ja'a Dioswiinduumän, y cab hajxy jaduhñ mmäna'añ coo wiinghäna'c jim tiägø'ø;wät, hoy hajxy hänäjty hamdsoo jia mäna'añ coo hajxy jim tiägø'ø;wa'añ.

¹⁴ Xiøøbä ja'a Dios hajxy jecy tøø mnä'ä pa'ya'axy. Mänitä yaamgto'oxy ja'a tiøøc hajxy mbøjcä. Paady hajxy hoyhoy mdsaačhpøga'añ.

¹⁵ Wiinduhmyhagajpt jamiøød hajxy naxy mhøxta'ay pøn jaduhñ xmiøødtúnäp maa ja'a mguhdujthajxiän. Y coo hajxy hänäjty tøø mbaady, mänitä haxøøgcuhdujt hajxy myajnähið'ø;y. Maas haxøøg hajxy jaduhñ jiatcø'ø;wa'añ quejee mijts.

¹⁶ Cab hajxy hoy mnä'ägä yajnähið'ø;y. Jaduhñ hajxy mmäna'añ; coo hajxy hänäjty tii myajwiinwaanø'ø;wa'añ, coo ja'a tsajtøjc mgapxpáadät, cab tyijy jaduhñ ñejpiä coo hajxy mga'a cudiúnät neby hajxy hänäjty tøø myajwiinwaanø'ø;yän. Pero jaduhñ hajxy mmänaambä, coo ja'a oro hajxy mgapxpáadät, ja'a jiiby tsajtøgootypä, tsipcøxp hajxy tyijy mgudiúnät. ¹⁷ Mguhmäñøøby hajxy jaduhñ; cab hajxy tii mwiinjuø'ø;y. Haa ca'a, maas tsoobaatp ja'a tsajtøjc quejee ja'a oro. Hiñ, Dios ja'a tsajtøjc jaduhñ cunuu'x. Ja'a oro, ñä'ä yajmägunuuxøøyy je'eduhñ. ¹⁸ Jaanä jaduhñ hajxy mmänaambä, coo mgapxpáadät ja'a cuyoxøhñdy, cábac tyijy jaduhñ ñejpiä coo mga'a cudiúnät. Pero jaduhñ hajxy mmänaambä, coo hajxy mgapxpáadät tijaty tøø mguyoxø'ø;y, tsipcøxpäc tyijy jaduhñ mgudiúnät. ¹⁹ Nej, cab hajxy mnajuø'ø;yä coo ja'a cuyoxøhñdy miaas tsoobaady quejee tijaty hajxy mguyoxøøby. ²⁰ Pøn jaduhñ capxpaatp ja'a cuyoxøhñdy, jaanä jaduhñ quiapxpaatpä tijatycøxpä ja'a jäya'ayhajxy jiiby tøø quiuyoxø'ø;y. ²¹ Pøn jaduhñ capxpaatp ja'a tsajtøjcøxpa, jaanä Dios quiapxpaatpä, ja'a jiiby tsänaabiä tsajtøgooty. ²² Pøn jaduhñ capxpaatp ja'a tsajpootyp, jaanä Dios yhäñaabiejt quiapxpaatpä, mõødä Dios ja'a jim häñaabiä.

²³ Mijts myajcopcøøby mädyii ca'a tsoobaatp coo hajxy hänäjty tii mguyoxø'ø;wa'añ maa ja'a tsajtøjcän. Pero cabä Diosmädia'agy hajxy myajcopcø'ø;y coo jaduhñ miäna'añ coo mhojiäya'ayhädät, coo hojioot mmøødhädät, coo ja'a Diosmädia'agy mmäbögät. Maas hoy jaduhñ coo hajxy mgudiúnät ca'xy pedyii. ²⁴ Jaduhñ mäwiinäts hajxy myajwiinhixø'ø;y nebiä wiindspän; cab hajxy myajcopcø'ø;y mädyii tsoobaatp.

²⁵⁻²⁸ Jaduhñ mijts mja wi'i quiähxø'ø;ga'añ nebiä hoyhäna'cän maa ja'a cu'ugwiinduumän. Pero haxøøgwiinmahñdy hajxy mmøød. Tsipcøxp ja'a mhaxøøgwiinmahñdy hajxy mnajtshixø'ø;wät, jaduhñ hajxy tøyhajt hoy mhídät.

²⁹ Naxy hajxy yajxón mguhmuučh maa ja'a Diosquexypähajxy jecy ñaaxtägøøyyän. Hojiäya'ayhajxy hijty. ³⁰ Mänit hajxy mmäna'añ: “Coo højts häxøpy jecy tøø njugyhájtäm, cabä nhap ndeedy hajxy häxøpy tøø nbuhbéjtäm coo ja'a Diosquexypä hajxy

yagho'cy.” ³¹ Cab jaduñ tiöyyä. Tøø ja'a mhap mdeedy hajxy häxøpy mbajacøøbiä; ³² y jaduñ hajxy mjaanč pajacø'øwaambä.

³³ 'Jaduñ mäwíinäts hajxy mga'awiindöyyä nebiä tshñdiän. Hoyhoy hajxy jaduñ jiiby mdsaačhpøga'añ möjcu'uhaam. ³⁴ Nguexáamböch ja'a Diosquexypä maa mijtsän, møødä cuhwijypiä, møødä yajnahixøøbiä. Näje'e hajxy myagho'oga'añ; näje'e hajxy mmøjpahbeda'añ cruzcøxp; näje'e hajxy mwobho'oga'añ tsajtøgooty. Näje'e hajxy mbäbo'owa'añ cajpt-cajpt. ³⁵ Mijts jaduñ mmøødhadaamby ja'a pojpa coo ja'a ho-jiäya'ayhajxy nägøxiä yagho'cä møødä Abel møødä Zacarías, ja'a Berequías yhuung. Tsajtøgooty ja'a Zacarías yagho'cä; ja'a mhap ja'a mdeedyhajxy jaduñ jecy jatcøöy. ³⁶ Tehm tiøyhajt jaduñ, mijts ja'a pojpa mmøødhadaamby.

³⁷ 'Mijts Jerusalénpäjäya'ay, tøø ja'a Diosquexypä hajxy mguhga'ačh. Jaduñ mäwíin-höch mijts mayhooc tøø nja näwa'añ nebiä tseej ja'a yhuung ñähmuhxtägoyyän; pero caj mijts myajnäwa'ana'añ. ³⁸ Mobädájpøch mijts nnähgue'ega'añ, ³⁹ y cábøch jaduñ xhixaanä høxtä cóonøch hñajty ngädaactägatsa'añ. Mänit hajxy mmäna'ana'añ: “Tsøc yø'øya'ay wiingudsähgøöyyäm, yø'øya'ay Diosquexypä.”

24

¹ Mänitä Jesúshajxy piädsøömy tsajtøgooty. Mänitä Jesús ñämaayyä ja'a miägu'ughajpähajxy:

—Huug hix yø'ø möj tsajtøjc.

² Mänitä Jesús yhadsooyy:

—Tehm tiøyhájthøch mijts nnäma'ay, yø'ø möj tsajtøjcä, cøxaamb jaduñ piuma'añ; cøxaamb jaduñ quiuhdägoyya'añ.

³ Mänit hajxy ñøcxy maa ja'a Olivostunän. Mänitä Jesús yhøxtaacy naaxwiin. Mänitä Jesús hamee'ch ñämaayyä ja'a miägu'ughajpähajxy:

—Højts hawáanäc mänaa yø'ø tsajtøjc jaduñ piuma'añ. Mädyii hijtahnd jaduñ cähxø'øgaamb coo hñajty mgädaactägatsa'añ, coo ja'a naaxwiimbä hñajty wyiimbida'añ.

⁴ Mänitä Jesús miänaañ:

—Ca'a hajxy myajwiinhøøñ. ⁵ Minaamb hajxy nämay. Jaduñ hajxy ñibiäda'aga'añii nébiøch høøchän. Jaduñ hajxy miäna'ana'añ: “Høøch je'e Cristo.” Nämayyä jäya'ay yajwiinhøøna'añ. ⁶ Mänit hajxy mmädoyhada'añ coo ja'a tsip jaduñ tøø piädø'øgy. Pero cab hajxy mdsähgø'øwät. Tsipcøxpä häyohn jaduñ jiada'añii. Pero cajnä hñajty yhabaady coo ja'a naaxwiimbä hñajty wyiimbida'añ. ⁷ Cajpthaam hajxy jaduñ ñimiädsibø'øwa'añii. Naxaambä yuuba'am wiinduhmyhagajpt møødä hujx. ⁸ Pero nä'ä tshñdaacnä ja'a tsø'ty hñajty jaduñ.

⁹ 'Mänit mijts myaghäyoowhixa'añ myajyagho'oga'añ. Mänit mijts myajmahanhada'añ maa ja'a høøchcøxpän wiinduhmyhagajpt. ¹⁰ Mänitä Dios hajxy ñajtshixø'øwa'añ nämay. Mänit hajxy ñimiähanhada'añii hamiñ haxøpy møødä hajxy tijaty yajniñähsøma'añii. ¹¹ Wäditaambä høhndaacpähajxy hñajty may. Mäna'anaamb hajxy hñajty cooc tyijy hajxy wiädity ja'a Dioscøxpä. Nämayyä cu'ughajxy yajwiinhøøna'añ. ¹² Cab hajxy ñimiägu'ughadäänänä je'eguiøxpä coo ja'a haxøøgpä hñajty jiaanč tehñ wiädity. ¹³ Pero pønjaty jaduñ ca'a jøjwa'adsaamb, je'eds ja'a hoybä paadaamb. ¹⁴ Wiinduhmyhagajpt ja'a mädia'agy wiädita'añ mädyii jaduñ mänaamb coo ja'a Dios ja'a miäjaa yajcähxø'øga'añ. Cøxaambä cu'ughajxy miädoyhada'añ; mänitäts ja'a naaxwiimbä wyiimbida'añ.

¹⁵ '(Pøn hädaa nocy capxp, ween jaduñ wyiinjuø'øy.) Ja'a Daniel, Dios jaduñ jecy quejx. Je'eduhñ cujahy coo ja'a haxøøgpä miedsa'añ maa ja'a Diostøjcän, y coo mänit jaduñ yajma'ada'añ. Coo ja'a haxøøgpä hajxy mhíxät, ¹⁶ mänit hajxy päyø'øguiä mnøcxät maa ja'a tunän, mijts yaa tsänaabiä Judeanaaxooty. ¹⁷ Y ja'a hajxy hijpä tøjwiing, jaduhyä hajxy piäyø'tøwät, cab hajxy jaduñ tii yajpädsømät tøgooty. ¹⁸ Y ja'a hajxy jim hijpä camjooty, jaduhyä hajxy piäyø'tøøbät, cab hajxy jaduñ nøcxy tii wyich

maa ja'a tiöjcän. ¹⁹ Pobre ja'a to'oxiojc-hajxy hänajty maaxhuungmøødpä, møød hajxy hänajty huungyajtsi'tspä. ²⁰ Mmänuu'xtá'agäp ja'a Dios hajxy coo hajxy ween mga'a päyø'ogy coo hänajty tiøøhcä, ni ja'a poo'xxiøøjooty. ²¹ Porque jaanč tehñ miøc ja'a tsaächpä ñaxa'añ. Ni mänaa jaduhñ tøø quia'a jadyii nebiä jaduhñ jiada'añiiñ. Y caj mänaa jiajtägatsa'añii jadähoocän. ²² Pero Dios jaduhñ tøø yajnähdijy coo ja'a tsaächpä jejcy quia'a jadøøjät, je'eguiøxpä coo chocy ja'a tøøbä wyiimbíyyäbä. Coo häxøpy jaduhñ tøø quia'a yajnähdijy, caj pøn häxøpy cho'oga'añ.

²³ 'Coo mijts pøn xñämä'awät: "Huug hiñ, chaadsä Cristo", o "Huug hiñ, xiids je'e", cab hajxy mmäbögät. ²⁴ Hiñ, minaambä wiinhøhmbähajxy; jaduhñ mäwiin hajxy ñibiäda'aga'añii nebiä Criston; jaduhñ mäwiinäts hajxy ñibiäda'aga'añii nebiä Diosquexypän. Yajcähxø'ogaamby hajxy ja'a hoy-yagjuøøñäjatypä nebiä cu'ug hajxy jaduhñ wyiinhøønät; høxtä ja wiinhøønánäp hajxy je'ebä, ja'a Dios tøø wyiimbíyyäbä. ²⁵ Chaads mijts nnäma'ay jäguemiä. ²⁶ Coo pøn xñämä'awät: "Huug hiñ, jim wiädity pactuum", cab hajxy jim mnócäät; o coo hajxy xñämä'awät: "Huug hiñ, jiiby je'e yu'uçhtium", cab hajxy mmäbögät. ²⁷ Cooč hänajty nwiimbida'añ, høøch ja'a Diosquexypä, jaduhñ mäwiin quiähxø'oga'añ nebiä wädsucän. Wiinduhmyhagájpthøch ja'a jäya'ayhajxy xyhixa'añ. ²⁸ Tsipcøxp jaduhñ jiada'añii nébiøch chaa nmäna'añ.

²⁹ 'Coo ja'a tsaächpä hänajty tøø ñajxnä, mänitiä hänajty wyiingoodsø'øwa'añ; cabä po'o hänajty yhana'añ. Chaadsä madsa'a may quia'awa'añ; chaadsä tsajt chäyuyya'añ. ³⁰ Mänitøch ja'a nhijxtahñ jim quiähxø'oga'añ tsajpootyp cooč hänajty nwiimbida'añ, høøch ja'a Diosquexypä. Mänitä jäya'ayhajxy wiinduhmyhagajpt jiø'øwa'añ xiuudsä'añ. Mänitøch hajxy xyhixa'añ cooč hänajty ngäda'aga'añ jocjooty. Diosmäjaaháamhøch jaduhñ ngäda'aga'añ hajájjäp. ³¹ Mänitøch ja'a nmoonsä tsajpootypä nhane'ema'añ coo ween hajxy møc xiu'uxy xuuxthaam. Mänitøch ja'a nwiimbiybähajxy xyajtu'ugmugaanä wiinduhmyhagajtpä.

³² 'Tsøg ja'a tsø'ty jaduhñ yajmäbáatäm nebiä piidsquepiän. Coo yhaabiädsømy, mänit hajxy mnajuø'øy coo piødtägøøñä. ³³ Jaduhñ mäwiinäts je'e, coo ja'a tsø'ty hajxy jaduhñ mhíxät, mänit hajxy mnajuø'øwät cooč hänajty mobädajpä nwiimbida'añ. ³⁴ Tøyhájtäts mijts nnäma'ay, cooč hänajty nwiimbida'añ, cajnä jäya'ayhajxy hänajty quiøxy ho'ogy, ja'a hajxy jäda'ahaty jugyhajpä. ³⁵ Ja'a tsajtwiing jaduhñ tægoyyaamb møødä naaxwiimbä. Tøjiadaamb jaduhñ nébiøch cham nmädia'aguiän.

³⁶ 'Pero ni pøn jaduhñ quia'a najuø'øy mänaaxøø jiada'añii ni mäduhnajtä. Ni ja'a Diosmoonsä tsajpootypä hajxy quia'a najuø'øy. Ni høøch nga'a najuø'øy, høøch ja'a Dioshuung. Jagooyyä Dios jaduhñ ñajuø'øy, ja'a nDeedyhájätäm.

³⁷ 'Cooč jaduhñ nwiimbida'añ, høøch ja'a Diosquexypä, jaduhñ mäwiinäts hänajty jiada'añii nebiä Noé jecy jiajtiän. ³⁸ Cajnä Dios ja'a nøøgomdägoy hänajty quiexyñä. Jimä jäya'ayhajxy hänajty quia'y yhu'ugy, piøcy yhu'ugy, høxtä coo ja'a Noé hänajty tøø tiägø'øy barcojooty. ³⁹ Ni mänit hajxy hänajty quia'a najuø'øyñä høxtä coonä ja'a nøøgomdägoy miejch. Mänit hajxy cøjx chømdu'ubøgyii. Jaduhñ mäwiinäts jiadáanäbä cooč hänajty nwiimbida'añ, høøch ja'a Diosquexypä. ⁴⁰ Mänitxøø ja'a ya'adiøjc-hajxy hänajty nämetsc yhida'añ camjooty. Tu'ug hänajty yajnøcxa'añii; tu'ug hänajty yajmähmø'øwa'añii. ⁴¹ Metscä to'oxiojc-hajxy hänajty jiøch. Tu'ug hänajty yajnøcxa'añii; tu'ug hänajty yajmähmø'øwa'añii.

⁴² 'Nähix hahixøø hajxy mhídät; cab hajxy mnajuø'øy mänaa ja'a mWiindsønñhajxy quiäda'aga'añ. ⁴³ Jaduhñ mäwiinäts ja'a cudøjc-hajxy, coo hajxy jaduhñ ñajuø'øwät mäduhnajtä ja'a mee'tspä miedsa'añ coods, jujcy hajxy jaduhñ yhídät, y cabä mee'tspä hajxy jaduhñ yajtøjtägø'øwät. ⁴⁴ Jaduhñ mäwiinäts mijtspä, nähix hahixøø hajxy mhídät. Cábøch mijts xñäl'ägä najuø'øwät mänáajøch jaduhñ ngäda'aga'añ, høøch ja'a Diosquexypä.

⁴⁵ 'Ja'a moonsäwiindsøn, je'edsä miämoonsä yajcaaby maa ja'a wyiindsøn tiøjcän. Hoy jaduhñ coo ja'a wyiindsøn miädia'agy miäbøjcät, coo cuhwijy tiúnät. ⁴⁶ Coo ja'a wyiindsøn miédsät, jootcujc ja'a moonsä ñijiäwø'øwa'añii mädyii jaduhñ cudiumb.

⁴⁷ Tøyhájtäts mijts nnäma'ay, jaduñä moonsä piäda'aga'añii nebiä wyiindsónän jim maa ja'a wyiindsón tiøjcän, mäduññtiä ja'a wyiindsón hänajty miøødä. ⁴⁸ Pero ja'a moonsä ca'a hoybä, je'eds jaduñ mäna'anaamb cooc tyijy ja'a wyiindsón quia'a tsoj medsa'añ. ⁴⁹ Mänitä miämoonsä tiägø'owa'añ häyoowhijxpä. Mänitä mu'ugyjiäya'ay miøødtägø'owa'añ caabiä huucpä. ⁵⁰ Cabä wyiindsón jaduñ yhuuc jahmiedsaannä coo wyiimbida'añ. Coo ja'a wyiindsón jaduñ jiaančh médsät, ⁵¹ mänitäts ja'a craa hoyhoy quiümädowa'añ møødä miäga'awiindøybä. Mänit hajxy jiø'owa'añ xiuudsä'añ.

25

¹ 'Coo ja'a Dios ja'a miäjaa jaduñ yajcähxø'oga'añ, jaduñ mäwíinäts je'e nebiä pøc hu'ug tøø jiadyiijän. Jimä cäxyiidøjc ja'a jamiø'ød hajxy hänajty yhahixy. Nämajc hajxy hänajty. Candilcón hajxy hänajty yhahixy. ²⁻⁴ Nämägooxc-hajxy, cab hajxy hänajty nähix hahixø'ø tøø tiu'ubøcy. Cabä guiaastä hajxy hänajty nä'ä tagø'øbä tøø jiuuy. Pero ja'a jiamiøødhajxy ja'a jaac nämägooxpä, nähix hahixø'ø hajxy hänajty tøø tiu'ubøcy mäbøjpä. Nä'ä tagø'øbä ja'a guiaastä hajxy hänajty tøø jiuuy. ⁵ Coo ja'a jamiø'ød jaduñ quia'a tsoj mejch, mänitä cäxyiidøjc-hajxy cøjx miaaho'ogy. ⁶ Coo quiuptsuhmdäjøøyy, mänitä jäya'ay tu'ug yaaxy: "Xiidsä jamiø'ød miech; nøcx hajxy jøjcubaadø'ow." ⁷ Mänitä cäxyiidøjc-hajxy cøjx piädø'ogy. Mänitä quiandilhajxy quiuhdøø'xøøyy. ⁸ Mänit hajxy miänaañ, ja'a hajxy hänajty nähix hahixø'ø tøø quia'a tu'ubøquiäbä: "Højtsä gaastä weeñtiä móoyyác; pi'idsaamb højtsä ngandil jaduñ." ⁹ Mänit hajxy yhadsooyy, ja'a hajxy hänajty nähix hahixø'ø tøø tiu'ubøquiäbä: "Caj, ni jaduñ quia'a mädoyhada'añ maa ja'a højtsøxpän. Nøcx hajxy jaduñ ñjiúuyyäxä maa tioogyiijän." ¹⁰ Mänit hajxy ñøcxxy juubiä. Mänitä jamiø'ød jaduñ miejch. Ja'a cäxyiidøjc-hajxy gaastämøødpä, mänitä jamiø'ød hajxy miøødtägøøyy tøgooty. Mänitä tøjc hajxy yhagøøñä. ¹¹ Mänitä cäxyiidøjc-hajxy jia mejtsnä, ja'a gaastä hajxy hoy tøø jiúyyäbä. Mänitä hajxy jia cugapxøøyy: "Wiindsón, huuc yaghawa'ads hädaa tøjc." ¹² Mänit hajxy ñämaayyä: "Cábøch mijts jaduñ nhixiä. Tøyhajt jaduñ."

¹³ Coo ja'a Jesús jaduñ miädiaacpädoøyy, mänit miänaañ:

—Jaduñ hajxy mnibiäda'agøøjät nähix hahixø'ø. Caj mijts mnajuø'øy mänáajøch nwiimbida'añ, høøch ja'a Diosquexypä.

¹⁴ 'Coo ja'a Dios ja'a miäjaa jaduñ yajcähxø'oga'añ, jaduñ mäwíinäts je'e nebiä jäya'ay tu'ugpä. Nøcxaamb hänajty je'e wiingnaaxooty. Mänitä mioonsähajxy miøjyaaxy. Mänitä xiädø'øñ yajmämähmøøyy.

¹⁵ 'Tu'ug jaduñ yajmämähmøøyyä mägooxmillón. Paady may miooyyä coo hänajty jiaty xädø'øñyajmayø'ow. Tu'ug jaduñ yajmämähmøøyyä mejtsmillón. Tu'ug jaduñ yajmämähmøøyyä tu'millón. Mänitä wiindsón tiu'ubøjcy. ¹⁶ Jaaya'ay ja'a mägooxmillón wiingpójcäbä, yajtagøøyy jaduñ niyhajjtäbä. Yajmayøøyy ja'a xädø'øñ jaduñ; mägooxmillón jaduñ jiaac paaty. ¹⁷ Jaanä jaduñduhmbä, jaaya'ay ja'a mejtsmillón wiingpójcäbä, mejtsmillón jaduñ jiaac paaty. ¹⁸ Pero jaaya'ay ja'a tu'millón wiingpójcäbä, hoy ja'a jut jaduñ tiajy. Mänitä wyiindsón xiädø'øñ hoy yú'tsanä jutjooty.

¹⁹ 'Cujecy ja'a wyiindsónhajxy miejtstägajch. Mänit hajxy tiägøøyy cueentäyajpäsøømbä. ²⁰ Jayøjp jaaya'ay miejch ja'a mägooxmillón hänajty tøø wyiingpøquiäbä. Mänitä wyiindsón miooyy cøxiä møødä mägooxmillón tøø jiaac páadiäbä. Mänit miänaañ: "Wiindsón, mägooxmillónhöch jaduñ xmiooyy; chaads je'e møødä mägooxmillónhöch tøø njaac yajmayø'øyäbä." ²¹ Mänitä wyiindsón miänaañ: "Hoy miich jaduñ tøø mgudiñ. Wéeñtiøch miich nyajmämähmøøyy. Maas máyhøch miich ja'a xädø'øñ jaduñ njaac mo'owa'añ neby jaduñ mjaac yajmayø'owät. Tøjtägø'ow tøgooty, ween nxoondáacäm." ²² Mänitä craa jiaac mejch ja'a mejtsmillón hänajty tøø wyiingpøquiäbä. Mänit miänaañ: "Wiindsón, mejtsmillónhöch jaduñ xmiooyy; chaads je'e møødä mejtsmillónhöch tøø njaac yajmayø'øyäbä." ²³ Mänitä wyiindsón miänáangumbä: "Hoy miich jaduñ tøø mgudiñ. Wéeñtiøch miich jaduñ nyajmämähmøøyy. Maas máyhøch miich ja'a xädø'øñ jaduñ njaac mo'owa'añ neby jaduñ

mjaac yajmay'owät. Tøjtägø'ow tøgooty, ween nxoondáacäm.”²⁴ Mänitá craa jiaac tehñ miejch ja'a tu'millón hánajty tøø wyiingpóquiäbä. Mänit miánaañ: “Wiindsón, nnajuóobiöch coo miičh hojioot mga'a møødä. Miičh ja'a xädø'øn jaduhñ mbaadaamby maa tøø mga'a tuñän.²⁵ Páadyhöch hijty ndsähgø'oy. Páadyhöch ja'a xädø'øn hoy nyu'učh naaxjutjooty. Huug hix, chaads je'e.”²⁶ Mänitá wyiindsón yhadsooy: “Caj miičh hoy mgudiñ. Mjaančh tehñ ñuux miičh. Mnajuøøby miičh jaduhñ coočh hojioot nga'a møødä, coočhä xädø'øn nbaada'añ maačh tøø nga'a tuñän.²⁷ Páadyhöch nxädø'øn jaduhñ cu xpiadaacä bancojooty. Jiiby cu miayøøyy. Mänitøch nxädø'øn cu xmiooyy møødä xädø'øn huung.”²⁸ Mänitá hajxy ñämaayy, ja'a hajxy jim tänaabiä: “Pøjcä yø'ø craa xädø'øn hajxy tu'millón; mo'ow yø'ø craa hajxy ja'a majcmillónmøødpä.²⁹ Pøn may nä'ägä møød, maas may jaduhñ mio'owa'añii. Hanaxiä jaduhñ miøødhada'añ. Pero pøn jaduhñ weeñtiä møød, pøgáañäxäp je'e mäduhñtiä miøødä.³⁰ Yø'ø craa jaančh tehñ ñuuxpä, høxwijtspädsøm hajxy hagogdstuum. Jiiby jaduhñ jiø'owa'añ xiuudsa'añ.”

³¹ 'Coočh jaduhñ ngädá'agät hanehmbä, høøch ja'a Diosquexypä, jímhøch jaduhñ nhäña'awa'añ maa ja'a hoyhäänaabiejtän ja'a yajxonbä. Quípxyhøch nmoonsä tsajpootypähajxy xmiøødcäda'aga'añ nägøxiä.³² Mänitøch ja'a jäya'ayhajxy xwyi-ingumedsø'owa'añ ja'a wiinduhmyhagajtpä. Mänitøch hajxy jaduhñ nyajwa'xa'añ nebiä meegän nebiä chiibän.³³ Nbäda'agäämbiöch näje'e maačh nhahooguiø'ojän, näje'e maačh nhanajtycø'ojän.³⁴ Ja'a hajxy hijpä hahooguiø'ø, mänitøch hajxy nnä-ma'awa'añ: “Min hajxy yam; tøøch mijts nDeedy xwyiimbiy coo hajxy mhané'emät. Jequiän hajxy jaduhñ xwyiimbiyy, cajnä ja'a naaxwiin hánajty yhädiñ.³⁵ Mänáajøch hijty nyäho'ogyiijän, mänitøch hajxy xyajcaayy. Mänáajøch hijty ndødsø'oyiijän, mänitøch hajxy xyajnøøhuucy. Mänáajøch hijty nwäditiän nebiä jäguembäya'ayän, mänitøch hajxy xyaghamejtstaacy.³⁶ Mänáajøch wit hijty nga'a møødän, mänitøch hajxy xñähxojxy. Mänáajøch hijty mba'amgo'na'ayän, ndsumyhäña'ayän, mänitøch hajxy hoy xquiuhixy.”³⁷ Ja'a hajxy hijpä hahooguiø'ø, mänit hajxy yhadsowa'añ: “Wiindsón, mänaa højts miičh tøø nyajcay; mänaa højts miičh tøø nyajnøøhu'ugy;³⁸ mänaa højts miičh tøø nyaghamejtsta'agy; mänaa højts miičh tøø nnähxoxy;³⁹ mänaa højts miičh hoy tøø nguhixy.”⁴⁰ Mänitøch nhadsowa'añ: “Tøyhajt mijts nnäma'ay, coočh mijts ja'a njamiøødhajxy tøø xñäxuu'tsä, hoy hajxy quia'a ja møjtøjcä, jaduhñ mäwiinhøch tøø xñäxuu'tspä.”

⁴¹ 'Mänitøch hajxy nnäma'awa'añ ja'a hajxy hanajtycø'øbä: “Jua'ads hajxy jim, mijts haxøøgtuum hijpä. Häda'ag hajxy jiiby maa ja'a jøøn mänaa quia'a pi'ichän. Paadiä jøøn tøø piäda'agyii, jiibiä møjcu'uhajxy chaächpøga'añ.⁴² Mänáajøch hijty nyäho'ogyiijän, cábøch hajxy xyajcaayy; mänáajøch hijty ndødsø'oyiijän, cábøch hajxy xyajnøøhuucy;⁴³ mänáajøch hijty nwäditiän nebiä jäguembäya'ayän, cábøch hajxy xyaghamejtstaacy; mänáajøch wit hijty nga'a møødän, cábøch wit hajxy xmiooyy; mänáajøch hijty nba'amgo'na'ayän, ndsumyhäña'ayän, cábøch hajxy hoy xquiuhixy.”⁴⁴ Mänit hajxy miäna'ana'añ: “Wiindsón, mänaa højts miičh nga'a puhbejty; mänaa højts miičh nhijxy coo hánajty myäho'ogyii, coo hánajty mdødsø'oyii, coo hánajty mwädity nebiä jäguembäya'ayän, coo wit hánajty mga'a møødä, coo hánajty mba'amgo'na'ay, coo hánajty mdsuymyhäña'ay.”⁴⁵ Mänitøch nhadsowa'añ: “Tøyhajt mijts nnäma'ay, coočh mijts ja'a njamiøødhajxy tøø xquia'a näxuu'tsä, hoy hajxy quia'a ja møjtøjcä, jaduhñ mäwiinhøch tøø xquia'a näxuu'tspä.”⁴⁶ Yø'øds hajxy jiiby häda'agaamb maa hajxy chaächpøga'añän cøjxta'axiøø. Pero pønjátyhöch tøø nwiimbiy, je'eds hajxy cøjxta'axiøø jugyhadaamb nebiä Dios jugyhatian.

26

¹ Coo ja'a Jesús jaduhñ miädiaacpädeøyy, mänit ñämaayy ja'a jiamiøødhajxy:

² —Mnajuøøby hajxy jaduhñ coo ja'a pascuaxøø cumaaxc yhadsoojø'owa'añ. Mänitøch hajxy xyajcø'ødägø'owa'añ, høøch ja'a Diosquexypä. Mänitøch hajxy xmiøj-pahbeda'añ cruzcøxp.

³ Mänitä teedywiindsøn4 Mänit hajxy quiojyquiapxyhajty nebiä Jesús hajxy miádsät, neby hajxy jaduhñ yaghó'ogät. ⁵ Mänit hajxy ñiñämaayyá:

—Cab jaduhñ yhooyä coo hajxy nmájtsämät ja'a xøøjooty coo ja'a cu'ughajxy ñä'ä haamhadät.

⁶ Jimä Jesús hänajty maa ja'a cajpt jaduhñ xiøhatiän Betania, maa ja'a Simón tiøgootiän, ja'a hänajty tøø ñähwa'açhíijäbä ja'a haxøøgpa'am. ⁷ Jimä Jesús hänajty quiay, mänitä to'oxiøjc tu'ug miejch, perfumecón, ja'a jaançh tehñ chowbä. Mänitä Jesús ja'a perfume yajcuhda'xøøyyä. ⁸ Coo ja'a Jesús jiamiøødhajxy jaduhñ yhiijxy, cab hajxy jaduhñ yhojiäwøøyy. Mänit hajxy miänaañ:

—Tii yø'ø perfume jaduhñ coo yaghäyooyy. ⁹ Coo jaduhñ cu tíoocy, mänitä häyoobäya'ay jaduhñ cu ñä'ägä puhbejty.

¹⁰ Coo ja'a Jesús jaduhñ miädooyy, mänit miänaañ:

—Ca'a yø'ø to'oxiøjc hajxy mhadsipy. Ca'a yhaxøøgpä jaduhñ tøø tiuñ maa ja'a høøchcøxpän. ¹¹ Ja'a häyoobädøjc, homiänaajä mijts jaduhñ xmiøødhida'añ; pero høøch, cáboch mijts jejcy nmøødhida'añ. ¹² Páadyhöch yø'ø to'oxiøjc perfume xyajcuhda'xøøyy, cooch mobädajpä nho'oga'añ. ¹³ Tøyhájttäts mijts nnäma'ay, homiaajä hädaa hoguiapxy hädaa homiädia'agy hajxy yaghawa'xø'øwät maa hädaa yaabä naaxwiinän, mänit hajxy jaduhñ miädia'aga'añ nébiøch yø'ø to'oxiøjc perfume tøø xyajcuhda'xø'øy. Jaduhñds yø'ø to'oxiøjc jiahmiedsa'añii.

¹⁴⁻¹⁵ Ja'a Jesús jiamiøødhajxy ja'a nämajmetspä, tu'ug hänajty xiøhaty Judas Iscariote. Mänitä Judas ja'a teedywiindsøn

—Mädühñtiøch hajxy xmiäjüyät cooch ja'a Jesús hajxy nyajcø'ødägø'øwät.

Mänitä Judas miooyyä hii'xmajc plataxadø'øñ. ¹⁶ Mänit wyiinmahñdyhajty nebiä Jesús yajcø'ødägø'øwät.

¹⁷ Ja'a tehñ xiøøhadsuujø'ø hajxy hänajty quiuhdujthaty coo ja'a tsajcaagy hajxy hänajty quiay ja'a ca'a tsoomiøødpä. Mänitä Jesús ja'a jiamiøød ñämejtsä. Mänit miäyajtøøwä:

—Maa hajxy ndsuugáayyämät ja'a pascuaxøøjooty.

¹⁸ Mänitä Jesús yhadsooyy:

—Nøcx hajxy cajptooty maaçh nmägu'ughajpä tiøjcän. Mänit hajxy mnämá'awät: “Nøm højts nWiindsón miäna'añ cooc tøø yhabáatäxä, y cooc højts yaa ndsuugaya'añ ja'a pascuaxøøjooty maa miich mdøgootiän.”

¹⁹ Mänit hajxy jiaançh cudiuuñ neby hajxy ñämaayyän. Mänitä jøø'xy hajxy yhädiuuñ.

²⁰ Coo quioodsøøyy, jimä Jesús hajxy hänajty quiay møødä nämajmetspä. ²¹ Mänitä Jesús miänaañ caaguiujc:

—Tøyhájttäts mijts nnäma'ay cooch mijts mjamiøød tu'jäya'ay xyajcø'ødägø'øwa'añ maaçh nmädsipän.

²² Mänit hajxy jiootmadiägøøyy. Mänit hajxy tiägøøyy yajtøøbä:

—Wiindsón, nej, høøch je'ejä.

²³ Mänitä Jesús yhadsooyy:

—Ja'açh tu'ugtexy xmiøødcaamiujpä, je'eçhäts jaduhñ xyajcø'ødägø'øwaamb.

²⁴ Jaduhñhöch njada'añ nhabeta'añ, høøch ja'a Diosquexypä, nebiä Diosmädia'agy jaduhñ miäna'añän. Pero jaançh tehñ chaaçhpøogaamb jaaya'ay häyoobä ja'açh tøø xyhawaanø'øyäbä. Mejor häxøpy tøø quia'a miñ tøø quia'a ca'ay.

²⁵ Mänitä Judas miänaañ, ja'a hänajty tøø yhawaanø'øyäbä:

—Wiindsón, nej, høøch je'ejä.

Mänitä Jesús yhadsooyy:

—Miich je'e.

²⁶ Jimnä hajxy hänajty quiayñä, mänitä Jesús tsajcaagy quionø'cy. Mänitä Dioscu-jú'uyäp yejcy. Mänitä tsajcaagy qyijwa'xy. Mänitä jiamioød mioooy. Mänit miänaañ:

—Cay hajxy; jaduñ mäwiin hädaa tsajcaagy nébiøchä nni'x nébiøchä ngopcän.

²⁷ Mänitä Jesús taza quionø'cy. Mänitä Dioscuju'uyäp yéjcumbä. Mänitä jiamioød ja'a taza mioooy. Mänitä Jesús miänaañ:

—Hu'ug hädaa vino hajxy nägøxiä.

Mänitä vino hajxy yhuucmujcy tu'ugtaza.

²⁸ Mänitä Jesús miänáangumbä:

—Jaduñ mäwiin hädaa vino nébiøchä nnø'tiän. Hijxtahñd jaduñ coöchä jemyguiuhdujt nyajwiimbädsøma'añ coöchä jäya'ayhajxy may nnähho'tu'uda'añ, coöch jaduñ nyajnähwä'adsaanä ja'a piojpa quiädieey. ²⁹ Pero nnämäabiøch mijts coöch hädaa vino nga'a huuctägatsa'añ høxtä cóonøch hänajty tøø nho'ogy. Mänitøch mijts jaduñ nmøødhuucmujtägatsa'añ jim maaçhä nDeedy jaduñ yhane'emiän.

³⁰ Mänitä Dioshöy hajxy yhöøyy. Mänit hajxy ñøcxy maa ja'a Olivostunän. ³¹ Mänitä Jesús miänaañ:

—Hädaa coods, cáboch mijts ja'a nmädia'agy hajxy hoy xmiäbøgáañänä. Mänitøch hajxy jaduñ xñähgue'ega'añ. Jaduñä Diosmädia'agy miäna'añ: “Nyagho'ogáambiøch ja'a meegcueendähajpä. Mänitä meeghajxy xii yaa ñøcxø'øwa'añ.” ³² Pero coöch hänajty tøø njujypioocy, mänitøch nnøcxø'øga'añ jim Galilea; mänit mijts høxhaam mnøcxa'añ.

³³ Mänitä Pedro miänaañ:

—Hoy miich hajxy nägøxiä xjia nähgué'egät, cáboch miich nnähgué'egät.

³⁴ Mänitä Jesús miänaañ:

—Tøyhájthøch miich nnäma'ay, coo ja'a tseey hänajty quia'a ya'axyñä hädaa coods, tøø miich hänajty tægøøghooc nnijioøgapxyii cóogøch tyijy jaduñ xquia'a hixiä.

³⁵ Mänitä Pedro miänaañ:

—Høyhöch miich näguipxy nja møødhó'ogät, cáboch jaduñ nnijioøgapxøjät.

Jaduñ hajxy nägøxiä piamänaambä.

³⁶ Mänitä Jesús hajxy miejch maa hänajty xiøhatiän Getsemaní. Mänitä Jesús miänaañ:

—Yaa hajxy høxta'ag naaxwiin; nõcxyhöch jimhaamby nhuuc Diospa'ya'axy.

³⁷ Mänitä Jesús ja'a Pedro wioonøcxy hawiing møødä Zebedeo yhuunghajxy nämetscä. Mänitä Jesús tiägøøyy jootmayhajpä hoyhoy. ³⁸ Mänit miänaañ:

—Jaanç tehñ jootmayhájjøch jaduñ. Jadúñhöch nnijiwø'øyii nebiä ho'ogaambän. Yaa hajxy mmähmø'øwät. Tsøg hajxy jujcy hjítäm.

³⁹ Mänitä Jesús weentiä jiaac nõcxy. Mänit miägutscädaacy. Mänit Dyiospa'yaaxy:

—Teedy, miich mee'x, ca'a yhendijy jaduñ cu ndsaaçhpøjcy. Pero ca'a yhöøchä nguhdujt jaduñ nyajtunaamby; miichä mguhdujt nyajtunáañäm.

⁴⁰ Mänitä Jesús wyiimbijty maa ja'a nädägøøgpä hänajty tøø ñähgue'eguiän. Jim hajxy hänajty mia'ay coo ja'a Jesús jim miejch. Mänitä Pedro ñämaayyä:

—Nej, ni tu'horä hajxy jujcy mga'a hida'añä. ⁴¹ Jujcy hajxy mhídät. MDiospa'yá'axäp hajxy jaduñ nebiä mõjcu'u hajxy jaduñ xquia'a jøcaxø'øwät. Jia tsojpiä mjoothajxy jaduñ coo hajxy jujcy mhídät, pero ja'a mni'x ja'a mgopc-hajxy jaduñ ca'a mee'xtugaamb.

⁴² Ja'a miämetsc-hoocpä Jesús ñøcxy Diospa'yaaxpä:

—Teedy, miich mee'x, cáboch ndijy jaduñ cu ndsaaçhpøjcy. Pero ween miichä mguhdujt nyajtúnäm.

⁴³ Mänit wyiimbijcumbä maa ja'a Pedrohajxiän. Tøø hajxy hänajty miaahó'cumbä. Jaanç tehñ mia'awaamb hajxy hänajty hanaxiä. ⁴⁴ Mänitä Jesús ñähguéeccumbä. Mänit nõcxcumbä miädägøøghoocpä Diospa'yaaxpä. Mänit jaduhyä miänáangumbä.

⁴⁵ Mänit miéjtscumbä maa ja'a Pedrohajxiän. Mänit miänaañ:

—Ma'awxä hajxy, poo'xxä hajxy. Tøøds je'e yhabaady coöch hajxy xyajcø'ødägø'øwa'añ maa ja'a cubojpä cugädieejäya'ayän, høøch ja'a Diosquexypä.

⁴⁶ Pädø'øg hajxy, jamds hajxy. Xiids je'e myiñ ja'a høøch jaduñ xyegaambä.

⁴⁷ Mädiaacnä ja'a Jesús hänajty coo ja'a Judas miejch, ja'a Jesús hänajty tøø miøød-wäditiäbä ja'a miämajmetspä. Jaanč tehñ miay ja'a jäya'ay hänajty miøødä, pu-jxtmøødpä, paxycappä. Ja'a teedywiindsøn hajxy jaduhñ quejx møødä martuumädøjc.

⁴⁸ Ja'a Judas ja'a Jesús hänajty yegaamb. Tøø ja'a Judas ja'a jäya'ay hänajty ñäma'ay:

—Ja'a høøch hänajty ndsu'xaambiä, je'eds hajxy mmádsäp.

⁴⁹ Mänitä Judas ja'a Jesús ñämejch. Mänitä yajpoo'xy. Mänit chu'xy. ⁵⁰ Mänitä Jesús miänaañ:

—Mägu'ughajpä, tiič xwia'ana'añ.

Mänitä Jesús hajxy miajch.

⁵¹ Mänitä Jesús jiamiøød ja'a piujxt jiuu'ty. Mänitä teedywiindsøn mioonsä tu'ug tiaatspujxtúutäxä. ⁵² Mänitä Jesús miänaañ:

—Cuyuugø'ow yø'ø mbujxt. Pønjaty jaduhñ pädø'p pujxthaam, jaanä pujxthaam yho'ogaambä. ⁵³ Nej, caj miič mnajuø'oyä, coočhä nDeedy jaduhñ nnämä'awät cooč ween xpiuhbety, mänitøch ja'a mioonsä tsajpootypä milhaam xyajnäguéxät. ⁵⁴ Pero cooč jaduhñ nnämä'awät, cabä Diosmädia'agy jaduhñ tiøjiädät maa jaduhñ myiñän cujaay cooč jaduhñ tsipcøxp njada'añ nhabet'añ.

⁵⁵ Mänitä Jesús ja'a majiäya'ay ñämaayy:

—Pujxtmøød paxycap hajxy tøø mbädø'ogy. Jaduhñhøch hajxy tøø xmiach nebiä mee'tspan. Jabom-jabomhøch mijts hijty nyajñähixø'oy tsajtøgooty, y cábøch hajxy mänaa tøø xmiach. ⁵⁶ Pero páadyhøch jaduhñ njaty nhabety, jaduhñä Diosmädia'agy jaduhñ tiøjiädät, nebiä Diosquexypähajxy jecy quiujahyyän.

Mänitä Jesús jiamiøødhajxy quiøxy päyø'cy. Nidiuhmä Jesús jaduhñ ñähgueecä.

⁵⁷ Mänitä Jesús yajmejtsä maa ja'a Caifás tiøjcän, ja'a møjcuhtdujtmøødpä maa ja'a teedyhajxiän. Jimä ley-yajñähixøøbiähajxy hänajty tøø yhamugø'oy møødä martuumädøjc-hajxy. ⁵⁸ Ja'a Pedro, jäguemjuøøby hänajty pianøcxy. Mänit jiiby tiägøøyy maa ja'a Caifás tiøjwiingän. Mänitiä yhøxtaacy maa ja'a policíahajxiän. Yhixaamby hänajty je'e nebiä Jesús hänajty tiuna'añii.

⁵⁹ Ja'a Jesús, tøø hänajty yajtøjtägø'oyii maa ja'a teedywiindsøn hajxy hänajty tøø yhamugø'oyän møødä ley-yajñähixøøbiähajxy møødä møjtøjc-hajxy. Jiiby hajxy hänajty wyiinmahñdyhaty nebiä Jesús hajxy jaduhñ ñähøønó'owät, hoy jaduhñ quia'a ja tøyyä, nebiä Jesús hajxy jaduhñ yajyagho'ogøøjät. ⁶⁰ Pero cabä tøyhajt hajxy piaaty, hoy jäya'ay may jia wi'i ñähøønøøyy. Mänitä hønndaacpä metsc piädsøømy. ⁶¹ Mänit hajxy miänaañ:

—Nøm yø'ø craa miänaañ coogä Diostøjc jaduhñ yajma'ada'añ; mänitac cumaaxc wiingpä yajpädø'ogáangumbä.

⁶² Mänitä teedywiindsøn tiänaayyø'cy. Mänitä Jesús ñämaayyä:

—Nej, caj mhadsowa'añä. Tii hajxy jaduhñ coo xñäxø'owø'oy.

⁶³ Pero cabä Jesús waamb ñä'a mänaañ. Mänitä teedywiindsøn miänáangumbä:

—Ja'a Dioscøxpä miič ja'a tøyhajt myégät; højts hawáanäc pø tøyhajt jaduhñ coo miič ja'a Dios tøø xquiexy, coo ja'a Dios xyHuunghaty.

⁶⁴ Mänitä Jesús miänaañ:

—Tøyhajt jaduhñ nej miič mmäna'añän. Jaduhñhøch mijts nnämaabiä, høøch ja'a Diosquexypä, cooč hajxy xyhixa'añ hñä'a maa ja'a Dios yhahooyhaampiän, ja'a mäjaamøødpä; y cooč jaduhñ nmänajtägatsa'añ jocjooty.

⁶⁵ Mänitä teedywiindsøn ja'a wyit quiøø'ch. Paady quiøø'ch coo hänajty yhawa'anda'agy. Mänit miänaañ:

—Tøø hädaa craa quiapxtägoy ja'a Dioscøxpä. Tii testigo hajxy njaac wáanämät. Hamdsoo hajxy tøø mmädoy nej tøø quiapxtägoyyän. ⁶⁶ Neby hajxy mmäna'añ.

Mänit hajxy yhadsooyy:

—Tøø jaduhñ quiapxtägoy ja'a Dioscøxpä; ween yho'ogy.

⁶⁷ Mänitä Jesús wyiingudsujøøyyä. Mänit wiojpä. Mänit wyiingugoxøøyyä. ⁶⁸ Mänit ñämaayyä:

—Pø tøyhajt jaduhñ coo Dios tøø xquiexy, najuø'ow pøn tøø xquioxy.

⁶⁹ Jimnä ja'a Pedro hänajty yhäña'ay tøjwiing. Mänitä Pedro nãmejtsä to'oxymoonsä tu'ug. Mänit nãmaayyã:

—Miičh ja'a Jesús hijty mmøødwädiipy, túhmäts, ja'a Galileatsohmbä.

⁷⁰ Mänitä Pedro ñijjogapxä maa ja'a jäya'ayhajxiän:

—Pätiidä jaduhñ mnä'ä mädiaacypy.

⁷¹ Tøjpädsømáannäp ja'a Pedro hänajty, mänit yhíjägumbä ja'a to'oxymoonsä tu'ug. Mänitä moonsä nãmaayy ja'a hajxy hänajty jimbä:

—Yø'ø mixy ja'a Jesús hijty møødwädiip ja'a Nazarettsohmbä.

⁷² Jadähooc ja'a Pedro ñijjogapxä:

—Tøyhajt, cábøch ja'a craa nhixiä.

⁷³ Mänitjuøøby ja'a Pedro nãmáayyägumbä, ja'a hajxy hänajty jimbä:

—Tøyhajt jaduhñ coo miičh ja'a Jesús hijty mmøødwädity; jaduhñ miičh mmädiaacpä nebiä Galileatsohmbän.

⁷⁴ Mänitä Pedro miänaañ:

—Pø cábøch tøyhajt nmädia'agy, wéenhøch ja'a Dios jaduhñ xyajcumädoy. Cábøch ja'a craa nhixiä.

Tuunä ja'a Pedro jaduhñ ñä'ä mänaañ, mänitiä tseey yaaxy. ⁷⁵ Mänitä Pedro quiøxy jahmiejch nebiaty ja'a Jesús hänajty tøø miäna'añän: “Cajnä ja'a tseey hänajty ya'axy, tøø miičh hänajty tægøøghooc mnijjogapxyii cóogøch tyijy xquia'a hixiä.” Mänitä Pedro jim chohñ. Mänit tiägøøyy jøøbiä hoyhoy.

27

¹ Coo jjobøøyy, mänitä teedywiindsøn hajxy quiojyquiapxytiuuñ møødä martuumädøjc-hajxy nebiä Jesús hajxy yaghó'ogät. ² Mänitä Jesús hajxy cø'øxoch hoy yajcø'ødägø'øy maa ja'a Poncio Pilatän, ja'a hänajty tuumbä gobernador.

³ Ja'a Judas ja'a Jesús hänajty tøø yhawaanø'øy. Coo ja'a Judas yhiixy coo ja'a Jesús hänajty yagho'oga'añii, cabä jioot jaduhñ ñä'ä møc-hajty. Mänitä hii'xmajcpä plataxädø'øñ hoy yajwiimbity maa ja'a teedywiindsøn hajxiän, maa ja'a martuumädøjc-hajxiän.

⁴ Mänit miänaañ:

—Tøøch jaduhñ ngädieey coöchä craa ho'cøøc tøø nhawaanø'øy, ja'a cajpä pojpä cädieemiøødpä.

Mänit hajxy yhadsooyy:

—Ca'a yhøjts ngüeendä yø'øduhñ. Miičh mgüeendä yø'øduhñ.

⁵ Mänitä Judas ja'a xädø'øñ ñajtsäbapøøyy jiiby tsajtøgooty. Mänit hoy ñiy-ø'tøøyyänä.

⁶ Mänitä teedywiindsøn ja'a xädø'øñ hajxy pyiwø'cy. Mänit hajxy miänaañ:

—Cab hädaa xädø'øñ hajxy hawiinmats nbädäacämät maa ja'a xädø'øñ hajxy quiuy-oxø'øyän, je'eguiøxpä coo jäya'ay jaduhñ tøø tioogyii ho'cøøc.

⁷ Mänit hajxy quiojyquiapxytiuuñ coo ja'a naax hajxy hänajty jiuya'añ, ja'a xøhajpä Tu'tspøjtstaact, ja'a xädø'øñhaam ja'a Judas hänajty hoy tøø ñajtsäbapø'øyäbä. Je'e hajxy hänajty wia'ana'añ cabäsantä maa ja'a jäguembäjäya'ayhajxy ñaaxtägø'øwät.

⁸ Coo ja'a naax hajxy jaduhñ jiuuyy ja'a xädø'øñhaam ja'a Judas hänajty hoy tøø ñajtsäbapø'øyäbä, paady jaduhñ xiøhaty Nø'ñaax høxtä jäda'anäbaadyñä. ⁹ Jaduhñdsä tiøjiajty nebiä Jeremías jecy miänaañän, ja'a Diosquexypä: “Mänitä plataxädø'øñ hajxy miooyyã hii'xmajc (nebiä judíoshajxy tøø ñägäpxiän). ¹⁰ Mänitä tu'tspøjtstaact hajxy hoy jiuy nébiøch ja'a Dios tøø xyhane'emiän.”

¹¹ Mänitä Jesús yajmejtsä maa ja'a gobernadorän. Mänit miäyajtøøwä:

—Nej, miičh ja'a judíoshajxy xguiobiernähajpä.

Mänitä Jesús yhadsooyy:

—Tøyhajt jaduhñ nej miičh mmäna'añän.

¹² Mänitä Jesús ñähwaambejtä ja'a teedywiindsøn13 Mänitä Pilato miänaañ:

—Nej, caj miičh jaduñ mmädooyä nebiaty hajxy jaduñ xñänómiänä.

¹⁴ Pero cabä Jesús ñä'ä hadsooyy; paadiä gobernador jiaančh tehñ yagjuöoyy. Cab hñajty ñajuö'oy nebiaty jaduñ wyiinmahñdyhadät.

¹⁵ Jaduhñsä gobernador hñajty quiuhdujthaty coo ja'a tsumyjiäya'ay hñajty tu'ug yhöxmach xööjooty pön ja'a cu'ug jaduñ ñänómäp coo yhöxmadsóójät. ¹⁶ Jiibiä craa hñajty tu'ug chumyčhäna'ay ja'a xöhajpä Barrabás. Töö ja'a Barrabás xiöö hñajty wyi'iwia'xy. ¹⁷ Coo ja'a cu'ughajxy hñajty töö quiöxy hamugö'oy, mänitä Pilato yajtöoyy:

—Pön mijts jaduñ mnänöömby coočh nhöxmádsät, Barrabás tögä ja'a Jesús ja'a Cristohajpä.

¹⁸ Ñajuööbiä Pilato hñajty coo ja'a Jesús jaduñ yajcö'ödägöoyyä je'eguiöxpä coo ja'a quiuhdujt hñajty quia'a yajmädsójcäxä.

¹⁹ Jimnä ja'a Pilato hñajty yhäña'ayñä maa hñajty tiuñän, mänitä Pilato quiapxyñäguejxä ja'a tio'oxiójcäm: “Cab jaduñ cu mdsaačhtiuñ; hoyhäna'c yö'öduñ. Tööčh haamyquiods haxöög nguma'ay yö'ögöxpä.”

²⁰ Mänitä teedywiindsøn ja'a cu'ug hajxy jiojcapxöoyy coo ween hajxy miäna'añ coo ja'a Barrabás yhöxmadsóójät, y coo ja'a Jesús yagho'ogóójät. ²¹ Mänitä gobernador ja'a cu'ug miäyajtöögumbä:

—Mädyii häna'c mijts mnänöömby coočh nhöxmádsät.

Mänit hajxy yhadsooyy:

—Barrabás.

²² Mänitä Pilato yajtöoyy:

—Ja'a Jesúsäts, ja'a xöhajpä ja'a Cristo, nébiöch je'e ndúnät.

Mänit hajxy nägöxiä yhadsooyy:

—Möjpahbet cruzcöxp.

²³ Mänitä Pilato miänaañ:

—Tii haxöögpä jaduñ töö tiuñ coo jaduñ yagho'ogóójät.

Mänit hajxy jaduñ yáaxcumbä:

—Möjpahbet cruzcöxp.

²⁴ Coo ja'a Pilato jaduñ yhiixy coo ja'a cu'ughajxy hñajty quia'a mädowna'añ, coo hajxy maas hanaxiä yhaamhada'añ, mänitä nöö yujwaañ. Mänit quiö'öbuju cu'ugwiinduum. Mänit miänaañ:

—Ca'a yhööch jaduñ mänaamb coo yö'ö hoyhäna'c jaduñ yagho'ogóójät; mijts jaduñ mänaamb.

²⁵ Mänitä cu'ughajxy nägöxiä miänaañ:

—Töyhajt jaduñ. Höjts jaduñ mänaamb mööd höjts nnöox mööd höjts nmajc.

²⁶ Mänitä Pilato ja'a Barrabás yhöxmajch. Mänitä Jesús yajwojpä. Mänit yajcö'ödägöoyy coo nöcxxy miöjpahbedyii.

²⁷ Mänitä Jesús yajnöcxä ja'a gobernador soldadohajxy. Mänitä Jesús jiuhibgöoyyä ja'a soldadohajxy nägöxiä. ²⁸ Mänitä wyit yajtsíjjäxä. Mänitä tsaptswit yajpägöoyyä.

²⁹ Mänitä hapyronä piädaacä maa ja'a quiuhduumän. Mänitä paxy yajcö'ögaböoyyä yhahooyhaampiäcö'ö. Mänit wyiinjjädaacä. Mänit wyiingapxpejtä:

—¡Viva ja'a judíos ja'a guiobiernähajxy, viva!

³⁰ Mänitä Jesús wyiingutsujöoyyä. Mänitä paxy piójcäxä. Mänit wiojpä quiuhduum.

³¹ Coo yhuuc wiingapxpéjtäbä, mänit tsaptswit yajtsíjjägumbä. Mänit yhamdsoo wit yajpägöoyyägumbä. Mänit yajnöcxänä maa hñajty miöjpahbeda'añiijän.

³² Tu'haamnöcxpä jäya'ay hajxy tu'ug jiojcubaadöoyy ja'a Cirenetsohmbä. Simón hñajty xiöhaty. Mänitä Simón ja'a cruz hadsip yajcajptsoowä.

³³ Mänit hajxy miehch maa jaduñ xiöhatiän Gólgota. Je'eduhñ ñänöömby: “Maa ja'a ho'ogyjiäya'aguiopc ñähgäda'aguiän.” ³⁴ Mänitä Jesús tsaatyñöö jia yaghuucä ja'a jaančh tehñ tiahmbä. Coo jaduñ yhuucmajch, cab jaduñ chojcy.

³⁵ Mänitä Jesús miøjpahbéjtänä cruzcøxp. Mänitä soldadohajxy yhäyø'cy dadoshaam nebiä Jesús ja'a wyit hajxy yajwá'xät. Jaduhñsä tiøjiajty nebiä Diosquexypä jecy miänaañän: “Dadoshaam hajxy yhäyø'cy nébiøch nwit hajxy jaduhñ xyajwá'xät.” ³⁶ Mänitä soldadohajxy jim yhäyø'cy nebiä Jesús hajxy jaduhñ wyiinhäñá'awät. ³⁷ Mänit hajxy jim yuugjahy cruzcuhduum tiiguiøxp ja'a Jesús coo tøø miøjpahbedyii: “Jesús hädaa, ja'a judíos guiobiernohajxy.”

³⁸ Jimä mee'tspä metsc miøjpahbéjtäbä. Cujc ja'a Jesús miähmøøyy, tu'ug hanajtyhaamby, tu'ug hahooyhaamby. ³⁹ Ja'a jäya'ayhajxy hänajty najxpä, wyi'i wyiingapxpejpy hajxy hänajty møød hajxy hänajty wyi'i quiuhjägøñ. ⁴⁰ Jaduhñ hajxy hänajty ñiñäma'ayii:

—Ja'a, miich jaduhñ mänaañ coo mahñdy ja'a tsajtøjc myagjida'añ, y cumaaxc mahñdy mhädiuna'añ wiingpä. Niyajmänacøjätš hamdsoo pø tøyhajt jaduhñ coo miich Dios xyHuunghaty.

⁴¹ Jaduhñ ja'a teedywiindsønñhajxy piamänaambä møødä ley-yajñähixøøbiähajxy, møødä fariseoshajxy, møødä martuumädøjc-hajxy.

⁴² —Tøø jaduhñ yhuuc wi'i miäyajñähwa'açh, y caj hamdsoo ñiyajñähwa'adsa'añii. Pø tøyhajt jaduhñ coo jaduhñ guiobiernähaty maa ja'a judiøshajxiän, ween jaduhñ hamdsoo ñiyajmänaaqyii cruzcøxp neby højts jaduhñ nmäbøjcämät. ⁴³ Jaduhñ tøø xnämäayyäm coo yHuunghadyii ja'a Diøšäm y coo ja'a Dios jaduhñ cwieendähada'añ. Pø tøyhajt jaduhñ coo ja'a Dios jaduhñ jiaançh tsoy, ween jaduhñ yajñähwa'açh.

⁴⁴ Jaduhñsä mee'tspähajxy piamänaambä, ja'a hajxy jim møjpahbetypä cruzcøxp.

⁴⁵ Mänitcujyxiøø ja'a naaxwiimbä wyiingoodsøøyy. Tägøøghorä jaduhñ yhiyty wiingoods. ⁴⁶ Mänitmänacyxiøø ja'a Jesús møc yaaxy: “Elí, Elí, lama sabactani”, je'eduhñ ñänøømby: Dios mee'x, Dios mee'x, tiich jaduhñ coo tøø xñajtshixø'øy.

⁴⁷ Ja'a hajxy hänajty jim wi'i tiänaabiä, coo hajxy jaduhñ miädooyy, mänit hajxy näje'e miänaañ:

—Elías yø'ø craa jaduhñ jia wi'i miøjyaaxyp.

⁴⁸ Mänit tu'jäya'ay xo'od hoy quioñ päyø'øguiä. Mänit quiuadsøøyy ja'a tsaatyñøøxunjooty. Cøjx je'e chomø'øy. Mänit paxy yagjøjwøønøøyy ja'a xo'od. Mänitä Jesús yaghaguubøøyyä neby jaduhñ miúügät. ⁴⁹ Mänitä häna'c-hajxy wiingpä miänaañ:

—Huug hahijxnä, ween yhuuc cähxø'øgy pø minaambä Elías yajñähwa'adsa'añ.

⁵⁰ Mänitä Jesús jadähooc møc yáaxcumbä. Mänit yho'nä. ⁵¹ Mänitä tsajtøjc-hadøødiuc quiøø'tswa'xy cujjiä. Cøxp jaduhñ quiøø'tsohñ. Mänitä hujx ñajxy. Mänitä tsaajaduhñ wia'xy. ⁵² Mänitä ho'ogyjiäya'ajiut may yhawaach. Mänitä ho'ogyjiäya'ayhajxy may jiuypiojcy, ja'a Diosmädia'agy hajxy hänajty tøø miäbøquiäbä. ⁵³ Coo ja'a Jesús hänajty tøø jiuypiojcy, mänitä ho'ogyjiäya'ayhajxy yhawa'adspädsøømy, ja'a hajxy hänajty tøø jiuypioquiäbä. Mänit hajxy quiajptägøøyy Jerusalén. Jim hajxy jaduhñ yhiyxä nämay.

⁵⁴ Jimä soldadowiindsønñ ja'a Jesús hänajty cwieendähaty møødä soldadohajxy. Coo ja'a tsø'ty hajxy jaduhñ yhiyx, mänit hajxy jiaançh tehñ chähgøøyy. Mänit hajxy miänaañ:

—Tøyhajtäm hijty coo hädaa craa hijty Dyioshuungä.

⁵⁵ Jimä tadjäya'ay ja'a Jesús hajxy hänajty wyi'i ñäheebø'øy jäguemduum. Jimä Jesús hajxy hänajty tøø piadsoonñ Galilea. Tøø hajxy hänajty piuhbety. ⁵⁶ Jimä María hänajtypä ja'a Magdalatsohmbä, møødä María ja'a Jacobo tiajhajxy, møødä Zebedeo tio'oxiojcy. ⁵⁷ Coo quioodsøøyy, mänitä mäyøøjäya'ay tu'ug miehch, ja'a xøhajpä José. Jim hänajty choonñ Arimatea. Pianøcxäbä ja'a Jesús miädia'agy hänajty je'e. ⁵⁸ Mänitä José ja'a Pilato cuhdujt hoy miäyujwa'añ coo ja'a ho'ogyjiäya'ay yajmäñacät cruzcøxp. Mänitä José ja'a cuhdujt miooyy. ⁵⁹ Mänit jaduhñ yajmäñajcy. Mänitä poobwit yajñähbijty. ⁶⁰ Mänit jaduhñ jiiby piädaacy tsaajutjooty ja'a naamdajypä. Paadiä José ja'a tsaajut hänajty tøø yajtajyii, jiiby hänajty piäda'aga'añii coo hänajty tøø yho'ogy. Mänitä tsaajut yhähamøømtägooyy tsaahaam maa ja'a Jesús hänajty tøø ñaaxtägø'øyän. Mänitä José

wyiimbijty. ⁶¹ Jimä María Magdalatsohmbähajxy miähmøøyy møødä María tu'ugpä. Jim hajxy hänajty yhäña'ay maa ja'a Jesús hänajty tøø ñaaxtägø'øyän.

⁶² Viernes ja'a Jesús jaduñ yho'cy. Cujaboom ja'a teedywiindsøn hajxy miehch maa ja'a Pilatän møødä fariseoshajxy. ⁶³ Mänitä Pilato ñämaayyá:

—Miičh møjteedy, ja'a craa häxøøy hó'cäbä, tøø hijty miäna'añ cooc tyijy cumaaxc hijty jiuypioğa'añ. Pero nä'ä hønndaac jaduñ. ⁶⁴ Entonces, quex ja'a soldado jim maa tøø ñaaxtägø'øyän, jaduñ hajxy jaduñ jim yhadäná'awät jadu'tsuhm. Jaduhndsä Jesús miägu'ughajpä ja'a ñaaxni'x hajxy nøcxy quia'a yajpädsøømä. Jaduhndsä cu'ug hajxy quia'a nämá'awät cooc tyijy tøø jiuypioçy. Maas hanaxiä hajxy jaduñ cu yhønndaacy quejee ja'a Jesús hijty yhønnda'aguiän.

⁶⁵ Mänitä Pilato miänaañ:

—Xiidsä soldadohajxy. Ween hajxy jim nøcxy yhadäna'ay neby jaduñ quia'a pädsømät.

⁶⁶ Mänit soldadohajxy jim quiejxä hadänaabiä. Mänitä tsaajuthaawän. Mänit hajxy jim miähmøøyy.

28

¹ Cujaboom näxøø jopyñä, mänitä María Magdalatsohmbä jim miehch maa ja'a Jesús hänajty tøø ñaaxtägø'øyän møødä María tu'ugpä. ² Mänitiä hujx møc ñajxy. Jimä Dios ja'a mioonsä hänajty tu'ug tiäna'ay. Tsajpootyp hänajty tøø chooñ. Mänitä tsaajuthaawän ja'a hijty hijpä juthaguum. Mänitä yhøxtaacy tsaanähgøxp. ³ Jaanč tehñ yhaamb hänajty je'e. Jaanč tehñ pioob ja'a wyit hänajty. ⁴ Cooc ja'a soldado ja'a Diosmoonsä hajxy yhiçy, mänit hajxy tiägøøyy tsäyuubiä. Jaanč tehñ chähgøøby hajxy hänajty. Mänit hajxy quiädaayy. Jaduhñ hajxy miähmøøyy nebiä ho'ogyiän. ⁵ Mänitä Maríahajxy ñämaayyá ja'a Diosmoonsäm:

—Ca'a hajxy mdsähgø'øy. Nnajuøøbiøch jaduñ cooc ja'a Jesús hajxy mhøxta'ay, ja'a hijty tøø miøjpahbedyíjábä. ⁶ Cabä jii; tøø jiuypioçy neby hijty tøø miäna'añän. Min hajxy huug hiç maa tøø ñaaxtägø'øyän. ⁷ Cooc hajxy jaduñ mhíxät, mänitä miägu'ughajpä hajxy nøcxy paquiä mhawaanä cooc jaduñ tøø jiuypioçy, cooc jaduñ ñøcxø'øğa'añ Galilea. Jim hajxy jaduñ mbaada'añ. Jaduhñhøch mijts nhawaanäm.

⁸ Mänitä Maríahajxy hoy yhiçy paquiä maa ja'a Jesús hänajty tøø ñaaxtägø'øyän. Jíibädä hajxy chähgø'øy, jíibädä hajxy xioonda'agy. Mänitä miägu'ughajpä hajxy hoy yhawaanä päyø'øguiä. ⁹ Tu'haamnøcxpä ja'a Jesús ñägüehxtøø'xy. Mänitä Maríahajxy yajpoo'xä. Mänitä Jesús hajxy wyiingumedsøøyy. Mänit hajxy tiecyamiänenøøyy. Jaduhñ hajxy wyiingudsähgøøyy. ¹⁰ Mänit hajxy ñämaayyá:

—Ca'a hajxy mdsähgø'øy. Nøcxhøch ja'a nmägu'ughajpä hajxy hawáanäc cooc hajxy jim ñøcxät Galilea, cooch hajxy jim xpiaada'añ.

¹¹ Cooc ja'a Maríahajxy hänajty tøø wyiimbity maa ja'a Jesús hänajty tøø jiuypioquiän, mänitä soldadohajxy näje'e nøcxy cajpooty, ja'a hajxy hänajty tøø yhadäná'ayäbä. Mänitä teedywiindsøn hajxy hoy yhawaanä nebiaty hajxy hänajty tøø yhiçy. ¹² Mänitä teedywiindsøn hajxy hoy miøødmädia'agy ja'a martuumädøjc-hajxy neby hajxy jaduñ quiojyquiapxytiünät. Mänitä soldado xädø'øñ hajxy may miooyyá. ¹³ Mänitä soldadohajxy ñämaayyá:

—Jaduñ hajxy mmäná'anät cooc hajxy coods mmaaho'cy, y cooc ja'a Jesús ja'a miägu'ughajpähajxy hoy yajpädsømyii. ¹⁴ Y coodsä gobernador jaduñ miädoyhädät, højts jaduñ nyajmábøgäp. Jaduhñ hajxy xquia'a capxpädät.

¹⁵ Mänitä soldado ja'a xädø'øñ hajxy wyiingpøjcy. Mänit hajxy hoy jiatcø'øy neby hajxy hänajty tøø ñäma'ayijän. Jaduhndsä judíoshajxy miädia'agyñä høxtä jäda'anäbaadyñä.

¹⁶ Mänitä Jesús miägu'ughajpähajxy jim nøcxy Galilea, ja'a nämajtu'ugpä. Mänit hajxy jim miehch maa ja'a tuñän maa ja'a Jesús hänajty tøø ñägäpxiän. ¹⁷ Cooc ja'a Jesús

hajxy yhjxy, mänit hajxy wyiingudsähgøøyy, hoy hajxy hänajty näje'e quia'a ja mäbøcy hamuumdu'joot. ¹⁸ Mänit hajxy wyiingumedsøøyyä. Mänit hajxy ñämaayyä:

—Tøøchä Dios cuhdujt cøxiä xmio'oy jim tsajpootyp, møød hädaa yaabä naaxwiin. ¹⁹ Nøcx hajxy wiinduhmyhagajpt. Yajwiingapxø'øw hajxy nébiøch nmädia'agy hajxy xmiäbøjcät. Jadhun hajxy myajnäbétät ja'a Diosteedycøxpä, møødä høøchcøxpä, møødä Dioshəpřritucøxpä. Høøch ja'a Dios xyHuunghajp. ²⁰ Jadhun hajxy myajnähixó'øwät coo hajxy jadhun miäbøgät nebiátyhöch mijts tøø nhane'emiän. Mjahmiédsäp hajxy jadhun coöch mijts nmøødhida'añ cøjxta'axiøø høxtä coonä naaxwiimbä wyiimbídät.

San Marcos

¹ Jaduhñä Diosmädia'agy chohnda'agy ja'a Jesucristocøxpä, neby jiajty, neby yhabejty. Dioshuungä Jesucristo je'eduhñ.

² Jaduhñ jim cujaay myiñ nocyjiooty, ja'a Isaías jecy quiujáhyyäbä. Ja'a Isaías, je'e ja'a Diosmädia'agy jecy yajwa'x. Jaduhñä Dios ja'a yHuung jecy ñämaayy: Huuc mäadow, chámhøchä nguguexy nguejxø'øga'añ maa miich mnøcxø'øwa'añän. Je'e ja'a mädia'agy nøcxy yajwa'xa'añ coo miich jim nøcxy mwäditaambä.

³ Mänitä Dios jiaac mänaañ:

“Pactúumhøchä nguguexy nøcxy wiädita'añ. Coo ja'a cu'ughajxy jaduhñ miädoyhada'añ coo ja'a wiingapx jøjcapxøøbiä jim tøø quiäda'agy pactuum, mänit hajxy nøcxy wyiingapx jøjcapxø'øwa'añii coo ja'a haxøøgwiinmahñdy hajxy ñajtshixø'ød,

coo ja'a Jesús ja'a miädia'agy hajxy miäbøjcat, ja'a hajxy mWiindsønhadambä.”
Ja'a Juan jaduhñ nänøømä, ja'a hänäjty mäyajnäbetaambä.

⁴⁻⁵ Mänitä Juan je'e jiaančh tægøøyy mäyajnäbejpä jim jäguemduum, maa ja'a møjnøø hänäjty xiøhatiän Jordán. Mänitä jäya'ayhajxy may miejch maa ja'a Juan hänäjtiän. Jim hajxy hänäjty choon maa ja'a naax hänäjty xiøhatiän Judea, møød jim maa ja'a cajpt hänäjty xiøhatiän Jerusalén. Mänitä Juan ja'a cu'ug tiægøøyy yajwiingapxøøbiä coo hajxy ñäbétät, weenä jootä wyiinmahñdy hajxy yajtägach. Jaduhñä Dios ja'a piojpä quiädieey hajxy yajnähwáatsät. Mänitä cu'ugä piojpä quiädieey hajxy ñägapxy. Jaduhñ hajxy hänäjty miäna'añ cooc ja'a yhaxøøgwiinmahñdy hajxy hänäjty ñajtshixø'øwa'añ. Mänit hajxy ñäbejnä.

⁶ Ja'a Juan, camelloøjt hänäjty wyithajpy. Wajhac hänäjty wiøønhajpy. Mu'u hänäjty chu'uçh hajpy. Møjtsiinnøø hänäjty yhu'ugyhajpy. ⁷ Mänitä Juan ja'a cu'ug yajwiingapxøøyy: “Jímhøchä njamiøød tu'ug jiaac medsa'añ yajwiingapxøøbiä. Maas mäjaamøød je'e miedsa'añ quejeech høøch. Cábøch cuhdujt jaduhñ njaty møødä nebiä cuhdujt je'e miøødän, ja'a jaac medsaambä. ⁸ Coo mijts nyajnäbejty, nøøhaam mijts nyajnäbejty. Pero ja'a jaac minaambä, Dioshespírituhaam hajxy jadähooc xyajnäbejtä-gatsa'añ.” Jaduhñä Juan miänaañ.

⁹ Cujequiä Jesús jim miejch maa ja'a Juan hänäjty miäyajnäbetiän, jim maa ja'a møjnøø hänäjty xiøhatiän Jordán. Jimä Jesús hänäjty tøø choon maa ja'a cajpt xiøhatiän Nazaret, jim maa ja'a naax hänäjty xiøhatiän Galilea. Mänitä Juan ja'a Jesús yajnäbejty. ¹⁰ Tuunä Jesús ñä'a tø'ødspädsøømy, mänit yhiixy coo ja'a tsajt yhawaach. Mänitä Jesús ja'a Dioshespíritu yhiixy coo hänäjty ñägäda'agyii nebiä paloman. ¹¹ Mänitä Dios jim quiuhgapxnajxy tsajpootyp. “Høøch miich tu'uquiiä nHuunghajpy. Miičh njaančh tehñ chojpy. Miičh njaančh tehñ quiumaaby.” Jaduhñä Jesús ñämaayyä.

¹² Mänitä Jesús miødhajtä pactuum ja'a Dioshespíritu. ¹³ Mänitä Jesús jim piuhwaatsä. Nidiuhñ jim miähmøøyy. Jagooyyä animalhajxy hänäjty jim wiädity. Mänitä Jesús ñämejtsä ja'a møjcu'ugong. Mänitä Jesús jia tægøøyyä jøjcapxøøyyäbä. Juxychägui'xxøø ja'a Jesús jim yhiixy jäguemduum. Mänitä Jesús ñämejtsä ja'a Diosmoonsähajxy ja'a jim tsajpootypä. Mänitä Jesús piuhbejtä.

¹⁴ Ja'a Juan, cujecy je'e chuümä. Coo je'e jaduhñ chuümä, mänitä Jesús jim ñøcxtägajch Galilea. Mänitä Jesús ja'a cu'ug tiægøøyy yajwiingapxøøbiä ja'a Diosmädia'agy cooc hänäjty yhabaatnä coo ja'a Dios ja'a miøcmäjaa hänäjty yajcähxø'øga'añ. ¹⁵ “Habäatnäp jaduhñ coo ja'a Dios ja'a miøcmäjaa yajcähxø'øga'añ. Paadiä Dios ja'a miädia'agy hajxy mmäbøjcat. Weenä mjootä mwiiinmahñdy hajxy myajtägach. Weenä mhaxøøgwiinmahñdy hajxy mnajtshixø'øy.” Jaduhñä Jesús miänaañ.

¹⁶ Cujequiä Jesús tiægøøyy wädiypä maa ja'a mejy hänäjty xiøhatiän Galilea. Jim hänäjty wiädity mejypia'a, mänitä jäya'ay metsc yhiixy, ja'a Simón møødä piuhya'ay

Andrés. Hacxmats ja'a Simónghajxy hánajty tiuunghajpy. Jiibiä yhacxjohmd hajxy hánajty piäda'agy mejjiooty. ¹⁷ Mänitä Simónghajxy ñämaayyá:

—Jam hajxy wädíjtäm. Je'e mijts hijty mduunghajpy, hacxmats. Wiingtuungh hөөч mijts nmo'owaamby. Nyajnáhixø'owaambiöch mijts nebiä cu'ugä Diosmädia'agy hajxy myajwiingapxø'owät —nömä Jesús miänaañ.

¹⁸ Tuunä jaduhñ ñä'ä mänaañ, mänitä Simón ja'a yhacxjohmd hajxy hoy ñajtswidsø'øy mejjypia'a. Mänitä Jesús hajxy piadu'ubøjcy. ¹⁹ Weeñtiä ja'a Jesús hajxy hánajty tøø miejypia'ayo'oy, mänitä Jesús ja'a Zebedeo yhiixy mөөдä yhuunghajxy, ja'a Santiago mөөдä Juan. Barcohuungooty ja'a Zebedeohajxy hánajty yhäña'ay. Jiibiä yhacxjohmd hajxy hánajty yhaxodsø'øy. ²⁰ Mänitä Jesús ja'a Santiago miøjyaaxy mөөдä Juan. Mänitä Santiago ja'a Jesús hajxy piadu'ubøjpä. Nähgüec ja'a tieedy hajxy jiiby barcohuungooty mөөдä mioonsähajxy.

²¹ Mänitä Jesús hajxy jim miejch maa ja'a cajpt hánajty xiøhatiän Capernaum. Coö ja'a poo'xxiøø yhabaaty, mänit hajxy jiiby tiägøøyy tsajtøgooty. Mänitä Jesús ja'a cu'ug tiägøøyy yajwiingapxøøbiä. ²² Mänitä cu'ughajxy yagjuøøyy coögä Jesús hánajty hoy yajnáhixø'øy nebiä möjcuhdujtmөөдпән. Maas hóyyäc hánajty yajnáhixø'øy quejee ja'a häna'c-hajxy, ja'a Diosmädia'agy hajxy hánajty naxy yajnáhixøøbiä tsajtøgooty. ²³ Jiibiä mähdiøjc hánajty tu'ug tsajtøgooty, tøø hánajty yajtägø'øyii ja'a möjcu'u. Mänitä möjcu'u tiägøøyy yaaxpä mөc:

²⁴ —Miičh Jesús, Nazaret miičh mdsooñ. Tii hөjts coö xmiädsibø'øy. Hөjts jaduhñ xjia wi'i yajcuhdägoyyaamb, túhmäts. Nnajuøøbiöch pøn miičh. Miičhä Dios xyHuunghajp —nömä mähdiøjcä möjcu'u yajmänaañ.

²⁵ Mänitä Jesús ja'a möjcu'u yhojy:

—Hamón, jua'ads jim maa yø'ø mähdiøjcän —nömä Jesús miänaañ.

²⁶ Mänitä möjcu'u ja'a mähdiøjc je'e yajpojpaaty. Yáaxäbä mähdiøjc ñähwaatsä. Ja'a möjcu'u jaduhñ yajyaax. ²⁷ Coö ja'a Jesús ja'a mähdiøjc jaduhñ yajnáhwaach, jiaanch tehñ yagjuøøyy ja'a cu'ughajxy jaduhñ nägøxiä. Mänit hajxy tiägøøyy niñamáayyábä:

—Maa yø'ø craa cuhdujt jaduhñ tøø ñä'ä mahñ piøcy coö yø'ø mähdiøjcä möjcu'u jaduhñ yajnáhwaatsä. Nej, hawiinjemyguiuhdujtäda'a miøødäjä —nömä Jesús ñänøømä.

²⁸ Paquiä mädia'agy jim wia'xy Galileanaaxooty wiinduhmyhagajpt coö ja'a Jesús ja'a miøcmäjaa hánajty tøø yajcähxø'øgy.

²⁹ Coö ja'a Jesús hajxy jiiby chajtøjpädsøømy mөөдä jiamiøødtøjc, mänit hajxy jim ñөcxy maa ja'a Simónghajxy hánajty chäna'ayän mөөдä Andrés. Quipxiä Santiagohajxy hánajty choonä mөөдä Juan. ³⁰ Ja'a Simón ja'a miø'ødhoc, pa'amgø'naaby hánajty je'e. Tobia'am hánajty miøød. Coö ja'a Jesús jim miejch maa ja'a Simón tiøjcän, mänitä Jesús yhawáañäxä coö ja'a pa'amjäya'ay hánajty jiiby tøgooty. ³¹ Coö ja'a Jesús tiøjtägøøyy, mänitä pa'amjäya'ay wyidsø'cy. Mänitiä ja'a tiøy tiøjch. Mänitä Jesús yajcaayy yaghuucä ja'a Simón ja'a miø'ødhoc.

³² Mänittsuu, coö ja'a xøø hánajty tøø quiuhnaxy, mänitä Jesús pa'amjäya'ay may yajnämejtsä, jim maa ja'a Simón tiøjcän, mөөдä möjcu'umөөдпähajxy. ³³ Jimä cu'ughajxy hánajty may tiäna'ay tøghaawjooty. ³⁴ Mänitä Jesús jäya'ay may yajpa'amnajxy. Madiu'ujä pa'am hajxy hánajty miøødä. Mөөдä möjcu'umөөдпähajxy, yajnáhwaatsä hajxy je'ebä. Mänitä Jesús ja'a möjcu'u yhanehmy coö hajxy quia'a cápxät, je'eguiøxpä coö ja'a Jesús hánajty ñajuø'øyii pøn je'e.

³⁵ Cujaboom, je'enä hánajty wyiingoodsä, mänitä Jesús piädø'cy. Mänit tiøjpädsøømy. Mänit jim ñөcxy jäguemduum. Mänitä Tieedy hoy pia'ya'axy. ³⁶ Coö jioböøyy, mänitä Simónghajxy yhiixy coö Jesús hánajty tøø tiu'ubøcy. Mänit hajxy tiu'ubøjcy høxtaabiä. ³⁷ Coö ja'a Jesús piaatä, mänit ñämaayyá:

—Jim miičhä cu'ug xjia wi'i yajtøy maačhä ndøjcän.

³⁸ Mänitä Jesús yhadsooyy:

—Jam hajxy wiingtuum wädjítäm maa ja'a cajpt wiingonbän. Jadúhnhöchhä cu'ugä Diosmädia'agy jim nyajwiingapxøöbiät. Jadúhnhöch nwiinguexiä coočhä Diosmädia'agy wiinduhmyhagajpt nmäwädítät.

³⁹ Mänitá Jesús tiägøøyy wädijpä tsajtøjc-tsjatøjc wiinduhmyhagajpt jim Galileanaaxooty. Ja'a Diosmädia'agy hánajty yajwiingapxøøby, møødä pa'amjäya'ay hánajty yajnähwaatspä, ja'a hajxy møjcu'umøødpä.

⁴⁰ Mänitá Jesús pa'amjäya'ay ñämejtsä tu'ug, ja'a leprapa'ammøødpä. Mänitá Jesús wyiinijcädaacä, miänuu'xtaacä:

—Pø chojpy miichä mjoot jaduhñ, høøch hädaa nba'am yajnähwaatsäc —nømä Jesús ñämaayyá.

⁴¹ Mänitá mähdiøjc ñäxuu'tsä. Mänit ñähdoonä. Mänit ñämaayyá:

—Tii coo quia'a cabä. Tøø jaduhñ mnähwa'aäch.

⁴² Tuunä ja'a Jesús jaduhñ ñä'ä mänaañ, mänitiä mähdiøjcä pia'am ñähwaatsä. ⁴³⁻⁴⁴ Mänit miägäp xhanehmä:

—Huuc mäadow, cab jaduhñ pøn mhawáanät coo tøø mba'amnähwa'aäch. Tu'uda'aquiä jim mnøcxät maa ja'a teediän, ween jaduhñ xyhixy coo tøø mjaanč pa'amnähwa'aäch. Mänit mguyoxø'owät nebiä Moisés jecy yhanehmiän, jaduhñä cu'ughajxy ñajuø'owät coo tøyhajtä mba'am tøø jiaanč naxy —nømä Jesús miänaañ.

⁴⁵ Pero cabä craa ñä'ä mädia'agymiäbøjcy, ja'a pia'am hánajty tøø yajnähwa'aächíjábä. Coo tiu'ubøjcy, mänit tiägøøyy mädiaacpä nebiaty hánajty tøø jiaty. Wiinduhmyhagajptä mädia'agy jaduhñ wia'xy. Coo ja'a pa'amjäya'ayhajxy jaduhñ miädoyhajty coo ja'a Jesús hánajty miäyajpa'amnaxy, mänitá Jesús hajxy tiägøøyy høxtaabiä coo ja'a pia'amhajxy yajnájxäxät. Paadiä Jesús hánajty quia'a cajptägø'owaannä coo ja'a pa'amjäya'ayhajxy hánajty jia wi'i ñämech. Paadiä Jesús miähmøøñä jäguemduum maa jäya'ay quia'a hitiän. Mänitá Jesús ja'a pa'amjäya'ay may ñämejtsä. Wiinduhmyhagajptjaty hajxy hánajty choon.

2

¹ Cujequiä Jesús jadähooc quiajptägøøyy Capernaum. Mänitá mädia'agy wia'xy coo hánajty jim tøø miéjtscombä. ² Mänitá jäya'ayhajxy may miejch maa ja'a Jesús hánajty miejsta'aguiän. Paquiä ja'a tøjc jaduhñ yhujch. Høxtä tøguubiaady hajxy miejch. Mänitá Jesús ja'a cu'ugä Diosmädia'agy tiägøøyy yajwiingapxøöbiä. ³ Mänitá pa'amjäya'ay tu'ug quiøømiejtsä cø'ømucy tecymiucy. Nämädaaxcä jäya'ayhajxy hánajty quiø'øy tsaajiooty. ⁴ Cabä pa'amjäya'ay hánajty hoy yajmedsa'añii maa ja'a Jesúsän, coo ja'a jäya'ayhajxy hánajty jiaanč tehñ miayyá. Mänitá mähdiøjc miäbejtä cuhjodiønähgøxp. Mänitá tøjc hajxy weeñtiä yajcuhwaach, jim mädoyyä maa ja'a Jesús hánajty pia'täna'ayän, mäduhñtiä pa'amjäya'ay hoy ñänaxy. Mänit jaduhñ quiuhdøøñajxä tsaajiooty. Jiiby hoy quiäda'agy maa ja'a Jesús wyiinduumän. ⁵ Paadiä pa'amjäya'ay yajmejtsä maa ja'a Jesúsän, ñajuøøby hajxy hánajty coo ja'a pia'am hánajty yajnaxáanäxä. Coo ja'a Jesús jaduhñ yhiyx coo ja'a miädia'agy hánajty miäbøgáanäxä coo hánajty miäyajtso'oga'añ, mänitá pa'amjäya'ay ñämaayyá:

—Mägu'ughajpä, tøø ja'a mboj tøø ja'a mgädieey xñähwa'aäch —nømä Jesús miänaañ.

⁶ Jiibiä häna'c-hajxy hánajty näje'e piahäña'ay, ja'a Diosmädia'agy hajxy naxy yajnähixøöbiä tsajtøgooty. Jiiby hajxy hánajty miämädoonaabiä. Mänit hajxy näje'e miänaañ quiopcooty: ⁷ “Tii yø'ø craa jaduhñ coo miäna'añ cooc tyijy yø'ø pa'amjäya'ay piojpä quiädieey tøø yajnähwaatsäxä. Cap pøn cuhdujt miøødä coo jäya'ayä piojpä quiädieey yajnähwaatsät; jagooyyä Dios tu'uquiä miøødä.” ⁸ Ñajuøøyy ja'a Jesús jaduhñ waambaty hajxy hánajty miädia'agy quiopcooty. Mänit hajxy ñämaayyá:

—Tii hajxy jaduhñ coo mw'i miädia'agy mgopcooty. ⁹⁻¹¹ Høøch, Diosquéxyhöch høøch, páadyhöch cuhdujt nmøødä coočhä jäya'ayä piojpä quiädieeyhajxy yaa yajnähwaatsät hädaa yaabä naaxwiin. Hädaa mähdiøjc, nyajpa'amnaxáambiöch hädaa. Jadúhnhöch nyajcähxø'oga'añ coöch njaanč Diosquexiä. Jaduhñä tøyhajt hajxy

mmøødhájpät cooçh cuhdujt njaançh møødä cooçhä jäya'ayä piojpä quiädieeyhajxy nyajnähwáatsät —nømä Jesús miänaañ.

Mänitä pa'amjäya'ay nãmaayyã:

—Tãnaayyø'øg. Widsø'øg yø'ø mdsaa. Nøcxnä maa ja'a mdøjcän.

¹² Tuunä ja'a Jesús jaduhñ ñä'ä mänaañ, mänitä pa'amjäya'ay jiaançh møcpøjcy. Mänit tiänaayyø'cy. Mänitä chaay wyidsø'cy. Mänit tiu'ubøjnä. Coø ja'a cu'ughajxy jaduhñ yhiijxy, mänit hajxy nägøxiä jiaançh tehñ yagjuøøyy. Mänit hajxy miänaañ:

—Ni mänaa højts jaduhñ nga'a híjxäm.

Mänitä Dios hajxy wyiingudsähgøøyy.

¹³ Mänitä Jesús ñøcxtägajch maa ja'a mejjiän. Mänitä jäya'ay jim may ñäméjtsägumbä. Mänitä Diosmädia'agy hajxy yajwiingapxøøyyä. ¹⁴ Jimä Jesús hãnajty miejypia'ayo'oy, mänitä Leví yhiijxy, ja'a Alfeo yhuung. Jim hãnajty yhäña'ay meexäpa'a maa hajxy hãnajty yajnähuudiu'udiän. Mänitä Leví nãmaayyã:

—Jam wädíjtäm —nømä Jesús miänaañ.

Mänitä Leví tiänaayyø'cy. Mänit piadu'ubøjcy.

¹⁵ Mänitä Jesús hajxy wiowä mägaabiä maa ja'a Leví ja'a tiøjcän, møødä jiamiøødtøjc. Nãmayyã jäya'ayhajxy jim piamejch, ja'a Jesús hajxy hãnajty pawädijpä. Jiibiä yajnähuudiuutpäðøjcä Jesús hajxy hãnajty may miøødcaamiucy miøødhuucmucy, møødä cuboj cugädieediøjc. ¹⁶ Jiibiä fariseoshajxy hãnajty näje'e miähee'pna'ay, møødä häna'c-hajxy, ja'a Diosmädia'agy hajxy hãnajty naxy yajnähuudiuutpäðøjc-hajxy hãnajty miøødcaamiugyii møødä cuboj cugädieejäya'ayhajxy, mänitä Jesús ja'a jiamiøødhajxy nãmaayyã:

—Yø'ø mwiindsøn, tii yø'ø yajnähuudiuutpäðøjc coø miøødcaamiucy, møød yø'ø cuboj cugädieejäya'ay —nømä fariseoshajxy miänaañ.

¹⁷ Miädoow ja'a Jesús jaduhñ coø hajxy jaduhñ miänaañ. Mänit hajxy nãmaayyã:

—Pøn jaduhñ møc, cab hajxy yajtsooyø'ø. Pøn jaduhñ pa'ammøød, je'eds hajxy jaduhñ yajtsooyøøby. Páadyhöch yaa tøø ngäda'agy hädaa yaabä naaxwiin cooçhä cuboj cugädieebiähajxy nnämä'awät coø ja'a yhäxøøgwiinmahñdy hajxy ween ñajtshixø'ø. Pønäc tyijy pojpä cädieey ca'a møød, cábøch hajxy je'e waamb nnäma'awa'añ —nømä Jesús miänaañ.

¹⁸ Cujecy, jimä Juan ja'a jiamiøødhajxy hãnajty jaguiay yhity, møødä fariseoshajxy näje'e. Mänitä jäya'ayä Jesús hajxy hoy näje'e miäyajtøy:

—Yø'ø Juan ja'a jiamiøødhajxy, jaguiay hajxy yø'ø yhity, møød yø'ø fariseoshajxy. Pero miichä mjamiøødhajxy, cab hajxy jaduhñ yhiijpä. Tisän —nømä Jesús nãmaayyã.

¹⁹ Mänitä Jesús yhadsooyy:

—Coo ja'a pøc ja'a hu'ug naxy jiadyii, cabä jäya'ayhajxy yhity jaguiay, ja'a hajxy woybä wichpä, coø ja'a jamiø'ød hajxy hãnajty wyiingay wyiinhu'ugy. Cab hajxy hãnajty jiootmayhaty. ²⁰ Pero habaadáañpä jaduhñ cooçh yaa ndsoonaannä. Mänitøch mabøjnäbä ja'a njamiøødhajxy yhida'añ jaguiay. Jootmayhadaamb hajxy hãnajtiän.

²¹ 'Ni pønä tucwit quia'a hagøø'ø yemywyithaam. Ja'a jemywyit, múgäp je'e. Ja'a tucwit, cøødsäp je'ebä. Maas hanaxiä jiaac pagøødsät. ²² Jaanä jaduhñduhmbä, ni pønä jemyvyino quia'a cudemø'ø yucwajhacxujiooty. Jaac xúnäp ja'a jemyvyino jaduhñ. Mägøødsø'øb ja'a tucwajhacxuy jaduhñ. Cóxäp ja'a jemyvyino yhöxyocy. Nä'ägä tågøyyäp jaduhñ nämetsc. Tågøyyäp ja'a tucwajhacxuy. Jaanä tågøyyäbä jemyvyinäbä. Páadiädsä jemyvyino hajxy quiudemø'ø yemywajhacxujiooty —nømä Jesús miänaañ.

²³ Poo'xxiøøjooty hãnajty je'e, jimä Jesús hajxy hãnajty wiädity trigocamjooty, møødä jiamiøødtøjc. Mänitä jiamiøødhajxy yohguiujc tiägøøyy trigowiingädsujtspä. Je'e hajxy hãnajty jioø'xaamby. ²⁴ Jimä Fariseoshajxy hãnajty näje'e piawädijpä. Mänitä Jesús nãmaayyã:

—Tii yø'ø mjamiøødhajxy coø trigowiingädsuch poo'xxiøøjooty. Nej, cab hajxiäda'a ñajuø'øyä coø ja'a cuhdujt jaduhñ myiñä coø hajxy jaduhñ mga'a túnät poo'xxiøøjootiä —nømä fariseoshajxy miänaañ.

²⁵ Mänitä Jesús miänaañ:

—Nej, cahnä Diosmädia'agy hajxy mgapxiä coo ja'a Davidhajxy jecy yäho'pøjcä mөөдä jiamiөөдtøjc. ²⁶ Ja'a Abiatar hänajty tuumb teedywiindsón. Mänitä David jiiby tiägøøyy Diostøgooty. Mänitä tsajcaagy quiaaay, ja'a teedyhajxy hänajty tøø quiuyoxó'øyäbä Dioswiinduum. Mänitä David ja'a jiamiөөдtøjc piuhmooyy. Hoorä, cabä cuhdujt hänajty myiñ coo ja'a David ja'a tsajcaagy hajxy jaduhñ quiáyät. Jagooyyä teedy cuhdujt hajxy hänajty miөөдä coo hajxy quiáyät.

²⁷ Mänitä Jesús miänáangumbä:

—Paadiä Dios ja'a poo'xxiөө quiunuu'xy, weenä jäya'ayhajxy mänit pioo'xy. Mijts jaduhñ ja mänaamb, paadiä Dios ja'a jäya'ay piäda'agy cooc tyijy ja'a poo'xxiөө hajxy wyingudsähgóløwät. Cab jaduhñ ñä'ä tøyyä. ²⁸ Cooch jaduhñ nDiosquexiä, páadyhöch cuhdujt nmөөдä cooch nmähané'emät høxtä poo'xxiөөjootypaady —nømä fariseosha-jxy ñämaayyä.

3

¹ Mänitä Jesús jadähooc tiøjtägøøyy tsajtøgooty. Jimä jäya'ay hänajty tu'ug cø'løma'ad. ² Jimä fariseos ja'a Jesús hajxy hänajty miähee'pna'ay pø jaančh mäyajpa'amnaxaamb hänajty je'e poo'xxiөөjooty. Wiinmahñdy hajxy hänajty yhöxtaaby nebiä Jesús hajxy yajtsumóøjät. ³ Mänitä cø'løma'adpä ñämaayyä:

—Tänaayyø'øg. Miñ yam cujc täna'aw —nømä Jesús miänaañ.

Mänitä mähdiojc jaduhñ quiudiuuñ. ⁴ Mänitä fariseoshajxy ñämaayyä:

—Nebiä cuhdujt myiñ coo hajxy ndúunämät poo'xxiөөjooty, hoy tøgä haxøøgä. Nej, jaduhñä cuhdujt myiñ coo jäya'ay hajxy nyajtsóocämät poo'xxiөөjootiä, tøgä jaduhñ myiñ coo jäya'ay hajxy nyaghó'cämädä —nømä Jesús miänáangumbä.

Pero cabä fariseoshajxy waamb ñälägä hadsooyy. ⁵ Mänit hajxy wyiinhee'ppejtä, mäduhñtiä Jesús hajxy hänajty jiuhdänaawiädity. Jootmayhajpä Jesús hänajty coo ja'a fariseos ja'a cø'løma'adpä hajxy hänajty quia'a näxuuch. Cabä Jesús hänajty jiootcujcä. Mänitä mähdiojc ñämaayyä:

—Xajtøw yø'ø mgø'ø.

Mänitä quiø'ø jiaančh xajtøøyy. Tuunä jaduhñ ñä'ä xajtøøyy, mäniitiä quiø'ø yhöyøøyy. ⁶ Mänitä fariseoshajxy wyiimbijty. Mänit hajxy ñøcxy maa ja'a Herodes jiamiөөdhajxiän. Ja'a Herodes, gobiernä hänajty tiuumby. Mänitä fariseoshajxy nägøxiä quiojyquiapxyhajty nebiä Jesús hajxy yajyagho'ogóøjät.

⁷ Coo ja'a Jesús hajxy jiiby choñ tsajtøgooty mөөдä jiamiөөдtøjc, mänit hajxy jim ñøcxtägajch maa ja'a mejypia'ajän. Jimä jäya'ayhajxy hänajty may piawädity. Galilea hajxy hänajty choñ. ⁸ Tøø ja'a mädia'agy hänajty wia'xy wiinduhmyhagajpt coo ja'a Jesús madiu'u hoy-yagjuøñäjatypä hänajty yajcähxø'øgy. Coo ja'a jäya'ay ja'a mädia'agy hajxy jaduhñ miädooyy wiinduhmyhagajpt, mänitä Jesús jäya'ay may ñämejtsä. Wiinduhmyhagajpt hajxy hänajty choñ, mөөд jim Judeanaaxooty, mөөд jim Jerusalén, mөөд jim Idumea, mөөд jim Jordánmøjnøøhawiimb, mөөд jim Tiro, mөөд jim Sidón. ⁹⁻¹⁰ Coo ja'a pa'amjäya'ayhajxy hänajty may tøø yajmøcpøgyii, paadiä Jesús hänajty jia wi'i ñähdona'añii ja'a jäya'ayhajxy jaac pa'ammøødpä, ween hajxy jaduhñ ñähwaatspä. Høxtä niyhanø'tsmújcáp hajxy hänajty. Mänitä Jesús ja'a jiamiөөдtøjc ñämaayy coo barcohuung hajxy jim nähix hahixø'ø miähñä'awät, jaduhñä Jesús jiiby paquiä piédät coo hänajty pianø'ødsa'añii ja'a cu'ug.

¹¹ Jimä jäya'ayhajxy hänajty wiädijpä ja'a møjcu'umøødpä. Homiaajä Jesús hajxy hänajty yhixy, mänitä Jesús hajxy hänajty wyiinjjicäda'agy, mänitä Jesús hajxy hänajty ñäma'ay:

—Dios miich xyHuunghajp —jaduhñä møjcu'umøødpähajxy hänajty wyi'i ya'axy.

¹² Mänit hajxy yhanehmä coo ja'a Jesús hajxy quia'a nägäpxät majiäya'ayhagujc. Ja'a Jesús jaduhñ hanehm.

¹³ Mänitä Jesús jim ñocxy tunguhduum. Mänitä Jesús ja'a jiamiøød miøjyaaxy, pøn hänajty hoy quipxy miøødwäditaamby. Coø hajxy jim quioo'ty maa Jesús hänajtiän, ¹⁴ mänit hajxy nämajmetsc wyiinguejxä coø ja'a Jesús hajxy quipxy miøødwädität, møød coø ja'a Diosmädia'agy hajxy nõcxy yajwa'xy. ¹⁵ Mänitä cuhdujt hajxy miooyä coø jäya'ay hajxy yajnähwá'adsät, ja'a hajxy mõjcu'umøødpä. ¹⁶ Jaduhñä Jesús ja'a jiamiøød-hajxy hänajty xiøhaty, ja'a hajxy nämajmetspä. Tu'ug hänajty xiøhaty Simón. Je'e ja'a Jesús yajxøbejt Pedro. ¹⁷ Jimä Zebedeo yhuunghajxy hänajtypä, ja'a Santiago møødä Juan. Jue'e hajxy yajxødägøøyyä Boanerges. Jaduhñ hänajty miädia'agytiägø'øy coø hajxy hänajty paquiä jiaançh tehñ yhawa'anda'agy nebiä häneejän. ¹⁸ Ja'a hajxy hänajty jaac jimä, jaduhñ hajxy hänajty xiøhaty Andrés, møødä Felipe, møødä Bartolomé, møødä Mateo, møødä Tomás, møødä Santiago, ja'a Alfeo yhuung, møødä Tadeo, møødä Simón, ja'a hänajty xøhajpä ja'a celote. ¹⁹ Ja'a miämajmetspä hänajty xøhajp Judas Iscariote. Je'e ja'a Jesús cujegy too'c; ja'a Jesús miädsiphajxy cø'ødägøøyyä. ²⁰ Mänitä Jesús hajxy nõcxy maa tiøjcän møødä jiamiøødhajxy.

Mänitä jäya'ayhajxy may miéjtscumbä maa ja'a Jesús hajxy hänajtiän. Paadiä Jesús hajxy hänajty quia'a näbaadøøyyäxä mänaa hajxy jaduhñ quiáyät møødä jiamiøød, coø ja'a pa'amjäya'ayhajxy hänajty wyi'i yhadsipy coø ja'a pia'amhajxy yajnäxäxät. ²¹ Coø ja'a Jesús ja'a jiuju miägu'ughajxy jaduhñ miädoyhajty coø ja'a Jesús hänajty jiaançh tehñ yhadsibyyi, mänitä Jesús hajxy ñämejch. Mänitä Jesús hajxy jia yajnøcxaanñ hadsip. Jaduhñ hajxy hänajty miäna'añ cooc tyijy ja'a Jesús hänajty tøø quiuhhiñ.

²² Mänitä häna'c-hajxy näje'e quiädaacy, ja'a Diosmädia'agy hajxy hänajty naxy yajnäxixøobiä tsajtøgooty. Jerusalén hajxy hänajty tøø chohnda'agy. Mänit hajxy miänaañ:

—Yø'ø Jesús, puhbéjtäp yø'ø ja'a mõjcu'ugong, paadiä mäjaa miøødä coø jäya'ay yajnähwä'açh, ja'a hajxy mõjcu'umøødpä. Haa ca'a, ja'a mõjcu'ugong ja'a mõjcu'u hajxy wyiindsøn hajpiä —nømä Jesús wyiingapxpejtä.

²³⁻²⁶ Mänitä yajnäxixøobiädøjc-hajxy miøjyaaxä. Mänitä Jesús tiägøøyy yajnäxixøobiä cuento yajmäbaadyhaam.

—Coø jäya'ayhajxy ñimiädsibø'øwøøjät quipxyjiaty tu'cajpt, cab hajxy hoy ñimiøød-tunáanänä. Jaanä jaduhñduhmbä, coø jäya'ayhajxy ñimiädsibø'øwøøjät quipxyjiaty tu'que'ex, cab hajxy hoy tøgooty ñimiøødhidáanänä. Jaanä jaduhñduhmbä, coø ja'a mõjcu'uhajxy ñimiädsibø'øwøøjät quipxyjiaty mõjcu'u, cab hajxy jaduhñ hoy wiädi-taanä. Cøxäp hajxy jaduhñ quiuhdägoyy. Jaduhñä tøyhajt hajxy mmøødhädät coöchä mõjcu'ugong xquia'a puhbety.

²⁷ 'Jaanä jaduhñduhmbä, ni pønä mõcjäya'ay hoy mga'a mäméedsät tijaty jiiby miøød tiøgooty. Mänit mäbøcypiä coø jawyiin mgø'øxots mdecyxiódsät, mänitäs hoy mmäméedsät.

²⁸ 'Tøyhajt jaduhñ coø ja'a Dios jäya'ay miämee'xa'añ nebiatiä pojpä cädieey hajxy miøødä, waambatiä Dios hajxy tøø miägapxtägoy. ²⁹ Pero pønä Dioshespíritu tøø miägapxtägoy, je'e mäbøcypiä, cab hajxy mänaa miämee'xáanänä. Homiänaaxøø ja'a piojpa quiädieey hajxy miäwädita'añ —nømä Jesús miänaañ.

³⁰ Paadiä Jesús jaduhñ miänaañ, coø hänajty tøø ñänømyii cooc tyijy ja'a mõjcu'ugong hänajty miøødwädity.

³¹⁻³² Jimä Jesús hänajty miädia'agynä, mänitä tiajhajxy miejch møødä piuhya'ayhajxy. Coø jäya'ayhajxy hänajty jiaançh tehñ miayyä tøgooty, paadiä tiajhajxy tøguum miäh-møøyy. Mänitä capxy hajxy quiejxy tøgooty coø ja'a Jesús ween yhuuc pädsømy. Jiibiä Jesús jäya'ay hänajty may jiuhhänaawiädityii tøgooty. Mänit hajxy miänaañ:

—Ximä mdaj xwyi'i yajtøy møødä mbuhya'ayhajxy møødä mbuhdo'oxyhajxy.

³³ Mänitä Jesús yhadsooyy:

—Pønñoch ndajhajpy; pønñoch nbuhya'ayhajpy.

³⁴⁻³⁵ Mänitä Jesús jäya'ay wyiinhee'ppejty mäduhñtiä hänajty jiuhhänaawiädityii. Mänit miänaañ:

—Pønjátyhøch nDeedy miädia'agy cudiúunäp, je'ečh ndajhajpy, je'ečh nbuhya'ayhajpy —nømä Jesús miänaañ.

4

¹ Mänitä Jesús jadähooc yhädáaccumbä mejypia'a Diosmädia'agy-yajwiingapxøöbiä. Mänitä jäya'ayhajxy may miejch maa je'e hānajtian. Coö hawa'adspä hānajtj jīm quia'a hity pu'uwiing, paadiä Jesús barcohuungooty tiägøøyy mejuwyiing. Mänit jii by yhäñaaguiädaacy. Jīmä jäya'ayhajxy miähmøøyy pu'uwiing hamädoowhi-jpā waambatiä Jesús hānajtj miädia'agy. ² Mänitä Jesús tiägøøyy yajnähihxøöbiä cuento-yajmäbaadyhaam.

³ —Huuc mäadow hajxy, mänitä jäya'ay tu'ug tiu'ubøjcy trigowøjpä. ⁴ Näje'e trigotøømd quiahy tu'haam. Mänitä muuxyhajxy hoy pyiwø'øgy. ⁵ Wiingtuumä trigotøømd hoy quiähgumbä tsaajoot maa naax hānajtj quia'a møødän. Paquiä trigotøømd miujxy coö naax hānajtj quia'a cøöcä. ⁶ Pero nägooyyä xøø piädsøømy, cøjxä trigohuung tiø'øčh coö tyicts hānajtj cøöc tøø quia'a häda'agy. ⁷ Wiingtuum hoy quiähgumbä maa haptj hānajtj jiaančh tehṃ miayyän. Coö haptj jaduṃ yee'cy, cøjx jaduṃ nāhdāna'ayii. Ni tiøøm ja'a trigo quia'a pejty. ⁸ Wiingtuum hoy quiähgumbä maa ja'a naax hānajtj jiaančh tehṃ tiøø'quiän. Jaančh tehṃ yhoyøøyy ja'a trigo jīm. Näje'e hii'xmajcpajc miøødä tu'wipä; näje'e tägøøghii'xpajc miøødä; näje'e mägo'xpajc miøødä tu'wipä.

⁹ Mänitä Jesús jiaac mänaañ:

—Pøn hädaaduhṃ wiinjuøøby, wéenhøch nmädia'agy xmiäbøjca.

¹⁰ Coö majiäya'ayhajxy wyiimbijty, jīmä Jesús ja'a jiamiøød miøødmähmøøyy, ja'a hajxy hānajtj nämajmetspä, møødä wiingjäya'ay ja'a näwéeñtiäbä. Mänitä Jesús nāmaayyä coö quiapxtøwät waambaty hānajtj tøø miädia'agy. ¹¹ Mänitä Jesús yhadsooyy:

—Jaduṃnä Dios jioot chocy coö mijts mwiinjuø'øwät nebiä miäjaa yajcähxø'øga'añ. Hijty, cap pøn hijty wyiinjuø'øy. Yø'ø wiinghäna'c-hajxy, ni yø'øhajxy quia'a wiinjuø'øy. Päädyhøch yø'ø häna'c-hajxy nyajnähihxø'øy cuento-yajmäbaadyhaam. ¹² Hoy hajxy jia mädooy, cab hajxy wyiinjuø'øy; jaduṃnä Dios hajxy quia'a jøjpøgø'øwät; jaduṃnä piojpä quiädieey hajxy quia'a yajnähwäatsäxät.

¹³ Mänitä Jesús jiaac mänaañ:

—Mijts, pø cab hajxy jaduṃ hoy mwiinjuø'øwa'añ waambátyhøch naamnä tøø ngapxy cuento-yajmäbaadyhaamä, ni jaduṃ hajxy hoy mga'a wiinjuø'øwa'añ waambátyhøch njaac yajmøødmädia'aga'añ cuento-yajmäbaadyhaam. ¹⁴ Ja'a jäya'ay trigowøjpä, jaduṃ mäwfiinäts miäbaady nebiä Diosmädia'agy-yajwa'xpän. ¹⁵ Ja'a trigotøømd cáhwäbä tu'haam, jaduṃ mäwiin miäbaady nebiä jäya'ay ja'a Diosmädia'agy hajxy näje'e jia mädooyyän. Pero nägooyyä ja'a møjcu'u nāmech, mänitiä hajxy yagjahdiägøoyyäxä waambaty hajxy tøø yajwiingapxø'øyii. ¹⁶ Ja'a tøømd cáhwäbä tsaajoot, jaduṃ mäwiin miäbaady nebiä jäya'ay ja'a Diosmädia'agy hajxy näje'e paquiä miäbøquiän, Jaančh tehṃ xioondaacp hajxy jaduṃ. ¹⁷ Pero cab hajxy jejcy miäbøcy. Nägooyyä hajxy jaduṃ chaächtiiñii ja'a Diosmädia'agyquiøxpä, mänit hajxy nājtshixøøñä. ¹⁸ Ja'a tøømd cáhwäbä maa haptj jiaančh tehṃ miayyän, jaduṃ mäwiin miäbaady nebiä jäya'ay ja'a Diosmädia'agy hajxy näje'e jia mäbøquiän. ¹⁹ Pero jiaančh tehṃ jiahmiejchp hajxy jaduṃ ja'a hädaa yaabä naaxwiimbä. Je'e hajxy jaduṃ wyi'i nādajpy wyi'i nāmaaby neby hajxy hoy chäná'awät, neby hajxy hoy yhäyówät, møød maa mäyøøhadyiibän. Yajtägoobiä Diosmädia'agy hajxy jaduṃ. ²⁰ Ja'a tøømd cáhwäbä maa naax jiaančh tehṃ tiøø'quiän, jaduṃ mäwiin miäbaady nebiä jäya'ay ja'a Diosmädia'agy hajxy näje'e hamuumdu'joot miäbøquiän. Hoy hajxy jiaančh tehṃ quiudiuñ. Jaduṃ hajxy miäbaady nebiä trigo hii'xmajcpajc miøødän tu'wipä, møød nebiä tägøøghii'xpajc miøødän, møød nebiä mägo'xpajc miøødän tu'wipä.

²¹ Mänitä Jesús jiaac mänaañ:

—Coö jäya'ay jøøn hajxy quiudøø'xø'øy, cøxp hajxy yujcoñ. Cab hajxy jii by quiuhjupy cubetapa'c. Ni jii by hajxy quia'a päda'agy maabejtpa'c. ²² Jaanä jaduṃduhmbä, tijaty

jaduhñ hijp yu'učh, tsipcøxp jaduhñ quiøxy cāhxø'øga'añ. ²³ Pøñ jaduhñ wiinjuøøby, wéenhøch nmädia'agy xmiäbøjcä.

²⁴ Mänitä Jesús jiaac mänaañ:

—Huuc wiinjuøøw hajxy nébiøch cham nyajmøødmädia'aga'añ; pøñ hädaa mädi-a'agy hoy wiinjuøøby, maas hoy jaduhñ jiaac yajwiinjuøøwa'añii. ²⁵ Pøñhøch nmädi-a'agy tøø xmiäbøjcä, je'ečh njaac yajnähxø'øwaamby. Pero pøñhøch nmädia'agy tøø xquia'a mäbøjcä, cābøch je'e tii nyajnähxø'øwaannä. Høxtä jahdiägoyyaamby je'e mädyii tyijy tøø jia wiinjuøøy.

²⁶ Mänitä Jesús jiaac mänaañ:

—Coo ja'a Dios ja'a miøcmäjaa yajcāhxø'øga'añ, jaduhñ mäwiin miäbaady nebiä jäya'ay ñi'ibiän. ²⁷ Coo ñiippädøøy, mänit nøcxy miaanä coo tøø quioodsøøy. Cujaboom, coo jiobøøy, mänit piädøøcumbä. Pero cab jaduhñ ñajuøøy nebiä tøømd miuxy. Hix, hamdsoo ja'a tøømd miuxy yeegy. ²⁸ Ja'a tøømd, jiibiä miäjaa piaady naaxooty. Coo miuxy, mänit yeegy. Coo yeegy, mänit piøjy. Coo piøjy, mänit tiøømbety. Coo tiøømbety, mänit miäjay. ²⁹ Coo miäjay, mänit hajxy chucy. Tøø jaduhñ yhabaatnä coo hajxy yajpädøøgät.

³⁰ Mänitä Jesús jiaac mänaañ:

—Nebiaduhñ njaac yajmäbáatämät coo ja'a Dios ja'a miøcmäjaa jaduhñ yajcāhxø'øga'añ. ³¹⁻³² Coo ja'a Dios ja'a miøcmäjaa yajcāhxø'øga'añ, jaduhñ mäwiin miäbaady nebiä mostazapajcän. Jaančh tehñ chay ja'abi' mostazapajc jaduhñ. Ni mädyii hujts piajc jaduhñ quia'a tsayyä nebiä habi' mostazapajc chayyän. Pero coo mní'ibät, jaančh tehñ piaquiä jaduhñ yeegy cøxp. Mäjatyjaty yhaa'x yeegy. Høxtä hoyyä muuxyhajxy jim pie'eñ yhaa'xjooty.

³³⁻³⁴ Haagä hädaaduhmbä cuento-yajmäbaadyhaamä Jesús ja'a cu'ug hänajty yajwiingapxøøy, mäduhñtiä hajxy hänajty hoy wyiinjuøøwa'añ. Pero coo ja'a cu'ug hänajty tøø wyiimbijnä, mänitä Jesús ja'a jiamiøød hawiing ca'xy quiapxtøønä, ja'a hajxy hänajty nämajmetspä.

³⁵ Coo chuujøøyy, mänitä Jesús ja'a jiamiøød ñämaayy:

—Tsøc hajxy jáamäm barcojooty; jam hajxy jimhaamby mejyhawiimb.

³⁶ Jiibiä Jesús hajxy hänajty yhäña'ay barcojooty møødä jiamiøødhajxy. Mänit hajxy tiu'ubøjcy. Jiibiä jäya'ayhajxy näje'e piadu'ubøjypä wiingbarcojooty. Pero ja'a majiäya'ay, jim hajxy miähmøøyy mejypia'a. ³⁷ Mänit møc tiägøøyy pojpä. Mänitä mejy tiägøøyy ja'tspä. Mänitä barco ñähja'tspejtä. Mänitä nøø com tiägøøyy barcojooty. Høxtä hujts ja'a barco jaduhñ. Quinaambä barco hänajty. ³⁸ Pero ja'a Jesús, maab hänajty je'e jiiby barcohøjxhaam. Cuhnøøxøøy hänajty jiiby mia'ay. Jaančh tehñ chähgøøbiä Jesús ja'a jiamiøødhajxy hänajty. Mänitä Jesús hajxy hoy yuxy. Mänitä Jesús ñämaayyä:

—Wiindsøn, nej, caj mdajy mmayyä coo hajxy nguhdägoyyänämä.

³⁹ Coo ja'a Jesús mia'abiädøøcy, mänitä poj yhojy møødä mejy coo yuungøøwät. Mänitä poj jiaančh mooñ; møødä mejy, yuungøøyy je'ebä. ⁴⁰ Mänitä Jesús ja'a jiamiøød ñämaayy:

—Tii hajxy hijty coo mwi'i chähgøøy. Nej, cab hajxy mmäbøquiä coočh møcmäjaa nmøødä.

⁴¹ Jaančh tehñ chähgøøby hajxy hänajty. Mänit hajxy hamee'ch ñiñämaayyä:

—Pøñäda'a yøø; høxtä poj møødä mejy, cudiúunäxäbä miädia'agy yøø.

5

¹ Mänitä Jesús hajxy jim miejch mejyhawiimb, maa ja'a naax hänajty xiøhatiän Gerasa. ² Coo hajxy miänajcy barcojooty, jimä jäya'ay hänajty tu'ug tiäna'ay jäguemjuøøby. Møjcu'u hänajty tøø yajtägøøy. ³ Jutjooty hänajty chäna'ay maa ja'a ho'ogyjiäya'ay hajxy hänajty ñaaxtägøøyän. Jaančh tehñ miøcä craa hänajty. Ni cadenahaamä jäya'ayhajxy hänajty hoy quia'a cøøxots quia'a tecyxiodsa'añ. ⁴ Mayhooc hajxy hänajty tøø jia cøøxoch tøø jia tecyxioch cadenahaam. Pero wyi'i yaghapodøøbiä cadena hänajty. Ni pøñ hänajty quia'a mäjäda'aga'añ. ⁵ Xøømdsuhñ hänajty jim ya'axy jiocy

cabäsantäjooty mөөd tunjooty. Naxy hänäjty tsaahaam hamdsoo ñiichugyii. ⁶ Coo ja'a Jesús jaduhñ yhiyxä jäguem, mänit päyø'øguiä ñänøcxä. Mänit hoy wyiinjiicäda'agyii.

⁷⁻⁸ Mänitä Jesús ja'a møjcu'u ñämaayy:

—Jua'ads miičh jii by maa yø'ø craajän.

Mänitä møjcu'u mөc yaaxy:

—Miičh Jesús, miičhä Dios xyHuunghajp, ja'a jim tsajpootypä. Nej mnijiäwø'oyii mөөd hөөčhcөxpä. Tunä mayhajt, ca'ačh xchaačhtiuñ. Dios, cөxp je'e.

⁹ Mänitä Jesús ja'a møjcu'u miäyajtøoyy:

—Tii mxøhaty.

Mänitä møjcu'u yhadsooyy:

—Legiönghöch nxøhaty. Páadyhöch jaduhñ nxøhaty coo hөjts jaduhñ njaanč tehñ ñämayyä.

¹⁰ Mänitä Jesús miänuu'xtaacä coo ja'a møjcu'uhajxy quia'a hөxquexöjät jäguem.

¹¹⁻¹³ Jim wiingón maa ja'a Jesús hajxy hänäjtiän, jim mejypia'a, jimä hädsømhajxy hänäjty may yuomydiajy tunmөjc. Nämejtsmil hajxy hänäjty wiädity. Mänitä Jesús jadähooc miänuu'xtaacä coo ja'a møjcu'uhajxy ween jim quiexyii maa ja'a mayhädsømän, weenä hädsømhajxy nøcxy yajtägø'oyii. Mänitä møjcu'uhajxy jiaanč quejxä maa ja'a hädsømän. Mänitä craa ñähwaach, ja'a hänäjty tøø miöjcu'uyajtägø'oyijäbä. Mänitä hädsømhajxy cөjx yajtägø'oyii. Mänit hajxy päyø'øguiä yhädaacy mejjiiooty. Cөjx hajxy jii by ñøøji'xø'öy.

¹⁴ Ja'a häna'c-hajxy hänäjty jim hädsømgüendähajpä, cөjx hajxy piäyø'ögy. Hoyyä mädia'agy hajxy jim yajwa'xy cajptooty mөөd cajtpa'a neby hänäjty tøø jiadyii tøø tiuñii. Coo ja'a cu'ughajxy jaduhñ miädooyy, mänit hajxy hoy yhiyx. ¹⁵ Coo hajxy jim miejch maa ja'a Jesús hänäjtiän, mänitä craa hajxy yhiyx, ja'a hijty pa'ammøödpä, coo hänäjty tøø ñähwäatsänä ja'a møjcu'u. Jim je'e hänäjty witmөөd yhäñaañä. Coo hijty pia'ammøödü, nähwa'ads hөxwa'ads hijty wiädity. Tøø hänäjty wyiinmahñmejtsnä. Jaanč tehñ yagjuøoyy ja'a cu'ughajxy jaduhñ coo ja'a craa hajxy yhiyx coo ja'a pia'am hänäjty tøø ñähwäatsänä. Höxtä tsähgøoyy hajxy jaduhñ. ¹⁶ Mänit hajxy cөjx yajmøödmädia'agyii neby hänäjty tøø jiadyii tøø tiuñii. Ja'a jäya'ayhajxy jaduhñ hijxäbä coo ja'a hädsøm ja'a møjcu'u hajxy yajtägøoyy, je'edshajxy jaduhñ mädiaac. ¹⁷ Mänitä cu'ug ja'a Jesús hajxy miänuu'xtaacy coo jim chöönät maa ja'a quiajpthajxiän.

¹⁸ Coo ja'a Jesús hänäjty wyiimbidaannä barcojooty, mänit jaduhñ ñämaayyä coo ween piadu'ubögyii. Ja'a craa jaduhñ mänaan, ja'a pia'am hänäjty tøø yajnäxäxäbä. ¹⁹ Mänitä Jesús ja'a craa ñämaayy:

—Caj, ca'ačh xpianөcxy. Nөcx jim maa ja'a mdöjcän, maa ja'a mjujy maa ja'a mmägu'ugän. Nөcxä mädia'agy yajwa'x coo miičhä Dios tøø xñäxuuch, coo miičhä Dios ja'a møjcu'u tøø xyajnähwä'ačh.

²⁰ Mänitä craa jiaanč nøcxy maa ja'a tiöjcän. Mänitä mädia'agy jim tiägøoyy yajwa'xpä maa naax hänäjty xiøhatiän Decápolis. Jaduhñ je'e miädia'agytiägø'öy majc-cajpt. Jaduhñä miädia'agy hänäjty yajwa'xy coo ja'a Jesús ja'a mähdiojc møjcu'umøödpä hänäjty tøø yajnähwa'ačh. Coo ja'a cu'ughajxy jaduhñ miädooyy, mänit hajxy jiaanč tehñ yagjuøoyy.

²¹ Mänitä Jesús hajxy wyiimbijnä barcojooty mөөdü jiamiøödhajxy. Coo hajxy jim miéjtscumbä mejyhawiimb maa hajxy hänäjty tøø chohnda'aguiän, mänit hajxy jim biarcomänajcy mejypia'a. Mänitä Jesús jäya'ay may ñämejtsä. ²² Mänitä Jesús jäya'ay tu'ug wyiinjiicädaacä. Jairo hänäjty xiøhaty. Je'e hänäjty jim tuumb wiindsón maa ja'a tsajtöjcän. ²³ Mänitä Jesús miänuu'xtaacä:

—Wiindsón, möjtä'agyhöch nhuung. To'oxiäna'c je'e. Majmetscjumöjt miøödü. Jámhöch nhuung cø'önähgäjpäc, ween jaduhñ miöcpöcy —nömä Jairo miänaañ.

²⁴ Mänitä Jairo ja'a Jesús miødhajty. Jimä jäya'ay ja'a Jesús hajxy hänäjty may pianø'öch piabooñ. ²⁵ Jimä tajjäya'ay hänäjty tu'ug pa'ammøödpä majiäya'ayhagujc. Majmetscjumöjtä ñø'ty hänäjty tøø xiee'xy jabom-jabom. ²⁶ Tøø ja'a mähdiojc hänäjty jejcy

jia yajtsooyø'oy maa ja'a doctorhajxiän. Pero cábädsä pia'am hänajty ñä'ägä yajnájxäxä. Tøø ja'a xiädø'øñ hänajty quiøjxnä tii jaduhñ ñä'ä jaac yajniñämäjuyø'øwøøjäp. Coø hänajty jaduhñ ñä'ägä yajtsooyø'oy tehngajnä, maas hanaxiä pia'am hänajty jaduhñ jiaac tehñ miøjta'agy. ²⁷⁻²⁸ Coø ja'a mähdijc jaduhñ miädoyhajty coø ja'a Jesús hänajty wiädity mäba'amyajnajxpä, mänit jaduhñ wyiinmaayy quiopcooty: "Cooçh yø'ø wyit häyaa nnä'ä nähdoonät, náxäbøch nba'amäda'a häyaaä." Mänitä Jesús jioyuhdiägøøyyä. Mänitä wyit jiaançh nähdoonäxä. ²⁹ Mänitiä tajjäya'ay ñø'ty jiaançh hadujcy. Mänit ñijiäwøøyyä coø ja'a pia'am hänajty tøø ñaxy. ³⁰ Mänitä Jesús ñijiäwøøyyä coø tu'jaya'ay hänajty tøø miøcpøcy ja'a miäjaahaam. Mänitä Jesús ja'a jäya'ay cøjx wyiinhee'ppety. Mänit miänaañ:

—Põnhøch nwit tøø xñähdoonä.

³¹ Mänitä jiamiøødhajxy yhadsooyy:

—Tii jaduhñ coø myajtøy pø tøø miiçh jäya'ay mwit xñähdoonä. Haa ca'a, majiäya'ay hajxy jaduhñ xwyi'i pianø'tsämä —nømä Jesús ñämaayyä.

³² Pero jimä Jesús hänajty yhäxta'aynä pønä wyit hänajty tøø nähdoonäxä. ³³ Ja'a tajjäya'ayä, jaançh tehñ chähgøøby hänajty je'e. Paady hänajty chähgø'oy coø hänajty ñajuø'oy neby hänajty tøø miøcpøcy. Mänitä Jesús hoy wyiinjiçäda'agyii tsäyüuyyap. Mänitä tajjäya'ay ñägapy neby hänajty tøø miøcpøcy. ³⁴ Mänitä Jesús miänaañ:

—Huung, paady miiçh mba'am tøø ñaxy coø tøø mmäbøcy cooçh mäjaa nmøødä cooçhä jäya'ay tøy njaançh yajpa'amnaxy. Nøcxnä jootcujc.

³⁵ Jimä Jesús hänajty miädia'agyñä, mänitä jäya'ayhajxy näje'e miejch. Jim hajxy hänajty tøø chohnda'agy maa ja'a Jairo tiøjcän. Mänitä Jairo ñämaayyä:

—Tøø ja'a mhuung yho'nä. Ca'a Jesús mhadsijpnä. Tii jaduhñ jim ñä'ä jaac túnäp. Tøø ja'a mhuung yho'nä.

³⁶ Coø ja'a Jesús jaduhñ yhamädoonajxy, mänitä Jairo ñämaayyä:

—Ca'a mga'a mäbøcy. Ca'a mjootmayhaty —nømä Jesús miänaañ.

³⁷ Mänitä Jesús miänaañ coø pøn jim quia'a panøcxät maa ja'a Jairo tiøjcän. Jagóoyyägä Pedrohajxy jim ñøcxät møødä Santiago møødä Juan, ja'a Santiago piuhya'ay.

³⁸ Coø hajxy jim miejch maa ja'a Jairo tiøjcän, jaançh tehñ jioøby jaançh tehñ yaaxpä jäya'ayhajxy hänajty jim. ³⁹ Mänitä Jesús hajxy tiøjtägøøyy. Mänitä Jesús miänaañ:

—Cajxä yø'ø to'oxiäna'c ñä'ä hó'oguiäbä. Tii hajxy coø mwi'i jioø'oy coø mwi'i ya'axy. Nä'ä maab yø'øduhñ.

⁴⁰ Coø ja'a Jesús jaduhñ miänaañ, mänit ñäxiicä. Mänitä Jesús ja'a jäya'ay cøjx yhäxuejxpädsømy tøghaguuy. Mänitä Jesús ja'a to'oxiäna'c hajxy ñänøcxny maa to'oxiäna'c hänajty quio'na'ayän, møødä Jesús ja'a jiamiøødhajxy, møødä to'oxiäna'cä tiaj tieedyhajxy. ⁴¹ Mänitä Jesús ja'a to'oxiäna'c wyidsø'cy. Mänit ñämaayy:

—Quixyhuung, pädø'øg.

⁴² Tuunä ja'a Jesús jaduhñ ñä'ä mänaañ, mänitiä to'oxiäna'c jiaançh pädø'cy. Mänit yo'oyø'cy. Jiaançh tehñ yagjuøøyy ja'a Jairohajxy jaduhñ møødä Jesús ja'a jiamiøødhajxy. ⁴³ Mänitä Jairohajxy yhanehmä coø hajxy jaduhñ quia'a mädiä'agät coogä yhuung hänajty tøø jiuypioøcy. Mänit hajxy ñämáayyäbä coø yhuung hajxy yajcáyät. Ja'a Jesús jaduhñ mänaañ.

6

¹ Coø ja'a Jesús hajxy jim chóhngumbä møødä jiamiøødhajxy, mänit hajxy jim ñøcxny maa ja'a cajpt hänajty xiøhatiän Nazaret. Jimä Jesús hänajty ñä'ägädä tsoon. ² Coø ja'a poo'xxiøø yhabaaty, mänitä Jesús jim ñøcxny maa ja'a tsajtøjcän. Mänit tiägøøyy yajnähixøøbiä. Coø ja'a cu'ughajxy jaduhñ miädooyy, mänit hajxy jiaançh tehñ yagjuøøyy. Mänit hajxy tiägøøyy niñämáayyäbä:

—Maa yø'ø craa mädia'agy jaduhmbä tøø ñä'ä maañ yhabøcy coø jaduhñ jiaançh tehñ jiaty jiaançh tehñ ñajuø'oy, coø jaduhñ hoy-yagjuøøñäjaty yajcähxø'ogy. Haa ca'a, højts nmägunaaxhájtäm yø'øjä. ³ Je'e yø'ø, ja'a hijty tsejtspä pujxpä. Ja'a María yhuung

yø'ø. Hajchhájitáp yø'ø, ja'a Santiago, møødä José, møødä Judas, møødä Simón. Yaa ja'a piuhdo'oxyhajxy chäna'ay maa højts ngajptän.

Coo ja'a Jesús hänajty jim choon Nazaret, paady hänajty jim quia'a mämøjø'øy quia'a mämayø'øyii.

⁴ Coo ja'a Jesús jadhun miädooyy, mänit miänaañ:

—Homiaajä ja'a Dioswiingueypähajxy wyiingudsähgø'øyii. Jagooyyä hajxy jim quia'a wiingudsähgø'øyii maa yhamdsoo cajpthajxiän, maa yhamdsoo tøjc-hajxiän.

⁵ Coo ja'a Jesús hänajty jim quia'a mämøjø'øy quia'a mämayø'øyii, paady hänajty jim madiu'u hoy quia'a yajcähxø'øga'añ. Nämets nädägøøquiä pa'amjäya'ayhajxy jim nää'ä maañ yajpa'amnajxä cø'ønähgapyhaam. ⁶ Jiaančh tehñ yagjuøøbiä Jesús hänajty jadhun coo ja'a miädia'agy jim quia'a jøjpøgøøyyäxä.

Mänitä Jesús ja'a mädia'agy jim tiägøøyy yajwa'xpä mäduhñjatiä cajpthuung wi-ingonbä. ⁷ Mänitä Jesús ja'a jiamiøød wyiinguejxy, ja'a hajxy hänajty nämajmetspä, coo hajxy wiädítät cajpt-cajpt, coo ja'a pa'amjäya'ay hajxy yajnähwá'adsät, ja'a hajxy hänajty møjcu'umøødpä. Nämetscjaty hajxy hänajty wiädita'añ. ⁸ Mänitä Jesús ja'a jiamiøød jiaac nämaayy coo hajxy tii quia'a mänócäxät, ni tsajcaagy, ni morral, ni xädø'øñ. Jagooyyä yomybiaxy hajxy quiábät tu'uquiä. ⁹ Tu'tehñquiä cø'øg hajxy miänócäxät møød tu'xojxyä wit. ¹⁰ Mänitä Jesús jiaac mänaañ:

—Coo hajxy jim mmédsät homiädyii cajptä, jimä tøjc hajxy tu'ug myujwá'anät maa hajxy hänajty mmejtsta'aga'añän. Jimiä hajxy jadhun mhídät. Cabä tøjc hajxy myajtägätsät. ¹¹ Majaty mijtsä cu'ugä mmädia'agy hänajty xquia'a jøjpøgø'øwaanä, mänitä mdecy hajxy mwiinxit mwiinwóbät, weenä naaxoc jadhun quiøxy ca'ay. Jadhunä hijxtahnd miähmø'øwät coo ja'a cu'ugä Diosmädia'agy hajxy hänajty tøø quia'a jøjhad-sowø'øy. Mänit hajxy jim mdsóonät.

¹² Mänitä Jesús ja'a jiamiøødhajxy tiu'ubøjnä mädia'agy-yajwa'xpä. Jadhunä cu'ug hajxy hänajty yajwiingapxø'øy coo ja'a Diosmädia'agy hajxy piadu'ubójnät, møød coo ja'a yhaxøøgwiiinmahñdy hajxy ñajtshixøøñät. ¹³ Mayyä jäya'ayhajxy hänajty yajnähwa'ačhii, ja'a hajxy hänajty møjcu'umøødpä. Mayyä pa'amjäya'ayhajxy hänajty yajmøcpøgyii coo hon hajxy hänajty yajnähjaaxyii.

¹⁴ Jimä Herodes hänajty guiobiernähaty maa ja'a naax hänajty xiøhatiän Galilea. Mänitä Herodes miädoyhajty coo ja'a Jesús ja'a hoy-yagjuøøñäjatypä hänajty yajcähxø'øgy. Mänitä Herodes miänaañ cooc tyijy ja'a Juan mäyajnäbejpä tøø jiuyp-iøjtägach. Ja'a Juan, je'e ja'a Herodes yhajodhajt cooc tyijy hänajty je'e Jiesúsä; páadiägä hoy-yagjuøøñäjatypä yajcähxø'øgy ja'a wyiinmahñdycøxpä, cooc tyijy hänajty tøø jiuyp-iøjtägach.

¹⁵ Wiingatiä jäya'ayhajxy hänajty miänaambä. Naje'e hajxy hänajty miäna'añ cooc tyijy Jesús hänajty je'e yhElíasä. Naje'e hajxy hänajty miänaambä cooc tyijy ja'a Jesús hänajty wiädity nebiä jecyjiäya'ayhajxy hänajty tøø Dyiosmädia'agy-yajwa'xiän jegyhajty. ¹⁶ Pero ja'a Herodes, tehngajnä je'e hänajty miäna'añ cooc tyijy je'e Jwiangä, ja'a hänajty tøø yajyo'puxyíjábä. Je'eg tyijy jadhun tøø jiuyp-iøjtägach.

¹⁷⁻¹⁸ Hix, haxøøgä Herodes hänajty jiäya'ayhaty; ja'a yhamdsoo puhya'ay tio'oxiøjc hänajty miøødtsänáayyap. Felipe ja'a Herodes piuhya'ay hänajty xiøhaty. Herodías ja'a Felipe tio'oxiøjc hänajty xiøhjäp, ja'a Herodes hänajty miøødtsänaabiä. Mänitä Juan ja'a Herodes yhojy: “Cab jadhun yhooyä coo ja'a mhamdsoo puhya'ay tio'oxiøjc jadhun mmøødtsänáayyät.” Coo ja'a Herodes jadhun yhojjä, paadiä Juan yajmajtsä. Mänitä Juan chuümä.

¹⁹ Cabä Herodías hänajty yhojwiø'øy coo ja'a Herodes jadhun yhojjä, paadiä Herodías ja'a Juan hänajty jia wi'i yajyagho'oga'añii. ²⁰ Pero cabä Herodes hänajty jadhun miäna'añ coo ja'a Juan yagho'ogøøjät. Hix, wyiingudsähgøøbiä Herodes ja'a Juan hänajty. Ñajuøøbiä Herodes hänajty coo ja'a Juan hänajty jiaančh tehñ yhojhäna'cä. Jaančh tehñ yhomiädoonä ja'a Herodes ja'a Juan miädia'agy hänajty miädoowä. Pero cabä Herodes hänajty ñajuø'øy neby jiatcø'øwät. ²¹ Cabä Herodías wiinmahñdy hänajty

ñä'ägädä paady nebiä Juan yajyagho'ogóójät. Mänit yhabaaty coo ja'a Herodes xiø hánajty jiada'añii. Mänitä Herodes ja'a jiamiøødtøjc miøødcaayy miøødhuucy, møødä mioonsähajxy, møødä generalhajxy, møødä mäyøødøjc-hajxy, ja'a hajxy hánajty jim tsánaabiä Galilea. ²²⁻²³ Jim hajxy hánajty quia yhu'ugy, mänitä Herodías yhuung jiiby tiøjtägøøyy. Mänitä quixy tiägøøyy hejtspä pujpä. Jaančh tehñ yajxon̄ yhejch piujty. Jaančh tehñ xioondaac ja'a Herodeshajxy jaduhñ møødä wioybä wyichpä. Mänitä Herodes ja'a quixy ñämaayy:

—Tehñ tiøy nnämä'awät, høøch yajmäyujwáan̄ac tii mdsogaamby, nmó'owábøch miich je'e, hotyijä, høxtä nmó'owábøch miich naax cupc maach yaa ngobiernähatiän.

Paadiä Herodes jaduhñ miänaañ, jaančh tehñ xioondaacp hánajty jaduhñ coo ja'a quixy hánajty yajxon̄ yhech. ²⁴ Mänitä quixy piädsøømy. Mänitä tiaj hoy miäyajtøy tiig jaduhñ yujwá'anäp. Mänitä Herodías wiinmahñdy piaaty nebiä Juan mäyajnäbejpä yajyagho'ogóójät. Mänitä yhuung ñämaayy coo ja'a Juan ja'a quiopc yujwáan̄äxät. ²⁵ Mänitiä quixy ja'a Herodes hoy ñäma'ay:

—Høøchä Juan quiopc móoyyác texyjooty.

²⁶ Coo ja'a Herodes jaduhñ ñämaayyá, mänit jiaančh tehñ jiootmadiägøøyy. Mänit jaduhñ ñähadsooyy. Hix, tøø hánajty jaduhñ miäna'añ cooc hánajty hoy ñä'a tiijä yega'añ. Hix, tøø ja'a wioybä wyichpä hánajty jaduhñ yajmädoy. ²⁷ Mänitä Herodes ja'a mioonsä jiiby quiejxy pujxtøgooty coo ja'a Juan nøcxy yo'puxyii. ²⁸ Mänit hoy jiaančh yo'puxyii. Mänitä quixy ja'a Juan quiopc hoy yajcø'ødägø'øyii texyjooty. Mänitä tiaj hoy miødiägach.

²⁹ Coo ja'a Juan jiamiøødhajxy jaduhñ miädoyhajty coo ja'a Juan hánajty tøø yagho'o-gyii, mänitä Juan ñi'x hajxy hoy yajpädø'cä. Mänit hajxy hoy yajnaaxtägø'øy.

³⁰ Mänitä Jesús ñämejtstägajtsä ja'a jiamiøød, ja'a hajxy nämajmetspä. Cøjxä Jesús yhawáan̄äxä, nebiaty hajxy hánajty tøø miäba'amyajnaxy, møød waambaty hajxy hánajty tøø yajnahixø'øy. ³¹ Jaančh tehñ miayyá Jesús jäya'ay hajxy hánajty ñämechii. Wiimbijp hadøjpä majiäya'ayhajxy hánajty. Coo ja'a jäya'ayhajxy may wyi'i miech, paadiä Jesús hajxy hánajty quia'a nabaadøøyyäxä mäduhñajtä hajxy quia yhu'ugät. Mänitä Jesús miänaañ:

—Jam hajxy paquiä póo'xäm wiingtuum maa majiäya'ay hajxy xquia'a paadäänäm.

³² Mänitä Jesús hajxy tiägøøyy barcojooty. Tsohñ hajxy jimän. Mänit hajxy jim ñøcxy maa ja'a majiäya'ayhajxy hánajty quia'a jadyhitiän. ³³ Coo ja'a Jesús hajxy jaduhñ yhiixtu'ubøjcä, mänitä majiäya'ayhajxy wyi'i piadu'ubøjpa. Ñajuøøby hajxy hánajty jaduhñ maa ja'a Jesús hajxy hánajty ñøcxa'añ. Päyø'øguiä hajxy jaduhñ ñä'ägä nøcxy. Jawyiin hajxy jim ñä'ägä mejch maa ja'a Jesús hajxy hánajty ñøcxiän. Wiinduhmyguiajpt hajxy hánajty choon̄. ³⁴ Coo ja'a Jesús jiiby piädsøømy barcojooty, mänitä jäya'ay yaghixøøyy may. Mänit näxuu'tscapxy miøødhajty. Jaduhñ yhiixy nej coo meeg wyiindsøn̄ ca'a hijpän, coo ja'a Diosmädia'agy hajxy hánajty quia'a yajnahixø'øyii. Mänitä Jesús madiu'u tiägøøyy yajnahixøøbiä. ³⁵ Tøø hánajty chuujøøñä. Mänitä Jesús ja'a jiamiøød ñämejtsä. Mänitä Jesús ñämaayyá:

—Jue'e jaduhñ yaa, pactuum. Cabä cajpt yaa maa ja'a cu'ug quiaayyøøc hajxy häyaa jiüyät. Tøø jaduhñ hoyhoy jiaančh tehñ chuujø'øy. ³⁶ Nämä'aw yø'ø cu'ug, ween hajxy nøcxy quia yhøxta'ay maa ja'a cajpt yaa wiingonbän —nømä Jesús ñämaayyá.

³⁷ Mänitä Jesús yhadsooyy:

—Tsøg hajxy nä'ägä yajcáayyäm højtshajtäm.

Mänit hajxy yhadsoogumbä:

—Haa tii hajxy jaduhñ nhuuc nä'a yajcáayyämbäp. Cajx nä'a caayyøøcpä nä'a huucøøcpä. Nej, jaduhñ miich mmäna'añä coo højts tsajcaagy nøcxy njuy mejtsmägo'x denario —nømä Jesús jiamiøød ñämáayyägumbä.

³⁸ Mänitä Jesús miänáangumbä:

—Huuc mäyajtøw yø'ø cu'ug pøn̄ caayyøøc møød. Pønjaty jaduhñ møød, ween hajxy yajmucy.

Coo hajxy hänajty tøø yajmujnä, mänitä Jesús ñämaayyá:

—Jagooyyá højts tsajcaagy mägooxyä tøø nbaady møødä hacx metsyá.

³⁹⁻⁴⁰ Mänitä Jesús miänaañ coo ja'a cu'ughajxy yhøxtá'agät necchooty tu'hagøøbiä-jaty, nämägo'xhaam møød näjuxychägui'xmajc-haam. Mänit hajxy jaduhñ jiaančh yhøxtaacy. ⁴¹ Mänitä Jesús ja'a tsajcaagy mägooxpä quioondsooyy møødä hacx metspä. Coo chajhee'py, mänitä Dioscujú'uyäp yejcy ja'a tsajcaagy quiøxpä møødä hacx quiøxpä. Mänitä tsajcaagy tiägøøyy haguidøøbiä. Mänitä jiamiøød tiägøøyy moobiä ja'a tsajcaagy møødä hacx, ween hajxy jaduhñ yajwa'xy maa ja'a cu'ugän. Tehngajnä Jesús ja'a tsajcaagy hänajty yajwa'añguiojy møødä hacx. Jiaac tehñ yajmayøøby hänajty jaduhñ. ⁴² Cu'uxiä jäya'ayhajxy jaduhñ jiaančh tehñ quiaaayy. ⁴³⁻⁴⁴ Hoyyá jäya'ayhajxy hänajty jaduhñ jia mayyá, majmetscachä tsajcaagy quiunajxy møødä hacx. Ja'a Jesús jaduhñ yajwa'añguioj. Nämägooxmil ja'a ya'adiøjc-hajxy jaduhñ quiaaayy yhuucy.

⁴⁵ Mänitiä Jesús ja'a jiamiøød ñämaayy coo hajxy tiägø'øwät jiiby barcojooty, wéénäc hajxy jim ñøcxø'ogät mejyhawiimb maa ja'a cajpt jaduhñ xiøhatiän Betsaida. Coogä Jesús ja'a majiäya'ay jaduhñ nähguéecnät, mänitác hajxy jim ñibiaadøøjät. ⁴⁶ Coo ja'a Jesús ja'a majiäya'ay nähgueecy, mänit jim ñøcxy tungøxp Diospa'yaaxpä. ⁴⁷⁻⁴⁸ Coo quioodsøøyy, jimä Jesús hänajty tøø miähmø'øy mejypia'a nidiuhñ. Ja'a barco, jagooyyá hänajty mejyquiujc tøø ñä'ä mahñ miech. Jaančh tehñ miøcä barco hänajty jiojcuøj'øyii. Tøø ja'a Jesús jiamiøødhajxy hänajty jiaančh tehñ yhanuu'xøøñä coo ja'a barco hajxy hänajty jia wi'i quiaaby. Coo ja'a Jesús jaduhñ yhiixy coo hajxy hänajty tøø yhanuu'xøøñä, mänit yo'oyhaam tiu'ubøjcy nøøwiing. Mobädajpä hänajty jioø'øwaannä, tøø ja'a Jesús ja'a jiamiøød hänajty ñajtspaadøøñä. Wyiinnaxáannäbä Jesús ja'a jiamiøød hänajty jaduhñ. ⁴⁹ Coo ja'a Jesús yhiixä coo hänajty yo'oy nøøwiing, mänitä jiamiøødhajxy miänaañ cooc tyijy hänajty je'e yháañämä. Mänit hajxy møc chaačhyaaxy. ⁵⁰ Nägøxiä hajxy hänajty chähgø'øy coo ja'a Jesús hajxy jaduhñ yhiixy coo hänajty yo'oy nøøwiing. Cab hajxy choj høxcajpy. Mänitä Jesús miänaañ:

—Møcä mjoot hajxy päda'ag; høøčh hädaa; ca'ačh hajxy xchähgø'øy.

⁵¹ Coo ja'a Jesús tiägøøyy barcojooty, mänitä poj miooñ. Jiaančh tehñ yagjuøøyy ja'a Jesús jiamiøødhajxy jaduhñ coo poj miooñ. ⁵² Hoy hajxy hänajty tøø jia hiixy coo ja'a Jesús ja'a tsajcaagy yajwa'añguiojy møødä hacx, cab hajxy hänajty ñajuø'øy coo ja'a Jesús møcmäjaa miøødä ja'a Dioscøxpä. Jaančh tehñ quiuhxex hajxy hänajty.

⁵³ Coo ja'a Jesús hajxy jim miejch mejyhawiimb maa ja'a naax hänajty xiøhatiän Genesaret, mänitä barco hajxy jim quiuxojch mejypia'a. ⁵⁴ Tuunä hajxy jaduhñ ñä'ä barcopädsøømy, mänitiä Jesús yhøxcajpä ja'a cu'ug. ⁵⁵⁻⁵⁶ Paquiä mädia'agy jim wia'xy coo ja'a Jesús hänajty jim tøø miech. Mänit tiägøøyy wädijpä cajpt-cajpt. Mänitä pa'amjäya'ayhajxy tiägøøyy cøømiéjtsäbä tsaajiooty maa ja'a Jesús hänajty wiäditiän. Jimä pa'amjäya'ayhajxy hänajty tøø ñajtscø'øyii møjtu'uba'a maa ja'a Jesús hänajty ñaxø'øwa'añän. Mänitä Jesús hajxy miänuu'xtaacy coo ja'a pa'amjäya'ayhajxy yajpa'am-naxøøjät. Pønjetiä Jesús wyitpa'a hänajty nä'ä nähdoonäxäp, tehñ ñajxpä pia'amhajxy hänajty mänitiä.

7

¹ Mänitä fariseos ja'a Jesús hajxy ñämejch, møødä häna'c ja'a Diosmädia'agy hajxy yajnahixøøbiä. Jim hajxy hänajty choon Jerusalén. ² Mänitä fariseoshajxy yhiixy coo ja'a Jesús jiamiøød ja'a cuhdujt hajxy hänajty näje'e quia'a yajtuñ, coo hajxy quia'a cø'øbuju coo hajxy hänajty tiägø'øwa'añ caabiä huucpä. Ja'a fariseoshajxy, jaančh tehñ yhooyä judiøcuhdujt hajxy hänajty quiudiuñ. ³ Hiix, jaduhñä judiøshajxy hänajty nägøxiä quiuhdujthatyñä nebiä yhapä tieedyhajxy hänajty jegyhajty tøø yajnahixø'øyii. Naaghooc hajxy hänajty quiaya'añ, tsipcøxpä quiø'ø hajxy hänajty hoyhoy ñä'ägä puju wa'ads. ⁴ Møød coo hajxy hänajty tøø yhooy halaplaaztøjpa'c, cab hajxy hänajty quiaya'añ jaguiø'øbuju. Madiu'u cuhdujt hajxy hänajty miøødä coo hajxy cøxiä wiinä nähbuju

ñähje'ečh, mөөдä cayөһңdy hu'ugөһңdy, mөөдä tu'ts, mөөдä pujxtu'ts. ⁵ Mänitä fariseos ja'a Jesús hajxy miäyajtөөyy:

—Tii yө'ө mjamiөөdhajxy jaguiө'өbuju coo quiaj. Cabä jecyquiuहुdujt hajxy yajtuñ neby jäya'ayhajxy hijty jegyhajty quiuहुdujthatiän.

⁶ Mänitä Jesús yhadsooy:

—Jue'e mijts, mjaančh tehм miähane'emaamb mijts, pero cab hajxy mnä'ä cudiuñ waambaty hajxy hamdsoo mja hane'emy. Mijtscoxpa ja'a Isaías jecy quiujuhjy, mänitä Dios miänaañ:

Hädaa jäya'ayhajxy, ja mänaamb hajxy jaduһn cóogөch tyijy hajxy xwyiingudsähgө'өy, pero cábөch hajxy hamuumdu'joot xñä'ä tsoy.

⁷ Xiöбөch hajxy xjia wi'i pia'häyoy.

Jaduһn hajxy jia mäna'añ cóogөch tyijy nmädia'agy hajxy xjia yajnähiхөөyyä, pero yhamdsoo mädia'agy hajxy ñä'ä wi'i miädiaacyy,

nөmä Isaías jecy quiujuhjy. ⁸ Mijts, tөө ja'a Diosmädia'agy hajxy mnajtshixөөñä. Ja'a mhamdsoo cuहुdujt hajxy jaduһn myaghijnäp —nөmä Jesús ja'a fariseos ñämaayy.

⁹⁻¹⁰ Mänitä Jesús ñämäaguiumbä:

—Paadiä Diosmädia'agy hajxy tөө mnajtshixө'өy, jaduһnä mhamdsoo cuहुdujt hajxy hoy myaghida'añ. Jaduһnä Moisés jecy miänaañ coo ja'a mdaj coo ja'a mdeedy hajxy mwiingudsähgө'өwät. Pero pönägä tiaj ja'a tieedy haxөөг nänөөmb, yajcuyagho'ogө'өwáanäbäc jaduһn. ¹¹⁻¹² Pero wiing mijts mja mäna'añ cooc tyijy jaduһn yhawinmatsä cooc pөñä tiajjä tieedy haxөөг ñämä'awät: “Cábөch mijts nbuhbedaannä. Hix, tөөchä Dios nnäma'ay cooč je'e cөxiä nmo'owa'añ ja'ačh mijts hijty nmo'owaambiä.” ¹³ Coo hajxy jaduһn mmäna'añ, myajcähxө'өpy hajxy jaduһn coo ja'a Diosmädia'agy hajxy mga'a yajtuunnä, mөөд coo ja'a mhamdsoo cuहुdujt hajxy myajnähiхөөñä. Madiu'u hajxy jaduһn myajcähxө'өgy coo ja'a Diosmädia'agy hajxy tөө mnajtshixөөñä, mөөд coo ja'a mhamdsoo cuहुdujt hajxy myajtuunnä —nөmä fariseoshajxy ñämaayyä.

¹⁴ Mänitä Jesús ja'a cu'ug yajwiingapxөөгuiumbä:

—Hөөчh nmädia'agy hajxy hamädoowhjtäc. ¹⁵ Tijaty hajxy mgaaby mhuucypy, cab hajxy xyajcädieey. Pero ja'a haxөөгwiinmahңdy, je'eds hajxy mäböcy xyajcädieeyäp.

¹⁶ Pөñ jaduһn wiinjuөөby, wéenhөch nmädia'agy xmiäböjcä.

¹⁷ Coo ja'a Jesús ja'a quiapxy miädia'agy jaduһn yajmaayy, mänitä cu'ughajxy quiөxy wiimbijnä. Mänitä Jesús hajxy tiөjtägөөñä mөөдä jiamioөdtөjc, ja'a hajxy hänajty ja'a nämajmetspä. Mänitä Jesús miäyajtөөwä neby hänajty jaduһn miädia'agytiägө'өy ja'a hänajty jaduһn jim tөө miädiä'aguiäbä majiäya'ayhagujc. Ja'a Jesús jiamioөdhajxy jaduһn yajtөөw yajtөө'x. ¹⁸ Mänitä Jesús yhadsooy:

—Nej, ni mijtshajxy jaduһn tөө mga'a wiinjuө'өyä waambátyhөch tөө nja mädiä'aguiä. Jaduһnds je'e, tijaty hajxy mgaaby mhuucypy, cab hajxy xyajcädieey. ¹⁹ Hix, ja'a jөө'xy ja'a pөcy, jiiby jaduһn yhäda'agө'өy maa ja'a mjөө'xytiөjc-hajxiän. Jadähooc nөcxy piädsөmy. Cab jaduһn jiiby tieһm tiägө'өy maa ja'a mjuөһңdyhajxiän —nөmä Jesús miänaañ.

Jaduһn hädaaduhñ miädia'agytiägө'өy coo ni mädyii jөө'xy pөcy quia'a hamajtsäcä.

²⁰ Mänitä Jesús miänängumbä:

—Pero ja'a haxөөгwiinmahңdy, je'eds hajxy mäböjnäbä xyajcädieeyäp. ²¹⁻²² Coo ja'a jäya'ay haxөөгwiinmahңdy hajxy jiaančh tehм miөөдä, paady hajxy haxөөгjaty jiaančh tehм jiatcө'өy; paady hajxy miämeečh, paady hajxy ñiyagho'ogyii, paadiä jäya'adio'oxiөjc hajxy miөөdtsäna'ay, paadiä jäya'ajie'e hajxy yhadsoy, paady hajxy miäwiinhөөñ, paady hajxy ñiñähojyii, paady hajxy jiaančh tehм yajcumaya'añ, paady hajxy quia'a nä'ägädä wiinmahñmech. Coo hajxy naxы miu'ugyii, paadiä hadsojwiinmahңdy hajxy miөөдä. ²³ Jaduһnds je'e, jaančh tehм miadiu'u ja'a haxөөгwiinmahңdy jii. Je'eds hajxy jaduһn mäböcy xyajcädiehby.

Mänitä Jesús miädiacpädөөñä.

²⁴ Coo ja'a Jesús jim chohñ, mänit jim ñöcxy maa ja'a naax jaduhñ xiøhatiän Tiro mөөд Sidón. Mänitä tøjc tu'ug piaaty maa hänajty miejtsta'aga'añän. Hamee'ch jim jia hidaañ. Pero miädoow ja'a cu'ughajxy jaduhñ coo ja'a Jesús hänajty jim tөө miech. ²⁵⁻²⁶ Jimä tadjäya'ay hänajty tu'ug chäna'ay. Hagriego hänajty miädia'agy. Ca'a hänajty je'e jiuđiosä. Jimä yhuung hänajty tu'ug, to'oxiäna'c. Tөө ja'a to'oxiäna'c hänajty pia'ambety. Møjcu'u hänajty tөө yajtägø'oyii. Coo ja'a quixiä tiaj jaduhñ miädooyhajty coo ja'a Jesús hänajty jim tөө miech, mänitä Jesús hoy wyiinjjicäda'agyii. Mänitä Jesús miänuu'xtaacä coo ja'a to'oxiäna'c nөcxy yajpa'amnäxäxä. ²⁷ Mänitä Jesús miänaañ:

—Cab jaduhñ yhahixø'oy coočhä huc-huung tsajcaagy nmó'owät, ja'a pigäna'c-hajxy hijty quiayaambiä.

Coo ja'a Jesús jaduhñ miänaañ, ja'a judiøshajxy jaduhñ yajmäbaatä nebiä pigäna'cän. Ja'a ca'a judiøshajxy jaduhñ yajmäbaatä nebiä hucän. ²⁸ Mänitä tadjäya'ay yhadsooy:

—Wiindsön, tøyhajt jaduhñ. Pero jiibiä huc-huunghajxy pia'piy pia'coñ meexäpa'c tijaty ja'a pigäna'c-hajxy yajwiinga'awøøby.

²⁹ Mänitä Jesús miänaañ:

—Coo jaduhñ tөө mmäna'añ, cähxø'p jaduhñ coočh nmädia'agy xmiäböjcä. Tөө ja'a mhuungä møjcu'u ñähwäatsänä. Nөcxnä jootcujc maa ja'a mdøjcän.

³⁰ Mänitä tadjäya'ay wyiimbijty. Coo jim miejch maa ja'a tiøjcän, tөө ja'a yhuungä møjcu'u hänajty jiaančh nähwäatsänä. Jimä yhuung hänajty quio'na'ay maabejtcøxp hoy weenän.

³¹ Mänitä Jesús jim wyiimbijtagajch maa ja'a naax xiøhatiän Tiro. Mänit jim ñaxøoy maa ja'a cajpt hänajty xiøhatiän Sidón. Mänit jim ñөcxy maa ja'a naax hänajty xiøhatiän Decápolis. Mänit jim miedsøoy maa ja'a mejy hänajty xiøhatiän Galilea. ³² Mänitä mähdiojc tu'ug yajmejtsä maa ja'a Jesús ja'a wyiinduumän. Cabä mähdiojcä mädia'agy hänajty hoy yhabädsømy, mөөд hänajty quiuhnatä. Mänitä Jesús miänuu'xtaacä coo ja'a quiø'ø yajnähgäbät maa ja'a mähdiojc cuhnatpä. Ja'a mähdiojcä jiamioødhajxy jaduhñ mänaañ. ³³ Mänitä Jesús ja'a mähdiojc jäguemjuøøby miødhajty nidiuhñ. Mänitä Jesús ja'a mähdiojcä tiaatsc piadsihwä. Mänitä Jesús ja'a quiø'owahxc chujyñähbo'ty. Mänitä mähdiojc tiaatsc chujyhabo'odøøyyäxä. ³⁴ Mänitä Jesús chajhee'py. Mänit miänaañ: “Efata.” Jaduhñ hädaa miädia'agytiägø'oy: “Hawa'ads.”

³⁵ Tuunä ja'a Jesús jaduhñ ñä'a mänaañ, mäniä mähdiojc quiapxø'cy miädoowø'cy. Jaančh tehñ yhoy jaduhñ miädiaacnä. ³⁶ Mänitä Jesús miänaañ coo hajxy quia'a mädiä'agät coo ja'a mähdiojc jaduhñ tөө yhoyø'oy. Pero cab hajxy jaduhñ jioodhajty. Mänitiä hajxy jaduhñ hoy yhamädiaagø'oy. Hoyyä Jesús mayhooc jia hanehmy coo hajxy quia'a hamädiaagø'owät, maas hanaxiä ja'a mähdiojc hajxy yhamädiaagøøoy. Cabä Jesús miädia'agy jaduhñ ñä'a yajtúunäxä. ³⁷ Jiaančh tehñ yagjuøøbiä cu'ughajxy hänajty jaduhñ. Mänit hajxy tiägøøoy mänaambä: “Jaančh tehñ miøjmayhajt jaduhñ tiuumby coo ja'a cuhnatpä yajmädoowø'ogy, mөөд coo ja'a huumbä yajcapxø'ogy.”

8

¹ Cujaboom cumaaxc, mäniä jäya'ayhajxy nämay yhamugøøguiumbä maa ja'a Jesús hänajtiän. Ja yähó'cäp hajxy hänajty, cabä caayyøøc hajxy hänajty ñä'ägädä mөөдä. Mänitä Jesús ja'a jiamioødtøjc yaaxmujcy, ja'a hajxy hänajty nämajmetspä. Mänitä Jesús miänaañ:

² —Nnäxúu'chpøch hädaa jäya'ayhajxy. Tägøøgxøøjoch hajxy tөө xpiawädiñä. Tөө ja'a quiay tөө ja'a yhu'ugyhajxy quiøjxnä. Tii hajxy jaduhñ ñä'a jaac cäyap. ³ Cooch hajxy jaguiay nguejxwiimbídat, wehndä hajxy jim tiu'uyuugädäwät. Hix, näje'e hajxy jäguem tөө chohnda'agy.

⁴ Mänitä Jesús yhadsoowä ja'a jiamioødtøjc:

—Tii hädaa jäya'ay hajxy häyaa nnä'a yajcäyayämb. Cabä cajpt yaa. Maa tsajcaagy hajxy häyaa nnä'a páatämät —nөmä Jesús jiamioødhajxy miänaañ.

⁵ Mänitä Jesús ja'a jiamioødtøjc miäyajtøoy:

—Naag tsajcaagy hajxy jii mmøødä.

—Juxtujc —nøm hajxy yhadsooyy.

⁶ Mänitä Jesús miänaañ coo ja'a majiäya'ayhajxy yhöxtá'agät naaxwiin. Mänitä Jesús ja'a tsajcaagy quioondsooyy. Mänitä Dioscujú'uyäp yejcy. Mänitä tsajcaagy tiägøøyy haguidøøbiä. Mänitä jiamiøødtøjc miooyy. Mänitä majiäya'ayhajxy miooyy. Coo ja'a Jesús ja'a tsajcaagy hänajty yhaguidø'øy, yajwa'añguiojpy hänajty tehngajnä. ⁷ Jimä hacxhuung hajxy hänajty miøødäbä mejtstägøøg. Mänitä Jesús quiunuu'xy. Mänit miänaañ coo ja'a majiäya'ayhajxy mio'owøøjät. Jaduhñ je'e may yajwa'añguiojpa. ⁸ Mänitä jäya'ayhajxy tiägøøyy caabiä. Höxtä cuuxä hajxy hoyhoy. Höxtä jiaac piwø'c hajxy juxtujcach, ja'a hänajty tøø quiunáxiäbä. ⁹ Nämädaaxmil jäya'ayhajxy jaduhñ quiaaay yhuucy. Mänitä Jesús miänaañ coo hajxy wyiimbijnät. ¹⁰ Mänitä Jesús hajxy jadähooc biarcopéjcumä møødä jiamiøødtøjc. Mänit hajxy jim ñøcxy maa ja'a cajpt hänajty xiøhatiän Dalmanuta.

¹¹ Mänitä Jesús ja'a fariseos näje'e ñämejtsä. Mänitä fariseos ja'a Jesús ja'a Diosmädi-a'agy hajxy miøødyajtsibøøyy. Mänitä Jesús jia nämäaayyä:

—Huuc yajcähxø'ögä hijxtahñd hoy-yagjuøñäbä ja'a tsajpootypä. Jaduhñ höjtsä tøyhajt nmøødhädät coo miichä Diosmäjaa mjaançh møødä —nømä fariseoshajxy miänaañ.

¹² Mänitä Jesús jiootmaxiey. Jootmadiägøøyy jaduhñ. Mänit miänaañ:

—Tii ja'a Diosmäjaa hajxy coo mwi'i yhixa'añ. Tøyhajt mijts nnämá'awät coo hajxy mga'a hixa'añ —nømä fariseoshajxy ñämaayyä.

¹³ Mänitä Jesús hajxy wyiimbijnä møødä jiamiøødtøjc. Mänit hajxy tiägøøyy barcojooty. Mänit hajxy tiu'ubøjcy. Mejyhawiimb hajxy hänajty ñøcxa'añ.

¹⁴⁻¹⁵ Mänitä Jesús ja'a jiamiøødtøjc ñämaayy:

—Mnigwieendähadøøjäp hajxy. Ca'a ja'a Herodes chajcaagychooy hajxy mmäwädijtä, ni ja'a fariseos jie'ehajxy.

Mänitä Jesús jiamiøødhajxy yhijxy coo ja'a tsajcaagy hajxy hänajty tøø quia'a jaac juy. Jagooyyä tsajcaagy hajxy hänajty tu'uquiä miøødä barcojooty. ¹⁶ Mänit hajxy tiägøøyy niñämäaayyäbä:

—Paady hajxy jaduhñ xñämäaayyäm, coo tsajcaagy hajxy tøø njahdiägøoyyäm.

¹⁷ Coo ja'a Jesús jaduhñ yhamädoonajxy waambatiä jiamiøødhajxy hänajty ñiñä-ma'ayii, mänit hajxy ñämaayyä:

—Nej, jaduhñ hajxy mwiinjuø'øyä coochä tsajcaagy tøø nmädia'aguiä, ja'a hajxy tøø njahdiägøoyyäbä. Cab hajxy tøø mnä'ägädä wiinjuø'øy tijátyhöch tøø nmädia'agy. Mjaançh tehñ quiuhxex mijts jaduhñ. ¹⁸ Xiidsä mwiin hajxy mja møødä, cab hajxy tii mhijxmähmø'øy. Xiidsä mmädohnd hajxy mja møødä, cab hajxy tii mmädoomähmø'øy. ¹⁹ Mänäajøchä nämägooxmilpä jäya'ay nyajcayyän ja'a mägooxtsajcaagy, naac cachä caadiuc hajxy mbiwø'cy.

Mänit hajxy yhadsooyy:

—Majmetsc.

²⁰ Mänitä Jesús miänáangumbä:

—Jaanä mänäajøchä nämädaaxmilpä jäya'ay nyajcayyän ja'a juxtujtsajcaagy, naag cach hajxy mbiwø'pä.

Mänit hajxy yhadsoogumbä:

—Juxtujc.

²¹ Mänit hajxy ñämäaayyägumbä:

—Caj mijts tøø mnä'ägä wiinjuø'øy tijátyhöch tøø nmädia'agy —nømä Jesús miänaañ.

²² Mänitä Jesús hajxy jim miejtstägajch maa ja'a cajpt hänajty xiøhatiän Betsaida. Mänitä wiinds tu'ug wyitsmejtsä maa ja'a Jesúsän. Mänitä Jesús miänuu'xtaacä coo ja'a wiinds ween ñähdoñii, ween jaduhñ yhijxø'øgy. ²³ Mänitä Jesús ja'a wiinds wyijtstsooyy. Mänitä wiinds cajtpa'a quipxy miødhajtä. Mänitä wiinds wyiingutsujøøyyä. Mänit

wyiingumo'xøøyyä. Mänit miäyajtøøwä pø tøø hānajtŷ yhijsø'øgy. ²⁴ Mänit tiägøøyy hijxø'pä weenjaty. Mänit miānaañ:

—Tøøch weenjaty nhijxø'øgy. Cábøchä jäya'ay hoy nhøxcaba'añ. Nnajuóøbiøch jaduhñ coo jäya'ayä, pero jadúhñhøch nhixy nebiä quepychaajän.

²⁵ Mänitä Jesús ja'a wiinds jadāhooc wyiingumo'xøøguiumbä. Mänitä wiinds hoy tiägøøñä hijxpä. Hotyijä hānajtŷ jäguemjaty yhijsnä. ²⁶ Mänitä Jesús miānaañ:

—Tu'uda' aquíä mnócxät maa ja'a mdøjcän. Ca'a cajptooty mguyo'oy mgubøgø'øgy —nømä craa ñāmaayyä, ja'a hānajtŷ tøø yhijsø'øguiäbä.

²⁷ Mänitä Jesús hajtŷ jim tiu'ubøjcy møødä jiamiøødtøjc. Jim hajtŷ hānajtŷ ñøcxa'añ maa ja'a naax hānajtŷ xiøhatiän Cesarea de Filipo. Cajpt-cajpt hajtŷ hānajtŷ wiädita'añ. Tu'haamnøcxpä, jimä Jesús ja'a jiamiøødtøjc miäyajtøøyy:

—Høøch, pøñhøchä cu'ugäda'a xtyijp.

²⁸ Mänitä Jesús yhadsoowä:

—Näje'e hajtŷ miāna'añ cooc tyijy miich mJuan mäyajnäbejpä. Näje'e hajtŷ miānaambä cooc tyijy miich mhElíasä. Näje'e hajtŷ jiaac mänaambä cooc tyijy miich mDiosquexiä, cooc tyijy miichä Diosmädia'agy jecy myajwa'xy.

²⁹ Mänitä Jesús yajtøøgumbä:

—Mijtsäts, pøñhøch mijtshajtŷ jaduhñ xtyijp.

Mänitä Pedro yhadsooyy:

—Jue'e miich, Cristo. Dios miich tøø xwyiinguexy.

³⁰ Mänitä Jesús ja'a jiamiøødtøjc ñāmaayy coo ja'a Jesús hajtŷ quia'a mädiä'agät pøñ hānajtŷ je'e.

³¹ Mänitä Jesús ja'a jiamiøødtøjc tiägøøyy yajwiingapxøøbiä:

—Høøch, Diosquexyhøch høøch. Madiú'ujøchä tsaächpä nøcxy nhabaada'añ. Xmiāhanhadāambøchä jäya'ayhajtŷ, ja'a hajtŷ jiiby wiindsøn'hajpä maa ja'a tsajtøjcän, møødä teedywiindsøn'hajtŷ, møødä häna'c-hajtŷ jiiby Diosmädia'agy-yajnähixøøbiä maa ja'a tsajtøjcän. Mänithøch hajtŷ jaduhñ xjia yajyagho'oga'añii. Pero cooch hajtŷ hānajtŷ tøø xyajyagho'ogyii, cudägøøgxøøyyä, mänithøch njujypijøjtägatsa'añ.

³² Howyiinjuøøñä ja'a Jesús jaduhñ miädiaacy. Mänitä Pedro ja'a Jesús hawiingtuum wioonøcxy. Mänitä Pedro miānaañ:

—Wiindsøn, ca'ads jaduhñ mwi'i miāna'añ. Caj miich nej mjada'añ mhabeta'añ —nømä Jesús ñāmaayyä.

³³ Mänitä Jesús wia'wiimbijty. Mänitä jiamiøødtøjc wyiinhee'ppejty. Mänitä Pedro yhojjä:

—Møjcu'u, jua'ads yaa maaçh nwiinduumän. Jaduhñ miich mwiiinmahñdyhaty nebiä jäya'ayhajtŷ wyiinmahñdyhajpä. Caj miich jaduhñ mwiiinmahñdyhaty nebiä Dios wyiinmahñdyhatiän —nømä Jesús miānaañ.

³⁴ Mänitä Jesús ja'a cu'ug miøjyaaxy møødä jiamiøødtøjc. Mänitä Jesús miānaañ:

—Pøñ jioot tsojp cooch xjamiøødhädät, weenä yhamdsoo cuhdajtŷ hajtŷ ñajtshixø'øgy, weenä jioot hajtŷ piäda'agy coo hajtŷ chaächpøjpat nébiøch ndsaaçhpøga'añän. Wéenhøchä nmädia'agy hajtŷ tehngajnä xmiäbøjcä. ³⁵ Pøñä jioot ja pädaacp coo hajtŷ hoy jiugyhädät, cab hajtŷ cøjxta'axiøø jiugyhada'añ nebiä Dios jiugyhatiän. Pero pøñä jioot pädaacp coo hajtŷ yhö'ogät ja'a høøchcøxpä møødä Diosmädia'agyquiøxpä, je'edshajtŷ homiānaajä jugyhadaamb nebiä Dios jiugyhatiän. ³⁶ Coo hajtŷ hodiuum mga'a mähmø'øwät coo hajtŷ hānajtŷ tøø mho'ogy, cab hajtŷ jaduhñ mniyaghoyø'øwøøjät, hoy hajtŷ hānajtŷ yaa tøø mja mäyøøhaty hädaa yaabä naaxwiin. ³⁷ Ni tii yaa quia'a nä'ägädä tsoobaady hädaa yaabä naaxwiin nebiä mjugyhajthajtŷ choobaada'añän, coo hajtŷ homiānaajä mjugyhädät nebiä Dios jiugyhatiän. ³⁸ Pøñhøch xmiädsähdiuum møød-høchä nmädia'agyquiøxpä maa hädaa jäya'ay wyiinduumhajxiän, hädaa pojmoødpä cädieemiøødpähajtŷ, hädaahajtŷ ca'a Diosmädia'agymiäbøjpat, cooch yaa ngädaactägät-sät hädaa yaabä naaxwiin, mänitøch hajtŷ jadāhooc nmädsähdiuundägatsa'añ, pøñjaty-høch hānajtŷ yaa tøø xmiädsähdiuñ. Diosquexyhøch høøch. Diosmøcmäjaamøødhøch

hänajty yaa ngäda'aga'añ, näguipxy mөөдä Diosmoonsähajxy, ja'a hajxy jim hijpä Dioswiinduum —nөmä Jesús miänaañ.

9

¹ Mänitä Jesús miänaangumbä:

—Chaads mijts tøyhajt ndehm ñämä'awät, mijts xii tänaabiä, näje'e hajxy hänajty mga'a ho'ogyñä coo hänajty quiähxө'oga'añ coo ja'a Dios hänajty yhane'ema'añ ja'a miөcmäjaahaam.

² Cudädujxөө, mänitä Jesús ja'a Pedro wioonөcxy maa ja'a tun jaančh tehм quiөxpän, näguipxy mөөдä Santiago mөөдä Juan. Nämädaaxyä hajxy hänajty jim. Mänitä Jesús wyiin jiojр wiing jiajty maa ja'a Pedro wyiinduumhajxiän. ³ Hөxtä haamb hөxtä tsämaambä Jesús hänajty mөөдä wyit mөөдä tiucxy. Jaančh tehм pioobä wyit hänajty nägө'ө nädecypiä. ⁴ Mänitä Elfashajxy jim ñäguехтөө'xy mөөдä Moisés. Jimä Jesús hajxy hänajty wyl'i miөөdmädia'agy. Nägoojä Pedrohajxy hänajty ñä'a hijxcäda'agy ñä'a hee'pcäda'agy. ⁵⁻⁶ Jaančh tehм chähgөөbiä Pedrohajxy hänajty. Cab hajxy hänajty ñajuө'өy waamb hajxy jaduһñ ñä'a mäná'anät. Mänitä Pedro nä'a nägoobä miänaañ:

—Wiindsön, hoyөөyy jaduһñ coo hajxy yaa tөө nbéjtäm. Nhuuc hädiuñ hөjts tөjquemyhuung tägөөг maa mijtshajxy häyaa cөdu'ug myaghäña'awө'өwät, mөөд miičh, mөөдä Moisés, mөөдä Elías —nөmä Jesús ñämaayyä.

⁷ Tuunä ja'a Pedro jaduһñ ñä'a mänaañ, mänit hajxy ñäma'anähbejty. Mänitä Dios jiiby quiapxy nämä'ajooty: “Hөөчh nHuung hädaa. Njaančh tehм chөjpiөch hädaa. Mäbөjcä miädia'agy hajxy.” ⁸ Coo ja'a nämä'a chajpejty, tөө ja'a Moiséshajxy hänajty yhadägoyyө'өy mөөдä Elías. Coo ja'a Pedrohajxy jia hijxwädipty, cabä Moisés hajxy yhijxnä ni ja'a Elías; jagooyyä ja'a Jesús hajxy jiaag hijxy nidiuһñ.

⁹ Jimä Jesúsahajxy hänajty wyiinmänacy tunnähgөөp mөөдä jiamioөd nädägөөgpä, mänitä Jesús miänaañ:

—Ca'a hajxy pөñ mnä'ägädä hawaanä tijaty hajxy yaa tөө mhixy tөө mmädoy hөxtä cöonөch hänajty tөө njujypiөjtägach coöch hänajty tөө nho'ogy. Diosquөxyhöch hөөчh —nөmä Pedrohajxy ñämaayyä.

¹⁰ Coo ja'a Pedrohajxy jaduһñ ñämaayyä, paadiä mädia'agy hajxy jaduһñ miäbөjcy. Jioodhajt hajxy jaduһñ nebiaty hajxy hänajty tөө yhixy tөө miädoy. Hamiñ haxөpy hajxy hänajty jia ñimiäyajtөyii waambä Jesús hänajty jaduһñ jia mäna'ana'añ coo jaduһñ miänaañ cooc hänajty jiuypiojtagatsa'añ. ¹¹ Mänitä Jesús hajxy miäyajtөөyy:

—Ja'a häna'c hajxy jiiby yajnähixөөbiä maa ja'a tsajtөjcän, jaduһñ hajxy miäna'añ coogä Elías tsipcөp jawyiin quiädá'agät. Mänitägä Cristo hөxhaam jiaac tehм quiäda'aga'añ. Tii hajxy jaduһñ coo miäna'añ. Nej, tøyhajt jaduһñä.

¹²⁻¹³ Mänitä Jesús yhadsooyy:

—Jaduһñä Diosmädia'agy jiaančh mäna'añ coogä Elías jawyiin quiäda'aga'añ. Tøyhajt jaduһñ. Mänitägä cөxiä wiinä yagjema'añ yajtagatsa'añ. Tөө ja'a Elías jia cäda'agy. Pero tөө jaduһñ jiaančh tehм chaächtiuñii nebiatiä jäya'ay jioothajxy chocy. Tөjiajт jaduһñ nebiä Diosquөxyhajxy jecy quiujahyyän. Nej, mnajuөөby hajxy jaduһñä waambätyhöchä Diosmädia'agy xmiädiaacpä, hөөчh ja'a Diosquөxypä, coöchä jäya'ayhajxy xhaächtiunaambä, mөөд coöch hajxy xquia'a jaac hixaannä.

¹⁴ Coo ja'a Jesúsahajxy jiiby quiädaacy maa ja'a jiamioөdhajxy hänajty tөө miäh-mө'өyän, ja'a hajxy hänajty jiiby nädaaxtuypä, mänitä Jesús yhijxy coo ja'a jiamioөdhajxy hänajty piquiä tөө piäda'agyii ja'a majiäya'ay. Jimä häna'c hajxy hänajty miөөdniyhojyii, ja'a häna'c-hajxy jim yajnähixөөbiä maa ja'a tsajtөjcän. ¹⁵ Nägoo ja'a cu'ugä Jesús hajxy jiojcuhiхөөyy, mänit hajxy jiaančh tehм xioondaacy. Mänitä Jesús jiojcuhäyө'өгөөyyä. Mänit yajpoo'xä. ¹⁶ Mänitä Jesús miänaañ:

—Tii hajxy mwi'i yajniguiuhöjөөyyäp.

¹⁷ Mänit tu'jäya'ay yhadsooyy:

—Wiindsón, chaačhä nhuung tøø nja møødmeh. Møjcu'u jaduñ miøød. Ja'a møjcu'u wi'i yaguhmb. ¹⁸ Naxy jaduñ yajcädayyii. Mänit tiägø'øy hahoo'pä. Mänit tiøøts tiägø'øy yajcädajpä. Mänit møc-häwøönä jiaty. Tøøchä mjamiøødtøjc nja mänuu'xta'agy cooçh nhuung hajxy cu xyajpa'amnäwaatsä. Pero cab hajxy tøø miäjäda'agy —nømä Jesús nämaayyä.

¹⁹ Mänitä Jesús ja'a jiamiøødtøjc nämaayy:

—Ja'a! Cábøch mijtsä nmädia'agy xñä'ä mæbøjcä cooçh nDiosquexiä. Tøøch mijts jejcy nja møødwädity, y cahnä hajxy tii mnä'ägädä habøcyñä. Jaançh tehñ yhanaçiä mijts jaduñ mguhxexä. Nébiøch mijts nnä'ä túnät. Hoorä, witsminxä ja'a pa'amjäya'ay yaa —nømä Jesús miänaañ.

²⁰ Mänitä Jesús miädia'agy quiudiúunäxä. Coø ja'a Jesús yhiixä ja'a møjcu'u, mänitä mähdiojca pia'am tiehñ nämejtsä. Mänitä mähdiojca quiädaayy naaxwiin. Mänit piayajch piadøø'py. Mänit tiägøøyy hahoo'pä. ²¹ Mänitä craa tieedy miäyajtøwäxä:

—Mänaa hädaa mhuung tøø pia'ambety.

Ja'a Jesús jaduñ yajtøw.

—Muutsnä hänajyñä —nømä craa tieedy yhadsooyy.

²² Mänitä tieedy miänängumbä:

—Náxyhøch hädaa nhuung jiøøngädaw jiøømbøgø'øy coø pia'am jaduñ naxy nähbaadyii. Naxy ñøøgädaw ñøøbøgøøbiä. Ja weenjaty jaduñ quiaa yagho'ogyii. Tunä mayhajt. Pø jii miich møcmäjaa mmøødä, højts näxúu'tsäc, højts puhbéjtäc —nømä Jesús nämaayyä.

²³ Mänitä Jesús miänaañ:

—Nej, jadúhñhøch miich xmiøyajtøyyä pø nmøødhøch møcmäjaajä. Pøn jaduñ mæbøjp, hotyijä jaduñ yhojø'øwáañäxä.

²⁴ Mänitä pa'amjäya'ay tieedy yaaxy:

—Nmæbøjpiøch. Høøch puhbéjtäc, jadúhñhøch maas hoy njaac mæbøgät.

²⁵ Jimä jäya'ayhajxy hänajty may wyi'i miamiucy. Coø ja'a Jesús ja'a majiäya'ay jaduñ yhiixy, mänitä Jesús ja'a møjcu'u nämaayy:

—Høøch miich nhanehñby coø hädaa craa mhøxmájtsnät. Cab jaduñ mänaa mnämejtstägájtsnät. Naxy miich hädaa mähdiojca myaghuumy myajnaty —nømä møjcu'u yhojjä.

²⁶ Mänitä mähdiojca møc yajtsaaçhyaaxä. Mänit jiäwijpø'cy xiäyaayyø'cy. Mänit nähwaatsä quiuhwaatsä. Nebiä ho'ogypiän jiajty. Coø jaduñ yhiixä, mänitä jäya'ayhajxy may miänaañ cooc tyjy hänajty tøø yho'ogy. ²⁷ Mänitä Jesús ja'a craa wyidsø'cy. Mänitä craa hoy tiänaayyø'nø.

²⁸ Mänitä Jesús hajxy tiøjtägøøyy møødä jiamiøødtøjc. Mänitä Jesús hamee'ch miäyajtøwä ja'a jiamiøød:

—Tii højts jaduñ coø tøø nga'a mäjädaacpä.

²⁹ Mänitä Jesús yhadsooyy:

—Coø Dios hajxy mjaançh tehñ miänuu'xtä'agät, mänit yø'øduhmbä pa'am hajxy hoy myajnaxät. Pero pø caj, cab hajxy myajnaxät.

³⁰ Coø ja'a Jesús hajxy jim chohñ, mänit hajxy ñøcxy Galilea. Cabä Jesús hänajty yajnajuo'øwa'añii maa hänajty nøcxy wiädita'añ. ³¹ Mänitä Jesús ja'a jiamiøødtøjc tiägøøyy yajwiingapxøøbiä:

—Høøch ja'a Diosquexypä, nøcxáambøch nniñähduga'añii cooçhä jäya'ayhajxy xyaghó'ogät. Y cooçh hänajty tøø nho'ogy, cumáaxc-høch hänajty njuyjpiøjtägatsa'añ —nømä Jesús miänaañ.

³² Cabä Jesús ja'a jiamiøødhajxy ñä'ägädä wiinjuøøyy waambatiä Jesús hänajty tøø miädia'agy. Cab hajxy hänajty jia nä'ä wi'i miäyajtøwämbä. Hiix, tsähgøøby hajxy hänajty.

³³ Mänit hajxy jim miejch Capernaum maa hajxy hänajty chäna'ayän. Coø hajxy hänajty tøø tiøjtägø'øy, mänitä Jesús ja'a jiamiøødtøjc miäyajtøoyy:

—Tii hajxy hijty mwi'i yajcapxiøøby jim tu'haam-miimbä.

³⁴ Pero cab hajxy waamb ñä'ägädä hadsooyy. Hix, jue'e hajxy hänajty tøø yajtsibø'øy tu'haam-miimbä, pønä cuhdujt hänajty maas mœc mœød. Tsähdiuumb hajxy hänajty, paady hajxy quia'a nä'ägädä hadsooyy. ³⁵ Mänitä Jesús yhäñaaguiädaacy, Mänitä jiamiøødtøjc ñämaayy, ja'a hajxy hänajty nämajmetspä:

—Yam hajxy weentiä huuc møjwa'ag. Pøn jaduuh pœc-juøøby coo møjcuhdujt miøødhädät, cabä cuhdujt jaduuh ñä'ägädä mœødhada'añ. Moonsä jaduuh ñä'ägä tunaamby.

³⁶ Mänitä Jesús pigäna'c-huung tu'ug miøjyaaxy. Mänit piädaacy cujc maa ja'a jiamiøødhajxy hänajtiän. Mänit chehñø'cy. Mänitä jiamiøødtøjc ñämaayy:

³⁷ —Pøn hädaa pigäna'c hädaaduhmbä tsojp ja'a hœøchcœxpä, jaduuh mäwíinhœch xchojpa. Jaaná jadúhñhœchá nDeedy hajxy xchójcäbä —nœmä Jesús miänaañ.

³⁸ Mänitä Juan ja'a Jesús ñämaayy:

—Wiindsøn, tøø hœjts jäya'ay tu'ug nbaady. Jimä pa'amjäya'ay hänajty yajpa'amnaxy, ja'a hajxy møjcu'umøødpä. Miičhä mxøø hänajty xquiapxpáatáp. Mänit hœjts nnämaayy coo quia'a yajpa'amnáxnät. Paady hœjts jaduuh nnämaayy, coo hœjts näguipxy xquia'a mœødwädíjtäm.

³⁹ Mänitä Jesús miänaañ:

—Cábäts hajxy waamb cu mnämaayy. Pønñhœchá nxøø xquiapxpáatáp coo ja'a hoy-yagjuøøñäbä hänajty yajcähxø'ogy, cábœch jaduuh xchoj mägapxtägoyya'añ. ⁴⁰ Pøn hœjts jaduuh xquia'a mädsiphájtäm, je'eds hajxy jaduuh xmiägu'ughájtäm. ⁴¹ Coo mijts pøn xyajnoøhú'ugät je'eguiœxpä cooçh mijts xpiawädity, hœøch ja'a Cristo, jimä hoyhajtä weenhajt piaada'añ Dioswiinduum.

⁴² 'Pønjátyhœchá nmädia'agy xmiäbójcäp, hoy hajxy quia'a jagä hœxpøquiä, coo hajxy jiojcapxø'øwøøjtät, ja'a häna'c-hajxy jaduuh mäjojcapxøøbiä, mejor paandsaa hajxy häxøpy tøø yajyo'xodsø'øyii, jaduuhnds hajxy häxøpy tøø miejjiäwipø'øyii. ⁴³⁻⁴⁴ Pø jimä mgø'ø hänajty xyajcädieey, maas hoy jaduuh coo mnä'ägädä hœxpúxät, jaduuh tehngajnä xquia'a yajcädiéhñät. Jadúhñäts homiänaajä mjugyhädät nebiä Dios jiugyhatiän, hoyyä mgø'ø hänajty metsc mga'a jagä mœødä. Hix, coo tehngajnä mjaac cädiéeyät, jiiby mhädá'agät haxøøgtuum maa ja'a jøøn mänaa quia'a nä'ägädä pi'ichän, hoyyä mgø'ø hänajty jia ca'xiä. ⁴⁵⁻⁴⁶ Jaaná jaduuhduhmbä, pø jimä mdecy hänajty xyajcädieey, maas hoy jaduuh coo mnä'ägädä hœxpúxät, jaduuh tehngajnä xquia'a yajcädiéhñät. Jadúhñäts homiänaajä mjugyhädät nebiä Dios jiugyhatiän, hoyyä mdecy hänajty metsc mga'a jagä mœødä. Hix, coo tehngajnä mjaac cädiéeyät, jiiby mhädá'agät haxøøgtuum, hoyyä mdecy hänajty jia ca'xiä. ⁴⁷ Jaaná jaduuhduhmbä, pø jimä mwiin hänajty xyajcädieey, maas hoy jaduuh coo mnä'ägädä yajpäsómät, jaduuh tehngajnä xquia'a yajcädiéhñät. Jadúhñäts homiänaajä mjugyhädät nebiä Dios jiugyhatiän, hoyyä mwiin hänajty metsc mga'a jagä mœødä. Hix, coo tehngajnä mjaac cädiéeyät, jiiby mhädá'agät haxøøgtuum, hoyyä mwiin hänajty jia ca'xiä. ⁴⁸ Jiiby haxøøgtuum, cabä tøønghajxy jiiby mänaa ñä'ägä pi'tspä.

⁴⁹ 'Pøn jiiby hijp haxøøgtuum, cab hajxy jaduuh jiiby mänaa quiøxy toya'añ. Jaduuh mäwíinäts je'e nebiä tsu'uch caanø'øybän, cabä jøøn jaduuh jiiby mänaa pyi'ich.

⁵⁰ Ja'a caan, tuungpaatp je'e. Pero coo ja'a tiaamdspä quiøxät, cab jaduuh mänaa tiuungpáatnät. Jaduuh mäwíinäts mijtspä, hoy yajxon hajxy mnimiøødhidøøjtät. Cab hajxy jaduuh mänaa myajniguiudsip myajniguiuma'adø'øwøøjtät.

10

¹ Mänitä Jesús jim chónhngumbä Capernaum. Mänit ñœcxy Judea-naaxooty, ja'a xøøbädsømyhaampiä, jim Jordán-møjnoøhawiiimb. Mänitä jäya'ay may ñäméjtsägumbä. Mänitä Jesús tiägøøguiumbä yajnähixøøbiä, neby hänajty naxy yajnähixø'øyhatiän.

² Mänitä fariseodøjc-hajxy näje'e miejch. Mänitä Jesús hajxy miäyajtøøyy:

—Nej, miimbä cuhdujt jaduuhä coo jäya'ayhajxy ñiyhœxmadsoøjädä.

Paadiä Jesús jaduñ miäyajtøwä, hijxmadsaanäp hänäjty jaduñ waamb hänäjty yhadsowa'añ. ³ Mänitä Jesús yajtøødägajch:

—Nej, jaduñä Moisés jecy quiujahyyä coo hajxy mniyhøxmadsoøjäädä.

⁴ Mänitä fariseoshajxy yhadsooyy:

—Jaduñä Moisés jecy quiujahy coogä cuhdujt jaduñ myiñ coo jäya'ayhajxy ñiyhøxmadsoøjät.

⁵ Mänitä Jesús miänäängumbä:

—Coo mijts mjaanč tehñ quiuhxexä, paadiä Moisés ja'a cuhdujt jaduñ jecy yejcy coo mdo'oxiøjc hajxy mhøxmädsät. ⁶ Mänaa ja'a naaxwiimbä jecy yhawijy tiø'x-ta'aguiän, mänitä Dios jäya'ay metsc quiunuu'xy ya'adio'oxy. ⁷⁻⁸ Coo ja'a Dios ja'a jäya'ay jaduñ jecy quiunuu'xy ya'adio'oxy, paadiä ya'adiojc jaduñ tio'oxiøjwiingpøgät. Jaduñ hajxy jaduñ yhiñät nebiä tu'que'expän. Hawiingøøby hajxy jaduñ. Cab hajxy wioowhíjtänä ja'a tiaj ja'a tiéediäm. ⁹ Pønjatiä Dios jaduñ tøø quiunuu'xy coo hajxy ñimiøødtsäna'awøød nämetsc, cab hajxy jaduñ ñiyhøxmadsoøjät —nømä Jesús miänaañ.

¹⁰ Mänitä Jesús hajxy tiøjtägøøyy møødä jiamiøødtøjc. Mänitä Jesús jadähooc miäyajtøwä ja'a jiamiøød waambatiä Jesús ja'a fariseodøjc hänäjty tøø miøødmädia'agy.

¹¹ Mänitä Jesús yhadsooyy:

—Pønä tio'oxiøjc høxmajtsp, y mänitä wiingto'oxiøjc wyiingpøcy, miägädiehbiä tio'oxiøjc jaduñ. Haxøøg jaduñ jiatcø'øy. ¹² Jaanä jaduñduhmbä, coo ja'a to'oxiøjc ñihyhap yhøxmädsät, y coo wiingya'adiojc wyiingpøgät, jaduñä ñihyhap miägädiehbiä. Jaanä haxøøg je'eduhñ jiatcøøbiä —nømä Jesús miänaañ.

¹³ Mänitä Jesús pigäna'c mejtstägøøg yajnämejtsä, coo hajxy ween quiunuu'xyii. Coo ja'a Jesús jiamiøød hajxy jaduñ yhiixy cooc tyijy ja'a Jesús hänäjty yhadsiba'añii, mänitä pigäna'cä tiajhajxy yhadújcäxä coo ja'a Jesús hajxy jaduñ quia'a nänøcxät. ¹⁴ Coo ja'a Jesús jaduñ yhiixy coo ja'a pigäna'c-hajxy hänäjty wyi'i yhadugyii, mänitä Jesús ja'a jiamiøød yhojy:

—Ca'a yøø pigäna'c hajxy mwi'i yhaducy. Wéenhøch hajxy jaduñ xñämiñ. Coo mijtsä Diosmädia'agy jaduñ mmäbøgät neby hädaa pigäna'c-hajxy miäbøquiän, mänit mijtsä Dios jaduñ xyhuunghädät. ¹⁵ Hiix, ja'a pigäna'c-hajxy, cab hajxy tii quia'a nä'ä mäböcy. Tsipcøxp hajxy jaduñ ñä'ägä mäböcy. Jaduhñds je'e, coo mijts mmäbøgät nebiä pigäna'c-hajxy miäbøquiän, mänit hajxy jaduñ mjygyhädät cøjxta'axiøø nebiä Dios jiygyhatiän. Tøyhajt jaduñ —nømä Jesús miänaañ.

¹⁶ Mänitä Jesús ja'a pigäna'c tiägøøyy cunuu'xpä tu'ugjaty-tu'ugjaty. Cøønähgäjpäp hajxy hänäjty.

¹⁷ Mänitä Jesús jim chohñ. Jim hänäjty tiu'uyo'oyñä, mänitä Jesús jäya'ay tu'ug päyøøguiä ñajtspaadøøyyä. Mänit wyiinjjcädaacä. Mänit ñämaayyä:

—Wiindsøn, mjaanč tehñ yhojhäna'c miič. Nébiøch ngudiünät cooch cøjxta'axiøø njygyhädät nebiä Dios jiygyhatiän —nømä Jesús miäyajtøwä.

¹⁸ Mänitä Jesús yhadsooyy:

—Tiič miič jaduñ coo xñäma'ay cooch nhoyhäna'cä. Ni pøn jaduñ quia'a hoyhäna'cä. Jagooyyä Dios tu'uquiä yhojhäna'cä. ¹⁹ Mnajuøøby miič jaduñ nebiatiä Moisés cuhdujt jecy yejcy, túhmäts. “Cab hajxy mniyagho'ogøøjät. Cabä wiingto'oxiøjc hajxy mmøødtsäná'awät. Cab hajxy mméedsät. Cab hajxy mhøhñdá'agät. Cab hajxy mmäméedsät høhñda'agymiädia'agyhaam. Mwiingudsähgø'owäbä mdajjä mdeedy hajxy” —nømä Jesús miänaañ.

²⁰ Mänitä Jesús ñämääyägumbä:

—Pero Wiindsøn, homiänääjøch jaduñ ngudiuñ. Múutsnøchä hoguiuhdujt nmädsohñdaacy —nømä Jesús ñämaayyä.

²¹ Mänitä Jesús ja'a craa wyiinhee'ppejty. Jiaanč tehñ chójcäbä craa hänäjty je'e. Mänitä Jesús miänaañ:

—Tu'tu'uyyā mga'a cōxy cudiuñ. Nōcx cōxy toog tijaty jim̄ mmōød, jaduhnds mmó'owāt pōnjaty hajxy häyoob. Coō jaduhñ mgudiúnāt, mänit jim̄ mnócxāt Dioswiinduum. Jim̄ miichä hoybä weenbä mbáadāt tsajpootyp. Hoorä, hōōch padu'ubójcäc.

²² Coō ja'a craa jaduhñ ñāmaayyā, mänit jiootmadiägōōyy. Mänit wyiimbijnä tájjäp máayyāp. Hix, jaanč tehñ miäyōō hānajty je'e.

²³ Jim̄ Jesús ja'a jiamiōōdhajxy hānajty piadāna'ay. Mänitā Jesús wyiinhee'ppejty. Mänit miānaañ:

—Jaanč tehñ chip jaduhñ coō yō'ō mäyōōdōjc-hajxy jim̄ ñócxāt Dioswiinduum. Tehñ tiōyhajt jaduhñ.

²⁴ Coō ja'a Jesús jaduhñ miānaañ, jiaanč tehñ yagjuōōyy ja'a jiamiōōdhajxy jaduhñ. Mänitā Jesús miānāangumbä:

—Mägu'ughajpādōjc, pōnjatiä xiädō'ōñ hajxy hajoodhajp, jaanč tehñ chip jaduhñ coō hajxy jim̄ ñócxāt Dioswiinduum. ²⁵ Maas paquiä camello tu'ug jiby ñaxó'ōwāt xuhñdyjutooty quejee ja'a mäyōōhāna'c-hajxy jim̄ tiägó'ōwāt Dioswiinduum.

²⁶ Coō ja'a Jesús jaduhñ miānāangumbä, mänitā jiamiōōdhajxy maas hanaxiä yagjuōōguiumbä. Mänitā Jesús miäyajtōōwä:

—Pōñxäda'aduhñ jaanč tōy nähwa'adsaamb.

²⁷ Mänitā Jesús wyiinhee'ppéjcumbä. Mänit miānaañ:

—Ja'a jäya'ayhajxy, cab hajxy hamdsoojoot hoy yajniñähwa'adsóójät. Pero Dios, je'eds mäyajnähwaatsp. Hotyijä Dios jaduhñ jiaty.

²⁸ Mänitā Pedro ja'a Jesús ñāmaayy:

—Huuc mäadow, coō hōjts miich nbadu'ubójcy, cōjx hōjts nnähgue'egy tijaty hōjts hijty nmōød.

²⁹⁻³⁰ Mänitā Jesús yhadsooyy:

—Pōnjaty cōxiä tōō ñähgue'egy ja'a hōōchcōxpä mōødä Diosmädia'agyquiōxpä, maas may hajxy jaduhñ jiaac paada'añ hädaa yaabä naaxwiin tijaty hajxy hānajty tōō ñähgue'egy tōō yhōxyo'oy, tiōjc, piuhya'ay, piuhdo'oxy, tiaj tieedy, yhuung, ñaax. Mōød jim̄ hajxy ñōcxa'añ tsajpootyp. Jim̄ hajxy jaduhñ homiānaajä yhida'añ, hoy hajxy hānajty yaa tōō jia tsaächpōcy ja'a hōōchcōxpä hädaa yaabä naaxwiin. Tōyhajt jaduhñ.

³¹ Pōnjatiä mōjtuung jäda'ahaty ca'a mōød, nämay hajxy miōjtägō'ōwa'añ. Pero pōnjatiä mōjtuung jäda'ahaty ja mōød, nämayyā tiuunghajxy piōgáanäxä —nōmä Jesús miānaañ.

³² Mänitā Jesús hajxy jim̄ tiu'ubójcy mōødä jiamiōōdtōjc. Jerusalén hajxy hānajty ñōcxa'añ. Jawyiinä Jesús hānajty yo'oy. Mayyā jäya'ayhajxy hānajty pianōcxy mōødä Jesús jiamiōōdhajxy, ja'a hajxy hānajty nämajmetspä. Jaanč tehñ yagjuōōby hajxy hānajty. Hōxtä tsähgōōby hajxy hānajty. Mänitā Jesús ja'a jiamiōōd hawiing wioonōcxy. Mänitā Jesús tiägōōyy mädiaacpä nebiaty hānajty jiada'añ yhabeta'añ:

³³ —Huuc mäadow hajxy, yam hajxy nnócxäm Jerusalén. Coō hajxy jim̄ ngoodáanäm, mänitōchä teedywiindsōnhajxy xyajcō'ōdägō'ōwa'añ, mōødä häna'cä Diosmädia'agy hajxy jim̄ yajñähixōōbiä tsajtōgooty, hōōch ja'a Diosquexypä. Mänitōch hajxy jaduhñ xyajñähdiä'añ coōch hajxy xyaghō'oga'añ. Mänitōch hajxy xyajcō'ōdägō'ōwa'añ ja'a häna'c-hajxy jim̄ tsohmbä Roma. ³⁴ Madiú'ujōch hajxy xchaačhtiuna'añ. Xñäx-il'igáambōch hajxy. Xwyiinwoonáambōch hajxy. Xwyiingutsujō'ōwáambōch hajxy. Xwiobho'ogáambōch hajxy. Mänitōch hajxy xjia yaghō'oga'añ. Pero cudägōōgxōōyyōch njuypiōjtägatsa'añ, —nōmä Jesús miānaañ.

³⁵ Mänitā Jesús wyiinguwa'agōōyyä ja'a Santiago mōødä Juan. Ja'a Zebedeo yhuung-hajxy hānajty je'e. Mänit hajxy miānaañ:

—Wiindsōñ, huuc tunä mayhajt ja'a hōjtscōxpä.

³⁶ Mänitā Jesús yhadsooyy:

—Tii mayhájthōch ndúnäp.

³⁷ Mänitā Santiagohajxy miānāangumbä:

—Coo miičh hänajty tøø mmøjtägø'øy, coo hänajty tøø mdägø'øy hanehmbä, mänit højts cuhdujt xmió'owät coo højts jim nhäñá'awät miičhä mnähmøjc, hahooyhaampiä møød hanajtyhaampiä.

³⁸ Mänitä Jesús yhadsoogumbä:

—Mijts, cab hajxy mnajuø'øy tii hajxy jaduhñ mnänøømby. Nej, mmee'xtúgäp hajxy jaduhmbä nébiøch ndsaächpøgá'añänä.

³⁹ Mänitä Santiagohajxy yhadsooyy:

—Nmee'xtúgäp højts jaduhñ.

Mänitä Jesús miänaangumbä:

—Jaduhñ mijts mjaančh tsaächpøgaambä nébiøch ndsaächpøga'añän. Tøyhajt jaduhñ. ⁴⁰ Pero cábøčhä cuhdujt jaduhñ nmøødä coo mijtsä cuhdujt nmó'owät coo hajxy jim mhäñá'awät høøčhä nnähmøjc mänáajøch hänajty tøø ndägø'øyän hanehmbä. Dios ja'a cuhdujt møød pøn yajnähdiijaamby coo hajxy jim yhäñá'awät. Je'edshajxy jaduhñ jim häñá'awaamb —nømä Jesús miänaañ.

⁴¹ Coo Jaha Jesús jiamiøødhajxy jaduhñ miädooyy, ja'a hajxy hänajty jaac nämajcpä, mänitä Santiagohajxy miäjootma'tä møødä Juan. ⁴² Mänitä Jesús miøjyaaxy ja'a hajxy hänajty jaac nämajcpä. Mänitä Jesús miänaañ:

—Ja'a gobiernähajxy, møødä häna'c-hajxy yaa møjtuungmøødpä hädaa yaabä naaxwiin, ja'a häná'cätshajxy jaduhñ yaa hanehmb. Mnajuøøby hajxy jaduhñ, túhmäts. ⁴³⁻⁴⁴ Pero mijts, cab hajxy mbøc-juó'owät coo møjtuung hajxy mmøødhädät. Pønä jioot tsojp coo wyiingudsähgø'owøøjät, weenä jioot piäda'agy coo jiamiøød piuhbédät. ⁴⁵ Høøčhpaady, høøch ja'a Diosquexypä, mäbuhbéjpoeh jaduhñ yaa tøø ngäda'agy. Høxtä nnähho'tu'udáambiøčhä jäya'ayhajxy nägøxiä. Cáboch jaduhñ nmäna'añ coočhä jäya'ayhajxy xpiuhbédät.

⁴⁶ Mänitä Jesús hajxy quioo'ty maa ja'a cajpt hänajty xiøhatiän Jericó. Coo hajxy jim chøhngumbä, mayyä jäya'ay hajxy piadu'ubøjcä. Jimä wiinds hänajty tu'ug yhäñá'ay tu'haam. Bartimeo hänajty xiøhaty. Timeo ja'a tieedy hänajty xiøhaty. Xädø'øñyu-jwaambä Bartimeo hänajty. ⁴⁷ Coo ja'a Bartimeo jaduhñ miädooyy coo hänajty je'e Jiesúsä, ja'a hänajty tsohmbä Nazaret, mänitä Bartimeo møc yaaxy:

—Jesús, David miičh jecy mhaphajt mdeedyhajt. Høøch näxúu'tsäc.

⁴⁸ Mänitä Bartimeo yhojmujcä nämay coo cu yhamooñ. Pero cab jaduhñ ñä'a hamooñ. Tehngajnä maas møc tiägøoyy yaaxpä:

—Jesús, miičhä David jecy mhaphajt mdeedyhajt. Høøch näxúu'tsäc.

⁴⁹ Mänitä Jesús tiänaaxiøjpy. Mänit miänaañ coo ja'a Bartimeo miøjya'axøøjät. Mänitä Bartimeo tu'jäya'ay ñämaayyä:

—Xoonäda'ag, tänaayyø'øg. Ximä Jesús xmiøjya'axy.

⁵⁰ Mänitä Bartimeo paquiä tiänaayyø'cy. Mänitä yoñwit yajniñähnaajptuutä. Mänitä Jesús päyø'øguiä hoy wyiingumedsø'øy. ⁵¹ Mänitä Jesús ja'a Bartimeo miäyajtøoyy:

—Tii mayhajt jaduhñ myajtunáanäp.

Mänitä Bartimeo yhadsooyy:

—Wiindsøn, høøch yaghijxø'cäc.

⁵² Mänitä Jesús miänaañ:

—Ja'a hoy, tisän coo quia'a cabä. Coochä nmädia'agy tøø xmiäbøjcä, paady tøø mhijxø'nø.

Tuunä Jesús jaduhñ ñä'a mänaañ, mänitiä Bartimeo jiaančh hijxø'cy. Mänitä Jesús piadu'ubøjnä.

11

¹ Jimä Jesús hajxy hänajty quioodaannä maa ja'a cajpt hänajty xiøhatiän Betfagé møød Betania, jim mäðøyyä maa ja'a tun hänajty xiøhatiän Olivos. Jim hänajty miäwiingón Jerusalén. Mänitä Jesús ja'a jiamiøød metsc ² ñämaayy:

—Nøcx hajxy jimhaamby maa yø'ø cajpthuungän. Coö hajxy jim mmedsa'añ, jimä burro hajxy tu'ug mbaada'añ cuxoch. Cahnä pøn yajpejmachñä. Mmägüeje'owäp hajxy. Jaduhnds hajxy yaa mwitsmínät. ³ Y pø jimä jäya'ay hajxy xmiäyajtøy tii hajxy jaduhñ coö mmägüeje'øy, mänit hajxy mnämä'awät: “Ja'a nwiindsøn højts cham yajmaajajp. Paquiä højts nnä'a yajtuna'añ. Mänit højts miñ nnajtswidso'øy.” Jaduhñ hajxy mmänä'anät —nømä Jesús ñajtsapxøøyy.

⁴⁻⁵ Mänitä burro hajxy hoy jiaanč paady cuxoch jim möjtu'haam, jim tøjnahmøjc mädøyyä. Jimä jäya'ayhajxy hänajty näje'e tiäna'ay. Coö ja'a Jesús jiamiøødhajxy tiägøøyy burromägüeje'obiä, mänit hajxy ñämaayyä:

—Tii yø'ø burro hajxy jaduhñ coö mmägüeje'øy.

⁶ Mänit hajxy jaduhñ yhadsooy waambaty hajxy hänajty tøø yhane'emyii coö hajxy jaduhñ yhadsówät. ⁷ Mänitä Jesús ja'a burro yajnäméjtsäxä. Mänitä jiamiøødä wyit hajxy jim piädaacy burronähgøxp. Mänitä Jesús jim piejty. ⁸ Jaanč tehñ miayyä jäya'ayhajxy hänajty pianøcxy. Mänitä wyit hajxy näje'e chijy. Jaduhnds hajxy tu'haam ñajtsye'ebøøyy maa ja'a Jesús hänajty burronähgøxp ñaxø'owa'añän. Näje'e hujtsaay hajxy hänajty piujxpä. Jim hajxy hänajty piädaacpä tu'haam. ⁹ Cu'ughagujcä Jesús hänajty ñøcxy. Mänitä cu'ughajxy nägøxiä tiägøøyy yaaxpä jojpä:

—¡Viva Jesús, viva! ¡Gloria a Dios! Diosquexy hädaa Jesús jaduhñ. ¹⁰ ¡Gloria a Dios tsajpootypä! Jaduhñ hädaa Jesús yhane'emaambä nebiä David jecy yhanehmiän, ja'a hajxy jecy nhaphajt ndeedyháltäm.

¹¹ Mänitä Jesúshajxy jim quioo'nä Jerusalén, møødä jiamiøød ja'a nämajmetspähajxy. Mänit hajxy jim ñøcxøøyy maa ja'a tsajtøjcän. Coö hajxy jiiby chajtøjtägøøyy, mänit hajxy yhiwxwädijty tijaty hänajty jiiby. Mänit hajxy wyiimbjçumbä. Mänit hajxy jiiby yhädáaccumbä Betania. Hix, tøø hänajty chuujø'øy, y jiiby hajxy hänajty miejtsta'aga'añ Betania.

¹² Cujaboom, mänitä Jesúshajxy jim tiu'ubøjcumbä. Mänitä Jesús yäho'pøjcä. ¹³ Mänitä piids tu'ug ñäheebøøyy coö hänajty jim tiäna'ay picxumnä. Coö wiingón ñämejch, mänit yhiixy coö tiøøm hänajty quia'a nä'ägädä hity. Haagä haay hänajty je'e. Cahnä yhiit's hänajty yhabaadyñä mänaabä hänajty naxy tiøømbetiän. ¹⁴ Mänitä Jesús piids ñämaayy:

—Ni mänaa miičh mga'a tømbejtägatsaannä.

Coö ja'a Jesús jaduhñ miänaañ, miädoow ja'a jiamiøødhajxy jaduhñ.

¹⁵ Coö ja'a Jesúshajxy jim miejtstägajch Jerusalén, mänitä Jesús jiiby chajtøjtägøøguiumbä. Mänitä Jesús ja'a too'pädøjc juubiädøjc tiägøøyy høxpäboobiädsøømbä jiiby tsajtøgooty. Mänitä meexä tiägøøyy høxjuijpä maa xädø'øn hajxy hänajty quiuwichän, møødä häñaabiejt maa hajxy hänajty yhäña'ayän coö hajxy hänajty pialomatoogy. ¹⁶ Mänitä Jesús tiägøøyy hadujpä coö ja'a jäya'ayä tioogy hajxy jiiby quia'a mädägøøñät tsajtøgooty. ¹⁷ Mänitä Jesús tiägøøyy yajwiingapxøøbiä:

—Jaduhñ jim myiñ cujaay maa ja'a Diosmädia'aguian: “Pa'yaaxtáacthøchä ndøjc hajxy nägøxiä xwiäänät, ja'a jäya'ayhajxy wiinduhmyhagajtpä.” Jaduhñä Dios jecy miänaañ. Pero mijts, wiing mijtsä tsajtøjc mwa'añ. Jaduhñ hajxy mwa'añ nebiä mee'tstaactän —nømä Jesús miänaañ.

¹⁸ Coö ja'a teedywiindsøn hajxy jaduhñ miädooyy, møødä häna'cä Diosmädia'agy hajxy hänajty jiiby yajnähixøøbiä tsajtøgooty, mänit hajxy tiägøøyy cojyquiapxytiuumbä nebiä Jesús hajxy yaghó'ogät. Hix, chähgøøbiä Jesús hajxy hänajty je'eguiøxpä coö ja'a Jesús ja'a miädia'agy hänajty jiaanč tehñ yhamädoowhíjtäxä ja'a cu'ug. ¹⁹ Pero coö quioodsøøñä, mänitä Jesúshajxy jiiby yhädáaccumbä Betania.

²⁰ Cujaboomä Jesúshajxy ñøcxtägajch Jerusalén. Coö hajxy jim ñaxøøguiumbä maa ja'a Jesús ja'a piids hänajty tøø ñäbogø'øyän, mänitä piids hajxy yhiixy coö hänajty tøø quiøxy tø'øch. ²¹ Coö ja'a Pedro jaduhñ jiahmiejtstaacy, mänitä Jesús ñämaayyä:

—Wiindsøn, huug hix yø'ø piids. Häxøøy miičh yø'ø mnäbogøøyy coö ni mänaa quia'a tømhájnät. Tøø yø'ø quiøxy tøøtsnä —nømä Pedro miänaañ.

²² Mänitá Jesús yhadsooyy:

—Mäbøjcä ja'a Dios miädia'agy coo jiaanč tehñ tiømiädia'aguiä. ²³ Coo hajxy hamuumdu'joot mmäbøgät, høxtä yø'ø tun ja'a mmädia'agyhajxy xquiudiúunäp coo hajxy mnämä'awät coo ween nøcxy miejyquia'awø'øy. Mänitá mmädia'agyhajxy jaduhñ xquiudiúunät coo ja'a Dios ja'a miädia'agy hajxy hamuumdu'joot mmäbøjcät coo tiømiädia'aguiä. Tøyhajt jaduhñ. ²⁴ Coo mijtsä Dios tijaty mmäyujwá'anät, xmió'owäp hajxy jaduhñ, coo ja'a miädia'agy hajxy hamuumdu'joot mmäbøjcät coo tiømiädia'aguiä. ²⁵ Coo mijtsä Dios hänäjty mba'ya'axa'añ, tsipcøxpä häna'c hajxy jayøjp mmämée'xät, ja'a mijts hänäjty tøø xñägädieeyø'yäbä, jaduhñä Dios hajxy jaduhñ xmiämée'xpät tijaty hajxy hänäjty mgädieeyhajpy. ²⁶ Pero pø cab hajxy mmämee'xa'añ, ni mijtsä mDeedy tsajpootypä xquia'a mämee'xtägatsa'añ —nømä Jesús miänaañ.

²⁷ Coo ja'a Jesús hajxy jim quioo'tägajch Jerusalén, mänitá Jesús jadähooc tiägøøyy tsajtøgooty. Jiibiä Jesús hänäjty wiädity, mänit nämejtsä ja'a teedywiindsøn, møødä häna'c-hajxy jiiby yajñähixøøbiä tsajtøgooty, møødä majjäya'adiøjc. ²⁸ Mänitá Jesús hajxy miäyajtøøyy:

—Pøn miič cuhdujt tøø xmiø'oy coo miič häxøøyy yaa tsajtøgooty tøø mdsiptuñ.

²⁹⁻³⁰ Mänitá Jesús yhadsooyy:

—Nhadsóowäbøch häyaa jaduhñ cooch mijts häyaa jayøjp xyhadsóowät. Pønä Juan mäyajnäbejpä quejx, Diosä tøgä jäya'ayä. Hadsóowägøch hajxy. Cooch hajxy häyaa xyhadsóowät, mänitøch mijts häyaa nhadsóowägäjtspät —nømä Jesús miänaañ.

³¹ Cabä teedywiindsøn hajxy hänäjty ñajuø'øy waambä Jesús hajxy yhadsóowät. Mänit hajxy tiägøøyy niñämäayyäbä: “Coo hajxy häyaa nmänáanämät coo ja'a Dios ja'a Juan quiejxy, jaduhñ jadähooc xyhadsowáanäm: Aa, pø tøyhajt jaduhñ coo ja'a Dios ja'a Juan jiaanč quejxy, tii ja'a Juan miädia'agy hajxy coo tøø mga'a mäbøjcä. ³² Y coo hajxy häyaa nmänáanämät coo ja'a Dios ja'a Juan quia'a quejxy, mänitá cu'ug hajxy häyaa xmiädsibøøyyämät.” Hiñ, jaduhñä cu'ughajxy hänäjty miäna'añ coogä Juan hänäjty Dyiosquexiä. ³³ Mänitá Jesús hajxy ñämaayy coo hajxy hänäjty quia'a najuø'øy. Mänitá Jesús yhadsooyy:

—Pues, ni høøch jaduhñ nga'a nägapxaambä pøn høchä cuhdujt tøø xmiø'oy.

12

¹ Mänitá Jesús tiägøøyy yajñähixøøbiä cuentäyajmäbaadyhaam:

—Mänitá jäya'ay tsaatypcam tu'ug piädaacy. Mänit jiuhguraajøøyy. Mänitá tsaatyñøøxee'xøhñdy ñädajøøyy. Mänitá nähbettøjc tu'ug yhädiuun coo hajxy jim yhäñá'awät coo ja'a tsaatypcam hajxy hänäjty cwieendähada'añ. Mänitá wiingjäya'ay ja'a tsaatypcam hajxy yajcø'ødägøøyyäxä coo hajxy cøguipxyjiaty cwieendähádät. Mänitá cudsatyp jäguemnaax nøcxy. ² Coo ja'a tsaatyptuc yhabaaty, mänitá cudsatyp ja'a mioonsä quiejxy coo hajxy cøgujiä ween yajwa'xy. ³ Coo ja'a craa jim miejch, mänit hoyhoy quioxho'cä. Mänit piäboowyiimbijtä cø'øwa'ads. ⁴ Mänitá cudsatyp ja'a mioonsä mäwiingpä jia quéjxcumbä. Maas hanaxiä craa je'e wiobhó'cäbä. Høxtä yajtsäbíjtäxä ja'a quiopc jaduhñ. Hoyhoy jaduhñ chaačhtiuunä. ⁵ Mänitá cudsatyp ja'a mioonsä mäwiingpä jia quéjxcumbä. Mänit hajxy je'e yagho'cy. Maas mayyä mioonsä jia jaac tehñ quiejxy. Näje'e hajxy wiobho'cä; näje'e hajxy yagho'cä.

⁶ Jimä cudsatyp ja'a yhuung hänäjty tu'ug. Jiaanč tehñ chojpiä yhuung hänäjty. Mänit ñämaayy: “Nhuuc quéxyhöch miič jim. Wehñdä miič hajxy häyaa xñä'ä wiingudsähgø'øwät.” ⁷ Coo ja'a cudsatyp yhuung jim miejch, mänit hajxy tiägøøyy niñämäayyäbä, ja'a tsaatypcam hajxy hänäjty tøø miämähmø'øyäbä: “Coo hädaa craa tieedy häyaa ñä'ä hó'ogät, hädaa craa jaduhñ cøxiä mämähmø'øwaamb mäduhñtiä hädaa tsaatypcam. Tsøc hädaa craa hajxy jaduhñ nä'ägä yaghó'cäm, jaduhñ højts hädaa tsaatypcam nje'ehájtämät.” ⁸ Mänitá cudsatyp yhuung miájtsäxä. Mänit yagho'cä. Mänit hajxy hoy yhøxchømy jäguemjuøøby.

⁹ 'Haa, nebiä cudsaatypäda'a hänajty jiatcø'owa'añ. Nøcxaambäda'a hajxy yagho'tä-gatsa'añii, ja'a hajxy hänajty tøø miäyaghó'oguiäbä. Mänitä wiinghäna'cä tsaatypcam hajxy hänajty yajcø'ødägø'owa'añii.

¹⁰ 'Jaduhñ jim myiñ cujaay maa ja'a Diosmädia'aguiän:

Ja'a tsaamädyii ja'a tøjmuu'tspädøjc-hajxy quia'a nä'ägä cumaayy, je'e nä'ägä tuundsohñ maa ja'a tøjteecän.

¹¹ Ja'a Dios jaduhñ mänaañ coo ja'a tsaamädyii jim tiuundsóonät.

Paady hajxy jaduhñ jaanč tehñ yajxonñ nhíxäm —nømä Jesús miädiaacy.

¹² Ja'a teedywiindsønñhajxy, ñajuøøby hajxy hänajty jaduhñ coo hajxy hänajty tøø yajmäbaadyii nebiä cahwiindøyhäna'cän, ja'a hajxy hänajty tsaatypcueendähajpä. Coo hajxy jaduhñ ñajuøøyy, paadiä Jesús hajxy hänajty jia wi'i miadsa'añ. Pero cab hajxy jaduhñ ñä'ä majch, je'eguiøxpä coo ja'a cu'ug hajxy hänajty chähgø'øy. Mänitä Jesús hajxy ñähgueecnä. Mänit hajxy wyiimbijnä.

¹³ Mänitä fariseoshajxy näje'e wyiinguejxä, møødä Herodes quiu'ughajxy näje'ebä, coo ja'a Jesús hajxy yajcapxtägóyyät, jaduhñ hajxy hoy ñäxø'owó'owät. ¹⁴ Mänitä Jesús ñämejtsä. Mänit ñämaayyä:

—Nñajuøøby hõjts coo miich tøy mjaanč tehñ miädia'agy. Caj miich jaduhñ mnä'ägä møjpäda'agy waambatiä cu'ug xjia näma'ay. Tu'cuhdujt miichä jäya'ay mhixy, pønjaty hajxy mäyøø, pønjaty hajxy häyoob. Tøyhajt hõjts miich xyajnähixø'øy coo hõjts hoy njäya'ayhädät nebiä Dios choquiän. Hoorä, coo hõjtsä gobiernä Rómabä hänajty xyajnähuudiu'uda'añ, nej, hahixøøby jaduhñ coo hõjts nnähjuudiú'udädä —nømä Jesús miäyajtøwä.

¹⁵ Mänitä Jesús yhadsooyy:

—Tiič hajxy jaduhñ coo xjia wi'i yajcapxtägoyya'añ. Høøchä xädø'ønñ tu'ug huuc yaghíjxäc.

Paadiä Jesús jaduhñ miänaañ, ñajuøøby hänajty jaduhñ coo hänajty jia wi'i yajcapxtägoyya'añii. ¹⁶ Mänitä Jesús xädø'ønñ jiaanč yaghijxä. Mänit miänaañ:

—Pøn wyiin jiojy yø'øduhñ. Pøn xiøø yø'øduhñ jim miimb.

Mänit hajxy yhadsooyy:

—Ja'a gobiernä wyiin jiojy yø'ø, ja'a jim tuumbä Roma. Jaaya'ay xiøø yø'øbä.

¹⁷ Mänitä Jesús miänáangumbä:

—Tøyhajt jaduhñ. Mo'owxä ja'a gobiernä hajxy pø je'e jie'e yø'ø. Pero mädyii ja'a Dios jie'e, mo'ow hajxy je'ebä.

Coo ja'a Jesús jaduhñ yhadsooyy, jaanč tehñ yagjuøøyy ja'a fariseoshajxy jaduhñ.

¹⁸ Mänitä Jesús ja'a saduceos näje'e ñämejtsä. Cabä saduceoshajxy hänajty miäbøcy coogä ho'ogyjiäya'ayhajxy hänajty jiuypiojtagatsa'añ. Jaduhñä saduceoshajxy hänajty miäna'añ cooc tyijy ja'a ho'ogyjiäya'ayhajxy quia'a jiuypiojtagatsa'añ. ¹⁹ Mänitä saduceos ja'a Jesús hajxy ñämaayy:

—Wiindsønñ, jaduhñä Moisés jecy quiujahy neby hõjts nguhdujthájtämät, hõjts judío-jäya'ayhájäm. Hoorä, coogä ya'adiøjc tu'ug yhó'ogät, coog hänajty piøquiä, pø cáhnäg hajxy hänajty yhuungpaadyñä, pø jimägä piuhya'ay, wéénägä piuhya'ay ja'a yaamgto'oxy wyiingpøcy, jaduhñäc hajxy jaduhñ yhuungpáadät. Jaduhñäc quiähxó'ogät coog hänajty je'e yhuungä, ja'a hänajty tøø yhó'oguiäbä. ²⁰ Hoorä, jii jäya'ayhajxy hänajty näjuxtujya'ay, haagä tu'que'ex. Mänitä tehñ quioobhuung tio'oxiojwiingpøjcy. Cab jecy miøødtsánaayy, mänitä craa yho'cy. Cabä huung hajxy ñä'ä paaty. ²¹ Mänitä jiojdsomy ja'a yaamgto'oxy wyiingpøjcy. Ni je'ehajxy quia'a huungpaatpä. Mänitä craa yho'pä. Jaduhñä jiojdsomy je'ebä jia wiingpøjcumbä. Jaanä jaduhyyä je'e jiajpä nebiä yhajchhajxy jiajtiän. ²² Jaduhñ hajxy näjuxtujc jia møødtsánaayy, ni pøn je'e quia'a yaghuungpaaty. Nägøxiä hajxy jaduhñ yho'cy. Høxtä ja'a to'oxiojyc, jaac tehñ yho'c je'ebä. ²³ Bueno, coo ja'a ho'ogyjiäya'ayhajxy hänajty nägøxiä jiuypiojtagatsa'añ, pønda'a je'e tehñ tiøybä møødtsána'awaamb, ja'a hajxy hänajty näjuxtujcpä. Hix,

näjuxtujc hajxy hänajty tøø jia møødtsäna'ay. Paady højtsä tøyhajt ndsocy —nømä Jesús ñämaayyä.

²⁴ Mänitä Jesús yhadsooyy:

—Caj mijtsä tøyhajt hajxy mnä'ägä møødä, je'eguiøxpä coo ja'a Diosmädia'agy hajxy mga'a nä'ägädä wiinjuø'øy. Møød cab hajxy mnajuøøbiä nebiatiä Dios ja'a miøcmäjaa ya-jcähxø'øgy. ²⁵ Coo ja'a ho'ogyjiäya'ayhajxy hänajty jiuypiojtägatsa'añ, cab hajxy mänit piøga'añ, cab hajxy mänit yhu'uga'añ. Jaduhñ hajxy yhida'añ nebiä Diosmoonsähajxy jim yhitiän tsajpootyp. ²⁶ Tii mijts coo mga'a mähøga'añ coo ja'a ho'ogyjiäya'ayhajxy jiuypiojtägatsa'añ. Jaduhñä Moisés jecy quiujahy coogä Dios tähooc miøødnibiaatä jim pactuum maagä hujts haptymøødpä hänajty tioyyän. Mänitägä Dios ja'a Moisés ñämaayy: “Høøchä Abraham xDyioshajp, møødä Isaac, møødä Jacob.” ²⁷ Coo ja'a Dios jaduhñ jecy miänaañ, jaduhñä tøyhajt hajxy nmøødhajtäm coo ja'a Abrahamhajxy hänajty tøø jiuypiojtägach, møødä Isaac, møødä Jacob. Hix, jujcyjiäya'ay ja'a Dios jaduhñ Dioshajtäp, ca'a yho'oguiäya'ayä. Coo mijts jaduhñ mmäna'añ cooc tyijy ja'a ho'ogyjiäya'ayhajxy quia'a jujypiojtägatsa'añ, caj mijtsä tøyhajt hajxy mnä'ägä møødä —nømä Jesús miänaañ.

²⁸ Jimä jäya'ay hänajty tu'ug yhamädoowhity. Tsajtøgooty hänajty tiuñ. Coo miädooyy coo ja'a Jesús hänajty hoy tøø yhadsoy, mänitä Jesús hoy wyiinguwa'agø'øyii. Mänit ñämaayyä:

—Madiu'u ja'a Moisés hajxy jecy xyhanéhäm. Mädyii jaduhñ maas tuungpaatp —nømä Jesús miäyajtøwä.

²⁹ Mänitä Jesús yhadsooyy:

—Jaduhñ je'e miäna'añ: “Pønjetiä Israel jecy haphajt teedyhajt, hamädoowhit hajxy. Ja'a Dios hajxy nWindsøn'hajtäm. Tu'uquiä Dios jaduhñ Dyioshaty. ³⁰ Hamuumdu'jootä Dios hajxy mjaanč tehñ wyiingudsähgø'øwät nägø'ø nädecypiä. Mähøjcä miädia'agy hajxy homiänaajä. Jahmiets hajxy jaduhñ cøjxta'axiøø.” ³¹ Jaduhñä miämetspä miänaambä: “Mdsógäbä jäya'ay hajxy nägøxiä nej mijts hamdsooyyä mničogyijän. Ni mädyii mädia'agy jaduhñ quia'a mäbaady neby hädaa mädia'agy metspä tiuungpaadiän” —nømä Jesús miänaañ.

³² Mänitä craa miänáangumbä, ja'a hänajty tuumbä tsajtøgooty:

—Wiindsøn, jaanč tehñ yhoy miič mhadsooyy. Tøyhajt jaduhñ nej miič mmäna'añän coo Dios tiu'uquiä. Cabä wiingDios jyijä. Xjiaanč tehñ tiuungpáatäm hajxy jaduhñ ³³ coo ja'a Dios hajxy hamuumdu'joot nwiingudsähgøøyyämät, møød coo jäya'ay hajxy nägøxiä ndsójcämät neby hajxy hamdsooyyä mničójcäm. Pero cab hajxy xjiaty tuungpáatäm coo animal hajxy jiiby nøcxy nnä'ä hayójxäm tsajtøgooty no'cøøc —nømä Jesús ñämaayyä.

³⁴ Coo ja'a Jesús jaduhñ miädooyy coo ja'a craa hänajty najuøøyyhaamby tøø quiapxy, ja'a hänajty tuumbä tsajtøgooty, mänitä craa ñämaayyä:

—Jaac mähøc ja'a Diosmädia'agy hamuumdu'joot, jaduhñds miič jim mnócxät Dioswiinduum —nømä Jesús miänaañ.

Mänitä häna'c-hajxy yhamoonnä, ja'a Jesús hajxy hänajty jia wi'i yagho'ogaambä. Cabä Jesús hajxy waamb miäyajtøönä je'eguiøxpä coo ja'a Jesús hajxy hänajty chähgø'øy.

³⁵ Jiibiä Jesús hänajty yajnähixø'øy tsajtøgooty. Mänit miänaañ:

—Yø'ø häna'c-hajxy jii yajnähixøøbiä tsajtøgooty, tii hajxy jaduhñ coo miäna'añ coogä David ja'a Cristo yhaphaty yhoc-haty. ³⁶ Haa ca'a, jaduhñ jim myiñ cujaayä maa ja'a Diosmädia'aguian coo ja'a David hamdsooyyä jecy miänaañ:

Mänitøchä Dios ja'a nWiindsøn xñämaayyä:

“Yaa miñ häña'aw maačhä nhahooyhaampiän,

høxtä cóonøchä mmädsip nga'a yajmäjädaacämät.”

Ja'a Dioshespírituhaamä David jaduhñ jecy miänaañ. ³⁷ Jaduhñä David jecy miänaañ coogä Cristo hänajty wyiindsønhaty. Hoorä, pø tøyhajt jaduhñ coo ja'a David ja'a Cristo

jaduhñ jecy wyiindsønñhajty, tii yø'ø jäya'ayhajxy coo miäna'añ coogä David ja'a Cristo ñä'a haphaty ñä'a hoc-haty —nømä Jesús miänaañ.

Jaanč tehñ yhomiädoonä ja'a jäya'ayhajxy hänajty miädooy nebiä Jesús hänajty yajñähixø'øyän. Nämäyyä jäya'ayhajxy hänajty.

³⁸ Mänitä Jesús jiaac mänaañ:

—Yø'ø häna'c-hajxy jii yajñähixøøbiä tsajtøgooty, cab yø'ø miädia'agy hajxy mmäbójcät. Yoñwitmøød hajxy naxy wiädity cajptooty je'eguiøxpä coo hajxy wi'i yajcumaya'añ. Wi'i yajwiingudsähgø'øwaamb hajxy jaduhñ. ³⁹ Jiiby hajxy jia wi'i yhäña'awa'añ maa ja'a häñaabiejt yajxonjatypän, hädaa yaabä tsajtøgootypä, møød jim maa ja'a cay hu'ugy naxy jiadyiijän. ⁴⁰ Pero cabä quiuhdujthajxy ñä'ägädä hoyyä. Hix, pójcäxäbä yaamgto'oxiä tiøjc-hajxy. Hoy hajxy jaduhñ jia jatcø'øy, jejcyjatiä Dios hajxy jia wi'i pia'ya'axy. Pero jaanč tehñ yhoyhoy hajxy jaduhñ yajcumädowa'añii —nømä Jesús miänaañ.

⁴¹ Mänitä Jesús jim mädooyä hoy yhöxta'agy maa ja'a jäya'ay xädø'øn hajxy hänajty naxy quiuyoxø'øyän. Ja'a mäyøøjäya'ayhajxy, majiatiä xädø'øn hajxy hänajty piäda'agy. Jimä Jesús hänajty miähee'pna'ay. ⁴² Mänitä yaamgto'oxy tu'ug miehch. Jaanč tehñ yhäyoob hänajty je'e. Mejtsmägo'xä häyoobä je'e quiugonøoyy. ⁴³⁻⁴⁴ Mänitä Jesús ja'a jiamiødtøjc ñämaayy:

—Huug hix yø'ø yaamgto'oxy hajxy. Cøxiä yø'øduhñ tøø yecy mäduhñtiä hijty miøødä, ja'a hijty ñägayaambiä. Pero yø'ø mäyøøhäna'c-hajxy, weeñtiä hajxy jaduhñ ñä'a puhyejcy.

13

¹ Coo ja'a Jesúshajxy jiiby chajtøjpädsøømy, mänitä jiamiøød tu'ug miänaañ:

—Wiindsøn, huug hix yø'ø tsajtøjc, jaanč tehñ yajxon yø'øduhñ miuuchä.

² Mänitä Jesús yhadsooyy:

—Hoy huuc tehñ yheeb. Hoy yø'ø tøjc jaduhñ jia cruundä, cøxaamb yø'øduhñ jyida'añ. Haxit hatajø'øy yø'ø muuch jiada'añ.

³ Mänitä Jesúshajxy jim ñøcxy maa ja'a tun hänajty xiøhatiän Olivos, jim Jerusalén-woc-hawiimb. Coo hajxy jim miehch, mänitä Jesús hanidiuhmduum hoy yhöxta'agy. Mänitä Pedro ja'a Jesús hajxy ñänøcxy, møødä Santiago, møødä Juan, møødä Andrés. Mänitä Jesús hajxy miäyajtøoyy:

⁴ —Mänaads yø'ø tsajtøjc jaduhñ jyida'añ. Mädyii hijxtáhñdäts jaduhñ cähxø'øgaamb coo hänajty jaduhñ yhabaada'añ.

⁵ Mänitä Jesús yhadsooyy:

—Mniyajcopcø'øwøøjäp hajxy. Cab hajxy myajwiinhøønät. ⁶ Mayyä jäya'ayhajxy min miäwiinhøøna'añ. Jaduhñ hajxy hänajty miäna'ana'añ: “Høøch je'e Cristo.” Mayyä jäya'ayhajxy hänajty jiaanč tehñ miäbøga'añ.

⁷ 'Coo hajxy mmädoyhädät coo tsip pleetä hänajty xii yaa tøø piädø'øgy, cab hajxy jaduhñ mmäná'anät cooc tyijy ja'a naaxwiimbä hänajty wyiimbida'añ. Homiänaajä tsip pleetä jiadyii. ⁸ Nimiädsibø'øwáanäp hajxy hänajty wiinghagajptjaty. Wiinduhmyhagajpt hujx hänajty ñaxa'añ. Jadáanäbä yuuxøø hänajty wiinduhmyhagajpt. Coo jaduhñ jiada'añii, hijxtahñd jaduhñ cähxø'tsoonaamb coo tsø'ty häyohn hoçhähgøøñäjaty hänajty jiada'añii.

⁹ 'Mniyajcopcø'øwøøjäp hajxy mänit. Mäjähñdiuum hajxy hänajty mhida'añ. Xmiadsaambä mmädsip hajxy hänajty. Mänit hajxy jim xyajnøcxa'añ hagujc. Møød jim maa ja'a judfos chajtøjc-hajxiän, xwiobho'ogaamb hajxy hänajty jim. Xyajñøcxaamb hajxy hänajty jim maa ja'a gobiernä wyiinduumhajxiän, je'eguiøxpä cooçh mijts xpiawädity. Jimhøch hajxy jaduhñ xmiädiá'agät gobiernäwiinduum. ¹⁰ Hix, cahnä naaxwiimbä hänajty wyiimbityñä, cøxaambä jäya'ay ja'a Diosmädia'agy hajxy miädowa'añ wiinduhmyhagajpt. ¹¹ Y coo hajxy jim xyajnøcxät hagujc, cab hajxy mänit mnädaj mnämáyät waambaty hajxy mhadsówät. Hix, ja'a Dios ja'a mädia'agy hajxy hänajty

xmio'owaamb. Cab hajxy hānajtj hamdsoo mmādia'aga'añ; ja'a Dioshespīritu hajxy hānajtj xyajmādia'agaamb. ¹² Hamiñ haxōpiā jāya'ayhajxy hānajtj tu'que'ex ñiñāhduga'añii coo hajxy yagho'ogōōjāt. Jaanā jaduhñā yhuung hajxy hānajtj ñāhdugaambā. Ja'a muutsc-hāna'c-hajxy, jaanā jaduhñā tieedy hajxy hānajtj tiunaambā. ¹³ Nāgōxiā mijtsā jāya'ay xmiāhanhada'añ je'eguiōxpā coo'ch mijts xpiawādity. Pero pōñ hānajtj tōō miee'xtucy, hoy hānajtj tōō jia ho'ogy, nāhwa'adsaamb hānajtj je'e.

¹⁴ 'Habaadaamb jaduhñ coo ja'a haxōōgpā ca'a hoybā miedsa'añ maa ja'a Diostōjcān —pōñ hādaa nocy capxp, ween jaduhñ wyiinjuō'oy—. Mānitā Diostōjc jaduhñ yajma'ada'añii. Coo ja'a haxōōgpā hajxy jaduhñ mhíxāt, mānit hajxy pāyō'oguiā mnōcxāt tunjoot, pōnjaty yaa tsānaaby Judeanaaxooty. ¹⁵ Pōnjaty hānajtj hāñāaby tōjnāhgōxp, ween ñā'āgā pāyō'ogy, cap nōcxy tii jiiby yajpādsōmy tōgooty. ¹⁶ Pōnjaty hānajtj camjooty, cab jaduhñ jim ñōcxāt maa ja'a tiōjcān. Cap nōcxy jiiby tii yajpādsōmy, ni wyit ni tii. ¹⁷ Jaan'ch tehñ chaa'chpōgaambā to'oxiōjc-hajxy hānajtj, ja'a hajxy hānajtj co'na'awaambā, mōōd ja'a hajxy hānajtj huungyajtsi'tspā. ¹⁸ Mmānuu'xtā'agābā Dios hajxy coo tsō'ty hāyohn ween quia'a jadyii coo hānajtj jiaan'ch tehñ tiōōchcā. ¹⁹ Jaan'ch tehñ yhoyhoyyā jāya'ayhajxy hānajtj chaa'chpōga'añ. Ni mādyii tsaā'chpā jaduhñ quia'a mābaada'añ neby hānajtj jiada'añiijān, ni ja'a jecy nājxābā, ni ja'a jaac minaambā. ²⁰ Tōō ja'a Dios jaduhñ miāna'añ coo ja'a jāya'ayhajxy hānajtj jecy quia'a tsaā'chpōga'añ, je'eguiōxpā coo chocy pōnjaty jaduhñ tōō wyiimbiy. Coo ja'a Dios hāxōpy jaduhñ tōō quia'a māna'añ, jejquiā jāya'ayhajxy hāxōpy chaa'chpōga'añ. Ni pōñ hāxōpy quia'a nāhwa'adsa'añ.

²¹ 'Coo mijts pōñ xñāmá'awāt coog tyijy ja'a Cristo hānajtj jii wiādity, cab hajxy mmābōgāt. ²² Hix, mayyā jāya'ayhajxy hānajtj wiādita'añ māwiinhōhmbā, cooc tyijy hajxy hānajtj je'e Cristo, mōōd cooc tyijy hajxy hānajtj Dyiosquexiā. Pi-ayajcāhxō'ōgaambiā hijxtahñd hajxy hānajtj hoy-yagjuōōñābā. Jaduhñā jāya'ayhajxy hānajtj jia wi'i wyiinhōna'añii, mōōd ja'a hajxy hānajtj Dioswiimbíyyābā. ²³ Mniyajcopcō'ōwōōjāp hajxy. Jāguemiā hajxy chamñ nnāma'ay coo hajxy mniyajcopcō'ōwōōjāt.

²⁴ 'Mānitxōōbā, coo ja'a tsaā'chpā hānajtj tōō ñajxnā, mānitā xōō wyiingoodō'ōwahñ mōōdā po'o. ²⁵ Mānitā mamiadsa'a hānajtj quia'awa'añ. Tsāyuyyaamb hānajtj jaduhñ, tijaty jim cuhdujtmōōd tsajtcōxp. ²⁶ Mānitōch hānajtj ngāda'aga'añ jocjooty, hōō'ch ja'a Diosquexypā. Mōcmājaamōōdhōch hānajtj ngāda'aga'añ. Yajxōñhōch hānajtj mānit ngāda'aga'añ. Mānitōchā jāya'ayhajxy hānajtj may xpia'hee'ptāgō'ōwa'añ. ²⁷ Mānitōchā nmoonsā tsajpootypāhajxy hānajtj nguexa'añ coo hajxy jaduhñ quiōxy yajtu'ugmúgāt pōnjatyhōch hānajtj tōō nwiimbiy. Wiinduhmyhagajpt hajxy hānajtj wioomuga'añii.

²⁸ 'Hōxtahñdsā higueraquepy, coo jaduhñ wiámāt, hijxtahñd jaduhñ coo hānajtj tōō pioodtāgōōñā. ²⁹ Jaanā jaduhñduhmbā, coo ja'a tsō'ty hajxy jaduhñ mhíxāt nébiōch naamñā tōō nmādia'agy, hijxtahñd hānajtj jaduhñ coo'ch hānajtj mobādajpā ngādaactāgatsa'añ hādaa yaabā naaxwiin, hōō'ch ja'a Diosquexypā. ³⁰ Cōxaamb jaduhñ jiada'añii nébiōch naamñā tōō nmādia'agy, cahnā jāya'ayhajxy hānajtj quiōxy ho'ogyñā, ja'a hajxy jāda'ahaty jugyhajpā. Tōyhajt jaduhñ. ³¹ Cuhdāgoyyaambā tsajt mōōdā naaxwiimbā. Pero tsipcōxp jaduhñ tiōjiada'añ nébiōch chamñ nmādia'aguiān.

³² 'Ni pōñ jaduhñ quia'a najuō'oy mānaa jaduhñ jiada'añii. Jagooyyā Dios nidiuhñ ñajuō'oy, ja'a hajxy nDeedyhājtam. Ni ja'a Diosmoonsāhajxy jaduhñ quia'a najuō'oy, ja'a hajxy jim tsajpootypā. Ni hōō'ch nga'a najuō'oy, hōō'ch ja'a Diosquexypā.

³³ 'Paady, nāhix hahixō'ō hajxy mhídāt homiānaajā, je'eguiōxpā coo hajxy mga'a najuō'oy mānaa jaduhñ jiada'añii. ³⁴ Jii jāya'ay hānajtj tu'ug, coo hānajtj ñōcxa'añ jāguemnaax, mānitā mioonsā ñāmaayy coo ja'a tiōjc cwieendāhājtaxāt. Nāgōxiā hajxy jaduhñ yaagā nā'ā tuungmooyyā. Jaduhñā tu'jāya'ay ñāmāyābā coo jim tiúnāt maa ja'a tōghaawān, weenā tōjc yaghawa'a'ch jopy; tsuu jādāhooc yhagōōguiumbāt. ³⁵⁻³⁶ Ja'a cudōjcā mioonsāhajxy, cab hajxy hānajtj ñajuō'oy mānaa ja'a wyiindsōnhajxy

hänajty mietstägatsa'añ, pø coodsóõñäp hänajty jaduhñ, o pø tsuhmdä hänajty, o pø tu'tseey-yaaxø'ogy hänajty, o pø jobóõñäp hänajty. Nähix hahixø'ø ja'a wyiindsónñ hajxy jaduhñ yhahixät. Pø caj, coo hajxy jaduhñ jaguiapxiä ñähmejtspedóõjät, wehñdä hajxy hänajty mia'ay. Jaduhñ mäwíinäts mijtspä, cab hajxy jaduhñ mnajuø'øy mänáajøch yaa ngádaactägatsa'añ hädaa yaabä naaxwiin. Paady hajxy nähix hahixø'ø homiänaajä mnä'ägä hídät. ³⁷ Jaduhñhøchä jäya'ayhajxy nägøxiä nnämaabiä coo hajxy nähix hahixø'ø ñä'ägä hídät homiänaajä.

14

¹ Mejtsxøø ja'a pascuaxøø hänajty quia'a habaady mänaa ja'a judíos tsajcaagy hajxy hänajty quiayyän, ja'a cajpä tsoomiøødpä. Ja'a teedywiindsønñhajxy, møødä häna'c-hajxy, ja'a hajxy hänajty jiiby yajñähixøøbiä tsajtøgooty, cojyquiapxytuumb hajxy hänajty jaduhñ nebiä Jesús hajxy yajtsumóõjät hønñda'agymiädia'agyhaam, jaduhñ hajxy jaduhñ hoy yajyagho'ogóõjät. ² Mänit hajxy näje'e ñiñämaayyä:

—Cab hajxy tsøc nej jatcøøyyäm coo ja'a cu'ug hajxy jaduhñ xñä'ä nähbädó'cämät.

³ Tøø ja'a Jesús hänajty yhäda'agy Betania. Jim hänajty miädsuugay maa ja'a Simón tiøjcän, ja'a hijty leprapa'ammøødpä. Mänitä to'oxiøjc tu'ug miejch. Jimä nardoperfume hänajty quiø'ogonhaty alabastro-vidrioooty. Jaanç tehñ chowä nardoperfume hänajty ñøcxy. Mänitä to'oxiøjcä parfume-vidrio piuhy. Mänitä Jesús ja'a parfume yajcuhtemøøyyä. ⁴ Mänitä jäya'ayhajxy näje'e jiootma'ty, ja'a hajxy hänajty jim pahäñaabiä. Mänit hajxy ñiñämaayyä:

—Cap yø'ø parfume jaduhñ cu yaghäyooyy. ⁵ Coo jaduhñ cu ñä'ägä too'cy, tsoobaadaamb yø'ø hijty, tægøøgmägo'x-xøøguduñ. Jimä häyoobädøjcä chow hajxy jaduhñ cu miooyyä coo jaduhñ cu ñä'ägä too'cy.

Jaduhñä to'oxiøjc yhojjä.

⁶ Mänitä Jesús miänaañ:

—Weends yhity. Ca'a hajxy mwi'i yhojy. Nébiøch yø'ø jaduhñ tøø xtiñän, cab jaduhñ ñejpiä; hoy jaduhñ. ⁷ Homiänaajä mijtsä häyoobäjäya'ay mhixy. Homiänaajä hajxy jaduhñ mbuhbédät. Pero høøch, cábøch mijts jejcy xyhixa'añ. ⁸ Xwyiingudsähgøøbiøch yø'øya'ay jaduhñ, páadyhøchä parfume jaduhñ xyajcuhtemøøyy. Jaduhñ miäbaady nej coøch häxøpy tøø nho'oguiän. Jaduhñhøch yø'ø hijty xyajñhdema'añ. ⁹ Majatiä Diosmädia'agy wiädita'añ wiinduhmyhagajpt ja'a høøchcøxpä, jaduhñä jäya'ayhajxy miädia'aga'añ nébiøch yø'øya'ay naamnä tøø xtiñ. Jaduhñ yø'ø homiänaajä jiahmiedsäänänä. Tøyhajt jaduhñ.

¹⁰ Jimä Jesús ja'a jiamiøød hänajty tu'ug xiøhaty Judas Iscariote, ja'a hajxy hänajty nämajmetspä. Mänitä Judas ja'a teedywiindsónñ hoy miøødcojyquiapxytiñ coo ja'a Judas ja'a Jesús hänajty tiooga'añ. ¹¹ Coo ja'a teedywiindsønñhajxy jaduhñ miädooyy, mänit hajxy jaduhñ jiaanç tehñ xioondaacpøjcy. Mänitä Judas yajwiinwaanøøyyä coo xädø'øñ hänajty mio'owa'añii. Mänitä Judas tiägøøyy wiinmaabiä nebiä Jesús paquiä yajcø'ødägó'øwät.

¹² Mänitä pascuaxøø yhabaatnä. Jaduhñä judíoshajxy hänajty quiuhdujthaty coo tsajcaagy hajxy naxy quiay, ja'a cajpä tsoomiøødpä. Jaduhñ hajxy hänajty quiuhdujthajpä coo meeghuung hajxy naxy yoxy ja'a pascuaxøøjooty. Mänitä Jesús ja'a jiamiøød miäyajtøøwä:

—Maada'a yhooyyä coo pascuaxøø hajxy häyaa nwiindsuugáayyämät.

¹³ Mänitä Jesús ja'a jiamiøød nämetsc ñämaayy:

—Nøcx hajxy jim Jerusalén. Jimä jäya'ay hajxy tu'ug mbaada'añ nøøgón. ¹⁴ Je'eds hajxy mbadu'ubögäp. Mänit hajxy mbadøjtägó'øwät. Mänitä cudøjc hajxy mnämä'awät: “Ja'a nWiindsónñ højts jaduhñ tøø xwyiinguexy coo højts nyajtówät maa højtsä pascuaxøø häyaa tsuu nwiindsuugáyät.” ¹⁵ Mänit mijtsä cudøjc cuarto nøcxy xyajñähixø'øwa'añ nähbettøjcøxp. Jaanç tehñ quiäruundä ja'a cuarto jaduhñ møød

yajxonä. Jimä cay hu'ugy hajxy mnähix mhahixó'owät coo hajxy jim ndsuugayáanäm —nömä Jesús miänaañ.

¹⁶ Mänit hajxy nämetsc jiaančh nocy jim cajptooty. Jiaančh paat hajxy jaduhñ neby hajxy hänajty tøø ñäma'ayijän. Mänitä tsuugay hajxy tiägøøyy nähix hahixøöbiä.

¹⁷ Coo quioodsøñä, mänitä Jesúshajxy jim ñocy maa ja'a pascuaxøø hajxy hänajty wyiindsuugaya'añän, møødä jiamøødhajxy ja'a jaac nämajcpä. Mänit hajxy tiägøøyy caabiä. ¹⁸ Mänitä Jesús miänaañ:

—Tú'ughøch mijts mjamiøød xñäxø'owø'owa'añ. Quipxy hajxy je'e cham xmiøød-caamiújcäm. Tøyhajt jaduhñ —nömä Jesús miänaañ.

¹⁹ Mänit hajxy nägøxiä jiootmadiägøøyy. Mänit hajxy tiägøøyy niñamáayyabä:

—Nej, høøch je'eda'a tyjy xñänøømbä.

²⁰ Mänitä Jesús yhadsooyy:

—Mijts mjamiøød jaduhñ tu'ug jatcø'owaamb, näguipxiä tsajcaagy hajxy jaduhñ jiiby xmiøødpaguhmá'tsäm texyjooty. ²¹ Høøch, ja'a Diosquexypä, jaduhñhøch njada'añ nhabeta'añ neby jim myiñän cujaay maa ja'a Diosmädia'aguiän. Tøjiadaambä Diosmädia'agy jaduhñ. Pero ja'a crájøch jaduhñ xñähdugaambä, jaančh tehñ yhoyhoy jaduhñ chaačhpøga'añ. Maas hoy häxøpy coo quia'a nä'ägä naaxwiimbädsøømy —nömä Jesús miänaañ.

²² Caabyñä ja'a Jesúshajxy hänajty, mänitä Jesús ja'a tsajcaagy quionø'cy. Mänitä Dios ñämaayy: “Dioscujú'uyäp.” Mänitä jiamøøødä tsajcaagy nägøxiä yajnäguidøøyy. Mänit miänaañ:

—Cay hädaa hajxy; høøch nni'x ngopc hädaa —nömä Jesús miänaañ.

²³ Mänitä Jesús ja'a vaso quionø'cy, ja'a hänajty vinomøødpä. Mänitä Dios ñämáaguiumbä: “Dioscujú'uyäp.” Mänitä Jesús ja'a vino yhuuctsohñ. Mänitä jiamøøød miooyy. Nägøxiä hajxy jaduhñ yhuucy. ²⁴ Mänitä Jesús miänáangumbä:

—Høøch nnø'ty hädaa. Hijxtahñd hädaa jaduhñ coöchä nnø'ty nyajxee'xa'añ coöchä jäya'ayhajxy hänajty nnähho'tu'uda'añ. Jaduhñhøchä cuhdujt nyajtødiägø'owa'añ, ja'a Dios ja'a Abraham jecy miøødyajcuhdújcäbä. ²⁵ Tøyhájthøch jaduhñ nnämá'awät, cábøchä vino nhuuctägatsa'añ høxtä cóonøch hänajty jim tøø nnøcxtägach maächä nDeediä wyiinduumän. Mänitøchä vino jembybiä nhuucmadsa'añ —nömä Jesús miänaañ.

²⁶ Mänitä Jesús ja'a Dioshöy hajxy yhöøyy, møødä jiamøøødtøjc. Mänit hajxy jim chohñ. Mänit hajxy jim ñocy maa ja'a tun hänajty xiøhatiän Olivos. ²⁷ Mänitä Jesús ja'a jiamøøødtøjc ñämaayy:

—Nägøxiøch mijts xñähgue'ega'añ, je'eguiøxpä coöch nmädia'agy hajxy xquia'a mabøgaanä. Jaduhñ jim myiñ cujaay maa ja'a Diosmädia'aguiän: “Nyagho'ogáambiøchä meegcueendähjapä. Cøxaambä meeghajxy piäyø'oga'añ. Xii yaa hajxy ñøcxø'owa'añ.”

²⁸ Cooch hänajty tøø nho'ogy, mänitøch jadähooc njujyipiøjtägatsa'añ. Mänitøch jim nnøcxa'añ Galilea. Mänitøch mijts jim nocy xpiaada'añ —nömä Jesús miänaañ.

²⁹ Mänitä Pedro ja'a Jesús ñämaayy:

—Høøch mabøcypiä, cábøch miich mänaa nbuhwa'adsa'añ, hoy miich hajxy nägøxiä xjia puhwá'adsät.

³⁰ Mänitä Jesús yhadsooyy:

—Tøyhájthøch miich nnämá'awät, häyaa coods miich tægøøghooc mniguiugapxa'añii coöch tyjy xquia'a hixiä.

³¹ Pero Pedro, tehngajnä je'e jiaac miänaañ:

—Cábøch mänaa nniguiugapxa'añii coöch tyjy miich nga'a hixiä, høyhøch miich quipxy nja møødhó'ogät —nömä Pedro miänaañ.

Jaduhñ hajxy nägøxiä piahadsoobä.

³² Mänitä Jesúshajxy jim ñocy maa hänajty xiøhatiän Getsemaní. Mänitä Jesús ja'a jiamøøødtøjc ñämaayy:

—Jiids hajxy huuc häña'aw, nocy nhuuc Diospa'ya'axy.

³³ Mänitä Jesús ja'a Pedro hawiing miødnøcxy, møødä Santiago, møødä Juan. Mänitä Jesús hoyhoy jiaanč teh̄m jiootmabiøjcy. ³⁴ Mänitä Pedrohajxy ñämaayyä:

—Hoyhóyhøch jaduñ jiaanč teh̄m jiootmayhaty. Høxtä ho'ogáambøch nni-jiäwø'øyii. Huuc mähmø'øw hajxy yaa. Cab hajxy mmaahó'ogät. Jujcy hajxy mhídät —nømä Jesús miänaañ.

³⁵⁻³⁶ Mänitä Jesús weeñtiä jiaac nøcxy. Mänit jaduñ miägutsçädaacy. Mänitä Dios tiägøøyy mänuu'xtaapä: “Teedy, mee'x, coo miich jaduñ cu mga'a mänaañ, cábøch häxøpy ndsaächpøga'añ nébiøch cham̄ nmänaxa'añän. Pero cábøchä nguñdujt yhidät nébiøchä njoot jia tsoquiän. Miičhä nguñdujt jaduñ nä'ägädä hidaamb.”

³⁷ Mänitä Jesús jim̄ ñøcxtägajch maa ja'a Pedrohajxy hänajty tøø miähmø'øyän. Coo jim̄ miejch, mänit jaduñ yhijxy coo hajxy hänajty tøø quiøxy maaho'ogy. Mänitä Pedro ñämaayyä:

—Simón, nej, mmaabä. Nidu'hora miič tøø mga'a mee'xtucy. ³⁸ Jujcy hajxy hit. Teh̄ngajnä ja'a Dios hajxy mba'yá'axät. Jaduhñä möjcu'ugong hajxy xquia'a jøjcapxø'øwät. Jia tsojpiä mjoothajxy jaduñ coo hajxy jujcy mhídät, pero cabä mni'x ja'a mgopc-hajxy jaduñ miee'xtuga'añ.

³⁹ Mänitä Jesús ja'a Dios hoy pia'yáaxcumbä. Jaduhñ jadähooc ñämänaanoøguiumbä. ⁴⁰ Mänit jadähooc miéjtsçumbä maa ja'a Pedrohajxy hänajty tøø miähmø'øyän. Tøø hajxy hänajty miaahó'cumbä. Hiç, tøø hajxy hänajty jiaanč teh̄m yhanuu'xø'øy. Coo hajxy jaduñ yujxä, cab hajxy hänajty ñä'ägä najuø'øy waamb hajxy yhadsówät. ⁴¹ Coo ja'a Jesús jaduñ miejch ja'a miädägøøghoocpä, mänit miänaannä:

—Nej, je'enä hajxy mwi'li mia'ayñä. Ween tiuhñä. Tøø yhabaatnä coöchä cahwiindøy-häna'c-hajxy xquiø'ødägø'øwaannä, høøch ja'a Diosquexypä. ⁴² Pädó'näts hajxy. Jam̄ hajxy. Ximä craa myiñ ja'ačh jaduñ xyajcø'ødägø'øwaambä.

⁴³ Jimä Jesús hänajty miädia'agyñä, mänitä Judashajxy miejch, møødä majiäya'ay, haagä espada-cap. Näje'e hajxy hänajty wiojptcappä. Ja'a teedywiindsøn̄hajxy jaduñ mäguejx, møødä häna'c-hajxy jiiby yajñähixøøbiä tsajtøgooty, møødä majjäya'adiøjc-hajxy. ⁴⁴ Tøø ja'a Judashajxy hänajty quiojyquiapxytiuñ: “Ja'ačh hänajty ndsu'xaambiä, je'e hänajty je'e. Mänit hajxy mmádsät. Mänit hajxy nøcxy mdsuñy”, nømä Judas hänajty tøø miäna'añ. ⁴⁵ Mänitä Judas ja'a Jesús ñämejch. Mänit ñämaayy:

—jWiindsøn̄!

Mänitä Judas ja'a Jesús jiaanč tsu'xy. ⁴⁶ Mänitä Jesús miajtsä.

⁴⁷ Ja'a Jesús ja'a jiamiøød tu'ug, jimä espada hänajty miøjnädawhaty. Coo jaduñ yhijxy coo ja'a Jesús hänajty tøø miächii, mänitä yhespada jiuu'pädsøømy. Mänitä teedywiindsøn̄ä mioonsä tu'ug tiaatspujxtuutä.

⁴⁸ Mänitä Jesús ja'a majiäya'ay ñämaayy:

—Tiičh hajxy jaduñ coo tøø xñämiñ espada-cap wojptcap. Tiičh hajxy xyhixy, mée'tspjä. ⁴⁹ Tiičh hajxy jim̄ coo xquia'a majtspä tsajtøgooty. Nébyhøch hajxy jaduñ høxtä yaa tøø xñämiñ. Nej, ca'a, jabom-jabómhøch hijty jim̄ nøcxy nyajñähixø'øyä. Pero páadyhøch cham̄ njaty nhabety, jaduñä Diosmädia'agy tiøjiädät ja'a høøchcøxpä.

⁵⁰ Nidiuhmä Jesús hänajty jiaac mädia'agy. Tøø ja'a jiamiøødhajxy hänajty quiøxy päyø'øgy. ⁵¹ Jimä høxcujc-häna'c ja'a Jesús hänajty tu'ug piawädijpä, poobwit-nähcäjeenä. Mänit jaduñ jia madsaanä. ⁵² Mänitä poobwit yajniñähñajptuutä. Nähwa'ads høxwa'ads je'e piäyø'cy.

⁵³ Mänitä Jesús yajñøcxä maa ja'a teedywiindsøn̄ wyiinduumän, ja'a jaac teh̄m miøjpä. Mänitä teedywiindsøn̄hajxy jiaac teh̄m miejch, møødä majjäya'adiøjc-hajxy, møødä häna'c-hajxy jiiby yajñähixøøbiä maa ja'a tsajtøjcän. ⁵⁴ Jimä Pedro hänajty jäguem̄juøøby piadäna'ay maa ja'a teedywiindsøn̄ tiøjwiingøn. Mänit jim̄ piahøxtaacy maa ja'a hadänaabiähajxy hänajty jiøømba'axamiän.

⁵⁵ Jimä teedywiindsøn̄hajxy hänajty jia wi'li wyiinmahñdyhaty nebiä Jesús hajxy yajyagho'ogøøjät. Pero cab hajxy hänajty ñä'ägä wiinmahmybiaady. ⁵⁶ Hiç, hoyyä Jesús hajxy hänajty nämay jia nähøønø'øy, wiingaty hajxy hänajty miädia'agy; cab hajxy

hänajty tiu'ugmädiá'aguiä. ⁵⁷⁻⁵⁸ Mänitä wiinghäna'c-hajxy tiänaayyø'cy; nøm hajxy je'e miänaam̄bä:

—Tøø hõjts jaduñ nmädoy coo jaduñ miänaañ: “Hädaa tsajtøjc, jäya'ayhajxy hädaa hädiuun. Pero høøch, nyajnajtsjidø'øwäbøch hädaa. Cudägøøgxøyyøchä wiingpä nhädiuundägätsät. Ca'a jäya'ayhajxy je'e hädiúnäp” —jaduñ hajxy je'e yhöñdaacpä.

⁵⁹ Ni je'e hajxy hänajty quia'a tu'ugmädiá'aguiäbä.

⁶⁰ Mänitä teedywiindsøn tiänaayyø'cy majiäya'ayhagujc, ja'a tehñ miøjpä. Mänitä Jesús ñämaayyä:

—Nej, cab jaduñ mnä'ä hadsowa'añä waambaty hajxy miäna'añä.

⁶¹ Pero cabä Jesús waamb ñä'ägä hadsooyy. Mänit ñämäayyägumbä:

—Nej, tøyhajt jaduñä coo miichä Dios tøø xquiexiä, Nej, miichä Dios xyHuunghajpä.

⁶² Mänitä Jesús yhadsooyy:

—Tøyhajt jaduñ. Høøch je'e. Xyhixáambøch mijts jaduñ cooch jim nhäña'awa'añ Dioswiinduum, maa ja'a yhahooyhaampiän. Mänitøch hajxy jadähooc xyhixáangumbä cooch hänajty yaa ngädaactägatsa'añ hädaa yaabä naaxwiin. Jocjótyhöch hänajty nmänaca'añ.

⁶³ Mänitä teedywiindsøn ja'a wyit quiøø'ch. Paady jaduñ jiatcøoyy coo hänajty jiaanç tehñ jiootma'ady. Mänit miänaañ:

—Tii testigo hajxy jaduñ nnä'ä jaac wáanämät. ⁶⁴ Tøø hajxy jaduñ mhamdsoo mädoy coo ja'a Dios tøø miägäpxtägoy. Waamb hajxy jaduñ mmäna'añ, neby hajxy ndúunämät.

Haagä jaduñ hajxy miänaañ cooc tyijy ja'a Jesús tøø quiädieey, møød cooc ween yagho'ogyii.

⁶⁵ Mänitä Jesús tiägøoyyä wiingutsujøoyyäbä. Mänit wyiinguxødsøoyyä. Mänit wyiingutexøoyyä. Mänit ñämaayyä:

—Najuø'øw pøn xquiojx.

Mänitä hadänaabiädøjc ja'a Jesús hajxy wyiingula'abøoyy.

⁶⁶⁻⁶⁷ Y ja'a Pedro, jii by hänajty je'e hanaaxyp jøømba'axamy maa ja'a tøjwiingän. Mänitä teedywiindsønä qyixymoosä tu'ug miejch maa ja'a Pedro hänajtiän. Coo ja'a Pedro jaduñ yhiixä, mänit wyiinhee'ppejtä. Mänit ñämaayyä:

—Naxy miich yø'ø Jesús mmøødwädity, túhmäts. Haagä Nazaret hajxy mdsooñ nämetsc, túhmäts.

⁶⁸ Mänitä Pedro ñijjogapxä:

—Ni nga'a híxiøch yø'ø. Ni nga'a najuø'øyhøch jaduñ tiich jaduñ xjia wi'i yajmøødmädiacp —nømä Pedro yhöñdaacy.

Mänitä Pedro quiuraabädsøømy. Mänitiä tseey tu'ug jiaanç yaaxø'cy. ⁶⁹ Mänitä quixymoosä ja'a Pedro yhiixcumbä. Mänitä jäya'ayhajxy ñämaayyä, ja'a hajxy hänajty jim jaac padänaabiä:

—Xii Jesús jiamioød tu'ug. Je'e yø'ø —nømä quixymoosä miänaañ.

⁷⁰ Mänitä Pedro jadähooc ñiguiugápaxgumbä. Cab jaduñ ñä'ä jegøoyy, mänitä Pedro ñämäayyägumbä:

—Mbawädijpy miichä Jesús pä, túhmäts. Nyo'mädooby hõjts jaduñ coo miich jim mdsooñ Galilea.

⁷¹ Mänitä Pedro jadähooc miänáangumbä:

—Tøyhajt, cábøch jaduñ nnä'ägä híxiä pøn hajxy jaduñ mja mädiacp.

Tähoocapxiä ja'a Pedro jaduñ miänaañ cooc tyijy ja'a Jesús hänajty quia'a nä'ägädä híxiä. ⁷² Mänitiä tseey miämetsc-hoocpä yáaxcumbä. Mänitä Pedro jiahmiejtstaacy coo ja'a Jesús hänajty tøø miäna'añ: “Cahnä tseey hänajty miämetsc-hoocpä ya'axy, tøø miich hänajty tægøøghooc mniguiugapxyii cooch miich hänajty xquia'a híxiä.” Mänitä Pedro jøøguioo'ty coo ja'a tseey miämetsc-hoocpä jiaanç yaaxy.

15

¹ Coo jioobøoyy, mänitā teedywiindsøn hajxy nägøxiä yhamugóøguiumbä, møødä majjäya'adijoc-hajxy, møødä häna'c-hajxy jiiby jajnähiçøobiä tsajtøgooty. Mänit hajxy quiojyquiapxytiuuñ nebiä Jesús hajxy hänajty tiuna'añ. Mänitā Jesús hajxy quio'øojch. Mänitā Pilato hajxy hoy yajcø'ødägø'øy maa je'e hänajty guobiernähatiän. ² Mänitā Pilato ja'a Jesús miäyajtøoyy:

—Nej, tøyhajt jaduhñä coo miichä judíoshajxy xguiobiernähatiä.

Mänitā Jesús yhadsooyy:

—Tøyhajt jaduhñ.

³ Madiu'u ja'a teedywiindsøn ja'a Jesús hajxy hänajty jia wi'i näxø'øwø'øy. Pero cabä Jesús hänajty waamb ñä'ägä hadsooyy. ⁴ Mänitā Pilato miänáangumbä:

—Nej, caj mhadsowa'añä. Madiu'u miich hajxy xjia wi'i näxø'øwø'øy —nømä Jesús ñämaayyä.

⁵ Pero cabä Jesús waamb ñä'ägädä hadsooyy. Jiaançh tehñ yagjuøoyy ja'a Pilato jaduhñ coo ja'a Jesús jaduhñ quia'a nä'ägädä hadsooyy.

⁶ Jaduhñä Pilato hänajty jomøjt-jomøjt quihdujthaty coo xøø hänajty jiadyii, mänitā tsumyjiäya'ay naxy tu'ug yajpädsømy, ja'a judíoshajxy hänajty jajnähdijpiä. ⁷ Jiibiä jäya'ayhajxy hänajty näje'e chumyçhäna'ay. Tsip hajxy hänajty tøø yagjadyii. Tøø hajxy hänajty miäjäya'ay-yagho'ogy. Tu'ugä tsumyjiäya'ay hänajty xiøhaty Barrabás. ⁸ Coo ja'a cu'ughajxy jim miejch maa ja'a Pilato wyiinduumän, mänitā Pilato hajxy jaduhñ ñämaayy coo ja'a tsumyjiäya'ay tu'ug yhøxmádsät. ⁹ Mänitā Pilato yhadsooyy:

—Nej, jaduhñ hajxy mmäna'añä cooçhä Jesús nhøxmádsädä, ja'a tyjy hajxy mgobiernähajpiä.

¹⁰ Paadiä Pilato jaduhñ miänaañ, ñajuøøby hänajty je'eduhñ tiiguiøxpä ja'a Jesús coo yajcø'ødägøoyy ja'a teedywiindsøn. Paadiä Jesús jaduhñ yajcø'ødägøoyy je'eguiøxpä coo ja'a miädia'agy hänajty quia'a yajmädsójcäxä. ¹¹ Mänitā teedywiindsøn ja'a cu'ug hajxy jiojcapxøoyy coo ja'a cu'ughajxy jaduhñ miäná'anät coo ja'a Jesús ween quia'a høxmaçhii, weenä Barrabás ñä'ägä høxmaçhii. Coo ja'a cu'ughajxy jaduhñ jiaançh mänaañ, ¹² mänitā Pilato ja'a cu'ug jadähooc miäyajtøoyy:

—Y yø'ø Jesúsäts, ja'a tyjy hajxy mgobiernähajpiä, neby hajxy yø'ø myajnähdijy nébiøch yø'ø ndúnät.

¹³ Mänitā cu'ughajxy møc yaaxy:

—Møjpahbet hajxy cruzøxp.

¹⁴ Mänitā Pilato miänáangumbä:

—¡Pero tisän! Tii tøø quiadieey.

Mänit hajxy maas møc yáaxcumbä:

—Møjpahbet hajxy cruzøxp.

¹⁵ Mänitā Pilato jiaançh mänaañ coo ja'a Barrabás hajxy ween nøcxy yajpädsømy pujtøgooty. Hiç, cabä Pilato ja'a cu'ug hänajty yagjootma'ada'añ. Mänitā Pilato miänaañ coo ja'a Jesús wiobho'ogóøjät. Mänit miänáangumbä coo ja'a Jesús hajxy nøcxy cruzøxp miøjpahbety.

¹⁶ Mänitā soldado ja'a Jesús hajxy jajnøcxy maa ja'a haguçän. Mänitā soldado ja'a jiamiøød hajxy quioxy mõjyaaxy. ¹⁷ Mänitā Jesús hucywyit jajnähtämoogøoyy. Mänitā haptycorona yajcuhjenøoyy. ¹⁸ Mänitā Jesús tiägøoyy wiinyáaxäbä:

—¡Viva ja'a Jesús, ja'a judíoshajxy jaduhñ guobiernähajpiä! ¡Viva!

Jaduhñä Jesús hänajty wyiinwoonii. ¹⁹ Mänit hoyhoy wiojpä quihduum paxyhaam. Møød wyiingutsujøoyy. Mänit wyiinjicädaacä. Jaduhñä soldadohajxy hänajty jiatcø'øy nebiä wyiingudsähgøøbiän. ²⁰ Pero wyiinwohmäbiä Jesús hajxy hänajty jaduhñ. Mänitā hucywyit hajxy jajtsijy. Mänitā yhamdsoo wit yajpøgøoyyaxä. Mänit hajxy jajnøcxy maa hajxy hänajty miøjpahbeda'añän.

²¹ Mänitā jäya'ay hajxy tu'ug jiojcubaadøoyy. Camjooty hänajty tøø yhoy. Simón hänajty xiøhaty. Jim hänajty choon Cirene. Jue'e yhuunghajxy hänajty xiøhaty

Alejandro mөөдä Rufo. Jimä Jesús cruz hänäjty chөmä. Mänitä Simón hadsip nāmaayyā coo ja'a Jesús ween piuhdsөmө'öy. Mänitä Simón ja'a cruz jiaančh tsөmө'cy.

²² Mänitä Jesús yajmejtsä maa ja'a nähgaphuung hänäjty xiөhatiän Gólgota. Jaduhñä nähgaphuung hänäjty quiähxө'ögy nebiä ho'ogyjiäya'aguiopcän, paady hajxy jaduhñ yajxөbejty Gólgota. ²³ Mänitä Jesús vino jia mooyyā. Mirra ja'a vino hajxy hänäjty tөө yajmädemө'öy. Pero cabä Jesús jaduhñ ñä'ägä huucy. ²⁴⁻²⁵ Mänitä Jesús miөjpahbejtä cruzcөxp. Mөjpetyxiөө hänäjty jaduhñ. Tөө ja'a Jesús ja'a wyit hänäjty jadähooc yajtsijjähä. Mänitä soldado ja'a Jesús ja'a wyit hajxy tiägөөyy yajniGUIUHÄYÓ'cäbä. ²⁶ Mänit hajxy jim yuugjahy cruzcopchduum tiiguiөxpä ja'a Jesús jaduhñ coo miөjpahbejtä: “Hädaa ja'a judíoshajxy guiobiernähajpy”, nөm hajxy jim quiujahy. ²⁷ Mänitä mee'tspähajxy nämetsc miөjpahbéjtäbä. Tu'jäya'ay miөjpahbejtä maa ja'a Jesús yha-hooyhaampiän. Jatu'ug miөjpahbéjtäbä maa ja'a Jesús yhanajtyhaampiän. Cujcä Jesús jaduhñ hoy piäda'agyii. ²⁸ Coo ja'a Jesús ja'a mee'tspä jaduhñ näguipxy miөөdho'cy, jaduhñä Diosmädia'agy tiөjiajty maa jaduhñ myiñän cujaay: “Haxөөghäna'c jaduhñ pianänөөmä.”

²⁹ Ja'a jäya'ayhajxy hänäjty jaduhñ jim naxөөbiä, höxtä yagjuөөby hajxy hänäjty coo ja'a Jesús hajxy jim yhijxy cruzcөxp. Mөөд hajxy hänäjty wyiinwoöñ:

—Ja'a, miich mahñdy ja'a tsajtөjc mwi'i yagjidaamby, y cudägөөgxөөyyä mahñdy miich je'e mhädiuundägätsät. ³⁰ Pө tөy miich mөcmäjaa mjaančh mөөдä, tiids miich jim coo mга'a mänacy cruzcөxp. Jaduhñäts mbäyө'ögät —nөmä Jesús nāmaayyā.

³¹ Jaanä jaduhñä teedywiindsөnhajxy hänäjty miäwiingapxpejpä, mөөдä häna'c-hajxy hänäjty jim yajnähixөөbiä maa ja'a tsajtөjcän. Jaduhñ hajxy hänäjty ñiñäma'ayii:

—Tөө yө'ө wiinghäna'c may yajnähwa'ačh, pero caj yө'ө hamdsoo hoy yajniñäh-wa'adsa'añii. Jaduhñ hijty ñibiäda'agyii nebiä Dioshuungän. Jaduhñ hijty niñänөmyii cooc tyijy ja'a judíoshajxy guiobiernähaty. ³² Mänit hajxy häyaa njaančh mäbөjcämät, nägooyyä jim miänácät cruzcөxp.

Jaanä jaduhñä mee'tspähajxy hänäjty miäwiingapxpejpä, ja'a Jesús hajxy hänäjty näguipxy tөө miөөdmөjpahbedyíijäbä.

³³ Nägooyyä quiujyxiөjөөyy, mänit jaduhñ cөjx wyiingoodsө'öy. Tägөөghora jaduhñ yhijty wiingoods. ³⁴ Coo ja'a xөө jaduhñ wyiinajtúutcumbä, mänitä Jesús mөc yaaxy: “Eloi, Eloi, lema sabactani.” Jaduhñ miädia'agytiägө'öy: “Diosteedy, Diosteedy, tiičh coo tөө xñähgue'egy.”

³⁵ Jimä jäya'ayhajxy hänäjty näje'e miähee'pna'ay. Coo hajxy jaduhñ miädooyy, mänit hajxy miänaañ:

—Mädown, Elíasäda'a mөjyáaxäp.

³⁶ Mänit tu'jäya'ay esponja hoy quioñ päyө'öguiä. Mänit jiiby piama'tsnajxy xunvino-jooty. Mänitä esponja yujxojch paxyjөbhaam. Mänitä Jesús yaghagaabөөyyä coo jaduhñ wyiinmúugät. Mänit jaaya'ay miänaañ:

—Tsөc huuc híxäm pө minaañbä Elías, pө yajmänacáañbä Jesús cruzcөxp.

³⁷ Mänitä Jesús mөc yáaxcumbä. Mänit yho'nä. ³⁸ Tuunä ja'a Jesús jaduhñ ñä'ä ho'cy, mänitä tsajtөjc-hadөөdiujt cujjiä quiөө'tswa'xy. Quiuhduum chohñdaacy, höxtä yhөxhaam jaduhñ yhagөөdsөөyy. ³⁹ Jimä capitán ja'a Jesús hänäjty tu'ug wyiindäna'ay. Coo yhijxy coo ja'a Jesús hänäjty tөө yho'ogy, mänit miänaañ:

—Tөyhajt yө'өduhñ hijty Dyioshuungä.

⁴⁰ Jimä tadjäya'ayhajxy hänäjty näje'e miähee'pna'ay jäguemjuөөby. Jimä María hänäjtypä, ja'a hänäjty jim tsohmbä Magdala, mөөдä Salomé. Ja'a María, ja'a Santiago mөөдä José tiaj, jim hänäjty je'ebä. Ja'a muutspä Santiago jaduhñ ñänөөmby. ⁴¹ Hädaa tadjäya'ayhajxy, quipxiä Jesús hajxy hänäjty tөө piawädity jim Galilea. Tөө hajxy hänäjty piuhbety mänaa hänäjty jim tөө yhitiän. Y coo ja'a Jesús jaduhñ piejnä Jerusalén, quipxy hajxy piabejty, näguipxy mөөдä wiingjäya'ayhajxy nämay.

⁴²⁻⁴³ Ja'a viernes hänajty tsuujøøby. Ja'a poo'xxiøø hänajty tsohnda'agaamb, ja'a pascuaxøø. Ñähix yhahixøøbiä judíoshajxy hänajty ja'a pascuaxøøgøxpä. Jimä jäya'ay hänajty tu'ug choñ Arimatea. José hänajty xiøhaty. Jim hänajty miøjtuungmøødä tsajtøgooty. Jaanč tehñ yhojiäya'ayä José hänajty. Jiøbhijxyp hänajty jaduñ coo ja'a Dios ja'a møcmäjaa hänajty yajcähxøøga'añ. Mänitä José ja'a Pilato ja'a Jesús ñaaxni'x hoy miäyujwaanä. Hix, cabä José ja'a Pilato hänajty chähgøøy. ⁴⁴ Cahnä Pilato hänajty miädoyhatyñä coo ja'a Jesús hänajty tøø yho'nä. Yagjuøøyy je'eduhñ coo ja'a Jesús paquiä yho'cy. Mänitä Pilato ja'a capitán miøjyaaxy. Mänit miäyajtøøyy mäduhnajtä ja'a Jesús yho'cy. ⁴⁵ Coo ja'a Pilato jaduñ yhawáañä coo ja'a Jesús hänajty tøø jiaanč ho'ogy, mänit miänaañ coo ja'a José ja'a ho'ogyjiäya'ay ween yajmänacy cruzcøxp. ⁴⁶ Mänitä José sábana hoy jiuuy. Mänitä Jesús hoy yajmänacy cruzcøxp. Mänit ñähbijty ñähmojch sábanahaam. Mänit hoy yajnaaxtägøøy tsaajutjooty. Mänitä tsaajut ja'a tsaajut hajxy yaghadäguejtägooyy. ⁴⁷ Jimä Maríahajxy hänajty miähee'pna'ay, møødä Magdala-tsohmbä, møødä José tiaj.

16

¹ Coo ja'a poo'xxiøø hänajty tøø ñajxnä, mänitä María perfume hajxy hoy jiuuy, møødä Magdala-tsohmbä, møødä Santiago tiaj, møødä Salomé. Ja'a Jesús ja'a perfume hajxy hänajty yajñähjaaxaamby. ² Cujaboom jopy ja'a Maríahajxy jim ñøcxy maa ja'a Jesús hänajty tøø ñaaxtägøøyän. Näxøø hänajty je'e. Tøø ja'a xøø hänajty piädsøømnä. ³ Tu'haamnøcpxä hajxy tiägøøyy niñamáayyabä:

—Pønä tsaajut häyaa hadäguejtú'udäp.

⁴ Tehñ miejtsp hajxy hänajty jim, mänitä tsaajut hajxy yhiixy coo hänajty yhawa'adsän. Tøø häna'cä tsaajut yagjua'ačh, hoyyä tsaajut jia cruundä. ⁵ Coo hajxy jiiyby chaajuttägøøyy, mänitä muutsc-häna'c hajxy tu'ug yhiixy. Jiiyby hänajty yhäña'ay hahooyhaamby. Yomybioobwit hänajty miøød. Coo ja'a Maríahajxy jaduñ yhiixy, mänit hajxy chähgøøyy. ⁶ Mänit hajxy ñämaayyä:

—Ca'a hajxy mdsähgøøy. Ja'a Jesús hajxy mhøxtaaby, ja'a jim tsohmbä Nazaret, ja'a tøø miøjpahbedyijäbä cruzcøxp. Tøø jiuuypiøjtägach. Tøø yaa choñnä. Huuc tehñ yhiix hajxy, cab je'e yaajän maa je'e piädaacän. ⁷ Nøcx ja'a jiamiøød hajxy hawaanä. Møødä Pedro, mhawáañäp je'ebä. Jaduñ hajxy mhawáañät cooc jim ñøcxa'añ Galilea. Jimäc hajxy nøcxy piaady, neby hajxy hijty tøø yajmøødmädia'agyijän —nømä muutsc-häna'c miänaañ.

⁸ Päyøøguiä Maríahajxy jiuutpädsøømy. Tsähgøøyyäp tsäyúuyyap hajxy piädsøømy. Cab hajxy jaduñ pøn ñä'ägädä hawaanä. Hix, jaanč tehñ chähgøøby hajxy hänajty.

⁹ Näxøø jopy ja'a Jesús jiuuypiøjtägajch. Mänitä María jayøjp yhiixtsohñnä, ja'a hänajty jim tsohmbä Magdala, ja'a møjcu'u juxtujc-hooc yajñähwáatsäbä. Ja'a Jesús jaduñ mäyajnähwaats. ¹⁰ Mänitä María ja'a Jesús jiamiøød hoy jia hawaanä. Wi'i jioøby wi'i xiuu'tsp ja'a Jesús jiamiøødhajxy hänajty. ¹¹ Hoy hajxy jia ñämaayyä coogä Jesús hänajty tøø jiuuypiøcy, møød coogä María hänajty tøø yhiixy hajujcy, cab hajxy ñä'ägä mabøjcy.

¹² Cujecy, jimä Jesús ja'a jiamiøødhajxy hänajty nämetsc ñøcxy camjooty. Mänitä Jesús ñägüehxtøø'xy maa wyiinduuhajxiän. ¹³ Mänitä jiamiøød hajxy hoy jia hawáañäbä. Ni je'e ja'a miädia'agyhajxy jaduñ quia'a mabøjcäxä.

¹⁴ Cujequiä Jesús jiamiøødhajxy hänajty quiaay, ja'a hajxy hänajty nämajtu'ugpä. Mänitä Jesús jim ñägüehxtøø'xcumbä maa hajxy hänajty quiaayän. Mänit hajxy jaduñ ñämaayyä:

—Tii mijtsä miädia'agy hajxy coo tøø mga'a mabøjcä, ja'a mijts tøø xjia hawáañäbä cóogøch hajxy tøø xyhiixy hajujcy, cóogøch tøø njuypiøjtägach. ¹⁵ Nøcx hädaa miädia'agy hajxy yajwa'x wiinduuhmyhagajpt. Jaduñä jäya'ay hajxy nägøøxiä myajwiingapxó'øwät neby hajxy ñähwá'adsät. ¹⁶ Pønjaty jaduñ mabøjcp, pønjaty jaduñ näbejp, je'edshajxy jaduñ nähwa'adsaamb. Pero pønjaty jaduñ ca'a mabøjcp, haxøøgtuum hajxy je'e miähmøøwa'añ. ¹⁷ Pønjaty jaduñ mabøjcp, hijxtahnd hajxy yajcähxøøgaamby

hoy-yagjuoñäbä. Ja'a hooçhcøxpä, jaduñä pa'amjäya'ay hajxy yajnähwá'adsät, ja'a hajxy møjcu'umøødpä. Wiinghayuuc hajxy miädia'agáannäp. ¹⁸ Hoyyä tsahñdy hajxy tiehm wyidsó'ogät, cab hajxy nej tiunóøjät. Hoyyä veneno hajxy tiehm yhú'ugät, ni jaduñ hajxy nej quia'a jádät. Y coo ja'a pa'amjäya'ay hajxy quiø'ønähgábät, náxäbä pia'amhajxy.

¹⁹ Coo ja'a Jesús ja'a jiamiøødtøjc miøødmädiaacpädøøyy, ja'a hajxy nWiindsøn-hájtämbä, mänit ñøcxnä tsajpootyp. Mänit hoy yhøxta'agy maa ja'a Tieediä yahooyhaampiän. ²⁰ Mänitä jiamiøødhajxy jiaançh tu'ubøjcy. Mänitä mädia'agy hajxy hoy yajwa'xy wiinduhmyhagajpt. Pihbejpiä Jesús ja'a jiamiøødtøjc hänajty. Majaty hajxy hänajty wiädity, yajcähxø'piä hijxtahnd hajxy hänajty hoy-yagjuoñäjaty. Jaduhñ hänajty yajnajuø'øyy coo hajxy hänajty tiømiädia'agy. Amén.

San Lucas

¹⁻⁴ Mägu'ughajpä Teófilo, miičhcóxpöch hädaa nocy nhädiuñ nej miičh ja'a tøy-hajt jaduhñ mmøødhádät ja'a Jesucristocöxpä, nej jiajty nej yhabejty, nej ñib-ianöcxyii. Pedyíjoch jaduhñ tøø nhaböcy. Jaduhñ miičh tøø mmädoyhajpä. Nämaj jäya'ay ja'a nocy capxy hajxy tøø yajpäð'ögy ja'a Jesucristocöxpä. Ja'a Diosmädi-a'agy-yajwa'xpähajxy, je'eds hajxy jaduhñ tøø xyajmäðoyhájätäm. Yhamdsoo wiinhaam hajxy tiehm yhiijxy.

⁵ Coö ja'a Herodes hänajty jim guiobiernähaty Judeanaaxooty, jimä jäya'ay hänajty tu'ug xiøhaty Zacarías. Teedy ja'a Zacarías hänajty tiuumby maa ja'a judíos ja'a quiuhdujthajxy hänajty myiñän. Ja'a Abías ja'a quiuhdujt hänajty yajtuñäxäp neby hänajty jecy tøø yhane'emiän. Ja'a Zacarías ja'a tio'oxiöjc, Elisabet hänajty xiøhaty. Ja'a Aarón yhap yhoc ja'a Elisabet jaduhñ. ⁶ Pedyii ja'a Zacaríashajxy hänajty quiudiuñ ja'a Diosmädi-a'agy. Hoy hajxy hänajty yajtuñ nebiä Dios choquiän. ⁷ Pero cabä yhuunghajxy hänajty nitu'ugtä. Cahnä Elisabet hänajty ñä'ägädä huungpaadyñä. Tøøds hajxy hänajty miäjaanä.

⁸ Tu'ugxøöbä, jiibiä Zacarías hänajty tiuñ möjtsajtögooty. ⁹ Mänitä piaatä coö ja'a poom jiiby jiógät maa ja'a poomjojtaactän, jim Dioswiinduum. Jaduhñä teedyhajxy hänajty quiuhdujthaty. ¹⁰ Mänit yhabaaty coö ja'a Zacarías ja'a poom hänajty jiiby jioğa'añ. Mänitä cu'ughajxy yhamugøöyy möjtsajtøghaguuy. Mänit hajxy tiägøöyy Diospa'yaaxpä. ¹¹ Jimä Zacarías hänajty piomjocy, mänitä Dios mioonsä tu'ug ñägue-hxtø'xy hahooyhaamby maa ja'a poom hänajty jioquiän. Jim hänajty tøø chooñ Dioswiinduum. ¹² Coö ja'a Zacarías jaduhñ yhiijxy, mänit chähgøöyy. Cabä wiinmahñdy piaaty nej jiatcø'öwät. ¹³ Mänit ñämaayä:

—Zacarías, ca'a mdsähgø'öy. Tøø ja'a Dios miädoy nej tøø mmägäpxiän coö huung xmió'owät. Huungpaadaamb ja'a mdo'oxiöjc jaduhñ. Juan ja'a mhuung myajxøhátät. ¹⁴ Mxoonda'agaamb miičh jaduhñ ja'a mhuungcöxpä. Nämaj ja'a jäya'ayhajxy jaduhñ xioonda'agaambä coö mhuung myínät miédsät. ¹⁵ Cumay ja'a mhuung piädsöma'añ ja'a Dioscöxpä. Miøødhadaambiä Dioshespíritu; jaduhñ miämín miäga'awa'añ. Cabä jocnøø yhu'uga'añ ni ja'a vino. ¹⁶⁻¹⁷ Jaduhñdsä cuhdujt miøødhada'añ nebiä Elías jecy miøødhajtiän. Ja'a Diosmädi-a'agy jaduhñ yajwa'xaamby. Mänitä judíos ja'a Dios hajxy jiahmiejstaactägatsa'añ jadähooc. Jaduhñä Juan yajwiingapxø'öwa'añ coö ja'a yhuung hajxy quia'a møødnimiädsiphájätänät, y coods hajxy miäbójnät ja'a hoguiapxy ja'a homiädi-a'agy pøn yhamdsoo cuhdujt ja wi'i yajtunaamb. Coö hajxy jaduhñ quiudiünät, mänitä Dios jaduhñ quiuhböga'añ.

¹⁸ Mänitä Zacarías miänaañ:

—Nébiöch ja'a tøyhajt jaduhñ nmøødhádät coöch nhuung myina'añ. Tøø højts nmäjaanä møødhöch ndo'oxiöjc.

¹⁹ Mänitä Dios mioonsä yhadsooyy:

—Gabriélhöch nxøhaty. Jímhöch ndsooñ Dioswiinduum. Je'ečh tøø xquiexy coöch miičh miñ nhawaanä coö ja'a mhuung jaduhñ myina'añ. ²⁰ Coöch miičh ja'a nmädi-a'agy tøø xquia'a mäböjcä, huum miičh mmähmø'öwa'añ. Høxtä coonä ja'a mhuung myínät, mänit mgapxø'öga'añ. Tøjiadaamb jaduhñ nébiöch cham nmädi-aguiän.

²¹ Jimä cu'ug ja'a Zacarías hajxy hänajty jia wi'i yhahixy möjtsajtøghaguuy. Yagjuøöby hajxy hänajty coö ja'a Zacarías jiiby wy'i jecy tsajtögooty. ²² Coö ja'a Zacarías tiöjpädsøömnä, tøø hänajty jiaanč huumy. Mänitä cu'ughajxy ñajuøöyy coö ja'a Zacarías ja'a tsø'ty hänajty tøø yhixy. Hix, cø'øhaam yajnähiøöñä.

²³ Hoorä, coö ja'a Zacarías yaghabejty mäduhñtiä hänajty tiuna'añ tsajtögooty, mänit ñöcxnä maa ja'a quiajptän. ²⁴ Mänitä tio'oxiöjc jiaanč mähmøöyy maaxhuungmøøð. Jiiby ñä'ägä mähmøöyy tögooty mägooxpo'o. Caj ñä'ägä tøjpädsøömnä. Jaduhñ hänajty

wyli miädiaacta'agy quiopcooty: ²⁵“Páadyhøch ja'a Dios jaduñ tøø xñäxuučh nébiøch ja'a cu'ughajxy jaduñ xquia'a péjxnät.”

²⁶Tädujpo'o ja'a Elisabet hänajty tøø yhity maaxhuungmøød, mänitä Dios ja'a Gabriel quiéjxcumbä. Jimä Gabriel quiejxä maa ja'a cajpt xiøhatiän Nazaret jim Galileanaaxooty. ²⁷Ja'a María jaduñ yajnäguejxä. Cäxyiihajpnä hänajty je'enä. Tøø hänajty tiødiägø'øyy coo ja'a José hänajty piøga'añ. Jue'e ja'a José, David yhap yhoc je'e, ja'a hijty jegyhajty gobiernä tuumbä. ²⁸Mänitä Gabriel tiøjtägøøyy maa ja'a María hänajtiän. Mänitä María ñämaayyä:

—Diøshøch tøø xquiey cooçh miičh jaduñ nmägäpxät. Miičhcøxpä ja'a Dios ja'a mayhajt tiuna'añ. Xmiøødhijp miičh ja'a Dios. Maas hoy miičh ja'a Dios xyhixy quejee ja'a mmädo'oxiøjc-hajxy.

²⁹Cabä María hänajty ñajuø'øyy tii jaduñ coo tøø ñäma'ayii ja'a Dioscøxpä. Tsähgøøyy jaduñ siémpräm. ³⁰Mänitä ñämaayyägumbä:

—María, ca'a mdsähgø'øyy. Møj ja'a Dios ja'a mayhajt tiuna'añ ja'a miičhcøxpä. ³¹Mhuungpaadaamb miičh jaduñ. Jesús ja'a mhuung myajxøhata'añ. ³²Møj jaančh jaduñ yhida'añ. Høxcabáanäp jaduñ coo Dyioshuungä. Dios jaduñ päda'agaamb gobiernä nebiä David jecy tiuunän, ja'a Jesús yhap tieedy. ³³Paady jaduñ piäda'aga'añii gobiernä nebiä judiøshajxy yhané'emät cøjxta'axiøø. Nimänaa jaduñ quia'a hanehmbädø'øwa'añ.

³⁴Mänitä María yajtøøyy:

—Nébiøch jaduñ nnä'ä huungpáadät; cáhnøch ya'adiøjc nhixyhatyñä.

³⁵Mänitä Gabriel yhadsooyy:

—Minaambä Dioshespíritu xyhuungmo'owa'añ. Dioshuung jaduñ minaamb ca'awaamb. Cabä pojpä cádieey mänaa tiuna'añ. ³⁶Y miičh mhocmaam, ja'a Elisabet, jaduñ je'e miaaxhuungpaadaambä, hoy jaduñ jia majjä jia petiä. Tädujpo'ohájñäp je'e. Cábäc tyijy hijty miaaxhuungpaada'añ; jaduñä cu'ughajxy hijty miäna'añ. ³⁷Pero cabä Dios tii tsip ñä'ägä juø'øyy. Hotyijä jaduñ tiuna'añ.

³⁸Mänitä María miänaañ:

—Wéenhøch ja'a Dios jaduñ xñä'ägä moonsähaty. Wéenhøch jaduñ njaty nébiøch tøø xñäma'ayän.

Mänitä Gabriel wyiimbijnä.

³⁹⁻⁴⁰Mänitiä ja'a María ñøcxy maa ja'a Elisabethajxiän. Judeanaaxooty hajxy hänajty chäna'ay tunjooty. Mänitä María tiøjtägøøyy. ⁴¹Mänitä Elisabet yajpoo'xä. Mänitä maaxhuung jiiby yu'xy Elisabet jioodooty. Mänitä Elisabet ja'a Dioshespíritu ñämejtsä.

⁴²Mänitä Elisabet møc yaaxy:

—Maas hoy miičh ja'a Dios xyhixy quejee ja'a mmädo'oxiøjc-hajxy. Jaduñ miičh mhuung xyhixáanabä. ⁴³Ja'a miičh mhuung, nwiindsønhadáambiøch je'e. Nyagjuøøbiøch jaduñ cooçh miičh xwyiingudsähgø'øyy. ⁴⁴Túunøch miičh xñä'ä yajpoo'xy, mänitiøch nhuung yaaby jiaančh tehñ yu'xy njoodótyhøch. Jootcujc jaduñ ñijiäwø'øyyii, paady yu'xy. ⁴⁵Tøjiadaamb jaduñ nej miičh ja'a Dios tøø xñäma'ayän. Coo jaduñ mmäböcy, jootcujc mhida'añ —nømä Elisabet ja'a María ñämaayy.

⁴⁶Mänitä María miänaañ:

Tøyhajtä Dios miøjjä jiaančhä.

⁴⁷Jootcujc-høch nnijiäwø'øyyii cooçh je'e xyhixy.

⁴⁸Xjiahmiéjtsøch jaduñ, hóyhøch nja häyoy.

Jootcujc-høch ja'a jäya'ayhajxy xñä'ägä nänømaannä,

⁴⁹je'eguiøxpä cooçh ja'a Dios tøø xyhuungmo'oy.

Møj jaančh ja'a Dios.

⁵⁰Pønjaty ja'a Dios jaduñ wiingudsähgøøby,

Dios jaduñ näxuudsaamb cøjxta'axiøø.

⁵¹Tøø ja'a Dios ja'a miäjaa yajcähxø'øgy;

tøø hajxy quia'a mäjäda'agy, ja'a hajxy hijty yajcumayaambä.

⁵² Tøø ja'a gobiernä quiuhdujthajxy piójcäxä,
tøø ja'a häyoobäjäya'ayhajxy miøjtägø'oy.

⁵³ Tøø ja'a häyoobäjäya'ayhajxy cøxiä wiinä mio'oyii;
cabä mäyøøjäya'ayhajxy tii tøø piaady.

⁵⁴ Piuhbejt ja'a Dios ja'a judíoshajxy.

Cøjxta'axiøø ñäxuuch pia'häyoy,

⁵⁵ nebiä Abrahamhajxy jecy ñämaayän,
ja'a nhaphájtäm ja'a ndeedyhájtäm.

⁵⁶ Tägøøgpø'o ja'a María jim jiaac hijty maa ja'a Elisabetän. Mänit yhádaacnä maa ja'a quiajptän.

⁵⁷ Mänitä Elisabet miaaxhuungpaatnä; ya'ayhäna'c jaduñ miingahw. ⁵⁸ Mänitä Elisabet hoy quiuhixyíjäm ja'a jiuju ja'a miägu'ughajxy møødä miädøjc-hajxy. Mänit hajxy nägøxiä xioondaacy coo Dios ja'a mayhajt jaduñ tøø tiuñ. ⁵⁹ Cuductujxøø ja'a pigäna'c hajxy hoy yajcircuncidarhadyii nebiä judíoshajxy hänajty quiuhdujthatiän. Mänit hajxy jia yajxøhatañ Zacarías nebiä tieedy hänajty xiøhatiän. ⁶⁰ Mänitä tiaj miänaañ:

—Cábøch jaduñ nyajxøhata'añ. Juánhøch jaduñ nyajxøhata'añ.

⁶¹ Mänitä Elisabet ñämaayä:

—Tii jaduñ coo myajxøhata'añ. Caj pøn jaduñ xiøhaty maa miich mjuju maa miich mmägu'ugän.

⁶² Mänitä Zacarías miäyajtøøwä cøøhaam nebiä yhuung xiøhátät. ⁶³ Mänitä pu'uyhuung ñädsiiwøøyy coo mio'owøøjät. Mänit yuugjahy pu'uguiøxp: “Juan xiøhata'añ.” Mänit hajxy nägøxiä yagjuøøyy. ⁶⁴ Mänitä Zacarías quiapxø'nä. Mänitä Dios Dioscuj'uyäp miooy. ⁶⁵ Jaanč tehñ yagjuøøyy ja'a cu'ughajxy jaduñ. Mänitä mädia'agy tiägøøyy wädijpä jim Judeanaaxooty jim tunjooty nebiaty ja'a Zacarías tøø jiaty. ⁶⁶ Coo ja'a jäya'ayhajxy nägøxiä miädoyhajty, mänit hajxy tiägøøyy najuøødiaacpä. Mänit hajxy miänaañ:

—Pätiidä yø'ø pigäna'c tiunaamby coo hänajty tøø yeegy.

Tøyhajtä Dios hänajty piuhbeda'añ.

⁶⁷ Mänitä Zacarías ñämejtsä ja'a Dioshøpíritu. Mänitä Zacarías jiomädiaacnajxy neby hänajty tøø miøødmädia'agyijän ja'a Diósäm:

⁶⁸ Møj jaanč ja'a Dios;

paady jaduñ tøø quiäda'agy coo højts xyajnähwa'ads xyajcuhwa'adsaanäm, højts judíoshájtäm.

⁶⁹ Tøø højts ja'a yajnähwaatpä yajcuhwaatpä xyajnäguéjäm;

je'edsä møjcuhdajt jaduñ møød; ja'a David yhap yhoc je'e.

⁷⁰⁻⁷³ Jaduñä Dios jecy miänaañ coo højts xyajnähwa'ads xyajcuhwa'adsaanäm højts nmädsiphájtäm.

Jaanä jaduñ miänaambä coo xñäxuuds xpia'häyowáanäm.

Yajtøjiadaamby jaduñ nebiä Abrahamhajxy jecy miøødyajcuhdujquiän,

ja'a nhap ja'a ndeedyhájtämhajxy.

Ja'a Diosquexyhajxy jaduñ jømädiaacnajx.

⁷⁴ Coo ja'a Dios hajxy jaduñ xñäwáanäm maa ja'a nmädsiphájtämhajxiän,

paady hajxy nga'a tsähgøøyyänä. Hoyyä Dios hajxy nbanócxämät.

⁷⁵ Hawa'adstuum hajxy xyaghidáanäm cøjxta'axiøø.

⁷⁶ Huung, miich nnämaaby coo Diosmädia'agy-yajwa'xpä mwädita'añ.

⁷⁷ Myajwiingapxøøwaamby ja'a Dios quiu'ughajxy neby hajxy jaduñ ñähwa'ads quiuhwá'adsät.

Coo ja'a Dios ja'a piojpä quiädieey hajxy yajmøødmädiá'agät,

mänit hajxy yajnähwa'ads yajcuhwa'adsøjät.

⁷⁸ Xñäxúu'tsäm ja'a Dios hajxy jaduñ,

paadiä yajnähwaatpä yajcuhwaatpä quiejxy.

⁷⁹ Xpiädáacäm hajxy hawa'adstuum,
xmióoyyäm ja'a hoyhajt ja'a weenhajt hajxy,
nõmä Zacarías miánaañ.

⁸⁰ Hoorä, yee'c mõjjooyy ja'a Juan jaduhñ. Wiinmahñdymejts jaduhñ. Ñajuøoyy jaduhñ mädyii hoy mädyii mäbaad. Miøødhajt ja'a Dioshespíritu jaduhñ. Coø mõjjooyy, mänit tiägøoyy wädijpä haniduhmduum. Jim yhiyty høxtä coonä tiägøoyy Diosmädi-a'agy-yajwa'xpä.

2

¹ Coø ja'a xøø jomøjt yhabaaty, mänitä gobiernä Augusto yhanehmy coø ja'a jäya'ay-hajxy ween nõcxy nägøxiä ñiguiujaayii maa ja'a yhamdsoo cajpthajxiän, ja'a hajxy wiinduhmyhajtpä. ² Ja'a Augusto jaduhñ hanehmduum; cahnä põñ hñajty jaduhñ yhane'emyñä. Ja'a Cirenio, je'e hñajty jim tuumb gobernador Sirianaaxooty. ³ Mänitä jäya'ayhajxy nägøxiä jiaančh cudiuuñ nebiä Augusto hñajty tøø yhane'emiän. ⁴⁻⁵ Jue'e ja'a José hñajty, ja'a David yhap yhoc hñajty je'e. Belén ja'a cajpt hñajty xiøhaty maa ja'a David hñajty tøø myiñ tøø quia'ayän, jim Judeanaaxooty. Coø ja'a David hñajty jim tøø myiñ tøø quia'ay, paadiä Joséhajxy hñajty jim nõcxy ñiguiujaaya'añii mõøä María. Tøø hñajty tiødiägøøñä coø hajxy hñajty piøgaannä. Maaxhuungmøød ja'a María hñajty. Galileanaaxooty hajxy hñajty tøø choñda'agy maa ja'a cajpt xiøhatiän Nazaret. ⁶ Coø hajxy jim miejch Belén, mänitä María miaaxhuungpaaty. ⁷ Ja'a quioobhuung jaduhñ miingahw. Mänitä María ñähbijty ñähmojch. Mänit quiugo'ogøoyy wajjøø'xøhñdyjooty. Hiç, cabä mejtstaact hajxy hñajty maa tøø ñä'ägädä paady jim cajptooty. Paady hajxy jim ñä'a nõcxøoyy tøjpa'c maa häna'c ja'a waj hajxy hñajty yajtäna'ayän.

⁸ Jim häna'c-hajxy hñajty näje'e mieegcueendähaty cajtpa'a. Coods hñajty je'e. ⁹ Mänitä Dios ja'a cujapä cudøø'xpä yajcähxø'cy maa hajxy hñajty mieegcueendähatiän. Mänitä Diosmoonsä tu'ug ñäguehxtøø'xy maa wyiinduumhajxiän; jim hñajty tøø choñ tsajpootyp. Mänit hajxy chähgøoyy. ¹⁰⁻¹¹ Mänit hajxy ñämaayä:

—Ca'a hajxy mdsähgø'oy. Naamñä ja'a Cristo tøø myiñ tøø quia'ay jim Belén. Mijts jaduhñ xyajnähwa'ads xyajcuhwa'adsaamb. MWiindsøn'hadaamby hajxy jaduhñ. Páadyhöch nhawáañäm nebiä jäya'ayhajxy nägøxiä xioondá'agät. ¹² Coø ja'a pigäna'c hajxy jaduhñ mbáadät nähbity nähmoch wajjøø'xøhñdyjooty, jaduhñ hajxy mna-juø'owät coø hñajty jie'ejä.

¹³ Mänitä Diosmoonsähajxy nämay jiaac näguehxtøø'xy; haagä jim hajxy hñajty tøø choñ tsajpootyp. Mänit hajxy miánaañ:

¹⁴ Møj jaančh ja'a Dios; tsajpootyp jaduhñ yhity.

Jootcujc ja'a jäya'ayhajxy yaa yhida'añ hädaa yaabä naaxwiin põnjaty ja'a Dios quiu-maaby.

¹⁵ Mänitä Diosmoonsä hajxy wyiimbijnä, ñøcxnä hajxy tsajpootyp. Mänitä meegcueendähajpähajxy ñiñämaayä:

—Jam hajxy híjxäm Belén nebiä Diosmoonsä hajxy tøø xyhawáañäm.

¹⁶ Päyø'øguiä hajxy tiu'ubøjcy. Mänitä Jesucristo hajxy hoy jiaančh paady mõøä María mõøä José. Jiibiä Jesucristo hñajty quio'na'ay nähbity nähmoch wajjøø'xøhñdyjooty. ¹⁷ Mänitä mädi'a'agy hajxy hoy yajwa'xy nebiaty hajxy hñajty tøø yhiçy tøø miädoy ja'a Jesucristocøxpä. ¹⁸ Ja'a jäya'ayhajxy jaac mädoyhájtäbä, yagjuøoyy hajxy jaduhñ. ¹⁹ Pero cabä María jaduhñ yagjuøoyy. Tøø hñajty miøødmädi'a'agyii coø jaduhñ jiada'añ yhabeta'añ. Jiiby quiopcooty miädiactaacy. Caj põñ yajmøødmädiacy.

²⁰ Haa ja'a meegcueendähajpähajxy, mänit hajxy wyiimbijnä, ñøcxnä hajxy. Mänitä Dios ja'a Dioscujú'uyäp hajxy miooyy coø hajxy tøø yhiçy tøø miädoy nebiaty hajxy hñajty tøø miøødmädi'a'agyii.

²¹ Cuductujxøø ja'a Jesús hajxy yajcircuncidarhajtä. Mänit hajxy yajxøbejty Jesús nebiä Maríä hánajty tøø ñäma'ayii coo hánajty quia'a huungmo'oyiinä. Ja'a Diosmoonsä tsajpootypä hánajty hoy tøø ñäma'ay.

²² Coo ja'a xøø hánajty tøø yhabejnä, mänit hajxy hoy chi'iy nebiä ley myiñän, ja'a Moisés jecy quiujáhyyäbä. Mänitä Jesús hajxy jiiby chehñhádaacy Jerusalén jim møjtsajtøgooty. ²³ Jaduhñ jiiby myiñ maa ja'a Diosmädia'aguiän: “Ja'a coobhuung ya'ayhäna'cpähajxy, Diostuung hajxy tiunaamby.” ²⁴ Mänitä paloma hajxy metsc yojxy nebiä jiiby myiñän cujaay maa ja'a Diosmädia'aguiän.

²⁵ Jimä jäya'ay hánajty tu'ug chána'ay Jerusalén; Simeón hánajty xiøhaty. Hojiäya'ay hánajty je'e. Hoyyä Dios hánajty wyiingudsähgøøy. Miøød ja'a Dioshespíritu hánajty je'e. ²⁶ Tøø hánajty miøødmädia'agyíijäm ja'a Dioshespíritu coo hánajty quia'a tsoj ho'o-ga'añ høxtä coonä ja'a Cristo hánajty tøø yhamdsoo hixy, ja'a Dios hánajty quiexaambiä. ²⁷ Mänitä Simeón ñämaayyä ja'a Dioshespíritu coo jim ñøcxät tsajtøgooty. Mänitä Jesús hoy jiiby piaady møødä tiajhajxy. Cahnä hajxy hánajty wyiimbityñä. ²⁸⁻²⁹ Mänitä Simeón ja'a Jesús chehndsooyy. Mänitä Simeón miänaañ:

Diosteedy, Dioscujú'uyäp, jootcújc-høch nhó'ogät,
je'eguiøxpä coo tøø myajtøjiaty nébiøch hijty tøø xmiøødmädia'aguiän.

³⁰ Hamdsóojøch tøø nhixy ja'a yajnahwaatspä, ja'a yajcuhwaatspä,

³¹ ja'a miich tøø mguéxiäbä hádaa yaabä naaxwiin.

³² Ja'a hajxy ca'a judíospä, yajwiingapxø'owáanäp ja'a hoguiapxy ja'a homiädia'agy hajxy.

Ja'a judíoshajxy, cumayáanäp hajxy je'e;

møj jaançh hajxy piäda'aga'añii.

³³ Mänitä Jesús tiajhajxy yagjuøøyy coo yhuunghajxy hánajty jaduhñ tøø ñänøømäxä.

³⁴⁻³⁵ Mänit hajxy ñämaayyä:

—Weenä Dios ja'a hoyhajt ja'a weenhajt xmio'oy.

Mänitä Maríä nidiuhñ ñämaayyä:

—Näje'e ja'a judíoshajxy yhida'añ tu'ugmädia'agy møød miich mhuung. Piaadaamby ja'a hoyhajt ja'a weenhajt hajxy je'e. Pero nämay hajxy jaduhñ quia'a møødhida'añ tu'ugmädia'agy. Ñähwaambedamby hajxy je'e. Tu'udägoyyaamb hajxy jaduhñ. Cähxø'øgaambä wyiinmahñdyhajxy jaduhñ neby hajxy tiajy miay.

³⁶⁻³⁷ Jiibiä yaamgto'oxy hánajty tu'ug tsajtøgooty; Ana hánajty xiøhaty. Fanuel ja'a tieedy hánajty tøø xiøhaty. Aser ja'a yhap ja'a tieedy jegyhajty xiøhaty. Juxtujcjomøjt ja'a ñihyhap hánajty tøø miøødtsána'ay. Mänitä ñihyhap yho'nä. Mänitäts hánajty tøø jiaac jugyhaty mädaaxc-hii'xcumädaaxcjomøjt nidiuhñ. Tøø hánajty miäjaanä. Ja'a Diosmädia'agy hánajty yajwa'xyp. Jiiby hánajty ñä'ägä tuñ tsajtøgooty. Xøømdsuhñ ja'a Dios hánajty wyiingudsähgøøy. Hayuu hánajty yhity tähoocjaty nebiä Diosmädia'agy jaduhñ maas hoy wyiinjuø'owät. ³⁸ Coo ja'a Ana jaduhñ miädooyy nebiä Simeón ja'a Jesús ñänøømiän, mänitä Dios miooyy Dioscujú'uyäp. Mänitä mädia'agy tiägøøyy yajwa'xpä jim Jerusalén coo ja'a Cristo tøø quiäda'agy. Nägøxiä jäya'ayhajxy miädooyhajty, ja'a Cristo hajxy hánajty yhäijxypä.

³⁹ Coo ja'a Maríahajxy hánajty tøø quiudiuñ nebiä Diosley myiñän, mänit hajxy wyiimbijnä, yhädaacnä hajxy Nazaret jiiby Galileanaaxooty, maa hajxy hánajty tøø chooñän. ⁴⁰ Yee'c møjjøøyy ja'a Jesús jaduhñ. Wiinmahñdymejts jaduhñ. Dios jaduhñ mooyy ja'a hoyhajt ja'a weenhajt.

⁴¹ Wiingujomøjt ja'a judíos ja'a xøø hajxy hánajty yagjadyii jim Jerusalén mänaabä ja'a meeghuung hajxy hánajty yoxiän. ⁴² Coo ja'a Jesús majmetscjomøjt yaghabejty, mänitä Maríahajxy ñøcxy xøøhajpä Jerusalén møødä Jesús, nebiä cuhdujt hajxy hánajty miøødän. ⁴³ Coo ja'a xøø hánajty tøø miaañä, mänit hajxy wyiimbijnä. Pero ja'a Jesús, jim je'e miähmøøyy Jerusalén nidiuhñ. Cabä tiajhajxy hánajty ñajuø'oy pø tøø miähmø'oy.

⁴⁴ Jaduhñ hajxy hánajty miäna'añ cooc tyijy hajxy hánajty jim piämänaqyii møødä miägu'ughajpähajxy. Tu'xøø ja'a Maríahajxy hánajty tøø tiu'uyo'oy, mänitä Jesús hajxy

yhixpaaty coo hānajtj jim quia'a pamānacy hōxhaam. Mānit hajxy jia hōxtaayy maa ja'a jiuju ja'a miāgu'ughajxiān. ⁴⁵ Coo hajxy quia'a paaty, mānit hajxy wyiimbíjcumbä. Mānit hajxy ñōcxtāgajch Jerusalén jadāhooc.

⁴⁶ Jimä Jesús hajxy jiaančh paaty tsajtōgooty. Miädägōgxōbä hānajtj jim tōø yhity. Jiiby hānajtj yhäña'ay maa ja'a ley-yajñāhixōōbiädōjc-hajxiān, ja'a hajxy jiiby tsajtōgootypä. Jiibiä capxy mädia'agy hānajtj miämādoona'ay. Cōxiä wiinä hānajtj yajtōy. ⁴⁷ Jaduhñ hānajtj yhadsoy nebiä jajpān, nebiä tōōbä quiapxtá'aguüübān. Yagjuōōby hajxy hānajtj, ja'a hajxy hānajtj jiiby häñaabiä tsajtōgooty. ⁴⁸ Coo ja'a Jesús jaduhñ pīaatä ja'a tiajhajxy, mānit hajxy yagjuōōyy. Mānitä tiaj miānaañ:

—Huang, tii hōjts jaduhñ coo tōø xyhāyoowhixy coo tōø mmāhmō'ōy. Jiiby hōjts miičh nja wi'i yhōxta'ay.

⁴⁹ Mānitä Jesús yhadsooyy:

—Tiičh mijts coo xyhōxta'ay. Nej, cab hajxy mnajuō'ōyā coočh tsipcōxp nduna'añ maačh nDeedy tiōjcānä. Haa ca'a, Diōshōch jaduhñ nDeedyhajpiä.

⁵⁰ Pero cabä tiajhajxy wyiinjuōōyy tii jaduhñ coo tōø miāna'añ.

⁵¹ Mānitä Jesús jiaančh padu'ubōjnä, pīahādaacy jiiby Nazaret. Hix, jiaac mēbōjcāp ja'a tiaj miādia'agyhajxy hānajtj. Y ja'a María, jiiby hānajtj yajnōcxy yagjuō'ōy quiopcooty nebiä yhuung hānajtj tōø xyi'igy tōø miādia'agy jiiby tsajtōgooty. ⁵² Yee'c-habejt ja'a Jesús jaduhñ; jaac wiinmahñdymejts jaduhñ. Quiumaayy ja'a Dios jaduhñ mōōdä tsaan mōōdä cu'ug.

3

¹⁻² Coo ja'a Juan hānajtj tōø miōjjōōñä, ja'a Zacarías yhuung, mānit miägāpā ja'a Diōsām. Mānit tiägōōyy wādijpā hanidiuhmduum. Majmocxjomōjt ja'a Tiberio hānajtj tōø guiobiernāhaty. Ja'a Poncio Pilato hānajtj tuumb gobernador Judeanaaxooty. Ja'a Herodes hānajtj tuumb gobernador Galileanaaxooty. Ja'a piuhya'ay Felipe hānajtj tuumb gobernador Itureanaaxooty mōōdä Traconitenaaxooty. Ja'a Lisanas hānajtj tuumb gobernador Abilinianaaxooty. Ja'a Anás hānajtj tuumb teedywiindsōñ mōōdä Caifás. ³ Mānitä Juan ñōcxōōyy maa ja'a Jordānmōjnōō mēwiingonān. Jaduhñä tsaangu'ug hānajtj yajwiingapxō'ōy coo hajxy ñābētāt, coo ja'a yhaxōōgwiinmahñdy hajxy ñajtshixō'ōwāt, nebiä piojpä quiādieey hajxy jaduhñ ñāhwá'adsāt. ⁴⁻⁵ Tōjiajt jaduhñ nebiä Isafás ja'a Diosquexypä jecy jiahyyān:

Jimä jäya'ay tu'ug yaaaxwādity hanidiuhmduum:

“Najtshixō'ōw ja'a mhaxōōgwiinmahñdy hajxy.

Jaduhñ ja'a mWiindsōñ hajxy hoy mhahíxāt;

jaduhñ hajxy hoy mwiingudsāhgō'ōwāt.

⁶ Nāgōxiä jäya'ayhajxy jaduhñ ñajuō'ōwa'añ neby hajxy yajnāhwa'adsōōjāt ja'a Diōsām.”

⁷ Coo ja'a tsaangu'ughajxy hānajtj yajnābeta'añíjām ja'a Juángām, jaduhñ hajxy hānajtj ñāma'ayii:

—Haay mōjcu'u, caj mijts hoguiuhdujt mnä'ägä mōōdä. Paady hajxy jaduhñ mhuuc nābetaambä nebiä Dios hajxy jaduhñ xquia'a yajcumādōwāt, túhmäts. ⁸ Hoy hajxy mwādítāt neby jaduhñ quiāhxō'ōgāt coo ja'a mhaxōōgwiinmahñdy hajxy hānajtj tōø mnajtshixōōñä. Y cab hajxy jaduhñ mmāná'anāt: “Abrahāmhōch nhaphajt ndeedyhajt, páadyhōch ja'a Dios xquia'a yajcumādowa'añ.” Mānitä Dios hajxy xyajnāhwá'adsāt coo ja'a mhaxōōgwiinmahñdy hajxy mnajtshixō'ōwāt; ca'a jie'eguiōxpä coo Abraham hajxy mhaphajty mdeedyhajty. ⁹ Hoy hajxy mwādítāt nebiä Dios hajxy jaduhñ xquia'a pādā'agāt haxōōgtuum. Pōñ hoy ca'a wādijp, jaduhñ mēwīnāts je'e nebiä quepychaa ca'a tōōmhajpān. Piuxaamby hajxy je'e; mānit hajxy ño'oga'añ.

¹⁰ Mānitä tsaangu'ughajxy miānaañ:

—Neby hōjts ndúnāt coo hōjts hoy nwādítāt.

¹¹ Mānitä Juan yhadsooyy:

—Põn camiixy metsc mөөd, ween tu'ug nã'ä mo'oy põn quiamiixy ca'a hijp. Jaanä jaduhnduhmbä, põn jөө'xypocy mөөd, ween mio'oy põn mähdiöjc ca'a mөөd —nomä Juan miänaañ.

¹² Nãje'e ja'a yajnahjuudiutpähajxy miejtspä näbejpä. Mänitä Juan hajxy nãmaayy:

—Wiindsõn, hõjtsäts, neby hõjts jaduhndúnät.

¹³ Mänitä Juan yhadsooyy:

—Cab hajxy nã'ä tãgø'øbä myagjuuñáxät.

¹⁴ Jaanä jaduhnä policiahajxy nãje'e yajtøøbä. Mänitä Juan yhadsooyy:

—Cabä xädø'õn põn mbõjcät nã'ä nagoobä. Y caj põn mnähwaambédät nã'ä nagoobä. Mjootcädá'agáp ja'a mmájuhndy hajxy.

¹⁵ Ja'a tsaangu'ughajxy, jaduhñ hajxy hãnajty wyi'i yajtøy wyi'i yajtø'xy pø Cristo je'e ja'a Juan. Paady hajxy hãnajty wyi'i yajtøy, coo ja'a Cristo hajxy hãnajty yhahixy.

¹⁶ Mänitä Juan yhadsooyy:

—Nøøháamhøch mijts chaa nyajnäbety. Pero xiichä jäya'ay tu'ug xjiaac pamiñ. Je'eds mijts mãbocy xmio'owaamb ja'a Dioshespíritu. Xyajnhwa'ads xyajcuhwa'adsaamb hajxy jaduhñ. Maas møc cuhdujt jaaya'ay miøødä quejeech høøch. Cábøchä cuhdujt nnä'ägä møødä ni weeñtiä maa jaaya'aguixpän. ¹⁷ Põn ja'a haxøøgwijnmahñdy jaduhñ ca'a najtshixø'owaamb, haxøøgtuum piäda'aga'añii. Cøjxta'axiøø jiiby chaächpøga'añ. Pero põnä homiädia'agy pawädijp, cøjxta'axiøø hajxy jim yhida'añ tsajpootyp.

¹⁸ Madiu'u ja'a Juan ja'a cu'ug hãnajty yajwiinxiic yajwiingapxø'øy ja'a Diosmädia'agy. Møc hãnajty jiaanç tehñ miädia'agy. ¹⁹ Mänitä Juan ja'a Herodes hoy yhojy, ja'a hãnajty tuumbä gobernador. Paadiä Herodes yhojjä coo yhamdsoo puhya'ay ja'a tio'oxiöjc hãnajty miøødtsänaayyä. Felipe ja'a piuhya'ay hãnajty xiøhaty. Jiinä hãnajty jiugyhatyñä. Herodías ja'a Felipe tio'oxiöjc hãnajty xiøhaty. Madiu'u ja'a Herodes hãnajty jiatcø'øy haxøøg. ²⁰ Coo ja'a Herodes jaduhñ yhojjä, mänitä Herodes ja'a Juan yajtsuumä. Hix, haxøøgwijnmahñdy ja'a Herodes hãnajty miøød.

²¹ Coo ja'a Juan hãnajty quia'a tsumyiinä, jimä cu'ug hãnajty yajnäbety. Mänitä Jesús miejch näbejpä. Juan hãnajty je'e yajnäbetaamb. Jimä Jesús hãnajty Dyiospa'ya'axy, mänitä tsajpootyp yhawaach. ²² Mänitä Dioshespíritu ja'a Jesús nãgädaacy nebiä paloman. Mänit hoy yhãnaaxiøpy ja'a Jesús ja'a quiuhduum. Mänitä Dios jim quiapxy tsajpootyp:

—NHuunghájpiøch miich. Njaanç tehñ chójpiøch miich. Jootcujc-høch jaduhñ nniijiäwø'øyii maa miichcøxpän.

²³ Hii'xmajcjomøjt ja'a Jesús hãnajty miøødä mänaabä tiägø'øyän yajnahixøøbiä. Ja'a cu'ug jaduhñ mänaañ cooc tyijy ja'a Jesús ja'a José hãnajty tieedyhaty. Ja'a José yhap tieedyhajxy, jaduhnä xiøøhajxy ñibianøcxä: Elí ja'a José tieedy xiøhajty. ²⁴ Ja'a Elí tieedy, Matat je'e xiøhajty. Ja'a Matat tieedy, Leví je'e xiøhajty. Ja'a Leví tieedy, Melqui je'e xiøhajty. Ja'a Melqui tieedy, Jana je'e xiøhajty. Ja'a Jana tieedy, José je'e xiøhajty. ²⁵ Ja'a José tieedy, Matatías je'e xiøhajty. Ja'a Matatías tieedy, Amós je'e xiøhajty. Ja'a Amós tieedy, Nahúm je'e xiøhajty. Ja'a Nahúm tieedy, Esli je'e xiøhajty. Ja'a Esli tieedy, Nagai je'e xiøhajty. ²⁶ Ja'a Nagai tieedy, Maat je'e xiøhajty. Ja'a Maat tieedy, Matatías je'e xiøhajty. Ja'a Matatías tieedy, Semei je'e xiøhajty. Ja'a Semei tieedy, Josec je'e xiøhajty. Ja'a Josec tieedy, Judá je'e xiøhajty. ²⁷ Ja'a Judá tieedy, Joanán je'e xiøhajty. Ja'a Joanán tieedy, Resa je'e xiøhajty. Ja'a Resa tieedy, Zorobabel je'e xiøhajty. Ja'a Zorobabel tieedy, Salatiel je'e xiøhajty. Ja'a Salatiel tieedy, Neri je'e xiøhajty. ²⁸ Ja'a Neri tieedy, Melqui je'e xiøhajty. Ja'a Melqui tieedy, Adi je'e xiøhajty. Ja'a Adi tieedy, Cosam je'e xiøhajty. Ja'a Cosam tieedy, Elmodam je'e xiøhajty. Ja'a Elmodam tieedy, Er je'e xiøhajty. ²⁹ Ja'a Er tieedy, Josué je'e xiøhajty. Ja'a Josué tieedy, Eliezer je'e xiøhajty. Ja'a Eliezer tieedy, Jorim je'e xiøhajty. Ja'a Jorim tieedy, Matat je'e xiøhajty. ³⁰ Ja'a Matat tieedy, Leví je'e xiøhajty. Ja'a Leví tieedy, Simeón je'e xiøhajty. Ja'a Simeón tieedy, Judá je'e xiøhajty. Ja'a Judá tieedy, José je'e xiøhajty. Ja'a José tieedy, Jonam je'e xiøhajty. Ja'a Jonam tieedy, Eliaquim je'e xiøhajty. ³¹ Ja'a Eliaquim tieedy, Melea je'e xiøhajty. Ja'a Melea

tieedy, Mena je'e xiøhajty. Ja'a Mena tieedy, Matata je'e xiøhajty. Ja'a Matata tieedy, Natán je'e xiøhajty. ³² Ja'a Natán tieedy, David je'e xiøhajty. Ja'a David tieedy, Isaí je'e xiøhajty. Ja'a Isaí tieedy, Obed je'e xiøhajty. Ja'a Obed tieedy, Booz je'e xiøhajty. Ja'a Booz tieedy, Sala je'e xiøhajty. Ja'a Sala tieedy, Naasón je'e xiøhajty. ³³ Ja'a Naasón tieedy, Aminadab je'e xiøhajty. Ja'a Aminadab tieedy, Admin je'e xiøhajty. Ja'a Admin tieedy, Esrom je'e xiøhajty. Ja'a Esrom tieedy, Fares je'e xiøhajty. Ja'a Fares tieedy, Judá je'e xiøhajty. ³⁴ Ja'a Judá tieedy, Jacob je'e xiøhajty. Ja'a Jacob tieedy, Isaac je'e xiøhajty. Ja'a Isaac tieedy, Abraham je'e xiøhajty. Ja'a Abra'am tieedy, Taré je'e xiøhajty. Ja'a Taré tieedy, Nacor je'e xiøhajty. ³⁵ Ja'a Nacor tieedy, Serug je'e xiøhajty. Ja'a Serug tieedy, Ragau je'e xiøhajty. Ja'a Ragau tieedy, Peleg je'e xiøhajty. Ja'a Peleg tieedy, Heber je'e xiøhajty. Ja'a Heber tieedy, Sala je'e xiøhajty. ³⁶ Ja'a Sala tieedy, Cainán je'e xiøhajty. Ja'a Cainán tieedy, Arfaxad je'e xiøhajty. Ja'a Arfaxad tieedy, Sem je'e xiøhajty. Ja'a Sem tieedy, Noé je'e xiøhajty. Ja'a Noé tieedy, Lamec je'e xiøhajty. ³⁷ Ja'a Lamec tieedy, Matusalén je'e xiøhajty. Ja'a Matusalén tieedy, Enoc je'e xiøhajty. Ja'a Enoc tieedy, Jared je'e xiøhajty. Ja'a Jared tieedy, Mahalaleel je'e xiøhajty. Ja'a Mahalaleel tieedy, Cainán je'e xiøhajty. ³⁸ Ja'a Cainán tieedy, Enós je'e xiøhajty. Ja'a Enós tieedy, Set je'e xiøhajty. Ja'a Set tieedy, Adán je'e xiøhajty. Ja'a Adán, Dios jaduhñ cunuu'x pädaac.

4

¹ Jimä Jesús hñajty maa ja'a Jordánmøjnøjñ. Miøødä Jesús ja'a Dioshespíritu hñajty. Mänitä Jesús wioonøcxä hanidiuhmduum ja'a Dioshespíritu. ²⁻³ Jim jaduhñ yhiyty juxychägui'xxøø. Hayuu hñajty ñä'ägä hity. Jimä Jesús hñajty jia jøjcapxø'owa'añii ja'a møjcu'ugóngäm coog tyijy cu tiu'udägooyy. Mänitä Jesús yuu piaatä. Mänitä Jesús ñämaayy ja'a møjcu'ugóngäm:

—Pø tøy miich ja'a Dios xyHuunghaty, yajwa'añguioj yø'ø tsaä nebiä tsajcaaguiän —ja jøjcapxø'owaanä ja'a Jesús jaduhñ, paady jaduhñ ñämaayyä.

⁴ Mänitä Jesús yhadsooyy:

—Jaduhñä Diosmädia'agy miäna'añ: “Ca'a quiaaguiä ja'a jäya'ayhajxy miäjyghädät hädaa yaabä naaxwiin; møødä Diosmädia'agy hajxy miäjyghädät.”

⁵ Mänitä møjcu'ugong ja'a Jesús wioonøcxä maa ja'a tun jaançh tehñ quiøxpän. Mänitä Jesús tu'habaquiä yajnäheebøyyä ja'a naax ja'a cajpt cøxiä hädaa yaabä naaxwiin. ⁶⁻⁷ Mänitä Jesús ñämaayyä:

—Høøch nje'e yø'øduhñ cøxiä mäduhñtiä jii quiähxø'øgy. Yajxon yø'ø cajpt jaduhñ. Møj jaançh ja'a jäya'ayhajxy, ja'a hajxy xiiby tsänaabiä. Høøch jaduhñ cøxiä tøø xquiøxy cø'ødägø'øgy. Nmøødhøch ja'a cuhdujt jaduhñ cooch hopiønä nyajcø'ødägø'øwät. Y cooch miich jaduhñ xwyiingudsähgø'øwät, mänitøch miich ngøxy mó'owät.

⁸ Mänitä Jesús yhadsooyy:

—Jaduhñä Diosmädia'agy miäna'añ: “Mwiingudsähgø'øwäp ja'a Dios; je'eduhñ mWiindsønähädäp. Cab jaduhñ wiingpä mwiindsønähädät.”

⁹ Mänitä møjcu'ugong ja'a Jesús wioonøcxä jim Jerusalén-cajptooty. Mänit miøødwimbejty møjtsajtøjcuhdum. Mänitä møjcu'ugong miänaañ:

—Pø tøy miich ja'a Dios xyHuunghaty, cuhdøpxnax jiiiby naaxwiin. ¹⁰ Caj miich nej mjädät. Jaduhñ jiiiby myiñ maa ja'a Diosmädia'aguiän:

Dios hane'emaamb ja'a mioonsähajxy tsajpootypä coo miich xcwieendähädät.

¹¹ Xchehñhidaamb miich hajxy jaduhñ nej miich tsaajooty jaduhñ mga'a cuhnébät.

¹² Mänitä Jesús yhadsooyy:

—Jaduhñä Diosmädia'agy miänaambä: “Cabä Dios mjøjcapxø'øwät, ja'a mWiindsønähajpiä.”

¹³ Coo ja'a møjcu'ugong miädia'agy hñajty quia'a jøjtägø'owäänäxä, mänit ñähgueecnä. ¹⁴ Mänitä Jesús yhädaactägajch Galileanaaxooty. Diosmäjaa hñajty miøød. Mänitä mädia'agy wiädijty ja'a Jesuscøxpä wiinduhmyhagajpt. ¹⁵ Cajpt-cajpt

ja'a Jesús hänajty wiädity yajnáhixøøbiä tsajtøgooty. Mänitä Jesús quiumaayyá ja'a jäya'ayhajxy nägøxiä.

¹⁶ Mänitä Jesús miehch Nazaret maa hänajty tøø miuutsc-hatiän. Coo ja'a poo'xxiøø yhabaaty, mänit tiägøøyy tsajtøgooty. Jaduhñ hänajty ñä'ägä cuhdujthaty ja'a poo'xxiøøjooty. Mänit ñämaayyá coo ja'a Diosmädia'agy quiápxät. Coo tiänaayyø'cy majiäya'awyinduun, ¹⁷ mänitä libro miooyyá, ja'a Isaías hänajty jegyhajty tøø jiáayäbä, ja'a Diosquexypä. Mänitä libro quiejtøøyy. Mänit tiägøøyy capxpä:

¹⁸ Ja'a Dioshespíritøch nmøød.

Je'eçh tøø xpiäda'agy coočhä häyoobäya'ayhajxy nhawáanät coo hajxy yaghoyø'øwa'añii.

Jadúhñhöch tøø xwyiinguexy coočhä jäya'ayhajxy nhawáanät nebiä piojpä quiädieey hajxy ñähwa'ads quiuhwá'adsät,

nebiä Diosmädia'agy hajxy pedyii quiudiúnät.

¹⁹ Tøø jaduhñ yhabaady coo ja'a Dios ja'a mayhajt jaduhñ tiuna'añ mõj may.

²⁰ Mänitä Jesús ja'a libro yhabädjnä. Mänitä tsajtøjyohbiä jaduhñ miooyyá. Mänitä Jesús yhänaaguiädaacy. Wyi'i wyiinhee'ppejpy ja'a cu'ug ja'a Jesús hajxy hänajty.

²¹ Mänitä Jesús miänaañ:

—Tøø ja'a Diosmädia'agy tiøjiaty nébiøch tøø ngapxiän.

²² Mänitä cu'ughajxy yagiuøøyy coo ja'a Jesús hänajty hoy tøø quiapxy. Hoy ja'a Jesús hajxy hänajty ñänømy:

—Maa yø'ø capxy yø'ø mädia'aguiäda'a tøø yhuug habøjpä. Haa ca'a, ja'a José yhuung yø'øduhñ, cabä —nømñ hajxy hänajty miäna'añ.

²³ Mänitä Jesús miänaañ:

—Jadúhñhöch mijtsäda'a xñäma'awa'añ: “Huuc yajcähxø'øg ja'a hijxtahñd yaa maa ja'a mhamdsoo cajptän nej miich jim tøø mhuuc yajcähxø'pän jim Capernaum.”

²⁴ Mänitä Jesús jiaac mänaañ:

—Pero høøch jaduhñ mänaamb, ja'a Diosquexypähajxy, cabä miädia'agyhajxy miäbøgáanäxä maa yhamdsoo cajpthajxiän. Tehm tiøyhajt jaduhñ. ²⁵⁻²⁶ Coo ja'a Elías hänajty jegyhajty wiädity Diosmädia'agy-yajwa'xpä yaa Israelpä-naaxooty, tægøøgjomøjtä cupc caj ñä'ägädä tuuyy. Chaadsä yuuxøø jiaançh tehñ jiajtä. Mänitä Dios ja'a Elías quiejxy maa ja'a cajpt hänajty xiøhatiän Sarepta, jim Sidón mäwiingón. Jimä Elías ja'a yaamgto'oxy hoy tu'ug piuhbety. Pero ja'a yaamgto'oxyhajxy yaabä, cab hajxy yajnäguejxä, hoy hajxy hänajty jia nämayyá. ²⁷ Jaanä jaduhñduhmbä, jii haxøøgpa'ammøødpähajxy hänajty nämay yaa Israelpä-naaxooty mänaa ja'a Eliseo hänajty yaa wiäditiän Diosmädia'agy-yajwa'xpä. Pero cabä pia'amhajxy jaduhñ yajnaxx yajmáayyaxä. Jagooyyá Naamán pia'am nidiuhñ ñajxy miaayy, y jäguem hänajty chäna'ay jim Sirianaaxooty, ca'a yaajä.

²⁸ Coo ja'a jäya'ayhajxy jaduhñ miädooyy nebiä Jesús miänaañän, ja'a hajxy hänajty jiiby tsajtøgootypä, cøjx hajxy jiootma'ady. ²⁹ Mänitä Jesús hajxy ñädänaayyø'cy. Mänitä Jesús hajxy jim yajnøcxy tunguhduun jim cajtpa'a. Jimä Jesús hajxy hänajty quiuhjujpnaxa'añ. ³⁰ Pero cabä Jesús hajxy nej ñä'ä tuuñ. Jahuhyä je'e yajyohñajxy majiäya'ayhagujc. Mänit jim wyiimbijnä.

³¹ Mänitä Jesús ñøcxy Capernaum, jim Galileanaaxooty. Coo ja'a poo'xxiøø yhabaaty, mänitä Jesús ja'a cu'ug tiägøøyy yajnáhixøøbiä tsajtøgooty. ³² Jaduhñä Jesús hänajty yajnáhixø'øy nebiä capxta'agypiän, paadia cu'ughajxy hänajty yagiuø'øy.

³³ Jiibiä jäya'ay hänajty tu'ug ja'a mõjcu'uba'ammøødpä. Mänit mõc yaaxy:

³⁴ —Ween højts nhity. Tii jaduhñ mhøxtaaby maa højtsän. Nej, xyajcuhdägoyyaamb højtsä. Nhíxyhöch miich. Jesús mxøhaty. Nazaret mdsooñ. Nnajuøøbiøch jaduhñ coo miichä Dios xyHuunghaty.

³⁵ Mänitä Jesús ja'a mõjcu'u yhojy:

—Hamón, jua'ads jim maa yø'ø craajän.

Mänitä mähdiøjc quiädaayy naaxwiin maa ja'a jäya'ay wyiinduuhajxiän. Mänitä møjcu'u piädsømy. Cabä mähdiøjc nej jiajnä. ³⁶ Mänitä jäya'ayhajxy nägøxiä chähgøyy. Mänit hajxy ñiñämaayyä:

—Høxtahm̄ds jaduhñ quiapxy miädia'agy. Cuhdujtmøødäda'a yø'øduhñ maa ja'a møjcu'uhajxiän. Jaançh pädsømb hajxy jaduhñ coo hajxy ñäma'ayii coo hajxy piädsømt.

³⁷ Mänitä mädia'agy tiägøyy wädijpä ja'a Jesúscøxpä jim wiinduhmyhagajpt.

³⁸ Mänitä Jesús piädsømy tsajtøgooty. Mänit ñøcxy maa ja'a Simón tiøjc-hajxiän. Jiibiä Simón miø'ødhoc hänajty pia'amgo'na'ay tomiøød. Mänitä Jesús hajxy miänuu'x-taacy coo ja'a toy ween yajtøjtsäxä. ³⁹ Mänitä Jesús ja'a pa'amjäya'ay wyiinguwoodsøyy. Mänit miänaañ coo ja'a toy ween ñähwa'açhii. Mänitiä ja'a toy jiaançh tøjtsnä. Mänitä pa'amjäya'ay piädø'cy. Mänit tiägøyy mayhajt-tuumbä maa ja'a Jesúshajxiän.

⁴⁰ Coo chuujøyy, mänitä pa'amjäya'ayhajxy may wiomejtsä maa ja'a Jesúsän. Madiu'u ja'a pa'am hajxy hänajty miøødä. Mänitä Jesús nägøxiä quiø'nähgajpy tu'ugjaty-tu'ugjaty. Jaduhñä pia'amhajxy ñähwaats quiuhwaatsä. ⁴¹ Nämäy hajxy hänajty møjcu'uba'ammøødä. Coo ja'a møjcu'uhajxy piädsømy, mänit hajxy yhayaaxy:

—Dios miich xyHuunghajp.

Mänitä Jesús ja'a møjcu'u yhojy. Cab hajxy ñä'ägä yajcapxä. Hiç, ñajuøby hajxy hänajty coo ja'a Jesús jie'ejä ja'a Cristo, ja'a Dios tøø quiéxiäbä.

⁴² Coo jiojøyy, mänitä Jesús ñøcxy cajtpa'a hanidiuhmduum. Jimä cu'ug ja'a Jesús hajxy hänajty yhøxta'ay. Coo hajxy piaaty, mänit hajxy jia yajmähmø'owaañ. ⁴³ Mänitä Jesús miänaañ:

—Páadyhöch ja'a Dios yaa tøø xquiexy hädaa yaabä naaxwiin cooçh wiinduhmyhagajpt nwädítät, cooçh nyajwiingapxø'owät coo ja'a Dios ja'a miäjaa yajcähxø'ogaannä. Paady, cábøch yaa nmähmø'owa'añ.

⁴⁴ Jaduhñä Jesús hänajty wiädity yajñähixøøbiä jim Galileanaaxooty. Wiinduhmyçhajtøjc hänajty wiädity.

5

¹ Mänitä Jesús hänajty jim tiäna'ay Genesaretmejypia'a. Mänitä jäya'ayhajxy may miejch Diosmädia'agymiädoobä. Nø'øchpän ja'a jäya'ayhajxy hänajty tiäna'ay maa ja'a Jesúsän. Cabä hawa'adspä hänajty maa. ² Mänitä Jesús barco yhiixy metsc jim mejypia'a. Yajwa'adsä barco hänajty. Jimä cubarcohajxy hänajty quiuhjuijtsaabiujy mäwiingón. ³ Mänitä Jesús ja'a barco tu'ug yajpejty ja'a Simón jie'e. Mänitä Jesús ja'a Simón ñämaayy coo barco weenä yajmäwiingónät wiinduum. Jimä Simón ja'a Zebedeo yhuunghajxy hänajty miøødä nämetscä. Jacobo hänajty tu'ug xiøhaty. Tu'ug hänajty xiøhajpä Juan. Mänitä Jesús yhäñaaguiädaacy barcojooty. Mänitä cu'ughajxy tiägøyyä yajwiingapxøyyäbä. ⁴ Coo ja'a Jesús jaduhñ quiapxpäðøyy, mänitä Simón ñämaayyä:

—Yajmøjyo'oy ja'a mbarco ja ween comduum. Jiibiä mguhjuijtsaay hajxy mbädá'agät.

⁵ Mänitä Simón yhadsooyy:

—Wiindsón, tu'tsuhm højts tøø nja cuhjuipy. Cab højts tii tøø nnä'ägädä mach. Pero cooçh miich jaduhñ tøø xñäma'ay, nõcxyhöch nhuuc jaac juipy.

⁶ Coo hajxy jaduhñ jiaançh cudiuuñ, mänitä hacx hajxy may miajch, høxtä tsømgøø'tsä ja'a cuhjuijtsaay jaduhñ. ⁷ Mänitä miägu'ughajpä hajxy møjjeemy, ja'a hajxy hänajty wiingbarcojootypä, coo hajxy min piuhbodyii. Mänitä barco hajxy metsc yaghujch. Ja weenjaty hajxy quia'a mäguiñä. ⁸⁻¹⁰ Mänit hajxy yagjuøyy coo hacx hajxy may miajch. Mänit hajxy ñajuøyy coo ja'a Jesús ja'a hijxtahñ jaduhñ yajcähxø'cy hoy-yagjuøñä. Mänitä Simón Pedro ja'a Jesús wyiinjjcädaacy. Mänit miänaañ:

—Wiindsón, cábøch miich hawiinmats xmiøødhídät. Cábøch hoguiuhdujt nmøødä.

Mänitä Jesús ja'a Simón ñämaayy:

—Ca'a mdsähgø'øy. Wiingtuung mbanøcxáannäp. Myajwiingapxø'øwaambiä cu'ug ja'a Diosmädia'agy.

¹¹ Mänitä barco hajxy yajmøjyohbiejty mejypia'a. Mänitä Jesús hajxy piadu'ubøjcy. Nāhgueecy hajxy jaduħñ cøxiä.

¹² Mänitä Jesús wiingcajpt miejch. Jimä jäya'ay hänajty tu'ug haxøøgpu'udsmøød. Coö ja'a Jesús yhijsä, mänit wyiinijcädaacä. Mänit nāmaayyä:

—Wiindsøn, miičh nnāmaaby, høøch nbu'uds yajtsóocäc.

¹³ Mänitä Jesús ja'a mähdiøjc nāhdooñ. Mänitä Jesús miānaañ:

—Tøø jaduħñ mdso'ogy.

Tuunä ja'a Jesús jaduħñ nā'ä mänaañ, mäniä ja'a mähdiøjc choocy. ¹⁴ Mänitä Jesús miānaañ:

—Caj pøñ mhawáanät coö tøø mdso'ogy. Nøcx tu'uda'aquíä maa ja'a teediän. Jimä xädø'øñ mguyoxø'øwät nebiä Moisés jecy yhanehmiän. Paadiä xädø'øñ mguyoxø'øwät, jaduħnä hijxtahnd myajcähxø'øgät coö tøø mdso'ogy.

¹⁵ Mänitä mädia'agy hajxy yajwädipty jäguembaady cooc ja'a Jesús ja'a hijxtahnd tøø yajcähxø'øgy. Mänitä jäya'ayhajxy maas may jiaac hamugøøyy maa ja'a Jesúsän. Ja'a Jesús miädia'agy hajxy hänajty yhamädoowhidáanäp. Møødä pia'amhajxy hänajty yajnaxáanäxä. ¹⁶ Coö ja'a jäya'ayhajxy hänajty wyi'i yhamugø'øyy maa ja'a Jesúsän, paadiä Jesús haniduihmduum nøcxy Diospa'yaaxpä.

¹⁷ Wiinghoocä Jesús ja'a cu'ug hänajty yajwiingapxø'øyy. Jaančh tehñ yhujs ja'a tøjc hänajty. Jiibiä fariseoshajxy hänajty yhäña'ay møødä ley-yajnahixøøbiähajxy. Wiinduhmyhagajpt hajxy hänajty choon Galileanaaxooty møødä Judeanaaxooty møødä Jerusalén. Miøødä Jesús ja'a Diosmäjaa hänajty nebiä pa'am jaduħñ yajnaxät.

¹⁸ Mänitä cø'ømucypiä tecymiucypiä tu'ug quiøømiejtsä tsaajiooty. Jiiby hajxy jia yajtøjtägø'øwaañ maa ja'a Jesús hänajty miädia'aguiän. ¹⁹ Pero jaančh tehñ yhujs ja'a tægø'øwøødiaact hänajty. Mänit hajxy nāmaayyä coö hajxy jim yaghawa'adsa'añ tøjnähgøxp. Mänit pa'amjäya'ay hajxy quiuhdøøñajxy tøjcuħduum maa ja'a Jesús hänajty pia'täna'ayän. ²⁰ Coö ja'a Jesús nājuøøyy coö ja'a miädia'agy hänajty miäbøgáanäxä, mäniä cø'ømucypiä tecymiucypiä nāmaayyä:

—Mägu'ughajpä, miičh nnāmaaby coö ja'a mbojpä mgädieey tøø xñähwa'ačh tøø xquiuhwa'ačh.

²¹ Mänitä fariseoshajxy quiopcooty tiägøøyy mädiaactaactä møødä ley-yajnahixøøbiä: “Tii yø'ø craa jaduħñ coö miäna'añ. Capxtägooby yø'øduħñ. Jagooyyä Dios ja'a cuħdujt jaduħñ miøødä coö ja'a pojpä cädieey miée'xät.”

²² Mänitä Jesús nājuøøyy nebiaty hajxy hänajty miädiaacta'agy quiopcooty. Mänit miānaañ:

—Tii hajxy jaduħñ coö mmädiaacta'agy mgopcooty. ²³ Nej, maas páquiøch yø'ø mähdiøjc nnämä'awädä: “Tøøch miičh mbojpä mgädieey nmämee'xy”, tøgä maas páquiøch jaduħñ nnämä'awädä “Tänaayyø'øg, yo'oyø'øg.” ²⁴ Mhuug híxäp hajxy nébiøch hädaa mähdiøjc nyajmøcpøga'añ. Jaduħñ hajxy mnajuø'øwät coöchä cuħdujt jaduħñ nmøødä hädaa yaabä naaxwiin coöchä pojpä cädieey jaduħñ nmée'xät, høøch ja'a Diosquexypä.

Mänitä mähdiøjc nāmaayyä:

—Tänaayyø'øg; widsø'øg yø'ø mdsaa; nøcxnä maa ja'a mdøjcän.

²⁵ Mäniä ja'a mähdiøjc jaduħñ tiänaayyø'ocy maa ja'a wyiinduumhajxiän. Mänitä tsaay wyidsø'ocy maa hänajty tøø quio'na'ayän. Mänit nøcxnä maa ja'a tiøjcän. Mänitä Dios Dioscujú'uyäp miooyy. ²⁶ Mänit hajxy nägøxiä jiaančh tehñ yagjuøøyy. Jaančh tehñ chähgøøyy hajxy jaduħñ. Mänitä Dios Dioscujú'uyäp hajxy miooyy. Mänit hajxy miānaañ:

—Tøødsä hoy-yagjuøøñäbä hajxy nhíxäm jäda'a.

²⁷ Mänitá Jesús wyiimbijnä. Mänitá jäya'ay tu'ug yhjxy, ja'a Levíhajpä. Jimä Leví hänajty yhäñ'a'ay maa hajxy hänajty yajñähuudi'udiän. Je'e ja'a Leví hänajty tiuunghajpy. Mänitá Jesús ja'a Leví ñämaayy:

—Høøch pamíñác.

²⁸ Mänitá Leví tiänaayyø'cy, pianøcxy ja'a Jesús. Cøjx jaduhñ ñähgue'egy mäduhñtiä hänajty miøødä.

²⁹ Mänitá Leví ja'a xøø yagjajtä maa ja'a tiøjcän ja'a Jesúscøxpä. Jiibiä yajñähuudiutpähajxy hänajty nämay miägaabiä møødä wiinghänä'c-hajxy. ³⁰ Jiibiä fariseoshajxy hänajty miägaabiä møødä ley-yajñähixøøbiähajxy. Mänitá Jesús jiamiøødhajxy ñämaayy ja'a fariseoshajxy:

—Tii yø'ø yajñähuudiutpä hajxy coo mmøødcay coo mmøødhu'ugy. Haa ca'a, jue'e yø'ø hajxy, pojpäya'ay cädieejäya'ayhajxy jaduhñ.

³¹ Mänitá Jesús yhadsooyy:

—Pøñ møc, cab hajxy yajtsooyø'øy. Pøñ pa'ammøød, je'eds hajxy yajtsooyøøby.

³² Jaduhñ mäwíñäts høøch ja'a pojpäya'ay cädieejäya'ay nyajñähwa'aäch nyajcuhwa'aäch. Pero mijts jaduhñ mänaamb cooc tyijy pojpä cädieey hajxy mga'a møødä. Páadyhøch mijts waamb nga'a nämä'ay.

³³ Mänitá Jesús hajxy ñämaayy:

—Ja'a Juan jiamiøødhajxy, naxy hajxy yhity hayuu; naxiä Dios hajxy pia'ya'axy. Jaduhñä fariseos jiamiøødhajxy naxy quiudiuumbä. Pero miičh mjamiøødhajxy, nä'ä caaby nä'ä huucp hajxy je'e. Cab hajxy yhity hayuu. Cab jaduhñ yhooyä.

³⁴ Mänitá Jesús miänaañ:

—Coo ja'a pøc hu'ug maa jiadyii, cabä woybä wichpähajxy hayuu wyiimbity. Jaduhñ mäwíñäts høøch nebiä jamiø'ødän ja'a pøgaambä. Páadyhøch njamiøødhajxy hayuu quia'a hity. ³⁵ Habaadäänäp jaduhñ cooch yaa ndsoonaannä. Mänitøch njamiøødhajxy yhida'añ hayuu mäbøcypä.

³⁶ Mänitá Jesús jadähooc wyiingapxøøguiumbä:

—Cabä tucwit pøñ yhagø'øy jemýwyithaam. Cøødsäp ja'a jemýwyit jaduhñ; cab jaduhñ ñibiaada'añii møødä tucwit. ³⁷ Jaanä jaduhñduhmbä, cabä jemývyino pøñ quiudemø'øy ja'a tucwajhacxujiooty. Cøødsäp ja'a tucwajhacxuy jaduhñ; høxyógäp ja'a vino jaduhñ. Haagä tägóyyäp ja'a tucwajhacxuy jaduhñ møødä vino. ³⁸ Pero jiibiä jemývyino hajxy quiudemø'øy ja'a jemýwajhacxujiooty. Cab jaduhñ tii mia'ady, ni ja'a jemývyino, ni ja'a jemýwajhacxuy. ³⁹ Cabä jemývyino pøñ hoyhuucnä jäwø'øy coo ja'a vino hänajty tøø yhu'ugy ja'a tehñ jiecypä. “Maas hoyhuucnä ja'a jecyvyino” —nømä jäya'ayhajxy miäna'añ.

6

¹ Mänitxøø ja'a Jesúshajxy hänajty wiädity trigoni'ibyquiuyc. Poo'xxiøøjooty hänajty je'e. Mänitá jiamiøød ja'a trigo hajxy tiøjy. Mänit hajxy ñähxajtstuuty. Mänit hajxy jiøø'xy. ² Mänitá fariseoshajxy näje'e miänaañ:

—Cabä cuhdujt jaduhñ myiñ coo hajxy jaduhñ mdúnät ja'a poo'xxiøøjooty.

³ Mänitá Jesús miänaañ:

—Nej, cahnä ja'a Diosmädia'agy hajxy mgapxiä nebiä David tiuun coo hänajty yäho'ogyii møødä jiamiøødhajxy. ⁴ Mänit hajxy jiiby tiägøøyy tsajtøgooty. Mänitá tsajcaagy hajxy quiaayy ja'a teedyhajxy hänajty tøø quiuyoxø'øyábä. Cabä David ja'a cuhdujt hajxy hänajty miøødä coo hajxy jaduhñ quiáyät. Jagooyä teedy ja'a cuhdujt hajxy hänajty miøødä coo hajxy quiáyät. ⁵ Høøch ja'a Diosquexypä, jadúhñhøch høøchpä, nmøødhøch ja'a cuhdujt jaduhñbä høxtä maa ja'a poo'xxiøøbaadiän —nømä Jesús miänaañ.

⁶ Jatu'ugpä poo'xxiøøjootypä ja'a Jesús tiägøøyy tsajtøgooty. Mänit tiägøøyy yajwiingapxøøbiä. Jiibiä mähdijc hänajty tu'ug hadu'ugcø'ødø'øds ja'a yahooyhaampiä. ⁷ Jiibiä fariseoshajxy hänajty tiäna'ay møødä ley-yajñähixøøbiähajxy. Jiibiä Jesús hajxy hänajty wyi'i yheebý. Yhjxmajchp ja'a Jesús hajxy hänajty pø yajnaxaambiä pa'am ja'a

poo'xxiøjooty. Yhøxtaabiä fariseos ja'a wiinmahñdy hajxy hänajty nebiä Jesús hajxy yajtsumóøjät coo ja'a pa'amjäya'ay hänajty yajmøcpøgyii ja'a poo'xxiøjooty. ⁸ Ja'a Jesús, ñajuøøby hänajty je'e nebiä fariseoshajxy hänajty tiajy miay. Mänitä Jesús ja'a mähdiøjc ñämaayy ja'a hadu'ugcø'ødø'ødspä:

—Tänaayyø'øg, miñ huuc täna'aw cujc.

Mänit jiaančh tänaayyø'cy. ⁹ Mänitä Jesús ñämaayy ja'a fariseoshajxy:

—Mijts nmäyajtøøby, nej, yejpiä Dios ja'a cuhdujt jaduhñ coo hajxy hoy ndúunämät ja'a poo'xxiøjootiä, tøgä yejpiä cuhdujt coo hajxy haxøøg ndúunämät ja'a poo'xxiøjootiä. Jaaná jaduhñduhmbä, nej, yejpiä Dios ja'a cuhdujt coo ja'a jäya'ay hajxy nyajnähwáatsämät ja'a poo'xxiøjootiä, tøgä yejpiä cuhdujt coo jäya'ay hajxy nyajcuhdägóoyyämät ja'a poo'xxiøjootiä.

¹⁰ Mänitä Jesús ja'a jäya'ay wyiinhee'ppejty nägøxiä. Mänitä Jesús ja'a mähdiøjc ñämaayy:

—Xajtøw yø'ø mgø'ø.

Mänitä quiø'ø jiaančh xajtøoyy. Mänitä quiø'ø hoy jiajnä. ¹¹ Mänitä fariseoshajxy jiootma'ty hoyhoy. Mänit hajxy quiojyquiapxyhajty nebiä Jesús hajxy tiuna'añ.

¹² Cujaboomgumaaxc ja'a Jesús ñøcxy tunguhduum. Tu'tsuhmä Tieedy pia'yaaxy.

¹³ Coo jiobøoyy, mänitä jiamiøødhajxy miøjyaaxy. Mänitä nämajmetspähajxy wyiimbi-iwä coo ja'a Diosmädia'agy hajxy yajwá'xät. ¹⁴ Jaduhñdsä nämajmetspähajxy hänajty xiøhaty: Simón, ja'a Jesús hänajty tøø yajxøbëtiäbä Pedro, møødä piuhya'ay Andrés, møødä Jacobo, møødä Juan, møødä Felipe, møødä Bartolomé, ¹⁵ møødä Mateo, møødä Tomás, møødä Jacobo, ja'a Alfeo yhuung, møødä Simón ja'a celote, ¹⁶ møødä Judas, ja'a Jacobo yhuung, møødä Judas Iscariote; je'e ja'a Jesús hänajty yajcø'ødägø'øwaamb ho'cøøc maa ja'a fariseoshajxiän.

¹⁷ Mänitä Jesús hajxy miänajnä tunguhduum. Mänit hajxy hoy ñaaxoguiädaacnä. Jimä Jesús jiamiøødhajxy hänajty nämay. Jimä jäya'ayhajxy hänajty may tøø miech. Ja'a Jesús miädia'agy hajxy hänajty yhamädoowhidáanäp. Yajnaxáanäxäp ja'a pia'amhajxy hänajty. Jäguembaady hajxy hänajty tøø choon Judeanaaxooty, møødä Jerusalén, møødä mejypia'a jim Tiro møødä jim Sidón. ¹⁸ Ja'a jäya'ayhajxy hänajty møjcu'uba'ammøødpä, yajnájxäxä ja'a pia'amhajxy je'ebä. ¹⁹ Nägøxiä ja'a Jesús hajxy hänajty ñähdona'añ. Mänitä pia'amhajxy yajnájxäxä ja'a Jesús miäjaahaam.

²⁰ Mänitä Jesús wyiinhee'ppejty ja'a jiamiøødhajxy. Mänit miänaañ:

—Jootcujc mijts mhity, mijts häyoobädøjc. Paady hajxy jootcujc mhity coo hajxy jim mnøcxa'añ maa ja'a Diosän.

²¹ Jootcujc mijts mhity, mijts yajmaajiajpä. Paady hajxy jootcujc mhity coo ja'a Dios hajxy cøxiä wiinä xmio'owa'añ.

Jootcujc mijts mhity, mijts jøøbiä xuu'tspä. Paady hajxy jootcujc mhity coo hajxy mxi'ig mxoonda'aga'añ.

²² Jootcujc mijts mhity, hoy mijts jäya'ay xjia mähanhatty ja'a høøchcøxpä, hoy mijts jäya'ay xquia'a ja tsocy xquia'a ja mee'xy, hoy mijts xjia nänømy, hoy mijts xjia pexy.

²³ Mxi'ig mxoonda'agäp hajxy jaduhñ. Mbaadaambiä hoyhajt ja'a weenhajt hajxy jim tsajpootyp. Jaduhñ hajxy jiajpä yhabejpä, ja'a Diosmädia'agy hajxy jecy tøø yajwá'xiäbä.

²⁴ 'Pero mijts mäyøøjäya'ayhajxy, ja'a tsaächpä hajxy mbaadaamby. Cab hajxy mxoonda'agaannä neby hajxy hijty mxoonda'aguiän.

²⁵ Hoy mijts tii hamaay mga'a ja juø'øy, myajmaajidaamby hajxy jaduhñ.

Hoy mijts mja xi'igy mja xoonäda'agy, pero mnä'ägädä jø'øw mnä'ägädä xuudsaaamb hajxy.

²⁶ Tsipcøxpä tsaächpä hajxy mbaada'añ, hoyyä cu'ug hajxy xjia cumay. Jaduhñä jäya'ayhajxy hijty yajcumay ja'a hajxy hijty jegyhajty nä'ä wädijpä høhñdaacpä. Nä'ä mänaamb hajxy hijty jaduhñ cooc tyijy ja'a Diosmädia'agy hajxy yajwa'xy.

²⁷ 'Huuc mäadow hajxy, mdsógäp hajxy pøn jaduhñ xmiädsiphajp hädaa yaabä naaxwiin; mmée'xäp hajxy pøn jaduhñ xmiähanhajp. ²⁸ Mmänuu'xtá'agäp ja'a Dios

hajxy coo ja'a Dios ween mio'oy ja'a hoyhajt ja'a weenhajt pønjaty mijts jaduñ xyhäyoowhijxp, pønjaty mijts jaduñ haxøøg xñänøømb. ²⁹ Coo pøn xyhatejxó'ogät tu'nax, mmøjcóogumbäp jadu'nax; ween jaduñ jadu'nax xjiaac tehñ yhatejxó'ogy. Coo pøn mjocxwit xpiójcät, mänitá mgamiixy mjaac tehñ mió'owät. ³⁰ Coo pøn tii jaduñ xmiäyujwá'anät, mmó'owäp jaduñ. Y coo pøn tii xpiójcät, cab je'e mmäyujwaandägájt-snät. ³¹ Jaduñds mijts wiinghäna'c mnäxúudsät nej mijts hánajty myajnäxuudsá'añän.

³² 'Coo ja'a mmägu'ughajpähajtiä hajxy mmøødnijootpaadóøjät, cab hajxy tii mbáadät; jaduñdsä pojpäya'ay cädieejäya'ayhajxy ñiçhójcäbä. ³³ Coo hajxy jagooyyá mmøødniñäxuudsóøjät pønjaty jaduñ xñäxuu'tsp, cab hajxy tii mbáadät; jaduñdsä pojpäya'ay cädieejäya'ayhajxy ñiñäxúu'tsäbä. ³⁴ Coo jagooyyá xädø'øñ hajxy myaghanúu'xät pøn jaduñ mnajuøøby xmioodiägatsaamb pedyii, cab hajxy tii mbáadät; jaduñdsä pojpäya'ay cädieejäya'ay xädø'øñ hajxy yajnimiähanúu'xäbä. Ñajuøøby hajxy jaduñ coo hajxy pedyii mioodiägatsa'añii. ³⁵ Mdsógäp hajxy pøn jaduñ xmiädsiphajp. Mnäxúudsäp hajxy jaduñ. Coo pøn xädø'øñ xmiäyujwá'anät, mnä'a mó'owäp jaduñ. Mänitá hoyhajt ja'a weenhajt hajxy mbáadät may. Mänitá Dios hajxy xyhuunghádät jim tsajpootyp. Hix, Dios, ñäxuu'chp ja'a jäya'ayhajxy høxtä ja'a jäya'ayhajxy ja'a Dioscujú'uyäp hajxy quia'a yejpiä, møød ja'a hojioot hajxy ca'a møødpä. ³⁶ Mmøødhádäp ja'a hojioot hajxy jaduñ nebiä nDeedy hojioot miøødhájtäm.

³⁷ 'Cabä wiinghäna'c hajxy mnähójtät coo ja'a Dios hajxy xyajcumädówät. Pero mmämée'xäp hajxy jaduñ; mänitá Dios hajxy jaduñ xmiämée'xpät. ³⁸ Mäduñtiä wiinghäna'c hajxy mmo'oy, nä'a tågø'øbä hajxy mbaattägatsa'añ. ³⁹ Jadúñhøch mijts nyajmäbáadät nebiä wiindspän. Coo ja'a wiindspähajxy ñiwyitswädityii, tsipcøxp hajxy jiuca'ay. Paady mijts jaduñ mga'a wädítät nebiä wiindspän. ⁴⁰ Cabä capx-taacpäna'c-hajxy jiaty jaty nebiä wyiindsøñhajxy jiatian. Coo hajxy nägø'ø nädecypä quiapxtá'agät, mänit hajxy jaduñ ñajtspaadó'owät.

⁴¹⁻⁴² 'Coo ja'a mmägu'ughajpä weentiä quiadiéeyät, y coo miiçh hánajty maas hanaxiä tøø mgädieey, cabä mmägu'ughajpä hawiinmats waamb mnä'ägädä nämá'awät. Coo miiçh hánajty tøø mnähwa'açh, mänitá mmägu'ughajpä hawiinmats mwiingapx mjøj-capxó'owät.

⁴³ 'Mädyii quepychaa pa'ag nä'ägädä tømbejp, ni mänaa ja'a tiøøm quia'a xunä. Jaaná jaduñduhmbä, mädyii quepychaa xun nä'ägädä tømbejp, ni mänaa ja'a tiøøm quia'a pa'agø'oy. Tøyhajt jaduñ. ⁴⁴ Mnajuøøby hajxy jaduñ mädyii quepychaa hoy tømhajp. Ja'a hapy, cab jaduñ tiøømhaty nebiä piidsän. Y ja'a wädsats, cab jaduñ tiøømhaty nebiä tsaatypän. ⁴⁵ Jaduñ mäwíinädsä hojiäya'ay ja'a howyiinmahñdy miøødá. Hoy jaduñ wiädity. Pero ja'a ca'awiindøjiäya'ayhajxy, cabä howyiinmahñdy hajxy miøødá. Haxøøgwiinmahñdy hajxy miäwädiipy. Haxøøg hajxy jaduñ ñä'ägädä capxy ñä'ägädä mädia'agy.

⁴⁶ 'Wiindsøñhøch mijts xwyi'i ñäma'ay; pero cab hajxy jaduñ mgudiuna'añ nébiøch mijts nja hane'emiän. ⁴⁷ Pøñhøch nmädia'agy xmiädóowäp, pøñhøch nmädia'agy xmiäbójcäp, jaduñ mäwíinäts je'e ⁴⁸ nebiä jäya'ay tiøjcojjiän. Cøøc jaduñ tiajøøyy. Tsaawiing jaduñ miuu'tsø'cy. Coo ja'a nøøgomdägoy quiädaacy, coo ja'a tøjc jaduñ ñøønähgoombejty, cab jaduñ piädø'cy, je'eguiøxpä coo hánajty cøøc miuu'tsø'øguiä. ⁴⁹ Pero pøñhøch nmädia'agy jaduñ xquia'a mäbójcäp, jaduñ mäwíinäts je'e nebiä jäya'ay tiøj cøøc quia'a muu'tsø'quiän. Coo ja'a tøjc ñøønähgoombejty, pädø'c jaduñ; cøjx jaduñ quiäday.

7

¹ Coo ja'a Jesús miädiaacpædøøyy, mänit quiajptägøøyy Capernaum. ² Jimä soldadowiindsøn hánajty tu'ug. Roma hánajty chooñ. Tøø ja'a mioonsä hánajty tu'ug pia'ambety. Jaduñ hánajty jiäwø'oy nebiä yhamdsoo puhya'ayän. Nä'ägädä ho'ogáannäp hánajty je'e. ³ Coo ja'a soldadowiindsøn miädoyhajty coo ja'a Jesús ja'a pa'amjäya'ay hánajty yajmøcpøcy, mänitá majtøjc näje'e quiejxy maa ja'a Jesúsän. Judíos hajxy je'e. ⁴ Mänitá

Jesús hajxy hoy miänuu'xta'agy coo ja'a pa'amjäya'ay ween nõcxy yajmõcpõcy. Mänitä Jesús ñämaayyá:

—Ja'a soldadowiindsón, hojiäya'ay je'e. Hahixøøby jaduhñ coo mbuhbédät. ⁵Xhójcäm hajxy jaduhñ. Tøø højts ndsajtõjc xyajcójjäm.

⁶⁻⁷Mänitä Jesús ja'a majtõjc miøødtu'ubõjcy. Ja ween hajxy hänäjty quia'a coody maa ja'a soldadowiindsón tiõjcän, mänitä soldadowiindsón ja'a Jesús capxy yajnäguejxy:

—Wiindsón, jadhuyyá mmäná'anät cooch nmoonsä miõcpõgät. Cábõch cuhdujt nmøødä nej miiç cuhdujt mmøødän; paady jaduhñ caj yhawiinmatsä coo mdägó'øwät maaç ndøgootiän. Páadyhöch miiç hamdsoo tøø nga'a mägapxy. ⁸Hix, hané'emyhöch nhity; y cooch nsoldado howiaambä nhané'emät møødhöch nmoonsä, xquiudiúunäbõch nmädia'agy hajxy —nõmä soldadowiindsón ja'a Jesús quiapxyñäguejxy.

⁹Jaanch tehñ yagjuøøyy ja'a Jesús jaduhñ coo jaduhñ ñämaayyá. Mänitä cu'ug wyiinhee'ppejty. Mänit miänaañ:

—Cábõch nmägunaaxhajxy jaduhñ miäbõcy nej yø'ø craa miäbõquiän, y jäguem chooñ.

¹⁰Ja'a majtõjc hänäjty tøø quiexyíjábä maa ja'a Jesúsän, mänit hajxy wyiimbijnä. Coo hajxy mietstägajch maa ja'a soldadowiindsón tiõjcän, tøø ja'a soldadowiindsón mioonsä hänäjty miõcpõjnä.

¹¹Mänitä Jesús hajxy nõcxy maa ja'a cajpt hänäjty xiøhatiän Naín møødä miägu'ughajpähajxy. Nämayyá jäya'ayhajxy hänäjty pianõcxy. ¹²Jim hajxy hänäjty miäwiingoñ cajtpa'a, mänitä ho'ogyjiäya'ay hajxy hoy jijcubaadø'øy. Cabäsantä hänäjty nõcxy ñaaxtägø'øy. Tu'ughuung hänäjty je'e. Yaamgto'oxy ja'a tiaj je'ebä. Majiäya'ay hänäjty panõcxp. ¹³Coo ja'a Jesús ja'a yaamgto'oxy yhijxy, mänit ñäxuu'ch. Mänit ñämaayy:

—Ca'a mjø'øy ca'a mxuuçh.

¹⁴Mänitä Jesús miänaañ coo hajxy yhuuc yaghahíxät. Mänitä cøøbiädõjc-hajxy tiänaaxiõjpy. Mänitä Jesús ja'a ho'ogyjiäya'aguiajä hoy ñähdoñ. Mänitä ho'ogyjiäya'ay ñämaayy:

—Jexy, pädø'øg.

¹⁵Mänitä craa yhäñaayyø'cy. Mänit quiapxø'cy. Mänitä tiaj miødhajnä. ¹⁶Mänitä jäya'ayhajxy nägøxiä jiaanç tehñ yagjuøøyy. Mänitä Dios hajxy ñämaayy:

—Dioscujú'uyäp.

Mänit hajxy ñiñämaayyá:

—Diosquexy yø'ø craa. Møj jaanç yø'øduhñ. Paadiä Dios tøø quiexy, piuhbedaambä ja'a quiu'ug jaduhñ, ja'a hajxy hädaa yaabä naaxwiimbä.

¹⁷Mänitä mädia'agy tiägøøyy wädijpä jim Judeanaaxooty coo ja'a Jesús ja'a ho'ogyjiäya'ay tøø yagjujypioçy. Wiinduhmyhagajpt ja'a mädia'agy jaduhñ wiädijty.

¹⁸Ja'a Juan, tøø je'e hänäjty chumyii. Coo ja'a miägu'ughajpähajxy miädoyhajty nebiatiä Jesús hänäjty tiuñ, mänitä Juan hoy yhawáanäxä. ¹⁹⁻²⁰Mänitä Juan ja'a miägu'ughajpä metsc miøjyaaxy. Mänit hajxy quiejxä maa ja'a Jesúsän. Coo hajxy jim miejch, mänitä Jesús hajxy ñämaayy:

—Juan mäyajnäbejpä højts tøø xquiexy coo højts miiç nmäyjtówät pøn miiç. Nej, miiç ja'a Dios hijty jaduhñ xquiexaambä, tøgä wiinghäna'c je'ejä.

²¹Jimä Jesús ja'a pa'amjäya'ay hänäjty yajmõcpõcy. Madiu'u ja'a pa'am hajxy hänäjty miøødä møødä mõjcu'u. Møødä wiindspähajxy hänäjty nämay yaghixø'øgyii. ²²Mänitä Jesús yhadsooyy:

—Nõcxä Juan hajxy hawaanä nebiaty hajxy yaa mhixy mmädoy. Hijxø'p ja wiindspähajxy, yo'oyø'p ja'a tecymia'adpähajxy, nähwaatsp ja'a haxøøgpa'ammøødpähajxy, madoowø'p ja'a cuhnatpähajxy, jujypiojpp ja'a ho'ogyjiäya'ayhajxy, yajwiingapxøøyyäp ja'a häyoobäya'ay ja'a Diosmädia'agy hajxy. ²³Pønjátyhöch nmädia'agy xmiäbõjcap tehngajnä, jootcujc hajxy jaduhñ ñijiäwø'øyii —nõmä Jesús miänaañ.

²⁴Coo ja'a Juan miägu'ughajpähajxy wyiimbijnä, mänitä Jesús miänaañ:

—Coo hajxy tøø mhoy pactuum, Juan miädia'agy hajxy hänäjty mmädoóaanäp, túh-mäts. Cabä tsajcapy pojyu'xpä hajxy hoy mhixy. Caj pues, paady hajxy jim tøø mhoy coo ja'a Juan ja'a miädia'agy hajxy hänäjty mmädoóaanä. ²⁵ Diosquexy je'e, paady hajxy hoy tøø mmädoowä, hoyyä howyit je'e quia'a ja mөөdä nebiä mäyөөjäya'ayhajxy miөөdän. ²⁶ Tøyhajt jaduһn coo ja'a Juan ja'a Diosmädia'agy yajwa'xy. Maas may ja'a Dios ja'a Juan cuhdujt tøø mio'oy quejee ja'a jäya'ay ja'a Diosmädia'agy hajxy jecy yajwá'xäbä. ²⁷ Ja'a jäya'ay ja'a Diosmädia'agy jecy nägápxäbä, Juan je'e. Jaduһnä Dios jecy miänaañ coo ja'a quiuguexy hänäjty jayөjp quiexa'añ coo ja'a cu'ug ween yajwiinxiiic yajwiingapxө'oy coo ja'a yhaxөөgcuhdujt hajxy ñajtshixө'owät. Hөxháamhөch hijty ngäda'aga'añ. Jayөjpä Juan quiejxä; hөxháamhөch njaanч cädaacy. ²⁸ Ni pөñ jaduһn jäda'ahaty quia'a mäbaady hädaa yaabä naaxwiin nebiä Juan mäyajnäbejpä ja'a cuhdujt miөөdän. Tøyhajt jaduһn. Pero cooч hänäjty tøø nho'nä, cooч hänäjty tøø nnөcxtägach maaч nhuuc tsoһmbän, pөnjaty ja'a Diosmädia'agy hänäjty mäbögaamb ja'a hөөчhcөxpä, maas may ja'a cuhdujt hajxy hänäjty miөөdhada'añ quejee ja'a Juan jäda'ahaty miөөdän, hoyyä möjcuhdujt hajxy hänäjty quia'a ja mөөdä.

²⁹ Coo ja'a cu'ughajxy jaduһn miädooy mөөdä yajnähuudiutpädөjc-hajxy, mänitä Dios hajxy quiapxpaaty coo yhooyä, je'eguiөxpä coo hajxy hänäjty tøø yajnäbetyii ja'a Juángäm. ³⁰ Pero ja'a fariseohajxy mөөdä ley-yajnähixөөbiähajxy, cab hajxy hänäjty tøø yajnäbetyii ja'a Juángäm. Paadiä Dios hajxy quia'a jөjpөгөөyy. Cabä jioot hajxy hänäjty chocy coo hajxy yajnähwa'adsөjät ja'a Diósäm. ³¹ Mänitä Jesús miänaañ:

—Nhuuc yajmäbáadyhөch ja'a jäya'ayhajxy jäda'ahatypä. ³² Cab hajxy tii yho-jiäwө'owa'añ. Jaduһn mäwíinäts hajxy je'e nebiä pigäna'c-hajxy wiinhecpän. Coo hajxy naxy miech häyө'pä tөjpa'c, mänitä miäbigäna'c hajxy ñäma'ay: “Tøø hөjts nja xu'uxy, pero cab hajxy tøø mhech. Tøø hөjts hojiөөñä nja hөy, pero cab hajxy tøø mjө'oy.” ³³ Hoorä, coo ja'a Juan mäyajnäbejpä miejch, cabä tsajcaagy hänäjty quiaya'añ, ni ja'a vino hänäjty quia'a hu'uga'añ. Y mijts jaduһn mänaamb coo quiuhmäñө'oy. ³⁴ Y cooч nbamejtpä, hөөч ja'a Diosquexypä, mänitөch ndägөөyy caabiä huucpä. Jaduһnч mijts xñänөmbä cooч nwi'i quiaya'añ, cooч nwi'i yhu'uga'añ, cooчhä pojpäya'ay cädieejäya'ay nmägu'ughaty mөөdä yajnähuudiutpädөjc. ³⁵ Pөnjaty ja'a Dios jaanчh jahmiejtsp, yajcähxө'py hajxy jaduһn coo ja'a Dioswiinmahñdy hajxy miөөdä.

³⁶ Mänitä fariseo ja'a Jesús tu'ug hoy wioy caabiä. Simón hänäjty xiөhaty. Mänit hajxy yhänaaguiädaacy caabiä maa ja'a Simón tiөjcän. ³⁷ Mänitä to'oxiөjc tu'ug miejch cuhhiñbä. Haxөөgcuhdujt hänäjty miөөd. Tøø hänäjty miädoyhaty coo ja'a Jesús jilby tøø miech maa ja'a Simón tiөjcän. Perfume quionmejts alabastrofrascooty. ³⁸ Mänit tiägөөyy jөöbiä. Mänitä Jesús tiecypiuju wyiinnөohaam. Mänit tiecymieexy quiuhwaayhaam. Mänit tiecychu'xy. Mänit tiecyñähjahxy perfumehaam. ³⁹ Mänitä Simón tiägөөyy tajpä maabiä: “Coo ja'a Jesús häxөpy quiunajuөhñdiä, tøø häxөpy ñajuө'oy coo yө'ө to'oxiөjc quiuhhiñä.” ⁴⁰ Mänitä Jesús ja'a Simón ñämaayy:

—Simón, tsөг mädiäacäm.

Mänitä Simón yhadsooyy:

—Wiindsөñ, tsөc.

⁴¹ Mänitä Jesús miänaañ:

—Jimä jäya'ay hijty tu'ug miänuu'xyhadyii jäya'ay metscä. Tu'jäya'ay hänäjty miänuu'xyhaty mägooxmägo'x denarios. Jatu'ug, juxychägui'xmajc. ⁴² Cab hajxy hänäjty tii miөөdä nebiä ñuu'xy hajxy yajnähwá'adsät. Mänit hajxy ñämaayyä: “Weends yhity.” Hoorä, pөñäda'a maas mädsөгäp.

⁴³ Mänitä Simón yhadsooyy:

—Jue'eda'a, ja'a craa ja'a ñuu'xy maas may hijty miөөdpä.

Mänitä Jesús miänaañ:

—Je'e pues.

⁴⁴ Mänitä Jesús ja'a to'oxiөjc miөjhee'py. Mänitä Simón ñämaayy:

—Coočh yaa ndägøøyy maa miičh mdøgootiän, cábøch miičh nøø tøø xmiø'oy cooçh ndecypiújät. Jaduhñ hajxy naxy nguuhdujthájtäm. Pero yø'ø to'oxiøjc, wyiin-nøøháamhøch ndecy tøø xpiujjä, quiuhwaayháamhøch ndecy tøø xmieexä. ⁴⁵ Cábøch miičh tøø xchu'xy, pero yø'ø to'oxiøjc, tehngájnoch ndecy xwyi'i chu'xä. ⁴⁶ Cábøch miičh ja'a nguuhwaay tøø xyhoonä. Jaduhñ hajxy naxy nguuhdujthájtäm. Pero yø'ø to'oxiøjc, perfumeháamhøch ndecy tøø xyhoonä. ⁴⁷ Xjiaančh tehñ chójpøch yø'øduhñ; paadiä piojpä quiädieey yajnáhwáatsäxä, hoy hijty may jia møødä. Pero pønä pojpa cádieey hijty ca'a jaty møød, cábøch jaduhñ xjiaty wiingudsähgø'oy.

⁴⁸ Mänitä Jesús ja'a to'oxiøjc ñämaayy:

—Tøøch miičh ja'a mbojpa mgädieey nyajnáhwáatsäm.

⁴⁹ Ja'a hajxy hánajty jilby pahäñaabiä, mänit hajxy tiägøøyy niñamáayyäbä:

—Maa ja'a cuhdujtäda'a tøø yhuuc paatpä coo ja'a pojpa cádieey yajnáhwa'ačh.

⁵⁰ Mänitä Jesús ja'a to'oxiøjc ñämáaguumbä:

—Coočh nmädia'agy tøø xmiäbøjcä, páadyhøch ja'a mbojpa mgädieey tøø nyajnáhwa'ačh. Nøcxnä jootcujc.

8

¹ Mänitä Jesús hajxy tiägøøyy wädijpä wiinduhmyhagajpt møødä jiamiøødhajxy ja'a nämajmetspä. Diosmädia'agy-yajwa'xpä hajxy hánajty wiädity. Jaduhñä Jesús hánajty miäna'añ cooc ja'a Dios ja'a miäjaa hánajty yajcähxø'øgaanä. ² Quipxiä to'oxiøjc-hajxy hánajty nämay piawädijpä, ja'a Jesús hánajty tøø yajpa'amnáxiäbä, møød ja'a møjcu'u hajxy hánajty tøø yajnáhwa'ačhiijäbä. Paadiä Jesús hajxy hánajty piawädity, mioobiä Jesús hajxy hánajty tijaty je'e hánajty miäjuyhajpy. María ja'a to'oxiøjc hánajty tu'ug xiøhaty ja'a Magdalatsohmbä. Juxtujc ja'a møjcu'u hánajty tøø yajnáhwa'ačhii. ³ Jatu'ug hánajty xiøhaty Juana, ja'a Cuza tio'oxiøjc. Ja'a Cuza hánajty copc-hajp maa ja'a Herodes hánajty yhane'emiän. Møødä Susana hánajty piawädijpä.

⁴ Mänitä Jesús jäya'ay may ñänøcxä. Mayhagajpt hajxy hánajty chooñ. Coo hajxy hánajty may tøø yhamugø'oy, mänitä Jesús tiägøøyy yajwiingapxøøbiä yajmäbaadyhaam:

⁵ —Mänitä jäya'ay tu'ug tiu'ubøjcy niippä. Coo ja'a tøømd tiägøøyy wøjpä, näje'e ja'a tøømd quiahy tu'haam. Mänitä muuxyhajxy hoy yajpädø'ogy. Mäduhñtiä ja'a muuxyhajxy quia'a yajpädø'cy, je'edsä jäya'ay jiaac yajtehñ. ⁶ Näje'e ja'a tøømd quiahy tsaanähgøxp. Ja mujx je'eduhñ, pero tøøts. Hix, weeñtiä ja'a naax jim tsaanähgøxp. ⁷ Näje'e ja'a tøømd quiahy haptiooty. Ja mujx je'eduhñ. Ja yee'c, pero caj ñä'ä tøømbejty. Hix, ja'a hapy je'e xaam. ⁸ Näje'e ja'a tøømd quiahy maa ja'a hoñaaxän. May je'e tiømhajty høxtä mägo'xhaam.

Mänitä Jesús møc miänaañ:

—Pøn hädaa wiinjuøøby, wéenhøch hädaa nmädia'agy xmiäbøjcä.

⁹ Mänitä Jesús miäyajtøøwä neby jaduhñ miädia'agytiägø'oy. Ja'a miägu'ughajpähajxy jaduhñ yajtøøw. ¹⁰ Mänitä Jesús yhadsooyy:

—Chojpiä Dios jioot jaduhñ coo mijts mwiinjuø'øwät nebiä miäjaa yajcähxø'øga'añ. Pero ja'a häna'c-hajxy jaac yaabä, cabä Diosmädia'agy hajxy tiu'joottsoy. Hoyyä mädia'agy hajxy jia mädooy, pero cab hajxy wyiinjuø'oy tii jaduhñ jia mädiaacyy.

¹¹ 'Jaduhñds miädia'agytiägø'oy nébiøch hajxy tøø nyajwiingapxø'øyän. Jaduhñdsä tøømd miäbaady nebiä Diosmädia'aguiän. ¹² Ja'a tøømd cáhwäbä tu'haam, jaduhñ miäbaady nebiä jäya'ay ja'a Diosmädia'agy hajxy jia mädooyän. Coo ja'a møjcu'u miech, mänit hajxy wyiinhøøñii neby hajxy jaduhñ quia'a mäbøgät, nebiä piojpä quiädieey-hajxy jaduhñ quia'a nähwá'adsät. ¹³ Y ja'a tøømd cáhwäbä tsaanähgøxp, jaduhñds je'e miäbaatpä neby hajxy jia mädooyän. Tu'habaquiä hajxy jaduhñ xioonda'agy. Pero cab hajxy hamuumdu'joot pianøcxy. Coo hajxy cøxypänejpiä tiuñii, mänit hajxy ñajtshixøøñä. ¹⁴ Y ja'a tøømd cáhwäbä haptiooty, jaduhñds je'e miäbaatpä neby hajxy jia mädooyän. Pero cabä yhamdsoo cuhdujt hajxy ñajtshixø'øwa'añ møødä miäyøøhajt. Cabä Diosmädia'agy hajxy hoy quiudiuna'añ. ¹⁵ Y ja'a tøømd cáhwäbä hoñaaxooty,

jaduhñ miäbaady nebiä Diosmädia'agy hajxy hamuumdu'joot mäbøjpän. Jaanč tehñ yhoy hajxy jaduhñ quiudiuñ.

¹⁶ 'Coo jäya'ay jøøn hajxy quiuhno'ogø'øy, cøxp hajxy yujcoñ neby hajxy quiudøø'xøjät, ja'a hajxy tøjtägøøbiä. Cabä pøn jøøn quiuhjupy, ni maabejtpa'c hajxy quia'a päda'agy. ¹⁷ Jaduhñ mäwínäts mijts ja'a nmädiá'agyhøch hajxy xwyiinjuø'øwaanä, ja'a tsipjátypøch jaduhñ tøø nyajwiingapxø'øyäbä.

¹⁸ 'Huuc wiinjuø'øw hajxy hoy. Pøn'høch nmädia'agy tøø xmiäbøjcä, njaac yajñähixø'øwáambiøch je'e. Pøn'høch nmädia'agy tøø xquia'a mäbøjcä, cábøch tii nya-jñähixø'øwaanä. Høxtä jiahdägoyyaamby hajxy je'e mädyii tyijy ja'a tøø wyiinjuø'øy.

¹⁹ Mänitä Jesús ñámejtsä ja'a tiaj møødä piuhya'ayhajxy. Cab hajxy hoy tiehñ wyiingumedsøøyy, je'eguiøxpä coo ja'a jäya'ayhajxy hñajty ñämäyyä jiiby tøgooty maa ja'a Jesús hñajtiän. ²⁰ Mänitä Jesús ñämaayyä:

—Ximä mdajhajxy tøghaguuy møødä mbuhya'ayhajxy. Miič hajxy xjia wi'i miøød-mädia'agaamb.

²¹ Mänitä Jesús miänaañ:

—Pønä Diosmädia'agy jaduhñ mäbøjp, pøn jaduhñ cudiuumb, je'ečh ndajhajpy, je'ečh nbuhya'ayhajpy.

²² Miäwiinghoocpä ja'a Jesúshajxy tiägøøyy barcojooty møødä miägu'ughajpähajxy. Mänitä Jesús miänaañ:

—Jam hajxy jim mejyhawiimb.

Mänit hajxy jiaanč tu'ubøjcy. ²³ Nøcxnä hajxy hñajty jaduhñ, mänitä Jesús miaaho'cy. Mänitä poj møc piädø'cy. Mänitä nøø quiubøjøøyy barcojooty. Hújtsnäp ja'a barco hñajty. ²⁴ Mänitä Jesús hajxy hoy yuxy. Mänit hajxy ñämaayy:

—Wiindsøn, Wiindsøn, pädø'og, quinaambä barco cham.

Mänitä Jesús piädø'cy. Mänitä poj yhojy møødä nøø. Mänitä poj yuungøøyy. Moñdiucy jaduhñ jiajnä. ²⁵ Mänitä Jesús ja'a miägu'ughajpähajxy ñämaayy:

—Tii hajxy coo mwi'i chähgø'øy. Nej, cab hajxy mnajuø'øyä cooçh mijts homiänaajä ngüeendähada'añ.

Jaanč tehñ yagjuøøyy hajxy jaduhñ. Mänit hajxy hamiñ haxøpy ñiñämaayyä:

—Pønäda'a yø'øduhñ coo ja'a miädia'agy miäbøjcäxä ja'a poj møødä nøø.

²⁶ Mänit hajxy miejyhawiimpädsøømnä jim maa ja'a naax hñajty xiøhatiän Gadara, jim jaduhñ mejyhawiimpä maa ja'a Galileanaaxootiän. ²⁷ Coo ja'a Jesús biarcopädsøømy, mänitä jäya'ay tu'ug miejch Jesús wyiinduum, ja'a jim cajptooty tsänaabiä. Tøø hñajty jiegø'øy mänaa ja'a mähdiojc møjcu'u hñajty tøø ñämečhiijän. Cabä wit hñajty miøødhajnä, ni quia'a hñä'ay hñajty tøgooty. Jim hñajty yhity maa ja'a cabäsantän. ²⁸ Coo ja'a Jesús yhiixy, mänit wyiinjiçädaacy. Mänitä møjcu'uhajxy yaaxy:

—Jesús, tii højts xwia'ana'añ. Dios miič xyHuunghajp ja'a tsajpootypä. Tunä mayhajt, ca'a højts jiiby xquiexy maa jiaanč tehñ chaačhpän.

²⁹ Paadiä mähdiojc jaduhñ yaaxy, je'eguiøxpä coo ja'a Jesús ja'a møjcu'u hñajty tøø yhane'emy coo ñähwa'adsøjät. Mayhooc ja'a mähdiojc hñajty tøø ñämečhii ja'a møjcu'ujäm. Paadiä jäya'ayhajxy hñajty jia wi'i yaghida'añ cø'øxoch tecyxioch cadenaam neby jaduhñ hoy yhidät. Pero nimiäpodøøyyäp hñajty je'e, y yajnøcxäp hñajty pactuum ja'a møjcu'ujäm. ³⁰ Mänitä Jesús ja'a mähdiojc miäyajtøøyy:

—Tii mxøhaty.

Mänit yhadsooyy:

—Legiónhøch nxøhaty.

Paady jaduhñ miänaañ coo ja'a møjcu'u hñajty may miøødä. ³¹ Mänitä møjcu'u ja'a Jesús hajxy miänuu'xtaacy coo hajxy jiiby quia'a quexøjät møjcu'uhaam maa jiaanč tehñ chaačhpän. ³² Jimä mayhädsøm hñajty yuummy tunmøjc. Mänitä møjcu'u ja'a Jesús hajxy miänuu'xtáaccumbä coo hajxy jim quiexøjät maa ja'a mayhädsøm hñajtiän. Mänitä Jesús cuhdujt miooyy. ³³ Mänitä mähdiojc ja'a møjcu'u ñähwáatsänä.

Mänitä hädsøm̄hajxy hoy ñämečhii. Mänit hajxy wyiinmänacpäyø'cy. Mänit hajxy quiuhgahnajxy naaxøjpcøxp mejjiooty. Jiiby hajxy cøjx ñøøho'ogø'oy.

³⁴ Coo ja'a hädsøm̄güeendähajpähajxy jaduhñ yhiijxy, mänit hajxy piäyø'cy. Mänitä cu'ug hajxy hoy yhawaanä cajptooty mөөdä cajtpa'a. ³⁵⁻³⁶ Mänitä cu'ughajxy hänajty nõcxy yhixa'añ neby hänajty tøø jiadyiijän. Mänit hajxy miejch maa ja'a Jesús hänajtiän. Jiibiä mähdiojc ja'a Jesús hänajty wyiinhäñ'ay, ja'a mõjcu'u hänajty tøø ñähwa'ačhiijäbä. Tøø wit hänajty piägøøñä. Tøø hänajty wyiinmahñdymejtsnä. Coo ja'a cu'ughajxy jaduhñ yhiijxy, mänit hajxy chähgøøbiøjcy. Paady hajxy chähgøøyy, haxøøgjäya'ay tyijy ja'a Jesús. Mänitä cu'ughajxy yhawaañäxä nebiä mähdiojc ja'a mõjcu'u hänajty tøø ñähwa'ačhiijän. Ja'a hajxy hänajty tøø yhiixiäbä, je'e hajxy jaduhñ nägapx. ³⁷⁻³⁹ Mänitä Jesús hajxy tiägøøyy mänuu'xtaacpä coo jim chóonät Gadara. Hix, jaanč tehñ chähgøøby hajxy hänajty. Jim tyijy ja'a Jesús cøxypänejpä jiaac jatcø'owa'añ. Ja'a mähdiojc hänajty tøø ñähwa'ačhäbä, mänitä Jesús miänuu'xtaacy coo cu miødhajty. Mänitä Jesús yhadsooyy coo miähmø'owät maa quiajptän:

—Nøcx maa ja'a mdøjcän; mädia'ag nebiaty ja'a Dios tøø xpiuhbety.

Mänitä craa jiaanč nõcxy, miädiaacy jiiby cajptooty nebiaty hänajty tøø piuhbodyiijäm ja'a Jesús. Mänitä Jesús biarcotägøøñä, wyiimbijnä.

⁴⁰ Coo ja'a Jesús jim miejtstägajch mejyhawiimb, jimä cu'ughajxy hänajty yhahixy. Mänit hajxy xioondaacy. ⁴¹ Mänitä jäya'ay tu'ug miejch ja'a xøhajpä Jairo. Tsajtøjwiindsøn hänajty tiuumby. Mänitä Jesús wyiinjiçädaacy. Mänit miänuu'xtaacy coo ñøcxät maa ja'a tiøjcän. ⁴² Jimä Jairo yhuung hänajty yho'ogaannä. Tiu'ughuung hänajty je'e. Majmetscjomøjt ja'a to'oxyhäna'c hänajty miøødä. Mänitä Jesús tiu'ubøjcy. Mayyä jäya'ayhajxy piadu'ubøjcy, høxtä yhanø'tsmujpy ja'a Jesús hajxy hänajty.

⁴³⁻⁴⁴ Mänitä Jesús ja'a tajiäya'ay tu'ug jiøgyohdiägøøyyä. Pa'ammøød hänajty je'e. Majmetscjomøjt ja'a pa'am hänajty tøø miähäyoy. Ñø'ty hänajty wi'i xiee'xp, pero weenjaty weenjaty. Ni pøn hänajty quia'a najuø'oy nebiä choomiáyät. Mänitä Jesús wyitpa'a ñähdoonäxä. Mänitä ja'a tajiäya'ay ñø'ty yhadujnä. ⁴⁵ Mänitä Jesús miänaañ:

—Pøñhöch xñähdoon.

Ni pøn quia'a mänaañ coo hajxy ñähdoon. Mänitä Pedrohajxy miänaañ:

—Wiindsøn, xjiaanč tehñ yhanø'tsmujp miich ja'a cu'ug. Tii nyajnajuoøyyäm pøn tøø xñähdoon.

⁴⁶ Mänitä Jesús miänáangumbä:

—Nnajuøøbiøch coo pøn tøø miäbaadø'oy høøch nmäjaahaam. Páadyhöch jaduhñ tøø nnä'a najuø'oy cooçh hajxy tøø xñähdoon.

⁴⁷ Mänitä tajiäya'ay jaduhñ ñajuøøyy coo ja'a Jesús hänajty ñajuø'oy coo je'e hänajty tøø miänähdoon. Mänitä Jesús wyiingumedsøøyy tsäyúuyyap. Mänitä Jesús wyiinjiçädaacy. Mänit ñägapxy cu'ughagujc cooc ja'a Jesús wyit hänajty tøø ñähdoonä, y cooc mänitä pia'amnajxy. ⁴⁸ Mänitä Jesús ja'a tajiäya'ay ñämaayy:

—Huung, paady miich tøø mba'amnaxy coo tøø mmäbøcy. Nøcxnä jootcujc.

⁴⁹ Jimä Jesús hänajty miädia'agyñä, mänitä jäya'ay tu'ug miejch. Jim hänajty tøø chohnda'agy maa ja'a Jairo tiøjcän. Mänitä Jairo ñämaayyä:

—Tøø ja'a mhuung yho'ogy. Cabä wiindsøn mhadsípnät.

⁵⁰ Miädoow ja'a Jesús jaduhñ. Mänitä Jairo ñämaayy:

—Ca'a mjootmayhaty. Mäbøc. Jujypiøgäp ja'a mhuung häyaa.

⁵¹ Mänit hajxy jim miejtsnä maa ja'a Jairo tiøjcän. Coo ja'a Jesús tiøjtägøøyy, caj pøn miøødtøjtägøøyy, jagooyyä Pedro mөөdä Juan mөөdä quixy tiaj tieedy. ⁵² Tøghaguuy ja'a cu'ughajxy miähmøøyy jøøbiä xuu'tspä. Mänitä Jesús miänaañ:

—Ca'a hajxy mwili jøø'oy mwili xiuuuch. Caj tøø yho'ogy, nä'a maab jaduhñ.

⁵³ Mänitä Jesús ñäxiicä. Ñajuøøby hajxy hänajty coo ja'a quixy hänajty tøø yho'ogy.

⁵⁴ Mänitä Jesús ja'a quixy quio'ø miajtsä. Mänitä Jesús møc miänaañ:

—Huung, pädø'og.

⁵⁵ Mänitā quixy jiuypiojcy. Mänit piädø'cy. Mänitā Jesús miänaañ coo hajxy yajcáyät. ⁵⁶ Jaančh tehñ yagjuøøyy ja'a tiaj ja'a tieedy jaduñ. Mänitā Jesús miänaañ coo hajxy pøn quia'a yajmøødmädiá'agät neby hänajty tøø jiatän.

9

¹ Mänitā Jesús ja'a jiamiøød miøjyaaxy ja'a hajxy nämajmetspä. Mänitā cuhdujt hajxy miooyy coo ja'a mõjcu'uba'ammøødpä hajxy nägøxiä yajnähwá'adsät. Møødá mäjaa hajxy miøoyyábä coo ja'a pa'amjäya'ay hajxy yajmøøcpøgät. ² Mänit hajxy wyiinguejxä coo ja'a Diosmädia'agy hajxy yajwá'xät, coo ja'a pa'amjäya'ay hajxy yajmøøcpøgät. Jaduhñ hajxy miädiá'agät coo ja'a Dios ja'a miäjaa yajcähxø'øga'añ. ³ Mänit hajxy ñämaayyā:

—Cab hajxy tii mmänøcxät, ni cuhdajt, ni pijty, ni tsajcaagy, ni xädø'øñ. Tu'xojxc-hajtiä ja'a mwit hajxy mmänøcxät, ca'a mietscä. ⁴ Homiädyii tøjcä hajxy mmejtstá'agät, jim hajxy mmähmø'øwät høxtä coonä hajxy jim jadähooc mwiimbídät. ⁵ Y coo hajxy maa xquia'a yajtøjtägø'øwá'anät, mänit hajxy jim mdsóonät maa ja'a cajptän. Mänitā mdecy hajxy mwiinwøbät nebiä hijxtahñ jaduhñ miähmø'øwät coo mijts tøø xquia'a yajtøjtägø'øy —nømä Jesús miänaañ.

⁶ Mänit hajxy tiu'ubøjcy. Wiinduhmyhagajpt hajxy hänajty wiädity Diosmädia'agy-yajwa'xpä, pa'amjäya'ay-yajmøøcpøjpä.

⁷ Ja'a Herodes hänajty jim tuumb gobernador. Mänit miädoyhajty nebiatiä Jesús ja'a hijxtahñ hänajty yajcähxø'øguiän. Cab hänajty ñajuø'øy nebiä wyiinmahñdyhädät. Hix, näje'e hajxy hänajty miäna'añ cooc tyijy ja'a Juan hänajty tøø jiuypiojcy. Hix, tøø ja'a Juan hänajty yagho'ogyii. ⁸ Näje'e hajxy hänajty miänaambä cooc tyijy je'e Elías, ja'a Diosmädia'agy jecy yajwá'xäbä. Näje'e hajxy hänajty jiaac mänaambä cooc tyijy ja'a jecyjäya'ay tøø jiuypiojcy, ja'a Diosmädia'agy jecy yajwá'xäbä. ⁹ Mänitā Herodes miänaañ:

—Høøchä Juan nyajyo'pujxä. Pønäda'a jaduñ wädiip. Madiú'ujøch jaduñ nmädoj yajcähxø'øgy.

Jiaančh tehñ yhixaambiä Herodes ja'a Jesús hänajty.

¹⁰ Coo ja'a Jesús jiamiøødhajxy wyiimbijtagajch, mänitā Jesús hajxy yajmøødmädiaacy nebiaty hajxy hänajty tøø wiädity. Mänit hajxy miøødnøcxä pactuum, jim mäwiingon maa ja'a cajpt hänajty xiøhatiän Betsaida. ¹¹ Coo ja'a cu'ughajxy jaduñ miädoyhajty, mänitā Jesús hajxy jim piamejch. Mänit hajxy ñämaayyā coo hajxy jim miähmø'øwät. Mänitā Diosmädia'agy hajxy yajmøødmädiaacä cooc ja'a Dios ja'a miäjaa yajcähxø'øga'añ. Møødá pa'amjäya'ayhajxy may yajmøøcpøjcä.

¹² Tsuijøøñäp hänajty, mänitā Jesús wyiingumedsøøyyä ja'a jiamiøødhajxy ja'a nämajmetspä. Mänitā Jesús ñämaayyā:

—Näma'aw yø'ø jäya'ayhajxy coo hajxy nøcxy pioo'xnä, coo hajxy nøcxy quiayhøxta'ay wiingtuum maa ja'a cajpt miäwiingonän. Yaa maa hajxy nhíjtäm, cabä tii yaa.

¹³ Mänitā Jesús miänaañ:

—Huuc yajcay mijts.

Mänit hajxy yhadsooyy:

—Cab højts tii nmøødá; jagooyyä højts tsajcaagy mägoøxc nmøødá møødá hacx metscä. Tøgä nøcxäp højts njuuyyä ja'a hajxy quiayaambiä, hoy hajxy jia nämayyā.

¹⁴ Nämägoøxmil ja'a ya'adiøjc-hajxy hänajty nägøxiä. Mänitā Jesús ñämaayy ja'a jiamiøødhajxy:

—Näma'aw hajxy ween hajxy yhäñaaguiäda'agy naaxwiin näjuxychägui'xmajcjaty.

¹⁵ Mänit hajxy ñämaayy coo hajxy jaduñ yhäñaaguiädá'agät. Mänit hajxy yhäñaaguiädaacy nägøxiä. ¹⁶ Mänitā Jesús ja'a mägoøxpä tsajcaagy quioondsooyy møødá metspä hacx. Mänit chajhee'py. Mänitā Dios pia'yaaxy, miänaañ:

—Dioscujú'uyäp coo højts hädaa tøø xmio'oy.

Mänit jaduñ yhağuidøøyy. Mänitä jiamiøød mioooy coo hajxy jaduñ yajwá'xät maa ja'a cu'ugän. ¹⁷ Mänit hajxy nägøxiä quiaaay cu'uxiä. Majmejtscach ja'a caadiuc quiunajxy.

¹⁸ Wiingxøø hänajty je'ebä, jimä Jesús ja'a Tieedy hänajty pia'ya'axy hanidiuhmduum. Jimä jiamiøødhajxy hänajty miøødä. Mänitä Jesús yajtøøyy:

—Nébyhöch ja'a cu'ughajxy xñänømy pønhöch høøch.

¹⁹ Mänit hajxy yhadsooyy:

—Näje'e hajxy miäna'añ cooc tyjy miich mJuangä ja'a hijty mäyajnäbejpä. Näje'e hajxy miänaambä cooc tyjy miich mhElíasä. Näje'e hajxy jiaac mänaambä cooc tyjy ja'a jecyjia'ay tøø jujypiøcy, ja'a Diosmädia'agy jecy yajwá'xäbä, y cooc tyjy miich mje'ejä.

²⁰ Mänitä Jesús yajtøøgumbä:

—Mjtsäts, nej mijts mmänaambä pøn xtyjy høøch.

Mänitä Pedro yhadsooyy:

—Diosquexy miich.

²¹ Mänitä Jesús møc miänaañ coo hajxy quia'a nägäpxät pøn hänajty je'e. ²² Mänitä Jesús miänáangumbä:

—Høøch ja'a Diosquexypä, hoyhöyhöch njaanč tehñ chaächpøga'añ. Cáböch ja'a tsajtøwiindsøn hajxy xñä'ägädä wiingudsähgø'owa'añ, ni ja'a teedywiindsøn hajxy, ni ja'a jäya'ayhajxy jim cuhdujtmøødpä tsajtøgooty. Xyagho'ogáamböch hajxy, pero cudägøøgxøøjöch njujypiøga'añ.

²³ Mänit jiaac mänáangumbä:

—Pønjätyhöch nmädia'agy xpiađu'ubøgáanäp, ween yhamdsoo cuhdujt hajxy ñajtshixø'oy, ween hajxy chaächpøjpä jabom-jabom nébiöch ndsaächpøga'añän. Jadúhñhöch nmädia'agy hajxy hoy xpianöcxät. ²⁴ Pøn jiuğyhajt ja wi'i yaghoyø'øwaamb, nä'ägä cuhdägoyyaamb je'e. Pero pøn jiuğyhajt jaduñ yajtägoyyaamb ja'a høøchcøxpä, nä'ägä hodium je'e miähmø'øwa'añ. ²⁵ Coo hajxy hodium mga'a mmähmø'øwät, cab hajxy jaduñ mniyaghoyø'øwøjät, hoy hajxy mja mäyøøjä hädaa yaabä naaxwiin. ²⁶ Pønhöch xmiädsähdiuumb møødhöch nmädia'agyquiøxpä, mänitöch jaduñ nmädsähdiunaambä coöch hänajty ngädaactägatsa'añ. Hajajaamb hänajty yaa neby jim yhajjiän tsajpootyp maač nDeedy yhitiän, maa ja'a mioonsähajxy yhitiän. ²⁷ Tøyhájthöch jaduñ nmäna'añ, ja'a hajxy yaa tänaabiä, näje'e hajxy jaduñ quia'a tsoj ho'oga'añ høxtä coonä ja'a Dios ja'a miäjaa hänajty yajcähxø'øga'añ.

²⁸ Cuductujxøø ja'a Jesús ja'a Pedro miøødwimbejty tunguhduum Diospa'yaaxpä, møødä Juan møødä Jacobo. ²⁹ Jimä Jesús ja'a Tieedy hänajty pia'ya'axy, mänitä wyiin jiojp høxtä haamb høxtä tsämaamb quiähxø'cy. Jaanč tehñ pioob ja'a wyit jaduñ jiajnä. ³⁰⁻³¹ Mänitä Moisés hajxy ñäguexxtøø'xy maa jiajy maa chämamiän møødä Elías. Mänitä Jesús hajxy miøødtägøøyy mädiaacpä. Je'e hajxy hänajty miädiaacy coo ja'a Jesús hänajty jim nøcxy yho'oga'añ Jerusalén. ³² Hoyyä Pedrohajxy hänajty jia wi'i mia'awa'añ, cab hajxy ñä'ägädä maaho'cy. Mänit hajxy yhişy coo ja'a Jesús hajxy hänajty jiajy chämamy møødä Moisés møødä Elías. ³³ Coo ja'a Moisés hajxy hänajty wyiimbidaannä, coo ja'a Jesús hajxy hänajty piuhwa'adsaannä, mänitä Pedro ja'a Jesús ñämaayy:

—Wiindsøn, hoyøøyy jaduñ coo hajxy yaa tøø nbéjtäm. Ween højts tøjquemy tägøøg cu nhädiuun, tu'ug miich mje'e, tu'ug Moisés jie'e, tu'ug Elías jie'e.

Nä'a nagoobä ja'a Pedro jaduñ miänaañ. ³⁴ Mänitä näma'a tehñ miapxy quiädaacy maa hajxy hänajtiän. Nädägooyy hajxy jaduñ. Mänitä Pedrohajxy chähgøøbiøcy.

³⁵ Mänit hajxy miädooyy ja'a Dios quiapxy näma'ajooty:

—Høøch nHuung hädaa. Høøch tøø nwiinguexy. Mhamädoowhíjtäp ja'a miädia'agy hajxy.

³⁶ Mänitä Jesús hajxy yhişy coo hänajty nidiuhm tiänaañä. Hamon hajxy jaduñ miähmøøñä. Cab hajxy pøn yajmøødmädiaacy nebiaty hajxy hänajty tøø yhişy.

³⁷ Cujaboom hajxy jim wyiimbijnä tunguhduum. Mänitä Jesús jäya'ay may jiojcubaadøoyä. ³⁸⁻³⁹ Mänit tu'jäya'ay mœc quiapxy maa ja'a cu'ugän:

—Wiindsøn, tú'uquiœch nhuung. Náxyhœch nhuung mœjcu'u xjiaanç tehñ ñämejtsä. Mœc jadhun ya'axy, mœc chäyuy. Hœxtä hahoo'p jadhun. Hanaxiä jadhun chaaçhtiuñii, y cab jadhun ñä'ägädä nähwa'açh. Wiindsøn, tunä mayhajt, yajnahwáatsägœch nhuung. ⁴⁰ Tœœch ja'a mjamiœœd nja wi'li miänuu'xta'agy coœch nhuung hajxy xyajnahwáatsät, pero cab hajxy jadhun ñä'a jajty.

⁴¹ Mänitä Jesús ja'a jiamiœœd ñämaayy:

—Nej, cájtäm mijts mänaa mmäbœga'añä. Pämädühñtiœch mijts jadhun njaac mämeex'tuga'añ.

Mänitä cuhuung ñämaayy:

—Woominxä mhuung.

⁴² Cahnä craa hänäjty miechñä maa ja'a Jesúsän, mänit yajcädaawä ja'a mœjcu'ujäm. Mänit yajtsäyuyy. Mänitä Jesús ja'a mœjcu'u yhœxquejxy. Mänitä craa ñähwaach. Mänitä tieedy yajcœ'œdägœoyy. ⁴³ Mänitä cu'ughajxy nägœxiä yagjuœoyy coo ja'a Dios miœjja jiaançhä, nebiä Jesús ja'a hijxtahñd hänäjty yajcähxœ'œguiän.

Mänitä Jesús ñämaayy ja'a jiamiœœdhajxy:

⁴⁴ —Hoy hajxy wiinjuœ'œw; ca'a hajxy mjahdiägoy; hœœch ja'a Diosqueypä, nmäd-síphœch hajxy jim xyajcœ'œdägœ'œwaamb maa ja'a cu'ughajxiän nägœxiä.

⁴⁵ Pero cabä jiamiœœdhajxy ñä'ägädä wiinjuœoyy neby hajxy hänäjty tœœ miœœdmädi-a'agyijän. Hix, Jesús jadhun ca'a yajwiinjuœoyy. Cab hajxy jadhun yajtœoyy. Tsähgœœby hajxy hänäjty.

⁴⁶ Mänit hajxy tiägœoyy yajtsiptaacpä pœñ cuhdujt maas mœj mo'owáanäp.

⁴⁷ Ñajuœœbiä Jesús hänäjty nebiaty hajxy hänäjty tiagy miay. Mänitä pigäna'c hoy tu'ug wioy, piädaacy miœjc-haamby. ⁴⁸ Mänit miänaañ:

—Pœñ hädaa pigäna'c jadhun tsógäp ja'a hœœchœxpä, jadhun mäwíinäts hœœch xchojpa. Y pœñhœch jadhun xchojp, je'eçh nDeedy jadhun xjiahmiéjtsäp ja'açh jadhun tœœ xquiéxiäbä. Pœñ ja'a mœjcuhdujt ca'a tsogaamb maa mijtsän, je'eds ja'a mœjcuhdujt jadhun nä'ägädä mo'owáanäp.

⁴⁹ Mänitä Juan miänaañ:

—Wiindsøn, tœœ hœjts tu'jäya'ay nhixy. Miiçhcœxpä ja'a mœjcu'u hijty yhœxquexy. Mänit hœjts jadhun nnämaayy coo quia'a hœxquéjxnät, je'eguiœxpä coo hœjts xquia'a mœœdwädíjtäm.

⁵⁰ Mänitä Jesús miänaañ:

—Cab hajxy jadhun cu mnämaayy. Pœñ hœjts jadhun xquia'a mädsiphájtäm, je'e hœjts jadhun xmiägu'ughájtäm.

⁵¹ Tœœ hänäjty miäwiingoonnä coo ja'a Jesús hänäjty ñœcxaannä tsajpootyp, mänitä jioot yajmœœdmädiaacy coo jim ñœcxnät Jerusalén. ⁵² Mänitä jiamiœœd mejtstägœœg quiejxœ'cy. Mänitä mejtstaact hajxy hoy jia hœxta'ay maa ja'a cajpthuung tu'ugän jim Samarianaaxooty. ⁵³ Pero cab hajxy jadhun ñä'a tœjmooyy, je'eguiœxpä coo hajxy hänäjty jim jiaac nœcxa'añ Jerusalén. Hix, cabä Samariabä-jäya'ayhajxy hänäjty miœœdnijiootpaadyii ja'a jäya'ayhajxy hänäjty tsänaabiä Jerusalén. ⁵⁴ Coo ja'a Jacobo jadhun miädooyy mœœdä Juan, mänitä Jesús hajxy ñämaayy:

—Wiindsøn, tähooc ja'a Elías jœœn jim miœjyaaxy tsajpootyp nebiä haxœœgjäya'ay-hajxy jadhun tióyät. Nej, mmäná'anäp miiçh jadhun coo hœjts jœœn jim nmœjyáaxpät tsajpootyp neby hajxy jadhun tióobiät ja'a hœjts jadhun xquia'a tœjmo'owaambä.

⁵⁵ Mänitä Jesús wyiinhee'ppejty; mänit yhojy:

—Mijts, cab hajxy mnajuœ'œy coo haxœœgwiinmahñdy hajxy mmœœdä. ⁵⁶ Páadyhœch yaa tœœ ngäda'agy hädaa yaabä naaxwiin nébiœch ja'a jäya'ayhajxy jadhun nyajnahwa'ads nyajcuhwá'adsät. Cábœch hajxy jadhun nyajcuhdägoyya'añ.

Mänit hajxy jim tiu'ubœjnä, ñœcxy hajxy wiingcajpt.

⁵⁷ Jim hajxy hānajtŷ tiu'uyo'oyñā, mānitā jāya'ay hajxy tu'ug piaaty jim tu'haam. Mānitā Jesús ñāmaayyā:

—Wiindsōñ, nja wi'i pianōcxáambiōch miīch majaty miīch mnōcxa'añān.

⁵⁸ Mānitā Jesús miānaañ:

—Ja'a xōōgaa, jimā jiuŷ je'e; ja'a muuxy, jimā pie'eñ je'e; pero hōōch ja'a Diosquexpā, cābōch ndōjc jaduhñ maačh nboo'x nhāñá'awāt.

⁵⁹ Mānitā Jesús wiinghāna'c ñāmāguiumbā:

—Hōōch padu'ubōjcāc.

Mānitā Jesús ñāmaayyā:

—Mānitōch miīch nbadu'ubōgāt coōch ndeedy hānajtŷ tōō yho'nā, coōch hānajtŷ tōō nyajnaaxtāgōōñā.

⁶⁰ Mānitā Jesús miānaañ:

—Ja'a jāya'ayhajxy ca'a mǎbōjpa, je'e miīch ja'a mdeedy hajxy xyajnaaxtāgō'owāanāp. Pero miīch, nōcx ja'a Diosmādia'agy yajwa'x coo ja'a Dios ja'a miājaa yajcāhxō'oga'añ.

⁶¹ Mānitā Jesús ñāmaayyā wiingjāyá'ayāgumbā:

—Wiindsōñ, nja wi'i pianōcxáambiōch miīch, pero nōcxyhōch ja'a njujy nmāgu'ug nhuuc hawaanā jayōjp coōch miīch jaduhñ nbadu'ubōgaannā.

⁶² Mānitā Jesús yhadsooyy:

—Pōñhōch jaduhñ xjia wi'i piawāditaamb, coōch nmādia'agy hamuumdu'joot xquia'a mǎbōjcāt, cābōch jaduhñ hoy xpianōcxāt.

10

¹ Mānitā Jesús jāya'ay jiaac wiimbiiyy nādāgōōghii'xcumajc. Mānit hajxy metscaty metscaty quiejxō'cā majaty ja'a Jesús hānajtŷ ñōcxa'añān. ² Mānit hajxy ñāmaayyā:

—Nāmāyā jāya'ayhajxy jia mǎbōga'añ; je'eds ca'a hijp pōñ ja'a Diosmādia'agy yajwá'xāp. Mānuu'xta'ag ja'a Dios hajxy coo ja'a Diosmādia'agy-yajwa'xpā jiaac quéxāt. ³ Nōcx hajxy. Mnigwieendāhadōōjāp hajxy. Ca'awiindōyhāna'c-hagujc hajxy mwādita'añ. ⁴ Cabā xuummy hajxy mmānōcxāt, ni xādō'ōñ. Tu'tehngā cō'og hajxy mmānōcxāt. Cab hajxy pōñ mwiindānaaxiōbāt tu'haam. ⁵ Coo hajxy muum maa mhamejtstā'agāt, myajpōo'xāp ja'a cudōjc hajxy. “Weenā Dios hajxy xmio'oy ja'a hoyhajt ja'a weenhajt.” Jaduhñ hajxy mnāmá'awāt. ⁶ Pō hojiāya'ay ja'a cudōjc-hajxy jaduhñ, mānitā Dios jiaanč mō'owāt ja'a hoyhajtŷ ja'a weenhajt; pō caj, cab hajxy jaduhñ mio'owōōjāt. Y cab hajxy jim mnā'agā mǎhmō'owāt. ⁷ Cab hajxy tōjc-tōjc mwādītāt. Jim hajxy mnā'agādā hídāt maa hajxy hānajtŷ tōō mmejtsta'aguiān. Jim hajxy mmāhu'ug mmāgāyāt. Je'e hajxy jaduhñ mhú'ugāp mgāyāp tijaty hajxy jaduhñ xmiooby. Hawiinmats jaduhñ coo hajxy jaduhñ xmió'owāt, je'eguiōxpā coo hajxy mwiinguexiā. ⁸ Homiādyii cajptā hajxy jaduhñ xtiōjmō'owāt, mgāyāp hajxy jaduhñ tijaty hajxy xmiooby. ⁹ Myajmōcpōgāp ja'a pa'amjāya'ay hajxy maa ja'a cajptān. Jaduhñ hajxy mnāmá'awāt: “Tōō miāwiingoōnnā coo ja'a Dios ja'a miājaa yajcāhxō'oga'añ ja'a mijtsōxpā.” ¹⁰ Pero homiādyii cajptā hajxy jaduhñ xquia'a tōjmō'owāt, callejooty hajxy nōcxy mya'axy: ¹¹ “Hādaa cajpt yaabā, cabā quiuhdujthajxy yhooyā. Paady hōjts ndecy nwiinwoba'añ. Jaduhñā hijxtahñd miāhmō'owāt coo ja'a mguhdujthajxy quia'a hoyyā. Mjahmiédspā hajxy jaduhñ coo miāwiingoōnnā coo ja'a Dios ja'a miājaa yajcāhxō'oga'añ ja'a mijtsōxpā.” ¹² Tōyhājthōch jaduhñ nmāna'añ, coo ja'a naaxwiimbā hānajtŷ wyiimbida'añ, maas hanaxiā ja'a cajpt jaduhñbā chaāchpōga'añ quejee ja'a Sodomacajpt jecy chaāchpōjquiān.

¹³⁻¹⁴ 'Mjaanč tehñ chaāchpōgaamb hajxy pōnjaty jim tsānaaby Corazincajptooty mōōdā Betsaidacajptooty. Maas hanaxiā hajxy mdsaačpōga'añ quejee ja'a jāya'ayhajxy jecy chaāchpōjquiān, ja'a hajxy jecy tsānāyābā Tirocajptooty mōōdā Sidōncajptooty. Coo je'e hajxy cu yhijsy ja'a hijxtahñd nej mijts mja hixiān, cu ñajtshixōōy ja'a yhaxōōgcuhdajt hajxy; cu jiōōy cu xiuu'ch hajxy jaduhñ. ¹⁵ Y mijts jim tsānaabiā

Capernaum, haagä jii by mijts mhäda'aga'añ møjcu'uhaam. Cab hajxy jim mnöcxa'añ tsajpootyp neby hajxy mdiijian.

¹⁶ Mänitä Jesús nämaayy ja'a jiamiödhajxy ja'a nädägöghii'xcumajcpä:

—Pönjaty mijts mmädia'agy xyhamädoowhijtäp, jaanä jadúhnhöch nmädia'agy hajxy xyhamädoowhijtäbä. Pero pönjaty mijts mmädia'agy xquia'a hamädoowhijtäp, ni hөөч nmädia'agy hajxy xquia'a hamädoowhijtäbä; ni ja'a nDeedyhöch miädia'agy xquia'a hamädoowhijtäbä, ja'ačh tөө xquiéxiäbä.

¹⁷ Mänitä nädägöghii'xcumajcpähajxy tiu'uböjcy Diosmädia'agy-yajwa'xpä. Cujecy hajxy wyiimbijtagajch. Jaančh tehñ jiootcujc hajxy hänäjty. Mänit hajxy miänaañ:

—Wiindsön, höxtä ja'a møjcu'u höjts nmädia'agy hajxy tөө xmiäböjčä ja'a mi-ichcöxpä.

¹⁸ Mänitä Jesús miänaañ:

—Tøyhajt jaduhñ. Nhíjxhöch ja'a Satanás coo jim quiahy tsajpootyp. Nebiä wädsucän jaduhñ jiatcöoyy. ¹⁹ Huuc mädown hajxy, tөөч mijts ja'a mäjaa nmo'oy coo mijts tsahñdy myajteenät möödä caa'pty, y coo ja'a møjcu'u hajxy mga'a yajmäjäda'agät; y cab hajxy nej mjada'añ. ²⁰ Paady hajxy mxoondá'agät coo ja'a mxөөhajxy jim yhity cujaay tsajpootyp. Cab jaduhñ ñejpiä pө tөө ja'a møjcu'u ja'a mmädia'agyhajxy xmiäböjčä.

²¹ Mänitä Jesús jiaančh tehñ yajxoondaacpöjčä ja'a Dioshespíritu. Mänitä Jesús miänaañ:

—Teedy, miíchäts jim Wiindsönhajp tsajpootyp mööd hädaa yaabä naaxwiin. Chojpy miích mjoot jaduhñ coo ja'a hajxy ca'a höxpöcypä wyiinjuó'owät tijaty ja'a hajxy höxpöcypä tөө mga'a yajwiinjuó'oy. Páadyhöch miích hoy nnänömy.

²² Mänitä Jesús nämaayy ja'a jiamiödhajxy:

—Tөөч nDeedy ja'a cuhdujt xquiöxy mo'oy. Cáböch pөн xñajuó'oy pönhöch hөөч, jagóoyyöch nDeedy jaduhñ xñajuó'oy. Y jagóoyyöch nDeedy nnajuóöbiä. Ñajuóöby hajxy je'ebä pönjátyhöch tөө nyajnähdijy coo hajxy ñajuó'owät.

²³ Mänitä Jesús ja'a jiamiöod wyiinhee'ppejty ja'a hajxy nämajmetspä. Mänit hajxy hawiing nämaayyä:

—Jootcujc hajxy jaduhñ mhídät je'eguiöxpä coöch mijts ja'a hijxtahñd may tөө nyajnähixö'oy. ²⁴ Tøyhájtthöch jaduhñ nmäna'añ. Ja'a Diosmädia'agy-yajwa'xpähajxy möödä gobiernähajxy, nämay hajxy jia hixaañ tijaty mijts mhijxyp. Nämay hajxy jia mädownaañ tijaty mijts mmädooby.

²⁵ Mänitä ley-yajnähixööbiä tu'ug tiänaayyö'cy. Mänitä Jesús hoy miäyajtöy:

—Wiindsön, tiích ngudiúnäp nébiöch cöjxta'axiöө njugyhädät nebiä Dios jiugyhatiän. Paadiä Jesús jaduhñ nämaayyä, nä'a mädia'agyhixáanäp hänäjty je'e waamb hänäjty yhadsowa'añ. ²⁶ Mänitä Jesús yhadsooyy:

—Neby jaduhñ jim myiñ cujaay maa ja'a leyän. Neby jaduhñ mwiinjuó'oy.

²⁷ Mänitä ley-yajnähixööbiä yhadsooyy:

—Jaduhñ jim myiñ maa ja'a leyän coo ja'a Dios mwiingudsähgö'owät hamuumdu'joot. Jaanä jaduhñ jim myiimbä coo hopionä mdsógät mba'häyówät nebiä mni'x nebiä mgopc mdsöquian.

²⁸ Mänitä Jesús miänaañ:

—Hoy jaduhñ tөө mhadsoy; coo jaduhñ mgudiúnät, mänit jim mnöcxät tsajpootyp.

²⁹ Pero yajcumayaambä ley-yajnähixööbiä hänäjty. Mänit miänängumbä:

—Pөн jaduhñ mnänöömby coöch hopionä ndsógät nba'häyówät.

³⁰ Mänitä Jesús yhadsoögumbä:

—Nhuuc yajmöödmädiá'agyhöch mädia'agy tu'ug, nej miích jaduhñ hoy mwiinjuó'owät. Jiibiä jäya'ay hänäjty tu'ug yhäda'agy Jericó. Jerusalén hänäjty tөө chohnda'agy. Tu'haamhádaacpä ja'a mee'tspä piaaty. Cöjx jaduhñ miée'tsäxä möödä wyit. Mänit hoyhoy wiobho'cä. Nebiä ho'ogypiän hajxy jaduhñ ñähgueecy. ³¹ Mänit teedywiindsön tu'ug ñajxy. Coo ja'a mähdiojč jaduhñ yhjxy, cab jaduhñ tiänaaxiojpy. Jiuhyohy jaduhñ. ³² Jaduhñdsä tsajtöjcueendähajpä tu'ug ñajxpä; jaduhñ je'e jiuhyohbiä.

³³ Mänitä Samariabäya'ay tu'ug ñajxpä. Coö jaduhñ yhiyx, mänitä hojioot miøødhajty.

³⁴ Mänitä mähdiøjc chooyøøyy aceitehaam møødä vinohaam. Mänit yhamäguyty withaam maa hänajty tøø jiotiän. Mänitä yhamdsoo jäyujcøxp yujtsehñ. Mänitä mähdiøjc hoy ñajtsøømø'øyii maa ja'a mejtstaactän. Mänit jim yhiyxä. ³⁵ Cujaboomä Samariabäya'ay ja'a cudøjc plataxädø'øñ metsc miooyy. Mänit ñämaayy: “Tuñä mayhajt, huuc cueendähat yø'ø mähdiøjc. Mäduhñtiä xädø'øñ mjaac yajtuñ, mänitøch jaduhñ nmoodiägätsät coöch nwiimbijtägätsät.”

³⁶ Mänitä Jesús ja'a ley-yajnahixøøbiä miäyajtøøyy:

—Pøn maas hoyhäna'c tøø piädsømy yø'ø nädägøøgpähajxy.

³⁷ Mänitä ley-yajnahixøøbiä yhadsooyy:

—Ja'a häna'c hojioot møødhájtäbä.

Mänitä Jesús miänaañ:

—Nøcx, y jaduhñ miich hojioot mmøødhájpät.

³⁸ Mänitä Jesús hajxy tiu'ubøjcumbä. Mänit hajxy miejch wiingcajttooty. Mänitä Jesús yajtøjtägøøyyä ja'a to'oxiøjc tu'ug ja'a xøhájpä Marta. ³⁹ Jimä Marta piuhdo'oxy hänajty tu'ug ja'a xøhájpä María. Mänitä María ja'a Jesús wyiinhøxtaacy. Yhamädoowhidaamby hänajty je'e waambaty ja'a Jesús hänajty miädia'aga'añ. ⁴⁰ Pero wyi'i jioodhadóøtsäp ja'a Marta tiuung hänajty. Mänitä Jesús ñämaayy:

—Wiindsøn, nej miich jaduhñ mnijiäwø'øyii coöch nbuhdo'oxy ja'a tuung tøø xyajmänähgueegø'øy. Huuc näma'aw weenç xpiuhbety.

⁴¹ Mänitä Jesús yhadsooyy:

—Marta, Marta, madiu'u miich mwi'i tiajy mwi'i miay. ⁴² Tu'tu'uyyä jaduhñ yhawiinmatsä. Hoyyä mbuhdo'oxy jaduhñ quiudiuñ. Cabä María ja'a cuhdujt jaduhñ pøn piögáañäxä coöch nmädia'agy jaduhñ xyhamädoowhíjtät.

11

¹ Wiingtuumä Jesús ja'a Dios hänajty pia'ya'axy. Coö pia'yaaxpädøøyy, mänitä jiamiøød tu'ug miänaañ:

—Wiindsøn, højts Diospa'ya'ax yajnahixøøyyäc nebiä Juan ja'a jiamiøød yajnahixøøyyän.

² Mänitä Jesús miänaañ:

—Coö ja'a Dios hajxy hänajty mba'ya'axa'añ, jaduhñ hajxy mmäná'anät:

Dios, miich højts nDeedyhajpy. Jim mhity tsajpootyp.

Weenä jäya'ayhajxy nägøxiä xwyiingudsähgø'øy. Weenä mmäjaa myajcähxø'øgy.

Weenä mmädia'agy hajxy yaa xmiäbøjcä hädaa yaabä naaxwiin neby hajxy jim xmiäbøjcän tsajpootyp.

³ Móoyyäc højts ja'a cay jäda'axøø neby højts cu'uxiä ngáyät.

⁴ Højts ja'a pojpä cädieey mämée'xäc neby højts jaduhñ nmämee'xiän pønjaty højts xñägädieeyøøby.

Cabä møjcu'ugong cuhdujt mmó'owät coö højts xjiøjcapxó'owät, coö højts ja'a haxøøgpä xyajnähdíjtät.

⁵ Mänitä Jesús miänáangumbä:

—Tsøg hajxy jaduhñ mänáañäm coö mijts mmägu'ughajpä mmøødä tu'ug. Coö miich cuptsuhmdä nøcxy mnäma'ay: “Mägu'ughajpä, høøchä tsajcaagy tägøøg yajyujwáañäc.

⁶ Ja'a nmägu'ughájjøch tu'ug tøø miech. Jäguem choöñ. Cábøch tii nmøødä tiiich jaduhñ nnä'ä mó'owäp.” ⁷ Wehñdä mmägu'ughajpä jiiby tøgooty xyhadsówät: “Ca'a xyhadsipy.

Hagø'øy ja'a tøjcän. Tøø højts ngøxy maaho'nä móødhøch nhuunghajxy. Cábøch nbädø'øgaannä coöch miich jaduhñ tijaty nmó'owät.” ⁸ Tøyhájthøch jaduhñ nmäna'añ,

hoy jaduhñ xjia mägu'ughaty, cab jaduhñ xñä'ä näbädø'øgáambät coö miich tijaty xmió'owät. Pero coö miich tehngajnä mwi'i né'emät, mänit jaduhñ piädø'øgät, mänit jaduhñ xmió'owät tijaty miich hänajty myajmaajiajpy. ⁹ Tøyhájthøch jaduhñ nmäna'añ,

coo mijts ja'a Dios tijaty mmäyujwá'anät tehngajnä, tsipcøxp jaduhñ xñä'ägädä mó'owät.
¹⁰ Coo pønä Dios tijaty miäyujwá'anät tehngajnä, tsipcøxp jaduhñ ñä'ägädä mo'owa'añii.

¹¹ Pø jim mhuunghajxy, coo tsajcaagy xmiäyujwá'anät, cabä tsa mmo'owa'añ; coo hacx xmiäyujwá'anät, cabä tsahñdy mmo'owa'añ. ¹² O coo tseediu'udy xmiäyujwá'anät, cabä caa'pty mmo'owa'añ. ¹³ Hojiatypä ja'a mhuung hajxy jaduhñ mmooby, hoy hajxy mja ca'awiindøyyä. Mänaxiä ja'a mDeedyhajxy jim tsajpootypä xmió'owät ja'a yhEspíritu coo mijts jaduhñ mmäyujwá'anät.

¹⁴ Wiinghoocä Jesús ja'a møjcu'u hánajty yhøxquexy. Tøø jäya'ay hánajty tu'ug yaghu-umyüi. Coo ja'a mähdiøjc ñähwaatsnä, mänit quiapxø'nä. Yagjuøøyy ja'a jäya'ayhajxy jaduhñ. ¹⁵ Pero näje'e hajxy jaduhñ miänaañ:

—Yø'ø craa, ja'a møjcu'ugongä miäjaa jaduhñ miøødhájtäp, paadiä møjcu'u yhøxquexy. Ja'a møjcu'ugong, ja'a møjcu'u wyiindsønñhajxy je'e.

¹⁶ Näje'e häna'c ja'a Jesús hajxy hánajty ñäma'ay coo hijxtahñd ween yajcähxø'øgy, ja'a jim tsajpootypä. Wyiinmahñdyhixaambiä Jesús hajxy hánajty. ¹⁷ Pero ñajuøøbiä Jesús hánajty nebiaty hajxy hánajty wyi'i tiajy wyi'i miay. Mänit miänaañ:

—Homiädyii cajptä, coo ja'a cu'ughajxy ñiyhawiingpäda'agóøjät, coo hajxy tu'tøjc ñimiädsibø'øwøøjät, cuhdägóyyäp ja'a chäna'ahajxy jaduhñ. ¹⁸ Jaanä jaduhñduhmbä, coo Satanáshajxy ñimiädsibø'øwøøjät, cuhdägóyyäp hajxy je'ebä. Mijts jaduhñ mänaamb cooçh tyijy ja'a møjcu'uhajxy nhøxquexy ja'a møjcu'ugongä miäjaagøxpä. ¹⁹ Pero coo häxøpy jaduhñ tiøyyä, maa mijts mjamiøød ja'a mäjaa hajxy yhuuc paatpä coo ja'a møjcu'u hajxy yhøxquexy. Cähxø'p jaduhñ coo mijts ja'a tøyhajt hajxy mga'a møødä. ²⁰ Pero høøçh, ja'a Diosmäjaagøxpøch ja'a møjcu'uhajxy nhøxquexy. Y cähxø'p jaduhñ coo miäwiingoonnä coo Dios ja'a miäjaa yajcähxø'øga'añ ja'a mijtsøxpä.

²¹ Tsøg jaduhñ mänáañäm, coo ja'a jäya'ay jaançh møcpä cwieendähädät ja'a yhamdsoo tøjc, coo pujxt coo wojpt hánajty miøødä, cabä mee'tspä jaduhñ tiägó'owät. ²² Pero coo jäya'ay maas ca'awiindøybä miédsät, cabä cudøjc jaduhñ miäjädä'agät. Pøjcäxäp ja'a piujxt ja'a wiojpt jaduhñ ja'a tyijy yajmäjäda'agaambiä. Møød jaduhñ piøjcäxäbät tijaty jiiby miøød tøgooty. Y høøçh, jaduhñ mäwíinäts høøçh ja'a møjcu'ugong nga'a yajmäjäda'agy.

²³ Pøñhöch jaduhñ xquia'a møødpädø'p, høøçh nmädsip je'eduhñ. Y pøñhöch jaduhñ xquia'a møødtuumb, je'e jaduhñ yajma'p pønjátyhöch nmädia'agy xjia wi'i miäbøgáañäp.

²⁴ Mänitä Jesús miänáangumbä:

—Tsøg jadähooc mädiáaccumbä. Coo ja'a møjcu'u piädsómät maa jäya'ay tu'ugän, mänit tiägø'øy poo'xtaacthøxtaabiä pactuum. Y coo jaduhñ quia'a páadät, mänit miäna'añ cooc jim wyiimbida'añ maa tøø yhuuc pädsømbän. ²⁵ Coo jim mietstägátsät maa ja'a jäya'ayän, tøø ja'a jäya'ay hánajty wyiinmahñdymech nebiä tøjc wa'adspän. ²⁶ Mänitä møjcu'u ja'a jiamioød nøcxy wioy juxtujc ja'a maas haxøøgpä. Mänit hajxy nägøxiä tiägø'øy maa ja'a jäya'ayän tsánaabiä. Y maas haxøøg ja'a jäya'ay ñä'ägä jaty quejee hánajty.

²⁷ Jimä Jesús hánajty miädia'agyñä, mänitä to'oxiøjc tu'ug yaaxy cu'ughagujc:

—Jootcujc miich mdaj mdsi'tsc jaduhñ yhyty je'eguiøxpä coo miich tøø xyajtso'ogy tøø xyajyeegy.

²⁸ Mänitä Jesús miänaañ:

—Je'eds maas jootcujc hijp, pønjataiä Diosmädia'agy cudiumb.

²⁹⁻³⁰ Tehngajnä ja'a Jesús ja'a cu'ug hánajty jiaançh tehñ ñämugø'øyüi may. Mänitä Jesús miänaañ:

—Cabä jäya'ay howyüinmahñdy hajxy miøødä, ja'a hajxy jäda'ahatypä. Ja'a hijxtahñd hajxy jia wi'i yhixaamby, ja'a hoy-yagjuøøñbä. Pero cab hajxy jaduhñ yaghixa'añii. Jagooyä hajxy jaduhñ yhixa'añ cooçh høøçh jaduhñ njada'añ nebiä Jonás jecy jiajtiän mänaa jim quiexyüijän Nínivecajptooty. Dios jaduhñ quejx. ³¹ Coo jaduhñ yhabáadät coo ja'a jäya'ayhajxy hánajty yajnähdiä'añii, mänitä to'oxiøjc piädø'øga'añ, ja'a jecy

hanéhmäbä jim jäguemnaax ja'a jøombojmanajpä. Je'e jaduñ mäna'anaamb coo ja'a jäya'ayhajxy jäda'ahatypä piäda'agóøjät haxøøgtuum. Je'eds ja'a Salomón hoy tøø miämädoona'ay, je'eguiøxpä coo ja'a Salomón hänajty jiaanč tehñ quiuhwijjiä. Y cabä Salomón cuhdujt hänajty jiaty møødä nébiøch høøch jaduñ nmøødän. ³² Y ja'a jäya'ayhajxy jecy tsánaayyäbä Nínivecajptooty, jaduñ hajxy miäna'anaambä coo ja'a jäya'ayhajxy jäda'ahatypä piäda'agóøjät haxøøgtuum. Coo ja'a Jonás ja'a Diosmädia'agy hoy yajwa'xy jim Nínivecajptooty, mänitä jäya'ay ja'a yhaxøøgwiinmahñdy hajxy ñajtshixøøyy. Y cabä Jonás cuhdujt hänajty jiaty møødä nébiøch høøch nmøødän.

³³ 'Coo ja'a jäya'ay jøøn hajxy quiuhno'ogø'øy, cøxp hajxy jaduñ piäda'agy, nebiä jäya'ayhajxy jaduñ quiudøø'xóøjät ja'a hajxy tøjtagøøbiä. Cabä jøøn hajxy yu'učh, ni cab hajxy quiuhjupy cajonghaam. ³⁴⁻³⁶ Cooch mijts ja'a nmädia'agy hamuumdu'joot xmiäbójcät, hoy hajxy jaduñ mwädítät homiänaajä. Pero cooch nmädia'agy hajxy xquia'a mäbójcät, hagoodstuum hajxy jaduñ mhídät. Homiänájøch nmädia'agy hajxy xmiäbójcät neby hajxy hagoodstuum mga'a cá'awät.

³⁷ Coo ja'a Jesús miädiacpádøøyy, mänitä Jesús wioonøcxä mägaabiä ja'a farisewäm. Coo jim miejch maa ja'a fariseo tiøjcän, mänit yhäñaaguiädaacy meexäwiinduum. ³⁸ Jaguiø'øbuju ja'a Jesús yhäñaaguiädaacy. Caj quiø'øbuju nebiä judíoshajxy hänajty quiuhdujthatiän. Coo hajxy hänajty tiägø'øwa'añ caabiä, mänit hajxy hänajty quiø'øbuju. Coo ja'a Jesús quia'a cø'øbuju, yagjuøøyy ja'a fariseo jaduñ. ³⁹ Mänitä Jesús miänaañ:

—Mijts fariseodøjc, jaduñ hajxy mja wi'i quiähxø'øga'añ nebiä hoyhäna'cän jim cu'ughagujc. Pero cabä mjoot cabä mjuøhñdyhajxy yhooyä, je'eguiøxpä coo hajxy mwi'i mieech mwi'i pioty. ⁴⁰ Caj mijts mwiinmahñdy yhooyä. Tøø ja'a Dios ja'a mni'x ja'a mgopc-hajxy xquiunuu'xä. Tøø ja'a mjoothajxy xjia cunúu'xäbä coo ja'a mjuøhñdyhajxy hoy cu mhijty. ⁴¹ Coo ja'a häyoobäya'ay hajxy mbuhbédät hamuumdu'joot, mänit hajxy jaduñ mnähwá'adsät.

⁴² 'Mijts fariseodøjc, haxøøg hajxy mjada'añ mhabeta'añ. Xiøøbä hajxy mja nä'a wi'i quiuyoxø'øy yø'øbi'c jøø'xychooy jiiby tsajtøgooty. Pero cabä Diosmädia'agy hajxy mgudiuna'añ maa jaduñ myiñän coo hajxy hoy mwädítät, coo ja'a Dios hajxy mwiingudsähgø'øwät. Pedyii ja'a Diosmädia'agy hajxy mgudiúnät.

⁴³ 'Mijts fariseodøjc, haxøøg hajxy mjada'añ mhabeta'añ. Mjaanč tehñ ya-jcumayaamb hajxy jaduñ. Jiiby hajxy mja wi'i yhäña'awa'añ maa ja'a häñaabiejt hojiatypän jiiby tsajtøgooty. Y chojpy ja'a mjoothajxy jaduñ coo ja'a cu'ug hajxy xi'ig xon xwyiingudsähgø'øwät jiiby halaplaaz.

⁴⁴ 'Mijts fariseodøjc, mijts ley-yajnähihøøbiädøjc, mhøhndaacp hajxy jaduñ. Cab hajxy myajcähxø'øgy coo ja'a mguhdujthajxy quia'a hoyyä. Y pønjaty ja'a mmädia'agy-hajxy xpianøcxäp, tu'udägooby hajxy je'ebä, je'eguiøxpä coo hajxy quia'a najuø'øy coo mijts mguhdujt jaduñ yhaxøøgä.

⁴⁵ Mänitä Jesús ñämaayyä ja'a ley-yajnähihøøbiä tu'ug:

—Wiindsøn, coo jaduñ mmäna'añ, haxøøg højts jaduñ xñänøømbä.

⁴⁶ Mänitä Jesús miänaañ:

—Mijts ley-yajnähihøøbiädøjc, jaanä haxøøg mijts mjadaambä mhabetaambä. Hanaxiä mijts ja'a tsipjatypä myajnähihø'øy. Ni pøn jaduñ quia'a jada'añ nej mijts myajnähihø'øyän. Y cab hajxy hamdsoo mgudiuna'añ neby hajxy myajnähihø'øyän ni weeñtiä.

⁴⁷⁻⁴⁸ 'Haxøøg hajxy mjada'añ mhabeta'añ. Haxøøg mijts mguhdujt nebiä mhap ja'a mdeedyhajxy hijty chäna'ay yhäyoyyän jegyhajty. Je'eds hajxy jaduñ yagho'c ja'a Diosmädia'agy hajxy jecy yajwá'xäbä. Y mijts ja'a tiøjc-huunghajxy myajcójjap maa hajxy jecy ñaaxtägøøyyän. Myajcähxø'py hajxy jaduñ coo ja'a mhap ja'a mdeedy hajxy tu'ugwiinmahñdy mmøødhity.

⁴⁹ 'Najuøøbiä Dios jaduñ. Je'e jaduñ mänaañ: “Nguexáambiøch nguguexyhajxy maa yø'ø häna'c-hajxiän. Näj'ejøch nguguexyhajxy xyagho'ogaañä. Naje'e hajxy

ñä'ä tsaächtiuna'añii." ⁵⁰ Ja'a jäya'ayhajxy jäda'ahatypä, pojpatuum cädieedium hajxy jaduhñ miähmø'øwa'añ ja'a Dios quiugueycøxpähajxy, ja'a hajxy tøøbä yagho'ogyíjábä nägøxiä. Mänit hajxy tiägøøyyä yaghó'cäbä mänaa hädaa yaabä naaxwiin yhawijy tiøø'xta'aguiän. ⁵¹ Møødä Abel yaghó'cäbä møødä Zacarías. Tsajtøghaguuy ja'a Zacarías yagho'cä jim mädøyyä maa ja'a altarän. Tøyhajt jaduhñ coo ja'a jäya'ayhajxy jäda'ahatypä miähmø'øwa'añ pojpatuum cädieedium.

⁵² 'Mijts ley-yajnahixøøbiädøjc, haxøøg hajxy mjada'añ mhabeta'añ. Cabä cu'ug ja'a tøyhajt hajxy mnä'ä mo'owa'añ. Cabä tøyhajt hajxy hamdsoo mnä'ä tsoy. Mijts ja'a cu'ug mwil'i quiapxhiimby nebiä tøyhajt hajxy jaduhñ quia'a páadät.

⁵³ Mänitä Jesús jiaančh tehñ miäjootma'tä ja'a fariseodøjc møødä ley-yajnahixøøbiädøjc. Mänit hajxy tiägøøyy mäyajtøøbä madiu'u. ⁵⁴ Jia wiinmahñdyhixaan ja'a Jesús hajxy jaduhñ neby hajxy jaduhñ cu yajnahdsøømy.

12

¹ Mänitä jäya'ayhajxy yhamugøøyy milhaam høxtä niñø'tsmujcä hajxy jaduhñ. Mänitä Jesús ja'a jiamiøød hawiing ñämaayy:

—Cabä fariseos miädia'agy hajxy mmäbøjcät. Nämäy häna'c jaduhñ tiu'udägoy coo ja'a fariseos miädia'agy hajxy miäbøjcä. Hix, høhndaacp ja'a fariseoshajxy jaduhñ. Yajnajuo'øwaamb jaduhñ tsipcøxp coo hajxy jaduhñ yhøhnda'agy. Hoy hajxy hoy jia capxy jia mädia'agy, cab hajxy hamdsoo hoy quiudiuñ. ² Hix, cab jaduhñ tii ñä'ägädä mähmø'øwa'añ jañägapxy. Haagä cähxø'øgaamb jaduhñ cøxiä. ³ Jaanä jaduhñduhmbä ja'a mijtsøxpä, waambaty hajxy tøø mmäna'añ hamee'ch, yajmädowaamb jaduhñ cu'ughagujc.

⁴ 'Mägu'ughajpädøjc, cab hajxy mdsähgø'øwät pøn ja'a mni'x ja'a mgopc xyaghó'cäp. Cab jaduhñ nej xjiaac túnät. ⁵ Pero ja'a Dios hajxy jaduhñ mdsähgø'øwäp. Je'edsä cuhdujt møød coo ja'a mjogyhajthajxy xyajcuhdägóoyyät, y coo hajxy xpiädá'agät haxøøgtuum.

⁶ 'Høxtahmäsä muuxyhuunghajxy, hoy hajxy yaa tii quia'a ja wa'añ, jahmiejchpä Dios je'e. ⁷ Mänaxiä mijts ja'a Dios xquia'a jahmiédsät. Paady hajxy jaduhñ mga'a tsähgø'øwät. Xjiaančh tehñ chojp mijts ja'a Dios høxtä xmiooby hajxy tijaty hajxy myajmaajijpy.

⁸ 'Tøyhájthøch jaduhñ nmäna'añ, høøch ja'a Diosquexypä, pøn høch xquiapxpaatp cu'ughagujc, je'ečh jaduhñ ngapxpaattägatsaamb by jim tsajpootyp ja'a Diosmoonsäwi-induum. ⁹ Pero pøn høch jaduhñ xquia'a capxpaatp cu'ughagujc, ni je'ečh jaduhñ nga'a capxpaadaambä ja'a Diosmoonsäwiinduum.

¹⁰ 'Pøn høch haxøøg xñänøømb, mee'xáanäp je'e. Pero coo ja'a Dioshespíritu hajxy haxøøg ñänómät, cab hajxy jaduhñ miée'xänät.

¹¹ 'Coo mijts häna'c mädsibø'øbä xyajnöcxät tsajtøgooty o jim maa ja'a hagujtøjcän, cab hajxy mdaj mmáyät waamb hajxy mmädiá'agät, ¹² je'eguiøxpä coo ja'a Dioshespíritu hajxy xñajtsapxøoyyät waambaty hajxy jaduhñ mhadsówät.

¹³ Mänitä Jesús ñämaayyä tu'jäya'ay maa ja'a cu'ugän:

—Wiindsøn, nämáayyägøch nbuhya'ay coočhä nnädeedyñaax xpiuhmó'owät.

¹⁴ Mänitä Jesús miänaañ:

—Pøn høch tøø xquiuhdujtmø'oy coočh mijts nhané'emät.

¹⁵ Mänitä Jesús miänáangombä:

—Mnigwieendähadøøjäp hajxy coo hajxy tii mga'a hadsógät. Cab hajxy nøcxy mdajy mmay coo hajxy cøxiä mga'a møødä.

¹⁶ Mänit miänáangombä:

—Tsøg hajxy mänáanäm, jii jäya'ay hijty tu'ug jaančh tehñ miäyøø. Mänitä ñøø miooc may yajpädø'cy. ¹⁷ Mänit tiägøøyy tajpä maabiä: “Nébiøch nnøø nmooc ndúnät. Maačh jaduhñ nnä'ä pädá'agät.” ¹⁸ Mänit miänáangombä: “Tøøch nnajuø'øy maačh nbädá'agät. Nyajmä'adäbøch yø'ø ndsehñ. Maas crúundøch ngójät. Jíbyhøch nnøø nmooc ngøxy pädá'agät, mäduhñtiøch nmøødä. ¹⁹ Cábøch jaduhñ tii ndájnät

nmáañät. Jootcujc-høch jaduhñ ndsánáañät nhäyóonät majiomøjt. Poo'xáambøch, cayáambøch hu'ugáambøch, xoonða'agáambøch.”²⁰ Mänitá Dios ja'a craa ñämaayy: “Miiçh, cab jaduhñ mnä'ägä mæbøcy. Jáda'a coods mho'oga'añ. Yø'øduhñ tøø mwi'i piädá'aguiäbä, pøn jaduhñ mämähmø'øwaamb.”²¹ Jaduhñdsä mäyøøjäya'ayhajxy jiaty yhabety pønjaty maxiädø'øñ jaduhñ tehngajnä yajmujp yhamdsoogøxpähajxy. Pero maa ja'a Dioswiinduumän, häyoob hajxy jaduhñ.

²² Mänitá Jesús ja'a jiamiøød ñämaayy:

—Ca'a hajxy mdajy mmay tii hajxy mnäjyghadaamby, tii hajxy mgayaamby, tii hajxy mwihadaamby.²³ Cab hajxy nøcxy mdajy mmay coo hajxy cøxiä wiinä mga'a møødä.²⁴ Høxtahmñds yø'ø muuxyhajxy, cab hajxy tiuñ xiajy. Cab hajxy tii ñi'iby; cab hajxy tii yajpädø'øgy; cabä tsehñ hajxy miøødä. Ja'a Dios jaduhñ yagjøø'xp. Y mijts, mmaas tsoobaatp hajxy quejee ja'a muuxyhajxy.²⁵ Hoy hajxy mäduhñtiä mja taj mja máyät, cab hajxy hamdsoo mniyajeegøøjät ni weeñtiä.²⁶ Pø cab hajxy hoy hamdsoo mniyajeega'añii, cab hajxy tii mdaj mmáyät.

²⁷ Høxtahmñds yø'ø pøjy, yee'p yø'ø. Pero cab tiuñ xiajy; cab pyiidyhädiuñ. Tøyhajt jaduhñ, ni ja'a rey Salomón jecy quia'a nä'ägä mäbaaty nej yø'ø pøjjiän, hoy howyit hänajty jia møødä.²⁸ Hoyyá Dios yø'ø pøjy yajxón jia cunuu'xy, cab jiecyy. Mänaxiä mijts ja'a Dios xquia'a witmó'owät, hoy mijts jaduhñ mga'a ja mæbøcy.²⁹ Ca'a hajxy mwi'i tiajy mwi'i miay tii hajxy mgayaamby mhu'ugaamby.³⁰ Ja'a hajxy jaduhñ ca'a mæbøjpä, je'eds hajxy wyl'i tiajpy wyl'i miaaby. Pero mijts, ñajuøøbiä mDeedyhajxy tijaty hajxy myajmaajiajpy.³¹ Taj may hajxy nebiä Diosmädia'agy hajxy hoy mgudiúnät, mänitá Dios cøxiä xmió'owät.

³² Mägu'ughajpädøjc, ca'a hajxy mdsähgø'øy, hoy hajxy jaduhñ mja nä'ä weeñtiä. Chojpiä mDeedy jioot jaduhñ coo mijts xyhuunghádät.³³ Mdóogäp hajxy mäduhñtiä hajxy mmøødä; mänitá häyoobäya'ay hajxy mnä'ä mó'owät cøxiä. Jaduhñ hoyhajt weenhajt jim mbáadät tsajpootyp. Cab jaduhñ pøn jim tii xpiójcät.³⁴ Coo ja'a Diosmädia'agy hajxy hamuumdu'joot mgudiúnät, mbáadäp ja'a hoyhajt ja'a weenhajt hajxy jaduhñ. Coo ja'a yaabä naaxwiimbä hajxy mbøcjuó'owät, cab hajxy tii mbáadät.

³⁵⁻³⁶ Mänitá Jesús tiägøøyy mädiaacpä nebiä jiamiøødhajxy nähix hahixø'ø yhidät coo hänajty quiädaactägatsa'añ jadähooc. Mänit miänaañ:

—Nähix hahixø'ø hajxy mhídät nebiä homioonsähajxiän coo ja'a wyiindsøn'hajxy wyiimbídät mägaabiä mähuucpä maa ja'a pøc hu'ug jiadyiijän. Jøønmøød hajxy jaduhñ yhahixy. Coo ja'a wyiindsøn'hajxy miech maa ja'a tiøjcän, mänit hajxy yajtøjtägø'øy.³⁷⁻³⁸ Pø jujyñä ja'a mioonsähajxy hänajty, hoy ja tsuhmdä, hoy ja moññä, cumayaambä wyiindsøn jaduhñ. Tøyhajt jaduhñ. Høxtä yajcayøøjäp hajxy ja'a yhamdsoo wiindsøn.³⁹ Y jaaná jaduhñduhmbä, coo ja'a cudøjc jaduhñ ñajuó'owät mäduhñajtä ja'a mee'tspä miédsät, cab jaduhñ ñä'ägä maahó'ogät nebiä mee'tspä jaduhñ quia'a tøjtägø'owät.⁴⁰ Jaduhñ mijts nähix hahixø'ø mhíjpät. Cab hajxy mnä'ägä najuó'owät mänáajøch ngädaactägatsa'añ, høøch ja'a Diosquexypä.

⁴¹ Mänitá Pedro yajtøøyy:

—Wiindsøn, pøn miiçh hädaa myajmøødmädiaacpyy, højtsyähajtiä tøgä nägøxiä.

⁴² Mänitá Jesús yhadsooyy:

—Pøn jaduhñ cudiuumb nebiatiä wyiindsøn yhane'emiän, je'eds jaduhñ hoy copc-hajp maa ja'a wyiindsøn tiøjcän. Coo ja'a wyiindsøn maa ñøcxy, je'eduhñ mähmøøby coo jaduhñ yajcáyät pøn jiiby hijp tøgooty.⁴³ Pø cudiuumbä copc-hajpä hänajty hoy, coo ja'a wyiindsøn wyiimbijtagátsät, cumayáanäp jaduhñ ja'a wyiindsøn.⁴⁴ Mänitá wyiindsøn yajnáhdija'añii coo jaduhñ quiopc-hádät mäduhñtiä ja'a wyiindsøn miøødä cøxiä.⁴⁵ Pero coo ja'a copc-hajpä miäná'anät coo ja'a wyiindsøn quia'a tsoj medsa'añ, coo ja'a miämoonsä yhäyoowhíxät, coo tiägø'owät huucpä caabiä, coo miu'ugøøjät,⁴⁶ mänitá wyiindsøn miejtstägatsa'añ jaguiapxy, mänit jaduhñ jiaanch tehñ chaaçhtiuna'añii neby hajxy chaaçhtiunijän ja'a hajxy ca'a mæbøjpä.

⁴⁷ 'Mädyii moonsä jaduhñ ca'a mädia'agymiäbøjp, hoy jia najuø'øy nebiaty ja'a wyiindsón yhane'emyii, jaanč tehñ chaächtiunáanäp je'e. ⁴⁸ Pero mädyii moonsä ca'a mädia'agymiäbøjp je'eguiøxpä coo quia'a najuø'øy, cab jaduhñ jiaty tsaächtiuna'añii. Pøn madiuung jaduhñ yajcø'ødägøøyyäp, tsipcøxp jaduhñ quiudiúnät nebiaty yhane'emyii.

⁴⁹ 'Páadyhøch yaa tøø ngäda'agy hädaa yaabä naaxwiin nebiä tsip jaduhñ piädø'ogät. Weenä jäya'ayhajxy ñimiädsibø'øyii. ⁵⁰ Mobadájpech nho'oga'añ. Jiaanč tehñ chójpiøch njoot coo paquiä yhabáadät. ⁵¹⁻⁵² Páadyhøch yaa tøø ngäda'agy hädaa yaabä naaxwiin nebiä jäya'ayhajxy ñimiädsibø'øwøjät. Cabä jäya'ayhajxy jootcuyc ñä'ägä hidaannä. Nimiädsibø'øwáanäp hajxy tu'ugtøgooty. Nädägøøgpäna'c-hajxy yajmuga'añ ja'a nämetspäya'ay. ⁵³ Miøødnimiädsibø'øwáanäp ja'a tiaj ja'a tieedyhajxy. Miø'ødhoc jixie'ebhajxy ñimiädsibø'øwa'añii.

⁵⁴ Mänitä Jesús ja'a cu'ug ñämaayy:

—Coo ja'a joc piädø'ogy maa ja'a xøø quiuhnaxiän, hijxtahñd je'e coo tiu'uwa'añ.

⁵⁵ Y coo jiøømbojy, hijxtahñd jaduhñ coo hañ yhida'añ. Y mnajuøøby hajxy jaduhñbä.

⁵⁶ Tøyhajt jaduhñ, mnajuøøby hajxy jaduhñ nebiä xøø ñaxa'añ, pero cab hajxy mnajuø'øy tijaty jadaannäp habetáannäp. Hix, hamdsoo ja'a mjoothajxy quia'a tsoy coo hajxy jaduhñ mnajuø'øwät.

⁵⁷ 'Tii hoguiuhdujt hajxy hamdsoo coo mga'a jada'añ. ⁵⁸ Coo pøn hänäjty tøø xñäxø'øwø'øy, coo hänäjty xyajnøcxy haguyc, tu'haamnøcxpä myajtødiägø'øwät. Pø caj, xchúmäp hajxy jaduhñ. ⁵⁹ Y cab jaduhñ mdsoj pädsømät høxtä coonä mnuu'xy myajnáhwá'adsät pedyii. Jaduhñ mäwíinäts Dios hajxy xyajcumädöwät.

13

¹ Mänitiä ja'a Jesús yhawáanäxä coo ja'a Pilato ja'a Galileabäya'ay hänäjty näje'e tøø yajyagho'ogyii tsajtøghaguuy. Animalyojxpä Galileabäya'ayhajxy hänäjty. Jaduhñ hajxy hänäjty quiuhdujthaty. ² Mänitä Jesús miánaañ:

—Nej, mmánaamb hajxy jaduhñä, paady yø'ø häna'c-hajxy yagho'cä je'eguiøxpä coo maas may ja'a pojpä cädieey hajxy hänäjty tøø tiuñ quejee ja'a miägunaaxhajxiä. ³ Høøch jaduhñ mänaamb, caj. Y coo mijts ja'a mhaxøøgcuhdujt hajxy mga'a najtshixø'owät, jaduhñ hajxy mjájpät nägøxiä. ⁴ Y yø'ø häna'c-hajxy nämajmocxtägøøgpä tøø yhø'oguiäbä jim Siloé mänaa ja'a møj torre tøø ñähgahbetiän, nej, mmánaamb mijts jaduhñä coo maas may pojpä cädieey hajxy hänäjty tøø tiuñ quejee ja'a jiamiøødhajxy jim tsánaabiä Jerusalén. ⁵ Høøch jaduhñ mänaamb, caj. Y coo mijts ja'a mhaxøøgcuhdujt hajxy mga'a najtshixø'owät, jaduhñ hajxy mjájpät nägøxiä.

⁶ Mänitä Jesús miánaangombä:

—Tsøc mädiáacäm, jii jäya'ay piids hijty tu'copc miøødä maa ja'a ñaaxän. Mänit hoy jia hixø'øy pø tøø tiøømbety. Cahnä hänäjty tiøømbetyñä. ⁷ Mänitä mioonsä ñämaayy: “Huug hix yø'ø piids, tøø ndijy häxøpy tiøømbejnä cudägøøgjomøjt, y cahnä ñä'ägädä tøømbetyñä. Púxäts, xiøøbä jim ñä'ä naaxnáhdäna'ay.” ⁸ Mänitä mioonsä miánaañ: “Wiindsón, ween jiaac täna'ay tuljomøjt. Nhuuc nä'ä juhajtú'udyhøch. Nhuuc tsooyø'øyhøch abonohaam. ⁹ Wehñdä jaduhñ ñä'ä tøømbédät. Pø caj, mänitøch nbúxät.”

¹⁰ Wiinghoocä Jesús hänäjty jiiby yajwiingapxø'øy tsajtøgooty. Poo'xxiøøjooty hänäjty je'e. ¹¹ Jiibiä tajiäya'ay hänäjty tu'ug. Majmocxtägøøgjomøjt ja'a pa'am hänäjty tøø miähäyoy. Jøney ja'a mähdiojc hänäjty tøø yagjadyii ja'a møjcü'ujäm; ni cab hänäjty hoy ñä'ägä tøwa'añ. ¹² Coo ja'a Jesús ja'a tajiäya'ay yhijxy, mänit miøjyaaxy. Mänit miánaañ:

—Pi'maam, tøø ja'a mba'am jaduhñ xñähwa'ačh.

¹³ Mänitä Jesús ja'a pa'amjäya'ay ñähdoon. Mänitiä ja'a mähdiojc tiøøyy. Mänit miánaañ coo ja'a Dios miøjjä jiaančhä. ¹⁴ Mänitä tsajtøjwiindsón jiootma'ty je'eguiøxpä coo ja'a Jesús ja'a pa'am yajnaxy ja'a poo'xxiøøjooty. Mänitä cu'ug ñämaayy:

—Tädujxøø ja'a Dios tøø quiunuu'xy coo hajxy ndúunämät. Mänitä mba'am hajxy miñ myajniñähwa'ačhii. Pero cab hajxy myajniñähwa'adsøjät ja'a poo'xxiøøjooty.

¹⁵ Mänitä Jesús miänaañ:

—Mhøhndaacp mijts jaduhñ. Nej, caj mijts mweey mburro hajxy myajnøøhu'ugy ja'a poo'xxiøøjootiä. Hoy hajxy hoy mja capxy mja hane'emy, cab hajxy hamdsoo hoy mgudiuñ. ¹⁶ Y hädaa tajjäya'ay, Abraham yhap yhoc hädaaduhñ. Majmocxtägøøgjomøjt hijty tøø yaghidyii pa'ammøød ja'a møjcü'ujäm. Nej, cábøch ja'a cuhdujt hijty nmøødä cooçh poo'xxiøøjooty tøø nyajnahwa'açhä.

¹⁷ Mänitä Jesús miädsiphajxy chähdiuñ. Pero ja'a cu'ug, jaançh tehñ xioonndaac hajxy jaduhñ je'eguiøxpä coo ja'a Jesús ja'a hoy-yagjuøøñäjatypä hänajty tøø yajcähxø'ogy.

¹⁸ Mänitä Jesús miänaañ:

—Coo ja'a Dios ja'a miäjaa hänajty yajcähxø'oga'añ, jaduhñhøch nyajmäbaada'añ ¹⁹ nebiä habi'c mostazapajcän. Coo jäya'ay jaduhñ ñi'ibät maa ja'a ñaaxän, cøxp jaduhñ yéegät. Høxtä pe'eñhädiünäp ja'a muuxyhajxy yhaa'xcøxp.

²⁰ Mänitä Jesús miänáangombä:

—Coo ja'a Dios ja'a miäjaa hänajty yajcähxø'oga'añ, jaduhñhøch nyajmäbaada'añ ²¹ nebiä to'oxiøjc tsajcaagyooy hajxy yajtuñän coo tsajcaagy hajxy yhädiuñ. Tägøøgquixøhñdy ja'a harina hajxy yajmäbädaagø'oy ja'a tsajcaagyooy. Mänit jaduhñ hoy piädø'ogy.

²² Mänitä Jesús tiu'ubøjcy. Jerusalén hänajty ñøcxa'añ. Tu'haamnøcxpä ja'a Jesús hänajty yajnahixø'oy maa ja'a cajpthuungän. ²³ Mänitä Jesús miäyajtøøwä:

—Nej, näweeñtiä hajxy ñähwa'adsa'añ ja'a piojpä cädieyhajxiä.

Mänitä Jesús yhadsooy:

²⁴ —Tsipecøxpä Diosmädia'agy hajxy hoy mgudiünät nebiä cuhdujt hajxy hoy mmøød-hädät neby hajxy jim mdägø'owät tsajpootyp. Nämäy hajxy jia wi'i tiägø'owa'añ, pero cab hajxy hänajty yajtägø'owa'añii coo cuhdujt hajxy hänajty quia'a møødä. ²⁵ Coo ja'a Dios ja'a tøjc hänajty tøø yhagøøñä, mänitä tøghagø'ow hajxy hänajty jia wi'i quiojxnoga'añ, pønjaty tøba'am hänajty tøø miähmø'oy. Mänit hajxy hänajty jia wi'i miäna'ana'añ: “Dios, yaghawa'ads yø'ø tøjc.” Mänitä Dios yhadsowa'añ: “Cábøch mijts nhixiä.” ²⁶ Mänit hajxy hänajty miäna'anáangombä: “Pero tøøds miiçh nmøødcaay nmøødhu'ugy; tøøds miiçh mmädia'agy xyajnahixø'oy mänaa jim mhitiän maa højts ngajptän.” ²⁷ Mänitä Dios hänajty yhadsowáangombä: “Tøø hajxy nnäma'ay coo hajxy nga'a hixiä. Wiimbit hajxy. Caj mijts mguhdujt ñä'ägä hoyyä.” ²⁸ Mänitä Abraham hajxy hänajty jim mhixa'añ tsajpootyp jim Dioswiinduum møødä Isaac møødä Jacob møødä Diosquexyhajxy nägøxiä. Mänit hajxy mjø'owa'añ mxuudsä'añ coo ja'a Dios hajxy tøø xquia'a yajtägø'oy. ²⁹ Nøcxaambä jäya'ayhajxy miägaya'añ Dioswiinduum ja'a hajxy wiinduhmyhagajpt-tsohmä. ³⁰ Jaaya'ayhajxy jäda'ahaty péjxäbä, näje'e møjtuung hajxy piaada'añ. Y jaaya'ayhajxy jäda'ahaty møjtuungmøødpä, näje'e tiuunghajxy piøgáanäxä.

³¹ Mänitxøøbä ja'a fariseoshajxy näje'e miehch maa ja'a Jesúsän. Mänitä Jesús hajxy ñämaayy:

—Mdsóonäp yaa coo ja'a Herodes xjia wi'i yajyagho'oga'añii.

³² Mänitä Jesús yhadsooy:

—Ca'awiindøyyä Herodes jaduhñ. Nøcx hajxy näma'aw cooçh mejtsxøø tægøøgxøø njaac tuna'añ. Njaac høxquexáambiøch ja'a møjcu'uhajxy. Njaac yajmøcpøgáambiøch ja'a pa'amjäya'ayhajxy. Mänitøch nduumbädø'owa'añ. ³³ Jexioo, mejtsxøø tægøøgxøøjoch njaac tu'uyo'oya'añ. Mänitøch jim nmedsa'añ Jerusalén. Cab jaduhñ yhawiinmatsä coo ja'a Diosquexy wiingtuum yhö'ogät.

³⁴ Mänitä Jesús miänáangombä:

—Ja'a häna'c-hajxy jim tsänaabiä Jerusalén, tøø ja'a Diosquexy hajxy may quiuh-ga'açh. Tøøch mayhooc nja wi'i ñäma'ay coo ja'a yhaxøøgcuuhdujt hajxy ñajtshixø'owät; pero cab hajxy ñä'a najtshixø'owa'añ. ³⁵ Cooçh jim ngóodät Jerusalén, páquiøch jim nhida'añ. Mänitøch mijts jim nnähgue'egáangombä. Cábøch hajxy xyhixaanä høxtä

cóonøch hánajty ngádaactägatsa'añ. Mänit hajxy hánajty mmána'ana'añ: “Jaanč teh_m miøj jaanč teh_m jiaanč ja'a Dios tøø quiéxiäbä.”

14

¹ Wiinghooçä Jesús ñøcxy mägaabiä maa ja'a fariseowiindsønä tiøjcän. Poo'xxiøøjooty hánajty je'e. Jiibiä Jesús hánajty miähijxna'ayíjäm tøgooty ja'a fariseoshajxy. ² Jiibiä mähdiojc hánajty tu'ug qui'ixypa'ammøød. Jesúswiinduum hánajty tiána'ay. ³ Mänitä Jesús miäyajtøøyy ja'a ley-yajnáhixøøbiähajxy møødä fariseoshajxy:

—Nej, jii cuhdujt jaduh_n coo ja'a pa'amjäya'ay myajmøcpøgät poo'xxiøøjootiä.

⁴ Pero cab hajxy waamb ñä'a hadsooyy. Mänitä Jesús ja'a pa'amjäya'ay ñähdoon_n, yajmøcpøjcy. Mänit ñämaayy coo wyiimbídat. ⁵ Mänitä fariseoshajxy ñämäayyägombä:

—Coo mijts mburro mweey quiuga'awó'øwät nøøjutjooty, nej, cab hajxy mäniitä myajpádsómädä, hoy hánajty jia poo'xxiøøjootiä.

⁶ Cab hajxy waamb ñä'ägä hadsooyy.

⁷ Mänitä Jesús yhijsy coo ja'a woybä wichpä hoyhánaabiejt hajxy jia wi'i yhøxta'ay. Mänit miänaañ:

⁸ —Coo ja'a pøc ja'a hu'ug hánajty mänaa jiadyii, coo mijts myajwówät, cabä hoyhánaabiejt hajxy myaghäna'awó'øwät. Hix, coo häna'c maas cuhdujtmøødpä jiaac médsät, ⁹ mäniitä cudøjc xñámá'awät: “Pädø'øg, mo'ow yø'ø hänaabiejt yø'ø häna'c tøø jiaac méchäbä.” Xyajtsähdiúnäp jaduh_n. Mänit nøcxy mhäna'ay maa ja'a hänaabiejt ca'a hojiatypän. ¹⁰ Pero jayøjp mhøxtá'awät ja'a hänaabiejt ca'a hojiatypä. Mänitä cudøjc xñámá'awät: “Mägu'ughajpä, yaa nax maa hädaa hänaabiejt hojiatypän.” Xquiumáyäp ja'a jäya'ayhajxy ja'a hajxy jim hänaabiä. ¹¹ Pøn ja wi'i yajcumayaamb, yajpexaamb je'eduh_n. Pøn ca'a yajcumayaamb, je'eds jaduh_n møjtägø'øwaamb.

¹² Mänitä Jesús ja'a fariseowiindsøn ñämaayy, ja'a hánajty tøø miäwóyyäbä:

—Coo ja'a tsuunax hánajty mänaa myagjada'añii, cabä mmägu'ughajpähajxy mwówät, ni ja'a mbuhya'ayhajxy, ni ja'a mjujy ja'a mmägu'ughajxy, ni ja'a mmäjøøn ja'a mmädøjc-hajxy ja'a mäyøøbä. Xwioodägátsäp hajxy je'e ja'a miich hánajty tøø mwóyyäbä. ¹³ Pero je'eds mwówäp ja'a häyoobä, ja'a ca'a hoybä, ja'a tecymia'adpä, ja'a wiindspä. ¹⁴ Hoy miich jaduh_n xquia'a ja woodägátsät, jootcujc mhídät jadähooc je'eguiøxpä coo ja'a hoyhajt ja'a weenhajt mbaada'añ mänaa ja'a jäya'ayhajxy hánajty jiuypiojtägatsa'añän, ja'a Diosmädia'agy hajxy hánajty tøø quiudiñäbä.

¹⁵ Jimä jäya'ay hánajty tu'ug yhäna'ay meexäwiinduum. Mänitä Jesús ñämaayy:

—Jootcujc je'e, pøn mägayaamb Dioswiinduum.

¹⁶ Mänitä Jesús miänaañ:

—Tsøc mädiáacäm. Jaduh_nä jäya'ay tsuunax tu'ug yagjajtä. Mänitä jäya'ay may yajwoowä. ¹⁷ Coo hánajty tøø yhabaady, mäniitä mioonsä ñämaayy: “Nøcx ja'a woybä wichpähajxy näma'aw coo hajxy yhadó'ødsät, coo ja'a cay tøø yhabaatnä.” ¹⁸ Pero mäniit hajxy nägøxiä yhadsooyy cooc hajxy quia'a näbaadø'øwáanäxä. Tu'jäya'ay miänaañ: “Tøøchä naax njuy; nøcxáambøch cham nhixa'añ. Huuc mee'x, cábøch xñäbaadø'øwaanä.” ¹⁹ Mänit wiingpä miänáangombä: “Tøøchä waj njuy mägooxman-cuerno. Je'eçh nøcxy nyajtuunghabøga'añ. Huuc mee'x, cábøch xñäbaadø'øwaanä.”

²⁰ Mänitä wiingpä jiaac mänáangombä: “Naambøcyhøch høøch; páadyhøch nga'a nøcxa'añ mägaabiä.” ²¹ Coo ja'a moonsä wyiimbijtagajch, mäniit je'e cøjx ñägapxy waambaty hajxy yhadsooyy. Mänitä wyiindsøn jiaanč teh_m jiootma'ty. Mänitä mioonsä ñämäaguioombä: “Nøcx jim päyø'øguiä maa ja'a møjtu'ujän. Pønjaty jim mbaatyp, ja'a häyoobä, ja'a ca'a hoybä, ja'a tecymia'adpä, ja'a wiindspä, je'e jaduh_n mwoomínäp.”

²² Coo ja'a moonsä jadähooc wyiimbijtagajch, mäniit miänaañ: “Wiindsøn, Tøøch ngudiñ nébiøch miich tøø xyhane'emiän. Pero xiinä hawa'adspä.” ²³ Mänitä wyiindsøn yhadsooyy: “Nøcx jim maa ja'a xu'udstu'ujän, maa ja'a padu'ujän; pønjaty jim najxp, mnámá'awäp hadsip coo hajxy myínät, nébiøch ndøjc jaduh_n yhúdsät. ²⁴ Pero pønjátyhøch tøø nja yajwoyii, cab hajxy min quiaya'añ maaçh ndsuunax nyagjadyiijän.”

²⁵ Nämayyā jāya'ay ja'a Jesús hānajty pianōcxy. Mānitā Jesús wia'wiimbijty. Mānit miānaañ:

²⁶⁻²⁷ —Pōnjátyhōch xpianōcxaamb, wéenhōch xmiaas tsoy quejee ja'a tiaj ja'a tieedyhajxy chocy, mōōdā yhuch ja'a piuhya'ay; quejee ja'a yhuungā tio'oxy chocy. Pō caj, cábōch hoy xpianōcxāt. Pōn ja'a jiugyhajt ca'a nāhduj, cábōch jaduhñ hoy xpianōcxāt. ²⁸ Coō pōnā tōjc hānajty quioja'añ, jayōjpā xiādō'ōñ miāchoy pō pedāanp jaduhñ. ²⁹ Pō caj, mānit jaduhñ ñāxi'igōōjāt coō hānajty quia'a maya'añ. ³⁰ Jaduhñ hajxy miānā'anāt: “Xiōōbā yō'ō craa ñā'ā yajtsohndaacy; maa jaduhñ ñā'ā yajmaayy.” ³¹ Coō ja'a reyhajxy hānajty ñimiādsibō'ōwa'añii, jayōjp hajxy yhahixō'ōy pō mājāda'agaamb coō nāmajcmil soldado jia mōōdā, coō ja'a miādsip ja'a soldado nāhii'xmil miōōdā. ³² Pō caj, jāguemiā ja'a quiuguexy quiéxāt weenā miādsip jaduhñ miee'xy. ³³ Jaanā jaduhñ mijtspā, coō hajxy cōxiā wiinā mga'a najtshixō'ōwāt ja'a hōōchcōxpā, cábōch hajxy hoy xpianōcxāt.

³⁴ 'Tuungpaatpā caan hit. Pero coō jiō'ōwāt, cab jaduhñ mānaa yhoyōōñāt. ³⁵ Cab jaduhñ tiuungpaadaannā. Nā'ā tāgooby jaduhñ. Pō mwiinjuōōby hajxy, wéenhōch hādaa nmādia'agy xmiābōjcā.

15

¹ Mānitā Jesús ñāmejtsā ja'a yajnāhjuudiutpāhajxy nāmāy mōōdā cubojpā cugādieeybāhajxy. Miādowaambiā miādia'agy hajxy hānajty. ² Mānitā fariseos ja'a Jesús hajxy tiāgōōyy mādiaacpā mōōdā ley-yajnāhixōōbiāhajxy:

—Cab jaduhñ yhooyā coō yō'ō craa ja'a cubojpā ja'a cugādieeybā miāgu'ughādāt, coō miōōdcāyāt.

³ Mānitā Jesús tiāgōōyy mādiaacpā:

⁴ —Tsōc mánānām, pōñ meeg hānajty mōōd māgo'x, coō tu'ug tiāgōōyyāt, nej, cabāda'a nāgō'ō nādecypiā mhōxtā'awādā. ⁵ Y coō mbāadāt, mānit mxoōndā'agāt. Mānitā meeg mdsehñō'ogāt. Mānit mdsehñnōcxāt maa ja'a mdōjcān. ⁶ Coō jim mmēdsāt, mānit mmājōōn mmādōjc mwoomūgāt mōōdā mmāgu'ughajpāhajxy. Mānit mmānā'anāt: “Tsōg hajxy xoōndācām; tōōchā meeg nbaady ja'a hijty tōō tiāgōōyyābā.” ⁷ Tōyhajt, jaanā jaduhñ hajxy jim xioōnda'agaambā tsajpootyp coō ja'a cubojpā cugādieeybā yhaxōōgcuhdujt hajxy ñajtshixō'ōwāt. Ja'a jaac nāmādaaxc-hii'x-cumajmocxmādaaxc jāya'ayhajxy, ja'a hijty tōō quia'a tu'udāgōōyyābā, cab hajxy jiaty nāxoōnda'aga'añii.

⁸ 'Tsōg jaac mánānām, mādyii to'oxiōjc xādō'ōñ majc mōōd, coō tu'ug tiāgōōyyāt, mānitā jōōn quiudōō'xō'ōy. Mānit tiāgōōy tōjpeetpā hodia'agyhaamby, cham jaduhñ yhōxta'ay. ⁹ Coō ja'a xādō'ōñ piaady, mānitā miājōōn miādōjc wioomucy mōōdā miāgu'ughajpāhajxy. Mānit miāna'añ: “Tsōg hajxy xoōndācām; tōōchā xādō'ōñ nbaady ja'a hijty tōō tiāgōōyyābā.” ¹⁰ Tōyhajt jaduhñ, jaanā jaduhñ ja'a Diosmoonsāhajxy jim xioōnda'agaambā tsajpootyp coō ja'a cubojpā cugādieeybā yhaxōōgcuhdujt hajxy ñajtshixō'ōwāt.

¹¹ Mānitā Jesús jadāhooc miānāngombā:

—Tsōc mādiācām, jaduhñā jāya'ay hānajty tu'ug, metsc yhuung. ¹² Mānitā muutspā ñāmaayy ja'a tieedy: “Teedy, hōōchā xādō'ōñ mōōyyāc mādūhñtiōch hijty tōō xyajnāhdijy.” Mānitā yhuunghajxy miooyy ja'a xādō'ōñ. ¹³ Cujaboom cumaaxcā craa muutspā tiu'ubōjnā. Cōjxā xiādō'ōñ miādu'ubōcy. Mānit ñōcxy jāguemnaax. Mānitā xiādō'ōñ cōjx ñāhaduhñ ñāhanāma'awō'ōy. Haxōōg hānajty wiādity. ¹⁴ Coō ja'a xiādō'ōñ hānajty tōō quiojxnā, mānitā yuu miejch maa ja'a craa hānajtīān. Mānitā yuu hoyhoy piāatānā. ¹⁵ Mānitā tuung hoy piaady mähādsōmyagjōō'x. ¹⁶ Jia wil'ijōō'xaamby hānajty ja'a hādsōm hānajty jioō'xypā, pero cab hānajty tii ñā'āgā mo'oyii. ¹⁷ Mānit wyiinmahñdymejch: “Jim maačh ndeedy tiōjcān, jaančh tehñ quiu'uxiā ja'a moonsāhajxy jim quiay yhu'ugy. Y hōōch, coōch yaa nmāhmō'ōwāt, yuuhō'ogābōch hāyaa. ¹⁸ Nnā'āgā nōcxyhōch jim maačh ndeedy tiōjcān. Jadūhñhōch nnāma'awa'añ: Teedy, tōōch ngādieey ja'a Dioscōxpā mōōdā miīchcōxpā. ¹⁹ Cábōch miīch hawiinmats

xyhuunghájnät. Hóyhöch miich xñä'a wá'anät moonsä." ²⁰ Mänitá craa wyiimbijty, ñöcxtägajch maa ja'a tieedy tiöjcän.

'Möjnä hänajty quia'a mech, mänitá tieedy jiojcuheeböoyä. Mänitá tieedy jioot xiuu'tspöjcy jadähooc. Mänit päyö'oguiä hoy jiojcubaadö'öy. Mänit ñähmäneeñ quiuhmäneeñ. Mänit chu'xy. ²¹ Mänitá yhuung miänaañ: "Teedy, tөөч ngädieey ja'a Dioscöxpä möödä miichcöxpä. Cáböch miich hawiinmats xyhuunghájnät." ²² Mänitá tieedy ja'a moonsä tu'ug ñämaayy: "Tsögäm, nøcx ja'a howyit yajpäsöm. Yajniguiubögö. Pädaacä cö'öjädsohñdy tu'ug möödä xäguiö'ög. ²³ Nöcxä wajhuung hajxy yagho'og ja'a ni'xpä. Tsögä xöø hajxy yagjätäm. Tsög hajxy caayy tsög hajxy húucäm. ²⁴ Jadúhñhöch hädaa nhuung hijty nebiä ho'ogypiän nebiä tägoybän. Pero tөөч jadähooc xyhajuö'yii. Y chaaçh tөө xñämech." Mänitá xöödsuu hajxy yagjätä.

²⁵ Ja'a craa möjpä, jim hänajty je'e camjooty. Mänit wyiimbijty. Coö hänajty miedsaannä maa töjcän, mänit miädooyy coö hajxy wyi'i xiu'uxy, coö hajxy wyi'i yhech wyi'i piuty. ²⁶ Mänitá moonsä tu'ug miöjyaaxy. Mänit miäyajtöoyy: "Tii jadhñ jätäp." ²⁷ Mänit ñämaayy: "Tөө ja'a mhuch miech hoy ween. Paadiä mdeedy ja'a wajhuung ni'xpä tөө yajyagho'ogyii." ²⁸ Mänitá craa möjpä jiootma'ty. Cab hänajty tiöjtägö'owa'añ. Mänitá tieedy tiöjpädsöomy. Mänit hoy miänuu'xta'agyii coö tiägö'öwät. ²⁹ Mänitá craa ja'a tieedy ñämaayy: "Tөөч miich majiomöjt nja mööduñ. Homiänájöch miich mmädia'agy tөө nmäböjcam. Pero cáböch miich mänaa tii tөө xñä'ägä mo'oy, nébiöchä xöø jadhñ nyagjadöjät möödhöch nmägu'ughajpädöjç-hajxy. ³⁰ Pero xiidsä mhuung tөө miech. Tөө miich mxädö'öñ xñä'a yaghäyö'cä maa ja'a cuhñdo'oxiöjçän. Y yö'ö craagöxpä miichä wajhuung ni'xpä tөө myajyagho'ogyii." ³¹ Mänitá tieedy miänaañ: "Huung, homiänájöch miich tөө xmiöödhity. Y Haagä miich mje'e jadhñ mäduhñtiöch jii nmöödä. ³² Pero hawiinmats jadhñ coö ja'a xöø nyagjätämät, coö nxoondäacämät, je'eguiöxpä coö yö'ö mhuch tөө miech. Jadhñ hijty nebiä ho'ogypiän nebiä tägoybän. Pero tööds jadähooc xyhajuö'öyyäm."

16

¹ Mänitá Jesús ja'a jiamioöd ñämaayy:

—Jadhñdsä mäyöjjäya'ay hänajty tu'ug. Mänit hoy yhawáanäxä coö ja'a xiädö'öñ hänajty yajtúunäxä ja'a mioonsä. ² Mänitá mioonsä miöjyaaxy: "Nej, töyhajt jadhñ coöch miich ja'a nxädö'öñ xwyi'i yajtúunäjä. Hoorä, hөөч móoyyác mäduhñtiöch miich hijty tөө nyajcö'ödägö'öy. Cáböch miich nmoonsähadaannä." ³ Mänitá craa tiägöoyy tajpä maabiä: "Nébiöch jadhñ nnä'a jatcö'öwät. Xpiögáanäböch ja'a nduung jadhñ. Cáböch möcmäjaa nmöödä coöch nyu'uw coöch nbúxät. Tsähdiúnäböch jadhñ coöch ndägö'öwät xädö'önyujwaambä. ⁴ Tөөч nnajuö'öy nébiöch njatcö'öwät, nébiöchä jäya'ayhajxy xtiöjmó'owät, coöch nduung hänajty tөө xpiöjçä." ⁵ Mänit tu'ugjaty tu'ugjaty miöjyaaxy pönjaty ja'a wyiindsón hänajty mänuu'xyhajp. Mänitá tu'jäya'ay jayöbajt miäyajtöoyy: "Mäduhñtiöch yö'ö nwiindsón xmiänuu'xiä." ⁶ Mänit yhadsooyy: "Mägo'xlatä acéitöch nmänuu'xiä." Mänitá craa miänaañ: "Hädaa nocy jadhñ mänaamb coö miich mägo'xlatä mmänuu'xyhaty. Chaadsä nocy wiingpä. Huug hädiuundägats coö juxychägui'xmajç-latä mmänuu'xyhaty." ⁷ Mänitá tu'ug miäyajtöögombä: "Miiçhäts, mäduhñtiä mnuu'xy." Mänit yhadsooyy: "Mägo'xquipxö'hñdyhöchä trigo nmänuu'xyhaty." Mänitá craa miänaañ: "Chaadsä nocy wiingpä. Huug hädiuundägats coö mädaaxc-hii'x mmänuu'xyhaty." ⁸ Mänitá mäyöjjäya'ay ja'a mioonsä quiumaayy coö quiuhwijjiä. Maas cuhwijy ja'a Diosmädia'agy hajxy ca'a mäböjpä maa ja'a tiuunghajxiän quejee yö'ö Diosmädia'agy hajxy mäböjpä.

⁹ Tsipcöxpä xädö'öñ quiöxa'añ hädaa yaabä naaxwiin. Myajtúnäp hajxy jadhñ nebiä jäya'ay hajxy jadhñ xmiägu'ughädät. Coö hänajty tөө mho'nä, mänitá Dios jim xwyiingpögät tsajpootyp.

¹⁰ Pönä xädö'öñ hoy yajtuumb, hoy jia weeñtiä, coö ja'a xädö'öñ hänajty miayyá, mänit hoy yajtúungombät. Pero pönä xädö'öñ hoy ca'a yajtuumb coö hänajty weeñtiä, ni

jaduhñ hoy quia'a yajtúnät coo hánajty miayyá. ¹¹ Jaduhñds je'e, coo mijts ja'a xädø'øñ hoy mga'a yajtúnät hádaa yaabä naaxwiin, caj mijts ja'a Dios xyajcø'ødägø'øwät mädyii jaančh tsoobaadaamb. ¹² Y coo wiingjäya'ay xiädø'øñ hajxy hoy mga'a yajtúunät, cabä hoyhajt ja'a weenhajt hajxy jim mbáadät tsajpootyp.

¹³ 'Coo ja'a moonsä ja'a wyiindsøn metsc miädúnät, ja'a tu'jäyá'ayäbä, je'e miädia'agy hoy quiudiúnäp; ja'a tu'jäyá'ayäbä, cabä miädia'agy miäböjcät. Jaanä jaduhñduhmbä, coo ja'a xädø'øñ hajxy mwi'li chógät, cabä Dios hajxy hoy mmädúnät.

¹⁴ Jimä fariseoshajxy hánajty näje'e miämädoona'ay. Jiaančh tehñ piøcjuøöbiä fariseos ja'a xädø'øñ hajxy hánajty. Mänitä Jesús hajxy ñäxiicy. ¹⁵ Mänitä Jesús miänaañ:

—Mijts, mjaančh tehñ yajcumayaamb hajxy jaduhñ maa ja'a cu'ughagujcän. Pero xñajuøyyäp ja'a Dios ja'a mwiinmahñdyhajxy. Mädyijaty ja'a jäya'ayhajxy quiumaaby, je'edsä Dios jaduhñ piejxyp.

¹⁶ 'Ja'a Moisés miädia'agy hijty cudiúunäxäp møødä Diosquexy miädia'agyhajxy. Pero coo ja'a Juan ja'a Diosmiädia'agy tiägøyy yajwa'xpä, nägøxiä jäya'ayhajxy jia wi'li tiägø'owa'añ maa ja'a Diosmiädia'aguiän.

¹⁷ 'Pero cabä Moisés miädia'agy tiägoyya'añ. Maas paquiä ja'a tsajpootyp tiägóyyät møødä naaxwiin quejee ja'a Moisés miädia'agy.

¹⁸ 'Pønä tio'oxiøjc høxmajtsp, tu'udägooby jaduhñ coo wiingto'oxiøjc wyiingpøjnät. Jaanä jaduhñ tiu'udägoöbiä pønä to'oxiøjc wiingpøjp ja'a tøø yhøxmačhíjábä.

¹⁹ 'Jaduhñdsä mäyøøjäya'ay hánajty tu'ug. Jaančh tehñ yajxón ja'a wyit hánajty miøødhaty. Jabom-jabom ja'a xøø hánajty yagjadyii jaančh tehñ yajxón. ²⁰ Jimä mähdiøjc hánajty tu'ug xiøhaty Lázaro. Jaančh tehñ ñähbu'uds jaančh tehñ quiuhbu'udsä Lázaro hánajty. Jim naxy yhäñ'ay naaxwiin maa ja'a mäyøøhänä'c tiøghaawän.

²¹ Je'e ja'a Lázaro hánajty jia wi'li quiayaamby tijaty jiiby cahb naaxwiin maa ja'a mäyøøjäya'ay mieexän. Høxtä nähwéhyäxäbä Lázaro piu'uds hánajty ja'a húcäm.

²² Mänitä Lázaro yho'nä. Mänitä yháañmä yajnøcxäxä tsajpootyp maa ja'a Abraham wyiinduumän. Ja'a Diosmoonsä yajnøcx. Mänitä mäyøøjäya'ay yho'pä. Mänit yajnaaxtägøyyä. ²³ Mänitä yháañmä yhädaacy møjcu'uhaam. Mänit tiägøyyä tsaächtiúunäbä. Mänit chajhee'py. Jimä Abraham ñäheebøyy møødä Lázaro. ²⁴ Mänit yaaxy: "Abraham, høøch näxú'utsäc. Høøchä Lázaro yajnäguéjxäc. Weenä quiø'øjøj yajxoogy wéenhøch ndoots min xyajtøjtsä. Jaančh tehñ chaačhpøjpøch yaa jøønjooty."

²⁵ Mänitä Abraham yhadsooyy: "Huong, jahmiets jaduhñ nej tøø mdsäna'ay nej tøø mhäyoyyän yajxón. Pero Lázaro, jaančh tehñ yhäyoob je'e hijty. Pero coo yaa tøø quiø'ø'nä, jootcujc yhiñä. Míichäts jiiby tsaächpøjnäp. ²⁶ Y chaads je'ebä, cabä najxtaact maa, coo ja'a Lázaro jiiby yhadá'agät, ni coo miích yaa mbédät."

²⁷ Mänitä mäyøøjäya'ay miänaañ: "Abraham, tunä mayhajt, huuc quex ja'a Lázaro jim maačh ndeediän.

²⁸ Mägøøxc-høch nbuhya'ay jim. Weenä Lázaro nøcxy ñäma'ay coo ja'a yhaxøøgcuhdujt hajxy ñajtshixø'øwät, neby hajxy yaa min quia'a tsaächpøjpät."

²⁹ Mänitä Abraham miänaañ: "Jim hajxy je'e miøødä ja'a Moisés miädia'agy møødä Diosquexy miädia'agyhajxy. Je'e hajxy quiudiúnäp."

³⁰ Mänitä mäyøøjäya'ay miänáangombä: "Abraham, tøyhajt jaduhñ, pero coo ja'a ho'ogyjiäya'ay jim miédsät maačh ndedyhajxiän, mänit mabøcypä yhaxøøgcuhdujt hajxy ñajtshixø'øwät."

³¹ Mänitä Abraham yhadsoogombä: "Pø cab hajxy quiudiuna'añ nebiä Moisés jia hanehmiän, nebiä Diosquexyhajxy jia hanehmiän, nej, je'e hajxy nøcxy ñä'ä mabøquiä coo ja'a ho'ogyipiä jia médsädä."

17

¹ Mänitä Jesús ja'a jiamioød ñämaayy:

—Tspicøxpä jäya'ay hajxy xjia wi'li yajtu'udägoyya'añ. Pero pøn jaduhñ jatcøøby, haxøøg jiada'añ. ²⁻³ Nägüeentä hajxy mwädítät. Coo pøn yø'ø pigäna'c yajtu'udägóyyät, haxøøg jaduhñ jiädät. Mejor ñä'ägä mejjwyipø'øwøjät molinopaanyo'xodsø'y.

'Coo ja'a mbuhya'ay xñägädieeyó'owät, mhójöp jaduhñ. Y coo xñámá'awät coo mmée'xät, mmée'xöp jaduhñ. ⁴ Coo juxtujc-hooc xñägädieeyó'owät tu'xøbä, y coo juxtujc-hooc xñámá'awät coo quia'a jatcø'owaannä jaduhñ, mmée'xöp jaduhñ.

⁵ Mänitä Jesús ñämaayyá ja'a jiamiødhajxy:

—Højtsä mäjaa jaac móoyyác neby højts maas hoy nmäbógät.

⁶ Mänitä Jesús yhadsooyy:

—Coo mijts häxøpy mmäbøcy hoy jia tu'lii'xiä, coo yø'ø quepychaa hajxy mnämá'awät coo nøcxy ñimiejjwyipø'øyii, xquiudiúunäbä mmädia'agyhajxy jaduhñ.

⁷ Tsøg jaduhñ mänäänäm, coo ja'a mmoonsä tu'ug wyiimbídät camjooty, nej, jaduhñ mnämá'awädä: “Miñ cay.” ⁸ Caj pues, cab jaduhñ mnämá'awät. Jaduhñ mnämá'awät: “Høøch njøø'xy hädiúunäc, høøch puhbéjtác maačh cham ngaya'añ nhu'uga'añän. Mänit miičh häyaa høxhaam mgáyät mhú'ugät.” ⁹ Ni mga'a Diosmó'owät coo ja'a mmädia'agy hánajty tøø xquiudiuunä. ¹⁰ Jaaná jaduhñ mijtspä, coo hajxy hánajty tøø mgudiuñ nebiatiä Dios hánajty tøø xyhane'emiän, jaduhñä Dios hajxy mnämá'awät: “Cab højts hawiinmats xmió'owät Dioscujú'uyäp. Jaduhyyä højts tøø ngudiuñ neby højts miičh tøø xyhane'emiän” —nømä Jesús miänaañ.

¹¹ Tu'uyóhñäbä Jesúshajxy hánajty. Jerusalén hajxy hánajty ñøcxy. Mänit hajxy jim miejch maa ja'a Samarianaax miøødnibiaadyiijän ja'a Galileanaax. ¹² Mänit hajxy miejch maa ja'a cajpthuung tu'ugän. Mänitä Jesús jiojcubaadøoyyá ja'a häna'c nämajcpä ja'a haxøøgpu'udsmøødpä. Pero cabä Jesús wiingón tiehm ñämejtsä. ¹³ Mänit hajxy yaaxy:

—Jesús, Wiindsøn, højts näxúu'tsäc.

¹⁴ Coo ja'a Jesús jaduhñ yhiijxy, mänit miänaañ:

—Nøcx hajxy niyajcähxø'øgøø maa ja'a teedyhajxiän.

Coo hajxy wyiimbijty, mänit hajxy cøjx ñähwa'ačh ja'a piu'uds. ¹⁵ Coo hajxy yhiijxy coo hajxy hánajty tøø ñähwa'ačh, mänit tu'jája'ay wyiimbíjcumbä. Mänit møc yaaxy coo ja'a Dios miøjjä jiaančhä. ¹⁶ Mänitä Jesús hoy wyiinjjcäda'agy. Høxtä mägujtscädaac naaxwiin. Mänitä Jesús Dyiosmooyy. Samaria ja'a craa hánajty chooñ. ¹⁷ Mänitä Jesús miänaañ:

—Nämajc ndijy hajxy tøø ñähwa'ačh. Maa ja'a jiamiødhajxy ja'a nädaaxtujcpä.

¹⁸ Jagooyyá hädaa craa nidiuhñ tøø wyiimbity Diospa'yaaxpä, y Samaria chooñ.

¹⁹ Mänitä Jesús ja'a craa ñämaayy:

—Tänaayyø'øg, nøcxnä. Coo tøø mmäbøcy, paadiä mbu'uds tøø cho'ogy.

²⁰ Mänitä fariseos ja'a Jesús hajxy miäyajtøoyy mänaa hánajty yhabaada'añ coo ja'a Dios ja'a miäjaa hánajty yajcähxø'øga'añ. Mänitä Jesús yhadsooyy:

—Cab jaduhñ yaghixa'añ mänaa jaduhñ yhabaada'añ. ²¹ Cab hajxy jaduhñ miäna'ana'añ: “Xiids je'e”, o “Chaads je'e.” Tøø yhabaatnä coo ja'a Dios ja'a miäjaa yajcähxø'øga'añ.

²² Mänitä Jesús ja'a jiamiøød ñämaayy:

—Habaadaamb jaduhñ cooçh mijts xjia wi'i yhiijxtägatsa'añ, høøch ja'a Diosquexypä; pero cábøch hajxy xyhixa'añ. ²³ Mänitä cu'ughajxy miäna'ana'añ cóogøch tyijy tøø ngäda'agy; pero cab hajxy mmäbógät. ²⁴ Jaduhñ høch ngäda'aga'añ nebiä wädsucän coo xim yam tiägø'øy hajajpä. ²⁵ Pero jaančh tehñ chaačhpøgáambøch jayøjp. Cáboch jäya'ayhajxy xmiee'xa'añ ja'a hajxy jäda'ahatypä. ²⁶ Cooçh hánajty ngädaactägatsa'añ, jaduhñä jäya'ayhajxy hánajty jiatcø'owa'añ nebiä jecyjia'ayhajxy hánajty jiatcø'øyän mänaa ja'a Noé hánajty jyijän. ²⁷ Wi'i quiaaby wi'i yhuucp hajxy hánajty, wi'i piøjp wi'i yhuucp hajxy hánajty. Mänitä Noé tiägøoyy barcojooty. Mänitä Dios ja'a nøøgomdägoy quiejxy. Cøjx hajxy jaduhñ yho'ogy. ²⁸ Jaduhñ hajxy hánajty jiatcøøbiä mänaa ja'a Lot hánajty jyijän. Wi'i quiaaby wi'i yhuucp hajxy hánajty, wi'i jiuuby wi'i tiøøp hajxy hánajty, wi'i ñiip hajxy hánajty, wi'i tiøjcojp hajxy hánajty. ²⁹ Coo ja'a Lot jim chohñ maa ja'a Sodomacajptootiän, mänitä jøøn tiägøoyy cahbä møødä azufre. Cøjxä jäya'ayhajxy yho'ogy. ³⁰ Jaduhñä jäya'ayhajxy hánajty jiatcø'owáangombä cooçh hánajty ngädaactägatsa'añ, høøch ja'a Diosquexypä.

³¹ Mänitxøø, pøn hänajty hijp tøjwiing, caj tiøjtägó'øwät coo cøxiä wiinä yajpädsómät; jaduhyä piäyó'ögät. Y pøn hänajty hijp camjooty, caj wyiimbídät maa ja'a tiøjcän; jaduhyä tiu'ubøjtówät. ³² Høxtahmdsä Lot tio'oxiøjc jiajty. ³³ Pønä jiuhyhajt hädaa yaabä naaxwiin ja wi'i yaghoyø'øwaamb, haxøøgtuum piäda'aga'añii. Pero pønä jiuhyhajt nähdugaamb, hodiuum je'e ñä'ägä nøcxa'añ.

³⁴ Tøyhajt jaduñ, mänetcoods, nämetsc hajxy hänajty mia'awa'añ tu'ugmaabejt. Tu'ug yajnøcxa'añii, tu'ug yajmähmø'øwa'añii. ³⁵ Jaduhñä to'oxiøjc-hajxy hänajty jiojtspä nämetsc. Tu'ug yajnøcxa'añii, tu'ug yajmähmø'øwa'añii. ³⁶ Jaduhñä ya'adiøjc-hajxy hänajty nämetsc tiuumbä camjooty. Tu'ug yajnøcxa'añii, tu'ug yajmähmø'øwa'añii.

³⁷ Mänitä Jesús miäyajtøwä:

—Wiindsøn, maa jaduñ jiaada'añii.

Mänitä Jesús yhadsooyy:

—Tsipcøxp jaduñ jiaada'añii nébiøch cham nmädia'aguiän.

18

¹ Mänitä Jesús tiägøøyy yajwiingapxøøbiä coo hajxy tehngajnä Dyiospa'ya'axät, coo hajxy mänaa quia'a jootmayhädät, hoyyä Dios quia'a ja tsoj hadsówät. ² Mänit miänaañ:

—Tsøg hajxy mädiácäm. Jaduhñä jäya'ay hijty tu'ug quiuduunghaty. Cabä Dios hänajty wyiingudsähgø'øy ni ja'a miägajptjäya'ay. ³ Jimä yaamgto'oxy hänajty tu'ug maa ja'a cajptän. Ja'a miädsip hänajty jia wi'i ñäxø'øwø'øwaamb. Paady hänajty jabom-jabom ñøcxy maa ja'a cuduungän neby jaduñ piuhbedøjtät. ⁴ Cabä yaamgto'oxy miädia'agy hänajty ñä'ägä cudiunáanäxä. Mänitä cuduung tiägøøyy tajpä maabiä: “Cábøch pøn nwiingudsähgø'øy ni ja'a Dios ni ja'a jäya'ay. ⁵ Pero cooçh yø'ø yaamgto'oxy xwyi'i yhadsipy, ngudiunáanäbøçhä miädia'agy jaduñ, nébiøch min xquia'a wi'i yhadsípnät. Pø caj, jootmä'adäbøch häyaa.”

⁶ —Nømä cuduung miänaañ, ja'a Dios ca'a wiingudsähgøøbiä. ⁷ Jaduhñä Dios ja'a yhuung piuhbedaambä, ja'a hajxy xøømdsuhm pa'yaaxpä. ⁸ Paquiä yhadsowa'añ. Pero høøçh ja'a Diosquexypä, cooçh yaa ngädaactägátsät hädaa yaabä naaxwiin, nej, je'enä ja'a jäya'ay ja'a Diosmädia'agy hajxy hänajty miäböcyñjä.

⁹ Jimä jäya'ayhajxy hänajty näje'e, wi'i yajcumayaamb hajxy hänajty. Wyi'i piejxyp wyi'i tiehmby ja'a miägu'ughajpä hajxy hänajty. Mänitä Jesús miänaañ:

¹⁰ —Tsøg hajxy mädiácäm. Jaduhñä jäya'ay metsc ñøcxy tsajtøgooty Diospa'yaaxpä. Tu'ug hänajty tiuñ fariseo, tu'ug hänajty tiuñ yajnähjuudiutpä. ¹¹ Ja'a fariseo, täna'a hänajty Dyiospa'ya'axy: “Haay Dios, Dioscujú'uyäp cooçh nguhtujt quia'a haxøøgä. Cábøch nmeeçh cábøch nboty, cábøçhä to'oxiøjc nmøødä wiingpä. Cábøch jaduñ njatcø'øy nej yø'ø yajnähjuudiutpä. ¹² Hayúujøch naxy nhity metsc-hooc tu'ugpä semana. Nyéjpiøçhä diezmo homiänaajä.” ¹³ Jäguemjuøøbiä yajnähjuudiutpä hänajty tiäna'ay. Cab hänajty ñä'ägä tsajheeb. Jaançh tehñ jiootmayhajp hänajty je'e. Jaduhñ hänajty miäna'añ: “Haay Dios, høøçh näxúu'tsäc. Nnajuøøbiøch cooçh ngubojpä cooçh ngugädieeyä.” ¹⁴ Tøyhajt jaduñ, coo ja'a yajnähjuudiutpä wyiimbijnä, tøø ja'a piojpä quiädieey hänajty yajnähwa'açhíijäm ja'a Diósäm. Pero ja'a fariseo, cab jaduñ yajnähwaatsä. Pøn ja wi'i yajcumayaamb, cabä Dios quiumay. Pero pøn ca'a yajcumayaamb, je'edsä Dios jaduñ quiumaaby.

¹⁵ Mänitä pigäna'c-huunghajxy näje'e wiomejtsä maa ja'a Jesúsän, nebiä Jesús jaduñ quiunúu'xät. Coo ja'a jiamioødhajxy jaduñ yhjxy, mänet hajxy tiägøøyy hojpä ja'a pigäna'c-hajxy tøø wiomeçhíijäbä. ¹⁶⁻¹⁷ Mänitä Jesús ñämaayy ja'a jiamioødhajxy:

—Weençh yø'ø pigäna'c-hajxy xñämiñ. Ca'a hajxy mhaducy. Yø'ø pigäna'c-hajxy, chojpiä jioothajxy coo ja'a Diosmädia'agy hajxy miäböçgät. Cab hajxy yajcumaya'añ. Pønä jioot jaduñ tsoj coo ja'a Diosmädia'agy miäböçgät, pøn ca'a yajcumayaamb, je'eds jim nøcxaamb maa ja'a Dioswiinduumän. Tøyhajt jaduñ.

¹⁸ Mänitä Jesús miäyajtøwä ja'a copc-hajpä tu'ug:

—Wiindsón, mhoyhána'c miičh. Tiičh ngudiúnäp nébiöch cøjxta'axiøø njugyhádät nebiä Dios jiugyhatiän.

¹⁹ Mänitä Jesús yhadsooyy:

—Tiičh coo xñäma'ay coočh nhoyhána'cä. Jagooyä Dios tu'ug yhooyä. ²⁰ Mjajpy jaduhñ nebiä Dios tøø xyhanéhmäm, tuhñds: “Cabä to'oxiøjc wiingpä mmøødhádät; ca'a mjäya'ay-yagho'ogy; ca'a mmeečh; ca'a mhøhñda'agy; mwiingudsähgø'øwäp ja'a mdaj ja'a mdeedy.”

²¹ Mänitä copc-hajpä miänaañ:

—Ngudiúumbiöch jaduhñ. Chúucnøch jaduhñ nmädsøhñdaacy ja'a wiinmahñdy hoybä.

²² Mänitä Jesús miänaañ:

—Jadu'tu'uyyä mga'a yajpedyii. Cøx toog mäduhñtiä mmøødä; mänitä häyoobäya'ay mnä'ä mó'owät. Coö jaduhñ mgudiúnät, mänit jim mdägø'øwät tsajpootyp. Hoorä, høøch padu'ubøjcäc.

²³ Mänitä craa jiootmabiøjcy, je'eguiøxpä coo hänäjty jiaančh tehñ miäyøøjä. ²⁴ Coö ja'a Jesús yhiijy coö ja'a craa hänäjty tøø jiootmabiøcy, mänit miänaañ:

—Jaančh tehñ chip jaduhñ coö ja'a mäyøøjäya'ayhajxy jim tiägø'øwät Dioswiinduum.

²⁵ Maas paquiä ja'a camello ñaxø'øwät ja'a xuhñdyjutjooty quejee ja'a mäyøøjäya'ayhajxy jim tiägø'øwät Dioswiinduum.

²⁶ Mänitä jäya'ayhajxy miänaañ, ja'a hajxy hänäjty jim mämädoonaabiä:

—Pønäda'a jim nä'ä tægø'øwäp Dioswiinduum.

²⁷ Mänitä Jesús miänáangombä:

—Mädyii ja'a jäya'ayhajxy quia'a jadaamby, Dios mábøcypä jadaamby.

²⁸ Mänitä Pedro miänaañ:

—Tøøds højts ngøxy najtshixø'øy mäduhñtiä højts hijty nmøødä, neby højts miičh hoy nbanøcxät.

²⁹ Mänitä Jesús yhadsooyy:

—Tøyhajt jaduhñ, pønä tiøjc najtshixø'øwaamby, o ja'a tiaj ja'a tieedy, o ja'a piuhya'ay, o ja'a yhuung ja'a tio'oxy, ja'a Diosmädia'agyquiøxpä, ³⁰ piaadaamby ja'a maas hoybä ja'a maas weenbä hädaa yaabä naaxwiin. Y coö hänäjty tøø yho'nä, mänit hänäjty cøjxta'axiøø jiugyhada'añ nebiä Dios jiugyhatiän.

³¹ Mänitä Jesús ja'a jiamiøød hawiing wioonøcxy ja'a nämajmetspä. Mänit miänaañ:

—Yam hajxy nnøcxäm Jerusalén. Jímhøch njada'añ nhabet'añ nébiöchä Diosquexy-hajxy jecy xmiädiaaquiän, høøch ja'a Diosquexypä. ³² Xquiø'ødägø'øwáambøch ja'a teedywiindsønhaajxy ja'a jäguembäya'ayhajxy. Xñäxi'igáambøch hajxy. Xwyiinwoonáambøch hajxy. Xwyiingutsujø'øwáambøch hajxy. ³³ Xwiobho'ogáambøch hajxy. Mänitøch hajxy xyagho'ogaannä. Y cudägøøgxøøjøch njujypioğa'añ.

³⁴ Cabä Jesús ja'a jiamiøødhajxy hänäjty ñä'ägä wiinjuø'øy nebiä Jesús hänäjty miädia'agy. Tsip hänäjty miädia'agy.

³⁵ Coö ja'a Jesús hajxy hänäjty tøø miäwiingoonnä maa ja'a cajpt hänäjty xiøhatiän Jericó, jimä wiindspä hänäjty tu'ug yhäña'ay tu'haam. Xädø'øñ hänäjty yujwaamby.

³⁶ Coö miädooyy coö jäya'ay hänäjty may wyi'i ñaxy, mänit yajtøoyy tii jájtäp. ³⁷ Mänitä yhawáanäxä coö ja'a Jesús hänäjty ñaxy, ja'a Nazaret-tsohmbä. ³⁸ Mänitä wiindspä yaaxy:

—Jesús, miičhä David xyhaphajp xyhoc-hajp. Høøch hii näxúu'tsäc.

³⁹ Ja'a hajxy hänäjty jawyiin najxpä, mänit hajxy yhojy coö yhamónät. Pero maas møc jaduhñ jiaac yaaxy:

—Miičhä David xyhaphajp xyhoc-hajp. Høøch hii näxúu'tsäc.

⁴⁰ Mänitä Jesús tiänaaxiøjpy. Mänit miänaañ:

—Yajmets yø'ø wiindspä yaa.

Coö ja'a mähdijc yajmejtsä maa ja'a Jesúsän, mänitä Jesús ja'a wiindspä miäyajtøoyy:

⁴¹ —Nébiöch miičh nbuhbédät.

Mänitä mähdiøjc yhadsooy:

—Wiindsón, høøch hii yaghixó'cäc.

⁴² Mänitä Jesús miänaañ:

—Tøø jaduhñ mhijxø'øgy coo tøø mmäbøcy.

⁴³ Mäniitiä ja'a wiindspä jiaanč hijxø'cy. Mänitä Jesús piadu'ubøjcy. Mänitä tiägøøyy mänaambä coo ja'a Dios miøjjä jiaančhä. Ja'a jäya'ayhajxy jaduhñ híjxäbä, jaduhñ hajxy miänaambä nägøxiä coo ja'a Dios miøjjä jiaančhä.

19

¹ Mänitä Jesús quiajptägøøyy Jericó. Mänitä ñajxy cajptooty. ² Jimä mäyøøjäya'ay hänajty tu'ug ja'a xøhajpä Zaqueo. Wiindsón hänajty tiuumby maa ja'a jajnähuudi-uutpähajxiän. ³ Ja'a Zaqueo, jia wi'i yhixaambiä Jesús hänajty, pero cab hänajty hoy yhixa'añ je'eguiøxpä coo hänajty jiaanč tehñ ñaaxypä, møødä jäya'ayhajxy hänajty jiaanč tehñ miayy. ⁴ Mänitä päyø'øguiä ñøcxy maa ja'a Jesús hänajty ñaxø'owa'añän. Mänitä piejty quepyquiøxp, nebiä Jesús jaduhñ hoy yhíxät. ⁵ Coo ja'a Jesús jimä ñajxy, mänitä yuughee'py maa ja'a Zaqueo hänajty yhäña'ayän. Mänitä Jesús miänaañ:

—Zaqueo, tsógämäts, mänácäts, mejtsta'agáambøch jimä maa miich mdøjcän.

⁶ Mäniitiä ja'a Zaqueo miänajcy. Mänitä Jesús hoy yajtøjtägø'oy jootcujc. ⁷ Coo ja'a cu'ug jaduhñ yhiixy, mänitä hajxy tiägøøyy mänaambä cooc jaduhñ quia'a hoyy coo ja'a Jesús jimä miejtstá'agät maa ja'a cubojpäya'ay cugädieejäya'ay tiøjcän. ⁸ Mänitä Zaqueo tiänaayyø'cy. Mänitä Jesús ñämaayy:

—Wiindsón, huuc mädown, mäduhñtiøch nmøødä, cúpc-høchä häyoobäya'ay nnä'ä mo'owa'añ. Pønjátyhøch tøø nmämeech høhnda'agymiädia'agyhaam, mädaaxc-jaduhñtiøch nyajwiimbida'añ.

⁹ Mänitä Jesús miänaañ:

—Jädá'ajøchä piojpä quidiäeyhajxy nyajnähwá'adsaanä hädaa tøgootypä, je'eguiøxpä coo yhAbraham yhap yhocä hädaa craabä, hoy jia nä'ä jajnähuudiu'udy.

¹⁰ Páadyhøch yaa tøø ngäda'agy hädaa yaabä naaxwiin, høøch ja'a Diosquexypä, nébiøchä jäya'ay piojpä quidiäeyhajxy jaduhñ nyajnähwá'adsät. Jaduhñhøch njoot chocy.

¹¹ Mäwiingóonnäbä Jesús hajxy hänajty Jerusalén. Miädóowäbä cu'ugä Jesús miädi-a'agy hänajty. Jaduhñ hajxy hänajty miäna'añ cooc hänajty tøø yhabaatnä coo ja'a Dios ja'a miäjaa hänajty yajcähxø'øga'añ. ¹² Paadiä Jesús tiägøøyy mädiaacpä:

—Jaduhñä mäyøøhäna'c hänajty tu'ug. Nøcxaamb hänajty jäguemnaax coo hänajty mio'owa'añii møjtuung maa ja'a yhamdsoo cajptän. Mänitä hänajty wyiimbida'añ. ¹³ Coo hänajty tiu'ubøga'añ, mäniitiä mioonsä ja'a majcpä miøjyaaxy. Mäniitiä maxiädø'øñ hajxy nägøxiä yajcø'ødägøøyyä. Mäniitiä mäyøøjäya'ay miänaañ: “Mäduhñtiøch jäguem nhida'añ, myajmayø'owäp hädaa xädø'øñ hajxy.” Mäniitiä craa tiu'ubøjcy. ¹⁴ Jaanč tehñ xiøøghájtäbä craa jimä maa ja'a yhamdsoo cajptän. Mäniitiä cu'ugä capxy quiejxy coo hajxy hänajty quia'a tsocy coo ja'a craa jimä quiopc-hädät maa ja'a quiajpthajxiän. ¹⁵ Coo ja'a craa hänajty tøø tiuungwiingpøjnä, mäniitiä wyiimbijnä maa ja'a quiajptän. Mäniitiä mioonsä miøjyaaxy ja'a xädø'øñ hajxy hänajty tøø yajcø'ødägø'øyíjjäbä. Yajtøwaambiä craa hänajty mäduhñjaty hajxy hänajty tøø yajmayø'øy. ¹⁶ Mäniitiä tu'ug miejch. Mäniitiä miänaañ: “Wiindsón, majcjaduhñtiä ja'a mxädø'øñ tøø miayø'øy.” ¹⁷ Mäniitiä craa yhadsooy: “Jaanč tehñ yhoy miich tøø mgudiuñ. Wéeñtiøch miich hijty tøø nyajcø'ødägø'øy. Coo hoy tøø mgudiuñ, páadyhøch miich nyajnähdijy coo mgopc-hädät maa yø'ø majcpä cajptän.” ¹⁸ Mäniitiä wiingpä miejtspä. Mäniitiä miänaañ: “Wiindsón, mägooxcjaduhñtiä ja'a mxädø'øñ tøø miayø'øy.” ¹⁹ Mäniitiä craa yhadsógombä: “Jimä miich mgopc-hada'añ maa ja'a mägooxpä cajptän.” ²⁰ Mäniitiä wiingpä jiaac mejtspä. Mäniitiä miänaañ: “Wiindsón, chaadsä mxädø'øñ. Paayjäjóotyhøch hijty nyaghity. ²¹ Míiçhøch hijty ndsähgøøby je'eguiøxpä coo miich mjootmøjjä, coo miich myajpädø'øgy maa hijty tøø mga'a päda'aguiän.” ²² Mäniitiä mäyøøhäna'c miänaañ: “Caj miich hoy tøø

mgudiuñ. Hamdsoo miičh mmäna'añ coočh njootmøjjä, coočh nyajpædø'ogy maačh hijty tøø nga'a päda'aguiän. ²³ Jimhøch nxædø'øñ häxøpy tøø xpiädaacä maa ja'a bancon, neby jaduhñ cu miayøøyy, mäduhñtiøch hoy jäguem tøø nwädity." ²⁴ Mänitä craa ja'a jäya'ay ñämaayy ja'a hajxy hänajty jiiby tänaabiä: "Pøjcä yø'ø craa yø'ø xædø'øñ. Mo'ow yø'ø craa ja'a xædø'øñ majcjaduhñtiä tøø yajmayø'øyäbä." ²⁵ Mänit hajxy yhadsooyy: "Wiindsøn, tisän, ximä xædø'øñ may miøødäbä." ²⁶ Mänitä mäyøøhäna'c yhadsooyy: "Høøch jaduhñ mänaamb; pøn may møød, maas may mio'owa'añii. Pero pøn weeñtiä møød, pøgáanäxäp cøxiä mäduhñtiä miøødä. ²⁷ Y ja'a nmädsiphøchhajxy, ja'a høøch hajxy xxioøghajpä, yajmñ hajxy yaa; yagho'og hajxy yaa maačh nwiinduumän" —nømä Jesús miänaañ.

²⁸ Mänitä Jesús hajxy tiu'ubøjcombä. Jerusalén hajxy hänajty ñøcxy. ²⁹ Mäwiingoomb hajxy hänajty maa ja'a cajpt hänajty metsc xiøhatiän Betfagé møødä Betania, mäwiingõn maa ja'a tun hänajty xiøhatiän Olivos. Mänitä Jesús ja'a jiamiøød metsc ³⁰ ñämaayy:

—Nøcxø'og hajxy jim maa yø'ø cajptän. Jim cajtpa'a ja'a burrohuung hajxy tu'ug mbaada'añ cuxoch. Cahnä pøn ñä'ägä yaghäñaabietyñä.

Mmäguejø'owäp hajxy; mänit hajxy yaa mmämínät. ³¹ Coø pøn xmiäyajtøwät tii ja'a burro hajxy coo mmäguejø'oy, mänit hajxy mhadsówät coočh høøch jaduhñ nmäna'añ.

³² Mänitä burro hajxy hoy jiaančh paady nebiä Jesús hänajty tøø miäna'añän. ³³ Jimä burro hajxy hänajty miäguejø'oy, mänit hajxy ñämaayy ja'a cuburrohajxy:

—Tii yø'ø burro hajxy coo mmäguejø'oy.

³⁴ Mänit hajxy yhadsooyy:

—Højts nwiindsøn jaduhñ mänaamb.

³⁵ Mänitä burro hajxy yajnøcxy maa ja'a Jesúsän. Mänitä wyit hajxy piädaacy burronähgøxp. Mänitä Jesús hajxy yajpejty burronähgøxp.

³⁶ Mänitä cu'ugä wyit hajxy tiägøøyy najtswidsoøbiä tu'haam maa ja'a Jesús hänajty ñaxø'owa'añän. ³⁷ Olivostunmøjcä tu'u hänajty ñaxø'oy. Coø hajxy miejtsnä maa ja'a wi-inmänacän, mänitä Jesús jiamiøødhajxy tiägøøyy yaaxpä jojpä je'eguiøxpä coo hajxy hänajty xioonda'agy. Nämayy Jesús jiamiøødhajxy hänajty. Jaduhñ hajxy hänajty ya'axy coo ja'a Dios miøjjä jiaančh, coo hajxy hänajty tøø yhixy ja'a hoy-yagjuøøñäjatypä ja'a Jesús hänajty tøø yajcähxø'oguiäbä:

³⁸ —Møj jaančh hädaa gobiernä; Diosquexy hädaaduhñ. Møj jaančh Dios jim tsajpootypä; ween hajxy jim xioonda'agy —nøm hajxy hänajty ya'axy.

³⁹ Jimä fariseoshajxy hänajty näje'e piädäna'ay. Mänitä Jesús hajxy ñämaayy:

—Wiindsøn, mhøjäp yø'ø mjamiøødhajxy.

⁴⁰ Mänitä Jesús yhadsooyy:

—Høyhøch yø'ø häna'c cu nja hoj, cab häna'c häyaa ñä'a hamóombät; maas møc hajxy ñä'ägä yá'axät.

⁴¹ Coø ja'a Jesús hänajty jim miedsaannä Jerusalén, coo jaduhñ ñäheebøøyy, mänit tiägøøyy jøøbiä. ⁴² Mänit miänaañ:

—Yø'ø Jerusalénpäya'ayhajxy, coočh hajxy cu xchojcy, jootcujc hajxy häxøpy yhity. Tøø yhabaady coo ja'a cu'ughajxy cu jiootcugøøyy. Pero cab hajxy wyiinjuø'owa'añ. Cábøch hajxy xchoga'añ xmiee'xa'añ. ⁴³ Haxøøg hajxy jiada'añ yhabeta'añ. Medsaambä miädsiphajxy. Mänit hajxy jiuhguraajø'owa'añii piquiä. ⁴⁴ Cab hajxy yajmäjäda'aga'añii. Yagho'ogáanäp hajxy jaduhñ. Mänitä quiajphajxy quihdägoyya'añ. Paady hajxy jaduhñ jiada'añ yhabeta'añ coočh hajxy jaduhñ xquia'a tsoga'añ.

⁴⁵ Coø ja'a Jesús miejch cajptooty, mänit tiägøøyy tsajtøgooty. Mänit tiägøøyy høxquejxpädsøombä pønjaty jiiby juuby too'p. ⁴⁶ Mänit miänaañ:

—Jim jaduhñ myiñ cujaay maa ja'a Diosmädia'aguiän: "Jue'ečh ndøjc hajxy xwiáanät coočh hajxy jiiby xpia'yá'axät." Ja'a Dios jaduhñ mänaañ. Pero mijts, jaduhñ hajxy mwa'añ meedsøhñdy.

⁴⁷ Najxpäxøø ja'a Jesús hänajty jiiby yajnähixø'oy tsajtøgooty. Pero ja'a teedywiindsøn hajxy møødä ley-yajnähixøøbiähajxy, quiojyquiapxytiumby hajxy hänajty nebiä

Jesús hajxy yaghó'ogät, mөөдä cu'ugwiindsøn48 Pero cab hajxy hánajty ñajuø'øy neby hajxy jiatcø'owät je'eguiøxpä coo ja'a cu'ug ja'a Jesús miädia'agy hajxy hánajty jiaančh teh̄m miämädoonaayyä.

20

¹ Jiibiä Jesús ja'a cu'ug ja'a Diosmädia'agy hánajty yajñähixø'øy tsajtøgooty, mänitä Jesús ñämejtsä ja'a teedywiindsøn2 Mänit hajxy miänaañ:

—Pønä cuhdujt tøø xmiø'oy coo ja'a cu'ug tøø mhøxquejxpädsømy tsajtøgooty, y coo tøø mdägø'øy yajñähixøobiä.

³ Mänitä Jesús miänaañ:

—Chaads mijts nmäyajtøwaambä. Mhadsówäp hajxy jaduñ: ⁴ Coo ja'a Juan hijty wiädity mäyajnäbejpä, pøn jaduñ quejx, Dios tøgä jäya'ayä.

Cab hajxy ñälä hadsooyy. ⁵ Mänit hajxy tiägøøyy yajcapxiøobiä:

—Neby hajxy nnä'ä hadsówämät; coo hajxy nmänáanämät coo ja'a Dios quiejxy, mänit yhadsowa'añ: “Tii hajxy coo mga'a mæbøjcä.” ⁶ Y coo hajxy nmänáanämät coo jäya'ay quiejxy, mänitä cu'ug hajxy xquiuhgá'tsämät. Hiç, haagä mänaamb hajxy jaduñ coo ja'a Juan tøø quiexyijäm ja'a Dios.

⁷ Mänit hajxy yhadsooyy coo hajxy quia'a najuø'øy pønä Juan quejx mäyajnäbejpä.

⁸ Mänitä Jesús miänaañ:

—Ni høøch nga'a nägapxa'añ pøn

⁹ Mänitä Jesús ja'a cu'ug tiägøøyy mөөдmädiaacpä:

—Jaduñä jäya'ay tsaatypcam piädaacy maa ja'a ñaaxän. Mänit yhadoo'tujcy. Mänit tiu'ubøjcy. Jäguem ñøcxy. Jegaamb hánajty jim. ¹⁰ Coo ja'a tsaatypcuc yhabaaty, mänitä mioonsä tu'ug quiejxy coo ja'a tsaatypcam piuhmo'owøøjät. Mänitä mioonsä quiohxó'cäxä. Caj tii yajmäwiimbijtä. ¹¹ Mänitä mioonsä tu'ug quiejxcumbä. Jaduñä mähdiøjc quiohxó'cägombä. Haxøøgjaty jaduñ ñämaayyä. Ni je'e tii quia'a mooyyä. ¹² Mänitä wiingpä jiaac quiejxcumbä. Nähdsäbit cuhdsäbit ja'a mähdiøjc piädäacänä.

¹³ Mänitä cudsatypcam miänaañä: “Nébiøch nnä'ä jatcø'owät. Tøøch cham nnajuø'øy. Hädaa nhúunghøch, njaančh teh̄m chójpiøch njaančh teh̄m pia'häyóobiøch hädaa. Nhuuc quéxyhøch hädaa. Coo yhøxcabøøjät, weñdä wyiingudsähgø'owøøjät.” Mänitä yhuung quiejxy. ¹⁴ Coo yhøxcajpä, mänit hajxy tiägøøyy ñiñämáayyäbä, ja'a tsaatypcam hajxy hánajty hajoodiujpä: “Ja'a cudsatypcam yhuung yø'ø. Coo yø'ø tieedy jaduñ yhó'ogät, yø'ø mähmø'owaamb cudsatypcam. Tsøg hajxy yaghó'cäm neby hajxy jaduñ nmämähmøøyyämät.” ¹⁵ Mänitä cudsatypcam yhuung yhøxwiit-spädsøømäxä. Mänit hajxy yagho'cy.

Mänitä Jesús yajtøøyy:

—Nebiä cudsatypcam jiatcø'owa'añ coo yhuung yaghó'cäxä. ¹⁶ Nøcxaamb yagho'tä-gatsa'añ ja'a yhuung tøø yaghó'cäxäbä. Mänitä wiinghäna'c ja'a tsaatypcam yaghajood-iuga'añ.

Coo ja'a cu'ughajxy jaduñ miädooyy, mänit hajxy miänaañ:

—Ni ja'a Dios jaduñ quia'a mäná'anät.

¹⁷ Mänitä Jesús ja'a cu'ug wyiinhee'ppejty. Mänit miänaañ:

—Nej mijts ja'a Diosmädia'agy myajmädia'agytiägø'øy coo miäna'añ:

Ja'a tsaa mädyii ja'a tøjcojpä hajxy quia'a nä'ägä cumaayy, je'e nä'ägä tuundsoñ.

(Jesús hamdsoo niñänøømä nebiä tsaajän je'eguiøxpä coo hánajty quia'a tsocy quia'a mee'xyijäm ja'a cu'ug. Pero mo'owáanäbä Jesús hánajty møjtuung.)

¹⁸ Mänitä Jesús miänáangumbä:

—Pøn jaduñ cá'awäp yø'ø tsaanähgøxp, tägóyyäp jaduñ. Y coo pøn ñäh-gahbedøøjät yø'ø tsaa, tägóyyäp je'ebä.

¹⁹ Mäniitä ja'a Jesús jia madsaanä ja'a teedywiindsøn20 Mäniitä häna'c hajxy yajnahdijy coo hajxy ñibiäda'agөөjät nebiä hoyhäna'cän. Nөcxäp hajxy miädoy nebiaty ja'a Jesús hänäjty miädia'aga'añ. Coo ja'a Jesús quiapxtägöyyät, mäniit hajxy ñäxө'өwө'өwa'añ maa ja'a gobernadorän. ²¹ Mäniitä Jesús hajxy miäyajtөөyy:

—Wiindsøn, nnajuөөby hөjts coo miichä төyhajt myajnahixө'өy ja'a Diosmädia'agy. Hopionä miich mmөөdmädia'agy; y caj miich pөн mmөjpäda'agy, hoy pөн mөjtuung jia mөөдä. ²² Hөjtsä төyhajt móoyyác. Coo hөjtsä gobiernä hänäjty xyagjuy xyajmo'ona'añ, nej, hoyyada'a jaduhñ coo hөjts njúyädä.

²³ Pero ñajuөөbiä Jesús hänäjty coo hänäjty jia yajcapxtägoyya'añii. Mäniit miänaañ:
—Tiič hajxy coo xjia wi'i jiojcapxө'өwa'añ. ²⁴ Hөөчhä xädө'өñ tu'ug yaghíjác. Pөн yhajahñaxy yө'өduhñ, pөн xiөө yө'өduhñ.

Mäniit hajxy yhadsooyy:

—Ja'a gobiernä.

²⁵ Mäniitä Jesús miänáangombä:

—Pues, mmó'owäp ja'a gobiernä hajxy tijaty yө'ө jie'ehajpy. Y mmó'owäbä Dios hajxy tijaty yө'ө jie'ehajpy.

²⁶ Cabä Jesús hajxy hänäjty hoy yajcapxtägoyya'añ cu'ughagujc. Yagjuөөyy hajxy jaduhñ coo hoy yhadsooyy. Y cab hajxy waamb miänaañä.

²⁷ Mäniitä Jesús ñämejtsä ja'a saduceoshajxy näje'e, ja'a hajxy jaduhñ mänaambä cooc tyijy ni pөн quia'a jujypioğa'añ. Mäniitä Jesús hajxy ñämaayy:

²⁸ —Wiindsøn, jaduhñdsä Moisés jecy quiujahy, cooc ja'a ya'adiөjc hänäjty tu'ug tөө yho'ogy, y cooc ja'a yaamgto'oxy ja'a huung quia'a mөөдä, mäniitägä quiapy wyiingpögät, nébiägä yhuung jaduhñ miähmө'өwät ja'a piuhya'aguiөxpä. ²⁹ Jaduhñä häna'c-hajxy hänäjty, näjuxtujc tu'que'ex. Ja'a craa möjpä, mäniit jia pөjcy. Mäniit yho'cy. Nitu'ugtä yhuung quia'a mähmөөyy. ³⁰ Mäniitä jiөdsөmy ja'a yaamgto'oxy jia wiingpөjcombä. Mäniit je'e yhó'combä. Nitu'ugtä yhuung quia'a mähmөөbiä. ³¹ Mäniitä yaamgto'oxy ja'a quiapy jia wiingpөjcombä jat'u'ug. Jaanä jaduhñ yhó'combä. Nägөxiä ja'a yaamgto'oxy ja'a quiapy jia mөөdtsänaayy ja'a näjuxtujpä; cөjx hajxy yho'ogy, y ni pөн yhuung quia'a mähmөөyy. ³² Mäniitä yaamgto'oxy jiaag ho'pä. ³³ Hoorä, coo hajxy hänäjty tөө jiuypiojnä, pөнä to'oxiojyc төyhajt mөөdtsäna'awaamb ja'a näjuxtujpä, jim tsajpootyp.

³⁴ Mäniitä Jesús yhadsooyy:

—Hädaa yaabä naaxwiin, pөjp huucp ja'a jäya'ayhajxy yaa. ³⁵ Pero pөnjaty juypioğaamb, pөnjaty nөcxaamb tsajpootyp, cab hajxy jim piөgaannä yhu'ugaannä.

³⁶ Cab hajxy mänaa yho'tägatsaannä. Coo hajxy hänäjty tөө jiuypiojnä, jaduhñ hajxy miähmө'өwaannä nebiä Dioshuungän, nebiä Diosmoonsän. ³⁷ Hamdsoo ja'a Moisés hajxy xyajnahixөөyyäm coo ja'a ho'ogyjiäya'ayhajxy jiuypioğa'añ, jiiby maa jaduhñ myiñän coo ja'a hujtshuung hänäjty tioy tu'ug. Jaduhñ jiiby myiimbä coo ja'a Dios wyiingudsähgө'өyíjäm ja'a Abraham mөөдä Isaac mөөдä Jacob. ³⁸ Cabä Dios wyiingudsähgө'өyíjäm ja'a ho'ogypiähajxy. Ja'a jujcyjiäya'ayhajxy, je'eds hajxy jaduhñ wiingudsähgөөby ja'a Dios.

³⁹ Mäniitä ley-yajnahixөөbiähajxy näje'e miänaañ:

—Wiindsøn, yajxon miich jaduhñ mmädia'agy.

⁴⁰ Cabä Jesús hajxy waamb ñämaañä je'eguiөxpä coo hajxy hänäjty chähgөөñä.

⁴¹ Mäniitä Jesús miänaañ:

—Tii hajxy coo mmäna'añ cooc ja'a David yhuunghaty ja'a Diosquexy. ⁴² Hamdsoo ja'a David miänaañ maa ja'a Salmos quiujahyyän:

Mänitөчhä Dios ja'a nwiindsøn xñamaayyä:

“Yaads miñ häña'aw nhahooguiө'өháampiөch,

⁴³ hœxtä cónoçhä mmädsip tœœ nga'a yajmäjädáacäm.”

⁴⁴ Coö ja'a David ja'a Diosquexy hamdsoo ñämaayy “wiindsón”, nébiäts jaduhñ ñä'a huunghádät.

⁴⁵ Jimä cu'ughajxy hänäjty nägœxiä miämädoona'ay, mänitä Jesús ñämaayy ja'a jiamiœdhajxy:

⁴⁶ —Ca'a yœ'œ ley-yajnähiçœœbiä miädia'agy hajxy mmäbœjçä. Yoñwitmœœd hajxy wyi'i wiädity je'eguiœxpä coö hajxy wyi'i yajcumaya'añ. Jaduhñä jioothajxy jia tsoçy coö hajxy jim wyiingudsähgœ'œwœœjät halaplaaz. Jiiby hajxy yhäña'awa'añ maa ja'a häñaabiejt yajxonjatypän jiiby tsajtœgooty, chaads jim maa ja'a xœœ jiadyiijän. ⁴⁷ Y piœjçäbä yaamgto'oxy ja'a tiœjç hajxy. Wi'i yajcumayaamb hajxy, paady hajxy wyi'i Dyiospa'ya'axy jejcyjaty. Hanaxiä hajxy chaaçhtiuna'añii.

21

¹ Tsajtœgootiä Jesús hänäjty, mänitä mäyœœjäya'ay yhiçy coö xädœ'œñ hajxy hänäjty quiuyoxœ'œy. ² Mänitä yaamgto'oxy tu'ug yhiçxpä ja'a jaanç tehñ yhäyoobä. Jagooyyä xädœ'œñhuung hänäjty miœœdä metsc. Je'eduhñ çœjç yecy. ³ Mänitä Jesús miänaañ:

—Tœyhajt jaduhñ, maas may hädaa yaamgto'oxy häyoobä ja'a xädœ'œñ tœœ quiuyoxœ'œy quejee yœ'œ mäyœœjäya'ayhajxy. ⁴ Yœ'œ mäyœœjäya'ayhajxy, je'e hajxy quiuyoxœœyy mäduhñtiä hajxy tœœ yajcunaxy. Pero hädaa yaamgto'oxy, je'e çœjç quiuyoxœ'œy mäduhñtiä hijty ñägaya'añ.

⁵ Jiibiä jäya'ayhajxy hänäjty näje'e tsajtœgooty. Jaduhñ hajxy hänäjty miädia'agy coö ja'a tsaä jiaanç tehñ yajxonjatiä, coö hajxy tœgooty yajxon jiaanç tehñ yhiçy nebiatiä jäya'ayhajxy hänäjty tœœ piäda'aguiän. Mänitä Jesús miänaañ:

⁶ —Habaadaamb jaduhñ coö hädaa tsajtœjç jyida'añ çœxiä.

⁷ Mänitä Jesús ñämaayyä:

—Wiindsón, mänaa jaduhñ jiada'añii. Tii hijxtahñd jaduhñ naxaamb coö hänäjty tœœ yhabaatnä.

⁸ Mänitä Jesús yhadsooyy:

—Mniyajcopçœ'œwœœjöp hajxy, çab hajxy myajwiinhœœnät. Nämays hajxy wiädita'añ. Jaduhñ hajxy miäna'ana'añ: “Hœœçhä Dios tœœ xquiexy”, y “Tœœ yhabaatnä.” Pero çab hajxy mmäbœgät. ⁹ Coö hajxy jaduhñ mmädoyhádät coö tsip piädœ'œga'añ, çab hajxy mdsähgœ'œwät. Jayœjpä tsip jiada'añii, çahnä hänäjty yhabaadyñä.

¹⁰ Mänitä Jesús jiaac mänaañ:

—Nimiädsibœ'œwáañäbä wiingçajptjaty. ¹¹ Mœç hujç jiädita'añ. Jadáañäbä yuuxœœ mœœdä pa'am wiinduhmyhagajpt. Y jimä hoçhähgœœñäjatypä quiähxœ'œga'añ tsajtwiing.

¹² 'Pero çahnä hänäjty yhabaadyñä, xmiadsaamb mijts ja'a jäya'ayhajxy. Xyajnœçxaamb hajxy maa ja'a tsajtœjçän. Jiiby hajxy xñäxœ'œwœ'œwa'añ. Xçhumaamb hajxy jaduhñ. Xyajnœçxaamb hajxy maa ja'a gobiernäwiinduumhajxiän. Ja'a hœœçhcœxpä hajxy xçhaaçhtiuna'añ. ¹³ Coö hajxy jaduhñ mjádät mhabétät, mänitœch hajxy xmiädiä'agät. ¹⁴ Wiinjuœ'œw hajxy jaduhñ. Çab hajxy jäguemiä mwiinmahñdyhádät waambaty hajxy mhadsówät. ¹⁵ Hœœçh mijts nbuhbedaañby. Nmo'owáambiœch mijts ja'a wiinmahñdy nebiä mmädsip hajxy mga'a yajmäjädá'agät. ¹⁶ Hœxtä xñähdugaambä mdeedy hajxy mœœdä mbuhya'ayhajxy mœœdä mjuçy mmägu'ughajxy mœœdä mmägu'ughajpähajxy. Näjé'eyyäm mijts häna'c xyagho'oga'añ. ¹⁷ Nägœxiä hajxy xxiœœghada'añ maa ja'a hœœçhcœxpän. ¹⁸ Hoy hajxy çœypäneçpiä cu mja jat cu mja habet, tsipçœxp hajxy hodiium mnœçxa'añ. ¹⁹ Coö hajxy hamuumdu'joot mmee'xtúgät, mdägœ'œwäp hajxy jim tsajpootyp.

²⁰ 'Coö hajxy mhíxät coö ja'a Jerusalençajpt hänäjty tœœ jiuhibgœ'œyíjäm ja'a miädsip, mänit hajxy mnajuœ'œwät coö hänäjty tœœ yhabaatnä coö Jerusalén quiuhdägoyya'añ.

²¹ Pœnjaty hänäjty yaa hijp Judeanaaxooty, tsipçœxp hajxy piäyœ'œgät, nôçxäp hajxy jim maa ja'a tunän. Pœnjaty hänäjty yaa hijp Jerusalençajptooty, tsipçœxp hajxy yaa çhóonät. Pœnjaty hänäjty hijp çamjooty, çab hajxy ñœçxtägätsät quiaçptootyhajxy. ²² Jaançh

tehm̄ chaačhpøgaambä jäya'ayhajxy nägø'ø nädecypä. Jadáanäp jaduñ nebiaty jii by myiñän cujaay maa ja'a Diosmädia'aguiän coo jiada'añii. ²³ Jaančh tehm̄ chaačhpøgaambä to'oxiøjc-hajxy hänajty, ja'a hajxy hänajty moxtsa'amhjäp, ja'a hajxy hänajty maaxhuungmøødpä. Hoyhoyyä jäya'ayhajxy yaa chaačhpøga'añ hädaa yaabä naaxwiin. Jaančh tehm̄ yajcumädoŵaanäp hajxy jaduñ. ²⁴ Näje'e hajxy yho'oga'añ coo ja'a tsip jiada'añii. Näje'e hajxy miadsa'añii. Mänit hajxy yajnøcxa'añii wiinduhmyhagajpt. Minaambä jäguemjäya'ay ja'a Jerusaléncajpt hajxy yajma'ada'añ, høxtä coonä yhabétät coo ja'a cuhdujt hajxy piójcäxät coo hajxy jaduñ quia'a jatcøøñät.

²⁵ 'Cähxø'øgaambä hijxtahnd maa ja'a xøøjän, maa ja'a po'ojän, maa ja'a madsa'ajän. Pädo'øgaambä mejy; jäditaamb jaduñ. Paadia cu'ughajxy chähgø'øwa'añ wiinduhmyhagajpt. ²⁶ Wiinmahñtiägoyyaambä jäya'ayhajxy coo høchähgøøñä yaa jiada'añii hädaa yaabä naaxwiin. Tsäyuyyaambä xøø chaadsä po'o chaadsä madsa'a. ²⁷ Mänitøch ngädaactägatsa'añ joc-hagujc, høøch ja'a Diosquexypä. Hajájjbøch ngäda'aga'añ mäjaamøød. Xyhixáambøchä jäya'ayhajxy. ²⁸ Coo jaduñ jiadøøjät, mänit hajxy mjootcugø'øwät. Mänit hajxy mbädsøma'añ hawa'adstuum.

²⁹ Mänitä Jesús miänáangombä:

—Høxtahndsä quepychaa, ³⁰ coo hajxy mhixy coo wiamy, mnajuøøby hajxy coo pioodtägøøñä. ³¹ Jaduñ mäwíinäts je'e coo ja'a hijxtahnd hajxy mhijxtsøonät, mnajuø'øwäp hajxy jaduñ coo yhabaatnä coo Dios ja'a miäjaa yajcähxø'øga'añ.

³² 'Coo jaduñ yhabaadät nébiøch cham̄ nmädia'aguiän, cahnä jäya'ayhajxy hänajty quiøxy ho'ogyñä ja'a hajxy jäda'ahatypä. Tøyhajt jaduñ. ³³ Tägoyyaambä tsajtwiing møødä naaxwiin, pero tøjiaadaamb nébiøch cham̄ nmädia'aguiän.

³⁴⁻³⁵ 'Mniyajcopcø'øwøøjäp hajxy. Cab hajxy mnajuø'øy mänáajøch ngädaactägatsa'añ. Paady hajxy hoy mhídät. Cab hajxy mh'uug cab hajxy mjøø'xät. Cab hajxy tii mhadsógät hädaa yaabä naaxwiin. Pønjaty jaduñ ca'a cudiumb, haxøøg hajxy jiada'añ yhabeta'añ, høxtä hoy hajxy maa cu jia tsäna'aw. ³⁶ Nähix hahixø'ø hajxy mhídät. Homiänaajä hajxy mDiospa'yá'axät neby hajxy haxøøg mga'a jat mga'a habétät, nébiøch hajxy hoy xwyiingudsähgø'øwät, høøch ja'a Diosquexypä.

³⁷ Xøømbaadia Jesús hänajty yajnähixø'øy tsajtøgooty. Coodspaady hänajty wiädity maa ja'a tun̄ xiøhatiän Olivos. ³⁸ Jopyñä ja'a jäya'ayhajxy hänajty quiøxy hamugø'øy tsajtøgooty coo ja'a Jesús miädia'agy hajxy hänajty wyi'i yhamädoowhidaanä.

22

¹ Tøø ja'a pascuaxøø hänajty miäwiingoonnä mänaa ja'a tsajcaagy hajxy hänajty quiayyän ja'a cajpä tsooy miøødäbä. ² Jia wi'i xyiictaacyy jia wyi'i miädiaactaacyy ja'a teedywiindsøn̄hajxy hänajty møødä ley-yajnähixøøbiähajxy nebiä Jesús hajxy yaghó'ogät. Pero chähgøøbiä cu'ug hajxy hänajty.

³ Mänitä Judas Iscariote ja'a Satanás jioottägøøyy quioptägøøyyä. Jesús jiamiøød hänajty je'e tu'ug maa ja'a nämajmetspän. ⁴ Mänitä Judas ja'a teedywiindsøn̄ hoy miøødmädia'agy møødä møjhjäp hajxy maa ja'a tsajtøjcän. Je'e yajmøødmädiaac nebiä Jesús yajcø'ødägø'øwät. ⁵ Mänitä teedywiindsøn̄hajxy xioondaacy. Mänitä Judas hajxy ñämaayy coo xädø'øñ hajxy mio'owa'añ. ⁶ Mänitä Judas ñähadsooyy. Mänit tiägøøyy wiinmahñdyhjäp nebiä Jesús yajcø'ødägø'øwa'añ, mänaa ja'a cu'ughajxy hänajty quia'a jaty mayyän.

⁷ Mänitä pascuaxøø yhabaatnä mänaa ja'a tsajcaagy hajxy quiayyän, ja'a cajpä tsooy miøødäbä. Yoixypä meeghuung hajxy hänajty ja'a pascuaxøøjooty. ⁸ Mänitä Jesús ñämaayy ja'a Pedro møødä Juan:

—Nøcx ja'a tsuugay hajxy yaghoyø'øw. Tøø yhabaady coo hajxy ndsuugayáanäm ja'a pascuaxøøgøxpä.

⁹ Mänitä Jesús hajxy miäyajtøøyy:

—Maa højts nyaghoyø'øwät.

¹⁰ Mänitä Jesús yhadsooyy:

—Coo hajxy mgajptäg'owät, mbaadaambiä jäya'ay hajxy tu'ug majtcón. Mbanócxäp hajxy maa tiøjtäg'owa'añän. ¹¹ Mänitä cudøjc hajxy mnämä'awät: “Højts nWiindsón tøø xquiexy coo højts miich nmäyajtówät maa hawa'adspä jii maa højts ndsuugáyät ja'a pascuaxøøgøxpä.” ¹² Mänitä hawa'adspä hajxy xmio'owa'añ cruundä jim cøxp. Tøø hajxy hánajty hoy yajxón yaghoyø'oy. Jimä tsuugay hajxy myaghoyø'owät.

¹³ Mänit hajxy hoy piaady nebiatiä Jesús hánajty tøø miäna'añän. Mänitä tsuugay hajxy yaghoyøøyy ja'a pascuaxøøgøxpä.

¹⁴ Coo yhabaatnä, mänitä Jesúshajxy yhäñaaguiädaacy meexäwiinduum møødä jiamioødhajxy. ¹⁵ Mänitä Jesús miänaañ:

—Cooch nho'ogaannä, jootcújc-høch nnijiäwø'oyii cooch mijts nmøødtuugaya'añ ja'a pascuaxøøgøxpä. ¹⁶ Cábøch mijts nmøødtuugaadiägatsa'añ høxtä coonä yhabáadät mänaa ja'a Dios ja'a miäjaa yajcähxø'oga'añän. Tøyhajt jaduhñ.

¹⁷ Mänitä Jesús ja'a vaso tu'ug quionø'cy vinomøød. Mänitä Dioscujú'uyäp yejcy. Mänit miänaañ:

—Huucmuc hajxy hädaa nägøxiä. ¹⁸ Cábøchä vino nhuuctägatsa'añ høxtä coonä yhabáadät coo ja'a Dios ja'a miäjaa yajcähxø'oga'añ.

¹⁹ Mänitä Jesús tsajcaagy quionø'cy. Mänitä Dioscujú'uyäp yéjcombä. Mänitä tsajcaagy qyijwa'xy. Mänitä jiamioød miooyy. Mänit miänaañ:

—Høøch nni'x ngopc hädaa. Ja'a mijtscøxpøch nniñähduga'añii cooch mijts nnähho'tu'uda'añ. Naaghóoc-høch mijts xjiahmiejtsta'agy, jaduhñä tsajcaagy hajxy mgáyät.

Coo hajxy quiaabiädøøyy, mänitä Jesús ja'a vaso quionø'cy, ja'a hánajty vinomøødpä. Mänit miänaañ:

²⁰ —Hädaa vino, hijxtahñd jaduhñ miähmø'owa'añ nébiøch nnø'ty nyaghäyowa'añän cooch mijts nnähho'tu'uda'añ.

²¹ 'Pero ja'a craa xyegáambøchä, yaaçh jaduhñ xmiøødhäña'ay maa hädaa meexän. ²² Tsipcøxpøch nho'oga'añ nébiøchä Dios tøø xyajñhdijjiän, høøch ja'a Diosquexypä. Pero ja'a craa xyegaambä, maas haxøøg jiada'añ yhabeta'añ.

²³ Mänitä Jesús jiamioødhajxy tiägøøyy nimiäyajtówäbä hamiñ haxøpy pønä Jesús yegaamb.

²⁴ Mänit hajxy tiägøøyy yajcapxiøøbiä pøn møjtuung mo'owáanäp. ²⁵ Mänitä Jesús miänaañ:

—Hädaa hajxy yaa gobiernähajpä hädaa yaabä naaxwiin, nä'ä hanehmb hajxy. Tsipcøxpä cu'ughajxy quiudiuñ neby hajxy yhane'emyijän. ²⁶ Pero mijts, cab hajxy mnibiäda'agøøjät nebiä gobiernän. Pøn møjtuung møød maa mijtsän, ween ñibiäda'agyii nebiä tuung møj ca'a møødpän. Pøn hanehmb maa mijtsän, ween ñibiäda'agyii nebiä moonsän. ²⁷ Pøn møjtuung møød, ja'a craa caabiä, tøgä craa mäyajcaabiä. Ja'a craa caabiä, je'eds møjtuung møød. Pero høøch mijts nyajcaaby, hóyhøch møjtuung nja møødä.

²⁸ 'Tøøch mijts xmiøødyo'oy xmiøødnaxy tsip xex. ²⁹ Páadyhøch mijts møjtuung nmo'owa'añ, nébiøch nDeedy tøø xmio'oyän, ³⁰ neby hajxy jim mgay mhú'ugät maaçh nmeexäwiinduumän maaçh ngobiernähada'añän, nebiä hoyhäñaabiejt hajxy myaghäña'awø'owät mänaa ja'a judíos hajxy mhane'ema'añän, ja'a nämajmetsc-hagajtpä.

³¹ Mänitä Jesús ja'a Pedro ñämaayy:

—Simón, Simón, mniyajcopcø'owøøjäp. Tøøchä Satanás cuhdujt xjia mäyujwa'añ coo mijts xyajtu'udägóyyät. ³² Pero tøøchä Dios nmänuu'xta'agy ja'a miichcøxpä nébiøch miich nmädia'agy homiänaajä xmiäbøjcät. Coo miich hánajty tøø mwiinmahñdymejtsnä, mjoodcapxmøcpøgäp ja'a mjamiøødtøjc neby hajxy jaduhñ quia'a tu'udägóyyät.

³³ Mänitä Pedro ja'a Jesús ñämaayy:

—Homiäajøch miich nbanócxät, hoy jia pujxtøgootiä. Høxtä näguipxy jaduhñ nmøødhó'ogät.

³⁴ Mänitä Jesús miänaañ:

—Pedro, cham nnäma'ay, cahnä tseey hänajty ya'axyñä, tøø miičh hänajty tægøøghooc mnijjogapxyii cooč tyijy xquia'a hixiä.

³⁵ Mänitä Jesús miäyajtøøyy ja'a jiamiøødhajxy:

—Coočh mijts nguejxy Diosmädia'agy-yajwa'xpä, mänitøech mijts nnämaayy coo hajxy tii mga'a wähätät, ni xuummy, ni xädø'øñhidøhñdy, ni cø'øg. Y tii hajxy myajmaajajt.

Mänit hajxy yhadsooyy:

—Ni tii.

³⁶ Mänitä Jesús miänaañ:

—Pero chaačh nmänaañnä coo xuummy hajxy mwähätät møødä xädø'øñhidøhñdy. Pøn espada ca'a møød, weenä wyit tioogy nebiä espada jiúyät. ³⁷ Tsipcøxp tiøjiada'añ neby jim myiñän cujaay maa ja'a Diosmädia'aguian ja'a høøchcøxpä: “Ca'awiindøyhäna'c jaduñ tyijjä.” Cøxiä jaduñ tiøjiada'añ neby jim myiñän cujaay ja'a høøchcøxpä.

³⁸ Mänit hajxy miänaañ:

—Chaa højts espada metsc nmøødä.

Mänitä Jesús yhadsooyy:

—Mädøyyä jaduñ.

³⁹ Mänitä Jesús tiu'ubøjcy. Mänit ñøxcy maa ja'a Olivostunän neby hänajty ñä'ägä cuhdujthatiän. Quipxiä jiamiøødhajxy pianøxcy. ⁴⁰ Coo hajxy jim miejch, mänitä Jesús miänaañ:

—Tsögä Dios hajxy pa'yáaxäm; jaduñ hajxy mga'a tu'udägóyyät.

⁴¹ Mänitä Jesús ñøxcy jäguemjuøøby nidiuhm Diospa'yaaxpä. Mänit jyjicadaacy.

⁴² Mänit miänaañ:

—Teedy, coo miičh jaduñ mmäná'anät, cáboch hädaa tsaačhpä peenä nmänáxät. Pero ca'a yhøøch nguuhdujtä nyaghidaamby; miičh mguhdujt hidaamb.

⁴³ Mänitä Diosmoonsä tu'ug ñäguexxtøøxy. Tsajpootyp hänajty choon. Ja'a Jesús ja'a mäjaa hoy mio'oy. ⁴⁴ Jaančh tehñ chaačhpøjppä Jesús hänajty. Mänitä Dios miänuu'xtaacy nägø'ø nädecypä. Mänit xiäbitnøø tiägøøyy ta'xpä naaxwiin nebiä nø'tiän.

⁴⁵ Coo ja'a Jesús Dyiospa'yaaxpädøøyy, mänit tiänaayyø'cy. Mänitä jiamiøødhajxy hoy yhixø'oy. Haagä maab hajxy hänajty je'eguiøxpä coo hajxy hänajty jiaanč tehñ jiootmayhaty. ⁴⁶ Mänitä Jesús miänaañ:

—Tii hajxy coo mwi'ia'ay. Pädo'øg hajxy. MDiospa'yá'axäp hajxy; jaduñ hajxy mga'a tu'udägóyyät.

⁴⁷ Jimnä ja'a Jesús hänajty miädia'agyñä, mänitä cu'ug miejch. Ja'a Judas hänajty copc-hajp maa ja'a cu'ughajxiän. Je'e ja'a Jesús hänajty tøø jiamiøødhaty maa ja'a nämajmetspähajxiän. ⁴⁸ Mänitä Jesús hoy chu'xy. Mänitä Jesús miänaañ:

—Judas, nej, tsu'xyháamhøch miičh xyega'añä, høøch ja'a Diosquexypä.

⁴⁹ Mänitä Jesús jiamiøødhajxy miänaañ:

—Wiindsøn, nej, pädo'øgäp højts espadahamä.

⁵⁰ Mänitä Jesús jiamiøød tu'ug tiaatspujxtuuty ja'a teedywiindsøn mioonsä. Ja'a hahooybä taatsc ñäbujx. ⁵¹ Mänitä Jesús miänaañ:

—Ween hajxy yhity. Ween tiuhnä.

Mänitä Jesús ja'a craa tiaatsc piädaacä. Tsooc je'e. ⁵² Mänitä Jesús ñämaayy ja'a teedywiindsøn hajxy, møødä tsajtøjwiindsøn hajxy, møødä møjtøjc-hajxy, ja'a Jesús hajxy hänajty yajpädo'øgaambä:

—Nej, mée'tspøch hajxy jaduñ xtyijjiä coo espada coo wojpt hajxy mmäbädø'øguiä.

⁵³ Coočh mijts hijty nmøødhity tsajtøgooty najxpäxøø, cáboch mijts hijty nej xtiuñ. Pero tøø yhabaatnä coočh mijts xmiädsät ja'a haxøøgpä miäjaagøxpä.

⁵⁴ Mänitä Jesús hajxy miajch. Mänit hajxy yajnøxcy maa ja'a teedywiindsøn tiøjcän. Jäguemjuøøbiä Pedro hänajty piayo'oy. ⁵⁵ Mänitä soldado jøøn hajxy tiägøøyy yajmøjjøøbiä jim tøba'amhagujc. Mänit hajxy yhøxtaacy piquiä jøømba'axaambä. Mänitä Pedro piahøxtaacpä. ⁵⁶ Mänitä to'oxymoonsä ja'a Pedro yhiyxy coo jiiby piahäñaabiä. Mänit miänaañ:

—Yø'ø mixy, ja'a Jesús jiamiøød yø'ø.

⁵⁷ Mänitä Pedro ñijjogapxä:

—Pi'muuxy, cábøchä Jesús nhixiä.

⁵⁸ Mänitä Pedro yhøxcájpägombä wiinghäna'c. Mänit ñämaayyä:

—Miičh mjamiøød je'e, tuhmds.

Mänitä Pedro yhadsooyy:

—Joom, caj tiøyyä.

⁵⁹ Tøø hänajty tu'horä yhity, mänitä Pedro ñänøømä:

—Tøyhajt jaduhñ coo ja'a Jesús jiamiøød yø'ø. Galilea yø'ø craa chohmä.

⁶⁰ Mänitä Pedro miänaañ:

—Joom, pätiidä miičh jaduhñ mnä'ä mädiaacyy.

Tuunä Pedro jaduhñ ñä'ä mänaañ, mäniitiä ja'a tseey jiaančh yaaxy. ⁶¹ Mänitä Jesús ja'a Pedro miøjhee'py. Mänitä Pedro cøjx jiahmiech waambaty hänajty tøø ñäma'ayíjäm ja'a Jesús: “Cahnä tseey hänajty ya'axyñä, tøø miičh hänajty tægøøghooc mnijjogapxyii cóogøch tyijy xquia'a hixiä.” ⁶² Mänitä Pedro wyiimbijnä. Mänit hoyhoy jiøyy.

⁶³ Mänitä Jesús tiägøøyyä näxícäbä näyáaxäbä ja'a häna'c-hajxy hänajty hadänaabiä. Mänit tiägøøyyä wobhó'cäbä. ⁶⁴ Mänit hajxy wyiinguxodsøoyy. Mänit hajxy wyiingu-wobøoyy. Mänitä Jesús ñämaayyä:

—Najuø'øw pøñ tøø xwiopy.

⁶⁵ Jaančh tehñ yhaxøøgjatiä Jesús ñämaayyä.

⁶⁶ Coo jiobøoyy, mänitä judíoshajxy yhamugøøyy, møødä møjtøjc-hajxy, møødä teedywiindsøn'hajxy, møødä ley-yajnahixøøbiähajxy. Mänitä Jesús hajxy yajnøcxy maa junta hajxy hänajty yagjadyiijän. Mänit hajxy miäyajtøoyy:

⁶⁷ —Højtsä tøyhajt móoyäc, nej, miičh Dios tøø xquiexiä.

Mänitä Jesús yhadsooyy:

—Hóyhøch jaduhñ cu nja mäna'an, cábøch mijts häyaa xñä'ä mäbójcäbät. ⁶⁸ Y cooçh mijts waambaty nmäyajtøwät, cábøch hajxy xyhadsówät, ni cábøch hajxy xyhøxmádsät. ⁶⁹ Tøø yhabaatnä cooçh jim nnøcxaannä maa ja'a Diosän, ja'a møjcuhdujtmøødpä. Jímhøch nøcxy nhäña'awa'añ maa ja'a yhahooyhaampiän, høøch ja'a Diosquexypä.

⁷⁰ Mänit hajxy wyi'i miäyajtøoyy:

—Nej, miičhä Dios xyHuunghajpä.

Mänitä Jesús yhadsooyy:

—Tøyhajt jaduhñ nej mijts mmäna'añän.

⁷¹ Mänit hajxy miänaañ:

—Tii testigo hajxy nnä'ä jaac wáanämät. Hamdsoo hajxy tøø nmädóowäm coo hamdsoo tøø ñimiädia'agyii.

23

¹ Mänit hajxy nägøxiä tiänaayyø'cy. Mänitä Jesús hajxy yajnøcxy maa ja'a Pilato wyiinduumän. ² Mänit hajxy tiägøøyy nähwaambejpä:

—Jim hädaa craa ja'a cu'ug hijty wyi'i quiapxhiñ. Nømm hijty miäna'añ coo højtsä gobiernä xädø'øñ nga'a mó'owät ja'a jim tsänaabiä Roma. Jaduhñ hijty miänaambä cooc tyijy ja'a Dios tøø quiexyii gobiernähajpä.

³ Mänitä Pilato ja'a Jesús miäyajtøoyy:

—Nej, jaduhñ miičh mnibiäda'agyii nebiä gobiernän maa hädaa judíoscájptänä.

Mänitä Jesús yhadsooyy:

—Tøyhajt jaduhñ nej miičh mmäna'añän.

⁴ Mänitä Pilato ñämaayy ja'a teedywiindsøn'hajxy møødä cu'ug:

—Cábøch hädaa craa nhixy coo tii pojpä quia'a møødä.

⁵ Mänit hajxy tehngajnä wyi'i ya'axy:

—Høhnda'agymiädia'agyhaam yø'ø craa yajnähixø'øy ja'a Judeabä-jäya'ayhajxy. Jim yajtsøhndaacy Galilea. Yaa tøø miech. Jaduhñ yaa jiatcøøbiä.

⁶ Coo ja'a Pilato jaduñ miädooyy, mänit yajtøoyy pø jimä Jesús jiaanč tsooñ Galilea. ⁷ Coo ja'a Pilato yhawáanäxä cooc ja'a Jesús jim chooñ, mänitä Pilato ja'a Jesús quiejxy maa ja'a Herodes wyiinduumän. Hix, gobernador ja'a Herodes hänajty jim tiuumby Galilea. Tøø hänajty quiody Jerusalén xøøhajpä. ⁸ Coo ja'a Herodes ja'a Jesús yhjxy, mänit jiootcugøoyy je'eguiøxpä coo hänajty jia wi'i yhixa'añ. Tøø hänajty miädoyhaty coo ja'a Jesús ja'a hoy-yagjuøøñäjatypä hänajty tøø yajcähxø'ogy. Jaduhnä Herodes hänajty jia wi'i yhixa'añ coo ja'a Jesús ja'a hoy-yagjuøøñäbä yajcähxø'ogät. ⁹ Mänitä Herodes ja'a Jesús madiu'u jia wi'i miäyajtøoyy, pero cabä Jesús ñä'ägä hadsooyy. ¹⁰ Tehngajnä ja'a Jesús hänajty ñähwaambedyijäm ja'a teedywiindsøn11 Mänitä Herodes ja'a Jesús hajxy tiägøoyy näxiicpä näyaaxpä møødä soldadohajxy. Mänitä wit hajxy yajpägøoyy yajxonbä nebiä rey wyitän. Mänitä Herodes ja'a Jesús quiejxwiimbijty maa ja'a Pilatän. ¹² Mänitxøø ja'a Pilato ja'a Herodes miøødnimiägu'ughajpøjcä. Nimiädsiphájtäp hajxy hänajty.

¹³ Mänitä Pilato yaaxmujcy ja'a teedywiindsøn14 Mänit miänaañ:

—Míjtshøch hädaa craa tøø xyajnämech. Mmänaamb mijts jaduñ coo ja'a cu'ug hijty quiapxhiñ. Tøøch nja yajmäyach maa mijts mwiinduumhajxiän, y tøø hajxy mhixy mmädoy coo ja'a pojpä quia'a møødä nej mijts tøø mja nähwaambetiän. ¹⁵ Ni ja'a Herodes quia'a mäna'añ coo ja'a pojpä miøødä, paady tøø quiejxwiimbity. Tøø hajxy mhixy coo ja'a pojpä quia'a møødä. Paady, cáboch nyajyagho'oga'añii. ¹⁶ Jayójpøch nyajcumädowna'añ, mänitøch nhøxmadsaannä.

¹⁷ Jaduhñ hajxy hänajty quiuhdujthaty coo ja'a tsumyjiäya'ay hajxy hänajty tu'ug yhøxmach ja'a pascuaxøøjooty. ¹⁸ Mänit hajxy nägøxiä yaaxy:

—Ca'a yø'ø craa mhøxmach. Jue'e mhøxmádsäp ja'a craa Barrabáshajpä.

¹⁹ Paadiä Barrabás hänajty tøø chumyii coo ja'a tsip hänajty tøø yajpädø'ogy cajptooty, møød coo hänajty tøø miäjäya'ay-yagho'ogy. ²⁰ Jia wi'i yhøxmadsaamby ja'a Pilato ja'a Jesús hänajty. Jaduhnä cu'ug jia nämáaguimbä. ²¹ Mänitä cu'ughajxy maas møc jiaac yaaxy:

—Møjpahbet hajxy cruzcøxp, møjpahbet hajxy cruzcøxp.

²² Miädägøøghoocpä ja'a Pilato jia mänángombä:

—Pero nébiämäts jaduñ tøø jiatcø'oy. Cabä pojpä tii miøødä. Nébiøch nya-jyagho'ogøøjät. Nyajcumädownáambiøch. Mänitøch nhøxmadsaannä.

²³ Pero tehngajnä hajxy jiaanč tehñ ya'axy coo ja'a Jesús miøjpahbedóøjät cruzcøxp. Jaduhñsä teedywiindsøn24 Mänitä Pilato miänaannä coo ja'a Jesús miøjpahbedóøjät cruzcøxp.

²⁵ Mänit Barrabás yhøxmajch, ja'a cu'ughajxy hänajty tøø yajnahdíjjiäbä, ja'a hänajty tøø chumyijjibä je'eguiøxpä coo tsip hänajty tøø yajpädø'ogy, møød coo hänajty tøø miäjäya'ay-yagho'ogy. Mänitä Pilato yhanehmy coo ja'a Jesús miøjpahbedóøjät cruzcøxp.

²⁶ Jimä soldado ja'a Jesús hajxy hänajty yajnøcxy maa hajxy hänajty miøjpahbedä'añän. Mänitä jäya'ay hajxy tu'ug miajch, ja'a xøhajpä Simón, ja'a Cirenetsohmbä. Camjootiä Simón hänajty tøø yhoy. Mänitä cruz hadsip yajtsømdu'ubøjcä. Høxhaamä cruz miäyohy.

²⁷ Jaanč tehñ ñämay hajxy hänajty pianøcxy møødä to'oxiøjc-hajxy. Jøøyyäp yáaxäbä to'oxiøjc-hajxy hänajty ñøcxy. Jootmayhajp hajxy hänajty ja'a Jesúsøxpä. ²⁸ Mänitä Jesús ja'a to'oxiøjc-hajxy miøjhee'ppejty ja'a hajxy tsohmbä Jerusalén. Mänit hajxy ñämaayyá:

—Ca'ačh hajxy xñäjø'oy. Mijts hamdsoo mniñäjø'owóøjäp møødä mhuonghajxy.

²⁹ Habaadaamb jaduñ coo ja'a jäya'ayhajxy miäna'ana'añ: “Jootcujcä to'oxiøjc-hajxy yhity ja'a yhuung ca'a hijpä.” ³⁰ Mänitä jäya'ay ja'a tun hajxy ñäma'awa'añ: “Højts nähgahbéjtäc, højts yú'tsäc.” ³¹ Xchaačhtiunáambiøch ja'a jäya'ayhajxy, hóyhøchä pojpä cädieey nga'a ja møødä. Maas hanaxiä mijts mjada'añ mhabeta'añ.

³² Metscä mee'tspädøjc ja'a Jesús hänajty quipxy nøcxy miøødmøjpahbeda'añii. ³³ Coo hajxy jim miejch maa hänajty xiøhatiän “Maa ja'a Ho'ogyjiäya'aguiopc Nähgädá'aguiän”, mänitä Jesús miøjpahbejtä cruzcøxp møødä mee'tspädøjc, tu'ug hanajtyhaamby, tu'ug hahooyhaamby. ³⁴ Jimnä ja'a Jesús hänajty miøjpahbedyiinä, mänit miänaañ:

—Teedy, mee'x yø'ø häna'c-hajxy; cab hajxy ñajuø'øy tii hajxy jaduhñ coo jiatcø'øy.

Mänitä soldado ja'a Jesús wyit hajxy tiägøøyy yajniguiuhäyø'cäbä. ³⁵ Jimä cu'ughajxy hänajty miähee'pna'ay møødä tuungmøødpähajxy. Jimä Jesús hajxy hänajty wyi'i ñäxi'igy:

—Yajnahwaachp yø'ø craa hijty wiinghäna'c. Ween hamdsoo yajniñähwa'açhii pø tøy jaduhñ Dyioshuungä, pø tøy jaduhñ Dyiosquexiä.

³⁶ Jaaná jaduhñä soldadohajxy wyi'i ñäxiicpä. Mänitä Jesús vinagre yaghuucä. ³⁷ Mänit ñämaayyä:

—Pø tøy miiçhä judíos hajxy xquiobiernähaty, hamdsoods yajniñähwa'adsøø.

³⁸ Mänitä soldado pu'uyhuung hajxy jim yujpahy cruzcuhduum. Tägøøgtu'u hayuuc hänajty miøødä cujaay: “Hädaadsä judíos hajxy guiobiernähajpy.” Griegohaam hänajty quiujaayä, møødä latínhaam, møødä hebreohaam.

³⁹ Mänitä mee'tspä tu'ug miänaañ, ja'a hänajty tøø miøjpahbéjtäbä cruzcøxp:

—Pø tøyä Dios tøø xquiexy, hamdsoods yajniñähwa'adsøø, y yajnahwäätsägäts højtspä —nømä Jesús ñämaayyä.

⁴⁰⁻⁴¹ Mänitä craa yhojjä jiamiøød:

—Nej, cájtämä Dios mwiingudsähgø'øyä. Paady højts ngumadowáañäm coo tøø ngädiéhyäm. Pero hädaa craa, caj nej tøø jiatcø'øy.

⁴² Mänitä Jesús ñämaayyä:

—Jesús, høøch xjiahmiédsäp coo miiçhä hänajty mdägø'øwa'añ gobiernähajpä.

⁴³ Mänitä Jesús yhadsooyy:

—Tøyhajt jaduhñ nnäma'ay, jädá'ajoch miiçhä jim xmiødhada'añ tsajpootyp.

⁴⁴ Cujyxioø hänajty je'e, mänit wyiingoodsøøyy wiinduhmyhagajpt. Tägøøghorä yhjity wiingoods. ⁴⁵ Cabä xøø hänajty maa ñä'ä hañ. Mänitä tsajtøjc-hadøødiuc quiøø'tswa'xy cujjiä. ⁴⁶ Mänitä Jesús yaaxy:

—Teedy, høøch miiçhä njoot njuøhñdy nyajcø'ødägø'øwaamby.

Jagoo jaduhñ jiaac mänaannä, mänitiä yho'nä.

⁴⁷ Mänitä soldadowiindsøn yhjity nebiä Jesús jiajtiän. Mänit jia mänaañ coo ja'a Dios miøjjä jiaançhä, coo ja'a Jesús ja'a pojpa hijty quia'a møødä.

⁴⁸ Coo ja'a cu'ughajxy yhjity nebiä Jesús jiajtiän, mänit hajxy wyiimbijnä jootmayhájtäp. ⁴⁹ Jimä Jesús miägu'ughajpähajxy hänajty tiäna'ay jäguemjuøøby møødä to'oxiøjc-hajxy, ja'a hajxy hänajty jim tøø piadsóoñäbä Galilea. Yhjix hajxy je'ebä nebiä Jesús jiajtiän.

⁵⁰ Jimä hojiäya'ay hänajty tu'ug ja'a xøhajpä José. Arimatea hänajty choon jim Judeanaaxooty. Møjtuung hänajty miøød maa ja'a judíoscajptän. ⁵¹ Pero cab jaduhñ piamänaañ coo ja'a Jesús cu yagho'cä. Jiøbhijxyp hänajty je'e coo ja'a Dios ja'a miäjaa yajcähxø'øga'añ. ⁵² Mänitä José ja'a Pilato ja'a cuhdujt hoy miäyujwa'añ coo ja'a ho'ogyjiäya'ay yajmänácät cruzcøxp. ⁵³ Coo ja'a cuhdujt jaduhñ miooyyä, mänit yajmänajcy. Mänitä poobwit yajnahbijty. Mänit hoy yajnaaxtägø'øy maa ja'a tsaajutän ja'a naamhädiüñäbä. ⁵⁴ Mänacyxioø hänajty je'e mänaa ja'a Jesús ñaaxtägø'øyän. Viernes hänajty je'e. Hadsuujøøñäp hänajty; ja'a poo'xxiøø hänajty habáatnäp.

⁵⁵ Ja'a to'oxiøjc-hajxy, ja'a Jesús hajxy hänajty tøø piadsóoñäbä Galilea, mänitä Jesús hajxy hoy yhixy maa hänajty tøø ñaaxtägø'øyän. ⁵⁶ Coo hajxy wyiimbijty, mänitä pa'agxuu'pähön hajxy hoy jiuu. Mänit hajxy pioo'xnä ja'a poo'xxiøøjooty neby hajxy hänajty quihdujthatiän.

24

¹ Näxøjopiä to'oxiøjc-hajxy ñøcxtägajch maa ja'a Jesús hänajty tøø ñaaxtägø'øyän mөөdä jiamiøødhajxy wiingpä. Pa'agxuu'pähongón hajxy ñøcxy ja'a hajxy hänajty tøø jiúyyäbä. ² Coø hajxy jim miejch, mänit hajxy yhiijxy coø ja'a tsaajut hänajty tøø yhawa'ačh. ³ Mänit hajxy jiiby tiägøøyy. Cab hajxy jiiby pøn piaaty. ⁴ Mänit hajxy chähgøøyy. Cab hajxy hänajty ñajuø'øy neby hajxy jiatcø'øwät. Mänit hajxy yhiijxy coø ja'a jäya'ay hajxy hänajty metsc miøødtäna'ay. Yajxonjatiä wyithajxy hänajty. Høxtä haambä wyithajxy hänajty. ⁵ Mänitä to'oxiøjc-hajxy ñaaxcooyy je'eguiøxpä coø hajxy hänajty chähgø'øy. Mänit hajxy ñämaayyä:

—Tii ja'a Jesús hajxy yaa coø mhøxta'ay maa ja'a ho'ogyjiäya'ayhagujcän. ⁶ Cab je'e yaajän. Tøø jiuypijönä. Nej, cab hajxy mjahmiechä neby hajxy jiiby tøø xya-jmøødmädia'aguiän Galilea. ⁷ Nømä Jesús ja'a Diosquexypä hajxy xyhawaanä cooc hijty quiø'ødägø'øwa'añii ja'a cubojpäya'ay ja'a cugädiejiäya'ay, cooc hijty miøjpahbeda'añii cruzcøxp, cooc cudägøøgxøø hijty jiuypijøga'añ.

⁸ Mänit hajxy jiaančh jahmiejtsnä neby hajxy hänajty tøø ñäma'ayijän Jesúsäm. ⁹ Mänit hajxy wyiimbijnä. Mänitä jiamiøødhajxy hoy yhawaanä ja'a nämajtu'ugpä mөөdä nämaybä. ¹⁰ Ja'a to'oxiøjc ja'a mädia'agy hajxy mäméjtsäbä, jue'e hajxy hänajty näje'e xiøhaty María Magdalatsøhmä, mөөdä Juana, mөөdä María ja'a Jacobo tiaj. ¹¹ Pero cabä to'oxiøjc ja'a miädia'agyhajxy miäböjçäxä ja'a Jesús jiamiøødhajxy. Nebiä cuhhiimbä-mädia'aguiän hajxy jaduhñ miädooyy.

¹² Pero ja'a Pedro, miäböjç je'e. Päyø'øguiä ñøcxy maa ja'a Jesús hänajty tøø ñaaxtägø'øyän. Coø jiiby quiuwoodsøyy, mänitä poobwit yhiijxy coø wiingtuum yhiijnä. Mänit wyiimbijnä. Yagjuøøyy jaduhñ neby hänajty tøø jiadyijän.

¹³ Mänitxøøbä ja'a Jesús jiamiøødhajxy hänajty metsc ñøcxy maa ja'a cajpt hänajty xiøhatiän Emaús. Majtu'ugkilómetro hänajty jäguemä maa ja'a Jerusaléncajptän. ¹⁴ Mädiäcäp hajxy hänajty tiu'uyo'oy tijaty tøø jiadyii. ¹⁵ Mänit hajxy wyiingumed-søøyyä ja'a Jesús. Mänit hajxy miøødtu'ubøjcy. ¹⁶ Hoy hajxy jia hijxy, cab hajxy yhøxcajpy. ¹⁷ Mänitä Jesús miänaañ:

—Tii hajxy mmädiacy. Tii hajxy coø mdajy coø mmay.

¹⁸ Tu'jäya'ay hänajty xiøhaty Cleofas. Mänit yhadsooyy:

—Hopionä ñajuø'øy tii jim tøø jiadyii Jerusalén jäda'a xøøbä. Nej, miičh nidiuhm mga'a najuøøby tii jim tøø jiadyijä, hoy miičh jim tøø mja hijpä.

¹⁹⁻²⁰ Mänitä Jesús yhadsooyy:

—Tii jaduhñ tøø jiadyii.

Mänit hajxy yhadsooyy:

—Ja'a Jesús tøø yagho'ogyii cruzcøxp. Ja'a teedywiindsøn hajxy yejc mөөd højts ngopc-hajpä. Diosquexy hijty wiädity. Hoy-yagjuøøñäjatypä hijty yajcähxø'py. Hoy hijty miädia'agy ja'a Dioscøxpä cu'ughagujc. ²¹ Jaduhñ højts njoot hijty chocy coø ja'a Jesús ja'a gobiernä Rómaba ja'a quiuhdujt cu piøjçä nebiä gobiernä yaa quia'a hanéhmät maa højts ngajptän, højts judíosjäya'ayhajxy. Maaxtøjcy mädagøøyy jaduhñ yagho'cä. ²² Haamiän ja'a to'oxiøjc-hajxy näje'e yhooyy maa ja'a Jesús hänajty tøø ñaaxtägø'øyän. ²³ Pero cábäc hajxy piaaty. Mänitägä Diosmoonsä hajxy metsc yhiijxy ja'a tsajpootypä-tsohmä. Mänitac hajxy yhawáanäxä cooc ja'a Jesús hänajty tøø jiuypijönä. Hoy-yagjuøøñä højts hajxy xyajmøødmädiacy. ²⁴ Mänit højts njamiøødhajxy hoy yhiijpä. Jaduhñac hajxy piaatpä nebiä to'oxiøjc-hajxy hänajty tøø ñägäpxiän. Ni jé'egädsä Jesús hajxy quia'a hijxy.

²⁵ Mänitä Jesús miänaañ:

—Nej, cab hajxy mnä'ägä wiinjüø'øyä, cab hajxy mnä'ägä mäbøquiä nebiä Diosquexy-hajxy jecy miänaañän. ²⁶ Tsipcøxpä Diosquexy chaačhpøga'añ coø hänajty jim ñøcx-aannä tsajpootyp.

²⁷ Mänit tiägøøyy yajwiingapxøøbiä ja'a Diosmädia'agy majaty miädia'agyijän. Jim quiapxtsohñ maa ja'a Moisés hänajty tøø quiujaayän. Cøjx quiapxy mäduhñtiä ja'a Diosquexyhajxy quiujahyyän.

²⁸ Coø hajxy jim miejch Emaús, mänitä Jesús miänaañ cooc jiaac yo'oya'añ. ²⁹ Mänit hajxy ñämaayho'cy:

—Huuc mähmø'øw yaa maa højtsän. Tøø chuujøøñä. Coodsøøñäp jaduhñ.

Mänitä Jesús jiaanč mähmøøyy. Mänit hajxy tiøjtägøøyy. ³⁰ Mänit hajxy yhäñaaguiä-daacy meexäwiinduum. Mänitä Jesús tsajcaagy quionø'cy. Mänitä Dioscujú'uyäp yejcy. Mänitä tsajcaagy qyijwa'xy. Mänitä jiamiøød miooyy. ³¹ Mänitnäs hajxy yhøxcajpnä. Mänitä Jesús yhadägoyyøøñä. ³² Mänit tu'jäya'ay miänaañ:

—Wíinghøch hijty nnijiäwø'øyii tu'haambejpä coo ja'a Diosmädia'agy xyajmøød-mädiáacäm.

³³ Mänitiä hajxy wyiimbijnä, ñøcxtägajch Jerusalén. Mänitä jiamiøød hajxy hoy piaady maa hajxy hänajty tøø yhamugø'øyän, ja'a nämajtu'ugpä møød hajxy nämaybä.

³⁴ Mänit hajxy nämetspä ñämaayä:

—Tøyhajt jaduhñ coo ja'a nWiindsønñájtäm tøø jiuypioøcy. Ja'a Simón jaduhñ tøø yhixy.

³⁵ Mänit hajxy je'e ñägäp xpä cooc ja'a Jesús hajxy tøø piaady tu'haam. Mänitac hajxy yhøxcajpnä coogä Jesús ja'a tsajcaagy qyijwa'xy.

³⁶ Jiiby hajxy hänajty miädia'agyñä, mänitä Jesús ñäguehxtøø'xy maa hajxy hänajty yhäña'ayän. Mänit yajpoo'xy ja'a jiamiøødhajxy. ³⁷ Mänit hajxy jiaanč tehñ chähgøøyy. Háañämä tyijy hajxy nämejtsä. ³⁸ Mänitä Jesús miänaañ:

—Tii hajxy coo mwi'i chähgø'øy. Tiič hajxy coo xquia'a høxcapy. ³⁹ Høxtáhmdsøch hädaa ngø'ø, høxtáhmdsøch hädaa ndecy. Høøch je'e Jesús. Høøch hajxy nähdoonäc. Cabä háañämä ni'x copc miøødä nébioch høøch nmøødän.

⁴⁰ Mänitä Jesús ja'a quiø'ødiecy yaghijxy ja'a jiamiøødhajxy. ⁴¹ Pero cab hajxy hamuumdu'joot ñä'ägä mäbøjcy. Xoondaacp hajxy hänajty møød hajxy hänajty yagjuø'øy. Mänitä Jesús miänaañ:

—Tii hajxy jii mmøød cooçh ngáyät.

⁴² Mänitä hacxtsa'ay hajxy miooyy møødä møjtsiinjøødy. ⁴³ Mänitä Jesús quioon-dsooyy. Mänit quiaayy maa ja'a wyiinduumhajxiän. ⁴⁴ Mänit miänaañ:

—Nébioch tøø njatiän, tøøds hajxy hijty nhawáañäm mänaa hajxy quipxy tøø nhíjtäm. Tøjiajt jaduhñ ja'a høøchcøxpä neby jiiby myiñän cujaay maa ja'a Moisés miädia'aguiän, chaads jiiby maa ja'a Sálmosän, chaads jiiby maa ja'a librän ja'a Diosquexyhajxy jecy jáhyyäbä.

⁴⁵ Mänitä Diosmädia'agy quiapxtøøyy:

⁴⁶ —Jaduhñ myiñ cujaay maa ja'a Diosmädia'aguiän cooc ja'a Diosquexy tsipcøxp yho'oga'añ, y cooc cudägøøgxøø jiuypioøjtägatsa'añ, ⁴⁷ y cooc miädia'aga'añii wi-induhmyhagajpt. Yaa Jerusalén miädiaactsoona'añii. Jaduhñä cu'ughajxy yajwiingapxø'øwa'añii coo ja'a yhaxøøgcuhdujt hajxy ñajtshixø'øwät. Mänit hajxy yajnäh-wa'adsa'añii ja'a piojpä quiädieey hajxy. ⁴⁸ Hamdsoo hajxy tøø mhixy tøø mmä-doy nébioch cham nmädia'aguiän. ⁴⁹ Nyajnäguexáambiøch mijts ja'a Dioshespíritu ja'a nDéedyhøch tøø xyajwiinwaanø'øyäbä cooçh mijts nmó'owät. Jim choona'añ tsajpootyp. Yaa hajxy mmähmø'øwät Jerusalén høxtä coonä ja'a Dioshespíritu hajxy hänajty tøø xñägäda'agy.

⁵⁰ Mänitä Jesús miøødcajptpädsøømy ja'a jiamiøødhajxy. Mänit hajxy miejch maa ja'a cajpt xiøhatiän Betania. Mänitä Jesús ja'a quiø'ø chajxajy. Mänitä Dioscujú'uyäp yejcy ja'a jiamiøødcøxpähajxy.

⁵¹ Mänit hajxy ñähguécänä. Mänitä Jesús jim ñøcxy tsajpootyp. ⁵² Mänitä Jesús hajxy wyiingudsähgøøyy. Mänit hajxy wyiimbijnä jaanč tehñ jiootcujc. Mänit hajxy ñøcxy Jerusalén. ⁵³ Jabom-jabom hajxy hänajty ñøcxy tsajtøgooty. Nøcxy hajxy hänajty quiapxy miädia'agy coo ja'a Dios miøjjä jiaančhä. Amén.

San Juan

¹ Ja'a Dioshuung, je'e hajxy xyajnahixóoyyäm nebiä Dios jiäya'ayhatiän. Jíiyäm hänajty je'e mänaa hädaa yaabä naaxwiin yhawijy tiø'xta'aguiän. Jíiyäm hänajty je'e møødä Dios; Diósäts je'e. ² Jim hänajty je'e møødä Dios mänaa hädaa yaabä naaxwiin yhawijy tiø'xta'aguiän. ³ Jaaya'ay jadhun hädiuun cøxiä. Nidiuhm yhädiuun. ⁴ Ja'a Dioshuung, yejpy ja'a jugyhajt je'e. Jadhun mäwiin je'e nebiä cujajpä nebiä cudø'xpän. Xyajpädsømmäm hajxy hagoonstuum. ⁵ Coø jøøn yhajajy hagoonstuum, hoy jadhun nhíxäm. Ja'a Dioshuung, jadhun mäwínäts je'e nebiä jøønän coø xyaghíxäm neby hajxy hoy nwädíjtämät.

⁶ Mänitä Dios jäya'ay tu'ug quiejxy, ja'a xøhajpä Juan. ⁷ Paadiä Juan quiejxä, jadhunä Dioshuung nägäpxät, jadhunä jäya'ayhajxy nägøxiä miäbøgät. ⁸ Ja'a Juan, ca'a je'e Dyioshuungä. Nä'a nägapxpä jadhun quiejxä. ⁹ Tøø ja'a Dioshuung hänajty yaa miejtsnä hädaa yaabä naaxwiin. Je'e ja'a tøyhajt hajxy xmióoyyäm nägøxiä maa hajxy yaa ndsänaayyäm hädaa yaabä naaxwiin. Cøxiä xyajnahixóoyyäm.

¹⁰ Coø yaa miejch hädaa yaabä naaxwiin, cabä miädia'agy miäbøjcäxä, hoy hänajty cøxiä tøø jia hädiuun. ¹¹ Jim je'e jia medsøoyy maa ja'a yhamdsoo cajptän, pero cab jim chojcä. ¹² Pero näje'ejaty hajxy chojcy. Pøn jadhun tsojc, pøn ja'a miädia'agy mäbøjcä, je'edsä cuhdujt hajxy mooyyä coø hajxy yhidät nebiä Dioshuungän. ¹³ Cab hajxy xyhuunghájtäm nebiä yaabä teedy hajxy xyhuunghájtäm. Pero coø hajxy nmäbøjcämät ja'a Dios ja'a miädia'agy, mänit hajxy jadhun xyhuunghájtämät.

¹⁴ Ja'a Dioshuung, jäya'ayhajty je'e neby højts chaa njäya'ayhájtäm. Hädaa yaabä naaxwiin je'e chánaayy maa højtshájtäm. Tøø højts nhixy coø je'e miøjjä jiaančhä. Paady miøjjä jiaančhä coø je'e Dyioshuungä. Tiumby je'e ja'a mayhajty homiänaajä. Tømiädiaacp je'e homiänaajä. ¹⁵ Jaayá'ayädsä Juan jadhun nägapx:

—Yø'øya'ayhöch hijty nnägapxyp, yø'ø høxhaam tøø jiaac méchäbä. Høøch hijty jayøjp tøø nmech. Yø'ødsä møjcuhdajt nä'ägädä møød. Høøch, cábøchä cuhdujt jadhun nmøødä neby yø'øya'ay miøødän. Jímiäm yø'øya'ay hänajty coøch yaa nmiiñ ngahy.

¹⁶ Jaayá'ayäts ja'a mayhajty tuumb ja'a højtscøxphájtäm homiänaajä. ¹⁷ Dios ja'a Moisés ja'a cuhdujt jadhun mooyy. Højts ja'a Moisés ja'a cuhdujt xmiöödiägájtäm. Pero xchójcäm ja'a Dios hajxy møød xmióoyyäm ja'a tøyhajt. Paadiä Jesucristo yaa quiejxä. ¹⁸ Ni pøn ja'a Dios quia'a hixyñä. Ja'a yHuung, je'e hajxy xyhawáanäm nebiä Dios jiäya'ayhatiän. Jiaančh tehñ chojpy ja'a Dios ja'a Jesucristo. Tu'ughuunghajp ja'a Jesucristo.

¹⁹ Mänitä teedyhajxy näje'e jim quiejxä møødä levitashajxy maa Juangän. Ja'a levitashajxy, tsajtøcueendähajpä hajxy hänajty tiuunghajpy. Jim hajxy chohndaacy maa ja'a cajpt jadhun xiøhatiän Jerusalén. Ja'a judíos wyiindsøn hajxy jadhun mäguejx. Paadiä teedyhajxy jadhun quiejxä coø ja'a Juan hajxy ween nøcxy tiøyhajtmädoyp pøn je'e. ²⁰ Coø ja'a Juan jadhun miäyajtøøwa, yejc je'e ja'a tøyhajt. Caj yhøhndaacy:

—Ca'a yhøøchä je'e ja'a Cristo, ja'a hajxy nhahíxämbä, ja'a Dios tøø wyiinguéxiäbä coø hajxy xyhanéhämät.

²¹ Mänitä jadähooc miäyajtøøwägumbä:

—Pøn miičh. Nej, miičh Elíashajpä ja'a mináambäjä.

Mänitä Juan yhadsooyy:

—Caj.

Mänitä miäyajtøøwägumbä:

—Nej, tøgä miičh ja'a Diosmädia'agy jecy tøø mhuuc mäwädijpä.

Mänitä Juan yhadsoogumbä:

—Cábämäts.

²² Mänitä miäyajtøøwägumbä:

—Pøñ miich. Højts ja'a tøyhajt móoyyác neby højts ja'a nwiindsón häyaa nhawaandägátsät pøñ miich.

²³ Mänitá Juan yhadsooyy:

—Høøch, nyajcapxóøbiøch ja'a Diosmädia'agy møc pactuum. Panøcx ja'a Diostu'u hajxy nebiá Isafás jecy miánaañän coo hajxy mbanøcxät. Diosmädia'agy ja'a Isafás jecy yajwa'x.

²⁴ Ja'a hajxy hänajty tøø quiexyíjábä maa ja'a Juangän, näje'e hajxy hänajty pianøcxä ja'a fariseos ja'a miädia'agy hajxy.

²⁵ Mänitá Juan miäyajtøøwa:

—Tii miich coo mnä'a mäyajnäbejpä pø cá'adäm miich mGrístäjä, pø cá'adäm miich ja'a jäya'ay ja'a Diosmädia'agy jecy tøø yajwá'xiäbä.

²⁶ Mänitá Juan yhadsooyy:

—Høøch, nøøháamhøch nmäyajnäbety. Pero xima jäya'ay tu'ug majiäya'ayhagujc. Cahnä hajxy mhixyhatyñä. ²⁷ Jayøjphøch nmejch. Mänit yø'øya'ay høxhaam jiaac mejch. Møjcuhtu'uyt yø'øya'ay miøød quejeech nmøødä.

²⁸ Jimä Juan hänajty miäyajnäbety maa ja'a cajpt hänajty xiøhatiän Betábara, ja'a Jordánpä möjnøøhaawiimbä jaduhñ maa ja'a xøø piädsømiän.

²⁹ Cujaboom ja'a Juan ja'a Jesús yhiixy. Jimä Jesús hänajty miänacy maa ja'a Juan hänajty tiána'ayän. Mänitá Juan miánaañ:

—Huug hix hajxy, xii jäya'ay tu'ug miänacy. Yø'ø jaduhñ xøhajt ja'a Meeghuung ja'a Dios tøø quiéxiäbä. Yø'øds hajxy je'e xñähho'tu'udáanäm. Yø'øds hajxy je'e xyajnáhwa'ads xyajcu'hwá'adsáanäm ja'a nbojpä ngädieeyhájtäm. ³⁰ Yø'øch hijty nnänøømby ja'a høxhaam tøø jiaac méchäbä. Høøch hijty jayøjp tøø nmech. Yø'øds je'e ja'a möjcuhtu'uyt møød quejeech nmøødä. Jímiäm yø'øya'ay hänajty mänaäch nmiñ nga'ayän. ³¹ Cábøch hijty nnajuø'øy pøñ jaduhñ tunaamb nébiøch tøø nmädia'aguiän. Pero páadyhøch tøø nmech mäyajnäbejpä nøøhaam neby hajxy jaduhñ mnajuø'øwät pøñ je'e, mijts judíós.

³² Mänitá Juan miánaangumbä:

—Tøøchä Dioshespíritu nhixy coo jim tøø choon tsajpootyp. Mänítøch nhixy coo hänajty miänacy nebiä palomän. Mänitá ñaaxcädaacy. Mänitá jim yhøxtacy yø'øya'ay quiuhduum. ³³ Cahnøch hänajty nnajuø'øy pøñ je'e. Pero jaayá'ayhøch tøø xquiéxiäbä mäyajnäbejpä nøøhaam, je'e ch jaduhñ xñämaayy: “Mhixaambiä Dioshespíritu maa je'e miänacø'øwa'añän. Jim jaduhñ miähmø'øwa'añ maa tu'jäya'ay quiuhduumän. Jaayá'ayäts ja'a Dioshespíritu jaduhñ yegáannäp.” ³⁴ Tøøch njaan ch hixy. Tøøch nnägapy coo yø'øya'ay jiaan ch Dioshuungä. Nyéjpiøch ja'a tøyhajt jaduhñ.

³⁵ Cujaboom ja'a Juan hänajty jim tiánaaguiumbä møødä jiamiøød metscä. ³⁶ Jimä Jesús hänajty wiädiipä. Coo ja'a Juan ja'a Jesús miøjhee'py, mänitá Juan miánaañ:

—Yø'øds jaduhñ xøhajt ja'a Meeghuung ja'a Dios tøø quiéxiäbä.

³⁷ Coo ja'a Juan ja'a jiamiøødhajxy jaduhñ miädooyy, mänitá Jesús hajxy piadu'ubøjcy nämetscä. ³⁸ Coo Jesús jiäwøøyy coo hänajty pianøcxyii, mänitá wia'wiimbijty. Mänitá yhiixy coo hänajty nämetscä pianøcxyii. Mänitá miánaañ:

—Tii hajxy mhøxtaaby.

Mänit hajxy yhadsooyy:

—Wiindsón, maa miich tøø mmejtsta'agy.

³⁹ Mänitá Jesús yhadsooyy:

—Jam huug híxäm.

Mänit hajxy hoy jiaan ch hixy maa Jesús hänajty tøø mjejtsta'aguiän. Tøø hänajty miänacyxiøjøñä. Jim hajxy miähmøøñä maa Jesúsän.

⁴⁰ Tu'ugä Juan ja'a jiamiøød hänajty xiøhaty Andrés, ja'a Simón Pedro piuhya'ay. Je'eds ja'a Jesús hänajty tøø piadu'ubøcy møødä jiamiøød tu'ug. ⁴¹ Mänitiä Andrés ja'a piuhya'ay hoy piaady, ja'a xøhajt Simón. Mänitá Simón ñämaayy:

—Tøø hõjts ja'a Mesías nbaady —je'e jaduñ ñänøømby ja'a Cristo, ja'a Dios tøø wyiinguéxiäbä coo hajxy yaa xyhanéhmämät.

⁴² Mänitá Andrés ja'a Simón jim wioonøcxy maa ja'a Jesús hánajtiän. Coo ja'a Jesús ja'a Simón yhiixy, mänit miänaañ:

—Miičh, Simón miičh mxøhaty. Jonás miičh mdeedyhajpy. Pero Pedro mxøhataañnä —je'e jaduñ ñänøømby tsaa.

⁴³ Cujaboom ja'a Jesús hánajty ñøcxa'añ Galilea. Mänitá Felipe hoy piaady. Mänitá Felipe ñämaayy:

—Jámhøch quipxy møødwädíjtäc. Høøchä nmädia'agy habójcäc.

⁴⁴ Jimä Felipe hánajty chooñ maa ja'a cajpt hánajty xiøhatiän Betsaida. Jim ja'a Andrés hánajty choñmbä møødä Pedro. ⁴⁵ Mänitá Felipe ja'a Natanael hoy piaady. Mänitá Natanael ñämaayy:

—Tøø hõjts jaaya'ay nbaady ja'a Moisés tøø ñägápxiäbä maa ja'a nocy piädø'quiän, ja'a Diosmädia'agymiäwädijpähajxy tøø ñägápxiäbä. Jesús jaduñ xiøhaty. José yhuung je'eduhñ. Jim jaduñ chooñ Nazaret.

⁴⁶ Mänitá Natanael miänaañ:

—Nazaretä. Cabä ndijy hoybäda'a jim Nazaret.

Mänitá Felipe yhadsooyy:

—Jam huug híjxäm.

⁴⁷ Jimä Natanael ja'a Jesús hánajty ñämech. Coo Jesús ja'a Natanael yhiixy, mänitá Jesús miänaañ:

—Yø'ø judío xii miimbä, hamuumdu'joot ja'a Diosmädia'agy quiudiuñ. Ni mänaa quia'a høhnda'agy.

⁴⁸ Mänitá Natanael ja'a Jesús miäyajtøøyy:

—Maäch miičh tøø xyhixy cooçh miičh jaduñ tøø xyhøxcapy.

Mänitá Jesús yhadsooyy:

—Jiiby miičh hánajty mdäna'ay piidspa'c. Cahnä Felipe hánajty xmiägapxy.

⁴⁹ Mänitá Natanael miänaañ:

—Wiindsøn, Dios miičh xyhuunghajp. Mhanehmby miičh ja'a judíošhajxy.

⁵⁰ Mänitá Jesús miänaañ:

—Páadyhøch ja'a nmädia'agy xmiäbøjcä cooçh jaduñ nmänaañ cooçh miičh jiiby tøø nhixy piidspa'c. Pero mhixaamby cooçh maas hoy-yagjuøøñäjatypä nyajcähxø'øga'añ.

⁵¹ Mänitá Jesús miänáangumbä:

—Chaads mijts nnämä'awät, mhixaamby hajxy coo ja'a tsajpootyp yhawa'adsa'añ. Mhixaamby ja'a Diosmoonsä hajxy ja'a tsajpootypä coo hajxy chajpeda'añ coo hajxy ñaaxcäda'aga'añ maächä nwiinduumän, høøch ja'a Diosquexypä.

2

¹ Cumaaxc ja'a pøc hu'ug hánajty jiada'añii maa ja'a cajpt hánajty xiøhatiän Caná de Galilea. Jimä Jesús ja'a tiaj wioowä ² møødä Jesús møødä jiamioødhajxy. ³ Mänitá vino quiøjxy. Mänitá Jesús ñämaayy ja'a tiaj coog ja'a vino tøø quiøxy. ⁴ Mänitá Jesús yhadsooyy:

—Maam, ca'a mhaaw mbäda'agy. Ca'a myiičhä mgüeendä. Høøch nnajuøøby. Cahnä yhabaadyñä cooçh nmayhajtúnät.

⁵ Mänitá Jesús ja'a tiaj miänaañ, ñämaayy ja'a moonsähajxy:

—Naxy hajxy mdehm miäbøgät coo Jesús hajxy xmiägapx xyhané'emät.

⁶ Jimä hamøj tsaanøgow hánajty quiärumna'ay tädujcä. Tägø'øwaamb jiiby tu'nøø-gow mädaaxc-hii'xlitro o mägo'xlitro. Jue'e ja'a judíos hajxy hánajty wia'añ, cø'øbu-jnøøhidøhñdy. Jaduñ hajxy hánajty quiuhdujthaty. ⁷ Mänitá Jesús miänaañ, ñämaayy ja'a moonsähajxy:

—Cudemø'ow nøø hajxy nøøgowooty. Cøxy yaghuts hajxy.

Mänit hajxy jiaančh yaghujch. ⁸ Mänit Jesús miänáangumbä:

—Jee'ppädsøm nøø hajxy weeñtiä. Nøcx ja'a mwiindsón hajxy mo'ow.

Mänit hajxy jaduhñ quiudiuuñ. ⁹Tøø ja'a nøø hänajty wia'añguiojy vino. Jesús jaduhñ yajwa'añguioj. Mänitä moonsäwiindsón ja'a vino quiøøchooyy. Mänit yhuucmajch. Cab hänajty ñajuø'oy maa ja'a vino tøø chooñ. Pero ñajuøøby ja'a moonsähajxy hänajty; hix, je'e ja'a nøø hajxy hänajty tøø jee'ppädsøm. Mänitä moonsäwiindsón ja'a jamiø'd miøjyaaxy. ¹⁰Mänit ñämaayyä:

—Jayøjp ja'a hovyino hajxy naxy ñä'ägädä temy. Coø ja'a woybä wichpähajxy hänajty com tøø yhu'ugy, mänit hajxy hänajty jiaac tema'añ ja'a vino ca'a jaty hoybä. Pero miich, cahnä hovyino mdemyñä.

¹¹Coø Jesús ja'a vino yajwa'añguiojy jim Caná de Galilea, hijxtahnd jaduhñ yajcähxø't-sohñ coø miøjjä coø jiaančhä. Coø Jesús ja'a jiamiø'dhajxy jaduhñ yhiixy coø Jesús ja'a vino yajwa'añguiojy, paadiä Jesús miädia'agy miäböjcäxä.

¹²Mänitä Jesús hajxy jiiby yhädaacy maa ja'a cajpt jaduhñ xiøhatiän Capernaum, møødä tiaj, møødä piuhya'ayhajxy, møødä jiamiø'dhajxy. Coø hajxy jiiby quiädaacy, mejtsxøø tægøøgxøø hajxy jiiby yhiixy.

¹³Jadäänäp ja'a pascuaxøø hänajty jim maa ja'a cajpt jaduhñ xiøhatiän Jerusalén. Ja'a judíoshajxy hänajty jim yagjadäänäp. Mänit Jesús jim ñøcxxy Jerusalén. ¹⁴Coø jim quiø'ty, mänit jiiby tiøjtægøøyy maa ja'a tsajtøjc hamøjpän maa ja'a judíos ja'a Dios hajxy hänajty wyiingudsähgø'oyän. Jiiby ja'a wajtoo'pähajxy hänajty møødä meeg-too'pä møødä palomato'pä. Jaanä jiiipiä xädø'øñguiuwijtspähajxy hänajty yhäñaabiä.

¹⁵Coø Jesús jaduhñ yhiixy, mänitä xaäch wyidsø'cy. Mänitä ju'xt yhädiuñ. Mänitä jäya'ayhajxy cøjx yhäxpäbo'oyii jiiby tsajtøgooty møødä waj møødä meeg cøxiä. Mänitä Jesús yajtsitø'cy ja'a xädø'øñguiuwijtspä mieexähajxy. Cøjx ja'a xiädø'øñhajxy yhöxxity.

¹⁶Mänitä palomato'pähajxy ñämaayyä:

—¡Yajpädsøm yø'ø mbaloma hajxy! ¡Cábøch nDeedy ja'a tiøjc hajxy xwiáanät halaplaaz!

¹⁷Mänitä jiamiø'dhajxy jiahmiejtstaacy coø jaduhñ yhity cujaay: “Mjaanč tehñ cwieendhadäänäbøch hädaa miich mdøjc nägø'ø nädecypiä, hóyhøch hajxy cu xjia yajcuyagho'ogø'ow.”

¹⁸Mänitä judíoshajxy miänaañ, ñämaayyä Jesús:

—Tii hijxtahnd højts xyajcähxø'ogäänäp hoy-yagjuøøñäjatypä pø mmøød miich cuhdujt jaduhñ coø yø'øya'ayhajxy tøø mgøxy høxpäbo'oy.

¹⁹Mänitä Jesús yhadsooyy:

—Coø hädaa tsajtøjc hajxy myagjídät, pues cudägøøgxøøyyøch nyaghoyøødiägätsät.

²⁰Mänitä judíoshajxy miänaañ:

—Cujuxychägui'xtädujcumøjt hädaa tsajtøjc jecy miaayy y tægøøgxøøyyä miich myaghoyøødiägatsa'añ. Cab højts jaduhñ nmäböcy.

²¹Pero jue'e Jesús hänajty ñänøømby “ja'a tsajtøjc”, ja'a yhamdsoo ni'x ja'a yhamdsoo copc. ²²Coø Jesús hänajty cujecy tøø jiaanč jujypiøcy, mänitä jiamiø'dhajxy jiahmiejtstaacy nebiaty hänajty tøø miäna'añän. Mänitä Diosmädia'agy hajxy miäböjnä møødä Jesús ja'a miädia'agy.

²³Mänaa ja'a Jesús jim yhitiän Jerusalén ja'a pascuaxøøjooty, mänitä cu'ugä Jesús hajxy yhiixy coø ja'a Jesús ja'a hoy-yagjuøøñäjatypä hänajty yajcähxø'ogy. Mänitä Jesús ja'a miädia'agy miäböjcäxä nämøj nämay. ²⁴Pero cabä Jesús hänajty yajwiinhøøñ, je'eguiøxpä coø hänajty ñajuø'oy hamdsoohaamby coø ja'a cu'ughajxy hänajty hamuumdu'joot quia'a mäböcy. ²⁵Hix, hamdsoohaambiä Jesús hänajty ñajuø'oy coø hajxy haxøøg nwiinmahñdyhåjtäm nägøxiä. Cabä Jesús hänajty pøn miäyajtøy neby hajxy nwiinmahñdyhåjtäm.

3

¹⁻²Coø maxiøø hänajty tøø yhiijnä, mänitä copc-hajpä jim tu'ug miejch maa Jesúsän. Nämay hajxy hänajty quiøpc-haty maa judíoshaxiän. Nicodemo ja'a copc-hajpä hänajty

xiøhaty. Pianócxäp ja'a fariseos miädia'agyhajxy hänajty. Tøø hänajty quioodsø'øy coo jim miejch maa Jesúsän. Mänit Jesús ñämaayyá:

—Wiindsón, nnajuøøby højts coo miichä Dios tøø xquiexy yajnahixøøbiä. Coo miichä Dios häxøpy xquia'a puhbety, caj miich hoy-yagjuøøñajatypä häxøpy myajcähxø'øgy.

³ Mänit Jesús miänaañ:

—Chaads miich tehñ tiøyhajt nnämä'awät, coo mga'a miindägats mga'a cahdägätsät, cabä Dios xyhané'emät.

⁴ Mänit Nicodemo yajtøøyy:

—Pero neby jaduñ mmiindägats mgahdägätsät coo hänajty tøø mmäjaanä. Neby jiiby mdägøødiägätsät ja'a mdaj jioodooty coo jiiby jadähooc mmaaxhuunghädät.

⁵ Mänit Jesús yhadsooyy:

—Pues caj. Chaads miich tehñ tiøyhajt nnämä'awät, coo mga'a miindägats mga'a cahdägätsät nøøhaam møødä Dios yhEspirituhaam, cabä Dios xyhané'emät. ⁶ Coo tøø mmiñ tøø mga'ay nebiä maaxhuungän, Dios je'e xmiooyy ja'a mni'x ja'a mgopc møødä mjuøhñdy. Y jaduñ mäwínäts je'e, coo Dioshespíritu mbadu'ubögät, nebiä miindägach cahdägachpäñ mmähmø'øwät. ⁷ Ca'a myagjuø'øy coöch jaduñ nnäma'ay coo tsipcøxp mmiindägats mgahdägätsät. ⁸ Coo poj jaduñ xiämemy, cab hajxy nnajuøøyyäm maa myinø'øy maa ñøcxø'øy. Homiaajä poj xiämemy. Mmädówäp jaduñ pero caj mhíxät. Jaduñ mäwínäts ja'a Dios yhEspíritu coo xjioottägø'øw coo xquioptägø'øwät. Coo jaduñ mmäböögät hamuumdu'joot, jaduñ mjädät nebiä miindägach cahdägachpäñ —nømä Jesús miänaañ.

⁹ Mänitä Nicodemo yajtøøgumbä:

—Neby je'eduhñ mnänømy.

¹⁰ Mänit Jesús yhadsooyy:

—Yajnahixøøbiä miich mduunghajpy maa ja'a judíoshajxiän pero cáhnøch nmädia'agy xwyiinjuøøyyäbä. ¹¹ Chaads miich tehñ tiøyhajt nnämä'awät. Nmädiaacyy højts mädyiijaty højts nnajuøøby y nnägäpxyp højts mädyiijaty højts tøø nhixy. Pero mijts, cab højts mijts nmädia'agy xñä'ägädä mæbøjcä. ¹² Tøø hajxy nja yajmøødmädia'agy tijaty yaa ja hijp hädaa yaabä naaxwiin, pero cab hajxy mmæböcy. Hoorä, coöch ja'a tsajpootypä hajxy nyajmøødmädiá'agät, ni je'e hajxy mga'a wiinjuø'øwät.

¹³ 'Ni pøn jim quia'a hoyñä tsajpootyp. Jagóoyyøch jim nidiuhñ ndsooñ, høøch ja'a Diosquexypä. Páadyhøch ja'a tøyhajt nmøødä neby jim. ¹⁴ Ja'a Moisés, jimä tsahñdyhahädiuunxay yujpahy quepyquioxp jim pactuum. Jaanä jadúhñhøch jäya'ay xyujpa'awaambä, høøch ja'a Diosquexypä. ¹⁵ Pønjátyhøch nmädia'agy xmiäböjcäp, cabä yháañämahajxy mänaa quiuhdägoyya'añ. Cøjxta'axiøø hajxy jiugyhada'añ nebiä Dios jiugyhatiän —nømä Jesús miänaañ.

¹⁶ Xjiaançh tehñ chojc xjiaançh tehñ pia'häyóowäm ja'a Dios hajxy nägøxiä, mäduhñtiä hajxy yaa nhíjtäm hädaa yaabä naaxwiin; paadiä tiu'ughuung ñähdujcy. Coo ja'a mädia'agy hajxy hamuumdu'joot nmæböjcämät ja'a Dioshuungcøxpä, cabä nháañämahajxy mänaa quiuhdägóoyyämät. Jaduñ hajxy cøjxta'axiøø njugyhájtämät nebiä Dios jiugyhatiän. ¹⁷ Paadiä Dios ja'a yHuung yaa tøø quiexy hädaa yaabä naaxwiin coo hajxy jaduñ ween xñähho'túutäm. Cab hajxy jaduñ xyajcumädownañäm.

¹⁸ Pønjätiä Dios yHuung ja'a miädia'agy mäböjcäxäp, cab hajxy je'e yajcumädownañii. Pønjäty ca'a mäböjp, tøø Dios miäna'añ cooc hajxy yajcumädownañii, coogä Dios ja'a yHuung ja'a miädia'agy quia'a mäböjcäxä. ¹⁹ Coo Dios yHuung yaa yhooyy hädaa yaabä naaxwiin, hagoonstuum jäya'ayhajxy hänajty yhity. Paady hajxy hänajty yhity hagoonstuum coo haxøøgwíinmahñdy hajxy hänajty tiuñ. Cabä Dios yHuung miädia'agy hänajty miäböjcäxä. Jaduñ mäwínäts je'e nebiä jøønän. Paady jaduñ nebiä jøønän, jaduñ jäya'ayhajxy piädsómät hagoonstuum. Pønjäty hagoonstuum mähmø'øwaamb, je'eds Dios ñänøømby coo hajxy yajcumädownañii. ²⁰ Pønjäty haxøøgwíinmahñdy tuumb, cab hajxy chocy maa jiajjiän. Cähxø'øgaamb yhaxøøgwíinmahñdyhajxy je'e, paady hajxy quia'a pädsøma'añ jajtuum. ²¹ Pønjäty panøcxaamb ja'a tømiädia'agy, je'eds

jaduhñ pädsømaamb jajtuum. Paady hajxy jaduhñ piädsøma'añ, jaduhñ quiähxø'øga'añ coo Dios hajxy tøyhajt jiaanč puhbedyii.

²² Mänitä Jesúshajxy jim ñøcxy Judeanaaxooty møødä jiamiødhajxy. Coo hajxy jim miejch, mänit hajxy tiägøøyy mäyajnäbejpä. Maxiøø hajxy jim yhjity mäyajnäbejpä. ²³ Jaanä jimä Juanghajxy hänajty miäyajnäbejpä maa ja'a cajpt hänajty xiøhatiän Enón. Salim cajpt mäwiingón jaduhñ. Comä nøø hänajty jim. Mejtsp jäya'ayhajxy hänajty jim näbejpä. ²⁴ Cahnä Juan hänajty chumyii.

²⁵ Mänitä Juan ja'a jiamiødhajxy tiägøøyy mädiaacpä møødä judíoshajxy nämejtsc nädägøøg. Je'e hajxy hänajty miädiaacy py neby hajxy ñäbétät. ²⁶ Mänit Juan hoy ñäma'ayii:

—Wiindsón, xiiby yø'øya'ay miäyajnäbety, ja'a miič hijty jim xmiøodhijpä ja'a Jordánpä möjnøhawiimb, ja'a miič tøø mnägápxiäbä coo Dios tøø quiexy. May jäya'ay tøø ñämech maa miäyajnäbetiän.

²⁷ Mänit Juan miänaañ:

—Coo ja'a Dios jaduhñ tøø miäna'añ, paadiä Jesús miädia'agy pianócxäxä nämay. ²⁸ Tøø hajxy mmädoy cooč nga'a Cristo. Jawyíinhöch Dios xquiejxy. Páadyhöch jawyíin xquiejxy cooč mädia'agy nyajwá'xät yø'ø Jesúscoxpä. ²⁹ Coo ja'a pøc hu'ug maa jiadyii, ja'a jamiø'ød, je'eds ja'a jaxie'eb møød. Ja'a jamiø'ød ja'a miägu'ughajpä jii hijpä, xoonäacp je'eduhñ coo jamiø'ød quiapxy. Jaanä xoonäacpøch høøčhpä je'eguiøxpä coo Jesús miädia'agy pianócxäxä nämay. ³⁰ Tehngahnä hajxy miayø'owa'añ, ja'a Jesús miädia'agy hajxy panócxäbä. Pero pønjátyhöchä nmädia'agy xpianócxäp, haweenø'owaamb hajxy je'e.

³¹ Xyhanéhmäm hajxy je'e nägøxiä, jaaya'ay jim tsohmbä tsajpootyp. Yaayyä hajxy ndsänáayyäm hädaa yaabä naaxwiin, y hädaa yaabä naaxwiimbä mädia'agy hajxy nmädiäacäm. Pero jaaya'ay jim tsohmbä tsajpootyp, ³² je'eduhñ miädiaacy py nebiaty jim tøø yhixy tøø miädoyyän tsajpootyp. Pero cabä miädia'agy miäbójcäxä nämay. ³³ Pønjetiä Jesús miädia'agy mabójcäp, je'eds tøyhajt yejp coo Dios tiømiädia'agy. ³⁴ Jaaya'ay Dios tøø quiéxiäbä, Diosmädia'agy je'eduhñ miädiaacy py. Hamuumdu'joot Dios ja'a Jesús ja'a Dioshespíritu miooyy nebiä Jesús jaduhñ miädiaactägátsät. ³⁵ Chojpy ja'a Dios ja'a yHuung; paadiä cøxiä wiinä tøø yajcø'ødägø'øy. ³⁶ Pønä Dios yHuung ja'a miädia'agy mabójcäp, je'eds cøjxta'axiøø jugyhadaamb nebiä Dios jiugyhatiän. Ja'a hajxy ca'a mabójpä, cab hajxy jaduhñ jiugyhada'añ nebiä Dios jiugyhatiän; yajcumä-dowáañp hajxy je'e ja'a Diósäm.

4

¹⁻³ Coo Jesús miädoyhajty coogä fariseoshajxy hänajty tøø miädoyhaty coogä Jesús ja'a jiamiødhajxy hänajty maas may yajmäbøcy y yajnäbety quejee Juan, mänit Jesúshajxy wyiimbijty Judea. Galilea hajxy ñøcxtägajch.

⁴ Jim hajxy ñaxøøyy Samarianaaxooty. ⁵ Mänit hajxy jim miejch maa ja'a cajpt hänajty xiøhatiän Sicar jim Samarianaaxooty, mäwiingón maa José ñädeedyñaaxän. Ja'a tieedy jaduhñ jecy xøhajt Jacob. ⁶⁻⁸ Jimä nøøjut mädyii José yajmämahmøøyyä coo Jacob yho'cy. Coo Jesúshajxy jim miejch maa nøøjutän, tøø Jesús hänajty yhanuu'xø'øy. Mänit Jesús yhøxtacy nøøjutpa'a. Tøø hänajty quiuyxiøøjø'øy. Mänitä jiamiødhajxy ñøcxy cajpooty juuguaabiä. Mänitä to'oxiøjc tu'ug quiädaacy nøøgoombä; Samaria hänajty chooñ. Mänit Jesús to'oxiøjc ñämaayy:

—Høøchä nøø móoyyác.

⁹ Mänit Jesús ñämaayyä:

—Tiič miič nøø coo xmiäyujwa'añ. Jue'e miič mdsöñ Judea. Høøch, yaač ndsooñ Samaria.

(Ix, cabä Judéabä jäya'ayhajxy hänajty miøødnijootpaadyii ja'a Samáriabä jäya'ayhajxy.) ¹⁰ Mänit Jesús yhadsooyy:

—Coo häxøpy mnajuø'øytii mayhajt Dios tiunaamby maa miihcøxpän y pønch høøch cooch ja'a nøø tøø nja yujwa'añ, mänitøch cu xmiäyujwaañ ja'a nøø ja'a ni mänaa ca'a tøøtspä.

¹¹ Mänitä to'oxiøjc yhadsooyy:

—Tsäguhm, cøøc hädaa nøøjut. Caj miiçh tii mmøødä coo ja'a nøø myajwohmäd-sómät. Maa tyijy miiçh ja'a nøø mbáadät, ja'a ni mänaa ca'a tøøtspä. ¹² Nejj, maas móctäm miiçh cuhdujt mmøødä quejee Jacob cuhdujt jegyhajty miøødä, ja'a hajxy hijty nhaphajt ndeedyhájtäm. Je'e hädaa nøøjut xyajmämähmøoyyäm. Yaa jecy ñøøhuucy møødä yhuunghajxy møødä yhanimalhajxy.

¹³ Mänit Jesús yhadsooyy:

—Coo hädaa nøø hajxy yhu'ugy, najxp tiødsø'øhajxy jaduhñ. Mänit hajxy tiødsø'øbáatägumbä cujaboom cumaaxc. ¹⁴ Høøch, nyéjpiøch ja'a nøø, ja'a ni mänaa ca'a tøøtspä. Coo hajxy yhu'ugät, ni mänaa ja'a tødsø'ø hajxy quia'a paattägájtänät. Cøjxta'axiøø hajxy jaduhñ jiugyhada'añ nebiä Dios jiugyhatiän.

¹⁵ Cahnä to'oxiøjc ja'a mädia'agy hänajty wyiinjuø'øyñä nebiä Jesús ja'a nøø ñä-gapxiän. Jue'e Jesús jaduhñ ñänøøm ja'a mayhajt ja'a Dios jaduhñ tiunaamby maa højtscøxpän. Mänit to'oxiøjc miänaañ:

—Høøchä nøø móoyyác nébiøch tødsø'ø xquia'a páatnät. Jadúhñhøch yaa min nga'a nøøwóhñnät.

¹⁶ Mänit Jesús miänaañ:

—Nøcx ja'a mnihyhap møyja'ax; mänit yaa mwoomínät.

¹⁷ Mänit to'oxiøjc yhadsooyy:

—Cábøch nnihyhap.

Mänit Jesús miänaañ:

—Tehm tiøyhajt miiçh jaduhñ mmäna'añ coo nihyhap mga'a møødä. ¹⁸ Mägoøxcä mnihyhap tøø mmøødtsäna'ay, y yø'ø ya'adiøjc xim mmøødpä, tøyhajt, ca'a myiichä mhamdsoo nihyhap yø'ø.

¹⁹ Mänit to'oxiøjc miänaañ:

—Tsäguhm, nyo'mädóobiøch jaduhñ coo miiçh ja'a Dioshøpíritu mmøødä. ²⁰ Jim højts nhap ndeedy ja'a Dios hajxy hijty jecy wyiingudsähgø'øytii maa yø'ø tunän. Pero mijts mänaamb coo hajxy jim nwiingudsähgø'øyyämät jim Jerusalén.

²¹ Mänit Jesús yhadsooyy:

—Muuxy, mäböjcägøch nmädia'agy. Habaadáannäp je'ejän coo mijts ja'a Diosteedy homiaajä mwiingudsähgø'øwaannä. Ca'a ñä'ä jiiyyä hajtiä mwiingudsähgø'øwa'añ maa yø'ø tunän ni jim Jerusalén. ²² Hoy Dios hajxy mja wiingudsähgø'øytii, cab hajxy mhixiä. Højts, nhixy højts ja'a Dios. Jaduhñ ja'a Diosmädia'agy miäna'añ coo ja'a judíos jäya'ay tu'ug yajnähwa'ads yajcuhwa'adsa'añ. ²³ Pøn ja'a Dios tehñ tiøyhajt wiingudsähgø'øñäp, je'eds hamuumdu'joot wiingudsähgø'øby. Jadúhñäts ja'a Dios chocy coo wyiingudsähgø'øwøød hamuumdu'joot. ²⁴ Jaduhñä Dios nebiä poj nebiä täxa'ajän. Tsipcøxp hit ja'a Dios hajxy nwiingudsähgø'øyyämät.

²⁵ Mänit to'oxiøjc miänaañ:

—Ja'a Cristo, ja'a Dios quiexaambiä, je'e højts nhahíxäm. Coo je'e quiäda'aga'añ, mänit højts je'e cøxiä xyhawaanäänäm.

²⁶ Mänit Jesús miänaañ:

—Høøchäts je'e ja'a Cristo.

²⁷ Mänit Jesús jiamioødhajxy miejch. Coo hajxy yhiijy coo Jesús ja'a to'oxiøjc hänajty miøødmädia'agy, yagjuøoyy hajxy jaduhñ. Pero cab hajxy yajtøoyy tiiguiøxpä Jesús ja'a to'oxiøjc hänajty coo miøødmädia'agy. ²⁸ Mänitä to'oxiøjc jiiy chohñ maa hajxy hänajty miädia'aguiän. Jiibiä miajt ñähgueecy, ñøcxy je'e cajptooty, hoy ja'a cu'ughajxy ñäma'ayii:

²⁹ —Jam jäya'ay hajxy tu'ug huug híxäm. Tøøch je'e xñajuø'øytii nebiätyhøch haxøøgpä tøø nduñ. Jadúhñhøch je'e tøø xyhawaanä. Je'e ndijjiäda'a je'e ja'a Cristo.

³⁰ Mänitä cu'ughajxy tiu'ubøjcy cajptooty, ñänøcxy ja'a Jesús hajxy. ³¹ Jimä Jesús hänajty ñäma'ayii ja'a jiamiøødhajxy:

—Wiindsón, cay.

³² Mänit Jesús yhadsooyy:

—Xiičh jøø'xypøcy nmøødä. Cab hajxy mnajuø'øy tii je'eduhñ.

³³ Mänitä jiamiøødhajxy ñiñämaayyä:

—Nejy, tøø jioø'xypøquiäda'a yajmèjtsäxä.

³⁴ Mänit Jesús miänaañ:

—Coočh jaduhñ nmänaañ cooçh jøø'xypøcy nmøødä, je'ečh hänajty jaduhñ nnänøømby cooçh njootcujcä, cooçh ngudiúnät nébiøch Dios tøø xyhane'emiän, cooçh tiuung nyajmáayyät; je'ečh jaduhñ tøø xquiexy. ³⁵ Huug hix yø'øya'ay hajxy xii mänajpä. Xmiäbøgåanäbøch nmädia'agy hajxy yø'ø. Jaduhñ mäwíinäts høøčhä nmädia'agy nebiä tøømd paquiä miayø'øyän. Tehm quiähxø'p jaduhñ. Cab hajxy jaduhñ mdehm miäná'anät nebiä niippädøjc-hajxy miäna'añän cooc mädaaxpo'o yhabety, mänitac hajxy je'e yajpädø'øga'añ. ³⁶ Póñhöch jäya'ay ja'a nmädia'agy xyajmábøgåanäp, xoon-da'agaamb hajxy je'e coo hajxy je'e may miäbøga'añ. Quipxy hajxy miøødxoon-da'aga'añ ja'a Diosmädia'agy hajxy jayøbajt yaghawa'xøøchóhñäbä. Ja'a hajxy yajmábøgåanäbä, je'edshajxy cøjxta'axiøø jugyhadaamb nebiä Dios jiuugyhatiän. ³⁷ Tøyhajt je'eduhñ nebiä jäya'ayhajxy miäna'añän: “Wiingpä je'e niip, y wiingpä je'e yajpädø'p.” ³⁸ Tøøčh mijts nwiinguexy coo mijts jäya'ay ja'a Diosmädia'agy hajxy myajmábøgät, ja'a hajxy hijty tøø miädoyhátibä. Wiingpä hajxy jayøbajt yajmädoyhajt; mijts høxhaam myajmábøgaamby —nøm Jesús miänaañ.

³⁹ Ja'a Sicarpä jäya'ayhajxy, nämay hajxy je'eduhñ miäbøjcä ja'a Jesús miädia'agy. Paady hajxy je'eduhñ miäbøjcä coo ja'a to'oxiøjc hänajty jaduhñ tøø ñägapxy cooc yhaxøøgwinnmahñdy cøjx ñajuøøyyäxä, møød cooc cøjx yhawaandøøwäxä. Jimä Sicarpä jäya'ayhajxy hänajty xiøønaxy Samarianaaxooty. ⁴⁰ Mänit Jesús hoy miänuu'xta'agyii coo jim miähmø'øwät maa quiajpthajxiän. Mänit jiaančh mähmøøyy. Mejtsxøø je'eduhñ jim yhiyty. ⁴¹ Coo Jesús jiaac yajmøødmädiaacy ja'a jäya'ayhajxy, nämay ja'a miädia'agy jiaac mäbøjcäxä. ⁴² Mänitä to'oxiøjc hajxy ñämaayy:

—Høxtahm̄ds miičh jim hoy mnägapxiän cajptooty, cab højts tu'joot nmäbøjcy. Pero coo højts jiiiby ngädaacy, mänit højts je'e xtiehm̄ yhamdsoo møødmädiaacy. Mänit højts nmäbøjcy. Mänit højts nnajuøøyy coo yø'øyá'adiäm Cristohaty. Yø'øds hajxy xyajnahwa'ads xyajcuhwa'adsaanäm nägøxiä mäduhñtiä hajxy yaa ndsänáayyäm hädaa yaabä naaxwiin.

⁴³ Nägooyyä mejtsxøø yhabety, mänit Jesús hajxy tiu'ubøjnä, ñøcñä hajxy jim Galilea. ⁴⁴ Hamdsoo Jesús je'eduhñ miänaañ cooc hajxy quia'a wiingudsähgø'øyii maa yhamdsoo cajptän, ja'a Diosmädia'agy hajxy yaghawa'xøøbiä. ⁴⁵ Pero coo Jesús jim miech Galilea maa yhamdsoo cajptän, mänit yajpoo'xä haxi'ig haxón. Paadiä Jesús yajpoo'xä, coo jäya'ayhajxy hänajty tøø yhixy hoy-yagjuøøñäjatypä, nebiaty Jesús jim tøø tiuñ tøø yajcähxø'øgy Jerusalén ja'a pascuaxøøjooty.

⁴⁶ Mänit Jesús jim jadähooc miéjtscumbä Caná de Galilea maa ja'a nøø hänajty tøø yajwa'añguiojjiän vino. Jimä gobiernä mioonsä hänajty tu'ug tøø miech. Tu'ugä yhuung hänajty tøø pia'ambety jim Capernaum. ⁴⁷ Coo ja'a gobiernä mioonsä miädoyhajty coo Jesús hänajty tøø miech jim Galilea, mänit Jesús hoy miänuu'xta'agyii coo yhuung nøcxy yajmøcpøjcäxä. Møjta'agy yhuung hänajty. ⁴⁸ Mänitä gobiernä mioonsä ñämaayyä:

—Mijts, cahnä hajxy mmäbøcyñä, hoy hajxy tøø mja mädoxyaty cooçh hoy-yagjuøøñäjatypä tøø nduñ. Mänit hajxy mmäbøga'añ coo hajxy mhuuc tehñ yhixa'añ.

⁴⁹ Mänitä gobiernä mioonsä miänaañ:

—Tsógäm, jam hadø'øčhä; chámhöch nhuung yho'ogaannä.

⁵⁰ Mänit Jesús miänaañ:

—Wiimbit jootcujc. Cabä mhuung yho'oga'añ.

Mänit Jesús miädia'agy jiaančh mabójcäxä. Mänit gobiernä mioonsä jiaančh wiimbijty. ⁵¹ Tu'haamhädaacpä ja'a mioonsähajxy jiojcubaadøøyyä. Mänit yhawáanäxä cooc yhuung hänajty tøø jiaančh møcpøcy.

⁵² Mänit yajtøøyy mädunajtä hänajty tøø miøcpøcy. Mänit ñämaayyä:

—Häxøøyy ja'a tioy tiøjch cujyxioøho'ogy.

⁵³ Mänit ja'a gobiernä mioonsä jiaančh jahmiejch coo Jesús hänajty häxøøyhajty cujyxioøho'ogy tøø miäna'añ cooc yhuung miøcpøga'añ. Mänit Jesús ja'a miädia'agy cøjx miabójcäxä mäduhñtiä hajxy tiu'ugtøjcä.

⁵⁴ Miämetsc-hoocpä Jesús je'eduhñ yajcähxø'cy ja'a hoy-yagjuøøñäjatypä jim Galilea. Mänit je'eduhñ yajcähxø'cy coo hänajty tøø yhoy Judea.

5

¹ Mänit Jesús ñøxcumbä jim Jerusalén xøøhajpä. Ja'a judíos xioøhajxy hänajty jadaañäp. ² Jimä tsiidaact jaduñ tu'ug xioøhaty Betzata, ja'a hebreohayuuc-haamby. Jimä tsiidaact mäduyü maa ja'a meegtoø'taactän. Mägooxc-hit ja'a tøjwiing wäditiä jim maa ja'a tsiidaactän. ³ Mayyä pa'amjäya'ay hänajty jim quio'na'ay møødä wiindspä møødä tecymia'adpä møødä tecymiucypä. Jim hajxy hänajty yhahixy coo ja'a nøø jaduñ jädsenyó'oyät. ⁴ Wiingumänaa ja'a Dios mioonsä tsajpootypä hänajty tu'ug quiäda'agy nøøyagjädsenyohbiä maa ja'a tsiidaactän. Pero cab hänajty quiähxø'ogy. Nägooyyä ja'a nøø hajxy hänajty jaduñ yhixy tiägø'oy jädsenyohbiä, mänitä pa'amjäya'ay-hajxy tiägø'oy nøøjooty. Ja'a hänajty jayøbajt tehñ tiägøøçhohmbä, je'eds hänajty jaduñ møcpøjp nidiuhñ. Hoy tyii pa'amä hänajty jia møødä, yajnaxyp je'e. ⁵ Jim jäya'ay hänajty tu'ug pia'amgo'na'ay. Miähii'xmajmocxtägøøgjumøjtpä hänajty jim tøø yhity. ⁶ Coo Jesús ja'a pa'amjäya'ay jaduñ yhijxy, mänit Jesús yajtøøyy:

—Nejy, mmøcpøgaambä.

⁷ Mänitä pa'amjäya'ay yhadsooyy:

—Cábøch nbøn pønhoç xpiaädá'agäp nøøjooty coo ja'a nøø tiägø'oy jädsenyohbiä. Cooch hänajty jiiby nja tagø'owa'añ, tøø wiingpä hänajty tiägøøñä.

⁸ Mänit Jesús miänaañ:

—Pädø'og, yajpädø'og mdo'ogy, yohñä.

⁹ Mänitiä pa'amjäya'ay jaduñ jiaančh møcpøjcy. Mänitä miaabejt jiaančh yajpadø'cy yo'oyø'cy. Poo'xxiøjooty hänajty je'e. ¹⁰ Mänitä judíoshajxy miänaañ, ñämaayyä ja'a craa ja'a hänajty tøø yajmøcpøgyíjábä:

—Poo'xxiøø jäda'a. Cabä cuhdujt jaduñ myiñ coo yø'ø mdo'ogy jäda'a mgapwädítät.

¹¹ Mänit jäya'ay yhadsooyy ja'a hänajty tøø miøcpøquiäbä:

—Jaayá'ayhøch tøø xyajmøcpøquiäbä, je'eçh jaduñ xñämaayy cooch ndo'ogy nya-jpädø'ogät.

¹² Mänit miäyajtøøwa:

—Pøn jaduñ tøø xñäma'ay coo mdo'ogy myajpädø'ogät, coo myo'oyø'ogät.

¹³ Cabä mähdiojc ñä'a hadsooyy. Hix, jaančh tehñ ñämay jäya'ayhajxy hänajty jim. Tøø Jesús hänajty yhixtägóoyänä. Paadiä mähdiojc hänajty quia'a najuø'oy waamb yhadsówät. ¹⁴ Mänit cueñtiä, mänit Jesús yhijxcumbä maa ja'a tsajtøjc hamøjpän. Mänit Jesús miänaañ:

—Huuc mäduw, chaa miich nnämä'awät, tøø miich mmøcpøcy. Ca'a tii pojpa cädieey mduñ coo maas haxøøg mjädät.

¹⁵ Mänitä mähdiojc hoy ñägäpxy maa ja'a judíoshajxiän cóodäm Jesús je'e, ja'a hänajty tøø miäyajmøcpøquiäbä. ¹⁶ Coo Jesús ja'a hoy-yagjuøøñäjatypä yajcähxø'cy ja'a poo'xxiøjooty, paadiä judíos Jesús hajxy miädsiphajty; paady hajxy wyiinmaayy nebiä Jesús hajxy yaghó'ogät. ¹⁷ Mänit Jesús miänaañ, ñämaayyä ja'a judíoshajxy:

—Cábøch nDeedy mänaa tiuumbädø'oy. Jäda'anäbaadyñä tiuñ. Páadyhøch jaduñ nbaduumbä, hoy jaduñ jia poo'xxiøjootiä.

¹⁸ Paady hajxy jia wiinmaayy nebiä Jesús hajxy yaghó'ogät, coo Jesús ja'a hoy-yagjuøñäjatypä yajcähxø'cy ja'a poo'xxiøøjooty, møød coo jaduhñ miänaañ cooc Dios Tieedyhaty, møød coo yajnimiäbaatä nebiä Diosän.

¹⁹ Mänit Jesús miänaañ, ñämaayyä ja'a judíoshajxy:

—Chaads mijts tehñ tiøyhajt nnämä'awät, cábøch nhamdsoo tuung nduñ; jaduhñhøch nduñ nébiøch nDeedy jim tiuñän. Nebiátyhøch nDeedy tiuñ, jaduhñhøch nduumbä. ²⁰ Xchójpøch nDeedy. Xyajñähixø'biøch nebiaty je'e tiuñ. Maas hoy-yagjuøñätyhøch nDeedy xyajñähixø'owa'añ neby hajxy myagjuø'owät. ²¹ Yagjujypiø'jpiøch nDeedy ja'a ho'ogyjiäya'ay. Jaaná jaduhñhøch nyagjujypiøgaambä, pønjätyhøch nyajñähdíjap. ²² NDéedyhøch, cab je'e pøn yajcumädowa'añ. Høøch je'e tøø xquihdujtmø'oy cooçh jäya'ay nyajcumädowät, ja'a hajxy ca'a mädia'agymiäbøjpä. ²³ Páadyhøch jaduhñ tøø xquihdujtmø'oy cooçh jäya'ayhajxy ween xwyiingudsähgø'oy nébiøch nDeedy wyiingudsähgø'oyiiän. Pønjätyhøch hajxy xquia'a wiingudsähgøøby, ni nDéedyhøch hajxy xquia'a wiingudsähgøøyyäbä, ja'açh tøø xquiéxiäbä.

²⁴ 'Chaads mijts tehñ tiøyhajt nnämä'awät, pønjaty højts nmädia'agy hajxy xmiäbøgaanäp móødhøch nDeedy, tøø ja'a haxøøgpä hajxy quiøxy najtshixøøñä. Je'eds hajxy cøjxta'axiøø jugyhadaamb nebiä Dios jiugyhatiän. Cab hajxy je'e mänaa quiumädowa'añ. ²⁵ Ja'a hajxy ca'a mäbøjpä, tøø yhabaady cooçhä nmädia'agy hajxy xmiäbøgaanä. Cooçhä nmädia'agy hajxy jaduhñ xmiäbøjcät, jaduhñ hajxy jiugyhada'añ cøjxta'axiøø nebiä Dios jiugyhatiän. ²⁶ Miøødhøch nDeedy cuhdujt coo jäya'ayhajxy ñämä'awät coo hajxy jaduhñ jiugyhádat tsajpootyp cøjxta'axiøø. Je'eçh cuhdujt tøø xmio'oy cooçhä jäya'ayhajxy jaduhñ nnämä'awät coo hajxy jim yhidät cøjxta'axiøø. ²⁷ Cooçh je'eduhñ tøø xwyiinguexy, páadyhøch jaduhñ tøø xquihdujtmø'oy cooçh nyajñähdíjät nebiaty jäya'ayhajxy jiädät. ²⁸ Ca'a hajxy myagjuø'oy. Habaadaamb je'e cooçhä ho'ogyjiäya'ayhajxy nyaaxpäsøma'añ. Mänitøch nmädia'agy hajxy xmiädowaanä. ²⁹ Mänit hajxy nägøxiä quiøxy jutpäsøma'añ mäduhñtiä hajxy hänäjty tøø yho'ogy. Ja'açh nmädia'agy hajxy hänäjty tøø xmiäbøjcäbä, je'eds hajxy nøcxaamb tsajpootyp. Ja'açh nmädia'agy hajxy hänäjty tøø xquia'a mäbøjcäbä, je'eds hajxy ca'awaamb haxøøgtuum.

³⁰ 'Nyajtødiägøøbiøch nébiøch nDeedy xñäma'ayän. Ca'a yhøøchä nhamdsoo wiinmahñdy nyaghijpy. Ngudiúumbiøch jaduhñ nébiøch nDeedy xmiägapxy xyhane'emiän. Cooçh jaduhñ ngudiúñ, páadyhøch ja'a tøyhajt nyecy cooçh nyajtødiägø'oy. ³¹ Cooçh häxøpy hamdsoo nniñägapxyii, mänit hajxy cu mmänaañ cooçhä tøyhajt nga'a mädia'agy. ³² Jiiçhä wiingpä xñägapxy; nnajuøøbiøch coo ja'a tøyhajt je'eduhñ yecy. Diøshøch je'e xñägapxp. ³³ Tøøch mijts hoy xyajtøy maa Juangän pø Diøshøch tøø xjiaançh quexy. Mänitä Juan ja'a tøyhajt hajxy xmiooyy. ³⁴ Pero høøch, ca'a jiäyá'ayhøch tøø xyhawaanä cooçh Dios tøø xquiexy. Nyagjahmiéjchpøch mijts nebiä Juan hajxy tøø xyhawaanän cooçh Dios tøø xquiexy, neby hajxy jaduhñ mnähwa'ads mguhwá'adsät. ³⁵ Yajwa'xyp ja'a Juan ja'a Diosmädia'agy hijty. Xyajñähixøøby hajxy hijty neby hajxy mnähwa'ads mguhwá'adsät. Hoy ja'a miädia'agy hajxy hijty mmädóowä. Pero cabä miädia'agy hajxy hijty mmäbøgaanä. ³⁶ Ndúumbiøch nébiøch nDeedy tøø xyhane'emiän. Cooçh jaduhñ nduñ, cähxø'p jaduhñ cooçh nDeedy tøyhajt tøø xquiexy. Cooçh hajxy jaduhñ xyhixy nébiøch nduñän, páquiøch nmädia'agy hajxy xmiäbøjcät, hoy ja'a Juan ja'a miädia'agy hajxy tøø mga'a ja mäbøjcä ja'a høøchcøxpä cooçh xñägapxy. ³⁷ Ja'a nDéedyhøch, ja'açh tøø xquiéxiäbä, høøchcøxpä jiiby tøø xyajcujaayii maa Diosmädia'aguiän. Pero cab hajxy mnajuø'oy cooçh nDeedy ja'a miädia'agy jaduhñ nmädiaacä. Cab hajxy mnajuø'oy cooçh jaduhñ nduñ nébiøch nDeedy tiuñän. ³⁸ Pero cábøch mijts nDeedy ja'a miädia'agy tøø xmiäbøjcä, ja'açh tøø xquiéxiäbä. Coo hajxy häxøpy tøø mmäbøcy, cu xmiäbøjcøch mijts ja'a nmädia'agy. ³⁹ Myajmädiaac-ho'py ja'a Diosmädia'agy hajxy, ja'a jecy mähmøøyyäbä cujaay. Paady hajxy jaduhñ myajmädiaac-ho'ogy coo tyijy hajxy jaduhñ mjugyhádat nebiä Dios jiugyhatiän. Chaads mijts ha-

jxy nnámá'awät, cooçh nmädia'agy hajxy xyajtúunät, mänit hajxy jaduhñ mjugyhádat. Pero hóyhøch Diosmädia'agy xjia nägapxy, ⁴⁰ cábøch mijts ja'a nmädia'agy xmiäbøgaanä. Cooçh mijts nmädia'agy hamuumdu'joot xmiäbøjcät, mänit hajxy mäbøcy mjugyhádat nebiä Dios jiugyhatiän.

⁴¹ 'Cábøch nmøjpäda'agy, hóyhøch jäya'ayhajxy xquia'a ja wiingudsähgø'ø. ⁴² Nnajuøbiøch coo mijts Dios mga'a tsocy. ⁴³ NDéedyhøch tøø xjia hamdsoo quexy. Pero cábøch mijts nmädia'agy xmiäbøgaanä. Coo wiingpä miédsät, je'eds mijts ja'a miädia'agy paquiä mmäbøgaanäp. ⁴⁴ Cábøch mijts nmädia'agy hoy xmiäbøgaanä. Jia tsojpy ja'a mjoothajxy jaduhñ coo jäya'ay hajxy xwyiingudsähgø'owät. Pero cabä mjoothajxy chocy coo Dios hajxy xchógät. ⁴⁵ Ca'a yhøøchä mijts jimñ nnäxø'owø'owaamby maa Dios wyiinduumän. Ja'a Moisésäts mijts jaduhñ xñäxø'owø'owaamb. Mmänaamb hajxy jaduhñ coo tyjy Diosmädia'agy hajxy mmäbøcy, ja'a Moisés jecy quiujáhyyäbä. ⁴⁶ Coo mijts cu mjaançh mäbøjcy, cu xmiäbøjcøch nmädia'agy hajxypä. Høøchcøxpä Moisés jaduhñ jecy quiujahy. ⁴⁷ Pero pø cab hajxy mmäbøga'añ nebiä Moisés jecy quiujahyyän, ni høøchä nmädia'agy hajxy xquia'a mäbøgaanäbä.

6

¹ Cumejtspo'o cudägøøgp'o Jesús jimñ ñøcxy mejyhawiimb. Mejtstu'u ja'a mejy xiøhaty Galilea møød Tiberias. ² Nämäy Jesús hänajty pianøcxyii jäya'ayhajxy. Paady hänajty pianøcxyii coo hoy-yagjuøøñäjatypä hänajty tøø yajcähxø'øgy, møød coo pa'amjäya'ay hänajty tøø yajmøcpøcy. ³ Mänit Jesús hajxy jimñ wyiimbejty maa ja'a tunguhduumän møødä jiamiøødhajxy. Mänit hajxy jimñ yhøxtaacy tunguhduum. ⁴ Mäwiingoomb ja'a pascuaxøø hänajty, ja'a judíøshajxy yagjätäbä. ⁵ Mänit Jesús wyiinhee'ppejty coo jäya'ay hänajty may pianøcxyii. Mänit Jesús ja'a Felipe ñämaayy:

—Maa ja'a caayyøøc hajxy nbáatämät coo yø'øya'ay hajxy nyajcáayyämät nämäy.

⁶ Paadiä Jesús jaduhñ miänaañ, yhuuc nä'a mädia'agyhixaamby hänajty waambä Felipe hänajty yhadsowa'añ. Tøø Jesús hänajty hamdsoo wyiinmay nebiä jäya'ayhajxy hänajty yajcaya'añii. ⁷ Mänitä Felipe yhadsooyy:

—Ni mejtsmägo'x denariojuy ja'a tsajcaagy quia'a mäðyhadät, hoy hajxy tu'lii'xyjaty cu nja móoyyäm.

⁸ Andrés ja'a Jesús ja'a jiamiøød hänajty tu'ug xiøhaty, ja'a Simón Pedro piuhya'ay. Mänitä Andrés ja'a Jesús ñämaayy:

⁹ —Chaadsä pigäna'c ja'a cebadatsajcaagy miøødä mägoøxcä, møødä hacx metscä. Pero cab jaduhñ miäðyhadät. Hiç, majiäya'ay yø'øduhñ.

¹⁰ Mänit Jesús miänaañ:

—Näma'aw hajxy ween hajxy yhøxta'agy.

Møj jimñ miøøjiotä. Jimñ hajxy yhøxtaacy ja'a mägoøxmilpä ya'adiøjc-hajxy møødä to'oxiøjc-hajxy hawiing. ¹¹ Mänit Jesús ja'a tsajcaagy quioondsooyy. Mänit Jesús Dios jaduhñ ñämaayy: “Dioscujú'uyäp.” Mänit Jesús ja'a jiamiøød ja'a tsajcaagy miooyy. Mänitä jiamiøød ja'a tsajcaagy hajxy tiägøøyy yajwa'xpä maa jäya'ayhajxy hänajty yhäña'ayän. Møødä hacx hajxy yajmäwa'xøøbiä. Jaduhñtiä jäya'ayhajxy miooyy mäduhñtiä hajxy hänajty quiaya'añ. ¹² Coo hajxy quiaabiädøøyy, mänit Jesús ja'a jiamiøød ñämaayy:

—Yajpäðø'og tsajcaagyquiaadiuc hajxy møødä hacxtsu'tstuc, neby hajxy jaduhñ nga'a nähguéecämät.

¹³ Mänit ja'a tsajcaagyquiaadiuc hajxy cøjx yajpäðø'øgy møødä hacxtsu'tstuc. Ma-jmetscach hajxy yaghujch ja'a tsajcaagyquiaadiuc. ¹⁴ Coo jäya'ayhajxy yhiijxy nebiä Jesús ja'a tsajcaagy hänajty tøø yajwa'añguiojjiän, mänit hajxy tiägøøyy mänaambä:

—Pues tehñ tiøyhajt, yø'øds je'e, ja'a hajxy hijty nhahíxämbä coo hajxy hijty xñämedsáañäm nebiä Diosmädia'agy miäna'añän.

¹⁵ Coo Jesús ñajuøøyy coo hänajty nõcxy piäda'aga'añii gobiernä mädsibø'øbä, mänit jim chohnnä. Mänit jim ñöcxnä nidiuhm tunjoot.

¹⁶ Coo chuujøøyy, mänitä Jesús jiamiøødhajxy yhädaacy mejypia'a. ¹⁷ Mänit hajxy tiägøøyy barcojooty. Mänit hajxy tiu'ubøjcy. Jim Capernaum hajxy hänajty ñöcxa'añ mejyhawiimb. Wiingoods hänajty. Cahnä Jesús ja'a jiamiøød hänajty piaadyñä. ¹⁸ Mänitä poj piädø'cy møc. Mänitä mejy chajcuju cøxp. ¹⁹ Mägøøxkilómetro tädujkilómetro hajxy hänajty tøø ñöcxy, mänitä Jesús hajxy yhiijxy coo ja'a barco hänajty tøø ñajtspaadø'øyy. Yohby Jesús hänajty mejywyiing. Mänitä jiamiøødhajxy chähgøøbiøjcy. ²⁰ Mänit hajxy ñämaayyä:

—Ca'a hajxy mdsähgø'øyy; Jesúshøch høøch.

²¹ Mänit hajxy jiootcugøøyy. Mänitä Jesús yajtägøøyyä barcojooty. Mänitä hajxy jim miejtsnä mejypia'a maa hajxy hänajty ñöcxian.

²² Cujaboom, jimnä majiäya'ayhajxy hänajty mejyhawiimbnä, maa hajxy hänajty tøø yajcayiiän. Ñajuøøby hajxy hänajty coo Jesús hänajty tøø quia'a møødtu'ubøgyii ja'a jiamiøødhajxy quipxy. Hijxä ja'a Jesús jiamiøødhajxy coo hajxy tiu'ubøjcy barcojooty ja'a majiäya'ayhajxy. Jagoo barco hänajty tu'ug; je'e hajxy hänajty tøø yajtu'ubøcy.

²³ Mänitä barco hajxy yajmeich wiingpä, ja'a Tiberiastsohmä. Jim hajxy miedsøøyy maa jäya'ayhajxy hänajty tøø chajcaaguyiayän, mänaa Jesús ja'a Dioscuju'uyäp yequiän.

²⁴ Coo ja'a majiäya'ayhajxy yhiijxy coo Jesúshajxy quia'a jiiän, mänit hajxy tiägøøyy barcojooty. Mänit hajxy tiu'ubøjcy Jesúshøxtaabiä. Jim hajxy ñöcxy mejyhawiimb jim Capernaum.

²⁵ Coo hajxy jim miejch mejyhawiimb, mänitä Jesús hajxy jim piaaty. Mänit Jesús hajxy ñämaayy:

—Wiindsøn, mänaa mmejch.

²⁶ Mänit Jesús miänaañ:

—Chaads mijts tehñ tiøyhajt nnämä'awät, páadyhøch mijts hijty xyhøxta'ay coöch mijts je'e cu'uxiä nyajcaayy. Cábøch mijts je'e xmiäyajtøwa'añ tiiguiøxpøch ja'a hoy-yagjuøøñäbä coo nyajcähxø'cy.

²⁷ Paady hajxy mduñ, jaduñä cay hu'ugy hajxy mbaady. Pero chaads mijts nnämä'awät jadunajtä coo hajxy mhøxtá'awät neby hajxy mjugyhádat nebiä Dios jiugyhatiän. Høøch mijts cuhdujt nmo'owaamby coo hajxy jaduñ mjugyhádat. Páadyhøch mijts jaduñ nmo'owa'añ, coöchä Dios tøø xquiuhdujtmø'oy, høøch ja'a Diosquexypä.

²⁸ Mänit Jesús miäyajtøøwa:

—Neby højts ngudiünät nebiä Dios choquiän.

²⁹ Mänit Jesús yhadsooyy:

—Chojpy ja'a Dios coöch mijts ja'a nmädia'agy xmiäbøjcät, ja'aäch tøø xquiéxiäbä.

³⁰ Mänitä Jesús miäyajtøøwägumbä:

—Tii hijxtahñd hoy-yagjuøøñäbä myajcähxø'øgaamby neby højts miič ja'a mmädia'agy jaduñ nmäbøjcät coo miič ja'a Dios tøø xquiexy. ³¹ Ja'a hajxy hijty nhaphájtäm ndeedyhájtäm ja'a jecypiä, jimä maná hajxy quiaayy maa hänajty pøn quia'a tsäna'ayän. Moisés ja'a maná yajwa'añguioj. Ja'a maná, nebiä tsajcaaguiän je'e. Jiiby jaduñ myiñ cujaay maa ja'a Diosmädia'aguiän: “Yajcaayyä jäya'ayhajxy ja'a tsajcaagyhajpä ja'a tsajpootyptsohmä. Dios jaduñ quejx.”

³² Mänitä Jesús yhadsooyy:

—Chaads mijts tehñ tiøyhajt nnämä'awät: Caha Mioisésä mijts ja'a tsajcaagy xyanäguejx ja'a tsajpootyptsohmä. Dios, je'eds hajxy je'e xyajnäguejx. Je'eds hajxy je'e xquiuhdujtmø'owaamb coo hajxy jim mdägø'owät tsajpootyp. ³³ Ja'a Dios tøø quiéxiäbä, jim tsajpootyp je'e tøø choön. Paady je'e yaa tøø quiäda'agy neby mijts xquiuhdujtmø'owät coo hajxy mjugyhádat nebiä Dios jiugyhatiän.

³⁴ Mänitä Jesús ñämaayyä:

—Højts yø'ø tsajcaagy móoyyäc cøjxta'axiøøbä, ja'a tsajpootyptsohmä.

Paady hajxy jaduhñ miänaañ coo hajxy quia'a wiinjuøøyy coo Jesús jaduhñ ñiñänøøma hamdsoo coo je'e tøø quiexyii ja'a Dios.

³⁵ Mänitã Jesús miänaañ:

—Høøch je'e, ja'a Dios tøø quiéxiäbã. Cuhdujtyéjþøch coo hajxy jim tiägø'øwät tsajpootyp þønjátyhöch ja'a nmädia'agy xmiäbøjçãp. Cøjxta'axiøø hajxy jim yhidät.

³⁶ Pero mijts, cábøch ja'a nmädia'agy hajxy tøø xmiäbøjçã, hoy hajxy tøø mja hixy cooçhä hoy-yagjuøøñäbã tøø nja yajcãhxø'øgy. ³⁷ Þønjátyhöch ja'a nDeedy jaduhñ xyajcø'øwaanøøby, je'eçhä nmädia'agy xmiäbøgáañãp. Nguhøgáambiøch hajxy je'e.

³⁸ Páadyhöch tøø ndsooñ tsajpootyp cooçh ngudiúnät nébiøch nDeedy xyhane'emiän, ja'açh tøø xquiéxiäbã. Cáboch ja'a nhamdsoo wiinmahñdy nyaghi-da'añ.

³⁹ Cáboçhä nDeedy miäna'añ coo hajxy haxøøgtuum quia'awät, ja'açh hajxy tøø xyajcø'øwaanø'øyäbã, coo ja'a xøø jumøjt jaduhñ yhabéjñät. Pero jaduhñ miäna'añ cooçh hajxy nyajnøcxät tsajpootyp.

⁴⁰ Jadúhñhöch ja'a nDeedy miäna'añ coo hajxy cøjxta'axiøø jiugyhádat neby jaaya'ay jiugyhatiän, þønjaty jaduhñ najuøøby cooçhä Dios xyHuunghaty, þønjátyhöch ja'a nmädia'agy xmiäbøjçãp. Je'eçh hajxy jim nyajnøcx-aamby tsajpootyp coo ja'a xøø jumøjt yhabéjñät.

⁴¹ Coo Jesús miädiaacpãdøøyy, mänit tiägøøyyã wiingapxpéjtãbã ja'a judíos hajxy. Paadiã wyiingapxpejtã coo hãnajty tøø miäna'añ coo jim chooñ tsajpootyp. ⁴² Jaduhñ hajxy ñiñãmaayã:

—Jesús yø'øya'ay xiøhaty; José yhuung yø'ø. Nhixyhájtãm ja'a tiaj tieedy yø'ø. Høhndaacp yø'øduhñ cooc tyijy jim tøø chooñ tsajpootyp.

⁴³ Mänitã Jesús ja'a judíos yhojy:

—Ca'a hajxy mgapxtãgooñã. ⁴⁴ Þøñhöch ja'a nDeedy yajnãhdijpy, je'eçhä nmädia'agy xmiäbøgáañãp. Je'eçh nyajnøcx-aamby tsajpootyp coo ja'a xøø jumøjt yhabéjñät.

⁴⁵ Jiiby jaduhñ myiñ cujaay maa ja'a Diosmädia'aguiän coo Dios jäya'ay nägøxiã yajnãhixø'øwa'añ. Þønjátyhöch ja'a nDeedy ja'a miädia'agy tøø xwyiinjuøøyyã tøø xyhabøjçã, jé'edshøch ja'a nmädia'agy tøø xmiäbøjçã.

⁴⁶ 'Cábøch nDeedy mänaa yhixyii jäyá'ayãm; høøch nidiuhñ tøø nhixy. Jímhöch ndsooñ Dioswiinduum. ⁴⁷ Chaads mijts tehñ tiøyhajt nnämä'awät, þøñhöch nmädia'agy xmiäbøjçãp, je'eds jugyhadaamb cøjxta'axiøø nebiã Dios jiugyhatiän. ⁴⁸ Høøch hajxy jaduhñ jim nyajtãgø'øwaamby. ⁴⁹ Ja'a nhaphájtãm ndeedyhájtãmhajxy, ho'c hajxy je'e, hoy ja'a maná hajxy jia caayy pactuum. Ja'a maná, mäjaayejc jaduhñ. Pero paquiã ja'a miãjaahajxy quiøjxy.

⁵⁰⁻⁵¹ Høøch, páadyhöch tøø ndsooñ jim tsajpooty nébiøch jäya'ayhajxy jim nya-jtãgø'øwät. Jim hajxy yhida'añ cøjxta'axiøø þønjátyhöch nmädia'agy xmiäbøjçãp. Nñãhdugáambiøch ja'a nni'x ja'a ngopc. Nñãhho'tu'udãambiøch jäya'ayhajxy nägøxiã.

⁵² Mänitã judíos hajxy yajcapxiøøyy ja'a Jesús ja'a miädia'agy:

—Nejy, xmio'owáañãm yø'øya'ay ñi'x quiopcãda'a coo ndsú'tsãmädã.

⁵³ Mänitã Jesús ñãmaayy ja'a judíos hajxy:

—Chaads mijts tehñ tiøyhajt nnämä'awät, høøch ja'a Diosquexypã, cooçh mijts ja'a nni'x ja'a ngopc xquia'a tsú'tsät, cooçh mijts ja'a nnø'ty ja'a njoot xquia'a húucät, cab hajxy jim mdãgø'øwät maa Dioswiinduumän. ⁵⁴ Þønjátyhöch ja'a nni'x ja'a ngopc xchú'tsãp, þønjátyhöch ja'a nnø'ty ja'a njoot xyhúucãp, je'eds je'e hidaamb cøjxta'axiøø jim tsajpootyp. ⁵⁵ Tsu'tsøøc-høch ja'a nni'x ja'a ngopc; huucøøc-høch ja'a nnø'ty ja'a njoot. ⁵⁶ Þønjátyhöch ja'a nni'x ja'a ngopc xchú'tsãp, þønjátyhöch ja'a nnø'ty ja'a njoot xyhúucãp, je'eçh jaduhñ nnãnøømby ja'a nmädiã'agyhöch hajxy xmiäbøjçãp. Je'eçh hajxy nguhdujtmø'owaamby coo hajxy yhidät cøjxta'axiøø jim tsajpootyp. Tu'ug-mädiã'agyhöch hajxy nmøødhida'añ. ⁵⁷⁻⁵⁸ Ja'a nDéedyhöch, ja'açh tøø xquiéxiäbã, je'eçh jaduhñ tøø xquiuhdujtmø'oy cooçh jäya'ayhajxy jim nyajnøcxät tsajpootyp, þønjátyhöch ja'a nmädia'agy xmiäbøjçãp. Jim hajxy yhida'añ cøjxta'axiøø. Ja'a nhaphájtãm ja'a ndeedyhájtãm, ho'c hajxy je'e jequiän, hoy ja'a maná hajxy jia caayy. Pero þønjátyhöch ja'a nmädia'agy xmiäbøjçãp, cab hajxy quia'awa'añ haxøøgtuum mänaa.

⁵⁹ Jaduhñ Jesús jim miädiaacy Capernaum coo hänajty yajnahixø'oy tsajtøgooty maa ja'a judíos ja'a Dios hajxy hänajty wyiingudsähgø'oyän.

⁶⁰ Coo Jesús ja'a jiamiøødhajxy jaduhñ jim miädooyy, mänit hajxy näje'e miänaañ:

—Cab hajxy jaduhñ nguhbójcämät; tsip xex yø'ø mädia'agy jaduhñ.

⁶¹ Ñajuøøyy Jesús jaduhñ nebiaty hajxy hänajty miädia'aguiän. Mänit hajxy ñämaayyá:

—Nejy, cábøchä nmädia'agy hajxy xjiøjpøgø'owáanjä. ⁶² Cooch mijts xyhíxät cooch hänajty jim nnøcxy tsajpootyp, mänitøch mijts ja'a nmädia'agy xmiäbøgaanä cooch jim ndsooñ tsajpootyp, høøch ja'a Diosquexypä. ⁶³ Ja'a mjuøhñdyhajxy, je'eds hajxy yaa xyagjugyhajp. Ja'a mni'x ja'a mgopc-hajxy, cab hajxy je'e yaa xyagjugyhaty. Cooch mijts ja'a nmädia'agy xmiäbójcät, mänit hajxy mdägø'owät jim tsajpootyp. ⁶⁴ Pero cahnä hajxy nägøxiä mmäbøcyñä.

Paadiä Jesús jaduhñ miänaañ, ñajuøøby hänajty jaduhñ pønjaty hänajty je'e ca'a mädia'agymiäbøgaamb. Ñajuøøby hänajty je'ebä pøn hänajty yegáanäp ho'cøoc. Jäguemiä Jesús jaduhñ ñajuøøyy mänaa ja'a miägu'ughajpähajxy tiägø'oyän yajnahixøøbiä.

⁶⁵ Mänit Jesús miänáangumbä:

—Páadyhøch mijts jaduhñ nnämaayy: “Pøñhøch ja'a nDeedy yajnahdijpy, je'ečhä nmädia'agy xmiäbøgáanäp.”

⁶⁶ Coo Jesús jaduhñ miädiaacpædøøyy, mänitä jiamiøødhajxy nämay wyiimbijnä. Cabä Jesús hajxy hänajty miøødwäditaannä. ⁶⁷ Mänitä Jesús ja'a jiamiøød miäyajtøøyy ja'a nämajmetspähajxy:

—Nejy, xpiuhwa'adsáambøch mijtspä.

⁶⁸ Mänitä Simón Pedro yhadsooyy:

—Wiindsøn, caj. Tii højts miich coo nnä'ä puhwá'adsät. Miich højts je'e xyanähixøøby neby højts jim ndägø'owät tsajpootyp. ⁶⁹ Nmäbójcäp højts miichä mmädia'agy. Nñajuøøby højts coo jim tøø mdsooñ maa Diosän, coo mGristähaty, ja'a højts hijty nhahijxypä, ja'a Dios hijty quiexaambiä.

⁷⁰ Mänitä Jesús yhadsooyy:

—Páadyhøch mijts tøø nwiimbiy nébiøch hajxy jaduhñ xmiøødwädítät, mijts ja'a nämajmetspä. Pero xii hajxy tu'jäya'ay mmøødä, ja'a møjcu'uwiinmahñdymøødpä.

⁷¹ Ja'a Judas jaduhñ nänøøma, ja'a Simón Iscariote yhuung. Ja'a Judas, je'edsä Jesús hänajty yegaamb ho'cøoc, hoy ja'a Judas ja'a Jesús hänajty jia møødwädity møødä nämajtu'ugpähajxy.

7

¹ Mänitä Jesús tiägøøyy cajpthayohbiä jim Galilea. Cab hänajty jim wiäditaannä jim Judea, je'eguiøxpä coo ja'a judíoshajxy hänajty yhøxta'ay nebiä Jesús hajxy yaghó'ogät.

² Jadáanäp ja'a judíos xiøøhajxy hänajty coo ja'a ramada hajxy yhädiuñ. Jim hänajty jiada'añii Jerusalén. ³ Mänitä Jesús ñämaayyá yhuchhajxy:

—Ca'a yaa mmähmø'øy. Nøcx jim Judea. Ween ja'a mmägu'ughajpähajxy jimhä yhuug hijxpä nejy miich ja'a hoy-yagjuøøñäjatypä myajcähxø'øguiän. ⁴ Myajcähxø'øpy miich hijty maa jäya'ay quia'a mayyän. Pero pø chojpy ja'a mjoot jaduhñ coo ja'a mmädia'agy wiädítät ja'a miichcøxpä, mänit hijxwiinduum myajcähxø'øgät majiäya'ayhagujc.

⁵ Cabä Jesús ja'a miädia'agy hänajty miäbójcäxä ni ja'a yhamdsoo huchhajxy. Paady hajxy jaduhñ miänaañ. ⁶ Mänitä Jesús miänaañ:

—Cahnä yhabaadyñä cooch jäya'ayhajxy nhawáanät pøñhøch høøch. Pero mijts, homiänaajä hajxy jim mnøcxät Jerusalén. ⁷ Caj mijts cu'ug xmiähanhaty. Pero høøch, xmiähanhájjøch cu'ug. Páadyhøch hajxy xmiähanhaty cooch nnägäpxy coo hajxy yhaxøøgwädity. ⁸ Nøcx mijts xøøhat. Cáboch nnøcxa'añ høøch. Cahnä yhabaadyñä cooch jäya'ayhajxy nhawáanät pøñhøch høøch.

⁹ Mänit Jesús miädiaacpædøøñä. Mänit jim jiaančh mähmøøñä jim Galilea.

¹⁰ Mänit Jesús yhuchhajxy jim ñöcxy xøhajpä Jerusalén. Mänit Jesús jim pianöcxy hamee'ch. ¹¹ Jimä judíos ja'a Jesús hajxy hānajty yhøxta'ay maa ja'a xøø hānajty jiadyijän. Jaduhñ hajxy hānajty miāna'añ:

—Maada'a tyijy je'e.

¹² Mädiäcäp ja'a Jesús hānajty ja'a majiäya'ayhajxy. Näje'e hajxy hānajty miāna'añ cooc yhojiäya'ayä. Näje'e hajxy hānajty miānaambä cooc tyijy yhaxøøgjäya'ayä, cooc tyijy hānajty wiädity cu'ugwiinhøhmbä.

¹³ Pero hamee'ch hajxy hānajty miädia'agy. Hix, chähgøøby hajxy hānajty ja'a judíos wyiindsønñhajxy.

¹⁴ Mägujnä xøø hānajty jiadyii, mänit Jesús tiägøøyy tsajtøgooty yajnähixøøbiä.

¹⁵ Mänitä judíoshajxy yagjuøøyy, miānaañ hajxy:

—Tii yø'øya'ayäda'a coo jiaančh tehñ jiaty madiu'u y caj yhøxpøquiä.

¹⁶ Mänit Jesús yhadsooyy:

—Ca'a yhøøchä nhamdsoo mädia'agy hädaa; nDéedyhöch miädia'agy hädaa jaduhñ, ja'ačh tøø xquiéxiäbä. ¹⁷ Pøn jaduhñ cuđiunaamb nebiä Dios miāna'añän, je'e najuø'øwaamb coo quia'a yhøøchä nhamdsoo mädia'agy hädaa, coo Diosmädia'agy hädaa.

¹⁸ Pøn jioot jaduhñ tsojp coo yajcumáyät, je'edsä yhamdsoo mädia'agy mädiaacp. Pero chójpiöch njoot coo Dios wyiingudsähgø'øwøøjät, ja'ačh tøø xquiéxiäbä. Nmøødhöch ja'a tøyhajt; cáböch nhøhnda'agy.

¹⁹ Tøyhajt coo Moisés ja'a ñocy jecy yejcy, túhmäts. Jiiby jaduhñ miāna'añ ñocyjiooty coo hajxy hoy mjäya'ayhädät. Pero cab hajxy mgudiuñ. Mmänaamb hajxy jaduhñ coöch hajxy xyagho'oga'añ.

²⁰ Mänitä cu'ug yhadsooyy:

—Nej, mguhmäñøøbiä coo jaduhñ mmäna'añ coo højts miičh nyagho'oga'añ. Pøñd-sän miičh xyagho'ogaamb.

²¹ Mänitä Jesús miänáangumbä:

—Tähöoc-höch ja'a hoybä tøø nduñ ja'a poo'xxiøøjooty; mänit hajxy myagjuøøyy nägøxiä. Mmänaamb hajxy jaduhñ coo hajxy tii nga'a túunämät ja'a poo'xxiøøjooty; paady hajxy myagjuøøyy. ²² Moisés ja'a cuhdujt jecy yejc coo hajxy mnicircuncidarhadøøjät. (Ca'a Mioisésä yajtsøhndaac; yhaphajpä tieedyhajpähajxy jecy yajtsøhndaac.) Paadiä mhuung hajxy mcircuncidarhaty hoy jia poo'xxiøøjootiä. ²³ Mgudiumby hajxy jaduhñ nebiä Moisés ja'a cuhdujt jecy yejquiän; pero mjootma'p hajxy coöchä jäya'ay tøø nyajmøcpøcy ja'a poo'xxiøøjooty. ²⁴ Cabä jäya'ay hajxy paquiä mwiinmahñdyhixät nebiä wyiinmahñdy je'e. Coo jecy mmøødhídät, mánitäts ja'a wyiinmahñdy je'e mhíxät. Coöchä pa'amjäya'ay tøø nyajmøcpøcy ja'a poo'xxiøøjooty, paady hajxy jaduhñ mmäna'añ cóogøch tyijy ja'a haxøøgwiinmahñdy nmøødä. Mmänaamb hajxy jaduhñ coo tii nga'a túunämät ja'a poo'xxiøøjooty. Pero Dios mänaamb coo yhähixø'øy coo hajxy ndúunämät.

²⁵ Mänitä Jerusaléngpä jäya'ayhajxy näje'e tiägøøyy mänaambä:

—Yø'øds hajxy yhøxtaaby coo hajxy yagho'oga'añ. ²⁶ Xiidsä quiapxy majiäya'ayhagujc, y caj waamb ñäma'ayii. Nej, mänaamb højts nwiindsønñhajtämhajxiäda'a coo yø'ø Miesíasä, ja'a hajxy nahíjxämbä. ²⁷ Nnajuøøyyäm hajxy maa yø'øya'ay chooñ. Pero ja'a Mesías, ja'a gobiernähadaambä, cab hānajty yajnajuø'øwa'añ maa hānajty chooñ.

²⁸ Jiibiä Jesús hānajty yajnähixø'øy tsajtøgooty. Coo jaduhñ miädooyy waambaty hajxy hānajty miāna'añ, mänitä møc miānaañ:

—Xyhixyhájpech hajxy. Mnajuøøby hajxy maačh ndsooñ. Pero ca'a yhøøchä hamdsoo tøø nwiinmay coöch yaa ngädá'agät. Ja'a nDéedyhöch tøø xquiexy. Pero cab hajxy mnajuø'øy. ²⁹ Nhíxyhöch je'e. Jímhöch ndsooñ. Je'ečh jaduhñ tøø xquiexy.

³⁰ Coo Jesús jaduhñ miānaañ, mänitä jia madsaanä. Pero caj ñä'ä yajmajch. Cajnä hānajty yhabaadyñä coo Jesús yagho'ogøøjät. ³¹ Hoy ja'a Jesús hānajty jia madsa'añii, nämay ja'a Jesús ja'a miädia'agy hānajty miäböjçäxä. Mänit hajxy miānaañ:

—Coo ja'a Mesías jaduñ miédsät, ja'a hajxy nhahíxämbä, nej, maas hoy-yagjuøñäjaty ja'a Mesíasäda'a yajcähxø'øga'añ quejee nej yø'øya'ay jaduñ yajcähxø'øguiän.

³² Mänitá fariseoshajxy jaduñ miädoyhajty waambaty Jesús hánajty miädia'agyii. Mänitá policíahajxy quiejxä coo Jesús hajxy miádsät. Ja'a fariseoshajxy jaduñ mäguejx møødá teedywiindsøñhajxy. ³³ Mänitá Jesús miänaañ:

—Cábøch mijts jeicy nmøødhidaannä. Nøcxáannøbøch maaçhä ndsohñän. ³⁴ Xjia høxta'awáambøch hajxy, pero cábøch hajxy xpiaada'añ. Cab hajxy jim hoy mnócxät maaçh nhida'añän.

³⁵ Mänitá judíoshajxy ñiñämaayyá:

—Maa yø'øya'ayäda'a ñøcxa'añ coo hajxy jaduñ nga'a páatämät. Nej, nøcxaambäda'a jim maa ja'a judíoshajxy wa'xyjaty chána'ayän maa ja'a hajxy ca'a Israelpähajpän, coo Diosmädia'agy yajnähixø'øwät ja'a hajxy ca'a judíoshajpá. ³⁶ Tiida'a tyijy coo miäna'añ cooc hajxy nja høxta'awáanäm, pero cábäc hajxy nbaadäänäm, y cooc hajxy hoy nga'a nøcxämät maa yhida'añän.

³⁷ Coo ja'a xøø hánajty miayaannä, ja'a møjxøøjooty, mänitá Jesús tiänaayyø'cy. Mänitá møc miänaañ:

—Pøn tødsøyyäp, ween yaa myiñ maaçh høøchän, ween min yhu'ugy mädyiibøch nmo'owaamby.

Jaduñ Jesús yajnimiäbaatä nebiä møjnøøgopcän. Mänitá miänángumbä:

³⁸ —Pønjátyhøch ja'a nmädia'agy xmiäbójcäp, je'eçhä nmädia'agy xyajwa'xtägájtäp, nebiä Diosmädia'agy miäna'añän.

³⁹ Jaduñ Jesús miänaañ, pønjaty ja'a miädia'agy mábøgäänäp, mänitá Dioshespíritu mio'owa'añii. Cahnä Dioshespíritu hánajty quiäda'agyñä. Cahnä Jesús hánajty yagho'ogyii; cahnä hánajty yhoodiägachñä maa ja'a Tieediän.

⁴⁰ Coo ja'a cu'ughajxy jaduñ miädooyy nebiä Jesús hánajty tøø miädia'aguiän, mänit hajxy näje'e miänaañ:

—Tehm tiøyhajt ja'a Dios ja'a quiugapxy yø'ø, ja'a Dios hijty quiexaambiä.

⁴¹ Näje'e hajxy miänaambä:

—Ja'a Mesías yø'ø, ja'a gobiernähadaambä.

Pero näje'ehajxy miänaambä:

—Pero cabä Mesías jim choona'añ Galilea. ⁴² Jaduñ Diosmädia'agy miäna'añ cooc ja'a Mesías ja'a David yhaphada'añ tieedyhada'añ, y cooc jim choona'añ Belén maa ja'a David jecy chánaayyän.

⁴³ Coo hajxy hánajty jaduñ miädia'agy, cab hajxy hánajty tu'ugmädia'agy ñibiaadyii ja'a Jesúscøxpä. ⁴⁴ Näje'e ja'a Jesús hajxy hánajty jia madsa'añ, pero caj pøn ñä'a majch.

⁴⁵ Mänitá policíahajxy wyiimbijty maa ja'a teedywiindsøñhajxiän, maa ja'a fariseoshajxiän. Mänitá policíahajxy ñämaayyá:

—Tii hajxy coo mga'a yajmejch.

⁴⁶ Mänit hajxy yhadsooyy:

—Cab jaduñ pøn mänaa miädia'agy nej yø'øya'ay miädia'aguiän.

⁴⁷ Mänitá fariseoshajxy miänaañ:

—Cab jaduñ yhooyä coo mijts jaduñ tøø myajwiinhøhmbä. ⁴⁸ Caj yø'øya'ay ja'a miädia'agy miäbójcäxä ja'a wiindsøñhajxy møødá fariseoshajxy. ⁴⁹ Pero yø'ø cu'ughajxy, cabä jecyquiuhdujt hajxy jiaty. Ween hajxy chaächpøcy.

⁵⁰ Jimä Nicodemo hánajty, ja'a Jesús hánajty tøø ñähóyyäbä. Fariseohajp hánajty je'ebä. Mänitá Nicodemo miänaañ:

⁵¹ —Cab højts nguhdujthájtäm jaduñ myiñäm coo jäya'ay nyajcumädóowämät coo hánajty tøø nga'a mädia'agymiädóowäm jayøjp.

⁵² Mänitá Nicodemo wyiinwohñä ñämaayyá:

—Jaduhñ miičh mbamädiaacpä nebiä Galileabä jäya'ayhajxy miädia'aguiän. Huuc tehñ yajmädia'ag ja'a Diosmädia'agy. Cab jaduhñ jiiby maa myiñ coo ja'a Dios ja'a quiugapxy jim choona'añ Galilea.

⁵³ Mänit hajxy ñöcxnä maa ja'a tiöjc-hajxiän.

8

¹ Mänitä Jesús jim ñöcxxy maa ja'a tun jaduhñ xiøhatiän Olivos. ² Cujaboom jopyjiajjø-gyñä, mänitä Jesús ñöcxxy maa ja'a tsajtöjcän. Mänitä Jesús ja'a cu'ug ñämejtsä. Mänitä Jesús yhäñaaguiädaacy, tiägøøyy yajñähixøøbiä. ³ Mänitä to'oxiøjc tu'ug yajmejtsä maa Jesúsän. Ja'a cuhdujtyajñähixøøbiähajxy mäyajmejts møødä fariseoshajxy. Paadiä to'oxiøjc hänajty tøø miächii coo hänajty tøø tiu'uma'ady tøø tiu'udägoy. Mänitä to'oxiøjc jim yajñöcxä maa ja'a cu'ughagujcän. ⁴ Mänitä cu'ug ja'a Jesús hajxy ñämaayy:

—Wiindsón, paady hädaa to'oxiøjc tøø miächii coo tøø piaadyii wiingya'adiøjmøød.

⁵ Jiiby maa ja'a Diosmädia'aguiän, jiibiä Moisés hajxy xyhanéhñäm coo ja'a to'oxiøjc jaduhñbä hajxy nguhgá'tsämat. Míičhäts, waamb miičh mmänaambä.

⁶ Paady hajxy jaduhñ yajtøøyy, coo hajxy hänajty miädoᵛa'añ pø tu'ugmädia'agy ja'a Jesús hänajty møødä Diosmädia'agy. Yhøxtaaby hajxy hänajty nebiä Jesús hajxy ñähwaambédät coo häxøpy quia'a tu'ugmädia'aguiä. Pero cabä Jesús waamb yhadsooyy. Mänitä Jesús ñaaxcooyy. Mänitä tiägøøyy jahbiä cø'øhaam naaxwiin. ⁷ Mänitä Jesús jaduhñ miäyajtøᵛwägumbä. Mänit yhäñaaguiugøøyy. Mänit miänaañ:

—Pønä pojpä cädieey ca'a møød, ween quia'tstsooñ.

⁸ Mänitä Jesús ñaaxcøogumbä. Mänit tiägøøguiumbä jahbiä naaxwiin. ⁹ Coo hajxy jaduhñ miädooyy nebiä Jesús hänajty tøø miäna'añän, mänit hajxy je'e tiu'ubøjñä hani-diuñmjaty. Ja'a møjpä, je'e jawyiin tehñ tiu'ubøjtsohñ. Niñajuøøyyä hajxy hamdsoo coo ja'a pojpä cädieey hajxy hänajty miøødä, paady hajxy tiu'ubøjcy. Mänämetscä Jesús ja'a to'oxiøjc miøødmähmøøyy. Jimä to'oxiøjc hänajty tiäna'ay Jesús ja'a wyiinduum.

¹⁰ Mänitä Jesús yhäñaaguiugøøyy. Mänitä Jesús ja'a to'oxiøjc ñämaayy:

—Maa jaaya'ayhajxy, ja'a hajxy hijty xquiuhga'adsaambä. Nej, caj pøn tøø xñä'a cuhga'ačhä.

¹¹ Mänitä to'oxiøjc yhadsooyy:

—Wiindsón, caj.

Mänitä Jesús miänaañ:

—Ni høøch jaduhñ nga'a mänaambä coo miičh myajcuhgá'adsät. Nøcx; cab jaduhñ haxøog mjatcøøñät.

¹² Mänitä Jesús miänáangumbä:

—Jaduhñ mäwiinhøch nyajnimiäbaadyii nebiä jøønän coočhä jäya'ayhajxy nya-jñähixø'øy ja'a tu'u hoybä. Pønjaty ja'a nmädia'agy xpianøcxáañäp, cab jaduhñ wiädita'añ hagoodstuum. Cøjxta'axiøø jim yhida'añ tsajpootyp.

¹³ Mänitä fariseos ja'a Jesús hajxy ñämaayy:

—Hamdsoo miičh mniñänømyii. Pero caj miičh mnä'a tømiädia'agy.

¹⁴ Mänitä Jesús yhadsooyy:

—Tømiädiäacpøch, hóyhøch hamdsoo nja niñänømyii. Nñajuøøbiøch maačh ndsooñ maačh nñöcxxy. Pero mijts, cab hajxy mnajuø'øy. ¹⁵ Nä'a nägøøbøch mijts xñä'a näh-waambety. Pero høøchä, cábøch jäya'ay nä'a nägoobä nnähwaambety. ¹⁶ Tøyhájtøch nnä'ägädä mädia'agy. Ca'a yhøøchä nhamdsoo mädia'agy hädaa; ja'a nDéedyhøchä miä-dia'agy hädaa, ja'ačh tøø xquiéxiäbä. ¹⁷ Miimb jaduhñ cujaay maa ja'a Diosmädia'aguiän, coo jäya'ayhajxy tiu'ugmädia'aguiä nämetscä, pues tøyhajt hajxy jaduhñ yejpy. ¹⁸ Pues højts, tu'ugmädia'agy højts møødhøch nDeedy cooch je'e tøø xquiexy.

¹⁹ Mänitä fariseoshajxy miänaañ:

—Maa mDeedy.

Mänitä Jesús yhadsooyy:

—Cábøch mijts xñajuø'ø; ni ja'a nDéedyhöch hajxy xquia'a najuøøyyä. Cooch mijts häxøpy xñajuø'ø, xñajuøøyyäbøch ja'a nDeedy hajxy häxøpy.

²⁰ Yajnahixøøguiujc ja'a Jesús jaduñ miänaañ jii by tsajtøgooty, jii by mäðøyyä maa ja'a cajän maa ja'a xädø'øñ hajxy hänajty yajnahgäda'aguiän. Pero cabä Jesús hänajty pøn miadsa'añii, hoy hänajty jia mädia'agy cu'ughagujc. Cahnä hänajty yhabaady coo je'e miadsøøjät.

²¹ Mänitä Jesús miänaangumbä:

—Nøcxáannäbøch høøch. Xjia høxta'awáambøch mijts, pero cábøch hajxy xpi-aada'añ. Cab hajxy hoy mnøcxät maaçh nnøcxa'añän. Coo hajxy mho'oga'añ, jii by hajxy mga'awa'añ haxøøgtuum.

²² Mänitä judíøshajxy ñiñämaayyä:

—Nej, hamdsooda'a ñiyagho'oga'añii, coo hajxy jaduñ nga'a nøcxämät maa ñøcxä'añän.

²³ Mänitä Jesús miänaañ:

—Yaa mijts mdsooñ, hädaa yaabä naaxwiin. Pero høøch, tsajpóotypøch ndsooñ, ca'a yaajä. ²⁴ Tøøch mijts jaduñ nnäma'ay, coo hajxy hänajty tøø mho'ogy, cahnä mbojpä mgädieey hajxy hänajty xñähwa'açhñä. Cabä mbojpä mgädieey hajxy xñähwa'adsa'añ coochä nmädia'agy hajxy xquia'a mäbøjcät pøn høch høøch.

²⁵ Mänitä Jesús hajxy miäyajtøøyy:

—Pønäsän miiçh.

Mänitä Jesús yhadsooyy:

—Tøøch mijts nja hawáanäm pøn høch høøch. ²⁶ Madiú'ujøch nnägápxät coo hajxy haxøøg mjäya'ayhaty. Cábøch mijts ja'a nmädia'agy xmiäbøjcä. Nhawáanäm mijts jaduñ nebiátyhöch jaaya'ay tøø xñajtsapxøøyyän, ja'açh tøø xquiéxiäbä.

²⁷ Pero cab hajxy wyiinjuøøyy coo Jesús ja'a Tieedy jaduñ ñägapxy. ²⁸ Mänitä Jesús miänaañ:

—Cooch mijts hänajty tøø xmiøjpahbety, mänit hajxy mnajuø'øwa'añ pøn høch høøch, y coochä nhamdsoo cuhdujt nga'a yajtuñ. Pero jaduñ nhawáanäm nebiátyhöch ja'a nDeedy tøø xyajnahixø'ø. ²⁹ Xmiøødwädíjpøch je'e, ja'açh tøø xquiéxiäbä. Cábøch nidiuhm tøø xñähgue'egy je'eguiøxpä cooch homiänaajä ngudiuñ nébiøch tøø xyhane'emiän.

³⁰ Coo ja'a Jesús jaduñ miädiaacy, mänitä miädia'agy miäbøjcäxä nämay.

³¹ Mänitä Jesús ñämaayy ja'a judíøshajxy, ja'a Jesús ja'a miädia'agy hajxy hänajty tøø miäbøjcäbä:

—Cooch mijts ja'a nmädia'agy xquiudiúunät homiänaajä, mänitøch mijts hamuum-du'joot xmiøødwädítät. ³² Jadhñdsä tøyhajt hajxy mmøødhädät cooch ja'a Dios tøø xquiexy. Jadhñdsä mhaxøøgwiinmahñdy hajxy mnajtsxixø'øwät, nebiä møjcu'ugong hajxy jaduñ xquia'a hané'emät.

³³ Mänitä judíøshajxy yhadsooyy:

—Abraham højts hijty nhaphajpy ndeedyhajpy. Cab højts pøn xyhane'emy. Tii jaduñ coo mmäna'añ coo højts ja'a møjcu'ugong xquia'a hané'emät.

³⁴ Mänitä Jesús yhadsooyy:

—Chaads mijts tehñ tiøyhajt nnämä'awät, pøn jaty ja'a pojpä cädieey jaduñ møød, møjcu'ugong jaduñ hanehmb. ³⁵ Ja'a moonsähajxy, cab hajxy jim yhity cøjxta'axiøø maa hajxy quiuduñän. Pero ja'a cumoonsä yhuungä, je'eds jim nä'ägä hijp maa ja'a tiøjcän. ³⁶ Høøch, nbuhbédäbøch mijts jaduñ nebiä mhaxøøgwiinmahñdy hajxy mnajtsxixø'øwät, nebiä møjcu'ugong hajxy jaduñ xquia'a hané'emät. ³⁷ Nnajuøøbiøch jaduñ coo Abraham hajxy hijty mhaphaty mdeedyhaty. Pero xyagho'ogáambøch mijts, je'eguiøxpä coo hajxy tu'joot mga'a tuna'añ nébiøch mijts nja näma'ayän. ³⁸ Nmädiäacypiøch nébiøch ja'a nDeedy tøø xyajmøødmädia'aguiän. Pero mijts, jaduñ mijts mjäya'ayhaty nebiä mdeedy yaa jiäya'ayhatiän hädaa yaabä naaxwiin, nebiä cu'ug yhane'emiän.

³⁹ Mänit hajxy yhadsooyy:

—Abraham hõjts hijty nhaphajpy ndeedyhajpy.

Mänitä Jesús miänaañ:

—Pø tøyhajt ja'a Abraham hajxy hijty mhaphaty mdeedyhaty, jaduñ hajxy mjäya'ay-hájpät nebiä Abraham jecy jiäya'ayhajtjän. ⁴⁰ Pero xyagho'ogáambøch mijts, hóyhøch mijts ja'a tøyhajt tøø nja yajmøødmädia'agy, mädyiibøch ja'a Dios tøø xyajmøødmädia'agy. Cábøchä Abraham häxøpy xyagho'oga'añ. Caj mijts mjäya'ayhaty nebiä Abraham jecy jiäya'ayhajtjän. ⁴¹ Jaduhñ mijts mjäya'ayhaty nebiä mdeedyhajxy jiäya'ayhajtjän.

Mänitä Jesús ñämaayyá:

—Tøyhajt hõjts ja'a Abraham hijty nhaphaty ndeedyhaty. Jaduhñ hõjts njäya'ayhaty nebiä Abraham jecy jiäya'ayhajtjän. Tu'ug hõjts nDeedy; Dios je'e.

⁴² Mänitä Jesús miänaañ:

—Coo Dios hajxy häxøpy tøyhajt mDeedyhaty, xchõjpøch mijts häxøpy yaabä. Jímhøch tøø ndsooñ maa Diosän; pero yaaçh nhijnä hädaa yaabä naaxwiin. Ca'a yhamdsoo jóothøch yaa tøø ngäda'agy. Dióshøch xquiejx. ⁴³ Xióøbøch yaa nja mädia'agy; cábøch mijts ja'a nmädia'agy xñä'ä cudiunaanä. ⁴⁴ Ja'a mõjcu'ugong hajxy mdeedyhajpy. Jaduhñ hajxy mjäya'ayhaty nebiä mdeedy jiäya'ayhajtjän. Mänit je'e tiägøøyy jäya'ay-yagho'pä mänaabä naaxwiin yhawijy tiøø'xta'aguiän. Cabä tiømiädia'agy. Cabä hädaa yaabä naaxwiin hoy jiäya'ayhaty. Høhñdaacp je'e; jaduñ ñä'ägä cuhdujthaty. Jaduhñ jäya'ayhajxy yaa yajnahixø'oyii ja'a mõjcu'uwiiinmahñdy. ⁴⁵ Pero høøch, cooçh mijts ja'a tøyhajt nyajmøødmädia'agy, cábøch nmädia'agy hajxy xmiäbøjca. ⁴⁶ Hopiønä ñajuø'oy cooçhä pojpa cádieey nga'a møødä. Jaduhñ hajxy mnajuø'owät cooçhä tøyhajt nmädia'agy. ⁴⁷ Ja'a Dios ja'a yhuungä, miädóowäp je'e ja'a Dios ja'a miädia'agy. Pero mijtsä, caj mijts Dios xyhuunghaty; paadiä Dios miädia'agy hajxy mga'a mädowaanä.

⁴⁸ Mänitä Jesús ñämaayyá ja'a judíoshajxy:

—Nej, cab jaduñ tiøyyä coo jim mdsooñ Samaria, coo mõjcu'ugong tøø xyajtägø'oyä.

⁴⁹ Mänitä Jesús yhadsooyy:

—Cábøchä mõjcu'ugong tøø xyajtägø'oy. Nwiinguhdsähgøøbiøch ja'a nDeedy. Pero cábøch mijts xwyiingudsähgø'oy. ⁵⁰ Cábøch hamdsoo mänaañ cooçh hajxy xwyiingudsähgø'owät. Ja'a nDéedyhøch jaduñ mänaamb. Yajcumädowaamb by je'e pøñhøch haxøøg xñänøømb. ⁵¹ Chaads mijts tehñ tiøyhajt nnämä'awät, cooçhä nmädia'agy pøñ xmiäbøjcat, ni mänaa quia'a hó'ogät.

⁵² Mänitä judíoshajxy yhadsooyy:

—Hoorá sí, tøø hõjts nnajuø'oy coo mõjcu'ugong tøø xyajtägø'oy. Tøø ja'a Abraham yho'ogy møødä Dios ja'a quiugapxyhajxy. Pero miiçh mänaamb coo mmädia'agy pøñ xmiäbøjcat, ni mänaa quia'a hó'ogät. ⁵³ Nej, maas møc miiçhä cuhdujt mmøødä quejee ja'a Abraham jecy miøødhajty, ja'a hajxy hijty nhaphajtäm ndeedyhajtämbä. Tøø je'e yho'ogy. Jaduhñ ja'a Dios ja'a quiugapxyhajxy tøø yho'pä. Pøñ tyijy miiçh coo jaduñ mniñänømyii.

⁵⁴ Mänitä Jesús yhadsooyy:

—Cab jaduñ yhahixø'oy cooçh hamdsoo nniguiumayøøjät. Pero Dióshøch xquimaaby, ja'a tyijy mijts mDioshajpy. ⁵⁵ Cahnøch nDeedy hajxy xñajuøøyyä. Pero høøch, nhixyhøch høøch. Cooçh nmäná'anät cooçh nga'a hixiä, hønñdá'agäbøch jaduñ nej mijts mhønñda'aguiän. Pero nhixyhøch høøch. Nmäbøjca bøch ja'a miädia'agy je'e. ⁵⁶ Ja'a Abraham, ja'a hajxy jecy nhaphajtäm ja'a ndeedyhajtämbä, xoonñdaacp je'e hijty cooçh hänajty xhixa'añ mänáajøch hänajty nhida'añän hädaa yaabä naaxwiin. Tøøch je'e xjiaançh hixy. Mänit jiaançh xoonñdaacy.

⁵⁷ Mänitä Jesús ñämaayyá ja'a judíoshajxy:

—Je'enä jaduñ mdsaanä. Nej, tøø ja'a Abraham mhixiä.

⁵⁸ Mänitä Jesús yhadsooyy:

—Chaads mijts tehñ tiøyhajt nnämä'awät, jíiyyämøch hänajty; cahnä Abraham hänajty jiinä.

⁵⁹ Mänitä tsaa hajxy quionø'cy; Jesús hajxy hänajty quiuhga'adsaamby. Pero tøø ja'a Jesús hänajty ñiguiu'üchii. Mänit piädsøømnä tsajtøgooty.

9

¹ Jimä Jesús hänajty ñaxy. Mänitä wiindspä tu'ug yhijxy. Jaduhñä mähdiøjc ñä'ägä maaxhuunghajty wiinma'ad. ² Mänitä Jesús ñämaayy ja'a jiamiøødhajxy:

—Wiindsøn, tii yø'øya'ay wyiinäda'a coo mia'adä. Pønä pojpa cädieeyäda'a tøø tiuñ, yø'øya'ayä, tøgä tiaj tieediä.

³ Mänitä Jesús yhadsooyy:

—Ni pøn. Paady yø'øya'ay wyiin mia'adä nebiä Dios ja'a miäjaa jaduhñ quiähxø'øgät maa yø'øya'aguixpän. ⁴ Tsøc Diostuung hajxy túunäm, ja'aäch tøø xquiéxiäbä, mäduhñtiä jugyhajt hajxy nmøødhajtäm. Coö hajxy nhó'cänät, cab hajxy jaduhñ mänaa ndúunänät. ⁵ Cooch yaa nhity hädaa yaabä naaxwiin, nyajcähxø'piøch jäya'ay piojpa quiädieeyhajxy.

⁶ Mänitä Jesús ñajtsujøøyy naaxwiin. Mänitä chujy yajmo'ondscojy. Mänitä pyinø'cy. Mänitä wiindspä yajwiingupiinøøyy ja'a chujy, ja'a hänajty tøø mio'ondscøjjiäbä.

⁷ Mänitä Jesús ja'a wiindspä ñämaayy:

—Nøcx niwyiimbujøø maa ja'a tsiidaact jaduhñ xiøhatiän Siloé —je'e jaduhñ ñänøømby, Quexy.

Mänitä wiindspä hoy jiaančh niwyiimbujyii. Coö wyiimbijnä, tøø hänajty wyiindøø'xø'nä. ⁸ Mänitä mähdiøjc yhijxä ja'a miädøjc-hajxy møødä hajxy hijty yhijxypä coö hänajty xiädø'ñyujwa'añ. Mänitä hajxy miänaañ:

—Nej, caj jie'e yø'øjä, ja'a hijty naxy xädø'ñyujwaambä häña'a.

⁹ Näje'e hajxy hänajty miänaañ:

—Jaančh je'e yø'ø.

Näje'e hajxy hänajty miänaañ:

—Ca'a jie'ejä; pero tehñ jiaduhñ quiähxø'øgy.

Pero ja'a mähdiøjc, hamdsoo hänajty ñiñänømyii:

—Høøch je'e hijty wiinds.

¹⁰ Mänitä miäyajtøøwa:

—Nejy mwiindøø'xø'cy.

¹¹ Mänit yhadsooyy:

—Jaaya'ay ja'a Jesús hajpä, jaaya'ay ja'a chujy yajmo'ondscoj. Mänitøch xyajwiingubiinøøyy. Mänitøch xñämaayy coöch nøcxy nniwyiimbujyii maa ja'a tsiidaact jaduhñ xiøhatiän Siloé. Mänitøch hoy njaančh niwyiimbujyii. Mänitøch nwiindøø'xø'cy.

¹² Mänitä miäyajtøøwägumbä:

—Maa jaaya'ayäda'a.

Mänit yhadsooyy:

—Pämäadädä.

¹³ Mänitä mähdiøjc yajnøcxä maa ja'a fariseos wyiinduumhajxiän, ja'a hänajty tøø wyiindøø'xø'øguiäbä. ¹⁴ Poo'xxiøøjooty ja'a Jesús ja'a chujy yajmo'ondscojy, yajwiindøø'xø'cy ja'a wiindspä. ¹⁵ Mänitä mähdiøjc miäyajtøøwägumbä ja'a fariseoshajxy:

—Nejy mwiindøø'xø'cy.

Mänit yhadsooyy:

—Chujy jaaya'ay yajmo'ondscoj; je'ečh je'e xyajwiingubiinøøyy. Mänitøch hoy nniwyiimbujyii. Mänitøch nwiindøø'xø'nä.

¹⁶ Mänitä fariseoshajxy näje'e miänaañ:

—Ca'a yø'øya'ay Dyiosquexiä. Tuumb yø'øduhñ poo'xxiøøjooty. Cabä cuhdujt miøødä coö jaduhñ tiünät poo'xxiøøjooty.

Pero näje'e hajxy hänajty miänaañ:

—Pero nebiä cuboj cugädieejäya'ay ja'a hoy-yagjuøøñäjatypä jaduhñ ñä'ä ya-jcähxø'øgät.

Cab hajxy hānajt̃y tu'ugmädia'agy ñibiaadyii. ¹⁷ Mānitā mähdiøjc ñāmaayyā, ja'a hānajt̃y tøø wyiindøø'xø'øguiäbā:

—Míichäts, waamb miich mmāna'añ. Nejt̃y yø'øya'ay mnānømy, ja'a tøø xyaghijxø'øguiäbā.

Mānit̃ yhadsooyy:

—Dios je'e tøø quiexy.

¹⁸ Cabā judíoshajxy hānajt̃y miäbøga'añ coo jaaya'ay hijty wyiindsä, coo jaaya'ay hijty tøø wyiindøø'xø'øgy. Paady hajxy miøjyaaxy jaaya'ay tiaj tieedy. ¹⁹ Mānit̃ hajxy miäyajt̃øøwa:

—Nejt̃, mijts ja'a mhuing yø'ø, ja'a hajxy mnānøømbiä coo hijty wiinds tøø miaaxhuunghatiä. Nebiäda'a tøø yhjxø'øgy.

²⁰ Mānitā tiaj tieedyhajxy yhadsooyy:

—Højts nhuung jaančh yø'ø. Wiinds jiaančh maaxhuunghajty. ²¹ Pero cab højts nnajuø'øy nejt̃ tøø yhjxø'øgy o pøn jaduhñ tøø yaghijxø'øgy. Yø'ø hajxy mäyajt̃øw. Møjt̃ yø'øjän. Ween hamdsoo ñägapxy.

²² Paady hajxy jaduhñ miānaañ, coo ja'a teedywiindsøn hajxy hānajt̃y chähgø'øy. Tøø ja'a teedywiindsøn hajxy hānajt̃y quiojyquiapxyhaty coo hajxy hānajt̃y yajpādsøma'añ tsajtøgooty pøn jaduhñ māna'anaamb cooc Jesús Miesíashaty. Nägooyyā hajxy hānajt̃y yajtpādsøma'añ, cab hajxy hānajt̃y yajtøjtägø'øwaannä tsajtøgooty. ²³ Paady jaaya'ay tiaj tieedyhajxy miānaañ: “Yø'ø hajxy mäyajt̃øw. Møjt̃ yø'øjän.”

²⁴ Mānitā mähdiøjc miøjyaaxägumbä, ja'a hānajt̃y tøø yhjxø'øguiäbā. Mānitā ñāmaayyā:

—Højts tøyhajt̃ móoyyāc. Nnajuøøby højts coo Jesús quiuboj quiugädieeyä.

²⁵ Mānit̃ yhadsooyy:

—Cábøch nnajuø'øy pø cuboj pø cugädieey je'e. Pero nnajuøøbiøch cooçh tøø nhijxø'øgy, hóyhøch hijty nja wiindsä.

²⁶ Mānit̃ ñāmaayyā:

—Nejt̃ xyaghijxø'øcy.

²⁷ Mānit̃ yhadsooyy:

—Tøøds mijts nja hawáañäm. Pero cab hajxy mmäbøjcy. Tii hajxy coo mmädozáan-gombä. Nejt̃, mbanøcxáañp ja'a miädia'agy hajxypä.

²⁸ Mānit̃ yhojjä ñāmaayyā:

—Miičh jaduhñ mbanøcxäp ja'a miädia'agy. Højtsä, Moisés ja'a miädia'agy nbanøcxäp. ²⁹ Nnajuøøby højts coo Dios ja'a Moisés miøødmädiaacy jequiän. Pero jaaya'ayä, cab højts nnajuø'øy maa chooñ.

³⁰ Mānitā mähdiøjc yhadsooyy:

—Hoy-yagjuøøñä jaduhñ. Cab hajxy nnajuø'øy maa jaaya'ay chooñ, hóyhøch tøø xjia yaghijxø'øgy. ³¹ Hoy piønä jaduhñ ñajuø'øy coo Dios jaduhñ quia'a mädoowa ja'a miädia'agy ja'a cuboj ja'a cugädieey. Pero pøn ja'a Dios jaduhñ wiingudsähgøøby, pøn jaduhñ cudiumb nebiä Dios yhane'emiän, je'e ja'a miädia'agy jaduhñ mädóowäxäp ja'a Diósäm. ³² Høxtahm̃ds ja'a naaxwiin yhawijy tiøø'xta'aguiän, ni mānaa jaduhñ quia'a yajmädoxyhaty coo jäya'ay yaghijxø'øgyii, ja'a wiinds tøø miaaxhuunghatiäbä, høxtä jäda'anäbaady. ³³ Coo jaaya'ay häxøpy quia'a Diosquexiä, cab jaaya'ay cu yajcähxø'øcy hoy-yagjuøøñäbä.

³⁴ Mānitā mähdiøjc yhojjä:

—Nejt̃, xyajñähixø'øwaamb højts miičhä. Pojpatuum cädieedium miičh tøø mmaaxhuunghaty.

Mānitā mähdiøjc je'e yajpādsøma tsajtøgooty.

³⁵ Mānitā Jesús miädoyhajty coo ja'a mähdiøjc hānajt̃y tøø yajpādsømyii tsajtøgooty. Mānitā Jesús ja'a mähdiøjc yhøxtaayy. Mānit̃ jiaančh paaty. Mānitā Jesús miānaañ:

—Nejt̃, mmäbøjcäp ja'a miädia'agy, ja'a Dios tøø quiexiäbä.

³⁶ Mānitā mähdiøjc yhadsooyy:

—Wiindsón, pøn jaduhñ mnänøømby. Høøch hawáanác nébiøch ja'a miädia'agy nmäbójcät.

³⁷ Mänitá Jesús miänaañ:

—Tøø je'e mhixy. Høøch je'e.

³⁸ Mänitá mähdiojc miänaañ:

—Wiindsón, mäbójpøch.

Mänitá Jesús wyiinjjcädaacä, wyiingudsähgøøyyä.

³⁹ Mänitá Jesús miänaañ:

—Páadyhøch yaa tøø ngäda'agy hädaa yaabä naaxwiin neby hajxy jaduhñ yhijsó'øgät, ja'a hajxy hijpä nebiä wiindspän; møød neby hajxy jaduhñ wyiindsó'øwät, ja'a hajxy hijpä nebiä hijxpän.

⁴⁰ Jimä fariseoshajxy hänäjty näje'e tiäna'ay maa Jesús hänäjty mädooyän. Coø hajxy jaduhñ miädooy nebiä Jesús miänaañän, mänitá Jesús hajxy ñämaayy:

—Nej, mmänaamb miich jaduhñä coø højts jaduhñ nhijpä nebiä wiindspän.

⁴¹ Mänitá Jesús yhadsooyy:

—Coø hajxy häxøpy mhity nebiä wiindspän, cabä pojpä cädieey hajxy häxøpy mhixyhaty. Pero coø hajxy jaduhñ mmäna'añ coø hajxy mhity nebiä hijxpän, paadiä mbojpä ja'a mgädieey hajxy xquia'a nähwa'ächñä.

10

¹ Mänitá Jesús miänáangombä:

—Chaads mijts tehñ tiøyhajt nnämä'awät: cabä mee'tspähajxy jiiby tiägø'øwø'øyy maa ja'a meegcuraahaawän. Wiingtuum hajxy je'e tiägø'øwø'øyy maa ja'a curaahaaw quia'a hitiän. ² Pero ja'a cumeeg, je'eds jiiby tägø'øwøøby maa ja'a curaahaawän. ³ Yajtägøøby ja'a curaagüendähajpä ja'a cumeeg jiiby curaajooty. Coø hänäjty mieeg-møjya'axa'añ, mänitá mieeg quiøxy xøøguya'axy. Yo'mädooby ja'a meeg ja'a wyiindsón hajxy. Mänitá cumeeg yhøxwoobädsømy. ⁴ Coø ja'a meeghajxy hänäjty tøø piädsømy, mänitá wyiindsón hajxy øjx piadu'ubøcy. Paady hajxy jaduhñ piadu'ubøcy coø ja'a wyiindsón hajxy yo'mädooy. ⁵ Cabä wiingjäya'ay hajxy pianøcxa'añ. Coø wiingjäya'ay hajxy yo'mädooy, øjx hajxy chähgø'øbäyø'øgy.

⁶ Ja'a Jesús, yajmäbaadyhaam hänäjty miädia'agy; pero cabä miädia'agy hänäjty wyiinjuøøyyäxä.

⁷ Mänitá Jesús miänáangumbä:

—Chaads mijts tehñ tøyhajt nnämä'awät: Øøch, jaduhñ mäwíinhøch nebiä curaahaawän maa ja'a meeghajxy tiägø'øwø'øyyän. ⁸ Cahnøch hänäjty nmech, tøø jäya'ayhajxy hänäjty may miech høhndaacpä. Jaduhñ hajxy ñibiäda'agyii nebiä Diosquexypän. Jaduhñ mäwíinäts hajxy miäbaady nebiä meegmee'tspän. Pero cabä miädia'agyhajxy miäbójcäxä. Jaaya'ayädshajxy jaduhñ ca'a mäbøjc, pønjätyhøch nmädia'agy xmiäbójcäp. Jaduhñ mäwíinäts hajxy je'e miäbaatpä nebiä meeg mädi-a'agymiäbøjpän. ⁹ Ja'a meeghajxy, jii hajxy je'e tiägø'øwø'øyy maa ja'a curaahaawän. Høøch, jaduhñ mäwíinhøch nebiä curaahaawän. Pøñhøch ja'a nmädia'agy xmiäbójcäp, je'e ch ngüendähadaamby.

¹⁰ 'Ja'a hajxy jäya'awyiinhøhmbä, Diosmädiá'aguiäc tyijy hajxy je'e yajwa'xyp. Yhamdsoo copcooty ja'a mädia'agy hajxy hänäjty yajpädsømy. Pero høøch, páadyhøch tøø ngäda'agy hädaa yaabä naaxwiin nebiä jäya'ayhajxy jaduhñ jim ñøcxät tsajpootyp, neby hajxy jaduhñ jim yhidät øjxta'axiøø. ¹¹ Ja'a cumeeg, cwieendähajpy ja'a mieeg je'e. Jaduhñ mäwíinhøch je'e, ngüendähadäämbiøch ja'a ch nmädia'agy hajxy xmiäbójcäbä. Jaaya'ay ja'a meeg jaan ch tehñ chojpä, høxtä ñähho'tú'udäp ja'a mieeg. ¹²⁻¹³ Ja'a moonsähajxy, cabä meeg hajxy tu'joot cwieendähaty. Paady hajxy je'e tu'joot quia'a cueendähaty, coø hajxy je'e quia'a yhamdsoo je'ejä. Mäjuy hajxy je'e jia cuduñ. Coø ja'a pahuc miech meegtsu'tspä, mänitá moonsähajxy piäyø'øgy. Mänitá meeg mähdiojc-hajxy ñä'ägä machii. Mänit hajxy chähgø'øbäyø'øgy.

¹⁴⁻¹⁵ 'Pero høøch, jaduhñ mäwíinhøch nebiä jäya'ay meeg hajxy jaançh tehñ chojpän. Xyhiyxhájpøch ja'a nDeedy, y nhixyhájpøch je'ebä. Jaanä jaduhñds je'e, jaanä nhixyhájpøch pønjátyhøch nmädia'agy hajxy xmiäbójcäp. Nnähho'tu'udáambiøch hajxy je'e. ¹⁶ Jaanä xmiäbøgáanäbøch ja'a nmädia'agy hajxy, ja'a jäya'ayhajxy tsánaabiä wiinghagajpt. Tu'ugmädia'agy hajxy yhida'añ møød hädaa jäya'ayhajxy yaabä. Tu'cuhdújhøch ja'a nmädia'agy hajxy xmiäbøgáanä nägøxiä.

¹⁷ 'Páadyhøch ja'a nDeedy xchocy cooçh jaduhñ nmäna'añ cooçh häna'c ween xyagho'ogy nébiøch jaduhñ njujypiógät jadähooc. ¹⁸ Høøch, hamdsooçh nmäna'añ cooçhä jäya'ay xyaghó'ogät. Cooçh häxøpy nga'a mänaambä, cábøçhä jäya'ay häxøpy xyagho'oga'añ. Nmóødhøch cuhdujt cooçh nhó'ogät; y nmóødhøch cuhdujt cooçh njujypiógät jadähooc. Páadyhøch ja'a nDeedy tøø xwyiinguexy cooçh nhó'ogät, cooçh njujypiógät.

¹⁹ Coe Jesús jaduhñ miädiaacy, paadiä judíoshajxy tu'ugmädia'agy quia'a nibiaatä. ²⁰ Mänit hajxy nämay miänaañ:

—Møjcu'uda'a miøød. Cuhmäñøøbiäda'a jaduhñ. Tii yø'ø miädia'agy hajxy coo mmädowaanä.

²¹ Mänit hajxy näje'e miänaañ:

—Cabä møjcu'umøødpä jaduhñ miädiá'agät. Cabä møjcu'u ja'a wiindspä jaduhñ yaghixó'ogät.

²² Jájtäbä xøø hänäjty jim Jerusalén, ja'a xøhajpä ja'a Dedicación. Tøøchpojooty hänäjty. ²³ Jiibiä Jesús hänäjty wiädity tsajtøgooty, jiiby maa ja'a tøjwiingän, ja'a xøhajpä Salomón. ²⁴ Mänitä judíoshajxy jim yhamugøøyy maa Jesús hänäjty wiäditiän. Mänitä Jesús nämaayä:

—Mänaa højts xyhawaanaanä pø tøyhajt mMesíashaty.

²⁵ Mänitä Jesús yhadsooyy:

—Tøøds mijts nja hawáanäm, pero cab hajxy mmäbøjcy. Cooçh jaduhñ ngudiuñ nébiøch ja'a nDeedy tøø xyhane'emiän, cähxó'pøch jaduhñ cooçh nGristohaty. ²⁶ Pero, cooçh mijts ja'a nmädia'agy hajxy xquia'a panøcxä, páadyhøch ja'a nmädia'agy hajxy xquia'a mäbøgáanä. ²⁷ Nhixyhájpøch pønñhøch ja'a nmädia'agy xmiäbójcäp; je'eçh ja'a nmädia'agy xpianócxäp. ²⁸ Nyajnøcxáambiøch hajxy jim tsajpootyp. Jim hajxy yhida'añ cøjxta'axiøø. Cáboch hajxy je'e pøn xpiójcät. ²⁹ Miøødhøch ja'a nDeedy ja'a mäjaa. Cabä pøn ja'a mäjaa jaduhñ miøødä nébiøch ja'a nDeedy miøødän. Ja'a nDéedyhøch jaduhñ tøø miäna'añ cooçh jaaya'ay ja'a nmädia'agy hajxy xmiäbójcät. Cáboch ja'a nDeedy jaaya'ayhajxy mänaa piøgáanaxä. ³⁰ Høøch móødhøch ja'a nDeedy, tu'ugmädia'agy højts nhity.

³¹ Mänitä judíoshajxy tiägøøguiombä tsaagonø'pä. Jesús hajxy hänäjty quia'ad-saamby. ³² Mänitä Jesús ja'a judíos nämaayy:

—Madiú'ujøch ja'a hoybä tøø ngudiuñ nébiøch ja'a nDeedy tøø xyhane'emiän. Tiiguiøxpøch mijts coo xquia'adsa'añ.

³³ Mänit hajxy yhadsooyy:

—Paady højts miich nga'adsa'añ coo Dios haxøøg mnänømy, coo mnibiäda'agyii nebiä Diosän; ca'a jie'eguiøxpä coo hodiunng jaduhñ tøø mduñ.

³⁴ Mänitä Jesús yhadsooyy:

—Jiiby jaduhñ myiñ maa mijts mguhdujtän coo Dios jaduhñ miänaañ: “Mdioshajp hajxy.” ³⁵ Tøyhajt ja'a Diosmädia'agy jaduhñ nä'ägädä mädia'agy. Jaduhñ miäna'añ cooc hajxy jaduhñ dyioshaty, ja'a jäya'ayhajxy tøø wyiingpóquiäbä ja'a Diosmädia'agy. ³⁶ Hoorä, Díøshøch tøø xquiunuu'xy tøø xpiäda'agy. Yaaçh tøø xquiexy hädaa yaabä naaxwiin. Cáboch Dios tøø nwiingapxpety cooçh nmänaañ cooçhä Dios xyHuunghaty. Tøyhájthøch jaduhñ xyHuunghaty. ³⁷ Cooçh häxøpy nga'a tuñ nébiøch ja'a nDeedy tiuñän, cábøçhä nmädia'agy hajxy häxøpy xmiäbøjcä. ³⁸ Pero jaançh túumbøch jaduhñ. Mmäbögäp hajxy jaduhñ cooçhä Dios tøø xquiexy, hóyhøçhä nmädia'agy hajxy xquia'a ja mäbøjcä. Jaduhñds hajxy mnajuøñät coo højts tu'ugjäya'ay nhity móødhøçhä nDeedy.

³⁹ Mänitä Jesús jia madsáanägumbä. Pero cabä ñä'ä yajmajch.

⁴⁰ Mänitä miøjnøønájxcumbä ja'a Jordángpä møjnøøbä maa ja'a Juan miäyajnäbejtso-hñän. ⁴¹ Mänitä Jesús hajxy ñämejch nämay. Mänit hajxy miänaañ:

—Cabä Juan ja'a hoy-yagjuøøñäbäjaty ñä'ä yajcähxø'cy. Pero tøyhajt jaduhñ cøxiä nebiä Juan yø'øya'ay tøø ñägapxiän.

⁴² Mänitä Jesús ja'a miädia'agy hajxy jim miäbøjcä nämay.

11

¹ Tu'ug jäya'ay hänajty xiøhaty Lázaro. Tøø hänajty pia'ambety. Jim hänajty chäna'ay Betania møødä piuhdo'oxyhajxy, ja'a María møødä Marta. ² Cahnä hänajty yhabaady mänaa María ja'a Jesús ja'a perfume hänajty yajtecytia'xø'øwa'añ, mänaa María ja'a Jesús hänajty tiecymie'exa'añ ja'a quiuhwaayhaam. ³ Coo Lázaro hänajty tøø pia'ambety, mänitä piuhdo'oxy ja'a capxy hajxy quiejxy maa Jesúsän coogä Lázaro tøø pia'ambety. Jesús ja'a miägu'ughajpä hänajty je'e. ⁴ Coo Jesús ja'a mädia'agy jaduhñ miädooyy, mänit miänaañ:

—Cabä mähdiøjc tiehm yho'oga'añ. Paady tøø pia'ambety neby jaduhñ quiähxø'øgät coo Dios miøjjä jiaančhä, neby jaduhñ quiähxø'øgät cooch nmøjjä njaančhä. Diøshøch xyHuunghajp.

⁵ Hoy ja'a Jesús hänajty jia jaančh tehñ miøødnijootpaadyii ja'a Lázarahajxy, ⁶ mejtsxøø jim jiaag hijty maa hänajty ñä'ägä hitiän. ⁷ Mänitä Jesús ja'a jiamiøød ñämaayy:

—Jamds hajxy jadähooc Judea.

⁸ Mänitä Jesús hajxy ñämaayy:

—Wiindsøn, cahnä jiegø'øy mänaa ja'a judíoshajxy xjia cuhga'adsa'añän. Tii jim coo mnøcxtägatsa'añ.

⁹⁻¹⁰ Mänitä Jesús yhadsooyy:

—Ja'a Diostuung hajxy tuumbä, coo ja'a tiuunghajxy je'e quia'a maynä, cahnä hajxy je'e yho'oga'añ. Jaduhñ mäwiinäts hajxy je'e nebiä xøømbä tiu'uyo'oyän. Cab hajxy je'e quiuhnepy. Hoy hajxy je'e yhixy.

¹¹ Mänitä miänáangombä:

—Tøø højts nmägu'ughajpä Lázaro miaahó'cäm. Nøcxáambøch cham nyuxa'añ.

¹² Mänitä jiamiøødhajxy miänaañ:

—Pero, wiindsøn, pø nä'ä maaho'c jaduhñ, møcpøjtägatsaambäda'a jaduhñ, cabä.

¹³ Coo Jesús jaduhñ miänaañ cooc Lázaro miaaho'cy, jaduhñ hänajty miäna'anaañ cooc tøø yho'ogy. Pero cabä jiamiøødhajxy jaduhñ wyiinjuøøyy coo Lázaro tøø yho'ogy. Jaduhñ hajxy wyiinjuøøyy coo tøø miaaho'ogy. ¹⁴ Mänitä Jesús howyiinjuøøñä tiehm ñägapxnä:

—Tøø ja'a Lázaro yho'ogy. ¹⁵ Xoondáacpøch jaduhñ cooch hänajty nga'a jimä. Coo hajxy jaduhñ mhixa'añ nébiøch nduna'añän, mänitøch mijts ja'a nmädia'agy xmiaas mabøgaanä. Páadyhøch jaduhñ nxoonäda'agy. Jamds hajxy jim maa Lázarän.

¹⁶ Tu'ugä Jesús ja'a jiamiøød hänajty xiøhaty Tomás, ja'a hajxy hänajty ñänøømbiä hametsc-huung. Mänitä Tomás ñämaayy ja'a jiamiøødhajxy:

—Jamxä Jesús hajxy møødhó'cäm.

¹⁷ Coo hajxy jim miejch Betania, mänitä Jesús yhawáanäxä coo ja'a Lázaro hänajty jiiby tøø yhity mädaaxxøø jutjooty maa cabäsaantän. ¹⁸ Mäwiingón Betania hänajty jim Jerusalén. Jaduhñda'a jiäguema, mejtskilómetro ja cupcäda'a. ¹⁹ Nämay ja'a judíoshajxy hänajty tøø ñämech ja'a Marta møødä María. Capxmøcpøgáanäp hajxy hänajty coo ja'a piuhya'ayhajxy hänajty tøø yho'ogy. ²⁰ Coo ja'a Marta jaduhñ miädooyhajty coo Jesús hänajty miäwiingoñ, mänit hoy jiojcubaadø'øy. Pero María, jiiby miähmøøyy maa ja'a tiøgootyhajxiän. ²¹ Mänitä Marta ja'a Jesús ñämaayy:

—Wiindsøn, coo häxøpy myaajä, cábøchä nbuhya'ay häxøpy tøø yho'ogy.

²² Nnajuøøbiøch jaduhñ, hoytyijä Dios mmäyujwá'anät, xmió'owäp je'e.

²³ Mänitä Jesús ja'a Marta ñämaayy:

—Jujypioḡaambä mbuhya'ay.

²⁴ Mänitä Marta miänaañ:

—Nnajuóobiöch coo jujypioḡa'añ coo ja'a naaxwiimbä hánajty wyiimbida'añ, coo hajxy nägøxiä njujypioḡaanäm.

²⁵⁻²⁶ Mänitä Jesús miänaañ:

—Nyagjujypioḡaambiöch hajxy je'e pønjátyhöch ja'a nmädia'agy xmiäböjçäp. Nya-jnøcxáambiöch hajxy je'e jim tsajpootyp, hoy hajxy hánajty jia jujcyñä, hoy hajxy hánajty tøø jia ho'ogy. Nejy, mmäböjpy jaduhñä.

²⁷ Mänitä Marta miänaañ:

—Wiindsón, nmäböjpiöch coo miičh ja'a Dios xyHuunghaty, coo mMesíashaty, coo miičh ja'a Dios tøø xquiexy hädaa yaabä naaxwiin.

²⁸ Mänitä Marta ja'a piuhdo'oxy hamee'ch hoy ñäma'ay:

—Tøø ja'a nWiindsónhájtäm miéjtsäm. Miičh xyajtøøb.

²⁹ Coo ja'a María miädooyy, mänitiä tiänaayyø'cy. Mänitä María ja'a Jesús ñänøcxy.

³⁰ Jimä Jesús hánajty tøø miähmø'øy maa ja'a Marta hánajty hoy tøø miøødmädia'aguiän. Cahnä Jesús hánajty quiajptägø'øy. ³¹ Ja'a judíoshajxy hánajty jiiby maa ja'a María tiøgootyhajxiän, coo hajxy yhiixy coo María tiänaayyø'cy, coo tiøjpädsøømy, mänitiä María hajxy piadøjpädsøømy. Jim tyijy María hánajty ñøcxy cabäsaantä jøøbiä xuu'tspä.

³² Coo ja'a María jim miejch maa ja'a Jesús hánajty tøø miähmø'øyän, mänitiä Jesús yhiixy. Mänitä María ja'a Jesús wyiinjjçädaacy. Mänitä María miänaañ:

—Wiindsón, coo miičh häxøpy myaajä, cáböçhä nbuhya'ay häxøpy tøø yho'ogy.

³³ Coo Jesús jaduhñ yhiixy coo María hánajty jio'øy møødä judíoshajxy, ja'a hánajty tøø piamečhíjábä, mänitiä Jesús jiootmabiøjcy. ³⁴ Mänit miänaañ:

—Maa hajxy tøø myajnaaxtägø'øy.

Mänitiä Jesús ñämaayyä:

—Wiindsón, jam nyajñähixø'øy.

³⁵ Mänitiä Jesús jioøyy. ³⁶ Mänitiä judíoshajxy miänaañ:

—Høxtahm̄ds jio'øy coo Lázaro hijty jiaančh teh̄m miøødnijiootpaadyii.

³⁷ Mänit hajxy näje'e miänaañ:

—Tisän yø'øya'ay ja'a Lázaro coo quia'a yajmøcpøjcy. Tøø yø'øya'ay ja'a wiindspä yaghixø'øgy, túhmäts.

³⁸ Mänitiä Jesús jiootmabiøjcombä. Mänit jim ñøcxy maa ja'a naaxjutän maa ja'a Lázaro hánajty tøø ñaaxtägø'øyän. Jimä tsa'a ja'a jut hánajty yhadäguec-haty. ³⁹ Mänitiä Jesús ñämaayy ja'a hajxy hánajty jim tänaabiä juthaguum:

—Hadäguejtu'ud yø'ø jut hajxy.

Jimä cuhäyohnd hánajty tiänaabiä, ja'a Martahajpä. Mänitiä Marta ja'a Jesús ñämaayy:

—Wiindsón, pero mädaaxxøø jiiby tøø yhity jutjooty. Haxøøgxuu'päda'a yø'øjän.

⁴⁰ Mänitiä Jesús ja'a Marta ñämaayy:

—Tøøch miičh nhawáañäm, coo mmäböçgät, mänit mhíxät coo Dios miøjjä jiaančhä.

⁴¹ Mänitiä jut hajxy jiaančh yhadäguejtuuty. Mänitiä Jesús chajhee'py. Mänit miänaañ:

—Teedy, Dioscujú'uyäp cooçh miičh ja'a nmädia'agy tøø xmiädoowa. ⁴² Nnajuóobiöch jaduhñ cooçh miičh ja'a nmädia'agy hoymiänaajä xmiädoowa. Páadyhöch miičh tøø nnäma'ay “Dioscujú'uyäp” neby hajxy miäböçgät cooçh miičh tøø xquiexy, yø'øya'ayhajxy xii tänaabiä.

⁴³ Mänitiä Jesús møc yaaxy:

—¡Lázaro, pädsómäts!

⁴⁴ Mänitiä Lázaro jiaančh pädsøømy, ja'a hánajty tøø yhö'oguiäbä. Nähbity nähmoch piädsøømy. Mänitiä Jesús ñämaayy ja'a hajxy hánajty jim tänaabiä:

—Nähbijtu'ud yø'ø hajxy. Ween ñøcxy maa ja'a tiøjcän.

Mänitiä Lázaro hajxy jiaančh nähbijtuuty. Mänit ñøcxy maa ja'a tiøjcän.

⁴⁵ Mänitiä Jesús ja'a miädia'agy miäböçcäxä nämay ja'a judíoshajxy, ja'a María hajxy hánajty tøø miøødhítiäbä maa ja'a tiøjc-hajxiän, ja'a hajxy hánajty tøø yhíxiäbä coo ja'a

Jesús ja'a ho'ogyjiäya'ay yagjujyipiøjcy. ⁴⁶ Pero cab judíos hajxy näje'e miäbøjcy. Paady ja'a fariseos hajxy hoy yhawaanä nebiä Jesús hänajty tøø tiuñ. ⁴⁷ Mänitä teedywiindsøn hajxy yhamugøøyy møødä fariseoshajxy møødä tuungmøødpähajxy. Mänit hajxy ñiñämaayyä:

—Neby hajxy nwiinmahñdyháltämät. Madiu'u jaaya'ay ja'a hoy-yagjuøøñäbäjaty tøø yajcähxø'øgy. ⁴⁸ Coø hajxy nga'a májtsämät, mänitä miädia'agy miäbøgáanäxä nägøxiä. Minaambä romano jäya'ayhajxy ja'a møjcuहुdujtmøødpä. Mänitä ndsajtøjc hajxy xyajma'adäänäm. Mänitä nguhdujt hajxy xpiøgáanäm.

⁴⁹ Caifás ja'a teedywiindsøn hänajty xiøhaty ja'a møjcuहुdujtmøødpä. Mänit miänaañ:

—Cab hajxy tii mjaty mnajuø'øy. ⁵⁰ Cab hajxy mwiinjuø'øy coø maas hoy hit jaduhñ coø ja'a cu'ug tu'jäya'ay xñähho'túutämät. Cab hajxy jaduhñ nägøxiä nguhdägøoyämät.

⁵¹ Ca'a Quiaifás ja'a yhamdsoo wiinmahñdy jaduhñ. Pero coø hänajty tiuñ teedywiindsøn møjcuहुdujtmøødpä, paadiä Dios ja'a Caifás jaduhñ yajnägäpaxxy coø ja'a Jesús ja'a judíos hänajty ñähho'tu'uda'añ, ⁵² møød hajxy nägøxiä, ja'a Dios hänajty tøø wyiimbíyyäbä, ja'a wiinghagajptjatypä. ⁵³ Mänitä møjcuहुdujtmøødpähajxy quiojyquiapxyhajtjy coø Jesús hajxy hänajty yagho'oga'añ.

⁵⁴ Paadiä Jesús hänajty jim quia'a wäditaannä mayjiäya'ayhagujc maa ja'a Israelpähaxiän. Mänitä Jesús hajxy jim chohñ jim Judea, ñøcxy hajxy jim maa ja'a cajpt jaduhñ xiøhatiän Efraín. Jimä Jesús hajxy miähmøøyy møødä jiamiøødhajxy. Mäwiingón ja'a cajpt hänajty tøødsnähgäp.

⁵⁵ Habaadäänäp ja'a pascuaxøø hänajty, ja'a judíoshajxy yagiáltäbä. Nämäy hajxy jim ñøcxy xøøhajpä jim Jerusalén, ja'a hajxy jim tsohmä maa ja'a cajpthuungän. Cahnä xøø hänajty jim chohnda'agy coø hajxy jim quioo'ty. Jayøjp hajxy hänajty yhuuc tsi'iwa'añ. Jaduhñäc tyijy hajxy hänajty ñähwa'adsa'añ ja'a piojpä quiädieey. ⁵⁶ Jiibiä Israelpäjäya'ay ja'a Jesús hajxy hänajty yajcopcø'øy tsajtøgooty. Jiiby hajxy hänajty ñimiäyajtøyii:

—Nej, cabä Jesúsäda'a miedsa'añ xøøhájpjä.

⁵⁷ Tøø ja'a teedywiindsøn hajxy hänajty yhane'emy møødä fariseoshajxy, coø Jesús pøn yhíxät, mänit hajxy ñägäpxät, nebiä Jesús hajxy jaduhñ miädsät.

12

¹ Ja tädujxøø ja'a pascuaxøø hänajty quia'a habaady. Mänitä Jesús jim ñøcxy Betania, maa Lázaro hänajty chäna'ayän, ja'a Jesús hänajty tøø yagjujyipiøquiäbä coø hänajty tøø yho'ogy. ² Nämäyyä jäya'ayhajxy jiiby yhamugøøyy tsuugaabiä ja'a Jesús cøxpä. Ja'a Marta hänajty txyhabøgøøby. Jiibiä Lázaro ja'a Jesús hänajty miøødtsuugay tøgooty. ³ Mänitä María ja'a perfume quionmejch cuplitro. Haagä nardopøjy ja'a perfume hänajty ja'a tsowjatypä. Mänitä María ja'a Jesús yajtecytia'xøøyy ja'a perfume. Mänitä María ja'a Jesús tiecymieexy quiuhwaayhaam. Mänitä perfume tiägøøyy pu'xø'pä tøgooty. ⁴ Jiibiä Judas hänajty, ja'a Simón Iscariote yhuung. Jesús ja'a jiamiøød hänajty je'ebä. Je'edsä Jesús hänajty yegaamb coø hänajty yajcø'ødägø'øwa'añii maa ja'a soldadohajxiän. Mänitä Judas miänaañ:

⁵ —Maas hoy hijty coø yø'ø perfume cu ndóo'cäm nebiä häyoobädøjc ja'a xädø'øñ cu nnä'a móoyyäm.

⁶ Pero cabä Judas ja'a häyoobädøjc hänajty ñä'ägädä näxuuch. Je'e ja'a xädø'øñ hänajty yajconwädíjtäp. Pero hamdsoo hänajty wyl'i yajpädsømy. Paady jaduhñ miänaañ coø ja'a perfume hajxy cu tíooc'y nebiä xädø'øñ jaduhñ miéedsät. ⁷ Mänitä Jesús ja'a Judas ñämaayy:

—Ween yø'ø to'oxiøjc yhity. Ca'a waamb mnäma'ay. Ween yø'ø perfume yaghity høxtä cóonøch nhó'ogät. Mänitøch yø'ø perfume xyajnähjáaxät. ⁸ Hoymiänaajä mijts ja'a häyoobädøjc xmiøødhida'añ. Pero høøch, cábøch mijts hajxy jejcy nmøødhida'añ.

⁹ Nämayyä Israelpä jäya'ayhajxy miädoyhajty coogä Jesús hänajty jim tøø miech Beta-nia. Mänitä Jesús hajxy hoy yhixy møødä Lázaro, ja'a Jesús hänajty tøø yagjujypióquiäbä. ¹⁰⁻¹¹ Coø Jesús ja'a Lázaro hänajty tøø yagjujypiøcy, paadiä Israelpä jäya'ay ja'a Jesús hajxy hänajty tøø piadu'ubøcy nämay. Y paadiä Jesús ja'a miädia'agy hajxy hänajty tøø miäbøjcäxä nämay. Coø ja'a teedywiindsøn ja'a miädia'agyhajxy hänajty quia'a jaty panøcxäxä, paady hajxy quiojyquiapxytiuuñ coø ja'a Lázaro hajxy ween yagho'ogy nebiä Jesús hajxy hänajty yagho'oga'añän.

¹² Nämayyä jäya'ayhajxy hänajty jim tøø miech Jerusalén pascuaxøøhajpä. Cujaboom hajxy miädoyhajty coø ja'a Jesús hänajty miedsa'añ cajptooty. ¹³ Mänitä xi'iwhaay hajxy hoy piuxy. Mänitä Jesús hajxy hoy jiojcubaadø'oy xi'iwhaaguiap. Yáaxäp ja'a Jesús hajxy hänajty ñänøcxy:

— ¡Viva Jesús! Tsøc yø'øya'ay hajxy wiingudsähgøøyyäm, yø'ø Dios tøø quiéxiäbä. Paadiä Dios tøø quiexy coø hajxy ngobiernähájtämät, højts ja'a Israelpäjäya'ayhájtäm.

¹⁴ Mänitä Jesús ja'a burrohuung tu'ug piaaty. Mänit yajpejty. Jaduhñ jiiby myiñ cujaay maa ja'a Diosmädia'aguiän:

¹⁵ Ca'a hajxy mdsähgø'oy, mijts jim tsänaabiä Jerusalén.

Huug hix hajxy, xiidsä mgobiernähajxy piety burrohuungnähgøxp.

¹⁶ Cabä Jesús ja'a jiamiøødhajxy hänajty ñajuø'oy pøn jaduhñ ñänøømby coø miedsa'añ burrohuungnähgøxp, ja'a Dios quixaambiä. Pero cujecy, coø Jesús hänajty tøø jiuujypiøjnä, coø hänajty tøø ñøcxnä tsajpootyp, mänitä jiamiøødhajxy jiahmiejtstaacnä coø jaduhñ jiaanç miñ cujaay ja'a Jesúscoxpä y coø Jesús hajxy hänajty tøø piuhbety.

¹⁷ Mädiaacp hajxy hänajty neby hajxy hänajty jim tøø yhixy mänaa Jesús ja'a Lázaro jiiby yhøxyaaxpädsømiän tsaajutjooty. Ja'a hajxy hänajty tøø quia'a yhíxiäbä, je'eds hajxy hänajty miøødmädiaacp. ¹⁸ Coø jaduhñ yajmädoyhajty nebiä Jesús ja'a Lázaro hänajty tøø yagjujypiøquiän, paadiä Jesús hajxy hänajty nøcxy jiojcubaadø'oy mayjiäya'ay.

¹⁹ Mänitä fariseoshajxy ñiñämaayyä:

— Nejy yø'øya'ay ndúunämät coø jaduhñ piawädityii nägøxiä.

²⁰ Tøø ja'a ca'a Israelpähajpähajxy hänajty näje'e quioo'pä xøøhajpä. Dioswiingud-sähgøøbiä hajxy hänajty tøø quioody. ²¹ Mänitä Felipe hajxy hoy ñämech. Betsaida Felipe hänajty chooñ jim Galileanaaxooty. Mänitä Felipe ñämaayyä:

— Tsäguhm, maa ja'a Jesús. Je'eds højts nja møødmädia'agaan.

²² Mänitä Felipe ja'a Andrés hoy yhawaanä coogä Jesús hajxy hänajty hoy tøø jia møødmädia'aga'añ. Mänitä Felipe ja'a Jesús hajxy hoy yhawaandägajtsä møødä Andrés.

²³ Mänitä Jesús miänaañ:

— Tøø yhabaady cooçh nhó'ogät. Páadyhøch Dios tøø xquiexy. ²⁴ Chaads mijts tehñ tiøyhajt nnämä'awät, coø jäya'ay ja'a trigo hajxy ñi'iby, mänitä tøømd tyictspädsømy yhaabiädsømy. Coø jaduhñ tyictspädsømät yhaabiädsømät, mänit hoy tiägøøñä yee'pä. Mayø'øb ja'a trigo jaduhñ. Pero coø quia'a tictspädsømät quia'a haabiädsømät, jaduhyä piú'udsät. Cabä miúxät. Cabä trigo miayø'øwät. ²⁵ Pønjátyhøchä nmädia'agy xquia'a mabøgaanä, cab hajxy jim ñøcxät tsajpootyp. Páadyhøchä nmädia'agy hajxy xquia'a mabøgaanä coø hajxy chähgø'oy coø hajxy yagho'oga'añii. Pønjátyhøchä nmädia'agy xmiäbøjcäp, je'eds hajxy jim nøcxaamb tsajpootyp, hoy hajxy jia yagho'ogyii ja'a høøchcøxpä. ²⁶ Pø xWyiindsønhadáambøch hajxy je'e, wéenhøchä nmädia'agy hajxy xpianøcxä. Nwowhídäbøch hajxy je'e. NDéedyhøch päda'agaamb coø hajxy wyiingud-sähgø'øwøød wiingjäya'aybä.

²⁷ Jootmayhájpøch cham. Cab jaduhñ yhahixø'oy cooçhä nDeedy nnämä'awät ween xyajtso'ogy cooçh hänajty yaa nho'oga'añ hädaa yaabä naaxwiin. Páadyhøch yaa tøø ngäda'agy cooçh yaa nhó'ogät. ²⁸ Teedy, yajcähxø'og ja'a mmäjaa.

Mänitä Dios jim yhadsooy tsajpootyp:

— Tøøch tähooc nyajcähxø'ogy. Nyajcähxø'ogáambiøch jadähooc.

²⁹ Ja'a hajxy hānajtj jim tanaabiä nämay maa ja'a Jesús ja'a wyiinduumän, jia mädoow hajxy, pero cab hajxy wyiinjuøøyy. Näje'e hajxy miānaañ cooc tyijy hänee yaaxy. Näje'e hajxy miānaañ cooc tyijy ja'a Dios ja'a mioonsä jim tsajpootyp tu'ug quiapxy. ³⁰ Mänitä Jesús miānaañ:

—Ca'a yhøøhcøxpä ja'a Dios jaduhñ miānaañ. Paady jaduhñ miānaañ nej mijts mnajuø'øwät cooçh jaduhñ xmiägäpxy. ³¹ Cooçh nhó'ogät, cáboch ja'a møjcu'ugong nyajmäjäda'aga'añ, jaaya'ay hanehmbä hädaa yaabä naaxwiin. Dios jaduhñ mänaamb coo hajxy ween yajcumädooy, ja'a høøchä nmädia'agy hajxy xquia'a mäbøjcäbä. ³² Høøch, cooçh nyajmøjpahbedät cruzcøxp, mänithøchä nmädia'agy hajxy xmiäbøgaanä, ja'a hajxy tsānaabiä wiinduhmyhagajpt.

³³ Paadiä Jesús jaduhñ miānaañ, neby hajxy ñajuø'øwät neby hānajtj yagho'oga'añii.

³⁴ Mänitä Jesús ñāmaayyā:

—Jiiby jaduhñ myiñ maa højts nguhdujtän coo jaaya'ay hānajtj yhane'ema'añ mayjiomøjt, ja'a Dios quiexaambiä, ja'a højts nhahixypä. Pero miich jaduhñ mänaamb coo tsipcøxp ja'a Diosquexypä yajmøjpahbeda'añ cruzcøxp. Pøn miich jaduhñ mnänøømby ja'a Diosquexypä.

³⁵⁻³⁶ Mänitä Jesús miānaañ:

—Cáboch mijts hajxy jecy nmøødhida'añ. Jaduhñ mäwíinhøch mijts ngudøø'xy nebiä jøønän. Mäbøjcägøch ja'a nmädia'agy hajxy, mäduhñtiøch hädaa yaabä naaxwiin nhidät, nébyhøch mijts jaduhñ hoy xpianócäxät, neby hajxy mga'a hidät hagogostuum. Pøn hajxy jaduhñ hijp hagogostuum, tægodiuum hajxy ñä'ägädä hity. Høøch, nøcxāannäbøch. Cáboch ja'a nmädia'agy hajxy xmiädowaanä.

Coo ja'a Jesús jaduhñ miädiacpādøøyy, mänitä tiu'ubøjnä. Mänit ñiguiu'tsä.

³⁷ Cabä Jesús ja'a miädia'agy hānajtj miäbøgāanäxä, hoy hānajtj madiu'u hoy-yagjuøøñajaty tøø jia yajcähxø'øgy. ³⁸ Paady hajxy hānajtj quia'a mäbøga'añ nebiä profeta Isaías ja'a miädia'agy jaduhñ tiøjiädät, nebiä jecy quiujahyyän: Dios, cab højts ja'a nmädia'agy pøn tøø xmiäbøjcä.

Tøø ja'a mmäjaa mja yajcähxø'øgy, pero cab hajxy tøø xmiøjpäda'agy. ³⁹ Cabä Jesús ja'a miädia'agy miäbøgāanäxä nebiä Isaías wiingtuum quiujahyyän:

⁴⁰ Tøø ja'a Dios miāna'añ:

Tøøchä quiopc-hajxy nyajxexä nébyhøchä nmädia'agy hajxy xquia'a wiinjuøøyyät, nebiä yhaxøøgwiinmahñdy hajxy quia'a najtshixø'øwät.

Cáboch ja'a piojpä quiädieey hajxy nyajnähwäatsät.

⁴¹ Jaduhñä Isaías jecy quiujahy nebiä Isaías ja'a Jesús hānajtj tøø yhixiän tsajpootyp. Cahnä Jesús hānajtj yaa quiäda'agy hädaa yaabä naaxwiin.

⁴² Siémpräm ja'a Israelpä jäya'ay ja'a Jesús ja'a miädia'agy hajxy miäbøjcä, møødä copc-hajpähajxy nämay. Pero hamee'ch hajxy miäbøjcä. Cabä Jesús hajxy hānajtj quiapxpaady mayjiäya'ayhagujc. Tsähgøøby hajxy hānajtj coo hajxy yajpādsømmøød maa ja'a chajtøjc-hajxiän ja'a fariseoshajxy. ⁴³ Ja'a judfoshajxy, cab hajxy chocy coo hajxy quiumayøød ja'a Dios. Je'e hajxy chojpy coo hajxy ween wyiingudsähgøøyyii ja'a cu'ug.

⁴⁴ Mänitä Jesús møc miānaañ:

—Pønhoch ja'a nmädia'agy xmiäbøjcäp, jaanä xmiäbøjcäbøchä nDeedy ja'a miädia'agy hajxypä, ja'açh yaa tøø xquiéxiäbä hädaa yaabä naaxwiin. ⁴⁵ Pønhoch jaduhñ xyhixp, jaanä xyhixäbøchä nDeedy hajxypä. ⁴⁶ Páadyhøch yaa tøø ngäda'agy hädaa yaabä naaxwiin, neby hajxy quia'a mähmø'øwät hagogostuum pønjátyhøch nmädia'agy hajxy xmiäbøjcäp. Jaduhñ mäwíinhøch ngudøø'xy nebiä jøønän neby hajxy hoy yhixät. ⁴⁷ Ca'a yhøøchä hajxy nyajcumädowaamby, ja'a nmädia'agyhøch hajxy xquia'a mäbøjcäbä, hoy hajxy jaduhñ tøø jia mädooyhaty. Páadyhøch yaa tøø ngäda'agy hädaa yaabä naaxwiin, nébyhøch ja'a jäya'ayhajxy jaduhñ nnähho'tú'udät. Ca'a yhøøchä hajxy je'e nyajcumädowaamby. ⁴⁸ Pønhochä nmädia'agy hajxy xquia'a mäbøjcäp, mänit hajxy quiumädowa'añ coo ja'a naaxwiimbä hānajtj wyiimbida'añ. Paady hajxy

quiumädowa'añ, coočhä nmädia'agy hajxy hänajty tøø xquia'a mäbøjcä. ⁴⁹ Ca'a yhööchä nhamdsoo mädia'agy jaduhñ tøø nyaghity. Ja'a nDéedyhöch, ja'äch tøø xquiéxiäbä, je'ečh jaduhñ tøø xyhane'emy nebiátyhöch nmädiá'agät. ⁵⁰ Hööchä, nmóødhöch ja'a tøyhajt jaduhñ coo hajxy jim yhida'añ tsajpootyp cøjxta'axiøø, pønjátyhöch ja'a nDeedy ja'a miädia'agy mäbøjcäp. Nmädiáacypiøch nébyhöchä nDeedy tøø xyhane'emiän.

13

¹ Mänitä pascuaxøø hänajty tiehm yhadsooyø. Tøø ja'a Jesús hänajty ñajuø'oy coo hänajty tøø yhabaady coo hänajty yaa choonaannä hädaa yaabä naaxwiin, coo hänajty jim ñøcxaannä maa ja'a Tieediän. Choipy ja'a Jesús ja'a jiamiøød hänajty hamuumdu'joot hädaa yaabä naaxwiin.

² Coo ja'a Jesús hajxy hänajty chuugaya'añ, tøø Judas hänajty wyiinmahñdyhaty, ja'a Simón Iscariote yhuung, coo Jesús hänajty yajcø'øwaanø'øwa'añii maa ja'a soldadohaxiän. Ja'a møjcu'ugong ja'a Judas jaduhñ yajwiinmahñdiägooyy. ³ Ñajuøøbiä Jesús hänajty nebiaty ja'a cuhdujt hänajty tøø mio'oyii ja'a Tieedy. Ñajuøøby hänajty coo hänajty jim tøø choon maa ja'a Tieediän, coo hänajty jim ñøcxáangombä jadähooc.

⁴ Coo hajxy hänajty tøø chuugaabiädøøñä, mänitä Jesús tiänaayyø'cy. Mänitä wyit chijy. Mänitä cuhbe'en tu'ug yajnimioxmäguitøoyy. ⁵ Mänitä nøø quidemøoyy palanganajooty. Mänitä Jesús tiägøoyy tecypiujpä ja'a jiamiøød. Coo tiecypiujpädøoyy, mänit tiecymiéexcombä.

⁶ Coo ja'a Jesús ja'a Simón Pedro hänajty tiecypiuja'añ, mänitä Simón Pedro miänaañ:
—Nej, xtiēcypiujaambøch hööchpjä.

⁷ Mänitä Jesús yhadsooyy:

—Miičh, caj miičh mnajuø'oy tiiguiøxpøch miičh coo ndecypiuju. Mänit jaduhñ mnajuø'øwa'añ cooč jaduhñ njädät nhabétät.

⁸ Mänitä Pedro miänaañ:

—Cab jaduhñ yahixø'oy cooč miičh jaduhñ xtiēcypiuját.

Mänitä Jesús yhadsooyy:

—Pø cájtäm miičh myajtecypiuja'añ, cájtämøch miičh hoy xjiamiøødhadaañä.

⁹ Mänitä Simón Pedro miänaañ:

—Bueno, Wiindsøn, cøxiøch jaduhñ xpiujät móødhöchä ndecy, móødhöchä ngø'ø, móødhöchä ngopc.

¹⁰ Mänitä Jesús yhadsooyy:

—Pøn tøø chi'iy, wa'ads ja'a ñi'x ja'a quiopc je'e. Jagoo ja'a tiecy piujät. Mijts, mwa'ads mijts hajxy, pero cab hajxy nägøxiä mwa'adsä.

¹¹ Ñajuøøbiä Jesús hänajty pøn hänajty yajcø'øwaanø'øwáañäp. Paady jaduhñ miänaañ coo tul'jäya'ay hänajty quia'a wa'adsä.

¹² Coo ja'a Jesús cøjx tiecypiujpädø'oy ja'a jiamiøødhajxy, mänitä Jesús wyitpägøøñä. Mänit yhöxtaacnä. Mänit miänaañ:

—Chójpjøchä njoot jaduhñ coo hajxy mnajuø'øwät tiiguiøxpøch mijts coo tøø ndecypiuju. ¹³ Hoy jaduhñ cooč mijts jaduhñ xñäma'ay: “Wiindsøn.” Tøyhájthøch mijts hajxy jaduhñ xWyindsønhaty. ¹⁴ Tøøch mijts hajxy ndecypiuju, hóyhøch Wiindsøn nja tuñ. Jaanä jaduhñ mijtspä, mnidiecypiujøøb hajxy hamiñ haxøpy. ¹⁵ Mbahixäp hajxy jaduhñ nebiátyhöch mijts tøø nduñ. ¹⁶ Chaads mijts tehñ tiøyhajt nnämä'awät, cabä moonsä cuhdujt møc miøødä quejee ja'a wyiindsøn. Jaanä jaduhñ je'ebä ja'a tøø quiexyíjábä, cabä cuhdujt je'e møc miøødäbä quejee ja'a tøø miäguéxiäbä. ¹⁷ Coochä nmädia'agy hajxy xwyiinjuøoyyät, coo hajxy jaduhñ mgudiúnät, jootcuju hajxy jaduhñ mhídät.

¹⁸ 'Cábøch mijts nägøxiä nnägäpaxy. Nnajuøøbiøch pønjátyhöch tøø nwiimbijy. Pero tøjiajpä Diosmädia'agy maa jaduhñ miäna'añän: “Ja'a craäch tu'ugmucy xmiøødcaabiä, tøøch je'e xmiädsibø'oy.” ¹⁹ Jäguémjøch mijts chaa nhawáañäm cooč haxøøg njada'añ nhabeta'añ. Cooch jaduhñ njaančh jädät njaančh habétät, mänit hajxy mhuuc mäbögät coochä Dios tøyhajt tøø xjiaančh quexy. ²⁰ Chaads mijts tehñ tiøyhajt nnämä'awät, pøn

hajxy mägu'ugpøgaamb ja'ačh nguexaambiä, møød høøch jaduhñ xmiägu'ugpøgaambä. Jaanä jaduhñds je'ebä, pøñhöch je'e xmiägu'ugpøgaamb, møødä Dios jaduhñ miägu'ugpøgaambä, ja'ačh tøø xquiéxiäbä.

²¹ Coo ja'a Jesús miädiacpädøøñä, mänit jiootmadiägøøñä. Mänit miänaañ:

—Chaads mijts tehñ tiøyhajt nnämä'awät coöch mijts ja'a mjamiøød tu'ug xyega'añ ho'cøøc.

²² Mänitä jiamiøødhajxy ñiwyyinhee'ppejtä. Cab hajxy hänajty ñajuø'øy pøn ja'a Jesús hänajty jaduhñ ñänøømby. ²³ Jimä Jesús ja'a jiamiøød hänajty yhäña'ay tiehñ ñähmøjc. Jaančh tehñ yhoy ja'a Jesús hänajty miøødñijootpaadyii. ²⁴ Mänitä Simón Pedro ja'a craa miäwø'xy. Mänit hamee'ch ñämaayy:

—Huuc mäyajtøw pøn jaduhñ ñänøømby.

²⁵ Mänitä craa ja'a Jesús tiaatsmägowøøyy. Mänit miäyajtøøyy:

—Pøn jaduhñ mnänøømby.

²⁶ Mänitä Jesús yhadsooyy:

—Nbama'tsnaxáambiøch hädaa tsajcaagyhaguijt. Mänitøch ja'a craa nmo'owa'añ, ja'ačh xyegaambä ho'cøøc.

Mänitä Jesús ja'a tsajcaagyhaguijt jiaančh pama'tsnajxy. Mänitä Judas yajcø'øgonøøyy, ja'a Simón Iscariote yhuung. ²⁷ Tuunä Judas ja'a tsajcaagy ñä'ä coondsooyy, mänitä miøjcu'ujoottägøøyyä. Mänitä Jesús ja'a Judas ñämaayy:

—Tsógäm. Nøcx jatcø'øw ney jmatcø'øwa'añän.

²⁸ Ja'a hajxy hänajty jim caabiä, cab hajxy hänajty ñajuø'øy tiiguiøxpä Jesús jaduhñ coo miänaañ. ²⁹ Näje'e hajxy hänajty wyiinmahñdyhaty coo tyijy ja'a Jesús ja'a Judas hänajty quiey juubiä mädyijaty tyijy hänajty yajtunaamby xøøjooty. Näje'e hajxy hänajty wyiinmahñdyhajtä coo tyijy Jesús ja'a Judas ja'a häyoobäya'ay hänajty yajmo'owa'añ xädø'øñ. Paady hajxy hänajty wyiinmahñdyhaty, coo ja'a Judas ja'a xädø'øñ hänajty yajwijtswädityii. ³⁰ Tuunä Judas ja'a tsajcaagy ñä'ä coondsooyy, mänitä tiøjpädsøømy. Tøø hänajty quioodsøøñä.

³¹ Coo ja'a Judas tiøjpädsøømy, mänitä Jesús miänaañ:

—Tøø yhabaady coöch ngähxø'øga'añ coöch nmøjjä njaančhä. Høøchcøxpä Dios jaduhñ quiähxø'øga'añ coo miøjjä jiaančhä. Dióshøch tøø xwyiinguexy.

³² Nyajcähxø'øgåambiøch ja'a Dios coo miøjjä jiaančhä. Mobädájpøch ja'a Dios xyajcähxø'øgaambä coöch nmøjjä njaančhä. ³³ Mägu'ughajpädøjc, cábøch mijts jejcy nmøødhida'añ. Xjia høxta'awáambiøch mijts, pero cábøch hajxy xpiaada'añ. Chaads mijts hajxy nnämä'awät nébyhøchä Israelpä jäya'ayhajxy tøø nnäma'ayän: Cab hajxy jim hoy mnøcxät maačh nhida'añän. ³⁴ Chaads mijts hajxy ja'a hawiinjemyguiuhdujt nmó'owät coo hajxy hamiñ haxøpy mniçhogøød nébyhøch mijts ndsoquiän. ³⁵ Coo hajxy mniçhogøød mnibia'häyowøød, cähxø'øgäp jaduhñ coöch mijts ja'a nmädia'agy xjiaančh panøcxä. Xyhíäp ja'a jäya'ayhajxy jii nägøxiä.

³⁶ Mänitä Simón Pedro ja'a Jesús miäyajtøøyy:

—Wiindsøn, maa mnøcxa'añ.

Mänitä Jesús yhadsooyy:

—Cábøch miich jadunajtä hoy xpianøcxät maačh nnøcxa'añän. Miiçh, høxhaam miich mnøcxät.

³⁷ Mänitä Pedro ja'a Jesús miäyajtøøgumbä:

—Tiiçh miichäda'a jadunajtä hoy coo nga'a panøcxät. Nnähho'tú'udäbøch miich häyaa.

³⁸ Mänitä Jesús yhadsooyy:

—Jaančhä; cabä ndijy miichäda'a xñähho'tú'udät. Chaads miich jadunajtä nnämä'awät, cahnä tseey hänajty ya'axyñä, tøø miich hänajty tägøøghooc mnijioçgapxyii coöch tyijy miich hänajty xquia'a hixiä.

—Ca'a hajxy mwi'li tiajy mwi'li miay. Mäbøjca ja'a Dios ja'a miädia'agy hajxy, y mäbøjcägøch ja'a nmädia'agy hajxypä. ² Jim tsajpootyp maačhä nDeediän, mayyä tsäna'awøhñdy jim. Coø häxøpy quia'a tøyyä, cab hajxy cu nhawáanäm. Nøcxáambøch ja'a tsäna'awøhñdy nbäda'aga'añ nähix hahixø'ø maa mijts mhídat. ³ Coočh jim nnøcxa'añ, cädaactägatsáambøch jadähóocägumbä. Mänítøch mijts jim ngøxy woonøcxa'añ maačh nhida'añän. Näguipxy hajxy jim nhidáanäm. ⁴ Mnajuøøby hajxy maačh nnøcxa'añ. Jaduhñ hajxy mnajuøøbiä neby hajxy jim mnøcxät.

⁵ Mänitä Tomás ja'a Jesús ñämaayy:

—Wiindsón, pero cab højts nnajuø'øy maa miich mnøcxa'añ. Neby højts jaduhñ jim nnä'ä nøcxät.

⁶ Mänitä Jesús yhadsooyy:

—Jaduhñ mäwíinhøch høøch nebiä tu'ujän. Høøchcøxpä hajxy jim mgooda'añ pønjátyhøch ja'a nmädia'agy xmiäbøjcäp. Høøchcøxpä hajxy jim mhida'añ cøjxta'axiøø. Paady hajxy jim mhida'añ coočhä tøyhajt nyajcähxø'øgy ja'a Dioscøxpä. ⁷ Pønjátyhøch je'e xyhixyhajp, jaanä xyhixyhájtäbøch ja'a nDeedy je'ebä. Tøø hajxy mhixy.

⁸ Pero cab hajxy wyiinjuøøyy waambä Jesús jaduhñ jia mänaañ. Mänitä Felipe ja'a Jesús ñämaayy:

—Wiindsón, ween højts ja'a mDeedy xyhuuc yaghíxät. Mänit højts jootcuyc nmäh-mø'øwät.

⁹ Mänitä Jesús yhadsooyy:

—Felipe, tii jaduhñ coo mmäna'añ. Tøøch miich jejcy xpiawädity. Xyhixyhájpøch miich jaduhñ. Pønch xyhixp, jaanä xyhíxäbøch ja'a nDeedy je'ebä. Tiiich miich jaduhñ coo xñäma'ay coočh mijts ja'a nDeedy nyaghíxät. ¹⁰ Nej, cab jaduhñ mmäbøquiä coočhä nDeedy tu'ugmädia'agy nmøødhity. Ja'a nDéedyhøch miädia'agy, je'ečh jaduhñ nmädiäacäp; ca'a yhøøchä nhamdsoo mädia'agy nmädiäacypy. Ja'a nDéedyhøch ja'a mäjaa jaduhñ xmiooby; je'ečh ja'a tiuung jaduhñ ndúunäp. ¹¹ Mäbøjcägøch ja'a nmädia'agy hajxy coočhä nDeedy jaduhñ tu'ugmädia'agy nmøødhity. Hoy hajxy mwiinjuø'øy mga'a ja wiinjuø'øy, mmäbøgäp hit hajxy jaduhñ. Páadyhøch hit hajxy ja'a nmädia'agy xmiäbøjcät, coočh hoy-yagjuøøñäjatypä nyajcähxø'øgy. ¹² Chaads mijts tehñ tiøyhajt nnämäaguionbä, pønñhøch ja'a nmädia'agy xmiäbøjcäp, jaanä yajcähxø'ø-gaamby je'ebä ja'a hoy-yagjuøøñäjaty. Maas hoy-yagjuøøñäjatypä je'e yajcähxø'øga'añ quejeech nyajcähxø'øgy. Paady jaduhñ yajcähxø'øga'añ coočh jim nnøcxa'añ maačhä nDeediän. ¹³⁻¹⁴ Coø hajxy mmäbøgät coočh ja'a cuhdujt tøyhajt nmøødä, coø hajxy hänäjty tii myujwa'ana'añ, ngudiúnäbøch jaduhñ neby jaduhñ quiähxø'øgät coočhä nDeedy je'eduhñ miøjjä jiaančhä.

¹⁵ 'Pø xchøjppøch mijts, mänítøch mijts ja'a nmädia'agy xquiudiúunät nebiátyhøch mijts tøø nmägapxy tøø nhane'emiän. ¹⁶ Nnämäabiøch ja'a nDeedy coo mijts ja'a jootcapxmøcpøjpä wiingpä xyajnäguéxät, ja'a tømiädiäacpä. Ja'a Dioshespíritu je'e. Cøjxta'axiøø hajxy jaduhñ xmiøødhida'añ. ¹⁷ Pønjaty ja'a Diosmädia'agy ca'a mäbøjp, cabä Dioshespíritu hajxy choga'añ. Cab hajxy mänaa yhixyhada'añ. Pero mijts, mobäda-jpä hajxy je'e mhixyhada'añ. Xmiøødhidáannäp hajxy je'e. Jiiby hajxy mmøødhada'añ mjoodootyhajxy. ¹⁸ Cábøch mijts je'e nnähgue'ega'añ nidiuhñ nämetsc. Cädaactägatsáambøch yaa jadähoc maa mijtsän. ¹⁹ Mejtsxøø tægøøgxøøch ja'a jäya'ayhajxy xjiaag hixa'añ. Cábøch hajxy hänäjty yaa xyhixaannä coočh yaa ndsoonaannä. Coočh cøjxta'axiøø nhida'añ, paady mijts cøjxta'axiøø mhidaambä. ²⁰ Mobäda-jpä hajxy jaduhñ mnajuø'øwa'añ coočhä nDeedy tu'ugmädia'agy nmøødhity. Jaanä tu'ugmädia'agy hajxy jaduhñ nhidáanämbä. ²¹ Pønjátyhøch ja'a nmädia'agy xquiudiúunäp nébiøch tøø nmägapxy tøø nhane'emiän, xchøjppøch je'e. Jaanä ndsojpy højts je'ebä móødhøch ja'a nDeedy. Nyaghixáambiøch ja'a nwiinmahñdy hajxy.

²² Jii Jesús ja'a jiamioød hänäjty tu'ug xiøhaty Judas. Pero ca'a je'e yhIscariote. Mänitä Judas ja'a Jesús miäyajtøøyy:

—Wiindsón, tii højts ja'a mwiinmahñdy coo xyaghixa'añ, pero cabä cu'ughajxy myaghixa'añ.

²³ Mänitä Jesús yhadsooyy:

—Pónhøch xchojp, xquiudiúunäbøch ja'a nmädia'agy je'e. Y chójpiøchä nDeedy je'ebä. Tu'ugmädia'agy højts nmøødhida'añ møødhøch ja'a nDeedy. ²⁴ Pónhøch jaduhñ xquia'a tsojp, cábøchä nmädia'agy xyajtuunä. Ca'a yhøøchä nhamdsoo mädia'agy hädaa, hädaa hajxy nyajmøødmädiaacypiä. Ja'a nDéedyhøch miädia'agy hädaa, ja'açh tøø xquiéxiäbä.

²⁵ 'Mijts, nyajmøødmädiacypiøch mijts jaduhñ mäduhñtiä hajxy yaa nmøødhitiän.

²⁶ Nägóoyyøch nnøcxaannä ndu'ubøgaannä, mänítøch ja'a nDeedy yhEspíritu quiexa'añ maa mijtsän. Je'eçh jaduhñ nguwitshadaamby. Mijts jaduhñ xjiootcapxmøcpøgaamb. Cøxaamb hajxy xyajnáhixø'øwa'añ. Cøxaamb hajxy xyagjahmiejsta'aga'añ nebiátyhøch mijts yaa tøø nyajmøødxi'igy tøø nyajmøødmädia'agy.

²⁷ 'Jootcújc-høch mijts nyajmähmø'øwa'añ. Cab mijtsä cu'ug xyagjootcugø'øwät nébiøch mijts jootcujc tøø nyaghitiän. Ca'a hajxy tii mnädajy mnämay. Ca'a hajxy mdsähgø'øy mdsähdiuñ. ²⁸ Tøøch mijts nhawáanäm cooçh nnøcxa'añ ndu'ubøga'añ. Pero cádaactägatsáambøch jadähooc. Pø xchójpøch mijts tøyhajt, mxoondá'agäp hajxy coo nhawáanäm cooçh jim nnøcxa'añ maaçhä nDeediän. Miaas møødá mäjaa je'e quejeech nmøødá. ²⁹ Tøøch mijts jäguemiä nhawáanäm nébiøch yaa njada'añ hädaa yaabä naaxwiin y cooçh jim nnøcxaannä maaçhä nDeediän. Cooçh jaduhñ njádät, cooçh jim nnøcxät, mänit hajxy mhuuc tehñ miäbøgät.

³⁰ 'Tu'habáquiøch mijts nhuuc jaac møødmädia'agynä. Medsaambä møjcu'ugong, ja'a yaa cu'ughanehmbä; pero cabä cuhdujt miøødá maaçh høøchcøxpän.

³¹ Ngudiunáannäbøch nébiøch ja'a nDeedy tøø xmiägapy tøø xyhane'emiän. Páadyhøch jaduhñ ngudiuna'añ neby jaduhñ quiähxø'øgät cooçhä nDeedy tøyhajt njaançh tsocy. Tänaayyø'øg hajxy. Jam hajxiän.

15

¹ 'Høøch, jaduhñ mäwíinhøch høøch nebiä tsaatyptequiän ja'a tøyhajt pä. Ja'a nDéedyhøch, jaduhñ je'e nebiä cudsatypcamän. ² Ja'a nDéedyhøch, xyhøxpújxäbøch ja'a nhaads mädyii ca'a tøømbejp; pero mädyiids jaduhñ tøømbejp, je'eds jaduhñ weenjaty yhøxpuyxyp, nebiä maas majiaty tiøømbédät. ³ Coo hajxy jaduhñ tøø mmäbøcy nebiátyhøch mijts je'e tøø nyajnáhixø'øyän, jaduhñhøch ja'a nDeedy mijts tøø xyajnáhwa'açh ja'a mhaxøøgwíinmahñdyhajxy. Jaduhñ mäwíinäts je'e nebiä tsaatyp hajxy jiojpuxiän. ⁴ Tehngájnoch ja'a nmädia'agy hajxy xpianøcxät; tehngájnoch mijts nbuhbeda'añ. Ja'a tsaatyphaads, cab je'e tiøømbeda'añ coo ja'a yhøjxä tiecy hánajty quia'a hity. Jaduhñ mäwíinäts mijts pä, pø cábøch ja'a nmädia'agy hajxy tehngajnä xpianøcxaanä, cab hajxy hoy mwädítät.

⁵ 'Høøch, jaduhñ mäwíinhøch høøch nebiä tsaatyptequiän. Høøch mijts jaduhñ nhaadshajpy. Cooçhä nmädia'agy hajxy tehngajnä xpianøcxät, mänit hajxy hoy mwädítät. Nbuhbédäbøch mijts jaduhñ. Cooçh mijts nga'a puhbédät, cab hajxy tii hoy mduna'añ. ⁶ Pónhøchä nmädia'agy xquia'a panøcxäp, jaduhñ mäwíinäts je'e nebiä tsaatyphaads hajxy yhøxpuxiän. Coo jaduhñ tiøøch, mänit hajxy yajpädø'øgy; mänit hajxy ño'ogy.

⁷ 'Cooçhä nmädia'agy hajxy tehngajnä xpianøcxät, coo hajxy mga'a jahdiägóyyät nebiátyhøch mijts tøø nyajnáhixø'øy, ngudiunäbøch jaduhñ mädyiibäjaty mijts xmiäyujwa'anaamb. ⁸ Coo hajxy hoy mwädítät, cähxø'øgäp jaduhñ cooçhä nmädia'agy hajxy tøyhajt xpianøcxä. Jaanä cähxø'øgaamb jaduhmbä cooçhä nDeedy je'e miøjjä jiaançhä. ⁹⁻¹⁰ Nébiøchä nDeedy xchoquiän, jaduhñhøch mijts ndsojpä. Cooçhä nmädia'agy hajxy xyajtuunät, ngumáyäbøch mijts jaduhñ; hoy miänájøch mijts ndsøgät. Jaduhñhøchä nDeedy xchocy cooçhä miädia'agy nyajtuunäbä.

¹¹ Páadyhøch mijts jaduñ nyajmøødxil'igy nyajmøødmädia'agy coo hajxy tehngajnä mxoondá'agät nébiøch nxoonda'aguiän. ¹² Mijts høch jaduñ nmägapxyp nhanehmb y coo hajxy hamiñ haxøpy mniçhogøød mnibia'häyowøød nébiøch mijts ndsoquiän. ¹³ Pøñ jaduñ jaanç tehñ çójcäp, coo hñajty yagho'oga'añii, nähho'tu'udøøb je'e ja'a miägu'ughajpä. ¹⁴ Coo hajxy mgudiünät nebiátyhøch mijts tøø nmägapxy tøø nhane'emy, xmiägu'ughájpøch mijts hñajty jaduñ. ¹⁵ Cábøch mijts nnäma'awaannä "moonsä." Ja'a moonsä, cabä ñajuø'øy tii ja'a wyiindsøn tiuumby. Pero mijts, tøø mijts ngøxy hawáanäm nebiátyhøch ja'a nDeedy je'e tøø xyhawaanä. Páadyhøch mijts nnäma'awaannä "mägu'ughajpä." ¹⁶ Ca'a yhøøch mijts je'e tøø xwyiimbiy; høøch mijts je'e tøø nwiimbiy. Tøøch mijts jaduñ nwiinguexy coo hajxy hoy mwädítät, coo Diosmädia'agy hajxy myajwá'xät, neby hajxy jaduñ mmayó'owät. Weenä Diosmädia'agy hajxy tehngajnä pianøcxpä; ween hajxy hoy wiädijpä. Jadúñhøch mijts nDeedy xmió'owät tijaty mijts hñajty mdsogaamb y, cooçhä nmädia'agy hajxy hñajty xmiäbøjcä. ¹⁷ Chámhøch mijts jadähooc nmägapxy nhane'emy coo hajxy mniçhogøød mnibia'häyowøød hamiñ haxøpy.

¹⁸ 'Mijts, xmiähanhadaamb ja'a tsaan ja'a cu'ug hajxy. Moorä høøch hajxy tøø xmiähanhajpä. ¹⁹ Xmiähanhadaamb mijts je'e, ja'a hajxy haxøøgwädijpä. Paady mijts xmiähanhada'añ coo mijts ja'a haxøøgpä tøø mgøxy najtshixøøñä. Tøø mijts ja'a mbojpä mgädieey nyajnhwáatsäm. Coo mijts häxøpy tøø mga'a najtshixø'øy ja'a haxøøgpä, cu xmiägu'ughajty jäya'ay hajxy may. ²⁰ Huuc jahmiets hajxy neby mijts tøø nnäma'ayän, cabä moonsähajxy quiuhdujtmøød quejee wyiindsøn hajxy. Cooçhä jäya'ayhajxy näje'e xmiädsiphaty, paady mijts hajxy xmiädsiphadaambä. Y cooçhä nmädia'agy hajxy näje'e xmiäbøjcä, paady mijts ja'a mmädia'agy hajxy xmiäbøgåanäbä. ²¹ Høøchcøxpä mijts ja'a cu'ug xmiädsiphada'añ, je'eguiøxpä cooçhä nDeedy hajxy xquia'a hixyhajtä, ja'açh tøø xquiéxiäbä.

²² Tøøch jäya'ay ja'a nmädia'agy hajxy hoy nyajmädoxyaty. Cooçhä nmädia'agy hajxy tøø xquia'a mäbøjcä, paady hajxy quiümädowa'añ. Cooçhä nmädia'agy hajxy häxøpy tøø xquia'a mädoxyajtä, cab hajxy häxøpy quiümädowa'añ. ²³ Pøñhøch xmiähanhajp, jadúñhøchhä nDeedy xmiähanhájtäbä. ²⁴ Tøøchä hoy-yagjuøøñäjatypä nyajcähxø'øgy. Caj pøñ jaduñ yajcähxø'øgy hädaa yaabä naaxwiimbä. Hoy jäya'ayhajxy tøø jia hixy tøø jia mädoxy, xmiähanhajp højts móødhøchhä nDeedy. Paady hajxy je'e quiümädowa'añ. Cooçhä hoy-yagjuøøñäjatypä häxøpy tøø nga'a yajcähxø'øgy, cab hajxy häxøpy quiümädowa'añ. ²⁵ Cooçhä jäya'ayhajxy xmiähanhaty, tøjiajp jaduñ nebiä Diosmädia'agy myiñän, neby hajxy jecy quiujahyyän: "Pues, nä'a nägøøbøch hajxy xmiähanhaty."

²⁶ Nguexáambiøch ja'a Dioshespíritu, ja'a mijts xjiootcapxmøcpøgaambä, ja'a tømíadiaacpä. Jim jaduñ choona'añ maaçhä nDeediän. Coo quiäda'aga'añ, mänítøch je'e xñägäpaxa'añ. ²⁷ Jadúñhøch mijts xñägäpaxaambä, nebiátyhøch mijts yaa tøø nmøødwädity. Høxtähmødsøchä jäya'ayhajxy nyajnhixøøçhoönän, quípxyhøch mijts nmøødtägøøyy wädijpä høxtä jäda'anäbaadyñä.

16

¹ Páadyhøch mijts cham nyajmøødxil'igy nyajmøødmädia'agy, cooçh mijts ja'a nmädia'agy ni mänaa xquia'a najtshixøøyyät, hoy mijts jäya'ay mäduhñtiä xjia mädsiphaty xjia mähanhaty. ² Xyajpädsømaamb mijts je'e tsajtøgooty. Høxtä habaadaamb jaduñ coo mijts xyagho'oga'añ je'eguiøxpä cooc tyijy ja'a Diosmädia'agy hajxy quiudiüñ. ³ Paady mijts je'e xmiädsiphada'añ coo højts je'e xquia'a hixiä móødhøchhä nDeedy. ⁴ Coo hajxy jaduñ mjädät mhabétät, mänit hajxy jaduñ mjahmiédsät coo hajxy nhawáanäm. Paady cham nhawáanäm.

'Cooçh mijts hijty quipxy nmøødwädity, paady hajxy hijty nga'a hawáanäm. ⁵ Nøcxáannäbøch jim maaçhä nDeediän, ja'açh tøø xquiéxiäbä. Jimhøch nhidaannä. Pero cábøch mijts xmiäyajtøy maaçh nnøcxä'añ. ⁶ Mjootmayhajp mijts jaduñ cooçh mijts jaduñ tøø nyajmøødmädia'agy. ⁷ Chaads mijts tehñ tiøyhajt nnämä'awät,

hoyø'owaamb jaduhñ mijtsçexpä cooçh nnøcxa'añ. Nguexáambiøch pøn mijts xjootcapxmøcpøgaamb. Cooçh nga'a nøcxät, cab jaduhñ quiädá'agät maa mijtsän. ⁸⁻⁹ Tsipcøxp jaduhñ ñä'ägä cäda'aga'añ. Mänitä jäya'ayhajxy yajwiinjuø'owa'añii coo pojpä cädieey hajxy tøyhajt jiaançh møødä. Paady hajxy miøødä, cooçhä nmädia'agy hajxy tøø xquia'a mäbøjcä. Paady hajxy yajcumädowa'añii ja'a Diósäm. ¹⁰ Jaduhñ hajxy yajwiinjuø'owáanäbä cooçh ja'a pojpä cädieey nga'a møødä. Nøcxáambøch jim maaçhä nDeediän; cábøch mijts yaa xyhixaannä. ¹¹ Jaduhñ hajxy yajwiinjuø'owáanäbä coo hajxy yajcumädowa'añii ja'a Diósäm, pønjaty ja'a møjcu'ugong ja'a miädia'agy panøcxäp, ja'a yaa hanehmbä hädaa yaabä naaxwiin. Tøø ja'a Dios miäna'añ coo ja'a møjcu'ugong quiumädowa'añ.

¹² 'Madiu'u mijts nja hawaanáanäm, pero cab hajxy mwiinjuø'owät. ¹³ Coo ja'a Dioshèspiritu hänajty quiäda'aga'añ, mänit mijts ja'a tøyhajt xquiøxy yajwiinjuø'owa'añ. Ca'a yhamdsoo mädia'agy je'e miädia'agaamby. Piamädia'agaamby jaduhñ nebiaty je'e tøø miädoy. Je'e mijts xyajmädoyhadaamb tijaty jadaan tunáanäp. ¹⁴ Xñägäpaxáambøch je'e cooçh nmøjjä njaançhä. Mijts xyajmädoyhadaamb nebiátyhöch je'e tøø nnäma'ayän. ¹⁵ Coo højts nhity tu'ugmädia'agy møødhøçhä nDeedy, páadyhöch mijts cham nnäma'ay coo mijts ja'a Dioshèspiritu xyajmädoyhada'añ nebiátyhöch je'e tøø nnäma'ay.

¹⁶ 'Mobädäjpøch jim nnøcxaannä maaçhä nDeediän. Pero cábøch njega'añ; mänítøch mijts hänajty xyhijxtägatsa'añ.

¹⁷ Mänitä Jesús ja'a jiamiøødhajxy näje'e ñiñämaayyä:

—Pätiidä yø'øya'ay jaduhñ coo ñä'ä mäna'añ cooc mobädäjpä ñøcxaannä; cábäc jaduhñ jiega'añ. Mänítäc nhixáanägombä. Pätiidä coo ñä'ä mäna'añ cooc ñøcxa'añ maa ja'a Tieediän. ¹⁸ Pätiidä coo ñä'ä mäna'añ “mobädäjpä.” Päwaambtä jaduhñ jia mäna'ana'añ.

¹⁹ Najuøøbiä Jesús hänajty coo hänajty miäyajtøwa'añii. Mänit miänaañ:

—Xmiäyajtøwáambøch mijts tijátyhöch jaduhñ tøø nja mädia'agy, túhnämäts. ²⁰ Chaads mijts tehñ tiøyhajt nnämä'awät, mjø'owaamb mxuudsaaamb mijts ja'a høøçhcøxpä. Pero yøø cu'ughajxy, jaançh tehñ xioonda'agaamb hajxy. Pero cab hajxy jejcy mjootmayhada'añ. Paquiä hajxy mjootcugø'owáangombä. ²¹ Coo ja'a to'oxiøjc ja'a xiøøbio'ohajxy piedyii, mänitä jioothajxy piädø'ogø'ogy. Nägooyyä ja'a yhuunghajxy je'e miejtsnä, hagädaacp ja'a jioothajxy je'e. Cab hajxy je'e jiahmiejtsnä coo ja'a jioothajxy hänajty tøø piädø'ogy. Xoondáacnäp hajxy coo yhuunghajxy hoy ween tøø myiñ tøø quia'ay. ²² Jaduhñ mäwíinäts hajxy mjootmayhaty nebiä to'oxiøjc ja'a jioothajxy piädø'oguiän. Pero nägooyyä højts nniyhíxägumbä, mänit mijts mxoonda'aga'añ. Caj mijts pøn xyagjootmayhadaannä.

²³ 'Cábøch mijts hänajty tii xmiäyujwa'anaannä. Chaads mijts tehñ tiøyhajt nnämä'awät, cooçh mijts nDeedy hänajty tijaty xmiäyujwa'anaañ, xmio'owaamb mijts je'e ja'a høøçhcøxpä. ²⁴ Cahnä hajxy tii mhuuc yujwa'añ ja'a høøçhcøxpä. Coo hajxy tijaty myujwá'anät, xñä'ägä mo'owaamb hajxy je'e. Jaduhñ hajxy hoy jootcuçj mhídat.

²⁵ 'Yajmäbaadyháamhöch mijts tøø nmøødmädia'agy. Habáatnäp jaduhñ cooçh nga'a mädia'agaannä yajmäbaadyhaam. Howyiinjuøøñøch ja'a nDeedy nmädia'agaannä. ²⁶⁻²⁷ Mänítøch mijts ja'a nDeedy hoy tyijä xmiäyujwa'anaañ ja'a høøçhcøxpä. Mänit hajxy xmio'owa'añ. NDéedyhöch mijts xyhamdsoo mäyujwa'anáanäp je'eguiøxpä cooçh mijts nDeedy xjiaançh tehñ chocy. Paady mijts xchocy cooçh mijts xchojpä, cooçh mijts ja'a nmädia'agy hajxy tøø xmiäbøjcä cooçh jim tøø ndsoon maaçhä nDeediän. Hamdsoo hajxy mmäyujwa'ana'añ; cábøch waamb nmäna'ana'añ. ²⁸ Høøçh, jimhöch tøø ndsoon maaçhä nDeediän. Yaaçh tøø ngäda'agy hädaa yaabä naaxwiin. Pero tsoonáambøch yaa jadähóocägumbä. Nøcxtägatsáambøch jimägumbä maaçhä nDeediän.

²⁹ Mänitä Jesús ja'a jiamiøødhajxy miänaañ, ñämaayyä Jesús:

—Hoorá sí, howyiinjuøøñä miich mmädiaacnä. ³⁰ Tøø højts nnajuø'øy. Cab højts miich tii nmäyajtøwaannä. Nmäbøjnäp højts jaduhñ cóodäm miich jim mjaançh tsoon maa Diosän.

³¹ Mänitá Jesús yhadsooyy:

—Mjaančh mábøjpiäda'a tyijy hajxiä. ³² Habáatnáp jaduhñ coo mijts ja'a cu'ug xquiøxy päboowia'xa'añ. Mänit hajxy jim mnøcxaannä maa mdøjc-hajxiän. Nidiúh-mhøch hajxy yaa xñähgue'egaannä. Pero cábøch nidiuhñ tøyhajt nhida'añ. Ja'a nDéedyhøch jaduhñ xmiøødhidaamb. ³³ Páadyhøch mijts jaduhñ cham nyajwiinxiic nyajwiingapxø'øy coo mijts ween jootcuyc mhíjnät coöchä nmädia'agy hajxy xmiäbøjcät. Mbaadaambiä tsaachpa peenä hajxy hädaa yaabä naaxwiin. Pero ca'a hajxy tii mdajy mmay; cábøchä møjcu'ugong nyajmäjäda'aga'añ.

17

¹ Nägooyyá Jesús miädiaacpædøøyy, mänit yuughee'py tsajpootyp. Mänit miänaañ:

—Teedy, tøø yhabaatnä. Huuc yajcähxø'øg coöch nmøjjä coöch njaančhä. Jaduhñhøch nyajcähxø'øgaambä coo miich mmøjjä coo miich mjaančhä. ² Tøøch miich cuhdujt jaduhñ xmio'oy coöchä jäya'ayhajxy nägøxiä nguhtdujtmó'owät coo hajxy jim jaduhñ ween yhity maa miichän cøjxta'axiøø, pønjátyhøch miich tøø xyajcø'øwaanø'øy. ³ Jaduhñ hajxy jim cøjxta'axiøø yhida'añ maa miichän, coo højts ja'a nmädia'agy jaduhñ xmiäbøjcämät coo miich nidiuhñ mDioshaty, coo miich mdømiädia'agy, coöch miich yaa tøø xquiøxy hädaa yaabä naaxwiin.

⁴ Høøch, ngudiúumbiøch hädaa yaabä naaxwiin nébiøch miich tøø xyhane'emiän. Nyajcähxø'piøch jaduhñ coo miich ja'a mäjaa tøyhajt mmøødä. ⁵ Teedy, høøchä nmäjaa yajcähxø'cäc jim maa miichä mwiinduumän nébiøchä mäjaa hijty jim nmøødän mänaabä hädaa yaabä naaxwiin yhawijy tiøø'xta'aguiän.

⁶ Pønjaty miich yaa tøø mwiimbiy hädaa yaabä naaxwiin, je'ečh hajxy jayøjp nyajmä-doyhajt coo miich nidiuhñ mDioshaty, coo miich mdømiädia'agy. Miichä mgø'øjooty hajxy je'e hijty. Pero jadähóoc-høch miich je'e tøø xyajcø'øwaanø'øguiumbä. Tøø ja'a mmädia'agy hajxy je'e xmiäbøjcä xquiudiuunä. ⁷ Najuøøñäp hajxy coöch miich jaduhñ tøø xmio'oy mäduhñtiøch nmøødä. ⁸ Tøøch hajxy ngøxy yajnähixø'øy nebiätyhøch miich tøø xyajnähixøøbiän. Najuøøñäp hajxy coöch jim tøyhajt ndsoøn maa miichän. Tøøchä nmädia'agy hajxy jaduhñ xmiäbøjcä coöch miich tøø xquiøxy.

⁹ Teedy, tuñä mayhajt. Cueendähat hädaa jäya'ayhajxy, hädájøch miich tøø xyajcø'øwaanø'øyabä. Ca'a jie'emøødøch jaduhñ nnänømy ja'a mmädia'agy hajxy tøø xquia'a mábøjcäbä. ¹⁰ Højts hädaa jäya'ay nje'ehajmújcäm; páadyhøch miich nnäma'ay coo mgüeendähädät. Hädaa jäya'aguiøxpä jaduhñ quiähxø'øga'añ coo højts nmøjhajtäm coo højts njaančhhajtäm.

¹¹ 'Cábøch yaa nhidaannä hädaa yaabä naaxwiin. Nøcxáannäbøch jim maa miichän. Pero yaačhä njamiøødhajxy miähmø'øwa'añ. Cueendähat hajxy neby hajxy jaduhñ yhidät tu'ugmädia'agy neby højts nhíjtäm tu'ugmädia'agy. Miichä mmäjaagøxpä mgüeendähädät. Miichhøch hajxy tøø xyajcø'øwaanø'øy. Jaančh tehñ wia'ads miichä mjoot miichä mwiinmahñdy. ¹² Høxtä jäda'anábáadyñøch hajxy ngüeendähaty miichä mmäjaagøxpä. Caj miichä mmädia'agy hajxy nägøxiä tøø xñajtshixøøyyä. Jagooyyä tu'jäya'ay ja'a mmädia'agy tøø xñajtshixøøyyä, ja'a hijty nä'ägä tu'udägoyyaambä. Paady jaduhñ tiu'udägooyy nebiä mmädia'agy jaduhñ tiøjiädät nebiä cujaaybä miäh-møøyyän.

¹³ Høøch, nøcxáannäbøch jim maa miichän. Páadyhøch miich jaduhñ cham nyajmøødmädia'agy hädaa jäya'ay wyiinduumhajxy neby hajxy jaduhñ xioondáacpät nébiøch nxoonða'aguiän. ¹⁴ Tøøch miichä mmädia'agy hädaa jäya'ayhajxy nya-jmøødmädia'agy. Paady hajxy yaa miähanhadyii hädaa yaabä naaxwiin, coo hajxy haxøøgtuum quia'a wädijnä. Høøch hajxy xpiahijxp coöch haxøøgtuum nga'a wädity. ¹⁵ Chaads miich nnämä'awät coo miich hädaa jäya'ayhajxy mgüeendähädät maa ja'a møjcu'ugongän. Cábøch jaduhñ nmäna'añ coo hajxy yaa choonät hädaa yaabä naaxwiin. ¹⁶ Hoy hajxy jaduhñ wiädity nébiøch nwäditiän. ¹⁷ Cunuu'x hädaa jäya'ay-hajxy ja'a miichä mhomiädia'agyhaam nebiä mmädia'agy hajxy tehngajnä xpianócxät

xquiudiúunät. Mäduhñtiä miičhä mmädia'aguiä, tøyhajt je'e. ¹⁸ Høøch, hädaa yaabä naaxwiinhöch miičh tøø xquiexy nébiöch miičh ja'a jäya'ay ja'a mmädia'agy hajxy nyajmädoyhädät. Jadúhñhöch yø'øya'ayhajxy nwiinguexaambä nebiä mmädia'agy hajxy xyaghawa'xóyyät. ¹⁹ Nnähho'tu'udáambiöch hädaa jäya'ayhajxy nejy miičhä mmädia'agy hajxy tehngajnä xpianócxät xquiudiúunät.

²⁰⁻²¹ 'Jadúhñhöch nmánaambä coo jäya'ayhajxy ween yhity tu'ugmädia'agy nägøxiä mädúhñtiöch ja'a nmädia'agy hajxy xmiäbögaanä majatyhagájpthöchä njamiøød ja'a nmädia'agy hajxy xyajwa'xaanä. Ween hajxy xmiøødhjítäm tu'ugmädia'agy neby hõjts nhjítäm tu'ugmädia'agy. Jaduhñdsä jäya'ayhajxy miäböga'añ coöch miičh tøyhajt tøø xjaančh quexy. ²² Tøøch hajxy nguhdujtm'ooy coo hajxy yhidät tu'ugmädia'agy, nébiöch miičh tøø xquiuhdujtm'ooyän coo nhjítämät tu'ugmädia'agy. ²³ Tu'ugmädiá'agyhöch hajxy xmiøødhity nébiöch miičh nmøødhitiän tu'ugmädiá'agy. Nägøxiä hajxy jaduhñ yhidät tu'ugmädia'agy, ja'a nmädiá'agyhöch hajxy tøø xmiäböjcbä. Jaduhñdsä jäya'ayhajxy ñajuø'owa'añ nägøxiä coöch miičh tøø xquiexy, coo miičh hajxy jaduhñ mdsocy nébiöch miičh xchoquiän.

²⁴ 'Teedy, mänáamböch jaduhñ coöch hajxy jim ween xmiøødhity maačh nhida'añän, ja'ačh miičh tøø xyajcø'owaanø'oyäbä. Jadúhñhöch nmánaambä coo ja'a mäjaa hajxy ween yhixy, ja'ačh miičh tøø xmió'oyäbä. Xjaančh tehñ chójpöch miičh hánajty mänaabä hädaa yaabä naaxwiin yhawijy tiøø'xta'aguiän. Høxtä jäda'anäbáadyñöch miičh xchocyñä. ²⁵ Teedy, tøyhajt miičh mnä'ägädä mädia'agy. Ja'a cu'ughajxy, cab hajxy wyiinjuø'oy coo miičh mdömiädia'agy. Pero høøch, nhíxyhöch miičh. Hädaa njamiøødhöch hajxy chaa tänaabiä, ñajuøøby hajxy je'e coöch miičh tøø xquiexy. ²⁶ Tøøch hajxy je'e nyajmøødmädia'agy coo miičh nidiuhñ mDioshaty, coo miičh mdömiädia'agy. Tehngájnoch jaduhñ nyajmøødmädiá'aga'añ neby hajxy jaduhñ ñiçhogøød ñibia'häyowøød nébiöch miičh xchoquiän. Wéenhöch hajxy tu'ugmädia'agy xmiøødhity.

Mänitä Jesús miädiacpádøøyy.

18

¹ Coo Jesús miädiacpádøøyy, mänitä Jesúshajxy chohñ cajptooty møødä jiamiøødhajxy. Mänitä woc hajxy yajnajxy, ja'a hánajty xøhjäpä Cedrón. Mänit hajxy tiägøøyy olivocamjooty. ² Ja'a Judas, yhixy hánajty je'e jiiby olivocamjooty. Mayhooc ja'a Jesúshajxy hánajty jiiby tøø yhamugø'oy. Ja'a Judas ja'a Jesús hánajty yegaamb. Ja'a Jesús ja'a miädsiphajxy hánajty yajcø'ødägø'owáanäp. ³ Mänitä Judas ja'a soldadohajxy hoy wioy. Møødä policíahajxy hoy wioy maa ja'a teedywiindsønñhajxiän, maa ja'a fariseoshajxiän. Mänitä Jesús jiiby ñägádaacä olivocamjooty, ja'a Judashajxy møødä soldado møødä policía. Tøø hánajty quioodsøøñä. Møødä jiøøn møødä quiuhmd hajxy quiädaacy. ⁴ Ja'a Jesús, ñajuøøby hánajty je'e nebiaty hánajty je'e tiuna'añii. Mänitä Jesús hoy jiojcuoy'oyø'oy ja'a Judashajxy. Mänit miäyajtøøyy:

—Pøñ hajxy mhøxtaaby.

⁵ Mänit hajxy yhadsooyy:

—Jesús Nazaretpä hõjts nhøxtaaby.

Mänitä Jesús miänaañ:

—Høøch jaduhñ xøhjäp.

⁶ Coo ja'a soldadohajxy jaduhñ miädooyy, mänit hajxy jaduhyyä yhøxtägø'owa'cy. Jaduhyyä hajxy cøjx quiäday. ⁷ Mänit Jesús miäyajtøøgumbä:

—Pøñ hajxy mhøxtaaby.

Mänitä Judashajxy yhadsoogumbä:

—Ja'a Jesús Nazaretpä hõjts nhøxtaaby.

⁸ Mänit Jesús miänaañ:

—Tøøds mijts nja hawáanäm. Høøchämäts je'e. Pø høøchtiäm mijts xyhøxtaaby, wéenhöchä njamiøødhajxy wyiimbity.

⁹ Paadiä Jesús jaduñ miänaañ neby jaduñ tiøjiädät nebiä Tieedy hänajty tøø ñäma'ayän: “Põnhøch miiçh tøø xyajcø'øwaanø'øy, cábøch pøn xpiøgaanä. Cab hajxy nejjiada'añ.” ¹⁰ Mänitä Simón Pedro ja'a espada jiädujpädsøømy. Mänitä teedywiindsøn ja'a mioonsä tiaatsc ñä'a pújxäxä, ja'a hahoodiaatsc. Malco hänajty xiøhaty. ¹¹ Mänitä Jesús ja'a Pedro yhojy:

—Cuyuugø'øw yø'ø mhespada. Tsipcøxpøch nho'oga'añ nébiøçhä nDeedy tøø xñäma'ayän.

¹² Mänitä Jesús miajtsä quiø'øxojsä. Ja'a soldadohajxy jaduñ jatcøøyy møødä wyiindsøn hajxy møødä policiahajxy, ja'a judíoshajxy hänajty tøø quiéxiäbä. ¹³ Mänitä Jesús yajnøcxä maa ja'a Anás ja'a tiøjcän. Ja'a Anás ja'a Caifás hänajty miø'ødhajxy. Teedywiindsøn ja'a Caifás hänajty tiuumby. ¹⁴ Ja'a Caifás, je'e ja'a judíoshajxy hänajty tøø ñäma'ay cooc yhahixø'øy jaduñ coo tul'jäya'ay ja'a cu'ug ñähho'tú'udät.

¹⁵ Høxhaam ja'a Simón Pedro ja'a Jesús hajxy hänajty pianøcxy nämetscä. Ja'a Jesús ja'a jiamiøødhajxy nämetscä. Ja'a Simón Pedro miägu'ughajpä, yhixy ja'a teedywiindsøn hänajty je'e. Mänit Jesús piädägøøyyä ja'a Simón Pedro miägu'ughajpä maa ja'a teedywiindsøn tiøghawa'adsän. ¹⁶ Ja'a Pedro, jim je'e miähmøøyy tøghawa'adshaguum. Mänitä Pedro miägu'ughajpä piädsøømy. Mänitä to'oxymoonsä miägapy ja'a tøjcueendähajpä. Mänitä Pedro quiuwowøøyyäbä tøghawa'ads ja'a yhamdsoo mägu'ughajpä. ¹⁷ Mänitä to'oxymoonsä ja'a Pedro miäyajtøøyy:

—Miiçh yø'øya'ay mmøødwädijpy, túhñämäts.

Mänitä Pedro yhadsooyy:

—Ca'a yhøøçhä.

¹⁸ Jimä policiahajxy hänajty jiøømba'axamy møødä moonsähajxy. Tøøchc hänajty. Paady hajxy hänajty tøø jiøønyajmøjjø'øy. Jimä Pedro hänajty jiøømba'axaambä.

¹⁹ Mänitä Jesús miäyajtøøwa ja'a jiamiøødcøxpä møødä miädia'agyquiøxpä. Ja'a teedywiindsøn jaduñ yajtøøw. ²⁰ Mänitä Jesús yhadsooyy:

—Jímhøch hijty tøø nmädia'agy majiäya'ayhagujc. Jímhøch hijty nmäyajnähixø'øy Diostøgooty møød tsajtøgooty maa ja'a judíoshajxy naxy yhamugø'øyän. Cábøch jim mänaa pactuum tøø nmädia'agy. ²¹ Tiiçh miiçh coo xmiäyajtøy. Yø'øya'ayhajxy mmäyajtøwäp yø'ø nmädiá'agyhøch hajxy tøø xmiädóowäbä. Yø'øhajxy je'e najuøøby nebiätühøch jim tøø nmädia'aguiän.

²² Tuunä Jesús jaduñ ñä'a hadsooyy, mänit yhala'abø'cä. Policía jaduñ tu'ug jatcøøyy. Mänitä policía Jesús ñämaayy:

—Cab jaduñ yhojy coo ja'a teedywiindsøn jaduñ mhadsówät.

²³ Mänitä Jesús miänaañ:

—Pø tøøçh ngapxtägoy, yec ja'a tøyhajt yaa. Pø caj, cab jaduñ yhojy cooçh miiçh nä'a nägoobä xñä'a hala'abø'øgät.

²⁴ Mänitä Anás ja'a Jesús quiejxy cø'øxoch maa ja'a Caifás ja'a wyiinduumän. Caifás hänajty teedywiindsøn tuumb.

²⁵ Ja'a Simón Pedro, jim hänajty jiøømba'axamy. Mänit miäyajtøøwa:

—Miiçh yø'øya'ay mmøødwädijpy, túhñämäts.

Mänitä Pedro ñiguiugapxä:

—Ca'a yhøøçhä.

²⁶ Mänitä Pedro miäyajtøøwägumbä:

—Tøøçh miiçh jiiby nhixy olivocamjooty møød yø'øya'ay, túhñämäts.

Ja'a teedywiindsøn ja'a mioonsä jaduñ mäyajtøøw, jaaya'ayä jiuuy miägu'ug ja'a tiaatsc hänajty tøø ñä'a pújxäxä ja'a Pedro. ²⁷ Mänitä Pedro ñiguiugápaxägumbä. Tuunä jaduñ ñä'a mänaañ, mänitä tseey yaaxy.

²⁸ Mänitä Jesús yajnøcxä maa ja'a gobernador tiøjcän. Pilato hänajty tuumb gobernador. Jobø'øwaamb hänajty. Coo hajxy jim quiø'øty, cabä teedywiindsøn hajxy ñä'a tøjtagøøyy. Cabä Israelpä quiuhdujthajxy hänajty jaduñ myiñ coo hajxy jiiby tiøjtägø'øwät maa ja'a tiøjc-hajxiän, ja'a hajxy ca'a Israelpähajpä, ja'a pascuaxøøjooty.

Coo hajxy jii by tiøjtägø'owät, cädiéeyäp hajxy jaduñ. Coo hajxy jaduñ quiädiéeyät, cab hajxy miägáyät ja'a pascuaxøøjooty. Paady hajxy jii by quia'a tægøøyy Pilato tiøgooty. ²⁹ Coo Pilato miädooyy coo hajxy hänäjty tøø quioody, mänit hajxy ñädøjpäd-søøma. Mänitä Pilato miänaañ:

—Tii mijts yø'øya'ay myajcuxø'owø'owaamby.

³⁰ Mänit hajxy yhadsooyy:

—Coo hädaa jäya'ay häxøpy tøø quia'a cädieey, cab højts miičh häxøpy tøø nyajnä-goody.

³¹ Mänitä Pilato miänángumbä:

—Yajwiimbit yø'øya'ay hajxy. Nøcx mijts mädia'agymiäadow nej mijts ja'a mguhdujt myiñän pø tøø quiädieey.

Mänitä judíoshajxy yhadsooyy:

—Ja mäná'anäp højts jaduñ coo yagho'ogøød; pero højts, cab højts ja'a cuhdujt jaduñ nmøødä coo højts jäya'ay nyaghó'ogät.

³² Paady hajxy jaduñ yhadsooyy, ween ja'a Pilato jaduñ ñägäpxy pø tøø Jesús tøyhajt jiaanč cädieey. Tøjiajt jaduñ nebiä Jesús hänäjty tøø miäna'añän coo hänäjty yega'añii maa ja'a ca'a Israelpähajxiän, coo hänäjty yagho'oga'añii cruzøxp. ³³ Mänitä Pilato tiøjtägøøyy. Mänitä Jesús quiyuaaxøøyyä tøgooty. Mänit miäyajtøøwa:

—Nej, miičhä judíoshajxy xguiobiernähajpä.

³⁴ Mänitä Jesús yhadsooyy:

—Pøn jaduñ xñämaayy. Tøgä miičhä mhamdsoo copcooty mnä'a yajcojjiä.

³⁵ Mänitä Pilato jadähooc yhadsoogumbä:

—Tiičh nyajnajuø'øb. Ca'a yhøøchä Israelpäjäya'ay. Miičhä mhamdsoo mägunáaxhöch miičh tøø xyajnägøody møødä teedywiindsøn hajxy. Tii jaduñ tøø mgädieey.

³⁶ Mänitä Jesús yhadsooyy:

—Høøch, cáboch yaa nduñ gobiernä hädaa yaabä naaxwiin. Cooch häxøpy nduñ, tøøchä nmoonsähajxy häxøpy xñäwa'añ. Cábochä judíoshajxy häxøpy tøø xñä'a mach. Cáboch yaa nduñ gobiernä.

³⁷ Mänitä Pilato miänaañ:

—Mduumbäda'a gobiernä.

Mänitä Jesús miänaañ:

—Jexioo, túumbøch jaduñ. Høøch, nmädiácypioch ja'a tøyhajt hädaa yaabä naaxwiin. Páadyhöch yaa tøø nmiñ tøø nga'ay. Pøn jaty ja'a tømia dia'agy mäbøjp, je'ečhä nmädia'agy xmiäböjcap.

³⁸ Mänitä Pilato miänaañ:

—Pätiidä miičh jaduñ mnänøømby ja'a tøyhajt.

Mänitä Pilato tiøjpädsøømgumbä. Mänitä judíoshajxy ñämaayyä:

—Høøch, cáboch yø'øya'ay tøø nhamdsoo hixy tøø nhamdsoo paady pø tøø quiädieey.

³⁹ Jii mijtsä mguhdujt jaduñ cooch mijts ja'a jäya'ay tu'ug nhøxmájtsämät ja'a pascuaxøøjooty. Nej, mmänaamb hajxy jaduñä coo ja'a mgobiernähajxy nhøxmájtsämät.

⁴⁰ Mänit hajxy møc yhadsooyy:

—¡Ca'a yø'øya'ay mhøxmach! ¡Høxmats ja'a craa Barrabáshajpä!

Paadiä Barrabás hänäjty chumyčhäna'ay coo hänäjty tøø mieech tøø pioty. Mänitä Pilato tiøjtägøøñä.

19

¹ Mänitä Pilato ja'a Jesús yajwojpä. ² Mänitä soldado ja'a wädsatscorona hajxy yhädiuuñ. Mänitä Jesús ja'a quiuhduum piädiácaxä. Mänitä Jesús ja'a hucywyit yajnäghäjenøøyyä nebiä gobiernähajxy hänäjty wyithatiän. Paadiä Jesús jaduñ tiuunä, neby hajxy hänäjty ñä'a wi'i ñäxi'iga'añ ñä'a wi'i ñäya'axa'añ. Paady hajxy hänäjty ñä'a

wi'i ñäxi'liga'añ coo ja'a Pilato hänäjty tøø miäna'añ coogä Jesús hänäjty guiobiernähaty.

³ Mänitä Jesús miäwiingoonä. Mänit ñäxiicä:

—¡A poco miičh tuumb gobiernäjä!

Mänitä Jesús tiägøøyyä coxhó'cäbä.

⁴ Mänitä Pilato tiøjpädsøømgumbä. Mänitä judíoshajxy ñämaayyä:

—Nyajtøjpädsøømäambiøch yø'øya'ay nebiä tøyhajt hajxy jaduñ mmøødhädät cooçh tøø nhixy tøø nbaady coo tøø quia'a cädieey.

⁵ Mänitä Jesús piadøjpädsøømy hucywyitmøød, coronamøød. Mänitä Pilato ñämaayy ja'a Israelpäjäya'ayhajxy:

—Xiids yø'øya'ay tøø tiøjpädsøømy.

⁶ Coo Jesús jaduñ yhiixä ja'a teedywiindsøñhajxy møødä policíahajxy, mänit hajxy ñäyaaxøøyy:

—¡Møjpahbétäts hajxy cruzcøxp! ¡Møjpahbétäts hajxy!

Mänitä Pilato miänaañ:

—Hamdsoo hajxy mmøjpahbédät. Høøch, cábøch jaduñ nmäna'añ coo tøø quiädieey.

⁷ Mänitä Israelpäya'ayhajxy yhadsooyy:

—Jaduñ højts nguhdujt myiñ coo yø'øya'ay ween yagho'ogyii je'eguiøxpä coo tøø miäna'añ coogä Dios Tieedyhaty.

⁸ Coo Pilato jaduñ miädooyy, mänitä chähgøøbiøjcy. ⁹ Mänitä Pilato ja'a Jesús miøødtøjtägøøñä. Mänitä miäyajtøøyy:

—Maa miičh mjaançh tsooñ.

Pero cabä Jesús waamb miänaañ.

¹⁰ Mänitä Pilato miänáangumbä:

—Nej, cábøch xñä'ägä hadsowa'añä. Nej, caj miičh mnajuø'øya cooçhä cuhdujt nmøødä cooçh miičh nhøxmádsät, ó cooçh miičh nyajmøjpahbedøød.

¹¹ Mänit Jesús yhadsooyy:

—Coo Dios miičh cuhdujt häxøpy tøø xquia'a mo'oy, caj miičh ja'a cuhdujt häxøpy mmøødä maach høøchcøxpän. Paady miičh ja'a pojpä caj mjaty møødä quejee ja'a teedywiindsøñ, ja'a høøch yaa tøø xyajméchäbä maa miičhä mwiinduumän.

¹² Mänit Pilato jia wiinmahñdyhajty nebiä Jesús yhøxmádsät. Pero mänitä Israelpäya'ayhajxy ñäyaaxøøguiumbä:

—¡Pø mmägu'ughajpy miičh ja'a gobiernä César, caj miičh yø'ø craa mhøxmádsät! Pøñ jaduñ wi'i ñibiädáacäp nebiä gobiernän, je'edsä gobiernä César møøtnimiädsiphájtäp.

¹³ Coo Pilato jaduñ miädooyy, mänitä Jesús miøødtøjpädsøømgumbä. Mänitä Pilato yhøxtaacy häñaabiejtøxp maa hajxy hänäjty xiøhdaacthatiän. Jue'e hänäjty jim xiøhaty Gabata, hebreohayuuc-haamby. Je'eduhñ ñänøømby “maa ja'a tsaa quiøøña'ayän.” ¹⁴ Tøø hänäjty quiujyxiøøjø'øy. Hadsuujø'øwaambä pascuaxøø hänäjty. Mänitä Pilato ñämaayy ja'a Israelpäjäya'ayhajxy:

—¡Xiidsä mgobiernähajxy!

¹⁵ Mänit hajxy ñäyaaxøøguiumbä:

—¡Ween yho'ogy! ¡Ween yho'ogy! ¡Nøcx hajxy møjpahbet!

Mänit Pilato miänaañ:

—Nej, mmäná'anäp mijts jaduñä coo mijts ja'a mgobiernä nmøjpahbétämät.

Mänit teedywiindsøñhajxy yhadsooyy:

—César højts ngobiernähajpy. Ca'a wyiinghäna'cä.

¹⁶ Mänitä Pilato Jesús yajcø'ødägøøyy maa ja'a Israelpähajxiän, coo Jesús miøjpahbedøød.

¹⁷ Mänitä Jesús jim yajnøcxä maa jaduñ xiøhatiän “Maa ja'a Ho'ogyjiäya'aguiopcän.” Gólgota jim xiøhaty hebreohayuuc-haamby. Yhamdsoo cruz je'e yajquejyquiaphájtä.

¹⁸ Jimä Jesús hoy miøjpahbedyii. Metscä jäya'ay jim miøjpahbétäbä Jesús ja'a ñähmøjc. Cujc ja'a Jesús quiuba'awøøyyä. ¹⁹ Mänitä Pilato yagjahyyä pu'uyhuungcøxp: “Jesús Nazaretpä, ja'a Israelpäjäya'ay ja'a guiobiernähajxy.” Mänitä pu'uyhuung yajuujpahwa

cruzcuhduum. ²⁰ Tägøøghayuuc-haamby jaduhñ yagjahyyä, mөөдä hebreo, mөөдä griego, mөөдä latín. Cajptmäwiingón Jesús miøjpahbejtä. Paadiä judíoshajxy nämäy yajmädiaacy nebiä Pilato hänäjty tөө yajyuugjaayiyän cruzcøxp. Mänitä teedywiindsón ja'a Pilato hajxy ñämaayy:

²¹ —Cab hijty jaduhñ yhahixø'øy coo jaduhñ cu mjahy: “Ja'a Israelpäjäya'ay ja'a guiobiernähajxy.” Jaduhñ cu mjahy: “Nä'a nibiädaacäp jaduhñ nebiä Israelpäjäya'ay ja'a guiobiernähajxiän.”

²² Mänitä Pilato yhadsooyy:

—Tөөч jaduhñ njaay; cábøch nyajtägatsa'añ.

²³ Coo Jesús hänäjty tөө miøjpahbedyii, mänitä soldado ja'a Jesús ja'a wyit hajxy yajpädø'cä. Nämädaaxc ja'a soldadohajxy hänäjty. Mänitä wit hajxy yajwa'xy cødu'ug. Jii Jesús ja'a yoñwit hänäjty tu'ug. Tu'ugwit hänäjty tөө quiogy; cab hänäjty maa xiuyyä.

²⁴ Mänitä soldadohajxy ñiñämaayyä:

—Cab jaduhñ yhooyä coo hädaa wit hajxy nhagøødsøyyämät. Tsøg hajxy häyø'cäm. Pøn hädaa wit jaduhñ cuhäyø'øgäp, je'e jaduhñ je'ehädäp.

Mänitä soldadohajxy jaduhñ jiaančhäyø'cy. Jaduhñsä Diosmädia'agy tiøjiajty maa jaduhñ cujaay myiñän: “Xyajwá'xøch ja'a nwit hajxy; xquiuhäyø'cøch ja'a nwit hajxy jaduhñ.”

²⁵ Jimä Jesús ja'a tiaj hänäjty tiäna'ay maa hänäjty mädooyyä tөө miøjpahbedyiiñän, chaadsä tiaj ja'a piuhdo'oxy, chaadsä María ja'a Cleofas ja'a tio'oxiøjc, chaadsä María Magdalena. Jimä Jesús ja'a miägu'ughajpä hänäjty tu'ug tiäna'ay maa ja'a Jesús tiaj mädooyyän, ja'a Jesús hänäjty jiaančhäyø'cy. ²⁶ Coo hajxy yhiyxä ja'a Jesús, mänitä Jesús ja'a tiaj ñämaayy:

—Maam, hädaads mhuunghädäp.

²⁷ Mänitä Jesús ja'a miägu'ughajpä ñämaayy:

—Hädaads mdajhädäp, ja'a hөөчhä ndaj.

Mänit jiaančhäyø'cy.

²⁸ Mänitä Jesús miänaañ:

—Tөөdsøyyäbøch.

Tøjiajt ja'a Diosmädia'agy jaduhñ. Ñajuøøbiä Jesús hänäjty coo hänäjty tөө yhabejnä.

²⁹ Jimä texy hänäjty tu'ug quiøøña'ay vinoxunmөөд. Mänitä xo'od hajxy quiugonøoyy vinojooty. Cøjx je'e chomø'øy. Mänitä paxy hajxy yagjøjwøønøoyy ja'a xo'od. Mänitä Jesús ja'a xo'od hajxy yaghayuugøoyy. ³⁰ Coo Jesús ja'a vino miuu'cy, mänitä miänaañ:

—Tөөds jaduhñ miaañä.

Mänitä quiopc yagjänaannä. Mänit yho'nä.

³¹ Mänaa ja'a Jesús yho'oguiän, ja'a pascuaxøø hänäjty tehñ yhadsooyy. Cujaboom ja'a møjpascuaxøø hänäjty jiada'añii, poo'xxiøøjooty. Jaduhñsä judíoshajxy hänäjty quiuhdujthaty, cabä ho'ogyjiäya'ay hajxy hänäjty jim yajmähmø'øy cruzcøxp ja'a poo'xxiøøjooty. Mänitä Israelpä ja'a Pilato hajxy hoy ñäma'ay coo soldado quiéxät weenä Jesús ja'a tiecyhajxy nøcxy tiøjjäxä neby hajxy paquiä yho'ogät. Nägooyyä hajxy jaduhñ yho'ogät, mänit hajxy yajmänacøød cruzcøxp. ³²⁻³³ Mänitä Pilato ja'a soldado jiaančhäyø'cy. Coo ja'a soldadohajxy jim miejch, mänit hajxy yhiyxä coo ja'a Jesús hänäjty tөө yho'ogy. Cabä tiecy hajxy je'e ñä'a tøjjä. Mänitä ñähmøjcpähajxy tiecytiøjjä nämetscä. Cahnä hajxy hänäjty yho'ogy.

³⁴ Mänitä Jesús quiaačhmägumøoyyä cuhmdhaam. Soldado jaduhñ tu'ug jatcøoyy. Mänitä nø'ty piädsøomy chaadsä nөө. ³⁵ Hөөч, tøyhájthøch jaduhñ tөө nhixy. Páadyhøch mijts jaduhñ nyajmädojhaty neby hajxy jaduhñ mmäbøgät. ³⁶⁻³⁷ Jecy hajxy jaduhñ quiujahy Diosmädia'agyjooty ja'a Jesúscøxpä: “Cabä piajc tiøjäänäxä.” Jaduhñ hajxy quiujahbiä ja'a Jesúscøxpä: “Wyiinhee'ppedaamby hajxy, ja'a hajxy hänäjty tөө quiúmiäbä.” Coo ja'a Jesús ja'a tiecy jaduhñ quia'a jaančhäyø'cy, coo jaduhñ jiaančhäyø'cy, tøjiajt ja'a Diosmädia'agy jaduhñ.

³⁸ Tu'ugä jäya'ay hänajty jim chooñ Arimatea. José hänajty xiøhaty. Hamee'ch ja'a Jesús hänajty miødnimiägu'ughadyii. Chähgøöbiä José ja'a judíos hänajty. Paadiä Jesús hänajty hijxwiinduum quia'a møødwädityii. Mänitä José ja'a cuhdujt hoy yajpädsømy maa ja'a Pilatän coo ja'a Jesús yajmänaca'añ cruzcøxp. Mänitä Pilato ja'a cuhdujt jiaanç yejcy. Mänitä José ja'a Jesús yajmänajcy cruzcøxp. ³⁹ Mänitä Nicodemo ja'a perfume miämejch hii'xmajc kilo. Mäyäbicø'øy miämejch møødä mirra møødä áloes. Tøø hänajty jiegø'øy coo ja'a Nicodemo hänajty tøø yhuug hoobiä coods maa ja'a Jesúsän. ⁴⁰ Mänitä José ja'a Jesús hajxy ñähbijty møødä Nicodemo. Jiibiä perfume hajxy yajmänähbidøøyy. Jaduhñdsä judíoshajxy hänajty quiuhdujthaty. Perfumemänähbidø'øy ja'a ho'ogyjiäya'ay hajxy hänajty yajnaaxtägø'øy. ⁴¹ Jimä olivocam hänajty tu'ug mäwiingõn maa ja'a Jesús hänajty tøø miøjpahbedyijän. Jiibiä tsaajut hänajty tu'ug olivocamjooty wiinmøjtuum. Naamba'ay ja'a tsaajut hänajty. Cahnä ho'ogyjiäya'ay hänajty jiiby piädaactsooñiinä. ⁴² Ja'a judíoshajxy, tsuu ja'a pioo'xxiøø hajxy hänajty yajtsohnda'agy. Cab hajxy hänajty quiuhdujthaty coo hajxy tii tiúnät ja'a poo'xxiøøjooty. Ja ween ja'a poo'xxiøø hänajty quia'a habaady, paadiä Joséhajxy quia'a näbaadøøyyä coo hajxy hoy jäguem cu yajnaaxtägøøyy. Paady hajxy jimiä ñä'ä pädaacy tsaajutjooty ja'a olivocamjootypä.

20

¹ Cumaaxc, näxøø hänajty je'e. Mänitä María Magdalenahajxy jim ñøcxy maa ja'a tsaajutän, maa ja'a Jesús hänajty tøø ñaaxtägø'øyän. Cahnä hänajty hoy jiajjo'ogyñä. Coodsjuøøbyñä hänajty. Mänit hajxy yhiixy coo ja'a tsaajut jim tøø jiøwa'açh juthaguuy. ² Coo ja'a María yhiixy coo ja'a tsaajut quia'a jimän juthaguuy, mänit wyiimbijty päyø'øguiä. Mänitä Simón Pedrohajxy piaatä chaadsä Jesús ja'a miägu'ughajpä, ja'a Jesús hänajty jiaanç tehñ chojpiä. Mänitä María miänaañ:

—Tøø ja'a nWiindsøn hájtäm hajxy xyajpädsøømäm tsaajutjooty. Cab højts nnajuø'øy pämaadä hajxy tøø piäda'agy.

³ Coo ja'a Pedrohajxy jaduhñ miädooyy, mänit hajxy jim ñøcxy päyø'øguiä maa ja'a tsaajutän. Mänitä María jadähooc pianócxcumbä. ⁴ Mänitä Pedro yhøxpäyø'cä. Jayøjp ja'a Pedro jiamiøød jim miejch maa ja'a tsaajutän. ⁵ Mänit jiiby quiuwoodsøøyy tsaajutjooty. Mänitä wit yhiixy coo jiiby yohoxna'ay jutjooty. Pero cab jiiby tiehñ tiägøøyy. Nä'ä cuhixøøyy jaduhñ. ⁶ Mänitä Simón Pedro høxhaam jiaac mejch. Tu'uda'auqiä jiiby tiägøøyy tsaajutjooty. Jaduhñä wit yhiixpä coo jiiby yohoxna'ay. ⁷ Mänitä paayyä yhiixy, ja'a Jesús hajxy hänajty tøø yajcuhmägu'ütiäbä. Hawiing hänajty jim ñe'na'ay. ⁸ Mänitä Pedro jiamiøød piädägøöbiä, ja'a hänajty jayøjp tøø miéchäbä. Mänitä paayyä yhiixpä coo hawiing ñe'na'ay. Paady jaduhñ miäbøjcy coo ja'a Jesús hänajty tøø jiuypioøcy. ⁹ Cahnä Diosmädia'agy hajxy hänajty hoy wyiinjuø'øyñä ja'a jecypä maa jaduhñ myiñän coo ja'a Jesús hänajty jiuypioøga'añ coo hänajty tøø yho'ogy. ¹⁰ Mänitä Pedrohajxy wyiimbijnä, ñøcñä hajxy maa ja'a tiøjc-hajxiän.

¹¹ Tøø ja'a María hänajty piäméjtscumbä høxhaam maa ja'a tsaajutän. Coo ja'a Pedrohajxy wyiimbijnä, mähmøøyy ja'a María jim nidiuhñ. Wi'i jiøøby hänajty. Mänit jiiby quiuwoodsøøguiumbä tsaajutjooty. ¹² Mänitä Diosmoonsä metsc yhiixy, ja'a tsajpootyptsøhmbä. Haagä nähboobwit hajxy hänajty. Jiiby hajxy hänajty yhäña'ay maa ja'a Jesús hänajty tøø wyijtsna'ayän. Tu'jäya'ay hänajty yhäña'ay maa ja'a Jesús ja'a quiopc hänajty tøø quioonna'ayän. Y tu'jäya'ay hänajty yhäña'ay maa ja'a Jesús ja'a tiicy hänajty tøø quiajpna'ayän. ¹³ Mänitä María miäyajtøøwa:

—Muuxy, tii coo mwi'i jiø'øy.

Mänitä María yhadsooyy:

—Tøøchä nWiindsøn hajxy xyajpädsøømä. Pämaadä hajxy tøø piäda'agy.

¹⁴⁻¹⁵ Tuunä María jaduhñ ñä'ä hadsooyy, mänitä wia'wiimbijty. Mänitä Jesús yhiixy. Jim hänajty tiäna'ay; pero cab jaduhñ yhøxcajpy. Olivocamgüeendähajpä je'e yhajood-hajt. Mänitä Jesús miänaañ:

—Muuxy, tii coo mwi'i jiø'ø. Pøñ mhøxtaaby.

Mänitä María yhadsooyy:

—Tsäguhm, pø miich tøø myajpädsømy, høøch hawáanäc maa tøø mbäda'agy nébiøch häyaa nøcxy nyajpäðø'øgy.

¹⁶ Mänitä Jesús yhadsooyy:

—¡María!

Tuunä María jadhun ñä'a nämaayyá, mänitä wyiinhee'ppejty. Mänitä yhøxcajpy coo je'e Jiesúsä. Mänitä jadhun miänaañ hebreohayuuc-haamby:

—¡Raboni! —je'e jadhun ñänøømby “Wiindsón.”

¹⁷ Mänitä María ja'a Jesús jia mats jia mänenaañ. Mänitä Jesús miänaañ:

—Ca'açh xmiach. Cahnøch jim nhoyñä maaçhä nDeediän. Nøcxhøchä njamiøødhajxy hawáanäc cooçh jim nnøcxa'añ maaçhä nDeediän, maaçhä nDiosän. Jaanä je'e mijts mDeedyhajpä mDioshajpä.

¹⁸ Mänitä María ja'a Jesús ja'a jiamiøødhajxy hoy jiaançh nämä'ay:

—Tøøch je'e nhixy, ja'a hajxy nWiindsønñajtämbä.

Mänit hajxy çøjx yhawáanäxä nebiaty ja'a María hänajty tøø ñäma'ayii.

¹⁹ Coo quioodsøñä, mänitä Jesús ja'a jiamiøødhajxy ñiyhagøøyyänä. Hix, chähgøøby ja'a judíos hajxy je'e hänajty; paady hajxy ñiyhagøøyyä. Mänitä Jesús jiiby ñäguehxtøø'xy haguyc hawa'ads. Mänitä Jesús miänaañ:

—Mäguieppe hajxy. Ca'a hajxy tii mdajy mmay.

²⁰ Mänitä Jesús yajcähxø'cy ja'a quiø'øjoot møødä quiaaçhhac maa hänajty tøø jiotiän. Coo hajxy yhiixy, mänit hajxy ñajuøøyy coo je'e Jiesúsä. Mänit hajxy xioønðacy.

²¹ Mänitä Jesús miänaañ:

—Ca'a hajxy tii mdajy mmay. Nébiøchä nDeedy tøø xwyiinguexiän, jaanä jadúhñhøch mijts nwiinguexaambä.

²² Mänitä Jesús ñäbäxujy ja'a jiamiøødhajxy. Mänitä miänaañ:

—Wiingpøc ja'a Dioshèpíritu hajxy. ²³ Høøch mijts ja'a mäjaa nmo'owaamby. Pønjaty mijts mhawáanäp coo Dios ja'a piojpä quiädieeyhajxy tøø yajnähwa'açh, pues tøyhajt jadhun coo Dios tøø yajnähwa'açh. Pønjaty mijts mhawáanäp coo Dios tøø quia'a yajnähwa'açh, pues tøyhajt jadhun coo Dios tøø quia'a yajnähwa'açh.

²⁴ Majmetscjäya'ay ja'a Jesús hänajty tøø miøødwädity. Tu'ug hänajty xiøhaty Tomás, ja'a hajxy hänajty ñänøømbiä “Hametsc-huung.” Mänaa ja'a Jesús ñäguehxtøø'xtsooñän jayøbajt, cabä Tomás hänajty jim. ²⁵ Mänitä Tomás ñämaayyá ja'a jiamiøødhajxy:

—Tøø højts nhixy, ja'a hajxy nWiindsønñajtämbä.

Mänitä Tomás miänaañ:

—Mänitøch nmäbøgät cooçh ndehm yhiçät pø jaançh jot ja'a quiø'ø, cooçhä ngø'ø jiiby nhuuc tehñ piädá'agät maa ja'a quiaaçhmøjc jiuatän. Pø cabä, cáboch jadhun nnä'ägä mäbøgät.

²⁶ Cuductujxøø, jiibiä Jesús ja'a jiamiøødhajxy hänajty tøgóotiägumbä. Jiibiä Tomás hänajtypä. Tøø ja'a tøjc hajxy hänajty yhagøøguiumbä. Mänitä Jesús jiiby ñäguehxtøø'x-cumbä haguyc hawa'ads. Mänitä miänaañ:

—Mäguieppe hajxy. Ca'a hajxy tii mdajy mmay.

²⁷ Mänitä Tomás ñämaayy:

—Tehñ quiudsiiwø'øw yø'ø mgø'ø yaaby ngø'øjootyhøch maa ja'a clavohaawän. Híjçägøch hädaa ngø'ø. Päda'ag yø'ø mgø'ø yaaby ngaachmøjc-høch. Miich, çaj miich hijty mmäböcy. Chaaçh miich nnämä'awät coo mmäbøgät.

²⁸ Mänitä Tomás yhadsooyy:

—Miiçhøch nWiindsønñajpy, nDioshajpy.

²⁹ Mänitä Jesús miänaañ:

—Cooçh miich tøø xyhiixy, paady jadhun mmäböcy. Jootcuyc hajxy je'e, ja'a hajxy tøø miäböquiäbä, hóyhøch hajxy je'e tøø xquia'a ja hixy.

³⁰ Madiu'u ja'a Jesús ja'a hoy-yagjuøøñjättypä yajcähxø'cy ja'a jiamiøødä wyiindu-umhajxy. Cab yam cøxiä quiujaayä hädaa librocøxp. Cujwa'xy je'e yam quiujaayä.
³¹ Paady yam quiujaayä neby hajxy jaduhñ mmäbøgät coo Jesús ja'a Dios Tieedyhaty, coo Jesús je'e Miesíashaty, coo ja'a Dios jaduhñ tøø quiexy. Coo ja'a Jesús ja'a miädia'agy hajxy mmäbøjcät, mhídäp hajxy jim tsajpootyp cøjxta'axiøø.

21

¹ Jadähooc ja'a Jesús yhiñägumbä ja'a jiamiøødhajxy jim mejypia'a ja'a xøhajpä Tiberias. ² Jimä Simón Pedrohajxy hänajty møødä Tomás, ja'a hajxy hänajty ñänøømbiä "Hametsc-huung", møødä Natanael ja'a Caná de Galilea tsohmä, møødä Zebedeo yhuunghajxy, møødä hajxy jaac nämetspä. Haagä Jesús ja'a jiamiøødhajxy jaduhñ.

³ Mänitä Simón Pedro miänaañ:

—Nøcxy nhuuc jaac hacxmach.

Mänitä jiamiøødhajxy miänaañ:

—Ween hajxy nnøcxäm.

Mänit hajxy jiaančh nøcxy mejypia'a. Mänit hajxy biarcotägøøyy. Mänit hajxy hoy jia hacxmadsa'añ. Tu'tsuhm hajxy jaduhñ jia wädipty. Pero cab hajxy tii ñä'ägä paaty.

⁴ Coo jobøøyy, jimä Jesús hänajty tiäna'ay pu'uwiing. Pero cabä Jesús yhøxcajpä ja'a jiamiøødhajxy. ⁵ Mänitä Jesús miänaañ:

—Mägu'ughajpädøjc, nej, cab hajxy tii tøø mnä'ägä paadiä.

Mänit hajxy yhadsooyy:

—Joom mägu'ughajpä, cab højts tii tøø nnä'ägä paady.

⁶ Mänitä Jesús miänaañ:

—Päda'ag yø'ø mdsaa y hajxy jimhaamby ja'a barcohahooyhaampiä pa'ahaam. Mänit hajxy jaduhñ mbáadät.

Mänitä chaay hajxy jim jiaančh pädaacy. May ja'a hacx hajxy jiaančh tehñ yaghadjy. Cab hajxy hänajty miänaañ coo ja'a tsaay hajxy hänajty jia wijtspädsøma'añ nøøjooty.

⁷ Mänitä Pedro ñämaayy ja'a Jesús ja'a jiamiøød, ja'a Jesús hänajty jiaančh tehñ chojpiä:

—Ja'a nWiindsønhtëjtämhajxy yø'ø!

Tuunä Pedro jaduhñ ñä'ä mädooyy coo je'e Jiesúsä, mänitä wyitpägøøyy. Høxyø'øhu-ungmøød hajxy hänajty yhacxmach. Mänitä quihtøpxnajxy nøøjooty. Nøcxaamb hänajty pu'uwiing maa ja'a Jesúsän. ⁸ Ja'a jiamiøødhajxy, jii by hajxy miähmøøyy barcojooty. Mejypia'a mäwiingón hajxy hänajty yhacxjoomy. Jaduhñäda'a ja'a mejypia'a hajxy hänajty tøø ñähgue'egy mägo'xmetro. Hujts ja'a tsaay ja'a hacx hänajty miøødä. Mänitä tsaay hajxy pawich yajnøcxy mejypia'a barcojooty. ⁹ Mänit hajxy biarcopädsøomy. Mänitä juhñdy hajxy yhiñy coo jim wyi'i tiøy pu'uwiing. Jimä Jesús hänajty yhacxtsa'ay. Jimä tsajcaagy hänajty yajcoonna'ay. ¹⁰ Mänitä Jesús miänaañ:

—Mämín ja'a hacx hajxy mejtstägøøg, ja'a hajxy tøø mmächäbä.

¹¹ Mänitä Pedro tiägøøguiumbä barcojooty. Mänitä tsaay pawich yajmejch mejypia'a. Mägo'x cu juxychägui'xmajtägøøg ja'a hacx hänajty jii by tsaajooty, haagä majatypä. Hujts ja'a tsaay hänajty, pero cabä hacx yajcøø'ch. ¹² Mänitä Jesús miänaañ:

—Minds hajxy cay.

Cab hajxy miäyajtøøyy pøn je'e. Tøø hajxy hänajty yhøxcapy coo je'e Jiesúsä.

¹³ Mänitä Jesús ja'a jiamiøød ja'a tsajcaagy hajxy miooyy møødä hacxtsa'ay.

¹⁴ Miädägøøghoocpä ja'a Jesús hajxy hänajty tøø yhiñy mänaa hänajty tøø jiuyp-iøquiän.

¹⁵ Coo hajxy quiaabiädøøyy, mänitä Jesús ja'a Simón Pedro ñämaayy:

—Simón, Juan miičh mdeedyhajpy. Pøn høchäda'a xmiaas tsojp, yø'ø njamiøødhajtäm o miičh.

Mänitä Pedro yhadsooyy:

—Mnajuøøby miičh coočh miičh njuø'øy nebiä hajch nebiä puhya'ayän.

Mänitä Jesús miänaañ:

—Yaghøjcägøchä nmeeghuunghajxy.

Ca'a mieeghuungä ja'a Jesús jaduñ tiehm ñänøøm. Je'eduhñ ñänøøm coo ja'a Simón Pedro ja'a jäya'ayhajxy yajñähixó'owät, ja'a Jesús ja'a miädia'agy hajxy panócxäbä.

¹⁶ Mänitä Jesús miänáangumbä:

—Simón, nej, xchójpøch miičhä.

Mänitä Pedro yhadsooyy:

—Mnajuøøby miičh coočh miičh njuø'øy nebiä hajch nebiä puhya'ayän.

Mänitä Jesús miänaañ:

—Cueendähájtägøčhä nmeeghajxy.

¹⁷ Ja'a miädägøøghoocpä ja'a Simón Pedro ñämáayyägumbä:

—Simón, nej, jaduñčh xjwiø'øy nebiä hajch nebiä puhya'ayän.

Mänitä Pedro jiootmadiägøøyy coo miäyajtøøwa ja'a miädägøøghoocpä.

Mänitä Pedro yhadsooyy:

—Cøxiä miičh mnajuø'øy. Mnajuøøby jaduñ coočh miičh njuø'øy nebiä hajch nebiä puhya'ayän.

Mänitä Jesús miänáangumbä:

—Pues, yaghócgøch ja'a nmeeghajxy. ¹⁸ Tehñ tiøyhájtøch miičh chaa nnámá'awät, coo hijty mdsucywiayjyhatyñä, hamdsoo ja'a mwit hijty mbägø'øy. Mwädiyp hijty maa ja'a mjoot hijty choquiän. Pero coo hñajty tøø mmäjaanä, mänit mgø'ø mxajtøwa'añ. Mänitä wiinghãna'c ja'a mwit xyajpägø'øwa'añ. Mänit xyajnøcxa'añ maa ja'a mjoot hñajty quia'a tsoquiän.

¹⁹ Paadiä Jesús jaduñ miänaañ nebiä Pedro jaduñ ñajuø'owät neby hñajty yagho'oga'añii, nebiä Dios ja'a miäjaa jaduñ yajcãhxó'ogät ja'a Pedrocøxpä. Mänitä Jesús ja'a Pedro ñämaayy:

—Jam hajxy wädíjtäm.

²⁰ Mänitä Pedro quioowiimbijty. Mänítøch xyhijxy coočhä Jesús hñajty nbanøcpxä. Høøch, Juáñghøch høøch. Høøchä Jesús hijty xjiaančh tehñ chojp. Høøch je'e hñäayy ja'a Jesús ja'a ñähmøjc mänaa højts ndsuugayyän. Høøch jaduñ nyajtøøw: “Wiindsón, pøn miičh jaduñ xyegaamb.” ²¹ Coočhä Pedro xyhijxy, mänitä Jesús miäyajtøøyy:

—Wiindsón, yø'øyá'ayäts, nej yø'øya'ay jiada'añ.

²² Mänitä Jesús yhadsooyy:

—Ca'a myiichä mgüentä yø'ø pø chójpiøchä njoot jaduñ coo yø'øya'ay hñajty jiinä coočhä ngädaactägätsät. Pero miičh, panócxägøch ja'a nmädia'agy.

²³ Mänitä mädia'agy jii wiädijty maa ja'a jäya'ayhajxiän ja'a Diosmädia'agy hajxy panøcpxä cóogøch tyijy nga'a ho'oga'añ. Pero cabä Jesús jaduñ miänaañ cóogøch nga'a ho'oga'añ. Nøm jaduñ miänaañ: “Ca'a myiichä mgüentä yø'ø pø chójpiøch ja'a njoot jaduñ coo yø'øya'ay hñajty jiinä coočh ngädaactägätsät.”

²⁴ Høøch, Juáñghøch høøch. Tehñ tiøyhájtøch jaduñ tøø nhixy nébiøch chaa ngujaayän. Ñajuøøbiøchä njamiøødhajxy coočhä tøyhajt nmøødä.

²⁵ Madiu'u ja'a Jesús jaduñ jiaančh tuuñ. Cábøch yam cøxiä tøø ngujaay. Cooch häxøpy cøxiä tøø ngujaay, cabä ndijy hädaa naaxwiimbä miädøyhädät. Amén.

Hechos

¹ Mägu'ughajpä Teófilo, mänáajøch miičh jayøbajt nnäjaayø'øyän, mänítøch ngøxy cujahy nebiatiä Jesús yaa wiädipty hädaa yaabä naaxwiin, møød nebiaty yajnähiøøyy, ²⁻⁴ mänaa jaduhñ tiägø'øyän wädiypä høxtä coonä hänajty ñøcxtägatsa'añ tsajpootyp. Cahnä Jesús hänajty yho'ogyñä, tøøyyämä jiamiøød hänajty wyiinguexy coo miädia'agy yajwá'xäxät wiinduhmyhagajpt. Coe Jesús yho'cy, mänit jiuypiojtägajch. Coe Jesús jaduhñ yhiixä ja'a jiamiøødhajxy, jaduhñä tøyhajt hajxy miøødhajty coe Jesús hänajty tøø jiaančh juyypiojtägach. Coe Jesús jaduhñ jiuypiojtägajch, mänitä jiamiøød jiaac møødwädipty juxychägui'xxøø. Jaduhñä Jesús hänajty yajnähiøø'oy coe Dios hajxy xyhanéhämäm ja'a miøcmäjaahaam. Coe juxychägui'xxøø yhabejty, mänitä Jesús ja'a jiamiøød miøødhamugøøyy maa tun hänajty xiøhatiän Olivostún. Mänitä Jesús tiägøøyy hanehmbä ja'a Dioshespíritu miäjaahaam. Mänit miänaañ:

—Coe hajxy jim mnøcxtägätsät Jerusalén, cab hajxy jim mdsohnädägätsät. Jim hajxy jaduhñ mjøbhixøt cooçh mijtsä nDeedy ja'a yhEspíritu xyajnäguéxät nej mijts tøø nnäma'ayän. Tøøch mijtsä nDeedy xyhuuc yajwiinwaanøøbiä coe hajxy jaduhñ xyajnäguexa'añ. ⁵ Ja'a Juan, nøøhaam hijty miäyajnäbety. Tøyhajt jaduhñ. Pero jaboom juxtøpc mijtsä Dios ja'a yhEspíritu xjiaančh yajnäguexa'añ. Ja'a yhEspírituhaam hajxy jaduhñ xyajnäbeta'añ —nømä Jesús ja'a jiamiøød ñämaayy, ja'a hajxy hänajty tøø yhamugø'øyäbä.

⁶ Mänitä Jesús miäyajtøøwä:

—Wiindsøn, nej, jaduhñ miičh tøø mwiiinmahñdyhatiä coe højtsä nmädsip mga'a yajmäjädaacnädä, højts judfos, møød coe højtsä nhamdsoo mägunaax ngobiernähájnät.

⁷ Mänitä Jesús yhadsooyy:

—Ja'a nDéedyhøchä tøyhajt møød mänaa jaduhñ yajtøjiada'añ nej mijts myajtøyyän. Je'e cuhdujt nidiuhm møød coe jaduhñ yajtøjiädät. Pero mijts, caj yhahixø'oy coe mijtsä tøyhajt mmøødhädät. ⁸ Coe mijtsä Dioshespíritu xñägädá'agät, mänitä mäjaa hajxy xmio'owa'añ. Mänítøch hajxy jim xmiädiá'agät Jerusalén cooçh tøø njuypiojtägach, hóyhøch hänajty tøø nja ho'ogy. Møød jim hajxy xmiädiáacpät Judea-naaxooty, møød jim Samaria-naaxooty, møød jim wiinduhmyhagajpt høxtä mäduhñtiä cajpt quiugøxø'øyän.

⁹ Mänitä Jesús miädiaacpädøøyy. Jimä Jesús hänajty wyiinhee'ppedyii ja'a jiamiøødhajxy, mänitä Jesús nä'a nägoobä chajpejty. Mänit hoy tiägø'oy jocjooty. Mänitä Jesús yhiixtägøoyy ja'a jiamiøødhajxy. ¹⁰ Jim hajxy hänajty chajheebynä, mänitä jäya'ayhajxy metsc ñäguehxtø'xy jim maa Jesús ja'a jiamiøødä wyiinduumhajxiän. Nähboobwit hajxy hänajty nämetsc. ¹¹ Mänitä Jesús ja'a jiamiøødhajxy ñämaayyä:

—Mägu'ughajpädøjc, jim hajxy mdsøñ Galilea maa Jesús choonän. Mijtsä mmägu-naax yø'ø. Quipxy hajxy hijty mmøødwädity. Ca'a hajxy mwi'i yuugheeby. Ca'a hajxy mwi'i tiajy mwi'i miay. Tøø Jesús jaduhñ ñøcxnä tsajpootyp. Pero coe yhabädät, mänit jaduhñ wyiimbijtägatsa'añ neby hajxy tøø mhijxnøcxiän.

¹² Mänitä Jesús ja'a jiamiøødhajxy jim chohñ maa tun hänajty xiøhatiän Olivos. Mänit hajxy ñøcxy Jerusalén. Tu'kilómetro hänajty jiäguemä. ¹³ Jue'e Jesús ja'a jiamiøødhajxy hänajty xiøhaty: Pedro, Juan, Andrés, Felipe, Tomás, Bartolomé, Mateo, Simón ja'a Celote, møødä Judas. Nämetsc hajxy hänajty xiøhaty Santiago. Judas ja'a piuhya'ay je'e ja'a tu'jäya'aybä. Alfeo ja'a Judas ja'a tieedyhajxy hänajty xiøhaty. ¹⁴ Naxy hajxy hänajty yhamugø'oy Diospa'yaaxpä nägøxiä, näguipxy møødä Jesús ja'a tiaj María, møødä Jesús ja'a piuhya'ayhajxy, møødä to'oxiøjc-hajxy, ja'a Jesús hänajty quipxy tøø piawädityiijäbä.

¹⁵ Cujaboom cumaaxc, mänitä mäbøjpädøjc-hajxy yhamugøøyy. Nämägo'x-cu-ii'x hajxy hänajty. Mänitä Pedro tiänaayyø'cy. Mänit miänaañ:

16-20 —Mägu'ughajpädöjc, jéquiänä David quiujahy salmosjooty ja'a Judascøxpä, nebiatiä Dioshespíritu ñajtsapxøøyyä: Pactsacä tiöjc jiada'añ; caj pøn jim chäna'awaannä. Ja'a Judas ja'a tiöjc jaduñ nänóømäxä. Jaduhñ jim miänaambä coogä Judas wiingjäya'ay hänajty ñähduundu'uda'añii. Jaančh tøjiajt jaduñ ja'a Judascøxpä nebiatiä David jecy quiujahyyän. Näguipxy hõjtsä Judas hijty xmiøødwädíjtäm. Näguipxy hõjts hijty xmiøødtuunmújcäm. Mänitä Judas wyiinmahñdyhajty coo Jesús ñähdúgät. Mänitä Judas ja'a jäya'ay wiomejch maa Jesús hänajtiän, ja'a Jesús hajxy hänajty madsaambä. Coo Judas jaduñ haxøøg jiatcøøyy, mänit miäjuuuyä. Mänitä naax hoy jiuuy. Mänit hoy quiuhgahnaxý cuhmänac. Coo mioxtsäbijty, mänitä tyiinčh yhøxhänøømbädsøømy. Coo jäya'ayhajxy jaduñ miädoyhajty, ja'a hajxy hänajty jim tsänaabiä Jerusalén, coo ja'a Judas hänajty tøø yho'ogy, mänitä naax hajxy yajxøbejty Acéldama, ja'a Judas hänajty tøø jiúyyäbä; jaduñ miädia'agytiägø'øy yhamdsoo hayuuc-haambyhajxy, Nø'ñaax.

21-22 'Jii hõjtsä nmägu'ughajpähájtäm, näguipxy hajxy tøø xmiøødwädíjtäm mänaa Jesús hijty jiiän, mänaa Juan ja'a Jesús yajnäbetiän, høxtä coo Jesús chajpejty cøxp. Hahixøøby jaduñ coo hajxy tu'jäya'ay nwiinguéjxämät, ja'a Judas nähduundu'udaambä. Näguipxiä mädia'agy hajxy xmiøødyajwá'xämät coo Jesús tøø jiuuypiøcy —nømä Pedro miänaañ.

23 Mänitä jäya'ay metsc ñänøømä. Tu'ug hänajty xiøhaty Matías. Jatu'ugpä, tægøøgtu'u hänajty xiøhaty: José, Barsabás, Justo. 24 Mänitä Pedrohajxy tiägøøyy Diospa'yaaxpä:

—Teedy, miičh mnajuøøby neby hõjts nägøxiä nwiinmahñdyhatiän. Hõjts hawáanäc mädyii miičh tøø mwiimbij hädaahajxy nämetspä, 25 mädyiibä Judas jaduñ nähduundu'udäp. Coo Judas jaduñ quiädiehy, paadia tiuung yajtägøøyy. Paady jii by yhädaacy haxøøgtuum —jaduhñä Dios hajxy pia'yaaxy.

26 Mänit hajxy yhäyø'cy suertehaam mädyii hänajty tuungtägø'owaamb. Mänitä Matías piaatä. Mänitä Matías hajxy quiumaayy, ja'a hajxy hänajty nämajtu'ugpä.

2

1 Coo Pentecostés-xøø yhabaaty, mänitä mabøjpädöjc-hajxy nägøxiä yhamugøøyy. 2 Jii by hajxy hänajty tøgooty yhäña'ay. Mänit hajxy miädooyy nebiä poj yhamuuyän coo møc piojy. Cøxp jaduñ chohñdaacy. Møc jii by yhawaandsøøyy tøgooty. 3 Mänit hajxy nägøxiä ñägädaacä haniduhñjaty ja'a Dioshespíritäm. Jaduhñ hänajty quiähxø'ogy nebiä tootsän, nebiä jøønhaayän. 4 Mänit hajxy nägøxiä yhadägøøyyä jioottägøøyyä ja'a Dioshespíritäm. Mänit hajxy tiägøøyy mädiaacpä wiinghayuucjaty. Ja'a Dioshespíritu hänajty jaduñ yajmädiaacp.

5 Tøø judíoshajxy hänajty nämay miech Jerusalén xøøhappä. Wiinduhmyhagajpt hajxy hänajty chooñ. Paady hajxy miejch Jerusalén xøøjooty, quiudiunaambiä quiuhdujt hajxy hänajty jaduñ neby hajxy hänajty quiuhdujthatiän. 6-7 Coo judíoshajxy miädooyy coo poj hänajty møc yhamuuy jii by tøgooty maa mabøjpädöjc-hajxy hänajty tøø yhamugø'øyän, mänitä judíoshajxy jii by tiøjtägøøyy. Coo judíoshajxy jaduñ miädooyy coo mabøjpädöjc-hajxy hänajty quiapxy miädia'agy wiinghayuucjaty, mänitä judíoshajxy wyiinjuøøyy yhamdsoo hayuuc-haamby neby hajxy hänajty miädia'aguiän majaty hajxy hänajty chooñ wiinduhmyhagajpt. Coo hajxy jaduñ miädooyy, mänit hajxy jiaančh tehñ yagjuøøyy nägø'ø nädecypiä. Mänit hajxy ñiñamaayyä:

—Yø'ø jäya'ayhajxy xiiby capxpä mädiaacpä, haagä Galilea yø'ø hajxy chooñ. 8 Tii hajxiäda'a coo tøø nmädóowäm nebiaty hajxy cøjwiinghayuuc tøø nmämín tøø nmäga'awøøyyäm. 9 Hiñ, wiinduhmyhagajpt hajxy ndsóhñäm, Partia, Media, Elam, Mesopotamia, Judea, Capadocia, Ponto, Asia, 10 Frigia, Panfilia, Egipto, møød jim Libia, Cirene mäwiingón. Høxtä Roma hajxy näje'e ndsóhñäm, 11 møød Creta, møød Arabia. Näje'e hajxy judíos nmämín nmäga'awøøyyäm. Näje'e ja'a judíos quiuhdujt wyiinmahñdy hajxy tøø njøjpøgøøyyäm neby hajxy quiuhdujthatiän. Coo yø'ø Galileabä-jäya'ayhajxy jaduñ tøø quiapxy tøø miädia'agy wiinghayuucjaty nebiatiä

Dios ja'a hoy-yagjuoñäbä tøø yajcähxø'ogy, jadhun hajxy tøø nwiinjuøyyäm ja'a nhamdsoo hayuuc-haamby cøjwiinduum —nømä judfoshajxy ñiñämaayyä.

¹² Coø judfoshajxy jadhun wyiinjuøyy ja'a yhamdsoo hayuuc-haamby, paady hajxy jiaanč tehñ yagjuøyy nägø'ø nädecypiä. Mänit hajxy ñimiäyajtøwä:

—Tii yø'ø jäya'ayhajxy coø quiapxy coø miädia'agy wiinghayuucjaty, yø'ø hajxy tsohm̄bä Galilea.

¹³ Mänit hajxy näje'e yhadsooy xi'igy hanähaty:

—Múucäp hajxiäda'a.

¹⁴⁻¹⁵ Mänitä Pedrohajxy tiänaayyø'cy møødä jiamiødhajxy ja'a nämajtu'ugpä, ja'a hajxy hänajty jadhun Dioswiingueypä. Mänitä Pedro møc tiägøyy mädiaacpä:

—Mägu'ughajpädøjc, nägøxiä hajxy njudfoshajtäm mäduhñtiä hajxy yaa nyajpáatäm, mäduhñtiä hajxy jäguem mdsooñ, møød mijts yaa tsohm̄bä Jerusalén. Näje'e mijts mmäna'añ cooc tyijy højts nmu'ugyii. Pero cab jadhun tiøyyä. Cab jadhun pøn yhu'ugy jopynä. ¹⁶ Coø hajxy tøø mhixy tøø mmädoy coø højts tøø ngapxy tøø nmädia'agy wiinghayuucjaty, jaanč tøjiajt jadhun nebiä Joel jecy quiujahyyän ja'a Dioscøxpä. Diosquexiä Joel hänajty. Jadhunä Joel jecy quiujahy:

¹⁷ Jadhunä Dios miänaañ: Coø hänajty yhabaadaannä coø naaxwiimbä hänajty wyiimbidaannä,

mänithøchä nhEspíritu nguexa'añ maa jäya'ayhajxy nägøxiän, mäduhñtiä hajxy yaa yhity hädaa yaabä naaxwiin.

Y mijtsä mnøøx mmajc-hajxy, mänithøchä nmädia'agy hajxy xyajwa'xaanä.

Ja'a høxcujc-häna'c-hajxy, hoy-yagjuoñjätyhøch hänajty nyajwiinhixa'añ.

Jaanä jadhunä majjäya'adiøjc-hajxypä, nyajcuma'awáambiøch hajxy hänajty hoy-yagjuoñjäty.

¹⁸ Coø hänajty yhabaada'añ, mänithøchä nhEspíritu nyajnäguexaambä ja'a nmoonsähajxy, ja'a ya'aybä, ja'a to'oxypä.

Mänithøchä nmädia'agy hajxy xyajwa'xäänäbä.

¹⁹ Nyajcähxø'øgáambiøchä hijxtahnd hoy-yagjuoñjätytäpä jim tsajtcøxp møød hädaa yaabä naaxwiin.

Hochähgøøñjätyhøch jadhun nyajcähxø'øga'añ nebiä nø'tiän, nebiä jøønän, nebiä jøønjocän.

²⁰ Wiingoodsø'øwaambä xøø hänajty.

Ja'a po'ø, tsapts hänajty yhana'añ nebiä nø'tiän.

Ja ween hänajty quia'a habaadyñä coöchä naaxwiimbä nyajwiimbidaannä, coöchä nHuung Jesucristo yaa quiadaactägatsa'añ hädaa yaabä naaxwiin.

Mänitä jäya'ayhajxy nägøxiä yajtøyhajtyega'añii.

Jadúhñhøchä nmøcmäjaa hänajty nyajcähxø'øga'añ.

²¹ Pønjätiä Jesucristo hänajty capxpaadaamb, je'e hänajty hodium mähmø'øwaamb, nømä Dios miänaañ. Jim jadhun myiñ maa Joel jecy quiujahyyän.

²² 'Mijts israelitas, huuc hamádoowhit hajxy hoy. Mnajuøøby hajxy jadhun coø Dios ja'a Jesús ja'a Nazarettsohm̄bä wyiinguejxy coø jii tiúnät maa mijtsän. Madiu'u ja'a Jesús hijxtahnd yajcähxø'cy hoy-yagjuoñjätytäpä maa mijtsä mwiinduumhajxiän. ²³ Tøø Dios hänajty yajnähdiy coø mijtsä Jesús mmádsät. Mänitä cahwiindøyhäna'c hajxy hoy myajcø'ødägø'øy. Mänitä Jesús hoy miøjpahbedyii cruzcøxp. Mänit yho'cy. ²⁴ Pero mänitä Dios ja'a Jesús yagjuypiojtägajch. Jadhunä Dios hänajty tøø miäna'añ coogä Jesús tsipcøxp jiuypiojgät. ²⁵ Hix, jadhunä David jecy miädiaacy ja'a Jesúsøxpä:

Nnajuøøbiøch jadhun coøch homiänaajä xpiuhbety.

Homiänájøch jadhun xcwieendähaty, jadúhñhøch pøn xquia'a hadsähgø'øwøt.

²⁶ Páadyhøch jootcujc njaanč tehñ ñijiäwø'øyii.

Páadyhøchä Dios jootcujc nba'ya'axy.

Cábøchä nho'og ndsähgø'øy je'eguiøxpä coöchä njuøhñdy nbäda'agy maa Diosän.

²⁷ Xyagjuypiojgáambøch miich jadhun.

Cáböch miičh jii by jutjooty xyajmähmø'øwa'añ coöch jii by nbú'udsät, je'eguiøxpä coöch miičh xyHuunghaty.

²⁸ Xyagjogyhadáamböch miičh cøjxta'axiøø nej miičh homiänaajä mjugyhatiän.

Coočh miičh jaduħn xmiøødhida'añ tehngajnä, páadyhöch jootcuyc nniäwø'øwa'añii.

²⁹ Mänitä Pedro miänáangumbä:

—Mägu'ughajpädøjc, nmøødhájtämä tøyhajt hajxy jaduħn coo David jaduħn jecy quia'a nimiädiaacä hamdsoo. Hiç, coo David jecy yho'cy, mänit hoy ñaaxtägø'øy. Jii by jaduħn yhityñä jutjooty høxtä jäda'anäbaadyñä. ³⁰ Coo David jaduħn jecy miädiaacy, ñajuøøby hänäjty jaduħn coo yhapä yhoc hänäjty tu'ug wyiinguexáanäxä ja'a Diósäm, møød coo hänäjty yhane'emaambä nebiä David jecy yhanehmiän. Tøøyyämä Dios hänäjty miäna'añ coo hänäjty yajtøjiada'añ coo David ja'a yhapä yhoc hänäjty tu'ug wiindsøn tiuna'añ. ³¹ Jaduħnä David tøyhajt jecy miøødhajty coo Dios ja'a wyiinguexypä yagjuypiøga'añ coo hänäjty tøø yho'ogy, møød coo hänäjty quia'a mähmø'øwa'añ jutjooty, møød coo ñi'xä quiopc hänäjty jii by quia'a pu'uda'añ. ³² Ja'a Jesúsøxpä David jecy miädiaacy coo Jesús hänäjty jiuypiojtägatsa'añ. Tøø højts nhamdsoo hixy coo jiaančh juypiøjcy. ³³ Mänitä Jesús jim miøjyaaxä maa Tieediä wyiinduumän. Mänit ñämaayyä coo jim yhöxtä'agät maa Tieediä yhahooyhaampiän. Mänitä Jesús jaa Tieediä yhEspíritu miooyyä nebiä Tieedy hänäjty tøø yajwiinwaanø'øyiiän. Mänitä Jesús ja'a Tieediä yhEspíritu yaghawa'xøoyyä. Je'e hajxy jaduħn tøø mhixy tøø mmädooy. ³⁴ Ja'a Jesúsäts jim møyjyaaxä tsajpootyp, ca'a Diavitä. Hiç, jaduħnä David jecy miänaambä: Ja'a høöčhä nWiindsøn, je'e jaduħn nämaayyä ja'a Tiéediäm:

“Min yaa häña'aw maačh nhahooyhaampiän.

³⁵ Nmo'owáambiöch miičh cuħdujt jaduħn coo mmädsip mga'a yajmäjädá'agät.”

Jaduħnä Dios ja'a yHuung ñämaayy.

³⁶ Mänitä Pedro miänáangumbä:

—Jaduħnds je'e, ja'a Jesús, ja'a mijts mmøjpahbéjtäbä cruzøxpä, je'e ja'a Dios jaduħn wyiinguejx coo hajxy nWiindsøn hájtämät, coo hajxy xyajnáhwáatsämät. Tøyhajt jaduħn. Hahixøøby jaduħn coo hajxy nägøxiä mmäbøgät ja'a Jesúsøxpä, mijts israelitas. Ca'a hajxy mga'a mäböcy —nømä Pedro miänaañ.

³⁷ Ja'a jäya'ayhajxy hänäjty jii by hamädoowhijpä, coo hajxy jaduħn miädooyy, mänit hajxy tiägøøyy tajpä maabiä hoyhoy. Mänitä Pedrohajxy ñämaayyä møødä jiamiøødtøjc:

—Mägu'ughajpädøjc, neby jaduħn yhahixø'øy højts ngudiünät.

³⁸ Mänitä Pedro yhadsooyy:

—Najtshixø'øw ja'a mhaxøøgcuhdujt hajxy. Jøjpøgøøyyä ja'a Dios ja'a quiuhdujt hajxy. Näbet hajxy ja'a Jesucristocøxpä. Jaduħnä Dios ja'a mbojpä mgädieeybä hajxy xyajnáhwáatsät. Jaduħnä yhEspíritu hajxy xmióobiät. ³⁹ Pønjetiä Dios ja'a nWiindsøn hájtämbä miøjyaaxyp, jé'egädsä piojpä quiädieeybä yajnáhwáatsäxäp, jé'egädsä Dios yhEspíritu mio'owaamby, møød mijts, møødä mhap møødä mhoc-hajxy, møød pønjetiä jäguem tsänaaby. Jaduħn hajxy xyajwiinwaanø'øyyäm —nømä Pedro miänaañ.

⁴⁰ Madiu'ujä Pedro jiaac mädiaacy. Mänit jiaac tehñ miänaañ:

—Yøø cahwiindøjiäya'ayhajxy, ca'a hajxy tehngajnä mbahixy neby hajxy quiuhdujthatiän, coo hajxy jaduħn mnä'ä padägóyyät —nømä Pedro miägapy yhanehmy.

⁴¹ Mänitä Pedro miädia'agy miäböjçäxä nädägøøgmil-jäya'ay. Mänit hajxy hoy nägøxiä ñäbety. ⁴² Hamuumdu'joot hajxy hänäjty miäböcy nägøxiä neby hajxy hänäjty yajnáhixø'øyiiän ja'a apóstoldøjçäm. Naxy hajxy hänäjty yhamugø'øy tsajcaagyquiaamiujpä, møød hajxy hänäjty Dyiospa'ya'axy. Tu'ugjoot tu'ugwiinmahñdy hajxy hänäjty yhity. Hamiñ haxøpy hajxy hänäjty ñibiuhbedyii.

⁴³ Madiu'ujä apóstoldøjçø hijxtahnd hajxy hänäjty yajcähxø'øgy hoy-yagjuøøñäjaty. Jiaančh tehñ yagjuøøbiä mäböjpädøjc-hajxy hänäjty neby hajxy hänäjty yhiçiän.

⁴⁴ Tu'ugmädia'agy hajxy hänäjty yhity mäduhñtiä hajxy hänäjty miäböcy. Yajtuunmujpy hajxy hänäjty tijaty hajxy hänäjty miøød. ⁴⁵ Mänit hajxy nägøxiä tiägøøyy too'pä tijaty hajxy hänäjty miøød. Pønjetiä xädø'øñ hänäjty yajmaajiajp, mänitä

xädø'õñ hajxy hänäjty mio'oyii mäduhñjaty hajxy hänäjty yajmaajiaty. ⁴⁶ Jabom-jabom hajxy hänäjty yhamugø'oy maa mõjtsajtøjcän Diospa'yaaxpä. Jootcuyc hajxy hänäjty quiaamiucy yhuucmucy maa yhamdsoo tøjc-hajxiän. Hojioot hajxy hänäjty miøød. ⁴⁷ Wyiingudsähgøøbiä Dios hajxy hänäjty. Møødä cu'ug hajxy hänäjty wyiingudsähgøøbiä. Jabom-jabomä mabøjpädøjc-hajxy hänäjty yajmayø'oyii ja'a Diósäm. Jaduhñ hajxy hänäjty yajnahwa'açhii.

3

¹ Tu'ugxøøbä Pedrohajxy hänäjty ñöcxy tsajtøgooty mõødä Juan. Mänacyxiø hänäjty je'e. Jaduhñ hajxy hänäjty quiuhdujthaty jabom-jabom coo hajxy mänacyxiø Dyiospa'ya'axy. ² Jimä pa'amjäya'ay hänäjty tu'ug yhäña'ay maa tsajtøghaawän. Tecymia'adä mähdiøjc hänäjty tøø myiñ tøø quia'ay. Jabom-jabom hänäjty jim yajmeçhii maa tsajtøjcän xädø'õñyujwaambä. Jim hänäjty jabom-jabom ñajtshäña'awø'oyii maa tsajtøghaawän, ja'a hänäjty xøhjäpä ja'a yajxonbä. Pønjaty hänäjty jiiby tægøøby, mänitä xädø'õñ hajxy hänäjty miäyujwa'añii ja'a pa'amjäya'ay. ³ Coo Pedrohajxy hänäjty jiiby tiøjtägøøwa'añ tsajtøgooty, mänit hajxy yhiixä ja'a pa'amjäya'ay. Mänitä xädø'õñ hajxy miäyujwaanä. ⁴ Mänitä Pedro ja'a mähdiøjc ñaaxcuheebøøyy maa hänäjty yhäña'ayän. Mänitä Pedro miänaañ:

—Højts wiinhee'ppéjtäc.

⁵ Mänitä Pedrohajxy jiaanç wiinhee'ppejtä. Jaduhñä mähdiøjcä yhaa jioot hänäjty yagjaty coo xädø'õñ hänäjty mio'owa'añii. ⁶ Mänitä Pedro miänängumbä:

—Cab højtsä xädø'õñ nnä'a mõødä tii højts miiçh nnä'a mó'owäp. Pero ndunaamby højtsä mayhajt maa miiçhcøxpän. Jaduhñ højts miiçh nnäma'ay coo mbädø'ögät, coo myo'oyø'ögät. Ja'a Jesucristocøxpä højts miiçh jaduhñ nnäma'ay, ja'a hijty jim tsohmä Nazaret.

⁷⁻⁸ Mänitä Pedro ja'a mähdiøjcä yhahooguiøø miajtsä. Mänitiä ja'a mähdiøjcä tiecy miøgøøyy mõødä tiecy-yo't. Coo Pedro wyidsø'cy, mänitä pa'amjäya'ay tiøpxø'cy. Mänit yo'oyø'cy. Mänitä Pedrohajxy jiiby miøødtøjtägøøyyä tsajtøgooty. Tøpxäp júhyyäp ja'a craa tiøjtägøøyy, ja'a hänäjty tøø miøcpóquiäbä. Mänit tiägøøyy Dioscapxpaatpä. ⁹ Jiibiä jäya'ayhajxy hänäjty nämay tsajtøgooty. Mänit hajxy yhiixy coo craa hänäjty yo'oy, mõød coo Dios hänäjty quiapxpaady. ¹⁰ Mänitä craa yhøxcäjpä coo hänäjty je'e jie'ejä, ja'a hänäjty jim tøø xiädø'õñyujwä'añbä maa tsajtøghaawän, ja'a hajxy hänäjty tyijpiä ja'a jaanç tehñ yajxonbä. Mänitä jäya'ayhajxy jiaanç tehñ yagjuøøyy nägø'ø nädecypiä coo craa hänäjty tøø miøcpøcy.

¹¹ Jimä Pedrohajxy hänäjty tiäna'ay maa hajxy hänäjty tyijjiän Pórtico de Salomón, mõødä Juan, mõødä craa ja'a hänäjty tøø miøcpóquiäba. Cabä Pedrohajxy hänäjty piuhwa'adsa'añii. Mänitä jäya'ayhajxy jim ñöcxøøyy yagjuøøyyäp maa Pedrohajxy hänäjty tiäna'ayän. ¹² Coo Pedro jaduhñ yhiixy coo jäya'ayhajxy hänäjty yagjuø'øy, mänitä jäya'ay ñämaayy:

—Mägu'ughajpädøjc, israelitadøjc, tii hajxy jaduhñ coo mwi'i yagjuø'øy. Tii højts jaduhñ coo xwyi'i yheeby. Coo hädaa craa tøø miäböcy ja'a Jesúsøxpä, paady jaduhñ tøø yo'oyø'øgy, ca'a jie'eguiøxpä coo højts mäjaa nmøødä, ni quia'a je'eguiøxpä coo højtsä Dios hoy nwiingudsähgø'øy. ¹³⁻¹⁵ Jue'e hajxy jecy nhaphájtäm ndeedyhájtäm, ja'a Abrahamhäjpä, mõødä Isaac-häjpä, mõødä Jacobhäjpä. Wyiingudsähgøøbiä Abraham ja'a Dios hajxy hänäjty jegyhajty. Pero coo Dios ja'a yHuung Jesús yaa quiejxy hädaa yaabä naaxwiin, cab hajxy mwiingudsähgøøyy. Mänit hajxy hoy mmach. Mänitä tuungmøødpä hajxy hoy myajcø'dägø'øy. Mänitä Pilato ja'a Jesús jia yaghøxmadsaanä. Pero mijts, caj mijts jaduhñ mmänaañ coo Jesús yhøxmadsoøjät, hoyyä Jesús tii pojpä tii cädieey hänäjty quia'a jagä mõødä. Mänit mijtsä haxøøghäna'c mnä'ägä nähdujcy coo yhøxmadsoøjät, ja'a hänäjty tøø jäya'ay-yaghó'oguiäbä. Mänit hajxy mmänaañ coo Jesús yagho'ogøøjät. Coo Jesús jaduhñ yho'cy, xyajnahwáatsäm hajxy jaduhñ; jaanä jaduhñ hajxy xyagjugyhadaänäm cøjxta'axiøø neby je'e jiugyhatiän. Mänitä Dios ja'a Jesús yagjujyipiøjtägajch. Jaduhñä Dios ja'a Jesús yajmøjtägøøyy. Coo Jesús hänäjty tøø

jiujypiojcy, mänit højts nhijxy, paady højts tøyhajt jaduhñ nmøødä. ¹⁶ Hoorä, hädaa craa, mnajuøøby hajxy hijty coo hijty tiecymia'adä. Mhíjxnäp hajxy jaduhñ coo tøø choocnä. Paady tøø cho'ogy coo tøø miäböcy ja'a Jesúscøxpä, coo Jesús møcmäjaa miøødä, møødä møccuhdujt.

¹⁷ 'Mägu'ughajpädøjc, huuc mäadow hajxy. Nnajuøøbiøch jaduhñ coo mijts häna-jty mga'a najuø'øy coo Jesús Dyioswiinguexiä, paady hajxy myajyagho'cä. Ni ja'a mwiindsønñhajxy hänajty quia'a najuø'øy coo je'e Dyiosquexiä. ¹⁸ Jéquiänä Dios ja'a profetadøjc ñajtsapxøøyy coo Mesías hänajty tsipcøxp yho'oga'añ, ja'a Dios hänajty tøø wyiinguéxiäbä. Jaduhñä profetadøjc-hajxy jiaančh cujahy. Y coo Jesús jaduhñ jiaančh ho'cy, jaduhñä Dios yajtøjiajty neby hänajty jecy tøø miäna'añän. ¹⁹ Paadiä mhaxøøgcuhdujt hajxy mnajtshixó'øwät. Jøjtägøøyyä ja'a Dios ja'a miädia'agy hajxy. Jaduhñä Dios ja'a mbojpa mgädieeybä hajxy xyajñähwáatsät. Y jaduhñä hoybä weenbä hajxy xmió'owät. ²⁰ Coø yhabáadät, mänitä Dios ja'a Jesús yaa quiejxtägatsa'añ hädaa yaabä naaxwiin, ja'a tøø wyiinguéxiäbä coo mijts xyajñähwá'adsät. ²¹ Cahnä yhabaady coo Jesús jim chohñdägátsät tsajpootyp, coo yaa miänajtägátsät hädaa yaabä naaxwiin. Jim jaduhñ yhida'aññä høxtä coonä yhabáadät coo Dios yaghoyøødiägátsät tijaty yaa hijp hädaa yaabä naaxwiin. Jaduhñä Dios ja'a profetadøjc jecy ñämaayy coo hajxy quiujáayät, ja'a Dios hänajty tøø wyiinguéxiäbä. ²² Hix, jéquiänä Moisés jaduhñ ñämaayy ja'a nhaphájtäm ja'a ndeedyhájtäm: “Tøøchä Dios xwyiinguexy coöchä profeta ndúnät. Coø yhabáadät, mänitä Dios tu'jäya'ay wyiinguexa'añ, ja'a højts nmägunáaxäm. Jaduhñ je'e tiunaambä profeta nébiøch nduñän. Nebiaty mijts xyhane'ema'añ, mgudiúunäbä miädia'agy hajxy. ²³ Pønjaty hänajty ca'a mabøgaamb, yajcuhdägoyyáanäp hajxy hänajty ja'a cú'ugäm”, nømä Moisés jecy miänaañ.

²⁴ 'Jaduhñä profetadøjc-hajxy jecy miädiaacy nägøxiä nebiaty jäda'ahaty jiadyii tiuñii, møødä Samuel, møød hajxy jaac túunäbä profeta. ²⁵ Ja'a hajxy jecy túunäbä profeta, mänitä Dios hajxy ñajtsapxøøyyä coo mijtsä Dios xñämaayy coogä Dios ja'a Mesías hänajty wyiinguexa'añ mijtsøxpä. Jaanä jaduhñduhmbä, jéquiänä Dios yajcuhdujcy møød højtsä nhaphájtäm møød højtsä ndeedyhájtäm coo Mesías hänajty wyiinguexa'añ mijtsøxpä. Hix, jaduhñä Dios ja'a Abraham jecy ñämaayy: “Ja'a miichä mhapä mhoccøxpä tu'ug, jadúhñhøchä jäya'ay nägøxiä ngunuu'xa'añ wiinduhmyhagajpt”, nømä Dios jecy miänaañ. ²⁶ Y coo Dios ja'a yHuung yagjujypiojtägajch mänaa hänajty tøø yho'oguiän, mijts jayøjp xyajñäguejx. Paady mijts jaduhñ xyajñäguejxy coo mijts jaduhñ xquiunú'xät, coo weenä mhaxøøgcuhdujt hajxy jaduhñ nägøxiä mnajtshixó'øwät, —nømä Pedro miänaañ.

4

¹⁻² Jimä Pedro ja'a cu'ug hänajty miøødmädia'agyñä tsajtøgooty, mänitä teedyhajxy miädoyhajty møødä saduceodøjc coogä Pedro ja'a cu'ug hajxy hänajty yajñähixø'øy coogä Jesús hänajty tøø jiujypiojtägach mänaa hänajty tøø yho'oguiän. Coogä Jesús jaduhñ jiujypiojcy, jadúhñägä Pedro tøyhajt hajxy hänajty miøødä coogä ho'ogyjiäya'ay-hajxy hänajty jiujypiojgaambä. Coø teedyhajxy jaduhñ miädoyhajty coogä Pedrohajxy hänajty jaduhñ yajñähixø'øy, mänitä teedyhajxy jiaančh tehñ jiootma'ty møødä saduceodøjc-hajxy, møødä tsajtøjcueendähajpä wyiindsønñhajxy. Mänitä Pedrohajxy ñämejtsä møødä Juan. ³ Mänitä Pedrohajxy hoy chumyii. Tøø hänajty chuujø'øy. Mänit hajxy jiiby yhijty pujxtøgooty tu'tsuhñ. ⁴ Mänitä jäya'ayhajxy nämay miäböjcy ja'a Jesúscøxpä, ja'a hajxy hänajty tøø miädóyyäbä nebiä Pedrohajxy yajñähixøøyyän tsajtøgooty. Nämägooxmil ja'a mabøjpädøjc-hajxy jaduhñ jiajty, haagä ya'adiøjc.

⁵ Cujaboom, mänitä judíos wyiindsønñhajxy jim yhamugøøyy Jerusalén, møødä majjäya'adiøjc-hajxy, møødä cuhdujtyajñähixøøbiädøjc-hajxy, ⁶ møødä Anás, ja'a hänajty tuumbä teedywiindsøn, møødä Caifás, møødä Juan, møødä Alejandro, møødä teedywiindsøn jiujy miägu'ughajxy. ⁷ Mänitä Pedrohajxy yajñøcxä møødä Juan jim maa judíos

wyiindsøn

—Coo mijts hädaa craa tecymia'adpä tøø myajtso'ogy, pønä quiuhdujthaam, pønä miājaahaam hajxy jaduhñ myajtsoocy.

⁸ Haa ja'a Pedro, miøødä Dioshespíritu hānajtj je'e. Mānitä Pedro miānaañ:

—Mijts cu'ugwiindsønðojc, mijts majjäya'adiøjc, ⁹ mijts højts jaduhñ xmiāyajtøøb neby højts hädaa mähdiøjc tøø nyajtso'ogy, hädaa hijty tecymia'adpä. ¹⁰ Huuc tunä mayhajt hajxy, huuc hamädoowhit hajxy weeñtiä neby højts chamñ nmädia'aga'añän maa mijtsä mwiinduumhajxiän. Jaduhñä tøyhajt hajxy nägøxiä mmøødhädät møødä israelitadøjc-hajxy nägøxiä neby hädaa mähdiøjc miøcpøjcy, hädaa hijty tecymia'adpä, hädaa yaa tänaabiä mijtsä mwiinduum. Ja'a Jesucristo jaduhñ yajmøcpøjc, ca'a yhöjtsä. Nazaret ja'a Jesucristo hijty chooñ. Mānit mijts myajmøjpahbejtä cruzcøxp. Mānitä Dios yagjuypiojtägajch. ¹¹ Jaduhñ jim myiñ cujaay maa Diosmädia'aguiän: “Jaa tsaa mädyiibä tøjcojpadøjc-hajxy quia'a cumaayy, je'eds jaduhñ jayøjp pädaactsøhnä jim tøjteec.” Haa jaa Jesucristo, jaduhñ je'e miäbaady nebiä tsaajän, ja'a jayøjp jim pädaactsøhnäbä teectuum. Pero mijts, cab hajxy mgumaayy, paady hajxy myajyagho'cä. ¹² Jaaya'ay hajxy jaduhñ xyajñahwaats xyajcuhwáatsäm. Ja'a Dios jaduhñ mānaañ coo Jesús hajxy jaduhñ xyajñahwaats xyajcuhwáatsämät —nømä Pedro miānaañ.

¹³ Coo Pedrohajxy hānajtj quiapxy hamøj jootmøj, paadiä møjtøjc-hajxy hānajtj yagjuø'øy. Hix, ñajuøøbiä møjtøjc-hajxy hānajtj coo Pedrohajxy hānajtj quia'a høxpøquiä. Mānitä møjtøjc-hajxy ñajuøøyy coo Pedro ja'a Jesús hānajtj tøø piawädity, paady hajxy hānajtj quiapxy hamøj jootmøj. ¹⁴ Cabä Pedrohajxy hānajtj hoy quiapxhaduga'añii, je'eguiøxpä coo hajxy hānajtj piuhdäna'awø'øyii ja'a craa ja'a hānajtj tøø chó'oguiäbä. ¹⁵ Mānitä Pedrohajxy jiiby yhöxquejxpädsøømä. Mānitä teedyhajxy tiägøøyy yajcapxiøøbiä:

¹⁶ —Neby hajxiäda'a nnä'ä jatcøøyyämät maa yø'ø häna'cøxpän. Mäduhñtiä cu'ughajxy yaa chāna'ay Jerusalén, quiøxy hixy quiøxy mädooy hajxy jaduhñ coo yø'ø häna'c yø'ø tecymia'adpä hajxy tøø yajtso'ogy. Neby hajxy jaduhñ nnä'ä mänáanämät coo jaduhñ quia'a tøyä neby yø'ø häna'c yø'ø tecymia'adpä hajxy tøø yajtso'oguiän. Pero cab jaduhñ yhahixø'øy coo yø'ø capxy coo yø'ø mädia'agy jaduhñ tehngahnä yhawa'xø'øwät. ¹⁷ Hahixøøby jaduhñ coo hajxy nhadsähgøøyyämät, jaduhñä dijuuntä Jesús hajxy tehngahnä quia'a ja wi'i quiapxpädät —nømä teedyhajxy ñiñamaayyä.

¹⁸ Mānitä Pedrohajxy yajmøjyaaxä møødä Juan. Mānit hajxy yhanehmä coo Jesús hajxy quia'a capxpäatnät, coo cu'ug hajxy quia'a yajñahixøøñät ja'a Jesúsøxpä. ¹⁹ Mānitä Pedrohajxy yhadsooyy:

—Huuc wiinmahñdyhat hajxy waambä Diosäda'a miāna'añ, pø hahixøøby jaduhñ coo højts mijtsä mmädia'agy ngudiúunämät, cahnä højtsä Dios ja'a miädia'agy hānajtj ngudiúunä. ²⁰ Caj pues, cab jaduhñ yhahixø'øy coo højts mijtsä mmädia'agy ngudiúunämät, cahnä højtsä Dios ja'a miädia'agy hānajtj ngudiúunä. Hoorä, jaduhñ højtsä Dios tøø xyhane'emy coo højtsä miädia'agy tehngahnä ngapxwá'xät coo højtsä Jesús tøø nhixjuypiojcy, coo højts tøø nmädooy nebiatiä Jesús tøø yajñahixø'øyän. Paady højts jaduhñ nga'a hamona'añ —nømä Pedrohajxy miānaañ.

²¹⁻²² Mānitä Pedrohajxy jadähooc yhadsähgøøyyä. Mānit hajxy yhöxmajtsä. Paady hajxy jaduhñ yhöxmajtsä coo teedywiindsøn

²³ Coo Pedrohajxy yhöxmäjtsänä møødä Juan, mānit hajxy jim ñøcxy maa jiamioødhajxiän. Mānit hajxy quiøxy mädiaacy waambatiä teedywiindsøn

miäna'añ, mөөdä majtөjc-hajxy. ²⁴ Coo jiamioөdhajxy jaduhñ miädooyy, mänit hajxy nägөxiä tiägөoyy Diospa'yaaxpä:

—Diosteedy, miičh höjts nWiindsөnhajpy. Miičhä tsajt jaduhñ mhädiuun mөөd hädaa yaabä naaxwiin, mөөdä mejy, mөөd tijaty jim hijp tsajtcөxp, mөөd hädaa yaabä naaxwiin, mөөd jiiby mejjiooty. ²⁵⁻²⁶ Jaduhñ miičhä David jecy mnajtsapxөoyyä ja'a mhEspirituhaam:

Nä'a nägoobä jäya'ayhajxy yhawa'anda'agy, ja'a Dios hajxy ca'a wiingudsähgөöbiä.

Xiöbä hajxy ñä'a wiinmahñdyhaty, cab hajxy tii yhoyöoyyaxä.

Mänitä gobiernähajxy yhamugөoyy, ja'a hajxy yaa hanehmä hädaa yaabä naaxwiin.

Mänitä Dios hajxy jia näbädө'cy.

Jaanä Mesías jaduhñ ja näbädө'cäbä, ja'a Dios hänajty wyiinguexaambä,

nөmä David jecy miänaañ, ja'a miičh jecy mmoonsähjätäbä, ja'a höjts jecy nhaphajt ndeedyhätäbä.

²⁷ 'Coo Jesús jaduhñ miajtsä, mänitä Herodeshajxy yaa yhamugөoyy juntahajpä yaa Jerusalén, mөөdä Poncio Pilato, mөөdä israelitahajxy, mөөdä jäya'ayhajxy ca'a israelitäbä. Jaduhñ jiaančh төjiajty nebiä David jecy jiaančh mänaañän. Mänitä Herodes ja'a Jesús hajxy ñähwaambejty, hoyyä Jesús hänajty tii cädieey quia'a jagä mөөdä. Miičhä mHuung je'e. Miičh je'e mwiinguejx coo Mesías tiünät. ²⁸ Töoyyäm miičh hänajty jaduhñ mmäna'añ coo Jesús hänajty jaduhñ tsipcөxp jiada'añ yhabeta'añ, paady miičh jaduhñ waamb mga'a mänaañ coo Jesús jaduhñ jiaančh jajty jiaančh habejty. ²⁹ Hoorä, Diosteedy, mnajuөoby miičh jaduhñ coo höjtsä teedywiindsөndөjc tөө xjia hadsähgө'öy. Höjts miičh jaduhñ xmioonsähajp. Höjtsä mäjaa jaac móoyyäc, jaduhñ höjts miičhä mmädia'agy jaduhñ hoy njaac yaghawa'xөoyyät hamөj jootmөj. ³⁰ Höjts jaac puhbéjtäc, jaduhñ höjtsä pa'amjäya'ay nyajmөcpөгät ja'a miičhä mHuungä miäjaagөxpä, ja'a Jesúsajpä, weenä cu'ughajxy jaduhñ jiaančh tehñ yagjuө'öy nej mijtsä mөcmäjaa hajxy mjaančh tehñ miөөdä —nөmä Pedro ja'a Dios hajxy pia'yaaxy.

³¹ Coo Pedrohajxy jaduhñ Dyiospa'yaaxpädөoyy, mänit jim chäyuuuyy maa hajxy hänajty tөө yhamugө'öyөн. Mänitä Dioshөpiritu hajxy nägөxiä yhadägөoyyä jioottägөoyyä. Mänitä Diosmädia'agy hajxy tiägөoyy yajwa'xpä hamөj jootmөj.

³² Tu'ugjoot tu'ugwiinmahñdiä mäbөjpädөjc-hajxy hänajty nägөxiä. Mäduhñjaty hajxy hänajty miөөdä cөxiä wiinä, tu'ugmucy hajxy hänajty yajtuunmucy. Cab hänajty pөñ miäna'añ coo hänajty nidiuhñ jie'ehaty. ³³ Haa ja'a apöstoldөjc-hajxy, Diosmäjaamөөd hajxy hänajty quiapxy miädia'agy coogä Jesús hänajty tөө jiuypioöcy, ja'a hajxy nWiindsөnhjätämbä. Jaančh tehñ piuhbéjtäp hajxy hänajty nägөxiä ja'a Diösäm. ³⁴ Cab hänajty pөñ tii yajmaajiaty. Hiñ, pөnjatiä naax hänajty mөөd, mөөdä төjc, tioo'py hajxy hänajty. Pөnjaty hänajty tөө ñaaxtoogy tөө tiөjtoogy, ³⁵ mänitä xädө'öñ hajxy hänajty yecy maa apöstoldөjc-hajxiän. Mänitä mäbөjpädөjcä xädө'öñ hajxy hänajty yajniñawa'xө'öyii pөnjaty hänajty yajmaajiajp. ³⁶ Jimä mäbөjpä hänajty tu'ug xiөhaty José. Chiprenaaxooty hänajty choöñ. Ja'a Leví ja'a José hänajty jegyhajty tөө yhaphaty tөө tieedyhaty. Bernabé ja'a José yajxөbejtä ja'a apöstoldөjcäm. (Jue'e Bernabé miädia'agytiägө'öy hahebreohaam, “mäjootcapxmөcpөjp.”) ³⁷ Jimä José naaxcam hänajty miөөdä. Mänit tioo'cy. Mänitä xädө'öñ hoy yecy maa apöstoldөjc-hajxiän.

5

¹ Jimä jäya'ay hänajty tu'ug xiөhaty Ananías. Safira ja'a tio'oxioöjc hänajty xiөhaty. Mänitä ñaax hajxy je'e piadoo'pä. ² Tөө hajxy hänajty quiojyquiapxytiun mөөdä tio'oxioöjc coogä xädө'öñ hajxy hänajty cujjiä yega'añ maa apöstoldөjc-hajxiän. Cujjiäc hajxy hänajty miämähmө'öwa'añ. Coo Ananías ja'a Pedro ja'a xädө'öñ yajnämejch, mänitä Ananías miänaañ cooc tyijy ja'a xädө'öñ hänajty tөө quiöxy yecy mäduhñtiä hänajty tөө tioogy. ³⁻⁴ Mänitä Pedro miänaañ:

—Ananías, coo miičhä mnaax tөө mdoogy, cujjiä xädө'öñ tөө mmämähmө'öy mäduhñtiä tөө xquijuuyyä. Coočh miičhä xädө'öñ cujjiä tөө xmio'oy, jaduhñ miičh

tøø mmäna'añ cooçh tyjy cøxiä tøø xmi'o'y. Coø naax häna'jty m'ga'a toogyñä, mje'ehajpyñä häna'jtyñä. Coø tøø mdoo'nä, miich mje'e hijty je'e ja'a naaxtsow. Coø jaduñ tøø mhøhnda'agy, mgädiehy jaduñ. Ja'a Dios miich mja wiinhøønaañ, ca'a yhøjtsä. Ja'a møjcu'ugong miich jaduñ xyajcapxtägooyy, paadiä Dioshespíritu jaduñ mja wiinhøønaañ —nømä Ananías ñämaayyä.

⁵ Coø Ananías jaduñ miädooyy, mäniä ho'ogy quiädaayy. Pønjaty jaduñ mädoyhajt coø Ananías jaduñ yho'cy, mäniä hajxy chähgøøbiøjcy. ⁶ Mäniä høxcujc-häna'c-hajxy näje'e miejch. Mäniä ho'ogyjiäya'ay hajxy ñähbijty. Mäniä hajxy hoy yajnaaxtägø'y.

⁷ Cudägøøghorä, mäniä Ananías tio'oxiøjc piamejtspä, ja'a häna'jty xøhajpä Safira. Cahnä Safira häna'jty miädoyhatyñä coø ñihyhap häna'jty tøø yho'ogy. Mäniä Safira tiøjtägøoyy maa Pedro häna'jtiän. ⁸ Mäniä Pedro ja'a Safira miäyajtøoyy:

—Nej, jaduñä mnaax hajxy mjaançh yequiä, neby hajxy tøø mnägapxiän.

—Jaduñ —nømä Safira yhadsooyy.

⁹ Mäniä Pedro miänáangumbä:

—Tii hajxy coø mja cojyquiapxytiuuñ coø hajxy häna'jty mhøhnda'aga'añ. Nej, cab hajxy mnajuø'yä coø Dioshespíritu hotyijä yajcopcø'y. Cab hajxy jaduñ hoy mwiinhøønät. Coø mnihyhap yhøhndaacy, paady tøø yho'ogy. Xii häna'c-hajxy je'e tiøjtägø'y, ja'a hajxy hoy tøø miäyajnaaxtägø'yäbä. Nøcxaamb miich yø'ø häna'c xyajnaaxtägø'øwaambä —nømä Safira ñämaayyä.

¹⁰ Tuunä Safira jaduñ ñä'a mädooyy, mäniä Pedro tiecyquiädawøoyyä ho'ogy. Coø høxcujc-häna'c-hajxy tiøjtägøoyy, mäniä Safira hajxy yhiixy coø häna'jty tøø yho'ogy. Mäniä hajxy yhøxcøøbiädsøomy. Mäniä hajxy hoy yajnaaxtägø'y maa ñihyhapä ñähmøjcän. ¹¹ Pønjaty jaduñ mädoyhajt nebiä Ananíashajxy häna'jty tøø jiaty tøø yhabetiän, mäniä hajxy nägøxiä chähgøøbiøjcy, møødä mäbøjpädøjc-hajxy nägøxiä.

¹² Mäniä apøstoldøjc-hajxy jim tiägøoyy mäba'amyajnajxpä cajptooty. Jaançh tehñ yhoj-yagjuøøñä hajxy häna'jty tiuñ. Jaduñ hajxy häna'jty yajcähxø'ogy coø Dios mäjaa jiaançh tehñ miøødä. Jimä mäbøjpädøjc-hajxy häna'jty yhamugø'yhaty tsajtøgooty maa häna'jty xiøhatiän ja'a Pörtico de Salomón. ¹³⁻¹⁴ Tehngahnä mäbøjpädøjc-hajxy häna'jty miayø'y näya'ay-nädo'oxy, ja'a hajxy häna'jty mäbøjpä ja'a Jesucristocøxpä. Haa ja'a jäya'ayhajxy häna'jty ca'a mäbøjpä, cab hajxy häna'jty jim ñä'ägädä nøcxy maa mäbøjpädøjc-hajxy häna'jty naxy yhamugø'yän, hoyyä mäbøjpädøjc-hajxy häna'jty jiaançh tehñ quiumayii ja'a cú'ugäm. Paady hajxy häna'jty jim quia'a nøcxa'añ, ja'a hajxy häna'jty ca'a mäbøjpä, coø hajxy häna'jty chähgø'y. ¹⁵ Coø apøstoldøjcä pa'amjäya'ay hajxy häna'jty may yajmøpcøcy, paadiä pa'amjäya'ayhajxy häna'jty jim quiøñøcxyii tu'haam maa Pedro häna'jty ñaxø'owa'añän. Jadúñägä pa'amjäya'ayhajxy jaduñ näje'e miøcpøgät coogä Pedro yhahapc hajxy ñä'a páatät maa hajxy häna'jty quio'na'ayän cøjxcøxp, møød to'ogyquiøxp. ¹⁶ Mayyä pa'amjäya'ayhajxy häna'jty jim yajmeçhii Jerusalén, møød ja'a hajxy haxøøgpä ca'a hoybä møødpä, ja'a hajxy häna'jty tsohmbä Jerusaléncajptpa'a mäwiingón. Nägøxiä hajxy häna'jty yajmøcpøgyii.

¹⁷ Coø teedywiindsøn hajxy jaduñ miädoyhajt coø pa'amjäya'ayhajxy häna'jty may tøø wyi'i miøcpøcy, mäniä hajxy nägø'ø nädecypiä jiootma'ty, møødä saduceodøjc-hajxy. Hix, cabä apøstoldøjc-hajxy häna'jty yajmädsogyii coø hajxy häna'jty tehngahnä wyl'i yajnähiø'y ja'a Jesúsøxpä. ¹⁸ Mäniä apøstoldøjc-hajxy hoy chumyii. ¹⁹ Mäniäcoodsä Diosmoonsä ja'a pujxtøghaaw hoy yaghawa'açh. Mäniä apøstoldøjc-hajxy yhøxwoobädsøomä ja'a Diosmoonsäm. ²⁰ Mäniä hajxy ñämaayyä:

—Coø jiobö'owät, mäniä hajxy jim mnøcxät maa tsajtøjcän. Jimä cu'ug hajxy myajnähiø'owät neby hajxy ñähwä'adsät, neby hajxy jaduñ jiuçyhädät cøjxta'axiøø nebiä Dios jiuçyhatiän —nømä Diosmoonsä miänaañ.

²¹ Coø jioböøyy, mäniä apøstoldøjc-hajxy jim jiaançh nøcxy tsajtøgooty neby hajxy häna'jty tøø ñäma'ayijän ja'a Diosmoonsäm. Mäniä cu'ug hajxy tiägøoyy yajnähiøøbiä.

Mäniä teedywiindsøn hajxy miänaañ coø hajxy nägøxiä yhamugø'owät juntahajpä, møødä majtøjc-hajxy israelítäbä. Mäniä hajxy miänaañ coø tsumyhäna'c-hajxy jim

yajmedsóǰjät maa junta hajxy hānajtŷ yagjadyiijän. ²² Coo policíashajxy jim̄ miejch maa pujxtǰcän, cab pǝn̄ hānajtŷ jiibiän. Mānitä policíashajxy wyiimbijty. ²³ Mānit hajxy miānaañ:

—Coo hǰjts jim̄ nmejch maa pujxtǰcän, je'enä hānajtŷ hoy yhaawguiichä. Jimä soldadohajxy hānajtŷ yhadāna'aynä maa pujxtǰghaawän. Pero coo hǰjts jiiby nja tǰjtǰgǝyy, cab pǝn̄ hānajtŷ jiibiän —nǝmä policíashajxy miānaañ.

²⁴ Coo teedywiindsǝnhajxy jadhun̄ miādooyy, mǝödä tsajtǰcŷeendähajpā wyiindsǝnhajxy, mǝödä mǝjteedywiindsǝn̄, mānit hajxy jiaanch̄ teh̄m̄ yagjuǝyy. Cab hajxy hānajtŷ ñajuǝ'oy tii hānajtŷ jājtǰp̄ túunǰp̄. ²⁵ Mānitä jāya'ay tu'ug miejch maa teedywiindsǝnhajxy hānajtŷ jiuntahatiän. Mānitä craa miānaañ:

—Ximä cu'ug wyi'i yajñähixǝyyägumbä tsajtǰgooty —nǝmä teedywiindsǝnhajxy ñāmaayyā.

²⁶ Mānitä apóstoldǰc-hajxy hoy wioyii. Ja'a tsajtǰcŷeendähajpāhajxy hoy miāwoy mǝödä policíashajxy. Hahoy haweenä apóstoldǰc-hajxy jadhun̄ jim̄ yajmejtsä maa junta hānajtŷ jiadyiijän. Hix̄, tsähgǝbiǝ policíashajxy hānajtŷ coo hajxy ñä'ä paga'ads ñä'ä pawobóǰjät ja'a cú'ugäm. ²⁷ Coo apóstoldǰc-hajxy jim̄ wioomejtsä maa junta hānajtŷ jiadyiijän, mānit hajxy jim̄ yajnǝcxä maa mǝjteedywiindsǝn̄ä wyiinduumän. Mānitä apóstoldǰc-hajxy ñāmaayyā:

²⁸ —Tǝǝ hǰjts mijts nja näma'ay coo hajxy mga'a nä'ägädä yajñähixǝñät ja'a dijuuntä Jesúsǝxpä. Pero cab hǰjts mijtsä nmādia'agy tǝǝ xquiudiuunä. Tǝǝ cu'ug hajxy jadhun̄ mgǝxy yajñähixǝ'oy, mäduhñtiä hajxy yaa chāna'ay Jerusalén. Y hǰjts mijts jadhun̄ xjia wi'i yajñahdsǝmaamb cooc tyijy hǰjtsä dijunto Jesús nyajyagho'cä.

²⁹ Mānitä Pedrohajxy yhadsooyy mǝödä jiamǝǝdhajxy:

—Cab yhahixǝ'oy coo hǰjtsä jāya'ay miādia'agy ngudiúunät, cahnä hǰjtsä Dios miādia'agy hānajtŷ ngudiúunä. ³⁰ Coo mijtsä Jesús myajyujmänoonä cruzǝxp, mānitä Dios ja'a Jesús yagjuypǰjtǰgajch, ja'a hǰjtsä nhapä ndeedyhǰjtäm jecy wyiingudsähgǝyyäbä. ³¹ Mānitä Dios ja'a Jesús cuhdujt miooyy coo Jesús jim̄ miāhané'emät tsajpootyp maa Dios yhahooyhaampiän. Coo judíos ja'a yhaxǝgcuhdujt hajxy ñajtshixǝ'ǝwät, jadhun̄ä piojpä quiädieeybä hajxy jadhun̄ yajñähwaats yajcuhwáatsäxät Jesúsäm. ³² Hǰjtsä tǝyhajt nyejpy coo Jesús jiuypǰjtǰgajch coo hānajtŷ tǝǝ yho'ogy. Jaanä jadhun̄ä Dioshǝpíritu tǝyhajt yejpä coo Jesús jiuypǰjcy. Pǝnjatiä Dios ja'a miādia'agy jadhun̄ cudiúunǰp̄, je'e ja'a Dios ja'a yhEspíritu miooby —jadhun̄ä Pedrohajxy miānaañ.

³³ Coo teedywiindsǝnhajxy jadhun̄ miādooyy, mānit hajxy jiaanch̄ teh̄m̄ jiootma'ty. Mānit hajxy jadhun̄ jia mānaañ coo Pedrohajxy yagho'ogóǰjät. ³⁴ Jimä fariseo hānajtŷ tu'ug teedywiindsǝnhagujc. Jue'e hānajtŷ xiǝhaty Gamaliel. Ley-yajñähixǝbiä hānajtŷ tiuunghajpy. Jaanch̄ teh̄m̄ wyiingudsähgǝyyäp hānajtŷ je'e ja'a cú'ugäm. Mānit tiānaayyǝ'cy. Mānit yhaneh̄my coo apóstoldǰc-hajxy nǝcxy yajpǰdsǝmyii tu'habaquiä.

³⁵ Mānitä Gamaliel ja'a jiamǝǝdtǰc ñāmaayy:

—Mägu'ughajpǰdǰc, huuc wiinmahñdyhat hajxy hodiägaamby neby yǝ'ǝ häna'c hajxy mduna'añ. ³⁶ Huuc jahmiets hajxy nebiä Teudas jecy jiajtiän. Mānit jootmǝj ñibiädaacä. Mānit ñiñänǝǝmä cooc tyijy miǝjjāya'ay jiaanch̄jāya'ayä. Mānit piadu'ubǰcä nämädaaxmāgo'x jāya'ay. Mānitä Teudashajxy tiägǝyy tsiptuumbä. Mānitä Teudas yagho'cä. Ja'a soldadohajxy jadhun̄ mäyagho'c. Mānitä Teudas jiamǝǝdhajxy xii yaa ñǝcxǝyy. Mānitä tsip jadhun̄ yhamaadiujnä. ³⁷ Mānitä tsip wiingpā jadāhooc chohñdáaccumbä mānaa censo hajxy hānajtŷ yajpǰdǝ'oguiän. Ja'a craa Judas ja'a tsip jadhun̄ yajtsohñdaac, ja'a hānajtŷ jim̄ tsohmbä Galilea. Mānitä cu'ug may piadu'ubǰcäbä. Mānitä Judas yagho'cäbä ja'a soldadohajxy. Jadhun̄ä Judas jiamǝǝdhajxy xii yaa ñǝcxǝbiä. ³⁸ Paady, hǝxmats yǝ'ǝ häna'c hajxy. Cab jadhun̄ yhahixǝ'oy coo hajxy nej mdúnät. Hix̄, pǝ yhamdsoo wiinmahñdy hajxy jadhun̄ yajtuumbŷ, cab jadhun̄ yhoyǝ'ǝwät; tu'umá'adǰp̄ jadhun̄. ³⁹ Pero pǝ yǝ'ǝ häna'cä Dios wyiinmahñdy hajxy yajtúunǰp̄, cab hajxy jadhun̄ hoy mgapxhadúgät. Hix̄, jadhun̄

quiahxó'ogät nejpiä Dios hajxy hänajty mmädsiphajpiän —jaduhñä teedywiindsønajxy ñämaayyā.

Jiaančh mähöjc hajxy jaduñh nebiä Gamaliel miänaañän.

⁴⁰ Mänitä apóstoldöjc-hajxy jadähooc quiuyaaxøøyyä tögooty. Mänit hajxy wiobho'cä. Mänit hajxy yhanehmä coo Jesús hajxy quia'a capxpáatnät. Mänit hajxy ñajtsmadsøøyyä. ⁴¹ Xoondáacäp hajxy tiöjpädsøømy maa junta hänajty jiadyiijän. Paady hajxy hänajty xioonda'agy, hix, hahixøøby hänajty jaduñh coo hajxy hočhähdiiuunnä chaačhpógät ja'a Jesúscøxpä. ⁴² Mänit hajxy tiägóøguiumbä yajnahixøøbiä ja'a Jesúscøxpä, tsajtögooty mөөд tögootypaady. Tehngahnä hajxy hänajty yajnahixø'öy jøjwidsø'ø.

6

¹ Tehngahnä mähöjpadöjc-hajxy hänajty jiaančh tehñ miayø'öy. Jaduhñ hajxy hänajty quiuhdujthaty coo yaamgto'oxy cay hu'ugy hajxy jabom-jabom mio'owóøjät. Cujwa'xiä mähöjpadöjc-hajxy hänajty quiapxy hagriego. Cujwa'xiä hajxy hänajty quiapxy hahebreo. Ja'a hajxy hänajty capxpä hagriego, mänit hajxy tiägøøyy mänaambä coo yaamgto'oxy cay hu'ugy hajxy hänajty pedyii quia'a móoyänä, ja'a hajxy hänajty capxpä hagriego. Hөxtä yajtsip yajma'adøøby hajxy hänajty ja'a yaamgto'oxycøxpä. ² Mänitä apóstoldöjc ja'a nämajmetspähajxy miänaañ coo mähöjpadöjc hajxy nägøxiä yhamugó'öwät. Mänitä apóstoldöjc-hajxy miänaañ:

—Mägu'ughajpadöjc, cab jaduñh yhahixø'öy coo höjtsä cay hu'ugy njaac yajwá'xät tehngahnä. Hix, cab höjtsä Diosmädia'agy jaduñh hoy ngapxwa'xaannä. ³ Paadiä, hahixøøby jaduñh coo hajxy mniwiyiimbiwóøjät näjuxtujc coo cay hu'ugy hajxy yajwá'xät. Jue'e hajxy mwiimbiwäp mädyii hoyhäna'c, mädyii Dioshespíritumөөд, mädyii jajp najuøøby. ⁴ Y höjts ja'a nämajmetspä, tehngahnä höjtsä Dios nba'ya'axa'añ. Tehngahnä höjtsä miädia'agy nyajnahixø'öwaañä —nөmä apóstoldöjc-hajxy miänaañ.

⁵ Mänitä mähöjpadöjc-hajxy nägøxiä cojyquiapxy miähmøøyy pөnjaty hajxy hänajty wiyiimbiwaamby. Jue'e hajxy jaduñh wiimbiiwä, ja'a Esteban, mөөдä Felipe, mөөдä Prócoro, mөөдä Nicanor, mөөдä Timón, mөөдä Parmenas, mөөдä Nicolás. Haa ja'a Esteban, hoyyä Diosmädia'agy hänajty jiaančh tehñ miäböcy. Miөөдä Dioshespíritu hänajty je'e. Haa ja'a Nicolás, Antioquía hänajty chooñ. Coo hänajty tøø miøjjø'öy, mänit jaduñh tiägøøyy maa judíos quiuhdujthajxiän. ⁶ Mänitä näjuxtujpähajxy jim wioonøcxä apóstolwiinduumhajxy. Coo näjuxtujpähajxy jim miejch, mänit hajxy quiø'nähgajpä ja'a apóstoldöjc. Mänitä apóstoldöjcä Dios hajxy pia'yaaxy coo näjuxtujpä cuhdujt hajxy mio'owóøjät coo hajxy jaduñh tiünät nebiä apóstoldöjc-hajxy hänajty tiuñän.

⁷ Tehngahnä Diosmädia'agy hänajty yhawa'xø'öy. Mayøøbyñä ja'a mähöjpadöjc-hajxy hänajty tehngahnä jim Jerusalén. Mayyä teedywiindsønajxy hänajty miäböjpä.

⁸ Haa ja'a Esteban, miөөдä Diosmäjaa hänajty je'e. Dioswiinguexy hänajty jaduñh. Mänit tiägøøyy pa'amyajnajxpä maa cu'ugän. Hoy-yagjuøøñä hänajty jaduñh wyl'i tiuñ. ⁹ Mänitä judíos ja'a Esteban hajxy näje'e tiägøøyy yajcapxiøøbiä nebiatiä Esteban hänajty yajnahixø'öy. Tøø hajxy hänajty yhity nebiä cudoogø'öybän. Pero tøø hajxy hänajty yhøxmájtsänä. Jimä yhamdsoo tsajtöjc hajxy hänajty miөөдä. Jäguembaady hajxy hänajty chooñ wiinghagajptjaty, mөөд jim Cirene, mөөд jim Cilicia-naaxooty, mөөд jim Asia-naaxooty. ¹⁰ Pero cab hajxy hänajty miäjäda'aga'añ je'eguiøxpä coo Esteban hänajty jiaančh tehñ jiaty mädia'ag. Hix, miөөдä Esteban ja'a Dioswiinmahñdy hänajty nebiaty hänajty mio'oyii ja'a Dioshespíritäm. ¹¹ Mänitä judíoshajxy quiojyquiapxytiuuñ coo wiinghäna'c hajxy miäjúyät coo weenä Esteban ñähwaambedyii cooc tyijy ja'a Moisés hänajty haxøøg tøø ñänømyii mөөдä Dios. ¹² Coo Esteban jaduñh ñähwaambejtä, mänitä cu'ughajxy hoyhoy jiootma'ty, mөөдä majtöjc-hajxy, mөөдä ley-yajnahixøøbiädöjc-hajxy. Mänitä Esteban yajmujcä. Mänit miajtsä. Mänit yajnøcxä maa teedywiindsønwiinduumhajxiän, maa junta hajxy hänajty yagjadyiijän. ¹³ Mänitä

wiinghänä'c-hajxy yajmejtsä maa junta hänajty jiadyiijän. Mänitä Esteban tiägöøyyä nähwaambéjtäbä:

—Tehngahnä yø'ø craa hädaa tsajtøjc haxøøg ñänømy maa Dios hajxy nwiingud-sähgöøyyämän. Jaduhnä ley haxøøg ñänøombä, ja'a Moisés jecy quiujáhyyäbä. ¹⁴Jaduhñ højts nmädooyy coo jäya'ayhajxy miänaambä cooc tyijy ja'a Jesús Nazaretpä hädaa tsajtøjc yajma'ada'añ, cooc tyijy ja'a cuhdujt yajtägatsa'añ, ja'a Moisés hajxy jecy xyajmänähgueegöøyyämbä —nømä Esteban ñähwaambéjtä.

¹⁵Mänitä tuungmøødpä Esteban hajxy wyiinhee'ppejty, mäduhñtiä hajxy hänajty jim yhäña'ay maa junta hänajty jiadyiijän. Haamb tsämaambä Esteban wyiin jøjpp hänajty quiähxø'øgy nebiä Diosmoonsä wyiin jøjphajxy quiähxø'øguiän, ja'a hajxy jim hijpä tsajpootyp.

7

¹Mänitä teedywiindsønä Esteban miäyajtøoyy:

—Nej, jaančh tøyhajt jaduhñä nej miich yø'ø häna'c xñänømiän.

²Mänitä Esteban yhadsooyy:

—Majtøjc, puhya'adiøjc, høøchä nmädia'agy hajxy huuc hamädoowhjtäc. Ja'a Abraham hajxy jecy nhaphajt ndeedyhjtäm. Jim hänajty chäna'aynä Mesopotamia-naaxooty maa Caldeabä-jäya'ayhajxy hänajty chäna'ayän. Cahnä Abraham hänajty jim jøbajnaxyñä maa naax hänajty xiøhatiän Harán. Mänitä Dios tsajpootypä jim ñäguehxtø'xy maa Abraham wyiinduumän. ³Mänitä Dios ja'a Abraham ñämaayy: “Mdsóonäp yaa maa mnaax maa mgajptän. Mnähgué'egäbä mjujy mmägu'ug. Jim mnócxät maačh miich nwoonøcxa'añän. Mänitøch miich jim nyajnahixó'owät maa mdsänaadiaacpögät”, nømä Abraham jecy nämaayy. ⁴Mänitä Abraham jim jiaančh tsohñä Mesopotamia. Mänit jim ñøcxy tsänaadiaacpøjpä Harán-naaxooty. Pero cab jim jejcy yhiyty Harán-naaxooty. Coo Abraham tieedy yho'cy, mänit jim chöhngumbä. Mänitä Dios ja'a Abraham yaa wiomejch hädaa yaabä naax hädaa yaabä cajpt maa hajxy jäda'ahaty nhjtäm. ⁵Pero cabä Dios ja'a Abraham cuhdujt ñä'ägä mooyy ni weeñtiä coo yaa chänaadiaacpögät. Jaduhñä Abraham cuhdujt ñä'a mooyy coo yaa ñä'a hahidät. Mänitä Dios ja'a Abraham yajwiinwaanøoyy coogä cuhdujt hänajty mio'owa'añ coo yhap yhoc-hajxy yaa chänáañät coo Abraham hänajty tøø yho'ogy, hoyyä Abraham yhuung hänajty quia'a jagä jiiä mänaa jaduhñ yajwiinwaanøoyyän. ⁶Jaduhñä Dios jiaac mänaañ coogä Abraham yhap yhoc-hajxy hänajty wiingnaaxooty nøcxy yhadsäna'awa'añ, møød coog hajxy hänajty yhida'añ nebiä cudoogø'øybän mädaaxmägo'xjumøjt, møød coog hajxy tsaačhtiuñ yhida'añ.

⁷Mänitä Dios miänáangumbä: “Coo miichä mhapä mhoc-hajxy hänajty tøø yagjaamduñ tøø yajtsaačhtiuñ, mänithøchä jäya'ay nyajcumädowa'añ, ja'a miichä mhapä mhoc hänajty tøø xjiaamduun tøø xchaačhtiuñäbä. Mänitä mhapä mhoc-hajxy jim choona'añ. Mänit hajxy yaa myina'añ. Yaačh hajxy jaduhñ xwyiingudsähgø'owa'añ.”

⁸Coo Dios ja'a Abraham jaduhñ yajmøødmädiaacy, yajcuhdujc hajxy jaduhñ neby hajxy jaduhñ miädiaaquiän. Mänitä Dios ja'a Abraham yhanehmy coo Abrahamhajxy yajcircuncidarhädät, møødä yhuunghajxy, møødä yhapä yhoc-hajxy. Jaduhñä hijxtahñd miähmøoyy coo Dios ja'a Abraham jaduhñ miøødyajcuhdujcy. Paadiä, coo Abraham yhuung Isaac jiaančh miiñ jiaančh cahy, cuctujxøø ja'a Abraham ja'a yhuung jiaančh circuncidarhajty. Y coo Isaac hänajty tøø miøjjø'øy, jaduhñä yhuung Jacob tiuumbä. Y ja'a Jacob, jaanä jaduhñä ñøøx miajc yajpanøcxpä, ja'a nämajmetspä, ja'a højts jecy nhaphajt ndeedyhjtämbä.

⁹Jue'e Jacob yhuung hänajty tu'ug xiøhaty José. Coo José hänajty jiaančh tehñ chogyii ja'a tiédiäm, paadiä José yhajchhajxy jiootma'ty. Mänitä José jim quiudoogøøyyä Egipto-naaxooty. José yhajchhajxy jaduhñ jatcøoyy. Pero tehngahnä Dios ja'a José hänajty cwieendähaty. ¹⁰Coo José hänajty hoyhoy tøø chaačhtiuñii, mänit yajnahwaatsä ja'a Diósäm. Mänitä José wiinmahñdy miooyy. Mänitä Dios miänaañ coo

José quiimayóøjät ja'a Faraóngäm, ja'a hänäjty jim tuumbä gobiernä Egipto-naaxooty. Mänitä Faraón ja'a José wyiinguejxy coo José jim yhané'emät mäduhñtiä Egipto-naax, mөөd jimbaady maa Faraón tiøjcän.

¹¹ Mänitä yuuxөө hoyhoy jiajtä jim Egipto mөөd jim Canaán-naaxooty. Mänit höjtsä nhapä ndeedyhajxy jiaančh tehñ chaačhpøjcy ja'a yuugөxpä, coo cay hu'ugy hänäjty jim quia'a hijnä. ¹² Pero coo Jacob jaduññ miädoyhajty coo trigo hänäjty jim yajpaady Egipto, mänitä ñөөx miäc jim quiejxy trigojuubiä. Coo Jacob yhuunghajxy yhoöchohñ jayөbajt, cabä José choj hөxcajpä ja'a yhájchäm. ¹³ Coo hajxy miämetsc-hoocpä yhoodiägajch, mänitä José ñiñägaxä. Mänit yhөxcájpänä. Mänitä Faraón ñajuөөñä coo José yhajchhajxy hänäjty je'e. ¹⁴ Mänitä José quiapxyñäguejxy coo tieedyhajxy jii by ween miänacy Egipto, mөөdä jiuju miägu'ughajxy nägөxiä. Jue'e hajxy hänäjty nägөxiä, nädägөөghii'xcumajmocx. ¹⁵ Mänitä Jacobhajxy jii by jiaančh hädaacnä Egipto mөөdä yhuunghajxy. Jii by hajxy nägөxiä yho'taacy, ja'a hajxy jecy nhaphajt ndeedyhajtämbä. ¹⁶ Cujequiä Jacob piajc-hajxy yagjөdsohnñájxäxä mөөdä José piajc. Jimä piajc-hajxy yajnөcxäxä maa cajpt hänäjty xiөhatiän Siquem. Jim hajxy hoy ñaaxtägөөdiägach maa Abraham ja'a naax hänäjty tөө jiuuyän. Ja'a Hamor yhuungä naax hajxy too'c.

¹⁷ 'Coo hänäjty yhabaadaannä coo Dios hänäjty yajtөjiada'añ nebiä Abraham hänäjty tөө yajwiinwaanө'oyiiän, tөө höjtsä nhaphajtämä ndeedyhajtämhajxy hänäjty miayөөñä jim Egipto. ¹⁸ Mänitä wiinggobiernä jim tiägөөyy tuumbä Egipto-naaxooty. Cabä gobiernä miөjpädaacy nebiä José hänäjty tөө tiuñän. ¹⁹ Mänit höjtsä nhaphajtämä ndeedyhajtämhajxy wyiinhөhnä. Ja'a gobiernä jaduññ mäwiinhөhn. Mänit hajxy jiaamduunä chaačhtiuunä. Mänit hajxy yhanemä hadsip coo yhuung hajxy yhöxtseenät yhöxcónät, ja'a naammiñ ja'a naammechpä, coo hajxy jaduññ ween yho'ogy. ²⁰ Mänitä Moisés myiiñguiahy. Yajxon jiaančh tehñ miaaxhuunghajty. Cabä Moisés yhöxtseñä nebiä gobiernä hänäjty tөө jia hane'emiän. Yu'uchä Moisés yaghijtä tägөөgpo'o tөгooty. ²¹ Coo Moisés hänäjty hoy yu'uch quia'a hidaannä, mänitä gobiernä tio'oxyhuungä Moisés yohbiaaty. Mänit yajtsoocy nebiä hamdsoo huungän. ²² Coo Moisés miөjjөөyy, mänitä cuhdujt cөxiä yajwiinhixөөyyä nebiä egipcioshajxy hänäjty quiuhdujthatiän. Jaančh tehñ jiajp jaduññ piädsөomy. Jaančh tehñ yajxon hänäjty quiapxy miädia'agy nebiä jajp nebiä najuөöbiän. Jaančh tehñ yhoy hänäjty miähane'emy.

²³ 'Coo Moisés jiumөjt juxychägui'x yhabejty, mänit wyiinmaadiaacy coo ja'a miägunaax nөcxy quiuhixa'añ. ²⁴ Jimä Moisés ja'a miägunaax hänäjty tu'ug chaačhtiuñii ja'a egipcio-jäyá'ayäm. Coo Moisés jaduññ yhi jxy, mänitä miägunaax ñäwaañ. Mänitä egipcio-jäyá'ay yagho'cy, ja'a hänäjty mädsaačhtiuumbä. ²⁵ Paadiä Moisés jaduññ jiatcөөyy, jaduññ hänäjty tiajy miay coo miägunaaxhajxy hänäjty tөө miäböcy coo Moisés hänäjty tөө wyiinguexyii ja'a Diösäm coo miägunaax jaduññ yajnähwá'adsät. Pero cab hajxy jaduññ ñä'a mäböjcy. ²⁶ Cujaboom, jimä israelitahajxy hänäjty nämetsc ñiguioxyii. Coo Moisés jaduññ yhi jxy, mänit jia mänaañ coo hajxy ñiyhöxmadsөjät. Mänit miänaañ: "Mägu'ughajpädөjc, jue'e mijts jaduññ, mdu'ugcunaax mijts jaduññ. Cab jaduññ yhahixө'өy coo hajxy jaduññ mniguioxөjät." ²⁷ Mänitä Moisés yhöxjähmä tul'jäyá'ay, ja'a hänäjty mäjäda'agaambä. Mänitä Moisés ñämaayy: "Pөñ miičh tөө xpiäda'agy coo höjts miičh xyhané'emät. ²⁸ Nej, jaduññ miičh mdaj mmaabiä coöch miičh xyagho'ogaambä nej miičhä egipcio-jäyá'ay häxөөyy myagho'quiän." ²⁹ Coo Moisés jaduññ miädooyy, mänit piäyө'cy. Mänit jim ñөcxy jäguem maa naax hänäjty xiөhatiän Madiän. Mänit jim tiägөөyy hadsänaabiä. Mänitä jäyá'ay wyiingpөjcy. Mänitä huung hajxy metsc piaaty.

³⁰ 'Coo Moisés hänäjty jim tөө yhi jnä Madiän juxychägui'xjumөjt, mänit jim tiägөөyy wädi jpä pactuum, jim mädooyyä maa ja'a tun hänäjty xiөhatiän Sinaí. Mänitä Moisés yhi jxy coo ja'a wädsats hänäjty tiöy. Mänitä Diosmoonsä tu'ug ñäguehxtөө'xy jөon-haajiooty. Tsajpootyp hänäjty tөө chooñ. ³¹ Coo ja'a Moisés jaduññ yhi jxy, mänit jaduññ jiaančh tehñ yagjuөөyy. Mänitä Dios ja'a Moisés ñämaayy: ³² "Hөөčh Dioshajp. Hөөčhä Abrahamhajxy jecy xwyiingudsähgөөyy, mөөdä Isaac, mөөdä Jacob, ja'a miičh

jecy mhaphajt mdeedyhájtäbä.” Mänitä Moisés tiägøøyy tsäyuubiä. Jaančh tehñ chähgøøby hänajty jaduhñ. Cab hänajty jim ñä'ägä møjheeba'añ maa hänajty miägapxyijän. ³³ Mänitä Moisés ñämäaayägumbä: “Jen yø'ø mgø'øg. Høøch nwiinduum miich yaa mdäna'ay. ³⁴ Tøøch nhixy coočhä ngu'ughajxy jim jiaančh tehñ chaachpøcy Egipto-naaxooty. Tøøch nmädoy coo hajxy wyi'i jio'øy wyi'i xiuučh. Páadyhöch yaa tøø ngäda'agy hädaa yaabä naaxwiin, ja'a ngú'ughöch nyajnáhwa'ads nyajcuhwa'adsaamby. Miich jim nguexaamby Egipto yajnáhwaatspä”, nømä Dios miänaañ.

³⁵ Mänitä Esteban jiaac mädiaacy:

—Tøø ja'a Moisés ja'a miädia'agy hänajty quia'a mabójcäxä. Ja'a yhamdsoo miägunaaxhajxy hänajty tøø quia'a mabøcy. Mänit hajxy miänaañ: “Pøn miich tøø xwyiinguexy coo mmøjhdät, coo mmahané'emät.” Hoyyä Moisés hänajty jaduhñ tøø jia näma'ayii, mänitä Dios ja'a Moisés wyiinguexy wiindsønñajpä maa ja'a quiu'ugän, coo hajxy jaduhñ ñähwa'ads quiuhwá'adsät. Ja'a Diosmoonsä ja'a Moisés jaduhñ najtscapxøøyyä, ja'a hänajty tøø ñäguehxtøø'xiäbä maa ja'a wädsats hänajty tioyyän. ³⁶ Mänitä Moisés ja'a hoy-yagjuøøñajatypä may yajcähxø'cy jim Egipto-naaxooty. Mänitä miägunaax jim hoy wioobädsømy. Majatiä Moisés hajxy hänajty wiädity, yajcähxø'piä Moisés ja'a hoy-yagjuøøñajatypä hänajty, møød jim maa ja'a Tsaptsmejjiän, møød jim pactuum. Juxychägui'xjumøjt hajxy jim wiädijty pactuum. ³⁷ Mänitä Moisés ja'a miägunaax ñämaayy: “Nébiöchä Dios tøø xwyiinguexiän coo mijts nyajnáhwa'adsät, jaanä jaduhñä Dios wiinghäna'c wyiinguexaambä, ja'a jaac miimbä ja'a jaac cahbä. Mijtsä mmägunaax jaduhñ pädsømaamb. NaXiä miädia'agy hajxy mdehm quiudiúunät waambaty hänajty miäna'ana'añ”, nømä Moisés jecy miänaañ. ³⁸ Hanäguipxiä Moisés ja'a miägunaax jim miøødwädipty pactuum, ja'a højts nhaphajt ndeedyhájtäm. Coo hajxy jim miejch maa ja'a tun hänajty xiøhatiän Sinaí, mänitä Diosmoonsä ja'a Moisés jim tu'ug miägapxy, ja'a hänajty jim tsohmbä tsajpootyp. Mänitä Moisés ja'a Diosmädia'agy ñajtscapxøøyyä. Paady jaduhñ ñajtscapxøøyyä, coo højts jaduhñ xya-jmänähgueegøøyyämät. Ja'a Diosmädia'agy, cab jaduhñ mänaaxøø quiuhdägoyya'añ.

³⁹ 'Pero cabä Moisés ja'a miädia'agy hänajty yajtunáanäxä. Ja'a højts nhaphajt ndeedyhájtäm hajxy hänajty ca'a cudiunaamb. Jaduhñä jioot hajxy hänajty tøø piäda'agy coo hajxy hänajty wyiimbida'añ, coo hajxy hänajty jim ñøcxtägatsa'añ Egipto. ⁴⁰ Jimä Moisés ja'a piuhya'ay hänajty tu'ug xiøhaty Aarón. Coo ja'a Moisés hänajty tøø ñøcxy tunmøjc, mänitä cu'ugä Aarón hajxy ñämaayy: “Huuc tunä mayhajt, højtsä saandä mejtstägøøg hädiúunäc, jaduhñ højts nwiingudsähgø'øwät. Je'e højts jaduhñ xwyiinwówäp. Ja'a Moisés, ja'a højts tøø xwiobädsøømämbä jim Egipto-naaxooty, cab jaduhñ yajnajuø'øy neby jaduhñ tøø jiaty tøø yhabety”, nømä Aarón ñämaayyä. ⁴¹ Mänitä saandä hajxy yhädiuun wajhuunghahädiuunnaxy. Mänitä saandä hajxy tiägøøyy wiingudsähgøøbiä. Mänitä animal hajxy tiägøøyy yojxpä ja'a saandäcøxpä. Mänitä saandä hajxy wyiinxoondaacy, ja'a hajxy hänajty hamdsoo tøø yhädiuñäbä. ⁴² Mänitä Dios ja'a tsaangu'ug piuhwaatsnä. Mänit ñähgueecnä, je'eguiøxpä coo ja'a xøø hajxy hänajty tøø tiägø'øy wiingudsähgøøbiä møødä po'o møødä madsa'a. Hix, jaduhñ jim myiñ cujaay maa ja'a profeta jecy quiujahyyän:

Mijts Israelpäjäya'ay,

mänaa hajxy jecy mwäditiän pactuum juxychägui'xjumøjt,

ca'a yhøøhcøxpä ja'a animal hajxy mwi'i yojxy,

ca'a yhøøchä mijts xwyiingudsähgøøyy.

⁴³ Caj pues, ca'a yhøøchä.

Je'e hajxy mwiingudsähgøøyy ja'a saandä hänajty xøhajpä Moloc.

Je'e chajtøjc-hahädiuunnaxy hajxy mmädajnaxä, møødä saandä Renfán ja'a miadsa'a-hahädiuunnaxy.

Hamdsoohaambiä saandä hajxy mhädiuun neby hajxy jaduhñ mwiingudsähgø'øwät.

Coo hajxy jaduhñ mjatcø'øy, paady mijts nhøxquejxpädsøma'añ maa ja'a mhamdsoo naaxhajxiän.

Jäguem mijts nguexa'añ Babilonia-nänaxy.

Jaduhñ jim myiñ cujaay maa ja'a Diosmädia'aguiän.

⁴⁴ 'Hoorä, mänaa højts nhaphajt ndeedyhajtämhajxy jecy wiäditiän pactuum, carpa-tøbia'cä Dios hajxy hänajty wyiingudsähgø'ø. Tsajtøjcä carpa-tøy hajxy hänajty wia'añ. Hoy ñä'ä majatiä carpa hajxy hänajty ñä'ä tø. Jaduhñä carpa-tøy hajxy yhädiuunñ nebiä Dios ja'a Moisés ja'a hijxtahnd jecy yaghijxiän coo jaduhñ piahädiünät. ⁴⁵ Ja'a nhaphajt ja'a ndeedyhajtämhajxy, ja'a hajxy jaac púhwäbä jaac hí'cäbä, tehngahnä cuhdujt hajxy hänajty jiaac panøcxy coo ja'a Dios hajxy hänajty wyiingudsähgø'ø carpa-tøbia'c. Jaduhñ hajxy hänajty jiaac paduññä mänaa ja'a Josué hajxy jim wioonøcxyiijän wiinghagajpt maa ja'a wiingjäya'ayhajxy hänajty chäna'ayän. Coo ja'a nhaphajt ja'a ndeedyhajtämä naax hajxy ñädägøøyy tsiptuumbä, ja'a Dioscøxpä hajxy miäjädaacy. Ja'a miädsiphajxy, cøjxä ñaax hajxy yhøxpäyø'øgy. Y coo ja'a David cujecy tiägøøyy gobiernähajpä, je'enä ja'a nhaphajt ja'a ndeedyhajtämä cuhdujt hajxy hänajty jiaac paduñ coo ja'a Dios hajxy hänajty wyiingudsähgø'ø carpa-tøbia'c, ja'a hajxy hänajty tøø jiaac tehñ piú'uyäbä, ja'a hajxy hänajty tøø jiaac tehñ yh'iguiäbä. ⁴⁶ Ja'a David, jaanč tehñ quiumaabiädsøøm jaaya'ay maa ja'a Diosän. Mänitä David ja'a Dios cuhdujt miäyujwaañ coo ja'a tsajtøjc yhädiünät maa ja'a Jacob yhap yhoc ja'a Dios hajxy jaduhñ pia'yá'axät. ⁴⁷ Ca'a Diavitä ja'a tsajtøjc hädiuun ja'a Dioscøxpä. Ja'a David ja'a yhuung Salomón, je'edsä tsajtøjc jaanč hädiuun. ⁴⁸ Pero ja'a Dios tsajpootypä, cab jaduhñ tiehñ yhity tsajtøgooty, ja'a jäya'ayhajxy yhädiuumbiä. Jaduhñä profeta tu'ug jecy quiujahy coogä Dios miänaañ:

⁴⁹ Høøch Dioshajp. Yaač nhäña'ay tsajpootyp.

Yaač nmähane'emy. Jiiby naaxwiin, jíbyhøčhä ndecy nyaghity.

Cábøčhä tøjc nyajmaajiaty maač nbó'xät. Cab jaduhñ yhahixø'øy coo mijtsä tøjc xquiójjät.

Tiičhä tøjc jaduhñ nnä'ä wá'anät.

⁵⁰ Haa ca'a, høøch cøxiä tøø nhuuc hädiuumbä mäduhñtiä yaa tsajpootypä møød jiiby naaxwiin, nømä Dios miänaañ.

⁵¹ Mänitä Esteban jiaac miänaañ:

—Ja'a mijtsä mhapä mdeedyhajxy ja'a jecypiä haampiä, jaanč tehñ quiuhxex hajxy hijty, nebiä Diosmädia'agy hajxy ca'a mabøjpän. Jaanä jaduhñ miltspä, caj mijtsä Diosmädia'agy mmäbøgaambä. Høxtä Dioshespíritupaady hajxy jaduhñ homiänaajä mmädsiphaty. ⁵² Ja'a mijtsä mhapä mdeedyhajxy ja'a jecypiä haampiä, quiøxy jaamduun quiøxy tsaachtuun ja'a profetadøjc hajxy jecy, ja'a Dios hänajty tøø wyiinguéxiäbä coo ja'a mädia'agy hajxy yajwá'xät coogä Dios ja'a yHuung hänajty yaa quiexa'añ hädaa yaabä naaxwiin, ja'a pojpä cädieey ca'a møødpä. Høxtä yagho'cä ja'a profetadøjc-hajxy jaduhñ. Y coo ja'a Dios yHuung yaa jiaanč cädaacy, mänit mijts mgø'øyejcy coo yagho'ogøøjät. ⁵³ Coo ja'a Dios ja'a Moisés cuhdujt jecy miooyy, ja'a Diosmoonsä ja'a Moisés najtsapxøøyyä, ja'a jim tsohmä tsajpootyp, mänit mijtsä mhapä mdeedy ja'a cuhdujt hajxy jaduhñ mioodiägajtsä. Hoyyä Diosmoonsä ja'a cuhdujt hajxy jia yejcy, cab hajxy jaduhñ mgudiunñ —nømä Esteban miädiaacpäðøøyy.

⁵⁴ Coo ja'a teedywiindsønhajxy jaduhñ miädooyy nebiä Esteban hänajty miädia'aguiän, mänitä Esteban hajxy jaduhñ jiaanč tehñ miäjootma'ty. Høxtä tøøtscädajp hajxy hänajty. ⁵⁵ Pero cabä Esteban jaduhñ ñä'ä møjpädaacy. Hix, miøðhajpiä Esteban ja'a Dioshespíritu hänajty. Mänitä Esteban yuughee'py tsajpootyp. Mänit jaduhñ yhjxy coo jim jiaanč tehñ yajxonä maa ja'a Dios yhäña'ayän. Mänitä Jesús jaduhñ yhíjxäbä coo jim yhäñaabiä maa ja'a Dios ñähmøjcän yhahooyhaamby. ⁵⁶ Mänitä Esteban miänaañ:

—Huug hix hajxy. Jaduhñhøčhä tsajt nhixy nebiä hawa'adspän. Ximä Jesucristo yhäña'ay Diosnähmøjc maa yhahooyhaampiän.

⁵⁷ Mäduhñtiä jäya'ayhajxy hänajty yhamädoowhity, mänit hajxy ñidiaatsmo'xä; haa ca'a, cab hajxy hänajty tehngahnä miädowaannä nebiatiä Esteban hänajty miädia'agy. Mänit hajxy tiägøøyy yaaxpä jojpä məcjaty. Mänitä Esteban yajmujcä. ⁵⁸ Mänit yajnøcxä cajtpa'a hadsip. Ja'a häna'cä Esteban hajxy hänajty tøø ñähwaambétiäbä, mänitä jiocxwit hajxy nägøxiä yhøxchijy. Jimä høxcujc-häna'c hänajty tu'ug piädäna'ay, ja'a hänajty xøhajpä Saulo. Mänitä Saulo ñämaayyä coo ja'a jiocxwithajxy cwieendähájtäxät. Mänitä Esteban tiägøøyyä ca'adshó'cäbä. ⁵⁹ Jimä Esteban hänajty quia'adsho'ogyii, mänit tiägøøyy Diospa'yaaxpä. Mänit miänaañ:

—Wiindsón Jesús, tunä mayhajt, høøch njuøhñdy jim wiingpójcäc tsajpootyp.

⁶⁰ Mänitä Esteban jyjcädaacy. Mänit məc yaaxy:

—Dios, ca'a jaduhñ mmøjpäda'agy nébiøch yø'ø häna'c xchaaçhtiuñän, hoy jia møjpo jia møjcädieeyä.

Coo ja'a Esteban jaduhñ jiaac tehñ quiapxy, mänit yho'nä.

8

¹ Y ja'a Saulo, quiumaayy je'eduhñ coo ja'a Esteban yagho'cä.

Ja'a mänitxøøbä ja'a mäbøjpädøjc-hajxy tiägøøyyä jaamduun tsaächtiúunäbä jim Jerusalén. Mänit hajxy xii yaa ñøcxøøyy. Näje'e hajxy miähmøøyy Judea-naaxooty wiinduhmyhagajpt. Näje'e hajxy ñøcxøøbiä Samaria-naaxooty. Jagooyy ja'a apóstolädøjc-hajxy jim jiaac mähmøøyy Jerusalén. ² Mänitä dijuuntä Esteban hoy yajnaaxtägø'oyii. Näje'e jäya'ayhajxy hoy miäyajnaaxtägø'oy, pønjetiä hojiot hänajty møød. Hoyhoyyä Esteban ñäjøøyy ñäxuu'tsä. ³ Y ja'a Saulo, tehngahnä ja'a mäbøjpädøjc hänajty jiaamduñ chaaçhtiuñ wiinduhmyhagajpt. Høxtä jäya'adiøgootypaadiä Saulo hänajty tiägø'oy. Pønjaty hänajty yajpaatp tiøgooty, mänit hajxy hänajty yhøxwich yhøxwooñii, ja'a ya'adiøjc ja'a to'oxiøjc.

⁴ Y ja'a mäbøjpädøjc-hajxy, ja'a hajxy hänajty tøø chóoñäbä Jerusalén, je'enä ja'a Diosmädia'agy hajxy hänajty tehngahnä yajwa'xy ja'a Jesúsøxpä, majaty hajxy hänajty wiädity. ⁵ Høxtáhmdsä craa Felipehajpä, coo jim chohñ Jerusalén, mänit jim ñøcxy Samaria-cajptooty. Coo jim miejch, mänit jaduhñ tiägøøyy mädiaacpä ja'a Jesúsøxpä, coo hänajty je'e Dyiosquexiä. ⁶ Mayyä jäya'ayhajxy hänajty yhamugø'oy mädia'agyhamädoowhijpä waambatiä Felipe hänajty miäna'añ. Madiu'u ja'a Felipe hoy-yagjuøøñäjatypä hänajty yajcähxø'ogy, paadiä miädia'agy hänajty jiaançh tehñ yhamädoowhíjtäxä. ⁷ Pønjetiä haxøøgpä ca'a hoybä hänajty møød, mänit hajxy nämay pia'amnajxy. Yáaxäp jójcäbä haxøøgpä ca'a hoybähajxy hänajty piädsømy. Jaduhñä cø'ømucypiä tecymiucypiähajxy hänajty miøcpøjpä møødä tecymia'adpähajxy. ⁸ Paadiä cu'ughajxy hänajty jiaançh tehñ xioonda'agy jim Samaria.

⁹⁻¹¹ Jimä jäya'ay hänajty tu'ug xiøhaty Simón. Tøø ja'a magia-wiinmahñdy hänajty jejcy tiuñ jim Samaria. Tøø ja'a Simón ja'a jäya'ay hänajty jim may jiaançh tehñ wyiinhøøñ. Jaduhñä Simón hänajty ñiñänømyii cooc tyijy jiaançh tehñ miøj jiaançh tehñ jiaançhä, je'eguiøxpä cooc tyijy ja'a magia hänajty jiaançh tehñ jiaty. Madiu'u ja'a Simón ja'a hoy-yagjuøøñäjatypä hänajty jiaançh tehñ yajcähxø'ogy, paadiä miädia'agy hänajty jiaançh tehñ miäbøjcäxä nägøxiä høxtä ja'a møjtojcpaady:

—Yø'ø Simón, jue'eda'a yø'ø, Dioswiinguexiäda'a yø'ø, paadiä møcmäjaa jaduhñ jiaançh tehñ miøødä.

Jaduhñä Simón hänajty ñänømyii ja'a cú'ugäm. ¹² Jaduhñä Felipe hänajty yajñähixø'oy coogä Dios yhane'emy ja'a miøcmäjaahaam, møød coogä Jesús Dyioswiinguexiä. Mänitä jäya'ayhajxy may miäbøjcy näya'ay nädo'oxy. Mänit hajxy nägøxiä hoy ñäbety. ¹³ Y ja'a Simón, miäbøjc je'eduhmbä. Mänit hoy pianäbejpä. Mänitä Simón ja'a Felipe tiägøøyy møødwädijpä. Yagjuøøbiä Simón hänajty nebiä Felipe ja'a hoy-yagjuøøñäbä hänajty yajcähxø'øguiän.

¹⁴ Y ja'a apóstoldøjc-hajxy, ja'a hajxy hänajty tøø miähmø'øyäbä Jerusalén. Mänit hajxy miädoyhajty coogä cu'ug ja'a Diosmädia'agy hajxy hänajty tøø jiojppøgø'oy jim

Samaria. Mänitä Pedrohajxy jim quiejxä mөөdä Juan. ¹⁵ Coö hajxy jim miehch Samaria, mänit hajxy tiägөөyy Diospa'yaaxpä ja'a mäbөjpadөjcөxpähajxy, weenä Dioshөspiritu hajxy nägөxiä yhadägө'өy jioottägө'өyii. ¹⁶ Hix, cahnä Dioshөspiritu hänajty pөң yhadägө'өy jioottägө'өyii. Tөө hajxy hänajty jia näbety ja'a Jesúsөxpä. Cahnä hajxy hänajty miädoyhatyñä ja'a Dioshөspiriticөxpä. ¹⁷ Coö ja'a Pedrohajxy Dyiospa'yaaxpädөөyy mөөdä Juan, mänitä mäbөjpadөjc-hajxy quiө'өнähxajjä. Mänit hajxy yhadägөөyy jioottägөөyyä ja'a Dioshөspiritäm.

¹⁸ Y ja'a Simón, coö jaduhñ yhiixy, mänitä Pedro xädө'өñ hajxy jia yajmähawaanөөyyä. ¹⁹ Mänitä Simón miänaañ:

—Hөөчh yө'ө mäjaa jaduhmbä yaghabөjcäc. Hix, coöчh pөң jaduhñ ngө'өнähxájät, tehñ jiaduhñ je'e yhadägөөyy jioottägөөyyäbät ja'a Dioshөspiritäm.

²⁰ Mänitä Pedro yhadsooyy:

—Coo miiчh jaduhñ mwi'i tiajy mwi'i miay coö hөjts miiчh ja'a Diosmäjaa nyaghabөgät juyhaam, paady miiчhä Dios xyajcuhdägoyya'añ mөөdä mxädө'өñ. Hix, ñä'a yejpiä Dios jaa miäjaa jaduhñ, caj pөң yajmädoogy. ²¹ Caj miiчh cuhdujt mnä'ägädä mөөdä coö hөjts miiчh ja'a Diostuung xmiөөdtünät, je'eguiөxpä coö miiчhä mwiinmahñdy quia'a nä'ägädä hoyyä ja'a Diosөxpä. ²² Najtshixө'өw ja'a mhaxөөgwiinmahñdy jaduhñ. Jímädä Dios xñä'a mämée'xät coö mmänuu'xtá'agät. ²³ Tөөчh miiчh nhөxcapy coö miiчhä mhaa mjoot jiaanчh tehñ yhaxөөgä, mөөd coö miiчh haxөөg mjaanчh tehñ tiajy mjaanчh tehñ miay mjoodooty mgopcooty.

²⁴ Mänitä Simón yhadsooyy:

—Huuc tunä mayhajt hajxy, huuc Diospa'ya'ax hajxy ja'a hөөчhcөxpä, jaduhñhөчhä Dios xquia'a yajcumädöwät nébiөch hajxy tөө xyajmөөdmädia'aguiän —nөmä Simón miänaañ.

²⁵ Jimä Pedrohajxy hänajty jiaac capxy jiaac mädia'agy ja'a Jesúsөxpä mөөdä Juan, nebiaty hajxy hänajty tөө yhamdsoo yajnähixө'өyii ja'a Jesúsäm. Mänit hajxy wyiimbijnä, mänit hajxy jim ñөcxtägajch Jerusalén näguipxy mөөdä Felipe. Tu'haamnөcpxä, nөөdänäayyap tu'udänäayyap hajxy hänajty ñөcxy. Majatiä cajpthuung jim Samaria-naaxooty, jaduhñä Diosmädia'agy hajxy hänajty yajwa'xy nebiä cu'ugä piojpä quiädieeybä ñähwa'ads quiuhwá'adsät.

²⁶ Coö hajxy jim quioo'ty Jerusalén, mänitä Felipe ja'a Diosmöonsäm tu'ug ñämaayyä, ja'a jim tsohmbä tsajpootyp:

—Nөcxө'өw jim jөөmboj mänajpä. Ja'a möjtu'u mbanөcxäp, ja'a jim nөcpxä maa ja'a cajpt jaduhñ xiөhatiän Gaza.

Ja'a möjtu'u jaduhmbä, pactuum jaduhñ ñөcxө'өy. ²⁷⁻²⁸ Mänitä Felipe jiaanчh tu'ubөjcy. Ja'a tu'haamnөcpxä, mänitä Felipe ja'a jäya'ay tu'ug piaaty, ja'a hänajty tsohmbä Etiopía. Tөө jaaya'ay hänajty yhoy Jerusalén Dioswiingudsähgөөbiä. Quiajptooty hänajty ñөcxnä. Eunuco je'e. Möjtuung hänajty jim miөөd maa ja'a ñaax maa ja'a quiajptän. Xädө'өñgwieendähajpä hänajty jim tiuumby. Ja'a reina mioonsä hänajty je'eduhñ, ja'a hänajty jim mähanehmbä Etiopía. Carretajooty jaaya'ay hänajty ñөcxy nocyhée'päp. Jue'e hänajty quiapxy, ja'a nocy ja'a Isaías jecy quiujähyyäbä, ja'a jecy túunäbä profeta.

²⁹ Mänitä Felipe ñämaayyä ja'a Dioshөspiritäm coö jim miөjwá'agät carretawiinduum.

³⁰ Coö ja'a Felipe jim jiaanчh möjwa'cy carretawiinduum, mänitä Felipe miädooyy coö ja'a Etiopíabä jäya'ay ja'a nocy hänajty quiapxy, ja'a Isaías jecy quiujähyyäbä. Mänitä Felipe jaaya'ay miäyajtөөyy:

—Nej, mwiinjuөөby miiчh jaduhñä nebiaty mgapxiän.

³¹ Mänitä jaaya'ay yhadsooyy:

—Cábөch nwiinjuө'өy. Cábөch pөң nmөөdä pөñhөch jaduhñ xquiapxtөwäp.

Mänitä Felipe ñämaayyä coö jim piэдät carretajooty, coö jim yhөxtá'agät maa ja'a Etiopíabä jäya'ay ñähmөjcän. ³² Jaduhñä jaaya'ay hänajty quiapxy:

Hadsipä mähdiøjc yajnøcxä maa ja'a yagho'taactän, jaduñ nebiä meeg yajnøcxyiijän
maa ja'a yagho'taactän.

Cabä mähdiøjc waamb ñä'ägädä capxy;

jaduñ hamoñ yhiyty nebiä meeg hamoñ yhitiän coo ñähme'xyii.

³³ Hočähdiuunnä ja'a mähdiøjc yagho'cä.

Cab jaduñ pøn ñähgapxtuuty.

Cabä ñøøxä miajc miøødhajty; hix, tøø ja'a jiugyhajt hänajty yaa quiøjxnä hädaa yaabä
naaxwiin.

³⁴ Mänitä Felipe ñämaayyä:

—Tuñä mayhajt, høøch huuc hawáanäc, coo ja'a Isafas jaduñ jecy quiujahy, pøn
jaduñ miädiaac, wiingjäya'ay tøgä je'eguiøxpä —nømä Etiopíabä jäya'ay yajtøøyy.

³⁵ Mänitä Felipe tiägøøyy capxtøøbä waambaty hänajty jaduñ miädia'agytiägø'øy.
Mänit miädiaacy ja'a Jesúsøxpä, coo hajxy hoy xñähho'túutäm. ³⁶ Weeñtiä hajxy jaduñ
jiaac yohy carretajooty, mänitä nøø hajxy piaaty. Mänitä Etiopíabä jäya'ay miänaañ:

—Xii nøø. Nej, cab jaduñ yhahixø'øyä cooçh nnäbétädä.

³⁷ Mänitä Felipe yhadsooy:

—Hahixøøby jaduñ pø tøyhajt jaduñ mmäbøcy hamuumdu'joot.

Mänitä Felipe yhadsoowä:

—Nmäbøjpiøch jaduñ coo ja'a Jesucristo Dyioshuungä.

³⁸ Mänitä Etiopíabä jäya'ay ja'a carreta yajyajtánaaxiøjpä. Mänitä Felipehajxy nämetsc
quiarretamänajcy, møødä Etiopíabä jäya'ay. Mänit hajxy nämetsc ñøødägøøyy. Mänitä
Etiopíabä jäya'ay ñäbejty. ³⁹ Coo hajxy ñøøbädsøømgumbä, mänitä Felipe wiingtuum
yajnøcxä ja'a Dioshøpíritäm. Cabä Felipe yhiyxtägäjtänä ja'a Etiopíabä jäya'ayäm.
Xoonäacäp ja'a Etiopíabä jäya'ay ñøcxnä. ⁴⁰ Y ja'a Felipe, mänit jim miejch maa ja'a
cajpt hänajty xiøhatiän Azoto. Mänit tiägøøyy wädiypä cajpt-cajpt. Yajwa'xypä Felipe
ja'a Diosmädia'agy hänajty nebiä cu'ugä piojpa quiädieeybä ñähwa'ads quiuhwá'adsät.
Mänit jim miejch Cesarea.

9

¹ Y ja'a Saulo, tehngahnä ja'a mäbøjpädøjc hänajty yhadsähgø'øy yhajuø'øy coo
hajxy hänajty yagho'oga'añii, pønjaty hänajty mäbøjp ja'a Jesúsøxpä. Coo ja'a Saulo
hänajty jaduñ tehngahnä jia wi'i miähadsähgø'øwa'añ, paady jim ñøcxy maa ja'a
teedywiindsønän. ² Mänitä Saulo cuhdujt miooyyä nocyhaam coo jim ñøcxät Damasco,
coo ja'a mäbøjpädøjc-hajxy jim yhøxta'awøøjät wiinduhmçhajtøjc, majatiä judíøshajxy
hänajty yhamugø'øyän. Jaduñä Saulo hänajty tiajy miay coo ja'a mäbøjpädøjc-hajxy
hänajty jim nøcxy chuma'añii Jerusalén, ya'adiøjcä tio'oxiøjcä. ³ Mänitä Saulohajxy
tiu'ubøjcy møødä jiamioød nämetsc nädagøøg. Ja ween hajxy hänajty jim quia'a
mech Damasco, mänitä Saulo jøøn møc quiuhjajcädaacä wädiä. Tsajpootypä jøøn
chohndaacy. ⁴ Mänitä Saulo quiädaayy. Mänit miädooyy coo jäya'ay hänajty tu'ug
quiapxy:

—Saulo, Saulo, tiich miich jaduñ coo xwyi'i miädsibø'øy.

⁵ Mänitä Saulo yajtøøyy:

—Wiindsøn, pøn miich jaduñ.

Mänit yhadsoowä:

—Jesúshøch høøch. Høøch miich jaduñ xwyi'i miädsibøøby. Cooçh miich jaduñ
xwyi'i miädsibø'øy, hamdsoo miich jaduñ mničhaächtiiñii.

⁶ Tsähgøøyy tsäyúuyyäbä Saulo yajtøøgumbä:

—Wiindsøn, neby yhahixø'øy njatcø'øwädøch.

Mänit yhadsóowägumbä:

—Pädø'øg, nøcx cajptooty. Jim häna'c xyhawáanät nej mjatcø'øwät.

⁷ Y ja'a Saulo jiamioødhajxy, coo hajxy jaduñ miädooyy nebiatiä Saulo hänajty tøø
miägapxyiijän, jaançh tehñ chähgøøyy hajxy jaduñ. Hix, cab hajxy pøn yhiyxy. Høxtä
hahuum høxtä hawiinds hajxy miähmøøyy. ⁸ Mänitä Saulo jiaançh tänaayyø'cy. Coo

jaduhñ jia wiindøø'xy, cab jadahñ tii yhijsy. Hix, tøø hñajty wyiinxooch. Coø hajxy jaduhñ tiu'ubøjtägajch, wichhaamä Saulo jim yajmejtsä Damasco. ⁹Tägøøgxøø ja'a Saulo jim yhijsy wiinxoods Damasco. Ni quia'a cay ni quia'a hu'ugy hñajty tii.

¹⁰Jimä jäya'ay hñajty tu'ug chñna'ay Damasco, ja'a hñajty xøhajpä Ananías. Tøø ja'a Diosmädia'agy hñajty miäböcy. Mänitä Ananías ja'a Jesús wyiinhijxy haguma'ayhaam. Mänitä Ananías miägäpxä:

—Ananías.

Mänit yhadsooyy:

—Wiindsøn, chaäch høøch, tisän.

¹¹Mänitä Jesús miänaañ:

—Pädø'ög. Nøcx jim maa ja'a møjtu'u jaduhñ xiøhatiän Tødiu'u. Jimä jäya'ay tu'ug chñna'ay, ja'a xøhajpä Judas. Jimä craa tu'ug yhahity, ja'a xøhajpä Saulo. Jim je'e choon maa ja'a cajpt xiøhatiän Tarso. Diospa'yaaxp jim jadunajtä maa ja'a Judas tiøjcän. Coø jim mmédsät, mänitä Saulo myajtówät. ¹²Tøø miichä Saulo xwyiinhixy haguma'ayhaam coø miich hoy mnähdoñ, jaduhñ yhijsägätsät.

¹³Coø ja'a Ananías jaduhñ miädooyy, mänit miänaañ:

—Wiindsøn, tøøch jaduhñ mayhooc nmädoyhaty nebiä craa Saulo naxy jiatcø'øy jim Jerusalén. Náxiägä mäbøjpädøjc-hajxy jim jiaamduñ chaächtiunni, ja'a miichä mmädia'agy hajxy xmiäböjcäbä. ¹⁴Jaduhñhöch tøø nmädoyhajpä coögä cuhdujt jim miooyy coø ja'a mäbøjpädøjc-hajxy yaabä yajnøcxøjät jim Jerusalén, coø hajxy jim chuumäbät, pønjaty miich jaduhñ yaa xquiapxpaatp. Ja'a teedywiindsønä cuhdujt hajxy jaduhñ yejc. Hoorä, tøø ja'a Saulo yaa miejtsnä Damasco —nømä Ananías miänaañ.

¹⁵Mänitä Jesús ja'a Ananías ñämäaguimbä:

—Tsögäm, nøcx cudiün nébiøch miich tøø nhane'emiän. Tøøchä Saulo nyajñahdijy coø miädiá'agät ja'a høøchcøxpä jim maa ja'a israelitahajxiän, møød jim maa ja'a ca'a israelitahajxypän, møød jim maa ja'a guiobiernähajxiän. ¹⁶Høøchä Saulo nyajñahdi-jaamby mäduhñtiä jaduhñ yhahixø'øy chaächpögät ja'a høøchcøxpä.

¹⁷Mänitä Ananías jiaançh nøcxy maa ja'a Saulo hñajty tøø miejtsta'aguiän. Coø ja'a Ananías tiøjtägøøyy, mänitä Saulo quiø'onähgajpä. Mänit ñämaayyä:

—Mägu'ughajpä Saulo, ja'a Jesús miich jaduhñ jim mhijx tu'haammiimbä. Jaayá'ay-høch jaduhñ yaa tøø xquiexy nej miich jaduhñ mhijxø'tägätsät hoy. Y jaduhñ miichä Dioshèspiritu xyhadägø'ow xjioottägø'owät.

¹⁸Tuunä ja'a Ananías jaduhñ ñälä mänaañ, mänitiä Saulo wyiingahduutä nebiä tsaamghacän. Mänitä yhijsø'tägajch. Mänit tiänaayyø'cy. Mänit hoy näbety. ¹⁹Mänit quiaayy yhuucy. Møcpøjc je'e jaduhñ. Mänit jim jiaac mähmøøyy mejtsxøø tägøøgxøø Damasco maa ja'a mäbøjpädøjc-hajxiän.

²⁰Mänitä Saulo tiägøøyy mädia'agy-yajwa'xpä wiinduhmçhajtøjc jim Damasco maa ja'a judíos chajtøjc-hajxiän. Jaduhñ hñajty miädia'agy coögä Jesús Dyioshuungä.

²¹Pønjaty ja'a Saulo miädia'agy hñajty hamädoowhjtäp, jiaançh tehñ yagjuøøby hajxy hñajty jaduhñ nebiä Saulo hñajty miädia'aguiän ja'a Jesúscøxpä. Mänit hajxy tiägøøyy niñämäayyäbä:

—Yøø craa Saulo, jue'e yøø, yøø ja'a mäbøjpädøjc jim wi'i miädsibøøby Jerusalén, pønjetiä Jesús capxpaatp. Paady yøø yaa tøø piejpä Damasco coø ja'a mäbøjpädøjc-hajxy yaa miäjtsäbät, møød coø hajxy jim yajnøcxøød Jerusalén hadsip, jaduhñ hajxy jim nøcxy quiø'øyegyii maa ja'a teedywiindsøn'hajxiän —nømä Saulo ñänøømä.

²²Y ja'a Saulo, tehngahnä hñajty hamøj jootmøj jiaty coø ja'a tsaanä cu'ug hñajty yajwiinxiic yajwiingapxø'øy coögä Jesús Dyioswiinguexiä. Jaançh tehñ homiäböjnä hñajty miädia'agy. Y ja'a judíoshajxy, ja'a hajxy hñajty jim tsänaabiä Damasco, cabä Saulo hajxy hñajty hoy quiapxhaduga'añ, je'eguiøxpä coø Saulo hñajty miädia'agy hamøj jootmøj.

²³Cujecy, mänitä judíoshajxy jim yhamugøøyy. Mänit hajxy quiojyquiapxytiuuñ coögä Saulo hajxy hñajty yagho'oga'añ. ²⁴Xøømdsuhmä Saulo hñajty miäxojna'ayii

mäduhñjatiä tägø'owøødiaactän maa ja'a Damasco-cajpt jiuhmuu'tswädiän. Mänitä Saulo jaduhñ miädoyhajty cooc hänajty yagho'oga'añii. ²⁵ Mänitä mabøjpädøjcä Saulo hajxy coods piädaacy møjcachjooty. Mänit hajxy quihdøøñajxy maa ja'a cajpt hänajty piquiä yhamuudsø'oguiän. Jaduhñdsä Saulo piäyø'cy.

²⁶ Cooc Saulo jim chohñ Damasco, mänit jim ñøcxtägajch Jerusalén. Cooc jim quioo'ty, mänit jim ñøcxøøyy maa ja'a mabøjpädøjc-hajxiän. Pero je'enä ja'a Saulo hajxy hänajty nägøxiä jiaanč tehñ chähgø'øy. Hiç, cab hajxy hänajty ñajuø'øy pø mabøjp hänajty je'ebä. ²⁷ Jimä mabøjpä hänajty tu'ug xiøhaty Bernabé. Je'e mabøcypiä, cab hänajty chähgø'øy. Mänitä Bernabé ja'a Saulo wioonøcxy maa ja'a apóstoldøjc-hajxiän. Mänitä Bernabé ja'a apóstoldøjc yajmøødmädiaacy coogä Saulo ja'a Jesús hänajty tøø wyiinhiçy tu'haamnøcxpä jim Damasco-mäwiingón, møød coogä Jesús ja'a Saulo jim miägäpçy, møød coogä Saulo tiägøøyy mädiaacpä hamøj jootmøj jim Damasco ja'a Jesúscøxpä. Jaduhñä Bernabé ja'a apóstoldøjc yajmøødmädiaacy ja'a Saulocøxpä. ²⁸ Mähmøøyy ja'a Saulo jim Jerusalén. Mänitä Saulo ja'a apóstoldøjc tiägøøyy møødwädiçpä. Mänitä mädia'agy tiägøøyy yajwa'xpä ja'a Jesúscøxpä hamøj jootmøj. ²⁹ Jimä judíoshajxy hänajty näje'e, hagriegio hajxy hänajty yhayuuc-hajpy. Mänitä Saulo tiägøøyy møødyajcapxiøøbiä ja'a Jesúscøxpä. Pero cabä judíoshajxy jaduhñ yhojiäwøøyy. Mänit hajxy wyiinmaayy cooc ja'a Saulo hajxy yagho'ogät. ³⁰ Cooc ja'a mabøjpädøjc-hajxy jaduhñ miädoyhajty coogä Saulo hänajty yagho'oga'añii, mänitä Saulo hajxy miøødnøcxy jim Cesarea. Cooc hajxy jim miejch, mänitä Saulo hajxy quiejxtägajch Tarso.

³¹ Mänitä tsip jaduhñ yhamaadiujnä ja'a mabøjpädøjcøxpähajxy, mäduhñjaty hajxy hänajty xii yaa chäna'ay, møød jim Judea, jim Galilea, jim Samaria. Tehngahnä møcmäjaa hajxy hänajty mio'oyii jøjwidsø'ø ja'a Dioshespíritäm, paady hajxy hänajty jabom-jabom miayø'øy.

³² Y ja'a Pedro, wiinduhmčajtøjc hänajty wiädity mäduhñjatiä mabøjpädøjc-hajxy hänajty chäna'ay. Mänit jim ñøcxøøbiä maa ja'a cajpt hänajty xiøhatiän Lida. Jimä mabøjpädøjc-hajxy hänajty chänaabiä. ³³ Jimä jäya'ay hänajty tu'ug pia'amgo'na'ay, ja'a hänajty xøhajpä Eneas. Tuctujcjumøjt hänajty tøø piøgyii. Jue'e hänajty je'e, cø'ømucy tecymiucy. Cooc ja'a Pedro jim miejch Lida, mänit jim ñøcxy maa Eneas tiøjcän. ³⁴ Mänitä Pedro miänaañ:

—Eneas, ja'a Jesucristo miič xyajmøcpøgaamb. Pädø'og. Pädit yø'ø mgøjxt.

Tuunä ja'a Eneas jaduhñ ñä'ä nämaayy, mänitiä jiaanč pädø'cy. ³⁵ Mäduhñtiä jäya'ayhajxy hänajty chäna'ay jim Lida møød jim maa ja'a joy hänajty xiøhatiän Sarón, cooc hajxy jaduhñ miädoyhajty coogä Eneas hänajty tøø pia'amnaxy, mänitä Eneas hajxy nägøxiä hoy yhiçy cooc tøø jiaanč møcpøcy. Mänitä Diosmädia'agy hajxy tiägøøyy mabøjpä ja'a Jesúscøxpä. Mänitä yhamdsoo cuhdujt hajxy ñajshixøøñä.

³⁶ Jimä tajiäya'ay hänajty tu'ug chäna'ay maa ja'a cajpt hänajty xiøhatiän Jope. Tabita ja'a tajiäya'ay hänajty xiøhaty arameo-ayuuc-haamby. Hagriegohaamby, jue'e hajxy hänajty tyijy Dorcas. Jaduhñ miädia'agytiägø'øy "Gacela." Hoorä, ja'a Dorcas, miäbøjpiä Diosmädia'agy hänajty je'e, paadiä häyoobädøjc hänajty naxy piuhbety, pønjaty hänajty tii yajmaajiajp. Jaanč tehñ yhooyä Dorcas hänajty jiäya'ayhaty. ³⁷ Mänitä Dorcas pia'ambejty. Mänit yho'cy. Mänitä ho'ogyjiäya'ay hajxy yajtsiyy. Mänit hajxy hoy piäda'agy cøxp nähbettøgooty. ³⁸ Jim Jope, wiingón hänajty jim Lida maa ja'a Pedro hänajty yhiän. Hoorä, ja'a mabøjpädøjc-hajxy hänajty jim tsänaabiä Jope, cooc hajxy jaduhñ miädoyhajty coogä Pedro hänajty jim wiädityñä Lida, mänitä cugapçy hajxy metsc quiejxy cooc Pedro paquiä yhuuc nõcxät jim Jope maa ja'a Dorcas hänajty tøø yho'oguiän.

³⁹ Mänitä Pedro jiaanč panøcxy. Cooc hajxy jim miejch Jope, mänitä Pedro wioonøcxä nähbettøgooty maa ja'a ho'ogyjiäya'ay hänajty wyijtsna'ayän. Piquiä ja'a yaamgto'oxy ja'a ho'ogyjiäya'ay hajxy hänajty tøø piäda'agy. Wi'i jioøby wi'i xiuu'tsp hajxy hänajty. Mänitä Pedro ja'a wit tucxy yaghijxä mädyijatiä Dorcas hänajty tøø yhädiuñ. ⁴⁰ Mänitä

Pedro ja'a jäya'ay nägøxiä yhøxquejxpädsøomy. Mänitä Pedro jyjicädaacy. Mänit Dyiospa'yaaxy. Mänitä ho'ogyjiäya'ay wyiinhee'ppejty. Mänit miänaañ:

—Tabita, pädø'øg.

Mänitä Dorcas wyiindøø'xø'cy. Coö ja'a Dorcas ja'a Pedro yhijxy, mänitä Dorcas yhänaayyø'cy. ⁴¹ Mänitä Pedro ja'a Dorcas wyidsø'cy. Mänitä Pedro ja'a mäbøjpädøjc quiuyaaxøyy tøgooty møødä yaamgto'oxy. Coö hajxy tiøjtägøøyy, mänit hajxy yhijxy coö ja'a Dorcas hänajty tøø jiuypjønä. ⁴² Mänitä mädia'agy paquiä wia'xy jim Jope cooc jaduhñ tøø jiuypjøcy. Mänitä jäya'ayhajxy may jiaanč mäbøjcy ja'a Jesúsøxpä. ⁴³ Mänitä Pedro jim jiaac mähmøøyy Jope maxiøø. Jim hänajty miejtsta'agy maa ja'a Simón tiøjcän, ja'a wajhacyajtøøtspä.

10

¹ Jimä jäya'ay hänajty tu'ug chäna'ay Cesarea, ja'a hänajty xøhajpä Cornelio. Soldado-wiindsøn hänajty tiuumby. Italia ja'a soldadohajxy hänajty chooñ. Nämaayä soldadohajxy hänajty jim yhity Cesarea. ² Hoyyä Cornelio ja'a Dios hajxy hänajty wyiingudsähgø'øy møødä yhuung møødä tio'oxy. Hojiootä Cornelio hänajty jiaanč tehñ miøød. Naxiä judiøshajxy hänajty piuhbedyii xädø'øñhaam, ja'a hajxy hänajty häyoobä. Jabom-jabomä Cornelio hänajty Dyiospa'ya'axy. ³ Mänacyxiøø hänajty jaduhñ, jimä Cornelio hänajty tiuñ xiajy tøgooty, mänitä Diosmoonsä tu'ug ñäguehxtøø'xy maa Cornelio hänajtiän. Tsajpootyp ja'a Diosmoonsä hänajty tøø chohnda'agy. Mänitä Diosmoonsä ja'a Cornelio ñämaayy:

—Cornelio.

⁴ Coö ja'a Cornelio ja'a Diosmoonsä jaduhñ yhijxy, chähgøøyy jaduhñ. Jejcy-juøøby miähee'pnaayy. Mänit miäyajtøøyy:

—Wiindsøn, tii mdsojpy.

Mänitä Diosmoonsä yhadsooyy:

—Xquiumaaby miičhä Dios jaduhñ coö miič tehngahnä mba'ya'axy, møød coö miičhä häyoobäjäya'ay naxy mbuhbety. ⁵⁻⁶ Jim Jope, jimä jäya'ay tu'ug chäna'ay mejypia'a, ja'a xøhajpä Simón. Jue'e Simón tiuunghajpy, wajhacyajtøøtsp. Jimä craa tu'ug yhäña'ay maa ja'a Simón tiøjcän. Mejtstu'u ja'a craa xiøø, Simón møød Pedro. Jimä cugapxy mejtstägøøg mguéxät Jope, weenä Pedro jaduhñ nøcxy ñäma'ayii cooc miič yaa min xquiuhixy. Jaaya'ay jaduhñ xyhawáañäp tii miičhä Dios xyajmädsøjpy coö mgudiúnät —nømä Diosmoonsä miänaañ.

⁷ Coö ja'a Diosmoonsä wyiimbijnä, mänitä Cornelio ja'a mioonsä metsc quiuyaaxøyy møødä soldado tu'ug. Dioswiingudsähgøøbiä soldado hänajty. Miøødnijiootpäatäbä Cornelio ja'a soldado hänajty. ⁸ Mänitä Cornelio quiøxy yajmøødmädiaacy waambaty hänajty tøø ñäma'ayii ja'a Diosmoonsäm. Mänitä Cornelio ja'a mioonsä jim quiejxy Jope nädägøøg møødä soldado.

⁹ Cujaboom cujyxioø, jim hajxy hänajty tiu'uyo'oyñä. Ja ween hajxy hänajty jim quia'a mech Jope. Y ja'a Pedro, mänit jim wyiimbejty tøjnähgøxp Diospa'yaaxpä. ¹⁰ Jaanč tehñ yähó'cäbä Pedro hänajty. Jaguiay hänajty je'eduhñ. Jimä quiaay hänajty yaghoyøøyyäxä. Mänit jaduhñ wyiinhijxy ¹¹ coö ja'a tsajt hänajty tøø yhawa'ač. Mänit jaduhñ yhijxy coö tii jaduhñ quiuhdøøñaxyii nebiä poobwit crutypän. Mädaaxc-hitä poobwit hänajty xiojtsø'øguiä. Jaduhñ hänajty miänoonna'ay. ¹² Madiu'u animalhajxy hänajty jim quiähxø'øgy poobwittøguiøxp, møødä hamädaaxtecypihajxy, møødä tsahñdy, møødä muuxy. ¹³ Mänitä Dios ja'a Pedro ñämaayy:

—Pedro, pädø'øg. Yagho'og yø'ø animal maybä. Mänit mdsú'udsät.

¹⁴ Mänitä Pedro yhadsooyy:

—Wiindsøn, caj; cáboch yø'ø animal jaduhñmä mänaa ndsu'uč. Hix, cab højts nguuhdujt jaduhñ myiñ coö højts animal hoñä'ä mädyiibä ndsú'udsät.

¹⁵ Mänitä Pedro ñämáayyägumbä:

—Tijátyhøch nyajnáhdijpy coo hajxy mdsú'udsät, cab jaduñ yhahixø'øy coo hajxy mwiingápxät —nømä Dios miänaañ.

¹⁶ Tägøøghoocä Pedro jaduñ miägäpxä, mänit yhiixy coo ja'a poobwit chajpéjcumbä tsajpootyp. ¹⁷ Wyi'i tiajpy wyi'i miaabiä Pedro hänajty tiiguiøxpä hänajty jaduñ coo tøø wyiinhixy. Y ja'a Cornelio quiugapxyhajxy, tøø ja'a Simón ja'a tiøjc hajxy hänajty piáatänä. ¹⁸ Mänit hajxy møc quiugapxøøyy pø jiiibiä Simón Pedro jiaanč hity.

¹⁹ Y ja'a Pedro, je'enä hänajty wyi'i tiaj wyi'i miay tiiguiøxpä hänajty jaduñ coo tøø wyiinhixy. Mänitä Dioshespíritu ja'a Pedro ñämaayy:

—Mädox, xiiby miich häna'c nädägøøg xyhøxta'ay. ²⁰ Mänac, nøcx yø'ø häna'c yajtøjtägø'øw. Hoy jaduñ coo mbanøcxät coo hajxy hänajty wyiimbida'añ. Hix, høøch yø'ø häna'c jaduñ tøø nguexy coo miich jaduñ xwioonøcxät maa ja'a quiajpthajxiän.

²¹ Mänitä Pedro jiaanč mänajcy. Mänitä Pedro ja'a häna'c nädägøøgpä ñämaayy:

—Høøch Pedrohajp. Høøch mijts xyhøxtaaby. Tiič mijts xwia'ana'añ.

²² Mänit hajxy yhadsooyy:

—Ja'a Cornelio højts tøø xquiexy, ja'a soldado-wiindsón. Jaanč tehñ yhojiäya'ay je'e. Dioswiingudsähgøøby je'e. Jiaanč tehñ chojpiä judfios ja'a Cornelio hajxy. Jiaanč tehñ quiumaaby hajxy jaduñ —nømä Pedro ñämaayyä.

²³ Mänitä Pedro ja'a häna'c nädägøøgpä ñämaayy coo hajxy tiøjtägø'øwät, møød coo hajxy jim miejtstä'agät. Cujaboom hajxy wyiimbijnä näguipxy møødä Pedro. Näje'e ja'a mäbøjpädøjc-hajxy pianøcxpä, ja'a hajxy hänajty jim tsänaabiä Jope.

²⁴ Cumaaxc hajxy jim miehch Cesarea. Jimä Cornelio hänajty yhahixy, møødä jiuuy møødä miägu'ug, møødä miägu'ughajpähajxy. ²⁵ Coo ja'a Pedro jim miehch maa ja'a Cornelio tiøjcän, mänitä Cornelio ja'a Pedro yajpoo'xy. Mänitä Cornelio ja'a Pedro wyiinjjcädaacy. Wyiingudsähgø'øwaambiä Cornelio ja'a Pedro hänajty jaduñ.

²⁶ Mänitä Pedro ja'a Cornelio ñämaayy:

—Tänaayyø'øg, ca'ač nDiosä. Nä'ä pajäya'ayhájpøch høøch nej miichän. Cab jaduñ yhahixø'øy coo miich xwyiingudsähgø'øwät.

²⁷ Mänitä Cornelio jiaanč tänaayyø'cy. Mänit hajxy paquiä miädiaacy. Mänit hajxy tiøjtägøøyy maa ja'a Cornelio miägu'ughajpähajxy hänajty nämay tøø yhamugø'øyän.

²⁸ Mänitä Pedro miänaañ:

—Højts judfios-jäya'ay, jaduñ højts nguhdujt myiñ coo højts jiiby nga'a tøjtagø'øwät maa jäya'ay tiøjc-hajxiän, ja'a hajxy ca'a judfiospä, nébiøch chaa tøø ndøjtägø'øyän. Coočhä Dios jaduñ xyajwiinhixy, jadúñhøch tøø xyajwiinjuø'øy coo jaduñ quia'a hahixø'øy coo pøn nbéxät. ²⁹ Paady, coočhä Cornelio tøø xyajmøjya'axyii, páadyhøch jaduñ tøø nga'a mäna'añ coočhä hänajty nga'a mina'añ. Huuc tunä mayhajt, høøch huuc hawáanäc tiič jaduñ coo tøø xyajmøjya'axyii.

³⁰ Mänitä Cornelio yhadsooyy:

—Maaxtøjcy mädägøøyy, yáabiøch hänajty nDiospa'ya'axy tøgooty. Mänacyiøø hänajty je'e. Mänitä jäya'ay tu'ug ñäguexhøø'xy høøch nwiinduum. Jaanč tehñ yhaambä wyit hänajty. ³¹ Mänitøch xñämaayy: “Cornelio, tøø miichä Dios xmiädoy coo jaduñ jabom-jabom mba'ya'axy. Xquiumaaby miichä Dios jaduñ coo miichä häyoobädøjc mnäxuuch. ³² Capxyñäguex ja'a Simón Pedro jim Jope coo ween yaa myiñ. Jim jaduñ yhahäña'ay maa ja'a craa Simónhajpä tiøjcän, ja'a wajhacyajtøtspä. Mejypia'a mäðyyä chäna'ay. Coo ja'a Simón Pedro yaa miédsät, mänit miich jaduñ xmiøødmädia'aga'añ.” ³³ Mänitøch häna'c jim njaanč quejxy coo miich nøcxy xwiøy. Hoy jaduñ coo tøø mmiñ. Paady højts yaa tøø nhamugø'øy coo højts miich mgapxy mmädia'agy nhamädoowhidáanäm nebiaty miichä Dios tøø xñajtsapxøøyyän coo højts jaduñ xyajmøødmädiaactägätsät. Xyhixp højtsä Dios jaduñ coo højts hamuumdu'joot nmäbøga'añ —nømä Pedro ñämaayyä.

³⁴ Mänitä Pedro tiägøøyy mädiaacpä:

—Tøøch nwiinjuøøñä coo højtsä Dios tu'cuhdugt xchójcäm. Cabä Dios pøn hixy heeby piäda'agy. Tøyhajt jaduhñ. ³⁵ Pønjatiä Dios jaduhñ wiingudsähgøøby hamuum-du'joot, pønjaty hojioot møød, je'edsä Dios quiumaaby, homiädyyi cajptä hajxy jia tsooñ. ³⁶⁻³⁷ Mänaa ja'a Juan tiägø'øyän mäyajnäbejpä, mänitä mädia'agy jim tiägøøyy yajwa'xpä Galilea-naaxooty cooc ja'a Dios ja'a Jesucristo hänajty quiexa'añ maa ja'a israelita-jäya'ayhajxiän, majaty hajxy hänajty chäna'ay, jaduhñä piojpä quiädieeybä hajxy ñähwa'ads quiuhwá'adsät. Jaaya'ay hajxy nägøxiä nWiindsøñhajtäm. ³⁸ Nazaret ja'a Jesús hänajty chooñ. Mänitä Dios ja'a Jesús ja'a yhEspíritu miooyy møødä mäjaa. Jaduhñä Jesús wyiinguejxä coo wiädítät mayhajtuumbä. Pønjaty hänajty pójcäp, yajpa'amnáxpä hajxy hänajty. Pønjatiä haxøøgpä ca'a hoybä hänajty møød, yajnähwáatsäp hajxy hänajty. Puhbéjtäbä Jesús hänajty ja'a Diósäm. ³⁹ Højts, hamdsoo højts nhijxy tijatiä Jesús jim tiuun Judea-naaxooty møød jim Jerusalén. Paady højtsä tøyhajt nmøødä coo tiøyyä. Mänitä Jesús miøjpahbejtä cruzcøxp. Jaduhñ yho'cy. ⁴⁰⁻⁴¹ Pero cumaaxcä Dios ja'a Jesús yagjujypiøjcy. Mänit højtsä Dios ja'a Jesús xyaghijxy coo hänajty tøø jiaançh jujypiøcy. Cabä jäya'ayhajxy nägøxiä yhijxy. Jagooyyä højts nhijxy. Paady højtsä Dios xyaghijxy coo højts hänajty jaduhñ tøø xyajnähdijy. Mänit højtsä Jesús nmøødcaayy nmøødhuucy. ⁴² Mänit højtsä Jesús xwyiinguejxy coo højtsä Diosmädia'agy nøcxy nyajwa'xy wiinduhmyhagajpt ja'a Jesúsøxpä, coo ja'a Dios ja'a Jesús tøø piäda'agy coo jäya'ayhajxy nägøxiä yajtøyhajtyegøøjät, yho'oguiä, jiujuquiä. ⁴³ Jaduhñä profetadøjc-hajxy jecy quiujahy coogä jäya'ayä piojpä quiädieey hajxy yajnähwä'äch yajcuhwa'ächii, pønjatiä Jesús ja'a miädia'agy mäbøjcäp.

⁴⁴ Cahnä ja'a Pedro hänajty miädiaacpädø'øyñä, mänit hajxy nägøxiä yhadägøøyy jioottägøøyyä ja'a Dioshespíritäm, pønjatiä Pedro ja'a miädia'agy hänajty hamädoowhijtäp. ⁴⁵ Y ja'a judíoshajxy, ja'a Pedro hajxy hänajty tøø piameçhíijäbä, ja'a hajxy hänajty mäbøjpä, coo hajxy jaduhñ yhijxy coo ja'a jäya'ayhajxy ca'a judíoshajpä yhadägøøyy jioottägøøyyä, mänit hajxy jiaançh tehñ yagjuøøyy. ⁴⁶ Hix, miädoow ja'a judíoshajxy jaduhñ coo ja'a ca'a judíospähajxy hänajty wiinghayuuc miädia'agy. Jaduhñä Dios hajxy hänajty quiapxpaady coo miøjjä coo jiaançhä. ⁴⁷ Mänitä Pedro ja'a judíos ñämaayy:

—Neby højtsä Dioshespíritu xyhadägøøyy xjioottägøøyyäm, jaanä jaduhñ hädaa jäya'ayhajxy yaabä tøø yhadägøøyy tøø jioottägøøyyäbä, hädaa ca'a judíoshajxypä. Hahixøøby jaduhñ coo hajxy ñäbéjpat.

⁴⁸ Mänitä Pedro ja'a jäya'ay ca'a judíospä jiaançh nämaayy coo hajxy ñäbétät ja'a Jesucristocøxpä. Mänit hajxy hoy jiaançh näbety. Mänitä Cornelio ja'a Pedro ñämaayy coo Pedro jim jiaac hídät mejtsxøø tægøøgxøø maa ja'a Cornelio tiøjcän.

11

¹ Mänitä mädia'agy jim wia'xy Judea-naaxooty wiinduhmyhagajpt coogä jäya'ayä Diosmädia'agy hajxy hänajty tøø jiojppøgø'øy, ja'a hajxy ca'a judíospä. Jaduhñä apóstoldøjc-hajxy miädoyhajty møødä mäbøjpädøjc-hajxy. ²⁻³ Pero coo ja'a Pedro jim ñøcxtägajch Jerusalén, mänit ñähøjjä:

—Tii miichä jäya'ay hoy coo tøø mguhixy, ja'a hajxy ca'a judíospä. Tii hoy coo tøø mmøødcay coo tøø mmøødhu'ugy.

Ja'a mäbøjpädøjc-hajxy jaduhñ mänaañ, ja'a hajxy hänajty mänaambä coo ja'a ca'a judíoshajxy tsipcøxp yajcircuncidarhájpat nebiä judíoshajxy quiuhdujthatiän. ⁴ Mänitä Pedro quiøxy mädiaacy tiiguiøxpä hänajty coo tøø yhoy Cesarea:

⁵ —Jímhøch hänajty nDiospa'ya'axy maa ja'a cajpt xiøhatiän Jope, mänitøch nwiin-hijxy coo tii hänajty quiuhdøøñaxyii tsajpootyp nebiä poobwit crutypän. Mädaaxc-hit hänajty xiojtsø'øguiä. Jaduhñ hänajty miänooñna'ay. Coo jaduhñ ñaaxcädaacy maäch hänajtiän, ⁶ mänitøch jiiby nguheebøøyy poobwittøjiooty. Mänithøchä animal madiu'u nhijxy møødä hamädaaxteycypiähajxy, møødä hawa'anjatypä, møødä tsahñdy, møødä muuxy. ⁷ Mänithøchä Dios xñämaayy: “Pedro, pädø'øg. Yagho'og yø'ø animal. Mänit

mdsú'udsät.” ⁸ Mänítøch nhadsooy: “Wiindsón, caj, cáboch yø'ø animalduhmbä mänaa ndsu'üch. Hiḡ, cab højts nguhdujt jaduhñ myiñ coo højtsä animal hoñä'ä mädyiibä ndsú'udsät.” ⁹ Mäníthøchä Dios jadähooc xñämaaguumbä: “Tijátyhøch nyajnähdijpy coo hajxy mdsú'udsät, cab jaduhñ yhahixø'øy coo hajxy mwiingápxät.” ¹⁰ Tägøøghóoc-høchä Dios jaduhñ xñämaayy, mäníthøchä poobwit nhijxy coo cha-
jpéjcumbä tsajpootyp. ¹¹ Mäníthøchä häna'c nädägøøg xñämejch maačh hänäjty nmejt-
sta'aguiän. Jim hajxy hänäjty tøø chohñda'agy Cesarea. ¹² Mäníthøchä Dioshespíritu
xñämaayy cooçh tähooccapxiä nbadu'ubógät. Mänítøch njaančh møødnøcxy. Mänit hä-
daa mähøjpädøjc-hajxy nädädujc piadu'ubøjpä. Jope hajxy chooñ. Coo højts jim nmejch
Cesarea, mänit højts jim ndøjtägøøyy maa ja'a craa Corneliohajpä tiøjcän. ¹³ Mänit
højtsä Cornelio xyajmøødmädiaacy nébiägä Diosmoonsä tsajpootypä ñäguehxtøø'xiän
ja'a Cornelio wyiinduum. Mänitägä Diosmoonsä ja'a Cornelio ñämaayy: “Jimä craa
tu'ug yhity Jope, ja'a xøhajpä Simón Pedro. Capxyñäguex ja'a craa jaduhñ coo yaa
myíñät. ¹⁴ Coo yaa miédsät, mänit miich xyhawaanaañä nebiä mbojpa mgädieeybä
hajxy mnähwa'ads mguhwá'adsät, møødä mhuung møødä mdo'oxy.” ¹⁵ Cooçh ndägøøyy
mädiaacpä, mänitä Corneliohajxy yhadägøøyy jioottägøøyyä ja'a Dioshespíritäm, neby
højts jayøbajt xyhuuc nägädaacämbän. ¹⁶ Mänítøch njahmiejtstaacy nebiä Jesús tähooc
miänaañän: “Ja'a Juan, nøøhaam hijty miäyajnäbety. Tøyhajt jaduhñ. Pero mijts jaduhñ
xyajnäbetaamb ja'a Dios yhEspírituhaam”, nøm højtsä Jesús xñämaayy. ¹⁷ Y coo hajxy
tøø nmähøjcäm ja'a Jesucristocøxpä, paadiä Dios ja'a yhEspíritu hajxy tøø xmióoyyäm.
Hoorä, ja'a jäya'ayhajxy ca'a judíospä, tøø ja'a Dios ja'a yhEspíritu mioobiä, neby hajxy
tøø xmióoyyämbän. Pøñhøch høøch cooçhä Dios jaduhñ nnä'ä capxhadúgät —nømä
Pedro miädiaacy.

¹⁸ Coo ja'a mähøjpädøjc-hajxy jaduhñ miädoyhajty jim Jerusalén, mänit hajxy hamoñ
haducy miähmøøyy. Mänitä Dios hajxy pia'yaaxy coo miøj coo jiaančh. Mänit hajxy
miänaañ:

—Ja'a jäya'ayhajxy ca'a judíospä, tøø ja'a cuhdujt hajxy mióoyyabä coo ja'a Dios
hajxy jiøjpøgø'øwät, møød coo ja'a yhaxøøgcuhdujt hajxy ñajtshixø'øwät, jaduhñ hajxy
cøjxta'axiøø jiugyhädät nebiä Dios jiugyhatiän.

¹⁹ Tøøyyämä Esteban hänäjty jim yagho'ogyii Jerusalén, mänitä mähøjpädøjc-hajxy
jim tiägøøyyä jaamdúunäbä tsaachtíuunäbä. Coo hajxy jim chohñ, näje'e hajxy
jäguembaady ñøcxøøyy, Fenicia, Chipre, Antioquía. Coo ja'a Diosmädia'agy hajxy
hänäjty yajwa'xy ja'a Jesucristocøxpä homiaajä, jagooyyä judíos ja'a Diosmädia'agy
hajxy hänäjty yajnahixø'øyii. Pønjaty hänäjty ca'a judíos, cab hajxy hänäjty ya-
jnähixø'øyii. ²⁰ Ja'a mähøjpädøjc-hajxy hänäjty jim tsohmä Chipre møød Cirene, coo
hajxy näje'e miejch maa ja'a cajpt hänäjty xiøhatiän Antioquía, hopiønä Diosmädia'agy
yajnahixøøyyä ja'a Jesúsøxpä, møødä judíoshajxy, møødä ca'a judíoshajxypä. Jaduhñ
hajxy yajnahixøøyyä coo ja'a Jesús hajxy nWiindsønähjätäm. ²¹ Ja'a mähøjpädøjc-hajxy,
miøødhjätäbä Dios ja'a miøcmäjaa hajxy hänäjty. Mänitä jäya'ay ja'a jiecycuiuhdujt
hajxy nämay ñajtshixøøyy. Mänitä Dios hajxy jiøjpøgøøyy.

²² Ja'a mähøjpädøjc-hajxy, ja'a hajxy hänäjty hijpä Jerusalén, coo hajxy jaduhñ
miädoyhajty coo ja'a mähøjpädøjc-hajxy hänäjty jim miayø'øy Antioquía, mänitä Bern-
abé hajxy jim quiejxy. ²³ Coo ja'a Bernabé jim miejch Antioquía, mänit yhijxy coo
ja'a Dios ja'a mayhajt hänäjty møj tøø tiuñ, coo ja'a mähøjpädøjc-hajxy hänäjty tøø
jiaančh mayø'øy. Mänitä Bernabé jiaančh tehñ xioondaacpøjcy. Mänitä Bernabé ja'a
mähøjpädøjc ñämaayy coo ja'a Diosmädia'agy hajxy tehngahnä miäbógät hamuum-
du'joot ja'a Jesucristocøxpä. ²⁴ Hojiootä Bernabé hänäjty jiaančh tehñ miøød. Jiaančh
tehñ miøødä Dioshespíritu hänäjty je'eduhñ. Hamuumdu'jootä Diosmädia'agy hänäjty
miäböcy. Paadiä mähøjpädøjc-hajxy hänäjty jaduhñ tehngahnä miayø'øy, ja'a hajxy
hänäjty mähøjpä ja'a Jesúsøxpä.

²⁵ Coo ja'a Bernabé jim chohñ Antioquía, mänitä Saulo hoy piaady. Mänit hajxy
jim nämetsc ñøcxtägajch Antioquía. ²⁶ Tu'jumøjtä Bernabéhajxy jim yhijty møødä

Saulo maa ja'a mǎbǝjpǎdǝjc-hajxiän. Jimǎ cu'ugǎ Diosmädia'agy hajxy nämay yajwiingapxǝyyǎ. Jim Antioquía, jimǎ mǎbǝjpǎdǝjc-hajxy yajxǝbejtsohnǎ cristianos, je'eguiǝxpǎ coo ja'a Jesucristo hajxy hǎnajty tǝǝ jǝjǝpǝgǝ'ǝy.

²⁷ Mǎnitǎ jǎya'ayhajxy näje'e jǝiby quiǎdaacy Antioquía. Jerusalén hajxy hǎnajty tǝǝ chohnda'agy. Tǝǝ hajxy hǎnajty ñajtsapxǝyyǎ ja'a Diósám. ²⁸ Tu'jǎya'ay hǎnajty xiǝhaty Agabo. Tǝǝ ja'a mǎbǝjpǎdǝjc-hajxy hǎnajty yhamugǝ'ǝy. Mǎnitǎ Agabo tiǎnaayyǝ'cy jǎya'ayhagujc. Mǎnit miǎnaañ coogǎ yuuxǝǝ hǎnajty jejcy jiada'añii wiinduhmyhagajpt. Mǎnit jadhun jiaanč tǝjiajty cujicy mänaa ja'a Claudio hǎnajty jim tiuungmǝǝdǎn Roma. ²⁹ Mǎnitǎ mǎbǝjpǎdǝjc-hajxy quiojyquiapxytiuun jim Antioquía coo ja'a xǎdǝ'ǝñ hajxy hǎnajty jim quiexa'añ Judea maa ja'a mǎbǝjpǎdǝjc-hajxy jimban. Jadhun hajxy hanidiuhmjaty jejcy, mäduhñtiǎ xǎdǝ'ǝñ hajxy hǎnajty miǝǝdǎ. ³⁰ Mǎnitǎ xǎdǝ'ǝñ hajxy jadhun jiaanč quejcy. Ja'a Bernabéhajxy jim mänǝcx Judea mǝǝdǎ Saulo. Mǎnitǎ majjǎya'adiǝjc ja'a xǎdǝ'ǝñ hajxy hoy mio'oyii, ja'a hajxy hǎnajty tsǎnaabiǎ jim Judea.

12

¹ Mǎnitǎ mǎbǝjpǎdǝjc-hajxy näje'e tiǎgǝyyǎ jaamdúunǎbǎ tsaačhtiúunǎbǎ. Ja'a Herodes jadhun jatcǝyy, ja'a hǎnajty tuumbǎ gobiernǎ jim Judea. ² Mǎnitǎ Herodes ja'a Santiago yajyagho'cǎ espadahaam, ja'a Juan yhajch. ³ Coo ja'a Herodes jadhun yhijxy coo ja'a judíoshajxy hǎnajty xioonda'agy je'eguiǝxpǎ coo ja'a Santiago hǎnajty tǝǝ yagho'ogyii, mǎnitǎ Herodes ja'a Pedro yajmajtsǎ. Ja'a xǝǝ hǎnajty jájtǎp mänaa ja'a judíos ja'a tsajcaagy hajxy hǎnajty quiayyǎn, ja'a ca'a tsoomiǝǝdpǎ. ⁴ Coo ja'a Pedro jadhun yajmajch, mǎnit chuunǎ. Xǝǝmdsuhm ja'a Pedro hǎnajty cwieendáhadyii ja'a soldádám. Tǎdujc-horajatiǎ soldadohajxy hǎnajty nämädaaxcjaty yhadána'ay. Niguiuwíjtsǎp hajxy hǎnajty. Tǝǝ ja'a Herodes hǎnajty wyiinmay coo ja'a Pedro hǎnajty xǝǝnaxy yajtyyaghyega'añii cu'ughagujc. ⁵ Hoyyǎ Pedro hǎnajty jia tsumiǎ, tehngahnǎ mǎbǝjpǎdǝjc ja'a Dios hajxy hǎnajty pia'ya'axy ja'a Pedrocǝxpǎ, coo yhǝxmadsoǝjǎt.

⁶ Cujaboomǎ Herodes ja'a Pedro hǎnajty yajnǝcxa'añ cu'ughagujc, jim Pedro hǎnajty mia'ay pujxtǝgooty. Coods hǎnajty jadhun. Soldadohajxy hǎnajty mia'ay. Cǝ'ǝxoch hǎnajty jadhun mejtsnax. Jimǎ soldadohajxy hǎnajty yhadána'ay pujxtǝghaawjooty. ⁷ Mǎnitǎ Diosmoonsǎ tu'ug näguehxtǝ'xy ja'a Pedro wyiinduum. Mǎnitǎ jǝǝn jǝiby yajjajǝyy pujxtǝgooty. Mǎnitǎ Diosmoonsǎ ja'a Pedro jiahmyu'xy. Mǎnitǎ Pedro ñǎmaayyǎ:

—Tsógǎm, pǎdǝ'ǝg.

Mǎnitǎ Pedro ja'a cadena quiǝ'ǝgahduutǎ. ⁸ Mǎnitǎ Diosmoonsǎ miǎnáangumbǎ, ja'a hǎnajty jim tsohmbǎ tsajpootyp:

—Niwiǝhnda'adsǝǝ. Pǎgǝ'ǝw yǝ'ǝ mgǝ'ǝg.

Coo ja'a Pedro jadhun quiudiuun, mǎnit ñǎmáayyǎgumba:

—Pǎgǝ'ǝw yǝ'ǝ mjocxwit. Hǝǝčh pajáamǎc.

⁹ Mǎnitǎ Pedro ja'a Diosmoonsǎ jiaanč padu'ubǝjcy. Cabǎ Pedro hǎnajty ñajuǝ'ǝy pǝ tǝyyǎ ja'a Diosmoonsǎ jiaanč hijxy, tǝgǎ ñǎ'ǎ wiinhijx jadhun. ¹⁰ Mǎnitǎ Pedrohajxy jim ñajxy maa ja'a soldado jayǝjpǎ hǎnajty yhadána'ayǎn. Mǎnit hajxy ñajxy maa ja'a miǎmetspǎn. Coo hajxy jim miejch maa tehñ piujxtǝghaawǎn, mǎnit yhawaach hamdsoo. Coo hajxy piǎdsǝǝmy, mǎnit hajxy weeñtiǎ jiaac nǝcxy. Mǎnitǎ Diosmoonsǎ yhadǎgoyyǝñǎ. Nidiuhmǎ Pedro jadhun miǎhmǝyy.

¹¹ Mǎnitǎ Pedro wyiinmahñmejtsnǎ. Mǎnit miǎnaañ quiopcooty:

—Tǝyhajt jadhun coočhǎ Dios ja'a mioonsǎ tǝǝ xyajnáguexy. Tǝǝčh jadhun xyajnáh-wa'ačh ja'a Herodescǝxpǎ mǝǝdǎ judíoshajxy.

¹² Mǎnitǎ Pedro jim ñǝcxy maa ja'a María tiǝjcǎn, ja'a Juan ja'a tiaj. Jadhunǎ Juan hajxy hǎnajty tyijpǎ Marcos. Tǝǝ jǎya'ayhajxy hǎnajty may yhamugǝ'ǝy tǝgooty Diospa'yaaxpǎ. ¹³ Coo ja'a Pedro jim miejch, mǎnitǎ tǝghaaw quiojxnojcy. Mǎnitǎ quixy tu'ug jim miejch maa ja'a tǝghaawǎn, ja'a hǎnajty xǝhajpǎ Rode. Miǎdowaambiǎ Rode

hänajty jaduħn pønä tøjc cojxnoj. ¹⁴ Coo ja'a Rode ja'a Pedro yo'mädooyy, mänitä Rode päyø'øguiä wyiimbijty xoonďáacäp. Cabä Rode ja'a tøjc ñä'ä yaghawaach. Mänit hoy ñägäpxy coogä Pedro hänajty jim tiäna'ay tøguuy. ¹⁵ Mänitä Rode ñämaayyä:

—Tøø miičhäda'a mguhhiñ.

Pero tehngahnä Rode hänajty miäna'añ cooc hänajty jie'ejä ja'a Pedro. Mänit hajxy yhadsooyy:

—Ca'ada'a yø'ø jie'ejä. Ja'a yhaañämädah yø'ø.

¹⁶ Jimä Pedro ja'a tøghaaw hänajty tehngahnä jia wi'i quiojxnocy. Coo hajxy hoy yaghawa'ačh, mänit hajxy yhiixy coo hänajty jiaančh je'ejä. ¹⁷ Mänitä Pedro seña tiuunñ quiø'øhaam coo hajxy yhamónät. Mänit jaduħn miädiaacy neby hänajty tøø yajpädsomyii pujxtøgooty ja'a Diósäm. Mänit jiaac mänaañ:

—Nøcxä Santiago hajxy hawaañä møødä mabøjpädøjc cooch tøø nnähwa'ačh.

Coo ja'a Pedro jaduħn miädiaacpädøoyy, mänit wiingtuum ñøcxnä.

¹⁸ Coo jioböñä, mänitä soldadohajxy jiaančh tehñ yagjuøoyy coo ja'a Pedro hänajty quia'a jiibiän pujxtøgooty. ¹⁹ Mänitä Herodes yhaneħmy coo ja'a Pedro yhøxta'awóøjät. Coo ja'a Pedro maa quia'a yajpaaty, mänitä soldadohajxy yajnähdsømmä, ja'a hajxy hänajty tøø yhadänä'ayäbä maa ja'a pujxtøjcän. Mänitä Herodes yhaneħmy coo ja'a soldadohajxy yagho'ogóøjät. Mänitä Herodes jim chohñ Judea. Mänit jim ñøcxy tsänaabiä Cesarea.

²⁰ Mänitä Herodes ja'a cu'ug jiaančh tehñ miäjootma'ty, ja'a hajxy hänajty tsänaabiä jim Tiro møød jim Sidón. Mänitä cu'ughajxy nägøxiä quiojyquiapxytiuunñ coo hajxy nägøxiä jim ñøcxät ja'a Herodes wyiinduum. Jimä Herodes ja'a mioonsä hänajty tu'ug xiøhaty Blasto. Møjtuungä Blasto hänajty jim miøød maa ja'a Herodes wyiinduuman. Mänitä cu'ugä Blasto hajxy miäjuuuy coo ja'a Blasto ja'a cu'ug piuhbédät, weenä tsip jaduħn ñaxy miay. Hiñ, jimä cu'ughajxy hänajty tiuundaacthaty maa ja'a Herodes ñaaxootiän. ²¹ Coo hajxy hänajty tøø yajcuhducy mänaa hajxy hänajty jim yhamugø'øwa'añän maa ja'a Herodes wyiinduuman, mänitä Herodes ja'a reewyit piägøoyy. Mänit jim yhøxtaacy maa ja'a yhäñaabiejtän, maa ja'a cu'ughajxy hänajty tøø yhamugø'øyän. Mänitä Herodes ja'a cu'ug tiägøoyy møødmädiaacpä. ²² Mänitä cu'ughajxy tiägøoyy yaaxpä:

—Yø'ø craa xim capxpä, jue'e yø'ø, Diosäda'a yø'ø; ca'ada'a yø'ø jiäya'ayä neby højtshájtäm.

²³ Tuunä hajxy jaduħn ñä'ä mänaañ, mänitä ja'a Diosmoonsä ja'a Herodes yajpa'ambejty. Paady jaduħn yajpa'ambejtä je'eguiøxpä coo ja'a Dios hänajty tøø quia'a wiingudsähgø'øy. Mänitä Herodes tiøøngcuhdsu'tsä. Mänit yho'nä.

²⁴ Pero ja'a Diosmädia'agy, tehngahnä hänajty jaduħn wia'xy wiinduhmyñaax wiinduhmyguiajpt.

²⁵ Hoorä, coo ja'a Bernabé møødä Saulo ja'a majjäya'adiøjc ja'a xädø'øñ hajxy hänajty tøø mio'oy jim Jerusalén, mänit hajxy wyiimbijnä. Mänit hajxy ñøcxtägajch jim Antioquía. Quipxiä Juan Marcos pianøcxy.

13

¹ Jim Antioquía, jimä jäya'ayhajxy hänajty may tøø yhamugø'øy Jesúswiingudsähgøøbiä. Naje'e hajxy hänajty tiuñ Diosmädia'agy-yajwiingapxøøbiä. Naje'e hajxy hänajty tiuumbä yajnähixøøbiä. Ja'a hajxy hänajty jaduħn tuumbä, jue'e hajxy hänajty xiøhaty: Bernabé, Simón ja'a ħumybiä, Lucio ja'a Cirene-tsoħmbä, Saulo, møød Manaén. Quipxiä Manaén ja'a Herodes hänajty tøø miøødmuutsc-haty, ja'a hänajty jim tøø guio-biernähátiäbä Galilea. ² Jiibiä Dios hajxy hänajty wyiingudsähgø'øy jaguiay jayhu'ugy maa ja'a chajtøjc-hajxiän. Mänit hajxy ñämaayyä ja'a Dioshespíritäm:

—Tøøchä Bernabé møødä Saulo nyajnähdiijy coochä nduung hajxy xtiúunät. Mwiinguéxäp hajxy jaduħn.

³ Coo ja'a mabøjpadøjc-hajxy jaduhñ Dyiospa'yaaxpadøyy, mänitä Bernabéhajxy quiø'onähgajpä møødä Saulo. Mänitä Bernabéhajxy tiu'ubøjñä møødä Saulo.

⁴ Mänitä Bernabéhajxy wyiinguejxä ja'a Dioshespíritäm coo hajxy wiädítät Diosmädia'agy-yajwa'xpä. Mänit hajxy jii by yhädaacy maa ja'a cajpt hänajty xiøhatiän Seleucia. Mänit hajxy hoy biarcotägø'øy. Mänit hajxy ñøcxy mejyhawiimb maa ja'a naax hänajty xiøhatiän Chipre, ja'a mejyhagujpä. ⁵ Coo hajxy jim miejch, mänit hajxy jim biarcomanajcy maa ja'a cajpt hänajty xiøhatiän Salamina. Mänit hajxy tiägøyy Diosmädia'agy-yajwiingapxøöbiä maa ja'a judíos chajtøjc-hajxiän. Jimä Juan Marcos hänajty piawädijpä nä'a jamiøød.

⁶ Coo ja'a Bernabé ja'a cajpthuung hajxy hänajty tøø quiøxy hawädity jim Chipre, mänit hajxy miejch maa ja'a cajpt hänajty xiøhatiän Pafos. Jimä jäya'ay hänajty tu'ug wiädijpä, ja'a hänajty xøhajpä Barjesús. Judío hänajty je'e. Wiinmahñmøød hänajty je'e. Jaduhñ hänajty yhöñda'agy cooc tyijy hänajty je'e Dyiosquexiä. ⁷ Hoyyä Barjesús ja'a Sergio Paulo hänajty miøødnimiägu'ughadyii, ja'a hänajty tuumbä gobernador. Coo ja'a Sergio Saulo jaduhñ miädoyhajty coo ja'a Bernabé ja'a Diosmädia'agy hajxy hänajty miäwädity, mänitä Bernabéhajxy miøjyaaxä møødä Saulo. Miädowáambiägä Sergio Paulo ja'a Diosmädia'agy hänajty. ⁸ Haa ja'a Barjesús, Elimas hänajty xiøhaty hagriegoaam. Hoorä, coo ja'a Elimas jaduhñ miädoyhajty coogä Sergio Paulo ja'a Diosmädia'agy hänajty miädowa'añ, cabä Elimas jaduhñ yhojiäwøøyy. Mänitä Elimas ja'a Sergio Paulo jia jøjcapxøøyy coo quia'a mabögät. ⁹ Haa ja'a Saulo, mejtstu'u hänajty je'e xiøhajpä møødä Pablo. Hoorä, miøødä Pablo ja'a Dioshespíritu hänajty. Mänitä Pablo ja'a Elimas wyiinhee'ppejty. ¹⁰ Mänit yhojy:

—Møjcu'uhuung, mjaanč tehñ yhöñdaacp miich. Jaanč tehñ yhaxøøg miichä mwiinmahñdy. Caj miich myajmädsocy coo jäya'ayhajxy hoy quiuhdujthädät. Tii miich jaduhñ coo mwi'i miäna'añ cooc tyijy ja'a Diosmädia'agy quia'a tøyyä. ¹¹ Xyajcumädowaamb miichä Dios. Xyajwiinxoodsaamb miich jaduhñ. Jecy miich wiinds mmähmø'owa'añ. Caj miichä jajpä mdsoj hixa'añ, —nømä Elimas ñämaayyä.

Mänitä Elimas jiaanč wiinxoo'ch. Hobiänejpä hänajty tioonä'ay maa ñøcxø'owät. Yhöxtaaby hänajty jaduhñ pøn jaduhñ wiinwidsäp. ¹² Coo ja'a Sergio Paulo jaduhñ yhiijy nebiä Elimas hänajty tøø jiaty tøø yhabetiän, mänit yagjuøøyy. Mänitä Diosmädia'agy jiaanč mabøjcy coo tiøyyä.

¹³ Mänitä Pablohajxy jim biarcotägøøguiumbä, møødä Bernabé, møødä Juan Marcos. Mänit hajxy miejñájxcumbä. Mänit hajxy miejch maa ja'a cajpt hänajty xiøhatiän Perga, jim maa ja'a naax hänajty xiøhatiän Panfilia. Jimä Juan Marcos wyiimbijnä nidiuhñ. Mänit yhädaacnä Jerusalén. ¹⁴ Coo ja'a Pablohajxy jim chohñ Perga, møødä Bernabé, mänit hajxy jiaac nøcxy maa ja'a cajpt hänajty xiøhatiän Antioquia, jim maa ja'a naax hänajty xiøhatiän Pisidia. Coo ja'a poo'xxiøø yhabaaty, mänitä Pablohajxy chajtøjtagøøyy maa ja'a judíos chajtøjc-hajxiän. Mänit hajxy jii by yhänaaguiädaacy. ¹⁵ Ja'a häna'c-hajxy hänajty jii by tuumbä tsajtøgooty, mänitä Diosmädia'agy hajxy quiapxy maa ja'a Moisés jecy quiujahyyän, møødä maa ja'a profetahajxy jecy quiujahyyän. Mänitä Pablohajxy ñämaayyä:

—Mägu'ughajpadøjc, pø jii mijts mädia'agy hajxy mmädia'aga'añ, huuc capx hajxy, weenä cu'ughajxy miädoy.

¹⁶ Mänitä Pablo tiänaayyø'cy. Mänitä quiøø chajtsihy, weenä cu'ughajxy jaduhñ yhamädoowhity. Mänit miänaañ:

—Huuc hamädoowhit hajxy nägøxiä, mijts israelitashajxy, møødä mijts ca'a israelítäbä. Mhaagä wiingudsähgøöbiä Dios hajxy. ¹⁷ Højts israelítäbä, Dios højts nDioshajpy. Jegyhajty højtsä nhapä ndeedyhajxy hijty jim yhadsäna'ay maa ja'a naax xiøhatiän Egipto. Mänit hajxy jaduhñ yajnähdiijä ja'a Diósäm coo hajxy hänajty quiu'ughada'añii ja'a Diósäm. Mänit hajxy jim Egipto yhöxwoobädsøømä ja'a Diósäm. Jaduhñä Dios ja'a miäjaa yajcähxø'cy. ¹⁸ Coo hajxy jim wiomejtsä pactuum maa hänajty pøn quia'a tsäna'ayän, jim hajxy miähmøøyy juxychägui'xjomøjt. Miee'xtujpiä

Dios hänajty jaduhñ, hoyyá miädia'agy hänajty quia'a jagä yajtuunäxä. ¹⁹ Mänitä israelitashajxy jim ñöcxxy maa ja'a naax hänajty xiøhatiän Canaán. Ja'a jäya'ayhajxy hänajty jim tsánaabiä, ja'a näjuxtujc-hagajtpä, cøjx hajxy yajcuhdägoyyii ja'a Diósäm. Mänit højtsä nhapä ndeedyhajxy ñaaxpaatnä. ²⁰ Mädaaxmägo'xjomøjt ja cupc hänajty tøø yhity coo hajxy hänajty tøø chooñ Egipto.

'Mänitä Dios miänaañ coo cuduung hajxy miøødhädät. Jaduhñ hajxy jecy miøødhajty. Ja'a Samuel, je'eds jaac tehñ tiuun cuduung. ²¹ Mänitä cu'ughajxy miänaañ coo gobiernä hajxy mio'owøøjät, coo hajxy jaduhñ yhane'emøøjät. Mänitä Dios ja'a Saúl yajnähdiij coo je'e tiünät gobiernä, ja'a Cis yhuung. Benjamín ja'a Cis hänajty jegyhajty tøø yhaphaty tøø tieedyhaty. Juxychägui'xjomøjtä Saúl jaduhñ tiuun gobiernä. ²² Mänitä Dios miänaannä coo Saúl jaduhñ quia'a tüunnät gobiernä. Jaduhñ miänaannä coo David jaduhñ ween tiuunnä gobiernä: “Njaanç tehñ quiümáabiøchä David jaduhñ, ja'a Isai yhuung. Cøxaamb jaduhñ quiudiuna'añ waambátyhøch nnäma'awa'añ”, nømä Dios ja'a David jecy ñänøømy. ²³ Mänitä Jesús cujegy jiaac mejch. Ja'a Jesús ja'a David jecy yhaphajt tieedyhajt. Paadiä Dios ja'a Jesús quiejxy coo ja'a israelitashajxy jaduhñ ween miñ yajnähwa'açhii. Jéquiänä Dios hajxy jaduhñ yajwiinwaanøøyyä coogä yajnähwaatpä hänajty quixa'añ. ²⁴ Cahnä Jesús hänajty tiägø'øyñä wädijpä, jimä Juan ja'a israelitas ja'a Diosmädia'agy hänajty yajwiingapxø'øy coo ja'a yhaxøøgcuhdujt hajxy nägøxiä ñajtshixø'owät, møød coo ja'a Dios hajxy hamuumdu'joot wyiingudsähgø'owät, møød coo hajxy ñäbétät. ²⁵ Coo ja'a Juan hänajty tiuumbädø'øwaannä, mänit miänaañ: “Jaduhñhøch mijtsäda'a xñänømy cooc tyijy høøch nGristo. Ca'açh nje'ejä. Jímhøchä njamiøød tu'ug jiaac medsa'añ. Maas møcmäjaamøød je'e miedsa'añ queeçh høøch. Cábøch cuhdujt jaduhñ njaty møødä nebiä cuhdujt je'e miøødän ja'a jaac medsaambä.”

²⁶ 'Mägu'ughajpädøjc, højtsä Abraham jecy nhaphajt ndeedyhajtäm; møød mijts ca'a judiøspä, mwiingudsähgøøbiä Dios hajxypä. Nägøxiä ja'a Dios hajxy tøø xyajnähdiijäm coo hajxy nägøxiä xyajnähwa'adsaanäm. ²⁷ Coo ja'a Jesús quioo'ty Jerusalén, cabä cu'ughajxy hänajty ñajuø'øy coo hänajty je'e Dyiosquexiä. Ni ja'a teedywiindsøn'hajxy hänajty quia'a najuøøbiä. Coo ja'a Jesús hajxy yajyagho'cä, jaduhñä Diosmädia'agy hajxy yajtøjiajty nej myiñän cujaay coo ja'a Diosquexy hänajty yagho'oga'añii. Ja'a profetadøjc-hajxy jaduhñ jecy cujahy, ja'a Diosmädia'agy hajxy hänajty jegyhajty mäwädijpä. Hoyyá cu'ugä Diosmädia'agy hänajty jia mädooy wiingusábadohaam nebiä profetadøjc ja'a Diosquexy hajxy hänajty jia mädia'aguiän, cabä cu'ughajxy hänajty ñajuø'øy coo ja'a Jesús hänajty Dyiosquexiä. ²⁸ Jaduhñä cu'ughajxy hänajty tehngajnä ñä'ägä mänaañ cooc tyijy ja'a Jesús hänajty hanaxiä tøø quiädieey. Pero cab hänajty jaduhñ ñä'ä tøyäbä. Hoy hänajty quia'a jagä tøyä, tehngajnä cu'ug ja'a Pilato hajxy jaduhñ ñamaaay coo ja'a Pilato ja'a Jesús yajyagho'ogøøjät. ²⁹ Coo ja'a Jesús jaduhñ jiaanç ho'cy, cøjx jaduhñ tiøjiaty nebiaty jim miädia'agyijän maa ja'a Diosmädia'agy myiñän. Mänit yajmänajcä cruzcøxp. Mänit hoy yajnaaxtägø'øyii. ³⁰ Mänitä Dios ja'a Jesús yagjujyiptägajch. ³¹ Mayhoocä Jesús jaduhñ jiaac hijxä ja'a jiamiøødhajxy, ja'a hajxy hänajty quipxy tøø piadsøhndá'aguiäbä jim Galilea. Quipxiä Jesús hajxy piagoo'ty Jerusalén. Hoorä, jäda'ahatiä Jesús hajxy miädiaacpä maa ja'a judiøshajxiän coogä Jesús Quiäristo.

³² 'Paady højts mijts jaduhñ nyajwiingapxø'øy ja'a Jesúsøxpä. Jequiän højts nhap ndeedyhajxy yhawäänäxä ja'a Diósäm coogä Dios ja'a yajnähwaatpä hänajty quixa'añ. ³³ Coo ja'a Jesús hajxy tøø xñähho'túutäm, møød coo jiuujyiptägajch, jaduhñä Jesús hajxy tøø xjiaanç yajnähwaatsäm. Jaduhñä Dios ja'a miädia'agy yajtøjiajty neby højts nhap ndeedyhajxy jecy yhawäänäxäm coogä Dios ja'a yajnähwaatpä hänajty quixa'añ. Jaduhñ jim myiñän cujaay maa ja'a salmo miämetspän: “Høøch miiçh nHuunghajpy. Jäda'açh miiçh tøø nyagjujyiptägach.” ³⁴ Jéquiänä Dios jaduhñ miänaañ coogä yHuung hänajty yagjujyiptägatsa'añ, jaduhñäc je'e quia'a pú'udsät. Jaduhñ jim myiimbä cujaay maa ja'a Diosmädia'aguiän: “Míjtshøch ngunuu'xaamby nébiøchä David tøø nyajnäma'ayän. Nyajtøjiadäämbiøch jaduhñ.” ³⁵ Jaduhñ jim myiimbä cujaay wi-

ingsalmojooty: “Caj miičh mmäna'ana'añ coo ja'a mHuungä ñi'xä quiopc piú'udsät, coo hänäjty tøø yho'ogy. Myagjujyjiøjtägatsaamby miičh jaduñ”, nømä Dios ñämaayyá. ³⁶ Hoorä, coo ja'a David jecy miähanehmbädøøyy nebiä Dios hänäjty tøø yajnähdiijiän, mänitä David yho'nä tiägoonä. Mänit hoy ñaaxtägø'oy. Mänit piuutsnä. Tøyhajt jaduñ. ³⁷ Pero ja'a Jesús, coo je'e yho'cy, cab je'e piuuch, je'eguiøxpä coo yagjujyjiøjtägajtsä. ³⁸⁻³⁹ Mägu'ughajpädøjc, huuc hamädoowhit hajxy, jaduñ højts mijts nyajwiingapxø'oy coo ja'a Jesús hajxy nägøxiä tøø xñähho'túutäm, møød coo jadähooc jiujiøjtägajch. Pønjaty jaduñ mäbøjp, nähwa'adsaamb hajxy je'e; hawa'adstuum hajxy miähmø'owa'añ. Hoyyä jecyquihdujt hajxy hijty nja wi'i quiudiunäänäm, ja'a Moisés jecy quiujähyyäbä, cab hajxy hoy pedyii ngudiunäänäm, paady hajxy hijty nga'a nähwa'adsäänäm. ⁴⁰ Naxy hädaa mädia'agy hajxy mdehm miäbøgät neby højts mijts cham nyajwiingapxø'oyän. Pø caj, weñdä hajxy mjat mhabétät nebiä profetadøjc-hajxy jecy quiujähyyän:

⁴¹ Huuc mäadow hajxy, pønjaty jaduñ mäwiingapxpejp,

myagjuø'owäp hajxy jaduñ;

mniguii'uds mniguiuhhämeedø'owøjöp hajxy.

Hix, hoy-yagjuøøñoch jaduñ njaanč tehñ yajcähxø'oga'añ maa mijts mwiinduumhaxiän.

Pero cab hajxy jaduñ miäbøga'añ, ja'a hajxy hamdsoo ca'a hixaambä, nømä Dios jecy miänaañ.

⁴²⁻⁴³ Mänitä Pablo miädiacpädøøñä. Coo ja'a Pablohajxy chajtøjpädsøemy møødä Bernabé, mänit hajxy ñämaayyá coo hajxy jadähooc ween min miädia'agy ja'a sábado hänäjty jaac miimbä, neby hajxy hänäjty tøø yhuuc mädiacpän. Mänitä Pablo jäya'ay hajxy may piadu'ubøjcä, møødä judfoshajxy, møødä ca'a judfospähajxy, ja'a Diosmädia'agy hajxy hänäjty mäbøjpä. Mänitä Pablohajxy miänaañ coo ja'a jäya'ayä Dios hajxy homiänaajä yhajodhadät.

⁴⁴ Coo ja'a sábado hänäjty jadähooc yhabáatcumbä, mänitä cu'ughajxy jim miejch maa ja'a judíos chajtøjc-hajxiän. Tøø ja'a cu'ughajxy hänäjty miädohyaty coo ja'a Pablo ja'a Diosmädia'agy hänäjty jadähooc miädia'agáangumbä. ⁴⁵ Coo ja'a judíos wyiindsøn hajxy jaduñ yhjxy coo ja'a cu'ughajxy hänäjty jaanč tehñ miay tøø miech Diosmädia'agyhamädoowhijpä, mänit hajxy jiootma'ty. Mänit hajxy tiägøøyy mänaambä cooc tyjy ja'a Pablohajxy hänäjty yhøhnda'agy. Wiingapxéjtäbä Pablohajxy hänäjty jaduñ.

⁴⁶⁻⁴⁷ Pero cabä Pablohajxy ñä'ägä møjpädaacy. Mänit hajxy yhadsooyy:

—Jaduñ højtsä Dios tøø xwyiinguexy coo højts mijts judfospä jayøjp nyajwiingapxø'owät ja'a mädia'agy ja'a Jesúscøxpä. Pero caj mijts hädaa mädia'agy mnä'ägä mädowna'añ. Coo hajxy jaduñ mga'a mäbøga'añ, paady jaduñ quia'a hawiinmatsä coo hajxy homiänaajä mjyghädät nebiä Dios homiänaajä jiugyhatiän. Cab højts mijts hädaa mädia'agy nyajmøødmädia'agaannä. Jim højtsä jäya'ay nøcxy nnä'ägä yajwiingapxø'owaannä, ja'a hajxy ca'a judfospä. Jaduñ jim myiñ cujaay maa ja'a Diosmädia'aguiän.

⁴⁸ Coo hajxy jaduñ miädooyy, ja'a hajxy ca'a judfospä, mänit hajxy xioondaacpøjcy. Mänit hajxy tiägøøyy mänaambä coogä Diosmädia'agy ja'a Jesúscøxpä jiaanč tehñ yhooyä. Mänit hajxy nägøxiä miäbøjcy, pønjetiä Dios hänäjty tøø yajnähdiijy coo hajxy jiugyhada'añ homiänaajä neby je'e jiugyhatiän. ⁴⁹ Mänitä Diosmädia'agy ja'a Jesúscøxpä tiägøøyy wa'xpä wiinduhmyhagajpt. ⁵⁰ Mänitä mäyøøjäya'ayhajxy jiojcapxøøyyä møødä to'oxiøjc-hajxy, ja'a hajxy hänäjty Dioswiingudsähgøøbiä. Jaduñ hajxy ñämaayyá coo ja'a Pablo miädia'agyhajxy quia'a mäbøjcäxät. Ja'a judföswiindsøn hajxy jaduñ mänaañ. Jaduñ hajxy hänäjty miänaambä coo ja'a Pablohajxy yhøxpäbo'owøjät. ⁵¹⁻⁵² Mänitä Pablo ja'a tiecy hajxy wyiinxiyty wyiinwojpy, weenä naaxoc jaduñ quiøxy ca'ay. Hijxtahñd hajxy jaduñ yajcähxø'c coo ja'a jäya'ay ja'a Diosmädia'agy hajxy hänäjty nämay quia'a mäbøga'añ. Pero ja'a jäya'ayhajxy hänäjty mäbøjpä, jaanč tehñ xioondaacp hajxy hänäjty. Høxtä piaatypä Dioshespíritu hajxy hänäjty. Mänitä

Pablohajxy jim chohnnä mөөдä Bernabé. Mänit hajxy jim ñöcxxy maa ja'a cajpt hänajty xiøhatiän Iconio.

14

¹ Mänitä Pablohajxy jim miejch Iconio. Coö sábadö yhabaaty, mänit hajxy ñöcxxy maa ja'a judíos ja'a chajtøjc-hajxiän. Mänitä Pablo ja'a Diosmädia'agy hajxy yajwiingapxøøyy. Mänitä jäya'ayhajxy may miäbøjcy, mөөдä judíoshajxy, mөөд hajxy ca'a judíospä. ² Pero cabä judíoshajxy nägøxiä miäbøjcy. Mänitä jäya'ayhajxy jiojcapxøøyyä, ja'a hajxy hänajty ca'a judíospä, ja'a hajxy hänajty mäbøjpä. Jaduhñ hajxy jiojcapxøøyyä coö ja'a Pablo miädia'agy hajxy quia'a mäbøjcäxät. Ja'a judíoshajxy jaduhñ mänaañ, ja'a hajxy hänajty ca'a mäbøjpä. Jaduhñ hajxy hänajty miänaambä coö ja'a Pablohajxy wyiingapxpedøøjät. ³ Jejquiä Pablohajxy jim jiaac hijty Iconio. Cabä Diosmädia'agy hajxy hänajty tsähgø'ø-tsähgø'ø ñä'a mädia'agy. Jaduhñ hajxy hänajty miädia'agy coögä Dios hajxy xjiaanč tehñ chójcäm. Madiu'u ja'a Pablo pa'am hajxy hänajty yajnaxy. Hijxtahñd hajxy hänajty yajcähxø'py jaduhñ coö ja'a Pablo ja'a Jesús ja'a miäjaa hajxy hänajty tøø mio'oyii. Hix, ja'a Jesús ja'a miäjaahaamä pa'am hajxy hänajty yajnaxy. Jaduhñä cu'ughajxy hänajty ñajuø'øy coö ja'a Dios hajxy tøyhajt xjiaanč tsójcäm. ⁴ Pero cabä cu'ughajxy hänajty tiu'ugmädia'aguiä. Näje'e ja'a judíos miädia'agy hajxy hänajty miäbøjcä. Näje'e ja'a Pablo miädia'agy hajxy hänajty miäbøjcä. Dioswiinguexiä Pablohajxy hänajty tiuumby mөөдä Bernabé. ⁵ Mänitä möjtuungmөөд-pähajxy quiojyquiapxytiuuñ coö ja'a Pablohajxy quiuhga'adsøøjät. Jaduhñä judíoshajxy piämänaambä mөөд hajxy ca'a judíospä. ⁶ Coö ja'a Pablohajxy jaduhñ miädooyy, mänit hajxy jim piäyø'cy. Mänit hajxy ñöcxxy maa ja'a naax hänajty xiøhatiän Licaonia, mөөд maa ja'a cajpt hänajty xiøhatiän Listra mөөд Derbe. ⁷ Mänitä Diosmädia'agy hajxy jim tiägøøyy yajwiingapxøøbiä Licaonia-naaxooty wiinduhmyhagajpt.

⁸ Jimä pa'amjäya'ay hänajty tu'ug chäna'ay Listra. Tecymiuquiä mähdiojç hänajty tøø myiñ tøø quia'ay. Cahnä hänajty mänaa yo'oyø'ogy. ⁹ Jiaanč tehñ yhamädoowhijpiä mähdiojç hänajty waambatiä Pablohajxy hänajty miädia'agy. Coö ja'a Pablo ja'a mähdiojç jaduhñ yhjxy coö ja'a mähdiojçä jioot hänajty tøø piäda'agy coö miøcpögät, mөөд coö hänajty miäböcy coö ja'a Pablo ja'a Jesús miäjaa hänajty miøødhajtä, ¹⁰ mänitä Pablo ja'a mähdiojç ñämaayy:

—Pädø'øg, tänaayyø'øg.

Möcä Pablo jaduhñ miänaañ. Mänitä craa jiaanč tänaayyø'cy. Mänit hoy tiägøøñä yohbiä. ¹¹⁻¹² Coö ja'a cu'ugä craa hajxy jaduhñ yhjxy coö hänajty tøø miøcpøcy, mänit hajxy tiägøøyy yaaxpä yhamdsoo hayuuc-haambyhajxy:

—Tøø ja'a Zeus hajxy xñägädäacäm mөөдä Hermes, ja'a hajxy nwiingudsähgøøyyämbä. Tøø hajxy jaduhñ ñibiäda'agyii neby jäya'ayän —nømä Pablohajxy ñänøømä.

Jaduhñä Bernabé hänajty yhajodhadyii nebiä Zeusän. Haa ja'a Pablo, jaduhñ hänajty je'e yhajodhajtäbä nebiä Hérmesän, je'eguiøxpä coö ja'a Pablo hänajty jiaanč tehñ miädia'agy. ¹³⁻¹⁴ Pero cabä Pablohajxy hänajty wyiinjuø'øy waambaty hajxy hänajty ñänømyii. Hoorä, jimä tsajtøjç hänajty tu'ug cajtpa'a maa ja'a cu'ugä Zeus hajxy hänajty wyiingudsähgø'øyän. Ja'a jäya'ay hänajty jim tuumbä teedy, mänitä waj may yajmejch maa ja'a Pablohajxy hänajty cajtpa'a tøø miähmø'øyän. Mayyä pøjy jaduhñ yajmejtspä. Mänitä Pablohajxy tiägøøyyä wiingudsähgøøyyäbä. Ja'a cu'ughajxy mөөдä teedy, je'e hajxy hänajty mäwiingudsähgøøby. Mänitä teedyhajxy tiägøøyy mänaambä coögä waj hajxy hänajty yoxa'añ ja'a Pablocøxpähajxy. Hagriegohaam hajxy jaduhñ miänaañ. Coö ja'a Pablohajxy jaduhñ wyiinjuøøñä nebiä cu'ughajxy hänajty jiatcø'owa'añ, mänitä Pablohajxy tiägøøyy tajpä maabiä. Mänitä wyit hajxy quiøø'ch. Mänit hajxy jim tiägøøyy cu'ughagujc. Mänit hajxy yaaxy:

¹⁵ —Mägu'ughajpädøjç, ca'a højts xwyiingudsähgø'øy. Jäya'ay højts nej mijtsän. Paady højts yaa tøø nmech maa mijts mgajptän, coö højts mijtsä Diosmädia'agy

nyajwiingapxó'owät, jaduñä Dios juppiä ja'a miädia'agy hajxy mmäbójcät. Jéquiänä Dios ja'a tsajt yhädiuuñ, mөөдä naaxwiin, mөөдä mejy, mөөд tijaty jaac jii, cөxiä. Jaduñä Dios miäna'añ coo hajxy je'e mwiingudsähgöñät, coo ja'a mhamdsoo cuhdujt hajxy mnajtshixöñät, ja'a ca'a tsoobaatpä. ¹⁶ Hijty, jaduñä Dios hijty miäna'añ coo ja'a jäya'ayä yhamdsoo cuhdujt hajxy ween yajtuñ. ¹⁷ Homiänaajä ja'a Dios yajcähxö'ogy coo hojioot jiaančh tehñ miөөдä maa mijtscөxpän, mөөд coo yajtu'uy coo yajta'xy, mөөд coo ja'a camä tu'u yaghoyö'oy, jaduñ hajxy ngaayy nhúucäm jootcujc —nөmä Pablohajxy miänaañ.

¹⁸ Hobiänejpä ja'a Pablo ja'a cu'ug hajxy jaduñ yajmäbójcy coo ja'a waj hajxy quia'a yóxät, coo ja'a Pablohajxy jaduñ quia'a wiingudsähgö'owөөд mөөдä Bernabé.

¹⁹ Mänitä judíoshajxy näje'e miejch. Antioquía hajxy hänajty choon mөөд Iconio. Mänitä cu'ug hajxy yajmäbójtagajch cooc tyjy ja'a Pablohajxy hänajty yhöñda'agy mөөдä Bernabé. Mänitä cu'ugä Pablo hajxy jaduñ jia ca'ch. Jaduñ hajxy hänajty yhajodhaty coo ja'a Pablo hänajty tөө yho'ogy, pero cab hänajty tөө ñä'a ho'pä. Mänitä Pablo hajxy hoy yhöxwich cajtpa'a. ²⁰ Ja'a jäya'ayä Diosmädia'agy hajxy hänajty jaduñ tөө miäböquiäbä, mänitä Pablo hajxy hoy juhmugö'oy. Mänitä Pablo jadähooc wyiinmahñmejch. Mänitä Pablohajxy jaduñ jiiby tiägö'oguiumbä cajptooty mөөдä mäbøjpädöjc. Cujaboomä Pablohajxy jim chohñ mөөдä Bernabé. Mänit hajxy ñöcxy maa ja'a cajpt hänajty jaduñ xiöhatiän Derbe.

²¹ Coo ja'a Pablohajxy jim miejch Derbe, mänitä Diosmädia'agy hajxy tiägö'oy hawaan hayaaxöobiä. Coo ja'a cu'ughajxy jaduñ miädooyy, mänit hajxy may miäböjc. Mänitä Pablohajxy jim wyiimbójcumbä. Mänit hajxy jim ñöcxtägajch Listra, mөөд jim Iconio, mөөд jim Antioquía, majaty hajxy hänajty tөө yhuuc hoobiän. ²² Ja'a jäya'ayä Diosmädia'agy hajxy hänajty tөө miäböquiäbä, mänit hajxy wyiingapxö'oyä coo ja'a Diosmädia'agy hajxy hamuumdu'joot pianöcxät tehngahnä, hoy hajxy jaduñ cu jia mänax cu jia yajnax ja'a tsaächpä ja'a peenä. Mänit hajxy jaduñ jim ñöcxät Dioswiinduum. ²³ Majatiä Pablohajxy hänajty wiädity, wyiinguejxyp hajxy hänajty pön jaduñ jim túnäp wiindsön maa ja'a tsajtöjcän. Mänitä Pablo ja'a Dios hajxy pia'yaaxy coo hajxy jaduñ quiuweendähadöjät ja'a Diósäm, ja'a hajxy hänajty tөө miäböquiäbä. Jaguiay jayhu'uguiä Dios hajxy hänajty miänuu'xta'agy.

²⁴ Mänitä Pablohajxy jim ñaxöoyy mөөдä Bernabé maa ja'a naax hänajty xiöhatiän Pisidia. Mөөд hajxy jim yhoobiä maa ja'a naax hänajty xiöhajpän Panfilia. ²⁵ Mänitä Pablohajxy jim jadähooc miéjtscumbä Perge. Jimä Diosmädia'agy hajxy jadähooc yajwá'xcumbä. Mänit hajxy ñöcxy jadähooc Atalia. ²⁶ Jim hajxy jadähooc hoy biarcotägö'oy. Mänit hajxy jim ñöcxumbä Antioquía maa hajxy hänajty jaduñ tөө yhuuc tsohñdaacpä, maa hajxy hänajty jaduñ tөө wyiinguexyijän coo ja'a Dios ja'a tiuung hajxy tiúunät. Coo hajxy jaduñ jim miejtstägajch Antioquía, yaghabejt hajxy jaduñ nebiä Dios hänajty tөө yhane'emiän coo hajxy jaduñ tiúnät. ²⁷ Coo hajxy jim miejch Antioquía, mänitä Pablo ja'a mäbøjpädöjc hajxy wioomujcy. Mänit hajxy miädiaacy nebiatiä Dios hajxy hänajty tөө piuhbedyijän, mөөд coo ja'a Dios cuhdujt jaduñ tөө yecy coo ja'a jäya'ayhajxy jaduñ miäböjpät, ja'a hajxy hänajty jaduñ ca'a judíospä. ²⁸ Jejquiä Pablohajxy jim yhijty Antioquía. Xyiicy xioondaacy hajxy jaduñ mөөдä mäbøjpädöjc-hajxy.

15

¹ Mänitä jäya'ayhajxy jaduñ jim näje'e miejch Antioquía. Judea hajxy hänajty tөө chohñda'agy. Mänitä mäbøjpädöjc-hajxy yajnähixö'oyä coo hajxy jaduñ quiudiúnät nebiä Moisés hänajty jegyhajty tөө yhane'emiän, coo hajxy yajcircuncidarhädät. Cooc hajxy jaduñ quia'a cudiúnät, cábac hajxy jaduñ ñähwá'adsät. Ja'a jäya'ayhajxy hänajty jim tsohmbä Judea, je'edsä mäbøjpädöjc hajxy jaduñ yajnähixö'oy. ²⁻³ Pero cabä Pablohajxy jaduñ quiumaayy coo ja'a mäbøjpädöjc-hajxy jaduñ yajnähixö'owöjät. Mänitä Pablo ja'a mädia'agy hajxy jaduñ yajcapxiö'oy coo ja'a mäbøjpädöjc-hajxy

jaduhñ quia'a mǎbǒgät neby hajxy hǎnajty tǒǒ yajñähixǒ'ǒyijän coo hajxy tsipcǒxp yajcircuncidarhǎdät. Mǎnitǎ Pablohajxy jim quiejxǎ Jerusalén mǒǒdǎ Bernabé, mǒǒdǎ wiinghǎna'c-hajxy. Ja'a mǎbǒjpǎdǒjc-hajxy jaduhñ mǎguejx coo ja'a tsip ja'a pleetǎ jaduhñ ween nǒcxy yajcǒxy yajmay. Ja'a jäya'ayhajxy hǎnajty jim tuumbǎ Jerusalén maa ja'a tsajtǒjcǎn, je'edsǎ tsip ja'a pleetǎ hajxy hǎnajty miǒǒdyajcǒxaamby miǒǒdyajmayaamby, jaduhñ hajxy quia'a tsipyajpǎdǒ'nǎt. Coo ja'a Pablohajxy jim tiu'ubǒjcy Antioquía, mǎnit hajxy jim ñaxǒǒyy maa ja'a naax hǎnajty xiǒhatiǎn Fenicia, mǒǒd jim maa ja'a naax hǎnajty xiǒhatiǎn Samaria. Jimǎ Pablo ja'a mǎbǒjpǎdǒjc hajxy miǒǒdmǎdiaacy, ja'a hajxy hǎnajty tsǎnaabiǎ jim Fenicia mǒǒd jim Samaria. Jaduhñǎ Pablohajxy miǎdiaacy coogǎ jäya'ayǎ Diosmǎdia'agy hajxy hǎnajty tǒǒ piadu'ubǒcy, ja'a hajxy hǎnajty ca'a judíospǎ, mǒǒd coogǎ yhamdsoo cuhdujt hajxy hǎnajty tǒǒ ñajtshixǒñǎ. Coo ja'a mǎbǒjpǎdǒjc-hajxy jaduhñ miǎdooyy, mǎnit hajxy jaduhñ jiaançh tehñ xiooñdaacy.

⁴ Coo ja'a Pablohajxy jim miejch Jerusalén mǒǒdǎ Bernabé, mǎnitǎ mǎbǒjpǎdǒjc-hajxy jim yhamugǒǒyy maa ja'a tsajtǒjcǎn, mǒǒdǎ Dioswiingueypǎhajxy, mǒǒdǎ tsajtǒjc-wiindsǒñhajxy. Mǎnitǎ Pablohajxy miǎdiaacy nebiatiǎ Dios hajxy hǎnajty tǒǒ piuhbedyijän. ⁵ Jimǎ fariseoshajxy ñaje'ebǎ. Tǒǒ ja'a Diosmǎdia'agy hajxy hǎnajty miǎbǒjpǎ ja'a Jesucristocǒxpǎ. Mǎnit hajxy tiǎnaayyǒ'cy. Mǎnit hajxy miǎnaañ:

—Tsicpǒxpǎ mǎbǒjpǎdǒjc-hajxy yajcircuncidarhǎjpǎt, hoy hajxy jaduhñ quia'a jagǎ judíospǎ; weenǎ mǎdia'agy hajxy jaduhñ quiudiunñ nebiǎ Moisés jecy yhanehmiǎn —nǒmǎ fariseoshajxy miǎnaañ.

⁶ Mǎnitǎ Dioswiingueypǎhajxy yhamugǒǒyy mǒǒdǎ tsajtǒjc-wiindsǒñhajxy. Mǎnit hajxy tiǎgǒǒyy mǎdiaacpǎ waambatiǎ fariseoshajxy tǒǒ miǎna'añ. ⁷ Mǎnitǎ Pedro tiǎnaayyǒ'cy mǎdiaaccujc. Mǎnit yajcapxǒǒyy:

—Puhya'adiǒjc, mnajuǒǒby hajxy jaduhñ coočǎ Dios jecy xwyiinguejxy coočǎ jäya'ayǎ Diosmǎdia'agy nyajwiingapxǒ'ǒwǎt, ja'a hajxy ca'a judíospǎ, coo hajxy miǎbǒgät, jaduhñ hajxy ñǎhwa'ads quiuhwǎ'adsǎt. ⁸ Haa ja'a Dios, xyhixyhǎjtǎmǎ njootǎ njuǒhñdyhajxy. Coo ja'a Diosmǎdia'agy hajxy jaduhñ miǎbǒjcy, ja'a ca'a judíospǎ, mǎnitǎ Dioshǎspíritu hajxy miǒǒoyyǎbǎ, nebiǎ Dios ja'a yhEspíritu hajxy tǒǒ xmiǒǒoyyǎm hǒjtsǎhǎjtǎm. Jaduhñǎ tǒyhajt hajxy nmǒǒdhǎjtǎm coo ja'a ñǎhwaatstaact hajxy jaduhñ piaatpǎ, neby hǒjts tǒǒ nbǎatǎm. ⁹ Tu'cuhdujtǎ Dios hajxy tǒǒ xyajñǎhwaats tǒǒ xyajcuhwǎatsǎm mǒǒdǎ cajpǎ judíospǎhajxy. Coo hajxy jaduhñ tǒǒ miǎbǒjpǎ, paadiǎ piojpǎ quiǎdieeyhajxy tǒǒ ñǎhwaatspǎ. ¹⁰ Pero jaduhñ mijts mja mǎna'añ coo ja'a cajpǎ judíospǎ ja'a mǎdia'agy hajxy jaduhñ quiudiúumbǎt nebiǎ Moisés jecy yhanehmiǎn. Ni hǒjts pedyii nga'a cudiúunǎm, hǒjts judíoshǎjtǎm. Ni hǒjtsǎ nhapǎ ndeedyhajxy hijty jegyhajty hoy quia'a cudiúunǎmbǎ. Coo mijts jaduhñ mja mǎna'añ coo ja'a cajpǎ judíoshajxy jaduhñ quiudiúumbǎt, jaduhñ hajxy myajcǎhxǒ'ǒgy nebiǎ Dios ja'a miǎdia'agy hajxy mga'a mǎbǒjcǎbǎn. ¹¹ Pero jaduhñ hajxy nnajuǒǒyyǎm coo ja'a Jesús hajxy tǒǒ xñǎ'lǎ yajñǎhwǎatsǎm tu'cuhdujt, mǒǒd hǒjts judíospǎhǎjtǎm, mǒǒdǎ cajpǎ judíoshajxy. Hojiootǎ Jesús jaduhñ miǒǒdhajpy maa hǒjtsǒxpǎhǎjtǎm —nǒmǎ Pedro miǎnaañ.

¹² Mǎnitǎ mǎbǒjpǎdǒjc-hajxy miǎdiaacpǎdǒǒyy, ja'a hajxy hǎnajty jim tsǎnaabiǎ Jerusalén. Mǎnitǎ Pablohajxy tiǎgǒǒyy mǎdiaacpǎ mǒǒdǎ Bernabé nebiatiǎ Dios ja'a miǎjaa hǎnajty tǒǒ yajcǎhxǒ'ǒgy maa ja'a jäya'aguiǒxpǎhajxiǎn, ja'a cajpǎ judíospǎhajxy, mǒǒd nebiatiǎ Pablo ja'a hoy-yagjuǒñǎjatypǎ hajxy hǎnajty tǒǒ tiuñ. ¹³ Coo ja'a Pablohajxy jaduhñ miǎdiaacpǎdǒǒyy, mǎnitǎ Santiago miǎnaañ:

—Puhya'adiǒjc, huuc tunǎ mayhajt hajxy, huuc hamǎdoowhit hǎdaa mǎdia'agy hajxy. ¹⁴ Jaduhñǎ Simón tǒǒ miǎdia'agy coo ja'a Dios ja'a hojioot miǒǒdhajñǎ maa ja'a jäya'aguiǒxpǎhajxiǎn, ja'a hajxy cajpǎ judíospǎ, mǒǒd coo ja'a Dios wyiimbiy pǒnjaty jaduhñ quiu'ughǎdǎp. ¹⁵ Jaduhñ jim myiñ cujaay maa ja'a Diosmǎdia'aguiǎn nebiǎ profetadǒjc-hajxy jecy quiapxy miǎdiaaquiǎn coo ja'a Dios hojioot hǎnajty miǒǒdhada'añ maa

ja'a jäya'aguixpähajxiän, ja'a hajxy cajpä judíospä. Jaduhnä profeta Amós jecy quiujahy quiuguee'ch ¹⁶ coo ja'a Dios jaduñ miänaañ:

Nguexáambiöchä nguguexy coo ween jaduñ yhanehm̄bä nebiä David jecy yhanehmiän, ¹⁷ jadúñhōchä jäya'ayhajxy xwyiingudsähg'owät,

ja'a hajxy cajpä judíospä, pønjátyhōch tōø nwiimbiy cooçh je'e ngu'ughádät.

¹⁸ Jéquiänä Dios jaduñ miänaañ coo jaduñ yajtōjiada'añ.

¹⁹ Mänitä Santiago jiaac mänaañ:

—Tøyhajt jaduñ nebiä Diosmädia'agy miäna'añän. Cab jaduñ yhahix'ōy coo ja'a mabōjpädōjc hajxy nhanéhm̄mät, ja'a hajxy ca'a judíospä. Cab hajxy nnámáyyänät coo hōjtsä nguhdujt hajxy xpiahíxämät, hōjts judíoshájtäm. ²⁰ Jaduhn mabōcypä, tsōc hajxy yajnāyaayōyyäm coo hajxy jaduñ quia'a tsú'udsät tijatiä jäya'ayhajxy tōø yoxy quepychechwiinduum, mōød coo wiingto'oxiōjc hajxy quia'a mōødmá'awät, mōød coo animal hajxy quia'a tsú'udsät ja'a jañ'xíe'xypä, mōød coo animalnō'ty hajxy quia'a hu'ug quia'a jōø'xät. ²¹ Jaduhnä Moisés jecy quiujahy coo hōjts jaduñ nguhdujthájtämät, hōjts judíoshájtäm. Jaduhn hōjts wiindu'ugpoo'xxiōø nyajnahixōyyäm maa ja'a tsajtōjcän wiinduhmyhagajpt.

²² Mänitä mabōjpädōjc-hajxy nägōxiä quiojyquiapxyhajty mōødä Dioswiingueypähajxy, mōødä tsajtōjc-wiindsōñhajxy, coo ja'a cunocy hajxy jim quiéxät Antioquía, coo ja'a Pablohajxy miōdhadōjät mōødä Bernabé. Mänitä Judashajxy jaduñ wyiinguejxä mōødä Silas coo hajxy jaduñ quiunocyhádät. Jimä Judashajxy hānajty quiopc-haty mōødä Silas maa ja'a tsajtōjcän. Mejtstu'u ja'a Judas hānajty xiōhaty mōødä Barsabás. ²³ Mänitä mabōjpädōjcä nocy hajxy yhädiuñ. Mänitä Pablo ja'a nocy hajxy yajcō'ōdägōyyä coo hajxy miänōcxät Antioquía. Jaduhnä nocy hajxy quiujahy:

“Puhya'adiōjc, mijts hädaa nocy nyajnäguejxyp, mijts ca'a judíospä, coo ja'a Diosmädia'agy hajxy tōø mmabōcy, pønjaty jim tsānaaby Antioquía, mōød jim Siria, mōød jim Cilicia. Hōjts hädaa nocy tōø nhädiuñ, hōjts mabōjpädōjc yaa hijpä Jerusalén, mōødä Dioswiingueypähajxy, mōødä tsajtōjc-wiindsōñhajxy. ²⁴ Tōø hōjts jaduñ nmädoyhaty coo hōjtsä nmägu'ughajpähajxy näje'e jim tōø yhoy maa mijtsän. Ca'a yhōjts jaduñ nguejx; hamdsoo joot hajxy jim tōø ñōcxy. Jaduhn hōjts tōø nmädoyhaty coo mijtsä häna'c xjia wi'i wyiinhōna'añ, ja'a hajxy jim tōø yhōyyäbä maa mijtsän, mōød coo mijts näje'e tōø myajwiinhōñ. ²⁵ Coo mijtsä häna'c jaduñ xjia wi'i wyiinhōna'añ, paady hōjts tōø ngojyquiapxyhaty coo hōjtsä nmägu'ughajpä nämetsc jim nguéxät maa mijtsän näguipxy mōødä Pablo mōødä Bernabé. Hōjtsä Pablo njaançh tehñ chojpy njaançh tehñ pia'häyooby mōødä Bernabé. ²⁶ Jaançh tehñ yhooyä Pablo ja'a Jesucristo hajxy miäduñ. Coo hajxy jaduñ hoy miäduñ, paady hajxy mayhooc tōø jia wi'i yagho'oga'añii. ²⁷ Ja'a Judas hōjts nwiinguejxyp mōødä Silas coo hajxy jim ñōcxät maa mijtsän. Hajäya'ayhaam mijts jaduñ xmiōødmädia'aga'añ waambaty hōjts cham njaay ngueechän nocyquiōxp. ²⁸⁻²⁹ Jaduhn hōjtsä Dioshēpīritu tōø xmiōødcojyquiapxyhaty coo mijts nhané'emät coo hajxy mga'a tsú'udsät mädyiijaty animal ja'a häna'c tōø yoxy quepychechwiinduum, mōød coo animal hajxy mga'a tsú'udsät ja'a jañ'xíe'xypä, mōød coo wiingto'oxiōjc hajxy mga'a mōødmá'awät. Coo hajxy jaduñ mgudiúnät, jaduñ hajxy mniyaghoyō'owōjät. Cabä wiingcuhtdujt yaghane'ema'añ. Ja'a Dios hajxy jaduñ xcwieendähädäp.” Jaduhnä mabōjpädōjcä nocy hajxy yhädiuñ, ja'a hajxy hānajty jim hijpä Jerusalén.

³⁰ Mänitä Pablohajxy jim tiu'ubōjcy mōødä Bernabé, mōødä Judas, mōødä Silas. Mänit hajxy jim ñōcxy Antioquía. Coo hajxy jim miejch, mänitä mabōjpädōjc-hajxy nägōxiä jim yhamugōyy maa ja'a tsajtōjcän. Mänitä Pablo ja'a mabōjpädōjcä nocy hajxy yajcō'ōdägōyy. ³¹ Mänitä mabōjpädōjcä nocy hajxy quiapxy. Mänit hajxy jiaançh tehñ jiootcugōyy je'eguixpä coo hajxy jaduñ quiapxmōcpōjcä nocyhaam.

³² Mänitä Diosmädia'agy hajxy yajwiingapxōyyä. Ja'a Judashajxy jaduñ capx mōødä Silas. Yoñ hajxy jaduñ quiapxy miädiaacy. Diosquexiä Judashajxy hānajty mōødä

Silas nämetsc. ³³ Maxiøø ja'a Judashajxy jim̄ yhiyty Antioquía mөөdä Silas. Coo hajxy hänäjty wyiimbidaañnä, mänit hajxy ñämaayyä coo ja'a Dioscujú'uyäp hajxy jim̄ nõcxy yecy Jerusalén. Mänitä Judashajxy ñöcxnä Jerusalén maa hajxy hänäjty tөө yhuuc tsohndaacpäñ. ³⁴ Pero cabä Silas ja'a Judas pianöcxy. Jim̄ miähmөөyy Antioquía ³⁵ näguipxy mөөdä Pablo mөөdä Bernabé. Mänitä Diosmädia'agy hajxy tiägөөyy yajwiingapxөөbiä näguipxy mөөdä mäbөjpädөjc-hajxy nämaybiä.

³⁶ Mänitä Pablo ja'a Bernabé cujecy ñämaayy:

—Jam̄ jadähooc wädijtäm majatiä Diosmädia'agy hoy nyajwá'xäm. Jam̄ mäbөjpädөjc cuhíjxäm pө tehngahnä ja'a Diosmädia'agy hajxy hoy pianöcxy.

³⁷ Jia nähadsoow ja'a Bernabé jaduhñ. Mänit jaduhñ jia mänaañ coo ja'a Juan Marcos hajxy cu miөdhajty. ³⁸ Pero cabä Pablo jaduhñ miänaañ coo ja'a Juan Marcos hajxy jaduhñ miөdhädät je'eguiөxpä coo ja'a Juan Marcos hajxy hänäjty tөө piuhwa'ačhi mänaa hajxy hänäjty jim̄ wiäditiän Panfilia maa ja'a Diosmädia'agy hajxy hänäjty yajwa'xiän. ³⁹ Coo ja'a Pablo hänäjty quia'a tu'ugmädia'aguiä mөөdä Bernabé, paady hajxy mänit ñiwia'xä. Mänitä Bernabé ja'a Marcos wiowө'cy. Mänit hajxy tiägөөyy barcojooty. Mänit hajxy jim̄ nõcxy mejyhawiimb maa ja'a naax hänäjty xiөhatiän Chipre. ⁴⁰ Haa ja'a Pablo, mänit je'eduhñ miänaañ cooc ja'a Silas hänäjty miөdwädita'añ. Mänitä mäbөjpädөjcä Dios hajxy miänuu'xtaacy coo ja'a Pablohajxy piuhbedөөjät. Mänitä Pablohajxy tiu'ubөjnä mөөdä Silas. ⁴¹ Mänit hajxy jim̄ ñaxөөyy Siria mөөd jim̄ Cilicia. Majatiä Pablohajxy hänäjty wiädity, jim̄ mäbөjpädөjc hajxy hänäjty quiapxmөcpөcy.

16

¹ Mänitä Pablohajxy jim̄ nõcxy Derbe. Coo hajxy jim̄ tiu'ubөjcumbä, mänit hajxy jim̄ ñöcxumbä Listra. Jim̄ craa hajxy tu'ug hoy piaady. Timoteo ja'a craa hänäjty xiөhaty. Miäbөjpiä Timoteo ja'a Diosmädia'agy hänäjty. Ja'a Timoteo ja'a tiajjä, judía hänäjty je'e. Jaanä miäbөjpiä Diosmädia'agy hänäjty je'ebä. Ja'a Timoteo ja'a tieediä, ca'a hänäjty je'e jiidíosä. ² Quiumaabiä mäbөjpädөjcä Timoteo hajxy hänäjty, ja'a hajxy hänäjty jim̄ tsänaabiä Listra mөөd jim̄ Iconio. ³ Mänitä Pablo ja'a Timoteo ñämaayy coo hänäjty miөdwädita'añ. Pero cahnä Timoteo hänäjty yajcircuncidarhaty. Mänitä Pablo ja'a Timoteo yajcircuncidarhajtä, jaduhñä judíoshajxy jaduhñ quia'a jootmä'adät. Hix, ñajuөbiä judíoshajxy hänäjty nägөxiä coo ja'a Timoteo hänäjty quia'a yajcircuncidarhatyñä. Coo ja'a Timoteo ja'a tieedy hänäjty quia'a judíosä, paadiä Timoteo hänäjty quia'a yajcircuncidarhatyñä. ⁴ Mänitä Pablohajxy tiägөөyy wädijpä cajpt-cajpt mөөdä Silas mөөdä Timoteo. Majaty hajxy hänäjty wiädity, jim̄ mäbөjpädөjc hajxy hänäjty yajmädoyhaty waambatiä Dioswiingueypähajxy hänäjty tөө yhane'emiän, mөөdä tsajtөjc-wiindsөñhajxy, ja'a hajxy hänäjty jim̄ hijpä Jerusalén. ⁵ Jaanä jaduhñä Pablo ja'a mäbөjpädөjc hajxy hänäjty quiapxmөcpөjpä wiinduhmyhagajpt, paadiä mäbөjpädөjcä Diosmädia'agy hajxy hänäjty hoy jiaac tehñ miäböcy. Mөөd hajxy hänäjty jiaac tehñ miayө'өy jabom-jabom.

⁶ Pero cabä Pablo cuhdujt hajxy choj mooyyä ja'a Dioshëpíritäm coo ja'a Diosmädia'agy hajxy jim̄ nõcxy yajwa'xy Asia. Paady hajxy jim̄ jiaac wädijty Frigia mөөd jim̄ Galacia. ⁷ Mänit hajxy jim̄ miejch maa ja'a naax hänäjty xiөhatiän Misia. Mänit hajxy jia mänaañ coo hajxy jim̄ ñöcxät maa ja'a naax hänäjty xiөhatiän Bitinia. Pero cabä Jesús yhEspíritu jaduhñ miänaañ coo hajxy jim̄ ñöcxät. ⁸ Coo hajxy jim̄ ñaxөөyy Misia, mänit hajxy jim̄ miejch maa ja'a cajpt hänäjty xiөhatiän Troas. ⁹ Mänitcoodsä Pablo jäya'ay tu'ug wyiinhijxy. Jim̄ hänäjty chooñ maa ja'a naax hänäjty xiөhatiän Macedonia. Tänäaby hänäjty jaduhñ. Mänitä Pablo ñämaayyä: “Huuc tunä mayhajt, jam̄ hөjtsä Diosmädia'agy yajwiingapxөөyyäc jim̄ Macedonia.” Jaduhñä Pablo miänuu'xtaacä. ¹⁰ Coo ja'a Pablo jaduhñ wyiinhijxy, mänit hөjts jaduhñ nwiinmaayy coo hөjts jim̄ njaančh nõcxät Macedonia. Jaduhñ hөjts hänäjty nwiinjuө'өy coo hөjtsä Dios hänäjty tөө xwyiinguexy coo hөjtsä Diosmädia'agy jim̄ nõcxy nyajwa'xy.

¹¹ Mänit højts hoy nbarcotägø'øy. Mänit højts jim ndsohñ Troas. Mänit højts nnøcxy mejyhawiimb maa ja'a naax hänajty xiøhatiän Samotracia. Mejyhagujcä naax jaduhñ. Cujaboom højts jadähooc nbarcotägøøguiumbä. Mänit højts njaac nøcxy mejyhawiimb maa ja'a cajpt hänajty jaduhñ xiøhatiän Neápolis. Coø højts jim nmejch mejyhawiimb, mänit højts nbarcopädsømnä. ¹² Mänit højts nnøcxcumbä maa ja'a cajpt hänajty jaduhñ xiøhatiän Filipos, jim Macedonia-naaxpa'a. Jimä Rómabä jäya'ayhajxy hänajty nämay chäna'ay. Jim højts jaduhñ maxiøø nhijnä. ¹³ Coø ja'a poo'xxiøø yhabaaty, mänit højts jim nnøcxy møjnøøba'a, jim cajtpa'a. Jimä judíos ja'a Dios hajxy hänajty naxy pia'ya'axy. Jimä to'oxiøjc-hajxy hänajty näje'e tøø yhamugø'øy. Mänit højts jim nhøxtaacy. Mänit højtsä jäya'ay ndägøøyy yajmøødmädiaacpä ja'a Diosmädia'agy, ja'a hajxy hänajty tøø yhamugø'øyäbä. Haagä to'oxiøjc hajxy hänajty je'e. ¹⁴ Tu'jäya'ay hänajty xiøhaty Lidia. Jim hänajty choon maa ja'a cajpt hänajty xiøhatiän Tiatira. Hucywyit hänajty tiøø'py, ja'a hojiatypä. Wyiingudsähgøøbiä Lidia ja'a Dios hänajty. Mänitä Dios ja'a Lidia yajmäbøjcy waambatiä Pablo hänajty yajnähixø'øy. ¹⁵ Mänitä Lidiahajxy hoy ñäbety nägøxiä mäduhñtiä hajxy hänajty jim yhity maa ja'a tiøjcän. Mänit højtsä Lidia xñämaayy:

—Pø mmänaamb hajxy jaduhñ coöchä Dios ja'a miädia'agy hamuumdu'joot nmäbøjcä, jam hajxy jim mejtsta'ag maačhä ndøjcän —nøm højts jaduhñ xñämaayy-ho'cy.

Mänit højts jim hoy nmejtsta'agy.

¹⁶ Wiinghooc højts hänajty jim nnøcxy maa ja'a Dios hajxy hänajty pia'ya'axiän. Tu'haamnøcxpä, jim højtsä cäxyiihäna'c tu'ug hoy nbaady. Cudoogø'øy hänajty je'eduhñ. Ja'a haxøøgpä hänajty miøød. Cuwiinmahñdy hänajty je'eduhñ. Cøxiä hänajty jaduhñ ñajuø'øy tijaty hänajty jadäänäp tunäänäp. Majiatiä xädø'øñ hänajty ñämečhii coø hänajty jaduhñ cøxiä ñajuø'øy. Coø xädø'øñ hänajty mio'oyii, cøxiä wyiindsøn hänajty miøodiägach, mäduhñtiä hänajty quianarhaty. ¹⁷ Mänit højtsä cäxyiihäna'c xpiadu'ubøjcy høxhaam. Mänit tiägøøyy yaaxpä jojpä:

—Yø'ø jäya'ayhajxy, ja'a Dios hajxy miäduumby, ja'a maas møc cuhdujt møødpä. Mijts hajxy xyajwiingapxø'øwaamb neby hajxy mnähwa'ads mguhwá'adsät.

¹⁸ Maxiøø højtsä quixy jaduhñ xpiawädijty yáaxäp wáañäp. Coø ja'a Pablo jaduhñ chíjpänä coø ja'a quixy jaduhñ wyl'i ya'axy, mänitä Pablo ñäwa'wiimbijty. Mänitä Pablo ja'a haxøøgpä yhøxquejxy:

—Ja'a Jesucristocóxpøch miich nhøxquexy; pädsøm jiiby maa yø'ø cäxyiihäna'cän —nømä Pablo miänaañ.

Mänitä haxøøgpä jaduhñ jiaanč pädsømy.

¹⁹ Coø ja'a quixiä wyiindsønhajxy jaduhñ yhiixy coø ja'a quixy hänajty jaduhñ tøø ñähwa'ačhii, mänit hajxy jaduhñ ñajuøøyy coø ja'a quixy hänajty jaduhñ quia'a canarhadaanä, møød coø xädø'øñ hajxy hänajty quia'a mo'owäänänä. Mänitä Pablohajxy miajtsä møødä Silas. Mänit hajxy yajnøcxä haguyc. ²⁰ Mänit hajxy jaduhñ ñäxø'øwøøyyä:

—Hädaa judíoshajxy, cajptyajma'p hajxy jaduhñ. ²¹ Wiingcuhdujt højts xjia wil'i yajnähixø'øwäänäm. Cab hajxy hawiinmats nmäbøjcämät, je'eguiøxpä coø hajxy jim ndsøhñäm Roma —nømä Pablohajxy ñänøømä.

Ja'a quixiä wyiindsønhajxy jaduhñ mänaañ.

²² Mänitä Pablohajxy ñäbädø'cä ja'a cú'ugäm. Mänitä cuduunghajxy miänaañ coø ja'a Pablo ja'a wyithajxy yajtsíjjäxät, møød coø hajxy wiobho'ogøøjät paxyhaam. ²³ Coø ja'a Pablohajxy hänajty tøø wiobho'ogyii, mänit hajxy hoy chumyii. Mänitä tsumyjiäya'agwieendähajpä yhanehmä coø ja'a Pablohajxy hoy cwieendähadøøjät. ²⁴ Mänit hajxy hoy piäda'agyii hadsihxtuum jiiby pujxtøgooty. Pu'uyhawa'adsootiä tiicyhajxy jaduhñ yhame'mújcäxä.

²⁵ Cuptsuhmdä hänajty jaduhñ, jiibiä Pablo ja'a Dios hajxy hänajty pia'høy pia'ya'axy. Jiibiä miädsomyjiäya'ayhajxy hänajty jaduhñ yhamädoowhity. ²⁶ Mänitä hujx møc ñajxy. Høxtä tsäyuuuy ja'a pujxtøjc jaduhñ. Cøjxä tøgaaaw jaduhñ yhawa'ačh. Møødä

cadena jaduhñ cøjx pioty maa ja'a tsumyjiäya'ayhajxy hñanjty jaduhñ quiuxochän. ²⁷ Coo ja'a tsumyjiäya'agwieendähajpä mia'abiädø'cy, mänit jaduhñ yhiyx coo ja'a tøghagø'øw hñanjty jaduhñ tøø quiøxy hawa'açh. Mänit jaduhñ miänaañ cooc tyjy ja'a tsumyjiäya'ayhajxy tøø quiøxy päyø'ogy. Mänitä espada jiuu'ty. Niyagho'ogáañap hñanjty jaduhñ hamdsoo je'eguiøxpä coo hajxy cu piäyø'cy. ²⁸ Mänitä Pablo yaaxy:

—Ca'a jaduhñ mniyagho'ogyii. Chaa højts jaduhñ nägøxiä. Caj pøn tøø piäyø'ogy —nømä tsumyjiäya'agwieendähajpä ñämaayyä.

²⁹ Jaanç tehñ chähgøøby hñanjty je'eduhñ. Høxtä tsäyuuby hñanjty je'eduhñ. Mänitä jøøn hoy quioñ. Päyø'oguiä tiøjtägøøguiumbä. Mänitä Pablohajxy hoy wyiin-jicäda'agyii møødä Silas. ³⁰ Mänit hajxy yhøxwoobädsøømä pujxtøgooty. Mänit hajxy miäyajtøwä:

—Wiindsøndøjc, ja wi'i ñähwa'adsáambøch høøch. Nébyhøch jaduhñ njatcø'øwat.

Ja'a tsumyjiäya'agwieendähajpä jaduhñ mänaañ. ³¹ Mänitä Pablohajxy yhadsooyy:

—Coo hajxy jaduhñ mmäbøgät ja'a Wiindsøn Jesúsçøxpä, jaduhñ hajxy mnähwä'adsät mäduhñtiä hajxy jim mhity maa ja'a mdøjcän.

³² Mänitä tsumyjiäya'agwieendähajpä ja'a Dioscapxy ja'a Diosmädia'agy hajxy hoy yajwiingapxø'oyii mäduhñtiä hajxy hñanjty jim yhity maa ja'a jioøn maa ja'a tiøjcän. Ja'a Pablohajxy jaduhñ mäyajwiingapxøoyy. ³³ Moññä hñanjty jaduhñ. Mänitä Pablohajxy hoy yajtsi'iyii møødä Silas majaty hajxy hñanjty jaduhñ tøø chaachø'öyän. Ja'a tsumyjiäya'agwieendähajpä jaduhñ mäyajtsiww. Mänit hajxy nägøxiä hoy ñäbety mäduhñtiä hajxy hñanjty jii by yhity maa ja'a jioøn maa ja'a tiøjcän. ³⁴ Mänitä Pablohajxy jim wioonøcxä maa ja'a craa tiøjcän. Mänit hajxy yajcaayy yaghuucä. Jaanç tehñ xioonädaac ja'a craahajxy jaduhñ je'eguiøxpä coo ja'a Dioscapxy ja'a Diosmädia'agy hajxy hñanjty tøø miäbøcy.

³⁵ Coo jioebøoyy, mänitä cuduungä policia hajxy quiejxy maa ja'a pujxtøjcän. Mänitä policia ja'a tsumyjiäya'agwieendähajpä hajxy hoy ñäma'ay coo ja'a Pablohajxy ween yhøxmaçhii møødä Silas. ³⁶ Mänitä Pablo hoy ñämaadiägachii:

—Tøøchä cuduunghajxy jaduhñ xyhane'emy cooch mijts nhøxmädsät. Nøcx hajxy jaduhñ jootcujc.

³⁷ Mänitä Pablo ja'a policia ñämaayy:

—Højts, Roma højts nxøaxy. Jaduhñ højts cuhdujt nmøødä nebiä Rómabä jäya'ay-hajxy miøødän. Hoy højts jim nja xøaxy Roma, tøø højtsä cuduunghajxy xyajwobho'ogyii hijxwiinduum. Hoy højts tii pojpä tii cädieey nga'a jagä møødä, tøø højts xyajtsumyii. Hoorä, tsähdiuumbä cuduunghajxy jaduhñ coo højts jaduhñ tøø xchaaçhtiuñ. Paady højts hamee'ch xjia wi'i yaghøxmasda'añii. Ween højts min xyhamdsoo høxmach —nømä policiahajxy ñämaayyä.

³⁸ Mänitä cuduunghajxy hoy yhawáañäxä waambatiä Pablo hñanjty tøø miäna'añ. Coo ja'a cuduunghajxy jaduhñ miädooyy coogä Pablohajxy hñanjty jim xiøaxy Roma, mänit hajxy chähgøøbiøjcy. ³⁹ Mänitä Pablohajxy hoy ñäma'ayii møødä Silas:

—Huuc tunä mayhajt hajxy, højts huuc mämée'xäc —nømä cuduunghajxy hoy miäna'añ.

Mänitä Pablohajxy yhøxmäjtsänä. Mänit hajxy miänuu'xtaacä coo hajxy jim chóonät Filipos. ⁴⁰ Coo ja'a Pablohajxy piujxtøjpädsøømy, mänit hajxy jim ñøcx maa ja'a Lidia tiøjcän. Mänitä mæbøjpädc-hajxy jim yhamugøoyy. Mänit hajxy quiapxmøcpøjcä ja'a Pablo. Mänitä Pablohajxy jim chohñnä møødä Silas.

17

¹ Mayhagajptä Pablohajxy ñaxøoyy, møød jim Anfípolis, møød jim Apolonia. Mänit hajxy jim miejch maa ja'a cajpt hñanjty xiøhatiän Tesalónica. Jimä judíos ja'a chajtøjc-hajxy hñanjty tu'ug. ² Jaduhñä Pablo hñanjty quiuhdujthaty coo jaduhñ chajtøjyo'oy. Wiindu'ugpoo'xxiøø hñanjty jaduhñ jim ñøcx maa ja'a tsajtøjcän. Tägøøghoocä Pablo jim yhooyy maa ja'a tsajtøjcän jim Tesalónica. Jimä Pablo ja'a jäya'ay

hänajty miøødcapxy miøødmädia'agy. Ja'a Diosmädia'agy hajxy hänajty yajcapxiøby. ³ Jaduhnä Pablo hänajty quiapxtøy coo jaduhn jim myiñ cujaay maa ja'a Diosmädi-a'aguiän coogä Dios ja'a Mesías hänajty yaa quiexa'añ hädaa yaabä naaxwiin, møød cooc hänajty yho'oga'añ, møød cooc hänajty jiuypiojtägatsa'añ:

—Ja'a Jesúshøch mijts nyajmøødmädiaacyy. Jue'e je'e, ja'a Mesías je'e, ja'a Dios jecy ñänøømäbä cooc hänajty yaa quiexa'añ ho'pä —nømä Pablo miänaañ.

⁴ Näje'e ja'a judíoshajxy miäbøjcy. Nämayyä jäya'ayhajxy miäbøjpä, ja'a hajxy hänajty ca'a judíospä, ja'a Dios hajxy hänajty wiingudsähgøøbiä. Nämayyä to'oxiøjc-hajxy miäbøjpä, pønhatiä ñihyhaphajxy hänajty jim tuungmøød hagujc. Mänitä Pablohajxy miägu'ugpøjcä møødä Silas, ja'a jäya'ayhajxy hänajty tøø miäbøquiäbä. ⁵ Coo ja'a Pablohajxy jaduhn miägu'ugpøjcä, mänitä judíoshajxy jiootma'ty, ja'a hajxy hänajty ca'a mäbøjpä. Mänitä haxøøghäna'c-hajxy hoy wioomugyü. Mänit hajxy ñämaayyä coo hajxy ween quiajptyajma'ady. Mänitä haxøøgjäya'ayhajxy miädoyhajty cooc tyijy ja'a Pablohajxy hänajty jim tøø miech maa ja'a Jasón ja'a tiøjcän. Jue'e ja'a haxøøgjäya'ayhajxy hänajty jiatcø'owa'añ møødä judíoshajxy, jimä Pablohajxy hänajty yajnøcxa'añii hagujc. Mänitä Jasón ja'a tiøjc hadsip yhajahmdúutäxä. ⁶ Coo ja'a Pablohajxy jim quia'a paatä, mänitä Jasónhajxy jim wyitsnøcxä hagujc hadsip, møødä mäbøjpädøjc-hajxy näje'e. Mänitä judíoshajxy tiägøøyy yaaxpä jojpä, ja'a hajxy hänajty ca'a mäbøjpä:

—Ja'a Pablohajxy, cajptyajma'pä hajxy jaduhn wiädity homiaajä. Tøø hajxy yaa miejtspä. ⁷ Jim hajxy miejtsta'agy maa ja'a Jasón ja'a tiøjcän, paadiä Jasón ja'a pojpa miøødäbä. Homiaajä Pablohajxy jaduhn wiädity, jaduhnä cu'ug hajxy jiojcapxø'øyy coo ja'a gobiernä miädia'agy hajxy quia'a mäbøjcänät, ja'a jim möjhajpä Roma. Jaduhnä Pablohajxy yhöhndaacpä cooc tyijy ja'a Jesús jaduhn miøjhajpä nebiä gobiernän —nømä judíoshajxy miänaañ, ja'a hajxy hänajty ca'a mäbøjpä.

⁸ Coo ja'a cu'ughajxy jaduhn miädooyy møødä möjhajpähajxy, mänit hajxy tiägøøyy yaaxpä waambä. ⁹ Mänitä Jasónhajxy ñiñähjuudiutä møødä mäbøjpädøjc-hajxy, ja'a hajxy hänajty tøø miächíijäbä. Mänit hajxy yhöxmájtsänä.

¹⁰ Coo quioodsøyy, mänitä Pablohajxy ñämaayyä møødä Silas coo hajxy jim chónät, coo hajxy ñøcxät jim maa ja'a cajpt hänajty xiøhatiän Berea. Ja'a mäbøjpädøjc-hajxy jaduhn mänaañ. Mänitä Pablohajxy jim jiaančh nøcxy Berea. Coo hajxy jim miejch, mänit hajxy ñøcxy maa ja'a judíos chajtøjc-hajxiän. ¹¹ Mänitä Diosmädia'agy hajxy tiägøøyy yajnähixøøbiä. Coo ja'a judíoshajxy jaduhn miädooyy, mänit hajxy jaduhn jiootcugøøyy. Cab hajxy jaduhn jiootma'ty nebiä miäjjudíoshajxy hänajty tøø jiootma'adiän jim Tesalónica. Mänitä Diosmädia'agy hajxy tiägøøyy capxtaacpä jabom-jabom pø jaančh tøyhajt hänajty jaduhn nebiä Pablo hajxy hänajty miädia'aguiän.

¹² Paady hajxy jaduhn may miäbøjcy. Møødä jäya'ayhajxy may miäbøjpä, ja'a hajxy hänajty ca'a judíospä, møødä möjhajpädøjc-hajxy, ya'adiøjc-hajxy møødä to'oxiøjc-hajxy.

¹³ Ja'a jäya'ayhajxy hänajty jim tsänaabiä Tesalónica, ja'a hajxy judíospä, coo hajxy jaduhn miädoyhajty coo ja'a Pablo ja'a Diosmädia'agy hänajty jim yajwa'xy Berea, mänit hajxy jiootma'ty. Mänitä jäya'ayhajxy Beréabä hoy jiojcapxø'øyyii coo ja'a Pablo ja'a miädia'agy quia'a mäbøjcäxät. ¹⁴ Ja'a jäya'ayä Diosmädia'agy hajxy hänajty mäbøjpä jim Berea, mänit hajxy miänaañ coo ja'a Pablo jim chónät, coo wiingtuum ñøcxät mejypia'a. Paady hajxy jaduhn miänaañ je'eguiøxpä coo hajxy hänajty chähgø'øyy coo ja'a Pablo cøxypänejpä tiunøøjät. Coo ja'a Pablo jim jiaančh tsohñ Berea, jimä Silashajxy miähmøøyy møødä Timoteo. ¹⁵ Yajmøødquejxä ja'a Pablo ja'a mäbøjpädøjc nämetsc nädägøøg. Coo ja'a Pablohajxy jim miejch mejypia'a, mänit hajxy biarcotägøøyy. Mänit hajxy ñøcxy barcojooty maa ja'a cajpt hänajty xiøhatiän Atenas. Coo hajxy jim miejch, mänitä Pablo jiamíøødhajxy wyiimbijnä. Mänitä Pablo capxy jim quiejxy Berea coo ja'a Silashajxy jim paquiä ñøcxpät Atenas møødä Timoteo, coo ja'a Pablo hajxy jim piáadät.

¹⁶ Jimä Pablo ja'a Silas hänajty yahixy Atenas møødä Timoteo, mänitä Pablo yhiixy coo tsaasaandä hänajty jim jiaančh tehñ miayyä cajptooty. Je'e ja'a cu'ughajxy hänajty wyiingudsähgøøby. Coo ja'a Pablo jaduhn yhiixy, mänit jiaančh tehñ jiootmayhajty.

¹⁷ Naxiä Pablo hänajty jim ñöcxy maa ja'a judíos chajtøjc-hajxiän. Ja'a Jesucristocøxpä ja'a Pablo hänajty jim yajcapxy yajmädia'aguio'øy mөөдä judiöshajxy, mөөдä jäya'ay-hajxy ca'a judiöspä, ja'a Dios hajxy hänajty wiingudsähgøøbiä. Jabom-jabomä Pablo hänajty jim ñöcxy cajptcujc. Mөөд jimä Pablo ja'a Jesucristocøxpä hänajty yajcapxy yajmädia'aguioøøbiä mөөдä cu'ug, ja'a hajxy hänajty jim yohby najxpä. ¹⁸ Mänitä jäya'ayä Pablo hajxy näje'e wyiingumedsøyy. Cujwa'xy hajxy hänajty yhabøcy ja'a epicureodøjcä miädia'agy. Mөөд cujwa'xy hajxy hänajty yhabøjpä ja'a estoicodøjcä miädia'agy. Mänit hajxy näje'e miänaañ:

—Yø'ø craa, jaanč tehñ yajcumayaamb yø'øduhñ cooc tyijy jiaanč tehñ yhøx-pøquiä. Pero cap yø'øduhñ tii ñä'ägädä jaty —nømä Pablo jaduññ ñänøømä.

Mänitä wiinghäna'c-hajxy miänaañ:

—Jäguem yø'ø craa choon. Wiingdiosäda'a miädiaacyy.

Paady hajxy jaduññ miänaañ, je'eguiøxpä coo ja'a Pablo ja'a Jesucristo hänajty miädia'agy, cooc hajxy hoy xñähho'túutäm, mөөд cooc jadähooc jiuypiojtägajch. ¹⁹ Mänitä Pablo jim wioonøcxä maa ja'a tunhuung hänajty xiøhatiän Areópago. Jimä jäya'ayhajxy hänajty may tøø yhamugø'øy. Mänitä Pablo ñämaayyä:

—Højts hawáañäc tii miich jaduññ mmädiaacyy hawiinjemybiä. ²⁰ Jaanč tehñ wyiing miich jaduññ mmädia'agy. Højts capxwíjjäc neby jaduññ miädia'agytiägø'øyän —nømä Pablo miäyajtøøwä.

²¹ Hiç, ja'a jäya'ayhajxy hänajty jim tsänaabiä Atenas, mөөдä jäya'ayhajxy hänajty jim hadsänaabiä, jaduññ hajxy hänajty quiuhdujthaty coo hajxy hänajty cøxiä wiinä miädowa'añ, ja'a hänajty hawiinjemybiä.

²² Mänitä Pablo tiänaayyø'cy cu'ughagujc. Mänit miänaañ:

—Mägu'ughajpädøjc, mijts yaa tsänaabiä Atenas, tøøch jaduññ nhixy coo mi-jtsä tsaasaandä madiu'u mwiingudsähgø'øy. ²³ Mayhitä wiingudsähgøødiaact hajxy mmөөдä. Tøøchä altar tu'ug nhixy coo letra jaduññ yuugiaay miөөдä: “Jii ja'a Diosäda'a tu'ug, cahnä pøn yhixyñä. Je'e yhaltar hädaa.” Hoorä, mwiingudsähgøøby yø'ø Dios hajxy jaduññ, hoy hajxy mga'a jagä hixyhatyñä. Pues je'ečh mijts jaduññ nyajmөөдmädiaacyy.

²⁴ 'Ja'a Dióshøch jaduññ nmädiaacypiä, cøxiä je'e yhädiuunñ mөөд hädaa yaabä naaxwiimbä, mөөд tijaty yaa hijp. Wiindsøn'hajp je'e jim tsajpootyp mөөд hädaa yaabä naaxwiin. Cøxiä wiinä jaduññ yhane'emy homiaajä. Cab jaduññ jiiby chäna'ay tsajtøgooty, ja'a jäya'ayhajxy jaduññ yhädiuumbiä. ²⁵ Cabä Dios tii yajmaajiaty. Cab jaduññ miäna'añ coo højts nbuhbéjtämät. Pero jaaya'ay hajxy cøxiä xmióoyyäm tijaty hajxy nyajmaajíjtäm, mөөдä jugyhajt, mөөдä poj, cøxiä.

²⁶ 'Tu'ug jäya'ay ja'a Dios jecy yhädiuundsohñ. Je'e hajxy nägøxiä nhøjxhájätäm ndecyhájätäm mäduhñtiä hajxy yaa ndsänaayyäm hädaa yaabä naaxwiin wiinduhmyhagajpt. Cahnä Dios hajxy hänajty xyhädiuunäm, tøøyyäm hajxy hänajty xyajnähdíjjäm mänaa hajxy nmiin ngähwämät, maa hajxy ndsänaayy nhäyóowämät. ²⁷ Chojpiä Dios ja'a jioot jaduññ coo hajxy nwiingudsähgøøyyämät, paady hajxy tøø xyhädiuunäm. Coo ja'a Dios hajxy hamuumdu'joot nba'yáaxämät, xyhadsóowäm hajxy jaduññ. ²⁸ Hiç, jaaya'ay hajxy xyagjugyhájätäm. Jaduhñ hajxy tøø xquiunúu'xäm coo hajxy ndsänaayy nhäyóowämät, mөөд coo hajxy nyohy nnájxämät. Jaduhñä yaabä jäya'ayhajxy näje'e tøø quiujaay coogä Dios hajxy xyhuunghájätäm. ²⁹ Tøyhajt jaduññ coo ja'a Dios hajxy xyhuunghájätäm. Pero coo jäya'ayä jäya'ayhahädiuunnaxy hajxy yhädiuunñ, jue'e hajxy yajtuumbiä, oro, mөөдä poobhoro, mөөдä tsa. Cab jaduññ yhahixø'øy coo jaduhmbä jäya'ayhahädiuunnaxy hajxy nwiingudsähgøøyyämät. Hiç, ca'a Dyiosä je'e jaduññ. ³⁰ Jegyhajty, cabä jäya'ayhajxy hijty ñajuø'øy pø jii Dios. Y cabä Dios hijty miøjpäda'agy coo hijty quia'a wiingudsähgø'øyii. Pero jäda'ahaty, tøø ja'a Dios hajxy xyhanéhmäm coo ja'a nhaxøøgcuhdujt hajxy nägøxiä nnajtshixøøyyämät, mäduhñtiä hajxy yaa ndsänaayyäm hädaa yaabä naaxwiin. ³¹ Hiç, tøø ja'a Dios wyiinmay coo hajxy nägøxiä xyajtøyhajtyegáañäm. Jaanä jaduññ tøø wyiinmaabiä mänaa hajxy jaduññ xyajtøyhajtyegáañäm.

Tøø ja'a Dios tu'jäya'ay yajnähdijy coo hajxy mänitxøøbä xyajcueendäyegáañäm. Coo tu'jäya'ay jaduħn yho'cy, mänitä Dios jaaya'ay yagjujypiøjtägajch jadähooc. Coo jaaya'ay jaduħn jiaanč jujypiøjtägajch, jaduħnä tøyhajt hajxy nmøødhájtäm coo jaaya'ay hajxy tøyhajt xyajcueendäyegáañäm mänitxøøbä —nømä Pablo miänaañ.

³² Coo ja'a cu'ughajxy jaduħn miädooyy coo ja'a Pablo jaduħn miänaañ cooc tu'jäya'ay hänäjty tøø jujypiøjtägach, ja'a hänäjty tøø yho'oguiäbä, mänitä Pablo hajxy näje'e ñäxiicy. Mänit wiinghäna'c-hajxy näje'e miänaañ:

—Mminäp yaa jadähooc. Njaac mädoowaamby højts jaduħn nej miich mmädia'aguiän —nømä Pablo ñämaayyä.

³³ Mänitä Pablo wyiimbijnä. ³⁴ Näje'e jäya'ayä Pablo hajxy pianøcxy. Miäbøjc hajxy jaduħn. Tu'jäya'ay hänäjty xiøhaty Dionisio. Møjhajp hänäjty je'e jim maa ja'a Areópagon. Jaanä jaduħnä to'oxiøjc tu'ug miäbøjpa. Dámaris hänäjty xiøhaty. Nämaj hajxy jaduħn miäbøjcy.

18

¹ Mänitä Pablo jim chohñ Atenas. Mänit wiingtuum ñøcxy maa ja'a cajpt hänäjty xiøhatiän Corinto. ² Jimä Pablo ja'a judío tu'ug miøødnibiaatä. Jue'e ja'a judío hänäjty xiøhaty Aquila. Jim hänäjty choon maa ja'a naax hänäjty xiøhatiän Ponto. Jue'e tio'oxiøjc hänäjty xiøhaty Priscila. Naam mech hajxy hänäjty jim Corinto. Jim hajxy hänäjty tøø chohnda'agy maa ja'a naax hänäjty xiøhatiän Italia. Paady hajxy jim chohñ Italia, je'eguiøxpä coo ja'a gobiernä Claudio hänäjty tøø yhane'emy coo ja'a judíoshajxy jim quiøxy tsóonät Roma. Mänitä Pablo jim ñøcxy cuhijxpä maa ja'a Aquilahajxy hänäjty yhahña'ayän. ³ Jue'e Aquilahajxy hänäjty tiuunghajpy, loondøy hajxy hänäjty yhädiuumby. Y ja'a Pablo, jaanä jaduħn hänäjty tiuungmøødäbä. Paadiä Aquila ja'a Pablo ñämaayy coo ja'a Pablo jim miøødtúnät. Mänitä Pablo jim miähmøøñä. ⁴ Wiindu'ugäsábado ja'a Pablo hänäjty jim ñøcxy maa ja'a judíos chajtøjc-hajxiän. Jiibiä Pablo ja'a Diosmädia'agy hänäjty yajwiingapxø'øy ja'a Jesucristocøxpä, weenä jäya'ayhajxy jaduħn miäbøcy, møødä judíoshajxy, møødä ca'a judíoshajxypä.

⁵ Mänitä Silashajxy jim miejch Corinto møødä Timoteo. Macedonia hajxy hänäjty tøø chohnda'agy. Mänitä Pablo jaduħn wyiinmaayy coo tu'tu'uyyä hänäjty tiunaannä, coo ja'a Diosmädia'agyhajtä hänäjty miäwäditaannä. Mänitä Pablo ja'a judíos tiägøøyy yajmøødmädiaacpä coogä Jesús hänäjty ja'a Mesías, ja'a Dios hänäjty jecy tøø yajnähdijjiäbä coo hänäjty quixa'añ yajnähwaatspä. ⁶ Mänitä judíoshajxy jiootma'ty. Mänit hajxy miänaañ cooc tyijy ja'a Pablo hänäjty yhøhnda'agy. Mänitä Pablo ja'a wyit wyiinxiyty. Jaduħnä hijxtahnd yejcy coo ja'a judíos wyiinmahñdyhajxy hänäjty quia'a hoyyä. Mänitä Pablo miänaañ:

—Hamdsooyyä pojpa hajxy jaduħn mmøødä coo hajxy jaduħn mga'a nähwa'adsa'añ. Paady hajxy jaduħn mga'a nähwa'adsa'añ coo haxøøgwiiinmahñdy hajxy mmøødä. Ca'a yhøøchä pojpa jaduħn nmøød coo hajxy mga'a nähwa'adsa'añ. Cábøch mijtsä Diosmädia'agy nyajwiingapxø'øwaannä. Ja'a jäya'ayhajxy ca'a judíospä, je'ečh hajxy jaduħn nyajwiingapxø'øwáannäp —nømä Pablo ja'a judíos ñämaayy.

⁷ Mänitä Pablo chajtøjpaðsøømy. Mänit jim ñøcxy maa ja'a craa Ticio Justo tiøjcän, jim tsajtøjnähmøjc. Wyiingudsähgøøbiä Ticio Justo ja'a Dios hänäjty, hoy hänäjty je'e quia'a jagä judíosä. ⁸ Jimä jäya'ay hänäjty tu'ug xiøhaty Crispo. Jue'e hänäjty tiuumby tsajtøjwiindsøn. Mänitä Crispo ja'a Diosmädia'agy hajxy miäbøjcy nägøxiä, møødä yhuung møødä tio'oxy. Nämayyä jäya'ayä Diosmädia'agy hajxy miäbøjpa, ja'a hajxy hänäjty jim tsänaabiä Corinto. Mänit hajxy hoy ñäbety. ⁹ Mänitä Pablo ja'a Jesucristo wyiinhijxy coods. Mänitä Jesucristo miänaañ:

—Ca'a pøn mdsähgø'øy. Høøch nmädia'agy tehngajnä yajwá'xäc. Caj mhamónät. ¹⁰ Høøch miich ngüeendähajpy. Caj miich pøn nej xtiuna'añ. Hix, nämáyhøchä jäya'ay ja'a ngapxy ja'a nmädia'agy hajxy yaa xmiäbøjca maa hädaa cajptän —nømä Pablo ñämaayyä.

¹¹ Tu'jomõjtä cupcä Pablo jim yhiyty Corinto. Jue'e ja'a Pablo hänajty jaduhñ ñä'ägädä tuunghajpy, ja'a Diosmädia'agy-yajwa'xyiibä.

¹² Pero coo ja'a craa Galiön jim tiägøøyy tuumbä gobernador maa ja'a naax hänajty xiøhatiän Acaya, mänitä judíos ja'a Pablo hajxy tiägøøyy mädsibøøbiä. Mänit hajxy jim yajnøcxy haguyc maa ja'a Galiön hänajty tiuñän. ¹³ Mänitä judíos ja'a Galiön hajxy ñämaayy:

—Jue'e hädaa craa jiatcø'øy, jiojcapxøøby hädaa craa ja'a cu'ug coo højts nguhdujt hajxy xquia'a yajtuunät neby højtsä Dios nwiingudsähgø'øyan. Wiingwiinmahñdy jaduhñ yajnahixøøby coo højtsä Dios wiing nwiingudsähgø'øwät —nømä Pablo ñähwaambejtä.

¹⁴ Coo ja'a Pablo hänajty yhadsowa'añ, mänitä Galiön yaghadsowøøyy:

—Coo hädaa craa häxøpy tøø quiädieey, mänitøch mijtsä mmädia'agy häxøpy nmä-dowaañä. ¹⁵ Pero ja'a mhamdsoo cuhdujt hajxy jaduhñ myajtsibøøby. Ja'a mhamdsoo mädia'agy hajxy jaduhñ myajcapxiøøby pøn jaduhñ xøhajp ja'a Mesías. Hamdsoo mijts myajtødiägø'øwät. Cábøch jaduhmbä nmädowa'añ —nømä judíoshajxy yhojjä.

¹⁶ Mänitä Galiön ja'a judíos yhøxquejxy maa ja'a hagujtøjcän. ¹⁷ Jimä jäya'ay hänajty tu'ug xiøhaty Sóstenes. Copc-hajp hänajty je'e maa ja'a judíos chajtøjc-hajxiän. Mänitä cu'ugä Sóstenes hajxy miejch. Mänit hajxy jim yajnøcxy haguyc. Mänit hajxy jim quioxho'cy. Pero cabä Galiön jaduhñ miøjpädaacy.

¹⁸ Y ja'a Pablo, maxiøø je'e jim jiaag hijty Corinto. Mänitä Pablo ja'a mæbøjpädøjc ñämaayy coo hänajty jim choonaañä. Jim hänajty ñøcxa'añ Siria barcojooty näguipxy møødä Priscila møødä Aquila. Cahnä hajxy hänajty jim biarcotägø'øy Cencrea, mänitä Pablo cuhdøø'x yajcuhme'xy. Paady jaduhñ yajcuhme'xy coo ja'a Dios hänajty cøxiä wiinä tøø miäyujwa'añ. Mänitä Pablohajxy tiu'ubøjnä barcojooty. ¹⁹ Mänit hajxy mejyhawiimb ñajxy. Mänit hajxy jim miejch maa ja'a cajpt hänajty xiøhatiän Efeso. Jimä Pablohajxy ñibiuhyohdiúütänä møødä Priscila møødä Aquila. Mänitä Pablo jim ñøcxy nidiuhm maa ja'a judíos chajtøjc-hajxiän. Mänitä Pablo ja'a judíos tiägøøyy møødmädiaacpä. ²⁰ Mänitä judíoshajxy jia mänaañ coo ja'a Pablo jim jejcy yhidät. Pero cabä Pablo jaduhñ miänaañ. ²¹ Mänit miänaañ: “Nøcxáambøch cham Jerusalem xøhajpä. Pero coo ja'a Dios jaduhñ miänä'anät, mänitøch yaa nmiindägätsät maa mijtsän.”

Coo ja'a Pablo jaduhñ quiapxpädøøyy, mänit jadähooc biarcotägøøguiumbä. Mänit jim chohñ Efeso. ²² Mänit jim ñøcxy barcojooty maa ja'a cajpt hänajty xiøhatiän Cesarea. Coo jim miejch, mänit biarcopädsøømy. Mänit ñøcxy Jerusalem. Coo jim quioo'ty, mänitä mæbøjpädøjc-hajxy hoy quiuhixyii. Mänitä Pablo jim ñøcxy Antioquia. ²³ Maxiøø jim yhiyty. Mänit jim tiu'ubøjcumbä. Mänit jim ñøcxy maa ja'a naax hänajty xiøhatiän Galacia møød jim Frigia. Majatiä Pablo hänajty wiädity, jimä mæbøjpädøjc-hajxy hänajty quiapxmøcøgyii nebiä Diosmädia'agy hajxy jaduhñ hoy yajnøcxät.

²⁴ Mänitä judíos jim tu'ug miejch Efeso. Apolos hänajty xiøhaty. Jue'e hänajty choon Alejandría maa ja'a naax hänajty xiøhatiän Egipto. Jøjwidsø'ø hänajty quiapxy miädia'agy. Ca'xiä Diosmädia'agy hänajty jiaanç tehñ jiaty. ²⁵ Tøø ja'a Diostu'u hänajty jaduhñ hoy yhabøcy. Hamuumdu'joot hänajty yajnahixø'øy ja'a Jesúscøxpä, neby hänajty tøø jiaty tøø yhabetiän. Ñajuøøbiä Apolos hänajty jaduhñ coo ja'a Juan hänajty tøø miäyajnäbety. Pero cahnä Apolos hänajty miädoyhatyñä coo ja'a mæbøjpädøjc-hajxy hänajty ñäbejnä ja'a Jesucristocøxpä. ²⁶ Mänitä Apolos jim ñøcxy maa ja'a judíos chajtøjc-hajxiän. Mänitä Apolos ja'a Diosmädia'agy tiägøøyy yajwiingapx yajwiinmädiaagøøbiä. Møcjoot hänajty miøød. Jimä Priscilahajxy hänajty yhamädoowhity tsajtøgooty møødä Aquila. Coo ja'a Apolos jaduhñ miädiaacpädøøyy, mänitä Priscila ja'a Apolos hajxy hawiing wioonøcxy. Mänitä Apolos hajxy ca'xy yajmøødmädiaacy nebiä Apolos ja'a Diosmädia'agy jaduhñ maas hoy yajnøcxät. ²⁷ Mänitä Apolos miänaañ coo hänajty jim ñøcxa'añ Acaya. Mänitä mæbøjpädøjc-hajxy jaduhñ piamänaañ coo ja'a Apolos jim ñøcxät. Mänitä mæbøjpädøjc nocy hajxy yhädiuun coo ja'a Apolos jim piuhbedøøjtät Acaya. Ja'a mæbøjpädøjc-hajxy hänajty jim hijpä Acaya, je'edsä Apolos

hajxy puhbédäp. Mänitä Apolos jim chohñ Efeso. Mänit jim ñöcxyc Acaya. Coo jim miejch, mänitä mabøjpadøjcä Apolos hajxy piuhbejty nägø'ø nädecypä. Paady hajxy hänajty tøø miäböcy ja'a Jesucristocøxpä, je'eguiøxpä coo ja'a Dios hojioot jiaanč tehñ miøødä. ²⁸ Majatiä Apolos ja'a judíos ja'a Diosmädia'agy hänajty miøodyajcapxiø'øy cu'ughagujc, cabä judíoshajxy hänajty yajmäjäda'agyii. Jaduhnä Apolos yajnähihixø'øy coogä Jesús hänajty je'e Miesíasä, ja'a Dios hänajty jecy tøø yajnähdíjjiäbä coo hänajty yaa quiexa'añ hädaa yaabä naaxwiin. Jaduhnä Apolos hänajty yajnähihixøøbiä coo jaduhn jim myiñ cujaay maa ja'a Diosmädia'aguiän coo ja'a Dios jaduhn jecy tøø miäna'añ coogä Mesías hänajty yaa quiexa'añ.

19

¹ Jimä Apolos hänajty yhityñä Corinto, mänitä Pablo jim chohñ Antioquía. Mänit jim ñaxøøyy tunjoot. Mänit jim miejch Efeso. Jimä Pablo ja'a mabøjpadøjc may piaaty.

² Mänitä Pablo miänaañ:

—Mänaa mijtsä Diosmädia'agy mmabøquiän, nej, mänitiä ja'a Dioshespíritu hajxy xquiorazóngtägøøyyä —nømä mabøjpadøjc-hajxy miäyajtøøwä.

Mänit hajxy yhadsooyy:

—Tii jaduhn mnänøømby ja'a Dioshespíritu. Cahnä højts jaduhn nmädoyhatyñä.

³ Mänitä Pablo miänáangumbä:

—Mänaa mijts mnäbetiän, pønä quiuhdujt hajxy myajtuunä.

Mänit hajxy yhadsooyy:

—Ja'a Juan quiuhdujt højts nyajtuunä.

⁴ Mänitä Pablo jiaac mänáangumbä:

—Jue'e ja'a Juan hänajty yajnäbejpy, pønjatiä yhaxøøgwiinmahñdy hänajty tøø ñajshixø'øy. Jaduhnä Juan hänajty yajnähihixøøbiä coo ja'a Jesús ja'a miädia'agy miäböjcxätä, ja'a hänajty jaac medsaambä —nømä Pablo ja'a mabøjpadøjc ñämaayy.

⁵ Coo hajxy jaduhn miädooyy, mänit hajxy hoy ñäbety ja'a Jesucristocøxpä. ⁶ Mänitä Pablo ja'a mabøjpadøjc tiägøøyy cø'øguhaxjäpä hanidiuhmjaty. Mänitä Dioshespíritu hajxy ñähgädaacä. Mänit hajxy tiägøøyy capxpä wiinghayuuc-haamby. Mänitä Dios ja'a miädia'agy hajxy tiägøøyyä najtscapxøøyyäbä. ⁷ Nämajmetscä mabøjpadøjc-hajxy hänajty.

⁸⁻⁹ Mänitä Pablo tiägøøyy nøcxpä maa ja'a judíos chajtøjc-hajxiän jim Efeso. Sábadohaam hänajty ñöcxyc. Mänitä Pablo ja'a judíos ja'a Diosmädia'agy tiägøøyy yajwiingapx yajwiinmädiaagøøbiä nebiatiä Dios yhane'emiän. Møcjootä Pablo miøødhajt. Jia wi'l'i yajmäbögaambiä Pablo ja'a judíos hänajty. Jia mabøjc hajxy jaduhn näje'e. Pero cab hajxy nägøxiä miäböjcy. Ja'a hajxy hänajty ca'a mabøjpä, mänit hajxy haxøøgjaty ñä'ägä mänaannä jäya'ayhagujc. Haxøøgä Diostu'u hajxy piädaacnä. Mänitä Pablo wyiinmaayy coo hänajty jim quia'a nøcxaannä maa ja'a judíos chajtøjc-hajxiän. Tägøøgp'o hänajty tøø yhabety coo ja'a Pablo jim tiägøøyy nøcxpä. Coo ja'a Pablo jim chohñ, mänitä Pablo ja'a mabøjpadøjc jiaac møødnöcxyc. Mänit hajxy tiägøøyy hamugøøbiä maa ja'a Tirano tiøjcän. Hamøj ja'a Tirano tiøjc hänajty. Jabom-jabomä Pablohajxy hänajty jim ñöcxyc capxpä mädiaacpä. ¹⁰ Mejtsjomøjtä Pablo jim jiaac yajnähihixøøyy. Nämayyä jäya'ayä Diosmädia'agy hajxy jaduhn jim miädooyy maa ja'a naax hänajty xiøhatiän Asia, wiinduhmyhagajpt, møødä judíoshajxy, møød hajxy hänajty ca'a judíospä. ¹¹ Madiu'ujä Pablo pa'am jim yajnajxy ja'a Dios miäjaahaam. Hoy-yagjuøøñajatiä Pablo jaduhn tiuun. ¹² Coo ja'a Pablo wyit hänajty ñähdóonäxä, høxtä najxpä pia'amhajxy hänajty, høxtä nähwáatsäp ja'a haxøøgpoj hajxy hänajty.

¹³ Jimä judíoshajxy hänajty näje'e wiädity. Jäya'ay hajxy hänajty yajnähwaachp, ja'a hajxy hänajty haxøøgpoj møødpä. Coo ja'a judíoshajxy jaduhn miädooyy cooc ja'a Pablo jäya'ay haxøøgpoj hänajty yajnähwa'ačh ja'a Jesús miäjaagøxpä, mänit hajxy wyiinmaadiaacy coo ja'a Pablo hajxy hänajty jaduhn piahixaambä. Mänitä haxøøgpoj hajxy tiägøøyy nämabiä:

—Ja'a Jesús miäjaagøxpä, ja'a Pablo naxy miädiaacypiä, jaduhñ miičh nhane'emy coo miičh jiiby mjøwá'adsät.

¹⁴⁻¹⁵ Jaduhñä Esceva yhuunghajxy hänajty jiatcøøbiä, ja'a hajxy hänajty näjuxtupä. Teedywiindsønä Esceva hänajty tiuumby maa ja'a judíos chajtøjc-hajxiän. Mänitä jäya'ay hajxy tu'ug piaaty. Haxøøgpoj hänajty miøød. Mänitä haxøøgpoj hajxy ñämaayy:

—Ja'a Jesús miäjaagøxpä miičh nhane'emy coo miičh jiiby mjøwá'adsät.

Mänitä haxøøgpoj yhadsooyy:

—Nhíxyhøchä Jesús. Nnajuøøbiøch pøn je'e ja'a Pablo. Pero mijts, caj mijts nhixiä —jaduhñä Esceva yhuunghajxy yhadsoowä.

¹⁶ Mänit hajxy hoyhoy quioxho'cä. Ja'a craa jaduhñ jatcøøyy, ja'a haxøøgpoj hänajty møødpä. Hoyhoy hajxy jaduhñ chaačhøøyy. Nähwa'ads høxwa'ads hajxy jaduhñ piädaacä. Mänit hajxy jiiby yhäxpäbooyy maa craa tiøjcän. ¹⁷ Mänitä mädia'agy jim wiädijty Efeso nebiä Esceva yhuunghajxy jiajty yhabejty. Nägøxiä jäya'ayhajxy jaduhñ miädoyhajty, møødä judíoshajxy, møødä ca'a judíoshajxypä. Jaančh tehñ chähgøøyy ja'a cu'ughajxy jaduhñ. Mänitä Jesús hajxy tiägøøyy wiingudsähgøøbiä nägø'ø nädecypiä, ja'a hajxy nWiindsønähjätämbä.

¹⁸ Mänitä mäbøjpädøjc-hajxy nämay hoy ñägapxy cu'ughagujc nebiaty hajxy hänajty haxøøg tøø jäya'ayhaty. ¹⁹ Ja'a jäya'ayhajxy hänajty tøø tiüñäbä magiahaam, mänitä magianocy hajxy quioxxy yajmejch. Mänit hajxy quioxxy no'cy hijxwiinduum. Jue'egä noquiäda'a hänajty tøø choobaady juxychägui'xmajcmil. ²⁰ Coo ja'a ñocy hajxy jaduhñ ño'cy, jaduhñä hijxtahnd hajxy yejcy coo ja'a Diosmädia'agy hajxy hänajty hoy tøø miäböcy. Tehngajnä ja'a Diosmädia'agy hajxy jim jiaac yajwa'xy wiinduhmyhagajpt.

²¹ Mänitä Pablo wyiinmaadiaacy coo hänajty jim nøcxy wiädita'añ Macedonia møød jim Acaya. Coo hänajty jim tøø quioxxy wädity, mänit hänajty jim ñøcxa'añ Jerusalén. Mänit miänaañ:

—Coočh hänajty tøø nhoy Jerusalén, mänitøch jim nnøcxa'añ Roma.

²² Jimä Pablo jiamioød hänajty miøødä nämetsc, ja'a Timoteo møødä Erasto. Mänit ja'a Pablo ja'a jiamioød jim quiejxø'cy Macedonia. Haa ja'a Pablo, maxiøø jim jiaag hijty Asia.

²³ Mänitä jäya'ayä tsip hajxy näje'e jim yajpädø'cy Efeso. Paady hajxy jaduhñ yajpädø'cy je'eguiøxpä coo ja'a Diosmädia'agy hajxy hänajty quia'a tsoy. ²⁴ Jimä jäya'ay hänajty tu'ug xiøhaty Demetrio. Saandätøjc-hahädiuunnaxiä Demetrio hänajty yhädiuumby poobhorohaam maa ja'a saandä hänajty yhitiän, ja'a xøhajpä Artemisa. Mayyä Demetrio moonsä hänajty miøødä. Jaančh tehñ quianarhajp hajxy hänajty jaduhñ coo ja'a saandätøjc-hahädiuunnaxy hajxy hänajty tioogy. ²⁵ Mänitä Demetrio ja'a mioonsä miøødhamugøøyy nägøxiä møød pønjaty hänajty hawiing saandähädiuumbä. Mänitä Demetrio miänaañ:

—Mägu'ughajpädøjc, coo hädaaduhmbä tuung hajxy ndúunäm, paady hajxy njaančh tehñ quianarhajtäm. Tøyhajt jaduhñ. ²⁶ Tøø hajxy mhixy, tøø hajxy mmädoy coo ja'a Pablo jii wiädity, coo jii quiapxy coo jii miädia'agy cooc tyjy højtsä nsaandä quia'a jújquiäm. Tøø jäya'ayhajxy may miäböcy; ca'a yaayyä Efeso, pero cøxiä wiinduhmyhagajpt yaa Asianaaxooty. ²⁷ Coo jäya'ayhajxy maas may jiaac mäbøgät, cab hajxy majiaty nganarhajtänät. Y cabä jäya'ayä nsaandähajxy xwyiingudsähgø'øwáanänä, ni ja'a saandätøjc maa yhitiän. Jiahdiägoyyaamby hajxy jaduhñän. Wiinduhmyhagajptä saandä Artemisa wyiingudsähgø'øyii yaa Asianaaxooty møød jäguembaady.

²⁸ Coo ja'a jäya'ayhajxy jaduhñ miädooyy, mänit hajxy jiootma'ty. Mänit hajxy tiägøøyy yaaxpä jojpä.

—¡Viva Artemisa, viva! Højtsä Artemisa yaa nsaandähajtäm yaa Efeso.

²⁹ Coo ja'a cu'ughajxy jaduhñ miädooyy coo ja'a Demetrio mioonsähajxy hänajty jaduhñ wyi'i ya'axy wyi'i jiocy cajptooty, mänitä cu'ughajxy tiägøøyy haamhajpä. Jimä Pablohajxy hänajty wiädity cajptooty. Jue'e ja'a jiamioødhajxy hänajty xiøhaty, Gayo møød Aristarco. Macedonia hajxy hänajty nämetsc choon. Mänitä Gayohajxy miajtsä møødä Aristarco. Ja'a cu'ughajxy jaduhñ mämajts. Mänitä Gayohajxy piawijtsä

piajägujcä maa ja'a hamugøødiaactän. Mänit hajxy jim ñäxø'øwøøyyä. ³⁰ Haa ja'a Pablo, coo jaduñ miädoyhajty coo ja'a jiamiøød jaduñ miájtsäxä, mänit jiiby jia wi'i tiägø'øwaañ jäya'ayhagujc. Ja'a jiamiøød hänajty jia wi'i ñähgapxtu'udaamby. Pero cabä mabøjpädøjcä Pablo hajxy jaduñ quiejxy. ³¹ Jimä Pablo ja'a miägu'ughajpähajxy näje'e miøjhaty Asia. Mänitä Pablo nocy yajnäguejxä coo jiiby quia'a tägø'øwät jäya'ayhagujc. ³² Jaančh tehñ yaaxp jaančh tehñ jiojpa cu'ughajxy hänajty jim maa hajxy hänajty tøø yhamugø'øyän. Wiingjaty hajxy hänajty ya'axy. Cab hajxy hänajty tu'cuhdujt ya'axy. Ni quia'a najuø'øy hajxy hänajty tii hajxy hänajty jaduñ tøø ñähamugø'øy. ³³ Jimä judíos hänajty tu'ug xiøhaty Alejandro. Mänitä Alejandro jaduñ piajahmä jäya'ayhagujc. Ja'a miägunaaxhajxy jaduñ näje'e jatcøøyy. Mänitä Alejandro yhawáanäxä tiiguiøxpä yø'ø jäya'ayhajxy hänajty jaduñ coo wyi'i yhaamhaty. Mänitä Alejandro ja'a judíos jia nähgapxtu'udaanñ jäya'ayhagujc. ³⁴ Coo ja'a cu'ugä Alejandro hajxy jaduñ yhøxcajpy coo hänajty je'e jiudíospä, mänit hajxy tiägø'øguiumbä yaaxpä jojpa.

—¡Viva Artemisa, viva! Højtsä Artemisa yaa nsaandähájtäm yaa Efeso.

Mejtshora hajxy jaduñ jiaac yaaxy jiaac jojcy.

³⁵ Hobiä nejpiä ja'a secretario ja'a cu'ug yaghamooñ. Mänit miänaañ:

—Mägu'ughajpädøjc, mijts yaa tsänaabiä Efeso, jéquiänä tsa tu'ug quiahy tsajtwiing. Artemisa hajxy nyajxøhájäm. Je'e hajxy yaa nwiingudsähgøøyyäm yaa Efeso. Tøø ja'a tiøjc hajxy jaduñ nhädiüunäm coo jaduñ jiiby yhidät jiiby tiøgooty. Højtsä cuhdujt jaduñ nmøød'ájtäm coo højtsä Artemisa ngüeendähájtäm. ³⁶ Tøyhajt jaduñ. Hopiønä jaduñ miäna'añ. Hoorä, huuc tunä mayhajt hajxy. Huuc hamón hajxy. Hoy hajxy jaduñ mhuuc tehñ tiaj mhuuc tehñ miáyät jayøjp tii hajxy mdunaamby. ³⁷ Hädaa mähdiøjc hajxy tøø mmächäbä, cabä tii pojpa tii cädieey hajxy hädaa tøø tiuñ. Cabä Artemisa hajxy tøø miägapxtägoy, ni cab hajxy tii tøø mieečh maa ja'a Artemisa tiøgootiän. ³⁸ Pø tøø hädaa mähdiøjc-hajxy jaduñ jiaančh cädieey nebiä Demetriohajxy ñäxø'øwø'øyän, weenä Demetriohajxy jim nøcxy ñäxø'øwø'øy maa ja'a hagujtøjcän. Jaduñhä cuhdujt ñä'ägä miñ. Paadiä cuduung yhuuc jimäbä. ³⁹ Pø jimä tsip wiingpä hajxy jaduñ mjaac møødä, mänit hajxy mnägápxät coo junta hänajty jiaac jada'añii. ⁴⁰ Cab jaduñ yhahixø'øy coo hajxy jaduñ nwi'i yhaamhájtäm nä'a nägoobä, coo tsip hajxy jaduñ nä'a nägoobä nyajpädó'cäm. Coo ja'a gobiernä Rómabä jaduñ miädoyhädät neby hajxy jäda'a tøø njatcøøyyäm, wehndä häyaa xñäxø'øwøøyyämät. Neby hajxy häyaa nnä'a hadsóowämät.

⁴¹ Mänitä secretario quiapxpädøñä. Mänit miänaañ coo ja'a jäya'ayhajxy wyiim-bijnät.

20

¹ Coo ja'a jäya'ayhajxy hänajty tøø mioon tøø tiujnä, mänitä Pablo ja'a mabøjpädøjc miøjyaaxy. Mänitä Pablo miägapxy yhanehmy. Mänit miänaañ coo hänajty jim wyiimbidaañnä, møød coo hänajty jim ñøcxaannä Macedonia. ² Coo jim miejch, mänit jim tiägøøyy wädijpä cajpt-cajpt. Majaty hänajty wiädity, jimä mabøjpädøjc hänajty miägapxy yhane'emy. Mänitä Pablo jim chóhngumbä Macedonia. Mänit jim ñøcxy Grecia. ³ Coo jim miejch, mänit jim yhijty tägøøgp'o. Coo hänajty jim choonángumbä, mänit hänajty jim ñøcxa'añ Siria barcojooty. Cahnä Pablo hänajty biarcotägø'øyñä, mänit miädoyhajty coogä judíoshajxy hänajty tøø quiojyquiapxytiuñ coogä Pablo hajxy hänajty miadsa'añ, nägøoyyädsä Pablo jiiby tiägø'øwät barcojooty. Mänitä Pablo wyiinmahñdyhajty coo hänajty quia'a tu'ubøgaannä barcojooty. Jaduñ wyiinmahñdyhajnä coo jim ñøcxø'øwät Macedonia tecy-yo'oyhaam. ⁴ Nämayyä Pablo miägu'ughajpähajxy jim miøødnøcxy Asia, møødä Timoteo, møødä Sópater, ja'a hänajty jim tsohmbä Berea, ja'a Pirro yhuung, møødä Gayo, ja'a hänajty jim tsohmbä Derbe, møødä Aristarco, møødä Segundo, møødä Tíquico, møødä Trófimo. Tesalónica ja'a Aristarcohajxy hänajty choon møødä Segundo. Asia ja'a Tíquicohajxy hänajty choon møødä Trófimo. ⁵ Coo ja'a Pablohajxy jim miejch Filipos møødä jiamiøødhajxy, mäníthøchä Pablo jim

nbaattägajch, hөөч Lucas. Hөөч hädaa nocy jaduhñ nhädiuumby. Mänitä Pablo jiamiөdhajxy jim ñөcxө'cy Troas. Jim höjts hänajty xyhahixa'añ, hөөч mөөдä Pablo. ⁶ Paady höjts jim nmähmөөyy Filipos, coo ja'a judíos ja'a xiөөhajxy hänajty jiada'añii mänaa ja'a judíos ja'a tsajcaagy hajxy quiayyän, ja'a ca'a levadura mөөdpä. Coo ja'a xөө jaduhñ miaaay, mänit höjts jim nbarcotägөөyy. Mänit höjts jim ndsohñnä Filipos barcojooty. Mägoөxxөө höjts mejjiooty nyohy. Mänit höjts jim nmejch Troas. Mänit höjtsä Pablo ja'a jiamiөөd jim nbaattägajch, ja'a höjts hänajty jim xyhahijxpä. Jim höjts njaac hijty juxtuxөө nägөxiä. ⁷ Coo näxөө jaduhñ yhabaaty, mänit höjts nhamugөөyy, höjts mäbөjpädөjc. Mänit höjtsä Santa Cena nyagjajtä. Mänit höjtsä Pablo xtiägөөyy yajñähixөөbiä. Jeycy jaduhñ miädiaacy je'eguiөxpä coo hänajty cujaboom tiu'ubөgaannä. Cuptsuhmdä hänajty төө jiaty, jimnä ja'a Pablo hänajty miädia'agyñä. ⁸ Maa höjts hänajty төө nhamugө'өyän, nähbettөjtөgooty hänajty jaduhñ jim. Jiibiä jөөн hänajty may tioy. ⁹ Jimä hөxcujc-häna'c hänajty tu'ug yhäña'ay ventanahaguuy nähbet-tөjñähgөxp ja'a miädägөөgpisobä. Eutico ja'a craa hänajty xiөhaty. Jim Eutico ja'a Pablo hänajty yhamädoowhity. Tөө ja'a Pablo hänajty jeycy miädiaacnä. Mänitä Eutico jim miaaho'cy maa hänajty yhäña'ayän ventanahaguuy. Mänit jim quiuhgahnajxy. Ho'ogy hoy wyidsө'cänä. ¹⁰ Coo ja'a Pablo jaduhñ yhijxy, mänit jiiby yhädaacy naaxyp maa ja'a Eutico hänajty төө quia'ayän. Mänitä Pablo ja'a Eutico miäneenө'cy. Mänit höjtsä Pablo xñämaayy:

—Ca'a hajxy mdsähgө'өy. Jujcyñä hädaa craa jaduhñ.

¹¹⁻¹² Jujcy ja'a craa jiaanч yajnөcxä maa ja'a tiөjcän. Mänitä mäbөjpädөjc-hajxy jiaanч tehñ xioondaacy. Mänitä Pablo jim ñөcxtägajch cөxp maa hänajty yajñähixө'өyän. Mänitä Pablo ja'a tsajcaagy yajwa'xy. Mänit höjts ngaayy nhuucy nägөxiä. Mänitä Pablo jiaac tägөөyy yajñähixөөbiä. Jim höjts jaduhñ ngujobөөyy. Mänitä Pablo miädiaacpädөөñä. Mänit jim chohñnä Troas.

¹³⁻¹⁴ Tөө höjtsä Pablo hänajty xñäma'ay cooc hänajty tecy-yo'oyhaam ñөcxa'añ jim maa ja'a cajpt hänajty xiөhatiän Aso. Pero höjts, barcojooty höjts jim nnөcxy, hөөч Lucas mөөдä Pablo jiamiөdhajxy. Coo höjts jim nmejch Aso, mänitä Pablo jim tiägөөbiä barcojooty. Mänit höjts jim ndu'ubөjcumbä Aso näguipxy mөөдä Pablo. Mänit höjts jim nägөxiä nnөcxy maa ja'a cajpt hänajty xiөhatiän Mitilene. ¹⁵ Coo höjts jim ndsöhngumbä, mänit höjts cujaboom nnaxөөyy jim mädөyyä maa ja'a naax hänajty xiөhatiän Quío. Mänit höjts jim cujaboom nmejch maa ja'a cajpt hänajty xiөhatiän Samos. Coo höjts jim ndsöhngumbä, cujaboom höjts jim nméjtscumbä maa ja'a cajpt hänajty xiөhatiän Mileto. ¹⁶ Tөө ja'a Pablo hänajty wyiinmay coo hänajty jim quia'a näxө'өwängumbä Efeso. Hix, cabä Pablo hänajty jim jeycy wiädita'añ Asianaaxooty. Paady hänajty jim quia'a wädita'añ Asia coo hänajty jim ñөcxa'añ Jerusalén. Mobädajpä ja'a Pentecostésxөө hänajty jim jiada'añii. Paadiä Pablo hänajty yhadө'өч, jaduhñä Pentcostés-xөө mädөyyä piädät.

¹⁷ Jimnä höjts hänajty nhityñä Mileto, mänitä Pablo capxy jim quiejxy Efeso coo ja'a tsajtөjwiindsөnhajxy jim ñөcxät Mileto, ja'a hajxy hänajty jim tuumbä Efeso. ¹⁸ Coo hajxy jim miejch Mileto, mänit hajxy ñämaayyä:

—Mänäajөch jim nhitiän maa mijtsän jim Asianaaxooty, jaanч tehñ yhöyhөch jim nduunñ mäduhñtiөch jim nhijty. Mnajuөөby hajxy jaduhñ coöch jaduhñ nga'a hөhñda'agy. ¹⁹ Jaanч tehñ yhöyhөchä Jesús ja'a tiuung hänajty nduunä, ja'a hajxy nWiindsөnhajtämbä. Mee'xxiéemyhөch hänajty nduñ. Näxyhөch hänajty njootmayhaty coöchä nmägunaaxä Jesús ja'a miädia'agy hajxy hänajty quia'a mäbөgaannä. Mayhooc hajxy jaduhñ quiojyquiapxytiuunñ coöch hajxy hänajty xjia wi'i yagho'oga'añ. ²⁰ Cөxyhөch mijts hänajty nyajwiinxiic nyajwiingapxө'өy neby hajxy hoy mhídät. Homiänäajөch mijts hänajty yajñähixө'өy, mөөd jim jäya'ayhagujc, mөөd jim maa ja'a mdөjc-hajxiän. ²¹ Jaduhñhөch mijts hänajty nmägapxy nhane'emy coo ja'a mhaxөөгcuhdujt hajxy jaduhñ mnajtshixө'өwät, mөөd coo ja'a Diosmädia'agy hajxy mmäbөгät ja'a Jesüscөxpä, ja'a hajxy nWiindsөnhajtämbä. Nägөxiөch mijts

hänajty jaduhñ nmøødmädia'agy, møød mijts judíoshajxy, møød mijts cajpä judíospä.²² Hoorä, tøøchä Dioshespíritu xñäma'ay cooçh jimñ nnócxät Jerusalén. Pero cábøch nnajuø'øy nébyhøch jimñ njada'añ nhabetä'añ.²³ Jagóoyyøch jaduhñ nnajuø'øy cooçh jimñ nyajtsuma'añ, cooçhä tsaächpä peenä jimñ nbaada'añ. Majátyhøch jaduhñ tøø nwädity, jadúhñhøchä Dioshespíritu tøø xyhawaanä cooçh jaduhñ njada'añ nhabetä'añ.²⁴ Pero cábøch tii ndajy nmay. Cabä cueentä jaduhñ cooçh nnä'ä hó'ogät. Je'eyyähájtøch nbøcjuøøby cooçhä nduung nyajmayaannä, ja'a Jesús høch xmióoyyäbä, ja'a hajxy nWiindsønñájtämbä. Jadúhñhøch xtiuungmooyy cooçhä mädia'agy jaduhñ nyajwá'xät coo ja'a Dios hojioot jiaançh tehñ miøødä.

²⁵ 'Tøøch mijts nyajwiinxiic nyajwiingapxø'øy coo ja'a Dios yhane'ema'añ ja'a miøcmäjaahaam. Hoorä, cábøch mijts mänaa xyhijxtägatsaannä. Tøyhajt jaduhñ.²⁶ Coo mijtsä Diosmädia'agy mga'a mábógät nébyhøch tøø nja mädia'aguiän, ca'a yhøøchä pojpä jaduhñ nmøød.²⁷ Hix, pedyijøch mijts tøø nyajmøødmädia'agy nebiatiä Dios tøø yhane'emiän.²⁸ Mniyajcopcø'øwøøjäp hajxy. Mgüeendähádäbä mábøjpädøjc hajxy nägøxiä. Ja'a Dioshespíritu hajxy jaduhñ xpiädaac coo hajxy jaduhñ mgüeendähádät. Coo ja'a Jesucristo hajxy tøø xñähho'túutäm, paadiä Dios hajxy jaduhñ xyhuunghájtäm, coo ja'a miädia'agy hajxy nmábójcäm.²⁹ Cooçh mijts jaduhñ nbuhwa'adsaannä, mänitä wiinghäna'c-hajxy yaa miedsa'añ maa mijtsän. Mäwiinhøhmbä hajxy jaduhñ miedsa'añ. Xjia wi'i jøjcapxø'øwaamb mijts jaduhñ coo ja'a Diosmädia'agy hajxy mnajtshixø'øwät. Jaduhñ mäwiinätš hajxy jiatcø'øwa'añ nebiä pahucä meeg hajxy chu'uçhän. Tøyhajt jaduhñ.³⁰ Høxtä mijtsä mjamioød näje'e tiägø'øwaambä høhndaacpä. Näje'e ja'a mábøjpädøjc-hajxy jaduhñ yajtägoyyáanäbä nebiä høhndaacpähajxy tiägoyya'añän.³¹ Naxy hajxy jaduhñ mdehññ ñiyajcopcø'øwøøjät. Tägøøgjomøjtøch mijts jaduhñ nmägapxy nhanehñny xøømdsuhñ. Jaançh tehñ chaaçhpøjpøch hänajty. Naxy hajxy jaduhñ mdehññ jiahmiédsät.

³² 'Hoorä, mábøjpädøjc, mijtsä Dios nyajcø'øwaanøøby ween hajxy jaduhñ xcwieendähaty. Jaduhñä Diosmädia'agy miäna'añ cooc ja'a Dios hojioot jiaançh tehñ miøødä. Coo ja'a Diosmädia'agy hajxy hamuumdu'joot mmábógät, jaduhñä Dios hajxy xjiaac tehñ piuhbédät ja'a miäjaahaam. Møød hodiuum hajxy jaduhñ xpiädá'agät näguipxy møød pønjaty ja'a Dios yhuunghajpy.³³ Cábøch pønä wyitä xiädø'øñ tøø nhadsojcä.³⁴ Ja'a nhamdsoo cø'øháamhøch jaduhñ tøø nniyhixyii. Jadúhñhøchä nmägu'ughajpä tøø nbuhbejpä. Tøyhajt jaduhñ.³⁵ Homiänájøch mijts tøø nmägapxy tøø nhane'emy coo hajxy mniguiudúunäxät, møød coo ja'a pa'amjäya'ay hajxy jaduhñ mbuhbédät møødä häyoobäjäya'ay. Mjahmiédsäp hajxy jaduhñ coo ja'a Jesús jaduhñ jecy miänaañ: "Coo wiinghäna'c mbuhbédät, jaduhñds jootcujc mhídät. Pø mnä'ä yajpuhbedaamb jaduhñ, cab jaduhñ jootcujc mhídät."

³⁶ Coo ja'a Pablo jaduhñ quiapxpädøøyy miädiaacpädøøyy, mänit hajxy nägøxiä jyijcädaacy näguipxy møødä Pablo. Mänit hajxy tiägøøyy Diospa'yaaxpä.³⁷ Mänit hajxy tiägøøyy jøøbiä xuu'tspä coo ja'a Pablo hajxy hänajty piuhwa'adsáanänä. Mänitä Pablo hajxy miajch miäneeñ. Mänitä Pablo hajxy chu'xy.³⁸ Jaançh tehñ jiootmayhajp hajxy hänajty je'eguiøxpä coo ja'a Pablo hänajty tøø miäna'añ cooc ja'a Pablo hajxy hänajty quia'a hijxtägatsaannä. Mänitä Pablo hajxy hoy ñajtshixøøñä maa ja'a Pablo hänajty biarcotägø'øwa'añän.

21

¹ Mänit højtsä mábøjpädøjc nbuhwaatsnä. Mänit højts nbarcotägøøyy. Mänit højts jimñ ndsohñnä Mileto. Mänit højts jimñ tu'uda'aquiä nnøcxy maa ja'a cajpt hänajty xiøhatiän Cos. Cujaboom højts njaac nøcxy maa ja'a naax hänajty xiøhatiän Rodas. Coo højts jimñ ndsøhngumbä, mänit højts jimñ njaac nøcxy maa ja'a cajpt hänajty xiøhatiän Pátara.² Jimñ højtsä barco wiingpä hoy nbaady. Jimñ hänajty ñøcxa'añ maa ja'a naax hänajty xiøhatiän Fenicia. Mänit højts ndu'ubójcumbä wiingbarcojooty.³ Mänit højtsä naax nnäheebøøyy, ja'a hänajty xøhajpä Chipre. Hahooyhaamby højts

jim̄ nwiinnajxy jäguemjuøøby. Jim̄ hõjts hãnajty nnøcxø'øy maa ja'a naax hãnajty xiøhatiãn Siria. Coø hõjts jim̄ nmejch, mãnit hõjts jim̄ nbarcopãdsøømy maa ja'a cajpt hãnajty xiøhatiãn Tiro. Paadiã barco jim̄ miedsøøyy Tiro coø tsømy hajxy hãnajty jim̄ ñãhdsøømdu'uda'añ. ⁴ Jim̄ hõjtsã mãbøjpãdøjc ñãje'e nbaaty. Mãnit hõjts jim̄ nhijty Tiro juxtujxøø maa ja'a mãbøjpãdøjc-hajxiãn. Mãnitã Pablo hajxy jia ñãmaayy coø jim̄ quia'a jaac nõcxãt Jerusalén. Jadúhñãc hajxy hãnajty tøø ñajtsapxø'øyii ja'a Dioshespíritãm. Pero cabã Pablo jaduhñ ñã'a møjpdãdaacy. ⁵ Coø juxtujxøø yhabejty, mãnit hõjts jim̄ ndu'ubøjcumbã. Mãnit hõjtsã mãbøjpãdøjc nãgøxiã hoy xñajtshixø'øy cajptpa'a møødã yhuung møødã tiø'oxy. Mãnit hõjts jim̄ njicãdaacy pu'uwíing. Mãnit hõjts nDiospa'yaaxy. ⁶ Mãnit hõjtsã mãbøjpãdøjc xpíuhwaatsnã. Mãnit hajxy wyiimbijnã maa ja'a tiøjc-hajxiãn. Mãnit hõjts ndãgøødiãgajch barcojooty.

⁷ Mãnit hõjts jim̄ ndsøhngumbã Tiro. Mãnit hõjts jim̄ njaac nõcxy maa ja'a cajpt hãnajty xiøhatiãn Tolemaida. Coø hõjts jim̄ nmejch, mãnit hõjtsã mãbøjpãdøjc hoy nguhixy. Tu'tsuhñ hõjts jim̄ nhijty maa ja'a mãbøjpãdøjc-hajxiãn. ⁸ Cujaboom hõjts jim̄ ndu'ubøjcumbã. Mãnit hõjts jim̄ nnøcxy maa ja'a cajpt hãnajty xiøhatiãn Cesarea. Coø hõjts jim̄ nmejch, mãnit hõjts jim̄ nnøcxøøyy maa ja'a Felipe tiøjcãn. Mãnit hõjtsã Felipe xñãmaayy coø hõjts jim̄ nmejtstã'agãt maa ja'a tiøjcãn. Jue'e ja'a Felipe hãnajty tiuunghajpy, ja'a Diosmãdia'agy hãnajty yajwa'xyp. Tøø hãnajty jaduhñ wyiinguexyii coø ja'a mãbøjpãdøjc piuhbãdãt. Ñãjuxtujc hajxy hãnajty jaduhñ wyiinguejxã coø hajxy jaduhñ miãbuhbãdãt. ⁹ Mãdaaxcã Felipe yhuung hãnajty haagã cãxyii. Nãmãdaaxcã Diosmãdia'agy hajxy hãnajty ñajtsapxø'øy. ¹⁰ Maxiøø hõjts hãnajty jim̄ tøø nhity maa ja'a Felipe tiøjcãn, mãnitã jãya'ay tu'ug miejch. Agabo hãnajty xiøhaty. Jim̄ hãnajty choõñ Judea. Ñajtsapxøøbiã Diosmãdia'agy hãnajty je'ebã. ¹¹ Coø ja'a Agabo jim̄ miejch maa hõjts hãnajty nmejtsta'aguiãn, mãnitã Pablo ja'a wiøøn wiãhãjtãxã. Mãnitã Agabo hamdsoo ñiguiø'øxojts ñidiecyxiojtsã ja'a Pablo ja'a wiøønhaam. Mãnitã Agabo ja'a Pablo ñãmaayy:

—Jadúhñhøçhã Dioshespíritu tøø xñãma'ay coøch miich nñajtsapxøøyyãt. Jadúhñãc miichã judíos xquiø'øxots xtiocyiodsaambã jim̄ Jerusalén nébyhøch cham̄ tøø nhamayyãn. Mãnitãc miich xyajcø'ødãgø'øwa'añ ja'a soldadohajxy Rómabã.

¹² Coø hõjts jaduhñ nmãdooyy, møødã mãbøjpãdøjc-hajxy, mãnit hõjtsã Pablo nja ñãmaayy coø jim̄ quia'a nõcxãt Jerusalén. ¹³ Mãnitã Pablo yhadsooyy:

—Tii hajxy coø mjø'øy coø mxuuçh. Tiiçh hajxy coø xyagjootmayhaty. Cabã cueentã jaduhñ coøçhã hãna'c jaduhñ jim̄ xquiø'øxots xtiocyiødsãt Jerusalén. Cabã cueentã jaduhñ coøçhã hãna'c jim̄ xyaghó'ogãt ja'a Jesúcøxpã, ja'a hajxy nWiindsønãhãjtãmbã —nømã Pablo miãnaañ.

¹⁴ Coø hõjts jaduhñ nhijxy coø ja'a Pablo hãnajty quia'a mãbøga'añ, mãnit hõjts nmãnaañnã:

—Ween jaduhñ jiadyii nebiã Dios tøø miãna'añãn.

Mãnit hõjts nhamoõnã.

¹⁵ Mãnit hõjts nhadsøømbøjcy, høøçh møødã Pablo. Mãnit hõjts jim̄ nnøcxy Jerusalén.

¹⁶ Ñãje'e hõjtsã mãbøjpãdøjc jim̄ xpianøcxy, ja'a hajxy hãnajty jim̄ tsohmbã Cesarea. Coø hõjts jim̄ nmejch Jerusalén, mãnit hõjts hoy xñajtswowø'øy maa ja'a Mnasón ja'a tiøjcãn. Jim̄ã Mnasón hãnajty jecy tøø chohnda'agy Chipre. Tøø hãnajty jiegeø'øy coø ja'a Mnasón ja'a Diosmãdia'agy hãnajty tøø miãbøcy. Jim̄ hõjts nmejtstaacy maa ja'a Mnasón ja'a tiøjcãn.

¹⁷ Coø hõjts jim̄ nmejch maa ja'a mãbøjpãdøjc-hajxiãn, mãnit hõjts xquionðymooyy xoõndãacãp. ¹⁸ Cujaboom hõjtsã Pablo jim̄ xmiødhajty maa ja'a tsajtøjcãn. Jim̄ã Santiago hãnajty møødã tsajtøjwiindsønãhajxy nãgøxiã. ¹⁹ Mãnitã Santiagohajxy miøød-niyajpoo'xã ja'a Pablo. Mãnitã Pablo tiãgøøyy mãdiaacpã nebiatiã Diosmãdia'agy hãnajty tøø yajwa'xiãn maa ja'a cajpa judíoshajxiãn, cooc jaduhñ quiapxy miãdiaacy ja'a Dios miãjaahaam. ²⁰ Coø ja'a Santiagohajxy jaduhñ miãdooyy, mãnitã Dios hajxy wyiingudsãhgøøyy. Mãnitã Pablo hajxy ñãmaayy:

—Mägu'ughajpä Pablo, mnajuøøby miičh jaduhñ coo ja'a judíos ja'a Jesús ja'a miädia'agy hajxy nämay tøø miäbøjcä. Jaduhñ hajxy nägøxiä miäna'añ coo ja'a cuhdujt hajxy tsipcøxp ngudiúunämät, ja'a Moisés jecy yhanéhmäbä. ²¹ Tøø hajxy jaduhñ miädoyhaty cooc tyijy miičhä judíos wiingcuhdujt tøø myajnahixø'øy, ja'a hajxy jäguembaady hadsänaabiä. Jadúhñäc tyijy tøø myajnahixø'øy coo cuhdujt hajxy ñajtshixø'øwät, ja'a Moisés jecy yhanéhmäbä. Jadúhñäc tyijy tøø myajnahixøøbiä coo hõjts ja'a nguuhdujt nga'a cudiúunänät, hõjts judíos, møød coo hõjts nhuung nga'a circuncidarhåjtänät. ²² Coo ja'a cu'ughajxy jaduhñ miädoyhädät coo miičh yaa tøø mgoody Jerusalén, mänitä tøyhajt hajxy choga'añ pø tøyhajt jaduhñ coo miičhä judíos jaduhñ tøø mjaančh yajnahixø'øy, ja'a hajxy jäguembaady hadsänaabiä. ²³ Tøø hõjts ja'a wiinmahñdy tu'ug nbaady nej miičh myajniyhoyø'øwøøjät. Jii hõjtsä nmägu'ughajpä nämädaaxcä. Tøø xøø hajxy yhagapxtucy coo meeg hajxy hånajty yoxa'añ nebiä Moisés jecy yhanehmiän coo hajxy jaduhñ nguuhdujthåjtämät. ²⁴ Mmødhädäp miičh yø'ø häna'c yø'ø nämädaaxpä. Jaduhñ miičh mnämäjuyø'øwät coo meeg hajxy hånajty yoxa'añ. Jaaná jaduhñ miičhä meeg tu'ug myójxpät. Coo miičh jaduhñ mnämäjuyø'øwät, jaduhñ hajxy hoy yajcuhmé'xät. Coo miičh jaduhñ mguhdujthädät, jaduhñ miičhä cu'ug xyhixät coo miičhä cuhdujt jaduhñ mgudiuumbä, ja'a Moisés jecy yhanéhmäbä. Jaduhñä cu'ugä tøyhajt hajxy miøødhada'añ coo miičh wiingcuhdujt tøyhajt mga'a yajnahixø'øy. ²⁵ Pero ja'a jäya'ayhajxy ca'a judiøspä, ja'a hajxy mäbøjpä, tøø hõjtsä nocy nyajnäaayø'øy. Jaduhñ hõjts tøø nmägapxy tøø nhane'emy coo hajxy quia'a tsú'udsät mädyiibä häna'c tøø yoxy quepychechwiinduum, møød coo hajxy quia'a tsú'tspät ja'a tøø quia'a nø'xiée'xiäbä, møød coo wiingto'oxiøjc hajxy quia'a møødmá'awät —nømä Pablo ñämaayyä.

²⁶ Mänitä Pablo ja'a häna'c miøødhajty ja'a nämädaaxpä. Mänit hajxy cujaboom hoy quiudiuñ nebiä judíos quiuhdujthajxy hånajty myiñän. Mänit hajxy tiøjtägøøyy tsajtøgooty. Mänit hajxy ñägäpxy cooc juxtujxøø hånajty quia'a habetyñä neby hajxy hånajty tøø yhagapxtuquiän coo meeg hajxy hånajty yoxa'añ.

²⁷⁻³⁰ Ja weenjaty hånajty quia'a habety ja'a juxtujxøøbä. Mänitä jäya'ayhajxy näje'e tiägøøyy tsajtøgooty. Jim hajxy hånajty chooñ Asia. Coo ja'a Pablo hajxy jiiby yhiixy tsajtøgooty, mänit hajxy tiägøøyy yaaxpä cooc ja'a Pablo hånajty jiiby wiädity:

—Judíostøjc, hõjts puhbéjtäc. Xiids yø'ø craa Pablo wiädity. Yø'ødsä wiingcuhdujt homiajaty nøcxy yajwiinhixø'øy. Jaduhñ yø'ø craa ja'a cu'ug jiojcapxø'øy coo hõjtsä nguuhdujt hajxy xquia'a cudiúunämät, nebiä Moisés jecy jia hanéhmäbä. Jaduhñ yø'ø craa yajwiinhixøøbiä cooc tyijy hädaa tsajtøjc jaduhñ quia'a tsoobaady. Maas hanaxiä haxøøg tøø jiatcø'øy coo jäya'ay yaa tøø miøødtägø'øy tsajtøgooty, ja'a hajxy ca'a judiøspä. Hix, cabä cuhdujt jaduhñ ñä'ägä miñ coo hajxy yaa tiägø'øwät tsajtøgooty, pønjaty ca'a judíos.

Paady hajxy jaduhñ miänaañ, je'eguiøxpä coo ja'a Pablo hånajty tøø yhixyii cajptooty coo ja'a Tróximo hånajty miøødä. Jaduhñä Asiabäjäya'ayhajxy hånajty miäna'añ cooc tyijy ja'a Pablo ja'a Tróximo hånajty tøø miøødtägøøyy tsajtøgooty. Efeso ja'a Tróximo hånajty chooñ. Ca'a jiidíosä hånajty je'e. Hoorä, coo ja'a cu'ughajxy jaduhñ miädooy cooc ja'a Pablo hånajty jiiby wiädity tsajtøgooty, mänit hajxy tiägøøyy haamhåjpä. Mänitä Pablo hajxy miajch. Mänit hajxy piawijch piäjädujty jim tsajtøghaguuy. Mänitiä tsajtøjc hajxy yhagøøyy.

³¹ Jimä cu'ugä Pablo hajxy hånajty ñä'ägä yagho'ogaannä, mänitä soldado-wiindsønä mädia'agy ñämejtsä coogä cu'ughajxy hånajty jim wyi'i yhaamhaty Jerusalén. Roma ja'a soldadohajxy hånajty chooñ. ³² Tuunä ja'a soldado-wiindsøn jaduhñ ñä'a mädooy, mänitä soldadohajxy yhamugøøyy. Mänit hajxy päyø'øguiä yhädaacy maa ja'a cu'ughajxy hånajty yhaamhatiän. Coo ja'a cu'ugä soldado hajxy jaduhñ jiojcuheebøøyy coo ja'a soldadohajxy hånajty miänacy maa ja'a Pablo hånajty wiobho'ogyiijän, mänitä Pablo yhøxmajtsä. ³³ Coo ja'a soldado-wiindsøn jiiby quiädaacy, mänitä Pablo chuumä. Hamejtscadena quiø'øxojs tiecyxiojtsä. Mänitä soldado-wiindsønä cu'ug miäyajtøøyy

põnä Pablo, mөөд тii hänäjty coo төө wiobho'ogyii. ³⁴ Mänitä jäya'ayhajxy may yhadsooyy haagä wiingjaty. Cab hajxy hänäjty tiu'ugmädia'aguiä. Coo ja'a cu'ughajxy hänäjty jaduһn wyi'i ya'axy, cabä soldado-wiindsõnä төyhajt hänäjty hoy piaada'añ. Mänit miänaañ coo ja'a Pablo jim yajnөcxөjät maa ja'a cuartelän. ³⁵ Coo ja'a soldado ja'a Pablo hajxy jim miөөdcoo'ty maa ja'a escalera jaduһn chohnda'aguiän, mänitä Pablo hajxy quiөyө'cy. Paady hajxy jaduһn quiөyө'cy coo ja'a cu'ugä Pablo hajxy hänäjty jia wi'i yagho'oga'añ. ³⁶ Hөxhaamä cu'ugä soldado hajxy hänäjty pianөcxy yäaxäp coo ja'a Pablo yagho'ogөjät.

³⁷ Jimä soldado ja'a Pablo hajxy hänäjty miөөdtägө'өwa'añ cuarteltөгooty, mänitä Pablo ja'a soldado-wiindsõn ñämaayy:

—Huuc miñ, nhuuc mөөdmädiä'agyhөch miiч paquiä.

Hagriego haamä Pablo jaduһn miänaañ. Mänitä soldado-wiindsõn yhadsooyy:

—Mjájpytiämä hagriego jaduһnä. ³⁸ Cäjtam miiч jim mdsoon Egipto-naaxootiä. Төө jiegө'өy coo häna'c tsip jim төө yajpädө'ogy Egipto. Nämädaaxmilä jiamiөөд hänäjty, haagä cahwiindөyhäna'c. Mänit hajxy piäyө'cy. Mänit hajxy jim ñөcxөyy pactuum maa pөñ quia'a tsäna'ayän.

³⁹ Mänitä Pablo miänáangumbä:

—Cábөch jim ndsoon Egipto. Judiójäyá'ayhөch hөөч. Jímhөch ndsoon maa ja'a cajpt jaduһn xiөhatiän Tarso jim Cilicanaaxooty. Mөjjuөөbyhөch ngajpt. Huuc tunä mayhajt, nhuuc cөxy mөөdmädiä'agyhөch yө'ө cu'ug.

⁴⁰ Mänitä soldado-wiindsõnä Pablo cuhdujt miooyy coo quiäpxät. Mänitä Pablo piejty escaleracөxp. Mänitä quiө'ө chajxajy. Mänitä cu'ughajxy cөjx yhamoñ. Mänit tiägөyy xiicpä mädiaacpä hebreohayuuc-haamby:

22

¹ —Mägu'ughajpädөjc, huuc hamädoowhit hajxy hoy; mijts nmөөdmädia'agaamby.

² Coo ja'a cu'ughajxy jaduһn miädooyy coo ja'a Pablo hänäjty quiapxy miädia'agy hebreohayuuc-haamby, tehngajnä hajxy hänäjty hoy yhamädoowhity. Mänitä Pablo jiaac mädiaacy:

³ —Judiójäyá'ayhөch hөөч. Jímhөch nnaaxque'exä Tarso, jim Cilicanaaxooty. Múut-snөch yaa ngoo'ty Jerusalén. Ja'a teedyhap Gamaliélhөch yaa xyajcapxtaac. Jaanч tehм yhöyhөch xyajnähixөyy ja'a jecyquihdujt. Jaanч tehм yhöyhөchä Dioscuhdujt hijty nbaduñ hamuumdu'joot nej mijts jäda'ahaty mbaduñän. ⁴ Nyajtsaächpөjpiөchä jäya'ay hijty, ja'a Diosmädia'agy hajxy mäbөjpä ja'a Jesúcөxpä, to'oxiөjcä, ya'adiөjcä. Hөxtä nyaghө'piөch hijty tähoocjaty. Pawíchhөch hijty pujxtөгooty nyajnөcxy cө'өxoch tecyxioch. ⁵ Ja'a teedywiindsõn yaa tuumbä Jerusalén, coo hajxy jaduһn mmäyajtөwät pө төyhájthөch jaduһn төө njatcө'өy, xmió'owäbä төyhajt hajxy jaduһn. Jaanä jaduһnä majtөjcä төyhajt hajxy yéjpat coo hajxy jaduһn mmäyajtөwät. Yө'өchä nocy hajxy төө xyajmäguexy coo höjts nmägunaax jim nmó'owät maa ja'a cajpt jaduһn xiөhatiän Damasco. Jímhөchä jäya'ay hänäjty nөcxy nhөxta'awa'añ Damasco pөnjatiä Diosmädia'agy mäbөjpä ja'a Jesúcөxpä. Je'eч hänäjty nөcxy nmadsa'añ. Yaaч hänäjty nyajmänaca'añ Jerusalén. Yaaч hänäjty miñ ndsaächtiuna'añ.

⁶ Jim tu'haamnөcxpä, ja weenjátyhөch hänäjty jim nga'a coody Damasco, mänitä jөөн quihajcädaacy jaanч tehм miөc, mäduһñtiөch hänäjty nyo'oy. Cujyxiөөho'ogy hänäjty jaduһn. ⁷ Túunөchä jөөн jaduһn nnä'a hijxy, mänitiөch jaduһn ngädaayy. Mänitөch nmädooyy coөch häna'c hänäjty xxiөөгuya'axy: “Saulo, Saulo, тiiч jaduһn coo xwyi'i miädsibө'өy.” ⁸ Mänitөch nmäyajtөyy: “Wiindsõn, pөñ miiч.” Mänitөch xyhadsooyy: “Jesühөch hөөч. Nazaréthөch hijty ndsoon. Hөөч miiч jaduһn xmiädsibөөby.” ⁹ Pөnjátyhөch hänäjty nmөөdnөcxyp, yhijx ja'a jөөн hajxy. Pero cab hajxy miädooyy coөchä Jesús jaduһn xmiägäpxy. ¹⁰ Mänitөchä Jesús nmäyajtөögumbä: “Wiindsõn, тiiч jaduһn ndúnäp.” Mänitөch xyhadsöögumbä: “Tänaayyө'өг. Jaac nөcx jim Damasco. Coo miiч jim mgöodät, mänit miiч häna'c jim xyhawaanaañä tijaty

miičhä Dios jaduhñ xyajtunaamb.” ¹¹ Hoorä, coočhä jøøn nhijxy, wiinxó'tshøch jaduhñ. Cábøch hänajty hoy nhijxnä. Ja'a njamiødhøch hajxy jim xjiaac witscoo't Damasco.

¹² Jimä jäya'ay hänajty tu'ug chäna'ay. Ananías hänajty xiøhaty. Jaanč tehñ yhooyä Ananías ja'a cuhdujt hänajty piaduñ nebiä Moisés jecy yhanehmiän. Jimä judíoshajxy hänajty näje'e chänaabiä Damasco. Jiaanč tehñ quiumaabiä judíos ja'a Ananías hajxy hänajty jaduhñ. ¹³ Hoorä, cooč jim ngoo'ty Damasco, mänitøchä Ananías hoy xquiuhixy. Mänitøch xñämaayy: “Puhya'ay Saulo, hijxø'øg jadähooc cham jaduhñ-jtä.” Tuunä ja'a Ananías jaduhñ ñä'ä mänaañ, mänitøch jaduhñ njaanč hijxø'cy. ¹⁴ Mänitøchä Ananías xñämäaguumbä: “Ja'a nhaphájtämhajxy ja'a ndeedyhájtämhajxy ja'a jecypiä haampiä, ja'a Dios hajxy hijty wyiingudsähgøøby jegyhajty. Jaaya'ay miič jaduhñ tøø xyajnáhdijy coo jaduhñ mdúnät neby je'e jioot choquiän, møød coo ja'a Jesús mhamdsoo híxät coo mhamdsoo mädówät nebiaty je'e miädia'agy. ¹⁵ Nøcxaamb miič mmädia'aga'añ wiinduhmyhagajpt ja'a Jesúscøxpä, nebiaty tøø mhixy nebiaty tøø mmädooy. ¹⁶ Hoorä, tsógänämäts, nøcx näbejnä. Jaduhñä Jesús mmänuu'xtá'agät coo weenä mbojpä mgädieey xyajnáhwaats xyajcuhwáatsät”, nómhøchä Ananías xñämaayy.

¹⁷⁻¹⁸ Mänitøch yaa nwiimbijtagajch Jerusalén. Mänitøch nnøcxy tsajtøgooty Diospa'yaaxpä. Mänitøchä Jesús nwiinhijxy, ja'a hajxy nWiindsøn hájtämbä. Mänitøchä Jesús xñämaayy: “Tsógänämäts, mdsóonäp yaa. Caj miičhä cu'ugä mmädia'agy yaa xmiäbøgaanä cooč miič yaa xjia wi'i miädia'aga'añ.” ¹⁹ Mänitøch nhadsooyy: “Wiindsøn, ñajuøøbiä cu'ughajxy cooč hijty nwädity wiinduhmyhagajpt maa ja'a judíos chajtøjc-hajxiän, coočhä jäya'ay hijty nyajnøcxy pujxtøgooty pønjetiä mmädia'agy xmiäbøjcäp. Náxyhøch hijty nyajwoyiyi. ²⁰ Y coo ja'a Esteban yagho'cä, jimhøch hänajty nbadsóonäbä. Møødhøch hänajty nbamánaambä coo yagho'ogøøjät. Ja'a häna'cä Esteban hajxy yaghó'cäbä, høøchä wyit ngüeendähajtä. Paadiä Esteban jaduhñ yagho'cä je'eguiøxpä coo miičhä mmädia'agy hänajty xyajwa'xä.” ²¹ Mänitøchä Jesús xñämäaguumbä: “Cabä cueentä jaduhñ. Nøcxnä. Jäguémhøch miič nguexa'añ maa ja'a jäya'ayhajxy chäna'ayän, ja'a hajxy ca'a judíospä.”

²² Mäduhñjatiä Pablo hänajty miädia'agy, hamädoowhíjtäxäbä miädia'agy hänajty jaduhñ. Pero coo jaduhñ miänaañ cooc hänajty jäguem quiexa'añii maa ja'a jäya'ayhajxy chäna'ayän, ja'a hajxy ca'a judíospä, cabä cu'ugä Pablo ja'a miädia'agy hajxy hänajty yhamädoowhidáanänä. Mänitä cu'ughajxy tiägøøyy yaaxpä jojpä:

—Ween yø'ø craa yho'ogy. Yagho'og yø'ø craa hajxy.

²³ Tehngajnä hajxy hänajty jaduhñ wyi'i ya'axy wyi'i jiocy. Yamä wyit hajxy hänajty wyi'i chajyemy. Yamä naaxoc hajxy hänajty wyi'i chajwøjy. Paady hajxy hänajty jaduhñ wyi'i jiatcø'øyy coo ja'a Pablo hajxy hänajty jiaanč tehñ miädsiphaty. ²⁴ Mänitä soldado-wiindsøn miänaañ coo ja'a Pablo jii by yajtøjtägø'øwøøjät cuarteltøgooty. Mänit jiaac mänaañ coo ja'a Pablo wiobho'ogøøjät, ween jaduhñ quiøxy nägapxy tiiguiøxpä cu'ugä Pablo hajxy hänajty coo tøø wyi'i ñäya'axy. ²⁵ Mänitä soldado ja'a Pablo hajxy quiø'øojch. Wiobho'ogaambiä Pablo hajxy hänajty. Mänitä Pablo ja'a capitán miägapxy, ja'a hänajty jim tänaabiä wiinduum:

—Caj mijts cuhdujt mmøødä cooč mijts xwióbät nä'ä nägoobä. Cab hajxy mnajuø'øyy pø tøøch ngädieey. Høøch, jadúhñhøchä cuhdujt nmøødä nebiä Rómabä jäya'ayhajxy miøødän —nømä Pablo ja'a capitán ñämaayy.

²⁶ Coo ja'a capitán jaduhñ miädooyy, mänitä wyiindsøn ñämaayy:

—Ca'a hajxy jaduhñ mwopy. Jadúhñäc yø'ø craa cuhdujt miøødä nebiä Rómabä jäya'ayhajxy miøødän.

²⁷ Mänitä soldado-wiindsøn Pablo hoy miäyajtøy:

—Nej, tøyhajt jaduhñ coo miičhä cuhdujt jaduhñ mmøødä nebiä Rómabä jäya'ayhajxy miøødänä.

Mänitä Pablo yhadsooyy:

—Tøyhajt jaduhñ.

²⁸ Mänitä soldado-wiindsøn miänaañ:

—Jadúhñhøchä cuhdujt nmøødäbä nebiä Rómabä jäya'ayhajxy miøødän. Pero jaančh tehñ chówñhøch jaduhñ tøø xyhabädsøømä coočhä cuhdujt jaduhñ tøø njuy.

Mänitä Pablo miänaañ:

—Coočh jim nnaaxque'exä Tarso, páadyhøchä cuhdujt jaduhñ nmøødä nebiä Rómabä jäya'ayhajxy miøødän.

²⁹ Ja'a soldadohajxy hänajty mäwobaambä, coo hajxy jaduhñ miädooyy coogä Pablo cuhdujt hänajty jaduhñ miøødä nebiä Rómabä jäya'ayhajxy hänajty miøødän, mänitä Pablo hajxy piuhwaach. Y ja'a soldado-wiindsøn, coo je'e jaduhñ miädooyy, tsähgøøyy je'eduhñ je'eguiøxpä coo ja'a Pablo hänajty tøø quiø'øxočhii tøø tiecyxiočhii.

³⁰ Cujaboomä soldado-wiindsøn jaduhñ miänaañ coo ja'a Pablo quiø'øguejøjät. Mänitä miänaañ coo ja'a teedywiindsøñhajxy yhamugø'øwät møødä majtøjc-hajxy. Mänitä Pablo jim yajnøcxä maa ja'a teedywiindsøñhajxy hänajty tøø yhamugø'øyän. Mänitä Pablo jim yajtänaaguiädaacä cu'ugwiinduum. Miädowaambiä soldado-wiindsøn hänajty jaduhñ tiiguiøxpä judíos ja'a Pablo hajxy hänajty coo tøø ñäxø'øwø'øy.

23

¹ Mänitä teedywiindsøñhajxy wyiinhee'ppejtä ja'a Pábläm. Mänitä Pablo miänaañ:

—Mägu'ughajpädøjc, Dióshøch jaduhñ xyhijxp coočh homiänaajä nhojiäya'ayhaty.

² Coo ja'a Pablo jaduhñ miänaañ, mänitä häna'c-hajxy ñämaayyä coo ja'a Pablo hajxy yhapo'xø'øgät, ja'a häna'c-hajxy hänajty jim tänaabiä Pablo wyiinduum. Ja'a Ananías jaduhñ mänaañ coo hajxy jaduhñ jiatcø'øwät. Møjhajpä Ananías hänajty jim maa ja'a teedywiindsøñhajxiän. ³ Mänitä Pablo ja'a Ananías ñämaayy:

—Dios miičh jaduhñ xyajcumädowaamb. Caj miičh hoy mduñ. Jaduhñ miičh mduungmøødä coočh miičh xyajtøyhajtyégät hoy yajxón nebiä cuhdujt myiñän. Pero coo miičh jaduhñ tøø mmäna'añ coočh häna'c xquióxät, myajcähxø'py miičh jaduhñ coo miičhä cuhdujt hoy mga'a yajtuñ.

⁴ Ja'a häna'c-hajxy hänajty jim tänaabiä, mänitä Pablo hajxy ñämaayy:

—Tøø miičh jaduhñ ngapxtägoy coo yø'ø mõjteedywiindsøn jaduhñ tøø mwiingapx-pety. Haa ca'a, Dios yø'øduhñ tøø yhuuc pädaacpä.

⁵ Mänitä Pablo yhadsooyy:

—Mägu'ughajpädøjc, huuc mee'x hajxy, cábøch hijty nnajuø'øy coo yø'ø jaduhñ tiuñ mõjteedywiindsøn. Jaduhñ jim myiñ cujaay maa ja'a Diosmädia'aguiän coo hajxy nga'a nänómät haxøøg, pønjatiä tuuñg møød maa ja'a tsaan maa ja'a cu'ugän.

⁶ Mänitä Pablo jaduhñ yhijxy coo häna'c-hajxy hänajty mejtstu'u tøø yhamugø'øy, møødä saduceoshajxy, møødä fariseoshajxy. Mänitä Pablo møc quiapxy:

—Mägu'ughajpädøjc, høøch, jue'ech høøch, fariséoshøch høøch. Haagä fariseos højts jaduhñ. Coočh jaduhñ nmäbøcy coo ja'a ho'oguiäya'ayhajxy jaduhñ jiuypijøjtägatsa'añ, páadyhøchä häna'c jaduhñ tøø xñäxø'øwø'øy.

⁷ Coo ja'a Pablo jaduhñ miänaañ, mänitä fariseoshajxy tiägøøyy yajcapxiøøbiä møødä saduceoshajxy. Cabä miädia'agyhajxy hänajty ñibiaadyii. ⁸ Hix, jaduhñä fariseoshajxy hänajty miäbøcy cooc ja'a ho'oguiäya'ayhajxy jiuypijøjtägatsa'añ. Jaduhñ hajxy hänajty miäbøjpä cooc ja'a Dios ja'a mioonsä jim miøødä tsajpootyp, møød cooc ja'a nhaañämähájtämhajxy quia'a hó'cäm. Pero cabä saduceoshajxy hänajty miäbøcy nebiä fariseoshajxy hänajty miäbøquiän. ⁹ Tehngajnä hajxy hänajty miaas nämayø'øy haamhajpä. Tehngajnä hajxy hänajty yhambøcy. Mänitä fariseoshajxy näje'e tiänaayyø'cy, ja'a hajxy hänajty yajnahixøøbiä maa ja'a tsajtøjcän. Mänit hajxy miänaañ:

—Yø'ø craa, cap tii pojpä cädieey miøødä. Jímädä Diosmoonsä tøø miägapyii, o háañämä.

¹⁰ Maas hanaxiä hajxy hänajty yhambøcy. Tsähgøøbiä soldado-wiindsøn hänajty coo ja'a Pablo hänajty yagho'oga'añii. Mänitä soldado-wiindsønä soldado miøjyaaxy coo ja'a soldado ja'a Pablo hajxy jiiby wyitstsóonät, møød coo hajxy jim yajnøcxät maa ja'a cuartelän.

¹¹ Mänitcoodsä Jesús jiiby ñäguehxtø'xy maa ja'a Pablo wyiinduumän. Mänitä Jesús ja'a Pablo ñämaayy: “Ca'a mdsähgø'oy. Nébyhöch miich yaa tøø xmiädia'aguiän Jerusalén, jaanä jadúhnhöch miich jim nøcxy xmiädia'agáangumbä Roma.”

¹² Cujaboomä judfoshajxy näje'e hoy quiojyquiapxyhaty coo ja'a Pablo hajxy yaghó'ogät. Mänit hajxy ñämaayyä:

—Mäduhñtiä Pablo jiaac jugyhaty, cab hajxy nnä'ägä caayy nnä'ägä húucämät.

¹³ Näjuxychägui'xnaxy hajxy hänajty je'eduhñ, ja'a hajxy hänajty jaduhñ tøø quiojyquiapxyhātiäbä. ¹⁴ Mänit hajxy hoy ñägapxy maa ja'a majtøjc-hajxiän:

—Tøø højts jaduhñ ngojyquiapxyhaty coo højtsä Pablo nyaghó'ogät. Høxtä mänit højts गया'añ nhu'uga'aññä. ¹⁵ Hoorä, mijts, nøcxä soldado-wiindsøn hajxy jaduhñ näma'aw coo weenä Pablo yaa yajmechii mijts mwiinduum. Jaduhñ hajxy mwiinhóønät coo tyjy ja'a Pablo hajxy mjaac tehñ miäyajtøwa'añ. Cahnä Pablo hänajty yaa quioody maa mijts mwiinduumän, jim højts nyaghó'ogät tu'haam —nømä teedywiindsøn hajxy ñämaayyä.

¹⁶ Mänitä Pablo chojmajc jaduhñ miädoyhajty coogä Pablo hänajty yagho'oga'añii. Mänitä Pablo hoy yhawáañäxä maa hänajty chumiän. ¹⁷ Mänitä Pablo ja'a capitán tu'ug miøjyaaxy. Mänit ñämaayy:

—Huuc tunä mayhajt, huuc woonøcx hädaa craa jim maa ja'a mwiindsønän. Jim jaduhñ miøødmädia'aga'añ.

¹⁸ Mänitä Pablo chojmajc wioonøcxäxä maa ja'a soldado-wiindsønän. Mänitä capitán ja'a soldado-wiindsøn ñämaayy:

—Ja'a Pábløch jaduhñ tøø xñäma'ay coöch hädaa craa yaa nwoomínät maa miichän. Míichäc jaduhñ xmiøødmädia'agaamb.

¹⁹ Mänitä Pablo chojmajc wiingtuum wyitsnøcxäxä. Mänitä soldado-wiindsøn miänaañ:

—Tiiçh jaduhñ xyhawaanäänäp —nømä Pablo chojmajc miäyajtøwäxä.

²⁰ Mänitä Pablo chojmajc yhadsooyy:

—Tøø ja'a judfoshajxy näje'e quiojyquiapxytiun cooc miich xñäma'awa'añ coo miichä Pablo jaboom ween mguexy maa ja'a teedywiindsønä wyiinduumhajxiän. Jadúhñäc miich xwyiinhøøna'añ cooc tyjy ja'a Pablo hajxy cøxiä wiinä jiaac tehñ miäyajtøwa'añ. ²¹ Caj miich jaduhñ mmäbøgät. Näjuxychägui'xnaxiä jäya'ayhajxy jaduhñ tøø quiojyquiapxyhaty coo ja'a Pablo hajxy yaghó'ogät tu'haamnøcxpä. Cábäc hajxy jaduhñ ñä'ägä caya'añ ñä'ägä hu'uga'añ. Høxtä coogä Pablo hajxy yaghó'ogät, mänitac hajxy quiaya'añ yhu'uga'aññä. Míichäc hajxy xyhuuc jaac hahijxp cooc miich jaduhñ mmäná'anät pø mgudiunaamby jaduhñ —nømä soldado-wiindsøn ñämaayyä.

²² Mänitä Pablo chojmajc ñämáayyäxä coo quia'a nágápxät wiingtuum waambaty hänajty jaduhñ tøø miädia'agy. Mänitä soldado-wiindsøn jaduhñ miänaañ coo ja'a Pablo chojmajc wyiimbijnät.

²³⁻²⁴ Mänitä soldado-wiindsønä capitán metsc miøjyaaxy. Mänit hajxy wyiinguejxä coo ja'a Pablo hajxy coods jim yajnøcxät Cesarea. Nämáayyä soldadohajxy hänajty pianøcxa'añ. Námejtsmägo'x hajxy hänajty ñøcxa'añ tecy-yo'oyhaam; møød nädägøøghii'xcumajc hajxy hänajty ñøcxa'añ cuaañähgøxp; møød námejtsmägo'x hajxy hänajty ñøcxaambä cuhmdcap. Jaduhñä capitánhajxy ñämáayyäbä coo ja'a Pablo cuaañähgøxp ñøcxät, møød coo hoy cwieendähadøøjät, jaduhñ nejy quia'a jat quia'a habétät. Jaduhñä soldado-wiindsøn yhanehmbä coo ja'a Pablo ja'a gobernador Félix yajcø'ødägø'øwøøjät. ²⁵ Mänitä soldado-wiindsønä nocy yhädiuun. Ja'a gobernador Félix hänajty yajnäguexaamby. Jaduhñ soldado-wiindsøn quiujahy:

²⁶ “Høøch hädaa nocy nhädiuumby, høøch Claudio Lisias. Wiindsøn Félix, miich jaduhñ cham nyajpoo'xyp. ²⁷ Hädaa jäyá'ayhöch miich nyajnäguejxyp. Pablo jaduhñ xiøhaty. Häxøoyy maaxtøjquiä Pablo yaa miajtsä Jerusalén. Ja'a judfoshajxy jaduhñ mämajts. Yagho'ogáañäbä Pablo hänajty. Pero coöch jaduhñ nmädoyhajty coo ja'a Pablo cuhdujt jaduhñ miøødä nebiä Rómabä jäya'ayhajxy miøødän, mänitøchä soldado

ja'a Pablo hoy nmøodyajnahwa'aäch. ²⁸ Je'eäch hänajty nmädowaamby tiiguiøxpä Pablo hänajty coo tøø miächii, páadyhöch jii by nmøødhädaacy maa ja'a judíos ja'a junta hajxy hänajty yagjadyiiän. ²⁹ Mänitøch nmädooyy coogä Pablo tii pojpä tii cädieey quia'a møødä. Je'eduhñ yajcumadsøøyyä coo ja'a judíos ja'a quihdujthajxy wyiingjatiä. Páadyhöch jaduhñ nga'a mänaañ coo ja'a Pablo yagho'ogøøjät, ni coo chumøøjät. ³⁰ Cooch jaduhñ nmädoyhajty coo ja'a judíoshajxy hänajty näje'e tøø quiojyquiapxyhaty coo ja'a Pablo hajxy hänajty yagho'oga'añ, mänitøch jaduhñ nwiinmaayy cooch miich jaduhñ nyajnäguéxät. Ja'a häna'cä Pablo hajxy ja wi'i yagho'ogaambä, tøøch nnäma'ay coo ja'a Pablo jim nøcxy ñäxø'øwø'øyii miich mwiinduum.”

³¹ Mänitä soldadohajxy jiaançh cudiuuñ nebiä wyiindsøn hajxy hänajty tøø ñäma'ayi-ijän. Mänitä Pablo hajxy jim coods yajnøcxy maa ja'a cajpt hänajty xiøhatiän Antípatris. ³² Cujaboomä soldadohajxy wyiimbijty, ja'a hajxy hänajty tøø ñøcxy tecy-yo'oyhaam. Ja'a hajxy hänajty cuaañähgøxpä, je'edsä Pablo hajxy jaac møødnøcxnä. ³³ Mänit hajxy jim quioo'ty Cesarea. Mänitä Pablo ja'a Félix hoy yajcø'ødägø'øyii møødä nocy, ja'a soldado-wiindsøn hänajty tøø quiéxiäbä. ³⁴ Mänitä Félix ja'a nocy quiapxy. Mänitä Félix ja'a Pablo miäyajtøøyy maa je'e chooñ. Mänitä Pablo yhadsooyy coo hänajty jim chooñ Cilicianaxooty. ³⁵ Coo ja'a Félix jaduhñ miädooyy, mänitä Pablo ñämaayy:

—Weenä jäya'ayhajxy yhuuc mech, ja'a miich hajxy jaduhñ xñäxø'øwø'øwaambä, mänitøchä tøyhajt nmädowa'añ ja'a miichcøxpä.

Mänitä Félix ja'a soldado ñämaayy coo ja'a Pablo piäda'agøøjät møjtgooty, ja'a hänajty xøhajpä Palacio de Herodes. Jaanä jaduhñä Félix miänaambä coo ja'a Pablo hoy cwieendähadøøjät.

24

¹ Cumägoøxxøø ja'a Ananíashajxy jim quioo'ty Cesarea. Møjteedywiindsønä Ananías hänajty tiuumby jim Jerusalén. Näguipxiä majtøjc-hajxy näje'e piagoo'pä møødä licenciadä tu'ug, ja'a hänajty xøhajpä Tértulo. Mänit hajxy jim ñøcxy maa ja'a gobernador Félix hänajty tiuñän. Mänitä Félix hajxy ñämaayy coo ja'a Pablo hajxy hänajty ñäxø'øwø'øwa'añ. ²⁻³ Mänitä Félix miänaañ coo ja'a Pablo yajmedsøøjät maa ja'a Félix wyiinduumän. Coo Pablo jaduhñ yajmejtsä, mänitä Tértulo ja'a Pablo tiägøøyy näxø'øwøøbiä:

—Wiindsøn Félix, hoy højts njaançh tehñ ñijiäwø'øyii maa miichcøxpän, coo miich hoy mjaançh tehñ tiuñ. Tøø højts miichä nnaaxä ngajpt xjiaançh tehñ yaghoyøøyyä. Cabä tsip cabä pleetä jaduhñ maa yajpaady. Coo miich jaduhñ hoy mjaançh tehñ tiuñ, paady højts Dioscujú'uyäbä njaançh tehñ yecy maa miichcøxpän. ⁴ Cábøch miich jejcy nhadsiba'añ. Huuc tunä mayhajt, højtsä nmädia'agy hamädoowhjtäc. Paquiä højts jaduhñ nmädia'aga'añ. ⁵ Yø'ø craa Pablohajpä, nmøødhajpy højtsä tøyhajt jaduhñ coo yø'ø højts xjiaançh tehñ miädsibø'øy majaty højts nhity, højts judíoshajpä. Jaduhñ højts xjia wi'i jiojcapxø'øy coo højtsä nguhdujt nñajtshixø'øwät. Jaduhñä tsip homiaajä yajpädø'øgy. Ja'a jäya'ayä Jesús Nazaretpä miädia'agy hajxy panøcxäbä, je'e ja'a Pablo hajxy wiindsøn'hajp. ⁶ Mänitä Pablo jäya'ay nämädaaxc miøødtøjtägøøyy maa højtsä nmøjtsajtøgootiän. Ja'a hajxy nämädaaxpä, ca'a hajxy je'e judíosa. Cab højtsä nguhdujt jaduhñ myiñ coo wiingjäya'ay jii by tiägø'øwät. Mänit højtsä Pablo nyajmajtsä. Nyajcumädowaamby højts hänajty, tii hänajty jii by tiuumby tsajtøgooty. Jaduhñ højtsä nguhdujt myiñ coo jaduhñ quiumädöwät. ⁷ Mänitä soldado-wiindsøn piayajcahw piayajpøgøøyy, ja'a xøhajpä Lisias. Mänit højtsä Pablo mädsibø'øbä xpiojca. ⁸ Mänit højtsä Lisias xñämaayy coo højts yaa nmínät maa miichä mwiinduumän, coo højtsä Pablo yaa nnäxø'øwø'øwät. Hoorä, hamdsoo miichä Pablo mmäyajtöwät pø tøyhajt jaduhñ neby højts chamñ nnäxø'øwø'øwät —nømä Tértulo ja'a Félix ñämaayy.

⁹ Jaduhñä judíoshajxy piamänaambä. ¹⁰ Mänitä gobernador Félix ja'a Pablo miäwø'xy coo ja'a Pablo miädiä'agät. Mänitä Pablo miänaañ:

—Wiindsón Félix, jaančh tehñ jiootcújc-höch chamñ nniijiäw'öyii coöch yaa nniigugapxa'añii miichä mwiinduum. Hiñ, ñajuóöbiöch jaduhñ coo miich möjtuung jecy yaa tøø mmøødhaty maa höjtsä nnaax maa höjtsä ngajptän. ¹¹ Chaañä miajmetsxøøhaty coöch jimñ ngoo'ty Jerusalén. Jímhøchä Dios hñajty nwiingudsähgø'øwa'añ tsajtøgooty. Tøyhajt jaduhñ. Hoy piönä jaduhñ miäna'añ. ¹² Pero cábøchä tsip jimñ nhøxtaayy. Cábøchä tsip ni maa nhøxtaayy, majátyhøch tøø nwädity, ni jiiby möjtsajtøgooty, ni jiiby muutstsajtøgooty, ni jimñ cajptooty. Cáboch pønñ jimñ nmøødyajcapxiøyy. ¹³ Hoorä, yø'ø hñana'c-hajxy ximñ xwyiingapxpépjøchä, hønñdaacp hajxy yø'ø. Cab hajxy tøyä ñä'ä mädia'agy. ¹⁴ Pero jaduhñ mäböcypiä, nwiingudsähgø'øbiöchä Dios. Nebiä jecyjiäya'ayä Dios hajxy wyiingudsähgøøyyän, jaduhñhöch nwiingudsähgøøbiä. Coöchä Dios jaduhñ nwiingudsähgø'øy, páadyhöchä yHuung Jesús ja'a miädia'agy jaduhñ nbanøcxä. Yø'ø hñana'c-hajxy ximbä, cabä Jesús ja'a miädia'agy hajxy wyiinjuøyyä. Cábac tyjy jaduhñ tiøyyä. Pero nmäböjpjøchä jecymiädia'agy, ja'a Moisés hajxy jecy quiujähyyäbä møødä profetadøjc-hajxy. ¹⁵ Yø'ø hñana'c-hajxy, jaduhñ hajxy miäböcy cooc ja'a ho'oguiäya'ayhajxy nägøxiä jiuypjøjtägatsa'añ, hoyhñana'cä, haxøøghñana'cä. Jaanä jaduhñhöch nmäböjpä. Coö ja'a Dios jaduhñ miänaañ cooc hajxy nägøxiä xyagjuypjøjtägatsáañäm, tøy jaduhñ. ¹⁶ Coöch jaduhñ nmäböcy, páadyhöchä njoot homiänaajä nbäda'agy coöchä Diosmädia'agy hoy tehngajñä nbadúnät. Jaduhñhöchä Dios xquiumáyät. Jaanä jaduhñhöchä cu'ug xquiumáabiät.

¹⁷ Mänäajøch hoy nwäditiän jäguembaady mejtsjomøjt tægøøjomøjt, mänitøch jimñ nmejtstägajch Jerusalén. Xädø'øñhöch jaduhñ nmämejts. Ja'a nmägunäaxhöch hñajty nmo'owaamby. Møødhøchä meeg hñajty nyoxa'añ ja'a Diosøxpä. ¹⁸ Jaduhñhöch hñajty jiiby nguhdujthaty möjtsajtøgooty, mänithøchä judíoshajxy näje'e xyhijxy, ja'a hajxy jimñ tsohmäbä Asia. Tøøch hñajty ngudiuñ neby höjtsä nguhdujt myiñän. Cábochä hñana'c hñajty nämay nmøødä. Cab höjts hñajty nhaamhaty. ¹⁹ Ja'a jäya'ay höjts jaduhñ xyhixäbä möjtsajtøgooty, je'eds jaduhñ hahixøøby xñäxø'øwó'øwäböch yaa miichä mwiinduum, pø tøøch hajxy jaduhñ xyhixy coöch ngädiehy. ²⁰ Yø'ø hñana'c-hajxy ximñ tänaabiä, ween yø'øhajxy jaduhñ ñägapxy pø tøøch hñajty ngädieey mänaächä hñana'c jimñ xyajmechän maa ja'a teedywiindsønä wyiinduumhajxiän jimñ Jerusalén. ²¹ Wéhñdøch mänit ngapxtägooyy coöch nmänaañ coöch nmäböcy coo ja'a ho'oguiäya'ayhajxy jiuypjøga'añ. Móc-høch jaduhñ nmänaañ.

Mänitä Pablo quiapxpädøøñä.

²² Coö ja'a Félix jaduhñ miädooyy, mänit jaduhñ wyiinmahñdyhajty coö ja'a tsip hñajty quia'a tsoj yajtødiägø'øwa'añ ja'a Pablocøxpä. Hiñ, ñajuóöbiä Félix hñajty jaduhñ coö ja'a jäya'ayhajxy hñajty hoy quiuhdujthaty, ja'a Jesús ja'a miädia'agy hajxy hñajty panøcxäbä. Mänitä Félix ja'a judíos ñämaayy:

—Mhahixäbä Lisias hajxy. Coö je'e yaa quiädá'agät, mänitøchä mdsiphajxy nya-jtødiägøøyyät —nømä Félix miänaañ.

²³ Mänitä Félix ja'a capitán ñämaayy coö ja'a Pablo jiaac yaghidøjøjt tsumy, møød coö quia'a tsaačhtiunøjøjt ni weñtiä. Jaduhñä Félix miänaambä coö ja'a Pablo quiuhixøjøjt ja'a miägu'ughajpädøjc, møød coö hoy tyijä ween yajnämechii.

²⁴ Cumejtsxøø cudägøøgxøø ja'a Félix ja'a tio'oxiøjc miøødmejch maa haguñcän. Drusila hñajty xiøhaty. Judía hñajty je'e. Mänitä Félix miänaañ coö ja'a Pablo yajmedsøjøjt maa ja'a Félix wyinduumhajxiän. Miädowaambiä Félixhajxy hñajty tiiguiøxpä Pablo ja'a Jesús ja'a miädia'agy hñajty coö pianøcxä. ²⁵ Mänitä Pablo tiägøøyy mädiaacpä coö hajxy hoy njäya'ayhajtämät, møød coö hajxy hoy nguhdujthajtämät, møød coö ja'a Dios hajxy cøxiä xyajnägapxáañäm nebiaty hajxy hñajty tøø njäya'ayhajtäm. Coö ja'a Félix jaduhñ miädooyy, mänit chähgøøbiøjcy. Mänitä Félix ja'a Pablo ñämaayy:

—Ween tiuhñä. Tøø ja'a mmädia'agy nmädóowäm. Nøcxnä. Coö jadähooc ñäbaadó'øwät, mänit miich jadähooc nyajmøjya'axøjøjt —nømä Félix ja'a Pablo ñämaayy.

²⁶ Jaduhñä Félix hänajty miäna'añ cooc tyijy xädø'øñ mio'owa'añii Pábläm, cooc tyijy ja'a Pablo jaduhñ yajpädsømóøjtät pujxtøgooty. Paadiä Félix ja'a Pablo hänajty ja naañhooc yajmøjya'axyii coo hänajty miøødmädia'aga'añii. ²⁷ Mejtsjomøjtä Pablo hänajty jim tøø chumyčhäna'ay Cesarea, mänitä gubernadorhajxy ñiguiuwijtsä. Coo ja'a Félix piädsøømy, mänit wiinghäna'c tiägøøguiumbä. Porcio Festo hänajty xiøhaty. Cabä Félix ja'a judíos hänajty yagjootma'ada'añ, paadiä Félix miänaañ coo ja'a Pablo jaduhñ jiaac hídät tsumy.

25

¹ Mänitä Festo tiägøøyy tuumbä gubernador jim Cesarea. Cudägøøgxøø jim ñøcxy Jerusalén. ² Coo jim quioo'ty, mänitä teedywiindsøñhajxy jim miejch maa ja'a Festo wyi-induumän, møødá møjhjäpä judíoshajxy. Mänitä Pablo hajxy tiägøøyy näxø'øwøøbiä. ³ Mänitä Festo hajxy miänuu'xtaacy coo mayhajt cu tiuuñ, coo cu yhanemy coo ja'a Pablo jim cu quiejxä Jerusalén. Hix, tøø ja'a judíoshajxy hänajty quiojyquiapxyhaty coo ja'a Pablo hajxy yaghó'ogät tu'haamnøcxpä. ⁴ Pero cabä Festo jaduhñ ñähadsooy. Mänit miänaañ coo ja'a Pablo hänajty jiiby chumyčhäna'ay Cesarea. Jaduhñä Festo miänaambä coo hänajty paquiä jim yhida'añ Jerusalén, møød coo hänajty jiiby yhäda'agáangumbä Cesarea.

⁵ —Pøñ cuhdujt møød maa mijtsän, wéenhøch hajxy jiiby xpiahäda'agy Cesarea. Y pø tøødsä Pablo jaduhñ jiaančh cädieey, jiiby jaduhñ ñäxø'øwø'øwøøjtät —nømä Festo ja'a judíos ñämaayy.

⁶ Tuctujxøø ja'a Festo jim jiaac hijty Jerusalén. Mänit jiiby yhädaactägajch Cesarea. Coo jiiby quiädaacy, mänit jim tiägøøyy tuumbä hagujc. Mänit miänaañ coo ja'a Pablo jim yajmedsøøjtät. ⁷ Coo ja'a Pablo jim miejch hagujc, mänitä judíos ja'a Pablo hajxy piquiä piädaacy, ja'a hajxy hänajty tøø chohñdá'aguiäbä Jerusalén. Mänitä Pablo hajxy cøxypänejpy ñähwaambejty. ⁸ Mänitä Pablo ñijjogapxä:

—Cábøchä cädieey jaduhñ maa nmøødá, ni jim maa ja'a judíos quihdujthajxiän, ni jim maa ja'a chajtøjc-hajxiän, ni jim Roma maa ja'a gobiernä yhane'emiän.

⁹ Mänitä Festo ja'a Pablo ñämaayy:

—Nej, mmänaamb miičh jaduhñä coo højts jim nnøcxämät Jerusalén, coo miičh jim mdøyhajtyégät maačh nwiinduumän.

Paadiä Pablo jaduhñ ñämaayy, je'eguiøxpä coo ja'a Festo ja'a judíos hänajty quia'a yagjootma'ada'añ. ¹⁰ Mänitä Pablo yhadsooy:

—Cab jaduhñ yhawinmatsä cooch jim ndøyhajtyégät Jerusalén. Hix, cábøch tii cädieey nmøødá maa yø'ø judíoshajxiän. Mnajuøøby miičh jaduhñ. Jaduhñ mábøcypiä yhawinmatsä cooch yaa ndøyhajtyégät maa ja'a gobiernä yhane'emiän, ja'a jim tuumbä Roma. ¹¹ Cooch häxøpy tøø ngädieey, hahixøøby hijty jaduhñ cooch nhó'ogät. Pero cábøch tøø ngädieey, hoy yø'ø judíoshajxy jaduhñ tøø xjia nähwaambety. Cab jaduhñ yhahixø'øy cooch pøñ xyégät maa yø'ø judíoshajxiän. Jaduhñhøch nja mäna'añ cooch jim ndøyhajtyégät maa ja'a gobiernä wyiinduumän jim Roma —nømä Pablo miänaañ.

¹² Mänitä Festo ja'a jiamiøød miäyajtøøyy neby jaduhñ wyiinmahñdyhadät ja'a Pablocøxpä. Mänitä Festo ja'a Pablo ñämaayy:

—Miičh jaduhñ tøø mmäna'añ coo miičh jim nøcxy mdøyhajtyega'añ jim Roma maa ja'a gobiernä wyiinduumän. Pues jimhøch miičh njaančh quexa'añ Roma tøyhajtyejpä.

¹³ Cumejtspo'o cudägøøgp'o, mänitä Agripahajxy jim miejch Cesarea møødá tio'ox-iøjc Berenice. Gobiernä ja'a Agripa hänajty tiuumby wiingtuum. Mänitä Agripa ja'a Festo hajxy yajpoo'xy. ¹⁴ Maxiøø ja'a Agripahajxy hänajty jim yhida'añ maa ja'a Festo tiøjcän. Mänitä Festo ja'a Agripa ñämaayy:

—Jimä jäya'ay tu'ug chumyčhäna'ay. Pablo jaduhñ xiøhaty. Coo ja'a Félix yaa piädsøømy tuumbä, jimä Pablo jaduhñ jiaac mähmøøyy tsumy. ¹⁵ Mänájøch jim nhoyyän Jerusalén, mänitøchä judíoshajxy xñähooyy, ja'a hajxy hänajty møjhjäpä, møødá teedywiindsøñhajxy. Mänitä judíos ja'a Pablo hajxy ñäxø'øwøøyy maačh nwiinduumän.

Mänitä judíoshajxy miänaañ coo ja'a Pablo cu yagho'cä. ¹⁶ Mänítøch nhadsooyy: “Jaduhñ hajxy jim quiuhdujthaty Roma, cab jaduhñ pøn yagho'ogyii, pø cahnä hänäjty ñijjogapxyii maa ja'a jäya'ayä wyiinduuhajxiän, ja'a hajxy hänäjty mänäxø'øwøøbiä”, nõmhøchä judíos nnämaayy. ¹⁷ Hoorä, cooch yaa ngädaactägajch Cesarea, mänítøchä judíos xpiamänajcy. Cujabóomhøch ndägøøyy tuumbä. Mänítøchä Pablo nyajmøjyaaxä. ¹⁸ Coo ja'a judíoshajxy jim miejch maaçh nwiinduuman, mänitä Pablo hajxy tiägøøyy näxø'øwøøbiä. Haxøøgaty ndijy ja'a Pablo hänäjty ñäxø'øwø'øwa'añii. Pero cabä Pablo jaduhñ haxøøgaty ñä'a nänøømä. ¹⁹ Jue'e ja'a judíoshajxy hänäjty yajcapxiøøby, nebiatiä quiuhdujt hajxy yaghity, møød coogä Pablo hoy quia'a cudiuñ. Møød hajxy hänäjty yajtsibøøbiä pø tøø ja'a Jesús jiaançh juyypijtagach, ja'a hänäjty tøø yhó'oguiäbä. Jaduhñä Pablo yhajodhaty coogä Jesús tøyhajt tøø juijypiøcy. ²⁰ Høøch, cábøch hänäjty nnajuø'øy nébiøchä capxy mädia'agy jaduhñ nyajtødiägø'øwät. Mänítøchä Pablo nmäyajtøøyy pø nõcxaamb hänäjty jim Jerusalén coo jim cu tiøyhajtyeicy. ²¹ Mänitä Pablo yhadsooyy cooc hänäjty jim quia'a nõcxa'añ Jerusalén. Mänit miänaañ cooc hänäjty jim nõcxy yajtøyhajtyega'añii Roma maa ja'a gobiernä tiuñän. Coo jaduhñ yhadsooyy, páadyhøch jaduhñ nmänaañ coo yaa jiaac hídät tsumy. Coo jaduhñ ñäbaadø'øwät, mänítøch jim nguexa'añ Roma, ween jim nõcxy tiøyhajtyeicy maa ja'a gobiernä wyiinduuman —nømä Festo quiapxy miädiaacy.

²² Mänitä Agripa ja'a Festo ñämaayy:

—Nmädwáambjøch høøchpä waambä craa jaduhñ miädia'aga'añ.

Mänitä Festo yhadsooyy:

—Jaboom mmädówät —nømä Agripa ñämaayyä.

²³ Cujaboomä Agripahajxy jim miejch hagujc møødä Berenice. Wiinxu'uxy wiinwopy hajxy jim miejch. Mänit hajxy jiiby tiøjtägøøyy maa ja'a Festo hänäjty tiuñän, näguipxy møødä soldado-wiindsøn hajxy, møødä møjtøjc-hajxy. Mänitä Festo ja'a Pablo yajmøjyaaxä. ²⁴ Coo ja'a Pablo jiiby tiägøøyy, mänitä Festo miänaañ:

—Wiindsøn Agripa, møød pønjaty yaa tøø miech maa højts nwiinduuman, mjítsäts jaduhñ nmägapxyp. Yø'ø craa xii tänaabiä, yø'øds jaduhñ xøhajp Pablo. Yø'ødsä judíoshajxy tøø wyl'i ñäxø'øwø'øy yaa Cesarea møød jim Jerusalén. Jaduhñ hajxy tøø wyl'i ya'axy tøø wyl'i jioicy coo yø'ø Pablo ween yho'ogy. ²⁵ Pero høøch, cábøch jaduhñ nmäna'añ coo tøø quiädieey. Páadyhøch jaduhñ nmäna'añ coo quia'a hó'ogät. Pero hamdsoo yø'øduhñ tøø miäna'añ coo jim ñøcxät Roma, coo jim nõcxy yajtøyhajtyega'añii maa ja'a gobiernä wyiinduuman. Páadyhøch jaduhñ jim nguexa'añ. ²⁶⁻²⁷ Cábøch nnajuø'øy waambátyhøchä gobiernä Rómabä nnocyñäjaayø'øwät ja'a Pablocøxpä. Cab jaduhñ yhawinmatsä coochä Pablo jim nguéxät Roma tsumy, pø cábøch tøyhajt nmøødä pø tøø jiaançh cädieey. Hoorä, páadyhøchä Pablo yaa tøø nyajmech coo mijts jaduhñ ween myajtøyhajtyeicy. Miiçh, Wiindsøn Agripa, miiçh mjaançh tehñ jiajpy mjaançh tehñ ñajuøøby. Coo mijts hänäjty tøø myajtøyhajtyeicy nebiaty jaduhñ tøø jiaançh cädieey, mänítøch mäbøcy nnajuø'øwät nébiøch njáayät —nømä Festo miänaañ.

26

¹ Mänitä Agripa ja'a Pablo ñämaayy:

—Hahixøøby jaduhñ coo miiçh hamdsoo mnijjogapxøøjät.

Mänitä Pablo ja'a quio'ø chajxajy. Mänit tiägøøyy mädiaacpä:

² —Wiindsøn Agripa, chámhøch nnijjogapxa'añii nebiátyhøchä judíoshajxy tøø xñähwaambety. Jootcújc-høch jaduhñ nnijjåwø'øyii cooch yaa nmädia'aga'añ miiçh mwiinduuman. ³ Páadyhøch jootcujc nnijjåwø'øyii je'eguiøxpä coo miiçh mjaançh tehñ jiaty mjaançh tehñ ñajuø'øy nebiatiä judíoshajxy quiuhdujthaty, møød tijaty hajxy naxy yajtsibøøby. Høøch huuc mée'xäc. Høøchä nmädia'agy huuc hamädoowhíjtäc.

⁴ Ñajuøøbiä judíoshajxy jaduhñ nägøxiä coochä quiuhdujhajxy hoy ngudiuunä homiänaajä, møød jim maaçhä nhamdsoo cajptän, møød jim Jerusalén. Múutsnøch

hänajty jaduhñ coočhä quiuhdujthajxy jaduhñ nbadu'ubøjcä. ⁵ Jaanä jaduhñä judíosahajxy ñajuøobiä coočhä fariseos quiuhdujthajxy hoy nyajtúunäbä. Múutsnøch hänajty jaduhñbä coočh ndägøøyy habøjpä. Miøødä judíos ja'a tøyhajt hajxy jaduhñ. Hahixøøby jaduhñ coo hajxy jaduhñ ñägápxät. Ja'a fariseoshajxy, ca'xiä cuhdujt hajxy yajnøcxy nebiä judíosahajxy yajñahixø'øyän. ⁶⁻⁷ Jéquiänä Dios jaduhñ miänaañ coogä ho'ogyjiäya'ay yagjujypiøga'añ. Højts judíos, jaduhñ højtsä nhapä ndeedyhajxy jecy xyajwiinwaanøøyyä ja'a Diósäm. Nägøxiä højts jaduhñ njøbhixy coo ja'a Dios jaduhñ yajtøjiada'añ neby jecy miänaañän, højts ja'a majmetsc-hagajtpä. Paady højtsä Dios xøømdsuhñ nwiingudsähgø'øy. Hoorä, Wiindsøn Agripa, cooč jaduhñ nmäbøcy coo ja'a Dios ja'a ho'ogyjiäya'ay yagjujypiøga'añ, páadyhöch yø'ø judíosahajxy cham xñäxø'øwø'øy miich mwiinduum —nømä Pablo ja'a Agripa ñämaayy.

⁸ Mänitä Pablo ja'a judíos ñämaayy:

—Tii hajxy jaduhñ coo mga'a mäbøga'añ coo ja'a Dios ja'a ho'ogyjiäya'ay yagjujypiøga'añ.

⁹ Mänitä Pablo jiaac mänaañ:

—Bueno, jadúhñhöch hijty nmäna'añ coo hijty yhahixø'øy coočhä jäya'ayhajxy ndsaaçhtiünät, ja'a Jesús Nazaretpä ja'a miädia'agy hajxy hänajty panøcxäbä. ¹⁰ Jadúhñhöch jim njaanç jatcøøyy Jerusalén. Ja'a teedywiindsønñhöchä cuhdujt hajxy jim xmiooyy coočhä jäya'ayhajxy nyajtsumøød, ja'a Jesucristo miädia'agy hajxy hänajty panøcxäbä. Nämäyhøch hajxy jaduhñ njaanç yajtsuumä. Y coo hajxy yagho'cä, jadúhñhöch hänajty nbamänaambä coo hajxy yagho'ogøjät. ¹¹ Ja naañhöc-høch hajxy tøø nyajtsaaçhtiuñii coo hajxy ñijiøgapxøjät ja'a Jesúsøxpä. Wiinduhmyçhajtøjc-høch hijty ndsaaçhtiuñ. Hanáxiøch hajxy hijty nmäjootma'ady, páadyhöch hajxy hijty jäguembaady ndsaaçhtiuñ.

¹² 'Mäníthøchä teedywiindsønñhajxy jim xwyiinguejxy Damasco coočhä mäbøjpädøjc jim nyajtsaaçhtiunøjät. ¹³ Tu'haamnøcxpä, mänit højtsä jøøn xquiuhjajcädaacy jaanç tehñ miøc. Cujyxiøøho'ogy hänajty je'e. Cabä xøø hänajty miäbaady nebiä jøøn hänajty jiajjiän. Høxtä xquiuhjajwädiht højts jaduhñ. ¹⁴ Coo højtsä jøøn jaduhñ nhixy, mänit højts nägøxiä ngädaayy. Mänitøch nidiuhñ nmädooyy coočhä häna'c xmiägäpaxy hahebreohaam. Mänitøch xñämaayy: “Saulo, Saulo, tiich miich jaduhñ coo xwyi'i miädsibø'øy. Cooč miich jaduhñ xwyi'i miädsibø'øy, hamdsoo miich jaduhñ mniçhaaçhtiuñii.” ¹⁵ Mänitøch nmänaañ: “Wiindsøn, pøn miich.” Mänitøch xyhadsooyy: “Jesúshøch høøch. Høøch miich jaduhñ xmiädsibøøby. ¹⁶ Tänaayyø'og. Páadyhöch jaduhñ tøø nnäguehxtø'xy ja'a miichøcxpä, míçhhøch nwiinguexaamby coo ja'a mädia'agy jaduhñ myajwá'xät nebiátyhöch tøø xyhixy, møød nebiátyhöch miich njaac yajñahixø'øwa'añ. ¹⁷ Nnäwa'anámboch miich majaty miich mwädita'añ, jim maa ja'a judíosahajxiän, jim møød maa ja'a wiingjäya'ayhajxiän, ja'a hajxy ca'a judíosä. Jímhöch miich jaduhñ nguexa'añ maa ja'a wiingjäya'ayhajxiän. ¹⁸ Páadyhöch miich jim nguexa'añ, jaduhñ miichä Diosmädia'agy myajwiingapxø'øwät, jaduhñä yhaxøøgcuhdujt hajxy ñajtshixø'øwät. Cabä mõjcu'ugong ja'a miädia'agy jaduhñ miäbøjcäxät. Ja'a Diosmädia'agy hajxy jaduhñ miäbøgäp. Y coočhä nmädia'agy hajxy jaduhñ xmiäbøjcäbät, jadúhñhöch nyajñahwá'adsät ja'a piojpä quiädieeyhajxy, jaduhñ hajxy miähmø'øwät hawa'adstuum”, nõmhøchä Jesús xñämaayy.

¹⁹ 'Wiindsøn Agripa, coočhä Jesús jaduhñ jim xmiägäpaxy tsajpootyp, páadyhöchä miädia'agy jaduhñ ngudiunä. ²⁰ Mänitøchä Diosmädia'agy ndägøøyy yajwa'xpä coo jäya'ayä yhaxøøgcuhdujt hajxy ñajtshixø'øwät, coo ja'a Diosmädia'agy hajxy piadu'ubøgät. Coo hajxy jaduhñ yhojiäya'ayhädät, jaduhñ hajxy yajcähxø'øgät coo yhaxøøgcuhdujt hajxy tøø jiaanç najtshixø'øy. Jímhöchä Diosmädia'agy nyajwa'xtsohñ Damasco. Mänitøch jim njaac yajwa'xy Jerusalén, møød jim Judeanaaxooty wiinduhmyhagajpt. Mänitøchä jäya'ayhajxy njaac yajñahixøøyy, ja'a hajxy ca'a judíosä. ²¹ Coočhä jäya'ayhajxy jaduhñ nyajñahixøøyy, ja'a hajxy ca'a judíosä, páadyhöchä judíosahajxy näje'e jim xjia majch mõjtsajtøgooty, jim Jerusalén. Cooč hajxy jaduhñ xmiäjch,

mänítøch hajxy xjia yagho'ogaañ. ²²⁻²³ Pero Dióshøch xpiuhbejp. Tehngájñøchä Dios-mädia'agy nyajwa'xy høxtä jäda'anäbaady, ja'a Jesúsøxpä. Nägøxiøchä jäya'ayhajxy jaduhñ nyajñähixø'øy, møjtøjc, häyoobädøjc. Jaduhñhøch nnä'ägä mädia'agyhaty neby jim cujaay myiñän nocyjiooty, ja'a profetadøjc-hajxy jecy yhädiúunäbä, ja'a Moisés jecy yhädiúunäbä. Jaduhñ hajxy jecy quiujahy coogä Dios ja'a wyiinguexypä hänajty quiexa'añ, ja'a xøhjäpä Cristo. Jaduhñ hajxy jecy quiujahbiä coogä Cristo hänajty yho'oga'añ. Jaayá'ayäc hänajty jayøjp juyypjøgaamb. Jaduhñägä jäya'ayhajxy hänajty yajñahwa'adsa'añii, møødä judíoshajxy, møødä wiingjäya'ayhajxy. Hoorä, coo ja'a Jesús yaa yhooyy hädaa yaabä naaxwiin, Dios jaduhñ wiinguejx. Jaduhñ tiøjiajty nebiä profetadøjc-hajxy jecy quiujahyyän, nebiä Moisés jecy quiujahyyän —nømä Pablo ñijjøgäpää.

²⁴ Mänitä Festo yaaxy:

—Pablo, tøø miich jaduhñ mguhhiñ. Coo hanaxiä tøø mgapxta'agy, je'e tøø xyajcuhhiñ.

²⁵ Mänitä Pablo yhadsooyy:

—Wiindsøn Festo, cábøch nguhhiñ. Ja'a tøyhajt, je'eçh nmädiaacpy. Homiäbøjnøch jaduhñ nmädia'agy.

²⁶ Mänitä Pablo ja'a Agripa ñämaayy:

—Wiindsøn Agripa, cóxiøch cham nmädia'agy maa miich mwiinduumän. Nmøød-høchä tøyhajt jaduhñ coo miich jaduhñ mgøxy najuøøbiä nebiätyhøch cham nmädia'agy. Hijxwiinduum jaduhñ tøø jiadyii tøø tiuñii, ca'a yhayu'uçh ca'a yhamee'chä.

²⁷ Wiindsøn Agripa, nnajuøøbiøch jaduhñ coo miichä mädia'agy mmäbøcy, ja'a profetadøjc-hajxy jecy yhädiúunäbä.

²⁸ Mänitä Agripa yhadsooyy:

—Ja weenjátyhøch miich xquia'a yajniñähdujca cooçh jaduhñ nmäbøgät ja'a Jesúsøxpä.

²⁹ Mänitä Pablo miänaañ:

—Hoy jia weenjaty hoy jia møjjaty hajxy mga'a mäbøcyñä, chojpiä Dios ja'a jioot jaduhñ coo ja'a miädia'agy hajxy nägøxiä mmäbøjcät ja'a Jesúsøxpä nébiøch nmäbøquiän, mäduhñtiä hajxy yaa mhamädoowhity, møød miich Wiindsøn Agripa. Pero cábøch jaduhñ nmäna'añ coo hajxy tsumy mhídät nébiøch høøchän.

³⁰ Mänitä Agripahajxy tiänaayyø'cy, møødä Festo, møødä Berenice, møødä jäya'ayhajxy nägøxiä. ³¹ Mänitä hajxy tiøjpädsømy. Mänitä Agripahajxy hawiing ñiñämaayyä møødä Festohajxy:

—Caj yø'ø craa tii cädieey miøødä. Cab jaduhñ yhahixø'øy coo tsumy jiaac hídät ni coo yagho'ogøøjät.

³² Mänitä Agripa ja'a Festo ñämaayy:

—Coo yø'ø craa häxøpy tøø quia'a mäna'añ coo jim nøcxy yajtøyhajtyega'añii Roma maa ja'a gobiernä wyiinduumän, tøø häxøpy yhøxmächii.

27

¹ Mänitä Festo wyiinmahñdyhajty coo ja'a Pablohajxy jim quiexøøjät Italia barcojooty møød jiamioødhajxy, ja'a hajxy hänajty tsumybiä. Mänitä Julio ja'a tsumyhäna'c yajcø'dägøøyyä. Capitán ja'a Julio hänajty tiuumby maa ja'a Augusto biatallóngän. Høøch Lucas, høøchä Pablo hänajty nbanøcxaamby. ² Mänit højts hoy nbarcotägø'øy. Jimä barco hänajty tøø chohnda'agy maa ja'a cajpt hänajty xiøhatiän Adramitio. Tänaayy-haambiä barco hänajty ñøcxa'añ majatiä cajpt hänajty miejypia'ajän jim Asianaaxooty. Jimä jäya'ay hänajty tu'ug piadsoonä. Aristarco hänajty xiøhaty. Jim hänajty quiunaaxä Tesalónica, jim Macedonia-naaxooty. Mänit højts ndu'ubøjnä barcojooty. ³ Cujaboom højts nmejch maa ja'a cajpt hänajty xiøhatiän Sidón. Jaançh tehñ yhojiootä Julio hänajty miøød ja'a Pablocøxpä. Paadiä Julio ja'a Pablo cuhdujt miooyy coo ja'a Pablo ja'a miägu'ughjäpä nøcxy quiuhixy cajptooty, weenä Pablo jaduhñ piuhbedyii. ⁴ Mänit højts

jim jadähooc ndu'ubójcumbä Sidón barcojooty. Møc højts hänajty xjijcubojø'oy. Paady højts Chiprenaaxooty hahooyhaamby nwiinnajxy maa hänajty møc quia'a jaty pojjiän. ⁵ Mänit højts jim nnaxøøyy Cilicia-naaxooty møød Panfilia-naaxooty. Mänit højts jim nmejch maa ja'a cajpt hänajty xiøhatiän Mira, jim Licea-naaxooty.

⁶ Jimä Julio wiingbarco hoy piaady, ja'a hänajty nøcxaambä Italia. Alejandría ja'a barco hänajty tøø chohnda'agy. Mänit højts barcojooty hoy ndägøødiägach. Mänit højts ndägøøyy tu'uyohbiä jadähooc. ⁷ Je'enä højts hänajty møc xjijcubojø'oy, paady højts hänajty hodiägaamby ndu'uyo'oy. Mädaaxxøø mägoøxxøø højts hänajty tøø njaac nøcxy coo højts jim nmejch mäwiingón maa ja'a cajpt hänajty xiøhatiän Gnido. Hobiänejpia højts jim nmejch. Cab højts hänajty hoy ndu'uyo'oyaännä. Je'enä højts hänajty møc xjijcubojø'oy. Mänit højts wiingtuum nnøcxøøyy maa ja'a naax hänajty xiøhatiän Creta. Coo højts jim nnaxøøyy mäwiingón maa hänajty xiøhatiän Cabo Salmón, mänit højts Creta hanajtyhaamby nnøcxøøyy maa hänajty møc quia'a jaty pojjiän. ⁸ Hamäjaa højts jim nmejypia'ayohy. Mänit højts jim nmejch maa ja'a cajpt hänajty xiøhatiän Buenos Puertos, jim mäwiingón maa ja'a cajpt hänajty xiøhatiän Lasea.

⁹ Maxiøø højts jim nhijty. Tøø højts hänajty hanaxiä nhøxhaamø'oy. Mäjähñ ja'a tu'uyo'oyiibä hänajty tøø jiajnä je'eguiøxpä coo tøøchpoj hänajty tøø piädsøømnä. Mänitä Pablo miänaañ:

¹⁰ —Wiindsøndøjc, mäjähñdiägøøbiøchä tu'uyo'oyiibä jaduñ nhijxnä coo tøøchpoj tøø piädsøømnä. Wehñdä barco jaduñ miá'adät møødä tsømydiajy cøxiä. Wehñdä højts jaduñ nhó'cämät.

¹¹ Pero cabä Julio ja'a Pablo ja'a miädia'agy ñä'a yajtuunä. Jue'e ja'a miädia'agyhajxy yajtuunäxä, ja'a barcoyajyohbiä møødä cubarco. Jaduñ hajxy hänajty tøø miäna'añ cooc tyijy hänajty quia'a mäjähñä. ¹² Cab hänajty yhahixø'oy coo højts tøøchpoj jim nya-jnaxät Buenos Puertos. Mänit hajxy nämay miänaañ coo højts jadähooc ndu'ubójcumbät barcojooty. Jim hajxy hänajty ñaxa'añ maa ja'a cajpt hänajty xiøhatiän Fenice. Creta-naaxooty hänajty je'e mejypia'a. Cab hänajty jim jiaty mäjähñä je'eguiøxpä coo jim møc quia'a pojy. Paadiä tøøchpoj hajxy hänajty jim yajnaxa'añ.

¹³ Mänitä jøømboj yuung piädsøømy. Mänit hajxy miänaañ cooc hajxy hoy jiaac tu'uyo'oya'añ barcojooty. Mänit højts njaançh tu'ubójcumbä. Jim højts njaac mejypia'ayohy Creta. ¹⁴ Weeñtiä højts hänajty tøø njaac tu'uyo'oy, mänitä tsuxpoj møc piädsøømy. ¹⁵ Møc højts hänajty xjijcubojø'oy. Coo ja'a barcoyajyohbiä jaduñ yhijxy coo hänajty quia'a mäjäda'aga'añ, mänit hajxy ñiñämaayyä coo ja'a barco ween piabojy. ¹⁶ Mänit højts jim nmejch maa ja'a naax mejyquiuyc chuucpäñ, ja'a hänajty xøhajpä Cauda. Mänit højts jim nnaxøøyy hanajtyhaamby maa hänajty møc quia'a pojjiän. Jim højtsä barcohuung hänajty nbawich. Hobiänejpia højtsä barcohuung jiiiby nyuugjädujty mõjbarcojooty. ¹⁷ Coo hajxy yajwiimbejty, mänitä barco hajxy yagjuhmägujwädipty laansähaam, jaduñä barco quia'a má'adät. Coo ja'a mejy hänajty jim quia'a jaty hagomä, paadiä barcoyajyohbiähajxy hänajty chähgø'oy coo ja'a barco jiiiby jie'xät tsäbiu'ujooty nøøba'c. Mänitä wit pojyohbiä hajxy yajmånajcy, ja'a barco hänajty quiuhdøyhajpiä. Mänit hajxy miänaañ coo ja'a barco ween jaduhyä piabojy. ¹⁸ Cujaboom, je'enä hänajty møc piojy. Møcä barco hänajty miøjpojpedyii. Ja'a tsømydiajy ja'a barco hänajty yajnøcxypä, mänit hajxy ñøøjuip ñøøpøgøøyy mejjiooty. ¹⁹ Cujaboom højtsä tuumbejt njaac nøøjuip njaac nøøpøgøøyy, møødä wit pojyohbiä, ja'a barco hänajty quiuhdøyhajpiä, møødä wittøøbiejt. ²⁰ Maxiøø højts jaduñ nmånajxy nyajnajxy. Tehngajnä hänajty møc piojy. Jaançh tehñ wyiimbøcy hänajty. Cabä xøø cabä madsa'a hänajty quiähxø'ogy ni weeñtiä. Cab højts hänajty nnajuø'oy maa højtsä poj hänajty xchøømnøcxy. Jaançh tehñ chähgøøby højts hänajty coo højts nhó'ogät.

²¹ Tøø højts hänajty maxiøø nhity jaguiay. Mänitä Pablo tiänaayyø'cy jäya'ayhaguyc. Mänit miänaañ:

—Wiindsøndøjc, coochä nmädia'agy hajxy häxøpy tøø xyajtuunä, cab hajxy häxøpy jim tøø mdsoñ Creta, y cabä tsø'ty cabä häyohn hajxy häxøpy tøø nbáatäm. ²² Pero,

ca'a hajxy mdsähgø'øy. Caj pøn yho'oga'añ, hoyyá barco cu jia ma'ad. ²³ Hix, haamyquiódshøchä Diosmoonsä tu'ug nwiinhijxy. Jim chooñ Dioswiinduum. Nwi-ingudsähgø'biøchä Dios. Je'eçh jaduñ xwyiinguejx. ²⁴ Mänithøchä Diosmoonsä xñämaayy: “Pablo, ca'a mdsähgø'øy. Tsipcøxp yhähixø'øy coo miich jim mmédsät Roma maa ja'a gobiernä wyiinduumän. Miihcøxpä ja'a Dios tøø miäna'añ cooc pøn quia'a ho'oga'añ mäduhñtiä hajxy jiiby mnøcxy barcojooty”, nõmhøchä Diosmoonsä xñämaayy. ²⁵ Paady, ca'a hajxy mdsähgø'øy. Nmäbøjcäbøchä Dios ja'a miädia'agy jaduñ cooc hajxy xyajnáhwa'adsaanäm, nebiátyhøchä Diosmoonsä tøø xyajmøødmädia'agy. ²⁶ Jim mejyquiujc, jimä naaxhuung tu'ug. Jim højts nøcxy nmøjpojpedaanäm. Tøyhajt jaduñ —nømä Pablo miänaañ.

²⁷ Majmactsxøø højts hänajty tøø nbabojoy barcojooty jim maa ja'a mejy hänajty xiøhatiän Adriática. Cuptsuhm hänajty jaduñ, mänitä barcoyajyohbiähajxy ñajuøøyy coo højts hänajty naaxpa'a tøø nmäwiingoñ. ²⁸ Mänitä nõø hajxy qyipy mäduhñtiä quiøcä. Jue'e hänajty quiøcä, hii'xmajmocxmetro. Coo hajxy weeñtiä jiaac nøcxy, mänit hajxy qyípxcumbä. Jue'e hänajty quiøcä, hii'xjuxtujmetro. ²⁹ Tsähgøøby hajxy hänajty coo ja'a barco tsaä nõøba'c miøjpohmbédät, paadiä pujxthajo'c hajxy mädaaxc ñøøjuipøøyy barcohøxhaam. Cuxodsø'øyä pujxthajo'c hänajty. Paady hajxy jaduñ ñøøjuipøøyy coo ja'a barco jaduñ jiiby wiohnmähmø'øwøøjät. Jaançh tehñ jiootmay-hajp hajxy hänajty. Jaduñ hajxy hänajty miäna'añ coo paquiä cu jiobøøyy. ³⁰ Mänitä barcoyajyohbiä ja'a barcohuung hajxy quiuhdøøñajxy nõøjooty. Jaduñ hajxy hänajty yajnänøma'añ cooc tyijy ja'a pujxthajo'c hänajty ñøøjuipø'øwa'añ barcojøbhaam. Ja wi'i piäyø'ogaambä barcoyajyohbiähajxy hänajty jaduñ ja'a barcohuungooty. ³¹ Pero cabä Pablo yajwiinhøhñ. Mänitä Juliohajxy ñämaayyä møødä soldadohajxy:

—Coo yø'ø yajyohbiädøjc-hajxy häyaa piäyø'ögät, mhó'ogäp hajxy jaduñ —nømä Pablo miänaañ.

³² Mänitä soldado ja'a barcohuung hajxy miäbuxøøyy. Mänitä barcohuung chømnøcä nähgapjooty. ³³⁻³⁴ Jobø'øwaamb hänajty jaduñ, mänitä Pablo jäya'ay ñämaayy:

—Joom, huuc wiingaañäxäts hajxy hii. Majmactsxøø hajxy tøø mhity jaguiay jamia'ay. Cab jaduñ yhooyä coo hajxy jaguiay mjaac hídät, coo hajxy jaduñ mnä'a päma'ayø'øwät. Hix, cab hajxy nej mjada'añ.

³⁵ Coo ja'a Pablo jaduñ quiapxpädøøyy, mänitä tsajcaagy quionø'cy. Mänitä Dios ñämaayy “Dioscujú'uyäp” jiamioødwiinduum. Mänitä tsajcaagy yhäguidøøyy. Mänit tiägøøyy caabiä. ³⁶ Coo ja'a Pablo jaduñ yhiyxä coo hänajty quiaay, mänitä jiamioødhajxy jiootcugøøyy. Mänit hajxy piädägøøbiä caabiä. ³⁷ Jue'e højts hänajty nhity barcojooty nämejtsmägo'xcudägøøghii'x cu majmocxtu'ug. ³⁸ Coo hajxy jaduñ quiaabiädøøyy, mänitä trigo hajxy miejwyipøøyy, jaduñä barco ween pie'tiø'øy.

³⁹ Coo jiobøøyy, cabä barcoyajyohbiädøjc-hajxy hänajty yhäjuø'øyii. Mänitä laguun hajxy yhiyx mejypia'a. Pa'adsäbiu'u hänajty je'e. Mänit hajxy miänaañ coo ja'a barco hajxy jim yajnøcxät pu'uwiing, coo hajxy jim yajmøjyädsujtspédät. ⁴⁰ Mänitä pujxthajo'c hajxy miäbuxøøyy. Jiiby jaduñ miähmøøyy mejjiooty. Mänitä barcoaa'pt hajxy yajuungøøyy, jaduñä barco hoy yó'oyät. Mänitä wit hajxy yujxojch barcojøbhaam, ja'a barco hänajty quiuhdøyhajpiä. Mänitä barco tiägøøyy yohbiä. Jim nõcxøøyy pu'uwiing. ⁴¹ Mänitä barco jie'xy nõøba'c tsäbiu'ujooty maa nõø hänajty quia'a comän. Ja'a barcojøbhaam jaduñ je'x. Mänitä barcohøxhaam tiägøøyyä møjcujpéjtäbä. Mänit tiägøøyy ma'pä tsaybiig.

⁴² Coo ja'a soldadohajxy jaduñ yhiyx coo ja'a barco hänajty mia'ada'añ, mänitä tsumyhäna'c-hajxy jia yagho'ogaanä, jaduñ hajxy cu quia'a päyø'cy yáhwäp. ⁴³ Pero cabä Julio jaduñ miänaañ coo ja'a tsumyhäna'c-hajxy yagho'ogøøjät. Paady jaduñ miänaañ je'leguiøxpä coo ja'a Julio ja'a Pablo hänajty yajnähwa'adsa'añ. Mänitä Julio miänaañ coo hajxy nõøga'awø'øwät, pønjaty yaaw hänajty jajp, jaduñ hajxy ñøcxät tø'ødstuum yáhwäp. ⁴⁴ Pønjaty hänajty ca'a yaawjajp, wéenac hajxy nõcxy pu'uñähgøxp, møødä barcohadøjcøxp. Jaduñ højts nägøxiä ndsoocy tø'ødstuum.

28

¹ Coo hõjts jaduhñ nãgõxiä ndõ'ødspädsõomy, mänit hõjts nmädooyy coo ja'a naax hänajty xiõhaty Malta. ² Mänit hõjtsä jäya'ay xñäxuu'ch, ja'a hajxy hänajty jim nä'ägä tsänaabiä. Tuub hänajty; tõõchc hänajty jaduhñ. Mänitã jõõn hajxy yajmõjjooyy. Mänit hõjts xñämaayy coo hõjts njõõmba'axámät. ³ Mänitã Pablo ja'axy tõ'ødspä miämejch tu'tso'oy. Jiibiä Pablo ja'axy hänajty piäda'agy jõõnhaajiooty. Mänitã hawa'andsahñdy tu'ug piädsõomy jõõnhaajiooty. Mänitã Pablo quiõ'õmãwõdsõoyyã. ⁴ Coo ja'a jäya'ayhajxy jaduhñ yhiijxy coo ja'a Pablo tsahñdy hänajty miõõdã quiõ'õgõxp, mänit hajxy ñiñämaayyã:

—Tõõ yõ'õ craada'a miäjäya'ay-yagho'ogy. Coo jaduhñ tõõ quiädieey, paady jaduhñ tsipecõxp yho'oga'añ, hoy jaduhñ tõõ jia tso'ogy mejjiooty.

⁵ Mänitã Pablo ja'a quiõ'õ xiädijty. Mänitã tsahñdy hoy quia'ay jõõnhaajiooty. Cabã Pablo nej jiajty. ⁶ Nõmä jäya'ayhajxy hänajty miäna'añ coog ja'a Pablo quiõ'õ cu qyixta'ch, o cooc cu yho'cy. Pero coo hajxy yhiijxy coo ja'a Pablo nej quia'a jajty, mänit hajxy miänaannã cooc tyijy ja'a Pablo Dyiosã.

⁷ Jimã jäya'ay hänajty tu'ug chãna'ay mäwiingõn maa hõjts hänajty njõõmba'axamiän. Publio hänajty xiõhaty. Gobernador ja'a Publio hänajty jim tiuumby Malta. Coo hõjts jim nmejch maa ja'a tiõjcän, mänit hõjts jim xyajmejtstaacy tãgõõgxõõ. ⁸ Jimã Publio tieedy hänajty pia'amgo'na'ay. Tõoyyãp hänajty jaduhñ mõõdã nõ'tiõ'õnõõ hänajty miõõdã. Mänitã Pablo jiiby tiõjtãgõõy maa ja'a Publio tieedy hänajty pia'amgo'na'ayän. Mänitã Pablo ja'a Dios pia'yaaxy. Mänitã Pablo ja'a pa'amjäya'ay ñähdoõñ. Mänit pia'amyajnajxã. ⁹ Coo ja'a pa'amjäya'ayhajxy jaduhñ jim miädoyhajty Malta, mänit hajxy hoy yajmõcpõjcabã nãgõxiä. ¹⁰⁻¹¹ Mänit hõjts madiu'u xñä'ã mooyy cõxiä wiinã. Jimã barco hänajty tu'ug tiõõchpojnaxy. Jue'e ja'a barco hänajty xiõhaty: “Ja'a Hametsc-huong.” Alejandría ja'a barco hänajty tõõ chohnda'agy. Coo hõjts hänajty jim tõõ nhity Malta tãgõõgpo'o, mänit hõjts nbejty barcojooty, ja'a hänajty xõhajpã: “Ja'a Ametsc-huong.” Mänit hõjtsä jäya'ay xjiaac mooyy tijaty hõjts hänajty nmänõcxaamby barcojooty. Ja'a jäya'ayhajxy hänajty tõõ miõcpõquiäbã, je'e hajxy jaduhñ xmiooyy. Mänit hõjts jim ndu'ubõjnã Malta.

¹² Mänit hõjts nmejch maa ja'a cajpt hänajty xiõhatiän Siracusa. Jim hõjts njaac hijty tãgõõgxõõ. ¹³ Coo hõjts jim ndu'ubõjcbumbã, mänit hõjts njaac mejypia'ayohy. Mänit hõjts jim nmejch maa ja'a cajpt hänajty xiõhatiän Regio. Cujaboomã jõõmboj piädsõomy. Mänit hõjts jadãhooc ndu'ubõjcbumbã. Cumaaxc hõjts jim nmejch maa ja'a cajpt hänajty xiõhatiän Puteoli. Jim hõjtsä barco nnähmänajtuutnä. ¹⁴ Mänit hõjtsä jäya'ay näje'e nbaaty. Ja'a Diosmädia'agy hajxy hänajty miäbõjpy. Mänit hõjts xñämaayy coo hõjts jim nmejtstã'agät maa ja'a tiõjc-hajxiän. Juxtujxõõ hõjts jim nhijty. Mänit hõjts jim ndu'ubõjcy tecy-yo'oyhaam. Jaduhñ hõjts hänajty jim njaac nõcxa'añ Roma. ¹⁵ Mänitã mäbõjpädõjc-hajxy Rómabã miädoyhajty coo hõjts hänajty jim nnõcxy Roma. Mänit hõjts näje'e hoy xjiõjcubaadõ'õy jim maa hänajty xiõhatiän Foro de Apio. Näje'e hõjts hoy xjiõjcubadõõbiä maa hänajty xiõhatiän Tres Tabernas. Coo ja'a Pablo jaduhñ yhiijxy, mänitã Dioscujú'uyãp yeycy. Mänit jiootcugõõy. ¹⁶ Coo hõjts jim ngoo'nã Roma, mänitã Pablo cuhdajt miooyyã coo ja'a yhamdsoo tõjc yhõxtã'awät maa jaduhñ yhidät. Mänitã soldado tu'ug yajcõ'õwaanõõyã coo ja'a Pablo cwieendãhadõõjät, coo ja'a Pablo jaduhñ ñä'ã päyõ'õgät. Mänitã tsumyhãna'c-hajxy jiaac yajcõ'õdãgõõyãbã ja'a soldado-wiindsõñ, ja'a copc-hajpã.

¹⁷ Cudãgõõgxõõ ja'a Pablo ja'a judíos yajmõjyaaxã, ja'a hajxy hänajty mõjhajpã maa ja'a chajtõjc-hajxiän. Coo hajxy hänajty tõõ yhamugõ'õy, mänit hajxy ñämaayyã:

—Mägu'ughajpãdõjc, mänãajõch jim nhitiän Jerusalén, jimhõch häna'c näje'e xmi-ajch, hõyhõch hänajty tõõ nga'a jagã cãdieey, hõyhõchã cuhdajt hänajty pedyii tõõ nja cudiuñ nebiä nhaphãjtãmã ndeedyhãjtãmhajxy jecy yajtsohndaãquiän. Ja'a nmägu-naaxhãjtãmhajxy jaduhñ xmiajts. Mänitõch hajxy xquiõ'õyeycy maa ja'a soldadohajxiän, ja'a hajxy yaa tsohmã Roma. ¹⁸ Coochã soldadoshajxy hänajty tõõ xyajtõyhajtyecy,

mānit hajxy jaduhñ ñajuøøyy cooçh hānajty tøø nga'a cādieey. Mānit hajxy jia mānaañ cooçh hajxy jaduhñ xyhøxmādsāt. ¹⁹ Pero cabā judíošhajxy jaduhñ miānaambā cooçh nyaghøxmādsāt. Mānitøch nwiinmahñdyhajty coo jaduhñ yhahixø'øyy cooçh yaa ndøyhajtyégāt Roma maa ja'a gobiernā wyiinduumān. Pero cābøch hānajty nmāna'añ cooçhā nmāgunaaxhajxy nnāxø'øwø'øwāt. ²⁰ Hoorā, cooçh jaduhñ tøø njaty tøø nhabety, páadyhøch mijts jaduhñ nmøødmādia'aga'añ. Páadyhøch cham̄ ndsumyħāñ'a'y coo højts judíos nmābøjčām coo ja'a ho'ogyjiāya'ayhajxy jiuypioğa'añ —nømā Pablo miānaañ.

²¹ Mānitā judíos ja'a Pablo hajxy ñāmaayy:

—Cab højts tii capxy tii mādia'agy tøø nmādoyhaty maa miičhcøxpān. Caj miičh pøn waamb tøø xñānømy, ja'a hajxy jim̄ tsohm̄bā Judea. ²² Jaduhñ højts tøø nmādoyhaty coo jāya'ayhajxy wiinduhmyhagajpt miādsiphadyii, ja'a hajxy jaduhñ mābøjpa coo ja'a Jesús Dyiosquexiā. Paady højts nhamādoowhida'añ nej miičh mwiinmayyān —nømā judíošhajxy miānaañ.

²³ Mānitā judíos ja'a Pablo hajxy miøødcojyquiapxytiuuñ mānaa hajxy jadāhooc ñøcxāt maa ja'a Pablo hānajty yhitiān. Coo yhabaaty, mānitā jāya'ayā Pablo hajxy nāmāy jiaančh nāmejch. Tu'xøø ja'a Pablo jāya'ayā Diosmādia'agy yajwiingapxøøyy ja'a Jesúsøxpā, coo ja'a Dios ja'a Jesús hānajty tøø quiexy, nebiā Moisés jecy quiujahyyān, nebiā profetadøjc-hajxy jecy quiujahyyān. Jia wi'i yajniñāhdugāanābā Pablo ja'a jāya'ay hānajty coo hānajty tøyhajt miādia'agy ja'a Jesúsøxpā. ²⁴ Nāje'e hajxy miābøjcy nebiatiā Pablo hānajty tøø miādia'aguiān. Nāje'e hajxy quia'a mābøjcy. ²⁵ Mānitā mādia'agy hajxy tiägøøyy yajcapxiøøbiā nebiā Pablo hānajty tøø miādia'aguiān. Coo ja'a miādia'agy hajxy quia'a yajniibiaatā, mānit hajxy tiägøøyy wiimbijpā. Mānitā Pablo miānaañ:

—Jéquiānā Dioshespíritu ja'a profeta Isaiās miāgapxy. Mānit højtsā nhaphajtāmā ndeedyhajtāmhajxy miāgapxtāgajtsā:

²⁶ Nøcx yø'ø jāya'ay nāma'aw:

Hoy hajxy mja mādowā'añ, cab hajxy mwiinjuø'øwā'añ.

Hoy hajxy mja hixa'añ, cab hajxy mmābøga'añ.

²⁷ Tøø hajxy mguhxexy. Jaduhñ hajxy mnibiāda'agyii nebiā wiindspān nebiā cuhnatpān.

Coo hajxy hāxøpy tøø mga'a cuhxexy, cu mwiinjuøøyy hajxy.

Jaduhñā mhaxøøgwiiinmahñdy hajxy cu mnajtshixøøyy.

Jaduhñ hajxy cu nyajñāhwaach,

nømā Dioshespíritu jecy miānaañ. Tøyhajt jaduhñ miānaañ.

²⁸ Mānitā Pablo jaduhñ jiaac mānaañ:

—Huuc mādow hajxy, ja'a jāya'ayhajxy ca'a judiøspā, yajwiingapxø'øwāanābā Diosmādia'agy hajxy je'e coo hajxy yajñāhwa'adsāanābā. Je'e hajxy mābøcypiā mābøgaamb.

²⁹ Coo ja'a Pablo jaduhñ quiapxpādøøyy, mānitā judíošhajxy quiøxy wiimbijnā.

³⁰ Mejtsjomøjtā Pablo jim̄ jiaag hijty maa ja'a tøjc hānajty yhajoodiuquiān. Pønjaty hānajty jim̄ mejtsp tøghayohbiā, mioobiā Pablo hāñaabiejt hānajty. ³¹ Haguyc jootcujcā Pablo ja'a Diosmādia'agy hānajty yajwiingapxø'øyy ja'a Jesúsøxpā coo ja'a Dios ja'a Jesús hānajty yaa tøø quiexy hādaa yaabā naaxwiin. Cabā Pablo hānajty yhagapxtugyii ni pøn.

Romanos

¹ Høøch hädaa nocy njahby, høøch Pablohajpä. Høøchä Jesucristo xyajtuumb nebiä moonsän. Hamuumdu'jóothøchä miädia'agy jaduñ nyajtuunä. Díshøch jaduñ xpiädaac cooch ndúnät apóstol. Cooch jaduñ nduñ apóstol, je'eduhñ ñänøømby coochä Dios xwyiinguejxy coochä miädia'agy nmäwädíjtät ja'a yHuungcøxpä, coo hajxy yaa hoy xñähho'túutäm.

² Jéquiänä Dios jaduñ miänaañ cooc ja'a yHuung hänajty yaa quiexa'añ hädaa yaabä naaxwiin. Jim jaduñ myiñ cujaay maa ja'a Diosmädia'aguiän. Ja'a jäya'ayä Diosmädia'agy hajxy jecy jajwá'xäbä, jaaya'ayhajxy jaduñ jecy cujahy. ³ Ja'a Jesucristo ja'a Dios jaduñ yHuunghajpy, ja'a hajxy nWiindsøn'hájtämbä. Jäya'ayhajt je'e hädaa yaabä naaxwiin neby højtshájtäm. Ja'a rey David yhap yhoc hänajty je'e. ⁴ Y coo ja'a Jesucristo yho'cy, mänit jiuypiojtägajch ja'a yEspírituhaam. Coo jaduñ jiuypiojtägajch, jaduñ yajnajuø'øy coo je'e ja'a Dios yHuunghadyii, coo møcmäjaa jiaanč tehñ miøødä, coo ja'a Dioshespíritu jiaanč tehñ miøødä.

⁵ Coo ja'a Jesucristo hajxy xñähho'túutäm, coo jiuypiojtägajch, páadyhøchä Dios tøø xquiexy wiinduhmyhagajpt mädia'agy-yajwa'xpä ja'a Jesucristocøxpä, weenä jäya'ayä Diosmädia'agy hajxy miäböcy, ween hajxy hoy jajtuñ, weenä Jesucristo hajxy jaduñ wyiingudsähgø'øy. Coochä Dios jaduñ tøø xquiexy, jajcähxø'py je'eduhñ cooch jaduñ xquiumay. ⁶ Møød mijtsä Dios xyajnáhdijpä coo ja'a Jesucristo miädia'agy hajxy mbanøcxäbät, mijts jim hijpä maa ja'a cajpt jaduñ xiøhatiän Roma. ⁷ Mijts hädaa nocy nyajnajaayøøby, pønjetiä Dios yaghijpy quiø'øjooty jim Roma. Jaaya'ay mijts jaduñ xyajnáhdij coo ja'a miädia'agy hajxy mmäbøjcät. Xjiaanč tehñ chojp mijts jaaya'ay jaduñ. Ween mijtsä hoyhajtä weenhajt xmio'oy møødä yHuung Jesucristo, ja'a hajxy nWiindsøn'hájtämbä. Ja'a Dios hajxy nDeedyhájtäm.

⁸ Jayøjphøchä Dios Dioscujú'uyäp nmo'oy. Coo ja'a Dioscujú'uyäp hajxy jaduñ nyéjcäm, mänitä Jesucristo hajxy jaduñ xñähgapxtúutäm. Wiinduhmyhagajptä mädia'agy wiädity cooc mijtsä Diosmädia'agy hoy mjaanč tehñ miäböcy nägøxiä. Páadyhøchä Dioscujú'uyäp nyecy. ⁹ Najuøøbiä Dios cooch tøy nmädia'agy cooch nmäna'añ coo mijts homiänaajä njahmiech coochä Dios naxy nba'ya'axy. Hamuumdu'jóothøchä Dios nmøødtuñ coochä miädia'agy nyajwa'xä ja'a yHuungcøxpä. ¹⁰ Mayhóoc-høch jim tøø nja nøcxa'añ maa mijtsän. Jadúñhøchä Dios nja wi'i ñäma'ay cooch jim xyajnácxät. Wehndä jaduñ miänáannät. ¹¹ Páadyhøch jim nja wi'i ñøcxa'añ maa mijtsän, jaduñ mijts hoy nbuhbédät ja'a Dioshespíritucøxpä, jaduñä Diosmädia'agy hajxy maas hoy mmäbøgät. ¹² Coo ja'a Diosmädia'agy hajxy näguipxy nmäbøjcäm, páadyhøch jim nja wi'i ñøcxa'añ maa mijtsän, jaduñ hajxy hoy hamiñ haxøpy nnijootcapxmøcpøjcämät.

¹³ Mägu'ughajpädøjc, jadúñhøch nja wi'i miäna'añ cooch jim nja wi'i ñøcxa'añ maa mijtsän, cáböch jaduñ nnä'a yajnabaadø'øy. Páadyhøch jim nja wi'i ñøcxa'añ, chójpiøchä njoot jaduñ coo hajxy mjaac mayø'øwät maa ja'a Diosmädia'agy hajxy mmäbøquiän, nebiä mäbøjpädøjc-hajxy tøø miayø'øyän wiingtuumjaty, majátyhøchä Diosmädia'agy tøø nyajwa'xiän. ¹⁴ Jadúñhøchä Dios xwyiinguejxy coochä miädia'agy nyajwá'xät ja'a yHuungcøxpä wiinduhmyhagajpt majatiä jäya'ayhajxy griegohaam miädia'aguiän, møød majatiä jäya'ayhajxy griegohaam quia'a mädia'aguiän. Jadúñhøch tøø xwyiinguejxpä coochä jäya'ay jaduñ nägøxiä nyajwiingapxø'øwät, hoy hajxy jia høxpøquiä, hoy hajxy quia'a jagä høxpøquiä. ¹⁵ Páadyhøch jim nja wi'i ñøcxaambä Roma maa mijtsän, jimhøchä jäya'ayä Diosmädia'agy nyajwiingapxø'øwaambä.

¹⁶ Hiç, cáböchä Diosmädia'agy nmädsähdiuñ ja'a Jesucristocøxpä, je'eguiøxpä coo jäya'ayhajxy nägøxiä piäda'aga'añii hawa'adstuum ja'a Dios miäjaahaam, pønjetiä Diosmädia'agy mäbøjp ja'a Jesucristocøxpä. Højts judíos, højts ja'a Diosmädia'agy jayøjp nmädoodsøn. Høxhaamä jäya'ayhajxy jiaac mädooyy, ja'a hajxy ca'a judíospä.

¹⁷ Ja'a miädia'agyhaamä Dios hajxy xyajwiinjuóöyyäm coo piäda'aga'añ hawa'adstuum pønjaty jaduñ mabøgaamb coo ja'a Dios yajtøjiada'añ waambaty tøø quiapxy tøø miädia'agy. Pøn jaduñ ca'a mabøgaamb, cab je'e piäda'aga'añii hawa'adstuum. Jaduñ jim myiñ cujaay maa ja'a Diosmädia'aguiän: "Pønjaty jaduñ mabøgaamb coo ja'a Dios yajtøjiada'añ waambaty tøø quiapxy tøø miädia'agy, je'e ja'a Dios jaduñ piäda'agaamby hawa'adstuum. Je'e jaduñ nøcxaamb Dioswiinduum."

¹⁸ Hoy piönä jaduñ ñajuø'øy coo ja'a Dios tsajpootypä yajcumädowa'añ pønjatiä Dios ca'a wiingudsähgøøby, møød pønjatiä jioot ca'a tsojp coo ja'a Dios wyiingudsähgø'owøøjät wiinghäna'c. Paadiä jioothajxy jaduñ quia'a tsoy je'eguiøxpä coo hajxy haxøøg jiaac jatcø'owa'añ. ¹⁹ Cabä tøyhajtpä hajxy chocy, hoyyä Dios hajxy tøø jia yajwiinjuø'øyii nebiatiä Dios jaduñ wyiinmahñdyhaty. ²⁰ Jéquiänä Dios cøxiä yhädiuñ, møød yø'ø tsajt, møød hädaa yaabä naaxwiin, cøxiä. Coo hajxy jaduñ nhíxäm tijaty ja'a Dios jaduñ tøø yhädiuñ, paadiä tøyhajtpä hajxy nmøødhájtäm coo ja'a Dios møcmäjaa miøødä homiänaajä, møød coo cøxiä wiinä yhane'emy, hoyyä Dios hajxy nga'a jagä híxäm. Jaduñä tøyhajtpä hajxy nmøødhájtäm coo ja'a Dios hajxy nwiingudsähgøöyyämät. Cab jaduñ pøn hawiinmats miäná'anät cooc tyijy hajxy quia'a najuø'øy coo ja'a Dios jyijä. ²¹ Ja'a häna'c-hajxy jaduñ haxøøg jatcøøbiä, cabä Dios hajxy wyiingudsähgø'øy, hoy hajxy jaduñ jia najuø'øy coo ja'a Dios jyijä. Ni cabä Dios Dioscujú'uyäp hajxy mio'oy. Paadiä wyiinmahñdyhajxy quia'a tsoobaada'añ. Y paady hajxy tehngajnä wyiinmahñdyhada'añ haxøøg. Cabä howyiinmahñdy hajxy hoy miøød-hadaannä. ²² Hoy hajxy jia nibiäda'agyii nebiä jaanč tehñ jiajpän, cab hajxy tii ñä'ägädä jaty. ²³ Ja'a Dios, møj jaanč je'e. Hoy miänaajä yhity. Cab jaduñ mänaa yho'ogy. Pero cabä haxøøghäna'cä Dios hajxy wyiingudsähgø'owa'añ. Jäya'ayhahädiuunnaxy hajxy wyiingudsähgøøby, hoyyä jäya'ayhajxy jia ho'ogy; møødä muuxyhahädiuunnaxy hajxy wyiingudsähgøøbiä, møødä tsahñdyhahädiuunnaxy, møødä animalhahädiuunnaxy ja'a hamädaaxtecypiä.

²⁴ Paady, cabä Dios waamb miäna'anaannä, weenä jäya'ayhajxy haxøøg wyiinmahñdyhaty nebiä jioot hajxy choquiän, coo hajxy cøxypänejpä ween ñidiuñii hočhähdiiuunnä, ²⁵ je'eguiøxpä coo ja'a tøyhajtpä hajxy tøø quia'a mabøcy ja'a Dioscøxpä. Ja'a høhn-da'agymiädia'agy hajxy jaduñ miäbøjpy. Cabä Dios hajxy wyiingudsähgø'øy. Jue'e hajxy wyiingudsähgøøby, tijatiä Dios yaa tøø quiunuu'xy hädaa yaabä naaxwiin. Pero, hahixøøby coo ja'a Dios hajxy nwiingudsähgøöyyämät homiänaajä. Tøyhajt jaduñ.

²⁶ Coo häna'cä Dios hajxy quia'a wiingudsähgø'owa'añ, paadiä Dios waamb quia'a mäna'ana'añ, ween hajxy hočhähdiiuunnä ñidiuunnä. Høxtä to'oxiøjpaadyhajxy jaduñ jiatcø'øy. Cabä ñihyhap hajxy näje'e miøødtsäna'awaannä; quipxyjatiä to'oxiøjc-hajxy cøxypänejpä ñidiuñii hočhähdiiuunnä. ²⁷ Jaanä jaduñä ya'adiøjc-hajxy näje'ebä, cabä tio'oxiøjc hajxy miøødtsäna'awaannä. Quipxyjatiä ya'adiøjc-hajxy ñimiøødtsäna'awa'añii. Hočhähdiiuunnä hajxy jaduñ ñidiuñii cøxypänejpä. Coo hajxy jaduñ jiatcø'øy, paady hajxy quia'a niyaghoyø'øyii maa ja'a ñi'xcøxp maa ja'a quiopcøxphajxiän, møød maa ja'a wiinmahñdycøxphajxiän.

²⁸ Coo ja'a haxøøghäna'cä Dios hajxy jaduñ quia'a wiingudsähgø'owa'añ, paady hajxy ñajtshixø'øyii ja'a Diósäm. Ja'a Dios, cab jaduñ waamb miäna'anaannä, weenä yhaxøøgwiinmahñdy hajxy tiuñ, ween hajxy jaduñ jiaac jatcø'øy haxøøg. ²⁹ Madiu'u hajxy haxøøg jiatcø'øy cøxypänejpä. Miøødtsänaabiä cuhñdo'oxiøjc hajxy. Møødä jäya'ajie'e hajxy yhadsocy. Cab hajxy hojiäwø'øy pø jimä miägu'ughajpähajxy cøxiä wiinä miøødä. Høxtä niyaghó'cäp hajxy. Nimiädsiphájtäp hajxy. Høhndaacp hajxy. Niñähøønóöyyäp hajxy. ³⁰ Niwyiingapxépjtäp hajxy. Møødä Dios hajxy miähahaty. Nibiéjxäp hajxy. Yajcumayaamb hajxy. Hawiinjembybiä haxøøgwiinmahñdy hajxy yajcojpy. Cabä tiaj, cabä tieediä miädia'agy hajxy miäbøjcä. ³¹ Jaanč tehñ quiuhxex hajxy. Ni ja'a yhamdsoo mädia'agy hajxy quia'a cudiuna'añ. Cab hajxy pøn chocy miee'xy. Ni cab hajxy pøn miee'xa'añ. Cabä hojioot hajxy ñä'ägädä møødä. ³² Ñajuøøby hajxy jaduñ coo ja'a Dios tøø yhane'emy coo hajxy haxøøgjaty quia'a jatcø'owät nébiøch

naamnä tøø nmädia'aguiän. Jaanä jaduñ hajxy ñajuøøbiä, pøn jaduñ haxøøg jatcøøby, quiümädowaamby hajxy je'e tehngajnä. Pero nägø'ø nädecypiä hajxy jaduñ jiatcø'øy, hoy hajxy jaduñ jia najuø'øy. Høxtä xoondaacp hajxy jaduñ coo wiinghäna'c-hajxy jaduñ haxøøg piajatcøøbiä.

2

¹⁻³ Nnajuøøyyäm hajxy jaduñ coo jaduñ yhahixø'øy coo ja'a Dios hajxy nägøxiä xyajcumädóowämät je'eguiøxpä coo hajxy nägøxiä haxøøg njatcøøyyäm. Cab jaduñ yhahixø'øy coo højtsä jäya'ay nnänøømämät coo hajxy hoy quia'a hity, coo hajxy ween quiümädoy. Caj pues, haa ca'a, jaduñ højts haxøøg nbajatcøøyyämbä. Hix, ni pøn jaduñ hahixøøby quia'a mäná'anät cooc tyjy hoy tiehm yhity. Paady jaduñ yhahixø'øy coo ja'a Dios hajxy nägøxiä xyajcumädóowämät, je'eguiøxpä coo hajxy hoy nga'a hoyhidáanäm. ⁴ Pero hojiootä Dios jiaanč tehñ miøød, paady hajxy xquia'a tsoj tsaächtiünäm. Chojpiä jioot jaduñ coo howyiinmahñdy hajxy nbadu'ubójcänät, coo ja'a nhaxøøgwiinmahñdy hajxy nnajtshixøøyyänät. ⁵ Pero jii jäya'ayhajxy näje'e, jaanč tehñ xiexä quiopcä tiaatsc-hajxy. Cabä yhaxøøgwiinmahñdy hajxy ñajtshixø'owa'añ. Y coo hajxy jaduñ tehngajnä quia'a mäbögat, mänit hajxy hänajty hanaxiä chaačhpøga'añ coo yhabáadät coo ja'a Dios ja'a cahwiindøyhäna'c hänajty chaačhtiuna'añ. ⁶⁻¹⁰ Pønä jioot nägø'ø nädecypiä tsojp coo hoy yhídät, pønä jioot pädaacp coo jim ñócxät Dioswiinduum, coo ja'a hoyhajtä weenhajt jim piáadät, coo jim quiümáyóøjät ja'a Diósäm, pues je'edsä Dios jim yajnøcxaamby. Mio'owaambiä Dios je'e ja'a hoyhajtä weenhajt. Quiümayaambiä Dios jaduñ. Yaghidaambiä Dios je'e jootcujc homiánaaja, hopiønä, hoy jia judíosä, hoy quia'a jagä judíosä. Pero hoyhoyyä Dios chaačhtiuna'añ pøn haxøøg jatcøøby, pønä Diosmädia'agy ca'a cudiunaamb, pøn ca'a yajmägapx ca'a yaghane'emaamb waambatiä Dios hajxy jaduñ xjia hanéhmäm. Hopiønä jaduñ chaačhpøga'añ, pønjaty jaduñ haxøøg jatcøøby, hoy hajxy jia judíospä, hoy hajxy quia'a jagä judíospä.

¹¹ Hix, cabä Dios miøjpäda'agy pø mjudio miič, pø caj. Je'e yajcopcøøby pø mhoyhäna'c, pø caj. ¹²⁻¹⁵ Højts judíoshajpä, jequiän højtsä Dios xyhanehmy neby højts hoy nguhdujthädät. Mänitä Moisés ja'a mädia'agy jaduñ quiujahy nebiaty højts hoy nguhdujthädät. Hoorä, ja'a häna'c-hajxy ca'a judíospä, cabä mädia'agy hajxy miädoyyä nebiä Moisés jecy quiujahyyän. Pero hoy hajxy quia'a jagä mädoyyä, coo hajxy hamdsoojoot hoy quiudiünät nebiä Dios jioot jia tsoquiän, cäxó'ögäp jaduñ coo hajxy yhawáanäxä ja'a Diósäm ja'a wyiinmahñdyhaamhajxy. Jaduñ hajxy hamdsoo ñajuø'øy pø hoy hajxy quiudiuñ, pø caj. Jaduñ hajxy yajtuungpaady néjjiäm hajxy häxøpy tøø miädoy ja'a mädia'agy ja'a Moisés jecy quiujahyyäbä. Y coo hajxy hoy quia'a cudiünät neby hajxy ñajuø'øy ja'a wyiinmahñdyhaamhajxy, mänit hajxy quiümädowa'añ. Jaanä jaduñ højtspä, højts judíospä, coo højts nga'a cudiünät neby højtsä Dios jecy xyhanehmiän, nebiä Moisés ja'a mädia'agy jecy quiujahyyän, jaduñ højts ngumädowaambä. Hix, pøn jaduñ cudiuumb nebiä Dios yhane'emiän, je'e ja'a Dios piäda'agaamby hawa'adstuum, hoyyä mädia'agy tøø quia'a jagä mädoyyä nebiä Moisés jecy quiujahyyän. Pero pøn jaduñ ca'a cudiuumb, hoyyä mädia'agy tøø jia mädoyyä nebiä Moisés jecy quiujahyyän, cab je'eduhñ hawa'adstuum piäda'aga'añii ja'a Diósäm. Jadhñds je'e, nägøxiä ja'a cahwiindøyhäna'c-hajxy quiümädowa'añ, hoy hajxy jia judíospä, hoy hajxy quia'a jagä judíospä. ¹⁶ Mänit hajxy jaduñ quiümädowa'añ coo ja'a Dios ja'a Jesucristo hänajty yaa quiejxtägatsa'añ hädaa yaabä naaxwiin. Mänitä jäya'ayhajxy yhixa'añii ja'a Jesucristäm nebiaty hajxy hänajty yaa tøø jiatcø'øy. Mänit hajxy yagjahmiejsta'aga'añii nebiaty hajxy hänajty tøø wyiinmahñdyhaty hamee'ch. Jadhñä Diosmädia'agy miäna'añ ja'a Jesucristocøxpä, ja'ačh nyajwa'xypä.

¹⁷ Højts judíoshajpä, naxy højts nniguiumayii coo højts njudiošaty, coo højtsä mädia'agy nmäböcy ja'a Moisés jecy quiujahyyäbä. Jaduñ højts nniguiumáayyäbä coo højtsä Dios tøyhajt xqui'uughaty, højtsyähajtiä, højts judíoshajpä. ¹⁸ Nnajuøøby

højts jaduhñ nebiatiä Dios jioot chocy coo højts nhoyhäna'c-hádät. Y ja'a mädia'agy ja'a Moisés jecy quiujáhyyäbä, je'e højts jaduhñ xyhawáanäp neby højts nwiimbíwät tii hoy tii mäbaad. ¹⁹⁻²⁰ Niyhajuóøyyäp højts coo højts häna'c hoy nyajnáhixø'owa'añ, ja'a häna'cä Diosmädia'agy hajxy ca'a jajpä ca'a najuøobiä. Jim højtsä tøyhajt nbaady maa ja'a mädia'aguiän, ja'a Moisés jecy quiujáhyyäbä. ²¹ Hoorä, coo højts häna'c jaduhñ nyajnáhixø'oy ja'a Diosmädia'agy, hahixøøby jaduhñ coo højtsä Diosmädia'agy hoy ngudiúnät. Cábøçhä nmägunaaxhajxy näje'e hoy quiudiuñ. Y coo højts häna'c nmägapxy nhane'emy coo hajxy quia'a méedsät, hahixøøby jaduhñ coo højts nga'a mée'tspät. Jaduhñhøçhä nmägunaaxhajxy näje'e jiatcø'oy. ²² Y coo højts häna'c nmägapxy nhane'emy coo wiinghäna'cä tio'oxiøjc hajxy quia'a møødtsánáayyät, cab jaduhñ yhahixø'oy coo højts jaduhñ njatcøøbiät. Jaduhñhøçhä nmägunaaxhajxy näje'e jiatcø'oy. Cab højts quepychec naaxpoch nwiingudsähgø'oy. Pero cab jaduhñ yhahixø'oy coo højts xädø'øñ nméedsät tsajtøgooty maa ja'a quepychec naaxpoch yhitiän. Jaduhñhøçhä nmägunaaxhajxy näje'e jiatcø'oy. ²³ Niguiumáayyäp højts jaduhñ coo højtsä mädia'agy nmäböcy ja'a Moisés jecy quiujáhyyäbä. Pero näje'eçhä nmägunaaxhajxy, cab hajxy hoy quiudiuñ. Jaduhñ hajxy yajcähxø'ogy coo ja'a Dios hajxy tøyhajt quia'a wiingudsähgø'oy. ²⁴ Jaduhñ jim myiñ cujaay maa ja'a Diosmädia'aguiän: "mijts judíoshajpä, coo ja'a Diosmädia'agy hajxy hoy mga'a cudiuñ, paadiä Dios haxøøgjaty ñáhojyii ja'a häna'c-hajxy ca'a judíospä." Tøyhajt jaduhñ.

²⁵ Højts, judíos højts nmäminø'oy nmäga'awø'oy. Mänit højtsä Dios xquiumáyät coo højtsä mädia'agy hoy ngudiúnät, ja'a Moisés jecy quiujáhyyäbä. Pero coo højts jaduhñ hoy nga'a cudiúnät, cab højtsä Dios jaduhñ xquiumaya'añ. ²⁶ Hoorä, ja'a häna'c-hajxy ca'a judíospä, coo hajxy hoy quiudiúnät nebiä Dios yhane'emiän, mänit hajxy quiumaya'añii ja'a Diósäm. ²⁷ Näje'eçhä nmägunaaxhajxy, cab hajxy hoy quiudiuñ nebiä Dios yhane'emiän, hoy hajxy judíos jia mäminø'oy jia mäga'awø'oy, hoyyá mädia'agy hajxy jia mädooyä, ja'a Moisés jecy quiujáhyyäbä. Je'ehajxy mäböcyä ca'a cumayáanäp ja'a Diósäm. ²⁸ Pønjaty hoy cudiuumb nebiä Dios yhane'emiän, je'edsä Dios quiu'ughajpy, hoy hajxy judíos quia'a jagä mäminø'oy quia'a jagä mäga'awø'oy, hoyyá hijxtahñd hajxy quia'a jagä møødä maa ja'a ñi'xcøxpahjxiän neby højts judíos nmøødän. ²⁹ Hix, coo pøn hoy quiudiúnät hamuumdu'joot nebiä Dios choquiän, mänit hajxy quiu'ughada'añii ja'a Diósäm, hoyyá judíoshajxy näje'e quia'a ja mäna'añ cooc tyijy hajxy jaduhñ quia'a cu'ughadyii ja'a Diósäm. Hix, quiumaabiä Dios jaduhñ pøn jaduhñ cudiuumb hamuumdu'joot.

3

¹⁻² Xchoobáatäp højts jaduhñ madiu'u coo højts judíos nmäminø'oy nmäga'awø'oy, coo højtsä hijxtahñd nyajpäda'agy maa højts ñi'xcøxpän, ja'a jaduhñ yajcähxø'pä coo højtsä Dios xquiu'ughaty. Tøyhajt jaduhñ. Haa ca'a, Dios højts nhap ndeedy jecy xyajcø'ødägøøyyä ja'a mädia'agy ja'a Moisés jecy quiujáhyyäbä. Mänit hajxy ñämaayyä ja'a Diósäm coog hajxy hánajty quiu'ughada'añii. ³⁻⁴ Y je'enä højtsä Dios xquiu'ughatyñä neby højts jecy xyajwiinwaanøøyyän, hoy højts nhap ndeedy nämay hoy quia'a jagä cudiuuñ neby hajxy hánajty tøø yhane'emyiijän ja'a Diósäm. Tøyhajt jaduhñ coo ja'a Dios tiømiädia'agy. Cabä Dios mänaa yhøhnda'agy, hoy hajxy nägøxiä cu nja mänaánäm cooc tyijy ja'a Dios quia'a yajtøjiaty waambaty hajxy tøø xyajwiinwaanøøyyäm. Jaduhñ jim myiñ cujaay maa ja'a Diosmädia'aguiän:

Diosteedy, hopiønä jaduhñ ñajuø'oy coo miich myajtøjiaty waambaty højts miich tøø xyajwiinwaanø'oy.

Coo miich pøn xñäxø'owø'owät cooc tyijy miich jaduhñ mga'a yajtøjiaty waambaty miich tøø mmädia'agy,

cähxø'ogaamb jaduhñ coo je'e yhøhnda'agy, ja'a miich jaduhñ xñäxø'owøøbiä.

⁵ Jaanch tehñ yhooyä Dios yhity. Pero højts, cab højts hoy nnä'ägä híjtäm. Tøyhajt jaduhñ. Paadiä, cähxø'p jaduhñ coo ja'a Dios jiaanç tehñ hoyyä. Hix, coo højts häxøpy

nhíjtäm hoy, cab jaduñ häxøpy quiähxø'øgy coo ja'a Dios jaduñ hoy jiaanč tehñ yhity. Pero jaduñä jäya'ayhajxy näje'e miäna'añ cooc tyijy ja'a Dios howyiniimahñdy quia'a møødä, je'eguiøxpä coo hajxy xyajcumädowáanäm. ⁶ Pero hahixøby jaduñ coo ja'a Dios hajxy xyajcumädowämät. Haa ca'a, coo ja'a Dios häxøpy hoy quia'a hity, cabä cuhdujt häxøpy miøødä coo hajxy jaduñ xyajcumädowämät.

⁷ Hoyyä jäya'ayhajxy näje'e jia mäna'añ cooc tyijy ja'a Dios quia'a yajtøjaty waambaty tøø quiapxy tøø miädia'agy, yajnajuøby jaduñ coo ja'a Dios tøyhajt mänaa quia'a höhnda'agy. Jaduñä jäya'ayhajxy nägøxiä ñajuø'øwa'añ coo jaduñ yhahixø'øy coo ja'a Dios hajxy nwiingudsähgøøyyämät. Pero coo pønä Dios jaduñ ñänómät cooc tyijy quia'a yajtøjaty waambaty tøø quiapxy tøø miädia'agy, hahixøby jaduñ coo je'e quiumädowät. ⁸ Näje'ečhä jäya'ayhajxy xñähøønø'øy cóogøch tyijy nmäna'añ cooc tyijy jaduñ yhahixø'øy coo hajxy haxøøg njatcøøyyämät, jaduñäc tyijy maas hoy quiähxø'øga'añ coo ja'a Dios jiaanč tehñ yhooyä. Ja'a hänä'c-høch hajxy jaduñ xñähøønøbiä, höhndaacp hajxy jaduñ. Hahixøby jaduñ coo hajxy quiumädowät.

⁹ Jaanä jaduñ højts judíos, cab højtsä Diosmädia'agy maas hoy ngudiuñ quejee ja'a hänä'c-hajxy ca'a judíos. Haa ca'a, tøøch nhuuc mänaambä coo hajxy jaduñ hoy nga'a nä'ägä hojiäya'ayhajtäm, coo ni pønä Diosmädia'agy hoy quia'a nä'ägä cudiuñ, ni højts judíos, ni ja'a hänä'c-hajxy ca'a judíos. Hamdsoojoot hajxy jaduñ hoy nga'a jäya'ayhajtäm. ¹⁰ Jaduñ jim myiñ cujaay maa ja'a Diosmädia'aguian:

Ni pøn hoy quia'a wädity.

¹¹ Ni pøn jaduñ quia'a wiinjuø'øwa'añ nebiä Dios wyiinmahñdyhatiän.

Ni pønä joot quia'a päda'agy maa ja'a Diosän.

¹² Tøø ja'a jäya'ayä Diosmädia'agy hajxy nägøxiä ñajtshixøñä.

Cøjnøø cøjtu'u hajxy tøø piadu'ubøjnä.

Haxøøg hajxy jäya'ayhajxy nägøxiä.

¹³ Jaanč tehñ yhaxøøg hajxy quiapxy miädia'agy.

Jaduñä yhaawhajxy tiocxuugy nebiä ho'oguiäya'ajiut tiocxuuguiän, ja'a tøø yhawá'ačhäbä.

Jaanč tehñ yhöhndaacp hajxy. Jaduñä haxøøgpä hajxy yaghity yhaawjooty nebiä haxøøgtsahñdyhaawän.

Jaanč tehñ miägapxpoj hajxy.

¹⁴ Jaanč tehñ quiapxtägooby hajxy hoñejpiä nebiä joot hajxy yajmädsoquiän. Jaanč tehñ yhaxøøg hajxy ñiñänømyii.

¹⁵ Jaanč tehñ piaquiä jootma'ad hajxy piaadyii, mänitä miäya'adiøjc hajxy nøcxy yagho'oga'añ.

¹⁶ Jaanč tehñ chipyajpædø'p hajxy majaty hajxy wiädity. Chaächtiumbiä cu'ug hajxy jaduñ.

¹⁷ Jaanč tehñ chiptsojp hajxy.

¹⁸ Cab hajxy tiajy miay pø yajcumädowáanäbä Dios hajxy.

¹⁹ Jaduñds je'e, yajcumädowaambiä Dios ja'a jäya'ay nägøxiä, pønä miädia'agy hoy ca'a cudiuñäp, møød højts judíos, møødä hänä'c-hajxy ca'a judíos. Højts judíos, højtsä pojpa nmaas møød, je'eguiøxpä coo højtsä Dios ja'a nhapä ndeedy jecy xjia hanehmä coo hajxy haxøøgjaty quia'a jatcø'øwät nébiøch naamnä tøø ngujaayän. Pero cab højts jaduñ nnä'ägädä cudiuña'añ. ²⁰ Jéquiänä Dios ja'a Moisés yhanehmy coo ja'a miädia'agy quiujähyyäxät. Jaduñ hajxy nnajuøøyyäm coo hajxy nägøxiä hoy nga'a jäya'ayhajtäm. Ni pøn jaduñ hoy quia'a cudiuña'añ ja'a Diosmädia'agy. Coo ja'a Jesucristo hajxy tøø xñähho'túutäm, paadiä Dios hajxy xpiäda'agáanäm hawa'adstuum, caj jie'eguiøxpä cooc tyijy ja'a mädia'agy hajxy hoy ngudiúunäm, ja'a Moisés jecy quiujähyyäbä.

²¹⁻²⁶ Hoorä, nnajuøøyyäm hajxy jaduñ coo hajxy nägøxiä haxøøg njatcøøyyäm, mäduhñtiä hajxy yaa ndsänaayyäm hädaa yaabä naaxwiin, møød højts judíos, møødä hänä'c-hajxy ca'a judíos. Cabä Dios pøn nä'ägädä cumay. Jaduñä jäya'ayhajxy näje'e

miäna'añ cooc tyijy hajxy piäda'aga'añii hawa'adstuum coogä jecymiädia'agy hajxy hoy quiudiúnät, ja'a Moisés jecy quiujáhyyäbä. Pero tøø hajxy nhíjxäm coo ni pøn jaduhñ quia'a päda'aga'añii hawa'adstuum. Hoorä, jéquiänä Dios wyiinmaayy coo ja'a yHuung hänajty yaa quiexa'añ maa højtshájtäm. Mayhajtä Dios hänajty tiunaamby maa højtshájtäm. Jaduhñ hajxy hänajty xpiäda'agáanäm hawa'adstuum. Jim jaduhñ myiñ cujaay maa ja'a jecymiädia'aguiän, ja'a Moisés jecy quiujáhyyäbä. Pero cabä jecyjiäya'ayhajxy hänajty wyiinjuø'oy. Hojiootä Dios miøød coo ja'a jecyjiäya'ayhajxy quia'a pädaacä haxøøgtuum, hoy hänajty jia hawiinmatsä coo hajxy jim cu piädaacä, je'eguiøxpä coo hajxy hänajty haxøøg jiatcø'oy. Paadiä Dios ja'a yHuung ñähdujcy, jaduhñä jäya'ayä piojpä quiädieey hajxy ñähwá'adsät. Jaduhñ quiähxø'ogy coo ja'a Jesucristo ja'a jecyjiäya'ay yajnahwaach ja'a piojpä quiädieeyhajxy. Høxtä jäda'anäbaadyñä ja'a Dios hajxy xyajwiinjuøyyäm neby hajxy xpiädáacäm hawa'adstuum. Jaanä jaduhñ hajxy xyajwiinjuøyyämbä coo hajxy piäda'aga'añii haxøøgtuum pønjaty haxøøg jatcø'oby jäda'ahaty. Paadiä Dios ja'a yHuung ñähdujcy, ja'a Jesucristo, neby hajxy jaduhñ xñähho'túutämät. Y coo hajxy jaduhñ nmäbøjcämät coo ja'a Jesucristo hajxy tøø xjiaançh nähho'túutäm, jaduhñä Dios ja'a nbojpä ngädieey hajxy xyajnahwáatsäm, jaduhñ hajxy xpiädáacäm hawa'adstuum, hopiønä, møød højts judíos, näguipxy møødä häna'c-hajxy ca'a judíospä. Mayhajtä Dios jaduhñ tiuun maa højtshájtäm coo hajxy jaduhñ xpiädáacäm hawa'adstuum.

²⁷⁻²⁸ Cab jaduhñ yhawiinmatsä coo hajxy hamdsoo nniguiumáayyämät. Hiç, coo hajxy nmäbøjcämät coo ja'a Jesucristo hajxy tøø xñähho'túutäm, paadiä Dios hajxy xpiäda'agáanäm hawa'adstuum, hoy hajxy nga'a jagä panócxäm nebiä Moisés jecy quiujahyyän. Coo ja'a Dios hajxy häxøpy xpiädáacäm hawa'adstuum je'eguiøxpä coo ja'a jecymiädia'agy hajxy ngudiúunäm, ja'a Moisés jecy quiujáhyyäbä, mänit hajxy mäbøcy cu nniguiumáayyäm hamdsoo. Pero caj pøn jaduhñ piäda'aga'añii hawa'adstuum hamdsoohaam.

²⁹⁻³⁰ Tu'uquiä Dios jaduhñ. Tu'cuhdujtä Dios hajxy xyhíjxäm nägøxiä, møød højts judíos, møødä häna'c-hajxy ca'a judíospä. Tøyhajt jaduhñ. Coo hajxy nägøxiä nmäbøjcämät coo ja'a Jesucristo hajxy tøø xñähho'túutäm, paadiä Dios hajxy jim xpiädáacämät hawa'adstuum nägøxiä. ³¹ Pero cábøch nmäna'ana'añ coo ja'a jecymiädia'agy quia'a tøyyä, ja'a Moisés jecy quiujáhyyäbä, hoy hajxy nja wiinjuøyyänä coo ja'a Jesucristo hajxy xpiädáacäm hawa'adstuum mänaa hajxy tøø xñähho'túutäm. Hiç, maas hoy hajxy jaduhñ nwiinjuøyyänä coo ja'a jecymiädia'agy jaduhñ jiaançh tøyyä, ja'a Moisés jecy quiujáhyyäbä. Coo hajxy nmäbøjcämät coo ja'a Jesucristo hajxy tøø xñähho'túutäm, paady hajxy xpiädáacäm hawa'adstuum, caj jie'eguiøxpä cooc tyijy ja'a jecymiädia'agy hajxy jaduhñ hoy ngudiúunäm. Tøø hajxy jaduhñ nwiinjuøyyänä coo jaduhñ tiøyhajtä.

4

¹ Højts judíos, højtsä Abraham jecy nhaphajt ndeedyhajt. ² Hoyyä Abraham hijty jiäya'ayhaty jegyhajty. Hoorä, coo ja'a Dios ja'a Abraham häxøpy tøø piäda'agy hawa'adstuum je'eguiøxpä coo ja'a Abraham hoy jia jäya'ayhajty, mänitä Abraham cu ñiguiumaayyä. ³ Hiç, paadiä Dios ja'a Abraham piädaacy hawa'adstuum, coo ja'a Abraham ja'a Dios miädia'agy miäbøjcä cooc ja'a Dios yajtøjiaty waambaty tøø quiapxy tøø miädia'agy, ca'a jie'eguiøxpä coo ja'a Abraham hoy jiäya'ayhajty. Jaduhñ jim myiñ cujaay maa ja'a Diosmädia'aguiän. ⁴ Hoorä, ja'a cuduumädøjc, paady hajxy miäjuyii coo hajxy quiuduñ, cab jaduhñ ñä'a mayhajtä. Jaduhñ miäbaady nebiä jäya'ayhajxy näje'e wyiinmahñdyhatiän. Yajcumayaamb hajxy ja'a Diósäm, paady hajxy jia wil'i yhojiäya'ayhada'añ. ⁵ Pero pønjaty tøø miäbøcy coo ja'a Dios yajtøjiaty waambaty tøø quiapxy tøø miädia'agy, je'edshajxy jaduhñ hawa'adstuum päda'agáanäp. Paady hajxy jim piäda'aga'añii coo hajxy jaduhñ miäbøcy, ca'a jie'eguiøxpä coo hajxy hoy jia jäya'ayhaty. Jim hajxy jaduhñ piäda'aga'añii, hoy hajxy haxøøg tøø jia jatcø'oy.

Tiuumbiä Dios mayhajt jaduñ. Coo ja'a Dios hajxy häxøpy xpiädáacäm hawa'adstuum je'eguiøxpä cooc tyijy hajxy hoy njäya'ayháltäm, cab hajxy häxøpy nmänánäm cooc ja'a Dios mayhajt tiuñ. ⁶ Jaduñä David jecy miänaañ cooc hajxy jootcujc yhida'añ, pønjaty jaduñ najuøby coo ja'a Dios hajxy xpiädáacäm hawa'adstuum ja'a miayahajthaam, hoy hajxy hänajty haxøøg tøø jia jatcø'øy. Hiñ, cabä Dios miøjpäda'agy pø cabä häna'c hänajty hoy tøø jiäya'ayhaty.

⁷⁻⁸ Coo jaduñ yhabáatnät coo Dios ja'a jäya'ay yajtøyhajtyega'añ nebiaty hajxy hänajty tøø quiädieeyän,

mänit hajxy jootcujc yhida'añ pønjetiä Dios piädaacypy hawa'adstuum, pønjetiä Dios miee'xyp,

pønjetiä piojhajpiä ja'a quiädieeyhajpiä hajxy yajnahwáatsäxä,

nømä David jecy miänaañ.

⁹ Jue'e ja'a David jecy nänøøm cooc hajxy jootcujc yhida'añ, pønjetiä Dios piädaacypy hawa'adstuum, hopiønä, møødä judíoshajxy, ja'a Dios quiu'ughajpiä, møødä cajpä judíoshajxy. Je'edshajxy ca'a cu'ugháltäp ja'a Dios. Hiñ, jaduñ myiñ cujaay maa ja'a Diosmiädia'aguiän: "Coo ja'a Abraham ja'a Dios miädia'agy miäbøjcä cooc ja'a Dios mänaa quia'a hønnda'agy, paady piädaacä hawa'adstuum."

¹⁰ Hoorä, jaduñä judíoshajxy quiuhdujthaty, yajcircuncidarhajpä ya'adiøjc-hajxy. Jaduñ miädia'agytiägø'øy coo hijxtahnd hajxy piädáacäxä maa ja'a ñi'xcøxpahajxiän. Hoorä ja'a Abraham, tøøyyäm hänajty je'e piädáacänä hawa'adstuum, cajnä hijxtahnd hänajty jaduñ piädáacäxä maa ja'a ñi'xcøxpän. Jaduñä tøyhajt hajxy nmøødháltäm coo häna'c-hajxy piäda'agyii hawa'adstuum je'eguiøxpä coo ja'a Dios miädia'agy hajxy miäbøjcä cooc ja'a Dios yajtøjiaty waambaty je'e tøø quiapxy tøø miädia'agy, hoyyä hijxtahnd hajxy quia'a jagä møødä maa ja'a ñi'xcøxpahajxiän. ¹¹ Paadiä Abraham hijxtahnd jaduñ piädáacäxä maa ja'a ñi'xcøxpän, jaduñ yajnajuo'øy coo ja'a Abraham hänajty tøø piäda'agyii hawa'adstuum. Paady jim piädaacä coo ja'a Dios ja'a miädia'agy hänajty tøø miäbøjcäxä. Jaduñä Abraham piädaactsohñä hawa'adstuum, hoyyä hijxtahnd hänajty jaduñ quia'a jagä pädaacäxänä maa ja'a ñi'xcøxpän. Pønjaty jaduñ mäbøjp nebiä Abraham jecy miäbøjquiän, jaanä jaduñ hajxy yhixáanäbä ja'a Dios nebiä Dios ja'a Abraham jecy yhiixiän, hoy hajxy quia'a jagä judíospä. Coo hajxy jaduñ nmäbøjcäm nebiä Abraham jecy miäbøjquiän, jaduñ quiähxø'øgy coo ja'a Abraham hajxy nhøjxháltäm ndecyháltäm. ¹² Højts judíoshajxy, højtsä Abraham jecy nhaphajt ndeedyhajt. Jaaya'ay jaduñ pädaactsohñä hawa'adstuum je'eguiøxpä coo jaduñ miäbøjcy coo ja'a Dios yajtøjiaty waambaty hänajty tøø quiapxy tøø miädia'agy. Tøyhajt jaduñ. Højts judíos, jaduñ højts nyajcircuncidarhaty nebiä Abraham jecy yajcircuncidarhajtän. Pero tøøyyämä Abraham ja'a Dios ja'a miädia'agy hänajty miäbøjcä, cahnä hänajty yajcircuncidarhaty. Højts judíos, højts jaduñ mäbøjpä, jaanä jaduñ højts nmäbøjpä nebiä Abraham jecy miäbøjquiän. Jaduñä tøyhajt hajxy nmøødháltäm coo højtsä Abraham jecy nhøjxhajty ndecyhajty, coo højts jaduñ nmäbøcy, højts judíos.

¹³ Jéquiänä Dios ja'a Abraham nãmaayy cooc hänajty yaa miähane'ema'añ hädaa yaabä naaxwiin näguipxy møødä yhap møødä yhoc. Ja'a Dios jaduñ mänaañ. Paadiä Abraham jaduñ nãmaayyä je'eguiøxpä coo ja'a Abraham ja'a Dios miädia'agy hajxy miäbøjcä, ca'a jie'eguiøxpä cooc tyijy ja'a Abraham jia cudiuuñ nebiaty hänajty tøø yhane'emyii. Pero coo ja'a Abraham jaduñ miäbøjcy coo ja'a Dios yajtøjiaty waambaty hänajty tøø quiapxy tøø miädia'agy, paadiä Abraham jaduñ nãmaayyä coo ja'a Abrahamhajxy hänajty yaa miähane'ema'añ hädaa yaabä naaxwiin, møødä yhaphajxy, møødä yhoc-hajxy. ¹⁴ Haa ca'a, jaduñä Dios miänaañ cooc hajxy yaa miähane'ema'añ hädaa yaabä naaxwiin pønjaty jaduñ mäbøjp coo ja'a Dios yajtøjiaty waambaty hänajty tøø miäna'añ. Jaduñ miädia'agytiägø'øy coo ja'a Dios ja'a hoybä weenbä hajxy xmio'owáanäm je'eguiøxpä coo hajxy jaduñ nmäbøjcäm. Pero coo ja'a hoybä weenbä hajxy häxøpy nbáatäm je'eguiøxpä coo ja'a jecymiädia'agy hajxy hoy ngudiúunäm, ja'a Moisés jecy quiujáhyäbä, cab jaduñ cu choobaaty coo ja'a Dios hajxy jaduñ tøø xñamáayyäm coogä

mayhajt hänajty tiuna'añ coo ja'a hoybä weenbä hajxy xmio'owáanäm. Ni jaduñ cu quia'a tsoobaaty coo hõjts cu nmäbõjcam coo ja'a Dios jaduñ yajtõjiaty waambaty tõõ quiapxy tõõ miädia'agy. ¹⁵ Hix, cabä jecymiädia'agy hajxy hoy ngudiúunäm, ja'a Moisés jecy quiujáhyäbä. Coo hajxy jaduñ nga'a cudiúunäm, paady hajxy ngädiéhyäm. Y paady jaduñ yhahix'õy coo hajxy ngumädóowämät. Pero pønjaty ja'a jecymiädia'agy tõõ quia'a mäday, ja'a Moisés jecy quiujáhyäbä, cab hajxy jaduñ quiumädowa'añ, hoy hajxy tõõ quia'a jagä tuñ nebiä Moisés jecy yhanehmiän.

¹⁶ Coo ja'a Abraham jaduñ jecy miäbõjcä ja'a Dios miädia'agy coo ñämaayyä coogä Abrahamhajxy hänajty yaa miähane'ema'añ hädaa yaabä naaxwiin, mõödä yhap mõödä yhoc-hajxy, paadiä tøyhajt hajxy nmõõdhájtäm coo ja'a Dios ja'a hoybä weenbä hajxy nägõxiä xmio'owáanäm nä'a mayhajt, coo ja'a Abraham hajxy nbamäbõjcamät coo ja'a Dios yajtõjiaty waambaty tõõ miäna'añ, mõöd hõjts judíos, mõöd mijts ca'a judiõspä. Coo ja'a Abraham hajxy jaduñ nbamäbõjcamät, jaduñ mäwiin hajxy nägõxiä xya-jmäbáatäm nebiä Abraham hajxy xyhaphájtäm xyhoc-hájtäm. Jaduñ quiähxõ'õgy coo ja'a Abraham hajxy nhõjxhájtäm ndecyhájtäm. ¹⁷ Hix, jaduñ jim myiñ cujaay maa ja'a Diosmädia'aguiän cooc ja'a Dios ja'a Abraham piädaacy coo ja'a jäya'ayhajxy mayhagajtpä yhaphat yhoc-hadõõjät ja'a Abraham. Y miäbõjcä ja'a Abraham jaduñ coo jaduñ ñämaayyä coogä tio'oxiõjc hänajty quio'na'awa'añ, hoy hajxy hänajty tõõ jia miäjaanä. Paadiä Abraham jaduñ miäbõjcy, ñajuõõby hänajty jaduñ coo ja'a Dios mäjaa miõödä coo ja'a ho'oguiäya'ay yagjujypiojtagátsät, y coo mäjaa miõödäbä coo ja'a jäya'ay quiunúu'xät ja'a hajxy hänajty ca'a miimb ca'a cahbnä. Y coo ja'a Abraham hajxy jaduñ nbamäbõjcam, jaduñ mäwiin hajxy nmäbáatäm nebiä Abraham hajxy xyhaphájtäm xyhoc-hájtäm. Jaduñ quiähxõ'õgy coo ja'a Abraham hajxy nhõjxhájtäm ndecyhájtäm.

¹⁸⁻²¹ Coo ja'a Dios ja'a Abraham jaduñ jecy ñämaayy coogä mayhagajtpä-jäya'ayhajxy hänajty yhaphada'añ tieedyhada'añ ja'a Abraham, tõõ ja'a Abrahamhajxy hänajty miäjaanä mõödä tio'oxiõjc. Mägo'x-jomõjtä Abraham hänajty miõödä. Y ja'a tio'oxiõjc, ja'a Sarahajpä, cahnä hänajty ñä'ägädä huungpaadyñä, hoyyä jomõjt hänajty tõõ jia nõcxnä coo yhuungpaadät. Pero cabä Abraham jaduñ ñä'ägädä mõjppädaacy coo hajxy hänajty tõõ miäjaanä. Hamuumdu'jootä Abraham jaduñ miäbõjcy nägõ'õ nädecypiä neby hänajty tõõ ñäma'ayijän ja'a Diósäm coog hänajty jäya'ay may yhaphat yhoc-hada'añii. Paady jaduñ tiõjiajty. Jaduñ jim myiimbä cujaay maa ja'a Diosmädia'aguiän cooc ja'a Abraham yhap yhoc-hajxy hänajty jiaanč tehñ miayõ'õwa'añ. Paadiä Abraham jaduñ miäbõjcy, ñajuõõby hänajty jaduñ coo ja'a Dios mäjaa miõödä coo jaduñ yajtõjiädät waambaty hänajty tõõ quiapxy tõõ miädia'agy. Mänitä Abraham ja'a Dios jaduñ mõjppädaacy jiaančpädaacy. ²² Coo ja'a Abraham jaduñ miäbõjcy, paady hawa'adstuum piädaacä.

²³ Jaduñ jim myiñ cujaay maa ja'a Diosmädia'aguiän coo ja'a Abraham piädaacä hawa'adstuum je'eguiõxpä coo ja'a Dios miädia'agy miäbõjcäxä coogä Dios yajtõjiaty waambaty tõõ quiapxy tõõ miädia'agy. ²⁴ Jaanä jaduñ hõjtsä Diosmädia'agy xñänõõmambä. Coo ja'a Dios ja'a miädia'agy hajxy jaduñ nmäbõjcamät, jaduñnä Dios hajxy xpiädáacambät hawa'adstuum, je'eguiõxpä coo ja'a Dios ja'a Jesucristo yagjujypiojtagajch. Ja'a Jesucristo, je'e hajxy nWiindsõnhájtäm. ²⁵ Jaaya'ay jaduñ nähdujcä coo hajxy xñähho'túutäm. Jaduñnä nbojphájtäm ja'a ngädieeyhájtäm hajxy xyajnáhwáatsäm. Y coo ja'a Jesucristo jaduñ yagjujypiojtagajtsä, jaduñ hajxy nmäh-mõõyyänä hawa'adstuum.

5

¹ Hoorä, coo hajxy nmäbõjcam coo ja'a Jesucristo hajxy tõõ xñähho'túutäm, paadiä Dios hajxy tõõ xyajnáhwáatsäm ja'a nbojphájtäm ja'a ngädieeyhájtäm. Paady hajxy xpiädáacäm hawa'adstuum. Jootcujcä Dios hajxy jaduñ xmiõõdhájtäm. ² Coo ja'a Jesucristo hajxy jaduñ tõõ xñähho'túutäm, coo je'e jiuujypiojtagajch, paadiä Dios

hajxy xquiumáayyänä. Paady hajxy nxoondáacäm. Y coo jaa tøyhajt hajxy jaduhñ nmøødhájtäm coo ja'a Dios hajxy jim xyajnøcxáanäm maa ja'a wyiinduumän, paady hajxy jootcujc nhíjtäm. ³⁻⁴ Jaaná jaduhñduhmbä, xoondáacäm hajxy hädaa yaabä naaxwiin, hoy hajxy yaa nja tsaachpójcäm. Coo hajxy nmee'xtújcämät, jaduhñä Diosmädia'agy hajxy hoy ngudiúunämät. Y coo hajxy jaduhñ hoy ngudiúunämät, jaduhñä tøyhajt hajxy nmøødhadaanäm coo ja'a Dios hajxy jim xyajnøcxáanäm maa ja'a wyiinduumän. Coo hajxy jaduhñ nnajuóøyyäm coo hajxy jim xyajnøcxáanäm, paady hajxy yaa nxoondáacäm, hoy hajxy yaa nja tsaachpójcäm. ⁵ Coo ja'a Dios jaduhñ miäna'añ coog hajxy jim xyajnøcxáanäm maa ja'a wyiinduumän, yejpiä Dios ja'a tøyhajt jaduhñ. Cab hajxy jaduhñ xwyiinhóhñäm. Hix, tøø ja'a Dioshespíritu hajxy xyhadägøøyy xjioottägøøyyäm. Jaduhñ hajxy xyajnajuóøyyäm coo hajxy xjiaanč tehñ chójcäm hamuumdu'joot.

⁶ Coo ja'a Dios yajnähdiij coo hänäjty tøø yhabaatnä, mänitä Jesucristo hajxy hoy xñähho'túutäm. Jaduhñä nbojhájtämä ngädieeyhájtäm hajxy xyajnähwáatsäm. Cab hajxy hänäjty hoy nnähwa'adsáanäm hamdsoo je'eguiøxpä coo hajxy hänäjty ngahwiindøyhájtäm. ⁷ Hix, caj miich pøn xchoj nähho'tú'udät, hoy miich hänäjty mja hojiäya'ayhaty. ⁸ Pero ja'a Dios hajxy xjiaanč tehñ chójcäm, paadiä Jesucristo hajxy hoy xñähho'túutäm, hoy hajxy hänäjty nja cuboj nja cugädieeyhájtäm. ⁹ Hoorä, coo ja'a Jesucristo hajxy tøø xñähho'túutäm, coo ja'a Dios hajxy tøø xpiädáacäm hawa'adstuum, jaduhñä tøyhajt hajxy nmøødhájtäm coo ja'a Dios hajxy xquia'a yajcumädozáanäm. ¹⁰ Coo hajxy hijty cøxypänejpiä njäya'ayhájtäm, jaduhñ mäwiin hijty piaady néjjiäm coo ja'a Dios hajxy hijty nmädsiphájtäm. Pero coo ja'a yHuung Jesucristo hajxy hoy tøø xñähho'túutäm, ja'a hajxy nWiindsønähájtämbä, paady cabä Dios hajxy nmädsiphájtänä. Hoyyä Dios hajxy xyhuunghájtänä. Tu'ugjoot tu'ugwiinmahñdiä Dios hajxy nmøødhájtänä. Y coo ja'a Jesucristo jiuypiojtägajch, coo jim ñøcxtägajch maa ja'a Tieediän, jaduhñä tøyhajt hajxy nmøødhájtäm coo hajxy jim xyajnøcxáanämbä. ¹¹ Jaduhñä tøyhajt hajxy nmøødhájtämbä coo ja'a Dios hajxy xquiumáayyänä. Paady hajxy jaduhñ xquiumáayyänä coo ja'a Jesucristo ja'a nbojpä ngädieey hajxy tøø xyajnähwáatsäm. Tsøcxä hajxy jaduhñ xoondáacäm.

¹² Hoorä, tu'jäya'ay jecy quia'a cudiuundsohñ neby hänäjty tøø yhane'emyiijän ja'a Diósäm. Ja'a Adánhöch jaduhñ nnänøømby, ja'a hajxy jecy nhaphájtäm ndeedyhájtäm. Jaduhñä pojpä cädieey yaa chohñdaacy hädaa yaabä naaxwiin. Y coo ja'a Adán jaduhñ jecy quiädiehy, paady jaduhñ yhuuc ho'tsohmbä. Y coo ja'a Adán hajxy jaduhñ jecy nhaphájtäm ndeedyhájtäm nägøxiä, paady hajxy nbagädiéhyyäm, paady hajxy nbahó'cäm. ¹³⁻¹⁴ Høxtä jecyjiäya'abiaady hajxy haxøøg jiäya'ayhajty, paady hajxy nägøxiä yho'cy, hoyyä Moisés hänäjty quia'a jagä miññä, quia'a jagä ca'ayñä, hoyyä Dios hänäjty quia'a jagä hane'emyñä coo ja'a jäya'ayhajxy hoy jiäya'ayhädät nebiä Moisés jecy quiujahyyän, hoy hajxy hänäjty quia'a jagä pagädiehbiä nebiä Adán hänäjty tøø quiädieeyän. Hoyyä Dios hänäjty quia'a jagä hane'emyñä coo ja'a jäya'ayhajxy hoy jiäya'ayhädät, nägøxiä jäya'ayä pojpä cädieey hajxy hänäjty miøødá. Y ja'a Adán, jaduhñ je'e jecy ñämaayyä cooc hänäjty yho'oga'añ, pø cab hänäjty jaduhñ quiudiuna'añ nebiä Dios hänäjty tøø yhane'emiän. Y coo ja'a Moisés jaduhñ cujecy quiujahy nebiatiä Dios hänäjty tøø yhane'emiän, jaduhñä jäya'ayhajxy nägøxiä ñämáayyäbä coogä Adán hajxy hänäjty nägøxiä piaho'ogaambä, pø cab hajxy hänäjty quiudiuna'añ nebiä Dios hänäjty tøø yhane'emiän. Ja'a jecyjiäya'ayhajxy hänäjty jiiä, cahnä Moisés hänäjty quiujaayñä nebiatiä Dios hänäjty tøø yhane'emy, cab hajxy hänäjty jaduhñ nämay ñajuø'øy coo hajxy hänäjty yho'oga'añ, pø haxøøg hajxy hänäjty jiäya'ayhaty.

¹⁵ Coo ja'a Adán ja'a Dios miädia'agy jaduhñ jecy quia'a cudiuunä, paady hajxy nägøxiä nhó'cäm. Pero coo ja'a Jesucristo ja'a Tieediä miädia'agy jaduhñ quiudiunä, paady hajxy nnähwaats nguhwáatsäm. Coo ja'a Jesucristo hajxy jaduhñ hoy xñähho'túutäm, paadiä Dios hajxy xpiädáacäm hawa'adstuum. Møjmayhajtä Dios jaduhñ tiuun maa højtshájtäm, pønjetiä miädia'agy tøø miäbøjcä ja'a Jesucristocøxpä. Paady

hajxy jim xyajnoxcáanäm maa ja'a wyiinduumän. ¹⁶ Coo ja'a Jesucristo hajxy hoy tøø xñähho'túutäm, jaduhñä tøyhajt hajxy nmøødhájtäm coo ja'a nbojpä ngädieey hajxy jaduhñ xyajnáhwáatsäm nägøxiä, pønjaty tøø miäböcy ja'a Jesucristocøxpä. Paadiä Dios hajxy xpiädáacäm hawa'adstuum. Paady hajxy jim xyajnoxcáanäm maa ja'a wyiinduumän. ¹⁷ Jaduhñds je'e, coo ja'a Adán ja'a Dios miädia'agy jecy quia'a cudiuunä, paady hijty yhawiinmatsä coo ja'a Dios hajxy xpiädáacämät haxøøgtuum. Pero tøø ja'a Jesucristo hajxy xyajnáhwaats xyajcuhwáatsäm. Møjmayhajtä Dios jaduhñ tiuun. Paadiä Dios hajxy xquia'a päda'agáanäm haxøøgtuum, pønjaty hawa'adstuum. Y paady højtsä hoyhajtä weenhajt yaa nbaadäänäm hädaa yaabä naaxwiin je'eguiøxpä coo ja'a Jesucristo hajxy tøø xyajnáhwaats tøø xyajcuhwáatsäm.

¹⁸⁻¹⁹ Mänaa ja'a Jesucristo yaa yhitiän hädaa yaabä naaxwiin, ca'xiä Tieediä miädia'agy quiudiuunä mäduhñtiä yaa yhijty. Y coo hajxy jaduhñ xñähho'túutäm, ja'a Tieediä miädia'agy jaduhñ quiudiuunä. Jaduhñ hajxy xyajnáhwáatsäm. Coo hajxy jaduhñ nmäböjcämät coo ja'a Jesucristo hajxy tøø xjiaančh nähho'túutäm, mänitä Dios hajxy xpiädáacämät hawa'adstuum. Hoorä, ja'a Adán, haxøøg je'e jecy jiäya'ayhajty. Cabä Adán ja'a Dios miädia'agy jecy ñä'ägädä cudiuunä. Y coo ja'a Adán hajxy jecy nhaphájtäm ndeedyhájtäm, paadiä Dios miädia'agy hajxy nga'a nä'ägädä cudiunáanämbä. Coo hajxy jaduhñ nga'a cudiunáanäm, paady hijty yhawiinmatsä coo ja'a Dios hajxy jiiby cu xpiädáacäm haxøøgtuum. Pero coo ja'a Jesucristo hajxy tøø xñähho'túutäm, paady hajxy jim xyajnoxcáanäm Dioswiinduum. Jaduhñä Dios mayhajt mõj jiaančh tehñ tiuun maa højtshájtäm.

²⁰⁻²¹ Coo ja'a Dios jecy yhanehmy coo ja'a jäya'ayhajxy hoy jiäya'ayhädät, mänitä Moisés jaduhñ quiujahy. Y coo ja'a nocy hajxy ngápxämät, ja'a Moisés jecy quiujáhyyäbä, jaduhñ hajxy nnajuøøyyämät coo hajxy njaančh cädiéhyyäm. Hoy hajxy jaduhñ nja najuøøyyäm, cab hajxy nmäböjcäm. Pero xjiaančh tehñ ñäxúu'tsämä Dios. Paadiä mõjmayhajt jiaančh tehñ tiuun maa højtshájtäm. Jaduhñds je'e, coo hajxy ngädiéhyyäm, paady hajxy nhó'cäm. Pero coo ja'a Dios hajxy xñäxúu'tsäm, paadiä Jesucristo hajxy hoy xñähho'túutäm, ja'a hajxy nWiindsønähájtämbä. Jaduhñä Dios hajxy xpiädáacäm hawa'adstuum. Mänit hajxy xyagjugyhadäänäm cøjxta'axiøø nebiä Dios jiugyhatiän.

6

¹ Cab jaduhñ ñä'ägädä hahixø'øy coo hajxy nmänáanämät: "Tsøg hajxy cädiéhyyäm tehngajnä. Haa ca'a, tehngajnä Dios hajxy xñäxuudsáanäm." ² Caj pues, cab jaduhñ yhahixø'øy coo hajxy tehngajnä ngädiéhyyämät. Haa ca'a, tøø ja'a pojpä cädieey hajxy nnajtshixøøyyänä coo ja'a Diosmiädia'agy hajxy tøø nmäböjcäm ja'a Jesucristocøxpä. ³⁻⁵ Tøgä cab hajxy nnajuø'øyä coo ja'a Jesucristo hajxy nmøødhájtäm tu'ugjoot tu'ugwiinmahñdy coo hajxy tøø nnäbéjtäm ja'a Jesucristocøxpä. Y coo hajxy jaduhñ tøø nnäbéjtäm ja'a Jesucristocøxpä, jaduhñ mäwiin piaady néjjiämä Jesucristo hajxy häxøpy näguipxy tøø nmøødhó'cäm. Jaanä jaduhñ mäwiin piaatpä néjjiämä Jesucristo hajxy häxøpy näguipxy tøø nmøødnaaxtägøøyyäm. Coo ja'a pojpä cädieey hajxy tøø nnajtshixøøyyänä, jaduhñ miädia'agytiägø'øy coo hajxy jaduhñ ween nga'a jatcøøyyänä haxøøg. Y coo ja'a Dios ja'a Jesucristo yagjujypiøjtägajch ja'a miäjaahaam, mänitä Jesucristo jugyhajt hawiinjemybiä miøødhajty. Jaanä jaduhñ højtshájtämbä, coo hajxy nnäbéjtäm, jaduhñ mäwiin piaady néjjiämä Jesucristo hajxy häxøpy näguipxy tøø nmøødjuyypiøjtägájtsäm. Paadiä jugyhajt hajxy hawiinjemybiä nmøødhájtämbä. Tøyhajt jaduhñ. Jaduhñä hojiootä howyiinmahñdy hajxy nmøødhájtämät. Jaduhñ miädia'agytiägø'øy coo ja'a Dios hajxy xyagjugyhadäänäm cøjxta'axiøø neby je'e jiugyhatiän. ⁶ Coo ja'a Jesucristo hajxy tøø xñähho'túutäm cruzcøxp, mänitä nhaxøøgwiinmahñdy hajxy quiuhdägøøyyänä nebiä haxøøgwiinmahñdy hajxy nägøxiä hijty nmøødhájtäm. Coo ja'a nhaxøøgwiinmahñdyhajxy jaduhñ quiuhdägøøyyänä, paadiä Jesucristo hajxy nmøødhájtänä tu'ugjoot tu'ugwiinmahñdy. Paady hajxy jaduhñ tøø xñähho'túutäm,

jaduhñä nhaxøøgwiinmahñdyhajxy jaduhñ quiuhdägóoyyänä. Jaduhñä njoot hajxy nga'a pädáacänät maa ja'a haxøøgpän. ⁷ Pønä Jesucristo hänajty mөөdhijp tu'ugjoot tu'ugwiinmahñdy mänaa ja'a Jesucristo yho'oguiän, cabä jioot piädaacnä maa ja'a haxøøgpän. ⁸ Coo hajxy nmäbójcäm coo ja'a Jesucristo hajxy jaduhñ tөө xñähho'túutäm mөөd coo jadähooc jiuypiojcy, jaduhñ mäwiin miäbaady néjjiäm coo ja'a Jesucristo hajxy häxøpy näguipxy tөө nmөөdjuypiojcam. Paady hajxy jaduhñ njugyhadaänäm cøjxta'axioø neby je'e jiu gyhatiän. ⁹ Coo ja'a Jesucristo jiuypiojtägajch, cab jaduhñ mänaa yho'tägatsaännä. Homiänaaxøøjä homiänaadsuujä jiu gyhada'añ. Tøyhajt jaduhñ. ¹⁰ Hix, tähoocnähho'tu'utiä ja'a Jesucristo hajxy xñähho'túutäm. Jaduhñä nbojpä ngädieey hajxy tөө xyajnáhwáatsäm. Y coo ja'a Jesucristo tөө jiuypiojtägajtsnä, paady homiänaaxøøjä homiänaadsuujä ja'a Dios miөөdhidaännä. ¹¹ Jaanä jaduhñ hөjtshajtämbä, coo ja'a Jesucristo hajxy nmөөdhjítänä tu'ugmädia'agy, tsөг hajxy jahmiejtstáacäm coo ja'a nhaxøøgwiinmahñdyhajxy tөө quiuhdägóoyyänä. Jaduhñ hajxy tsөc jahmiejtstáacämbä coo hawiinjemybiä jugyhajt hajxy nmөөdhjítänä nebiä Jesucristo hänajty miөөdhatiän mänaa jiuypiojtägachän. Paadiä Dios hajxy nmөөdhjítämbä tu'ugmädia'agy.

¹² Cab hajxy cөxpänejpiä tsөc jatcөoyyänä. Cabä njootä ngopc hajxy nbädáacänät maa ja'a haxøøgpän. ¹³ Cabä ngө'ө ndecy hajxy nyaghanájxänät, ni ja'a nhaawhajtäm. Tsөгä Diosmädia'agy hajxy hamuumdu'joot cudiúunäm. Coo ja'a Jesucristo hajxy hänajty nmөөdhjítäm tu'ugjoot tu'ugwiinmahñdy mänaa yho'oguiän, mөөd mänaa jiuypiojtägachän, paadiä Dios hajxy nmөөdhjítänä tu'ugjoot tu'ugwiinmahñdy. ¹⁴⁻¹⁵ Paadiä Dios hajxy xquiumáayyäm coo mayhajt tөө tiuñ maa hөjtshajtäm, ca'a jie'eguiөxpä coo ja'a mädia'agy hajxy nja wi'i quiudiunáanäm, ja'a Moisés jecy quiujähyyäbä. Coo ja'a Dios mayhajt jaduhñ tiuun maa hөjtshajtäm, je'eч jaduhñ nnänøөmby coo hajxy xyajnáhwaats, coo hajxy xyajcuhwáatsäm. Hoyyä Dios mayhajt jaduhñ tiuun maa hөjtshajtäm, cab jaduhñ ñäl'ägä hahixө'өy coo hajxy haxøөг njatcөoyyämät tehngajnä. ¹⁶ Tsөг hajxy paquiä mädiáacäm neby hajxy yaa nguhdujthajtäm hädaa yaabä naaxwiin. Jaduhñä cuhdujt hajxy nmөөdhjítäm coo hajxy nwiimbíiwämät pөñ jaduhñ nmädunáanäm. Y jaduhñ hajxy ngudiúunäm nebiatiä nwiindsөnhajtäm hajxy xyhanéhmäm. Jaanä jaduhñä cuhdujt hajxy nmөөdhjítämbä coo hajxy nwiimbíiwämät mädyii hajxy nyajtunáanäm, ja'a Diosmädia'agy, o ja'a nhaxøøgwiinmahñdyhajjtäm. Coo ja'a Diosmädia'agy hajxy nyajtúunämät, mäniitä Dios hajxy jaduhñ xquiumáayyämät. Pero coo ja'a nhaxøøgwiinmahñdy hajxy nyajtúunämät, cabä Dios hajxy jaduhñ nmөөdhjítämät tu'ugjoot tu'ugwiinmahñdy. Mäniitä Dios hajxy xpiädáacämät haxøөгtuum. Tøyhajt jaduhñ. ¹⁷ Dioscujú'uyäp ja'a Dios coo mijtsä Diosmädia'agy hamuumdu'joot myajtuunnä neby hajxy tөө mmäbөquiän. Cahnä Diosmädia'agy hajxy mmädoyñä, haxøөг hajxy hijty mjäya'ayhaty. ¹⁸ Coo mijts tөө mmäbөcy coo ja'a Jesucristo hajxy tөө xñähho'túutäm, paadiä mhaxøøgwiinmahñdy hajxy tөө mnajtshixө'өñä. Tөө ja'a mjoot hajxy mbäda'agy coo hajxy hamuumdu'joot mhojiäya'ayhájñät. ¹⁹ (Páadyhöch jaduhñ nmädia'agy neby hajxy yaa nguhdujthajtäm hädaa yaabä naaxwiin, jaduhñ hajxy hoy mwiinjuө'өwät. Cab hajxy jaduhyyä hoy mwiinjuө'өwa'añ.) Hijty, jaanч tehñ yhaxøөгjaty hajxy hijty mjäya'ayhaty. Cөxpänejpiä hajxy hijty mjaanч tehñ jiatcө'өy. Maas hanaxiä hajxy hänajty mjatcө'өwa'añ tehngajnä. Pero tөө ja'a Diosmädia'agy hajxy mmäbөjñä ja'a Jesucristocөxpä, paadiä Diosmädia'agy hajxy myajtuunnät nägө'ө nädecypiä.

²⁰ Coo ja'a mhaxøøgwiinmahñdy hajxy hijty myajtuñ, cabä mjoothajxy hijty chocy coo hajxy hoy mjäya'ayhádät. Coo hajxy häxøpy tөө mhojiäya'ayhaty, tөө ja'a Dios hajxy häxøpy xquiumay. ²¹ Höchähdiuunnä hajxy hijty mjatcө'өy. Cabä tii hoybä hajxy hijty mbaady. Haxøөгtuum hajxy hijty mnäl'ägädä häda'aga'añ. ²² Paadiä Jesucristo hajxy tөө xñähho'túutäm, coo ja'a mhaxøøgwiinmahñdy hajxy jaduhñ mnajtshixө'өwät. Tøyhajt jaduhñ. Paadiä Jesucristo hajxy nmөөdhijnä tu'ugjoot tu'ugwiinmahñdy. Coo ja'a mjoot hajxy hamuumdu'joot tөө mbäda'agy coo ja'a Dios hajxy mmөөdtuna'añ, paadiä hoyha-

jtä weenhajt hajxy mbaada'añ. Jaduhñ miädia'agytiägø'oy, coo mijtsä Dios hoyhäna'c xyagjada'añ nebiä Jesucristo yhoyhäna'c-hatiän, paadiä Dios hajxy xyagjughada'añ cøjxta'axiøø neby je'e jiugyhatiän. ²³ Coo hajxy cøxypänejpiä njatcøyyämät, cabä Dios hajxy jaduhñ nmøødhjätämät tu'ugmädia'agy, møød haxøøgtuum hajxy nhädaácämät. Pero tøø ja'a Dios mayhajt tiuñ coo ja'a yHuung hajxy yaa tøø xyajnäguéjxäm, ja'a Jesucristo, ja'a hajxy nWiindsøn'hjätämbä. Hoyyä Jesucristo hajxy tøø xñähho'túutäm. Jaduhñä Dios hajxy xpiädaácäm hawa'adstuum. Coo hajxy jaduhñ nmäbójcämät, mänitä Dios hajxy xyagjughjätämät cøjxta'axiøø neby je'e jiugyhatiän.

7

¹ Mägu'ughajpädøjc, mnajuøøby hajxy jaduhñ nebiä cuhdujt yaa myiñ hädaa yaabä naaxwiin. Ja'a häna'c-hajxy møjcuhdujtmøødpä, ja'a häna'c hajxy jaduhñ xyhanéhmäm mäduhñtiä hajxy yaa njugyhjätäm, túhmäts. Pero coo hajxy nhó'cänä, cab hajxy jaduhñ xyhanéhmänä. ²⁻³ Høxtahmäsä to'oxiøjc ja'a ya'adiøjcmøødpä, jaduhñä cuhdujt myiñ coo hajxy ñimiøødtsäna'awøøjät mäduhñtiä hajxy nämetsc jiugyhaty. Hoorä, coo ja'a to'oxiøjc wiingya'adiøjc miøødtsäná'awät, y je'enä ñihyhap jiugyhatyñä, haxøøgä to'oxiøjc jaduhñ jiatcø'owät. Hix, cabä cuhdujt jaduhñ myiñ coo jaduhñ jiatcø'owät. Pero coodsä ñihyhap yhó'ogät, mänitä quixy cuhdujt miøødänä coo piøjtägätsät, y cab jaduhñ ñejpiä.

⁴ Hoorä, mägu'ughajpädøjc, coo mijtsä Jesucristo hänajty mmøødhity tu'ugjoot tu'ugwiinmahñdy mänaa yho'oguiän, paadiä jecymiädia'agy hajxy xquia'a hanehmänä, ja'a Moisés jecy quiujáhyyäbä. Jaanä jaduhñduhmbä, tu'ugjoot tu'ugwiinmahñdiä Jesucristo hajxy hänajty mmøødhjätäbä mänaa jiuypijøjtägachän. Tøø ja'a mjoot hajxy mbäda'agy coo jaaya'ay hajxy mmøødtúnät. Jaduhñä Dios hajxy mmøødtúumbät. ⁵ Cahnä hajxy hänajty nmäbójcäm coo ja'a Jesucristo hajxy hoy xñähho'túutäm, jaduhñä njoot hajxy hänajty nnä'ägädä pädaácäm coo hajxy hänajty jaduhñ njatcø'owáanäm hoñejpiä. Paady hajxy hijty nhäda'agáanäm jii by møjcu'uhaam. Jaančh tehñ yhaxøøg hajxy hänajty nwiinmahñdyhjtäm. Hoyyä mädia'agy hajxy hänajty nja mädóowäm, ja'a Dios ja'a Moisés jecy ñajtsapxøøyyäbä, cab hajxy hänajty nyajtunáanäm. ⁶ Cahnä Diosmädia'agy hajxy hänajty nmäbójcäm ja'a Jesucristocøxpä, tehngajnä ja'a jecymiädia'agy hajxy hänajty nja wi'i quiudiunáanäm, ja'a Moisés jecy quiujáhyyäbä. Jaduhñäc tyjy hajxy hänajty nnähwa'adsáanäm. Pero coo ja'a Jesucristo hajxy tøø xñähho'túutäm, paadiä jecymiädia'agy jaduhñmbä xquia'a hanéhmänä. Coo ja'a Jesucristo hajxy tøø xyajñähwáatsäm, jaduhñ hajxy xyagjughadaánäm cøjxta'axiøø neby jaaya'ay jiugyhatiän. Y xpiuhbéjtämä Dioshespíritu hajxy nebiä Dios hajxy hoy nmøødtúunämät.

⁷⁻⁹ Cahnøøchä jecymiädia'agy hänajty nmädoyñä, ja'a Moisés jecy quiujáhyyäbä, cábøch hänajty nnajuø'oy cooçh hänajty hoy nga'a jäya'ayhaty. Pero cooçh jecymiädia'agy jaduhñ nwiinjuøøñä, páadyhøch nnajuøøñä cooçh cøxypänejpiä njatcø'oy hoñejpiä. Cooçh haxøøgwiinmahñdy jaduhñ njaančh tehñ miøødä, páadyhøchä njoot hijty chocy cooçh cøxypänejpiä njatcø'owät hoñejpiä nebiatiä jecymiädia'agy hajxy xjia hanéhmäm coo hajxy nga'a jatcøyyämät, ja'a Moisés jecy quiujáhyyäbä. Y cooçh jecymiädia'agy jaduhñ nmädoy, maas hanäxiøch cøxypänejpiä njaac jatcø'oy tehngajnä. Páadyhøchä tøyhajt nmøødä cooçh hijty nga'awa'añ haxøøgtuum. ¹⁰ Hóyhøch ndijy jaduhñ ngudiuna'añ ja'a jecymiädia'agy, ja'a Moisés jecy quiujáhyyäbä. Y cooçh häxøpy hoy ngudiunñ, hawa'adstúumhøchä Dios cu xpiädaacy. Pero cábøchä jecymiädia'agy jaduhñ hoy nnä'ägädä cudiuna'añ, páadyhøch hawiinmats nhädá'agät haxøøgtuum. ¹¹ Hoy ndíyhøchä jecymiädia'agy hänajty nyajtuna'añ, ja'a Moisés jecy quiujáhyyäbä. Jaduhñ ndíyhøchä Dios ja'a hoyhajtä weenhajt xmio'owa'añ. Pero cábøchä tøyhajt hänajty nnä'ägä møødä. Cooçh haxøøgwiinmahñdy hänajty nmøødä, páadyhøchä jecymiädia'agy hänajty hoy nga'a yajtuñ, ja'a Moisés jecy quiujáhyyäbä. Páadyhøch hänajty nga'awa'añ haxøøgtuum.

¹² Ja'a jecymiädia'agy ja'a Moisés jecy quiujáhyyäbä, je'e hajxy xyhanéhmäm coo hajxy hoy njäya'ayhájtämät. Jaduhñ miädia'agy neby hajxy hoy njäya'ayhájtämät. Xyajnajuóyyäm hajxy jaduhñ coo ja'a Dios howyiinmahñdy jiaanč tehñ miøødä. ¹³ Paadiä jecymiädia'agy jaduhñ yhooyä, ja'a Moisés jecy quiujáhyyäbä. Pero hóyhøch hänäjty tøø nja mädooy, tehñgájnøch hänäjty haxøøg nwi'i jiäya'ayhatyñä. Páadyhøch hijty jiiiby nga'awa'añ haxøøgtuum. Hiç, cábøchä nwiinmahñdy hänäjty yhooyä. Y cooçhä jecymiädia'agy jaduhñ nmädooyy, ja'a Moisés jecy quiujáhyyäbä, maas hanáxiøch hänäjty haxøøg njatcø'øwa'añ.

¹⁴ Jaduhñä tøyhajt hajxy nmøødhájtäm coo ja'a jecymiädia'agy hajxy xyhawáanäm coo ja'a Dios howyiinmahñdy jiaanč tehñ miøødä. Jaaná jaduhñ hajxy xyhawáanämbä coo Dios ja'a jioot chocy coo hajxy hoy njäya'ayhájtämät. Pero højts, cab højts hoy nnä'ägädä jäya'ayhájtäm, je'eguiøxpä coo højts hädaa yaabä naaxwiimbä wiinmahñdy nmøødhájtäm. Hamdsoojoot hajxy jaduhñ haxøøg njatcøoyyäm. ¹⁵ Jaduhñä njoothajxy jia wi'i chójcäm coo hajxy hoy njäya'ayhájtämät, pero cab hajxy nnä'ägädä jadaánäm hojiäya'ayhat. Pätiidä hajxy jaduhñ coo nga'a jadaánäm. Cøxypänejpiä hajxy nwi'i jiatcøoyyäm, hoy hajxy nja najuóyyäm coo jaduhñ yhaxøögä. ¹⁶ Nnajuóyyäm hajxy jaduhñ coo ja'a jecymiädia'agy yhooyä, ja'a Moisés jecy quiujáhyyäbä. Jaduhñä njoothajxy jia tsójcäm coo hajxy ngudiúunämät nebiatiä jecymiädia'agy hajxy xyhanéhmäm. Pero cab hajxy hoy nnä'ägädä cudiunáanäm. ¹⁷ Pero, ca'a yhamdsoojoot hajxy jaduhñ haxøøg njatcøoyyäm. Ja'a nhaxøøgwiiinmahñdy hajxy jaduhñ xyagjatcøoyyäm haxøøg. ¹⁸⁻¹⁹ Cabä Diosmädia'agy hajxy hoy ngudiunáanäm hamdsoojoot, hoyyä njoothajxy jia tsójcäm coo hajxy ngudiúunämät. Haxøøg hajxy njatcøoyyäm, hoyyä njoothajxy jaduhñ quia'a jagä tsójcäm coo hajxy jaduhñ njatcøoyyämät.

²⁰⁻²¹ Hiç, ja'a nhaxøøgwiiinmahñdy hajxy haxøøg xyagjatcøoyyäm, ca'a yhamdsoojootä. ²² Jaduhñä Diosmädia'agy hajxy xyhanéhmäm nebiaty hajxy hoy njäya'ayhájtämät. Njoodóotyhøch ngopcóotyhøch jaduhñ njuø'øy coo ja'a Diosmädia'agy jiaanč tehñ yhooyä. ²³ Nnajuóbiøch jaduhñ cooçhä haxøøgwiiinmahñdy njaanč tehñ miøødä. Páadyhøchä howyiinmahñdy hoy nga'a nä'ägädä yajtuna'añ. Hiç, ja'a nhaxøøgwiiinmahñdyhøch haxøøg xyagiäya'ayhajp. Y cábøch hoy nnä'ägädä najtshixø'øwa'añ.

²⁴ Cooçh häxøpy pøn hoy xquia'a yajnähwa'adsa'añ ja'a nhaxøøgwiiinmahñdyhøch, cábøchä Dios häxøpy hoy nmøødhida'añ tu'ugjoot tu'ugwiinmahñdy. Jiiibyhøch häxøpy nhäda'aga'añ mõjcu'uhaam. Jaanč tehñ yhoñäxú'utsnøch häxøpy nhity. ²⁵ Pero nmóobiøchä Dios Dioscujú'uyäp cooçhä Jesucristo tøø xyajnähwa'ačh, ja'a hajxy nWiindsønhájtämbä. Páadyhøchä Diosmädia'agy hoy nyajtuna'añ ja'a nhowyiinmahñdyháamhøch, hóyhøchä haxøøgwiiinmahñdy nja møødnä. Je'ečh tähoocjaty haxøøg xyagjatcøøby.

8

¹ Hoorä, hawa'adstuum hajxy nmähmóoyyänä coo ja'a Jesucristo hajxy nmøødhájtäm tu'ugmädia'agy. Jaduhñ hajxy ngudiúunäm nebiä Diosmädia'agy hajxy xyhanéhmäm. Cab hajxy cøxypänejpiä njatcøoyyänä. ² Coo ja'a Jesucristo hajxy tøø xñähho'túutäm, paady hajxy xmiøødhájtäm tu'ugjoot tu'ugwiinmahñdy. Paadiä Dioshespíritu hajxy xyagjugyhadaánäm cøjxta'axiøø nebiä Dios jiuçyhatiän. Paadiä Dios hajxy tu'ugjoot tu'ugwiinmahñdy xmiøødhidaánäm homiänaajä. Coo ja'a Jesucristo ja'a nhaxøøgwiiinmahñdy hajxy tøø xyajnähwáatsäm, paady hajxy jiiiby nga'a häda'agáanänä haxøøgtuum. ³⁻⁴ Coo ja'a Dios ja'a yHuung yaa quiejxy hädaa yaabä naaxwiin, jaduhñ yaa jiäya'ayhajty neby højtshájtäm. Jesucristo je'e. Pero cabä Jesucristo haxøøg jiäya'ayhajty neby højtshájtäm. Mäniä Jesucristo hajxy xñähho'túutäm. Hoyyä Jesucristo ja'a jecymiädia'agy quiudiuuñ, ja'a Moisés jecy quiujáhyyäbä. Pero højtshájtäm, cab hajxy jaduhñ ngudiúunäm. Paady jaduhñ yhahixø'øy coo hajxy ngumädóowämät. Coo ja'a Jesucristo hajxy xñähho'túutäm, quiümädoow je'e ja'a højtscøxphájtäm jaduhñ. Paadiä jecymiädia'agy hajxy xquia'a hanéhmänä, ja'a Moisés jecy quiujáhyyäbä. Ja'a

Dioshespíritu hajxy xpiuhbéjtänä coo ja'a Dios hajxy xmiøødhjítämät tu'ugjoot tu'ugwiinmahñdy. Jaduhñ hajxy xpiuhbéjtämbä coo hajxy haxøøg nga'a jáya'ayhájtänät.

⁵ Y coo ja'a Dioshespíritu hajxy jaduhñ xpiuhbéjtäm, paady hajxy nxiictaac nmädiaactáacäm nebiä Diosmädia'agy hajxy maas hoy nyajtúunämät. Pero ja'a jáya'ay ja'a Dioshespíritu ja'a miädia'agy hajxy ca'a cudiunáanäbä, jaduhñ hajxy xyiicta'agy miädiaacta'agy nebiä yhamdsoo wiinmahñdy hajxy yajtuñ. ⁶ Pøn jaduhñ xiictaacp mädiaactaacp nebiä Dioshespíritu ja'a miädia'agy maas hoy miäbójcät, je'e ja'a Dios jaduhñ miøødhijpy tu'ugjoot tu'ugwiinmahñdy. Je'eduhñ nøcxaamb Dioswiinduum. Jootcuyc je'e jim yhida'añ møødä Dios. Pero pønä yhamdsoo wiinmahñdy wi'i yajtunaamb, ja'a Dios ja'a miädsip je'eduhñ. Haxøøgtuum je'eduhñ ñä'ägä häda'aga'añ, ⁷⁻⁸ je'eguiøxpä coo ja'a Dios miädsiphaty. Cabä Diosmädia'agy hoy yajtuna'añ, ni ja'a jioot jaduhñ quia'a tsocy coo yajtúnät. Y cab jaduhñ quiumayii ja'a Diósäm.

⁹ Pønä Dioshespíritu ca'a møødhijp tu'ugmädia'agy, cabä Diosmädia'agy miäbøcy ja'a Jesucristocøxpä. Coo mijts jaduhñ mjaançh mäbøcy, paady mijtsä Dioshespíritu mmøødhity tu'ugmädia'agy. Y coo ja'a Dioshespíritu hajxy jaduhñ mmøødhity, paadiä mhaxøøgwiinmahñdy hajxy tøø mhøxhijxnä. ¹⁰ Tøyhajt jaduhñ coo hajxy nho'ogáanäm, je'eguiøxpä coo ja'a Adán jecy quiädiehy, ja'a hajxy jecy nhaphájtäm ndeedyhájtäm. Pero coo mijtsä Dios tøø xpiäda'agy hawa'adstuum, y coo ja'a Jesucristo hajxy mmøødhity tu'ugmädia'agy, paady mijtsä Dioshespíritu xyagjugyhada'añ homiänaajä nebiä Dios jjugyhatiän. Jim hajxy xyajnøcxa'añ Dioswiinduum. ¹¹ Coo ja'a Dioshespíritu hajxy xmiøødhjítäm tu'ugmädia'agy, paadiä Dios hajxy xyagjujypiøjtägatsáanäm ja'a yhEspírituhaam coo hajxy hánajty tøø nhó'cäm. Jaduhñ hajxy xyagjujypiøjtägatsáanäm nebiä Jesucristo yagjujypiøjtägajtsän.

¹² Mägu'ughajpådøjc, jaduhñds je'e, hahixøøby jaduhñ coo ja'a Dioshespíritu miädia'agy hajxy nyajtúunämät. Cab jaduhñ yahixø'øy coo ja'a nhamdsoo wiinmahñdy hajxy nyajtúunänät tehngahnä. ¹³ Hix, coo hajxy tehngahnä haxøøg njatcøøyyänät, cabä Dios hajxy hoy nmøødhjítämät tu'ugjoot tu'ugwiinmahñdy. Mänit hajxy jiiby nhädáacämät haxøøgtuum. Pero coo ja'a nhaxøøgwiinmahñdy hajxy nnajtsnixøøyyämät ja'a Dioshespírituhaam, jaduhñä Dios hajxy hoy nmøødhjítänät tu'ugjoot tu'ugwiinmahñdy.

¹⁴ Hix, pønjaty jaduhñ puhbéjtäp ja'a Dioshespíritu nebiä Diosmädia'agy hajxy jaduhñ hoy yajtúnät, Dios yhuung hajxy je'e. ¹⁵ Haa ca'a, ja'a yhEspírituhaamä Dios hajxy xyhuunghájtäm, paady hajxy nnämäáyyäm: "Diosteedy." Y coo ja'a Dios hajxy xyhuunghájtäm, paadiä Dios hajxy nga'a tsähgøøyyänä neby hajxy hijty ndsähgøøyyäm coo hajxy hijty xquia'a pädáacämnä hawa'adstuum. ¹⁶ Y coo ja'a Dioshespíritu hajxy jaduhñ xmiøødhjítäm, jaduhñä tøyhajt hajxy xmióoyäm coo ja'a Dios hajxy xyhuunghájtänä. ¹⁷ Coo ja'a Dios hajxy xyhuunghájtäm näguipxy møødä Jesucristo, paadiä Jesucristo hajxy jim xyajnøcxaanäm Dioswiinduum. Paadiä Dios hajxy madiu'u xquiunuu'xáanäm näguipxy møødä Jesucristo, nebiä Dios jecy miänaañän cooc hajxy xquiunuu'xáanäm. Y coo hajxy ndsaaçhpójcämät ja'a Dioscøxpä nebiä Jesucristo chaachpøjquiän, mänitä Dios hajxy møj jaançh xpiädáacämät näguipxy møødä Jesucristo.

¹⁸ Høøch jaduhñ mänaamb coo hajxy yaa weñtiä ndsaaçhpójcäm hädaa yaabä naaxwiin. Pero cab jaduhñ ñä'ägädä mäbaady ni weñtiä nebiä Dios ja'a hoyhajtä weenhajt hajxy jim xmi'owáanäm maa je'e wyiinduumän. ¹⁹ Tijatiä Dios yaa tøø quiunuu'xy hädaa yaabä naaxwiin, jia wi'i jibhijxyp hajxy jaduhñ coo yhabáadät coo ja'a Dios ja'a hoyhajtä weenhajt mio'owa'añ pønjaty jaduhñ yhuunghajpy. Mänitä Dios jaduhñ miäna'ana'añ coo hajxy nga'a tsaaçhpøgáanänä. ²⁰⁻²¹ Coo ja'a Adán jaduhñ jecy jawyiinhajt quiädiehçohñ, ja'a hajxy jecy nhaphajt ndeedyhájtämbä, paadiä Dios ja'a tsø'ty ja'a häyohn yaa quiejxy hädaa yaabä naaxwiin. Mäduhñtiä Dios yaa tøø quiunuu'xy cøxiä hädaa yaabä naaxwiin, cøxaamb jaduhñ quihdägoyya'añ. Pero cabä pojpa hajxy tii møødä. Ca'a jie'eguiøxpä ja'a Dios ja'a tsø'ty ja'a häyohn yaa quiejxy. Hix, jagooyyä jáya'ay pojpa cädieey hajxy møødä, paadiä Dios tsø'ty häyohn yaa quiejxy. Jéquiänä Dios jaduhñ wyiinmaayy coo cøxiä wiinä chaachpøgät näguipxy

møødä jäya'ayhajxy, tijatiä Dios yaa tøø quiunuu'xy, høxtä coonä yhabáadät coo ja'a Dios hajxy xquia'a yajtsaaçhtiunáanänä. Mänitä Dios ja'a hoyhajtä weenhajt hajxy nägøxiä xmio'owáanäm, højts Dioshuung, näguipxy møød tijaty ja'a Dios yaa tøø quiunuu'xy. ²² Hix, tijatiä Dios yaa tøø quiunuu'xy hädaa yaabä naaxwiin, jia wi'i jìbhihjyp hajxy jaduhñ coo yhabáadät coo ja'a Dioshuung ja'a hoyhajtä weenhajt hajxy mio'owa'añii. Tøyhajt jaduhñ. Pero cahnä yhabaady, jaançh tehñ chaaçhpøjp hajxy jaduhñ. ²³ Jaanä jaduhñ højtshájtämbä, jaduhñ højts ndsaaçhpøjcämbä, jaduhñ højts nja wi'i jìbhijxämbä coo yhabáadät coo ja'a Dios hajxy pedyii xmio'owáanäm ja'a hoyhajtä weenhajt. Coo Dios hajxy xyhuunghájtäm, paady hajxy jaduhñ xmio'owáanäm. Mänitä Dios ja'a hawiinjemybiä ni'xcopc xmio'owáanäm, ja'a mänaa ca'a ma'p ca'a tägoobiä. Coo ja'a Dios ja'a yHespíritu hajxy tøø xyajnäguéjxäm, jaduhñä tøyhajt hajxy nmøødhájtäm coo ja'a Dios hajxy xjiaançh huunghájtäm. Jaanä jaduhñä tøyhajt hajxy nmøødhájtämbä coo ja'a Dios ja'a hoyhajtä weenhajt hajxy pedyii xmio'owáanäm. ²⁴ Coo ja'a Diosmädia'agy hajxy tøø nmäbøjcäm ja'a Jesucristocøxpä, paady hajxy nnähwaats nguhwáatsäm, paadiä Dios hajxy xmiøødhíjtänä tu'ugjoot tu'ugwiinmahñdy. Y paady hajxy nja wi'i jìbhijxäm coo yhabáadät coo ja'a Dios hajxy xmio'owáanäm ja'a hoyhajtä weenhajt cøxiä. Cahnä yhabaady, paady hajxy nja wi'i jìbhijxämnä. Coo häxøpy tøø yhabaatnä, cab hajxy häxøpy njøbhijxänä. ²⁵ Coo hajxy hamuumdu'joot nmäbøjcäm coo ja'a Dios hajxy tøyhajt xmio'owáanäm tijaty hajxy xyajmädsøjcäm, paady hajxy tsøc mee'xtújcäm mäduhñtiä hajxy yaa njaac jøbhíjxäm, hoy hajxy nej nja jajt nja habéjtäm.

²⁶ Y xpiuhbéjtämä Dioshespíritu hajxy nebiaty hajxy hamdsoo nga'a jadáanäm. Hix, coo ja'a Dios hajxy naxy nja wi'i pia'ya'axáanäm, cab hajxy naxy nnajuøøyyäm tijatiä Dios hajxy nmäyujwáanämb, waambatiä Dios hajxy nmänuu'xtáacämät. Naxy hajxy jaduhñ njájtäm coo ja'a capxy ja'a mädia'agy hajxy hoy xquia'a habädsømáanäm. Nä'ä møcxéjjäm nä'ä ho'ogyxiéjjäm hajxy jaduhñ. Pero coo hajxy nga'a najuøøyyämät nebiä Dios hajxy nmänuu'xtáacämät, mänitä Dioshespíritu hajxy xpiuhbéjtämät. ²⁷ Piuhbejpiä Dioshespíritu pønjetiä Diosmädia'agy tøø miäbøcy. Hoorä, ñajuøøbiä Dioshespíritu jaduhñ waambatiä Dios jioot chocy coo ja'a Dios hajxy nmänuu'xtáacämät. Jaduhñä Dioshespíritu hajxy xyajxiic xyajmädiáacäm ja'a ngopcootyhájtäm. Y ñajuøøbiä Dios jaduhñ waambaty hajxy nxiic nmädiáacäm ja'a ngopcootyhájtäm.

²⁸ Hoorä, cab hajxy njootmayhájtämät coo Dios ja'a tsaächpä peenä hajxy xmiøøyyämät. Haa ca'a, nnajuøøyyäm hajxy jaduhñ coo Dios quiøxy najuø'øy nebiaty hajxy njajt nhabéjtäm, pønjetiä Dios tsojp. Nnajuøøyyäm hajxy jaduhñ coo Dios wyiinmay coo hajxy ween xyhoyøøyyäm cøxiä wiinä. Tøø hajxy xyajnähdíjjäm coo hajxy njäya'ayhájtämät nebiä jioot choquiän. Jaanä jaduhñ hajxy xyhawáanämbä cooc hajxy xyhuunghadáanäm. ²⁹ Hix, jéquiänä Dios yhuuc najuøøbiä pønjetiä miädia'agy hánajty mäbøgáanäxäp. Je'ehajxy jaduhñ yajnähdíjjä coo hajxy yhojiäya'ayhadät nebiä Jesucristo yhojiäya'ayhatiän, ja'a Dios yHuung. Jaduhñä Dios hajxy nägøxiä xyhixáanänä nebiä Jesucristo yhuchän. Højts jaduhñ xñänøømäm coo Jesucristo hajxy nbuhya'ayhadáanäm, je'eguiøxpä coo Dios hajxy xyhuunghájtäm. ³⁰ Coo Dios hajxy jecy xyajnähdíjjäm coo miädia'agy hajxy nmäbøjcämät, paady hajxy tøø xyhawáanäm cooc hajxy xyhuunghadáanäm. Y coo miädia'agy hajxy jaduhñ tøø njaançh mäbøjcäm, mänit hajxy xpiädáacäm hawa'adstuum. Jaduhñ tøø miänaambä coogä cuhdujt hajxy nmøødhadáanäm nebiä Jesucristo miøødan.

³¹ Homiädoonä hädaa mädia'agy, túhmäts. Coo Dios hajxy jecy xyajnähdíjjäm coo hajxy xyhuunghájtäm, ni pøn jaduhñ xquia'a yajtu'udägøøyyämät. Tøyhajt jaduhñ coo Dios yajtøjiada'añ tijaty tøø wyiinmay ja'a højtscøxphájtäm. ³² Xjiaançh tehñ chójcämä Dios jaduhñ. Høxtä ñähdujc ja'a yhamdsoo Uung coo hajxy hoy xñähho'túutäm nägøxiä. Jaançh tehñ miøjjä Dios mayhajt jaduhñ tiuunñ ja'a højtscøxphájtäm. Jaduhñä tøyhajt hajxy nmøødhájtäm coo ja'a mayhajt jaduhñ tehngajnä jiaac tuna'añ. ³³ Coo Dios hajxy tøø xyajnähdíjjäm coo miädia'agy hajxy nmäbøjcämät, paady hajxy pøn hoy xquia'a näxø'øwø'øwáanäm maa Dioswiinduumän. Haa ca'a, tøø Dios hajxy xpiädáacäm

hawa'adstuum. ³⁴ Ni pøn hajxy jaduhñ hoy xquia'a päda'agáanäm haxøøgtuum. Haa ca'a, jimä Jesucristo hajxy xñähgapxtúutäm Dioswiinduum. Ja'a Dios yhahooyhaambiä Jesucristo yhäña'ay. Møj jaanč jim yhity. Paady hajxy jim xñähgapxtúutäm, coo hajxy hoy tøø xñähho'túutäm, møød coo hoy tøø jiuypjøjtägach. Jaduhñ hajxy tøø xyajñähwaats tøø xyajcuhwáatsäm. ³⁵ Xjiaanč tehñ chójcämä Jesucristo hajxy jaduhñ nägø'ø nädecypä. Nnä'ägädä møødhájtämä tøyhajt hajxy jaduhñ coo hajxy mänaa xquia'a nähgue'egáanäm, hoyyá tsaachpä peenä hajxy cu nja páatäm, hoy hajxy pøn cu xjia tsaachtíuunäm ja'a Diosmädia'agyquiøxpä, hoyyá yuu hajxy cu xjia páatäm, hoyyá wit tucxy hajxy cu nja yajmaajíjtäm, hoy hajxy mäjahñdiuum cu nja wädíjtäm, hoyyá cahwiindøyhäna'c hajxy cu xjia yaghó'cäm. ³⁶ Jaduhñ jim myiñ cujaay maa Diosmädia'aguiän:

Xøømdsuhñ højtsä cahwiindøyhäna'c xjia wi'i yagho'oga'añ ja'a miičh mmädi-a'agyquiøxpä;

ho'cøøc højts xñä'ägädä wa'ana'añ,
nømä Dios ñämaayyá.

³⁷ Hoy hajxy jaduhñ cu nja jajt, hoy hajxy jaduhñ cu nja habéjtäm, nnä'ägädä mee'xtugáanäm hajxy jaduhñ. Ja'a Jesucristo hajxy jaduhñ xñä'ägädä puhbéjtäm, je'eguiøxpä coo hajxy xjiaanč tehñ chójcäm. Naamgahnä hajxy tii xjiájtäm xyhabéjtäm, jaduhñä Jesucristo hajxy maas hoy nbanøcxämät hamuumdu'joot. ³⁸⁻³⁹ Coo Dios hajxy xjiaanč tehñ chójcäm, jaduhñä tøyhajt hajxy njaanč tehñ miøødhájtäm coo Jesucristo hajxy tehngajnä xñä'ägädä puhbedáanäm, hoy ñejpiä hajxy cu nja jajt cu nja habéjtäm, hoy yhädaa yaabä naaxwiinä, hoy hajxy cu nja hó'cäm, hoy hajxy cu nja tågóoyyäm, hoy hajxy cu nja jaac jugyhájtäm, hoy hajxy cu nja jaac tsuxc-hájtäm, hoyyá møjcu'ugong hajxy cu xjia mädsiphájtäm, ja'a pojhajpä täxa'ahajpä, hoyyá møjcu'ugong hajxy cu xjia mädsiphájtäm, hoy miaajä hajxy jia hity, hoy yhädaa yaabä naaxwiinä, hoy jyim tsajpootypä, hoy jyiiby møjcu'uhaamá. Pero cabä cuhdujt hajxy ñä'ägädä møødä maa Jesucristocøxpän, ja'a hajxy nWiindsøn'hájtämbä. Paadiä Jesucristo hajxy homiänaajä xchójcäm; paady hajxy homiänaajä xcwieendähájtäm.

9

¹⁻³ Jaanč tehñ jiootmayhájpøchä judíoscøxpähajxy je'eguiøxpä coo hajxy quia'a mabøga'añ coo ja'a Jesucristo hajxy tøø ñähho'tu'udyii. Høøch nmägunaaxhajxy je'e. Jaanč tehñ chaačhøøbiøch njoot jaduhñ coo hajxy quia'a mabøga'añ. Tøyhøch jaduhñ nmädia'agy. Coochä Jesucristo nmøødhity tu'ugjoot tu'ugwiinmahñdy, jaduhñä tøyhajt hajxy mmøødhádät cooch nga'a hønñda'agy. Ja'a nhamdsoo juøhñdyháamhøch jaduhñ nnajuø'oy cooch nga'a hønñda'agy, møød coo Dioshespíritu jaduhñ miänaambä. Jaanč tehñ chaačhøøbiøch njoot jaduhñ coochä nmägunaaxhajxy quia'a mabøga'añ; høxtä cu nja nähhädaactu'udáanhøch hajxy jiiby haxøøgtuum coo Dios jaduhñ cu miänaañ. Jaduhñhøch mäna'ana'añ coochä Jesucristo cu xquia'a yajnähwaach, pero coochä nmägunaaxhajxy cu yajnähwaatsä. Hoorä, ja'a Israel, højts nhap ndeedy hijty je'e jegyhajty. ⁴ Jéquiänä Dios ja'a Israel miøødyajcuhdujcy coo Israel yhap yhoc-hajxy hñajty piuhbedáanäxä. Jaanč huunghajtä hajxy je'eduhñ ja'a Diósäm. Je'eduhñ ñänøømby coo hajxy jaduhñ quiu'ughajtä ja'a Diósäm. Yhijx hajxy jaduhñ coo Dios ja'a miäjaa yajcähxø'cy jim mädøyyä maa Diostøjcän. Jaduhñ hñajty quiähxø'ogy nebiä jocän. Mänitä Dios hajxy yhanemä madiu'u. Mänitä Moisés quiujahy nebiatiä Dios hñajty tøø yhane'emiän. Mänitä Dios cuhdujt yejcy nebiatiä Dios hajxy jaduhñ jim wyiingudsähgø'owät. Mänitä Dios tøyhajt yejcy coo ja'a yajnähwaatspä hajxy hñajty yajnäguxa'añii. Cooch jaduhñ nnänøømby coo hajxy yhaphaty yhoc-hadyii ja'a Israel, højts jaduhñ niñänøømäp, højts judíoshajxy. ⁵ Højtsä jecyjiäya'ay nhaphajt ndeedyhajt, ja'a Abraham møødä Isaac møødä Jacobo. Cumaayyä ja'a jecyjiäya'ayhajxy jaduhñ ja'a Diósäm. Y coo Cristo yaa hoy jiäya'ayhaty hädaa yaabä naaxwiin neby højtsájtäm, jaanä jaduhñ je'e yhaphájtäbä yhoc-hájtäbä ja'a Israel. Dioshajpä Cristo. Cøxiä wiinä je'eduhñ

yhane'emy homiaajä. Tsøc hajxy wiingudsähgöøyyäm homiänaaxøøjä coo miøjjä coo jiaančhä. Tøyhajt jaduhñ.

⁶ Coočh nmäna'añ coočhä nmägunaaxhajxy quia'a mäßøga'añ coo Jesucristo hajxy tøø xñähho'túutäm, cábøch jaduhñ nmäna'ana'añ cooc tyjy ja'a Dios ja'a miädia'agy tøø quia'a yajtøjiaty coo jecy miänaañ coogä Israel yhap yhoc-hajxy hänajty yajnähwa'adsa'añii. Hix, coo Dios ja'a Israel jecy ñämaayy coo yhap yhoc-hajxy hänajty yajnähwa'ads yajcuhwa'adsaanäxä, cabä Dios hänajty miäna'ana'añ cooc tyjy hajxy hänajty nägøxiä ñähwa'ads quiuhwa'adsa'añ. Jue'e hänajty ñänøømby pønjaty mäßøjp coo Dios yajtøjiaty waambaty tøø quiapxy tøø miädia'agy. Hix, cabä Israel yhap yhoc-hajxy nämay miäböcy coo hajxy tøø ñähho'tu'udyii ja'a Jesucristäm. Pønjaty jaduhñ mäßøjp, je'eds hajxy jaduhñ tøyhajt haphájtäp hoc-hájtäp ja'a Israel. Pønjaty jaduhñ ca'a mäßøjp, cab hajxy tøyhajt yhaphaty yhoc-hadyii ja'a Israéläm. ⁷ Jaaná jaduhñä Abraham ja'a yhuunghajxy je'ebä. Tu'uquía jaduhñ ñänøømä ja'a Diósäm coo hoyhajt weenhajt hänajty mio'owáanäbä nebiä Abraham hänajty mio'owa'añiiñän. Ja'a Abraham ja'a yhuung tu'ugpä, cab je'e jaduhñ ñänøømä coo tii mio'owa'añii. Jaduhñ jim myiñ cujaay maa Diosmädia'aguiän: "Ja'a miich mhuung Isaac, je'e yhap yhoc-høch jaduhñ nhixáanäp nej miich mhap nej miich mhocän", nømä Dios ja'a Abraham jecy ñämaayy. ⁸ Jaduhñä tøyhajt hajxy nmøødhájtäm coo Isaac yhap yhoc-hajxy quiu'ughájtäxä ja'a Diósäm. Paadia Isaac yhap yhoc-hajxy jaduhñ quiu'ughájtäxä ja'a Diósäm coo Abraham jecy yhawaaná coo tio'oxiøjc hänajty yhuungpaada'añ. Coo ja'a Abraham jaduhñ yhawáanäxä, tøø ja'a Sara hänajty miäjay, y cabä yhuung hänajty ni tu'ugtä. ⁹ Hix, cahnä Sara hänajty yhuungpaadyñä, tøyøyyämä Dios ja'a Abraham hänajty jaduhñ ñäma'ay: "Coo jaduhñ yhabáadät, mänit miich mhixa'añ coočhä nmädia'agy nyajtøjiada'añ. Co'na'awaambä mdo'oxiøjc Sara. Ya'ayhäna'c jaduhñ minaamb ca'awaamb", nømä Dios ja'a Abraham jecy ñämáaguiumbä. Ja'a Isaac jaduhñ ñänøømä coo hänajty myina'añ quia'awa'añ.

¹⁰ Jaaná jaduhñä Rebécabä, ja'a Isaac tio'oxiøjc, coo je'e quio'naabiä, mänitä pigäna'c-hajxy myiñguiahy tähoocmechpä. ¹¹⁻¹² Cahnä Rebeca hänajty quio'na'ayñä, tøyøyyäm hänajty ñäma'ayii ja'a Diósäm coo ja'a Jacobo ja'a Esaú hänajty yhane'ema'añ, hoyyä Esaú jayøjp jia mejch, hoyyä Jacobo jia jaac tehñ miejch høxhaam. Paadia Dios jaduhñ miänaañ, tøyøyyäm hänajty wyiinmahñdyhaty coo Jacobo yhap yhoc-hajxy hänajty quiu'ughadáanäxä ja'a Diósäm, møød coo Esaú yhap yhoc-hajxy hänajty jaduhñ quia'a cu'ughadáanäxä, hoy hänajty quia'a jagä cähxø'øgyñä pø hoyhäna'c-hadaambä Rebeca yhuunghajxy hänajty, pø caj. Hix, hamdsoojootä Dios jaduhñ wyiinmahñdyhajty nebiä Jacobo hänajty yhixa'añ, nebiä Esaú hänajty yhixa'añ. ¹³ Jaduhñ jim myiimbä cujaay maa Diosmädia'aguiän: "Ndsójc-høchä Jacobo møødä yhap møødä yhoc-hajxy, páadyhøch hajxy nnäxuudsä'añ. Pero ja'a Jacobo yhajch, ja'a Esaú, cábøch je'e nnäxuudsä'añ. Ni cábøchä yhap yhoc-hajxy jaduhñ nnäxuudsáanäbä", nømä Dios cujecy miänaañ.

¹⁴ Pero cab hajxy hawiinmats waamb nmánáanämät cooc tyjy Dios hoy quia'a wiinmahñdyhajty coo miänaañ coogä Jacobo yhap yhoc-hajxy hänajty piuhbedáanäxä, møød coogä Esaú yhap yhoc-hajxy hänajty quia'a puhbedáanäxä. Caj pues. Haa ca'a, hoyyä Dios jaduhñ wyiinmahñdyhaty homiänaaxøøjä. ¹⁵ Hix, jaduhñä Dios ja'a Moisés jecy ñämaayy: "Nnäxúu'chpøch nba'häyóobiøch pønjátýhøch njoot chojpy coočh jaduhñ nnäxúudsät, coočh jaduhñ nba'häyówät. Cábøch nnäxuudsä'añ pønñhøch njoot quia'a tsojpy coočh nnäxúudsät." ¹⁶ Coo Dios jaduhñ miänäxuučh, jaduhñ hajxy nyajna-juøøyyäm coo hojiot jiaanč tehñ miøødä. Hamdsoo ñägapy pøn ñäxuudsäamby. Hamdsoojoot jaduhñ miänäxuučh, caj jie'eguiøxpä coo hajxy cu nja nämáayyäm coo hajxy ween xñäxúu'tsäm, coo hajxy ween xpia'häyóowäm. Ni quia'a je'eguiøxpä coo njoot hajxy nbädáacäm coo hajxy hoy njäya'ayhájtämät. ¹⁷⁻¹⁸ Hix, ñäxuu'chpä Dios pøn ñäxuudsäamby. Jaaná jaduhñduhmbä, yajnähdiipiä Dios coo quiopc-hajxy xiéxät pønä Dios jaduhñ yajmädsojpy coo quiopc-hajxy jaduhñ xiéxät. Jaduhñä Dios ja'a gobiernä

ja'a quiopc jecy yajxejxä, ja'a hänajty jim hanehmbä Egiptonaaxooty. Tøyhajt jaduhñ. Haa ca'a, jaduhñ jim myiñ cujaay maa Diosmädia'aguiän coo Dios ja'a gobiernä jaduhñ ñämaayy: “Páadyhöch miich tøø nyajmøjtägø'øy, tøøch hänajty nwiinmay coochä nmäjaa hänajty nyajcähxø'øga'añ maa mijts mnaax maa mijts mgajptän. Cooch ngu'ug jim nhøxwoobädsómät maa mijts mnaax maa mijts mgajptän, jaduhñhöch nmäjaa njaançh tehñ yajcähxø'øga'añ. Jaduhñä mädia'agy wiädita'añ wiinduhmyhagajpt ja'a høøchcøxpä cooch njaançh tehñ miøjjä cooch njaançh tehñ jiaançhä”, nømä gobiernä jecy ñämaayyä.

¹⁹ Jii häna'c-hajxiäda'a näje'e miäna'ana'añ: “Cabä Dios wyiinmahñdy yhooyä je'eguiøxpä coo hajxy xñäxø'øwøyyäm cooc højts pojpa cädieey nmøødhajtäm. Haa ca'a, hamdsoo højts ngopc tøø xyajxéjxäm. Paady højts pojpa cädieey nmøødhajtäm.”

²⁰ Pero cab jaduhñ yhahixø'øy coo pøn jaduhñ miäná'anät. Tøyhajt jaduhñ. Caj pues. Haa ca'a, yaa hajxy njäya'ayhajtäm. Cabä cuhdujt hajxy nnälägädä møødhajtäm ni weeñtiä coo Dios hajxy nhadsóowämät. Hix, jaduhñ mäwínäts højts Dios xyajnähdijjäm nebiä tu'tspojtspädøjc-hajxy piochän nebiä jioot hajxy yajmädsøquiän. Coo tu'ts quiapxø'øgät, cabä pojtpä hawiinmats ñämá'awät: “Tiiçh yajxon coo xquia'a pojch.” Caj pues, cab jaduhñ yhahixø'øy coo tu'ts jaduhñ miäná'anät. ²¹ Haa ca'a, miøødä tu'tspojtspädøjc cuhdujt hajxy jaduhñ coo tu'tsnaax hajxy yajtúnät nebiä jioot hajxy yajmädsøquiän. Pø chojpiä jioothajxy jaduhñ coo tsowdu'ts hajxy piódsät, pues miøødä cuhdujt hajxy jaduhñ coo hajxy jaduhñ piódsät. Y pø chojpiä jioothajxy jaduhñ coo cuhga'aybä hajxy piódsät, jaduhñä cuhdujt hajxy miøødäbä coo hajxy jaduhñ piódsät. Jaduhñ mäwínädsä Dios cuhdujt miøødäbä coo hajxy xyajnähdijjämät nebiä jioot choquiän. Coo jioot jaduhñ chógät coo hajxy xpiädáacämät hawa'adstuum, pues miøødä cuhdujt jaduhñ coo hajxy jim xpiädáacämät. Y coo jioot jaduhñ chógät coo hajxy xpiädáacämät haxøøgtuum, jaduhñä cuhdujt miøødäbä coo hajxy jaduhñ jim xpiädáacämät.

²² Y jaanä jaduhñä Dios cuhdujt miøødäbä coo jaduhñ miee'xtujcy ja'a cahwi-indøjjiäya'aguiøxpä. Miøødä Dios cuhdujt jaduhñ coo ja'a cahwiindøjjiäya'ayhajxy yajcumädowøjät. Pero cab hajxy choj cumädowa'añ, hoy hajxy tøø jia cädieey hanaxiä. Hawiinmats hit jaduhñ coo hajxy paquiä quiümädówät. Y coo Dios hänajty yajcumädowa'añ ja'a quiädieeguiøxpähajxy, hijxtahñdä Dios jaduhñ yajcähxø'øgaamby coo mäjaa møc miøødä. Jaduhñ yajcähxø'øgaambä coo haxøøghäna'c-hajxy tehngajnä quia'a mee'xtuga'añii. ²³⁻²⁴ Coo Dios jaduhñ jecy wyiinmahñdyhajty coo haxøøghäna'c yajcumädowa'añ, paady jaduhñ wyiinmahñdyhajty neby højts jaduhñ hoy nwiinjuøyyämät coo jaduhñ yhawiinmatsä coo haxøøghäna'cä quiädieey hajxy quiümädówät. Jaanä jaduhñduhmbä, paadiä Dios jäya'ay näje'e quia'a yajcumädoy, je'eguiøxpä coo hajxy ñäxuuchii ja'a Diósäm, hoy hajxy hänajty tøø jia cädieey. Jequiän hajxy jaduhñ yajnähdijjä coo hajxy jim ñøcxät Dioswiinduum. Højts jaduhñ xñänøømäm coo Dios hajxy tøø xyajnähdijjäm coo hajxy jim xyajnøcxáañäm wyiinduum, pønjaty hajxy tøø xyajwiinwaanøøyyäm coo hajxy xyhuunghadäänäm, møødä judíoshajxy, møødä cajpä judíoshajxy. Jaduhñ hajxy nwiinjuøyyäm coo Dios møjmayhajt tøø tiuñ maa højtsøxpähajtäm, møød coo hojioot jiaançh tehñ miøødä. ²⁵ Maa Oseas nocy jecy quiujahyän, jaduhñ jim myiñ cujaay coo Dios jaduhñ miänaañ:

Yø'ø jäya'ayhajxy cajpä judíos, cábøch hijty ngu'ughaty.

Cábøch hijty ndsocy. Pero tøøch nyajnähdijnä cooch ngu'ughadäänä. Ndsójnábøch jaduhñ.

²⁶ Wiingtuum miänángumbä: “Cábøch mijts hijty ngu'ughaty.”

Pero jaduhñhajtøch mijts nhuunghadaannä, homiaajä hajxy mhity, nømä Dios miänaañ. Homiänaajä Dios yhity. ²⁷ Y ja'a Isaías, jaduhñ je'e jecy quiujahy: “Yø'ø judíoshajxy, hoy hajxy jaduhñ jia nämayyä nebiä tsäbiu'ujän, näweeñtiä hajxy jaduhñ cho'øga'añ. ²⁸ Ja'a jäya'ayhajxy yaa cädiehbiä hädaa yaabä naaxwiin, mobädajpä

hajxy yajcumädowa'añii ja'a Diósäm. Tähooc-yajcumädoybä hajxy yajcumädowa'añii hoyhoy.”²⁹ Jaaná jaduhñä Isaías jecy miädíaccumbä ja'a judíoscøxpähajxy:

Cøxiä wiinä Dios yhane'emy homiaajä. Coø højtsä Dios häxøpy tøø xquia'a näxúu'tsäm, tøø højts häxøpy ngøxy cuhdägóoyyäm, nebiä jäya'ayhajxy jecy quiuhdägooyyän, ja'a hajxy hijty jegyhajty tsánaabiä maa cajpt hijty xiøhatiän Sodoma møød Gomorra.

³⁰ Nébiøch cham tøø ngujaayän, jequiän højtsä Dios xyajnáhdijy coø højts hánajty xquiuhghada'añ, højts judíoshajpä. Pero, ja'a jäya'ayhajxy cajpä judíos, cabä Dios hijty je'e näxuučh. Ni ja'a jäya'ayhajxy hijty quia'a näxúu'tsábä, ja'a hajxy hánajty ca'a tajp ca'a maabiä maa ñähwaatstaact hajxy piáadät. Pero cahnä jiegø'ø y coø mädia'agy hajxy tøø miädoonä coogä Dios ja'a Jesucristo yaa quiejxy, cooc ja'a Jesucristo hajxy hoy xñähho'túutäm. Coø hajxy jaduhñ miädooy, näje'e hajxy miäbøjcy; paady hajxy tøø ñähwa'ačh, paady hajxy tøø quiuhwa'ačh. ³¹⁻³² Pero yø'ø judíoshajxy, jaduhñäc tyijy hajxy hijty ñähwa'adsa'añ je'eguiøxpä cooc tyijy hajxy hoy quiudiuñ nebiä Moisés jecy quiujahyyän. Pero cab hajxy jaduhñ ñä'a nähwaach je'eguiøxpä coø højiøot miøødä, ca'a jie'eguiøxpä coø jäya'ayhajxy hoy jia wi'i jäya'ayhada'añ. Paadiä judíoshajxy quia'a nähwaach je'eguiøxpä coø hajxy quia'a mäbøjcy coø højtsä Jesucristo xñähho'túutäm. Jaduhñ mäwiin hajxy jiaty nebiä häna'c quiuhnepiän tsaanähgøxp päyø'cujc. Cab hajxy ñä'ägä mech maa hajxy hánajty jia wi'i ñøcxa'añän. ³³ Tøøyyämä Dios hánajty ñajuø'ø y coø judíoshajxy hánajty quia'a mäbøga'añ coø Dios ja'a Jesucristo yaa quiejxy hädaa yaabä naaxwiin. Jimä cajpt tu'ug xiøhaty Siøn. Jimä judíoshajxy chána'ay, ja'a Dios quiuhghajpä. Jaduhñ jim myiñ cujaay maa Diosmädia'aguiän:

Jímhøch ngu'ug chána'ay maa cajpt jaduhñ xiøhatiän Siøn.

Jímhøchä tsa tu'ug nbäda'aga'añ, weenä jäya'ayhajxy jim quiuhnepy maa tsaajän, ween hajxy jim quiäday.

Ja'a Jesucristo jaduhñ mäbaat neby yø'ø tsaajän. Hix, pøn jaduhñ ca'a mäbøjp coø højtsä Jesucristo hoy xñähho'túutäm, jaduhñ je'e miäbaady nebiä häna'c cuhnejpän. Quiumädowaamby je'e. Pero pøn jaduhñ jaančh mäbøjp ja'a Jesucristocøxpä, je'eds hodiium päda'agäänäp.

10

¹ Mägu'ughajpædøjc, jia tsøjpiøch njoot jaduhñ coø judíoshajxy ñähwá'adsät. Jaduhñhøchä Dios nja pa'ya'axy jaaya'aguiøxpä. Haa ca'a, judíohájpeøch høøchpä. ² Jia wi'i quiudiunaambiä Diosmädia'agy hajxy. Tøyhajt jaduhñ. Pero cabä Diosmädia'agy hajxy hoy wyiinjuø'ø y. ³ Hamdsoo hajxy jia wi'i yajniñähwa'adsa'añii yhamdsoo cuhdujtcøxpä. Hix, cab hajxy jaduhñ wyiinjuø'ø y tiiguiøxpä Dios ja'a jäya'ay piäda'agy hawa'adstuum. Paady hajxy jim piäda'agyii coø Dios ja'a miädia'agy hajxy miäbøjcä coø hajxy jaduhñ ñähwa'adsa'añii. ⁴ Pønjaty mäbøjp coø hajxy tøø ñähho'tu'udyii ja'a Jesucristäm, je'edsä Dios näxuu'chp. Coø Jesucristo hajxy cu xquia'a nähho'túutäm, ngumädowáanäm hajxy hijty, je'eguiøxpä coø jecymiädia'agy hajxy tøø nga'a cud-iúunäm, ja'a Moisés jecy quiujáhyyäbä. Ja'a Jesucristo mäbøcypä, ca'xiä jecymiädia'agy quiudiuñ, ja'a Moisés jecy quiujáhyyäbä, nebiä Dios hánajty tøø yhane'emiän. Jaančh tehñ yhooyä Jesucristo jaduhñ yhäna'c-hajty. Cabä pojpa cädieey hánajty ñä'ägädä møødä ni weñtiä. Paady hijty jaduhñ quia'a hahixø'ø y coø jaduhñ cu yho'cy. Pero coø ja'a Jesucristo hajxy hoy xñähho'túutäm, paady yø'ø jecymiädia'agy hajxy jaduhñ xquia'a hanéhmanä, ja'a Moisés jecy quiujáhyyäbä.

⁵ Jaduhñä Moisés jecy quiujahy coø judíoshajxy pedyii quiudiúnät nebiaty hánajty tøø quiujaay. Jaduhñägä hoyhajtä weenhajt hajxy piáadät. ⁶ Coø hajxy nmäbøjcämät maa Jesucristocøxpän, jaduhñä hoyhajtä weenhajt hajxy nbáatämät. Ja'a Diosmädia'agy jaduhñ mänaamb. Pero cab hajxy ndaj nmáayyämät: “Pøn jim nõcxäp tsajpootyp coø yajnáhwaatpä wiömánácät.” ⁷ Ni jaduhñ hajxy nga'a taj nga'a máayyämät: “Pøn jiiby hädá'agäp møjcu'uhaam coø ja'a yajnáhwaatpä wiøbédät, jiiby maa ho'ogyjiäya'ay

yháañámahajxy yhitiän.” Paady hajxy jaduhñ nga'a taj nga'a máayyämät je'eguiøxpä coo Jesucristo yaa tøø yhoonä hädaa yaabä naaxwiin, coo hajxy hoy tøø xñähho'túütänä, møød coo jadähooc jiuypiojtägajch. Hix, jaduhñ hajxy tøø xyajnáhwaats tøø xyajcuhwáatsäm. ⁸ Nägooyä hajxy jaduhñ nmäbøjcämät coo Jesucristo hajxy tøø xñähho'túütäm, jaduhñ hajxy nnähwáatsämät. Cab hajxy jaduhñ pøn xñámáayyämät coo nähwaatstaact hajxy wiingtuum nhøxtáayyämät. Cab hädaa mädia'agy jaduhñ ñä'ägä tsipä. Howyiinjuøñä hädaa mädia'agy jaduhñ. Jaduhñ højts nnä'ägä yajnáhixø'øyhaty. ⁹ Coo hajxy mejtstu'u ngudiúunämät, mänit hajxy nnähwáatsämät. Je'eçh jaduhñ nnänøømby mejtstu'u, coo hajxy nnägápxämät cu'ughagujc coo Jesucristo hajxy nWiindsøn'hájtäm, møød coo hajxy nmäbøjcämät hamuumdu'joot coo Dios ja'a Jesucristo yagjuypiojtägajch mänaabä hánajty tøø yho'oguiän. Coo Dios ja'a Jesucristo jaduhñ yagjuypiojtägajch, jaduhñ hajxy nnajuøyyäm coo Dios ja'a Jesucristo quiumay, møød pønjaty ja'a Diosmädia'agy mäbøjp ja'a Jesucristocøxpä. ¹⁰ Coo hajxy jaduhñ nnä'ägä mäbøjcämät hamuumdu'joot, jaduhñä Dios hajxy xquiumáayyämät. Y coo Jesucristo hajxy nmädiáacämät cu'ughagujc coo hajxy nWiindsøn'hájtäm, mänit hajxy nnähwáatsämät.

¹¹ Jaduhñä Diosmädia'agy miäna'añ: “Pøn jaduhñ jaançh mäbøjp ja'a Jesucristocøxpä, je'eds jaduhñ päda'agáanäp hodiium ja'a Diósäm.” ¹² Hix, tu'cuhdujt højtsä Jesucristo xyhíjxäm, møødä judíoshajxy, møødä ca'a judíoshajxypä. Tu'cuhdujt højtsä Jesucristo jaduhñ xyhuunghájtäm. Coo højtsä Jesucristo nba'yáaxämät coo nbojpä ngädieey hajxy xyajnáhwaatsämät, tsipcøxp højts jaduhñ xñäxúu'tsämät, tsipcøxpä mayhajt jaduhñ tiúnät maa højtscøxphájtäm. ¹³ Jaduhñä Diosmädia'agy miänáangumbä: “Pønä Jesucristo pa'yaaxp, hodiium je'eduhñ piäda'aga'añii ja'a Diósäm.” ¹⁴ Pønjaty ca'a mädoobnä ja'a Jesucristocøxpä, cabä Jesucristo hajxy jaduhñ hoy miänuu'xta'aga'añ. Tøyhajt jaduhñ. Pø cahnä hajxy jaduhñ miädoyhaty coogä Jesucristo hajxy tøø xñähho'túütäm, cab hajxy hoy miäbøga'añ. Pø cahnä hajxy yajwiingapxø'øyii ja'a Jesucristocøxpä, cab hajxy hoy miädowna'añ. ¹⁵ Ja'a Diósädsä cugapxy quejx coo ja'a miädia'agy yajwá'xäxät maa jäya'ayhajxiän, ja'a cahnä hajxy hánajty miädoybä. Jaduhñ jim myiñ cujaay maa Diosmädia'aguiän: “Pønjetiä Diosmädia'agy tøø miädoy coogä Dios yajnáhwa'açh pønjetiä Dios pa'yaaxp, paady hajxy xioonda'agy coo hajxy jaduhñ tøø miädoonä. Jaançh tehñ yhoy jaduhñ coo Diosmädia'agy jaduhñ wia'xy.”

¹⁶ Pero cabä jäya'ayä Diosmädia'agy hajxy nägøxiä tøø miäböcy ja'a Jesucristocøxpä. Jaduhñä Isaiás jecy quiujahy: “Dios, tøø miiçh mmädia'agy nja yajwa'xä, pero cab pøn tøø miäböcy.” ¹⁷ Mayhagajptä Diosmädia'agy tøø wia'xy ja'a Jesucristocøxpä. Tøø jäya'ayhajxy may miädoonä. Näje'e hajxy hoy tøø wyiinjuø'ø. Je'eds hajxy jaduhñ tøø miäböcy. Coo hajxy quia'a mädownät, cab hajxy jaduhñ miäbögät.

¹⁸ Hoorä, ja'a judíoshajxy, tøyhajt jaduhñ coo hajxy je'e miädöyyäbä. Haa ca'a, jaduhñ jim myiñ cujaay maa Diosmädiá'aguiänä: “Wiinduhmyhagajptä mädia'agy tøø wia'xy ja'a Dioscøxpä.” ¹⁹ Y jia wiinjuøyy ja'a judíos ja'a mädia'agy hajxy jaduhñ ja'a Jesucristocøxpä. Pero cab hajxy miäböjcy. Ja'a jäya'ayhajxy ca'a judíospä, je'eds hajxy jaduhñ mäbøjc. Jaduhñä Moisés jecy quiujahy coogä judíoshajxy ñämaayyä ja'a Diósäm: Mbejxyp mijts pønjaty ca'a judíoshajpä cóogøch tyjy nga'a cu'ughaty.

Pero ngu'ughadáambiøch hajxy je'e. Jaduhñ mijts mnänømy cooc tyjy hajxy tii quia'a jaty quia'a najuø'øy.

Pero nnäxuudsáambiøch hajxy je'e, paady mijts mjootma'ada'añ, nømä judíoshajxy jecy ñämaayyä. ²⁰ Mänitä Isaiás høxhaam jiaac cujahy coogä Dios miänaañ:

Pønjetiä nähwaatstaact hijty ca'a høxtaaby, tøøçhä nmädia'agy hajxy xmiäbøjcänä.

Cábøch hajxy hijty xyajtøy, pero tøøçh hajxy nyajwiinjuøñä cooçh hojioot njaançh tehñ miøødä.

²¹ Jadúhñägä Dios miänáangumbä: “Yø'ø judíoshajxy, tøøch hajxy jaduhñ nja wi'li miänuu'xta'agy cooçh nmädia'agy hajxy xmiäbójcät. Pero cab hajxy jaduhñ ñä'ägä mábøga'añ. Jaançh tehñ xiexä quiopcä tiaatsc-hajxy jaduhñ”, nõmä Dios jecy miänaañ.

11

¹ Pero cábøch nmäna'ana'añ coo judíoshajxy tøø ñajtshixø'øyii ja'a Diósäm. Caj pues, caj tiähooçnajtshixø'øyä; paquiä hajxy ñajtshixø'øyä. Haa ca'a, judíoshájpxøch høøçhpä. Abrahámhøch nhaphajt ndeedyhajt. Y ja'a Benjamínhajpä, møød je'eçh nhaphajty ndeedyhajty. Ja'a Abraham yhap yhoc je'ebä, ja'a Benjamínhajpä. ² Cab højtsä Dios tøø xñajtshixø'øy, højts judíoshajpä. Hiç, jequiän højtsä Dios xyajñahdiy coo højts hñajty xquiu'ughada'añ. Jaduhñ jim myiñ cujaay maa Diosmädia'aguiän coogä Elías ja'a miägunaax jecy ñäxø'øwøøyy, ja'a judíoshajxy, ja'a Diosmädia'agy hajxy hñajty quia'a mábøgaambiä. Ja'a Elías, jequiän je'e quiuguexyhajtä Diósäm. Pia'yaaxypä Elías ja'a Dios hñajty coo jaduhñ miänäxø'øwøøyy: ³ “Dios, yø'ø judíoshajxy, haxøøg hajxy tøø jiatcø'øy. Tøø miiçh mguguexyhajxy xyagho'cä. Tøø tsaamaa'xy hajxy yajma'ady maa animalho'ogy hajxy hijty ño'oguiän coo miiçh hajxy hijty xwyiingudsähgø'øy. Nägøxiä jäya'ayhajxy tøø yagho'ogyii, ja'a miiçh hajxy hijty xwyiingudsähgøøbiä. Nidiúhmhøch tøø nmähmø'øy jujcy. Høøçhpaady hajxy xjia wi'li yagho'ogaambä”, nõmä Elías ja'a Dios jecy ñämaayy. ⁴ Mänitä Dios yhadsooy: “Caj tiøyyä cooçh miiçh nidiuhñ xjiaac wiingudsähgø'øyñä. Jé'enøçhä jäya'ayhajxy xwyiingudsähgø'øyñä ja'a hajxy näjuxtujmilpä. Cabä Baal hajxy wyiingudsähgø'øy. Quepychech je'e ja'a Baalhajpä”, nõmä Dios jecy miänaañ. ⁵ Ja'a judíoshajxy, jequiän hajxy jaduhñ yajñahdijjä ja'a Diósäm coo hajxy hñajty quiu'ughada'añii. Paady hajxy jaduhñ quiu'ughadyii coo Dios hojiot jiaançh tehñ miøødä. Pero näweeñtiä judíos ja'a Dios miädia'agy hajxy miäbójcä, caj ñämayyä. Jäda'anäbaadyñä, jiiñä judíos ja'a Dios miädia'agy hajxy näje'e miäbójcä. Je'enä hajxy quiu'ughadyiinä ja'a Diósäm. Coo hajxy jaduhñ ñäxuüçhii, paady hajxy je'enä wioowhidyyii, jaduhñä Dios miädia'agy tehngajñä miäbójcäxät. ⁶ Jaduhñä judíoshajxy yajñahdijjä coo ja'a Dios miädia'agy hajxy miäbójcät ja'a Jesucristocøxpä. Paady hajxy jaduhñ yajñahdijjä je'eguiøxpä coo Dios hojiot miøødä, ca'a jie'eguiøxpä coo hajxy hoy jiäya'ayhaty. Coo jäya'ayhajxy häxøpy ñäxuüçhii ja'a Diósäm je'eguiøxpä cooc tyijy hajxy hoy jiäya'ayhaty, cab hajxy jaduhñ cu nmänáañäm coo Dios hojiot miøødä.

⁷ Hiç, näje'e judíoshajxy yajñahdijjä coo hajxy ñähwá'adsät näweeñtiä. Jaduhñä Dios miädia'agy hajxy miäbójcä ja'a Jesucristocøxpä. Ja'a judíoshajxy nämaybä, cab hajxy jaduhñ yajñahdijjä, hoy hajxy hñajty jaduhñ jia wi'li ñähwa'adsa'añ. Hiç, xejx ja'a quiopcä tiaatsc-hajxy jaduhñ. Cabä Dios miädia'agy hajxy miäbójcä ja'a Jesucristocøxpä. ⁸ Jaduhñ jim myiñ cujaay maa Diosmädia'aguiän: “Tøø quiopcä tiaatsc-hajxy yajxéjxäxä ja'a Diósäm. Jaduhñ hajxy yhity nebiä wiindspän nebiä cuhnatpän høxtä jäda'anäbaadyñä.” ⁹ Jaduhñä David jecy quiujahbiä: Xøødsuu ja'a judíoshajxy naxy yagjájätap. Jadúhñäc tyijy ja'a Diosmädia'agy hajxy hoy quiudiuñ.

Jadúhñäc tyijy hajxy quiumayii ja'a Diósäm. Pero ween hajxy hoy quiumädoy. Hiç, cab hajxy tøyhajt miäbøga'añ.

¹⁰ Ween hajxy jaduhñ jiaty nebiä wiindspän nebiä xoodspän.

Ween hajxy ni mänaa quia'a wiinjuø'øy nebiä piojpä quiädieeyhajxy ñähwá'adsät.

Jaduhñä David jecy quiujahy.

¹¹ Hoorä, nämayyä judíoshajxy tøø quia'a mábøcy ja'a Jesucristocøxpä. Pero cab hajxy nägøxiä ñajtshixø'øwa'añii ja'a Diósäm. Cab hajxy nägøxiä quiumädowa'añ. Pero jaduhñä Dios wyiinmaayy coo jäya'ayhajxy ween miäbøcy ja'a Jesucristocøxpä, ja'a hajxy ca'a judíospä. Coo ja'a ca'a judíoshajxy ñähwaatsnä, paadiä judíoshajxy näje'e jia mänaambä coo hajxy ween ñähwáatspät. ¹² Coo judíoshajxy quia'a mábøjcy ja'a Jesucristocøxpä, paady hajxy paquiä ñajtshixø'øyä ja'a Diósäm. Pero mänitä Dios

wyiinmaayy coo jäya'ayhajxy ween ñähwa'aäch wiinduhmyhagajpt, ja'a hajxy cajpä judíos. Paadiä judíos ja'a quiopcä tiaatsc-hajxy yajxéjxäxä ja'a Diósäm. Paadiä hoyhajtä weenhajt hajxy quia'a mooyyá ja'a Diósäm. Cu miooyyá hajxy jaduñ coo hajxy cu miábøjcy ja'a Jesucristocøxpä. Pero ja'a jäya'ayhajxy ca'a judíospä, ja'a hajxy jim tsänaabiä wiinduhmyhagajpt, je'edsä hoyhajtä weenhajt mäbøcypiä mooyyá. Hoorä, habaadaamb jaduñ coo judíoshajxy miäbøgaambä ja'a Jesucristocøxpä. Mänit hajxy je'e ñähwa'adsaambä. Jaanč tehñ jiootcujc hajxy jaduñ yhidáannäbä. Mänitä jäya'ayä hoyhajtä weenhajt hajxy maas may jiaac mo'owa'añii wiinduhmyhagajpt.

¹³ Mijts jaduñ ca'a judíoshajpä, mijts nyajwiinmädiaagøñäp. Dióshøch jaduñ tøø xwyiinguexy coochä miädia'agy jim nyajwá'xät maa mijtsän. Xtiunngmóoyy-høchä Dios jaduñ. Nägø'ø nädécypiøchä nduung jaduñ nnä'ägä tuñ, ¹⁴ ween mijts nämay mmäbøcy ja'a Jesucristocøxpä, ween mijtsä judíos jaduñ xpiahiy. Coe mijtsä judíos jaduñ xyhíxät coe mijtsä Dios ja'a hoyhajtä weenhajt tøø xmio'oy, mänitä judíoshajxy miäbøgaambä ja'a Jesucristocøxpä. Høøch nmägunaaxhajxy je'e ja'a judíoshajxy. Ween hajxy jaduñ ñähwáatspät neby mijts tøø mnähwa'aächän. ¹⁵ Coe judíoshajxy quia'a mäbøjcy ja'a Jesucristocøxpä, paady hajxy ñajtshixøoyyá ja'a Diósäm. Paadiä Dios hänajty tøø wyiinmay coe mijtsä miädia'agy mmäbøjcänät, pønjayty jaduñ ca'a judíospä. Y coe judíoshajxy jaduñ miäbøjpät ja'a Jesucristocøxpä, mänit hajxy quiuhbøgáañägumbä ja'a Diósäm. Mänit hajxy yagjugyhada'añii homiänaajä ja'a Diósäm neby jaaya'ay jjugyhatiän. ¹⁶ Ja'a judíoshajxy, ja'a Abraham hajxy jecy yhaphajt tieedyhajt. Yhaadshajt tyictshajt ja'a Abraham hajxy jaduñ. Jéquiänä Dios ja'a Abraham quiu'ughajty. Paadiä judíoshajxy jäda'ahaty quiu'ughájtäbä ja'a Diósäm. Jaduñ mäwiinä Abraham miäbaady nebiä quepytyictsän. Y ja'a judíoshajxy, jaduñ mäwiin hajxy miäbaatpä nebiä quepyhaa'xän.

¹⁷ Hoorä, nämayyá judíoshajxy tøø quia'a mäbøcy ja'a Jesucristocøxpä. Paady hajxy tøø ñajtshixø'oyii ja'a Diósäm. Jaduñ mäwiin hajxy miäbaady nebiä olivohaa'x tøø piuhdøjjiän. Jaduñ miädia'agytiägø'oy coe judíos ja'a hoyhajtä weenhajt hajxy quia'a mo'owáañänä ja'a Diósäm. Y mijts ca'a judíospä, jaduñ mäwiin hajxy mmäbaatpä nebiä yuuc-holivohaa'xän coe tøø yagjøjheedsø'oy maa olivohaa'x tøø piuhdøjjiän. Coe hajxy tøø mmäbøjnä, paadiä Dios hajxy xmiooñä ja'a hoyhajtä weenhajt. ¹⁸ Pero caj mijtsä judíos hawiinmats mbéxät. Ca'a hajxy mniguiumayii. Cab hajxy mmäná'anät: "Cabä judíoshajxy quiu'ughájtänä ja'a Diósäm. Højtsä Dios xquiunuu'xy je'eguiøxpä coe Abraham jecy quiunuu'xä møødä yhap møødä yhoc, ja'a judíoshajxy. Coe Dios ja'a Abraham jecy cu quia'a cunuu'xy, ni mijts hijty xquia'a cunuu'xaambä.

¹⁹ Wehñdä pøn miäná'anät: "Yø'ø judíoshajxy tøø quia'a mäbøquiäbä ja'a Jesucristocøxpä, høøchcøxpä hajxy tøø ñajtshixø'oyii ja'a Diósäm. Hix, páadyhøchä Dios xchocy cooch nga'a judíosä. Cabä judíoshajxy chójcänä ja'a Diósäm." ²⁰ Tøyhajt jaduñ. Paadiä judíoshajxy tøø ñajtshixø'oyii ja'a Diósäm coe hajxy tøø quia'a mäbøcy ja'a Jesucristocøxpä. Y mijts, coe hajxy tøø mmäbøcy, paady mijtsä Dios tøø xquiunuu'xy. Pero ca'a hajxy mniguiumayii coe Dios hajxy jaduñ xñä'ä najtshixøøbiät. Hix, caj mijts hijty hoy mjäya'ayhaty. Coe Dios hojioot miøødä, paady hajxy xquiunuu'xy. ²¹ Jaanč tehñ yajcumayaambä judíoshajxy jaduñ. Paady hajxy jaduñ ñiguiumayii coe hajxy tøø quia'a mäbøcy coe hajxy tsipcøxp ñäxuudsøjät ja'a Diósäm. Paady hajxy ñajtshixøoyyá ja'a Diósäm, hoyyá Abraham hajxy jecy jia haphajty jia teedyhajty. Jaanä jaduñ mijtspä, mijts ca'a judíospä, coe mijts jaduñ mniguiumáayyäbät, mänitä Dios hajxy jaduñ xñajtshixøøbiät. ²² Hix, jiaanč tehñ quiunuu'xypä Dios ja'a quiu'ug. Pero pønjetiä Dios tøø ñajtshixø'oy, je'eds hajxy jaduñ jaanč tehñ yajcumädowáañäp ja'a Diósäm. Paady mijtsä Dios xjiaanč tehñ quiunuu'xy, coe hajxy mmäbøcy. Pero pø cab hajxy jaduñ mmäbøgaannä, mänitä Dios hajxy xyajcumädowaambä. ²³ Hoorä, ja'a judíoshajxy tøø quia'a mäbøquiäbä, coe hajxy jaduñ miäbøjpät, mänit hajxy jadähooc quiu'ughájtägumbät ja'a Diósäm. Haa ca'a, miøødä Dios mäjaa jaduñ coe hajxy jaduñ

quiu'ughájtägumbät. ²⁴ Hix, ja'a judíoshajxy, Abraham hajxy jecy yhaphajt tieedyhajt. Jéquiänä Abrahamhajxy yajnáhdijjá ja'a Diósäm coog hajxy jaduhñ quiu'ughadóøjät ja'a Diósäm, mөөdä Abraham yhap yhoc-hajxy, ja'a judíoshajxy. Tөyhajt jaduhñ, paadiä Abrahamhajxy paquiä hoy quiu'ughadáanägumbä Diósäm. Y mijts, jaanä jaduhñ mijtsä Dios xquiu'ughájnäbä, hoy mijts hijty jegyhajty xquia'a cu'ughaty. Paady, ca'a hajxy mmäna'añ cooc tyijy ja'a judíoshajxy quia'a cu'ughajtägatsa'añii ja'a Diósäm.

²⁵⁻²⁶ Mägu'ughajpädøjc, nébiøch chamñ nmädia'aga'añän, náamñnøchä Dios tөө xña-jtscapxøøyyä. Cahnä jäya'ay hädaa mädia'agy hajxy nämay miädoynä. Paady mijts jaduhñ nhawáanäm, jaduhñ hajxy mga'a niguiumayøøjät, hoyyä Dios hajxy tөө xjia cu'ughaty. Tөyhajt jaduhñ coo judíoshajxy nämay tөө quia'a mäböcy ja'a Jesucristocøxpä. Pero habaadaamb jaduhñ coo hajxy nägøxiä miäbögaannä. Mänit hajxy jaduhñ miäböga'añ coo mijts hánajty tөө mmäböcy, ja'a mijts ca'a judíospä, mäduhñtiä hajxy hánajty mmäböga'añ. Jaduhñ jim myiñ maa Diosmädia'aguiän:

Mänitä yajnáhwaatspä jim choona'añ maa cajpt jaduhñ xiøhatiän Siön, maa judíoshajxy chána'ayän.

Cøxaambä judíoshajxy jaduhñ miäböga'añ ja'a yajnáhwaatspäcøxpä. Cøxaambä piojpä quiädieeybä hajxy ñähwa'adsa'añ.

²⁷ Cooch hajxy jaduhñ nyajnáhwá'adsät, mänit jaduhñ tiøjiada'añ nébiøch hajxy hijty tөө nyajwiinwaanøøyän mänáajøch hajxy nmøødyajcuhduquiän hawiinjemy, nømä Dios miänaañ.

²⁸ Coo judíoshajxy tөө quia'a mäböcy ja'a Jesucristocøxpä, paady hajxy tөө ñajtshixøøyii ja'a Diósäm. Y coo hajxy jaduhñ tөө ñajtshixøøyii, paady mijtsä Dios tөө xyajnáhdijy coo hajxy mmäbögåt ja'a Jesucristocøxpä, mijts ca'a judíospä. Pero, hoyyä judíoshajxy tөө quia'a jagä mäböcy, tsójcäpnä hajxy jaduhñ ja'a Diósäm je'eguiøxpä coo yhapä tieedyhajxy jecy yajnáhdijjähä ja'a Diósäm coo hajxy quiu'ughadóøjät. ²⁹ Hix, cabä Dios mänaa yhøhnda'agy. Homiänaajä yajtøjiaty waambaty quiapxy miädia'agy. Y coo Dios jaduhñ jecy miänaañ coogä judíoshajxy homiänaajä quiu'ughada'añii, yejcä Dios ja'a tөyhajt jaduhñ. Hix, cabä Dios ja'a miädia'agy mänaa yajtägach. Jaduhñä tөyhajt hajxy nmøødhájtäm coo Dios jiaançh yajtøjiada'añ waambaty tөө miäna'añ ja'a judíoscøxpähajxy. ³⁰ Mijts ja'a ca'a judíospä, cabä Diosmädia'agy hajxy hijty mmädoyyä. Cabä Dios hajxy hijty mwiingudsähgøøy. Y coo judíoshajxy tөө quia'a mäböcy ja'a Jesucristocøxpä, paadiä Dios hojiot miөөdä ja'a mijtscøxpä. ³¹ Jäda'anäbaadyñä, cabä judíos ja'a Dios miädia'agy jäda'ahaty miäbögaanä ja'a Jesucristocøxpä. Coo hajxy jaduhñ quia'a mäböga'añ, paady mijtsä Dios xñäxuu'tsnä, mijts ca'a judíospä. Hoorä, coo mijtsä judíos xyhíxät coo mijtsä Dios xñäxuu'ch, mänit hajxy jaduhñ miäbögaambä ja'a Jesucristocøxpä. Mänit hajxy ñäxuudsáanäbä ja'a Diósäm. ³² Jéquiänä Dios jäya'ay yhawaanä nägøxiä coo pojpa cädieey hajxy miөөdä, mөөdä judíoshajxy, mөөdä ca'a judíoshajxypä. Jaduhñ hajxy jecy yhawáanähä coo hajxy hawiinmats quiumädówät. Hix, paadiä Dios jaduhñ miänaañ, je'eguiøxpä coo jäya'ayhajxy hánajty nägøxiä ñäxuudsä'añii tu'cuhdujt, mөөdä judíoshajxy, mөөdä ca'a judíoshajxypä. Coo Dios hajxy häxøpy tөө xquia'a näxúu'tsäm, nägøxiä hajxy hijty ngumädowáanäm.

³³ Jaançh tehñ jiajp, jaançh tehñ ñajuøøbiä Dios. Cab hajxy hoy nnä'ägä wiinjuø'owáanäm nebiatiä Dios wyiinmay. Hix, hojiotä Dios jiaançh tehñ miөөd coo hajxy nägøxiä tөө xñäxúu'tsäm, mөөdä judíoshajxy, mөөd cajpä judíoshajxy. Nägøxiä ja'a hoyhajtä weenhajt hajxy xmio'owáanäm tu'cuhdujt. ³⁴ Jaduhñ jim myiñ cujaay maa Diosmädia'aguiän: "Cabä Dios ja'a wyiinmahñdy pøn ñajuøøyyähä. Cabä Dios pøn miäyajtøy nebiä wyiinmahñdyhädät. ³⁵ Cabä Dios pøn miänuu'xyhaty." ³⁶ Hamdsoojootä Dios ja'a naaxwiimbä jecy yhädiuuñ mөөdä jäya'ay nägøxiä. Tijaty yaa jájtäp túunäp hädaa yaabä naaxwiin, ja'a Dios jaduhñ hanehmb coo jaduhñ jiadøøjät, coo jaduhñ tiunøøjät. Y tijaty jaduhñ jadaänäpnä tunáanäpnä, ja'a Dios jaduhñ yajtøjiadaamb nebiaty hánajty tөө wyiinmay. Tsögä Dios hajxy möj jaançh pädáacäm homiänaajä. Tsög hajxy homiänaajä wiingudsähgøøyyäm. Amén.

12

¹ Mägu'ughajpädöjc, miøødä Dios hojioot maa højtscøxphájtäm. Chamčh mi-jts nhane'emy coo hajxy hamuumdu'joot mniyegøøjät Dios quiø'øjooty tiecyjiooty. Jaduhnä Diosmädia'agy hajxy hoy mgudiúnät hamuumdu'joot. Jaduhnä Dios hajxy hoy mwiingudsähgø'øwät nebiä Dios hajxy xyajmädsøquiän. ² Ca'a hädaa wiinmahñdy hajxy myajtuñ nebiä jäya'ay wyiinmahñdyhajxy yaajän. Pønjetiä Dios quia'a cu'ughajpy, je'eds hädaa yaabä wiinmahñdy hajxy yajtuumb. Cabä yhaxøøgwiinmahñdy hajxy ñajtshixø'øwa'añ. Ca'a hajxy mbahixy. Hawiinjemybiä wiinmahñdy hajxy jaduhn mmøødhájnap, je'eguiøxpä coo Jesucristo hajxy mmøødhijnä tu'ugjoot tu'ugwiinmahñdy. Jaduhnä tøyhajt hajxy mmøødhádät tijatiä Dios hajxy xyajmädsøjp coo hajxy mdúnät. Homiänaajä Dios hajxy xyajmädsøjcäm coo hajxy hoy njäya'ayhájtämät, coo hajxy hoy ndúunämät. Coo hawiinjemybiä wiinmahñdy hajxy jaduhn mmøødhájtämät, jaduhnä tøyhajt hajxy jaduhn mmøødhájtämät tijatiä Dios hajxy xyajmädsøjcäm coo hajxy ndúunämät.

³ Mayhajtä Dios jaduhn ñä'a tuun ja'a høøchcøxpä coočhä cuhdujt jaduhn xmiooyy coočh mijts nmägäpx nhané'emät. Ca'a hajxy mniguiumayii cooc tyijy hajxy cøxiä wiinä mjaančh tehñ jiaty. Tijatiä tuungä Dios hajxy tøø xmio'oy, je'eds hajxy mmøjpäda'agäp. Ca'a wiingtuung hajxy mmøjpäda'agy. Hoy hajxy mdúnät nebiatiä Dios hajxy tøø xyajnähdijy. ⁴ Hix, nägøxiä ni'xcopc hajxy mmøødhájtäm møødä cø'ødecy, møødä wiinjøjp, møødä copctaatsc. Cab hajxy tiu'ugtuungä; haagä hawiingjaty hajxy tiuñ. Pero haagä tuungpaatp hajxy jaduhn. ⁵ Jaduhn mäwiin højts nmäbáatäm nebiä tu'ugni'x tu'ugcøpcän coo hajxy tu'cuhdujt nmäbøjcäm ja'a Jesucristocøxpä, hoy hajxy nja nämayahájtäm. Jaduhn hajxy hawiingjaty ndúunäm. Jaduhn hajxy nnibihbéjtäm hamiñ haxøpy.

⁶ Tsøg hädaa tuung hajxy hoy yajnøcxäm nebiatiä Dios hajxy tøø xyhanéhmäm. Mayhajtä Dios jaduhn tiuun coo wiinmahñdy hajxy cøjwiinduum xmióoyyäm nebiaty hajxy ndúunämät. Pønjaty tøø tiuungmo'oyii coo Dios ja'a miädia'agy hajxy yajwá'xät nebiaty hajxy hánajty tøø ñajtsapxøøyyäxä, ween hajxy jaduhn yajwa'xy nebiaty hajxy hánajty piuhbedyii. ⁷ Pønjaty tøø tiuungmo'oyii coo hajxy miäbuhbédat, ween hajxy hamuumdu'joot tiuñ. Pønjaty tøø tiuungmo'oyii coo Diosmädia'agy hajxy yajwá'xät, ween hajxy hoy yajwa'xy. ⁸ Pønjaty tøø tiuungmo'oyii coo hajxy miäjootcapxmøcpøgät, ween hajxy hoy tiuñ. Pønjaty mäyøø, weenä häyoobä hajxy piuhbety hamuumdu'joot. Pønjaty tøø tiuungmo'oyii coo hajxy miähané'emät maa tsajtøjcän, ween hajxy hoy miähane'emy. Hix, Dios ja'a cuhdujt jaduhn yejc coo hajxy jaduhn miähané'emät. Pønjaty tøø tiuungmo'oyii coo mayhajt hajxy tiúnät maa häyoobädøjcän, møød maa yaamgto'oxyhajxiän, ween hajxy hamuumdu'joot piuhbety. Møød weenä pa'amjäya'ay hajxy quiuhixy.

⁹ Tsøg hajxy hamuumdu'joot ničhøjcäm nibia'häyóowäm. Tsøgä haxøøgpä hajxy najtshixøøyyäm. Tehngajnä howyiinmahñdy hajxy tsøc tsøjcäm. ¹⁰ Hamiñ haxøpy hajxy mničhogøøjät mnibia'häyowøøjät neby tu'ugpuhya'ay neby tu'ugpuhdo'oxypän. Hamiñ haxøpy hajxy mniwiiingudsähgø'øwøøjät. Cab hajxy mnibiexøøjät.

¹¹ Hamuumdu'jootä Wiindsón Jesucristo hajxy mmädúnät. Jootcujc hajxy jaduhn mdúnät. Cab hajxy jaduhn mänaa mnänuuxø'øwät.

¹² Coo hajxy pøn xchaačhtiúnät, cab hajxy mmøjpäda'agät; mmee'xtúgäp hajxy jaduhn. Mnajuøøby hajxy jaduhn coo hajxy jim mnøcxa'añ maa Dioswiinduumän. Paady hajxy jaduhn mxoondá'agät. Homiänaajä Dios hajxy mba'yá'axät.

¹³ Coo pøn tii yajmaajiádät, naxy hajxy mdehñ piuhbédat. Je'ečh jaduhn nnänøømby pøn jaduhn mäbøjp ja'a Jesucristocøxpä. Pønjaty jaduhn mejtsp maa mdøjc-hajxiän, myajtøjtägø'øwäp hajxy je'e. Myajcáyäp myaghú'ugäp hajxy jaduhn.

¹⁴ Coo hajxy pøn xchaačhtiúnät, cab hajxy mmähanhádät. Pero mmänuu'xtá'agäp ja'a Dios hajxy coo hajxy ween ñähwa'ačh.

¹⁵ Pønjaty xoon̄daacp, mmøødxoon̄dá'agäp hajxy je'e. Pønjaty jøøby xuu'tsp, mmøød-jø'ow mmøødxúudsäp hajxy je'ebä.

¹⁶ Tu'ugcopc tu'ugwiinmahñdy hajxy mnimiøødhidøøjtät. Cab hajxy pøn mbéxät. Jootcujc hajxy mhídät, hoyyá møjtuung hajxy mga'a jagä møødä. Cab hajxy mänaa mniguiumayøøjtät.

¹⁷ Coö häna'c hajxy xyhäyoowhíxät, cab hajxy myaghawiimbijtagátsät. Hoy hajxy mjäya'ayhádät, jaduñnä Dios hajxy jaduñ xquiumáyät; jaduñ mijtsä cu'ug waamb xquia'a nänómät. Pero xwyiingudsähgø'owäbä cu'ug hajxy jaduñ. ¹⁸ Coö mijtsä cu'ug xjia wi'i jiojcapxø'owät coö hajxy jaduñ mbahíxät nebiaty hajxy haxøøg jiatcø'øyän, cab hajxy jaduñ mbahíxät. Pero coö hajxy waamb xquia'a nämá'awät, mäniit hajxy hoy yajxon̄ mmøødmädiá'agät. Cab hajxy pøn mmädsiphádät. ¹⁹ Mägu'ughajpädøjc, coö hajxy pøn xyhäyoowhíxät, cab hajxy myaghawiimbijtagátsät. Dios jaduñ yaghawiimbídäp. Jaduñ jim myiñ cujaay maa Diosmädia'aguiän coögä Dios jaduñ miänaañ: "Høøch jaduñ nyaghawiimbídäp." ²⁰ Coö hajxy pøn xmiädsiphádät, cab hajxy mmädsiphajtagátsät. Jaduñnä Diosmädia'agy miäna'añ: "Pø yähó'cäbä häna'c ja'a miich hñajty jaduñ xmiädsiphajpä, myajcáyäp myaghú'ugäp jaduñ. Pø tødsøyyäp, mmó'owäbä nøø. Coö jaduñ mgudiúnät, hoyhoyyá häna'c chähdiúnät, ja'a miich hñajty jaduñ xmiädsiphajpä." ²¹ Nägüeeñtä hajxy mhídät, cabä haxøøgpä hajxy myaghawiimbijtagátsät. Coö hajxy jaduñ mjatcø'owät, myajcähxø'ogäp hajxy jaduñ coö mhaxøøgwiinmahñdy hajxy hñajty tøø mbadu'ubójcumbä. Pero coö häna'c hoy yajxon̄ mmägápxät, ja'a mijts hñajty xmiädsiphajpä, jaduñ hajxy myajcähxø'ogät coö hawiinjemybiä wiinmahñdy hajxy hñajty mmøødhajnä. Mäniitä Dios jaduñ xquiumáyät.

13

¹ Tsøg hajxy nägøxiä cudiúunäm nebiatiä cuduung hajxy xyhanéhäm. Hix, Dios ja'a cuhdujt møc møød. Je'e ja'a cuhdujt yejp jadähooc. Pønä cuhdujt møød, paady jaduñ miøødä coö tøø mio'oyii ja'a Diósäm. ² Pøn jaduñ ca'a cudiunaamb nebiatiä cuduung jia hane'emiän, quiumädowaamby hajxy je'e. Hix, ja'a Dios ja'a cuduung pädaac coö yhané'emät. Jaduñds je'e, pø cab hajxy jaduñ mgudiuna'añ nebiatiä cuduung yhane'emiän, jaduñ miäbaady coö Dios miädia'agy hajxy mga'a cudiunaañä. ³ Pønjaty hoy wädijp, cabä cuduung hajxy chähgø'øy. Pero pønjaty hoy ca'a wädijp, je'eds mäböcypiä tsähgøøby. Coö hajxy hoy mwädítät, mäniitä cuduung hajxy xquiumáyät. Cab hajxy jaduñ xchaächtiúnät. ⁴ Hix, ja'a cuduunghajxy, moonsähjtäp hajxy je'e ja'a Diósäm. Paady hajxy jaduñ tiuñ, coö mijts hajxy jaduñ xwioowhídät. Jaduñnä cuhdujt hajxy tøø mióoyyäbä coö mijts hajxy xyajcumädówät coö mijts hñajty tøø mgädieey. Paady hajxy jaduñ mdsähgø'owät. ⁵ Naxy hajxy mdehm̄ quiudiúnät nebiatiä cuduung hajxy xyhane'emiän, coö Dios hajxy jaduñ xñä'ä yajcumädówät. Jaanä jaduñduhmbä, coö hajxy hamdsoo mnajuø'øy coö jaduñ yhahixø'øy coö hajxy hoy mwädítät, paady hajxy jaduñ mgudiúnät waambatiä cuduung hajxy xyhane'emiän. Coö hajxy jaduñ mga'a cudiúnät, cab hajxy jootcujc mhídät, je'eguiøxpä coö hajxy hñajty mnajuø'øy hamdsoo coö hajxy hñajty tøø mgädieey. ⁶ Jaanä jaduñduhmbä, tsipcøxp hajxy mnähjuudiú'udät tijaty häna'c hajxy xyajnämaaby coö hajxy mnähjuudiú'udät. Hix, ja'a Dios ja'a cuhdujt jaduñ yejc coö mijtsä häna'c jaduñ xyagjúyät.

⁷ Hahixøøby jaduñ coö cuduung hajxy mmäjúyät nebiaty hajxy xyajnäma'ay. Jaanä jaduñ yhahixøøbiä coö cuduung hajxy mwiingudsähgø'owät, miøjjä miuutscä.

⁸ Naxiä mnuu'xy hajxy mdehm̄ jahmiédsät. Naxy hajxy mniçhogøøjtät nebiä tu'ugpuhya'aybän, nebiä tu'ugpuhdo'oxypän. Hix, pøn wiinghäna'c tsojp, hoy jaduñ quiudiúñ nebiatiä Dios hajxy xyhanéhäm. ⁹ Jaduñnä Diosmädia'agy miäna'añ: "Pø jim miich mdo'oxiøjc, cabä wiingpä mmøødhídät. Cab mmäyaghó'ogät. Cab mméedsät. Cabä mmädøjcä jie'e mhadsøjcät." Hoorä, coö wiinghäna'c mdsógät hamuumdu'joot, hoy jaduñ mgudiúnät nébiøch naamnä tøø nmädia'aguiän. ¹⁰ Hix, pøn wiinghäna'c jaançh

tsojp hamuumdu'joot, cab jaduñ mänaa yhäyoowhixa'añ. Hoorä, coo wiinghäna'c mjaančh tsógät hamuumdu'joot, hoy ca'xy mgudiúnät nebiä Dios yhane'emiän.

¹¹ Naxy hajxy jaduñ mdehm ñičhogóójät. Hiç, mnajuøøby hajxy jaduñ coo tøø jicy mänaa hajxy tøø mmäbøquiän. Habáatnäp jaduñ coo Jesucristo hajxy miñ xyajpädø'ogáanäm, coo hajxy jim xyajnøcxáanäm tsajpootyp. Nägüeentä hajxy jaduñ mwädítät. Hiç, cab hajxy nnajuøøyyäm mänaa Jesucristo yaa quiädaactägatsa'añ, coo hajxy jaduñ xñä'ä nähgädaacpéjtämät. Hiç, coo jaduñ quiädaactägátsät, mänit hajxy xyajtøyhajtyegáanäm. ¹² Habáatnäp jaduñ coo hajxy yaa ndsoonáanäm, coo hajxy jim nnøcxáanäm tsajpootyp. Tsøcxä ja'a haxøøgpä hajxy najtshixøøyyäm neby hajxy yaa tøø njäya'ayhájtäm, cahnä Dios hajxy hánajty nwiingudsähgøøyyäm. ¹³ Tøø Dios hajxy xyajnähdíjjäm coo hajxy homiánaajä njugyhájtämät neby je'e jiugyhatiän. Paadiä Diosmädia'agy hajxy hoy nbanøcxáanäm. Tsøcxä hajxy hoy wädíjtäm, ca'a jiaduñnä nebiä häna'c-hajxy hagogdstuum wädijpän. Cab hajxy mhaxøøghu'ug mhaxøøgjóø'xät. Cab hajxy comjaty mhú'ugät. Cab hajxy jim mnøcxät maa cuhhiñdo'oxiøjc-hajxiän. Tsøgä to'oxiøjc hajxy wiingudsähgøøyyäm. Hiç, ja'a cu'ug hajxy xyhíjxäm neby hajxy njäya'ayhájtäm, pø hoy, pø caj. Cab hajxy haxøøg mnä'ägä jatcø'øwät. Cab hajxy pøn mmähänhädät, hoy hajxy jia mäyøøjä que mijts. Cab hajxy tii mmädsibø'øwät. ¹⁴ Ja'a Jesucristo hajxy nWiindsønähájtäm. Je'e hajxy xyhanéhmäm. Jaančh tehñ yhoy je'e wyiinmahñdyhaty. Naxy hajxy jaduñ mdehm miøødhídät tu'ugjoot tu'ugwiinmahñdy. Jaduñnä mhaxøøgwiinmahñdy hajxy hoy mhøxhíxät. Jaduñ hajxy hoy mhäna'c-hädät.

14

¹ Jii jäya'ayhajxy näje'e, cahnä Diosmädia'agy hajxy hoy yhabøcyñä, hoy hajxy tøø jia mäbøcy ja'a Jesucristocøxpä. Hahixøøby jaduñ coo hajxy mmägu'ughädät. Pero cab jaduñ yhahixø'øy coo mädia'agy hajxy mmøødyajyónät ja'a cuhdujtcøxpä. ² Pønhatiä Diosmädia'agy hoy tøø yhabøcy, ñajuøøby hajxy je'eduhñ coo jaduñ yhawiinmatsä coo hotyijjä mgáyät. Pero pønhaty hoy tøø quia'a habøcy, cábac tyijy yhoyä coo tsu'učh ndsú'tsämät. Páadiäc tyijy quia'a hoyä coo tsu'učh ndsú'tsämät, yajnajuøøby jaduñ coo häna'c ja'a tsu'učh hajxy hánajty tøø quiunuu'xy maa habojsnaxy wyiinduumän. Jaduñäc tyijy miäbaady néjjiämä habojsnaxy jaduñ mwiingudsähgøøbiän. ³ Hoorä, pø mdsu'chp miichä tsu'učh, cab jaduñ mbéxät ja'a häna'cä tsu'učh ca'a tsu'tspä. Jaanä jaduñduhmä, pønä tsu'učh ca'a tsu'tsp, cab jaduñ waamb ñämä'awät ja'a häna'cä tsu'učh tsu'tspä cooc tyijy jaduñ quiädieey. Haa ca'a, ja'a Dios yhuung je'ebä. ⁴ Cabä cuhdujt jaduñ myiñ coo waamb mnämä'awät pønä Diosmädia'agy panøcxp. Haa ca'a, ja'a Dios ja'a mioonsä je'ebä. Jagooyä Dios cuhdujt jaduñ miøødá coo miäná'anät pø hoyä mioonsä quiudiuñ, pø caj. Hamdsoojä Dios jaduñ ñämä'awät neby hoy wiädítät. Haa ca'a, ja'a Dios je'e hanehmäb.

⁵ Näje'ejä jäya'ayhajxy miäna'añ coo poo'xxiøø jyijjä mädyii hajxy yhamajtsch-hädäp. Näje'e hajxy miänaambä coo Dios hajxy homiánaajä nwiingudsähgøøyyämät. Pero mijts, jaduñ hajxy mgudiúnät nebiä Dios hajxy hamdsoo tøø xyajwiinjuø'øyän. ⁶ Hiç, pønhaty jaduñ mänaamb coogä poo'xxiøø jyijjä, nägüeentä hajxy jaduñ wiädity ja'a poo'xxiøøjooty. Jaduñä Dios hajxy wyiingudsähgøøy. Jaanä jaduñduhmä, pønhaty jaduñ mänaamb cooc jaduñ quia'a cádieeyä coo tsu'učh ndsú'tsämät, hoy hánajty tøø jia cunuu'xyii maa habojsnaxy wyiinduumän, mioobiä Dios Dioscujú'uyäp jaduñ coo jaduñ yajcayii. Jaanä jaduñduhmä, pøn jaduñ mänaamb cooc jaduñ quia'a hoyä coo tsu'učh ndsú'tsämät, jaanä jaduñä Dios Dioscujú'uyäp mioobiä coo jaduñ yajcayii.

⁷ Coo Diosmädia'agy hajxy nmäbójcäm ja'a Jesucristocøxpä, paady hajxy xmioonsähájtäm. Paady jaduñ quia'a hahixø'øy coo hajxy njäya'ayhájtämät nebiä nhamdsoojoot hajxy chójcäm. Ni ja'a cuhdujt hajxy nga'a møødhájtäm coo hajxy hamdsoo nniyajnähdíjjämät mänaa hajxy nho'ogáanäm ndägoyyáanäm. ⁸ Ja'a Jesucristo hajxy xmioonsähájtäm mäduhñtiä hajxy yaa njugyhájtäm, hoy ñejpiä hajxy cu nja jajt cu nja habéjtäm. Y coo hajxy nho'c coo hajxy ndägóoyyämät, je'enä hajxy hánajty

xmioonsähadäänäm homiänaajä. ⁹ Coo ja'a Jesucristo hajxy xñähho'túutäm, mänit jadähooc jiuypjöpjtägajch. Jaduhñ hajxy xquiu'ughájtäm, pønjaty jaduhñ mábøjp, møød hajxy tøø yhö'oguiäbä, møød hajxy jaac jujcypä jaac tsuxpä. Jaanä jaduhñ hajxy xyhanéhmbä.

¹⁰ Cabä mmägu'ughajpä hajxy hawiinmats mbéxät, hoyyä Diosmädia'agy hajxy hoy quia'a jagä habøcyñä. Cab hajxy pøn mnämä'awät cooc tyijy hajxy hoy quia'a cudiuñ, hoyyä wiingcuhdujt hajxy jia panøcxy. Hix, coo Jesucristo yaa quiädaactägätsät, mänit hajxy nägøxiä jim nnoxø'owáanäm ja'a Jesucristo wyiinduum tøyhajtyejpä. ¹¹ Jaduhñ jim myiñ maa Diosmädia'aguiän:

Nägøxiöchä jäya'ayhajxy nøcxy xwyiinijina'awa'añ.

Xwyiingudsähgø'owáambøch hajxy jaduhñ. Jaduhñhøch hajxy xquiapxpaadaambä cooch nidiuhñ nDioshaty. Tøyhajt jaduhñ, nömä Dios miänaañ. ¹² Jaduhñ hajxy nyajnajuøyyäm coo hajxy nägøxiä jim nøcxy ndøyhajtyegáanäm Dioswiinduum.

¹³ Cab hajxy tsøc niñänøsmänä cooc tyijy ja'a Diosmädia'agy hajxy hoy nga'a panøcxäm. Pero jaduhñ tsøc cudiunäm nebiatiä mábøjpädøjc-hajxy quiudiuñän, jaduhñ hajxy waamb xquia'a nänøsmämät. Pøn jaduhñ mänaamb cooc tyijy quia'a hawiinmatsä coo tsu'uch ndsú'tsämat, pues, hahixøby jaduhñ coo mga'a tsú'udsät coo hänäjty mmøødhty. Hix, wehñdä miich jaduhñ xpiadsú'udsät. Coo miich jaduhñ xjiaanç padsú'udsät, cädiéyap je'eduhñ. ¹⁴ Cab jaduhñ quiädieeyä coo tsu'uch ndsú'tsämat, hoy hänäjty tøø jia cunuu'xyii maa habojsnaxy wyiinduumän. Nmøødhøchä tøyhajt jaduhñ. Hix, tu'ugmädiä'agyhøchä Jesucristo nmøødhty, ja'a nWiindsønhtëmbä. Pero jii jäya'ayhajxy näje'e miäna'añ cooc tyijy quia'a hoyyä coo tsu'uch ndsú'tsämat. Coo hajxy jaduhñ jiaanç tsú'udsät, ja'a hajxy jaduhñ mänaambä, pues, cädiéyap hajxy jaduhñ. ¹⁵ Hoorä, coo miichä tsu'uch jaduhñ mdsú'udsät, y coo jaaya'ay jaduhñ xpiahíxät, ja'a jaduhñ mänaambä cooc tyijy quia'a hoyyä coogä tsu'uch mdsú'udsät, myajcädiéyap miich je'eduhñ. Pø jaanç tøy mdsocy, cab jaduhñ myajcädiéyät, je'eguiøxpä coo Diosmädia'agy miäbøcy. Hix, ja'a Jesucristo jaaya'ay tøø ñähho'tu'udy. Pero coo myajcädiéyät, wehñdä Jesucristo miädia'agy ñajtshixøyyäxät. ¹⁶ Y coo jaaya'ay jaduhñ myajcädiéyät, wehñdä miich myajnänøsmät. Y wehñdä jaaya'ay yajnänøsmät, ja'a Jesucristo miädia'agy tøø ñajtshixøyyäbä. Jaduhñds je'e, maas hoy hit jaduhñ coo tsu'uch mga'a nä'ägä tsú'udsät, hoy jaduhñ mja najuø'y coo jaduhñ quia'a cädieeyä coo mdsú'udsät. ¹⁷ Coo hajxy tøø nmäbøjcäm ja'a Jesucristocøxpä, paadiä Dios hajxy xyhanéhmbänä. Hix, cabä Dios waamb miäna'añ coo hajxy hotyijä ngaayy nhúucäm; ni jaduhñ quia'a mänaambä coo hajxy tii nga'a caayy nga'a húucämät. Coo Dios hajxy tøø xpiädáacäm hawa'adstuum, paady hajxy hoy njäya'ayhájtäm, paady hajxy jootcujc nnimiøødhíjtäm, paadiä Dioshëpíritu hajxy xyajxoondáacäm. ¹⁸ Hoorä, pønä Jesucristo miädia'agy jaduhñ cudiunäänäp, cumayäänäp je'e ja'a Diósäm møødä cú'ugäm. Tsøcxä hajxy jaduhñ cudiunäm nebiä mábøjpädøjc-hajxy quiudiuñän.

¹⁹ Mägu'ughajpädpøjc, tsøgä hoybä hajxy tehngajnä høxtáayyäm, jaduhñ hajxy jootcujc nnimiøødhíjtämät, jaduhñ hajxy hoy nniguiapxmøcpøjcämät, jaduhñä Jesucristo miädia'agy hajxy hoy ngudiunämät hamuumduljoot. ²⁰⁻²¹ Cab jaduhñ quiädieeyä coo hajxy hotyijä ngaayy nhúucämät. Pero pø jii mábøjpädøjc-hajxy jaduhñ näje'e miäna'añ cooc tyijy ja'a tsu'uch hajxy nga'a tsú'tsämat, cooc tyijy ja'a vino hajxy nga'a húucämät, pues, maas hoy jaduhñ coo mga'a tsú'udsät, coo mga'a hú'ugät. Hix, coo hajxy jaduhñ xyhíxät coo hänäjty jaduhñ mgay mhu'ugy, wehñdä hajxy jaduhñ xpiahíxät. Y coo hajxy jaduhñ xpiahíxät, cädiéyap hajxy jaduhñ. Jaduhñ quiähxø'ogät coo miich hänäjty tøø myajcädieey. Y cab jaduhñ yhooyä coo mábøjpädøjc myajcädiéyät hoy ñä'a tiiguiøxpä. Hix, jia wi'i pianøcxäänäbä Jesucristo miädia'agy hajxy jaduhñ, y coo hajxy jaduhñ quiädieeyät, cab hajxy jaduhñ hoy pianøcxät. ²² Hoy miich mja najuø'y coo quia'a cädieeyä coo hotyijä mgay mhú'ugät, cab jaduhñ yhooyä coo wiinghäna'c mmøødyajtsibø'owät. Ja'a Dios miich jaduhñ xyhijxp coo hoy mgudiuñ.

Pøn jaduhñ najuøøby coo quiumayii ja'a Diósäm nebiä quiuhdujthaty, jootcuyc je'eduhñ yhity. ²³ Pero pøn jaduhñ ca'a najuøøby pø yejpiä Dios cuhdujt jaduhñ coo tsu'učh ndsú'tsämät, pø caj, coo je'e jiaančh tsú'udsät, cädiéeyäp je'eduhñ, hoy hamdsoo jaduhñ jia mäna'añ cooc tyijy ja'a Dios tøø miäna'añ coo hajxy nga'a tsú'tsämät. Paady jaduhñ miäna'añ, wehñdä tsu'učh hñanjty tøø quiunuu'xyii maa habojsnaxiä wyiinduumän. Jaanä jaduhñduhmbä, hoy ñä'ä tiiguiøxpä, pøn jaduhñ ca'a najuøøby pø tøø Dios cuhdujt jecy je'eguiøxpä, o pø caj, coo jaduhñ jiaančh jatcó'øwät, cädiéeyäp jaduhñmbä.

15

¹⁻² Nnajuøøyyäm højts jaduhñ coo quia'a cädieeyä coo hajxy hotyijä ngaayy nhúucämät. Pero tsögä nmägu'ughajpädøjc ja'a Diosmädia'agy jaac yajmäbøjcäm, ja'a hajxy naamdägø'øy habøjpä, ja'a hajxy jaduhñ mänaambä cooc tyijy quia'a hawiinmatsä coogä tsu'učh ndsú'tsämät, coogä vino nhúucämät. Cabä nhamdsoo cuhdujthajtiä hajxy nyaghíjtämät; møødä Dioscuhdujt hajxy nyaghíjtämät. ³ Hix, mänaa Jesucristo yaa yhitiän hädaa yaabä naaxwiin, cabä yhamdsoo cuhdujt hñanjty yaghity. Ja'a Tieediä miädia'agy jaduhñ quiudiuunä, paady jaduhñ chaächpøjcy. Jaduhñ jim myiñ cujaay maa Diosmädia'aguiän: “Pønjaty miičh haxøøg xñänøømb, jaduhñ mäwiin miäbaady néjjiäm høøch xñänøømbän”, nømä Jesucristo ja'a Tieedy ñämaayy. ⁴ Ja'a højtscøxpä Dios ja'a miädia'agy jecy yajcujahyyä, jaduhñ hajxy hoy ngapxtáacämät. Jaduhñ højtsä tøyhajt nmøødhájtäm coo Dios yajtøjiada'añ neby jecy yajcujahyyän coo højts jim xyajnøcxáanäm maa wyiinduumän. Coo hajxy jaduhñ nnajuøøyyäm coo hajxy jim nnøcxáanäm, paady hajxy hotyijä nme'e'xtújcämät. Cab hajxy tsøc jootmayhájtäm, hoy hajxy cøxypänejpiä cu nja jajt cu nja habéjtäm. ⁵ Ja'a Dios hajxy jaduhñ xpiuhbéjtäm coo hajxy jaduhñ nme'e'xtújcämät, coo hajxy jaduhñ nga'a jootmayhájtämät. Ween mijtsä Dios xpiuhbety coo hajxy jaduhñ mbahíxät nebiä Jesucristo hoy yhitiän. Jootcuyc hajxy jaduhñ mnimiøødhidøøjtät tu'ugmädia'agy. ⁶ Jaduhñ hajxy tu'ugmädia'agy mhídät coo Dios hajxy mgapxpáadät møj jaančh. Ja'a Dios, ja'a Jesucristo Tieedy je'e. Ja'a Jesucristo hajxy nWiindsønhájtäm.

⁷ Hoorä, nebiä Jesucristo hajxy xchójcäm, jaanä jaduhñ hajxy hamuumdu'joot nničhójcämät. Coo cu'ug hajxy jaduhñ xyhíjxämät coo hajxy hñanjty nničhójcäm, jaduhñä cu'ughajxy ñajuø'øwaambä coo Dios miøjjä jiaančhä. ⁸ Jéquiänä Dios jaduhñ miänaañ coogä yajnähwaats yajcuhwaatspä quiexa'añ maa judíoshajxiän. Ja'a judíos ja'a yhapä tieedy hajxy, je'eds hajxy jaduhñ jecy hawáanäxä, møødä Abraham, møødä Isaac, møødä Jacob. Coo Jesucristo yaa quiejxä hädaa yaabä naaxwiin, hoyyä judíoshajxy piuhbodyii. Tøjijajt jaduhñ nebiä Dios jecy miänaañän coo yajnähwaats yajcuhwaatspä hñanjty quiexa'añ. Hix, tømíädiaacpä Dios. Caj mänaa yhøhñda'agy. Tøyhajt jaduhñ. ⁹ Jaanä jaduhñduhmbä, paadiä Jesucristo yaa quiejxä, hoyyä jäya'ayhajxy piuhbéjtäbä, ja'a hajxy ca'a judíospä. Coo hajxy jaduhñ ñäxúu'tsäbä ja'a Diósäm, paadiä Dios hajxy møj jaančh quiapxpaady. Jaduhñ jim myiñ cujaay maa Diosmädia'aguiän: Miičh ngapxpaadaamby møj jaančh näguipxy møød hajxy ca'a judíospä.

Høyháamhøch miičh nwiingudsähgø'øwa'añ,

nømä Dios ñämaayy. ¹⁰ Wiingtuumä Diosmädia'agy myíngumbä cujaay:

Mijts ca'a judíospä, xoonnda'ag hajxy møødä Dios quiu'ughajxy näguipxy.

¹¹ Jaduhñ cujaay myíngumbä wiingtuum:

Mijts ca'a judíospä, weenä Dios hajxy møj jaančh mgapxpaady wiinduhmyhagajpt.

¹² Wiingtuumä Isaías jecy quiujáhguiumbä:

Ja'a Isai yhapä yhoc, minaamb je'e miähane'ema'añ.

Ja'a jäya'ayhajxy ca'a judíospä, je'eds hajxy jaduhñ hane'emáanäp.

Jaaya'ay hajxy jaduhñ jibbhijxyp coo hajxy min yajnähwa'ads yajcuhwa'adsa'añii,

nømä Jesucristo jecy ñänøømä, møødä jäya'ayhajxy ca'a judíospä.

¹³ Hoorä mijts, coo Diosmädia'agy hajxy tøø mmäbøcy, weenä Dios hajxy hoyhoy xyajxoonnda'agy, ween hajxy xyaghity jootcuyc. Hix, tøø Dios hajxy xyhawáanäm coogä

hoyhajtä weenhajt hajxy xmio'owáañäm ca'xy pedyii. Hamuumdu'joot hajxy jaduhñ mjøbhíxät. Xpiuhbédäbä Dioshespíritu hajxy jaduhñ ja'a miäjaahaam.

¹⁴ Mägu'ughajpádøjc, nmóødhøchä tøyhajt jaduhñ coo hajxy hamuumdu'joot mniçhocy mnibia'häyoyii, møød coo hojioot hajxy mmøødä, møød coo Diosmädia'agy hajxy hoy mwiinjuø'øy, møød coo hajxy mjaty mägäpax hane'em. ¹⁵⁻¹⁶ Nébiøch hädaa nocy cham ngujaayän, hamøc hadsaach mijts tøø nmägäpax tøø nhane'emy. Nyagjahmiejchp mijts jaduhñ jadähooc. Nmóødhøchä cuhdujt jaduhñ cooçh mijts nyagjahmiédsät. Hix, ja'a Dióshøch jaduhñ tøø xtiuungmo'oy cooçhä miädia'agy nya-jwá'xät ja'a Jesucristocøxpä jim maa mijtsän, mäduhñtiä hajxy mga'a judíoshaty. Coo jäya'ayhajxy nämay miäbøgät hamuumdu'joot ja'a Dioshespíritu miäjaahaam, mänit hajxy quiumaya'añii ja'a Diósäm.

¹⁷ Jootcújc-høch jaduhñ nnijwiø'øyii cooçhä nduung tøø yhoyø'øy, ja'a Dióshøch tøø xmió'oyäbä. Ja'a Jesucristøch jaduhñ xpiuhbejp, páadyhøch nduung tøø yhoyø'øy. ¹⁸ Jayóoyyøch cham nmädia'aga'añ nebiátyhøchä Jesucristo xpiuhbejty mänáabøchä jäya'ay ja'a Diosmädia'agy nyajmäbøquiän, ja'a hajxy ca'a judíospä. Cábøch nmädia'aga'añ nebiatiä wiinghäna'c-hajxy tøø tiuñ. Mädia'agyháamhøchä jaaya'ay nya-jmäbøjcy, møød cooçhä hoy-yagjuøøñäbä hänajty nyajcähxø'øgy. ¹⁹ Ja'a Dios, ja'a miäjaahaamä hijxtahñd tøø yajcähxø'øgy hoy-yagjuøøñä. Ja'a yhEspírituhaamä jäya'ay tøø yajmäbøcy. Wiinduhmyhagájphøchä Diosmädia'agy hoy nyajwa'xy ja'a Jesucristocøxpä, coo jaaya'ay hajxy hoy xñäho'túutäm. Jímhøch ndägøøyy wädijpä Jerusalén. Jáguémhøch hoy nwädity. Høxtä jímhøch hoy nwädity maa naax xiøhatiän Iliria. ²⁰ Jayóoyyøch jim tøø nwädity majatiä Jesucristo hänajty tøø quia'a mädoyhadyijän. Jadúhñhøch nnä'ägä wädityhaty. Hix, cábøchä Dios xtiuungmooyy cooçh nwädität maa wiinghäna'cä Diosmädia'agy hänajty tøø yajwa'xiän. ²¹ Pønjetiä Diosmädia'agy tøø quia'a mädoy, je'eçh tøø nyajwiingapxø'øy. Jaduhñ jim myiñ cujaay jaaya'aguixøxpä maa Diosmädia'aguian, ja'a hänajty cahnä miädoybä:

Pønjaty ca'a mädoobnä coo Dios ja'a yajnähwaatspä tøø quiexy, je'edshajxy jaduhñ mädoyhadaamb.

Ja'a jäya'ayä Diosmädia'agy hajxy hijty ca'a mädoobnä, jaduhñ hajxy yajmøødmädia'aga'añii coo hajxy ñäxuuçhii ja'a Diósäm.

²² Tøøch jim mayhooc nja nøcxa'añ maa mijtsän jim Roma. Pero cábøch hijty xñäbaadøøyyä cooçh jim nnøcxät. Hix, ja'a Diosmädia'agyhøch hijty nyajwa'xyp wiinduhmyhagajpt. ²³ Pero tøøch nwädijpádøøñä wiinduhmyhagajpt. Mobädájpnøch jim nnøcxaannä maa mijtsän. Tøø jaduhñ majiomøjt yhiñnä cooçh jim tøø nja wi'i ñøcxa'añ maa mijtsän. ²⁴ Cooçh mäbøcy hänajty jim nnøcxa'añ España, mänítøch mäbøcy jim ndu'unaxø'øwät maa mijtsän. Jootcújc-høch jaduhñ nnijwiø'øwøjät cooçh mijts jaduhñ nguhíxät. Mänítøch njaac tu'uyó'oyät cooçh hänajty jim nnøcxa'añ España. Mänitäts mijts hii xpiuhbédät. ²⁵⁻²⁶ Pero cab jaduhñ choj näbaadø'øwa'añ cooçh jim nnøcxät maa mijtsän. Hix, Jerusalénhøch jayøjp nnøcxa'añ. Xädø'øñhøch jim nøcxy nyega'añ. Ja'a häyoobädøjc-høch nøcxy nmo'owa'añ, ja'a hajxy mäbøjpä. Ja'a mäbøjpädøjc-hajxy jim tsánaabiä Macedonia møød jim Acaya, jaaya'ayä xädø'øñ hajxy yajmujc. Høøchä xädø'øñ hajxy xyajmäguexaamb cooçh hänajty jim nnøcxa'añ Jerusalén. ²⁷ Hamdsoojoot hajxy yajmujcy, ca'a yhøøchä nnämaayy coo hajxy yajmúgät. Hawiinmats jaduhñ coo mäbøjpädøjc-hajxy piuhbedøjät, ja'a hajxy jim tsánaabiä Jerusalén. Hix, judíoshajp hajxy je'e. Jaaya'ayä Diosmädia'agy hajxy jim mäbøjtsohñ Jerusalén mänaabä Diosmädia'agy tiägø'øyän wädijpä ja'a Jesucristocøxpä. Mänitä jäya'ayhajxy høxhaam jiaac mädoyhajty, ja'a hajxy ca'a judíospä. Miäbøjc hajxy je'ebä. Paady jaduhñ yhawiinmatsä coo ja'a judíoshajxy piuhbedøjät ja'a jäya'ayháxiäm, ja'a hajxy ca'a judíospä. ²⁸ Hoorä, cooçhä xädø'øñ hänajty jim hoy tøø nyecy Jerusalén, mänítøch mäbøcy jim nnøcxa'añ España. Mänítøch jim ndu'unaxø'øwät maa mijtsän jim Roma. ²⁹ Y cooçh jim nmédsät maa mijtsän, nägø'ø nädécypiøchä Jesucristo xpiuhbeda'añ cooçh mijtsä Diosmädia'agy

nyajnáhixó'owät, jaduñ hajxy tu'ugmucy nhíjtämät jootcujc. Nmóødhöchä tøyhajt jaduñ.

³⁰ Mägu'ughajpádøjc, tu'ugmädia'aguia Jesucristo hajxy nmóødhíjtämbä, ja'a hajxy nWiindsøn'hájtäm. Ja'a Dioshespíritu hajxy xyajni'chójcäm. Huuc tunä mayhajt hajxy maa'ch høø'chcøxpän. Tsögä Dios hajxy hamuumdu'joot mänuu'xtáacäm maa'ch høø'chcøxpän ³¹ coöchä Dios jim xñäwá'anät Judeanaaxooty maa jäya'ayhajxy ca'a mabøjpän. Jaduhñä Dios hajxy nmänuu'xtáacämbät coöchä mabøjpádøjc-hajxy jim jootcujc xtiøjmó'owät jim Jerusalén coöch jim nmédsät xädø'øñyejpä. ³² Y coo Dios jaduñ miäná'anät, mänítøch jim nwiimbídät, mänítøch jim jootcujc nnócxät maa mijtsän. Jootcújc-høch jaduñ jim nbóo'xät. Hamiñ haxøpy hajxy mänit nnijoot-capxmcøpójcämät. ³³ Xmióoyyämä Dios ja'a hoyhajtä weenhajt hajxy. Wéenäts mijts nägøxiä xpiuhbety.

16

¹ Jimhöchä nmägu'ughajpä tu'ug chäna'ay maa cajpt xiøhatiän Cencrea. Febe xiøhaty. Diosmädia'agymiäbøjp je'ebä. To'oxiøjc je'eduhñ. Mäbuhbejp jaduñ maa tsajtøjcän. ² Coo Febe jim miédsät maa mijtsän, naxy hajxy jootcujc mdehm miägu'ugpøgät ja'a Jesucristocøxpä. Hawiinmats coo hajxy jaduñ mmägu'ugpøgät pønjetiä Diosmädia'agy mabøjp. Mmó'owäbä Febe hajxy jaduñ tijaty yajmaajiajpy. Hix, náxyhöch jaduñ xpiuhbety. Nämäy hajxy jaduñ tøø piuhbedyii.

³ Nyajpóo'xypøchä Prisca møødä Aquila. Tøøch hajxy jaduñ xmiøødtuñ ja'a Jesucristocøxpä. ⁴ Tøøch hajxy jaduñ jim xñäwa'añ mähahñdiuum. Páadyhöchä Dioscujú'uyäp nmo'oy. Jaduhñä mabøjpádøjcä Dioscujú'uyäp hajxy jejpä, ja'a hajxy ca'a judíospä, wiinduhmyhagajpt. ⁵ Móødhöchä jäya'ay jaduñ nyajpoo'xpä, pøn-jaty jaduñ hamugøøby Dioswiingudsähgøøbiä maa Prisca tiøjc-hajxiän. Móødhöchä Epeneto nyajpoo'xpä. Jaan'ch tehñ yhöyhøch je'eduhñ xmiägu'ughaty. Jaayá'ayäts jim mabøjtsohñ ja'a Jesucristocøxpä maa naax jaduñ xiøhatiän Asia. ⁶ Nyajpóo'xypøchä Maríabä. Jaan'ch tehñ yhoy jim tiuñ maa mijtsän. ⁷ Nyajpóo'xypøchä Andrónico møødä Junias. Høøch nmägunaaxhajxy je'e. Näguípxyhøch hajxy hijty xmiøødtsumy'chäna'ay. Hoy piønä jaduñ ñajuø'øy coo hajxy Dyiosquexiä. Paady hajxy jaduñ quiejxä, coo Diosmädia'agy hajxy jaduñ yajwá'xät. Jayøjp hajxy miäbøjc ja'a Jesucristocøxpä. Høøch høxhaam njaac mabøjc.

⁸ Nyajpóo'xypøchä Ampliato. Høyhöch je'e xmiøødnijootpaadyii ja'a Jesucristocøxpä, ja'a hajxy nWiindsøn'hájtäm. ⁹ Nyajpóo'xypøchä Urbano. Näguipxy hajxy je'e xmiøødtuñäm ja'a Jesucristocøxpä. Nyajpóo'xypøchä Estaquis. Høyhöch je'eduhñ xmiägu'ughaty. ¹⁰ Nyajpóo'xypøchä Apeles. Tøø jiaan'ch tehñ miee'xtucy ja'a Jesucristocøxpä. Nyajpóo'xypøch pøn-jaty jaduñ jim tsänaaby maa Aristóbulo tiøjcän, ja'a hajxy mabøjpä. ¹¹ Nyajpóo'xypøchä Herodiön. Høøch nmägunaax je'ebä. Nyajpóo'xypøch pøn-jaty jaduñ jim tsänaaby maa Narciso tiøjcän, ja'a hajxy mabøjpä. ¹² Nyajpóo'xypøchä Trifena møødä Trifosa. Tuumb hajxy jaduñ ja'a Jesucristocøxpä, ja'a hajxy nWiindsøn'hájtämbä. Nyajpóo'xypøchä Pérsida. Jaan'ch tehñ chójcäp je'e. Hoy jiaan'ch tehñ tiuumbä maa Jesucristocøxpän. ¹³ Nyajpóo'xypøchä Rufo møødä tiaj. Jaan'ch tehñ yhooyä Rufo ja'a Jesucristo miädia'agy pianøcxä. Jadúhñhöchä tiaj njuøoyyä nébiøch nhamdsoo tadjän. ¹⁴ Nyajpóo'xypøchä Asíncrito, møødä Flegonte, møødä Hermas, møødä Patrobas, møødä Hermes, møødä mabøjpádøjc jaac jimä. ¹⁵ Nyajpóo'xypøchä Filólogo, møødä Julia, møødä Nereo møødä piuhdo'oxy, møødä Olimpas, møødä Diosmädia'agymiäbøjpähajxy jaac jimä.

¹⁶ Xi'ig xon hajxy mniyajpoo'xóøjät ja'a Jesucristocøxpä. Xyajpoo'xp mijtspä, ja'a hajxy mabøjpä ja'a Jesucristocøxpä wiinduhmyhagajpt.

¹⁷ Mägu'ughajpádøjc, jii jäya'ayhajxy näje'e wiädity, wiing hajxy yajnáhixø'øy; cab hajxy yajnáhixø'øy nej mijts tøø mhabøquiän ja'a Jesucristocøxpä. Cabä jioot hajxy xyajmädsocy coo mijts tu'ugmädia'agy mhídät maa Diosmädia'agyquiøxpän. Jaduhñ

hajxy yajnáhixø'øy coo wiingmädia'agy hajxy mbadu'ubógät. Naxy hajxy mdehm̄ ñigwieendähadóøjät maa jaaya'ayhajxy jaduhmbän. Cab hajxy jim̄ mnøcxø'øwät maa jaaya'ayhajxy jaduhmbän. ¹⁸ Hix, cabä Diosmädia'agy hajxy yajnáhixø'øy ja'a Jesucristocøxpä. Jaduhñ hajxy yajnáhixø'øy nebiä cu'ughajxy jia mädowna'añän. Paady hajxy jaduhñ yajnáhixø'øy, yajmäjuyaamb hajxy jaduhñ; jaduhñ hajxy hoy jiatcø'øwa'añ nebiä jioot hajxy choquiän. Hoy yajxón hajxy jia capxy jia mädia'agy. Pero xjia wi'i yajtägoyyaamb mijts jaduhñ. ¹⁹ Hopiønä tøø miädoxyhaty coo mijtsä Diosmädia'agy hamuumdu'joot mmäböcy ja'a Jesucristocøxpä; páadyhöch jootcuyc̄ mnijiäwø'øyii ja'a mijtsøxpä. Jaduhñ mijts nyajmädsocy coo hajxy mnijajcopcø'øwøøjät, jaduhñ hajxy hoy mwädítät, jaduhñ hajxy haxøøg mga'a jäya'ayhädät. ²⁰ Ja'a Dios hajxy xyaghidaamb jootcuyc̄. Coo hajxy mga'a möjpädá'agät waambatiä höhndaacpä hajxy xjia wi'i yajnáhixø'øwa'añ, jaduhñä Dios ja'a möjcu'ugong quia'a yajmäjädá'agät. Y cabä möjcu'ugong hajxy nej xtiúunnät. Ween mijtsä Jesucristo ja'a hoyhajtä weenhajt tehngajnä xmio'oy, ja'a hajxy nWiindsøn'hájtämbä.

²¹ Xyajpoo'xp mijtsä Timoteo. Hööch jaduhñ xmiøødtuumb. Jaanä xyajpoo'xp mijts jaduhñ ja'a Lúciobä, møødä Jasón, møødä Sosípater. Haagä hööch nmägunaaxhajxy je'e.

²² Hööch Tercio, hööch hädaa nocy ngujahby. Jaanä hööch mijts nyajpoo'xpä ja'a Jesucristocøxpä.

²³ Xyajpoo'xp mijtsä Gayo. Yaačh jaduhñ nhity ja'a Gayo tiøgooty. Yejpiä tiøjc jaduhñ coo mäbøjpädøjc-hajxy yaa yhamugø'øwät Dioswiingudsähgøøbiä. Xyajpoo'xp mijtsä Erasto. Jim̄ je'e tiuñ haguyc̄. Xädø'øñgieendähajp jim̄. Møødä hermano Cuarto hajxy xyajpoo'xpä.

²⁴ Ween mijtsä Jesucristo ja'a hoyhajtä weenhajt xmio'oy nägøxiä. Amén.

²⁵ Hoorä, tsögä Dios hajxy möj jaančh capxpáatäm. Jaaya'ay mijts hamuumdu'joot xjiaac yajmäböögäp ja'a Jesucristocøxpä. Jaduhñhöch nnä'ägä yajnáhixø'øxyhaty coo Dios ja'a Jesucristo quiejxy. Jaduhñä Jesucristo hajxy hoy xyajnáhwáatsäm nägøxiä, møødä judíoshajxy, näguipxy møødä ca'a judíoshajxypä. Tøyhajt jaduhñ. Jéquiänä Dios jaduhñ wyiinmaayy, pero cab jaduhñ choj yajtøjiajty. Paady hajxy nga'a tsoj wiinjuóøyyäm.

²⁶ Pero jim̄ jaduhñ myiñ̄ cujaay maa Diosquexyhajxy jecy quiujahyyän. Jim̄ jaduhñ cøxiä quiapxtøy. Naamnä hajxy jaduhñ tøø nwiinjuóøyyäm. Paadiä Dios jaduhñ yhanehm̄nä coo mädia'agy ja'a Jesucristocøxpä wiá'xät wiinduhmyhagajpt, jaduhñä jäya'ayhajxy nägøxiä miäböögät, jaduhñ hajxy quiudiúumbät. Homiänaajä Dios yhity.

²⁷ Jagooyyä Dios tøø wyiinmay coo hajxy xyajnáhwáatsäm, coo hoyhajtä weenhajt hajxy xmióoyyäm. Ja'a Jesucristocøxpä Dios möj jaančh quiapxpaadyii cøjxta'axiøø. Amén.

1 Corintios

¹⁻² Høøch Pablo hädaa nocy cham njahby. Dióshøch xwyiinguejx coöchä Jesucristo xquiuguexyhädät. Mijts hädaa nocy cham nyajnjahby, pønjaty ja'a Diosmädia'agy mäbøjp maa ja'a cajpt jaduhñ xiøhatiän Corinto. Dios ja'a Jesucristo jaduhñ quejx coo hajxy hoy xñähho'túutäm, pønjaty ja'a Jesucristo miädia'agy mäbøjcäp wiinduhmyhagajpt. Jaaya'ay hajxy nWiindsøn'hátäm. Dios hajxy xyajnähdíjjäm coo ja'a Jesucristo hajxy xñähho'túutämät. Ja'a hermano Sóstenes, xyajpoo'xp mijts je'ebä. ³ Weenä Dios hoyhajt weenhajt hajxy xmio'oy mөөdä Jesucristo. Ja'a Dios hajxy nDeedyhátäm.

⁴ Homiänájøch ja'a Dios nnäma'ay Dioscujú'uyäp je'eguiøxpä coo Dios mayhajt tiuñ maa mijtsøxpän. Paadiä Dios mayhajt jaduhñ tiuñ, coo Jesucristo hajxy tu'ugmädia'agy mmөөdhity. ⁵ Coo hajxy jaduhñ mmөөdhity, paadiä Dios hajxy tөө xpiuhbety möj may, jaduhñ hajxy hoy mgápät, jaduhñ hajxy hoy mwiinjuó'øwät cøxiä. ⁶ Coo højts mijts ja'a mädia'agy tөө nyajwiingapxø'oy coo Jesucristo hajxy xñähho'túutäm, paadiä Diosmädia'agy hajxy hamuumdu'joot mmäbøjnä. ⁷ Coo hajxy jaduhñ mmäbøjnä hamuumdu'joot, paadiä Dios mäjaa hajxy xjiaanč tehñ mio'oy coo hajxy mgudiuñ waambaty hajxy xyhane'emy. Mjøbhijxyp mhajuøøbiä Jesucristo hajxy jaduhñ coo quiädaactägatsa'añ. ⁸ Dios hajxy xpiuhbedaamb coo miädia'agy hajxy hoy mgudiúunät. Paady mijts Dios hänäjty xpiäda'aga'añ hawa'adstuum coo ja'a Jesucristo ja'a haxøøgjäya'ay hänäjty yajcumädowaannä. ⁹ Tøyhajt ja'a Dios miädia'agy jaduhñ. Cabä Dios mänaa yhøhnda'agy. Jaaya'ay hajxy tөө xyajnähdijy coo yHuung hajxy mmөөdhíjtät tu'ugmädia'agy. Ja'a Jesucristo je'e.

¹⁰ Hermanodøjc, ja'a Jesucristo miädiä'agyhøch mijts cham nyajmөөdcapx nyajmөөdmädiaactägatsaamby coo hajxy tu'ugjoot tu'ugwiinmahñdy mhídät maa tsajtøjcän. Cab hajxy tii myajtsibø'øwät. ¹¹ Páadyhøch jaduhñ nmäna'añ, tөөchä hermanohajxy xyajmädoxyaty coog hajxy mnimiädsibø'øyii. Jim hajxy choon maa Cloé tiøjcän. ¹² Wiingátiägä mädia'agy hajxy mbanøcxy. Näje'e hajxy miäna'añ cóogøch høøch nmädia'agy hajxy xpianøcxä. Näje'e hajxy miänaambä coogä Apolos miädia'agy hajxy pianøcxä. Y näje'e hajxy miänáangombä coogä Jesucristo miädia'agy hajxy pianøcxä. ¹³ Pero cabä Jesucristo miädia'agy hajxy madiu'u xyajnähxøøyyäm. Hix, jaaya'ay mijts jaduhñ xñähho'tuut cruzcøxp, ca'a yhøøch mijts nnähho'tuut. Paady hajxy mnäbejty coo Jesucristo miädia'agy hajxy mbanøcxä, ca'a jie'eguiøxpä coöch høøch nmädia'agy hajxy xpianøcxä. ¹⁴⁻¹⁵ Jagóoyyøch ja'a craa Crispo nyajnäbejty maa mijtsän mөөdä craa Gayo. Cábøchä wiinghäna'c jim nnä'a yajnäbejty. Cab hajxy jaduhñ mmäná'anät cooc xtyijy nyajnäbejty. Páadyhøchä Dios jaduhñ nnäma'ay Dioscujú'uyäp. ¹⁶ (Jexioo, chamč njahmiejtstáacombä coöchä Estéfanashajxy nyajnäbejpä, mөөdä yhuung mөөdä tio'oxy. Cab ndijy wiinghäna'c njaac yajnäbejty.) ¹⁷ Ca'a jiäya'ay-yajnäbéjpøch Jesucristo xquiejxy. Diosmädia'agy-yajwá'xpøch xquiejxy coo hajxy xñähho'túutäm cruzcøxp. Cooch jaduhñ nwädity Diosmädia'agy-yajwá'xpä, howyiinjuøñøch hänäjty ngapxy nmädia'agy. Páadyhøch jaduhñ ngapxy nmädia'agy howyiinjuøñä, chójpiøch njoot jaduhñ coo hajxy hoy mwiinjuó'øwät ja'a Jesucristocøxpä. Cábøch njoot chocy coöch nmädia'agy hajxy xquiumáayät je'eguiøxpä cóogøch tyijy yajxon ngapxy nmädia'agy.

¹⁸ Nmäbøjcäm ja'a mädia'agy hajxy jaduhñ coo Jesucristo hajxy xñähho'túutäm cruzcøxp. Pønjaty häda'agaamb möjcu'uhaam, coo hajxy miädoxy coo Jesucristo hajxy tөө xñähho'túutäm cruzcøxp, ñäxiicypy hajxy jaduhñ je'eguiøxpä cooc tyijy jagooyyä cädieeyhäna'c-hajxy yagho'ogyii cruzcøxp. ¹⁹ Jaduhñ jim myiñ cujaay maa Diosmädia'aguiän:

Ja'a häna'c-hajxy cuwiinmahñdypä, ja'a tyijy hajxy howyiinmahñdymөөdpä, cábøchä wyiinmahñdyhajxy nyajtsøobaadaanä,

nõmã Dios miãnaañ. ²⁰ Hoorã, yajcãhxø'piã Dios coo jäya'ay wyiinmahñdyhajxy quia'a tsoobaada'añ, ja'a hajxy niñänøømãbã cuwiinmahñdy, ja'a tyijy hajxy howyiinmahñdymøødpã. Nãxiicypiã Dios jaduñ. ²¹ Jaanç tehñ quiuwiinmahñdiã Dios tu'iquiã. Je'e jaduñ mänaañ coo højts ja'a miãdia'agy nyajwã'xãmãt coo Jesucristo hajxy xñãhho'túutãm. Pønjaty jaduñ mãbøjp, Dios jaduñ wiinmahñdyhajt coo hajxy jaduñ yajnãhwa'adsøøjãt ja'a piojpã quiãdieeyhajxy, hoyyã jäya'ayhajxy näje'e jia näxi'igy. Ca'a yhøjts nhamdsoo wiinmahñdyhaam ja'a Dios ja'a miãdia'agy hajxy xyajwiinjuøøyyãm. Jaduñã Dios miãnaañ.

²² Ja'a judíosahajxy, coogã hoy-yagjuøøñãbã hajxy yhíxãt, mänítãc tyijy hajxy jaduñ miãbøga'añ. Y ja'a griegohajxy, mänítãc tyijy hajxy jaduñ miãbøga'añ coogã jäya'ay miãdia'agy hajxy miãdóowãt, ja'a hajxy niñänøømãbã cuwiinmahñdy, ja'a tyijy hajxy howyiinmahñdymøødpã. ²³ Pero højtshãjtãm, jaduñ højts nmãdiãacãm coo Jesucristo hajxy xñãhho'túutãm cruzcøxp. Cabã judíosahajxy jaduñ miãbøcy. Cab hajxy jaduñ miãna'añ cooc tyijy Jesucristo quia'a Dioshuungã. Hix, nõm hajxy miãna'añ cooc tyijy ja'a Dioshuung quia'a ho'oga'añ cruzcøxp. Hoorã, ja'a jäya'ayhajxy ca'a judíosã, ni je'e hajxy quia'a mãbøjpã. Hoñãxiicnã Diosmãdia'agy hajxy miãdoy. ²⁴ Pero coo Dios hajxy tøø xwyiimbíiwãm, paady hajxy nmãbøjcãm coo Jesucristo hajxy xñãhho'túutãm, hoy hajxy nja judíosãm. Cooc hajxy jaduñ xñãhho'túutãm, jaduñã Dios yajcãhxø'cy coo mäjaa miøødã, coo quiuwiinmahñdiã. ²⁵ Cooc Dios ja'a yHuung ñãhdujcy coo yagho'ogøøjãt, paadiã jäya'ayhajxy näje'e miãna'añ cooc tyijy Dios quia'a cuwiinmahñdiã, cooc tyijy mäjaa quia'a møødã. Cabã Diosmãdia'agy hajxy miãbøcy, paady hajxy jaduñ miãna'añ. Hoyyã Dios ja'a wiinmahñdy häxøpy weẽñtiã jia møødã, ni jaduñã jäya'ay wyiinmahñdyhajxy häxøpy quia'a najtspaadøøyyã. Jaanã jaduñduhmbã, hoyyã Dios ja'a mäjaa häxøpy weẽñtiã jia møødã, ni jaduñã jäya'ay miãjaahajxy häxøpy quia'a najtspaadøøyyã.

²⁶ Hermanodøjc, huuc mädow hajxy, mänaa mijts Dios xwyiimbiiyyãn, cab hajxy hänaajty nämay mhøxpøquiã, näjé'eyyãm; cab hajxy hänaajty nämay mmãyøøjã, näjé'eyyãm; cabã møjcuhdajt hajxy hänaajty nämay mmøødã, näjé'eyyãm. ²⁷⁻²⁸ Nmãbøjcãm ja'a Diosmãdia'agy hajxy. Xpiéjãm jäya'ay hajxy hijty coo hajxy hijty nga'a høxpøquiãm, coo hajxy hijty nga'a mäyøøjãm, coo møjcuhdajt hajxy hijty nga'a møødhãjtãm. Xxiøøghãjtãm ja'a jäya'ay hajxy hijty jaduñ. Pero coo Dios hajxy xwyiimbíiwãm, jaduñã Dios ja'a jäya'ay yajtsãhdiuundãgajch, ja'a hajxy hijty xpiéjãmbã. Jaduñã Dios yajcãhxø'cy coo hajxy hänaajty tøyhajt quia'a høxpøquiã, coo hajxy hänaajty tøyhajt quia'a mäyøøjã, coo møjcuhdajt hajxy hänaajty tøyhajt quia'a møødã. ²⁹ Hix, cab jaduñ pøn jim ñiguiumayãanã Dioswiinduum. ³⁰ Dios hajxy jaduñ xpiãdiãacãm tu'ugmãdia'agy møødã Jesucristo. Jaduñã Dios yajcãhxø'cy coo quiuwiinmahñdiã coo Jesucristo yaa quiejxy hädaa yaabã naaxwiin, coo hajxy hoy xñãhho'túutãm. Jaduñ hajxy xyajnãhwãatsãm ja'a nbojpã ngãdieeyhãjtãm. Jaduñ hajxy xpiãdiãacãm hawa'adstuum. ³¹ Jaduñã Diosmãdia'agy miãna'añ: “Cab hajxy hamdsoo nniguiumãayyãmãt. Tsøgã Dios hajxy møj jaançh pãdiãacãm.”

2

¹ Hermanodøjc, mänãajøch mijts nnãhooçhooñãn, mänãajøch mijts ja'a Diosmãdia'agy nyajwiingapxøøçhooñãn, cab mijts yajxon nmøødmãdiaacy. ² Cooçh hänaajty jim nnøcxa'añ maa mijtsãn, tøøçh hänaajty nwiinmahñdyhaty coo Jesucristo hajxy hänaajty nyajmøødmãdia'aga'añ, coo hajxy hänaajty je'e tøø xñãhho'túutãm cruzcøxp. Cãbøch wiingmãdia'agy hänaajty nmãdia'aga'añ. ³ Nnajuøøbiøch hänaajty cooçh hänaajty hoy nga'a capxa'añ ja'a nhamdsoo copc-hãamhøch. Høxtã tsãhgøøbiøch hänaajty; høxtã tsãyúubiøch hänaajty. ⁴ Hóyhøch hänaajty yajxon nga'a jagã mãdia'agy, xpiuhbéjpoçh ja'a Dioshøspiritu hänaajty ja'a miãjaahaam neby hajxy jaduñ ca'xy mwiinjuø'øwãt. ⁵ Hix, chojpiã Dios ja'a jioot jaduñ coo miãdia'agy hajxy mmãbøjcãt. Ja'a miãjaahaamã Dios hajxy xyajmãbøcy, ca'a quiuwiinmahñdyhäna'c hajxy jaduñ xyajmãbøjp.

⁶⁻⁷ Ja'a häna'c-hajxy cuwiinmahñdypä hädaa yaabä naaxwiimbä, cáboch hajxy jaduhñ xñänomy cooçh nguwiinmahñdiä. Jaduhñhøch häna'c-hajxy xñänømbä cooçh nga'a cuwiinmahñdiä, ja'a møjcuhtujtmøødpähajxy ja'a hädaa yaabä naaxwiimbä, ja'a Diosmädia'agy hajxy ca'a mabøjpä. Mänitä miäjaahajxy piögäänäxä møødä wyiinmahñdy-hajxy coo hädaa yaabä naaxwiimbä hänajty quiuhdägoyya'añ. Pønjetiä Diosmädia'agy ca'xy cudiuumb, ñajuøøby hajxy jaduhñ coo Dios tøyhajt quiuwiinmahñdiä. Paady hajxy jaduhñ ñajuø'øy cooçh jaduhñ tøø nyajmøødmädia'agy coo Jesucristo hajxy tøø xñähho'tuutäm, møød coo hajxy jim nnøcxäänäm Dioswiinduum. Jequiän ja'a Dios jaduhñ wyiinmaayy. Cahnä naaxwiimbä hänajty yhawijy tiøø'xta'agy. Cabä Dios ja'a wyiinmahñdy choy yajwiingähxø'cy. Cahnä hajxy xyajwiinjuøøyyäm høxtä jäda'anäbaadyñä. ⁸ Pero cabä møjcuhtujtmøødpähajxy jaduhñ wyiinjuø'owa'añ. Coo hajxy cu wyiinjuøøyy, cabä Jesucristo hajxy cu miøjpahbejty cruzcøxp. Piädaac ja'a Dios ja'a yHuung jaduhñ coo yaa wyiingudsähgø'øwøøjät hädaa yaabä naaxwiin. ⁹ Jaduhñä Diosmädia'agy miäna'añ:

Ni pøn quia'a hixyñä, ni quia'a mädoynä,

ni quia'a wiinmayñä nebiatiä Dios hoyhajt weenhajt mio'owa'añ pøn jaduhñ chojpy.

¹⁰ Ja'a højtshájtäm, tøø Dios hajxy xyajwiinjuøøyyäm ja'a yhEspirituhaam nebiaty jaduhñ wyiinmahñdyhajty. Yhøxtaabiä yhEspiritu jaduhñ neby hajxy hoy xyajwiinjuøøyyämät.

¹¹ Cabä wiinghäna'c jaduhñ xñajuøøyyät nebiaty hänajty mwiinmay. Jagooyyä miich mhamdsoo juøhñdy jaduhñ ñajuø'owät. Jaanä jaduhñä Diospä, cab jaduhñ pøn ñajuøøbiä nebiatiä Dios wyiinmay. Jagooyyä Dios yhamdsoo Espiritu jaduhñ ñajuø'øy. ¹² Tøø Dios ja'a yhEspiritu hajxy xmióoyyäm coo højts ja'a miädia'agy jaduhñ nmäbøjcäm. Ja'a yaabä juøhñdy, cab jaduhñ miäbaady nebiä Dios ja'a yhEspiritän. Paady hajxy jaduhñ xmióoyyäm, jaduhñ hajxy xyajnajuøøyyäm coo hoyhajt weenhajt hajxy xñä'a móoyyäm. ¹³ Jaduhñä jäya'ay hajxy nhawaandägájtäm coo hajxy jaduhñ xñä'a móoyyäm. Jaduhñ hajxy nhawaanäm nebiatiä Dioshespiritu hajxy xyajwiinjuøøyyäm. Jaduhñ hajxy nyajwiinjuøødiägájtäm je'eguiøxpä coo Dioshespiritu hajxy miøødhajpä. Ja'a häna'c-hajxy tyjy cuwiinmahñdypä, cabä wiinmahñdy hajxy ca'xy miøødä coo tijaty mädia'agy hajxy hänajty xyajmøødmädia'aga'añ. Paadiä wiinmahñdy hajxy ca'xy quia'a møødä coo Dioshespiritu hajxy quia'a møødä. Pero højts, cab højts nmädiácäm ja'a nhamdsoo wiinmahñdyhaam.

¹⁴ Pønjetiä Dioshespiritu ca'a møød, cab hajxy wyiinjuø'øy nebiatiä Dioshespiritu hajxy jia wi'i yajmøødmädia'aga'añii. Cábac tyjy jaduhñ choobaady. Hix, coo Dioshespiritu hänajty mga'a møødä, cab jaduhñ mnä'ägädä wiinjuø'owät nebiä Dioswiinmahñdy.

¹⁵ Pønjetiä Dioshespiritu møød, quiøxy wiinjuøøby hajxy jaduhñ. Pønä Dioshespiritu ca'a møød, cabä cuhtujt hajxy miøødä coo hajxy miäná'anät cooc tyjy jäya'ay ja'a Diosmädia'agy hajxy hoy quia'a yajnähixø'øy, ja'a jäya'ay ja'a Dioshespiritu hajxy møødpä. ¹⁶ Jaduhñ jim myiñ cujaay maa Diosmädia'aguiän: "Cabä Dios wyiinmahñdy pøn ñajuøøyyä. Cabä Dios pøn yajnähixø'øyii." Pero nmøødhájtäm ja'a Jesucristo wyiinmahñdy hajxy jaduhñ.

3

¹⁻² Hermanodøjc, cooçh jim nhooçhohñ maa mijtsän, cáboch mijts tsipjaty nyänähixøøyy. Ja'a ca'a tsipjátypøch mijts jaduhñ nyajnähixøøyy. Hix, je'enä hajxy hänajty mhityñä nebiä naamdägø'øybän maa Jesucristocøxpän. Jaduhñ hajxy hänajty mhity nebiä Diosmädia'agy ca'a mabøjpän. Cahnä hajxy hänajty may mwiinjuø'øyñä maa Dioshespiritucøxpän. Y høxtä jäda'anäbaadyñä, cahnä hajxy jaduhñ may mwiinjuø'øyñä. ³ Je'enä hajxy mniwyiinhecy mniwyiindoyiinä coo hajxy mga'a hity tu'ugmädia'agy. Cab hajxy jaduhñ mniçhocy mnimiee'xyii. Je'enä hajxy jaduhñ mjäya'ayhaty nebiä Diosmädia'agy ca'a mabøjpän. ⁴ Naje'e hajxy mmäna'añ: "Høøch ja'a Pablos miädia'agy nbanøcxäp." Naje'e hajxy mmänaambä: "Høøch ja'a Apolos miädia'agy

nbanócxäp.” Coo hajxy jaduhñ mga'a hity tu'ugmädia'agy, cähxø'p jaduhñ coo hajxy jaduhñ mjäya'ayhatyñä nebiä Diosmädia'agy ca'a mäbøjpän.

⁵ Høøch Pablo, cábøch møjcuhtujt nmøødä. Ni ja'a Apolos jaduhñ quiaa móødäbä. Cab jaduhñ yhäxø'øy coo højts nmädia'agy hajxy jaduhñ xyajtsibóøyyät. Jue'e højts, Dios højts jaduhñ xñä'ä moonsähajp. Dios højts jaduhñ xquiejx coo mijts jaduhñ nyajnahixø'øwät. Jaduhñ hajxy mmäbøjcy ja'a Dioscøxpä. Cøjwiinduum højts ja'a Dios ja'a tuung xmiiooy. ⁶ Høøch mijts ja'a Diosmädia'agy nyajnahixøøchohn. Mänitä Apolos hajxy jaduhñ xjiaac yajnahixøøyy. Pero Dios, je'e mijts jaduhñ xyajmäbøjc. Y tehngahnä hajxy xjiaac yajmäbøga'añ. Tehngahnä hajxy xjiaac yajmayø'øwa'añ. ⁷ Høøch Pablo, cábøch møjcuhtujt nmøødä. Ni ja'a Apolos jaduhñ quia'a móødäbä. Jagooyä Dios møjcuhtujt miøødä. Je'eduhñ tu'ug xyajmäbøgäp. Je'eduhñ tu'ug xyajmayø'øwäp. ⁸ Tu'ugmädiä'agyhøch ja'a Apolos nmøødhity, hoy højts cøjwiingtuung nja møødä. Coo højts hoy ndúnät, mänitä Dios møjmayhajt tiúnät maa højtscøxpän. Pero coo højts hamuumdu'joot nga'a túnät, mänitä Dios mayhajt hänäjty weeñtiä tiunaambä maa højtscøxpän. ⁹ Højts ja'a Dios nmøødtuumby. Y coo mijts hoy mjäya'ayhaty, jaduhñä jäya'ay tøyhajt hajxy miøødä coo Dios hajxy hoy xyagiäya'ayhaty. Mijts ja'a Dios ja'a mwiinmahñdy xyajtägäjtšäp neby hajxy jaduhñ mhídät nebiatiä jioot chocy.

¹⁰⁻¹¹ Tøøchä Dios xwyiinguexy coo mijts ja'a miädia'agy nyajnahixøøyyät ja'a Jesucristocøxpä. Xmióoyhøchä wiinmahñdy jaduhñ nébiøch mijts jaduhñ hoy nyajnahixø'ød. Cabä cuhtujt jaduhñ myiñ coo pøn ja'a Dios miädia'agy yajtägäjtšät ja'a Jesucristocøxpä. Ween hajxy jaduhñ yajnahixøøbiä nébiøch tøø nyajnahixø'øyän. ¹² Pønjetiä Diosmädia'agy mäbøjp, jaduhñ hajxy tiuunghaty nebiä jäya'ayhajxy jaduhñ miädoyhádat ja'a Jesucristocøxpä. Näje'e hermanodøjc-hajxy hoy tiuñ. Paady hajxy jiaanč tehñ quiimayii. Jiiby hajxy näje'e, cab hajxy hoy tiuñ. Paady hajxy jaduhñ quia'a cumayii. ¹³⁻¹⁴ Coo Jesucristo hänäjty yaa quiädaactägatsa'añ, mänit jaduhñ quiähxø'øga'añ pønjaty hänäjty hoy tøø tiuñ. Cøjxta'axiøø ja'a Dios jahmiedsa'añ neby hajxy hänäjty hoy tøø tiúñäbä. Møjmayhajt ja'a Dios tiunaambä maa häna'c hoy tøø tiuñän. Jaduhñ je'e quiähxø'øgaambä pønjaty hänäjty hoy tøø quia'a tuñ. Cabä Dios mayhajt tiuna'añ maa häna'c hoy tøø quia'a tññäbän. ¹⁵ Hawa'adstuum hajxy yaghida'añii, pero hobiä nejpiä.

¹⁶ Jaduhñ hajxy nmäbäatäm hädaa hajxy njoothájtämbä nebiä Diostøjcän coo Diosh-espíritu hajxy nmøødhájtäm maa hädaa njoodootyhajxiän. Mnajuøøby hajxy jaduhñ, túhmäts. ¹⁷ Pønjaty haxøøg nä'ägädä jäya'ayhajp, hoyyä Diosh-espíritu hajxy jia møødä jioodooty, päda'agáanäp hajxy hajøøxc. Hiç, coo ja'a Diosh-espíritu hajxy mmøødä ja'a mjoodooty, páadiäts mjoot hajxy wa'ads myaghídät. Hiç, cabä Diosh-espíritu hoñä'ä maajä yhida'añ majaty hänäjty quia'a wa'adsä.

¹⁸⁻¹⁹ Näje'eg tyijy mijts madiu'u mnajuø'øy neby hädaa yaabä naaxwiimbä wiinmahñdy myiñ. Cab hajxy hamdsoo mniguiumayøød coo hajxy mjaty coo hajxy mnajuø'øy. Nømä Dios miäna'añ cooc hädaa yaabä naaxwiimbä wiinmahñdy quia'a tsoobaady. Hähixøøby jaduhñ coo mhamdsoo wiinmahñdy hajxy mnajtsihixø'øñät, coo hajxy jaduhñ mnibiäda'agøøjät nebiä ca'a wiinjuøøbiän. Jaduhñ ja'a Dioswiinmahñdy hajxy hoy mwiinjuø'øwät nebiä tiøyyän. Jaduhñ jim myiñ cujaay maa Diosmädia'aguiän: “Dios yajcumädowaamb ja'a häna'c jaanč tehñ jiajpä mäwiinhøøn.” ²⁰ Jaduhñ jim myiimbä cujaay maa Diosmädia'aguiän: “Näjuøøbiä Dios coo jäya'ay wyiinmahñdyhajxy quia'a tsoobaady, ja'a hajxy tyijpiä cuwiinmahñdy.” ²¹⁻²² Näje'e jäya'ayhajxy ñiguiumayii je'eguiøxpä coo jäya'ay miädia'agy hajxy pianøcxä ja'a tyijy tøyhajtmøødpä. Cab hajxy jaduhñ mbahíxät. Mijtscøxpä Dios cøxiä yhädiuunñ tijaty yaa hijp hädaa yaabä naaxwiin. Møød højts ja'a Dios jaduhñ xyhädiuumbä ja'a mijtscøxpä, højts yajnahixøøbiädøjc, møød høøch, møødä Apolos, møødä Pedro. Paadiä Dios jugyhajt hajxy xmióoyäm neby hajxy jaduhñ hoy nyajtuungpáatämät. Hoy hajxy cu nja hó'cäm, hoy hajxy nyajtuungpáadäänäm tijaty jäda'ahaty jajtäp tñunäp, chaads tijaty jädäänäp tunäänäp, je'eguiøxpä coo Diosmädia'agy hajxy nbanócxäm. ²³ Hiç, coo Jesucristo

hajxy mWiindsønhaty, paadiä miädia'agy hajxy myajtuunä. Y jaduñä Jesucristobä, yajtuunäbä Tieedy miädia'agy je'ebä.

4

¹ Cab højts mójcuħdujt jaduñ nmøødä, ni høøch ni Apolos; xñä'ä moonsähajp højts ja'a Jesucristo jaduñ. Dios højts jaduñ tøø xwyiinguexy coo højts ja'a Diosmädia'agy ca'xy ngapxtówät, mädyijaty ja'a jäya'ayhajxy hijty jegyhajty quia'a wiinjuøby. ² Mäduhñtiä jäya'ay mioonsähadyii, tsipcøxp hajxy quiudiúnät neby hajxy yhane'emyii. Paady højts jaduñ ngudiunaambä neby højts ja'a Dios tøø xwyiinguexy. ³⁻⁴ Pero høøch, cáboch jaduñ tii nmøjpäda'agy cooçh pøn waambaty xñänómät pø hóyhøch nyajnáhixø'øy, pø caj. Hóyhøch cu nja mäna'an cooçh hoy nyajnáhixø'øy, cab jaduñ choobaada'añ. Tu'uquiä Jesucristo jaduñ ñajuø'øy pø hóyhøch njaançh yajnáhixø'øy. Y høøch, cooçh hamdsoo nniñänómøjät pø hóyhøch nyajnáhixø'øy, pø caj, cáboch nmädia'agy jaduñ choobáadät. Cáboch nnajuø'øy pø hóyhøch tøø nyajnáhixø'øy, pø caj. Pero, cab jaduñ ñeppiä pø nnajuø'øbiøch, pø cáboch nnajuø'øy. Ja'a Jesucristo tu'uquiä nägapxaamb pø hóyhøch tøø nyajnáhixø'øy, pø caj. ⁵ Caj pøn nä'ä nägoobä mnä'ä nänómät coo tøø quiädieey pø cabä tøyhajt hānajty mnä'ä møødä. Coo Jesucristo yaa quiädaactägätsät, mänit hānajty jaduñ yajcāhxø'øga'añ neby hajxy nwiinmahñdyhajtäm, nebiaty hajxy hānajty hamee'ch tøø njäya'ayhajtäm. Mänitä Dios hajxy xquiumayāñäm coo hajxy hānajty hoy tøø ngudiunäm.

⁶ Páadyhøch cham tøø nmädia'agy ja'a høøchcøxpä møødä Apoloscøxpä neby højts nyajnáhixø'øy, cáboch njoot jaduñ chocy coo hajxy jaduñ mnänómät coo tu'jäya'ay jiaty, coo tu'jäya'ay quia'a jaty. Pønjetiä Diosmädia'agy yajnáhixø'øby, je'eçh jaduñ nnänøømby coo hajxy jaduñ mga'a nänómät. ⁷ Cab jaduñ yhooyä coo hajxy mniguiumayøjät. Hix, Dios mäjaa hajxy jaduñ xmiøby neby hajxy jaduñ hoy mmädúnät. Cab jaduñ yhooyä coo hajxy mmäná'anät coo hajxy hamdsoohaamby mbaady. Caj mijts pøn xñänømy cooc tyijy mijts mjaançh tehñ miøj mjaançh tehñ jiaançh.

⁸ Nøñ mijtsäda'a hamdsoo mniñänømyii cooc tyijy Jesucristo mmäbaatnä nej yhojjäya'ayhatiän, y cooc tyijy ja'a Diosmäjaa hajxy mjaançh tehñ miøødä. Jaduñ mäwiin mijts mnibiädäcänä nebiä jäya'ayhajxy hanehmbän, cooc tyijy mijts cuħdujt mmaas møødä que højts. Pero mgapxtägooby hajxy jaduñ. Hoy hijty jaduñ coo hajxy cu mhanehmy. Näguipxy hajxy jaduñ cu nhanéhñäm. ⁹ Pero højts Diosquexypä, jaduñ mäwíinhøch ndijy højts Dios xpiädaacy nebiä cuħdujtmøød ca'a hidaambän. Jaduñ mäwiin højts xpiädaacpä nebiä cädieeyhána'c yagho'oga'añijän. Hijxwiinduum højts jaduñ njaançh tehñ chaachpøcy. Ja'a Diosmoonsähajxy tsajpootypä, je'e højts jaduñ xyhixp, møødä jäya'ayhajxy hädaa yaabä naaxwiimbä. ¹⁰ Nøñmä jäya'ayhajxy miäna'añ cooc tyijy højts tii nga'a jaty nga'a najuø'øy. Paady højts jaduñ xñänømy coo højts ja'a Jesucristo miädia'agy nyajwa'xä. Pero mijts, mjaançh tehñ ñiguiumáyyäp hajxy jaduñ cooc tyijy mijts ja'a Dios xjiaançh tehñ yajwiinjuø'øy ja'a Jesucristocøxpä. Jaduñ højts jäya'ayhajxy xñänøømbä cooc tyijy højts Diosmäjaa nga'a møødä. Pero mijts, mjaançh tehñ miøød ja'a Diosmäjaa tyijy. Mijts ja'a jäya'ayhajxy xñä'ägä wiingudsähgøøby. Pero højts jäya'ay xjiaançh tehñ piejxp xjiaançh tehñ tiehmb cooc tyijy højts tii nga'a jaty nga'a najuø'øy. ¹¹ Jaguiay jayhu'ugy højts naxy nhity homiänaaxøjjä. Hagøødsø'øy højts nwit nducxy naxy nmäwädity. Xjiaançh tehñ chaachtiumb højts jäya'ayhajxy yaa homiänaaxøjjä. Cab højts tsänaadiaact maa tøø nmøødhaty ni mänaa. ¹² Hamdsoo cø'øhaam hamdsoo tecyhaam højts nduñ nxajy. Jaduñ højts nnägaayyøøc nbaady. Coo højts jäya'ay naxy xñänømy haxøøgjaty, cab højts ndsippäda'agy nma'adpäda'agy. Yajxon højts nhadsoy. Coo højts jäya'ay naxy xyajtsaachpøcy, nmee'xtujpy højts jaduñ. Cab højts waamb jaduñ nnä'ägädä mäna'añ. ¹³ Coo højts jäya'ay naxy xñähwaambety nä'ä nägoobä, mee'xxieemy højts jaduñ njaançh tehñ yhadsoy. Høxtä jäda'anäbaadyñä højts jäya'ay xyhixy nebiä hujts nebiä haayän.

¹⁴ Hermanodøjc, jadúhnhøch mijts njuøøñä nebiä hamdsoo huungän. Páadyhøch mijts jaduñ nmägapxy nhane'emy. Cábøch mijts jaduñ nyajtsähdiuna'añ. ¹⁵ Hoy mijts häna'c xjia yajnahixø'øy nämay ja'a Jesucristocøxpä, høøch mijts jaduñ tu'uquiä xtieedyhajt ja'a Jesucristocøxpä, je'eguiøxpä cooçh mijts jayøbajt nyajnahixøøyy coo Jesucristo hajxy tøø xñähho'túutäm, y coo jadähooc jiuypiojtägajch. ¹⁶ Jadúhnhøch mijts nja näma'ay cooçh hajxy jaduñ xpiahíxät.

¹⁷ Y ja'a Timoteo, jadúhnhøch je'e ndsocy nébiøch nhamdsoo huungän ja'a Jesucristocøxpä. Pedyii jaduñ jiaançh tehñ quiidiuñ ja'a Diosmädia'agy. Páadyhøch jim tøø nguexy maa mijtsän nébiøch mijts jaduñ xjiahmiejtstä'agät cooçhä Jesucristo nbanøcxy. Wiinduhmyhagájpthøçhä Jesucristo miädia'agy nyajwiingapxøøyyä maa tsajtøjcän. ¹⁸⁻¹⁹ Høøch, mobädájpøch jim nnøcxaambä maa mijtsän coo Dios jaduñ miäná'anät. Cabä jäya'ayhajxy näje'e miäböcy cooc tyijy jaduñ jim nga'a nøcxa'añ, je'eguiøxpä cooc tyijy njaançh tehñ chähgø'øy. Paady hajxy jiaançh tehñ ñiguiumayii. Howiaambaty hajxy jiaançh tehñ miäna'añ. Pero cooçh jim jaduñ njaançh nócxät maa mijtsän, mänitøch jaduñ jim nhixa'añ pø jaançh tøyhajt ja'a Diosmäjaa hajxy jiaançh møødä, ja'a hajxy jaduñ niguiumáayyabä. Paady hajxy ñiguiumayii cooc tyijy ja'a Diosmäjaa hajxy jiaançh tehñ miøødä. ²⁰ Je'e jaduñ jaançh tehñ choobaatp coo Diosmädia'agy hajxy hoy mgudiúnät. Cab jaduñ choobaady coo hajxy nä'ä nägoobä mnä'ä xi'ig mnä'ä mädiá'agät. ²¹ Nøcxaambøch jim maa mijtsän. Coo mhaxøøgcuhdujt hajxy mnajtshixø'owät, mänitøch hajxy hoy yajxón nmøødmädiá'agät. Pero pø cabä mhaxøøgcuhdujt hajxy nnajtshixø'owa'añ, nmøødhøch cuhdujt jaduñ coo hajxy nya-jcumädowät.

5

¹ Tøøch nmädoyhaty coo tu'jäya'ay haxøøg jiaançh tehñ jiatcø'øy maa mijtsän, hoyyä Diosmädia'agy hajxy mja mäböcy. Yhamdsoo huudájjäc jaduñ miøødsänaaby. Ni pøn jaduñ quia'a jatcø'øy, ni ja'a cajpä jiuðioshajxy. ² Hahixøøby jaduñ coo yø'øya'ay hajxy mga'a mägu'ughájnät. Cu mhojy hajxy jaduñ. Jaduñ hajxy cu mjootmayhajty. Pero cab hajxiäda'a waamb tøø mnä'ägädä näma'ay. Höçhähdiuunnä jaduñ coo hajxy mga'a hojy. Cab jaduñ yhooyä coo hajxy mniguiumayii. ³⁻⁴ Hóyhøch jim nga'a jagä hity maa mijtsän, nmøødhøch cuhdujt jaduñ cooçh mijts nhané'emät ja'a Jesucristocøxpä coo jaaya'ay hajxy mga'a mägu'ughájnät, ja'a yhamdsoo huudaj jaduñ miøødsänaabiä. Mänit hajxy myajpädsómät coo hajxy hánajty mhamugø'øy. Dióshøch ja'a cuhdujt jaduñ xmiooyy cooçh mijts jaduñ nhané'emät. ⁵ Cab hajxy jim myajméjtsnät maa tsajtøjcän. Ween jaduñ chaächtiuñii ja'a møjcu'ugóngäm. Wehndä jaduñ yhuuc tehñ wyiinmahñmédsät coo haxøøg jiatcø'øy. Mänit jaduñ ñähwá'adsät ja'a piojpä quiädieey. Mänit jaduñ jim ñøcxpät tsajpootyp coo Jesucristo yaa quiädaactägátsät, ja'a nWiindsøñhájtabä.

⁶ Cab jaduñ yhooyä coo hajxy myajcumáyät. Huuc mädown hajxy, coo jäya'ay tsajcaagy hajxy yajcojy, mänitä chooy hajxy piädaacä harinajooty. Mänit hajxy yajmätijwäditø'øy. Mänitä harina chooy yajtägø'øyii. ⁷ Paadiä craa hajxy mga'a yajméjtsnät maa tsajtøjcän coo mijts jaduñ mnä'ä pahíxpät ja'a haxøøgpä. Jaduñ mijts jaduñ mga'a padu'udägóobiät. Hiç, tøø Jesucristo hajxy xñähho'túutäm. Jaduñ nbojhájtäm ngädieeyhájtäm hajxy xyajnahwáatsäm. ⁸ Jaduñds je'e, tsøgä haxøøgpä hajxy najtshixøøyyäm. Tsøgä tøyhajtpä hajxy hamuumdu'joot hoy yajtu'uyóhyyäm.

⁹ Tøøch mijts ja'a nocy tu'ug nyajnäjaayø'øy coo hajxy mga'a mägu'ughádät ja'a jäya'ayhajxy haxøøgwädijpä. ¹⁰⁻¹³ Je'eçh jaduñ nnänøømby pønða'a tyijy tuumb hermano. Cab hajxy jaduñ mmägu'ughádät ja'a hajxy wiingto'oxiøjc pawädijpä, møød hajxy jäya'ajie'e hadsojpä, møød ja'a quepychech hajxy wiingudsähgøøbiä, møød hajxy jäya'añähwaambejpä, møød hajxy jaduñ múucäp wädijpä, møødä jäya'ayhajxy mee'tspä. Ni jäya'ay jaduñbä hajxy mga'a møødcáyät, pøn tyijy jaduñ tuumb hermano. Tsipcøxp hajxy jaduñ jim mhøxquejxpädsómät maa tsajtøjcän, pønjaty

jaduhñ haxøøgwädiip. Pero cab højts cuhdujt nmøødhájtäm maa jäya'aguioxpähajxiän, ja'a hajxy ca'a tuumbä hermano, hoy hajxy jaduhñ jia wädiipä haxøøg. Dios jaduhñ najuøøby nebiä tsaachpä hajxy mio'owa'añii. Homiajatiä jäya'ay hajxy nbáatäm ja'a hajxy haxøøgwädiipä, møød ja'a jäya'ajie'e hajxy hadsojpä, møød ja'a mee'tspähajxy, møød ja'a quepychech hajxy wiingudsähgøøbiä.

6

¹ Hermanodøjc, coo mijts hánajty mniñäxø'øwø'øwa'añii, jim hajxy mnócxät maa Dios quiu'ugän; cab hajxy jim mnócxät maa cuduunghajxiän, ja'a Diosmädia'agy hajxy ca'a mabøjpä. Jaduhñä hermanohajxy näje'e jiatcø'øy. ² Tøgä cab hajxy mnajuø'øyä coo højts jäya'ayhajxy nägøxiä nyajtøyhajtyegáanäm ja'a hädaa yaabä naaxwiimbä, coo Jesucristo quiädaactägátsät. Paady hajxy hánajty jaduhñ ndunáanäm coo Dios hajxy xquiu'ughájtäm. Hoorä, pø myajtøyhajtyegaamby hajxy hánajty jaduhñä, tii hajxy coo mga'a jajpä yajtøyhajtyec mädyiibä ca'a tsipjaty. ³ Tøgä cab hajxy mnajuø'øyä coo Diosmoonsäbaady hajxy nyajtøyhajtyegáanämbä, ja'a hajxy jim hijpä Dioswiinduun. Jaduhñds je'e, hoy hajxy jaduhñ nyajtøyhajtyécämät mädyiijaty hädaa yaabä naaxwiimbä. ⁴ Pø jii hajxy tijaty myajtsibø'øy ja'a hädaa yaabä naaxwiimbä, tii hajxy jim coo nøcxy myajtødiägø'øy maa hajxy ca'a mabøjpän. ⁵ Hoçhädiuunä hajxy jaduhñ mjatcø'øy. Jii jajpähäna'cäda'aduhñ maa mijtsän tu'ug metsc. Je'eduhñ xyajtødiägøøyyäp ja'a mdsiphajxy, hermanodøjc. ⁶ Cab jaduhñ yhooyä coo hajxy hamiñ haxøpy mniñäxø'øwø'øwø'øjät maa cuduunghän, ja'a Diosmädia'agy ca'a mabøjpä.

⁷ Coo hajxy hánajty tijaty myajtsibø'øy, myajcähxø'py hajxy hánajty jaduhñ coo Diosmädia'agy hajxy hoy mga'a cudiun. Maas hoy hit jaduhñ coo pøn xmiägädiéeyät, coo pøn xmiäméedsät, cab hajxy mnäxø'øwø'øwät. ⁸ Pero cab jaduhñ yhooyä coo hajxy mnimiägädiéeyø'øjät, coo hajxy mnimiäméedsø'øjät, Haagä hermanodøjc.

⁹ Tøgä cab hajxy mnajuø'øyä coo haxøøghäna'c-hajxy jim quia'a tægø'øwa'añ maa Dioswiinduun. Tøyhajt jaduhñ. Jue'eçh jaduhñ nnänøømby ja'a haxøøgjäya'ayhajxy, ja'a hajxy nimioødtsänáayyabä jabiøcy, møød hajxy quepychech naaxpoch wiingudsähgøøbiä, møød hajxy wiingjäya'ay tio'oxiøjc møødtsänaabiä, møødä jäya'ay miäya'adiøjc møødtsänaabiä, ¹⁰ møødä mee'tspähajxy, møød hajxy jäya'ajie'e hadsojpä, møød hajxy múucäp wädiipä, møød hajxy wi'i quiapxpä, møød hajxy mee'tspä høhnda'agyhaam. Pønjaty jaduhñ jatcøøby, cab hajxy jim tiägø'øwa'añ maa Dioswiinduun. ¹¹ Jaduhñ hajxy hijty näje'e mbajatcøøbiä. Pero tøø Dios ja'a mbojpä mgädieeyhajxy xyajnähwa'açh ja'a yHespírituhaam maa Jesucristocøxpän, ja'a hajxy nWiindsønähájtämbä. Jaduhñä Dios hajxy tøø xpiädáacäm coo hajxy hoy nwädíjtämät, coo hajxy hoy njäya'ayhájttämät nebiä jioot jaduhñ chocy.

¹² Jaduhñä jäya'ayhajxy näje'e miäna'añ coogä cuhdujt jaduhñ myiñ cooc hajxy hotyijatiä ndúunämät nnájxämät. Tøyhajt jaduhñ. Pero cab jaduhñ xyhahixøøyyämät coo hajxy cøxiä wiinä ndúunämät nnájxämät. Y cab hajxy ndehm yaghanájxämät nebiä nwiinmahñdy hajxy hoy nhøxhíjxämät. ¹³ Paadiä Dios jøø'xytiøjc caadiøjc hajxy xmióoyyäm coo hajxy jaduhñ ngáayyämät coo hajxy jaduhñ nhúucämät. Pero nä'a mädøyyä hajxy ngáayyämät nhúucämät, cab hajxy ngaayyhanájxämät. Pero cab jaduhñ ñejpiä pø cáayyäm pø ca'a ngáayyäm; hiç, ñä'ägädä yajcuhdägoyyaambiä Dios je'e. Paadiä Dios hajxy xpiädáacäm coo miädia'agy hajxy ngudiúunämät. Pero cabä jioot jaduhñ chocy coo hajxy haxøøg nwädíjtämät. ¹⁴ Nebiä Dios ja'a yHuung yagjujyipiøjquiän, jaanä jaduhñ højts xyagjujyipiøgáanämbä ja'a miäjaahaam.

¹⁵ Huuc mädown hajxy, coo Jesucristo hajxy nWiindsønähájtäm, paady jaduhñ quia'a nä'ägädä hoyyä coo cuhhiñdo'oxiøjc hajxy nmøødmáawämät. ¹⁶ Jaduhñä Diosmädia'agy miäna'añ, coo jäya'ayhajxy ñimioødma'awø'øjät, jaduhñä Dios yhiçy nebiä tu'ugpä jäya'ayän. Jaduhñds je'e, coo cuhhiñdo'oxiøjc hajxy nmøødmáawämät, jaduhñä Dios hajxy xyhíjxäm nebiä tu'ugpä jäya'ayän. ¹⁷ Pero coo Jesucristo miädia'agy hajxy nbanócxämät, tu'ugjoot tu'ugwiinmahñdy ja'a Jesucristo hajxy jaduhñ nmøødhájtämät.

¹⁸ Cabä cuhindo'oxiøjc hajxy mmøødmá'awät; haxøøg jaduñ. Hoy hajxy nej cu mja jatcø'ow, cabä mni'x cabä mgopc nej jiaty jádät. Pero coo cuhindo'oxiøjc hajxy mmøødmá'awät, mnä'ägädä mägädiehbiä mhamdsoo ni'x ja'a mhamdsoo copc hajxy jaduñ. ¹⁹ Nej, cab hajxy mnajuø'øyä coo Dioshespíritu jii by yhity mjuøhñdiootyhajxiä. Dios hajxy jaduñ xmiøoyy. Jaaya'ay hajxy jaduñ xyhuunghajp, paadiä miädia'agy hajxy myajtúunät; cabä mhamdsoo cuhdujt hajxy myajtúnät. ²⁰ Paady hajxy xyhuunghaty coo yHuung hajxy xñähho'tuuty. Paady hajxy hoy mwädítät, jaduñ hajxy myajcähxø'øgät coo Dios miøjjä jiaančhä.

7

¹ Hoorä, tsøg hajxy mädiáacäm waambátyhøch mijts xmiäyajtøoyy nocyhaam. Hoy hit jaduñ coo ya'adiøjc ja'a to'oxiøjc quia'a møødtsáná'awät. ² Pero coo hajxy hánajty mga'a mee'xtuga'añ, maas hoy hit jaduñ coo to'oxiøjc hajxy mnä'ägädä pøgät, y weená to'oxiøjc ja'a ñihyhap miøødhájpät. ³⁻⁴ Ja'a pøcyjiäya'ayhajxy, hamiñ haxøpy hajxy ñimiøødma'awøøjät. Cabä cuhdujt hajxy mmøødä maa mhamdsoo ni'xhajxiän. Hiç, pø xmiøødma'awaambä mjamiøød jaduñ, naxy mdehm miøødmá'awät, cab jaduñ mnimiøjjø'øgøøjät. ⁵ Jaduñ hajxy mnä'ägädä cuhdujthádät coo møjcu'ugong hajxy xñä'ä yajtu'udägóyyät. Coo hajxy jaduñ námetsc mmáná'anät coo Dios hajxy mba'yá'axät, mänit jaduñ yhooyä coo hajxy mga'a nimiøødma'awøøjät hamiñ haxøpy. Hoorä, coo Dios hajxy hánajty tøø mba'ya'axy, mänit hajxy mnimiøødmáawägombät. Mänitä møjcu'ugong hajxy jaduñ xquia'a yajtu'udägóyyät.

⁶ Cábøch jaduñ nmäna'añ coo hajxy mädsibø'øbä mbøgät. Nnä'ä móobiøčhä cuhdujt jaduñ. ⁷ Maas hoy hit jaduñ coo hajxy jaduñ mnä'ägädä hídät nidiuhm nébiøch høøch jaduñ nhitiän. Pero cøjhaminø'øy ja'a Dios hajxy tøø xpiädáacäm. Naje'e hajxy tøø xpiädáacäm coo hajxy nidiuhm nhíjtämät, naje'e caj.

⁸ Jaduñds je'e, pøn jaduñ nidiuhmhajpnä, jaduñ ñä'ägädä mähmø'owät nidiuhm nébiøch høøch nhitiän. Y jaaná jaduñduhmbä, ja'a yaamgto'oxyhajxy, cab hajxy piøjtägátsät. ⁹ Pero pø cab hajxy mme'e'xtuga'añ, maas hoy hit jaduñ coo hajxy mbøgät, coo cuhindo'oxiøjc hajxy xñä'ä yajcuhhínät.

¹⁰ Pero pøn jaty jaduñ tøø piøjnä, cham hajxy nmägapxy nhane'emy. Ca'a yhøøch nhamdsoo mädia'agy hädaa; Diosmädia'agy hädaa. Cab jaduñ yhooyä coo to'oxiøjc ja'a ñihyhap piuhwá'adsät. ¹¹ Pero coods jaduñ piuhwá'adsät, cabä wiingya'adiøjc wyiingpøgät. Maas hoy coo ñihyhap ñä'ägädä nämejtstägátsät. Y ja'a ya'adiøjc, jaaná jaduñ je'ebä, cabä tio'oxiøjc yhøxmádsät.

¹² Chámhøch njaac mädia'aga'añ. Ja'a nhamdsoo mädiá'agyhøch hädaa; cab jaduñ jim myiñ cujaay maa Diosmädia'aguiän. Pø jii ya'adiøjc tu'ug mäbøjpa, pø cabä tio'oxiøjc miäböcy, cabä tio'oxiøjc yhøxmádsät pø jaac møødtsána'awáanäp ja'a tio'oxiøjcäm. ¹³ Jaaná jaduñduhmbä, pø jii to'oxiøjc mäbøjpa, pø cabä ñihyhap miäböcy, cabä ñihyhap ñähgué'egät pø jaac møødtsána'awáanäp ja'a ñihyhápäm. ¹⁴ Coo ya'adiøjc ja'a Diosmädia'agy hánajty quia'a mäböcy, yaghoyøøyyäp je'e ja'a tio'oxiøjcäm je'eguiøxpä coo tio'oxiøjc miäböcy. Jaaná jaduñduhmbä, coo to'oxiøjc ja'a Diosmädia'agy hánajty quia'a mäböcy, yaghoyøøyyäp je'ebä ja'a ñihyhápäm je'eguiøxpä coo ñihyhap miäböcy. Coo hajxy jaduñ yhodiuumä, paadiä yhuunghajxy jaduñ yhodiuumäbä. Pø cabä tiaj tieedy häxøpy nidu'jäya'adiä quia'a mäböcy, cab hajxy häxøpy yhodiuumäbä. ¹⁵ Pøn jaduñ mäbøjp, coo jiamioød ja'a ca'a mäbøjpa hadsip miäná'anät coo hajxy ñiyhøxmadsoøjät, ween hajxy jaduñ ñiyhøxmächii. Jaduñ jíajcombät nebiä tøø quia'a pøquiäbä. Hiç, chojpiä Dios jioot jaduñ coo hajxy hoy nhíjtämät. ¹⁶ Pøn jaduñ mäbøjp, cab jaduñ yajnajuø'øy pø yajmäbøgaambytiä ja'a jiamioød ja'a ca'a mäbøjpa.

¹⁷ Cøjhaminø'øy ja'a Dios hajxy tøø xpiädáacäm. Jaduñ hajxy jootcuç njaac híjtämät neby hajxy hánajty nhíjtäm mänaa Dios hajxy xyajnähdíjjäm coo hajxy nmädúunämät. Hädaa mädiá'agyhøch homiaajä nyajnähixøøby majatiä hermanodøjc-hajxy yhamugø'øyän Dioswiingudsähgøøbiä. ¹⁸ Højts judíos, coo Jesucristo

miädia'agy hajxy nbanócxäm, cab hajxy ndsähdiúunämät, hoy hajxy nja judíoshájtäm. Y ja'a jäya'ayhajxy ca'a judíospä, ja'a Jesucristo miädia'agy hajxy panócxpä, ni je'ehajxy quia'a tsähdiúnät, hoy hajxy quia'a ja judíoshaty. ¹⁹ Cab jaduhñ ñejpiä pø mjudíoshájp, pø caj. Je'e nä'ägädä tsoobaatp coo Dios miädia'agy mgudiúunät. ²⁰ Jaduhñ hajxy mjaac hídät neby hajxy hánajty mhitiän mänaa Dios hajxy xyajnáhdijjiän coo miädia'agy hajxy mmábójcät. ²¹ Näje'e mijts jäya'ay xjie'ehaty nebiä waj nebiä cuaayän, hoyyá Diosmädia'agy hajxy mja panócxä. Cab hajxy jaduhñ mmøjpädá'agät. Pero pø cabä mwiindsón hajxy xyajtunaannä, ween hajxy xyhøxmajtsnä. ²² Tøø mijts ja'a Dios xyajnáhdijy coo miädia'agy hajxy mmábójcät, hoyyá jäya'ay hajxy hánajty xjia je'ehaty nebiä waj nebiä cuaayän. Hix, tøø Jesucristo hajxy xyajnáhwáatsäm ja'a nbojpáhájtäm ja'a ngädieyhájtäm. Hoorä, pønjaty hánajty ca'a je'ehájtáp jaduhñ nebiä waj nebiä cuaayän mänaa hajxy yajnáhdijyijän ja'a Diósäm coo miädia'agy hajxy miábójcät, moonsä hajxy je'e tiúnäp ja'a Jesucristocøxpä. ²³ Tøø Jesucristo hajxy xñähho'túutäm, paadiä Dios miädia'agy hajxy nmábójcänä. Cabä jäya'ay miädia'agy hajxy nmábójcänät. ²⁴ Jaduhñds je'e, hermanodøjc, jaduhñ hajxy mjaac hídät neby hajxy hánajty mhitiän mänaa Dios hajxy xyajnáhdijjiän coo miädia'agy hajxy mmábójcät. Jaduhñä Dios hajxy hoy mmädúnät.

²⁵ Myajtøøw hajxy jaduhñ pø hahixøøby jaduhñ coo cäxyiihäna'c-hajxy piógät. Høøch nhamdsoo mädia'agy hädaa; cab jaduhñ jim myiñ cujaay maa Diosmädia'aguiän. Pero hahixøøby jaduhñ coöch mijts nmädia'agy xmiábójcät; hix, Dióshøch jaduhñ tøø xyajnáhdijy coöch nmädúnät. ²⁶ Pues høøch jaduhñ mänaamb coo jaduhñ yhahixø'øy coo hajxy mga'a pógät, je'eguiøxpä coo tsø'ty häyohn wiädijnä jäda'ahaty. ²⁷ Pø jii mdo'oxiøjc, caj mhøxmádsät. Y pø cabä to'oxiøjc mmøødä, ca'a mhøxta'ay. ²⁸ Cab jaduhñ yhaxøögä coo mbógät; y coo cäxyiihäna'c jaduhñ piógät, ni jaduhñ quia'a haxøögä. Pero coo hajxy jaduhñ piógät, maas hamäjaa jiugyhajt hajxy miänaxa'añ. Páadyhøch jaduhñ nja mäna'añ coo hajxy quia'a pógät.

²⁹ Hermanodøjc, jue'eçh jaduhñ nja mäna'ana'añ, ja ween quia'a habaady coo Jesucristo yaa quiädaactägatsa'añ hädaa yaabä naaxwiin. Cab hajxy yaa jejcy njaac tunáanäm. Jaduhñds je'e, pønjaty to'oxiøjmøød, jaduhñ hajxy xyiicta'ag miädiaactá'agät nebiä Dios hajxy hoy miädúnät. Cabä yhuung tio'oxy hajxy ñädaj ñämáañ. ³⁰ Pønjaty jaduhñ jootmayhajp, ween hajxy jaduhñ quia'a jootmayhajnä. Pønjaty jaduhñ xoonäacp, ween hajxy jaduhñ quia'a xoonäacnä. Y ja'a hajuubiädøjc-hajxy, ween hajxy jaduhñ yhity nebiä toogy hajxy ca'a møødpän. ³¹ Pønjaty jaduhñ yaa tsánaaby häyoob hädaa yaabä naaxwiin, ween hajxy jaduhñ yhity neby hajxy tii ca'a møødpän. Hix, hädaa yaabä naaxwiin, neby hajxy cham nhíxäm, cøxaamb hädaaduhñ quiuhdägoyya'añ.

³² Jaduhñhøch njoot chocy coo hajxy tii mga'a nädaj mga'a nämáyät. Ja'a ya'adiøjc nidiuhmhajpä, caj tii ñädajy ñamay. Jagoo tiajy miay nebiä Dios hoy miädúnät. ³³ Pero ja'a craa to'oxiøjmøødpä, je'e tiajpy miaaby nebiä yhuung nebiä tio'oxy hoy miøødhídät. ³⁴ Y cabä Dios hoy miäduna'añ. Jaaná jaduhñä cäxyiihäna'c-hajxypä, cab hajxy tii tiajy miay. Jagoo hajxy tiajy miay nebiä Dios hajxy hoy miädúnät. Hamuumdu'jootä Diosmädia'agy hajxy quiudiuna'añ. Pero ja'a to'oxiøjc ja'a ya'adiøjmøødpä, nebiä ñihyhap hoy miøødhídät, je'eyyá ñäl'ä tajpy ñäl'ä maaby.

³⁵ Páadyhøch jaduhñ nmäna'añ, mijts jaduhñ nja puhbedaan. Caj mijts jaduhñ nhane'ema'añ. Pero chójpjøch njoot jaduhñ coo hajxy hoy yajxón mwädítät, coo Diosmädia'agy hajxy hamuumdu'joot mgudiúnät.

³⁶ Pø jii mhuinghajxy tøø quiäxyiijø'øy, ween hajxy piøcy, pø chojpy mjoothajxy jaduhñ. Cab jaduhñ yhaxøögä coo hajxy jaduhñ piógät. ³⁷ Pero pø cabä mjoothajxy chocy coo hajxy piógät, ween hajxy jaduhñ quia'a pøcy. Hix, cabä cuhdujt pøn miøødä coo miiçh xyhané'emät maa mhuingcøxpän. ³⁸ Hoy jaduhñ coo mhuing myajpógät. Jaaná hoy jaduhmbä coo mga'a yajpógät; cab jaduhñ ñejpiä.

³⁹ Ja'a to'oxiøjc ya'adiøjmøødpä, cabä cuhdujt miøødä coo wiingpä miøødtsänä'awät. Pero coo ñihyahp yhö'ogät, mänit mäböcy wyiingpögät pøn jaduhñ chojpy. Pero tsiçxøxpä hermano wyiingpögät. ⁴⁰ Pero maas jootcuyc yhidät coo quia'a nä'ägädä pøjtägätsät. Høøch jaduhñ mänaamb. Ja'a Dioshespíritøch ndijy jaduhñ xña-jtscapxøøyyäp.

8

¹ Näje'eçh hajxy tøø xmiäyajtøy pø hoy jaduhñ coo animalho'ogy hajxy ndsú'tsämät ja'a häna'c-hajxy quepychechwiinduum yojxypä. Tøyhajt jaduhñ coo hajxy nägøxiä tøø nmädoyhájtäm hädaagøxpä. Cab jaduhñ yhooyä coo hajxy nmánaanämät cooc tyijy hajxy cøxiä nwiinjuøøyyäm. Jaduhñä häna'c-hajxy näje'e miánaambä, ja'a hajxy yajcumayaambä. Pero coo hajxy hamiñ haxøpy nniçhojc nnimiéé'xämät, mänitä Diosmädia'agy hajxy maas hoy nmäböjcämät. ² Pøn jaduhñ mänaamb cooc tyijy hotyijä jiaty, hønndaacp jaduhñ. Cab jaduhñ tiøyyä coo hotyijä jiaty. Ween jaduhñ jiaac habøcy. ³ Pønä Dios jaduhñ wiingudsähgøøby, ñajuøøbiä Dios jaduhñ pøn je'e.

⁴ Tsøg hajxy jadähooc jaac mädiácäm pø hoy jaduhñ coo animalho'ogy hajxy ndsú'tsämät, ja'a häna'c-hajxy quepychechwiinduum yojxypä. Bueno, nnajuøøyyäm hajxy coo quepychech naaxpoch quia'a jujyquiä. Y nnajuøøyyäm hajxy coo Dios tiu'ugä. ⁵ Mayyä jäya'ayhajxy jaduhñ miána'añ cooc tyijy ja'a Dioshajxy miayyä jim tsajpootyp chaads yaa hädaa yaabä naaxwiin. Je'eg hajxy jaduhñ jiaançh wiingudsähgøøby. ⁶ Pero højts jaduhñ mäánaanäm coo Dios tiu'ugä, ja'a nDeedyhájtäm. Je'e jaduhñ hädiuun cøxiä näguipxy møødä yHuung. Paady hajxy jaduhñ xquiunú'xäm xpiädácäm coo hajxy jaduhñ ween nwiingudsähgøøyyäm. Jaduhñ hajxy nmánaanäm coo Jesucristo hajxy nWiindsøn'hájtäm. Cabä wiingpä hajxy nwiindsøn'hájtäm. Møød je'e cøxiä yhädiuumbä. Høxtä højtspaadyhájtäm hajxy xquiunú'xäm.

⁷ Pero cabä jäya'ayhajxy nägøxiä miäböcy coo quepychech quia'a jujyquiä, coo naaxpoch quia'a jujyquiä. Näje'e jäya'ay quepychech naaxpoch hajxy wyiingudsähgøøyñä. Y coo hajxy jaduhñ chú'udsät tijaty jäya'ayhajxy yojxyp quepychechwiinduum, jootmayhajp hajxy jaduhñ cooc tyijy jaduhñ quia'a hoyyä coo hajxy chú'udsät. Hix, je'enä hajxy jaduhñ miäböcyñä cooc tyijy quepychech jiujyquiä. ⁸ Nnajuøøyyäm hajxy coo Dios quia'a møjpäda'agy pø ndsú'tsäm pø caj ndsú'tsäm. Cab jaduhñ ñejpiä pø ndsú'tsäm pø caj ndsú'tsäm. ⁹ Pero hoy hajxy nja najuøøyyäm jaduhñ coo quia'a nejpiä pø ndsú'tsäm pø caj ndsú'tsäm, maas hoy hit jaduhñ coo nga'a tsú'tsämät, pø jii hermanohajxy näje'e quia'a najuøøbiä coo jaduhñ quia'a nejpiä coo hajxy ndsú'tsämät. ¹⁰ Tsøc mädiácäm coo miich mnajuøøy coo jaduhñ quia'a nejpiä coo yø'øduhmbä tsu'uçh mdsú'udsät. Hoorä, tsøc mäánaanäm coo miich yø'øduhmbä tsu'uçh hänajty mdsu'uçh maa quepychechwiinduumän. Hoorä, coo hermano jaduhñ tu'ug xyhíxät, ja'a ca'a najuøøbiä coo jaduhñ quia'a nejpiä coo miich jaduhñ mdsú'udsät, wehndä je'e xpiadsú'tspät. Wehndä miána'anät cooc tyijy jaduhñ tøø quiädieey coo jaduhñ tøø xpiadsu'uçh. ¹¹ Y coo jaduhñ quiädieeyät, miichä pojpä hänajty mmøød je'eguiøxpä coo miich hänajty jim mgay. Hix, tøø mähdiøjc ñähho'tu'udyii ja'a Jesucristäm. ¹² Y coo miichä mähdiøjc jaduhñ myajcädieeyät, jaduhñ hänajty tøø piaady nejpä miichä Jesucristo hänajty tøø mmägädieeyän. ¹³ Hoorä, pø cädieeyaambä hermano tu'ug je'eguiøxpä cooçh høøch yø'øduhmbä tsu'uçh ndsu'uçh, cábøch jaduhñ nnä'ägädä tsú'udsät mänaa, coo hermano ñä'a cädieeyät.

9

¹ Cábøch pøn xyhane'emy, túhmäts. Diøshøch xwyiinguejx, túhmäts. Hamdsooçhä Jesucristo nhijxy, túhmäts, ja'a hajxy nWiindsøn'hájtämbä. Mijts ja'a Diosmädia'agy nyajmäböjc, túhmäts. ² Näje'e jäya'ayhajxy miána'añ cooc tyijy høøchä Dios tøø xquia'a wiinguexy. Pero mmøødä tøyhajt hajxy jaduhñ cooçhä Dios tøø xwyiinguexy, je'eguiøxpä cooçh mijts nyajmäböjcy ja'a Diosmädia'agy.

³ Cooch pøn mänaa xñäma'ay cooc tyjy hөөчhä Dios tөө xquia'a wiinguexy, jadúhnhөch naxy nhadsoy: ⁴ Nmөөdhөch ndijy cuhdujt jaduhñ cooch mijts cay hu'ugy nmäyujwá'anät je'eguiөxpä coochä Diostuung nduñ. ⁵ Ja'a Jesucristo yhuchhajxy, miөөdä cuhdujt hajxy je'e coo hajxy wiädítät to'oxiөjmmөөd. Jaduhñä Pedro miөөdäbä, möödä Dioswiinguexypähajxy. Jadúhnhөch cuhdujt nmөөdäbä, hoyyä jäya'ayhajxy näje'e jia mäna'añ cooc tyjy hөөч nga'a möödä. ⁶ Tөгä mmänaamb mijts jaduhñä coo hөjts cuhdujt nga'a möödä coo hөjts nduung nnajtshixө'өwät, coo hөjts ja'a Diosmädia'agy nyajwá'xät, hөөч möödä Bernabé. Ja'a Diosquexyhajxy nägөxiä, tөө tiuung hajxy ñajtshixө'өy coo Diosmädia'agy hajxy yajwa'xy. ⁷ Yajmäjuuby hajxy je'e, y jaduhñ hөjts nyajmäjuyaambä. Hix, yajmäjuubiä soldadohajxy. Y jaaná jaduhñduhmbä, ja'a cudsatypcamhajxy, jiө'xypä tsaatyptsa'am hajxy. Y jaaná jaduhñduhmbä, ja'a meegcueendähajpähajxy, yhuucypiä meegtsi'tsnөө hajxy. ⁸ Ca'a yhöөч nhamdsoo mädia'agy hädaa; jaduhñä mädia'agy miänaambä ja'a Moisés jecy quiujáhyyäbä. ⁹⁻¹⁰ Jaduhñ jim myiñ cujaay: “Cabä waj mhaxuu'tsө'ögät coo trigopajc hänäjty tiehñjo'öch.” Coo Dios jaduhñ jecy miänaañ, jaduhñ miänaañ coo hөjts nyajmäjúyät. Hix, ja'a häna'c naaxpuhbähajxy möödä tsjipädөjc-hajxy, ñajuөөby hajxy jaduhñ coo hajxy yajmäjuya'añ. Jaaná jaduhñ hөjtspä, jaduhñ hөjts nyajmäjúubiät. ¹¹ Coo hөjts mijtsä Diosmädia'agy tөө nyajnahixө'өy, paady hajxy xmiájúyät. ¹² Mmäjuubiä Diosquexy hajxy, túhmäts; maas may hөjts cuhdujt nmөөdä coo hөjts mijts xmiájúubiät.

Pero cahnä hөjts mänaa nmäna'aññä coo hөjts nyajmäjúyät. Choippy hөjts njoot jaduhñ coo Diosmädia'agy wiá'xät, ja'a Jesucristocөxpä, paady hөjts nhity jamiäjuy. ¹³ Pero nmөөd hөjts cuhdujt jaduhñ coo hөjts nyajmäjúyät. Hix, ja'a häna'c-hajxy jim tuumbä tsajtөгooty, miөөdä cuhdujt hajxy je'e coo hajxy quiáyät tijatiä cu'ughajxy jim quiuyoxөөby maa altarän. ¹⁴ Jaaná jaduhñduhmbä, tөө Dios yhane'emy coo Diosmädia'agy-yajwa'xpähajxy yajmäjúyät. Ja'a jäya'ayhajxy mädoobä, je'eds hajxy jaduhñ mäjúyap. ¹⁵ Pero hөөч, cábөch mänaa tөө nmäna'añ cooch mijts xmiájúyät. Jadúhnhөch njoot chocy cooch jamiäjuy ndúnät. Y cooch häyaa nnä'a yuuhö'ögät, cab jaduhñ ñejpiä, nägöөч hänäjty tөө nduñ jamiäjuy.

¹⁶ Näje'e jäya'ayhajxy yajcumaya'añ je'eguiөxpä coo Diosmädia'agy hajxy yajwa'xy. Pero Dióshөch xwyiinguejx cooch nyajwá'xät hөөч; cábөch hamdsoojoot nyajwa'xy. Paady, cábөch nyajcumaya'añ. Y coochä Diosmädia'agy jaduhñ nga'a yajwá'xät, xyajcumädöwäbөchä Dios jaduhñ. ¹⁷ Cáбөch hamdsoojoot ndägөөyy Diosmädia'agy-yajwa'xpä. Dióshөch jaduhñ xwyiinguejx cooch miädia'agy nyajwá'xät. Cooch häxөpy tөө ndägө'өy hamdsoojoot, mänítөch cu nyajmäjuuyy. ¹⁸ Jaanч tehñ xioondáacpөch jaduhñ coochä Diosmädia'agy nyajwa'xy jamiäjuy, hóyhөчhä cuhdujt nja möödä cooch cu nyajmäjuuyy.

¹⁹ Hix, cooch jaduhñ nduñ jamiäjuy, cábөch pøn xyhane'emy. Pero chójpiөch njoot jaduhñ cooch hoy piönä xyhané'emät, nägoo Diosmädia'agy hajxy miäböğät. ²⁰ Cooch jim nhijty maa judíoshajxiän, jadúhnhөch nguhdujthajpä nebiä judíoshajxy quiuhdujthatiän, weenä Diosmädia'agy hajxy jaduhñ cu miäböjcy. Y cooch jim nhijty maa jäya'ayhajxy hänäjty yhane'emyiijän ja'a Diosmädia'agy, ja'a Moisés jecy quiujáhyyäbä, jadúhnhөch nyaghanehmbä neby hajxy hänäjty yaghanehmbän, weenä Diosmädia'agy hajxy jaduhñ cu miäböjcy, hóyhөчhä cuhdujt nja nmөөdä cooch nga'a yaghané'emät. ²¹ Y cooch jim nhijty maa jäya'ayhajxiän, ja'a cajpä judíospä, ja'a mädia'agy hajxy ca'a cudiuumbä, ja'a Moisés jecy quiujáhyyäbä, jadúhnhөch nguhdujthajpä neby hajxy hänäjty quiuhdujthatiän, weenä Diosmädia'agy hajxy jaduhñ cu miäböjpä. Cáбөch nmäna'ana'añ coochä Dios ja'a miädia'agy hänäjty nga'a mäböjca. Hix, nmäböjcaбөчhä Jesucristo miädia'agy jaduhñ. ²² Y cooch jim nhijty maa hermanohajxiän, ja'a Diosmädia'agy hajxy ca'xy ca'a wiinjuөөbiä, jadúhnhөch nbaguhdujthajpä neby hajxy hänäjty quiuhdujthatiän, je'eguiөxpä cooch hänäjty nyajnahixө'өwa'añ nebiä Diosmädia'agy hajxy maas hoy wyiinjuө'өwät. Majátyhөch jaduhñ nwädity Diosmädia'agy-yajwa'xpä, cáбөчhä jäya'ayhajxy jaduhñ nyagjootma'ady, weenä Diosmädia'agy hajxy jaduhñ

miäböcy. ²³ Páadyhøch jaduhñ nguhdujthaty, jadúhñhøchä Diosmädia'agy hoy nya-jwá'xät. Y coochä jäya'ayhajxy may nyajmäböçgät, mänítøch jaduhñ nxoondá'agät.

²⁴ Coö jäya'ayhajxy naxy ñiyhøxpäyø'ogyii, tu'jäya'ay jaduhñ nøcxy quiuhäyø'ogy, ca'a ñägøxiä. Tøyhajt jaduhñ. Jaduhñ mäwiin højtshájtäm, coö Diosmädia'agy hajxy nbanøcxäm, naxy hajxy hoy ndehm quiudiúunämät, jaduhñ hajxy jim nnøcxämät Dioswiinduum. ²⁵ Høxtahñdsä häyø'pädøjc-hajxy, tu'jøjpiä jioot ja'a wyiinmahñdy hajxy naxy piäda'agy coö hajxy jaduhñ quiuhäyø'ogät, túhmäts. Paadiä haxøøgpä hajxy jaduhñ quia'a nä'ägä nähdoñ. Premio hajxy jaduhñ móooyäp, y cab jaduhñ ñä'a jecy. Pero højtshájtäm, coö Diosmädia'agy hajxy hoy njaançh tehñ quiudiúunämät, mänit hajxy jaduhñ jim nnøcxämät Dioswiinduum. Jimñds hajxy jaduhñ nhíjtämät cøjxta'axiøø. ²⁶ Ja'a häna'c cuhäyø'pädøjc-hajxy, tøyä hajxy jaduhñ ñä'a päyø'ogy, cab hajxy jaduhñ yhimybiäyø'ogy miaamybiäyø'ogy. Ja'a boxeadorhajxy jajpä mägox mädex, cab hajxy jaduhñ ñä'a yemy ñä'a wopy. Jaduhñ mäwíinäts høøch, tu'jøjpiøchä Diosmädia'agy nbanøcxy. ²⁷ Cábøchä haxøøgpä jaduhñ nnä'ägä nähdoñ. Ngudiúumbiøchä Diosmädia'agy jaançh tehñ yhoy. Páadyhøchä Dios jim xyajnøcxa'añ maa wyiinduumän. Y coöch jaduhñ hoy nga'a cudiúnät, cáboch jim xyajnøcxät, hóyhøchä jäya'ayhajxy hänajty tøy nja yajwiinhixø'øy.

10

¹ Hermanodøjc, huuc mädown hajxy jaduhñ. Jéquiänä Dios ja'a joc ja'a näma'a jaduhñ quiejxy maa nhaphájtäm maa ndeedyhájtämhajxy hänajtiän, møødä Moisés. Mänit hajxy jaduhñ jecy piadu'ubøjcy nägøxiä näwiinä. Mänit hajxy nägøxiä ñøonajxy coö Tsaptsmejy paquiä tiøøch. ² Ja'a Moisés hajxy hänajty näguipxy miøødwädiipxy nägøxiä maa joc hajxy hänajty piawäditiän, maa hajxy ñøonajxiän Tsaptsmejjiooty. ³ Mänitä Dios hajxy miooyä ja'a cay ja'a hu'ugy. Mänit hajxy quiaaay nägøxiä. ⁴ Mänitä Dios ja'a tsa tu'ug yajtsäbijty. Mänitä nøø tiägøøyy xee'xpä. Mänit hajxy nägøxiä ñøøhuucy. Jaduhñ mäwíinäts ja'a Cristo neby yø'ø tsaajän. Hiç, puhbéjtäp hajxy hänajty ja'a Crístäm majaty hajxy hänajty wiädity. Ja'a Cristo, Dios yHuung je'e. ⁵ Pero cabä Diosmädia'agy hajxy hoy nämay quiudiuuñ. Cabä Dios hajxy jaduhñ quiumaayy. Paady hajxy jim tiu'uhø'cy pactuum.

⁶⁻⁷ Paady hajxy jaduhñ jiajty yhabejty coö haxøøgpä hajxy yhadsojcy, coö quepychech ja'a naaxpoch hajxy wyiingudsähgøøyy. Hijxtahñd jaduhñ coö hajxy nga'a pahijx nga'a padúunämät. Jaduhñ jim myiñ cujaay maa Diosmädia'aguiän: “Mänit hajxy quiaaay yhuucy quepychechwiinduum; mänit hajxy yhejch piujty quepychechwiinduum.” ⁸ Näje'e hajxy haxøøg jiatcøøyy. Paady hajxy nähii'xtägøøg mil yho'cy tu'xøøbä. Paady hajxy jaduhñ nga'a pahijx nga'a padúunämät. ⁹ Näje'e Dios hajxy yhiixmajch pø tøyhajt hajxy hänajty yajcumädown'añíjäm ja'a Dios. Mänit hajxy चाहनुचु'ätsä. Cøjx hajxy je'e yho'ogy. Paady hajxy jaduhñ nga'a pahijx nga'a padúunämät. ¹⁰ Näje'e hajxy hänajty jootcujc quia'a hity, je'eguiøxpä coö hajxy hänajty quia'a mäböcy. Paadiä Dios ja'a mioonsä quiejxy, hoy hajxy yagho'ogyii.

¹¹ Paady hajxy jaduhñ jiajty yhabejty, hijxtahñd jaduhñ coö hajxy nga'a pahijx nga'a padúunämät. Paady cujaay yhity. Hiç, habáatnäp jaduhñ coö Jesucristo yaa quiädaactägatsa'añ. ¹² Pøn jaduhñ niñänøømäp coö hamuumdu'joot miäböcy, naxy tiehñ ñiyajcopcø'owøjät coö ñä'a tu'udägóyyät. ¹³ Mijts ja'a møjcu'ugong xjia wi'li yajtu'udägoyyaamb. Hoy piønä jaduhñ jia yagjatcø'owa'añii haxøøg. Pero jaduhñä Dios miäna'añ cooc hajxy xpiuhbedáanäm, neby hajxy jaduhñ nga'a tu'udägóoyyämät. Tøyhajt jaduhñ coö hajxy xpiuhbedáanäm. Hiç, cabä møjcu'ugongä miäjaa jaduhñ miäbaady nebiä Dios mäjaa miøødän.

¹⁴ Jaduhñds je'e, hermanodøjc, cabä quepychech, cabä naaxpoch hajxy mwiingudsähgø'øwät. ¹⁵ Mnajuøøby hajxy jaduhñ coöch tøyhajt nmädia'agy. Hiç, mwiinjuøøby hajxy hädaaduhñ. ¹⁶ Coö tsuugay nyagjáltäm mänaa vino hajxy nhúucäm, mänitä Dioscujú'uyäp hajxy nyéjcäm. Je'e jaduhñ ñänøømby coö hajxy tu'ugcopc

tu'ugwiinmahñdy nhíjtäm, je'eguiøxpä coo Jesucristo ñø'ty jiaançh tehñ yaghäyooyy mänaa hajxy je'e xñähho'túutäm maa hädaa yaabä naaxwiinän. Y coo tsajcaagy hajxy nyajniñäguidóøyyäm, je'e jaduñ ñänøømgumbä coo hajxy tu'ugcopc tu'ugwiinmahñdy nhíjtäm, je'eguiøxpä coo Jesucristo ja'a ñi'x ja quiopc ñähdujcy mänaa hajxy je'e xñähho'túutäm. ¹⁷ Coo tu'ugpä tsajcaagy hajxy ngaamiújcäm, paady hajxy tu'ugcopc tu'ugwiinmahñdy nhíjtäm, hoy hajxy nja nämáyyäm.

¹⁸ Jaduhñä judíoshajxy yhijpä tu'ugcopc tu'ugwiinmahñdy møødä Dios mänaa animal hajxy chu'uçhän, ja'a jäya'ayhajxy yojxypä altarwiinduum. ¹⁹ Jadúññhøch nmäna'añ coo quepychech naaxpoch quia'a jujyquiä. Jadúññhøch nmänaambä coo animal quia'a cunuu'xiä ja'a jäya'ayhajxy yojxypä quepychechwiinduum. ²⁰ Caj pues. Ja'a jäya'ay ja'a Diosmädia'agy hajxy ca'a mæbøjpä, coo animal hajxy yoxy quepychechwiinduum, ja'a møjcu'ugong hajxy jaduñ wyiingudsähgøøby, ca'a Dyiosä. Cábøch njoot chocy coo jäya'ay hajxy mmøødhídät tu'ugwiinmahñdy, ja'a møjcu'ugong hajxy wyiingudsähgøøbiä. ²¹ Pø mhu'ugaambiä vino hajxy ja'a Dioscøxpä, cab hajxy hoy mhú'ugät ja'a møjcu'ugongcøxpä. Pø mgayaambiä tsajcaagy hajxy ja'a Dioscøxpä, cab hajxy hoy mgáyät ja'a møjcu'ugongcøxpä. ²² Cab jaduñ yhooyä coo Dios hajxy nyagjootmá'tämät. Hix, maas mäjaamøødä Dios que højtshájtäm.

²³ Jaduhñä jäya'ayhajxy miäna'añ cooc cuhdujt hajxy nmøødhájtäm hoy ñejpiä. Tøy-hajt jaduñ. Pero cab jaduñ yhawiinmatsä coo hajxy hoy ñejpiä njatcøøyyämät. Hix, coo hajxy hoy ñejpiä njatcøøyyämät, cabä Diosmädia'agy hajxy hoy nyajtu'uyóhyyämät. ²⁴ Näje'e jäya'ayhajxy yhøxta'ay coo hajxy chäná'awät coo hajxy yhäyówät. Pero maas hoy jaduñ coo nmädøjc hajxy nbuhbéjtämät.

²⁵ Tsu'udsä tsu'uçh hajxy jaduñ mädyijaty jim tóo'cäp halaplazpa'c. Pero cab hajxy myajtówät pø tøø jäya'ay animal hajxy yoxy quepychechwiinduum. Cab hajxy je'eduhñ mnä'a taj mnä'a máyät ja'a tsu'uçhcøxpä. ²⁶ Hix, jaduñä Diosmädia'agy miädia'agy: "Dios jie'e hädaa cøxiä maa hädaa yaabä naaxwiimbän."

²⁷ Coo pøn hajxy jaduñ xwiówät mägaabiä, hoy jaduñ coo hajxy mnócxät, hoyyä craa ja'a Diosmädia'agy hánajty quia'a jagä mæbøcy. Y cab hajxy myajtówät pø tøø animal hánajty quepychechwiinduum yoxyii. Cab hajxy mdaj cab hajxy mmáyät ja'a tsu'uçhcøxpä. ²⁸ Pero coo pøn hajxy jaduñ xyhawáanät coo häna'c yø'ø animal hánajty tøø yoxy quepychechwiinduum, cab hajxy jaduñ mdsú'udsät, weenä craa jaduñ quia'a jootma'ady ja'a hajxy tøø xyhawáanäbä. Jaduhñä craada'a tiajy miay coo jaduñ quia'a hoyyä coo yø'øduhmä tsu'uçh hajxy ndsú'tsämät, ja'a häna'c yojxypä quepychechwiinduum. ²⁹ Ja'a craa tøø xyhawáanäbä, je'eçh jaduñ nnänøømby coo wehñdä jootma'ada'añ. Cábøch jaduñ nmäna'ana'añ coo mijts mjootma'ada'añ.

Näje'e jäya'ayhajxiäda'a miäna'ana'añ: "Ween yø'ø craa jaduñ ñä'a jootma'ady, nmøødhøch cuhdujt jaduñ cooçhä animal ndsú'udsät, hoy häna'c tøø jia yoxy quepychechwiinduum. ³⁰ Haa ca'a, nnämäabiøçhä Dios Dioscujú'uyäp cooçhä tsu'uçh hánajty tøø ndsu'uçh. Tiiçh yø'ø craa jaduñ coo xñä'a nämä'ay cooçh nga'a tsú'udsät."

³¹ Jaduhñds je'e, tsøgå mädia'agy hajxy hoy yajxon yajtuun yaghíjtäm homiädyiibä coo hajxy ngaayy coo hajxy nhúucäm. Coo jäya'ay hajxy jaduñ xyhíjxämät coo mädia'agy hajxy hánajty hoy yajxon nyajtuun nyaghíjtäm homiädyiibä, mänitä Dios hajxy miøjpäda'aga'añ jiaançhpäda'aga'añ. ³² Hix, coo mädia'agy hajxy hoy yajxon nyajtuun nyaghíjtämät homiädyiibä, ni pøn jaduñ quia'a jootmá'adät, ni ja'a judíoshajxy, ni ja'a jäya'ayhajxy cajpä judíoshajpä, ni ja'a jäya'ayhajxy ja'a Diosmädia'agy mæbøjpä. ³³ Jadúññhøch høøçhpä, hoy yajxonhøçhä nyajtuñ nyaghity homiädyiibä nébiøçhä jäya'ayhajxy jaduñ xquiumáyät. Cábøch pøn jaduñ nyagjootma'ady. Hix, chójpjøch njoot jaduñ coo jäya'ayhajxy nägøxiä ñähwá'adsät ja'a piojpä ja'a quiädieeyhajxy. Cábøch njoot chocy cooçh nidiuhñ nbáadät ja'a hoybä ja'a weenbä.

11

¹ Nébiøçhä Jesucristo nbahixiän, jadúññhøch mijts xpiahíjxpät.

² Hermanodøjc, xoondáacpøch jaduhñ cooçh mijts xjiahmiejtsta'agy homiänaajä, y coo Diosmädia'agy hajxy homiänaajä myajtuñ nebiátyhöch hajxy tøø nnajtscapxóøyyäm. ³ Chójpiøch njoot jaduhñ coo hajxy mwiinjuó'øwät coo Jesucristo ja'a Dios Wyiindsønhaty y coo højtsä Jesucristo nWiindsønhtëmbä, højts ya'adiøjc-häjtäm. Jaanä jaduhñä ndo'oxiøjc-häjtäm hajxy xwyiindsønhtëmbä, højts ya'adiøjc-häjtäm. ⁴ Maa hermanodøjc-hajxy yhamugø'øyän tsajtøgooty, coo ya'adiøjc jim tu'ug Dyiospa'yá'axät cuhjupmøød, cabä Jesucristo hamuumdu'joot wyiingudsähgø'oy; ni jaduhñ coo Diosmädia'agy cuhjupmøød yajwiinhixó'øwät. ⁵ Jaanä jaduhñduhmbä, coo to'oxiøjc-hajxy jiiby Dyiospa'yá'axät cuhwa'ads tsajtøgooty, o coo Diosmädia'agy hajxy jiiby yajwiinhixó'øwät cuhwa'ads, høchähdiuunnä hajxy je'eduhñ. Jaduhñ je'eduhñ piaady nejpiän yø'ø to'oxiøjc quihwaay hajxy yhöxme'xypän. ⁶ Jaduhñds je'e, pø cabä to'oxiøjc-hajxy tiägø'owa'añ tsajtøgooty cuhjuuxy, ween hajxy jaduhñ ñä'ägä yajcuhme'xy. Y pø tsähdiuumb hajxy jaduhñ cuhme'xy, ween hajxy ñiguiuhjuuxyii. ⁷ Pero ja'a ya'adiøjc-hajxy, cab hajxy je'e ween tsajtøgooty cuhjupmøød tiägø'obiä. Hix, jaduhñä Dios ja'a ya'adiøjc yhädiuunñ nebiä Diosän. Ja'a ya'adiøjc-cøxpä jaduhñ quiähxø'ogy coo Dios mäjaa jiaançh tehñ miøødä. Pero ja'a to'oxiøjc-cøxpä quiähxø'ogy coo ya'adiøjc mäjaa miøødäbä. ⁸ Coo Dios ja'a to'oxiøjc jecy yhädiuunñ, jayøjpä ya'adiøjc ja'a quiaaçh tu'ug piøjcäxä. Mänitä to'oxiøjc yajwa'añguiojjä caaçhhaam. Jaduhñ jim myiñ cujaay maa Diosmädia'aguiän. Pero cab jaduhñ miäna'añ coo ya'adiøjc yajwa'añguiojjä ja'a to'oxiøjc quiaaçhhaam. ⁹ Ja'a ya'adiøjc-cøxpä ja'a to'oxiøjc yhädiuunäbä. Cab hajxy nmänäänämät coo ya'adiøjc yhädiuunä ja'a to'oxiøjc-cøxpä. ¹⁰ Päädiädsä to'oxiøjc-hajxy wiädítät cuhjuuxy, jaduhñ hajxy yajcähxø'ögät coo hajxy yhane'emyii ya'adiøjcäm. Jaduhñä Diosmoonsähajxy quiumay, ja'a hajxy jim tsajpootypä. ¹¹ Pero jaduhñä Dios hajxy jecy xquiunú'xäm ya'adio'oxy. ¹² Hix, jéquiänä to'oxiøjc yajwa'añguiojjä ja'a ya'adiøjc quiaaçhhaam. Jaanä jaduhñduhmbä, ja'a to'oxiøjc-cøxpä ja'a ya'adiøjc myiñguia'ay.

¹³ Huuc mäna'an mijts pø hawiinmats jaduhñ coo to'oxiøjc-hajxy cuhwa'ads Dyiospa'yá'axät tsajtøgooty. ¹⁴ Høchähdiuunnä jaduhñ coo ya'adiøjc quihwaayhajxy yoñ yajyéegät. Hoy piønä jaduhñ miäna'añ. ¹⁵ Pero hahixóøyyäp ja'a to'oxiøjc-hajxy jaduhñ coo quihwaay hajxy yajyéegät yoñ; jaduhñ je'eduhñ miäbaady nebiä cuhmochpä. ¹⁶ Jaduhñ højts nnä'ägädä yajnähixø'oy coo to'oxiøjc-hajxy cuhmoch Dyiospa'yá'axät tsajtøgooty. Y jaduhñä hermanohajxy nägøxiä yajnähixø'obiä tsajtøgooty wiinduhmyhagajpt. Hoorä, pønjaty jaduhñ mänaamb cooc tyijy jaduhñ quia'a nejpiä coo to'oxiøjc-hajxy jaguiuhmoch tsajtøgooty Dyiospa'yá'axät, cabä tøyhajt hajxy ñä'ägädä møødä.

¹⁷⁻¹⁹ Tøøch nmädoyhaty coo hajxy näje'e haxøøgtøjiämuum mniñäma'ayii maa hajxy tsajtøgooty mhamugø'øyän. Tøyhajtäda'a jaduhñ. Cab jaduhñ yhooyä y cábøch jaduhñ ngumay, hóyhøch jaduhñ nja najuø'oy coo jäya'ayhajxy yhixa'añ pønjaty tøyhajt hoy wädijp. ²⁰ Coo Jesucristo hänajty yagho'oga'añii, mänitä jiamiøød ñämaayy coo hajxy chuugaamiúgät ja'a Jesucristocøxpä. Pero mijts, coo hajxy naxy tsajtøgooty mhamugø'oy, coo hajxy naxy mdsuugaamiucy, cabä Jesucristo hajxy naxy mjahmiech. ²¹ Hanidiuhmjaty hajxy naxy mgay. Cab hajxy naxy mdajy mmay pø jii mmägu'ughajpä caayyøøc hajxy miøødä quia'a møødä. Näje'e hajxy naxy mmu'ugyii. ²² Jim hajxy hawiinmats mgay mhú'ugät maa mhamdsoo tøjc-hajxiän. Cab jaduhñ yhooyä coo hajxy jaduhñ mjatcø'oy maa Diostøjcän. Myajtsähdiuumbiä häyoobäya'ay hajxy jaduhñ. Cáboch mijts jaduhñ nnä'ägädä cumay coo hajxy jaduhñ mjatcø'oy.

²³ Hamdsooçhä Jesucristo xyajnähixøøyy nébiøch mijts tøø nnajtscapxóøyyäm: Hoorä, mänittsuu, coo Jesucristo hänajty tiooga'añii, mänitä Jesucristohajxy tiägøøyy tsuugaabiä møødä jiamiøødhajxy. Mänitä Jesucristo tsajcaagy quionø'cy. ²⁴ Mänit Dioscujú'uyäp yejcy. Mänitä tsajcaagy yhaguidøøyy. Mänit miänaañ: "Huuc cay hajxy. Høøch nni'x høøch ngopc hädaa. Mijtsçøxpøçhä häna'c xtiooga'añ. Cooçh mijts mänaa xjiahmiejtstä'agät, jaduhñä tsajcaagy hajxy mgáyät." ²⁵ Y coo hajxy hänajty

tøø chuugaabiädøøñä, mänitä Jesús vino quionø'cy copajooty. Mänit miänáangombä: “Cooch mijts nnähho'tu'udaannä, cooch nnø'ty nyaghäyowaannä, hawiinjemybiä Dios hajxy xmiøødyajcuhduga'añ. Hoorä, hädaa vino, hijxtahnd jaduhñ miähmø'øwa'añ nébiøch nnø'tiän. Y naaghooc hädaa vino hajxy mhu'ugy, mänitøch hajxy xjiahmiejt-stá'agät.”²⁶ Homiänaajä hädaa tsajcaagy hajxy hánajty mgaya'añ, homiänaajä hädaa vino hajxy hánajty mhu'uga'añ, myajcøhxø'py hajxy hánajty coo Jesucristo hajxy tøø xñähho'túutäm. Hix, wiimbijtagatsaambä Jesucristo. Yaa jadähooc quiädaactägatsa'añ hädaa yaabä naaxwiin.

²⁷ Nebiä Jesucristo jiamioødhajxy miøødcaayy miøødhuuquiän, jadúhñäc hajxy ngaayy, jadúhñäc hajxy nhúucämbät. Pønjetiä howyiinmahñdy hánajty ca'a møød coo hánajty jaduhñ quiaya'añ, coo hánajty jaduhñ yhu'uga'añ, haxøøg hajxy jaduhñ jiatcø'øy ja'a Jesucristo ñi'xcøxpä ñø'tycøxpä. ²⁸ Jaduhñds je'e, coo hajxy hánajty mgaya'añ ja'a Jesucristocøxpä, coo hajxy hánajty mhu'uga'añ ja'a Jesucristocøxpä, naxy hajxy jayøjpiä mdehm ñiñajuø'øwøjät pø howyiinmahñdy hajxy hánajty mjaanč møød. ²⁹ Pønjaty jaduhñ caaby huucp ja'a Jesucristocøxpä, coo hajxy jaduhñ quia'a møjpadá'agät coo Jesucristo hajxy xñähho'túutäm, yajcumädowáanäp hajxy jaduhñ. ³⁰ Näje'e hajxy mba'ambety; näje'e hajxy mga'a majaamøødä. Høxtä näje'ejaty hajxy jaduhñ tøø yho'ogy. Paady hajxy jaduhñ mjaty mhabety coo hajxy mga'a møjpada'agy coo Jesucristo hajxy tøø xñähho'túutäm. ³¹ Pero cabä Dios hajxy xyajcumädóowämät coo howyiinmahñdy hajxy hánajty nmøødhájtäm coo hajxy hánajty ngayáanäm ja'a Jesucristocøxpä, coo hajxy hánajty nhu'ugáanäm ja'a Jesucristocøxpä. ³² Paadiä Dios hajxy tähoogaty xyajcumädóowäm, jaduhñ hajxy xyajnajuøøyyäm coo miädia'agy hajxy hánajty hoy nga'a yajtúunäm. Y coo miädia'agy hajxy hoy nyajtúunämät, cab hajxy jii by nnä'ä hädáacämät møjcu'uhaam maa jäya'ayhajxy yhäda'aga'añän, ja'a hajxy ca'a mäbøjpä.

³³ Jaduhñds je'e, hermanodøjc, coo hajxy hánajty mänaa mgaamiuga'añ ja'a Jesucristocøxpä, coo hajxy hánajty mänaa mhuucmuga'añ ja'a Jesucristocøxpä, naxy hajxy tu'cuhdujt mdehm quiaachóonät. Mnyihahixø'øwøjät hajxy jaduhñ. ³⁴ Pø myähó'cäp hajxy hánajty, jayøjp hajxy mnä'ägä cáyät maa mdøjc-hajxiän. Jaduhñä Dios hajxy xquia'a yajcumädóowät coo hajxy hánajty mgaamiuga'añ ja'a Jesucristocøxpä, coo hajxy hánajty mhuucmuga'añ ja'a Jesucristocøxpä. Madiu'učh hajxy tøø xjiaac mäyajtøy. Cooch jim nnøcxät maa mijtsän, mänitøch jim nyajtødiägø'øwät.

12

¹ Hermanodøjc, tsøg hajxy mädiäacäm nebiatiä Dioshëpíritu hajxy xpiuhbéjtäm, coo hawiingatiä tuung hajxy xmióoyyäm. Naxy hajxy jaduhñ mdehm wyiinjuø'øwät.

² Mnajuøøby hajxy jaduhñ, coo Diosmädia'agy hajxy hánajty mga'a panøcxyñä, je'enä quepychech naaxpoch hajxy hánajty mwiingudsähgø'øyñä. Cabä quepychech naaxpoch quiapxy miädia'agy. Jaduhñ hajxy hánajty mwädity nebiä tu'udägoybän. ³ Huuc wiinjuø'øw hädaa mädia'agy hajxy. Pønjetiä Dioshëpíritu jaduhñ najtsapxøøyyäp, cabä Jesús hajxy je'e haxøøg ñänømy. Y pønjetiä Dioshëpíritu jaduhñ ca'a najtsapxøøyyäp, cab hajxy hoy miäna'ana'añ coo Jesús hajxy nWiindsøn'hájtäm.

⁴ Coo Diostuung hajxy jaduhñ ndúunäm, hawiingatiä Diostuung hajxy jaduhñ xpiáatäm. Pero ja'a Dios ja'a yHëpírituhajtiä hajxy jaduhñ xtiuungmóoyyäm. ⁵ Madiu'u ja'a Diostuung hajxy jaduhñ njaanč túunäm, pero tu'jäya'ayyä hajxy jaduhñ nWiindsøn'hájtäm. Ja'a Jesucristo je'e. ⁶ Ja'a Dios hajxy xpiuhbéjtäm coo tiuung hajxy ndúunämät, nebiatiä tiuung hajxy xpiáatäm. ⁷ Paadiä Dioshëpíritu hajxy hawiingaty xtiuungmóoyyäm, jaduhñ hajxy hoy nnibihbéjtämät hamiñ haxøpy. ⁸ Hix, näje'e hermanohajxy tiuungmo'oyii ja'a Dioshëpíritäm coo hajxy quiapx coo hajxy miädia'agät nebiä japä häna'cän. ⁹ Näje'e hermanohajxy piuhbedyii ja'a Dioshëpíritäm coo hajxy hoy jiaanč tehñ miäböggät ja'a Diosmädia'agy. Näje'e hajxy miäjaamo'oyii nebiä jäya'ay hajxy yajmøcpøggät, ja'a pøjc ja'a híjxäbä. ¹⁰ Näje'e hermanohajxy piuhbedyii

ja'a Dioshespíritäm coo hajxy hoy-yagjuøøñä tiuñ ja'a Diosmäjaagøxpä. Näje'e hajxy tiuungmo'oyii coo Diosmädia'agy hajxy jajwá'xät. Näje'e hajxy tiuungmóoyyábä coo hajxy yhöxcábät pøn najtscapxóoyyáp ja'a Dioshespíritäm, pøn najtscapxóoyyáp ja'a mójcu'ugóngäm. Näje'e hajxy piaadyii coo hajxy quiápxät wiinghayuucjaty. Näje'e hajxy piáatábä coo hajxy quiapxhoyø'owät waambatiä hermanohajxy tøø quiapxy wiinghayuucjaty. ¹¹ Hanidiuhmjatiä Dioshespíritu hajxy xtiuungmóoyyäm, nebiä jioot chocy. Tu'uquiä ja'a Dioshespíritu jaduhñ.

¹² Ja'a tu'ugpä ni'x, ja'a tu'ugpä copc, madiu'u pajc miøødä. Pero tu'ugpä ni'x tu'ugpä copc hajxy jaduhñ nmøødhájtäm. Jaduhñ mäwiin højtshájtäm, tu'ugmädia'agy hajxy nhíjtäm coo Jesucristo hajxy nWiindsønhájtäm, hoy hajxy nja nämayhájtäm. ¹³ Coo hajxy nnäbéjtäm, jaduhñä Dioshespíritu hajxy xpiadáacäm tu'ugmädia'agy nägøxiä, møødä judíoshajxy, møødä cajpä judíoshajxy, møødä jäya'ayhajxy je'ehájtábä wiinghänä'cäm, møødä jäya'ayhajxy hijpä hawa'adstuum. Nägøxiä ja'a Dioshespíritu hajxy nmøødhájtäm.

¹⁴ Ja'a tu'ugpä ni'x ja'a tu'ugpä copc, madiu'u pajc hajxy nmøødhájtäm. ¹⁵ Coods yø'ø tecz jaduhñ ñä'ä mäná'anät: "Cábøch tii nmach cábøch tii nnähdoñ nej yø'ø cø'øjän, páadyhöch miich jaduhñ xquia'a yajtuna'añ", cab jaduhñ ñä'ä tóyyábä; haa ca'a, nyajyohy nyajnáxäm ja'a tecz jaduhmbä. ¹⁶ Jaanä jaduhñduhmbä, coo yø'ø taatsc jaduhñ miänáambät: "Cábøch jaduhñ nhixy nej yø'ø wiinän, páadyhöch miich jaduhñ xquia'a yajtuna'añ", cab jaduhñ ñä'ä tóyyábä; haa ca'a, nyajmädoowäm ja'a taatsc jaduhmbä. ¹⁷ Coo hajxy häxøpy nhaagä wiinhájtäm, cab hajxy häxøpy nmädóowäm. Y coo hajxy häxøpy nhaagä mädohndhájtäm, cab hajxy häxøpy tii xjiøjxuugóoyyäm. ¹⁸ Jaduhñä Dios hajxy xquiunúu'xäm nebiaty hajxy xyajmädsójcäm. Paadiä ni'x ja'a copc hajxy nmøødhájtäm, paadiä cø'ø ja'a tecz hajxy nmøødhájtäm. ¹⁹ Coo hajxy häxøpy nhaagä pajc-hájtäm, cabä nni'x ja'a ngopc-hajxy häxøpy yhíjtäm. ²⁰ Madiu'u ja'a pajc hajxy nmøødhájtäm ja'a tu'ugpä jäya'ay. Tu'ugni'x tu'ugcopc hajxy jaduhñ nmøødhájtäm.

²¹ Coo wiin häxøpy quiapxy, cabä cø'ø jaduhñ ñämä'awät: "Cábøch miich nyajmaaji-aty." Jaanä jaduhñä copcpä, coo häxøpy quiapxy, cabä tecz jaduhñ ñämäabiät: "Cábøch miich nyajmaajiaty." ²² Pero nhaagä yajtuungpáatäm ja'a ni'x ja'a copc cøxiä, hoyyä pajc näje'e quia'a jagä møcä. ²³ Cabä ni'x ja'a copc hajxy teeñmuum nyajcähxø'ogáanäm, paadiä wit hajxy nmøødhájtäm. ²⁴ Pero ja'a nwiin ja'a njøjphájtämhajxy, cab jaduhñ ñejpiä coo hajxy nyajcähxø'cämät. Jaduhñhöch cham tøø nmädia'agy nebiä Dios ja'a nni'x ja'a ngopc-hájtämhajxy xquiunúu'xäm tu'ughamuum. Hoorä, jaduhñ mäwiin højtshájtäm, tu'ugmädia'agy hajxy nnimiøødhájtäm coo Diosmädia'agy hajxy näguipxy nmäbójcäm, coo Jesucristo hajxy näguipxy nWiindsønhájtäm. Jaduhñä Dios hajxy xquiunúu'xäm coo hermanodøjc hajxy nwiingudsähgøoyyämät, hoy hajxy jia xoñ jia häyoy. ²⁵ Jaduhñä Dios quiumay coo hajxy nhíjtämät tu'ugjoot tu'ugcopc, coo hajxy nniçhøjc coo hajxy nnimié'e'xämät hamiñ haxøpy. ²⁶ Coo tu'jäya'ay chaächpógät, mänit hajxy nägøxiä njootmayhájtämät. Jaanä jaduhñduhmbä, coo tu'jäya'ay wyiingud-sähgø'owóøjät, mänit hajxy nägøxiä nxoondáacämät.

²⁷ Nwiindsønhájtämä Jesucristo hajxy nägøxiä pønjetiä Diosmädia'agy mäbøjp. Hawiingatiä Dios hajxy tøø xquiunúu'xäm. ²⁸ Näje'e hermanohajxy tøø tiuungmo'oyii ja'a Diósäm. Ja'a Dios quiuguexyhájtábä, je'e hajxy jayøjp tuungpaat. Mänit hajxy je'e tiuungpaatpä, ja'a Diosmädia'agy-yajwa'xpähajxy, møødä Diosmädia'agy-yajwiinhixøøbiähajxy. Näje'e hermanohajxy hoy-yagjuøøñä tiuñ ja'a Diosmäjaagøxpä. Näje'e hermanohajxy yajmøcpøcy ja'a jäya'ayhajxy nähba'amguhba'ambä. Näje'e hermanohajxy miäbuhbety. Näje'e hajxy jaduhñ miägapxy yhane'emy. Näje'e hajxy piaadyii coo wiinghayuucjaty hajxy quiápxät. ²⁹ Hoorä, cabä Dios hajxy nägøxiä xquiuguexyhájtäm. Cabä Diosmädia'agy hajxy nägøxiä nyajwá'xäm. Cab hajxy nägøxiä nyajnáhixøoyyäm. Cab hajxy nägøxiä ndúunäm hoy-yagjuøøñä ja'a Diosmäjaagøxpä. ³⁰ Cab hajxy nägøxiä nba'amyajnáxäm. Cab hajxy nägøxiä tøø

xpiáatám coo ngáp̄xámät wiinghayuucjaty. Y cab hajxy nägøxiä tøø xpiáatám coo hajxy ngap̄xhoyóøyyámät waambatiä hermano tøø quiapxy wiinghayuucjaty. ³¹ Tsögä njoot hajxy pädáacám hamuumdu'joot coo Dios tuung hajxy ween xmióoyyám ja'a maas tsoobaatpä. Chámhøchä mädia'agy hajxy nyajnáhixø'øwa'añ nebiä Dios miädia'agy hajxy hoy mmaas yajtu'uyó'oyät.

13

¹ Coo nmädøjc hajxy nga'a tsojc nga'a mée'xámät, cabä Diosmädia'agy hajxy hánajty hoy ngudiúunám, hoy hajxy cu nja capx cu nja mädiáacám madiu'u nebiä jäya'ay-hajxy yaa jia capxiän hádaa yaabä naaxwiin, nebiä Diosmoonsähajxy jim jia capxiän tsajpootyp. ² Coo nmädøjc hajxy nga'a tsojc nga'a mée'xámät, cab hajxy nnä'ägädä tsoobáatámät, hoy hajxy cu nja najuóøyyám tii jadáanäp tii tunáanäp, hoy hajxy cøxiä wiinä cu nja najuóøyy cu nja jahmiéjtsám, hoyyá møcmájaa hajxy cu nja jaančh tehñ miøødhájtám hoy ñä'ä tiigøxpä. ³ Coo nmädøjc hajxy nga'a tsojc nga'a mée'xámät, cab hajxy nnä'ägädä tsoobáatámät, hoyyá háyoobájäya'ay hajxy cøxiä wiinä cu nja móoyyám mäduhñtiä hajxy nmøødhájtám, hoyyá jäya'ay hajxy cu nja nähho'túutám.

⁴ Pønä miädøjc tsojp mee'xp, mee'xxieemy hajxy jaduhñ yhity. Hoy hajxy jaduhñ miädøjc-haty. Cabä hadsocywyiinmahñdy hajxy miøødä. Cab hajxy yajcumaya'añ. ⁵ Pønä miädøjc tsojp mee'xp, cab hajxy chähdiuhñdägoyyá. Cab hajxy wyiinducä. Cab hajxy jiootma'ady, hoy hajxy cøxypánejpiä cu jia tunøø. ⁶ Cabä haxøøgpä hajxy chocy; ja'a tøyhajtpä hajxy jaduhñ chojpy. ⁷ Pønä miädøjc tsojp mee'xp, miee'xtujpy hajxy. Coo hajxy cøxypánejpiä tiunóøjät ja'a miädøjcám, cab hajxy jiootma'ady. Cab hajxy ñäxø'øwø'øy, cab hajxy ñähøønø'øy. Hoy hajxy miäxi'igy, hoy hajxy miägapxy, weenä craa ja'a tøø quiädiéeyäbä jaduhñ yhuuc wiinmahñmech coo jaduhñ tøø quiädieey.

⁸ Habaadaamb jaduhñ coo jäya'ayä Diosmädia'agy hajxy hánajty quia'a yajwa'xaannä. Habaadaamb jaduhñ coo jäya'ayhajxy hánajty quia'a capx quia'a mädia'agaannä wiinghayuucjaty. Habaadaamb jaduhñ coo quia'a tsoobaadaannä tijatiä jäya'ayhajxy yaa ñajuøøby hádaa yaabä naaxwiin. Pero cøjxta'axiøø hajxy nničhoc nnimiee'xáanám. ⁹ Cahnä hajxy hoy nwiinjuóøyyám je'eguiøxpä coo hajxy yaa nhíjtámnä hádaa yaabä naaxwiin. Cahnä Diosmädia'agy hajxy hoy nhabójcám coo hajxy nyajwá'xámät. ¹⁰ Habaadaamb jaduhñ coo Diosmädia'agy hajxy maas ca'xy nwiinjuø'øwáanám, paady hánajty pøn quia'a wäditaannä Diosmädia'agy-yajwa'xpä.

¹¹ Coo hajxy nmuutsc-hájtámnä, cahnä hajxy hánajty nwiinmahñméjtsám. Pero coo hajxy nmøjjøøyyänä, mänit hajxy nnajuóøyyänä. Tøø hajxy nwiinmahñméjtsänä; cab hajxy nwiinmahñdyhájtänä neby hajxy tøø nmuutsc-hájtám. ¹² Jaduhñ mäwíinäts je'e, coo hajxy yaa nhíjtám hádaa yaabä naaxwiin, cahnä Diosmädia'agy hajxy hoy nwiinjuóøyyámänä. Cahnä Dios hajxy nhixyhájtám. Pero coo hajxy jim nnøcxáanám tsajpootyp, mänitä Dios hajxy nhixyhadáanám neby hajxy je'e xyhixyhájtám. Mänitä miädia'agy hajxy ca'xy nwiinjuø'øwáanám. ¹³ Tägøøgtu'u ja'a Dios hajxy xyhanéhñäm; coo miädia'agy hajxy nmäbójcámät coo tiøyhajtä, chaads coo Jesucristo hajxy njøbhíjxámät coo yaa quiädaactägatsa'añ, chaads coo nmädøjc hajxy ndsojc nmée'xámät. Hádaa høxhaambä jaduhñ maas tsoobaadaamb coo nmädøjc hajxy ndsojc nmée'xámät.

14

¹ Naxy hajxy ndehñ ñiçhojc ndehñ ñimiée'xámät hoy miánaajä. Je'e maas tsoobaatp. Jaanä jaduhñduhmbä, tsögä Dios hajxy nämáayyám coo mäjaa hajxy ween xmióoyyám coo tiuung hajxy jaduhñ ndúunámät. Je'e tsoobaatp coo hermano ja'a Diosmädia'agy hajxy yajwa'xy. ² Näje'e hermanohajxy, coo hajxy hánajty quiapxa'añ tsajtøgooty, cab hajxy howyiinjuøøñä miädia'agy. Hix, ja'a Dios hajxy jaduhñ miøødmädiaacypy, ca'a yhøjtshájtám, je'eguiøxpä coo Dioshajtiä wyiinjuø'øy. Cab højts jaduhñ nnä'ägädä wiinjuóøyyám. Najtscapxøøyyäp hajxy jaduhñ ja'a Dioshéspiritám. Jagooyyá Dios jaduhñ ñajuø'øy waambaty hajxy jaduhñ miädia'agy. ³ Pero coo Diosmädia'agy hajxy ngáp̄xámät nebiä jäya'ayhajxy jaduhñ wyiinjuø'øwät, mänitä jäya'ay ja'a Diosmädia'agy

hajxy hoy nyajwiingapxóoyyämät, hoy hajxy jaduhñ nmägapx nhané'emät, hoy hajxy jaduhñ ngapxmöcpójcämät. ⁴ Pøñ Dioshajtiä nä'ä møødmädiacp, je'e mäjaa nidiuhñ móoyyap nebiä Diosmädia'agy maas hoy jiaac wiinjuó'owät. Hix, cabä jäya'ayhajxy jaduhñ wyiinjuó'øy waambaty jaduhñ miädia'agy. Pero coo hermanodøjc ja'a Diosmädia'agy hajxy nyajwiingapxóoyyämät howyiinjuøøñä, mänit hajxy miäjaamo'owøøjät nebiä Diosmädia'agy hajxy jaduhñ maas hoy jiaac wiinjuó'owät.

⁵ Maas tsoobaatp jaduhñ coo Diosmädia'agy hajxy ngápämät howyiinjuøøñä; jaduhñä hermanohajxy nägøxiä wyiinjuó'owät, ja'a hajxy mädoobä. Hoy hit jaduhñ coo Dioshajtiä hajxy nägøxiä mmøødmädiá'agät. Mänit mabøcy yhojó'owät coo hajxy mgapxhoyó'owät, jaduhñä hermanohajxy nägøxiä wyiinjuó'owät. ⁶ Hermanodøjc, coochä Dioshajtiä nnä'ä møødmädiá'agät maa mijtsän, cab hajxy jaduhñ hoy mwiinjuó'owät. Pero mänit hajxy jaduhñ mwiinjuó'owät cooch mijtsä Diosmädia'agy hoy nyajwiinhixó'owät nebiátyhøchä Dios ja'a miädia'agy hánajty xñajtsapxøoyyä.

⁷ Høxtáhmädsä xuuxpädøjc-hajxy, coo hajxy hoy quia'a xú'uxät, nägoodä hajxy nøcxy ñä'ä yajxu'uxy ñä'ä yajpøgø'øy, y cab hoy yajmädoy. ⁸ Jaaná jaduhñduhmbä maa jäya'ayhajxy chiptuñän, coo soldado ja'a corneta hoy quia'a yajxú'uxät, cabä jiamiøødhajxy jaduhñ hoy chiptúnät. Nä'ä himybiäyø'øg nøø maamybiäyø'øgäp hajxy jaduhñ. ⁹ Jaduhñ mäwíinäts højtshájtäm, coo Dioshajtiä hajxy nmøødmädiácämät, cabä nmädia'agy hajxy jaduhñ nniwyiinjuóoyyämät hamiñ haxøpy. Xiøøbä hajxy jaduhñ nnä'ä capx nnä'ä mädiácämät. ¹⁰ Madiu'u hayuuc hajxy yaa ngápäm hädaa yaabä naaxwiin. Hawiingaty hayuuc hajxy nniwyiinjuóoyyäm. ¹¹ Y coo mädia'agy hajxy hamiñ haxøpy nga'a nniwyiinjuóoyyämät hawiingaty, cab hajxy jaduhñ hoy nnimiøødmädiácämät. ¹² Jaduhñ mäwíinäts mijts, mjaanç tehñ miánaamb mijts jaduhñ coo Dioshèspíritu hajxy xtiuungmó'owät. Y myujwá'anäp ja'a tuung hajxy mädyii maas tsoobaatp. Jaduhñä hermanodøjc hajxy maas hoy myajwiingapxó'owät nebiä Diosmädia'agy hajxy jaduhñ maas hoy wyiinjuó'owät.

¹³ Jaduhñds je'e, pøñ jaduhñ howyiinjuøøñä ca'a capxp ca'a mädiacp, weenä Dios jaduhñ ñäma'ay coo miäjaamo'owøøjät nebiä miädia'agy quiapxhoyó'owät. ¹⁴ Coo Dios hajxy nba'yáaxämät ja'a hayuuc-haamby mädyii Dioshajtiä wyiinjuøøbiä, cab hajxy nwiinjuóoyyämät, hoy hajxy cu nja mädiácäm wiinmahñdyhaam. Y cab hajxy jaduhñ nnä'ägädä wiinjuóoyyäm. ¹⁵ Jaduhñds je'e, tsøcxä Dios hajxy pa'yáaxäm juøhñdyhaam, pero howyiinjuøøñä. Tsøcxä Dioshøy hajxy høøwäm juøhñdyhaam, pero howyiinjuøøñä. ¹⁶ Coo Dios hajxy nnámáayyämät "Dioscujú'uyäp", ja'a hayuuc-haamby mädyii Dioshajtiä wyiinjuøøby, cab hajxy hamdsoo nwiinjuøoyyämät. Y ja'a jäya'ayhajxy jii mädoobä, ni je'e hajxy jaduhñ quia'a wiinjuó'owät. Y cab hajxy hoy piamáná'anät "Dioscujú'uyäp." ¹⁷ Hoyyä Dios hajxy yajxón cu nja nämáayyäm "Dioscujú'uyäp", ja'a jäya'ayhajxy jii mädoobä, cab hajxy wyiinjuó'owät. Y cabä Diosmädia'agy hajxy jaduhñ jiaac wiinjuó'owät. ¹⁸ Høøch, nnámáabiøchä Dios "Dioscujú'uyäp" je'eguiøxpä cooch pøñ jaduhñ xquia'a najtspaadø'øy nébiøch hayuuc-haamby ngapxiän, ja'a Dioshajtiä wyiinjuøøbiä. ¹⁹ Pero maa hajxy nhamugøoyyämän tsajtøgooty Dioswiingudsähgøøbiä, tsoobaatp jaduhñ cooch howyiinjuøøñä ngápät, hoy jia weentiä. Cab jaduhñ jiaty tsoobáadät cooch hayuuc-haamby ngápät ja'a Dioshajtiä wyiinjuøøbiä, hóyhøch yoñ cu nja capx. Hix, cooch howyiinjuøøñä ngápät, wyiinjuó'owäp ja'a hermanohajxy jaduhñ, jaduhñhøchä Diosmädia'agy hajxy hoy nyajwiingapxó'owät.

²⁰ Hermanodøjc, tsøg hädaa mädia'agy hajxy hoy wiinjuóoyyäm nebiä møjhá-na'c-hajxy hoy wyiinjuó'oyän. Yøø pigána'c-hajxy, cahnä hajxy wyiinmahñmechñä. Pero cahnä haxøgpä hajxy yhixy yhabaadyñä. ²¹ Jaduhñä Diosmädia'agy jecy miánaañ: "Ja'a judíoshajxy, cábøchä nmädia'agy hajxy xmiäbøgaanä. Nguexáambiøchä jäguembä jäya'ay jim maa judíoshajxiän. Mänit hajxy miøødmädia'aga'añii wiinghayuuc-haamby. Pero ni jaduhñhøchä nmädia'agy hajxy xquia'a mabøgaanä, nømä Dios miánaañ." ²² Ja'a jäya'ay ja'a Diosmädia'agy hajxy ca'a mabøjpä, je'eguiøxpä højts hayuuc-haamby ngápäm, ja'a Dioshajtiä wyiinjuøøbiä, ca'a jie'eguiøxpä ja'a

jäya'ayhajxy ja'a Diosmädia'agy mäbøjpa. Coo hajxy naxy ngápxäm ja'a hayuuc-haamby mädyii Dioshajtiä wyiinjuøby, jaduñä Dios hijxtahñd xii yecy coo jäya'ay tsaachpä peenä hajxy piaada'añ, ja'a Diosmädia'agy hajxy ca'a mäbøjpa. Pero coo Diosmädia'agy hajxy naxy ngápxäm howyiinjuøña, jaduñä Dios hijxtahñd xii yecy coo jäya'ay hoybä weenbä hajxy piaada'añ, ja'a Diosmädia'agy hajxy mäbøjpa. ²³ Hiç, coo hajxy nägøxiä ngápxämät ja'a hayuuc-haamby mädyii Dioshajtiä wyiinjuøby maa hajxy hñajty nhamugóøyyämän tsajtøgooty Dioswiingudsähgøøbiä, y coo jäya'ayhajxy jim tiägó'owät, ja'a Diosmädia'agy hajxy ca'a mäbøjpa, jaduñda'a hajxy miäná'anät cooc tyijy hajxy nguhhñäm. ²⁴⁻²⁵ Pero coo Diosmädia'agy hajxy nägøxiä ngápxämät howyiinjuøña, mäñitä jäya'ayhajxy wyiinjuø'owät, ja'a hajxy ca'a mäbøjpa. Mäñit hajxy yhuuc tehñ wyiinmahñmédsät. Mäñit hajxy hamdsooyä ñiñajuø'owøjät coo hajxy hñajty hoy tøø quia'a jäya'ayhaty. Mäñit hajxy jaduñ jyijcädá'agät. Mäñitä Dios hajxy yhuuc tehñ wyiingudsähgó'owät. Mäñit hajxy yhuuc tehñ miäná'anät coo Dios hajxy hñajty tøy xjiaanç tehñ miøødhjtäm.

²⁶ Hermanodøjc, maa hajxy nhamugóøyyämän tsajtøgooty Dioswiingudsähgøøbiä, tsøg hajxy yajxón yagjajtäm nägøxiä, jaduñä Diosmädia'agy hajxy maas hoy nmaas mäbøjcämät. Näje'e Dioshøy hajxy yhøwa'añ. Näje'e hajxy yajñähixø'øwa'añ. Näje'e hajxy miädia'aga'añ waambatiä Diosmädia'agy hajxy hñajty tøø ñajtsapxø'øyii ja'a Diósäm. Näje'e hermanohajxy quiapxa'añ hayuuc-haamby mädyii Dioshajtiä wyiinjuøby. Y näje'e hermanohajxy quiapxhoyø'øwa'añ waambatiä hermanohajxy hñajty tøø quiapxy ja'a hayuuc-haamby ja'a Dioshajtiä wyiinjuøøbiä. ²⁷ Coo hajxy mänaa ngápxämät ja'a hayuuc-haamby ja'a Dioshajtiä wyiinjuøøbiä maa hajxy hñajty nhamugóøyyämän tsajtøgooty Dioswiingudsähgøøbiä, nämetsyä nädägøøquiä hajxy ngápxämät hanidiuhmjaty. Mäñitä hermano tuljäya'ay xquiapxhoyø'øyyämät. ²⁸ Pero pø cabä hermanohajxy jim näje'e jiaty capxhoyø'ow, mejor ween hajxy jim nga'a nä'ägädä cápxämät tsajtøgooty ja'a hayuuc-haamby mädyii Dioshajtiä wyiinjuøby. Wiingtuum hajxy nøcxy nnä'ägädä cápxäm jaduñ hanidiuhmjaty. Xmiädóowämöp ja'a Dios hajxy jaduñ. ²⁹ Jaaná jaduñduhmbä, coo hermanohajxy hñajty quiapxa'añ waambaty hajxy hñajty ñajtsapxø'øyii ja'a Diósäm, ween hajxy nämetsyä nädägøøquiä quiapxy. Y ja'a hermanohajxy jaac jiihä, mäñit hajxy jaduñ miäná'anät pø tøø hajxy hoy miädoy, pø caj. ³⁰ Y coo wiinghermano hñajty quiapxa'añ waambaty hñajty ñajtsapxø'øyii ja'a Diósäm, weenä hermano yhuuc hamoñ, ja'a hñajty capxpä. ³¹ Hanidiuhmjaty hajxy ngápxämät nägøxiä waambatiä Dios hajxy hñajty xñajtsapxø'øyyäm. Jaduñ hajxy nägøxiä maas hoy nhabøjcämät; jaduñ hajxy nägøxiä nniguiapxwíjjämät. ³² Hiç, coo miiç hñajty mgapxa'añ waambaty miiçhä Dios hñajty xñajtsapxø'øwaanä, mäñit mgápxät coo hñajty tøø xyhabaatä. ³³⁻³⁴ Jaduñä Dios quiumay coo hajxy hanidiuhmjaty ngápxämät. Cab jaduñ quiumay coo hajxy nägøxiä nxiicmujc nmädiaacmújcämät tsajtøgooty.

Cab jaduñ yhooyä coo to'oxiøjc-hajxy jiihy quiápxät tsajtøgooty maa Dios hajxy hñajty nwiingudsähgøøyyämän. Cabä Dios jaduñ miäna'añ coo hajxy jiihy quiápxät. Jaduñä hermanohajxy nägøxiä quiuhdujthaty wiinduhmyhagajpt. Jaduñä Diosmädia'agy miäna'añ coo to'oxiøjc-hajxy miädia'agymiäbógät. ³⁵ Hoçhähdiuunnä jaduñ coo to'oxiøjc-hajxy jiihy quiápxät tsajtøgooty. Pø cabä Diosmädia'agy hajxy hñajty tøø wyiinjuø'oy tsajtøgooty, jimä ñihyhap hajxy miäyajtówät maa yhamdsoo tøgootyhajxiän.

³⁶ Jaduñä hermanodøjc-hajxy nägøxiä miäna'añ wiinduhmyhagajpt coo to'oxiøjc-hajxy jiihy quia'a capx quia'a mädiá'agät tsajtøgooty nebiä Diosmädia'agy miäna'añ. Y mijts jim hijpä Corintos, jaduñ mijts mbaguhdujthájpät. Caj mijts mhamdsoo cuhdujt myajtúnät. ³⁷ Nébiøch cham ngujaay, Diosmädia'agy hädaaduhñ. Naxy hajxy jaduñ mdehm miäbógät, pønjaty jaduñ niñänøømöp coo Dios hajxy ñajtsapxø'øyyäxä, coo Dioshèspiritu puihbodyii. ³⁸ Pønjaty hajxy jaduñ ca'a mäbøgaamb, cabä Dios hajxy jaduñ quiumaya'añii.

³⁹ Jaduhñds je'e, hermanodøjc, tsøgä Dios hajxy nämáayyäm coo hajxy tehngajnä ween xpiuhbéjtämät, coo miädia'agy hajxy xñajtscapxøyyämät. Jaduhñä miädia'agy hajxy hoy nyajwá'xämät. Pøn jaduhñ capxaamb mädia'agaamb ja'a hayuuc-haamby ja'a Dioshajtiä wyiinjuøöbiä, ween hajxy jaduhñ quiapxy, ween hajxy jaduhñ miädia'agy. ⁴⁰ Pero tsøgä Diosmädia'agy hajxy hoy yajxon yagjåjtäm tsajtøgooty.

15

¹⁻² Hermanodøjc, tsøg hajxy jahmiejtståacäm coo Jesucristo hajxy tøø xñähho'túutäm. Jaduhñhöch mijts tøø nyajwiingapxø'øy. Tøø hajxy jaduhñ nmäbøjcäm. Coo hajxy tehngajnä nmäbøjcämät hamuumdu'joot, mänit hajxy jim nnøcxämät Dioswiinduum. Pero coo hajxy jaduhñ nga'a mäbøjcämät, cab hajxy jim nnä'ägädä nõcxämät.

³ Jaduhñhöch mijts tøø nyajwiingapxø'øy nebiätyhöchä Dios tøø xñajtscapxøyyä. Jaanç tehñ choobaatp hädaa Diosmädia'agy jaduhñ. Tøø Jesucristo hajxy xñähho'túutäm; jaduhñä nbojpä ngädieeyhåjtäm hajxy tøø xyajnhwáatsäm. Jaduhñ jim myiñ cujaay maa Diosmädia'aguiän. ⁴ Coo Jesucristo hänajty tøø yho'ogy, mänit hoy ñaaxtägø'øy. Mänit hoy jiuypiojtägach cumaaxc. Jaduhñ jim myiñgombä cujaay maa Diosmädia'aguiän. ⁵ Mänitä Pedro ja'a Jesucristo hoy wyiinguhixø'øy. Mänitä Jesucristo hoy wyiinguhixøyyägumbä ja'a jiamioødhajxy, ja'a nämajmetspäjäya'ayhajxy. ⁶ Mänit hoy wyiinguhixøyyägombä ja'a miägu'ughajpähajxy nämägooxmägo'xnaxiä. Naje'eyyä hajxy tøø yho'nä, caj ñämayyä. ⁷ Mänitä Jacobo ja'a Jesucristo jadähooc wyiinguhixøøguiombä. Mänitä Jesucristo hoy wyiinguhixøyyägombä ja'a jiamioødhajxy nägøxiä.

⁸ Høøch, høxháamhøchä Jesucristo njaac tehñ yhijxy. Pero cábøch mähdiojc jaduhñ nnä'ägädä tsoobaady. ⁹ Cábøch cuhdujt møc nmøødä nej yø'ø Dioscugueypä cuhdujt hajxy møc jiaanç tehñ mioødän. Cábøch mähdiojc nhawiinmatsä cooçh mähdiojc jaduhñ nniñänømøøjät cooçh Dios xquiuguexyhajpä. Hiç, haxøøghøch hijty njäya'ayhaty. Nyajtsaächpøjpiochä jäya'ayhajxy hijty, ja'a Diosmädia'agy hajxy hijty panøcxpä. ¹⁰ Pero cooçhä Dios xjiaanç cuguexyhaty, páadyhøch jaduhñ xpiuhbety. Høyhøch nduñ. Maas máyhøchä Diosmädia'agy tøø nyajwa'xy ja'a nmädia'agyháamhøch que ja'a Dios quiugueypähajxy tøø yajwa'xy, ja'a hajxy jaac jimhä. Ca'a yhøøch jaduhñ tøø nnä'ä piy ngopcóotyhöch; Diøshøchä wiinmahñdy tøø xmio'oy. Jaduhñhöchä Dios xpiuhbety ja'a miäjaahaam. ¹¹ Pero cab jaduhñ ñejpiä pønjaty mijtsä Diosmädia'agy tøø xyajwiingapxø'øy, pø høøch, pø wiinghäna'c. Tu'ugmädia'agy højtsä Diosmädia'agy nyajwa'xy. Y tøø mijtsä Diosmädia'agy nmäbøcy.

¹² Jaduhñ højtsä mädia'agy nyajwa'xy coo Jesucristo jiuypiojtägajch coo hänajty tøø yho'ogy. Mayyä jäya'ayhajxy jaduhñ quia'a mäbøcy cooc tyijy ja'a ho'oguiäya'ayhajxy quia'a jiuypioğa'añ. Cabä tøyhajt hajxy jaduhñ ñä'ä møødä. ¹³ Pø cab häxøpy jaduhñ tiøyyä coo ho'oguiäya'ayhajxy jiuypioğa'añ, cabä Jesucristo cu jiuypiojcy. ¹⁴ Y coo Jesucristo häxøpy tøø quia'a jiuypioçy, cajxä hädaa mädia'agy häxøpy choobaady neby højts jaduhñ nja yajwa'xy. Y nej mijtsä mädia'agy hajxy mja mäbøcy, ni je'e häxøpy quia'a tsoobaady. ¹⁵ Jaduhñ højtsä Diosmädia'agy nyajwa'xy coo Dios ja'a Jesucristo yagjuypiojcy. Pø cab häxøpy jaduhñ tiøyyä, høhñdaacp højts häxøpy ja'a Diosøxpä. Hiç, pø cab häxøpy jaduhñ tiøyyä coo ho'oguiäya'ayhajxy jiuypioğa'añ, cabä Dios ja'a Jesucristo cu yagjuypiojcy. ¹⁶ Pø cab häxøpy jaduhñ tiøyyä coo ho'oguiäya'ayhajxy jiuypioğa'añ, cabä Jesucristo cu jiuypiojcy. ¹⁷ Y coo Jesucristo cu quia'a jiuypiojcy, cabä mädia'agy häxøpy choobaady neby hajxy nmäbøjcäm. Y cabä nbojpä ngädieeyhajxy häxøpy ñähwáatsäm. ¹⁸ Y tøø ho'oguiäya'ayhajxy häxøpy yhäda'agy mõjcu'uhaam, hoy hajxy cu jia mäbøc ja'a Jesucristo miädia'agy. ¹⁹ Coo Jesucristo cu quia'a jiuypiojcy, cab hajxy häxøpy jim nnøcxäänäm tsajpootyp. Tøø hajxy häxøpy nniwyiinhøhñäm hamiñ haxøpy. Hoñäxuu'tsnä jäya'ay hajxy häxøpy xyhijxäm.

²⁰ Pero tøyhajt jaduhñ coo Jesucristo jiuypiojtägajch. Jayøjp je'e jiuypiojtsohñ. Høxhaam hajxy njaac jiuypioğäänäm. ²¹ Tu'jäya'ay jecy yho'tsohñ hädaa yaabä

naaxwiin, ja'a craa Adánhájtábä. Paadiä Adán jecy yho'cy, coo Dios ja'a miädia'agy quia'a cudiuunä. Y jaanä jaduhnduhmbä, tu'jäya'ay jiuypiojtsohñ; ja'a Jesucristo je'e. ²² Ja'a Adán, hõjts nhaphajt ndeedyhájtäm je'e, paady hajxy nägõxiä nbaho'ogáanam. Y jaanä jaduhnduhmbä, nägõxiä hajxy njuypiojgáanam, pønjetiä Jesucristo miädia'agy mabõjcap. ²³ Coo Jesucristo hánajty tøø jiuypiojtagach, mänit jim ñõcxcombä maa Tieediän. Coo jim quioo'ty, mänit tiägøyy hanehmbä. Y coo yaa quiädaactägätsät hädaa yaabä naaxwiin, mänitä ho'oguiäya'ayhajxy jiuypiojtagatsa'añ, ja'a Jesucristo miädia'agy hajxy hánajty tøø miäbõjcabä. ²⁴⁻²⁶ Mänitä Jesucristo miäjäda'aga'añ. Mänitä Dios ja'a miädsip ja'a quiuhdujthajxy piögáanaxä nägõxiä. Mänitä jäya'ayhajxy quia'a ho'ogaanä ni mänaa. Mänitä Jesucristo ja'a Dios cuhdujt yajcø'ødägø'owa'añ neby jäda'ahaty yhane'emiän. Mänitä naaxwiimbä wyiimbidaannä: ²⁷ "Tøø Dios ja'a Jesucristo cuhdujt mio'oy coo jäya'ay cõxiä yhané'emät." Nõmä Diosmiädia'agy jecy miänaañ. Mänit jaduhñ tiõjiajty mänaa Jesucristo tiägø'oyän jäya'ayhanehmbä. Pero cabä Diosmiädia'agy jecy miänaañ coo Dios yaghane'emy. Hix, jaaya'ayä cuhdujt yejc coo Jesucristo jäya'ay cõxiä yhané'emät. ²⁸ Coo Jesucristo ja'a miädsip hánajty tøø quia'a cõxy yajmäjäda'agy, mänitä Tieedy cuhdujt quioxy yajcø'ødägø'owa'añ mäduhñtiä cuhdujt hánajty tøø mio'oyii. Jaduhñä Jesucristo yhane'ema'añii ja'a Tiéediäm. Jaduhñä Dios cõxiä yhane'ema'añ.

²⁹ Näje'e jäya'ayhajxy ñäbety ho'oguiäya'aguiõxpä. Pø cab häxøpy jaduhñ tiõyyä coo ho'oguiäya'ayhajxy jiuypiojga'añ, tiiguiõxpä jäya'ayhajxy jaduhñ coo ñäbety ho'oguiäya'aguiõxpä.

³⁰ Nmabõjpy hõjts jaduhñ coo hajxy njuypiojgáanam, paady hõjts nga'a mõjpäda'agy, hoy hõjts nja wädity mähähndiuum homiänaajä. ³¹ Cooch nmäna'añ cooch jaduhñ nwädity mähähndiuum, je'eçh jaduhñ nnänøømby coochä ca'awiindøyhäna'c-hajxy xjia wi'i yagho'oga'añ homiänaajä. Hermanodøjc, tehñ tiõyhajt jaduhñ cooch nxoonda'agy mijtscõxpä, je'eguiõxpä coo Jesucristo miädia'agy hajxy mmabõjca, ja'a hajxy nWiindsønähjtämbä. Hoorä, jaanä tøyhajt je'eduhmbä cooch nwädity mähähndiuum homiänaajä. ³² Tøøchä ca'awiindøyhäna'c-hajxy mayhooc xjia wi'i yagho'oga'añ yaa Efeso ja'a Diosmiädia'agyquioõxpä. Cooch häxøpy nga'a mabøcy coo ho'oguiäya'ayhajxy jiuypiojga'añ, cábøchä Diosmiädia'agy häxøpy nyajwa'xy. Coo häxøpy jaduhñ quia'a tõyyä coo ho'oguiäya'ayhajxy jiuypiojga'añ, cu nmänáanam hajxy jaduhñ: "Tsøg hajxy jaac cáayyäm, tsøg hajxy jaac húucäm, coo hajxy jaboom nho'ogáanam."

³³ Cab hajxy myajwiinhõønät. Cab hajxy mmøødwädijmúgät ja'a häna'c-hajxy mänaambä cooc tyijy ho'oguiäya'ayhajxy quia'a jiuypiojga'añ coo hajxy jaduhñ xyajtu'udägóyyät. ³⁴ Najtshixø'ow yø'ø mhaxøøgcuhdujt hajxy. Hoy hajxy myohy, hoy hajxy mnäxnät. Näje'e yø'ø mjamiøødhajxy quia'a mabøcyñä ja'a Diosmiädia'agy. Hoçhähndiuunä je'eduhñ.

³⁵ Näje'e jäya'ayhajxy yajtøwa'añ: "Nebiä ho'oguiäya'ayhajxy jiuypiojga'añ. Tii ni'x tii copc hajxy miøødhadaamby." ³⁶ Hoy piønä jaduhñ ñajuø'oy. Coo mädyii tøømd mní'ibät, hoy trigo, tsipcøxp jaduhñ piu'udy; pø caj, cab jaduhñ ñä'ä muxy. ³⁷ Y ja'a tøømd jaduhmbä, coo mní'ibät, wiing jaduhñ jiajnä coo miuxy. ³⁸ Dios jaduhñ tøø wyiinmay nebiatiä tøømd jíädät. Wiingatiä tøømd quiunuu'xy. ³⁹ Jaanä wiingatiä Dios ja'a nni'x ja'a ngopc-hajxy xquiunuu'xämbä. Y wiingatiä animal ñi'x quiopc-hajxy quiunuu'xäxäbä, møødä animalhajxy ja'a tø'ødstuum tsänaabiä, møødä muuxyhajxy, møødä hacxhajxy. ⁴⁰ Ja'a hajxy jim hijpä tsajtcøxp, wiing hajxy jaduhñ quiähxø'øgy. Cab hajxy jaduhñ quiähxø'øgy neby hajxy yaa quiähxø'øguiän, ja'a hajxy yaa hijpä hädaa yaabä naaxwiin. ⁴¹ Haagä hajajp ja'a xøø møødä po'o møødä madsa'a, pero haagä wiingaty yhajajy. Jaanä jaduhñ ja'a madsa'abä, haagä wiingaty yhajajp. ⁴²⁻⁴⁴ Jaduhñ mäwiinäts hõjtshájtäm, coo hajxy nho'c coo hajxy ndägóoyyäm, cabä mäjaa hajxy nmøødhájtänä. Mänit hajxy nõcxy nnaaxtägøyyänä. Ja'a naaxni'x ja'a naaxcopc jaduhñ naaxtägøøby. Mänit hajxy ngøxy yajxee'xtúutänä jutjooty. Mänit hajxy njájtänä hoxiøøghajnä. Pero coo Jesucristo yaa quiädaactägätsáangombä hädaa yaabä

naaxwiin, mänit hajxy njujypiøjtägatsáanägombä, coo hajxy hánajty tøø nho'c coo hajxy hánajty tøø ndägóoyyäm. Wiing hajxy jaduhñ njadáanänä coo hajxy jim̄ nnøcxáanänä Dioswiinduum. Hoy yajxón hajxy hánajty njadáanäm Haagä mäjaamøød. Y cab hajxy hánajty mänaa nho'tägatsáanänä. Wiing hajxy yaa nhíjtäm hädaa yaabä naaxwiin; wiing hajxy hánajty jim̄ nhidáanänä Dioswiinduum.

⁴⁵ Jaduhñä Diosmädia'agy miäna'añ: “Coo Adán jaduhñ quiunuu'xtsohñä, mänitä jugyhajt miooyä.” Pero coo Jesucristo jiuypiojtägajch, paadiä tøyhajt hajxy nmøødhájtäm coo hajxy nbajuypiojtägatsáanämbä. ⁴⁶ Jawyiin hajxy yaa nhíjtäm hädaa yaabä naaxwiin. Coo hajxy njujypiøjtägatsáanäm, mänit hajxy jim̄ nnøcxáanäm Dioswiinduum. ⁴⁷⁻⁴⁹ Ja'a craa Adánhájtäbä, jecy je'eduhñ quiunuu'xtsohñä naaxoc-haam. Yaa jaduhñ jecy chánaabiä hädaa yaabä naaxwiin. Jaaná jaduhñ højtshájtämbä, naaxoc hajxy nni'xhájtäm ngopc-hájtäm nebiä Adángän. Hix, je'e højts nhaphajt ndeedyhájtäm. Haa ja'a Jesucristo, jim̄ je'eduhñ choññ tsajpootyp. Coo yaa quiädaactägatsa'añ hädaa yaabä naaxwiin, mänit hajxy njujypiøjtägatsáanäm, pønjetiä miädia'agy hánajty tøø miäbøjcä. Jaduhñ hajxy jim̄ nhidáanäm tsajpootyp nebiä Jesucristo jim̄ yhitiän.

⁵⁰ Hermanodøjc, huuc mäadow hajxy, cab hajxy jim̄ hoy nnøcxämät Dioswiinduum ni'xocpmøød nebiä nni'xä ngopc hajxy yaa nmøødhájtäm hädaa yaabä naaxwiin, je'eguiøxpä coo hajxy nho'og coo hajxy ndägóoyyänäm. Coo hajxy ndägájtämät nebiä Jesucristo yhitiän, mänit mäböcy hajxy jim̄ nnøcxämät tsajpootyp. ⁵¹ Huuc mäadow hajxy nébiøchä Dios jaduhñ xñajtsapxøoyyä. Coo Jesucristo quiädaactägatsa'añ, cahnä hajxy hánajty nägøxiä nho'c ndägóoyyäm. Näje'e hajxy hánajty njújqüiämnä. Pero nägøxiä hajxy ndägatsáanäm, møødä jujcypä møødä ho'ogypä. ⁵² Nägooyyä Diosmoonsä ja'a corneta hánajty høxhaam jiaac yajxuuxmaya'añ, ja'a tsajpootypä, mänitä ho'oguiäya'ayhajxy jiuypiojtägatsa'añ. Cab hajxy hánajty mänaa yho'tägatsaannä. Mänitä hajxy nägøxiä ndägatsáanäm, møød hajxy hánajty yaabä jujcypä, møød hajxy hánajty tøø yho'oguiäbä. ⁵³ Hädaa naaxni'x hajxy nmøødhájtämbä, nä'ägädä ho'og nä'ägädä tägooyyänäm hajxy jaduhñ. Tsipcøxp hädaa nni'x hädaa ngopc-hajxy tiägatsáanäm, mänit hajxy jim̄ nnøcxáanäm Dioswiinduum. Y cab hajxy hánajty nho'tägatsáanänä ni mänaa. ⁵⁴ Y coo hajxy jaduhñ njadáanäm, mänitä Diosmädia'agy tiøjiada'añ coo jaduhñ miäna'añ: “Cabä jäya'ayhajxy hánajty mänaa yho'og tiägoyyaannä.” Coo Jesucristo hajxy tøø xñähho'túutäm, paady hajxy jiiby nga'a häda'agáanäm möjcu'uhaam. ⁵⁵ Y coo hajxy jiiby nga'a häda'agáanäm, paady hajxy nga'a tsähgøoyyänä coo hajxy hánajty nho'ogáanäm. ⁵⁶ Hoorä, coo Diosmädia'agy hajxy hoy nga'a cudiúunäm, paady hajxy ngädiéhyäm, paady hajxy nhó'cäm. ⁵⁷ Tsögä Dios hajxy nämáayyäm “Dioscujú'uyäp”, je'eguiøxpä coo Jesucristo hajxy xñähho'túutäm, ja'a hajxy nWiindsønähájtämbä. Coo hajxy xñähho'túutäm, paady hajxy jiiby nga'a häda'agáanäm möjcu'uhaam.

⁵⁸ Jaduhñds je'e, hermanodøjc, tsög hajxy hoy túunäm hamuumdu'joot ja'a Dioscøxpä. Cabä miädia'agy hajxy mänaa nnaajshixøoyyämät, howyiaambatiä jäya'ay hajxy cu xjia nämáayyäm. Nnajuøoyyäm hajxy jaduhñ coo Dios hajxy xpiuhbedáanäm.

16

¹ Mguexaambiä xädø'øñ hajxy jim̄ Judeanaaxooty maa hermanodøjc-hajxiän. Jaduhñ hajxy myajmújpät nébiøchä hermanodøjc-hajxy nhanehmy jim̄ Galacianaaxooty. ² Näxøøbaadiä xädø'øñ hajxy mbuhgónät mäduhñtiä hajxy hánajty tøø mguduñ. Hawiing hajxy jaduhñ myaghídat. Mänitøch hajxy xmió'owät cooch jim̄ nmédsät maa mijtsän neby hajxy jaduhñ mänit møc hadø'øchä mga'a wädijtä'agät. ³ Mänitä hermano hajxy mwiimbíwät pønjátyhøchä xädø'øñ hánajty nyajmäguexaamby jim̄ Jerusalén maa hermanodøjc-hajxiän. Nocymiøød hajxy ñócxät nebiä hermanohajxy jim̄ ñajuó'owät cooch hánajty tøø nguexy. ⁴ Pø hahixøøby hánajty cooch jim̄ nnøcxät, mänitøch hajxy xpianócxät.

⁵ Cooch hánajty jim̄ nnøcxa'añ Corintos, tu'unaxáambøch jim̄ Macedonia. ⁶⁻⁷ Coo Dios jaduhñ miäná'anät, jégäbøch jim̄ maa mijtsän. Wéhndøch jim̄ nga'a tsoj wiimbídat høxtä

coo tøøchpoj hānajtj tøø ñaxy. Jadúhñhøch mijts jejcy nguhíxät. Jadúhñhøch hajxy xpiuhbédät majátyhøch hānajtj njaac wädita'añ. ⁸ Pero cábøch yaa ndsoj tu'ubøga'añ yaa Efeso. Coo Pentecostésxøø hānajtj tøø yhabaady, mänítøch ndu'ubøga'añ. ⁹ Hix, jaanč tehñ miäbøgaambä jäya'ayhajxy yaa, hóyhøch nmädsiphajxy jia nämayyā.

¹⁰ Coo Timoteo jim miédsät maa mijtsän, hoy yajxón hajxy myajmédsät. Hix, jaduñä Diostuung tiuumbä nébiøch nduñän. ¹¹ Cab hajxy jaduñ mbéxät. Mbuhbédäp hajxy jaduñ nebiaduñ jootcujc jiaac mínät yaa maačh høøčhän. Nja wi'i jiøbhijxyp højts yaa møødä hermanodøjc-hajxy.

¹² Y ja'a hermano Apolos, nja mänuu'xtáac-høch je'e coo hermanodøjc cu miøødnøcxy maa mijtsän, pero cab jäda'a tiehñ ñøcxa'añ. Cooc ñäbaadø'øwáañäxä, mänítñäc hānajtj ñøcxa'añ.

¹³ Mniyajcopcø'øwøøjäp hajxy. Hoyyā Diosmädia'agy hajxy myajtu'uyó'oyät. Cab hajxy pøn mdsähgø'øwät. Mmee'xtúgäp hajxy. ¹⁴ Mničhoc mnimiee'xøøjäp hajxy hamuumdu'joot.

¹⁵ Hermanodøjc, mnajuøøby hajxy coo Estéfanas ja'a Diosmädia'agy hajxy jayøjp miäbøjtsohñ jim Acayanaaxooty, møødä yhuung møødä tio'oxy. Jimä hermanodøjc hajxy piuhbety. ¹⁶ Jadúhñhøchä njoot chocy coo hajxy mbahix mbadúnät nebiä Estéfanashajxy tiuñän. ¹⁷ Xoondáacpøch jaduñ coo Estéfanashajxy tøø miech møødä Fortunato møødä Acaico. Nñäjootmayhájpøch mijts coo hajxy mjäguemä. Pero coo Estéfanashajxy tøø miech, paady cábøch njootmayhajñä. ¹⁸ Tøøčhä njoot hajxy xyajmøcpøjcä. Jadúhñhøchä mjoothajxy nyajmøcpøgáañäbä. Mnajuó'øwäp hajxy jaduñ coo Estéfanashajxy hoy tiuñ.

¹⁹ Mijtsä hermanodøjc-hajxy xyajpoo'xp ja'a hajxy jim tsänaabiä Asianaaxooty. Xyajpoo'xp mijtsä Aquilahajxypä ja'a Dioscøxpä, møødä Priscila, møødä hermanodøjc-hajxy jim hamugøøbiä Dioswiingudsähgøøbiä maa tiøjc-hajxiän. ²⁰ Xyajpoo'xp mijtsä hermanodøjc-hajxy nägøxiä. Hoy yajxón hajxy mniyajpoo'xøjät.

²¹ Nhamdsoo cø'øháamhøch hädaa nocy njahmiay, høøčh Pablo.

²² Pønä Jesucristo ca'a tsojp, ja'a hajxy nWiindsøn hájtämbä, ween haxøøgtuum ñøcxy. Wiindsøn, min hadø'øchä.

²³ Weenä Jesucristo hajxy xmio'oy ja'a hoyhajt ja'a weenhajt, ja'a hajxy nWiindsøn hájtämbä. ²⁴ Ndsøjpiøch mijts nägøxiä ja'a Jesucristocøxpä. Amén.

2 Corintios

¹Hooch Pablo hädaa nocy njahby. Jesucristoch tøø xwyiinguexy cooch ja'a miädia'agy nyajwá'xät. Ja'a Dios jaduhñ mänaamb cooch nyajwá'xät. Ja'a hermano Timoteo, tu'ugwiinmähñdyhøch je'e xmiøødhity cooch hädaa nocy njaay. Mijts hädaa nocy nyajnäguexaamb by pønjaty Diosmädia'agymiäbøjp maa ja'a cajpt xiøhatiän Corinto, møød maa ja'a naax xiøhatiän Acaya wiinduhmyhagajpt. ²Ween mijts ja'a Dios hoyhajt weenhajt xmio'oy møødä Jesucristo. Dios hajxy nDeedyhajtäm. Jesucristo hajxy nWiindsøn'hajtäm.

³Tsögä Dios hajxy tehngajnä wiingudsähgøøyyäm. Tsøc hajxy tehngajnä nämáayyäm Dioscujú'uyäp. Ja'a Jesucristo Tieedy je'e. Jaançh tehñ yhojioot ja'a Dios miøød. Xjiootcapxmøcpøjcäm hajxy homiänaajä, ⁴hoy ñebiaty hajxy cu nja jajt cu nja habéjtäm. Paady hajxy jaduhñ xjiootcapxmøcpøjcäm, jaduhñ hajxy hoy njootcapxmøcpøjtägájt-sämnd pønjaty häyohmbaatp. ⁵Hix, nebiä Jesucristo chaaçhpøjquiän, jaanä jaduhñ hajxy ndsaaçhpøjcämbä. Y coo ja'a Jesucristo hajxy nmøødhíjtäm tu'ugmädia'agy, paadiä Dios hajxy xjiaançh tehñ jiootcapxmøcpøjcäm. ⁶Coo højts ndsaaçhpøcy, mänit højts Dios xjiootcapxmøcpøcy. Y jaduhñ mijts njootcapxmøcpøjtägajtspä. Y jaduhñ mijts Diosmädia'agy nyajwiingapxø'øwät neby hajxy jaduhñ mnähwá'adsät. Coo mijts mdsaaçhpøjpät neby højts ndsaaçhpøquiän, mänit mijts njootcapxmøcpøgät neby hajxy jaduhñ hoy mmee'xtúgät. ⁷Nnajuøøby højts coo mijts mmee'xtuga'añ, coo mijts Dios xjiootcapxmøcpøga'añ, hoy miäduhñtiä mijts cu mja tsaachpøc neby højts ndsaaçhpøquiän. Nmøød højts ja'a tøyhajt jaduhñ.

⁸Mägu'ughajpädøjc, chojpy højts njoot coo hajxy mnajuø'øwät nebiaty højts jim ndsaaçhpøjcy maa ja'a naax jaduhñ xiøhatiän Asia. Hanaxiä højts jim njajty nhabejty. Jaançh tehñ jiootmayhajt højts hänajty. Høxtä mänaañ højts jaduhñ coo ndijy højts hänajty jim nho'oga'añ, ⁹coo ndijy häna'c hänajty tøø quiojyquiapxytiuñ coo højts hänajty xyagho'oga'añ. Paady højts jaduhñ njajty nhabejty, jaduhñ højts nnajuø'øwät coo jagooyyä Dios xñäwá'anät, cab højts hamdsoo hoy nniäwa'anøøjät. Haa ca'a, Dios jaduhñ yagjujypijtägajtsp ja'a tøø yh'oguiäbä. ¹⁰Xñäwaan højts ja'a Dios coo højts häna'c hänajty jim xjia yagho'oga'añ. Homiänaajä højts jaduhñ xñäwa'ana'añ. Nmøød højts ja'a tøyhajt jaduhñ. ¹¹Naxy mijts ja'a Dios mdehñ pia'yá'axät maa højtsøxpän. Jaduhñ højts mijts hoy xpiuhbédät. Coo jäya'ayhajxy nämay Dyiospa'yá'axät maa højtsøxpän, mänit højts ja'a Dios xñäwa'ana'añ, mänitä jäya'ay ja'a Dios hajxy nämay ñäma'awa'añ "Dioscujú'uyäp", je'eguiøxpä coo højts Dios hoyhajt weenhajt xmio'oy.

¹²Jootcujc højts nnijiäwø'øyii coo højts hoy tøø njäya'ayhaty maa mijtsän hädaa yaabä naaxwiin. Dios højts jaduhñ xpiädaac coo højts hoy njäya'ayhädät. Jaaya'ay højts xyhijxp coo højts hoy njaançh jäya'ayhaty. Xpiuhbejp højts jaduhñ neby højts hoy njaac jäya'ayhädät. Cab højts hamdsoo hoy nhojiäya'ayhädät. ¹³⁻¹⁴Hix, howyiinjuøøñä mijts tøø nnäjaayø'øy, caj chipjatiä. Caj mijts mänaa tøø nwiinhøøñ. Tøø højts nmädia'agy hajxy siémpräm xwyiinjuøøyyä. Chojpy højts njoot coo hajxy ca'xy mwiinjuø'øwät, jaduhñ hajxy mxoondá'agät maa højtsøxpän coo ja'a Jesucristo hänajty quiädaactägatsa'añ. Je'e hajxy nWiindsøn'hajtäm. Mänit højts nxoonda'agaambä maa mijtsøxpän.

¹⁵Nmøødhøch tøyhajt jaduhñ coo højts nmädia'agy hajxy ca'xy xwyiinjuø'øwaanä, páadyhøch hijty tøø nja wiinmay coo mijts jadähooc nøcxy cu nguhijxy. Jaduhñ hajxy jadähooc cu nxoondáacäm nägøxiä. ¹⁶Hix, nøcxáambøch hijty jim maa ja'a naax jaduhñ xiøhatiän Macedonia, y jim mijts hijty ndu'uguhixa'añ Corinto. Y cooch hijty nwiimbidaannä Macedonia, mänit mijts hijty jadähooc ndu'uguhixáangombä cooch hijty jim nnøcxa'añ maa ja'a naax jaduhñ xiøhatiän Judea. Jim mijts jaduhñ cu xpiuhbejty. ¹⁷Pero cabä Dios jaduhñ miänaañ cooch jim cu nminøøyy maa mijtsän. Ca'a yhamdsoojøotøch jim tøø nga'a naxø'øy. Cab jaduhñ yhooyä coo hajxy mmäná'anät

cóogøch tyjy jaduñ ndu'ugcapxy nmetscapxy, cooçh jim tøø nga'a naxø'øy. Ja'a häna'c-hajxy ca'a mäbøjpä, je'eds hajxy tu'ugcapxp metscapxp, ca'a yhøøçhä. ¹⁸ Dios højts xyhijxp coo højts nga'a høhnda'agy. Cab højts mijts mänaa tøø nmøødu'ugcapxy tøø nmøødmetscapxy. ¹⁹ Hix, ja'a Jesucristo, ja'a Dioshuung, cab je'eduhñ mänaa tiu'ugcapxy mietscapxy. Homiänaajä tiømiädia'agy. Y coo højts mijts nyajwiingapxøøyy ja'a Jesucristocøxpä, paady højts nga'a tu'ugcapxy nga'a metscapxy, ni høøçh Pablo, ni hermano Silvano, ni hermano Timoteo. ²⁰ Waambatiä Dios jecy miänaañ coo hänajty yajtøjiada'añ, cøjx jaduñ tiøjiaty ja'a Jesucristocøxpä. Y coo højts ja'a mädia'agy nmäbøjcäm ja'a Jesucristocøxpä, jaduñä Dios møy jaançh nbädäacäm. ²¹ Pero ja'a Dios hajxy xpiuhbéjtäm nebiä Jesucristo hajxy jaduñ nmøødhjttämdu'ugmädia'agy tehngajnä, møød højts møød mijts nägøxiä. Jaanä Dios højts jaduñ xwiinguejxpä coo højts ja'a miädia'agy nyajwá'xät. ²² Xyaghijp højts ja'a Dios quiø'øjooty ja'a yhEspirituhaam. Xyhuunghajp højts jaduñ. Xmióoyäm ja'a tøyhajt hajxy jaduñ coo hajxy homiänaajä xcwieendähadäänäm.

²³ Dios ja'a tøyhajt møød cooçh nga'a høhnda'agy. Páadyhøch jim tøø nga'a naxø'øy Corinto maa mijtsän, cábøch njoot hänajty chocy coo mijts nhójtät. ²⁴ Pero cab højts mijts nhane'ema'añ nebiatiä Diosmädia'agy hajxy mmäbøgät. Hix, nnajuøøby højts jaduñ coo hajxy hamuumdu'joot mmäbøcy. Nja wi'i piuhbedaamby højts mijts jaduñ nebiä Diosmädia'agy hajxy maas hoy mbanøcxät. Jaduñ hajxy maas jootcujc mhídät.

2

¹ Mänáajøch jim nhuug hoobiän maa mijtsän, mänítøch mijts nhojy je'eguiøxpä coo hajxy hänajty hoy mga'a tuñ. Jootmayhájtäbøch jim nwiimbijty. Hoorä, tøøch nmädoyhájcombä coo hajxy hoy mga'a túungombä. Tøøch nwiinmahñdyhaty cooçh jim nga'a tsoj nøcxtägatsa'añ maa mijtsän, coo mijts jim nnä'ä hojtägätsät. ² Hix, coo mijts nhojtägätsät, mänítøch jadähooc njootmayhada'añ. Pero chójpiøch njoot jaduñ coo hajxy hoy mdúnät. Jadúhñhøch jootcujc nhídät. ³⁻⁴ Mänáajøch mijts jayøbajt nhuuc näjaayøøbiän, mänit mijts nmägapxy nhanehmy coo ja'a mhaxøøgcuhdujt hajxy mnajtshixø'øwät. Jaançh tehñ jootmayhájpøch hänajty coo ja'a Diosmädia'agy hajxy hänajty hoy mga'a panøcxy. Høxtä jøøyyhøch jaduñ. Paady mijts jaduñ nmägapxy nhane'emy nocyhaam, njaançh tehñ chojpy mijts jaduñ. Cábøch njoot chocy coo hajxy mjootmayhádät. Coo ja'a mhaxøøgcuhdujt hajxy mnajtshixø'øwät nébiøch cham nmägapxy nhane'emiän nocyhaam, mänítøch jim jootcujc nnøcxa'añ maa mijtsän. Coo mijts ja'a Diosmädia'agy hoy cu mbanøcxy, cábøch jaduñ mänaa cu njootmayhajty. Nnajuøøbiøch jaduñ coo ja'a Diosmädia'agy hajxy hoy mja wi'i pianøcxa'añ. Y coo hajxy jaduñ hoy mbanøcxät, jaduñ hajxy nägøxiä jootcujc nhjttämdu'ugmädia'agy møød høøch møød mijts.

⁵ Ja'a mijts mmägu'ughajpä ja'a tøø quiädiéeyäbä, nägøxiä hajxy jaduñ tøø xñägädieeyøøyyäm, ca'a yhøøçhähajtjä nidiuhm. Pero cábøch nmäna'añ coo hanaxiä tøø quiädieey. Hix, cábøch hanaxiä nyajtsähdiuna'añ. ⁶ Hoorä, tøø ja'a mmägu'ughajpähajxy chaachpøcy. Tu'ugwiinmahñdy hajxy mnibiaatä, paadiä mmägu'ughajpähajxy myajcumädooyy. Hoorä, tøø jaduñ chaachpøjnä. ⁷ Hahixøøby hajxy jaduñ mmämée'xnät. Jaduñ hoy jootcugøøguiumbät, y cab jaduñ hanaxiä jootmayhádät. ⁸ Coo hajxy jaduñ mmämée'xnät, myajcøxø'øgaamby hajxy jaduñ coo hajxy mjaançh tehñ chocy. ⁹ Paady mijts jayøbajt nnäjaayøøyy, nhijxmajts mijts jaduñ pø tøyhájtthøch nmädia'agy hajxy hänajty xmiäbøgaanä hamuumdu'joot. ¹⁰ Pønjaty mijts mmämée'xyp, jaanä jadúhñhøch nmämée'xaambä. Haa ca'a, pø tøøch häna'c nmämée'xy, páadyhøch tøø nmämée'xy, jaduñ mijts jootcujc mhídät. Jesucristøch jaduñ xyhijxp cooçh nga'a høhnda'agy. ¹¹ Coo hajxy jaduñ nnimiämée'xämd, cabä møyju'ugong miäjädá'agät maa højtsøxphjttäm. Nnajuøøyyäm hajxy coo ja'a møyju'ugong jiaançh tehñ miäwiinhøøñ.

¹² Cooch jim nmejch maa ja'a cajpt jaduñ xiøhatiän Troas Diosmädia'agy-yajwa'xpä ja'a Jesucristocøxpä, nbáathøch hawa'adspä cooch jim ndägø'owät Diosmädia'agy-yajwa'xpä. ¹³ Pero coochä hermano Tito jim nga'a paaty maa ja'a hermanodøjc-hajxiän, mänitøch ndägøøyy jootmayhajpä. Mänitøch nwiimbijnä. Mänitøch nnøcxy maa ja'a naax jaduñ xiøhatiän Macedonia.

¹⁴ Dioscujú'uyäp ja'a Dios coo højts xpiuhbety, coo højts xyaghity tu'ugmädia'agy mөөdä Jesucristo. Jaduñ højts ja'a Dios xpiuhbety coo højts ja'a møjcu'ugong nga'a yajmäjäda'agy majaty højts ja'a Diosmädia'agy nyajwa'xy ja'a Jesucristocøxpä. Homiädoonä ja'a jäya'ayhajxy miädoy nebiaty højts nyajwiingapxø'øy. ¹⁵⁻¹⁶ Xquiumaaby højts ja'a Dios coo højts ja'a miädia'agy nyajwa'xä ja'a Jesucristocøxpä. Pønjaty hoy mädoob, pønjaty mäbøjp, je'eds nähwa'adsaamb. Jugyhadaamb hajxy je'eduhñ cøjxta'axiøø nebiä Dios jiugyhatiän. Pero pønjaty hoy ca'a mädoob, pønjaty ca'a mäbøjp, cab hajxy jaduñ nähwa'adsa'añ. Je'eds hajxy haxøøgtuum nøcxy miähmø'owa'añ. Caj pøn yhamdsoo jada'añ Diosmädia'agy-yajwa'x. ¹⁷ Højts mäbøcypiä njajpy je'eguiøxpä coo højts ja'a Dios xwyiinguejxy. Hamuumdu'joot højts nduñ je'eguiøxpä coo højts ja'a Jesucristo tu'ugmädia'agy nmөөdhity. Xyhijxp højts ja'a Dios jaduñ coo højts hoy nduñ. Jii häna'c näje'e, cab hajxy hoy tiuñ. Ja'a Diosmädia'agy tyijy hajxy yajwa'xyp. Pero yhamdsoo mädia'agy hajxy wyi'i miädiaacy, je'eguiøxpä coo hajxy jia wi'i quiänaarhada'añ. Højts, cab højts jaduñ nbahixy.

3

¹ Cab hajxy mmäná'anät coo tyijy højts nniguiumayii nebiä häna'c ñiguiumayijän, ja'a yhamdsoo mädia'agy hajxy miäwädiippiä. Coo hajxy hänajty maa ñøcxa'añ, mänitä hermanodøjc hajxy ñäma'ay coo nocy hajxy jaduñ ween yhädiuunäxä cooc tyijy ja'a Diosmädia'agy hajxy hoy tøø yajwa'xy. Pero højts, cab højts jaduñmäba nocy nyajmaajiaty, ni coo mijts nyaghixät, ni coo mijts xmió'owät. ² Hoy piønä ñajuø'øy coo højts ja'a Diosmädia'agy hoy nyajwa'xy. Haa ca'a, tøø ja'a Diosmädia'agy hajxy mmäbøcy mänaa højts jim hoy nyajnähixø'øyän. Hix, njaanç tehñ chojpy højts mijts hamuumdu'joot. Homiänaajä højts mijts njahmiejtsta'agy. ³ Coo ja'a Diosmädia'agy hajxy tøø mmäbøcy, jaduñä cu'ug ja'a tøyhajt hajxy miөөdä coo højts ja'a Jesucristo jaduñ xwyiinguejxy maa mijtsøxpän, coo højts mijts ja'a Diosmädia'agy nyajwiingapxø'owät. Jujcy ja'a Dios. YhEspirituhaam ja'a Dios hajxy xyajmäbøjcy. Jaduñ miäbaady coo ja'a Jesucristo tøø yuugjaay maa ja'a jäya'ay quiorazoncøphajxiän. Cab jaduñ tøø yuugjaay tsaagøxp tintahaam nebiä Dios jecy yuugjahyyän tsaagøxp maa ja'a tun xiøhatiän Sinaí.

⁴ Paady højts jaduñ nmäna'añ, nmөөd højts ja'a tøyhajt coo højts ja'a Jesucristo xwyiinguejxy. ⁵ Pero cab højts tii njada'añ hamdsoo. Dios højts jaduñ xpiuhbejp coo højts njädät. ⁶ Jaaya'ay højts jaduñ tøø xyajnähdijy coo højts ja'a hawiinjemybiä mädia'agy nyajwá'xät ja'a Jesucristocøxpä. Hädaa hawiinjemybiä mädia'agy, yhEspirituhaam højts ja'a Dios tøø xmiø'oy. Cabä Dios tøø jahñä tsaagøxp nebiä jecyquihdujt jecy jahyyän tsaagøxp. Yø'ø jecyquihdujt, cab jaduñ pøn hoy quiudiuna'añ, paady hijty pøn quia'a pädsøma'añ haxøøgtuum. Pero coo ja'a hawiinjemyiädia'agy hajxy mmäbøgät, mänitä Dios hajxy xyagjugyhädät cøjxta'axiøø yhEspirituhaam neby je'e jiugyhatiän.

⁷ Hoorä, coo ja'a Dios ja'a jecyquihdujt jahy tsaagøxp, høxtä haamb høxtä tsämaamb ja'a Moisés ja'a wyiin jjøjp hänajty, høxtä cabä israelita ja'a Moisés ja'a wyiin jjøjp hajxy hänajty hoy yheebaana. Pero paquiä ja'a Moisés ja'a wyiin jjøjp jaduñ ñä'a haañ ñä'a tsämaamy. Paadiä Moisés ja'a wyiin jjøjp hänajty yhañ chämamy, tøø ja'a Moisés hänajty yhoy jim Dioswiinduum maa ja'a Dios hänajty tøø quiäda'aguiän jim tungøxp. Y mөcmäjaa ja'a Dios jiaanç tehñ miөөd. Hoorä, yø'ø jecyquihdujt, cab jaduñ pøn hoy quiudiuna'añ, paady hijty pøn quia'a pädsøma'añ haxøøgtuum. ⁸⁻⁹ Hoorä, coo ja'a Dios ja'a Moisés ja'a wyiin jjøjp jecy yaghaanä yajtsämaamä, jaduñä Dios yajcähxø'cy coo mөcmäjaa miөөdä. Y coo ja'a Dios ja'a hawiinjemyiädia'agy tøø yejnä coo hajxy tøø xpiädäacäm hawa'adstuum, ja'a yhEspirituhaam ja'a Dios ja'a

hawiinjemyiädia'agy tøø yecy. Jaduhnä Dios maas hoy tøø yajcähxø'ogy coo mœcmäjaa miøødä. Hix, hoy-yagjuøøñä ja'a Moisés ja'a wyiin jøjp jecy yhaañ chämaamy. Maas hanaxiä ja'a hawiinjemyiädia'agy yhoy-yagjuøøñä, ja'a højts nyajwa'xypä. ¹⁰⁻¹¹ Jaduhn quiähxø'ogy coo ja'a jecyquihdujt jadhun quia'a jaty tsoobaatnä. Ja'a hawiinjemyiädia'agy ja'a Jesucristocøxpä, je'eds jadhun tsoobaatnäp. Y cab jadhun mänaa tiä-goyya'añ.

¹² Tøyhajt jadhun, paady højts nga'a tsähdiuñ mänaa højts ja'a Diosmädia'agy nyajwa'xiän, ni nga'a mädsähdiuñii højts jadhun. ¹³ Hix, haamb tsämaambä Moisés ja'a wyiin jøjp hänajty coo ja'a Dios ja'a Moisés ja'a miädia'agy miooyy. Mänitä Moisés ja'a cu'ug ja'a Diosmädia'agy yajwiingapxøoyy. Coo ja'a Moisés miädiaacpädøoyy, mänitä wit ñiyajwiinguwidsooyy, je'eguiøxpä coo ja'a wyiin jøjp hänajty jecy quia'a hanaañnä quia'a tsämamaañnä. Paady jadhun miädsähdiuñä. Hix, yhixaambiä israelita ja'a Moisés hajxy hänajty coo ja'a Moisés ja'a wyiin jøjp hänajty quia'a haañnä quia'a tsämaañnä. ¹⁴⁻¹⁶ Pero ja'a israelitahajxy, jaanč tehñ quiuhxex hajxy hänajty, cab hajxy hänajty miädia'agywyiinjuø'oy. Høxtä chamnäbaadyñä hajxy jadhun quiuhxexä. Coo ja'a jecyquihdujt hajxy mänaa miädoy, cab hajxy jadhun wyiinjuø'oy, ja'a Moisés jecy miädiäacäbä. Mänit hajxy jadhun wyiinjuø'owät coo hajxy hänajty tøø miäböcy hamuumdu'joot ja'a Jesucristocøxpä. Je'e hajxy nWiindsøn'hájtäm. ¹⁷ Hoorä, tu'ugjuøhñdy ja'a Jesucristo yhity møødä Tieediä yhEspíritu. Y coo hajxy nmäböjcam ja'a Jesucristocøxpä, jadhunä cuhdujt hajxy xmióoyyäm coo Dios hajxy nba'yáaxäm. ¹⁸ Hoorä, pønjaty jadhun hamuumdu'joot mäböjp ja'a Jesucristocøxpä, tøø hajxy ngøxy wiinjuøoyyäm coo ja'a Jesucristo miøjjä jiaančhä. Tehngajnä ja'a Jesucristo hajxy xyaghaguijyatiøoyyäm neby je'e yhitiän. Hix, tu'ugjuøhñdy je'e yhity møødä Tieediä yhEspíritu.

4

¹ Hojiot ja'a Dios jiaanč tehñ miøød, paady højts tøø xwyiinguexy coo højts ja'a miädia'agy nyajwá'xät ja'a Jesucristocøxpä. Paady højts nga'a jootmayhaty ni mänaa. ² Nyejpy højts ja'a tøyhajt coo højts ja'a Diosmädia'agy nyajwa'xy. Cab højts jadhun mänaa nhøhnda'agy. Ñajuøøbiä cu'ughajxy jadhun coo højts mänaa nga'a nhøhnda'agy. Xyhijxp højts ja'a Dios jadhun. Ja'a häna'c-hajxy hønndaacpä, cabä Diosmädia'agy hajxy ca'xy yajwa'xy. Yhamdsoo mädia'agy hajxy jadhun yajmämädiaagøøby magämaa. Höchähdiuunnä hajxy jadhun jiatcø'oy. Pero højts, ja'a tøyhajt højts nmädiaacypy. ³ Cabä jäya'ay ja'a mädia'agy hajxy nägøxiä wyiinjuø'oy, ja'a højts jadhun nyajwa'xypä ja'a Jesucristocøxpä. Paady hajxy jadhun quia'a wiinjuø'oy coo hajxy haxøøgtuum wiädity. ⁴ Paadiä Diosmädia'agy hajxy quia'a mäböga'añ, tøø ja'a wyiinmahñdyhajxy piädiäcäxä haxøøgtuum ja'a møjcu'ugóngäm, ja'a yaa hanehmbä hädaa yaabä naaxwiin. Coo ja'a wyiinmahñdyhajxy tøø piädiäcäxä haxøøgtuum, paadiä Diosmädia'agy hajxy hoy quia'a wiinjuø'owa'añ maa jadhun myiñän cujaay coo ja'a Jesucristo mœcmäjaa miøødä. Tu'ugmädia'agy ja'a Jesucristo yhity møødä Tieedy. ⁵ Coo højts ja'a Diosmädia'agy nyajwa'xy, ja'a Jesucristo højts nmädiaacypy coo hajxy nägøxiä nWiindsøn'hájtäm. Cab højts jadhun nyajcumaya'añ. Jadhun højts njoot chocy coo højts mijts nbuhbédät, je'eguiøxpä coo højts ja'a Jesucristo nWiindsøn'haty. ⁶ Dios jecy mänaañ coo jøøn jíájt hagoodstuum. Cahnä ja'a naaxwiimbä hänajty yhoyø'oy. Jaaya'ay højts ja'a miädia'agy jadhun tøø xyajwiinjuø'oy coo je'e mœcmäjaa miøødä. Coo ja'a Jesucristo hajxy tøø xyajnahwaats tøø xyajcuhwáatsäm, jadhun hajxy nyajnajuøoyyäm coo ja'a Dios mœcmäjaa miøødä.

⁷ Jaaya'ay højts tøø xwyiinguexy coo højts ja'a miädia'agy nyajwá'xät ja'a Jesucristocøxpä. Jaanč tehñ choobaatp ja'a miädia'agy jadhun. Højts, cab højts mœcmäjaa nhamdsoo møødä. Dios højts jadhun xpiuhbejp coo højts ja'a miädia'agy nyajwá'xät. Coo højts jadhun xpiuhbety, jadhun yajnajuø'oy coo ja'a Dios mœcmäjaa jiaanč tehñ miøødä. ⁸ Tøø højts häyohn may nmänaxy nyajnaxy, pero cab jadhun tiehñ yhanaxiä.

Naxy hõjts nga'a najuø'øy neby hõjts njatcø'øwät, pero cab hõjts hanaxiä njootmayhaty. ⁹ Tøø hõjts häna'c mayhooc xjia wi'i chaächtiuna'añ, pero cab hõjts ja'a Dios mänaa xñajtshixø'øy. Hoy hõjts häna'c mayhooc tøø xjia häyoowhixy, cab hõjts nmøjpäda'agy. Hix, homiänaajä hõjts ja'a Dios jaduhñ xcwieendähaty. ¹⁰⁻¹¹ Nebiä Jesucristo hijty mähähndiuum wiäditiän jabom-jabom, jaanä jaduhñ hõjts mähähndiuum nwädiäpä homiänaajä. Ja'a Jesucristocøxpä hõjts häna'c xjia wi'i yagho'oga'añ. Pero cab hõjts Jesucristo xñä'ägä nähducy. Hix, coo ja'a Jesucristo yho'cy, mänit jiuujypiøjtägajch. Mänit jim ñöcxy maa ja'a Tieediä wyiinduumän. Jimä möcmäjaa jäda'ahaty miøødänä. Paady hõjts jaduhñ homiänaajä xcwieendähaty. ¹² Paady hõjts mähähndiuum nwädity coo hõjts Diosmädia'agy nyajwa'xy. Coo ja'a Jesucristo jiugyhaty, paady hajxy xcwieendähajtäm homiänaajä.

¹³ Jaduhñ jim myiñ cujaay maa ja'a Diosmädia'aguiän coo tu'jäya'ay jecy miänaañ: “Nmäbøjpiøch ja'a Diosmädia'agy, päadyhöch ja'a Dios ngapxpaady”; jaanä jaduhñ hõjts ja'a Diosmädia'agy nmäbøjpä, paady hõjts ja'a Dios ngapxpaatpä. ¹⁴ Coo ja'a Dios ja'a Jesucristo yagjujypiøjtägajch, ja'a nWiindsønähajtäm, jaduhñ hõjts ja'a tøyhajt nmøødä coo hõjts xyagjujypiøjtägatsaambä näguipxy möød mijts. Paadiä Dios hajxy xyagjujypiøjtägatsaanäm coo hajxy nhijtäm tu'ugmädia'agy möødä Jesucristo. Mänitä Dios hajxy nägøxiä xyajnøcxäänäm jim maa ja'a wyiinduumän näguipxy möød mijts. ¹⁵ Paady hõjts häyohn nmänaxy nyajnaxy, chojpy hõjts njoot jaduhñ coo mijts ja'a Diosmädia'agy hamuumdu'joot mmäbögät cooc ja'a Jesucristo hajxy tøø xñähho'túütäm. Jaanä jaduhñ hõjts njoot chojpä coo ja'a jäya'ayhajxy maas nämay jiaac mäbögät, weenä Dios hajxy nämay ñäma'ay: “Dioscujú'uyäp”, je'eguiøxpä coo ja'a Dios hojioot jiaançh tehñ miøødä. Y weenä Dios hajxy nämay ñämaabiä coo möcmäjaa jiaançh tehñ miøødä.

¹⁶ Nnajuøøby hõjts jaduhñ coo ja'a Dios hajxy xyagjujypiøgäänäm, paady hõjts nga'a jootmayhaty. Tehngajnä hõjts ja'a Dios möcmäjaa xjiaac mo'oy maa hõjts njuøhñdy-cøxpän, hoy hõjts nni'x ngopc tehngajnä jia mäjay. ¹⁷ Neby hõjts häyohn yaa nmänaxy nyajnaxiän, cab hõjts jecy nmänax nyajnaxa'añ. Y cab hõjts jaduhñ njaty tsaaçhpøcy. Coo hõjts jaduhñ tøø njaty tøø nhabety, paadiä Dios ja'a mayhajt möj may tiuna'añ maa hõjtsøxpän cøjxta'axiøø.

¹⁸ Pero cab hõjts jaduhñ nmøjpäda'agy coo hõjts jaduhñ yaa njaty nhabety hädaa yaabä naaxwiin. Hix, paquiä hõjts nnä'ä jaty nnä'ä habety. Jim hõjts njoot nbäda'agy maa ja'a Dios ja'a wyiinduumän. Cøjxta'axiøø hajxy jim xyaghidäänäm.

5

¹ Tsipcøxp hajxy nho'ogäänäm ndägoyyäänäm. Pero nmøødhajtäm ja'a tøyhajt hajxy jaduhñ coo ja'a Dios hajxy tøø xyajnähdijjäm cooc hajxy jim xyaghidäänäm maa ja'a wyiinduumän cøjxta'axiøø. Diósäts hajxy jim xyaghidäänäm, ca'a wyiingjäya'ayä hajxy jim xyaghidäänäm. ² Coo hajxy yaa ndsaaçhpøjcäm hädaa yaabä naaxwiin, paadiä njoot hajxy jaduhñ tøø nbädäcäm coo hajxy jim nnøcxäänäm tsajpootyp. ³ Coo hajxy jim ngóotäm, jaançh tehñ jiootcujc hajxy jim nnijiäwø'øwäänäm jim Dioswiinduum. ⁴ Mäduhñtiä hajxy yaa njaac hijtäm hädaa yaabä naaxwiin, cab hajxy jootcujc nhijtäm je'eguiøxpä coo hajxy yaa ndsaaçhpøjcäm. Pero cab hajxy ndsójcäm coo hajxy paquiä nho'c ndägóoyyäm. Je'e hajxy ndsójcäm coo njugyhajtäm cøjxta'axiøø nebiä Dios jiugyhatiän. ⁵ Ja'a Diósäts hajxy jaduhñ xyajnähdijjäm coo hajxy jim xyajnøcxäänäm maa ja'a wyiinduumän. Tøø ja'a yhEspíritu hajxy jaduhñ xyajnäguéjxäm coo hajxy jaduhñ xmiøødhajtäm tu'ugmucy. Jaduhñä tøyhajt hajxy nmøødhajtäm coo ja'a Dios hajxy tøyhajt xjiaançh yagjugyhadaanäm cøjxta'axiøø neby je'e jiugyhatiän.

⁶ Paady hõjts jootcujc nhity jabom-jabom. Mäduhñtiä hõjts yaa njaac jugyhaty hädaa yaabä naaxwiin, cab hõjts jim ndsoj nøcxa'añ maa ja'a Jesucristo wyiinduumän. Tøyhajt jaduhñ. ⁷ Hoy hõjts ja'a Jesucristo yaa nga'a ja hixy hajujcy, nmäbøjcäp hõjts ja'a miädia'agy jaduhñ. ⁸ Cab hõjts nnä'ägä jootmayhaty ni weentiä. Chojpy hõjts ja'a njoot coo hõjts nhó'ogät, coo hõjts jim nnøcxät maa ja'a Jesucristo wyiinduumän. ⁹ Cab hõjts

nmøjpäda'agy pø ho'ogaamb højts, ó pø cab højts ndsoj ho'oga'añ. Pero chojpy højts njoot jaduhñ coo højts ja'a Jesucristo miädia'agy hoy ngudiúunät. Jaduhñ højts ja'a Jesucristo xquiumáyät. ¹⁰ Hiḡ, nägøxiä ja'a Jesucristo hajxy nøcxy nwiindäna'awáanäm. Mänit jaaya'ay ñägapxa'añ pøn hñajty hoy tøø quiudiuñ, pøn hñajty hoy tøø quia'a cudiuñ. Pønjaty hñajty hoy tøø quiudiuñ, je'eds ja'a hoyhajt ja'a weenhajt hajxy paadaamb. Pero pønjaty hñajty hoy tøø quia'a cudiuñ, quiumädoowaamb by hajxy je'e.

¹¹ Nwiingudsähgøøby højts ja'a Jesucristo. Jia wi'i chojpy højts ja'a njoot jaduhñ coo højts xquiumáyät. Nja wi'i yajmäbøgaamb by højts ja'a cu'ughajxy coo højts ja'a Jesucristo tøyhajt tøø xwyiinguexy. Najuøøbiä Dios coo højts ja'a miädia'agy hamuumdu'joot ngudiúunä. Chójpíochä njoot jaduhñ coo mijts mnajuøøbiät coo højts ja'a Diosmädia'agy hamuumdu'joot ngudiúñ. ¹² Cab højts nyajcumaya'añ, hoy højts jaduhñ nja niñänømyii coo højts ja'a Jesucristo tøø xwyiinguexy. Paady højts mijts jaduhñ nhawáanäm, jaduhñ mijts mnajuø'owät neby højts mijts xpíuhgapxó'owät coo højts häna'c hñajty jaduhñ tøø xñähwaambety. Ja'a häna'c-hajxy jaduhñbä, je'e hajxy yajcopcøøby pø hoy yhamdsoo cuhdujt hajxy quiudiuñ. Cab hajxy ñä'ägädä wiinjuø'oy coo ja'a wyiinmahñdyhajxy quia'a nä'ägädä hoyyá. ¹³ Jaduhñ højts häna'c xñänømy cooc tyijy højts nguhmäñø'oy coo højts ja'a Dios ndsocy. Díósäts højts xñajuøøby coo højts nga'a cuhhiñ coo højts nga'a cuhmäñø'oy. Hiḡ, chojpy højts ja'a njoot jaduhñ coo mijts ja'a Dios ja'a hoyhajt ja'a weenhajt xmió'owät. ¹⁴ Coø højts ja'a Jesucristo xjiaanč tehñ chójcäm, paady højts ja'a miädia'agy ngudiúunäm hamuumdu'joot. Nmøødhájtäm ja'a tøyhajt hajxy jaduhñ coo jaaya'ay hajxy hoy xñähho'túutäm nägøxiä. Xyajnähwáatsäm ja'a nbojpä ngädieeyhajtämhajxy. ¹⁵ Coø ja'a Jesucristo hajxy hoy xñähho'túutäm, paadiä nhamdsoo cuhdujt hajxy nga'a yajtúunänä. Tsøgä miädia'agy hajxy jaduhñ cudiúunäm mäduhñtiä hajxy yaa njaac jugyhájtäm. Y coo ja'a Jesucristo jiuypíøjtägajch, jaduhñä tøyhajt hajxy nmøødhájtäm coo hajxy xyagjugyhadáanäm cøjxta'axiøø nebiä Tieedy jiu gyhatiän. ¹⁶ Cab højts pøn nyajcopcøøñä pø mäyøøhajxy, pø häyoobhajxy. Ja'a Jesucristo, jaduhñ højts hijty nhixy nebiä pajäya'ayän. Pero cab højts jaduhñ nhixnä nebiä pajäya'ayän. ¹⁷ Hoorä, pønjaty ja'a Jesucristo tu'ugjoot tu'ugjuøhñdy møødhíjnäp, hawiinjembä wiinmahñdy hajxy jaduhñ miøødhájnäp. Tøø ja'a yhaxøøgwíinmahñdy hajxy jaduhñ yhøxhixnä.

¹⁸⁻¹⁹ Ja'a Dios jaduhñ mänaañ coo hawiinjembä wiinmahñdy hajxy nmøødhájtäm. Y coo ja'a Jesucristo hajxy hoy xñähho'túutäm, jaduhñä Dios ja'a nbojpä ngädieey hajxy xyajnähwáatsäm. Jaduhñ hajxy xmiøødnijiootpáatäm. Y højts jaduhñ tøø xwyiinguexy coo højts ja'a miädia'agy jaduhñ nyajwá'xät coo ja'a Jesucristo hajxy tøø xñähho'túutäm, y coo ja'a Dios hajxy xyajnähwáatsäm, y coo ja'a Dios hajxy jaduhñ xmiøødnijiootpaadánäm. ²⁰ Ja'a Dios højts tøø xwyiinguexy coo højts ja'a Jesucristo miädia'agy nyajwá'xät. Jaduhñ højts tøø xñäma'ay coo højts mijts nmänuu'xtá'agät coo miädia'agy hajxy mmäbøjcät. Jaduhñä Dios hajxy xyajnähwá'adsät. Jaduhñ hajxy ween xmiøødnijiootpaadóøjät. ²¹ Cabä Jesucristo ja'a Dios mänaa miägädiehy. Pero coo Dios hajxy xjiaanč tehñ chójcäm, paady miänaañ coo ja'a Jesucristo ja'a nbojpä ngädieeyhajxy xchømó'cäm. Y coo ja'a Jesucristo hajxy xñähho'túutäm, jaduhñä Dios hajxy xyajnähwáatsäm. Jaduhñ hajxy xpiädácäm hawa'adstuum.

6

¹ Tøø ja'a Diosmädia'agy hajxy mmäbøcy, paadiä Dios ja'a hoyhajt ja'a weenhajt hajxy tøø xmió'oy. Højts mijts nmänuu'xtaacypy coo ja'a Diosmädia'agy hajxy hoy mgudiúnät. Paady mijts jaduhñ nmänuu'xta'agy, coo højts ja'a Dios nmøødtuñ. ² Hiḡ, jaduhñ jim myiñ cujaay maa ja'a Diosmädia'aguiän:

Tøøch nyajnähdiijy mänääjøch miičh ja'a hoyhajt ja'a weenhajt hawiinmats nmó'owät. Cooch miičh mänit xpia'yá'axät, mänítøch miičh nmädówät. Mänit nbuhbédät. Mänit nyajnähwa'ads nyajcuhwá'adsät,

nõmä Diosmädia'agy miäna'añ. Hoorä, tøø yhabaatnä coo ja'a Dios hajxy nba'yáaxämd. Jaduhñä Dios hajxy xyajñahwaats xyajcuhwáatsämd.

³ Maa højts ja'a Diostuung nduñän, hoy højts njäya'ayhaty. Hix, cab højts ndsocy coo højts pøn xñähwaambédät. ⁴ Hoy højts ja'a Diostuung njaančh tuñ. Nmee'xtujpy højts hoy tyijä, hoy ñejpiä højts nja jaty nja habety. Hanaxiä højts tøø ndsaačhpøcy. Tøø højts häyohn mayhooc nmänaxy nyajnaxy. ⁵ Tøø højts mayhooc nyajwobho'ogy. Tøø højts mayhooc nyajtsumy. Tøø højts ja'a cu'ug mayhooc xñäbädø'ogy. Tøø højts mayhooc nhanuu'xø'oy ja'a Diosmädia'agyquiøxpä. Tøø højts jamia'ay nhity mayhooc ja'a Diosmädia'agyquiøxpä. Tøø højts mayhooc jaguiay jayhu'ugy nhijpä. ⁶ Coo højts ja'a Diostuung nduñ, cab højts haxøøgwiiinmahñdy nnä'ägä møødä. Nwiinjüøby højts ja'a Diosmädia'agy. Mee'xhieemy højts nhity, cab højts tii nmøjpäda'agy. Hojioot højts nmøød. Hix, ja'a Dioshespíritu højts nmøød. Hamuumdu'joot højts jäya'ay jaduhñ ndsocy nba'häyoy. ⁷ Nyajwa'xyp højts ja'a tøyhajt. Ja'a Diosmäjaa højts nmøød. Jaančh tehñ yhoy højts njäya'ayhaty nebiä Dios choquiän. Jaduhñ højts ja'a haxøøgpä nga'a yajmäjäda'agy. ⁸ Näje'eyyä højts jäya'ay jaduhñ xwyiingudsähgø'oy. Näje'e højts xquia'a tsocy xquia'a mee'xy. Näje'e højts xquiumay, näje'e højts xñähojy. Tømiädiaacp højts, hoy højts jäya'ay näje'e xjia nänømy cooc tyjy højts nhøhnda'agy. ⁹ Hoy højts ja'a tsaangu'ug xjia hixyhaty, cab højts häna'c näje'e xmiämøj xmiämayø'oy. Mäjahñdiuum højts njaančh tehñ wiädity, høxtä xyagho'ogaamb højts jäya'ay. Pero ja'a Dios højts jaduhñ xcwieendhajt. Tøø højts ja'a Dios xyajcumädoy, pero cabä Dios jaduhñ miäna'añ coo højts nhó'ogät. ¹⁰ Jootcujc højts nnä'ägä hity homiänaajä, hoy højts wiingumänaajaty nja mänaxy nja yajnaxy. Hoy højts nja häyoy, nyajñahixøøby højts ja'a jäya'ay ja'a Diosmädia'agy nämay, jaduhñä hoyhajt ja'a weenhajt hajxy piáadät. Hoy højts tii nga'a ja møødä, Dios højts xmiooby tijaty højts nyajmaajijpy.

¹¹ Mägu'ughajpädøjc, ja'a mijts jim hijpä Corintos, mijts jaduhñ nmägäpxyp. Tøø mijts ngøxy hawáanäm nebiaty højts ja'a mädia'agy nmøødä. Njaančh tehñ chojpy højts mijts jaduhñ. ¹² Nja wi'i miøødnijiootpaadäänäp højts mijts. Cab højts nnajuø'oy pø jaduhñ mijts xjiäwøøbiä. ¹³ Tunä mayhajt hajxy, tsøc hajxy nijiootpáatäm. Jaduhñ mijts nmägäpxy nebiä huungän.

¹⁴ Cab hajxy mmøødwädiymúgät pøn ja'a Diosmädia'agy ca'a mæbøjp, coo hajxy jaduhñ mnä'ä pahíjxpät neby hajxy yhaxøøgwäditiän. Hix, pønjaty ja'a Diosmädia'agy mæbøjp, hoy hajxy quiudiuñ. Hawa'adstuum hajxy je'e. Pero pønjaty ca'a mæbøjp, cab hajxy quiudiuñ. Wiing ja'a wyiinmahñdyhajxy. Haxøøgtuum hajxy je'ebä. ¹⁵ Hix, cabä Jesucristo tu'ugmädia'agy yhity møødä møjcu'ugong. Jaanä jäduhñduhmbä, pøn ja'a Diosmädia'agy mæbøjp, cab hajxy tu'ugmädia'agy yhiijpä møødä ja'a Diosmädia'agy hajxy ca'a mæbøjpä. ¹⁶ Cabä cuhdujt jaduhñ myiñ coo häna'c quepychech naaxpoch hajxy wyiingudsähgø'owät maa ja'a Diostøjcän. Cabä quepychech naaxpoch jiujuquiä. Ja'a Diósäts mæböcy jujcy. Y coo ja'a Diosmädia'agy hajxy nmæbøjcäm, jaduhñ mäwiin hajxy nmæbáatäm nebiä Diostøjcän, je'eguiøxpä coo ja'a Dioshespíritu hajxy nmøødhájtäm. Jaduhñä Dios jecy miänaañ:

Pønjátyhøchä nmädia'agy xmiøbøjcäp, je'ečhä nhEspíritu nmo'owaamby.
Nwoowhidáambiøch hajxy je'e.

Xwyiingudsähgø'owáambiøch hajxy je'e. Ngu'ughadáambiøch hajxy je'e,
nõmä Dios hajxy jecy xmiädiácäm. ¹⁷ Jaduhñä Dios jecy miänaambä:

Puhwaatsnä hajxy ja'a häna'c ja'a quepychech hajxy wiingudsähgøøbiä, ja'a häna'c ja'a
naaxpoch hajxy wiingudsähgøøbiä.

Cab hajxy mmøødwädiymújnät. Høxhix ja'a haxøøgpä hajxy. Mänítøch mijts
xquiø'dägøñät.

¹⁸ XTieedyhadáambiøch mijts hñajtiän. Nnøøxhadáambiøch nmajc-hadáambiøch mijts
hñajtiän,

nõmä Dios jecy miänaañ. Møccuhdujt ja'a Dios miøød. Hoy piønä jaduhñ yhane'emy.

7

¹ Mägu'ughajpädöjc, tøyhajt jaduhñ coo ja'a Dios hajxy xyhuunghájtäm. Tsöcxä haxøogwiinmahñdy hajxy najtshixóøyyäm cøxiä. Yø'ø haxøogwiinmahñdy, xyajmá'täp ja'a mni'x ja'a mjuøhñdy jaduhñ. Tsögä Dios hajxy wiingudsähgøøyyäm. Tsögä njoot hajxy pädaacäm maa ja'a Dioscøxpän.

² Cham højts mijts nnämäaguuiumbä, tunä mayhajt hajxy, tsøc hajxy nijootpáatäm. Cab højts pøn tøø nhäyoowhixy, cab højts pøn haxøogwiinmahñdy tøø nyajnáhixø'oy, cab højts pøn tøø nwiinhøøñ. ³ Pero cáboch nmäna'añ coöch pøn tøø xñähøønø'oy. Njaanč tehñ chojpy højts mijts jaduhñ mäduhñtiä hajxy yaa njaac jugyhájtäm hädaa yaabä naaxwiin. Jaduhñ mijts hijty tøø nhuuc nämaabiä. ⁴ Nnajuóøbiøch coo mijts ca'xy mgudiuna'añ waambátyhøch mijts tøø nmägapy tøø nhane'emy. Ngumáabiøch mijts jaduhñ. Jootcújc-høch njaanč tehñ ñijiäwø'oyii maa mijtscøxpän. Jaanč tehñ xioondaacpøch, hoy højts madiu'u nja tsaächpøcy.

⁵ Coo højts ja'a hermano Tito jim nga'a paaty maa ja'a cajpt jaduhñ xiøhatiän Troas, paady højts jim nwiimbijty. Y coo højts yaa nmejch Macedonia-naaxooty, ni yaa højts ja'a hermano Tito nga'a paatpä. Coo højts yaa nga'a tsoj paaty, paady højts hijty jootcujc nga'a nä'ägädä ñijiäwø'oyii. Xmiädsiphajp højts jäya'ayhajxy hijty ja'a Diosmädia'agyquiøxpä. Jootmayhajp højts hijty je'eguiøxpä cooc tyijy mijts jaduhñ mga'a mabøga'añ. ⁶ Ja'a Dios, yagjootmøcpøjpy je'e pønjaty jaduhñ jootmayhajp. Y coo ja'a hermano Tito jiaanč mejch, mänit højts ja'a Dios xyagjootmøcpøjcy. ⁷ Xjiaanč tehñ yagjootmøcpøjc højts ja'a Dios jaduhñ coo højts ja'a hermano Tito xyhawaanä coo mijts je'e myagjootmøcpøjcy mänaa jim yhitiän maa mijtsän. Cøjx højts xyhawaanä cóogøch mijts xjia wi'i jiøbhixy coöch jim nnøcxät maa mijtsän. Jaduhñ højts tøø xyhawaanäbä cooc mijts mjootmayhaty je'eguiøxpä coöch mijts hijty tøø xyhuuc yagjootmayhajp. Y jaduhñ højts tøø xyhawaanäbä cóogøch mijts xjiaanč tehñ jiahmiejtsta'agy. Coo højts jaduhñ tøø xquiøxy hawaanä, páadyhøch njaanč tehñ xioonda'agy.

⁸ Mänáajøch mijts ja'a nocy jawyinhajtpä nyajnäguexiän, nhójjøch mijts jaduhñ siémpräm. Paady hajxy weeñtiä mjootmayhajty. Jootmayháthøch høøch weeñtiäbä coo mijts nhojy. ⁹ Coo mijts nhojy, paadiä mhaxøøgcuhdujt hajxy mhøxhijxy. Xquiumaayy mijts ja'a Dios jaduhñ coo hajxy jaduhñ mhøxhijxy. Coo hajxy jaduhñ mhøxhijxy, páadyhøch nxoonda'agy, ca'a jie'eguiøxpä coo hajxy mjootmayhajty. ¹⁰ Pønjaty yhaxøøgcuhdujt høxhijxp, je'edshajxy hodium mähmó'owäp. Cumay hajxy jaduhñ piädsómät maa ja'a Diosän. Y cab hajxy jaduhñ jootmayhájnät. Pero pønjaty yhaxøøgcuhdujt ca'a høxhijxp, haxøøgtuum hajxy miähmó'owät. Hoy miänaaxøø hajxy jaduhñ jootmayhada'añ. ¹¹ Pero mijts, hamuumdu'joot hajxy mgudiunñ nebiaty mijts tøø nmägapy tøø nhane'emiän mänáajøch ja'a jayøbajtpä nocy nguexiän. Mjaanč høxhijx ja'a mhaxøøgcuhdujt hajxy nebiä Diosmädia'agy yhane'emiän. Mjootmayhajt hajxy jaduhñ coo hajxy hijty tøø mgädieey. Y mdsähgøøyy hajxy jaduhñ weeñtiä. Chojpy ja'a mjoothajxy coo mijts ngumáyät, paadiä craa hajxy mhøxquejxpädsøømy, ja'a haxøøgjatcøøyyäbä. Tøø hajxy myajcähxø'nø coo hajxy tii pojpä tii cädieey mga'a møødän. ¹² Paady højts ja'a nocy jim nguejxy maa mijtsän, coo häna'c-hajxy haxøøg tøø ñidiuñii. Ca'a jie'eguiøxphajtiä højts yø'ø nocy nguejxy. Paady højts nguejxpä, chojpy højts ja'a njoot hänäjty coo hajxy myajcähxø'ogät coo højts mijts xchocyñä. Xyhijxp højts ja'a Dios jaduhñ coo højts nga'a hønnda'agy. ¹³ Coo højts mijts jaduhñ xchocyñä, paady højts nxoonda'agy.

¹⁴ Xoondaacp højts jaduhmbä coo ja'a hermano Tito xioondaacpä. Paady xioonda'agy coo ja'a Diosmädia'agy hajxy hänäjty hoy mbanøcxyñä nägøxiä mänaa jim yhitiän maa mijtsän. Tøøchä hermano Tito hijty nnäma'ay coo mijts ja'a Diosmädia'agy hoy mgudiunñ. Y tøyhajt hajxy mjaanč cudiuñ. ¹⁵ Hamuumdu'joot mijts ja'a hermano Tito xjiaanč tehñ chocy, je'eguiøxpä coo mijts ja'a miädia'agy mmäbøjcä hamuumdu'joot nebiaty mijts xyhanehmiän. ¹⁶ Nnajuóøbiøch coo mijts ja'a Diosmädia'agy hoy mbanøcxaannä; páadyhøch nxoonda'agy.

8

¹ Hoorä, mägu'ughajpädøjc, cham hõjts mijts nyajmøødmädia'aga'añ nebiaty ja'a Dios mayhajt tøø tiuñ ja'a mäbøjpädøjcøxpähajxy, ja'a hajxy jim tsänaabiä Macedonia-naaxooty. ² Jaančh tehñ xioondaacp hajxy, hoy hajxy jaduhñ tøø jia tsaäch-pøcy hoyhoy, hoy hajxy jaduhñ jia häyoy hanaxiä. Coø hajxy jaduhñ jiaančh tehñ xioonda'agy, paadiä xädø'øñ hajxy may tøø yajmucy. Hojiot hajxy jiaančh tehñ miøød, paady hajxy may tøø yajmucy. Tøø ja'a häyoobäjäya'ay xädø'øñ hajxy mio'oyii; ja'a hermanodøjc-hajxy jaduhñ tøø yecy. ³ Hamuumdu'joot hajxy jaduhñ tøø yecy, ca'a yhadsipä, ca'a yhajootma'adä. Tøøch nhamdsoo hixy coø hojiot hajxy jaduhñ jiaančh tehñ miøødä. Høxtä yejnajxypä xiädø'øñ hajxy jaduhñ näjootpä. ⁴ Coø hajxy miädoyhajty coø hõjts ja'a häyoobäjäya'ay hänajty nbuhbeda'añ xädø'øñhaam, ja'a Diosmädia'agy hajxy mäbøjpä, mänit hõjts xñämaayy coogä xädø'øñ hajxy jaduhñ quiexaambä, ja'a hajxy jim tsänaabiä Macedonia. Hamuumdu'jootäc hajxy jaduhñ quiexa'añ. ⁵ Xoonäac hõjts jaduhñ coø ja'a hermanodøjc xädø'øñ hajxy may yejcy, ja'a hajxy jim tsänaabiä Macedonia. Y coø hajxy miänaañ coø ja'a Dios ja'a miädia'agy hajxy hamuumdu'joot quiudiunaanä, paady hõjts maas hanaxiä nxoonäacy. Dios jaduhñ mänaañ coø hajxy jaduhñ quiudiunät. Jaduhñ hajxy miänaambä cooc hõjts ja'a nmädia'agy hajxy xquiudiunáanäbä. ⁶ Mänaa ja'a hermano Tito jim jayøbajt yhooyän maa mijtsän, mänit hajxy xñämaayy coø xädø'øñ hajxy myajmügät. Hoorä, jim hõjts ja'a hermano Tito nguejxtägatsaambä maa mijtsän, weenä xädø'øñ hajxy mgøxy yajmucy. Mänit hajxy jim mguéxät maa ja'a häyoobäjäya'ayhajxiän, ja'a Diosmädia'agy hajxy mäbøjpä. ⁷ Jaančh tehñ yhoy ja'a Diosmädia'agy hajxy mmäbøcy. Jaančh tehñ yhoy hajxy myajwiingapxø'øy. Jaančh tehñ yhoy hajxy mwiinjuø'øy. Hamuumdu'joot hajxy jaduhñ mmäbøcy. Xjiaančh tehñ chojpy hõjts mijts. Hoorä, chojpy hõjts ja'a njoot coø mijts ja'a häyoobäjäya'ay mjaančh tehñ piuhbédät hamuumdu'joot xädø'øñhaam.

⁸ Cábøch mijts ndehñ yhane'emy coø hajxy mbuhbédät. Paady mijts jaduhñ nyajmøødmädia'agy nebiatiä wiingjäya'ayhajxy tøø miäbuhbetiän, ween hajxy jaduhñ mbahíxpät. Jaduhñ hajxy myajcähxø'øgät coø hajxy tøyhajt mjaančh mädsøjpä. ⁹ Tøyhajt jaduhñ coø ja'a Jesucristo hojiot jiaančh tehñ miøødä, ja'a nWiindsønha-jtämhajxy. Cahnä hänajty yaa quiäda'agynä hädaa yaabä naaxwiin nebiä pajäya'ayän, jim hijty møc yhane'emy maa ja'a Tieedy ja'a wyiinduumän. Pero coø yaa quiädaacy, mänit jaduhñ jiajty nebiä hädaa yaabä jäya'ayhajxiän, neby hajxy yaa nhäyóowäm. Jaduhñ hajxy hoy xñähho'túutäm. Y coø hajxy jaduhñ tøø xñähho'túutäm, paady hajxy jim xyajnxøcxáanäm maa ja'a Tieediä wyiinduumän, pønhatiä miädia'agy jaduhñ mäbøjcäp.

¹⁰⁻¹² Cham mijts nwiingapx njøjcaxø'øwa'añ coø ja'a xädø'øñ hajxy myajpedøød neby hajxy hadøjumøjt mwiinmahñdyhajtjän coø hajxy hänajty myajmuga'añ. Mja nähmajts hajxy jaduhñ, pero cahnä hajxy myajpedyii. Hahixøøby jaduhñ coø hajxy myajpedøød, jaduhñ hajxy myajcähxø'øgät coø hojiot hajxy tøyhajt mjaančh møødä. Mijts jaduhñ mwiinmahñdyhajtsohñ coø xädø'øñ hajxy hänajty myajmuga'añ. Jaduhñ hajxy myégät neby hajxy mmäjäda'aga'añ. Mädyöyyä jaduhñ. Cab jaduhñ yhahixø'øy coø hajxy hanaxiä myégät. Hix, jaduhñä Dios ja'a jiioot chocy coø hajxy myajcähxø'øgät coø hojiot hajxy jaduhñ mjaančh møødä.

¹³ Cábøch nmäna'añ coø hajxy mhäyoodägø'øwät, páadyhöch tøø nmäna'añ coø hajxy hanaxiä mga'a yégät. ¹⁴ Jaduhñhöchä njoot chocy coø pøn tii quia'a yajmaajiädät. Jaduhñds je'e, hahixøøby jaduhñ coø mijts ja'a häyoobäjäya'ay mbuhbédät, je'eguiøxpä coø mijts nä'ä tægø'øbä mmøødä jäda'ahaty. Y coø mijts hänajty tøø mhäyoodägø'øy, mänit mijts xpiuhbejtägätsät, pø jim hajxy hänajty miøødä nä'ä tægø'øbä. ¹⁵ Jaduhñ jim myiñ cujaay maa ja'a Diosmädia'aguiän: "Pønjaty may yajpädø'c, piuhmooyy hajxy je'e pønjaty weñtiä yajpädø'c. Yaghaguipxyatiøoyy hajxy jaduhñ tu'cuhdujt."

¹⁶ Dios ja'a hermano Tito jaduhñ tøø yajnähdijy coø hojiot miøødhädät maa mi-jtscøxpä, neby hõjts hojiot nmøødän maa mijtscøxpän. Dioscujú'uyäp ja'a Dios jaduhñ.

¹⁷ Coo hõjts ja'a hermano Tito nnämaayy coo jim̄ ñõcxät maa mijtsän, jootcugøøyy je'e coo hõjts jaduññ nnämaayy coo jim̄ ñõcxät. Hix̄, hamdsoojoot hijty jaduññ ñä'ägä nõcxa'añ.

¹⁸ Nyajmäguexø'øwaamby hõjts ja'a hermano Tito ja'a mägu'ughajpä wiingpä. Wi-induhm̄chajtøjc tøø yajmädoyhaty coo ja'a Diosmädia'agy hoy yajwa'xy ja'a Jesucristocøxpä. ¹⁹ Jaduhñä mäbøjpädøjc-hajxy tøø miänaambä coo hõjts nmødhädät majaty hõjts ja'a xädø'õñ nyajmucy mänaa hõjts ja'a häyoobäjäya'ayhajxy hänajty nõcxy nmo'owa'añän. Cähxø'øgaamb jaduññ coo ja'a Dios miøjjä jiaančhä. Jaduhñ quiähxø'øgaambä coo hõjts hojioot nmøødä. ²⁰ Paady hõjts nämetsc nädägøøg nwädity xädø'õñyajmujpä, cab hõjts ndsocy coo hõjts pøn̄ xñänómät cooc tyijy hõjts nje'e-hada'añ. Hix̄, majiaty hõjts xädø'õñ nyajmucy. ²¹ Chojpy hõjts ja'a njoot jaduññ coo hõjts ja'a jäya'ayhajxy xquiumáyät neby hõjts ja'a Dios xquiumáyyän.

²² Chaads hõjts ja'a mägu'ughajpä mäwiingpä nguexáangumbä møødä hermano Titohajxy. Mayhooc hõjts hoy tøø xmiøødtuñ̄ hoy ñä'a mädyii tuungä. Hamuumdu'joot jim̄ nõcxa'añ maa mijtsän. Hix̄, ñajuøøby jaduññ coo mijts hoy myajtøjtägø'owa'añ. ²³ Naxiä hermano Tito hajxy hoy mdehm̄ yajtøjtägø'owät coo hajxy jim̄ miédsät. Haa ja'a hermano Tito, hoy miänájøch jaduññ xñä'ägä møødtuñ̄, páadyhöch jim̄ nguexa'añ maa mijtsän. Y ja'a jiamioødhajxy nämetspä, ja'a mäbøjpädøjc-hajxy yaabä, jaduññ hajxy tøø miänaambä coo hajxy jim̄ ñõcxät. Hoyyä Jesucristo hajxy wyiingudsähgø'øy. ²⁴ Coo mijts ja'a hermano Tito hoy myajtøjtägø'owät møødä jiamioødhajxy, jaduññ mijts ja'a mäbøjpädøjc hajxy xyhíxät coo hajxy tøyhajt mjaančh mädsocy. Tøjiádäp jaduññ neby hõjts mijts tøø nmädia'aguiän coo mijts hojioot mjaančh teh̄m̄ miøødä.

9

¹ Høøch mijts jaduññ nnä'a jaac näjaayøøby. Nnajuøøbiøch jaduññ coo mijts ja'a häyoobäjäya'ayhajxy mbuhbeda'añ, ja'a Diosmädia'agy hajxy mäbøjpä. ² Hix̄, nna-juøøbiøch coo hajxy hamuumdu'joot mbuhbeda'añ. Jaduhññhøchä mäbøjpädøjc-hajxy tøø nhawaanä, ja'a hajxy jim̄ tsänaabiä Macedonia-naaxooty. Jaduhññhöch hajxy tøø nhawaanä coo mijts hadojumøjt mdägøøyy xädø'õñyajmujpä, pøn̄jatiä Diosmädia'agy jim̄ mäbøjp Acaya-naaxooty. Y coo mijts jayøjp mnähmajch, paadiä Macedóniabä jäya'ayhajxy nämay xpiahixaambä. Jaduhñ hajxy hamuumdu'joot miäbuhbedaambä nej mijts mmäbuhbeda'añän hamuumdu'joot. ³ Páadyhöchä hermano Titohajxy jim̄ nguejxø'øga'añ maa mijtsän, weenä xädø'õñ hajxy paquiä myajmujpäðø'øy. Jaduhñds je'e, cooch jim̄ nnõcxät, tøø ja'a xädø'õñ hajxy hänajty mgøxy yajmujnä. Haa ca'a, tøøchä Macedoniabähajxy nhawaanä coo mijts ja'a xädø'õñ myajmuga'añä. ⁴ Hix̄, wéñndøchä Macedóniabä jäya'ayhajxy näje'e nmødhädät jim̄ maa mijtsän. Y coo hajxy jaduññ xyhíxät coo ja'a xädø'õñ hajxy hänajty mga'a cøxy yajmucyñä, mdsähdiunaamb hajxy jaduññ. Jaduhññhöch ndsähdiúumbät je'eguiøxpä cooch mijts tøø nmädia'agy coo ja'a xädø'õñ hajxy hänajty myajmuga'añ. ⁵ Páadyhöch jaduññ nwiinmaayy coo hijty yhahixø'øy coochä hermano Titohajxy jawyiin nguejxø'øgät maa mijtsän, jaduññ mijts jim̄ xpuihbédät maa ja'a xädø'õñ hajxy myajmuquiän. Jaduhñä xädø'õñ hajxy myaghídät nähix̄ hahixø'ø cooch jim̄ nmédsät, neby hajxy jaduññ tøø mmäna'añän coo hajxy myaghida'añ. Jaduhñ hajxy myajcähxø'øgät coo ja'a xädø'õñ hajxy myega'añ hojiootcøxpä. Cab pøn̄ jaduññ miäná'anät cooc tyijy mijts hadsip tøø nhane'emy coo hajxy myégät.

⁶ Jaduhñds je'e, pøn̄jaty jaduññ wiinduc wiindsaäch, cabä hoyhajt hajxy piaada'añ. Pero pøn̄jatiä häyoobäjäya'ay näxuu'tsp, je'edsä hoyhajt hajxy jaduññ paadaamb. Tøyhajt jaduññ. ⁷ Jootcujc hajxy myégät hamuumdu'joot neby hajxy hänajty myega'añän, ca'a yhadsipä ca'a yhajootma'adä, ca'a hajxy tii mnajtsähayowø'øy. Hix̄, je'e ja'a Dios chojpy pøn̄jaty jaduññ jootcujc yejp. ⁸ Møj jaančhä Dios. Xmió'owäp mijts ja'a hoyhajt ja'a weenhajt møj may, jaduññ hajxy tii mga'a yajmaajiädät ni mänaa. Nä'a tægø'øbä

hajxy jaduhñ xmió'owät, jaduhñä wiingjäya'ay hajxy hoy mbuhbejtägätsät hoy ñejpiä.

⁹ Jaduhñ jim myiñ cujaay maa ja'a Diosmädia'aguiän:

Pøn hojiäya'ay, møj mayyä häyoobäjäya'ay piuhbety.

Hoy miänaaxøø ja'a Dios jaduhñ piuhbejtägatsa'añ.

¹⁰ Ja'a Dios, yejpy je'e ja'a tøømd mädyii mn'libäp, mädyii mdúnäp. Yajmayøøby jaduhñ nebiä mgáyät nebiä mhú'ugät. Jaanä jäduhñduhmbä, xmió'owäp mijts ja'a Dios nä'a tægø'øbä tijaty hajxy hñajty myajmaajiajpy, jaduhñ mijts ja'a häyoobäjäya'ay mmoodiägätsät. ¹¹ Y coo mijts ja'a häyoobäjäya'ay jaduhñ hamuumdu'joot mbuhbédät, mänit mijts ja'a Dios ja'a hoyhajt ja'a weenhajt møj may xmió'owät. Y coo højts ja'a häyoobäjäya'ay xädø'øñ nøcxy nmo'oy, ja'a mijts hñajty tøø myéquiäbä, mänitä häyoobäjäya'ay ja'a Dios hajxy ñäma'awa'añ: “Dioscujú'uyäp.” ¹² Hix, coo mijts ja'a häyoobäjäya'ay jaduhñ mbuhbédät, mejtstu'u ja'a hoybä hajxy jaduhñ mduna'añ. Piaadaambiä häyoobäjäya'ayhajxy tijaty hajxy hñajty yajmaajiajpy, y tehngajnä ja'a Dios hajxy jaduhñ ñäma'awa'añ: “Dioscujú'uyäp.” ¹³ Coo mijts ja'a häyoobäjäya'ay jaduhñ mbuhbédät jootcujc hoy miädyii cajptä, myajcähxø'øgaamby hajxy jaduhñ coo ja'a Dios ja'a miädia'agy hajxy mgudiuunä ja'a Jesucristocøxpä. Jaduhñä häyoobäjäya'ay ja'a Dios hajxy møj jaančh ñäma'awa'añ, je'eguiøxpä coo mijts ja'a Dios ja'a miädia'agy mgudiuunä, møød coo hojiot hajxy mjaančh tehñ miøødä ja'a häyoobäjäya'aguiøxpähajxy. ¹⁴ Coo mijts ja'a Dios ja'a hoyhajt ja'a weenhajt møj may tøø xmió'oy, paady mijts ja'a häyoobäjäya'ay xchoga'añ xpia'häyowa'añ, møødä Dios hajxy pia'ya'axa'añ ja'a mijtsøxpä. ¹⁵ Tsøcxä ja'a Dios hajxy nägøxiä nämáayyäm: “Dioscujú'uyäp”, je'eguiøxpä coo ja'a yHuung yaa quiejxy hädaa yaabä naaxwiin, coo hajxy hoy xñähho'túütäm. Møjmayhajt ja'a Dios jaduhñ tiuun hoy-yagjuøøñä.

10

¹ Høøch mijts cham nmägapxaamby nhane'emaamby, høøch Pablohajpä. Mänaa ja'a Jesucristo yaa wiäditiän hädaa yaabä naaxwiin, jaančh tehñ miøødä hojiot hñajty. Mee'xxieemy hñajty jiaančh tehñ wiädity. Jaduhñhöch je'e nja pahixaañ cooçh mijts jaduhñ nmägapxa'añ nhane'ema'añ. Ja'a nmädsiphøchhajxy, jaduhñhöch hajxy xñänømy cooc tyijy mijts hñajty tsähgø'ø tsähgø'ø nmägapxy nhane'emy mänääjoch jim nhitiän maa mijtsän, pero cooc tyijy høøch nga'a tsähgøøñä coo mijts nmägapxy nhane'emy nocyaam. Cab jaduhñ tiøyyä, nä'a høhndaacp hajxy jaduhñ. ² Mägu'ughajpädøjc, huuc tunä mayhajt hajxy, høxhix ja'a haxøøgpä ja'a ca'a hoybä hajxy. Coo hajxy jaduhñ mhøxhixät, cab mijts jim waamb nnämä'awät cooçh jim nnøcxät maa mijtsän. Pero pøn jaduhñ mänaamb cooc tyijy højts hoy nga'a wädity nebiä hädaa jäya'ayhajxy hoy quia'a wäditiän hädaa yaabä naaxwiin, je'eçh mabøcy hajxy nhójp hajjäya'ayhaam. Nyajcähxø'øgäbøch jaduhñ cooçh hñajty tøyhajt nga'a tsähgø'øy. ³⁻⁴ Hoy højts yaa nja tsäna'ay hädaa yaabä naaxwiin, cab højts ja'a nhamdsoo wiinmahñdy nyajtuñ nebiä yaabä jäya'ayhajxy yajtuñän. Ja'a Dios højts xpiuhbejp ja'a miäjaahaam, cab højts ja'a Dios ja'a miädsip jaduhñ nyajmäjädaacä. ⁵ Jii jäya'ayhajxy näje'e wiädity, yajcumayaamb hajxy, høhndaacp hajxy. Cabä jioothajxy yajmädsocy coo wiinghänä'c ja'a Dios hajxy pia'häyowät. Nyajcähxø'py højts jaduhñ coo yø'ø häna'c-hajxy jaduhñ yhöhnda'agy. Y coo højts hñajty tøø nga'a yajmäjäda'agy, mänit højts nyajmäböga'añ ja'a Jesucristocøxpä, coo ja'a miädia'agy hajxy ween quiudiuunä. ⁶ Y coo mijts hñajty hoy tøø mgudiuñ, cab højts mijts hñajty waamb nnämä'awaannä. Pero pønjaty jaduhñ ca'a nä'ägädä cudiunaamb, je'eds højts hahoy nhøxquexaamby maa ja'a tsajtøjcän.

⁷ Pønjaty jaduhñ najuøøby coo hajxy tøø wyiinguexyii ja'a Jesucristäm, ween hajxy ñajuøøbiä cooçh ja'a Jesucristo tøø xwyiinguejxpä. Tøyhajt jaduhñ. Hoy piønä jaduhñ ñajuø'øy. ⁸ Ja'a Jesucristo højts ja'a cuhdujt jaduhñ tøø xmió'oy coo højts mijts nmägapx nhané'emät. Chojpiä jioot jaduhñ coo mijts ja'a miädia'agy mjaac mabøjcät. Cabä jioot chocy coo hajxy mdudägóyyät. Tøyhajt jaduhñ cooçhä Jesucristo ja'a cuhdujt

jaduhmbä tøø xmio'oy. Cooch jaduhñ nniänomyii, cáboch ndsähdiuna'añ, hóyhøch häna'c jaduhñ xjia nänomy cóogøch tyijy nyajcumaya'añ hanaxiä. ⁹ Cáboch mijts nhadsähgø'øwa'añ, hoy mijts nocy naxy nja yajnäguexy. ¹⁰ Ja'a nmädsiphøchhajxy, jaduhñ hajxy miäna'añ cooc tyijy mijts møc nhane'emy nocyhaam. Pero jaduhñ hajxy miänaambä cooc tyijy hänajty møc nga'a hane'emy mänáagøch jim nhitiän maa mijtsän, cooc tyijy hänajty weenjaty ndsähgø'oy. ¹¹ Pero pønjaty jaduhñ mänaamb, cabä tøyhajt hajxy miøødä. Jaduhñdsä tøyhajtpä, neby højts mijts møc nhane'emiän nocyhaam, jaanä jaduhñ mijts møc nhane'emaambä coo højts jim nnøcxtägätsät maa mijtsän.

¹² Jii häna'c-hajxy näje'e, jaanč tehñ yajcumayaamb hajxy cooc tyijy hajxy jiaanč tehñ jiaty jiaanč tehñ ñajuø'oy. Hamiñ haxøpy hajxy jaduhñ ñiguiumayii. Y cabä wiinghäna'c hajxy quiumay. Pero cabä tøyhajt hajxy miøødä. Højts, cab højts jaduhñ nhäna'c-haty. Cab højts jaduhñ niguiumayii. ¹³ Caj pues, cab højts nyajcumaya'añ. Jaduhñ højts nduna'añ neby højts ja'a Dios tøø xyajnähdijjiän coo højts ndúnät. Jaduhñ højts tøø xyajnähdijy coo højts jim ndúnät høxtä jimbaady maa mijtsän. ¹⁴ Coo højts jim nduñ maa mijtsän, ngudiuumby højts jaduhñ neby højts ja'a Dios tøø xñäma'ayän. Hix, højts ja'a Diosmädia'agy jim nyajwa'xtsohñ maa mijtsän, ja'a Jesucristocøxpä. ¹⁵ Majaty wiinghäna'c jaduhñ tøø tiuundsoönän, cab højts jaduhñ nmäna'añ coo højts jim tøø nduñ. Cab højts jaduhñ nguhdujthaty. Pero chojpy højts ja'a njoot coo mijts ja'a Diosmädia'agy maas hoy mmäbøgät, jaduhñ højts maas hoy njaac tehñ tiúnät maa mijtsän. ¹⁶ Y jaduhñ højts ja'a Diosmädia'agy hoy nyajwá'xät jäguembaady maa pøn ja'a Diosmädia'agy quia'a mädoynän. Hix, cab højts nduna'añ maa wiinghäna'c jaduhñ tøø tiuundsoönän. Hix, cab højts jaduhñ nyajcumaya'añ.

¹⁷ Jaduhñ jim myiñ cujaay maa ja'a Diosmädia'aguiän: “Cab jaduhñ yhahixø'oy coo hamdsoo mniguiumayøjät. Pero jaduhñ yhahixø'oy coo ja'a Dios hajxy møj jaanč mnänómät.” ¹⁸ Je'eduhñ tsoobaatp coo ja'a Dios jaduhñ xquiumáyät. Cab jaduhñ choobaady coo hamdsoo mniguiumayøjät.

11

¹ Huuc tunä mayhajt hajxy, huuc mee'x hajxy weeñtiä. Chámhøch weeñtiä nhuuc mädia'aga'añ nebiä jäya'ayhajxy yajcumayaambän. Cooch jaduhñ weeñtiä nniguiumayii, jaduhñ yajmädoy nebiä cuhhiimbähajxy miädia'aguiän. ² Nej mijts ja'a Dios xchoquiän, jaduhñhøch mijts ndsojpä, je'eguiøxpä cooch mijts ja'a Diosmädia'agy tøø nyajmäbøcy ja'a Jesucristocøxpä. Chójpiøchä njoot jaduhñ coo ja'a mjoot hajxy mbädá'agät hamuumdu'joot maa ja'a Jesucristocøxpän. Cabä mjoot hajxy wiingtuum mbädá'agät. ³ Mnigwieendähadøjöp hajxy, jaduhñ hajxy pøn xquia'a jøjcapxø'owät, coo hajxy xyagjahdiägóyyät ja'a Jesucristo. Jii häna'c-hajxy näje'e wiädity mäwiinhøhmbä. Cab mijts xyajmädsocy coo ja'a Jesucristo hajxy hamuumdu'joot mbanøcxnät. Paquiä hajxy jaduhñ xwyiinhøönät. Haa ca'a, jaduhñä Eva jecy yhuuc wiinhøhnäbä ja'a møjcu'ugongäm mänaa ja'a møjcu'ugong ñibiäda'agyijän nebiä tsahñdiän. Siémprämä møjcu'ugong quiuwiinmahñdiä. Paquiä ja'a Eva yajwiinhøhñ. ⁴ Paquiä mijts ja'a miädia'agyhajxy jaduhñ mmäbøjcø'cä pønjaty mijts jaduhñ wiing xyajnähixøøby ja'a Jesucristocøxpä. Cab hajxy jaduhñ yajnähixø'oy neby højts ja'a Diosmädia'agy nyajnähixø'oyän ja'a Jesucristocøxpä. Cab hajxy jaduhñ yajnähixø'oy ja'a Dioshespíritucøxpä neby højts nyajnähixø'oyän. Paquiä mijts ja'a miädia'agyhajxy jaduhñ mbadu'ubøjcä. ⁵ Yø'ø häna'c-hajxy jaduhñ wiing yajnähixøøbiä ja'a Jesucristocøxpä, jaduhñ hajxy ñiänomyii nebiä Dioswiinguexypän, neby jaanč tehñ jiajpän. Cab jaduhñ yhooyä coo hajxy mmäná'anät cooc tyijy hajxy miaas jaty queech høøch njaty. ⁶ Wehñdäda'a jaduhñ tiøyyä cooch hoy yajxon nga'a xi'igy nga'a mädia'agy; cab jaduhñ ñejpiä. Pero tøyhajt jaduhñ cooch madiu'u njaty nnajuø'oy ja'a Diosmädia'agyquiøxpä. Homiänaajä højts mijts ja'a tøyhajt nmo'oy hoy ñä'ä tiiguiøxpä.

⁷ Mänájøch mijts ja'a Diosmädia'agy nyajwiingapxø'oyän, cáboch mijts jaduhñ mänaa nnämaayy cooch mijts xmiäjúyät. Niguiudúunäbøch hänajty hamdsoo, je'eguiøxpä

coochä njoot hänäjty chocy coo mijts ja'a Diosmädia'agy maas hoy mmäbögät. Y cooch hänäjty hamdsoo nniguiudúunäxä, páadyhöchä jäya'ayhajxy näje'e xñänömy cóogöch tyijy hänäjty hoy nga'a cudiuñ. Pero cab jaduñ tiöyyä. ⁸ Wiingjäya'ayhöchhajxy hänäjty xpiuhbejp, ja'a Diosmädia'agy hajxy hänäjty mäbøjpä wiingtuumjaty. Páadyhöch hajxy hänäjty xpiuhbety cooch mijts ja'a Diosmädia'agy hänäjty nyajwiingapx nyajwiinmädiaagø'oy. ⁹ Mänäajøch jim nhitiän maa mijtsän, cáboch hänäjty pøn nnäma'ay cooch hajxy xpiuhbédät xädø'øñhaam, hóyhöch hänäjty tii nja yajmaajiaty táhoocjaty. Hiḫ, xpiuhbéjpočhä jäya'ayhajxy hänäjty, ja'a Diosmädia'agy hajxy hänäjty mäbøjpä, ja'a hajxy hänäjty jim tsohm̄bä Macedonia-naaxooty. Xmióobiøch hajxy hänäjty tijátyhöch hänäjty nyajmaajiajpy. Y cáboch mijts mänaa nnäma'awa'añ cooch mijts xpiuhbédät xädø'øñhaam. ¹⁰ Tømiädiáacpøch jaduñ nebiä Jesucristo tiømiädia'aguiän. Cábochä xädø'øñ pøn nmäyujwa'añ jim maa mijts mdsäna'ayän Acaya-naaxooty. ¹¹ Coø pøn jaduñ miäná'anät cóogöch tyijy mijts nga'a tsoy, höhndaacp hajxy jaduñ. Ja'a Dios jaduñ najuøby cooch mijts njaanč tehñ chocy njaanč tehñ pia'häyoy.

¹²⁻¹³ Jii häna'c-hajxy näje'e wiädity mäwiinhøhm̄bä. Ja'a Jesucristäc tyijy hajxy tøø wyiinguexyii coo ja'a Diosmädia'agy hajxy yajwá'xät maa ja'a mäbøjpädøjc-hajxiän, neby højts ja'a Jesucristo tøø xwyiinguexiän coo højts ja'a Diosmädia'agy nyajwá'xät. Pero höhndaacp hajxy; cab hajxy tøyhajt tøø wyiinguexyii ja'a Jesucristäm. Paady hajxy jaduñ yhöhnda'agy coo hajxy yajcumaya'añ. ¹⁴⁻¹⁵ Yø'ø häna'c-hajxy, ja'a møjcu'ugong hajxy wyiindsøn'hajpy. Jaaya'ay hajxy jaduñ piahijxyp. Nnajuøøyyäm hajxy coo ja'a møjcu'ugong ñibiäda'agyii nebiä jaanč tehñ yhöybän, nebiä Diosmoonsän. Hoorä, cab jaduñ yhöy-yagjuøøñä coo ja'a møjcu'ugongä mioonsähajxy pijaatcø'oy, coo hajxy yhöhnda'agy cooc tyijy hajxy tøø wyiinguexyii ja'a Jesucristäm. Y coo hajxy jaduñ haxøøg jiäya'ayhaty, je'e hajxy jaduñ quiumädoowaamby.

¹⁶ Hoorä, chámhøch mijts nmägápcombä. Cab hajxy jaduñ mmäná'anät cóogöch tyijy tøø nguhhiñ, hóyhöch weeñtiä nja niguiumayii. Pero, pø mjaanč mänaamb hajxy jaduñ cóogöch tyijy tøø nguhhiñ, huuc tunä mayhajt hajxy, höøchä nmädia'agy hajxy weeñtiä huuc hamädoowhjtäc. Nhuuc nimiädia'agyijøch weeñtiä. Nhuuc niguiumayijøch weeñtiä. ¹⁷ Cáboch nmäna'añ coochä Dios ja'a cuhdujt tøø xmio'oy cooch jaduñ nniguiumayøjät. Jaduhñhöch nniguiumayii nebiä cuhhiimbän. ¹⁸ Hiḫ, ja'a jäya'ayhajxy nämaybä, miäniguiumáayyap hajxy tijaty hajxy yaa miøød hädaa yaabä naaxwiin, møød tijaty hajxy jaduñ tøø tiuñ. Jaduhñch höøchpä, weeñtiøch cham nmäniguiumayáanäbä tijátyhöch tøø nduumbä. ¹⁹ Jaduhñ mijts mjaanč tehñ ñibiäda'agyii nebiä jaanč tehñ jiajpän nebiä jaanč tehñ ñajuøøbiän. Paady mijts ja'a cuhhiimbähäna'cä miädia'agyhajxy mhamädoowhidaañä. Pero cab hajxy tøyhajt mjaanč jaty mjaanč najuø'oy. ²⁰ Hiḫ, mmee'xtujpy hajxy hoy ñäl'ä tijatiä, hoy mijts yø'ø häna'c-hajxy hoy ñebiatiä xjia häyoowhixy, yø'ø häna'c-hajxy höhndaacpä, yø'ø miädia'agy hajxy mjaanč tehñ yhamädoowhidáanäbä. Xyhanehm̄b mijts jaduñ nebiä moonsän. Y xñägáayyap xñähúucap mijts ja'a mxädø'øñ. Xwyiinhøhm̄b mijts yø'ø häna'c. Xpiejxp mijts yø'ø häna'c. Høxtä xquiojxp mijts yø'ø häna'c, y cab hajxy waamb mmäna'añ. Cab mijts yø'ø häna'c xyhixy nebiä jäya'ayän. ²¹ Pero højts, cab mijts jaduñ mänaa nhäyoowhixy neby mijts yø'ø häna'c xyhäyoowhixiän, yø'ø häna'c-hajxy höhndaacpä. Cab højts jaduñ njootmøjjä.

Chámhøch weeñtiä nhuuc mädia'agáangumbä nebiä cuhhiimbän. Tijaty yø'ø häna'c-hajxy miäniguiumáayyap, nmøødhøchä cuhdujt höøchpä cooch jaduñ nmäniguiumáayyabät. ²² Niguiumáayyap hajxy je'eguiøxpä coo hajxy yhebreojäya'ayä, coo ja'a Abraham hajxy jecy yphajty tieedyhajty møødä Israel. Pues jaanä jaduñch höøchpä, jaduñch nniänøømäbä coochä Abraham tøø nhaphajpä tøø ndeedyhajp. ²³ Jaduhñ hajxy ñiguiumáayyabä je'eguiøxpä cooc tyijy hajxy mioonsähadyii ja'a Jesucristøm. Pues xmioonsähajpøchä Jesucristo höøchpä. Y maas hóyhöch nduñ que yø'ø häna'c-hajxy tiuñ. Cooch jaduñ weeñtiä nniguiumayii, jaduñ yajmädoy nebiä cuhhiimbähajxy miädia'aguiän. Maas móc-høch tøø nduñ que yø'ø

hána'c-hajxy tøø tiuñ. Mayhóoc-høch tøø nyajtsumy tøø nyajmach. Ni pøn jaduhñ quia'a yajtsumy quia'a yajmachñä nébiøch tøø nyajtsumiän. Mayhóoc-høchä hána'c tøø xjiaanç tehñ wiobho'ogy. Mayhóoc-høchä hána'c ja'a weenjaty tøø xquia'a yagho'ogy. ²⁴ Mägooxc-hóoc-høchä judíoshajxy tøø xjiu'xy hii'xmajmocxmädaaxcø'ø. ²⁵ Tägøøghóoc-høchä hána'c tøø xwiopy paxyhaam. Tähóoc-høchä hána'c xjia ca'ch; xquiuhga'adsáambøch hajxy hánajty. Tägøøghóoc-høchä barco tøø xmiäma'adø'øy mejjiooty. Xjia møødnøøguguñhøch jaduhñ. Mänáajøchä barco tähóoc xmiägüiñän, tu'xøøch jiiby nhijty mejywyiing møød tu'tsuhñ. ²⁶ Mayhóoc-høchä yoñdiu'u tøø ndu'uyo'oy. Mayhóoc-høch ja weenjaty tøø nga'a nøøho'ogø'øy møjnøøguc. Tøøchä mee'tspädøjc mayhóoc nyohbiaady. Tøøchä nhamdsoo mägunaax mayhóoc xjia yagho'oga'añ. Tøøchä wiinghána'c xjia yagho'ogaambä; ca'a yhøøchä nmägunaaxhajxy je'e. Tøøch nwädity mäjahñdiuum jim cajptooty, møød jim pactuum, møød jim mejjiooty. Tøøchä hána'c mayhóoc xchaaçhtiuñ, ja'a hajxy jaduhñ mänaambä cooc tyijy hajxy miäböcy. ²⁷ Tøøchä tuung mayhóoc xyaghanuu'xø'øy; høxtä xyajtsaaçhpøjc-høch jaduhñ. Mayhóoc-høch tøø ndsunaxy jamia'ay jayhity. Tøøchä yuu mayhóoc nmänaxy nyajnaxy møødä tødsø'ø. Tøøch mayhóoc nhity jaguiay jayhu'ugy. Tøøchä tøøchpä mayhóoc nmänaxy nyajnaxy. Nja yajmaajiájpiøchä wit tucxy hánajty.

²⁸ Tøøch madiu'u ndsaachpøcy, pero cábøch jaduhñajtä ngøxy mädia'aga'añ. Je'eçh nmädia'agaamby coöchä mæbøjpädøjc jabom-jabom nnädajy nnämay wiinduhmçhajtøjc, pø hoy pø ween hajxy yhity. Hix, høøchä ngø'øjooty hajxy jaduhñ yhity. ²⁹ Pønä Diosmädia'agy hoy ca'a cudiunaamb, hoy hajxy jia mæböcy, nnäjootmayhájpjøch hajxy jaduhñ. Pøn jaduhñ cädiehby je'eguiøxpä coo tøø wyiinhøøñii, nnäjootma'adhájpiøchä hána'c ja'a tøø miäwiinhøøñäbä. ³⁰ Høøch, cábøch nyajcumaya'añ. Pero coöch häxøpy nyajcumaya'añ, je'eçh häxøpy nyajniguiumayáanp coöchä häyohn mayhóoc tøø nmänaxy tøø nyajnaxy. ³¹ Ja'a Dióshøch jaduhñ xñajuøøby coöch nga'a hønnda'agy. Ja'a Jesucristo ja'a Tieedy je'e. Tsøgå Dios hajxy cøjxta'axiøø wiingudsähgøøyyäm. Ja'a Jesucristo hajxy nWiindsøn'hájtäm. ³² Mänäa ja'a Aretas hánajty tiuñän gobiernä, mänítøchä mioonsä xjia yajmadsaañ jim maa ja'a cajpt jaduhñ xiøhatiän Damasco. Juhmuu'tswädi-tiä cajpt hánajty jaduhñ. Jia pädaac ja'a hadänaabiä hajxy majatiä tægø'øwøødiaact nébiøch jaduhñ nga'a pädsømat. ³³ Pero päyø'c-høch. Ja'a nmägu'ughajpøchhajxy hoy xquiuhdøøñaxy cachjooty maa ja'a muuçh hánajty jiuñän.

12

¹ Cab jaduhñ yhäxø'øy coöch nyajcumáyät. Pero nébiøch cham nmädia'aga'añän, jaduhñ yajmädowa'añ nébiøch nyajcumaya'añän. Je'eçh cham nmädia'agaamby nebiát-yhøchä Jesucristo hijxtahñd tøø xyajwiinhixiän. ²⁻³ Nmøødhíjpjøchä Jesucristo tu'ugmädia'agy. Tøø yhiñä majmactsjumøjt coöchä Dios jim tøø xyaghoy tsajpootyp maa ja'a wyiinduumän. Cábøch nnajuø'øy pø ni'xhaam pø copc-háamhøch jim nhooyy, o pø juøhñdyhaam. Ja'a Dios jaduhñ nidiuhñ najuøøby. ⁴ Madiú'ujøchä hoy-yagjuøøñájatypä jim nmädooyy tsajpootyp. Cábøchä cuhdujt nmøødä coöch nmädiaactägátsät. ⁵ Coo wiinghána'c häxøpy jim tøø yhoy tsajpootyp, mänítøch häxøpy nmøjpäda'aga'añ. Pero høøch, cábøch hamdsoo nniguiumaya'añii. Jagóoyyøch nmädia'aga'añ nebiát-yhøchä häyohn tøø nmänaxy tøø nyajnaxy. ⁶ Nmøødhøchä cuhdujt jaduhñ coöch nmädiá'agät nebiát-yhøchä Dios tøø nmøødtuñ. Hix, tøyhájtøchä Dios jaduhñ tøø nmøødtuñ. Cábøch nmädia'aga'añ coöch jim nhooyy tsajpootyp, je'eguiøxpä coöchä njoot quia'a tsooy coöch pøn xmiøjpädá'agät. Coöchä jäya'ayhajxy xyhíxät coöch hoy njäya'ayhaty, coöch hajxy xmiädówät coöch hoy ngapxy nmädia'agy, mänítøch hajxy xquiумáyät.

⁷ Jaanç tehñ yhoy-yagjuøøñájatyhøch jim nwiinhijxy tsajpootyp. Pero cabä Dios ja'a jioot chocy coöch nniguiumayøøjät. Paadiä Dios miänään coöchä møjcu'ugong ja'a tsaachpä xyajpáadät, jaduhñhøch hamdsoo nga'a niguiumayøøjät. ⁸ Tägøøghóoc-høchä Jesucristo nja mänuu'xtaacy coöch cu xyajnáhwaach. ⁹ Mänítøch xyhadsooyy: "Njaanç tehñ chojpy njaanç tehñ pia'häyóobiøch miich. Páadyhøch miichä mdsaaçpä nga'a

yajnáhwa'adsa'añ, nyajcähxø'ogáambiøch jaduhñ coo miičh mduñ ja'a høøčhä nmä-jaagøxpä", nómhøčhä Jesucristo xñämaayy. Xoondáacpøch jaduhñ coočhä ndsaachpä xquia'a yajnáhwa'adsaannä, je'eguiøxpä cooč tøø xñäma'ay cóogøch xyajtuna'añ ja'a miäjaagøxpä. ¹⁰ Xoondáacpøch jaduhñ coočhä Jesucristo xyajtuñ, hóyhøčhä tsaachpä nja paady madiu'u. Náxyhøčhä häna'c xyhäyoowhixy. Náxyhøch cøxiä wiinä nyajmaajiaty. Náxyhøčhä häna'c xchaačhtiuñ ja'a Diosmädia'agyquiøxpä. Náxyhøčhä häyohn nmänaxy nyajnaxy. Pero cábøch nnä'ägä møjpadä'agy cooč jaduhñ njaty nhabety. Hix, cooč jaduhñ njaty nhabety, cähxø'p jaduhñ cooč tii nga'a tuñ ja'a nhamdsoo mäjaaháamhøch; ja'a Jesucristo miäjaaháamhøch jaduhñ nduñ.

¹¹ Hoorä, hóyhøch tii nga'a ja jada'añ hamdsoo, nmaas jájpiøch høøčh quejee yø'ø häna'c-hajxy, yø'ø hajxy jaduhñ niñänøømäbä cooc tyijy hajxy Dyioswiinguexiä. Cábac tyijy pøn jaduhñ jiaty nébiäc hajxy jiatian. Y cooč yø'ø häna'c-hajxy jaduhñ tøø xñähwaambety, tiičh mijts jaduhñ coo tøø xquia'a nähgapxtu'udy. Cooch mijts tøø xquia'a nähgapxtu'udy, páadyhøch cham hamdsoo nniñähgapxtu'udyii. Jaduhñ weenjaty yajmädooy nebiä yajcumayaambän. ¹² Mänáajøch jim nhitiän maa mijtsän, mänithøčhä hijxtahnd madiu'u nyajcähxø'cy hoy-yagjuøøñajatypä. Ja'a Diosmäjaaháamhøch jaduhñ nyajcähxø'cy. Nyajcähxø'c-høch jaduhñ coočhä Dios jaduhñ tøyhajt tøø xwyiinguexy. Mee'xtújpøch hánajty. ¹³ Jaanč tehñ yhóyhøch nduñ hoy miädyii tsajtøgootiä. Jaaná jaduhñhøch jim hoy nduumbä maa mijtsä mdsajtøjcän. Pero je'e mijts mga'a hojiäwøøby cooč mijtsä xädø'øñ tøø nga'a mäyujwa'añ nébiøch wiingtuumjaty nyujwa'añän. Jaanč tehñ wyiingä wiinmahñdy hajxy mmøødä. Pø tøøch mijts nyagjootma'ady, høøch hajxy huuc méé'xäc.

¹⁴ Metsc-hóoc-høch jim tøø nhooñä maa mijtsän. Miädägøøghóocpøch cham nnøcxáangumbä. Cáboch mijts tii nmäyujwa'ana'añ. Cábočhä njoot chocy coo hajxy tii xmió'owät. Jaduhñ mijts ndsocy nebiä hamdsoo huungpän, paady mijts jaduhñ nbuhbeda'añ. Pero cáboch nmäna'añ cooč mijts xpiuhbejtägätsät xädø'øñhaam. ¹⁵ Tøøchhä njoot hamuumdu'joot nbäda'agy maa mijtsän coo mijts nbuhbedät hoy ñejpiä, hóyhøch cøxypänejpiä cu nja jat cu nja habet maa mijtsøxpän. Njaanč tehñ chojpy mijts jaduhñ; pätiidä mijts jaduhñ coo xquia'a tsojtägach.

¹⁶ Mänáajøch jim nhoyyän maa mijtsän, cab mijtsä xädø'øñ nmäyujwaañ. Mnajuøøby hajxy jaduhñ, tuhmds. Pero näje'e mijts jaduhñ mmäna'añ cóogøch tyijy mijts tøø nwiinhøøñ ¹⁷ mänáajøchhä nmägu'ughajpähajxy jim nguexiän maa mijtsän xädø'øñyajmujpä. Jaduhñägäts tyijy mijts tøø nmämeečh. Pero cab jaduhñ tiøyyä. ¹⁸ Mänáajøchhä hermano Titohajxy jim nguexiän maa mijtsän møødä mägu'ughajpä tu'ugpä, ni je'e mijts xquia'a mämeé'tspä. Hix, jaduhñä hermano Tito howyihinmahñdy hajxy mióødäbä nébiøch nmøødän. Hoguiuhdujt hajxy mióødäbä nébiøch nmøødän.

¹⁹ Jaduhñ mijtsäda'a mmäna'añhaty cooc tyijy højts nja wi'i ñiñähgapxtu'uda'añii maa mijtsøxpän. Pero cab jaduhñ tiøyyä. Ja'a Dios højts xyhijxp coo højts ja'a Jesucristo tu'ugmädia'agy nmøødhity. Mägu'ughajpädøjc, paady højts mijts ja'a Diosmädia'agy jaduhñ nyajwiingapxø'øy, chojpy højtsä njoot jaduhñ coo mijts hamuumdu'joot mjaac mäbøgät. ²⁰ Cooch jim nnøcxtägätsät maa mijtsän, mänitøch jootcujc nhidät pø hoy hajxy hánajty mwädity. Jaduhñ hajxy jootcujc mhíjpät ja'a høøchcøxpä. Pero pø cab hajxy hánajty hoy mwädity, jootmayhädäbøch jaduhñ. Jaaná jaduhñ mijts mjootmayhájpat. Je'ečh jaduhñ cham nnädaj nnämaaby. Je'ečh jaduhñ nnänøømby ja'a ca'a howiädit, pø mnimiädsibøøyyäp hajxy hánajty, pø cab hajxy hánajty myajniyajmädsogyii, pø mnimiäjootmä'täp hajxy hánajty, pø mnimiädsiphájtpäp hajxy hánajty, pø mniwyiingapxéjtpäp hajxy hánajty, pø mniñänøømäp hajxy hánajty cøxypä waamb, pø mniguiumäyyäp hajxy hánajty, pø mdsipyagjájtpäp hajxy hánajty. ²¹ Pø jaduhñ hajxy hánajty mjaanč jootcø'øy cooč jim nnøcxtägätsät maa mijtsän, wéñdøčhä Dios weenjaty xyajtsähdiúnät maa mijtsøxpän. Je'ečh cham nnädaj nnämaaby. Nnäjootmayhädäbøch hajxy je'e, pønatiä yhaxøøgcuhdujt hajxy hánajty tøø quia'a najtshixø'øy. Je'ečh jaduhñ nnänøømby coo wiingto'oxiøjc hajxy piawädity tehngajnä.

13

¹ Miädägøøghóocpøch jim̄ nnøcxa'añ maa mijtsän. Jaduhñä cuhdujt myiñ, coo hajxy hänajty pøn̄ mnäxø'øwø'øwa'añ, tsipcøxpä testigo hajxy myajcähxø'øgät mejtstägøøg. ² Mänäajøch jim̄ nhuug hoobiän maa mijtsän ja'a miämetsc-hoocpä, mänítøch hajxy nyajcuhojøøyy coo hajxy haxøøg quia'a jootcøñät, pøn̄jaty hänajty haxøøgwädijp. Y chámhøch mijts jadähooc nnäma'awáangumbä nägøxiä coo hajxy mga'a haxøøgwädítät. Y pø je'enä hajxy hänajty mhaxøøgwädity cooch jim̄ nnøcxtägátsät maa mijtsän, tsipcøxpøch mijts nøcxy nyajcumädowa'añ. ³ Jadúhñhøch nyajcähxø'øga'añ coochä Jesucristo miädia'agy tøyhajt nyajnajxä. Haa ca'a, jadúhñhøch mijts tøø xyhuuc nāmaabiä cooch jaduhñ nyajcähxø'øgät. Hiç, møcmäjaahaamä Jesucristo hajxy xyajcumädówät coo hajxy hoy mga'a wädítät. ⁴ Coo ja'a Jesucristo miøjpahbejtä cruzcøxp, cabä miøcmäjaa hänajty yajcähxø'øgy. Pero coo jiuypjøjtägajch, coo jim̄ ñøcxtägajch maa ja'a Tieediän, jímäts jaduhñ yhiñä ja'a Tieediä miøcmäjaahaam. Nebiä Jesucristo ja'a miøcmäjaa hijty quia'a yajcähxø'øguiän, jaduhñ højts mäjaa nga'a móødäbä hamdsoo. Pero coo højtsä Jesucristo nmøødhity tu'ugmädia'agy, paady højts mijts hoy nhane'ema'añ ja'a Dios ja'a miøcmäjaahaam.

⁵ Huuc niñajuø'øwøø hajxy hamdsoo. Coo ja'a Jesucristo ja'a miädia'agy hajxy hoy mbanøcxät, jaduhñ hajxy myajnajjuø'øwät coo ja'a Jesucristo hajxy tøyhajt mjaançh møødhity tu'ugmädia'agy. Pero coo hajxy hoy mga'a panøcxät, cabä Jesucristo hajxy tøyhajt mmøødhídät tu'ugmädia'agy. ⁶ Choipy højtsä njoot coo hajxy mnajuø'øwät coo højtsä Jesucristo tøyhajt nmøødhity tu'ugmädia'agy. Cab højts jaduhñ nhøhñda'agy. ⁷ Nmānuu'xtaacypy højtsä Dios coo hajxy hoy mwädítät, coo hajxy haxøøg mga'a jäya'ayhädät. Pø mwädijp hajxy hänajty hoy coo højts jim̄ nnøcxtägátsät maa mijtsän, cab højts hänajty nyajcähxø'øga'añ coo højtsä Jesucristo ja'a cuhdujt tøø xmio'oy coo højts mijts nyajcumädówät. Y coo højts jaduhñ nga'a yajcähxø'øgät coo højtsä Jesucristo ja'a cuhdujt jaduhñ tøø xmio'oy, cab jaduhñ ñejpiä. Je'e højtsä njoot choipy coo hajxy hoy mwädítät. ⁸ Pø mjaançh wädijp hajxy hänajty hoy coo højts jim̄ nnøcxät, cab højts mijts hänajty waamb nnäma'awa'añ. Choipy højtsä njoot coo hajxy tøyhajt hoy mwädítät. Pero pø cab hajxy hänajty tøyhajt hoy mwädity, mänit højts mijts mæbøcy nhoja'añ. ⁹ Coo hajxy hoy mwädítät, xoondá'agäp højts jaduhñ. Cab højts jaduhñ nyajcähxø'øgät coo højtsä Jesucristo ja'a cuhdujt hänajty tøø xmio'oy coo højts mijts jaduhñ nyajcumädówät. Nmānuu'xtaacypy højtsä Dios jaduhñ coo ja'a mhaxøøgcuhdujt hajxy mgøxy najtshixø'øwät, coo ja'a hoguiuhdujt hajxy hamuumdu'joot mjaac panøcxät tehngajñä. ¹⁰ Páadyhøch mijts cham̄ weenjaty nhojy nocyhaam, jadúhñhøchä njoot chocy coo hajxy hoy mwädítät. Ja'a Jesucristøchä cuhdujt jaduhñ tøø xmio'oy maa mijtsøxpän, weenä miädia'agy hajxy maas hoy mjaac mæbøjcä. Cabä Jesucristo jioot chocy coo hajxy mdudägóyyät. Y pø mjaançh wädijp hajxy hänajty hoy cooch jim̄ nnøcxtägátsät maa mijtsän, cábøch mijts hänajty waamb nnäma'awa'añ. Pø caj, mänit højts mijts mæbøcy nyajcumädówät.

¹¹ Hoorä, mägu'ughajpædøjc, chámhøch jaduhñ nyajmayaannä maa hajxy cham̄ nmägapy nhane'emiän. Huuc cudiún hajxy jaduhñ nébiøch cham̄ nnäma'ayän. Yaghoyø'øw ja'a mdu'u hajxy. Ca'a haxøøgtu'u hajxy mbanøcxnä. Tsøc hajxy jaduhñ nimiøødhíjtäm tu'ugmädia'agy. Cab hajxy tii myajtsip myajma'adøøñät. Jaduhñä Dios hajxy xmiøødhíjnät. Xchójcäm ja'a Dios hajxy. Choipiä jioot jaduhñ coo hajxy jootcuyc nhíjtämät. ¹² Mniyajpoo'xøøjäp hajxy hamuumdu'joot, ween jaduhñ quiähxø'øgy coo ja'a Diosmädia'agy hajxy mmæbøcy. ¹³ Xyajpoo'xp mijtsä hermanodøjc-hajxy yaabä, ja'a Diosmädia'agy hajxy yaa mæbøjpä.

¹⁴ Weenä Jesucristo hajxy nägøxiä xmio'oy ja'a hoyhajt ja'a weenhajt. Je'e hajxy nWiindsøn̄híjtäm. Weenä Dios hajxy xchójcäm homiänaajä. Weenä Dioshespíritu hajxy xmiøødhíjtäm nägøxiä. Amén.

Gálatas

¹⁻² Høøch Pablo, hädaa nócyhøch nhädiuumby møødä hermanohajxy yaabä nägøxiä. Mijts hädaa nocy nyajnäguejxyp, mijts hermanodøjc jim tsänaabiä Galacia. Cab hajxy mmäná'anät coöch jäya'ay tøø xwyiinguexy. Jesucristøch xwyiinguejx møødä Dios ja'a nDeedyhájtäm. Jaayá'ayädsä Jesucristo yagjujypjøjc. ³ Weenä Dios ja'a nDeedyhájtäm hajxy xmio'oy ja'a hoyhajt ja'a weenhajt møødä Jesucristo ja'a nWiindsøn'hájtäm. ⁴ Jaaya'ay hajxy xñähho'túutäm ja'a nbojpä ngädieeyhájtäm nebiä Dios ja'a nDeedyhájtäm tøø miäna'añän. Paadiä Jesucristo hajxy xñähho'túutäm nebiä haxøøgpä hajxy yaa xñähwáatsämät hädaa yaabä naaxwiin. ⁵ Tsögä Dios hajxy møj jaançh pädaacäm cøjxta'axiøø. Amén.

⁶ Hermanodøjc, Dios hajxy xmiøjyáaxäm je'eguiøxpä coo ja'a Jesucristo hajxy xchójcäm. Pero tøøch nmädoyhaty coo ja'a Diosmädia'agy hajxy mga'a panøcxnä je'eguiøxpä coo ja'a wiingmädia'agy hajxy tøø mbadu'ubøjnä. Nyagjuøøbiøch jaduhñ coo ja'a Dios hajxy paquiä tøø mnajtshixøøñä. ⁷ Pero cabä wiingmädia'agy jii neby hajxy mnähwá'adsät. Jaduhñä häna'c-hajxy näje'e wiädity yajnähixøøbiä. Xjia jøj-capxø'øwaamb mijts jaduhñ. Ja'a hønnda'agymiädia'agy mijts hajxy xyajnähixøøby ja'a Jesucristocøxpä. ⁸⁻⁹ Tøøch mijts jaduhñ nhuuc nämaabiä, y chaaçh jadähooc nmänáangumbä, tøøch mijts ja'a Diosmädia'agy nyajnähixø'øby neby hajxy jaduhñ mnähwá'adsät. Pero coo mijts pøn wiingmädia'agy xyajnähixø'øwät, jiby nøcxy quia'awa'añ haxøøgtuum, hoy piønä, hoy yhøøchä, hoy jim jia tsoøn tsajpootyp.

¹⁰ Ndsøjpiøch coöchä Dios xquiumáyät. Cábøch ndsocy coöchä cu'ughajxy xquiumáyät. Coöch häxøpy jaduhñ ndsocy, cábøchä Jesucristo häxøpy hoy nbanøcxnä.

¹¹⁻¹² Hermanodøjc, huuc wiinjuø'øw hajxy jaduhñ, hädaa mädiä'agyhøch mijts nyajwiingapxøøbiä, ja'a Jesucristøch xmioooy; ca'a jiäya'ayä xmioooy hädaa yaabä naaxwiimbä.

¹³ Tøø hajxy nmädoyhaty nébyhøch hijty nwädity, mänáajøchä judíos miädia'agy hajxy hänajty nbanøcxänä. Mnajuøøby hajxy nébyhøchä jäya'ayhajxy hijty ndsaaçhtiuñ nägø'ø nädecypiä, ja'a Diosmädia'agy hajxy panøcxpä. Páadyhøch hijty ndsaaçhtiuñ nebiä Diosmädia'agy hajxy jaduhñ ñajtshixø'øwät. ¹⁴ Maa yø'ø judíos miädia'agyhajxy myiñän, maas hóyhøch hijty nbanøcxy. Cábøch nmägunaax pøn hijty xyhabexy, ja'a høøch nmädu'ugyee'taact. Hix, maas pedyijjøch hijty ngudiuñ ja'a nhap ndeedy quiuhdujthajxy ja'a jecypiä. ¹⁵ Pero tøøchä Dios hijty xwyiimbiy, cáhnøch hänajty nmiñ nga'ayñä. Páadyhøch tøø xmiøjya'axy coöch xjiaançh tehñ chocy. ¹⁶ Mänitä Dios miänaañ coöchä yHuung nhixyhájtät, nébiøchä miädia'agy jaduhñ nyajwiingapxøøyyät ja'a hajxy ca'a judiøspä, neby hajxy jaduhñ ñähwá'adsät. Coöch jaduhñ njajty, cábøch hoy pøn tøø nyajmøødmädia'agy, ¹⁷ ni ja'a hermanodøjc-hajxy jim hijpä Jerusalén, ja'a hajxy hijty tøø wyiinguexyíjábä ja'a Dios. Pero jimhøch nnøcxtøøyy Arabianaaxooty. Mänitøch nwiimbijty, nmejtstägajch maa ja'a cajpt xiøhatiän Damasco.

¹⁸ Coo tægøøgjomøjt hänajty tøø ñajxnä, mänitøch jim nnøcxy Jerusalén. Jimhøchä Pedro hoy nhixyhaty. Mänitøch nmøødhijty majmocxxøø. ¹⁹ Jimhøchä Jacobo nhixyhajpä ja'a nWiindsøn'hájtämä piuhya'ay. Pero cábøchä hermano wiingpä nhijxy, ja'a wiinguexypä. ²⁰ Tehñ tiøyhajt jaduhñ nébiøch cham njaayän. Cábøch nhønnda'agy. Diøshøch jaduhñ xhijxp coöch nga'a hønnda'agy.

²¹ Mänitøch hoy nwädity Sirianaaxooty møødä Cilicanaaxooty. ²² Ja'a hermanodøjc-hajxy jim hijpä Judeanaaxooty, ja'a Jesucristo miädia'agy hajxy hänajty panøcxäbä, cáhnøch hajxy hänajty nhixyhatyñä. ²³ Jagooyä hajxy hänajty miädooyä coöchä Diosmädia'agy hänajty nyajwa'xnä. Tøø hajxy hijty miädoyhaty coöchä hermanohajxy hijty ndsaaçhtiuñ, nebiä Diosmädia'agy hajxy ñajtshixø'øwät. Pero coöchä

Diosmädia'agy hänajty nyajwa'xnä hөөчпә, ²⁴ paadiä Dios hajxy miooyy Dioscujú'uyäp ja'a hөөчcөxpä.

2

¹ Coo majmactsjomöjt hänajty tөө ñajxnä, mänitöch hoy ngoo'nä Jerusalén mөөdä Bernabé mөөdä Tito. ² Dióshöch jim xquiejx. Jimhөchä Jacobo nmөөdhamugөөyy hamee'ch mөөdä Pedro mөөdä Juan. Jim hajxy hänajty quiopc-haty maa ja'a hermanodöjc-hajxiän. Mänitöch hajxy nyajmөөdmädiaacy nebiátyhөchä jäya'ay ja'a Diosmädia'agy hajxy nyajwiingapxө'öy, ja'a hajxy ca'a judíospä, neby hajxy hoy ñähwá'adsät. Páadyhөchä copc-hajpädöjc jawyiin nyajmөөdmädiaacy, nébiöch hajxy jaduhñ xquia'a jöjcapxө'öwät. ³⁻⁵ Xjiöjpögөөyy höjts jaduhñ; cab höjts waamb xñämaayy. Tөө häna'c-hajxy näje'e yajtägө'öy maa ja'a hermanodöjc-hajxiän; nom hajxy hänajty miäna'añ cooc tyjy hajxy pianөcpxä; pero cab hajxy hänajty töyhajt pianөcxy. Höjts hajxy xjia jöjcapxө'öwaan. Coö höjtsä Jesucristo miädia'agy hänajty nbanөcxänä, cab höjtsä judíospä cuhdujt hänajty nbanөcxnä. Pero cab höjts nmөjpädaacy, neby höjts mijts hoy njaac yajwiingapxө'öwät ja'a töyhajt, nej mijts jaduhñ hoy mnähwá'adsät. Jaduhñ hajxy hänajty jia mänaambä coö ja'a Tito ween yajcircuncidarhaty nebiä judíoshajxy quiuhdujthatiän, hoyyä Tito hänajty quia'a ja judíospä. Cabä copc-hajpähajxy miänaañ coö ja'a Tito yajcircuncidarhädät.

⁶⁻⁹ Cábөchä Jacobohajxy hänajty nmөjpäda'agy, hoy hajxy hänajty tөө jia päda'agyii copc-hajpä. Hix, cabä Dios hajxy xmiөjpädaácäm, hoyyä möjtuunğ hajxy nja mөөdhájtäm. Mänitöch hajxy xyhixyhajty coöchä Dios hänajty tөө xwyiinguexy, coöchä miädia'agy nyajwiingapxө'öyyät ja'a ca'a judíospähajxy, nebiä Pedro hänajty tөө wyiinguexyijän coö ja'a judíoshajxy yajwiingapxө'öwät. Mänit höjts ja'a copc-hajpähajxy xjiöjpögөөyy mөөdä Bernabé. Mänit höjts tu'ugmädia'agy nmähmөөyy coö höjts nwädítät maa ja'a ca'a judíospän, chaads häna'c-hajxy jaduhñ wiädítät maa ja'a judíospän. Y cábөch hajxy nej xyhanehmy. ¹⁰ Jagooyyä höjts xñämaayy coö höjtsä häyoobäya'ayhajxy nbuhbédät. Jaduhñch nnä'ägä cuhdujthaty.

¹¹⁻¹⁴ Mänitөchä Bernabé nmөөdhädaacy maa ja'a cajpt xiöhatiän Antioquía. Cujecy höjtsä Pedro xpiagädaacy. Mänitä Pedro tiägөөyy caamiujpä mөөdä hermanodöjc ja'a ca'a judíospä. Mänitä Jacobo miägu'ughajpähajxy näje'e quiädaacpä. Mänitä Pedro quia'a mөөdcaamiújcänä ja'a hajxy ca'a judíospä. Hix, chähgөөbiä Pedro hänajty coö ja'a hermanodöjc-hajxy miädoyhädät jim Jerusalén, ja'a hajxy hänajty jaac panөcpxä ja'a judíoscuhdujt. Mänitä Bernabé piäjatcөөbiä mөөdä hermanodöjc-hajxy nägөxiä ja'a judíos, coö hajxy quia'a mөөdcaamiugaannä ja'a hajxy ca'a judíospä. Hix, mejtstu'u ja'a wyiinmahñdyhajxy hänajty. Y coöch nhijxy neby hajxy hänajty jiatcө'öyän, coodsä töyhajt hajxy quia'a panөcxnä, ja'a Diosmädia'agy, mänitөchä Pedro njöjcuhojөөyy ja'a hermanodöjc wyiinduumhajxy. “Jue'e miich, mjudíos miich, y caj miich hijty nbanөcxy ja'a judíoscuhdujt. Caj miichä cuhdujt mnä'ägä mөөdä coö miichä wiinghana'c mädsibө'öbä mnämä'awät coö hajxy pianөcxät ja'a judíoscuhdujt.” Páadyhөchä Pedro jaduhñ nhojy coö je'e ja'a pojpä hänajty miөөdä.

¹⁵ Jue'e höjtshájtäm, judíos höjts nmiin ngáhwäm. Caj tyjy höjts ngahwiindöyyä nebiä wiingjäya'ayhajxiän. ¹⁶ Pero, paadiä Dios hajxy xpiädaácäm hawa'adstuum je'eguiөxpä coö ja'a Jesucristo miädia'agy hajxy hamuumdu'joot nmäböjcäm, ca'a jie'eguiөxpä coö hajxy ngudiúunäm nebiä jecyquiuhdujt myiñän. Coö ja'a Jesucristo miädia'agy mga'a mäböjcät, cabä Dios xpiädá'agät hawa'adstuum, hoy mja cudiunñ nebiä jecyquiuhdujt myiñän.

¹⁷ Pero tsөc mänáanäm, coö jaduhñ quiähxө'ögät coö höjts ngahwiindöyyäbä, hoyyä Jesucristo miädia'agy nja mäböjcäm, cab hajxy nmänáanämät cooc tyjy ja'a Jesucristo tөө xyajtu'udägöoyyäm. ¹⁸ Coö höjtsä jecyquiuhdujt nnajtshixө'öyyämät, cab jaduhñ yhooyä coö hajxy jadähooc nbadu'uböjcämät. Hix, cähxө'ögäp jaduhñ coö höjts ja'a pojpä cädieey nmөөdhájtäm. ¹⁹ Pero hөөch, cábөchä jecyquiuhdujt nbanөcxnä. Tөөch

nnajtshixøøñä, nébiøchä Dios hamuumdu'joot jaduhñ nbanøcxnät. ²⁰ Coo ja'a Jesucristo hajxy tøø xñähho'túutäm cruzcøxp, páadyhøch je'e hamuumdu'joot nbanøcxy; cábøch nhamdsoo wiinmahñdy nyajtunaannä. Tu'ugmädiá'agyhøchä Jesucristo xmiøødhijnä. Xchójpøch je'eduhñ, páadyhøch tøø xñähho'tu'udy. ²¹ Paadiä Dios hajxy xpiädáacäm hawa'adstuum je'eguiøxpä coo ja'a Jesucristo miädiá'agy hajxy nmäbøjcäm; ca'a jie'eguiøxpä coo ja'a jecyquihdujt hajxy ngudiúunäm. Coo häxøpy quia'a jaduhñä, xiøøbä ja'a Cristo häxøpy tøø ñä'a ho'ogy. Paady, cábøchä hoyhajt nnajtshixø'øwa'añ mädyijøchä Dios tøø xmiø'oy.

3

¹⁻⁵ Mijts hermanodøjc, nej, mguhmañøøby hajxy jaduhñä coo ja'a Diosmädiá'agy hajxy mga'a panøcxaannä. Nej, mbanøcxtägatsaambiä jecyquihdujt hajxy jadähooçä. Mnajuøøby hajxy coo ja'a Jesucristo hajxy tøø xñähho'túutäm. Coo mijtsä Jesucristo miädiá'agy tøø mmäbøjcä, paadiä Dios ja'a yhEspíritu hajxy tøø xmiø'oy, paadiä hoy-yagjuøøñäjatypä tøø yajnaxy maa mijtsän. Ca'a jie'eguiøxpä coo ja'a jecyquihdujt hajxy hijty mgudiuñ. Pero cabä ndijy ja'a Diosmädiá'agy hajxy tøyhajt nnajtshixø'øwa'añ.

⁶ Ja'a Abraham, ja'a hajxy nhaphájtäm ja'a hajxy ndeedyhájtämbä, miäbøjc je'e ja'a Diosmädiá'agy. Paadiä piädaacä hawa'adstuum. ⁷ Y coo højtsä Diosmädiá'agy nbamäbøjcämät, mänitä Dios hajxy xpiädáacämät nebiä Abraham yhap yhocän. Mänit højts xpiädáacänät hawa'adstuum. ⁸ Jéquiänä Dios ja'a Abraham ñämaayy: “Miičcøx-pøchä jäya'ayhajxy nbuhbeda'añ nägøxiä ja'a wiinduhmyhagajtpä je'eguiøxpä coo miič tøø mmäbøcy.” Jiiby jaduhñ myiñ cujaay maa ja'a Diosmädiá'aguiän. Jaduhñ hajxy nyajnajuøøyyäm coo ja'a Dios hajxy xpiäda'agáañäm hawa'adstuum pønjaty mäbøjp, hoy hajxy quia'a ja judfosä. ⁹ Entonces, ja'a hajxy mäbøjpä, jaduhñ hajxy piuhbedyii nebiä Abraham jecy piuhbejtän.

¹⁰ Ja'a hajxy jaduhñ mänaambä cooc tyijy hajxy ñähwa'adsa'añ je'eguiøxpä coo ja'a jecyquihdujt hajxy quiudiuñ, haxøøgtuum hajxy je'e piäda'aga'añii. Jaduhñ jiiby myiñ cujaay maa ja'a jecyquihdujtän, “Haxøøgtuum piäda'aga'añii pønjaty hoy ca'a cudiumb nebiaty hädaa libro xyhanéhmäm.” ¹¹ Jaduhñ jiiby myiimbä cujaay maa ja'a Diosmädiá'aguiän: “Coo ja'a Diosmädiá'agy hajxy nmäbøjcämät, mänitä Dios hajxy xyajnähwáatsämät.” Ca'a jie'eguiøxpä cooc tyijy hajxy ngudiúunäm ja'a jecyquihdujt. ¹² Pero jaduhñä jecyquihdujt miäna'añ: “Pønä jecyquihdujt cudiumb, hawa'adstuum piäda'aga'añii.”

¹³ Coodsä jecyquihdujt hajxy hijty hoy nga'a cudiuñänäm, haxøøgtuumä Dios hajxy hijty xpiäda'agáañäm. Pero xñäxúu'tsämä Dios hajxy jaduhñ; paadiä Jesucristo hajxy xñähho'túutäm; paadiä Dios hajxy xpiädáacäm hawa'adstuum. Jaduhñä jiiby myiñ cujaay maa ja'a Diosmädiá'aguiän: “Pøn möjpbahbéjtäp quepyquiøxp, tøø hänäjty piäda'agyii haxøøgtuum.” ¹⁴ Paadiä Jesucristo hajxy tøø xñähho'túutäm, nebiä jäya'ayhajxy jaduhñ piuhbéjtäbät, ja'a hajxy ca'a judíospä, nebiä Abraham jecy piuhbejtän. Y coo hajxy nmäbøjcämät, mänitä Dios ja'a yhEspíritu hajxy xmiø'owáañäm nägøxiä neby hajxy jecy xyajwiinwaanøøyyäm cooc hajxy xmiø'owáañäm.

¹⁵ Hermanodøjc, tsøg hajxy mädiáacäm neby hajxy yaa nguhdujthájtäm hädaa yaabä naaxwiin. Coo pøn tii yajcuhdúgät maa ja'a hagujtøjcän, coo fyirmarhadät, ni pøn jaduhñ quia'a yajtägätsät, ni quia'a mäná'anät coo quia'a hoyyä. ¹⁶ Bueno, coo ja'a Dios ja'a Abraham miøødyajcuhdujcy cooc hoy miänaajä piuhbeda'añ, jaduhñ miänaambä cooc ja'a Abraham yhap yhoc miøødyajcuhdujcbä. Jaduhñ jiiby myiñ cujaay maa ja'a Diosmädiá'aguiän. (Cab jaduhñ myiñ cooc hajxy nämay miøødyajcuhdujcbä.) Coo jaduhñ miäna'añ: “Abraham yhap yhoc”, ja'a Jesucristo jaduhñ nänøømäp. ¹⁷ Y coo mädaaxmägo'xcuhii'xmajcjomøjt hänäjty tøø ñaxy, mänitä jecyquihdujt piädaacä. Pero cab jaduhñ yajtägajch nebiä Dios ja'a Abraham hänäjty tøø miøødyajcuhduquiän. ¹⁸ Coo häxøpy quia'a tøyhajtä jaduhñ, cab häxøpy tiuñ nebiä Dios jecy yajcuhdujquiän.

¹⁹ Paadiä Dios ja'a jecyquihdujt yejcy neby jaduñ quiähx'ogät coo ja'a pojpä cädieey hajxy nmøødhájtäm. Pero coo ja'a Jesucristo yaa tøø yhoy hädaa yaabä naaxwiin, ja'a hänajty tøø miøødyajcuhdugyíjábä, cabä jecyquihdujt jaduñ tiunaannä. Bueno, coo ja'a Dios ja'a jecyquihdujt piädaacy, mänitä mioonsä tsajpootypä ja'a Moisés hoy mio'oy. Mänitä Moisés jiøyejnajxy. ²⁰ Pero hamdsoo ja'a Dios ja'a Abraham miøødyajcuhdujcy; cabä jiøyejnajxpä jaduñ ñä'ä yajtuuñ.

²¹ Cab hajxy nmänáañämät coo ja'a jecyquihdujt yajtägajch nebiä Dios hänajty tøø yajcuhduquiän. Coo ja'a Dios häxøpy tøø miäna'añ coo hajxy cu nnähwáatsäm maa ja'a jecyquihdujtän, pues tøø ja'a jecyquihdujt hajxy häxøpy xyajnhwáatsäm ja'a nbojpä ngädieeyhájtäm. ²² Ja'a Diosmädia'agy jaduñ mänaamb coo hajxy nägøxiä nhíjtäm haxøøgtuum je'eguiøxpä coo ja'a pojpä cädieey hajxy nmøødhájtäm. Pero coo ja'a Jesucristo miädia'agy hajxy nmäbøjcämät, mänitä Dios hajxy jaduñ xyhuunghájtämät nebiä jecy yajcuhdujquiän.

²³⁻²⁵ Tuungpaatpä jecyquihdujt hijty. Tsipcøxp højts hijty ngudiúunäm. Pero coo ja'a Jesucristo tøø yhoy, cab højtsä jecyquihdujt nbanøcxänä. Coo ja'a Jesucristo miädia'agy hajxy nmäbøjcämät, jaduñä Dios hajxy xyhuunghájtämät.

²⁶ Y xjiaanč huunghajp mijts ja'a Dios je'eguiøxpä coo ja'a Jesucristo miädia'agy hajxy mmäbøjcä, coo ja'a Jesucristo hajxy mmøødhity tu'ugmädia'agy. ²⁷ Y coo hajxy jaduñ mmøødhídat, coo hajxy jaduñ mnäbétät, mänitä Dios hajxy xyhuunghádät, nebiä Dios ja'a Jesucristo yHuunghatiän. ²⁸ Tu'ugmädia'agy hajxy mhijnä møødä Jesucristo. Cabä Dios tiehm yajtøy pø mjudíós, pø caj, pø mmäyøø, pø caj mmäyøøjä. Cabä Dios yajtøy ja'a haagä tehñ ya'adiøjcpä, ja'a haagä tehñ tio'oxiøjcpä. Jøjwa'achä yajtøy. Jaduñä Dios hajxy xyhijxnä nebiä yhamdsoo huungän. ²⁹ Y coo ja'a Jesucristo hajxy mmøødhity tu'ugmädia'agy, paadiä Dios hajxy xyhuunghaty, nebiä Dios ja'a Abraham jecy yhuunghajtiän.

4

¹⁻² Jaduñds je'e, coo jäya'ayhajxy hänajty näje'e yho'ogaannä, mänit hajxy miäna'añ coo yhuunghajxy yhíjxäxät ja'a miägu'ughajpähajxy. Coo ja'a yhuunghajxy miøjjøñät, mänit nädeedy hajxy miämähmøñät. Pero coo hajxy hänajty miuutsnä, jaduñ hajxy yhane'emyii nebiä moonsän, høxtä coonä hajxy hänajty tøø miøjjøñä. ³ Y højtshájtäm, coo ja'a Jesús hajxy hänajty nga'a hixyhájtämnä, jaduñ mäwíinäts hajxy hijty nhíjtäm nebiä hane'emybiän coo ja'a jecyquihdujt hajxy hijty tehngajnä nbanøcxäm. ⁴ Pero coo yhabaaty, mänitä Dios ja'a yHuung quiejxy; Jesucristo je'e. Hoy je'e miñguia'ay neby højtshájtämän yaa judíósnaaxooty, maa ja'a jecyquihdujt tiuñän. ⁵ Paadiä Jesús quiejxä neby højts jaduñ xñäho'túutämät, je'eguiøxpä coo højts ja'a jecyquihdujt hijty nbanøcxäm tehngajnä. Coo hajxy xñäho'túutäm, xyhuunghájtäm ja'a Dios hajxy jaduñ.

⁶⁻⁷ Xmio'owáañäm hajxy jaduñ nebiaty ñägapxy. Cab hajxy nhíjtänä nebiä hane'emybiän. Coo ja'a Dios hajxy xyhuunghájtäm, paadiä yhEspíritu hajxy xyajnäguéjxäm. Paady hajxy je'e nnämäayyäm: "Teedy" hamuumdu'joot.

⁸ Jue'e mijts hijty mwi'i wyiingudsähgøøby, quepychech naaxpoch. Cahnä ja'a Dios hajxy hänajty mhixyhatyñä. ⁹ Pero coo ja'a Dios hajxy tøø xwyiimbiy, paady hajxy mhixyhajnä. Cab jaduñ yahahix'øy coo ja'a jecyquihdujt hajxy jadähooc mbadu'ubøjcombät. Cab hajxy nyaghanéhmänät maa ja'a jecyquihdujtän. ¹⁰ Pero mijts, je'enä xøø hajxy mwi'i yagjadyii. Jaduñ tyijy hajxy mnähwa'adsa'añ. ¹¹ Nej, xiøøbøch mijts ja'a Diosmädia'agy tøø nja yajwiinhix'øy. Pø tøyhajt jaduñ, njaanč tehñ yagjuøøbiøch jaduñ.

¹²⁻¹⁴ Hermanodøjc, nnämä'awäbøch mijts cooçh mijts xpiahíxät. Najtshix'øw ja'a jecyquihdujt hajxy nébiøch tøø nnajtshix'øyän. Mänájøch mijtsä Diosmädia'agy nyajwiingapxøøchooñän, hóyhøch mijts xmiägu'ugpøjcy. Jadúhnhøch hajxy xjijpøgøøyy nebiä Diosquexiän, nebiä Jesucristän. Cábøch hajxy xxiøøghajty, hóyhøchä pa'am

hänajty nja mөөдä, hóyhөch mijts hoxiөghajnä hänajty xjia hixy. Coochä pa'am hänajty nmөөдä, páadyhöch jim nmähmөөyy maa mijtsän. ¹⁵ Pero mijts, cab hajxy jootcujc mhijnä. Pänebiä hajxy tөө mjaty. Mänáajөch jim nhitiän maa mijtsän, höchcөxpä mijts hänajty mduñ hoy miädyii mayhajtä. Xmióobiөch mijts hänajty hoy tyijjä. ¹⁶ Páadyhöch mijtsäda'a xquia'a mägu'ughadaannä cooch mijts tөө nhawáañäm ja'a tөyhajt.

¹⁷ Y häna'c-hajxy höhndaacpä, paady mijts hajxy xmiägu'ughada'añ nébiөch mijts jaduhñ xquia'a panócxnät. Pero caj mijts hajxy hamuumdu'joot xmiägu'ughada'añ. Xñä'a wiinhөnaamb mijts hajxy jaduhñ. ¹⁸ Hoy hit jaduhñ coo mijts pөñ hamuumdu'joot xmiägu'ughádät hoy miánaajä, hóyhөch hänajty jim nga'a ja hity maa mijtsän. ¹⁹ Mägu'ughajpä, jaanч tehñ jootmayhájpөch jadähooc ja'a mijtscөxpä. Jiaanч tehñ chójpiөch njoot coo mijts ja'a Jesucristo mmөөdhídät tu'ugmädia'agy. ²⁰ Cu nnócyhөch jim maa mijtsän. Cu nmөөdmädiäacyhöch mijts jaduhñ yajxón. Cooch mijts hoy nga'a mөөdmädia'aga'añ hajäya'ayhaam, cábөch nnajuө'өy nébiөch ndaj nmáyät ja'a mijtscөxpä.

²¹ Hoorä, pө chojpiä mjoothajxy tehngajnä coo ja'a jecyquihdujt hajxy mbanөcxa'añ, huuc mäadow hajxy neby jiiby myiñän maa ja'a jecyquihdujtän. ²²⁻²³ Metscä Abraham yhuung hänajty. Tu'ug hänajty xiөhajtý Isaac. Tөө Dios Abraham hänajty jaduhñ yajwiinwaanө'өy coo ja'a Isaac hänajty myina'añ quia'awa'añ. Abraham yhamdsoo huunghajxy je'eduhñ mөөдä tio'oxiөjc. Jatu'ugpä, Ismael je'e xiөhajpä. Jaduhyyä je'e ñä'a miiñ ñä'a cahy. Moonsä je'e tiajhajt. ²⁴⁻²⁵ Hädaa mädia'agy, nebiä hijxtahñdän hädaa jaduhñ. Ja'a Ismael tiaj, ja'a Agarhajpä, moonsähajp hänajty je'e. Cabä yhamdsoo cuhdujt hänajty yaghity. Hoorä, coo ja'a Dios ja'a cuhdujt yejcy maa ja'a tun hänajty xiөhatiän Sinaí, jim Arabianaaxooty, jaduhñ mäwíinäts hajxy nhíjtäm nebiä Agar hänajty mioonsähatiän. Cabä nhamdsoo cuhdujt hajxy nyaghíjtäm. Mejtstu'u ja'a tun hänajty xiөhaty. Xөhajp hänajty Sinaí, mөөдä hänajty xiөhaty Agar. Ja'a cajpt jaduhñ xөhajpä Jerusalén, ja'a hädaa yaabä naaxwiimbä, jaduhñ mäwíinäts je'e nebiä Agarän. Hix, cabä Jerusalénpä-jäya'ay yhamdsoo cuhdujt hajxy yaghity. ²⁶ Jaduhñ ja'a cajpt jim xiөhajpä tsajpootyp Jerusalén. Jim hajxy nxөönájxäm. Cabä jecyquihdujt jim tiuunnä nebiä Dios yejquiän Sinaí. Jemyguiuhdujtäts jim túunnäp. ²⁷ Jaduhñ jiiby myiñ cujaay maa ja'a Diosmädia'aguiän:

Huuc xoonäda'ag, hoyyä huung mga'a ja paadyñä, Maas may miiч huung mbaada'añ. Cabä mmoonsä may jiaty paada'añ.

²⁸ Hoorä, hermanodөjc, tөө ja'a Dios hajxy xyajnähdíjjäm coo hajxy xyhuung-hadáañäm, nebiä Isaac yajnähdíjjän. ²⁹ Dios ja'a yhEspíritu ja'a Isaac yajmägunuuxөөyy coo myíñät. Cabä Ismael yajmädsөjcy coo ja'a Abraham ja'a Isaac yhuunghádät. Jaduhñ mäwíinäts höjtsä jäya'ayhajxy xquia'a yajmädsөjcäm coo ja'a Dios hajxy xyhuunghájtämät. ³⁰ Jaduhñ jiiby myiimbä cujaay maa ja'a Diosmädia'aguiän: “Hөxquejxpädsөm yө'ө to'oxymoonsä mөөдä yhuung.” Cabä moonsä yhuung ñä'ägädä puhmo'owa'añii ñädeedy. Pero yhamdsoo to'oxiөjc yhuung, je'eds jaduhñ mio'owaamby. ³¹ Hermanodөjc, coo ja'a Diosmädia'agy hajxy hamuumdu'joot ndsөjcäm, jaduhñ mäwíinäts hajxy nhíjtäm nebiä Isaac jecy yhihtiän. Pero ja'a hajxy ca'a tsojpä, jaduhñ mäwíinäts hajxy je'e nebiä Ismaelän, ja'a moonsä yhuung.

5

¹ Coo ja'a Dioscuhdujt hajxy nyaghíjtäm, mädyii ja'a Moisés jecy miähooyy, jaduhñ mäwíinäts hajxy hijty nhíjtäm neby hajxy hadsip yajtuñíjjäbän. Coo ja'a Jesucristo quiädaacy, mänit hajxy xñämäayyäm coo ja'a jecyquihdujt hajxy nga'a möjpädäacänät. Xyhawáañäm hajxy jaduhñ neby hajxy nnähwáatsämät. Hamuumdu'jootä Jesucristo miädia'agy hajxy mbanөcxät. Cabä Moisés jecyquihdujt hajxy mbadu'ubөjcät jadähooc.

² Huuc hamädoowhit hajxy. Coo hajxy nyajcircuncidarhájtämät cooc tyijy hajxy jaduhñ nnähwa'adsáañäm, xiөөbä ja'a Jesucristo hajxy häxөpy tөө xñä'a nähho'túutäm.

Høøch jaduhñ mänaamb, Pablo. Diosquexhøch høøch. ³ Jaduhñhøch jadähooc nmänáangombä, pønjaty mänaamb coo hajxy yajcircuncidarhädät, tsipcøxp hajxy quiudiúnät nebiatiä Moisés jiecycuiuhdujt yajnähdiij coo hajxy quiudiúnät. ⁴ Jii häna'c-hajxy näje'e miäna'añ: "Páadyhøch nnähwa'adsa'añ coöchä Moisés jiecycuiuhdujt hoy ngudiunä." Pero cab jaduhñ tiøyyä coo hajxy ñähwa'adsa'añ. Hiç, cabä Jesucristo hajxy miøødhijnä tu'ugmädia'agy. ⁵ Pero nmäbøjcäm højts coo hajxy nnähwa'adsaanäm ja'a Jesucristocøxpä. Ja'a Dioshespíritu hajxy xpiuhbedaanäm. ⁶ Coo ja'a Jesucristo hajxy tu'ugmädia'agy nmøødhjätämät, cab jaduhñ ñejpiä pø tøø hajxy nyajcircuncidarhajtäm, o pø caj. Je'eduhñ tsoobaatp coo ja'a Jesucristo miädia'agy hajxy nmäbøjcämät y coo hajxy hamiñ häxøpy nniçhøjcämät nebiä Jesucristo hajxy xchøjcäm.

⁷ Hoy ja'a Diosmädia'agy hajxy hijty mbanøcxy. Pätiidä hajxy coo tøø mnajtshixø'øy. Pábøndä hajxy tøø xwyiinhøøñ. ⁸ Ca'a Dyiosä hajxy xyajnajtshixøøyy. Jaaya'ay hajxy xyajnähdijjäm coo ja'a miädia'agy hajxy nbanøcxämät. ⁹ Jaduhñä jäya'ayhajxy miäna'añ: "Coo tsajcaagychooy weñtiä nbädáacämät, cøxiä harina yajtägø'oyii." Jaduhñ mäwínäts højtshajtäm coo häna'c høhnda'agymiädia'agy hajxy xyajnähixøøyyämät; nägøxiä hajxy jaduhñ nmätämät. ¹⁰ Nbädáacypiøchä njuøhñdy ja'a Dioscøxpä coo wiingmädia'agy hajxy mga'a mabøgät. Dios jaduhñ yajcumädowaamb pøn mijts høhnda'agymiädia'agy xyajnähixøøby.

¹¹ Tehngájñøchä Diosmädia'agy nyajwa'xy coo ja'a jäya'ayhajxy ween miäbøcy; je'eguiøxpä coo ja'a Jesucristo hajxy tøø xñähho'túutäm cruzcøxp. Páadyhøchä jäya'ayhajxy xmiähahaty. Näje'e hajxy miäna'añ cooc tyijy høøchä mädia'agy nyajwa'xy coo hajxy ween ñiseñapäda'agyii. Pero cab jaduhñ ñä'a tøyyä. Coochä mädia'agy häxøpy nyajwa'xy coo hajxy yajcircuncidarhädät, cábøchä jäya'ayhajxy häxøpy xmiähahaty. ¹² Yø'ø häna'c mijts xjia wi'i ñämaabiä coo hajxy myajcircuncidarhädät, ween hajxy jaduhñ xpiuhwaatsnä.

¹³ Tøø mijts ja'a Dios xyajnähdijy coo ja'a Moisés jiecycuiuhdujt hajxy mnajtshixøøyyät. Pero cabä Dios jaduhñ miäna'añ coo hajxy cøxpänejpiä mjäya'ayhädät. Jaduhñ miäna'añ coo hajxy yajxón mniçhogøøjät, coo hajxy yajxón mnibiuuhbedøøjät.

¹⁴ Jaduhñä Dios jiecycuiuhdujt miäna'añ coo hajxy hoy piønä mdsoc mba'häyówät hädaa yaabä naaxwiin nebiä mhamdsoo ni'x nebiä mhamdsoo copc hajxy mdsoquiän. ¹⁵ Cab jaduhñ yhooyä coo hajxy mnimiähahadøøjät tu'ugpä tsajtøjc, jaduhñ hajxy mga'a niyajtägøyyøøjät.

¹⁶ Hoy hajxy mwädítät ja'a Diosmäjaagøxpä. Cabä mhamdsoo wiinmahñdy hajxy myaghijnät, hoyyä mjoothajxy hänäjty tii jia tsocy. ¹⁷ Ja'a Diosmäjaa, cabä tu'ugjuøhñdy yhity møødä haxøøgcuhdujt. Coo hänäjty haxøøg mjatcø'øwa'añ, Dios xyhadujp mga'a jatcø'øy jaduhñ cøxpänejpiä. Hoorä, coo ja'a mjoot hänäjty chocy coo hänäjty hoy mwädita'añ, ja'a mhaxøøgwiinmahñdy jaduhñ xyhadujp. ¹⁸ Pø chojpiä mjoot jaduhñ coo ja'a Diosmäjaagøxpä mwädítät, cabä Moisés jiecycuiuhdujt mbanøcxänät.

¹⁹ Madiu'u ja'a jäya'ayhajxy yhaxøøgcuhdujthaty: jabiøcy hajxy ñimiøødtsäna'ayii; cøxpänejpiä hajxy jiäya'ayhaty; haxøøg hajxy wiädity, hoy hajxy jia to'oxiøjcmøødä; ²⁰ wyiingudsähgøøbiä quepychech naaxpoch hajxy; mähijxp mabäxujp hajxy; nimiädsiphajtäp hajxy; yhadsojpy hajxy mädyiijatiä miägu'ughajpähajxy miøød; paquiä hajxy ñimiäjootma'adyii; wiinduc-ho'p hajxy; nibiuhyohdiúutäp hajxy; cab hajxy tiu'ugmädia'aguiä; ²¹ hadsojt hajxy wyi'i miøød; jäya'ay-yagho'p hajxy; haxøøghuucp hajxy, haxøøgjøø'xp hajxy; madiu'u hajxy jaduhñ jiatcø'øy. Tøøds mijts nja yagjahmiech, chaads jadähooc nhawáanäm: pøn haxøøgcuhdujt møød, cab jim ñøcxa'añ tsajpootyp.

²² Pero coo ja'a Diosmäjaagøxpä hajxy nwädjätämät, Dios hajxy jaduhñ xpiuhbéjtäm coo ja'a jäya'ay hajxy hoy nmägu'ughajtämät, coo hajxy nxoondáacämät, coo hajxy jootcujc nhjätämät, coo hajxy nmeex'xujcämät, coo ja'a nmäjøøn coo ja'a nmädøjc hajxy yajxón nmägu'ughajtämät, coo ja'a hojioot hajxy nmøødhjätämät, coo hajxy nga'a høhndaacämät, ²³ coo hajxy mee'xxieemy nhjätämät, coo hajxy jootxeemy nhjätämät. Coo hajxy jaduhñ njäya'ayhajtämät, cab hajxy pøn waamb xñämäayyämät. ²⁴ Pønä

Jesucristo miädia'agy panócxäp hamuumdu'joot, tøø ja'a yhaxøøgcuhdujt yhøxhixy, y cab jaduñ jiahmiejtsnä. ²⁵ Pø mänáañäm hajxy jaduñ coo ja'a Diosmäjaagøxpä hajxy nhíjtäm, tsøg hajxy hamuumdu'joot pawädíjtäm.

²⁶ Cab hajxy nyajcumáayyämät; cab hajxy nniyagjootmá'tämät hamiñ haxøpy; cab hajxy cøxiä wiinä nniyhadsójcämät.

6

¹ Hermanodøjc, coo pøn tiu'udägóyyät, mee'xxieemy hajxy mmägäp mhané'emät, nej mijtsä Diosmäjaa mmøødän, weenä yhaxøøgpä yhøxhijxnä. Pero mnigwieendähadøøjäp hajxy coo mijts jaduñ mnä'a tu'udägóobiät. ² Nibiuhedøø hajxy neby hajxy jaduñ mmäjädá'agät, neby hajxy jaduñ mga'a tu'udägóyyät. Jaduñdsä Jesucristo miädia'agy hajxy mgudiúuñät.

³ Pøn yajcumayaamb je'eguiøxpä cooc tyijy miøjjä, caj ñä'a tøyyä coo miøjjä. Nä'a niwyiinhøñäp jaduñ. ⁴ Cøjwiinduum hajxy mniyhixøøjät pø hoy hajxy tøø mgudiúñ. Y pø tøø hajxy hoy mgudiúñ, mänit hajxy mxoondá'agät. Pø tøø ja'a mmägu'ughajpä hajxy mbexy, cab hajxy nøcxy mniguiumayii. ⁵ Cøjwiinduum hajxy mniyajcopcø'øwøøjät pø hoy hajxy mgudiúñ.

⁶ Pøn jaduñ yajnahixøyyäp ja'a Diosmädia'agy, tsipcøxpä ofrenda hajxy yégät, mio'owøøjät ja'a yajnahixøöbiä.

⁷ Ca'a hajxy myajwiinhøñ; ñajuøöbiä Dios neby hajxy nwiinmahñdyhíjtäm. Nej tøø mjäya'ayhatiän, høxtä jaduñ mguhbédät. ⁸ Pønä Dioshespíritu panøcxp, je'e cøjxta'axiøø jugyhadaamb nebiä Dios jiugyhatiän; pero pøn yhamdsoo cuhdujt yajtuumb, cab jaduñ jiugyhada'añ nebiä Dios jiugyhatiän. ⁹ Tsøgä njoot hajxy møc pädáacäm; coo hajxy tehngajnä hoy nwädíjtämät, mänit hajxy jim nnócxämät tsajpootyp coo yhabáatnät. ¹⁰ Hoy miänaajä ja'a jäya'ay hajxy mbuhbédät nägøxiä. Tsipcøxpädsä hermanodøjc hajxy mnä'ägädä puhbédät.

¹¹ Hamdsójoçh hädaa letra nhädiuñ, paady miøjjatiä. ¹² Pønjaty mijts xjia wi'i ñämaaby coo hajxy myajcircuncidarhädät, paady hajxy jaduñ miäna'añ coo hajxy wyi'i yajcumaya'añ cu'ughagujc. Hix, tsähgøøby hajxy jaduñ coo hajxy miädsibø'øwøøjät ja'a homiädia'agyquiøxpä, coo ja'a Jesucristo hajxy tøø xñähho'túutäm cruzøxp. ¹³ Hoy hajxy näje'e tøø jia yajcircuncidarhaty, cabä Moisés jicyquiuhdujt hajxy yajtuunä. Paady mijts hajxy xjia wi'i ñäma'ay coo hajxy myajcircuncidarhájpat, yajcumayaamb hajxy jaduñ ja'a mijtsøxpä. ¹⁴ Pero høøch, cáboch nmäna'añ coo mädyii miøjjä jiaañchä. Jagóoyyøch nmäna'añ coo miøjjä jiaañchä coöchä Jesucristo tøø xñähho'tu'udy cruzøxp. Cábochä njoot yaa nbädaacnä hädaa yaabä naaxwiin. Hoyyä jäya'ay hajxy waambaty jia mäná'anät, cáboch tii nmøjpädaacnä. Cáboch tii hadsojt nmøødän hädaa yaabä naaxwiin. ¹⁵ Cab jaduñ ñejpiä pø tøø myajcircuncidarhaty o pø caj. Je'eduhñ tsoobáatnäp coo ja'a Dios hajxy tøø xpiädáacäm hawiinjemy. ¹⁶ Pønä Diosmädia'agy hoy cudiuumb, je'eds hoyhajt weenhajt mo'owáañäp.

¹⁷ Páadyhøch chaa nnähxäguuüch nguhxäguuüchä coöchä Jesucristo miädia'agy tøø nmädiaacä. Y coöch jaduñ tøø ngudiúñ, páadyhøchä cuhdujt nmøødän. Páadyhøch hajxy tii xquia'a yajnámáañät.

¹⁸ Hermanodøjc, weenä Jesucristo hajxy xcwieendähaty. Amén.

Efesios

¹ Høøch xøhajp Pablo. Høøch hädaa nocy njahby. Ja'a Dios jaduhñ mänaañ coočhä Jesucristo xwyiinguéxät. Mijts hädaa nocy nyajnäjaayøøby pønhatiä Diosmädia'agy mäbøjp jim maa ja'a cajpt jaduhñ xiøhatiän Efeso, pønhatiä Jesucristo miädia'agy jim hoy yajtuunäp. ² Weenä Dios hajxy xmiø'oy ja'a hoyhajt ja'a weenhajt, mөөdä Jesucristo. Ja'a Dios hajxy nDeedyhájtäm. Ja'a Jesucristo hajxy nWiindsønähájtäm.

³ Tsögä Dios hajxy wiingudsähgøøyyäm. Ja'a Jesucristo, Dyioshajpiä Dios je'eduhmbä; y jaduhñ je'e Tieedyhajpä. Coö ja'a Jesucristo hajxy xmiøødhájtäm tu'ugmädia'agy, paadiä Dios tsajpootypä ja'a mayhajt madiu'u tiuñ ja'a højtscøxphájtäm. ⁴ Cahnä hädaa yaabä naaxwiin hänajty chohnda'agy, tøøyyämä Dios hajxy hänajty xwyiimbíiwäm coö ja'a Jesucristo hajxy xmiøødhájtämät tu'ugmädia'agy. Jaaná jaduhñ hajxy xwyiimbíiwämbä coö hajxy hoy njäya'ayhájtämät, coö hajxy nga'a cädiéhyyämät, jaduhñ hajxy wa'ads hoy nhájtämät maa ja'a Dioswiinduumän. ⁵ Coö ja'a Dios hajxy xchójcäm, paadiä Jesucristo yaa quiejxä hädaa yaabä naaxwiin ja'a højtscøxphájtäm. Paadiä Dios ja'a Jesucristo yaa quiejxy coö ja'a Dios hänajty tøø wyiinmay coö hajxy xyhuunghadäänäm. Hamdsoojootä Dios jaduhñ miänaañ coö hajxy xyhuunghájtämät. ⁶ Tsøcxä Dios hajxy wiingudsähgøøyyäm coö hajxy xjiaanč tehñ chójcäm, coö ja'a Jesucristo yaa quiejxä maa højtshájtäm. Jaduhñä Dios ja'a mayhajt møj tiuun ja'a højtscøxphájtäm. Paady hajxy xchójcäm coö ja'a Jesucristo hajxy xmiøødhájtäm tu'ugmädia'agy. Hix, jaanč tehñ chójcäbä Jesucristo ja'a Tiéediäm. ⁷ Coö ja'a Dios hajxy jaduhñ xjiaanč tehñ chójcäm, paadiä Jesucristo hajxy yaa hoy tøø xñähho'túutäm, jaduhñä nbojpä ngädieey hajxy xyajnahwaats xyajcuhwáatsäm. Jaduhñä Dios hajxy xmiéé'xäm. ⁸ Coö hajxy jaduhñ xjiaanč tehñ chójcäm, paady hajxy hoy tøø xyajwiinjuøøyyäm nebiaty jaduhñ tøø wyiinmay ja'a højtscøxpä. ⁹ Tøø ja'a wyiinmahñdy hajxy xyhawäänäm ja'a hijty jaduhñ quiuyu'chpä. Hamdsoojootä Dios jaduhñ tøø wyiinmahñdyhaty. Chojpiä jioot hänajty jaduhñ coö ja'a mayhajt hänajty tiuna'añ ja'a højtscøxphájtäm. ¹⁰ Jaduhñä Dios tøø wyiinmahñdyhaty coö ja'a Jesucristo Wyiindsønhadøøjät cøxiä tijaty jim tsajpootyp, mөөdä tijaty yaa hädaa yaabä naaxwiin. Coö ja'a Dios jaduhñ yaghabaadät, mänit hänajty tiøjiada'añ coö ja'a Jesucristo jaduhñ Wyiindsønhadä'añii.

¹¹ Ja'a Dios, yajtøjiajpy je'eduhñ nebiaty je'e wyiinmay. Hoorä, jéquiänä Dios wyiinmaayy coö højts ja'a yHuung xyajnahwa'ads xyajcuhwá'adsät, højts judíospä, coö højts jaduhñ nmøødhídät tu'ugmädia'agy. ¹² Jequiän højts ja'a nhap ja'a ndeedy ja'a Dios ja'a miädia'agy hajxy tiägøøyyä mäbójcäbä coö højts xyajnahwa'ads xyajcuhwá'adsät. Hoorä, paadiä Dios jaduhñ jecy wyiinmaayy coö højts ja'a yHuung xyajnahwa'ads xyajcuhwá'adsät, jaduhñä jäya'ayä Dios hajxy nägøxiä wyiingudsähgø'øwät coö jiaanč tehñ miøjjä coö jiaanč tehñ jiaančhä. ¹³ Y mijts ja'a ca'a judíospä, jaaná jaduhñä Dios tøø wyiinmaabiä coö mijts ja'a yHuung xyajnahwaats xyajcuhwáatspä. Y jaduhñ hajxy tøø mmäbøjpä coö ja'a yHuung hajxy tøø xyajnahwaats tøø xyajcuhwaatspä. Jaanč tehñ tiømiädiaacpä Dios jaduhñ. Coö hajxy jaduhñ nmäbójcäm, paadiä Dios ja'a yhEspíritu yaa tøø quiejxy maa højtshájtäm, jaduhñä tøyhajt hajxy nmøødhájtäm coö ja'a Jesucristo hajxy tøø xjiaanč yajnahwaats tøø xjiaanč yajcuhwáatsäm. Hix, jéquiänä Dios jaduhñ miänaañ coö ja'a yhEspíritu hänajty quiexa'añ maa ja'a jäya'ay-hajxiän, ja'a miädia'agy hajxy hänajty mäbójcäbä coö hajxy hänajty yajnahwa'ads yajcuhwa'adsa'añii. Jaduhñä Dios ja'a tøyhajt hajxy xmiøøyyäm coö hajxy hoy miänaajä xcwieendähadäänäm. ¹⁴ Y coö ja'a Dios ja'a yhEspíritu tøø jiaanč quejxnä maa højtshájtäm, jaduhñä tøyhajt hajxy nmøødhájtämbä coö hajxy jim xyajnöcxäänäm maa ja'a wyiinduumän. Jaduhñä DioshEspíritu hajxy xmiøødhidäänäm høxtä coonä yhabaadät coö ja'a Dios hajxy jim xyajnöcxämät maa ja'a wyiinduumän, y coö ja'a Dios

ja'a mayhajt jaduhñ tiuñ ja'a højtscøphajtäm, páadiäts hajxy nwiingudsähgøøyyämät coo jiaanč tehñ miøjjä coo jiaanč tehñ jiaančhä.

¹⁵ Nmädøyhøch jaduhñ coo ja'a Jesús ja'a miädia'agy hajxy tøø mmäbøjcä, ja'a hajxy nWiindsønñajtämbä. Jadúhñhøch nmädøyyäbä coo hajxy mdsocy mba'häyoy pønñatiä Diosmädia'agy panøcxp. ¹⁶ Cooč jaduhñ nmädøyyä, páadyhøch Dios Dioscujú'uyäp nmo'oy ja'a mijtscøxpä hoy miänaajä, cooč hñajty nDiospa'ya'axy ja'a mijtscøxpä. ¹⁷ Nmänuu'xtäacypiøčhä Dios coo ja'a wyiinmahñdy hajxy jaduhñ ween xmio'oy ja'a yh-Espírituhaam, y coo ja'a wyiinmahñdy hajxy jaduhñ ween xyajwiinjuø'oy. Diosñajtäbä Dios ja'a Jesucristäm, ja'a hajxy nWiindsønñajtämbä. NDiosñajtämä Dios hajxy. Møj jaanč je'e. Hawiinmats hajxy jaduhñ nwiingudsähgøøyyämät. ¹⁸ Jadúhñhøčhä Dios nmänuu'xtaacpä coo hajxy ween xyajwiinjuø'oy coo je'e tøø wyiinmay coo hajxy jim xyajnøcxäänäm maa ja'a wyiinduumän. Paady hajxy jim xyajnøcxäänäm coo hajxy xyhuunghajtäm. Jaanč tehñ yhoy jaanč tehñ yajxon hajxy jim nhidäänäm. ¹⁹ Weenä Dios hajxy xyajwiinjuøbiä coo møcmäjaa jiaanč tehñ miøødä, coo ja'a miäjaahaam hajxy xpiuhbéjtäm coo ja'a miädia'agy hajxy nmäbøjcäm coo tiømiädia'agy. ²⁰ Jaanä miäjaahaamä yHuung jaduhñ yagjuypiøjtägajtspä. Mänit jim yajnøcxy maa ja'a wyiinduumän. Mänit ñämaayy coo yhøxtá'agät maa ja'a quiø'ø hahooyhaampiän. Jimä Jesucristo ja'a Tieedy miøødhanehmñä. ²¹ Ni pønä cuhdujt jaduhñ quia'a nä'ägädä møødä nebiä Jesucristo mõjcuñdujt miøødän, ni jim tsajpootyp, ni hädaa yaabä naaxwiin. Ni pønä cuhdujt mänaa quia'a møødhada'añ nebiä Jesucristo mõjcuñdujt miøødän. ²² Jaduhñä Jesucristo piädaacä coo cøxiä wiinä yhané'emät hoy miaajä. Jaduhñ je'e piädaacäbä coo højts nWiindsønñajtämät coo ja'a miädia'agy hajxy nmäbøjcäm coo tiømiädia'agy. ²³ Hoyyä Jesucristo cøxiä wiinä jia hane'emy hoy miaajä, coo hajxy jaduhñ nmäbøjcäm, xjiootcädaacäm hajxy jaduhñ coo hajxy xmiøødhajtämät tu'ugmädia'agy. Ni tii jaduhñ quia'a jootcädaacy neby højts xjiootcädaacäm.

2

¹ Jue'e mijts hijty, cabä Dios hajxy hijty mwiingudsähgø'ø, je'eguiøxpä coo ja'a pojpa cädieey hajxy hijty mmøødä, coo ja'a Diosmädia'agy hajxy hijty mga'a cudiuñ. ² Jaanč tehñ yhaxøøgtuum hajxy hijty mnä'ägädä hity. Jaduhñsä jäya'ayhajxy yhity ja'a Diosmädia'agy hajxy ca'a mäbøjpä. Ja'a mõjcu'ugong ja'a miädia'agy hajxy hijty mmäbøjcäp. Jaayá'ayäts mõjtuumgmøød tsajtcøxp. Yhanehmby jaduhñ pønñatiä Diosmädia'agy ca'a mäbøjp. ³ Jaduhñ hajxy hijty nägøxiä njatcøøyyämbä. Haxøøg hajxy hijty nwädijtäm nebiä njootä ngopc-hajxy hijty chójcäm. Paadiä Dios hajxy hijty xyajcumädozáanäm nägøxiä näguipxy møødä haxøøgjäya'ayhajxy. ⁴ Pero hojiootä Dios jiaanč tehñ miøød. Xjiaanč tehñ chójcäm hajxy. ⁵ Hoyyä Dios ja'a miädia'agy hajxy hijty nga'a ja cudiúunäm, ja'a miäjaahaamä Dios ja'a nwiinmahñdyhajxy tøø xyajtägajtsäm, nebiä miädia'agy hajxy jaduhñ hoy ngudiúunämät, nebiä Jesucristo yagjuypiøjcän ja'a Tieediä miäjaahaam. Coo ja'a Dios hajxy xjiaanč tehñ chójcäm, paady hajxy tøø xpiädaacäm hawa'adstuum. ⁶ Nebiä Dios ja'a Jesucristo yagjuypiøjtägajchän, jaanä jaduhñ højts xyagjuypiøjtägatsäänämbä. Tøø hajxy xpiädaacäm coo ja'a Jesucristo hajxy nmøødhajtämät tu'ugmädia'agy. Y nebiä Dios ja'a Jesucristo ja'a cuhdujt miooyän coo jim miähané'emät tsajpootyp, jaanä jaduhñ højtsä cuhdujt xmio'owäänämbä. ⁷ Paadiä Dios ja'a cuhdujt hajxy jaduhñ xmiøoyyäm, jaduhñ yajcähxø'øga'añ coo hojioot jiaanč tehñ miøødä maa højtscøxpän, coo hajxy xjiaanč tehñ chójcäm. Paadiä Jesucristo yaa quiejxä hädaa yaabä naaxwiin; paady hajxy hoy xñähho'túutäm. Jimä Dios hajxy hoy miänaajä xyaghidäänäm maa ja'a wyiinduumän. ⁸ Cab hajxy hamdsoo tøø nhawa'adspädsøømäm. Ja'a Dios hajxy tøø xpiädaacäm hawa'adstuum. Paady hajxy xyaghawa'adspädsøømäm coo hojioot jiaanč tehñ miøødä, coo hajxy nmäbøjcäm coo hojioot miøødä. ⁹ Coo ja'a nbojpä ngädieey hajxy hamdsoo tøø nga'a yajniñähwäatsäm, paady hajxy hamdsoo nga'a niguiumäayyämät, hoy hajxy tøø nja hojiäya'ayñajtäm. ¹⁰ Hix, tøø ja'a Dios ja'a nwiinmahñdyhajxy xyajtägajtsäm coo ja'a Jesucristo hajxy

xmiødhjítäm tu'ugmädia'agy. Tøø ja'a Dios ja'a mäjaa hajxy xmióoyyäm neby hajxy hoy nhjítämät. Jéquiänä Dios jaduhñ wyiinmaayy coo hajxy jaduhñ hoy nhjítämät.

¹¹ Hoorä, højts judíospä, yajcumaaby højts jaduhñ coo højts nyajcircuncidarhaty. Jaduhñ højts tyjy nyajcähxø'øgy coo højtsä Dios xquiu'ughaty. Coe højts jaduhñ nyajcircuncidarhaty, je'eduhñ ñänøømby coo højtsä seña nbäda'agy maa højtsä nni'xcøxpän. Paady højts mijts nxøøghaty, mijts ca'a judíospä, coo hajxy mga'a yajcircuncidarhajpä. Tøyhajt jaduhñ. ¹² Hix, højts judíospä, ja'a Dios højts jecy xquiu'ughajt. Jaduhñ højtsä Dios xmiøodyajcuhdujcy coo højts hänajty xyajnáhwa'ads xyajcuhwa'adsa'añ. Pero mijts ca'a judíospä, caj mijtsä Dios xñämaayy coo mijts xquiu'ughada'añ, coo mijts xyajnáhwa'ads xyajcuhwa'adsa'añ. Hix, cahnä Diosmädia'agy hajxy hänajty mmädoyñä ja'a Cristocøxpä. Paady hajxy hijty mga'a najuø'øgy coo mijts ja'a Dios xyajnáhwa'ads xyajcuhwa'adsaambä. ¹³ Caj mijtsä Dios hijty xquiu'ughaty. Cabä Diosmädia'agy hajxy hijty mmädooyä. Pero coo ja'a Jesucristo hajxy tøø xñähho'tu'udy, paadiä Dios hajxy xquiu'ughajnä. ¹⁴ Coe ja'a Jesucristo hajxy tøø xñähho'túutäm, jaduhñ hajxy tøø xpiädáacäm tu'ugmädia'agy nägøxiä, møød højts judíospä näguipxy møød mijts ca'a judíospä. Hamiñ haxøpy hajxy hijty nnimiädsiphjítäm. Pero tøø hajxy nnimiägäpxø'cänä je'eguiøxpä coo ja'a Jesucristo hajxy tøø xñähho'túutäm. ¹⁵ Højts judíospä, mijts hijty nmøødnimiädsiphjítäp, mijts ca'a judíospä. Hix, højtsä Dios jecy xyhanehm madiu'u, ca'a myijtsä. Mänitä Moisés quiujahy nebiaty højtsä Dios xyhanehmy, y coo ja'a Jesucristo hajxy hoy xñähho'túutäm, paadiä Dios ja'a mädia'agy yaghamaadiujnä nebiä Moisés hänajty jecy tøø quiujaayän. Jaduhñä Jesucristo hajxy tøø xpiädáacäm tu'ugmädia'agy møød je'e, møød højts judíospä näguipxy møød mijts ca'a judíospä. Paady hajxy nga'a nimiädsiphjítänä hamiñ haxøpy neby hijtiän, højts judíospä møød mijts ca'a judíospä. ¹⁶ Coe ja'a Jesucristo hajxy tøø xñähho'túutäm cruzcøxp, paadiä Dios hajxy tu'ugmädia'agy xmiødhjítänä, møød højts judíospä näguipxy møød mijts ca'a judíospä. Cabä Dios hajxy jaduhñ nmädsiphjítänä.

¹⁷ Hoyyä Jesucristo hajxy xyhawaanäm coogä Dios ja'a jioot quia'a tsocy coo ja'a Dios hajxy nga'a mädsiphjítänät. Jaduhñägä jioot chocy coo hajxy nmøødhjítänät tu'ugmädia'agy nägøxiä, møød højts judíospä näguipxy møød mijts ca'a judíospä. ¹⁸ Hix, coo ja'a Jesucristo hajxy nägøxiä tøø xñähho'túutäm, paadiä Dios hajxy nägøxiä nmøødhjítänä tu'ugmädia'agy, møød højts judíospä näguipxy møød mijts ca'a judíospä. Ja'a yhEspírituhaam hajxy jaduhñ xyajmøødhjítäm tu'ugmädia'agy nägøxiä. ¹⁹ Xquiu'ughajñäp mijtsä Dios møødä jäya'ayhajxy nägøxiä, ja'a Diosmädia'agy hajxy mäbøjpä, hoy hajxy mga'a jagä judíospä. Xyhuunghajñäbä Dios hajxy jaduhñ. Cabä Dios hajxy hijty xquiu'ughaty xyhuunghaty, coo ja'a miädia'agy hajxy hijty mga'a mäbøjcä. ²⁰ Coe ja'a Jesucristo hajxy hoy tøø xñähho'túutäm, mänit je'e hoy jiuypjøjtägach. Mänitä Diosquexy ja'a Diosmädia'agy hajxy tiägøøyy yajwa'xpä. Mänitä Diosmädia'agy hajxy nmäbøjcäm. ²¹⁻²² Paadiä Jesucristo hajxy xmiødhjítäm tu'ugjoot tu'ugwiinmahñdy coo ja'a Diosmädia'agy hajxy näguipxy nmäbøjcäm, møød højts judíospä, møød mijts ca'a judíospä. Hix, tøø ja'a Dios hajxy xyajnáhwaats xyajcuhwáatsäm ja'a nbojpä ngädieeyhajtäm. Ja'a yhEspírituhaam hajxy jaduhñ xyajmøødhjítäm tu'ugjoot tu'ugwiinmahñdy.

3

¹ Høøch Pablo, páadyhøch chaa ndsumyčhänä'ay coöchä Jesucristo miädia'agy nyajwa'xä maa mijtsän, mijts ca'a judíospä. Coe ja'a Jesucristo hajxy tøø xpiädáacäm tu'ugmädia'agy nägøxiä, páadyhøchä Dios nba'ya'axy ja'a mijtscøxpä. ² Tøø hajxiäda'a mmädoyhaty coöchä Dios tøø xwyiinguexy coo mijtsä Diosmädia'agy nyajwiingapxø'øwät, coo ja'a Dios ja'a hojioot miøødä ja'a mijtscøxpä. ³ Jéquiänä Dios wyiinmaayy coo højtsä nbojpä ngädieey xyajnáhwaats xyajcuhwáatsät, højts judíospä. Nnajuøøby højts hijty jaduhñ. Pero cuyu'uchä Dios hijty yaghity coo hänajty tøø wyiinmaabiä coo mijts xyajnáhwa'ads xyajcuhwa'adsaambä, mijts ca'a judíospä. Hoorä, tøøchä Dios hädaa mädia'agy xyajwiinjuøøñä nébiøch hädaa mädia'agy weenjaty cham njaayän. ⁴ Coe

hädaa mädia'agy hajxy mgápxät, jaduñ hajxy mnajuø'øwa'añ cooçhä Dios ja'a mädi-a'agy tøø xyajwiinjuø'oy, ja'a Jesucristocøxpä, ja'a cuyu'uçh tøø yhítiäbä. ⁵ Cab hädaa mädia'agy hijty põñ miädooyä. Pero tøø ja'a Dios ja'a wyiinguexyhajxy yajwiinjuøñä. Ja'a yhEspírituhaam jaduñ yajwiinjuøyy. ⁶ Jaduñ hajxy nnajuøøyyäm coo ja'a Dios jecy wyiinmaayy coo ja'a Jesucristo hajxy hänajty xñähho'tu'udáanäm, coo hänajty jiuypjøjtägatsa'añ. Y coo ja'a Diosmädia'agy hajxy nmäbøjcäm, paadiä Jesucristo hajxy nägøxiä nmøødhjítäm tu'ugjoot tu'ugwiinmahñdy, møød højts judíospä näguipxy møød mijts ca'a judíospä. Jaduñä Dios hajxy nägøxiä xyhuunghájtäm. Tu'ugmädia'aguiä Dios hajxy jaduñ xyaghjítäm ja'a Jesucristocøxpä. Paadiä Dios hajxy jaduñ xyajnáhwaats xyajcuhwáatsäm coo ja'a Jesucristo hajxy hoy tøø xñähho'túutäm. Jéquiänä Dios jaduñ wyiinmaayy.

⁷⁻⁸ Ja'a miøcmäjaahámhøçhä Dios tøø xtiuungmo'oy cooçh ja'a miädia'agy nyajwá'xät maa ja'a ca'a judíoshajxypän. Xtiuungmóoyhøçhä Dios jaduñ cooçhä judíoshajxy nyajwiingapxø'øwät coo Dios ja'a mayhajt mõj may tiuna'añ ja'a højtsøxphájtäm, je'eguiøxpä coo ja'a Jesucristo hajxy hoy tøø xñähho'túutäm. Hojiotä Dios miøød, páadyhøch jaduñ xtiuungmooyy, hóyhøch nga'a jagä mäna'añ cooçh nga'a tsoobaady cooçh jaduñ ndúnät, hóyhøch nja mäna'añ coo ja'a Dioshuunghajxy miaas tsoobáadät, coo hajxy jaduñ tiúnät. ⁹ Jaanä jadúhnhøçhä Dios tøø xtiuungmoobiä cooçhä jäya'ay-hajxy nägøxiä nyajwiinjuø'øwät coo ja'a Dios jecy wyiinmaayy coo mijtsä Jesucristo hänajty xyajnáhwa'ads xyajcuhwa'adsaambä, mijts ca'a judíospä. Mänitä Dios jaduñ wyiinmaayy mänaa cøxiä wiinä yhädiuñän. Cab hajxy xchoj yajwiinjuøyyäm. Jecy jaduñ yaghijty cuyu'uçh. ¹⁰ Hoorä, coo ja'a Jesucristo hajxy nägøxiä tøø xyajnáhwaats tøø xyajcuhwáatsäm, møød højts judíospä näguipxy møød mijts ca'a judíospä, coo ja'a Diosmädia'agy hajxy näguipxy nmäbøjcäm coo tiømiädia'agy, jaduñä Diosmoonsä hajxy jim ñajuøøñä tsajpootyp coo ja'a Dios jiaançh tehñ quiuwiinmahñdiä madiu'u. Haa ca'a, xyhíxämä Diosmoonsä hajxy coo hajxy tu'ugmädia'agy jaduñ nhjítänä. ¹¹ Jaduñä Dios ñä'ägädä wiinmaayy jequiän, jajty hädaa naaxwiin yhädiuñ. Jaduñ yajtøjiajty coo ja'a Jesucristo hajxy hoy xñähho'túutäm, ja'a hajxy nWiindsøn'hájtämbä. ¹² Coo ja'a Jesucristo hajxy nmøødhjítäm tu'ugmädia'agy, coo ja'a miädia'agy hajxy nmäbøjcäm, jaduñä tøyhajt hajxy nmøødhájtäm coo ja'a cuhdujt hajxy nmøødhájtäm coo ja'a Dios hajxy nba'yáaxämät. Jaduñä tøyhajt hajxy nmøødhájtämbä coo hajxy xmiädóowäm. ¹³ Mijts nmänuu'xtaacyy coo hajxy mga'a jootmayhádät, hóyhøch yaa nja tsaachpøcy. Páadyhøch chaa ndsaachpøcy cooçhä Diosmädia'agy nyajwa'xy maa mijtsän. Páadiäts hajxy jaduñ mxoondá'agät.

¹⁴⁻¹⁶ Ja'a nWiindsøn'hájtäm Jesucristo, Dios je'e Tieedyhajpy. Tieedyhajpiä Dios hajxy je'ebä põnjaty jim tsánaaby tsajtcøxp møød põnjaty yaa tsánaaby hädaa yaabä naaxwiin. Coo ja'a Jesucristo hajxy tøø xpiädáacäm tu'ugmädia'agy møød højts judíospä näguipxy møød mijts ca'a judíospä, páadyhøçhä Dios hamuumdu'joot nmänuu'xta'agy coo mijtsä mäjaa ween xmio'oy ja'a yhEspírituhaam, neby hajxy jaduñä mjuøhñdyhaam mmee'xtúgät. Xpiuhbédäbä Dios hajxy jaduñ je'eguiøxpä coo je'e miøjjä jiaançhä. ¹⁷ Jadúhnhøçhä Dios nmänuu'xtaacyy coo ja'a Jesucristo yhEspíritu hajxy ween mjaac møødhájtä, je'eguiøxpä coo ja'a miädia'agy hajxy mmäbøjcä. Jaduñ hajxy hoy yajxøn mniçhoc mnimiee'xøøjät hoy miänaaxøøjä. ¹⁸⁻¹⁹ Y jaduñ hajxy mwiinjuøøbiät coo ja'a Jesucristo hajxy xjiaançh tehñ chójcäm mõj may. Hanaxiä hajxy jaduñ xjiaançh tehñ chójcäm. Cab hajxy ca'xy nwiinjuøyyäm nebiaty hajxy jaduñ xjia tsójcäm. Cab hajxy pedyii nwiinjuøyyäm. Coo hajxy hoy nwiinjuøyyämät, hoyyä nwiinmahñdyhajxy jiadáanäm nebiä Dios ja'a wyiinmahñdiän.

²⁰ Jaançh tehñ miäjaamøødä Dios. Ja'a miäjaahaamä nwiinmahñdyhajxy xyajtägájt-säm. Jaanä miäjaahaamä mayhajt mõj may tiuumbä ja'a højtsøxphájtäm. Høxtä cab hajxy hoy nwiinjuø'øwáanäm nebiatiä mayhajt jaduñ tiuun. Mõj mayyä mayhajt jaduñ tiuun, hoy hajxy nga'a jagä mäyujwáanäm. ²¹ Tsøgä Dios hajxy hoy miänaajä wi-ingudsähgøyyäm, coo ja'a miädia'agy hajxy nmäbøjcäm, je'eguiøxpä coo ja'a Jesucristo

hajxy tøø xñähho'túutäm. Tøyhajt jaduhñ.

4

¹ Coochä Jesucristocøxpä nduñ, páadyhöch chaa ndsumyčhäna'ay. Coo mijtsä Dios tøø xyajñhdijy coo hajxy hoy mwädítät, paady hajxy jaduhñ mgudiúnät. ² Cab hajxy myajcumáyät. Mee'xxieemy hajxy mhídät. Mmee'xtúgäp hajxy jaduhñ. Hamiñ haxøpy hajxy mničhoc mnimiee'xóøjät. ³ Naxy hajxy tu'ugcopc tu'ugwiinmahñdy mdehmñ yhídät. Ja'a Dioshespíritu hajxy jaduhñ xyaghídäp tu'ugmädia'agy. ⁴ Tu'ugmuquiä Jesucristo miädia'agy hajxy nbanócxäm, møød højts judíospä näguipxy møød mijts ca'a judíospä. Tu'ugmuquiä Dioshespíritu hajxy nmøødhájtäm. Nägøxiä Dios hajxy xyajñhdíjjäm coo hajxy jim xyajñøcxäänäm maa ja'a wyiinduumän. Tu'ugmucy hajxy jaduhñ njøbhíjxäm. ⁵ Tu'ugmuquiä Jesucristo hajxy nWiindsønñájtäm. Tu'ugmuquiä miädia'agy hajxy nmäbójcäm coo tiømiädia'agy. Ja'a Jesucristocøxpä hajxy nägøxiä nnäbéjtäm. ⁶ Tu'ugmuquiä Dios hajxy nDeedyhájtäm nägøxiä. Jaaya'ay hajxy xyhanéh-mäm nägøxiä. Ja'a højtscøphájtäm jaaya'ayä mayhajt tiuñ nägøxiä. Jaaya'ay hajxy hoy xmiøødhíjtäm nägøxiä.

⁷ Cøjhawiingatiä Jesucristo hajxy tøø xyajñhdíjjäm nebiaty hajxy ndúuñämät. ⁸ Jaduhñä Diosmädia'agy miäna'añ:

Coo jim ñøcxy tsajpootyp, tsumiä miädsip yajñøcxy, ja'a hajxy hñajty tøø quia'a mäjädá'aguiäbä.

Mänitä jiamiøød madiu'u miooyy cøxiä wiinä.

⁹⁻¹⁰ Coo jaduhñ miäna'añ coo ja'a Jesucristo ñøcxy tsajpootyp, jaduhñ miäna'ana'añ coo hñajty yaa tøø yhoy hädaa yaabä naaxwiin. Jim hñajty tøø yhuuc tsohndaacpä tsajpootyp. Y coo jim ñøcxtägajch Dioswiinduum, jim mõj jaanč yhijnä. Jim jaduhñ yhanehmñä tsajpootyp møød hädaa yaabä naaxwiin. ¹¹ Ja'a Jesucristo højts xpiädaac coo højts madiu'u ndúnät jaaya'aguiøxpä. Näje'e højts xyajñhdijy coo højts ndúnät apóstol. Je'eč jaduhñ nnänøømby coo højtsä Jesucristo xquiejtsohñ Diosmädia'agy-yajwa'xpä wiinduhmyhagajpt. Näje'e hajxy yajñhdíjjäbä coo ja'a Diosmädia'agy hajxy jiaac yajwá'xät. Näje'e hajxy yajñhdíjjäbä coo ja'a Diosmädia'agy hajxy yajwiingapxó'øwät. Näje'e hajxy yajñhdíjjäbä coo ja'a Diosmädia'agy hajxy yajñhixó'øwät. Näje'e hajxy yajñhdíjjäbä coo hajxy quiopc-hádät maa ja'a hermanodøjc-hajxy yhamugø'øyän Dioswiingudsähgøøbiä. ¹² Paady hajxy jaduhñ tiuñ, jaduhñä Diosmädia'agy hajxy maas hoy quiudiúnät coo ja'a Diosmädia'agy hajxy miäböcy. Jaanä jaduhñ hajxy tiúumbät ja'a Dioscøxpä. Jaduhñ hajxy maas hoy wiädítät nägøxiä coo ja'a Jesucristo hajxy pianøcxy. ¹³ Jaduhñä Dios ja'a miädia'agy hajxy tu'ugmucy hoy nmäbójcämät nägøxiä coo tiømiädia'agy ja'a Jesucristocøxpä. Y jaduhñä Jesucristo hajxy hoy nmøødhíjtämät tu'ugmädia'agy, ja'a Dioshuung. Jaduhñä Diosmädia'agy hajxy maas hoy nwiinjuøyyämät. Jaduhñ hajxy maas hoy nyajtúuñämät. Mänit hajxy hoy nwiinmäyyämät nebiä Jesucristo wyiinmayyän. Y jaduhñ hajxy hoy nwädíjtämät nebiä Jesucristo hoy wiäditiän. ¹⁴ Pønjetiä Diosmädia'agy hoy ca'a wiinjuøøbyñä, jaanč tehñ piaquiä hajxy yajwiinhøøñ. Hoy tyii mädia'aguiä hajxy miäböga'añ. Hix, ja'a hñana'c-hajxy mäwiinhøhmä, jiaanč tehñ jiajpy hajxy mäwiinhøøn. Jaanč tehñ piaquiä hajxy jaduhñ xwyiinhøønät. Pero højtshájtäm, cab højts jaduhñ nyajwiinhøhñämät. ¹⁵ Pero, tsøg hajxy tøgüápäm, tsøg hajxy tømiädiäcäm. Tsøg hajxy tsójcäm, tsøg hajxy mée'xäm pønjaty hajxy nmøødmädiäcäm. Jaduhñ hajxy hoy nwädíjtämät nebiä Jesucristo hoy wiäditiän, ja'a hajxy nWiindsønñájtämbä. ¹⁶ Coo hajxy nhíjtämät tu'ugmädia'agy, coo hajxy nnibiuhbéjtämät hamiñ haxøpy nebiatiä Dios hajxy tøø xtiuungmóoyyäm, jaduhñä Jesucristo hajxy xpiuhbéjtämät, neby hajxy jaduhñ maas hoy nničhojc nnimiee'xämät hamiñ haxøpy, nebiä Diosmädia'agy hajxy jaduhñ maas hoy nwiinjuøyyämät, neby hajxy jaduhñ maas hoy ngudiúuñämät.

¹⁷⁻¹⁹ Pønjetiä Diosmädia'agy ca'a panøcpx, cab hajxy miøjpäda'agy tijaty jaduhñ tsoobaatp. Cab hajxy tii wyiinjuø'øy. Jaanč tehñ xiexä jiootä quiopc-hajxy; paady

hajxy quia'a wiinjuø'øy coo ja'a Dios ja'a møjmayhajt tøø tiuñ ja'a højtscøxphájtäm, paady hajxy quia'a cumayii ja'a Diósäm. Tsähdiuhndägoy hajxy jaduhñ. Hanaxiä hajxy yhaxøøgiatcø'øy cøxypänejpä. Paady mijts jaduhñ nmägapxy nhane'emy ja'a Jesucristocøxpä, paady hajxy mnajuø'øy coo jaduhñ quia'a hoyyä coo hajxy jaduhñ mga'a haxøøgwädíjnät, neby hajxy naamnä tøø nmägapxy tøø nhane'emiän. ²¹ Tøyhajt jaduhñ coo hajxy tøø mhabøcy ja'a Jesucristocøxpä. Jaaya'ay hajxy xyajñähixøøyy ja'a yhEspírituhaam. Hix, tøgüiapxp tømíadiaacp je'e. ²² Jaduhñ hajxy xyajñähixøøyy coo ja'a mhaxøøgcuhdujt hajxy mnajtshixø'owät neby hajxy hijty mhaxøøgjäya'ayhatiän. Mdu'udägoyyaamb hajxy hijty je'egüiøxpä coo hajxy hijty cøxiä wiinä mhadsocy, cooc tyijy hajxy hijty jaduhñ mbaada'añ ja'a hoyhajtä weenhajt. Pero myajwiinhøhmb hajxy hijty. Hix, cabä hoyhajtä weenhajt hajxy jaduhñ mbáadät. ²³ Pero, yajtägatsä mjootä mwiinmahñdy hajxy. ²⁴ Tøø ja'a Dios hajxy xmióoyyäm ja'a hawiinjembä howyiinmahñdy nebiä Dios hajxy jaduhñ hoy nbahíxämät. Jaduhñ hajxy tøyhajt hoy mjäya'ayhädät. Jaduhñ hajxy tøyhajt haxøøg mga'a wädíjnät.

²⁵ Jaduhñds je'e, cab hajxy mhøhndáacnät. Tøyhajt hajxy mmädiáacnät. Hix, tu'ugmädia'agy hajxy nhíjtäm.

²⁶⁻²⁷ Coo hajxy tähoocjaty mnimiäjootma'adøøjät, paquiä hajxy jadähooc mnimiägäpø'cägumbät, coo ja'a møjcu'ugong hajxy jaduhñ paquiä xñä'ä yajcädiéeyät.

²⁸ Pønjaty mee'tsp, cab hajxy miéé'tsnät. Ween hajxy tiuunnä, jaduhñä wiingjäya'ay hajxy piuhbädät pøn jaduhñ yajmaajiajp.

²⁹ Cab hajxy mhaxøøgcápät. Coo hajxy hoy mgapx mmädiá'agät, jiaac wiinjuø'owaambiä jäya'ayhajxy, ja'a homiädia'agy hajxy hoy mädoobä. Jaduhñä Dios ja'a mayhajt tiünät jaaya'agüiøxpähajxy, ja'a hajxy jaduhñ mädoobä. ³⁰ Cabä DioshEspíritu hajxy myagjootmadiägø'owät. Hix, jaaya'ay hajxy jaduhñ xcwieendähadäänäm høxtä coonä ja'a Jesucristo hänajty yaa quiädaactägatsa'añ. Mänit jaduhñ quiäxø'øga'añ coo hajxy hänajty tøø xyajñähwaats tøø xyajcuhwäatsäm, møød coo hajxy hänajty tøø xyajpädsøømäm haxøøgtuum.

³¹ Cab hajxy mnixiøøghájtänät. Cab hajxy mnimiädsiphájtänät. Cab hajxy mnimiäjootmá'tänät. Cab hajxy mniyhójjänät. Cab hajxy mniñähójjänät. Cab hajxy mnimiähahájtänät. ³² Pero, mniçhoc mnimiee'xøøjäp hajxy hamiñ haxøpy. Mniñäx-uudsøøjäp hajxy jaduhñ. Mnimiee'xøøjäp hajxy jaduhñ. Hix, jaduhñä Dios hajxy tøø xmiéé'xäm ja'a Jesucristocøxpä.

5

¹ Xyhuunghájtämä Dios hajxy; xchójcäm hajxy jaduhñ. Naxiä Dios hajxy ndehm piahíxämät. ² Mniçhoc mnimiee'xøøjäp hajxy nebiä Jesucristo hajxy xchójcäm. Coo hajxy jaduhñ xchójcäm, paady hajxy tøø xñähho'túutäm. Quiumaayy ja'a Dios jaduhñ.

³ Coo ja'a Dios hajxy xyhuunghájtäm, paady hajxy haxøøg mga'a nä'ägädä jatcø'owät. Ni mga'a hadsógät jäya'adio'oxiøjc hajxy. Jaanä jaduhñ mijts to'oxiøjc-hajxypä, caj mijts wiingya'adiøjc mmøødmábät. Ni mga'a hadsójcät hajxy ja'a mmädo'oxiøjcä ñihyhap. Ni cab hajxy mhaxøøgcápät. ⁴ Cabä haxøøghaaw hajxy mmøødhädät. Cab hajxy mguhhinmädiá'agät. Cab hajxy mhanähädät. Cab jaduhñ yhawiinmatsä coo hajxy jaduhñ mjatcø'owät. Pero ja'a Dios hajxy mnämä'awäp: "Dioscujú'uyäp." ⁵ Tøyhajt jaduhñ, pøn haxøøg jatcøøby, pøn jäya'ajie'e jaanç tehñ yhadsojp, cab jim tiägø'owa'añ maa ja'a Jesucristo wyiinduumän, maa ja'a Dios ja'a wyiinduumän. Hix, pøn jäya'ajie'e hadsojp, cabä Dios hoy wyiingudsähgø'øy. ⁶ Cab hajxy nyajwiinhøhñämät coo jäya'ay hajxy hänajty xjia nämáayyämät cooc tyijy yhooyä coo hajxy haxøøg njatcøøyyämät, nébiäts naamnä tøø nmägapxy tøø nhane'emiän. Ja'a häna'c-hajxy ca'a mabøjpä, ja'a häna'c-hajxy jaduhñ haxøøg jatcøøbiä, nébiäts naamnä tøø nmägapxy tøø nhane'emiän, yajcumädowáanäp hajxy je'eduhñ ja'a Diósäm. ⁷ Paady jaduhñ, tsøc ca'a møødjatcøøyyäm näguipxy.

⁸ Mijts, cabä Diosmädia'agy hajxy hijty mmädoyyä. Mhaxøøgwädiyp hajxy hijty, mөөd hajxy hijty haxøøgjaty mjatcø'øy. Pero coo ja'a Jesucristo miädia'agy hajxy tөө mmäbøjcänä, paadiä mwiiinmahñdy hajxy mmөөdän hawa'adstuum. Jaduhñä mwiiinmahñdy hajxy mjaac yaghídät. ⁹ Pønjetiä wyiinmahñdy hawa'adstuum, hojioot hajxy miөөd. Hoy hajxy jäya'ayhaty. Tøguiapxp tømiiädiaacp hajxy je'e. ¹⁰ Mjaac habøgäp hajxy jaduhñ nebiatiä Dios hajxy xyajñähixø'øy neby hajxy jaduhñ maas hoy mjäya'ayhádät. Jaduhñä Jesucristo hajxy xmiaas cumáyät. ¹¹ Ja'a häna'cä Diosmädia'agy hajxy ca'a mäbøjpä, cab hajxy hoy jäya'ayhaty. Cab hajxy jaduhñ cøxypänejpä mmөөdjatcø'owät; pero mwiiinguhojø'owäp hajxy jaduhñ. ¹² Jaanč tehñ yhočhähdiiuunnä hajxy hamee'ch jiatcø'øy; páadyhöch nga'a nägapxa'añ nebiaty hajxy jaduhñ jiatcø'øy. ¹³ Coo jäya'ay hajxy nwiinguhojøyyämät coo hajxy yhaxøøgwädity, nebiä Diosmädia'agy miäna'añän, mänit hajxy jaduhñ yhooc tehñ ñajuó'owät coo hajxy tøyhajt yhaxøøgwädity. ¹⁴ Jaduhñä jäya'ayhajxy näje'e miäna'añ:

Pøn jaduhñ maab, ma'abiädø'og hajxy;

pøn jaduhñ tөө yho'ogy, mjujypiojtägätsäp hajxy.

Ja'a Jesucristo mijts xquiujajaamb xquiudøø'xaamb.

Jaduhñ miädia'agytägø'øy, pønä Diosmädia'agy ca'a mäbøjp, ween hajxy miäböcy. Jaduhñä Jesucristo hajxy xyajwiinjuó'owät coo je'eyyä jaduhñ tu'uquiiä ja'a mbojpa mgädieey hajxy xyajñähwäatsät.

¹⁵ Jaduhñds je'e, nägüeentä hajxy mwädítät. Cab hajxy mnibiäda'agøøjät nebiä jäya'ayä Diosmädia'agy hajxy ca'a wiinjuøöbiän. Paady hajxy hoy mwädítät coo ja'a Diosmädia'agy hajxy mwiiinjuø'øy. ¹⁶ Naxy hajxy hoy mdehñ wiädítät. Hix, jiaanč tehñ miäwädiypä jäya'ayä haxøøgwiiinmahñdy hajxy jäda'ahaty. ¹⁷ Hoorä, cab hajxy mnibiäda'agøøjät nebiä jäya'ayhajxy ca'a jajpän. Naxiä Dios ja'a miädia'agy hajxy mdehñ wyiinjuøöyyät mdehñ wyiinmädóowät nebiatiä jioot chocy coo hajxy mgudiúunät. ¹⁸ Cab jaduhñ yhooyä coo hajxy mmu'ugøøjät; yajtägoobiä jocnøø jaduhñ. Pero weenä Dioshespíritu hajxy xjiaac puhbéjtäm coo ja'a miädia'agy hajxy jaduhñ njaac cudiúunäm. ¹⁹ Coo ja'a Dioshespíritu hajxy xpiuhbéjtäm, jaduhñ hajxy nnijioot-capxmøcpøjcäm ja'a Dioshøyhaam. Jaduhñä Dios hajxy hamuumdu'joot mwiiinhøw mwiiinyá'axät. ²⁰ Hoy miäduhñajtä Dios hajxy mnämá'awät: “Dioscujú'uyäp”, ja'a Jesucristocøxpä, ja'a hajxy nWiindsøn'hájtämbä. Paadiä Dios hajxy jaduhñ mnämá'awät: “Dioscujú'uyäp”, coo ja'a hoyhajtä weenhajt hajxy je'e xmióoyyäm. Hix, je'e hajxy nDeedyhájtäm.

²¹ Hoorä, coo ja'a mmähermano waamb xyhané'emät, hamuumdu'jootä miädia'agy mgudiúunät, je'eguiøxpä coo ja'a Jesucristo hajxy hoy nwiingudsähgøöyyäm.

²² Mijts to'oxiøjc-hajxy, mgudiúunäbä mnihyhapä miädia'agy hajxy. Jaduhñä Jesucristo hajxy xyhane'emy, ja'a hajxy nWiindsøn'hájtämbä. ²³ Coo ja'a mnihyhaphajxy quiopc-haty maa mijtsän, jaduhñ mäwiin miäbaady coo ja'a Jesucristo hajxy nWiindsøn'hájtäm coo ja'a miädia'agy hajxy hoy nmäbøjcäm. Jaaya'ay hajxy xyajñähwäatsäm. ²⁴ Coo ja'a Jesucristo miädia'agy hajxy ngudiúunäm, jaduhñ mijtsä mnihyhapä miädia'agy mgudiúunäbät, waambaty hajxy jaduhñ xyhane'emy.

²⁵ Hoorä, mijts ya'adiøjc-hajxy, mdsógäp mmée'xäbä mdo'oxiøjc hajxy nebiä Jesucristo hajxy xchøjcäm. Hix, tөө hajxy xñähho'túutäm. ²⁶ Paady hajxy tөө xñähho'túutäm, jaduhñ hajxy tөө xyajñähwäatsäm ja'a nbojpa ngädieeyhájtäm. Paady hajxy jaduhñ tөө xyajñähwäatsäm coo ja'a miädia'agy hajxy tөө nmäbøjcäm. Y coo hajxy nnäbéjtäm, jaduhñ hajxy mnänäänäm coo ja'a nbojpa ngädieey hajxy tөө xñähwäatsäm. ²⁷ Paadiä Jesucristo hajxy tөө xñähho'túutäm, jaduhñ hajxy hoy yajxon xyhíxämät nebiä puji nebiä je'ečhpän coo hñajty yaa quiädaactägätsa'añ. Hix, tөө ja'a nbojpa ngädieey hajxy hñajty xyajñähwäatsäm. ²⁸ Jaduhñds je'e, mijts ya'adiøjc-hajxy, mdsógäp mmée'xäbä mdo'oxiøjc hajxy nebiä mhamdsoo ni'x nebiä mhamdsoo copc hajxy mjuø'øyän. Pønä tio'oxiøjc tsojp mee'xp, jaduhñ miäbaady nebiä yhamdsoo ni'x nebiä yhamdsoo copc choquiän. Hix, tu'ugni'x tu'ugcopc hajxy jiaty coo to'oxiøjc

hajxy wyiingpøcy. ²⁹ Hix, cap pønä yhamdsoo ni'x yhamdsoo copc xiøøghaty. Pero ngüeendähájtämä nni'x ja'a ngopc-hájtäm hajxy; jaduñ mäwíinäts miäbaady nebiä Jesucristo hajxy xcwieendähájtäm. ³⁰ Hix, tu'ugjoot tu'ugwiinmahñdiä Jesucristo hajxy xmiøødhíjtäm coo hajxy nWiindsøn'hájtäm. ³¹ Jaduhñä Diosmädia'agy miäna'añ: "Jaduhñds je'e, coo ja'a ya'adiøjc to'oxiøjc piaady, mänitä tiaj tieedy piuhyohdiuutnä. Jaduhñ mäwíinädsä ya'adiøjc-hajxy jiaty møødä tio'oxiøjc nebiä tu'ugni'x nebiä tu'ug-copcän." ³² Jaançh tehñ yajxón hädaa mädia'agy jaduñ. Cabä Dios hajxy hijty xchoj yajwiinjuøyyäm. Jaduhñçh nwiinjuø'y, coo ja'a ya'adiøjcä tio'oxiøjc miøødhity tu'ugmädia'agy, coo jaduñ miøødhity tu'ugni'x tu'ugcopc, jaduñ mäwíinäts miäbaady coo ja'a Jesucristo hajxy xmiøødhíjtämbä tu'ugmädia'agy coo ja'a miädia'agy hajxy nmäbøjcäm. ³³ Jaduhñds je'e, jaduñä mdo'oxiøjc hajxy mdsoc mmée'xät nebiä mhamdsoo ni'x nebiä mhamdsoo copc hajxy mdsoquiän. Y mijts to'oxiøjc-hajxy, jaanä jaduñä mnihyhap hajxy mwiingudsähgøøbiät.

6

¹ Mijts pigäna'tøjc-hajxy, mgudiúunäbä mdajjä mdeediä miädia'agy hajxy ja'a Jesucristocøxpä, ja'a hajxy nWiindsøn'hájtämbä. Hahixøøby jaduñ coo hajxy jaduñ mgudiúnät. ²⁻³ Jaduhñä Diosmädia'agy miäna'añ: "Pønjatiä tiaj tieedy wiingudsähgøøby, je'eçh hajxy hoy nyaajtsäna'awaamby nyaghäyowaamby hädaa yaabä naaxwiin; je'eçh hajxy jecy nyagjugyhadaamby", nømä Diosmädia'agy miäna'añ. Coo ja'a Dios hajxy jaduñ jecy xyhanéhäm, mänit jaduñ miänaandsohñ coo ja'a mayhajt hänajty tiuna'añ ja'a højtscøxphájtäm.

⁴ Mijts taj teedyhajxy, cabä mnøøx cabä mmajc hajxy hanaxiä mhójtät coo hajxy xmiähanhádät. Jaduhñä mhuung hajxy mmägäp mhané'emät coo hajxy hoy wiädítät. Jaduhñ hajxy quiumayøøjtät ja'a Jesucristäm, ja'a hajxy nWiindsøn'hájtämbä.

⁵ Näje'e mijtsä jäya'ayhajxy xjie'ehaty nebiä waj nebiä cuaayän. Mgudiúunäbä mwiindsønä miädia'agy hajxy hamuumdu'joot, ja'a hajxy hädaa yaabä naaxwiimbä. Mwiingudsähgøøwäp hajxy jaduñ nebiä Jesucristo hajxy nwiingudsähgøøyyäm. ⁶⁻⁷ Hoyyä jäya'ayhajxy tiuñ coo ja'a wyiindsøn hajxy hänajty wyiindäna'ayii neby hajxy jaduñ quiumayøøjtät ja'a wyiindsønäm. Pero näje'e jäya'ayhajxy hoy quia'a tuñ coo ja'a wyiindsøn'hajxy hänajty quia'a jimä. Mijts, cab hajxy jaduñ mbahíxät. Hamuumdu'jootä mwiindsøn hajxy mmädúnät. Jaduhñ hajxy hoy myajcähxø'ögät coo ja'a Jesucristo hajxy hoy mjaançh mäduñ. Jaaya'ay hajxy nmaas Wiindsøn'hájtäm. Jaduhñä Dios chojpä. Ja'a Jesucristocøxpä hajxy jaduñ mdúnät. Ca'a jiäya'aguixpähajtiä hajxy mdúnät. ⁸ Mjahmiédsäp hajxy jaduñ, coo ja'a nwiindsøn hajxy hoy nmädúunämät, hoy hajxy xjia je'ehájtäm nebiä waj nebiä cuaayän, mänitä Jesucristo ja'a hoyhajt weenhajt hajxy xmiøoyämät.

⁹ Jaduhñ mijtspä, cumoonsädøjc, mnäxúudsäbä mmoonsä hajxy jaduñ. Cab hajxy mhadsähgøøwät. Haa ca'a, jaduñ mijtsä Dios hajxy xyhanehmbä nebiä mmoonsä hajxy xyhanéhmbän ja'a Diósäm, ja'a jim tsajpootypä. Haa ca'a, cabä Dios hajxy wiing xyhíxäm. Haa ca'a, tu'ugjäya'ayhájtäm hajxy nägøxiä.

¹⁰⁻¹¹ Hoorä, mänuu'xta'agä Dios hajxy coo hajxy ween xpiuhbety ja'a miäjaahaam; jaduñä miädia'agy hajxy maas hoy mjaac mäbøjcät. Hix, jaançh tehñ miäwiinhøhmbä møjcu'ugong. Pero jiaançh tehñ miøødä Dios mäjaa. Y coo hajxy jaduñ xpiuhbédät, cabä møjcu'ugong hajxy jaduñ myajmäjädá'agät. ¹² Hix, ja'a møjcu'ugong hajxy yaa xmiädsibøøyyäm møødä mioonsä hajxy, ca'a jiäya'ayhajxiä ja'a hädaa yaabä naaxwiimbä. Haxøøgä møjcu'uhajxy jiäya'ayhaty. Pojhaam hajxy wiädity. Cabä ni'x copc hajxy tiehñ miøødä neby højtshájtäm. Møcä mäjaa hajxy jiaançh tehñ miøødä. Ja'a hädaa yaabä naaxwiimbä haxøøgjäya'ayhajxy hanéhmbä møjcu'ugóngäm. Hoy chajtcøxpä ja'a møjcu'uhajxy wiädity. ¹³ Paadiä Dios hajxy mmänuu'xta'agät coo hajxy ween xpiuhbety ja'a miäjaahaam. Jaduhñä møjcu'ugong hajxy hoy mjøjtänä'awät. Jaduhñ hajxy mga'a yajmäjädá'agät. ¹⁴ Jøjtäna'awxä ja'a møjcu'ugong hajxy. Naxy hajxy hoy

miánaaxøøjä mdehm̄ tiømiädiá'agät. Jaduhñ hajxy hoy mmee'xtúgät. Jaduhñ mäwíinäts miäbaady nebiä soldadohajxy møc ñiwiøhn̄ta'açhiijän coo hajxy hñajty chiptuna'añ. Naxy hajxy hoy yajxon̄ mdehm̄ wiädítät. Jaduhñä Dios hajxy xñäwá'anät. Jaduhñ mäwíinäts miäbaady nebiä soldado latapujxt hajxy yajniguiäaachjubø'øyiiijän. Jaduhñ hajxy hoy miäjäda'aga'añ. ¹⁵ Niyhahixø'øwøø hajxy nebiä Diosmädia'agy hajxy jaduhñ hoy mmäwädítät. Coo jäya'ayä Diosmädia'agy hajxy miäbøgät, jaduhñ hajxy jootcuyc yhidät. Jaduhñ mäwíinäts miäbaady nebiä soldadohajxy ñiyhahixø'øyiiijän coo ja'a quiø'og hajxy piägø'oy. ¹⁶ Naxiä Dios ja'a miädia'agy hajxy mdehm̄ miäbøjcät coo ja'a Jesucristo hajxy tøø xyajnahwáatsäm. Jaduhñä møjcu'ugong hajxy mga'a yajmäjädá'agät. Jaduhñ mäwíinäts miäbaady nebiä soldado escudo hajxy yajniyhawähajtugyiiijän neby hajxy jaduhñ quia'a tøpxøøjät ja'a tøpxquepty tóoyyöp queecpä. ¹⁷ Naxiä Diosmädia'agy hajxy mdehm̄ miäbøgät coo ja'a Jesucristo hajxy tøø xñähho'túutäm. Jaduhñ mäwíinäts miäbaady nebiä soldado pujxcuhjup hajxy miøødän. Naxiä Diosmädia'agy hajxy mdehm̄ yhabøgät nebiä Dioshèspíritu hajxy xyajnahixø'øyyäm. Jaduhñ mäwíinäts miäbaady nebiä soldadohajxy espadacap chiptuñän. ¹⁸ Coo ja'a Dios hajxy mba'yá'axät, mmäyujwá'anöp hajxy tijaty hajxy hñajty myajmaajiajpy. Mmäyajtówäbä Dios hajxy ja'a yhEspírituhaam tijaty hajxy mmäyujwá'anöp. Mmänuu'xtá'agäbä Dios hajxy ja'a jäya'aguiøxpä, ja'a Diosmädia'agy hajxy panøcxpä. Cab hajxy mnänuuxø'øwät coo ja'a Dios hajxy hñajty mba'ya'axa'añ. ¹⁹⁻²⁰ Møød høøçhcøxpøçhä Dios hajxy xpia'yáaxäbät cooçhä Dios xñajtsapxø'øyyät waambátyhøch ngapx nmädiá'agät cooçhä miädia'agy hñajty nyajwa'xä, ja'a hijty yaghijpiä cuyu'uçh. Ja'a Dióshøch jaduhñ xwyiinguejx cooçhä miädia'agy jaduhñ nyajwá'xät. Páadyhøch chaa ndsumyçhäna'ay ja'a Diosmädia'agyquiøxpä. Jaduhñhøçhä Dios hajxy xpia'yáaxäbät cooçh nga'a tsähgø'øwät cooçhä miädia'agy hñajty nyajwa'xä, nébiøch jaduhñ hoy ngudiúnät.

²¹⁻²² Nguexáambiøçhä hermano Tíquico jim̄ maa mijtsän. Coo jim̄ miédsät, jim̄ hajxy jaduhñ xyhawáanät nebiaty højts chaa ngudiuñ nguñaxy, coo højts hoy ween nhity, neby hajxy jaduhñ mga'a jootmayhájñät ja'a højtsøcxpä. Hóyhøçhä hermano Tíquico nmøødnijiootpaadyii. Hóyhøch jaduhñ xmiøødtuñ ja'a Jesucristocøcxpä.

²³ Ween mijtsä Diostedy hajxy xmio'oy ja'a hoyhajtä weenhajt møødä Jesucristo, ja'a hajxy nWiindsøn'hájtämbä. Weenä Dios hajxy xpiuhbety nebiä miädia'agy hajxy maas hoy mjaac mäbøjcät, neby hajxy jaduhñ maas hoy mniçhoc mnimiee'xøøjät. ²⁴ Weenä Dios ja'a mayhajt tiuñ ja'a højtsøcxphájtäm nägøxiä coo ja'a Jesucristo hajxy nwiingudsähgø'øyyäm hamuumdu'joot, ja'a hajxy nWiindsøn'hájtämbä. Tøyhajt jaduhñ. Amén.

Filipenses

¹ Jesucristo hõjts xmioonsáhajp, hõõch Pablo mөөdä Timoteo. Hõjts mijts hádaa nocy nyajnäjaayөөby mäduhñtiä mijts ja'a Diosmädia'agy hajxy jim mbanөcxy maa ja'a cajpt xiõhatiän Filipos, nägөxiä mөөdä mwiindsөnhajpä jii by tsajtөгootypä, mөөd hajxy jii by puhbejpä. ² Weenä Dios hajxy xmio'oy hoyhajt weenhajt, ja'a nDeedyhajtäm hajxy jim tsajpootypä mөөdä Jesucristo hajxy nWiindsөnhajtämbä.

³ Naaghóoc-höch mijts njahmiejtsta'agy, nnämäabiöch ja'a Dios "Dioscujú'uyäp" maa ja'a mijtsөxpän. ⁴ Naaghóoc-höch ja'a Dios nba'ya'axy, nmäyujwáambiöch hoyhajt weenhajt ja'a mijtsөxpä. Coochä Dios hánajty nba'ya'axy ja'a mijtsөxpä, jootcújc-höch hánajty nnijiäwө'oyii, ⁵ je'eguiөxpä coo ja'a Diosmädia'agy hajxy näguipxy төө nya-jwá'xäm, mänaa hajxy төө mmädoodsoönän hөxtä je'enä jäda'anäbaadyñä. ⁶ Ja'a Dios ja'a hodiung yajtsohndaac ja'a mijtsөxpä. Nmөdhdөchä төyhajt jaduhñ coo ja'a Dios ja'a tiuung hoy yajtu'uyo'oya'añ hөxtä coonä Jesucristo hánajty quiädaactägatsa'añ. ⁷ Páadyhөchä төyhajt nmөөdä cooch mijts njaanч tehñ chocy njaanч tehñ pia'häyoy, coo ja'a Dios hajxy xpiuhbéjtäm näguipxy, homiáajöch nhity, hoy piujxtөгootiä, hoy yhagujcä, cooch hánajty nmädia'agy coo ja'a Diosmädia'agy tiөyyä. ⁸ Najuөөbiä Dios cooch mijts njaanч tehñ chocy njaanч tehñ pia'häyoy nägөxiä, nebiä Jesucristo hajxy xchójcäm. ⁹ Nmänuu'xtáacypiöchä Dios coo hajxy hamuumdu'joot mjaac niçhoc mjaac nibia'häyowөjät, coo hajxy hoy mguhwijyhädät, ¹⁰ neby hajxy jaduhñ mnajuö'owät mwiimbíwät ja'a hojiatypä hajxy. Jaduhñ hajxy mhídät hawa'adstuum nebiä Dios hajxy xyajmädsójcäm, hөxtä coonä Jesucristo hánajty quiädaactägatsa'añ. ¹¹ Xpiuhbédäp ja'a Jesucristo hajxy neby hajxy jaduhñ hoy mwädítät. Jaduhñdsä Dios hoy quiähxө'ögät coo miөjjä coo jiaanчhä.

¹² Hermanodөjc, huuc wiinjuө'ow hajxy jaduhñ; cooch yaa ndsumyçhänä'ay, maas hóyhөchä Diosmädia'agy jaduhñ yaa nyajwa'xy. ¹³ Nägөxiä cu'ughajxy төө miädoyhaty coochä Jesucristo miädia'agy ngudsumyçhänä'awөöyyä, nägөxiä, mөөdä soldadohajxy jim hadänaabiä maa ja'a gobernador tiөjcän. ¹⁴ Ja'a Jesucristo miädiä'agyhöch ngudsumyçhänä'awөөby. Cáböch ndajy nmay. Cooch nga'a tajy nga'a may, paadiä hermanodөjc-hajxy nämay quia'a nä'ägädä taj quia'a nä'ägädä maabiä coo ja'a Diosmädia'agy hajxy yajwa'xy, hoy hajxy cu jia tsúumäbä. Cab hajxy ñä'ägädä tsähgө'oy ni weeñtiä. Hix, hõõch hajxy jaduhñ xpiahijxp.

¹⁵⁻¹⁷ Paadiä Diosmädia'agy hajxy yajwa'xy cooch hajxy xchocy xpia'häyoy. Hojiot hajxy jiaanч tehñ miөөd. Najuөөby hajxy jaduhñ coochä Diosmädia'agy ngudsumyçhänä'awө'oy. Pero jii hajxy näje'ebä, paadiä Diosmädia'agy hajxy yajwa'xy, cooch hajxy xmiädsiphaty. Tөyhajt jaduhñ. Je'eçh hajxy xyajmädsöjp cooch yaa ndsaaçhpögät pujxtөгooty. Cabä hojiot hajxy ñä'ägädä mөөdä ja'a hõõchөxpä. ¹⁸ Pero cáböch jaduhñ nmөjpäda'agy, hóyhөch hajxy jaduhñ xjia mädsiphaty.

Xoondáacpöch jaduhñ coo ja'a Jesucristo hajxy miädia'agy, hoy hojiot hajxy quia'a ja mөөdä ja'a hõõchөxpä. ¹⁹ Y jaac xoonda'agáamböch jaduhñ. Nnajuөbiöch cooch hodiium nmähmө'owa'añ. Hix, mijts ja'a Dios hoyhajt weenhajt mmäyujwaamby ja'a hõõchөxpä. Y xpiuhbéjpöchä Dioshespíritu ja'a Jesucristocөxpä. ²⁰ Cáböchä njoot ñä'ägädä tsocy cooch ndsähgө'owät mänaajöchä Jesucristo hánajty nmädi-a'aguian. Cáböch mänaa ndsähgө'oy ndsähdiuñ. Chójpiöch njoot jaduhñ coochä Jesucristo nyajcähxө'ögät coo miөjjä coo jiaanчhä, hóyhөch njadehñ quiuho'ogө'owät. ²¹ Madúhñtiöch yaa njaac jugyhaty, nyajcähxө'ögäböchä Jesucristo coo miөjjä coo jiaanчhä. Y cooch nhó'nät, maas hoy hánajty quiähxө'ogaannä coo miөjjä coo jiaanчhä. Mänítöch jim nnөcxaannä maa je'e wyiinduumän. ²²⁻²³ Mejtstú'ujöchä njoot nyajmөdmädia'agy. Cooch nhó'ogät, mänítöch cu nnөcxnä maa ja'a Jesucristän. Maas jootcújc-höch jim nnijiäwөöyyänät. Pero cooch yaa njaac jugyhädät, maas hóyhөchä

Jesucristo jaduñ njaac mädúnät. Cábøch ndehm yhoñajuø'øy pø maas hoy cooçh nhó'nät, o pø caj. ²⁴ Høøch jaduñ mänaamb cooçh hit nga'a tsoj hó'ogät; jadúñhøch mijts ja'a Diosmädia'agy tehngajnä njaac yajnáhixø'øwät. ²⁵ Nmøødhøchä tøyhajt jaduñ cooçh mijts njaac møødhida'añ. Njaac yajnáhixø'øwáambiøch mijts tehngajnä, neby hajxy jaduñ maas hoy mmäbøgät, neby hajxy jaduñ mjaac xoonäacpøgät. ²⁶ Cooçhä Jesucristo jim xyajncxtägátsät maa mijtsän, mänit hajxy mmäna'ana'añ coo tiøyyä coo Jesucristo miøjjä jiaançhä.

²⁷ Naxiä Jesucristo miädia'agy hajxy mdehm yajtúunät. Jaduhñä Diosmädia'agy hajxy näguipxy myajwá'xät tehngajnä, hóyhøch jim nga'a ja nócxät maa mijtsän. ²⁸ Cabä mmädsip hajxy mnä'ägädä tsähgø'øwät. Jaduhñ hajxy ñajuø'øwa'añ coo hajxy haxøøgtuum yajca'awa'añijäm ja'a Diósäm, møød coo mijts ja'a Dios xpiäda'aga'añ hodiium. ²⁹⁻³⁰ Tiuumbiä Dios ja'a mayhajt coo hajxy xyajnáhdijy coo ja'a miädia'agy hajxy mmäbøjcät ja'a Jesucristocøxpä, nébiøch cham ndsaaçhpøquiän. Tøøch hajxy hamdsoo xyhixy xmiädoy cooçh yaa ndsaaçhpøcy ja'a Jesucristocøxpä.

2

¹ Coo mijts ja'a Jesucristo xchocy, paady hajxy xjiootcapxmøcpøcy. Coo mijts ja'a Dioshèspíritu tu'ugmädia'agy mmøødhity, paady hajxy hamiñ haxøpy mniçhocy mnibia'häyoyii. ² Jadúñhøch njoot jiaançh tehñ chocy coo hajxy tu'ugmädia'agy mhídät. Coo hajxy mniçhoc mnibia'häyowøøjät, maas hóyhøch nnijiäwø'øwøøjät. ³ Ca'a mhamdsoo wiinmahñdy hajxy mwi'i yajtuñ. Ca'a hajxy mniguiumayii. Jaduhñ hajxy mmäna'anät coo ja'a mmägu'ughajpä miaas jaty quejee miich. ⁴ Hamiñ haxøpy hajxy mnigwieendähadøøjät.

⁵ Mbahíxäp ja'a Jesucristo hajxy neby je'e jecy wiädiñtiän. ⁶ Hoyyä Jesucristo jia Dioshuungä, caj jiootma'ty coo ñämaayyä coo yaa jiäya'ayhadät hädaa yaabä naaxwiin. ⁷ Coo yaa jiäya'ayhajty, yhøxhijx yhamdsoo cuhdujt jaduñän. Jaduhñ ñibiädäacänä nebiä moonsän. Cab hänäjty hamdsooyyä miøjhada'añ. ⁸ Mänitä Dios miädia'agy quiudiuunä coo yhó'ogät. Höçhähdiuunnä jim cruzcøxp miøjpahbejtä. ⁹ Coo ja'a Jesucristo quiudiuunä neby ñämaayyän, paadiä yajmøjhajtä ja'a Diósäm. Ni pøn jaduñ quia'a mäbaady nebiä Jesucristän. ¹⁰ Weenä Jesucristo hajxy nägøxiä wyiingudsähgø'øy, jim tsajpootyp, møød hädaa yaabä naaxwiin, homiaajä. ¹¹ Weenä Jesucristo hajxy nägøxiä quiapxpaady coo hajxy wyiindsønhaty. Jaduhñä Dios jim quiähxø'øgät møj jaançh, ja'a nDeedyhajtäm.

¹² Mägu'ughajpædøjc, mänáajøch jim nhitiän maa mijtshajxiän, xmiäbøjcäbøchä nmädia'agy hajxy hänäjty. Hoorä, cooçh yaa jäguem nhijnä, miaas tsøjpiøch njoot cooçh nmädia'agy hajxy tehngajnä xmiäbøjcät. Naxiä Diosmädia'agy hajxy mdehm miäbøgät, neby hajxy jaduñ hodiium mmähmø'øwät. Naxiä Dios hajxy mdehm wyiingudsähgø'øwät. Cab hajxy nä'ä nägoodä mnä'ä niguiumayøøjät. ¹³ Jaduhñä Dios jioot chocy coo hajxy hoy mwädítät. Xpiuhbéðäp ja'a Dios hajxy jaduñ.

¹⁴ Hoy hajxy mwädítät. Cab hajxy tii mwi'i chippädá'agät. Cab hajxy tijaty myajniguiuhøjø'øwøøjät. ¹⁵⁻¹⁶ Jaduhñ hajxy hoy mwädítät nebiä Dioshuungän maa ja'a ca'awiindøyhäna'c-hagujcän. Coo ja'a Diosmädia'agy hajxy myajnáhixø'øwät, jaduñ hajxy mwädítät nebiä jøøn yhajjiiän hagoodstuum; coo jäya'ayhajxy jaduñ miäbøgät, mänit hajxy hodiium piäda'agøøjät. Coo hajxy mgudiúnät neby hajxy chaa nnäma'ayän, mänitøch nxoondá'agät, mänaa ja'a Jesucristo hänäjty jadähooc quiädaactägatsa'añän. Cähxø'øgaamb jaduñ cooçh hänäjty hoy tøø nduñ maa mijtscøxpän. ¹⁷ Coo Diosmädia'agy hajxy hamuumdu'joot mmäbøcy, páadyhøch nxoonäda'agy, hóyhøch cu nja ho'og. Chøjpiøch njoot coo hajxy nmøødxoondá'agät. ¹⁸ Tsøgxä hajxy jaduñ xoonäacäm.

¹⁹ Coo ja'a Jesucristo ja'a nWiindsøn'hajtäm jaduñ miäná'anät, mobädájpech mijts ja'a Timoteo nyajnáguexa'añ. Cooçhä Timoteo min jadähooc xyhawaanä coo mijts hoy mhity, hóyhøch hänäjty nnijiäwø'øwa'añii. ²⁰ Páadyhøchä Timoteo jim nguexa'añ cooçh je'e nidiuhm xmiøødhity tu'ugmädia'agy maa mijtscøxpän. Xpiuhbedaaamb mijts jaduñ

hamuumdu'joot. ²¹ Ja'a häna'c-hajxy jaac yaabä, yhamdsoo tuung hajxy tiuumby. Cabä Jesucristo tiuung hajxy hamuumdu'joot tiunaanä. ²² Mnajuøøby hajxy jaduhñ coöchä Timoteo hoy xmiøødtuñ maa ja'a Diosmädia'agy myiñän, nébiøch nhamdsoo huungän. ²³ Mänitøchä Timoteo nguéxät coöch hänajty tøø nnajuø'øy pø pädsømáambøch. ²⁴ Coø ja'a Dios jaduhñ miänä'anät, mobädájpøch jim nnøcxa'añ maa mijtsän.

²⁵ Tøøch mijts ja'a hermano Epafrodito hijty xyajnäguexy coöch jaduhñ xpiuhbédät. Hóyhøch jaduhñ xjiaançh møødtuñ coöchä Diosmädia'agy nyajwa'xy. Hahixøøby coöch mijts nyajnäguejxtägätsät, ²⁶ je'eguiøxpä coø mijts xjia wi'i quiuhjxtägätsa'añ. Jaançh tehñ tiajp jaançh tehñ miáabiäc je'eduhñ coø mijts tøø mmädoyhaty coø hijty piøgyii. ²⁷ Tøyhajt hijty piøgyii. Ja weenjaty jaduhñ quia'a ho'cy. Miøødhajt ja'a Dios hojiot ja'a Epafroditocøxpä møød høøchcøxpä. Coø häxøpy tøø yho'ogy, maas hanáxiøch häxøpy njootmayhaty. ²⁸ Páadyhøch mijts ja'a Epafrodito nyajnäguejxtägätsa'añ, neby hajxy jaduhñ mxoondá'agät coø mijts jadähooc xñämejtstägätsa'añ. Coø hajxy jaduhñ mxoondá'agät, mänitøch jaduhñ hoy nnijiäwøøyyäbät. ²⁹ Coø jim miédsät maa mijtsän, xi'ig xon hajxy myajpóo'xät nebiä hermanän. Homianaaja hajxy mwiingudsähgø'øwät pønjetiä Diosmädia'agy pawädiip nebiä Epafrodito piawädiitiän. ³⁰ Paady je'e ja weenjaty quia'a ho'cy coöch jaduhñ xmiøødtuñ maa ja'a Diosmädia'agy myiñän. Pero cabä miøjpäda'agy coø ja weenjaty tøø quia'a ho'ogy. Coöch yaa xpiuhbety, mijts yaa xñähduunduutp. Hix, cábøch mijts hoy yaa xpiuhbeda'añ; jäguem mijts jaduhñ xpiaatä.

3

¹ Hermanodøjc, tsøg hajxy xoonädácäm ja'a Dioscøxpä. Chaa hajxy jadähooc nhawaandägátsänäm neby hajxy tøø nhuuc nāmaabiän. Coø hädaa mädia'agy hajxy jaduhñ myajtúnät, cab hajxy myajwiinhøønät. Ni mänáajøch jaduhñ nga'a nānuuxø'øy, hoñaaghocä hajxy jaduhñ nhawáanamät. ² Mnigwieendähadøøjöp hajxy maa häna'c-hajxy jaançh tehñ quia'awiindøybän, ja'a hajxy jaduhñ mänaambä coø hajxy tsipcøxp nyajcircuncidarhajtämät. ³ Tøyhajtä Dios hajxy xjiaançh circuncidarhajtäm coø hajxy nwiingudsähgøøyyäm. YhEspirituhaam hajxy nwiingudsähgøøyyäm. Jootcujc hajxy jaduhñ nnijiäwøøyyäm ja'a Jesucristocøxpä. Cab hajxy nmänaänäm coø ja'a jecyquiuhdujt hajxy xyajnáhwáatsäm. ⁴ Høøch, jadúhnhøch hijty nmänaambä cooc tyjy ja'a jecyquiuhdujt hajxy xyajnáhwáatsäm. Pedyiijøch hijty ngudiuñ nej yhane'emiän. Cab jaduhñ pøn ñä'ägä cudiuñ nébiøch hijty ngudiuñän. ⁵ Judíoshøch høøch. Judíospøch hijty ndajhajpy ndeedyhajpy. Benjamínhøch hijty nhaphajpy ndeedyhajpy. Mänáajøch nmiñ nga'ayän, cuctuujxøøjøch hoy nyajcircuncidarhaty, nebiä judíoshajxy quiuhdujthatiän. Ja'a fariseos miädiá'agyhøch hijty nbanøcxäp. ⁶ Nägø'ø nädécypiøch hijty ngudiuñ, høxtä ja'a hermanobáadyhøch hijty nyajtsaächpøcy. Jaançh tehñ pedyiijøchä ley hijty ngudiuñ; cábøch hijty pøn waamb xñäma'ay. ⁷ Jaançh tehñ ñiguiumáyäbøch hijty coöch hijty jaduhñ hoy ngudiuñ. Pero cábøch nniguiumáyäänänä, je'eguiøxpä coöchä Jesucristo miädia'agy tøø nbadu'ubøjcänä. ⁸ Cójxhøch nnajtshixøøñä mädyiijátyhøch hijty nyajtuumbý. Páadyhøch tøø nnajtshixøøñä, nébiøchä Jesucristo miädia'agy jaduhñ hoy nbanøcxät. Maas tsoobáatnäp hädaa coöchä Jesucristo tu'ugmädia'agy nmøødhijnä ja'a nWiindsønha-jpiä. ⁹ Coöchä Jesucristo miädia'agy nmäbøjcä, páadyhøchä Dios tøø xyajnáhwa'açh. Cábøch nmänaannä cóogøch tyjy ja'a jecyquiuhdujt xyajnáhwá'adsät. ¹⁰ Chójpjøch njoot coöchä Jesucristo tu'ugmädia'agy nmøødhijnät. Coø ja'a Jesucristo jadähooc jiuypjøjcy, paadiä mäjaa jaduhñ miooyä coöch jaduhñ xpiuhbédät. Chogáambjøch njoot coöch ndsaächpøgät ja'a Jesucristocøxpä. Høxtä ho'ogáambøch jaduhñ neby je'e yho'quiän. ¹¹ Páadyhøch njoot jaduhñ chocy coø ja'a Dios jaduhñ ween miäna'añ coöch xyagjuypjøjtägätsät.

¹²⁻¹⁴ Hermanodøjc, cábøch jaduhñ nmäna'añ coöch tøø nyajpedyii. Cábøch njahmiejtsnä nébiøch hijty nwädity. Coöchä Jesucristo xmioonsähaty, páadyhøch miädia'agy nyajcopcøøyyänä, nébiøch jaduhñ ca'xy ngudiúunänät. Ñä'ägädä tsójpiøch njoot nägø'ø

nädecypiä cooĉ ca'xy ngudiúnät. Jadúhñhøĉhä Dios jim xmiøjyá'axät tsajpootyp, je'eguiøxpä cooĉhä Jesucristo tøø xyajnáhwa'aĉh.

¹⁵ Tsøg hajxy tu'ugcopc híjtäm nébiøĉ jaduhñ naamnä ngujaayän, pønjaty ca'xy cudiuumb. Pønjaty xquia'a møødhíjtäm tu'ugcopc, weenä tøyhajt hajxy mio'oyíjäm ja'a Diósäm. ¹⁶ Tsøg hajxy tehngajnä yajtu'uyóhyäm nebiä Dios hajxy xyajnáhixøyyäm.

¹⁷ Hermanodøjc, xpiahíxäbøĉ hajxy jaduhñ nébiøĉ hoy nwädiitiän. Xpiahíxpøĉ hajxy jaduhñ nämäy. Mbahíxäp hajxy je'eduhmbä. ¹⁸ Tøøĉ mijts mayhooc nnäma'ay coo ja'a hønñdaacpähajxy may wiädity. Cábäc tyijy jaduhñ tiøyyä coo ja'a Jesucristo hajxy tøø xñähhø'túutäm cruzcøxp. Cháajäts jadähooc nnämäaguumbä. Jaanĉ tehñ hoñäjøøñä jaduhñ. ¹⁹ Haxøøgtuum hajxy yhida'añ cøjxta'axiøø. Hiñ, cabä Dios hajxy wyingudsähgø'oy. Yhamdsoo cuhdujt hajxy yajtuumb. Tijaty maas høĉhähdiuunnä, je'e hajxy ñä'ägä cumaaby. Je'e hajxy jaduhñ wyi'i chojpy coo hoyhajt weenhajt hajxy cu piaaty hädaa yaabä naaxwiin. ²⁰ Pero højtshíjtäm, jim højts njoot hamuumdu'joot nbädaacäm tsajpootyp. Ja'a Jesucristo, ja'a hajxy nWiindsønñhíjtämbä, je'e hajxy xya-jnáhwäatsäm. Je'e hajxy nhahíxäm coo jim choona'añ tsajpootyp, coo yaa miänaca'añ hädaa yaabä naaxwiin. ²¹ Mänitä nnaaxni'xhajxy xyhädiuundägatsáañänä. Jaduhñ hajxy yajxón ngähxø'øgáañäm nebiä Jesucristo yhamdsoo ni'x yhamdsoo copcän. Miøødä Jesucristo cuhdujt jim cøxp møød hädaa yaabä naaxwiin homiaajä. Paadiä nnaaxni'xhajxy xyhädiuundägatsáañäm coo cuhdujt jaduhñ miøødä.

4

¹ Hermanodøjc, njaanĉ tehñ chojpy njaanĉ tehñ pia'häyóobiøĉ mijts jaduhñ. Páadyhøĉ nja wi'i ñøcxa'añ maa mijtsän. Jaanĉ tehñ xioondäacpøĉ jaduhñ ja'a mijtscøxpä, je'eguiøxpä coo mijts ja'a Diosmädia'agy jaanĉ tehñ yhoy mgudiunñ, coo hajxy jim mnøcxa'añ tsajpootyp. Tehngajnä ja'a Dios hajxy mmøødhídat tu'ugmädia'agy.

² Evodia møødä Síntique, mijts nmänuu'xtaacypy coo hajxy mhídat tu'ugmädia'agy. Jaduhñä Diosmädia'agy hajxy hoy myajtuunmúgät. ³ Chaads miĉĉ mägu'ughajpä, hóyhøĉ miĉĉ xjiaanĉ tehñ jiamíøødhaty, tunä mayhajt, mmägápxäp mhané'emäp ja'a Evodia møødä Síntique coo hajxy tu'ugmädia'agy yhíjñät. Näguípxyhøĉhä Diosmädia'agy hajxy hoy nmøødyajwa'xy, møødä Clemente møødä hermanodøjc-hajxy may. Jim hajxy nøcxy yhidaannä tsajpootyp cøjxta'axiøø.

⁴ Tehngajnä hajxy homiänaajä mxoondá'agät ja'a Dioscøxpä. ⁵ Hoy hajxy mjaanĉ tehñ jiäya'ayhádat cu'ughagujc. Mäwiingoomb jaduhñ coo ja'a Jesucristo quiädaac-tägatsa'añ. ⁶ Cab hajxy tii mdaj mmáyät. Dios hajxy mmäyujwá'anäp coo hajxy xpiuhbédät. Mnämä'awäp ja'a Dios hajxy jaduhñ "Dioscujú'uyäp." ⁷ Mänitä Dios hajxy xmió'owät hoyhajt weenhajt. Jaduhñ hajxy tii mga'a taj mga'a máañät. Jagoo hajxy jaduhñ mjaac taj mjaac máyät ja'a Jesucristocøxpä. Ni pøn jaduhñ xquia'a puhbédät nebiä Dios hajxy xpiuhbetiän.

⁸ Hermanodøjc, chaaĉhä nocyhädiún nyajmayaannä. Je'e hajxy myajcopcø'øwäp mädyiijaty jaduhñ tøyhajt, mädyiijaty jaduhñ howyingudsähgøøñä, mädyiijaty jaduhñ hoy, mädyiijaty jaduhñ yajxón, mädyiijaty jaduhñ hoguiumaañä.

⁹ Tehngajnä hajxy hoy mgudiúnät neby hajxy tøø nyajnáhixø'yän. Jadúhñhøĉ hajxy xpiahíxät nébiøĉ hoy ngudiunñän. Jaduhñä Dios hajxy xmiøødhídat tu'ugmädia'agy. Jaduhñ hoyhajt weenhajt hajxy xmió'owät.

¹⁰ Xoonäacpøĉ je'eguiøxpä cooĉ mijts jadähooc xpiuhbéjcumbä xädø'øñhaam. Páadyhøĉhä Dios jaduhñ nnäma'ay "Dioscujú'uyäp." Jia tsojc ja'a mjoothajxy cooĉ hajxy cu xpiuhbejty, pero cab hajxy xñä'ä näbaadøyyä. ¹¹ Cábøĉ hänajty ndsippäda'agy, hóyhøĉ hänajty tii nja yajmaajiaty. Tøøĉ nhabøjnä nébiøĉ jootcujc nhíjñät, hóyhøĉ hänajty tijaty nja yajmaajiaty. ¹² Cábøĉ nmøjpädaacnä mädyiijátyhøĉ nyajmaajijpy. Cábøĉ nøcxy nniguiumayii cooĉhä Dios xpiuhbety. ¹³ Hotyíjøĉ njada'añ. Ja'a Jesucristøĉ homiänaajä xpiuhbejp. ¹⁴ Hoyøøyy cooĉ mijts xpiuhbejty xädø'øñhaam.

¹⁵ Pero jadúhñhøch mijts naxy xñä'ägädä puhbetyhaty. Cooch hänajty jim ndsoona'añ Macedonianaaxooty, mänitøchä xädø'øñ hajxy hoy xmio'oy. Páadyhøch hajxy hoy xmio'oy coochä Diosmädia'agy jim hoy njaančh tehñ yajwa'xy jim maa mijtsän jim Filiposcajptooty. Cábøch wiinghänä'c-hajxy hänajty tii xñä'ägädä mo'owa'añ. ¹⁶ Mänáajøch hänajty jim nhityñä maa ja'a cajpt xiøhatiän Tesalónica, coo hajxy mmädoyhajty cooch hänajty nyajmaajiaty, metsc-hooc tægøøghóoc-høch xädø'øñ hajxy jim xyajnäguejxy. ¹⁷ Cab hajxy mmänä'anät cóogøch tyjy xädø'øñ nwi'i quiuhbøcjuø'øy. Cooch mijts xpiuhbety, paadiä Dios hajxy xmio'owa'añ hoyhajt weenhajt. Høøch, páadyhøch nxoonä'agy. ¹⁸ Cábøch tii nyajmaajiajnä. Nä'ä tægø'øbøch mijts xyajnäguejxy, ja'a Epafrodito miäméjtsäbä. Xjiaančh tehñ quiumaabiä Dios hajxy jaduhñ cooch hajxy xjiaančh tehñ piuhbety. ¹⁹ Coo hajxy hänajty tii myajmaajiaty, xmió'owäp ja'a Dios hajxy ja'a Jesucristocøxpä. Jim cøxiä miøødä tsajpootyp. ²⁰ Tsøgä Dios hajxy nämáayyäm cøjxta'axiøø coo miøjjä coo jiaančhä; je'e hajxy nDeedyhájtäm. Amén.

²¹ Ja'a hermanodøjc-hajxy yaabä, højts mijts nyajpoo'xyp pønjetiä Diosmädia'agy jim mabøjp Filipos. ²² Pønjetiä Diosmädia'agy yaa mabøjp, je'eds mijts xyajpoo'xp, møød hajxy yaa tuumbä maa ja'a gobiernä tiøjcän.

²³ Weenä Jesucristo hajxy xmio'oy hoyhajt weenhajt. Je'e hajxy nWiindsønähájtäm. Amén.

Colosenses

¹⁻² Høøch jaduñ xøhajt Pablo. Jesucristøch xquiuguexyhajt. Ja'a Dios jaduñ mänaañ cooçh jaduñ xquiuguexyhädät. Højts hädaa nocy nhädiuumby mөөдä mägu'ughajpä Timoteo. Mijts jaduñ nnocyñäjaayøøby, pønjatiä Diosmädia'agy jim mäbøjp maa ja'a cajpt xiøhatiän Colosas. Tu'ugmädia'agy mijtsä Jesucristo mmөөдdhity. Weenä Dios ja'a hoyhajtä weenhajt hajxy xmio'oy. Hiç, jaaya'ay hajxy jaduñ nDeedy-häjtäm.

³ Naaghooc højtsä Dios jaduñ mba'ya'axy ja'a mijtscøxpä, nnämaaby højtsä Dios "Dioscujú'uyäp." Haa ja'a Jesucristo, ja'a hajxy nWiindsønähjätmä, ja'a Dioshuung je'e. ⁴ Tøø højts jaduñ nmädoyhaty coo mijtsä Jesucristo miädia'agy mmäbøjcä, mөөд coo mijtsä mäbøjpädøjc nägøxiä mdsocy, ja'a Diosmädia'agy hajxy mäbøjpä. ⁵ Tøø ja'a mjoot hajxy jim mbäda'agy tsajpootyp coo hajxy jim nøcxy mhida'añ cøjxta'axiøø. Mänitä mjoot hajxy jim mdehm piädaacy mänaa ja'a Diosmädia'agy hajxy mmädoodsooñän, ja'a jaançh tehñ tiøyhajtpä. ⁶ Wiinduhmyhagajptä Diosmädia'agy wia'xnä. Jaduñnä jäya'ayhajxy wiinduhmyhagajpt miäbøjnäbä. Jaduñ mijts tøø mmäbøjpä coo ja'a Dios hajxy tøyhajt xhöjcäm. ⁷ Højts nmägu'ughajpä Epafra, jaaya'ayä Diosmädia'agy hoy yajwa'xtsooñ maa mijtsän. Jaanä Jesucristo quiuguexy je'ebä. Hoy højts jaduñ xmioødtuñ. ⁸ Je'e højts hoy xyhawaanä cooc mijtsä mäbøjpädøjc mjaançh tehñ choçy mjaançh tehñ pia'häyoy ja'a Dioshespiritucøxpä.

⁹ Jajty højts jaduñ nmädoyhajty cooc hajxy hoy mjaançh tehñ miäböcy, jabom-jabom højtsä Dios nba'ya'axy ja'a mijtscøxpä, ween hajxy jaduñ mnajuø'øy tii ja'a Dios hajxy xyajmädsojp, mөөд weenä Dios ja'a miädia'agy hajxy cøxiä xyajwiinjüø'øy. ¹⁰ Jaduñ højtsä Dios nba'yaaxpä coo hajxy hoy mwädítät. Jaduñnä Jesucristo hajxy xquiumáyät. Jaduñnä hoybä hajxy madiu'u mgudiúnät. Maas hoyyä Dios hajxy jaduñ mmөөдdhídät tu'ugmädia'agy, mөөд jaduñ hajxy xquiumáabiät. ¹¹ Jaduñ højtsä Dios nba'yaaxpä coo ja'a Dios hajxy ween xpiuhbety ja'a miäjaagøxpä ja'a jim miøødpä tsajpootyp. Jaduñ hajxy hoy mmee'xtúgät, hoy häna'c hajxy nebiaty cu xjia tun. Tehngajnä hajxy jaduñ mxoondá'agät, hoy hajxy nej cu mja jat cu mja habet. ¹² Tehngajnä ja'a nDeedyhäjtäm hajxy jaduñ mnämä'awät "Dioscujú'uyäp." Hiç, jaaya'ay hajxy hawa'adstuum xpiädáacäm mөөдä jäya'ayhajxy nägøxiä, ja'a miädia'agy hajxy mäbøjcäbä. ¹³ Tøø ja'a Dios hajxy xyajpädsøømäm hagogdstuum. Hodium hajxy hoy nmähmøøyyäm maa ja'a yHuung yhane'emiän. Jiaançh tehñ chojpiä Dios ja'a yHuung jaduñ. ¹⁴ Jaayá'ayäts hajxy jaduñ xñähho'túutäm; jaduñnä nbojpa ngädieey hajxy xyajnahwäatsäm.

¹⁵ Haa ja'a Jesucristo, jíiyäm hänajty je'e mänaa hädaa yaabä naaxwiin yhawijy tiøø'xta'aguiän. Tu'uquiä Jesucristo jaduñ mөөдä Dios. Mänitä Jesucristo hoy yaa jäya'ayhaty hädaa yaabä naaxwiin. Nhíxäm hajxy jaduñ. Haa ja'a Dios, cab hajxy mänaa nhíxäm. ¹⁶ Cøxiä Jesucristo yhädiuun jim tsajpootyp mөөд yaa hädaa yaabä naaxwiin, tijaty hajxy yaa nhíxäm, mөөд tijaty hajxy yaa nga'a híxäm, mөөдä poj mөөдä täxa'a, ja'a jim mähanehmbä tsajtcøxp, mөөд pønjaty yaa mähanehmb hädaa yaabä naaxwiin, mөөд pønjaty jim jaac mähanehmb tsajpootyp. Paadiä Jesucristo jaduñ cøxiä yhädiuun coo hänajty jaduñ tøø yhane'emyii ja'a Tieedy. Madiu'u ja'a tuung jim tsajpootyp maa ja'a Jesucristo ja'a Diosmoonsä hoy piäda'aguiän. Hamdsoo ja'a Jesucristo jaduñ cøxiä ñiyhädiuunäxä. ¹⁷ Jíiyäm hänajty je'e mänaa hädaa yaabä naaxwiin yhawijy tiøø'xta'aguiän. Je'enä yaghityñä tijaty yhädiuun. ¹⁸ Jaayá'ayäts jaduñ copc-hajp maa ja'a Diosmädia'agy hajxy nmäbøjcäm. Cooc hajxy hoy xñähho'túutäm, coo jadähooc jiuypipøjtägajch, paady møj jaançh yhiñä. Hiç, jayøjp je'e jiuypipøjcy. Y coo jaduñ jiuypipøjtsohñ, paady møjcuhtuñ miøødän. ¹⁹ Nebiä Dios jim yhitiän tsajpootyp, jaanä jaduñnä Jesucristo jim yhiñäbä. Jaduñnä Dios ja'a yHuung

Jesucristo yajmädsojcy coo ja'a Jesucristo pedyii Dyioshádät nebiä Tieedy Dyioshatiän. ²⁰ Jaduhñä Dios ja'a jioot jia tsojpä coo hoy piönä miøødhádät, møød coo ja'a Dios hajxy jaduhñ nga'a mädsiphájtänät. Paadiä Dios ja'a yHuung yaa quiejxy coo hajxy jaduhñ xñähho'túutämät cruzcøxp.

²¹ Mijts, cabä Dios hajxy hijty mmøødhity tu'ugmädia'agy. Mmädsiphajpiä Dios hajxy hijty jaduhñ. Haxøøg hajxy hijty mwädity. ²² Coo ja'a Jesucristo hoy yaa jiäya'ayhaty hädaa yaabä naaxwiin, coo hajxy hoy xñähho'túutäm, tu'ugmädia'agy hajxy jaduhñ xmiøødhíjtänä. Jaduhñä nbojpä ngädieey hajxy xyajnáhwáatsäm. Jaduhñä Tieedy tøø yhawaanä coo hajxy tøø nnähwáatsäm. ²³ Hoyyä Jesucristo hajxy tøø xjia yajnáhwáatsäm, pø cabä Diosmädia'agy hajxy hoy ngudiunánäm, cabä Dios hajxy jaduhñ xquiumáayyämät. Paadiä Diosmädia'agy hajxy hamuumdu'joot mgudiúnät nebiä Epafraas hajxy xyajnáhixøøyyän. Cab hajxy mnajtsihixó'øwät. Jaduhñ hajxy jim mnócxcät tsajpootyp. Wiinduhmyhagajptä Diosmädia'agy jada'ahaty wia'xnä. Høøch jaduhñ nyajwa'xyp, høøch Pablo.

²⁴ Xoondáacpøch je'eguiøxp cooch jaduhñ ndsaaçhpøcy ja'a mijtscøxpä pønhatiä Jesucristo miädia'agy mábójcäp. Jaduhñä Jesucristo hajxy maas hoy mmøødhídät tu'ugmädia'agy. Jaduhñch ndsaaçhpøjpä nebiä Jesucristo chaaçhpøjquiän. ²⁵ Jaayá'ayhöch jaduhñ xpiädaac coods mijtsä Diosmädia'agy ca'xiä ngøxy yajnáhixó'øwät. Jaduhñch xpiädaacpä coochä jäya'ay nägøxiä nbuhbédät, ja'a miädia'agy hajxy jaduhñ mábójcäbä. ²⁶ Cabä Dios ja'a wyiinmahñdy choj yajwiingähxø'cy. Cujecy hajxy jaduhñ tøø xya-jmädoyhájtäm pønhatiä miädia'agy mábójcäp. ²⁷ Jaduhñä Dios wyiinmahñdyhajty coo ja'a Jesucristo hajxy nägøxiä nmøødhíjtämät tu'ugmädia'agy møød mijts ca'a judióspä. Mänit hajxy nägøxiä jim mnøcxaanä tsajpootyp. Hoy-yagjuøøñä ja'a Dios jaduhñ wyiinmahñdyhajty.

²⁸ Hoy miaajä højts Jesucristocøxpä nwädity yajnáhixøøbiä coo jäya'ayä yhaxøøgcuhdujt hajxy ñajtsihixó'øwät, møød coo ja'a Jesucristo miädia'agy hajxy cøxiä ween yajtuungpaatä. Ja'a Dios højtsä wiinmahñdy xmiooby nebiaty højts nyajnáhixó'øwät. Jaduhñ højtsä Jesucristo nhawaanä coo ja'a jäya'ayä Jesucristo miädia'agy hajxy hoy yajtúunänä. Cumayáanäp hajxy jaduhñ ja'a Jesucristo. ²⁹ Hamuumdu'jóothøch jaduhñ nduunghaty nägø'ø nädecypiä. Ja'a Jesucristøch xpiuhbejp. Je'eçhä mäjaa xmiooby pedyii.

2

¹ Jabom-jabómhøchä Dios møc-møc nmänuu'xta'agy ja'a mijtscøxpä møødä mábøjpädøjcøxpähajxy, ja'a hajxy jim tsánaabiä Laodicea, møødä mábøjpädøjc-hajxy nägøxiä pønjátyhöch xquia'a hixyhajpnä. ² Ween mijtsä Dios xquiapxmøcpøcy. Jaduhñä Jesucristo hajxy maas hoy mmøødhídät. Ween hajxy hamiñ haxøpy mniçhocy mnibia'häyoyii. Mmøødhájnäbä tøyhajt hajxy jaduhñ coo ja'a Jesucristo hajxy xmiøødhijnä tu'ugmädia'agy. Ween hajxy jaduhñ tehngajnä mjaac habøcy. ³ Y coo ja'a Jesucristo hajxy tu'ugmädia'agy xmiøødhijnä, jaduhñ hajxy mnajuøøñä nebiatiä Dios wyiinmahñdyhaty, coo cøxiä wiinä jiaançh tehñ ñajuø'øy, coo cøxiä wiinä jiaançh tehñ jiaty. ⁴ Paady mijts jaduhñ nhawaanäm, jaduhñ hajxy mga'a yajwiinhóønät, hoy häna'c hajxy yajxón cu xjia møødmädia'ag. ⁵ Hóyhøch jim nga'a ja hity maa mijtsän hajäya'ayhaam, njahmiejchp mijts jaduhñ. Xoondáacpøch jaduhñ coo ja'a Jesucristo miädia'agy hajxy hamuumdu'joot mmábøjcä, møød coo hajxy tu'ugmädia'agy mhity.

⁶ Tøø ja'a Jesucristo miädia'agy hajxy mmábøjcä, ja'a hajxy nWiindsønähájtämbä. Paady hajxy mmøødhijnät tu'ugmädia'agy. Paadiä miädia'agy hajxy pedyii mgudiúunänät. ⁷ Ca'xy hajxy jaduhñ mgudiúnät nebiä Epafraas hajxy xyajnáhixøøyyän. Mijts, mmábøjcäbä Jesucristo miädia'agy hajxy. Tsipcøxpä Dios hajxy jabom-jabom mnämä'awät "Dioscujú'uyäp." Hix, coo ja'a Jesucristo hajxy tøø xyajnáhwa'açh, paady hajxy jaduhñ mmábøgät.

⁸ Mnigwieendähadóøjáp hajxy. Cabä häna'cä miädia'agy hajxy mmäbójcät, ja'ä häna'cä Jesucristo hajxy ca'a capxpaatpä. Höhndaacpä hajxy jaduhñ wiädity. Cab tii töyhajt hajxy ñä'ägädä yecy.

⁹ Nebiä Dios jim̄ yhitiän cøxp, jaanä jaduhñä Jesucristo jim̄ yhijpä. Hix, pedyii ja'ä Jesucristo Dyioshaty nebiä Tieedy Dyioshatiän. ¹⁰ Coo ja'ä Jesucristo hajxy xmiødhijnä tu'ugmädia'agy, jaduhñä Dios hajxy xmiødhijpä. Haa ja'ä Jesucristo, nägøxiä ja'ä Diosmoonsähajxy jim̄ yhanéhmänä tsajpootyp ja'ä Jesucristo. ¹¹ Coo ja'ä Jesucristo hajxy jaduhñ xmiødhjítäm tu'ugjoot tu'ugwiinmahñdy, jaduhñ hajxy xyhíjxäm nejjian coo hajxy häxøpy tøø nyajcircuncidarhájítäm, je'eguiøxp coo ja'ä nhaxøggwiinmahñdy hajxy tøø nhøxhíjxäm. Jaduhñä jäya'ayhajxy näje'e jia wi'i miäna'añ coo hajxy nyaj-circuncidarhájítämät, højts ya'adiøjc-hájítäm. Coo ja'ä Jesucristo ja'ä nbojpä ngädieey hajxy häxøpy tøø xquia'a yajnähwáatsäm, cabä circuncisión häxøpy tiuungpaady. ¹² Coo hajxy nnäbéjtäm, jaduhñ hajxy ngähxø'cäm coo ja'ä nhaxøggcuhtuht hajxy tøø nnajtshixøyyänä, møød coo ja'ä Diosmädia'agy hajxy nmäbójcänä coo ja'ä Jesucristo hajxy xñähho'túutäm, møød coo yagjujyipiøjtägajtsä ja'ä Dios. ¹³⁻¹⁴ Jaduhñ mäwíinäts hajxy hijty nhjítäm nebiä ho'ogypian coo ja'ä pojpa cädieey hajxy hijty njaanč tehñ miødhjítäm coo hajxy hijty haxøgg njaanč tehñ jäya'ayhájítäm. Jéquiänä Moisés hajxy xyhanéhmäm nebiä hoguiuhdujt hajxy ngudiúunämät. Pero cab hajxy hoy ngudiunáañäm. Paadiä Moisés jecy miänaañ coo hajxy cu ngumadóowäm. Mänitä Dios miänaañ coo ja'ä Jesucristo hajxy xñähho'túutämät cruzcøxp. Jaduhñä nbojpä ngädieey hajxy cøjx xyajnähwáatsäm. Jaduhñä Jesucristo hajxy tu'ugmädia'agy nmøødhjítänä. ¹⁵ Coo ja'ä Jesucristo hajxy jaduhñ xñähho'túutäm cruzcøxp, mänitä möjcu'ugongä quiuhdujt hajxy quiøxy pójcäxä ja'ä højtsøxpä. Tøø ja'ä Dios jaduhñ yajcähxø'øgy coo ja'ä Jesucristo ja'ä möjcu'ugong hoyhoy tøø quia'a yajmäjädä'agy.

¹⁶ Coo mijts pøn xjia wi'i yhane'emá'anät coo ja'ä quiuhdujt hajxy myajtúunät, cab hajxy mnä'ägädä möjpadá'agät. Madiu'u cuhtuht hajxy miøødä, coo hajxy tijaty mga'a hu'ug mga'a cáyät, møød coo ja'ä xøø hajxy myagjadóøjtät, ja'ä jomøjthaambä, ja'ä po'ohaambä, ja'ä poo'xixøøhaambä. Cabä cuhtuht jaduhmbä hajxy mgudiúnät. ¹⁷ Hix, cab jaduhñ tiuunnä, je'eguiøxpä coo ja'ä Jesucristo yaa yhooy hädaa yaabä naaxwiin. Jaaya'ayädsä quiuhdujt jaduhñ túunnäp. ¹⁸ Näje'e jäya'ayä Diosmoonsä hajxy wyiingudsähgø'øgy. Páadiäc hajxy jaduhñ wyiingudsähgø'øgy je'eguiøxp cooc tyijy hajxy quia'a jada'añ nebiä Dios hajxy wyiingudsähgø'øwät. Haxøgg hajxy jiaanč tehñ wyiinmahñdyhaty. Jaanč tehñ ñiguiumáayyap hajxy je'eguiøxp cooc tyijy hajxy naxy cøxiä wiinä wyiinhixy. Coo mijts xjia wi'i yhane'emá'anät coo hajxy mbahíxät, cab hajxy mnä'ägädä yajwiinhóønät. ¹⁹ Yhøxhijxypä Jesucristo hajxy jaduhñ. Haa ca'a, je'e hajxy ngopc-hájítäm nägøxiä, mäduhñtiä Diosmädia'agy hajxy nmäbójcäm. Tu'ugmädia'agy hajxy xmiødhjítäm. Je'e ja'ä mäjaa hajxy xmiøoyyäm nebiä Diosmädia'agy hajxy jaduhñ maas hoy ngudiúunämät, neby hajxy jaduhñ tu'ugmädia'agy nnimiødhjítämät hamiñ haxøpy. Chojiä Dios ja'ä jioot jaduhñ.

²⁰ Tøø ja'ä Jesucristo hajxy xñähho'túutäm. Paadiä mhamdsoo wiinmahñdy hajxy tøø mnajtshixø'øgy. Tii hajxy coo mwi'i quiuhdujthatyñä nebiä häna'c-hajxy yhuuc cuhtu-jthatiän, ja'ä hajxy ca'a mäbøjpä. ²¹ Madiu'u hajxy jaduhñ jiaanč tehñ quiuhdujthaty. Jaduhñ hajxy miäna'añ coo hajxy tijaty mga'a nä'ä jóø'xät, møød coo hajxy tijaty mga'a nä'ä nähdonät, je'eguiøxp cooc tyijy quia'a hoyyä. ²² Yhamdsoo cuhtuht hajxy jaduhñ yaghijpy coo hajxy jaduhñ miäna'añ coo hajxy tijaty nga'a jóø'xämät, coo hajxy tijaty nga'a nähdonämät. Hix, cab tii jaduhñ ñä'ägädä jecy. Paadiä cuhtuht jaduhmbä quia'a jegaambä. ²³ Coo hajxy jaduhñ quiuhdujthaty, hamuumdu'joot hajxy jaduhñ quiudiuñ nägø'ø nädecypiä. Jaduhñ hajxy jia nibiäda'agyii nebiä jaanč tehñ jiootxeemybiän. Hamdsoo hajxy jia ničhaächtiüüü, cooc tyijy yhaxøggwiinmahñdy hajxy jaduhñ hoy yhøxhixa'añ. Tøyhajt jaduhñ coo ja'ä cuhtuht jaduhmbä hoy jia cähxø'øgy; pero cab jaduhñ ñä'ägädä tuungpaady.

3

¹⁻² Coo ja'a Jesucristo jiuypiojcy, paady hajxy jim̄ nnøcxáanäm̄ maa yháña'ayän, jim̄ hahooyhaamby maa ja'a Dios yháña'ayän. Tsøcxä Diosmädia'agy hajxy hamuumdu'joot mäbøjcäm. Cab hajxy nyajcopcøoyyämät ja'a hädaa yaabä naaxwiimbä. ³ Tøø hajxy jaduhmbä nnajtshixøoyyänä je'eguiøxp coo ja'a Jesucristo hajxy xñähho'túutäm. Coo hajxy tu'ugmädia'agy nmøødhjítäm, paadiä Dios hajxy jim̄ xyaghidáanäm̄ maa je'e yhitiän. Tøø ja'a hawiinjemywyiinmahñdy hajxy xmióoyyäm. ⁴ Y coo ja'a Jesucristo yaa quiädaactägatsa'añ, mänit hajxy min̄ xyajpædø'ogáanäm. Mänit hajxy jim̄ xya-jnøcxáanäm̄ tsajpootyp. Hoy miänaajä hajxy jim̄ xyaghidáanäm.

⁵ Paadiä mguhdujt hajxy naxy mdehm̄ ñajtshixø'øwät, ja'a hajxy yaa myajtuumbiä hädaa yaabä naaxwiin. Cabä to'oxiojcy hajxy nä'a nägoobä mnä'a møødtsáná'awät jabiocy. Cab hajxy haxøøg mjäya'ayhädät. Cabä mjoot hajxy mbädá'agät maa haxøøg ca'a hoybän. Cabä mmäjøønä mmädøjc hajxy tijaty mhadsójcät. Jaančh teh̄m̄ yhaxøøg jaduhñ. Jaduhñ miäbaady nej coo jäya'ayä quepychechä naaxpoch hajxy wyiingudsähgø'øy. ⁶ Coo hajxy jaduhñ jiatcø'øy, ja'a hajxy ca'a mäbøjpä, paady hajxy yajcumädowa'añii ja'a Dios. ⁷ Jaduhñ hajxy hijty mbajatcøøbiä haxøøg. ⁸ Coo ja'a Jesucristo hajxy xñähho'túutäm, hahixøøby jaduhñ coo ja'a mhaxøøgcuhdujt hajxy mnajtshixø'øwät. Cab hajxy mnimiäjootma'adóøjät. Cab hajxy mniyhojøøjät. Cab hajxy haxøøg mniñänømøøjät. Cab hajxy mhaxøøgcapx mhaxøøgmädiá'agät. ⁹ Cab hajxy hamiñ haxøpy mniwyiinhøønøøjät. Jaduhñ hajxy hijty mjatcø'øy. Cab hajxy jaduhñ mjatcøñät. ¹⁰ Ja'a hawiinjemywyiinmahñdy hajxy mhabójnöp, jaduhñä Dios hajxy hoy mbahijx mbadúunnät, je'eguiøxp coo hajxy tu'ugmädia'agy nmøødhjítäm. Paadiä Jesucristo ja'a hawiinjemywyiinmahñdy hajxy xmióoyyäm tehngajnä, jaduhñ hajxy maas hoy nbahjxämät. ¹¹ Je'eduhñ tsoobaatp coo ja'a Jesucristo hajxy nmøødhjítäm tu'ugjoot tu'ugwiinmahñdy, je'eguiøxp coo hajxy nägøxiä xñähho'túutäm wiinduhmy-hagajpt, hoy piønä. Cabä Jesucristo hajxy wiingaty xquiunúu'xäm. Tu'cuhdujt hajxy xquiunúu'xäm haagä hawa'adstuum. Cab jaduhñ miøjpäda'agy pø judíoshjítäm hajxy, pø caj. Cab jaduhñ ñejpiä pø høxpøcyhajtäm hajxy, pø caj. Cab jaduhñ ñejpiä pø cudoogø'øyhajtäm hajxy, pø caj.

¹² Mijtsä Dios tøø xyajnáhdijy coo ja'a tiuung hajxy jaduhñ mdúunät. Paady hajxy xjiaančh teh̄m̄ chocy. Naxiä hojioot hajxy mdehm̄ miøødhädät. Naxy hajxy jaduhñ mhídät mee'xxieemy. Mmee'xtúgäp hajxy jaduhñ. ¹³ Cab hajxy tii mdsippädá'agät, cab hajxy tii mma'adpädá'agät. Coo hajxy mniñägädieeyø'øwøøjät, mnimiämee'xøøjäp hajxy jaduhñ, nebiä Jesucristo hajxy xmiée'xäm. Coo hajxy jaduhñ xmiée'xäm, paady hajxy mmämée'xät pøn̄ xñägädieeyøøby. ¹⁴ Hamiñ haxøpy hajxy mniçhogøøjät. Jaduhñ hajxy hoy mjaančh teh̄m̄ yhídät tu'ugmädia'agy. ¹⁵ Weenä Jesucristo hajxy jaduhñ jootcujc xyaghjítäm tu'ugmädia'agy neby hajxy yaa tøø xpiädáacäm. Jabom̄-jabom̄ hajxy tsøc hjítäm jootcujc. Tsøgä Dios hajxy nämáayyäm “Dioscujú'uyäp.”

¹⁶⁻¹⁷ Mhabójcäbä Jesucristo miädia'agy hajxy cøxiä. Myajtuungpáadäp hajxy jaduhñ. Ja'a Dioswiinmahñdyhaam hajxy myajniñähixø'øwøøjät. Jaanä jaduhñ hajxy mni-jiootcapxmøcpøjcäbät. Hamuumdu'jootä Dioshöy hajxy mhówät. Naxiä Diosteedy hajxy mdehm̄ ñámá'awät “Dioscujú'uyäp”, je'eguiøxp coo ja'a Jesucristo hajxy xñähho'túutäm. Je'e hajxy nWiindsøn̄hajtäm. Ja'a Jesucristocøxpä hajxy tijaty mdúnät.

¹⁸ Mijts to'oxiojcy hajxy, tsipcøxpä mnihyhapä miädia'agy hajxy mmäbøjçät. Cähxø'ø-gaamb hánajty jaduhñ coo ja'a Diosmädia'agy hajxy mmäbøcy. Chojpä Dios ja'a jioot jaduhñ coo hajxy jaduhñ mgudiúnät. ¹⁹ Mijts, ya'adiøjc-hajxy, yajxonä mdo'oxiojcy hajxy jaduhñ mdsoc mba'häyówät. Cab hajxy mnä'ägä hójät. ²⁰ Pøn̄jaty høxcujc-hajp, mmäbøjçäbä mdajjä mdeediä miädia'agy hajxy jaduhñ cøxiä. Xquiunúu'yäbä Dios hajxy jaduhñ. ²¹ Jaanä jaduhñ mijts teedyhajpä, cabä mnøøxä mmajc hajxy nä'a nägoobä mnä'a yagjootmä'adät, coo hajxy jaduhñ ñä'a jootmayhädät. ²² Jaanä jaduhñ mijtspä, mijts moonsähajpä, hamuumdu'jootä mwiindsøn̄ä miädia'agy hajxy mgudiun̄ mguñájxät, nebiaty hajxy xyhane'emy. Jaduhñä häna'c-hajxy näje'e jiatcø'øy, coo

ja'a wyiindsón hajxy hánajty jim tiána'ay, mänit hajxy hánajty jøjwidsø'ø tiägø'øy tuumbä. Yajcumayaamb hajxy hánajty coo hajxy hánajty jiaanč tehñ tiuñ. Caj mijts jaduñ mjatcø'obiät. Coo hajxy hoy mdúnät, cähxø'ögäp jaduñ coo ja'a Dios hajxy hoy mwiingudsähgø'øy. ²³ Hamuumdu'joot hajxy mdúnät hoy tiehm miädyii tuungä, jaduñä Dios hajxy xquiumáyät. Cab hajxy mnä'ä yajcumayá'anät cu'ughagujc. ²⁴ Paady hajxy jaduñ hoy mdúnät, tøø hajxy mnajuø'øy coo ja'a Dios hajxy jim xyajnøcxa'añ tsajpootyp, je'eguiøxp coo ja'a Jesucristo hajxy mmäduñ. Hix, tøyhajt hajxy jaduñ mnä'ägädä Wiindsønhaty. ²⁵ Pøn hoy ca'a jäya'ayhajt, tsipcøxp jaduñ nøcxy quiumädowna'añ. Hoy jia mäyøjä, cabä Dios miøjpäda'agy.

4

¹ Hoorä, pønjaty moonsämøød, hoyyä moonsä hajxy myajtúnät. Cab hajxy md-saächtiúnät nä'ä nägoobä. Naxy hajxy mdehm jiahmiédsät coo mijtsä mWiindsøn jyíjábä, ja'a jim hijpä tsajpootyp.

² Tehngajnä Dios hajxy mba'yá'axät hamuumdu'joot. Ca'a Diosmädia'agy hajxy mmäniyhøxmaaho'ogyii. Mnämä'awäbä Dios hajxy "Dioscujú'uyäp." ³ Mba'yá'axäbä Dios hajxy ja'a højtscøxpä coo højts ween xyajyajnäbaadø'øy coo højtsä miädia'agy njaac mädiäacät ja'a Jesucristocøxpä, ja'a naam yajmädoyhátiäbä. Cooch jaduñ tøø nmädia'agy, päadyhöch yaa ndsumyhäña'ay. ⁴ Pa'ya'axä Dios hajxy ja'a høøhcøxpä, jaduñchä Diosmädia'agy howyiinjuøñä nyajnähixø'øwät. Jaduñä Dios jiaanč tehñ quiumay.

⁵⁻⁶ Ja'a häna'cä Diosmädia'agy hajxy ca'a mäbøjpä, hoy yajxon hajxy mmøød-mädiä'agät hoy miänaajä. Cab hajxy mmädsip, cab hajxy mmäma'adó'øwät. Coo ja'a Dios jaduñ miäná'anät, naxy hajxy mdehm quiudiúnät. Jaduñ hajxy paquiä mnajuø'øwät neby hajxy hoy mhadsówät hoy tiehm piønä.

⁷ Haa ja'a mägu'ughajpä Tíquico, jaanč tehñ yhöyhøch je'e xmiøødtuñ ja'a Dioscøxpä. Coo jim miédsät maa mijtsän, mänit hajxy xyhawaanaañ cøxiä ja'a høøhcøxpä. ⁸ Mänit hajxy xjiootcapxmøcpøga'añ. ⁹ Quipxiä Onésimo miødhada'añii. Höyhøch je'e xmiøødtuumbä. Jim je'e chohmbä maa mijtsän. Xyhawaanaañap mijts jaduñ nebiaty yaa jiadyii.

¹⁰ Haa ja'a Aristarco, yaač je'e xmiøødtsumčhänaabiä. Xyajpoo'xp mijts je'ebä. Møødä Marcos hajxy xyajpoo'xpä. Ja'a Bernabé jiuuy miägu'ug je'eduhñ. Tøø mijts nnocynäjaayø'øy ja'a Marcoscøxpä. Coo jim miédsät maa mijtsän, mänit hajxy hoy yajxon mwiingudsähgø'øwät. ¹¹ Jaduñä Jesús Justo hajxy xyajpoo'xpä. Haa ja'a judíoshajxy yaabä, ja'a Diosmädia'agy hajxy tøø miäbøquiäbä, cábøchä Diosmädia'agy hajxy xmiøødyajwa'xa'añ. Jagóoyøchä Aristarcohajxy xmiøødtuñ, møødä Marcos, møødä Jesús Justo. Höyhøch hajxy jaduñ xpiuhbety. ¹²⁻¹³ Xyajpoo'xp mijtsä Epafras jaduñbä. Ja'a Jesucristo tiuung je'e tiüunäbä. Jim je'e chohmbä maa mijtsän. Høøchä tøyhajt nmøød coo ja'a Epafras ja'a Dios jiaanč tehñ miänuu'xta'agy ja'a mijtsøxpä, møødä mäbøjpädøjcøxpähajxy, ja'a hajxy jim tsänaabiä Laodicea, møød jim Hierápolis. Jaduñä Epafras ja'a Dios miänuu'xta'agy coo mijtsä Diosmädia'agy pedyii myajtúnät hamuumdu'joot. Jaduñä Dios hajxy xquiumáyät. ¹⁴ Jaduñ mijts ja'a Demas xyajpoo'xpä, møødä Lucas ja'a mädsøoyø'øbiä.

¹⁵ Huuc yajpoo'xä mäbøjpädøjc hajxy, ja'a hajxy jim hijpä Laodicea. Jaduñä hermana Ninfa hajxy myajpoo'xpät, møødä mäbøjpädøjc-hajxy, ja'a hajxy jim nøcxpä Dioswiingudsähgø'øbiä maa ja'a Ninfas tiøjcän. ¹⁶ Coo hädaa nocy hajxy hánajty tøø mgapxy, mänit hajxy jim mguejxtägätsät Laodicea, weenä mäbøjpädøjc-hajxy jim quiápxpät. Mänitä nocy hajxy mgápxpät, ja'ač jim tøø nguéxiäbä Laodicea. ¹⁷ Huuc näma'awä Arquipo hajxy jaduñ coo naxy hoy tiehm quiudiúnät nebiaty tøø yhane'emyii ja'a Dios.

¹⁸ Hamdsoo cø'øjaayháambyhöch hädaa nocy nyajmaya'añ. Huuc pa'ya'axä Dios hajxy ja'a høøhcøxpä cooch ween xpiuhbety maač yaa ndsumyčhäna'ayän. Weenä Dios ja'a hoyhajtä weenhajt hajxy xmio'oy. Amén.

1 Tesalonicenses

¹ Chaa hõjts hädaa nocy nhädiuunmuga'añ, hõõch Pablo, mõödä Silvano, mõödä Timoteo. Mijts hädaa nocy nyajnäjaayõõby, pønjatiä Diosmädia'agy jim mäbõjp Tesalónica. Mwiingudsähgõõbiä Diosteedy hajxy mõödä Jesucristo, ja'a hajxy nWiindsõnhájtämbä. Tu'ugmädia'agy hajxy mmõõdhity. Weenä Dios ja'a hoyhajtä weenhajt hajxy xmio'oy mõödä Jesucristo.

²⁻³ Tehngajnä hõjtsä Dios nnäma'ay “Dioscujú'uyäp” ja'a mijtsõxpä nägõxiä. Jaanä mijtsõxpä hõjtsä Diosteedy nmänuu'xta'agy tehngajnä. Jaduhñ hõjtsä Dios nnäma'ay coo mijtsä miädia'agy hamuumdu'joot mmäbõjcä, paady hajxy hoy mjaançh tehñ quiudiuunä. Paady hajxy jaduhñ mgudiunñ, coo ja'a Dios hajxy mjaançh tehñ chocy. Coo ja'a Jesucristo hajxy hamuumdu'joot mjõbhixy, paady hajxy nägõø nãdecypiä mmee'xtucy. ⁴ Mägu'ughajpãdõjc, xchojpä Dios hajxy jaduhñ. Nnajuõõby hõjts jaduhñ coo ja'a Dios hajxy tõø xwyiimbiy. ⁵ Hix, coo hõjts mijts nyajwiingapxõõyy coo ja'a Jesucristo hajxy tõø xñähho'túutäm, ja'a Dioshëpíritu hõjtsä mäjaa hänajty xmiooby. Cab hõjts hänajty nä'a nägoobä nnä'a capxy nnä'a mädia'agy. Coo hõjtsä mäjaa jaduhñ xmiooy, paady hõjts hänajty nnajuõ'õy coõchä tõyhajt hänajty nyecy. Mänaa hõjts jim nhitiän maa mijtsän, hoy hõjts jim nhijty. Paady hõjts jaduhñ hoy nhijty coo hõjts mijts hänajty jaduhñ hoy ween xpiahity. Mjähmiejchp hajxy jaduhñ, túhmäts.

⁶ Jaduhñ hõjts mijts hoy xjiaançh pahity. Jaduhñä Wiindsõñ Jesucristo hajxy hoy tõø mbahixpä. Yajxonä mädia'agy hajxy jaduhñ mmädooy, ja'a hõjts mijts nyajwiingapxõõyyäbä ja'a Jesucristocõxpä, ja'a hõjtsä Dios xñajtsapxõõyyäbä. Mxoonãaac hajxy jaduhñ coo hajxy jaduhñ mmädooy, hoy hajxy hänajty jaduhñ hanaxiä mja tsaachpõcy. Ja'a Dios hajxy jaduhñ xyajxoonãaac. ⁷ Coo ja'a Diosmädia'agy hajxy tõø mmäbõcy, hoy hajxy hänajty mja tsaachpõcy, paadiä mäbõjpãdõjc-hajxy hoy miäbõjpä nägõxiä, ja'a hajxy jim tsänaabiä maa ja'a naax xiõhatiän Macedonia mõød Acaya. ⁸ Ca'a jyimiähajtiä ja'a Diosmädia'agy jaduhñ tõø wia'xy ja'a Jesucristocõxpä. Wiinduhmyhagajpt jaduhñ wia'xnä. Jaanä jaduhñä mädia'agy wia'xpä wiinduhmyhagajpt coo mijtsä Diosmädia'agy mmäbõjtsohñ. Coo ja'a mäbõjpãdõjc-hajxy jaduhñ tõø miädoyhajnä, paady hõjts jaduhñ nga'a nägapxy. ⁹ Hix, majaty hõjts nwädity, jaduhñ hõjtsä mäbõjpãdõjc xñäma'ay coog hõjts mijts hoy yajxonñ xyajtõjtãgõõyy mänaa hõjts jim nhoyyän maa mijtsän, mõød coogä quepychëchä naaxpoch hajxy tõø mnajtshixõõñä. Pãadiãc hajxy tõø mnajtshixõ'õy coogä Dios hajxy mwiingudsähgõõñä, mõød coogä Diosmädia'agy hajxy hamuumdu'joot myajtuunnä. Tõyhajtä Dios jiujuiä. Cabä quepychëchä naaxpoch jiujuiä. ¹⁰ Mõød jaduhñ hajxy miänaambä cooc mijtsä Dioshuung Jesucristo hajxy mjõbhixy coo yaa quiãdaactãgatsa'añ hädaa yaabä naaxwiin. Tsajpootyp chohñda'aga'añ coo hänajty yaa miänaca'añ. Coo ja'a Jesucristo hänajty tõø yho'ogy, mänit yagjujypjõjcä ja'a Tieedy. Mänit jim ñõcxy tsajpootyp. Ja'a Jesucristo hajxy jaduhñ xyajnähwa'adsãanäm coo ja'a haxõõgjäya'ayhajxy hänajty yajcumãdowa'añii ja'a Dios.

2

¹⁻² Mägu'ughajpãdõjc, coo hõjts jim nhooy Filipos Diosmädia'agy-yajwa'xpä, mänit hõjtsä jäya'ay jim xxiõõghajty. Hõxtä xchaachtuuñ hõjts jaduhñ. Pero coo hõjts mänitiä nnõcxy maa mijtsän, mänit hõjtsä Dios xjiootcapxmõcpõjcy, hoy hõjtsä jäya'ay hänajty xjiaançh tehñ miädsiphaty. Y coo hõjts mijtsä Diosmädia'agy nyajwiingapxõõyy, mänit hajxy mmäbõjcy hamuumdu'joot. Tõyhajt jaduhñ, túhmäts. Coo hõjtsä Dios xpiuhbety, paady hõjtsä miädia'agy hamõj jootmõj nyajwa'xä. ³ Tõyhajtä Diosmädia'agy jaduhñ. Hamuumdu'joot hõjts nyajwa'xy. Cab hõjts nhõhñda'agy. ⁴ Haa ca'a, ja'a Dios hõjts xwyiinguejx Diosmädia'agy-yajwa'xpä, paady hõjts hamuumdu'joot nyajwa'xy ca'xy pedyii. Cab hõjts nyajtãgach ni weenñtiä. Ja'a Dios hõjts xquiumaayy. Jaduhñ hõjtsä njoot chocy coo hõjts xquimáyät. Cab hõjts nmõjppãda'agy pø cab hõjtsä cu'ug xquiumay.

Hix, jaduñä Dios hajxy xñajuóøyyäm neby hajxy nwiinhøøna'añ. ⁵ Mänaa højts jim̄ nhoyyän maa mijtsän, cab højts mijts hñajty nwiinhøøna'añ. Jii jäya'ayhajxy näje'e, yajxón hajxy miäwiinhøøñ je'eguiøxp coo hajxy yajcumaya'añ. Pero højts, cab højts jaduñ mänaa njatcø'øy. Ni cab højtsä xädø'øñ mänaa nhadsocy. Jii jäya'ayhajxy näje'ebä, yajxón hajxy miäwiinhøøñ, weenä xädø'øñ hajxy jaduñ mio'oyii. Pero højts, cab højts jaduñ njatcø'øy. Tøyhajt jaduñ. Xñajuóøbiøchä Dios jaduñ cooçh nga'a høhnda'agy. ⁶ Cab højts jaduñ nmäna'añ coo højts pøn xwyiingudsähgø'owät, ni mijts ni pøn, hoy jaduñ jia hawiinmatsä coo højts cu xwyiingudsähgøøyy, je'eguiøxpä coo højtsä Jesucristo tøø xwyiinguexy. ⁷ Pero nnäxuu'chp højts mijts. Mijtscoxpä højtsä hojioot nmøødhaty. Høxtahm̄dsä tajjäya'ay ja'a yhuung hajxy cwieendähaty, jaduñ højts mijts ngüeendähjapä. ⁸ Njaançh teh̄m chojpy højts mijts, paady højts mijtsä Diosmädia'agy hoy nyajwiingapxø'øy. Høxtä cu nnähho'tuuty højts mijts coo ja'a Dios jaduñ cu miänaañ. Hix, hoyhoy højts mijts ndsocy nba'häyoy nägø'ø nädecypä. ⁹ Mägu'ughajpädøjc, mänaa højts mijtsä Diosmädia'agy hoy nyajwiingapxø'øyän, nna-juøøby højts hñajty coo mijtsä xädø'øñ hñajty may mga'a møødä. Paady højts hñajty møc nduñ nxajy xøømdsuh̄m. Mjahmiejch hajxy jaduñ, túhm̄äts. Ja'a nhamdsoo caayyøøc højts hñajty nguduumb̄y nguxajpy. Cab højts hñajty nmäna'añ coo højts mijtsä caayyøøc xñä'a mó'owät.

¹⁰ Mägu'ughajpädøjc, hoy højts jim̄ nwädijty maa mijtsän. Cab højts jim̄ nme'e'ch nbojty. Cab højts jim̄ nduundägooyy nnajxtägooyy. Ni ween̄tiä højts jim̄ nga'a cädiehy. Tøyhajt jaduñ, túhm̄äts. Jaduñ højtsä Dios xñajuøøbiä coo tiøyyä. ¹¹ Høxtahm̄dsä teedyjäya'ayä yhuung hajxy jiootcapxmøcpøcy, jaanä jaduñ højts mijts njootcapxmøcpøjpä. Tøyhajt jaduñ, túhm̄äts. Jaduñ mijts nmägapx nhanehm̄bä coo hajxy hoy yajxón mjäya'ayhadät. ¹² Jaduñä Dios jioot chocy. Coo hajxy jaduñ hoy yajxón njäya'ayhajtämät, paadiä Dios hajxy jim̄ xyajnøcxäänäm tsajpootyp maa miähane'emiän, maa wyiingudsähgø'øyiijän.

¹³ Paady højtsä Dios tehngajnä nnäma'ay "Dioscujú'uyäp." Hix, coo højts mijtsä Diosmädia'agy hoy nyajwiingapxø'øy, mänit hajxy hamuumdu'joot mguhbøjcy. Jaduñ hajxy mmäbøjcy coo jiaançh Diosmädia'aguiä. Cab hajxy mmänaañ cooc tyijy jäya'ay tøø yhädiuñ. Tøyhajt jaduñ coo ja'a Dios tøø yhädiuñ. Y coo hajxy jaduñ mmäbøcy, paady hajxy hoy mjäya'ayhajnä. ¹⁴ Mägu'ughajpädøjc, coo ja'a mhamdsoo mägunaax hajxy xchaächtiuuñ, ja'a judíoshajxy, jaduñ hajxy mjajt mhabejpä nebiä mähøjpädøjc-hajxy jim̄ chaächpøquiän Judea-naaxooty, ja'a hajxy mähøjpä ja'a Diosmädia'agy møødä Jesucristo miädia'agy. Jaduñ hajxy chaächtiúunäbä ja'a yhamdsoo mägunaaxhajxy, ja'a judíoshajxy. ¹⁵ Coo ja'a Wiindsón Jesucristo yagho'cä, ja'a judíoshajxy jaduñ jatcøøyy. Jaduñä judíos ja'a profetadøjc hajxy jecy yagho'pä. Højtspaadiä judíos xjiaac hadsaächtiuuñnaxpä. Coo ja'a judíoshajxy jaduñ haxøøg yhäna'c-haty, paady hajxy quia'a cumayii ja'a Dios. Hoy piønä hajxy jaduñ miädsiphaty. ¹⁶ Hix, coo højtsä jäya'ayä Diosmädia'agy hñajty nyajmøødmädia'agy, ja'a hajxy ca'a judíospä, ween hajxy jaduñ ñähwaats quiuhwaatspä, mänit højtsä judíos hñajty xjia wi'i yhaduga'añ. Coo ja'a judíoshajxy jaduñ jiatcø'øy, tehngajnä hajxy hanaxiä haxøøg jiaac teh̄m jiatcø'øy. Pero mobädajpä hajxy hoyhoy yajcumädowa'añii ja'a Dios.

¹⁷⁻¹⁸ Hoorä, mägu'ughajpädøjc, coo højts jim̄ nhooyy maa mijtsän, mänit højts jim̄ nwiimbj̄cumbä. Mänit højts yaa nmänajcy. Pero cab højts hijty yaa njega'añ. Ja wi'i ñøcxtägatsaamb højts jim̄ jadähooc maa mijtsän. Hix, jaduñ højts mijts njuø'øy nebiä hamdsoo huungpän. Hoy miänaajä mijts njahmiejtsta'agy, hoy hajxy nga'a ja niyhíxäm hajujcy. Høøch Pablo, mayhóoc-høch jim̄ tøø nja wi'i ñøcxtägatsa'añ, pero cab højtsä møjcu'ugong tøø xyajnäbaadøøyyä coo højts jim̄ nnøcxtägätsät. ¹⁹⁻²⁰ Haa ja'a Jesucristo, ja'a hajxy nWiindsønähjtämbä, coo je'e yaa quiädaactägätsät hädaa yaabä naaxwiin, mänit hajxy hñajty mgähxø'øga'añ maa wyiinduumän coo ja'a Diosmädia'agy hajxy hñajty hamuumdu'joot tøø mmäbøcy. Paady højts njøbhixy coo ja'a Jesucristo yaa quiädaactägatsa'añ. Mänit højts jaduñ nxoonda'aga'añ nägø'ø nädecypä ja'a

mijtscøxpä. Mänit højtsä Dios xquiumaya'añ je'eguiøxp coo ja'a miädia'agy hajxy hoy mgudiuunä mänaabä højts mijts hoy nyajwiingapxø'øyän.

3

¹⁻³ Coo højts jaduñ nmädoyhajty coog hajxy hijty mjaanč tehñ chaačhpøcy, mänitøch njaanč tehñ jiootmayhajpøjcy je'eguiøxp cooçh hänajty nga'a najuø'øy pø mjøjtänaabiä møjcu'ugong hajxy hänajty. Páadyhøchä njoot hänajty jiaanč tehñ chocy cooçh jim nnøcxät maa mijtsän, nmäyajtøwáambiøch mijts hänajty pø hoy hajxy hänajty mmee'xtucy. Pero cab hänajty ñäbaadø'øwa'añ cooçh jim nnøcxät. Mänitøch jaduñ nwiinmahñdyhajty cooçhä hermano Timoteo jim nguéxät nidiuhñ, y cooçh jiiby nidiuhñ nmähmø'øwät Atenas. Näguipxy højtsä hermano Timoteo xmiøødtuñ Diosmoonsä maa højtsä Diosmädia'agy nyajwa'xiän ja'a Jesucristocøxpä. Páadyhøchä hermano Timoteo jim nguejxy maa mijtsän coo mijts jaduñ xjiootcapxmøcpøgät maa hajxy hänajty mdsaačhpøquiän, weenä Diosmädia'agy hajxy hänajty jaduñ maas hoy mmäbøcy hamuumdu'joot, møød ween hajxy hänajty jaduñ mga'a jootmayhaty. Hix, ja'a Dios hajxy jaduñ tøø xyajnähdiñjam coo hajxy jaduñ ndsaačhpøjcämät ja'a Jesucristocøxpä. Tøyhajt jaduñ, túhmäts. ⁴ Haa ca'a, mänaa højts jim nhoyyän maa mijtsän, mänit hajxy nhawáanäm coo hajxy hänajty tsipcøxp ndsaačhpøgáanäm. Jaduñ hajxy tøø njaanč jajt tøø njaanč habéjtäm, túhmäts. ⁵ Hoorä, cooçh hänajty nga'a najuø'øy pø hoyyá møjcu'ugong hänajty mjøjtäna'ay maa hajxy hänajty xjia wi'i jjøjcapxø'øyän, mänitøch jaduñ nja mänaañ cooçh jim nnøcxät maa mijtsän. Pero coo hänajty quia'a näbaadø'øwa'añ cooçh jim nnøcxät høøch, páadyhøchä hermano Timoteo jim nguejxy, ween mijts jaduñ xmiäyajtøy pø hoyyá møjcu'ugong hajxy hänajty tøø mjøjtäna'ay, pø hoyyá Diosmädia'agy hajxy hänajty mbanøcxyñä. Hix, ndsähgøøbiøch hänajty coo ja'a møjcu'ugong hajxy hänajty tøø xjijøjcapxø'øy. Coo hajxy häxøpy tøø mga'a mee'xtucy, xiøøbä højts mijtsä Diosmädia'agy häxøpy hoy tøø nyajwiingapxø'øy.

⁶ Coo ja'a Timoteo jim jiaanč hooyy maa mijtsän, mänit wyiimbjícumbä. Hoy yaa miejtstägach maa højtsän. Mänit højts xyhawaanä coogä Diosmädia'agy hajxy tehngajnä mmäbøcy hamuumdu'joot, møød coog hajxy hamiñ haxøpy mniçhogyii. Hoxioondaacnä jaduñ. Jaduñä Timoteo miänaambä cóogøch mijts hoy miänaajä xjiahmiejtsta'agy, møød cóogøch mijts xchocy xpia'häyoy. Jaduhñägøch mijts xjia wi'i yhixa'añ nébiøch mijts nja wi'i yhixa'añän.

⁷ Mägu'ughajpädøjc, coo højts jaduñ nmädoyhajty coogä Diosmädia'agy hajxy hänajty tehngajnä mmäbøcy hamuumdu'joot, mänit højts njootcugøøyy, hoy højts hänajty hanaxiä nja tsaachpøcy, hoy højts hänajty møj may nyajmaajiaty. ⁸ Paady højts jootcuyc nniñiäwøøyyänä coo mijtsä Diosmädia'agy tehngajnä mbanøcxy hamuumdu'joot ja'a Jesucristocøxpä. ⁹ Coo mijts jaduñ mmäbøcy tehngajnä, paady højts njaanč tehñ xioonda'agy Dioswiinduum, paady højtsä Dios hoy miänaajä nnäma'ay “Dioscujú'uyäp.”

¹⁰⁻¹¹ Xøømdsuhñ højtsä Diosteedy mba'ya'axy møødä Wiindsón Jesucristo. Jaduñ højts nmänuu'xta'agy hamuumdu'joot coo hajxy ween yajnäbaadø'øy coo højts jim nnøcxtägätsät maa mijtsän, jaduñ højts mijtsä Diosmädia'agy njaac yajnähixø'øwät nebiaty hajxy pedyii mga'a mäbøcyñä, ¹² møød weenä Jesucristo hajxy xjiaac puhbety coo hajxy hamuumdu'joot mjaac niçhogøøjät hamiñ haxøpy neby højts mijts ndsoquiän, møød coo jäya'ay hajxy jaduñ nägøxiä mdsoc mba'häyówät, ¹³ møød weenä Jesucristo hajxy xjiaac puhbety coo ja'a Diosmädia'agy hajxy hamuumdu'joot mbanøcxät, møød coo hajxy mga'a najtshixø'øwät, møød coo hajxy mga'a wädítät haxøøg, jaduñ hajxy mhídät hawa'adstuum, jaduñ hajxy pøn xquia'a nähwaambédät maa ja'a Diosteedy wyiinduumän coo ja'a Wiindsón Jesucristo hänajty yaa tøø quiädaactägach hädaa yaabä naaxwiin. Näguipxiä Jesucristo ja'a mioonsä hänajty nägøxiä miøødcäda'aga'añ møød pønjatia Diosmädia'agy hänajty tøø miäbøcy.

4

¹ Hoorä mägu'ughajpädøjc, ja'a Jesucristocøxpä højts mijts cham̄ nmägapxy nhane'emy coo hajxy hoy mjaac teh̄m jīāya'ayhādāt, jaduh̄nä Dios hajxy xquiumáyāt. Jaduh̄n højts mijts jayøbajt nyajnahixøyy. Y jaduh̄n hajxy hoy mjaančh jāya'ayhaty.

² Jaduh̄n højtsä Wiindsøn Jesucristo tøø xñajtscapxø'øyc coo højts mijts nyajwiin-gapxø'øwāt, túhmäts. ³ Jaduh̄nä Dios hajxy xyajmädsójcām coo hajxy hoy ngudiúunāmät nebiaty hajxy tøø xyhanéh̄mām coo hajxy hoy nwädíjtāmät, møød coo ja'a haxøøgwī-inmah̄ndy hajxy ngøxy najtshixøyyāmät. ⁴ Jaanä jaduh̄nä Dios hajxy tøø xyhanéh̄-māmbä coo ja'a ndo'oxiøjc hajxy hoy yajxón̄ nmøødtsānāayyāmät, møød coo hajxy nwiingudsāhgøyyāmät. ⁵ Haa ja'a jāya'ayä Dios hajxy ca'a hixyhajpnä, cabä miädia'agy hajxy jaduh̄n quiuidiunä. Hix, wiingto'oxiøjc hajxy wyi'i yhadsojpy. Pero mijts, ca'a hajxy jaduh̄n mbajatcø'øyc. ⁶ Ca'a mmäjøøn mmädøjcä tio'oxiøjc hajxy jaduh̄n mmägapxtägooyä. Pønjaty jaduh̄n jatcøøby, tsipcøxp hajxy hoyhoy yajcumädowa'añii ja'a Jesucristo. Haa ca'a, jaduh̄n højts mijts tøø nhuuc haneh̄mbä. ⁷ Hix, jaduh̄nä Dios hajxy tøø xyajnahdijjām coo hajxy hoy yajxón̄ njāya'ayhājtamät. Cab hajxy jaduh̄n xyajmädsójcām coo hajxy haxøøg nwädíjtāmät. ⁸ Jaduh̄nds je'e, paadiä Dios ja'a yhEspíritu tøø xmióoyyām, jaduh̄n hajxy hoy njāya'ayhājtamät. Pønjaty jaduh̄n ca'a cudiunaamb̄ nébiøch cham̄ nmädia'aguiän, ja'a Dios hajxy jaduh̄n ñägädieeyøøby, ca'a jīāya'ayä.

⁹ Mägu'ughajpädøjc, ja'a Dios hajxy jaduh̄n tøø xyajnahixøyyām coo hajxy hamiñ̄ haxøpy nniçhójcāmät, pønjatiä Diosmädia'agy mæbøjp. Hoorä, coo ja'a Dios hajxy jaduh̄n tøø xyajnahixøyyām, cab yhadsipä cooçh mijts jaduh̄n njaac yajnājaayø'øwāt coo hajxy jaduh̄n nniçhójcāmät. ¹⁰ Tøyhajt jaduh̄n coo ja'a mæbøjpädøjc hajxy nägøxiä mdsocy yaa Macedonia-naaxooty wiinduh̄myhagajpt. Jaduh̄n højts mijts mæbøcy nmānuu'xta'agy coo hajxy maas hamuumdu'joot mmädsógät. ¹¹ Jaduh̄n højts mijts tøø nhuuc haneh̄mbä coo hajxy hamoñ̄ haducy mhídāt, coo hajxy mga'a yajtägø'øwāt maa cueendä hajxy mga'a møødän, møød coo hajxy mnihix̄ mnimiähäyowøjät hamd-soohaamby. Jaduh̄nä mjoot hajxy mbädá'agät coo hajxy jaduh̄n mgudiúnät, ¹² jaduh̄nä cu'ug hajxy xquiumáyāt, møød jaduh̄n hajxy tii mga'a yajmaajiädät.

¹³ Mägu'ughajpädøjc, ja'a jāya'ayhajxy ca'a mæbøjpa, coo ja'a jiuju ja'a miägu'ug hajxy yho'ogy tiägoy, mänit hajxy jiaančh teh̄m jiootmayhaty. Paady hajxy jaduh̄n jiootmay-haty coo hajxy quia'a najuø'øyc coo ja'a Dios ja'a ho'oguiäya'ay yagjuypiojtägatsa'añ, ja'a hajxy hānajty tøø miäbøquiäbä. Paady højts mijts cham̄ nhawāanām, cab højtsä njoot chocy coo hajxy mjootmayhājpat. ¹⁴ Hoorä, coo hajxy jaduh̄n nmæbøjcam̄ coo ja'a Jesucristo jiuypiojtägajch mānaabä hānajty tøø yho'oguiän, paady hajxy jaduh̄n nmæbøjcāmbä coo ja'a Dios ja'a ho'oguiäya'ay yagjuypiojtägatsa'añ, ja'a hajxy hānajty tøø miäbøquiäbä ja'a Jesucristocøxpä, ja'a Jesucristo hajxy møødhijpä tu'ugmädia'agy.

¹⁵⁻¹⁷ Hädaa mädia'agy jaduh̄mbä, ja'a Jesucristøch jaduh̄n xñajtscapxøøyyä. Hoorä, coo ja'a Jesucristo hānajty yaa quiädaactägatsa'añ hädaa yaabä naaxwiin, mänit jim̄ choona'añ tsajpootyp. Mänit møc ya'axa'añ nebiä soldadowiindsøn̄hajxy møc ya'axiän coo hajxy hānajty chiptuna'añ. Mänitä Diosmoonsä møc ya'axaambä, ja'a møjtuung jim̄ møødpä tsajpootyp. Mänitä Dios ja'a xiuuxt̄ yajxu'uxa'añii møc. Mänitä ho'oguiäya'ay-hajxy jiuypiojga'añ, ja'a hajxy hānajty tøø miäbøquiäbä ja'a Jesucristocøxpä. Mänitä mæbøjpädøjc-hajxy nägøxiä chajpeda'añ, pønjaty hānajty jujyñä tsuxnä, näguipxy møød pønjaty hānajty tøø yho'ogy, ja'a hajxy hānajty tøø jiuypiojtägächäbä. Mänitä Jesucristo hajxy nägøxiä nøcxy njøjcubaadø'øwāanām jim̄ jocjooty, møød pønjaty hānajty tøø jiuypiojtägach, møød pønjaty hānajty jujyñä tsuxnä. Hoy miānaajä ja'a Jesucristo hajxy nägøxiä xmiøødhidāanām. Cab hajxy mānaa xpiuhwa'adsāanām. ¹⁸ Tøyhajt hädaa mädia'agy jaduh̄n. Coo hajxy jaduh̄n mmæbøcy, jaduh̄n hajxy hamiñ̄ haxøpy mnijiootcapxmøcpegøjät.

5

¹⁻² Mägu'ughajpädøjc, mnajuøøby hajxy jaduhñ coo jaduhñ quia'a yajnajuø'ø y mänaa xøø tiempo yhabaada'añ coo ja'a Jesucristo yaa quiädaactägatsa'añ hädaa yaabä naaxwiin. Paady, cab yhadsipä cooch mijts njaac yajnäjaayø'øwät mänaa jaduhñ jiada'añii. Pero jaduhñ mäbøcy, mnajuøøby hajxy jaduhñ coo ja'a Jesucristo hajxy xyajcädaacpedäänäm jaguiapxy jamiädia'agy. ³ Jaduhñä cu'ughajxy hänajty miäna'ana'añ: “Jootcujc hajxy nhíjtäm; cab hajxy nej njadaänäm, cab hajxy nej nhabetäänäm”, nøm. Mänitä tsø'ty häyohn jaguiapxy jamiädia'agy yhabaada'añ. Paquiä cu'ughajxy jaduhñ jiada'añii tiuna'añii jaduhñ mäwiin nebiä to'oxiøjc-hajxy jiaty yhabetiän coo ja'a yhuung-hajxy hänajty myina'añ quia'awa'añ. Cabä cu'ughajxy hänajty hoy piäyø'øga'añ. ⁴ Pero mijts, mägu'ughajpädøjc, mwiinjuøøby hajxy jaduhñ. Cab hajxy jaduhñ myagjuø'øwa'añ coo ja'a Jesucristo hajxy jaduhñ xyajcädaacpéjtämät jaguiapxy jamiädia'agy. ⁵ Hix, coo ja'a Diosmädia'agy hajxy nmäbøjcäm ja'a Jesucristocøxpä, paady hajxy jaduhñ mäwiin nmäbáatäm nebiä jäya'ayhajxy xøøm wädijpän. Hoy hajxy yhixy. Cab hajxy nhíjtäm hagoonstuum. ⁶⁻⁸ Coo hajxy jaduhñ nmäbøjcäm ja'a Jesucristocøxpä, tsøcxä hajxy híjtäm nähix hahixø'ø. Tsøc hajxy híjtäm wijy quejy. Jaduhñ hajxy nga'a híjtämät nebiä jäya'ay maabän, nebiä jäya'ay múucábän. Jaduhñä haxøøgpä hajxy hoy njøjtänäayämät nebiä soldadohajxy chiptuñän nähbujxt cuhbujxt. Tsøcxä Diosmädia'agy hajxy hamuumdu'joot mäbøjcäm. Tsøgä jäya'ay hajxy nägøxiä tsojc pa'häyóowäm. Tsøgä Jesucristo hajxy jøbhíjxäm coo hajxy xyajnáhwa'ads xyajcuhwa'adsäänäm. ⁹ Hix, cabä Dios hajxy xyajmädsøjcäm coo hajxy ndsaaçhpøjcämät. Caj pues. Jaduhñ hajxy tøø xyajnáhdíjjäm coo ja'a Wiindsón Jesucristo hajxy xyajnáhwaats xyajcuhwáatsämät. ¹⁰ Paady hajxy hoy xñähho'túütäm, jaduhñ hajxy hoy xmiøødhidäänäm cøjxta'axiøø. Coo yaa quiädaactägatsa'añ hädaa yaabä naaxwiin, mänit hajxy nägøxiä xwiowø'øgäänäm, møød pønjaty hänajty jujyñä tsuxnä, møød pønjaty hänajty tøø yho'ogy tøø tiägoy. ¹¹ Hoorä, jaac nijjootcapxmøcpøgøø hajxy hamiñ haxøpy. Jaac niyajnáhixø'øwøø ja'a Diosmädia'agy hajxy. Jaduhñ hajxy jäda'ahaty mjaançh cudiuñ.

¹² Mägu'ughajpädøjc, mijts nmänuu'xtaacy py coo ja'a wiindsøndøjc hajxy mwiingudsähgø'øwät, ja'a hajxy jim tuumbä maa ja'a Diostøjcän, ja'a mijts xwyiingapx xjiøjcapxøøbiä. ¹³ Coo hajxy jaduhñ tiuñ, paady hajxy hamuumdu'joot mdsoc mba'häyóowät. Jootcujc hajxy mnimiøødhidøøjät. Cab hajxy mnimiäjootma'ad mnimiädsiphadøøjät.

¹⁴ Mägu'ughajpädøjc, jaduhñ mijts njaac yajwiinxiic njaac yajwiingapxø'ø y coo häna'c hajxy mhójtät, ja'a hajxy naxy nuuxho'pä, coo hajxy ween tiuñ; møød coo häna'c hajxy mjootcapxmøcpøgät, ja'a hajxy jootmayhajpä; møød coo häna'c hajxy mwiingapx mjøjcapxø'øwät, ja'a hajxy hoy ca'a mäbøgaambä. Mee'xxieemy hajxy jaduhñ nägøxiä mmägapx mhané'emät.

¹⁵ Mniyajcopcø'øwøøjöp hajxy. Coo pøn ñägädieeyø'øwøøjät, cab yaghawiimbídat. Jaduhñä mjoot hajxy hoy miänaajä mbädá'agät coo mayhajt hajxy mduñhájtät hoy ñä'ä pønä, møødä mäbøjpädøjc-hajxy, møødä cu'ughajxy nägøxiä.

¹⁶ Hoy ñä'ä mänaajä hajxy mxoondá'agät. ¹⁷ Tehngajnä Dios hajxy mba'yá'axät. ¹⁸ Mnämá'awäbä Dios hajxy “Dioscujú'uyöp”, hoy hajxy nej cu mja jat cu mja habet. Chøjpiä Dios jioot jaduhñ coo hajxy jaduhñ ngudiúunämät, je'eguiøxp coo ja'a miädia'agy hajxy nmäbøjcäm ja'a Wiindsón Jesucristocøxpä.

¹⁹ Cabä Dioshespíritu hajxy mänaa mhadúgät. ²⁰ Cab hajxy mbéxät pønjetiä Diosmädia'agy najtsapxøøby. ²¹ Pero cøxäbä mädia'agy hajxy mmädoomach mädyii hoy mädyii mäbaad. Je'eds hajxy mguhbøgäp hamuumdu'joot. ²² Møødä haxøøgjootä haxøøgwiinmahñdy hajxy mgøxy najtshixø'øwät.

²³ Ja'a Dios ja'a hoyhajtä weenhajt hajxy xmióoyäm. Ween hajxy xquiøxy yajnáhwa'açh xquiøxy yajcuhwa'açh. Ween hajxy xyaghity hawa'adstuum, møødä mjuøhñdy-hajxy, møødä mni'xä mgopc-hajxy, høxtä coonä ja'a Wiindsón Jesucristo yaa quiädaactägatsät hädaa yaabä naaxwiin. ²⁴ Ja'a Dios hajxy tøø xwyiimbíwäm. Jaaya'ay hajxy

tsipcøxp xyajñhwa'ads xyajcuhwa'adsáanäm neby hajxy tøø xyajwiinwaanøøyyäm. Tøyhajt jaduñ. Hix, cabä Dios mänaa yhöhnda'agy.

²⁵ Mägu'ughajpädøjc, huuc Diospa'ya'ax hajxy tehngajnä ja'a højtscøxpä.

²⁶ Huuc nämä'aw ja'a mabøjpädøjc hajxy jaduñ nägøxiä coo højts hamuumdu'joot ndsocy nba'häyoy.

²⁷ Naxiä mabøjpädøjc hädaa nocy hajxy mdehm yajwiingapxø'øwät nägøxiä. Ja'a Jesucristo jaduñ hanehmb.

²⁸ Ween mijtsä Wiindsón Jesucristo ja'a hoyhajtä weenhajt møj may xmio'oy. Amén.

2 Tesalonicenses

¹ Chaa hõjts hädaa nocy nhädiuunmuga'añ, hõõch Pablo, mөөдä Silvano, mөөдä Timoteo. Mijts hädaa nyajnäjaayөөby, pөnjaty jim hamugөөby Dioswiingudsähgөөbiä Tesalónica. Ja'a Dios hajxy nDeedyhajtäm, mөөдä Jesucristo hajxy nWiindsönhajtäm.

² Ween mijtsä Dios ja'a tsooctä mayhajt xtiuunä, ween mijtsä hoyhajtä weenhajt xmiö'oy.

³ Mägu'ughajpädөjc, ja'a mijtscөxpä hõjtsä Dios hoy miänaajä nnäma'ay “Dioscu-jú'uyäp.” Hawiinmats jaduhñ. Hix, tehngajnä Diosmädia'agy hajxy mjaac mäböcy, mөөд hajxy tehngajnä mjaac niçhogyii hamiñ haxөpy. ⁴ Hoy miajatiä hõjts nwädity maa ja'a Diostөjcän, jaduhñ hõjts nmädia'agy ja'a mijtscөxpä coo ja'a Diosmädia'agy hajxy hoy mjaanç tehñ miäböcy, mөөд coo hajxy hoy mjaanç tehñ miee'xtucy, hoy hajxy hanaxiä mja tsaächpөcy ja'a Dioscөxpä. ⁵ Coo hajxy jaduhñ mmee'xtucy, paadiä Dios hajxy jim xpiäda'aga'añ hawa'adstuum coo hänajty miähane'ema'añ. Xyhixpä Dios hajxy coo hajxy je'e myajcudsaaçhpөгө'oy. Hoy jaduhñ coo hajxy jim xpiädä'agät.

⁶ Pөnjaty mijts jaduhñ xchaaçhtiuumb, yaghawiimbidaambiä Dios jaduhñ. Jaduhñä Dios jioot chocy. ⁷ Coo ja'a Wiindsön Jesucristo yaa miänajtägatsa'añ hädaa yaabä naaxwiin, jim choona'añ tsajpootyp. Ja'a mioonsä miөөdmänacaamby, ja'a hajxy mäjaamөөdpä. Hajäjjäbä Jesucristo quiäda'aga'añ. Mänitä Dios hajxy nägөxiä xyajpoo'xäänäm, mөөд hõjts mөөд mijts nägөxiä. Cab hajxy jaduhñ xyajtsaaçhtiuunänänä.

⁸ Coo ja'a Jesucristo hänajty yaa tөө quiäda'agy, mänitä jäya'ayhajxy quiumädowa'añ pөnjatiä Dios hänajty tөө quia'a möjpädä'aguiäbä, pөnjatiä miädia'agy hänajty tөө quia'a mäböjcäbä ja'a Wiindsön Jesucristocөxpä. ⁹ Cөjxta'axiөө hajxy jiiby chaaçhpөгa'añ haxөөгtuum. Cab hajxy jim mänaa yajtägө'өwa'añii Dioswiinduum, maa ja'a Dios möj jaanç yhäña'ayän, maa möcmäjaa miөөдän. ¹⁰ Coo ja'a Jesucristo hänajty yaa tөө quiäda'agy, mänitä jäya'ayhajxy jiaanç tehñ yagjuө'өwa'añ, ja'a Diosmädia'agy hajxy hänajty tөө miäböquiäbä, ja'a hajxy hänajty tөө nähwa'açh tөө quihwa'açhäbä. Mänitä Jesucristo hajxy wyiingudsähgө'өwa'añ. Jim mijts hänajty mbahidaambä je'eguiөxp coo ja'a Diosmädia'agy hajxy hänajty tөө mmäböjpä neby hõjts mijts tөө nyajnähixө'oyän.

¹¹ Ja'a mijtscөxpä hõjtsä Dios hoy miänaajä nba'ya'axy coo ja'a miädia'agy hajxy hoy mgudiüünät, ween hajxy jaduhñ xquiumay. Paady hajxy tөө xyajnähdijy coo hajxy mnähwa'ads mguhwá'adsät. Ween hajxy xpiuhbety ja'a miäjaahaam coo ja'a miädia'agy hajxy hoy mmäböjcät, jaduhñä hojioot hajxy mmөөdhädät. ¹² Coo ja'a hoybä weenbä hajxy jaduhñ mgudiünät, jaduhñä cu'ugä Wiindsön Jesucristo hajxy wyiingudsähgө'өwät, mөөд jaduhñ mijtsä cu'ug xwyiingudsähgөөbiät. Ja'a nDioshajtäm mөөдä Wiindsön Jesucristo, jaaya'ay mijtsä tsooctä mayhajt xtiuunäp.

2

¹⁻² Mägu'ughajpädөjc, çámhөch nmädia'aga'añ coo ja'a Wiindsön Jesucristo yaa quiädaactägatsa'añ hädaa yaabä naaxwiin, mөөд coo hajxy xmiөjya'axäänäm coo hajxy jim nhamugөөyyämät maa je'ejän. Hoorä, coo hajxy mmädoyhädät cooc tyijy tөө yhabaatnä coo ja'a Jesucristo quiädaactägatsaannä, cab hajxy mdsoj mäbögat. Cab hajxy mjootmayhädät. Cab hajxy mdsähgө'өwät. Hix, jaduhñä häna'c-hajxy näje'e tөө yhöhnda'agy cooc tyijy ja'a Dios jaduhñ tөө miäna'añ, mөөд cooc tyijy hõjts jaduhñ tөө nmäna'añ, capxyhaam, nocyhaam. Pero cab jaduhñ nä'ä töyyä. Paady hõjts mijts cham nmänuu'xta'agy ³ coo hajxy mga'a yajwiinhöönät ni weentiä. Hix, cab jaduhñ choj habaada'añ. Jayөjpä jaya'ayä Diosmädia'agy hajxy nämay näjtshixө'өwa'añ. Mänitä haxөөгjäya'ay wyiingähxө'өгa'añ, ja'a hänajty jiiby ca'awaambä haxөөгtuum. ⁴ Mänitä haxөөгjäya'ayä Dios miädsibө'өwa'añ mөөдä jäya'ayhajxy yaa wyiingudsähgөөbiä cөxiä. Jaanç tehñ yajcumayaamb hänajty jaduhñ. Mänitä yhanehmдаact jiiby piäda'aga'añ maa Diostөjcän. Jaduhñ hänajty ñibiäda'aga'añii nebiä Diosän. Yajwiingudsähgө'өwaamb hänajty jaduhñ nebiä Diosän.

⁵ Mänaajoch jim nhitiän maa mijtsän, mänitoch jaduñ nhuuc hawáanäm coo jaduñ jiada'añ. Mjahmiejchp hajxy jaduñ, túhmäts. ⁶ Cabä haxøøgjäya'ay jaduñ choj wiingähxø'øga'añ je'eguiøxp coo yhadugyii høxtä coonä Dios yaghabáadät coo jaduñ wyiingähxø'øgät. Mnajuøøby hajxy jaduñ põñ mähadujp. ⁷ Tøø ja'a haxøøgwiinmahñdy tiägøøñä wädiypä. Hamee'ch jaduñ wiädity. Jaanä jaduñ je'e yhadújcäbä. Coo yhabáadät coo quia'a hadújcänät, mänitä mähadujpä jiøwa'adsa'añ. ⁸ Mänitä haxøøgjäya'ay jaduñ jiaančh wiingähxø'øga'añ. Mänitnä Wiindsón Jesucristo yaa quiádaactägatsa'añ mäjaamøød. Mänitä Jesucristo ja'a haxøøgjäya'ay yajcuhdägoyya'añ. Piäxujyaam jaduñ yagho'oga'añ. ⁹ Coo ja'a haxøøgjäya'ay jaduñ wyiingähxø'øga'añ, ja'a møjcu'ugong puhbedaamb. Møcmäjaa miøødhadaamb. Mänitä hijxtahñd yajcähxø'øga'añ hoy-yagjuøøñä. Jaduñnä cu'ug hánajty wyiinhøøna'añ. ¹⁰ Haxøøgwiinmahñdyhaam hánajty miäwiinhøøna'añ. Ja'a jäya'ayhajxy hánajty tu'udägoyyaambä, je'edshajxy jaduñ yajwiinhøønaamb. Paady hajxy hánajty tiu'udägoyya'añ coo ja'a tøyhajt hajxy hánajty tøø quia'a tsocy. Paady hajxy hánajty quia'a nähwa'ads quia'a cuhwa'adsa'añ. ¹¹⁻¹² Pønjetiä tøyhajt jaduñ ca'a tsojp, ja'a haxøøgpä hajxy wyiinxoondaacypy. Jaduñnä Dios miäna'añ coo hajxy ween yajwiinhøøñ, møød coo ja'a høhñda'agymiädia'agy hajxy ween miäböcy, jaduñ hajxy jiiby quiá'awät haxøøgtuum.

¹³ Mägu'ughajpädøjc, xjiaančh tehñ chojpy mijtsä Dios. Ja'a mijtscøxpä højtsä Dios hoy miänaajä nnäma'ay “Dioscujú'uyäp.” Hawiinmats jaduñ. Paady højts jaduñ nnäma'ay je'eguiøxp coo ja'a Dios hajxy jecy xyajnähdiyp coo hajxy mnähwa'ads mguhwá'adsät. Cahnä hädaa yaabä naaxwiin hánajty yhawijy tiøø'xta'agy coo hajxy jaduñ xyajnähdiyp. Coo ja'a tøyhajt hajxy tøø mmäböcy, paadiä Dios hajxy xyajnähwa'ačh xyajcuhwa'ačh ja'a yhEspirituhaam. ¹⁴ Coo ja'a Dios hajxy jaduñ xyajnähdiyp, paadiä tøyhajt hajxy tøø mmäböcy mänaa højts mijts hoy nyajwiingapxø'øyän. Jaduñ hajxy tøø xyajnähdiypä coo ja'a Wiindsón Jesucristo hajxy xmiøødhidät cøjxta'axiøø.

¹⁵ Mägu'ughajpädøjc, tøø højts mijtsä cuhdujt madiu'u nyajnähixø'øy capxyhaam møød nocyhaam. Hamuumdu'joot hajxy jaduñ mmäböçgät tehngajnä. Cab hajxy nnajtshixø'øwät. ¹⁶ Xjiaančh tehñ chójcäm ja'a Wiindsón Jesucristo hajxy møødä Diosteedy. Tøø mayhajt hajxy xtiúunäm coo hajxy tøø xyajwiinwaanøøyyäm cooc hajxy hoy miänaajä xmiøødhidáanäm. ¹⁷ Weenä Dios hajxy xpiuhbety coo hajxy hoy mgudiúnät, møød coo hajxy hoy mgäpxät.

3

¹ Hoorä, mägu'ughajpädøjc, huuc pa'ya'axä Dios hajxy ja'a højtscøxpä, ween højtsä mädia'agy ja'a Jesucristocøxpä paquiä nøcxy nyajwa'xy, weenä cu'ughajxy miäböcy nej mijts tøø mmäböquiän, ² møød ween højtsä Dios xñäwa'añ maa ja'a haxøøghäna'c-hajxiän, maa ja'a cahwiindøyhäna'c-hajxiän. Hix, cabä jäya'ayhajxy nägøxiä miäböcy. ³ Pero tømiädiaacpä Dios. Xpiuhbedaamb hajxy jaduñ. Xñäwa'anaamb hajxy jaduñ maa ja'a haxøøgpän. ⁴ Jaanä jaduñduhmbä, mmäböçpä højtsä Dios ja'a miädia'agy ja'a mijtscøxpä. Mnajuøøby højts coo mijtsä cuhdujt mgudiuna'añ, ja'a højts mijts cham nyajwiingapxø'øwaambiä. ⁵ Weenä Dios hajxy xjiaac yajwiinjuø'øy tiiguiøxpä hajxy jaduñ coo xchójcäm, møød tiiguiøxpä Jesucristo coo miee'xtujcy mänaa yaa yhitiän hädaa yaabä naaxwiin.

⁶ Mägu'ughajpädøjc, tøø højts nmädoyhaty cooc mijts näje'e mwi'i ñuuxho'ogy, møød cooc hajxy näje'e mga'a nä'ägädä tuna'añ. Hoorä, jaduñ højts mijts nmägapxy nhane'emy ja'a Wiindsón Jesucristocøxpä coo hajxy mbuhwá'adsät põnjaty jaduñ wi'i ñuuxho'p, ja'a cuhdujt hajxy ca'a cudiunaambä, ja'a højts mijts tøø nyajwiingapxø'øyabä. ⁷ Mnajuøøby hajxy coo højts hawiinmats xpiahíxät neby højts hoy nwädi-tiän. Hix, mänaa højts jim nhitiän maa mijtsän, cab højts hánajty jim nnuuxho'ogy. ⁸ Caj pues. Xøømdsuhñ højts hánajty nduñ nxajy. Paady højts hánajty jaduñ nguhdujthaty, cab højts hánajty ndsocy coo højts mijts cu xpiuhbejty. Ngujuuby højts hánajty tijaty højts hánajty ngaaby. ⁹ Paady højts hánajty jaduñ nguhdujthaty, jaduñ højts hánajty

ndsocy coo hõjts mijts jaduñ xpiahíxät, hoy hõjtsä cuhdujt hãnajty nja møødä coo hõjts mijts cu xpiuhbejty. ¹⁰ Mãnãã hõjts jim nhitiãn maa mijtsãn, jaduñ hõjts hãnajty nmãgapxy nhane'emy coo hajxy nãgøxiã mdun mxájät. Pøn jaduñ ca'a tunaamb, cabã caayyøøc hajxy mmó'owät. ¹¹ Coo hõjts jaduñ tøø nmãdoyhaty cooc hajxy jaduñ nãje'e mwi'i ñuuxho'ogy, møød cooc hajxy nãje'e mga'a nã'ãgãdã tuna'añ, møød cooc hajxy nãje'e mwi'i yajtägø'oy maa cueendã hajxy mga'a møødãn, ¹² pønjaty jaduñ jatcøøby, jaduñ hõjts nmãgapxy nhane'emy ja'a Wiindsøn Jesucristocøxpã coo hajxy jootcuyc ween tiuñ xiajy, jaduñã quiaayyøøc hajxy ñiguiudúunãxät.

¹³ Mijts, mägu'ughajpãdøjc, cab hajxy mnãnuuxø'owät coo ja'a hoybã weenbã hajxy mdúnät. ¹⁴ Pøn jaduñ ca'a cudiunaamb neby hõjts cham ngujaayãn maa hädaa noquiãn, myajcopcø'owãp hajxy jaduñ. Cab hajxy mmøødwãdijmúnät. Ween jaduñ chãhdiuñ. ¹⁵ Pero cab hajxy mmãdsiphãdät. Jaduñ hajxy mhoj mmãgãpxät nebiã huch nebiã puhya'ayãn.

¹⁶ Yejpiã Dios ja'a hoyhajtã weenhajt. Ween mijtsã hoyhajtã weenhajt mõj may xmio'oy hoy miãnaajã. Ween hajxy nãgøxiã xmiøødhity.

¹⁷ Høøch Pablo, hamdsoo cø'øháamhøch cham njahmiaya'añ. Jadúñhøch nxøø ngujaay hoy ñã'ã mädyii nocyjiootiã: Pablo. ¹⁸ Ween mijtsã Wiindsøn Jesucristo ja'a tsooctã mayhajt xtiuunã nãgøxiã. Amén.

1 Timoteo

¹ Pablohájpøch høøch. Ja'a Jesucristøch xquiuguexyhajp. Ja'a Diosteedy møødä Wiindsón Jesucristo, mänítøch hajxy tøø xyhane'emy coöch jaduhñ ndúnät cuguexy. Ja'a Dios hajxy jaduhñ xyajnáhwaats xyajcuhwáatsäm. Ja'a Jesucristo hajxy njøbhíjxäm coo hajxy hawa'adstuum xpiáda'agáañäm. ² Timoteo, míichhøch hádaa nocy nyajná-jaayøøby. Jadúhñhøch miích njuø'øy nebiä hamdsoo huungpän coo ja'a Diosmädia'agy nmäbójcäm. Tøyhajt jaduhñ. Ja'a Diosteedy møødä Wiindsón Jesucristo, ween miíchä tsooctä mayhajt hajxy xtiuunä, ween xñäxuuch, weenä hoyhajtä weenhajt xmio'oy.

³ Hoorä, mänaa højts jim tøø nhíjtäm Efeso, mänítøch nwiinmahñdyhajty coöch jim nnøcxät Macedonia-naaxooty. Mänítøch miích nmänuu'xtaacy coo jim mmähmó'øwät Efeso nidiuhñ, coo jaduhñ jim ween mduñ wiindsón maa ja'a Diostøjcän. Jadúhñhøch miích cham nnämäaguumbä coo jim mjaac túnät. Hix, jii jäya'ayhajxy näje'e, cabä Diosmädia'agy hajxy hoy yajnáhixø'øy neby højts nyajnáhixøøyyäm. Wiingaty hajxy yajnáhixø'øy. Mhójäp jaduhñ coo hajxy jaduhñ wiing quia'a yajnáhixøøñät. ⁴ Jaaná jaduhñduhmbä, mhójäp je'ebä pønhatiä nähap hajxy wi'i miädiaacp, møød pønhati yaj-copcøøby tijatiä jecyjiäya'ayhajxy hijty xiøhaty. Cab jaduhñ choobaady coo jaduhmbä capxy coo jaduhmbä mädia'agy hajxy tehngajnä yajcapxiø'øy. Jue'e tsoobaatp coo ja'a Diosmädia'agy hajxy nmäbójcäm coo ja'a Dios hajxy xpiädáacäm hawa'adstuum.

⁵ Pero jaduhñä Dios jioot chocy coo hajxy hamuumdu'joot nniçhojc nnibi-a'häyóowämät hamiñ haxøpy. Pønhati howyiinmahñdy møød, je'ehajxy jaduhñ hamuumdu'joot niçhojc nibia'häyóowäp, møød pønhati haxøøgwiinmahñdy ca'a møød, møød pønhatiä Diosmädia'agy hamuumdu'joot mäbøjp. ⁶ Tøø jäya'ayä Diosmädia'agy hajxy ñajtshixøøñä näje'e. Tøø hajxy jaduhñ tiu'udägoonä. Xiøøbä hajxy yajcapxiø'øy mädyii ca'a tsoobaatp. ⁷ Jaduhñä jioot hajxy jia wi'i piäda'agy coo ja'a jecyquihdujt hajxy yajnáhixø'øwät, ja'a Moisés jecy quiujähyyäbä. Pero cab hajxy wyiinjuø'øy neby hajxy jia wi'i yajnáhixø'øwa'añ cooc tyijy tiøyyä.

⁸ Coo ja'a jecyquihdujt hajxy jaduhñ hoy nyajtúunämät, mänit jaduhñ tiuung-paady. Tøyhajt jaduhñ, túhmäts. ⁹ Paadiä Dios ja'a jecyquihdujt piädaacy coo ja'a haxøøgjäya'ayhajxy jaduhñ quiumädówät, ca'a jie'eguiøxpä ja'a hojiäya'ayhajxy. Tøyhajt jaduhñ, túhmäts. Jue'eçh jaduhñ nnänøømby ja'a haxøøgjäya'ayhajxy, pønhatiä Diosmädia'agy ca'a mäbøjp, møød pønhatiä Dios ca'a wiingudsähgøøby, møødä cubojpä cugädieebiähajxy, møød pønhatiä haxøøgwiinmahñdy møød, møød pønhatiä Dios mä-gapxtägooby, møød pønhatiä tiaj tieedy yagho'p, møødä jäya'ay-yagho'pähajxy, ¹⁰ møød pønhatiä wiingto'oxiøjc møødtsänaaby, møød pønhatiä miäya'adiøjc møødmaab, møødä jäya'amiee'tspähajxy, møødä høhñdaacpähajxy, møødä mänähøønøøbiähajxy, møød pønhatiä hoguiapxiä homiädia'agy hajxy ca'a cudiuumb. ¹¹ Hádaa hoguiapxy hádaa homiädia'agy hádaaduhmbä, jim jaduhñ myiñ cujaay maa ja'a Diosmädia'aguian coo ja'a Dios hajxy tøø xpiädáacäm hawa'adstuum. Diøshøch jaduhñ tøø xyajnáhdijy coo ja'a miädia'agy nyajwá'xät. Jaançh tehñ jiootcujcä Dios jaduhñ.

¹² Haa ja'a Wiindsón Jesucristo, je'eçhä mäjaa tøø xmio'oy. Páadyhøch jaduhñ nnä-ma'ay "Dioscujú'uyäp" coöch tøø xwyiinguexy coöchä miädia'agy jaduhñ nyajwá'xät. Xyaghijxnájxhøch jaduhñ coöch hánajty hoy nduna'añ, ¹³ hóyhøch hijty haxøøg nja wiingapxpety. Nmädsibóøbiøch hijty. Nhøxpäbóøbiøch hijty pønhati mäbøjp ja'a Jesucristocøxpä. Pero cábøçhä Dios xyajcumädooy. Xñäxúu'tshøch jaduhñ je'eguiøxp coöch hánajty nga'a nnajuø'øyñä coöch hánajty haxøøg njatcø'øy. ¹⁴ Mänítøchä Dios ja'a tsooctä mayhajt møj may xtiuunä. Mänítøch xpiädaacy tu'ugmädia'agy møødä Jesucristo. Páadyhøchä Diosmädia'agy nmäbøjnä. Páadyhøchä jäya'ay nägøxiä ndsojc nba'häyoonä.

¹⁵ Paadiä Jesucristo yaa yhooy hädaa yaabä naaxwiin, ja'a cubojpä ja'a cugädiee-biähajxy hoy yajnahwa'ačh yajcuhwa'ačhii. Tehm tiøyhajt jaduhñ. Tsøc hajxy hamuumdu'joot mäbójcäm. Høøch, hanaxiøchä pojpa cädieey hijty nmøødä may. Cab ndiyy pøn hijty xmiäbaady nébiøchä pojpa cädieey hijty nmøødä. ¹⁶ Hóyhøchä pojpa cädieey hijty may nja møødä hanaxiä, mänitøchä Dios xñäxuu'ch, jaduhñä Jesucristo yajcähxø'cy cooch hñajty xjiaančh tehñ miee'xtucy, weenä cubojpä cugädieebiähajxy jaduhñ wyiinjuø'øy coo hajxy hawiinmats miäbógät ja'a Diosmädia'agy ja'a Jesucristocøxpä, møød ween hajxy jaduhñ wyiinjuøøbiä coo hajxy hoy jiugyhada'añ cøjxta'axiøø nebiä Dios jiugyhatiän. ¹⁷ Tsøgä Dios hajxy hoy miänaajä wiingudsähgøøyyäm. Nidiuhñ jaduhñ miähane'emy cøjxta'axiøø. Cab jaduhñ mänaa yho'oga'añ tiägoyya'añ. Cab hajxy jaduhñ mänaa nhíxäm. Tehm tiøyhajt jaduhñ.

¹⁸⁻¹⁹ Huang Timoteo, chámhøch miich nwiingapx njøjcapxø'øy coo ja'a Diosmädia'agy hamuumdu'joot mmämøjtänä'awät, møød coo tehngajnä mmäbógät, møød coo hojioot howyiinmahñdy mjaac panøcxät. Jaduhñ miichä Dioscugapxyhajxy jecy tøø xyhuuc mädiaacpä coo miich jaduhñ mgudiuna'añ. Najtscapxøøyyä hajxy jaduhñ ja'a Dioshøpñritu. Jii jäya'ayhajxy näje'e, coo ja'a yhojiootä yhowyiinmahñdy hajxy tøø ñajtshixø'øy, paady hajxy tøø tiu'udägoonä. Cabä Diosmädia'agy hajxy miäbøjnä. ²⁰ Jaduhñä Himeneohajxy tøø jiaty møødä Alejandro. Tøøchä møjcu'ugong hajxy nyajcø'ødägø'øy, weenä Dios hajxy jaduhñ miänuu'xta'agy coo hajxy miämee'xøøjät, møød coo hajxy ween wyiinjuø'øy coo jaduhñ yhaxøøgä coo ja'a Dios hajxy ñähojy.

2

¹ Hoorä, chámhøch nyajwiinxiic nyajwiingapxø'øwa'añ nebiatiä Dios hajxy nba'yaaxmújcämät. Tsøgä Dios hajxy mänuu'xtaacäm ja'a jäya'aguixøxpähajxy nägøxiä mäduhñtiä hajxy yaa chäna'ay hädaa yaabä naaxwiin. Tsøgä Dios hajxy nämäaayäm “Dioscujú'uyäp.” ² Pønjaty hajxy xyhanéhmäm, je'eguiøxpä Dios hajxy tsøc mänuu'xtaacäm, møødä gobiernähajxy, møødä gobernadorhajxy, møødä cuduunghajxy. Jaduhñ hajxy hagujc jootcujc nhíjtämät. Jaduhñä cu'ug hajxy xquia'a hadsijpämät. Jaduhñä Diosmädia'agy hajxy hoy ngudiúunämät. Jaduhñä Dios hajxy hoy nwiingudsähgøøyyämät. ³ Hahixøøby jaduhñ coo ja'a Dios hajxy jaduhñ nmänuu'xtaacämät ja'a gobiernäcøxpähajxy. Jaduhñä Dios hajxy xquiumáayämät. Jaaya'ay hajxy jaduhñ xyajnahwaats xyajcuhwáatsäm. ⁴ Jaduhñä Dios jioot chocy coo hajxy nägøxiä nnähwaats nguhwáatsämät mäduhñtia hajxy yaa ndsänäaayäm hädaa yaabä naaxwiin, møød coo ja'a tøyhajt hajxy nwiinjuøøyyämät ja'a Jesucristocøxpä. ⁵⁻⁶ Hiñ, tu'uquiä Dios hajxy nDeedyhajtäm. Jaanä jaduhñduhmbä, tu'jäya'ay hajxy jim xñähgapxtúutäm Dioswiinduum. Ja'a Jesucristo je'e. Mänitä Dios miänaañ coo ja'a Jesucristo yaa jiäya'ayhadät hädaa yaabä naaxwiin. Mänitä Jesucristo hamdsoojoot ñiñähdujcä. Mänit hajxy nägøxiä hoy xñähho'túutäm. Jaduhñ nbojpa ngädieey hajxy nägøxiä xyajnahwaats xyajcuhwáatsäm. ⁷ Páadyhøchä Dios xpiädaacy cooch xquiuguexyhadät coochä mädia'agy jaduhñ nyajwá'xät coo ja'a Jesucristo hajxy tøø xñähho'túutäm, møød coochä jäya'ayä Diosmädia'agy nyajwiingapxø'øwät, ja'a hajxy ca'a judiøspä, ween hajxy jaduhñ miäböcy, møød weenä tøyhajt hajxy jaduhñ wyiinjuø'øy. Tømiädiäacpøch jaduhñ, cábøch nhøhnda'agy.

⁸ Jaduhñds je'e, jaduhñhøchä njoot chocy coochä nmäya'adiøjcä Dios hajxy pi-a'yá'axät, hoy ñä'a majatiä hajxy mhamugø'øy Dioswiingudsähgøøbiä. Hojioot howyiinmahñdymøød hajxy jaduhñ mba'yá'axät, ca'a yhadsip ca'a yhajootma'adä, ca'a yhaxøøgwiiinmahñdymøødä. ⁹ Jaanä jaduhñduhmbä, cábøchä njoot chocy coo ja'a to'oxiøjc-hajxy høchähdiuunnä ñibiäda'agøøjät. Cabä quiuhwaay hajxy hanaxiä yajcopcø'øwät. Cabä oro hajxy piädá'agät ni perlas. Cabä wit tsowjatypä hajxy miäwädítät. ¹⁰ Jaduhñä jioot hajxy piädá'agät coo ja'a mayhajt hajxy tehngajnä tiúnät, jaduhñ hajxy yajcähxø'øgät coo ja'a Dios hajxy tøyhajt wyiingudsähgø'øy hamuumdu'joot. ¹¹ Hamoñ haducy ja'a to'oxiøjc-hajxy jim yhamädoowhídät maa hajxy naxy mhamugø'øyän.

Jaduhñä Diosmädia'agy hajxy hoy yhabógät. Møød mee'xxieemy hajxy jim yhídät. ¹² Jaduhñhöch nmägäpax nhanehmbä coo ja'a to'oxiøjcä Diosmädia'agy hajxy jim quia'a yajnahixø'owät maa hajxy naxy mhamugø'øyän. Hamoñ haducy hajxy jim ñä'ägä hídät. Cabä to'oxiøjc cuhdujt hajxy miøødä coo ja'a ya'adiøjc hajxy yhoj yá'axät. ¹³ Hix, ja'a Adán, jawyiin je'e yhädiuunä; høxhaamä Eva jiaac hädiuunä. ¹⁴ Jaanä jaduhñduhmbä, ja'a Eva jaduhñ wiinhøhnä ja'a møjcu'ugong, ca'a yhAdángä. Jaduhñä Eva quiädiehçohñ. ¹⁵ Paadiä to'oxiøjc-hajxy jiaançh tehñ chaaçhpøcy coo yhuunghajxy myiñ miech. Pero coo ja'a Dios ja'a miädia'agy hajxy tehngajnä miäböjcät, jaduhñä piojpä quiädieey hajxy yajnahwa'ads yajcuhwa'adsáanäxä. Jaduhñä Dios chojpä coo ja'a to'oxiøjcä mäßjøpädøjc hajxy hamuumdu'joot choc pia'häyówät, møød coo hojioot howyiinmahñdy hajxy miøødhádät, møød coo hajxy mee'xxieemy yhídät.

3

¹ Hahixøøby jaduhñ coo ja'a mjoot hajxy mbädá'agät coo hajxy mdúnät wiindsón maa ja'a mäßjøpädøjc-hajxiän. Hodiuunğ jaduhñ. Tehñ tiøyhajt jaduhñ. ² Pøn jaduhñ tuumb wiindsón maa ja'a Diostøjcän, tsipcøxpä howyiinmahñdy miøødhádät. Jagooyyä to'oxiøjc tu'ug yaghídät, ca'a mietsc ca'a tiägøøgä. Cabä vino comjaty yhú'ugät. Cabä haxøøg-wiinhøhnä miøødhádät. Hoy wiädítät. Coo pøn miédsät tøghayohbiä maa ja'a tiøjcän, piu'umió'owäp quioñdymó'owäp jaduhñ. Jiädäp yajnahixø'ow jaduhñ. ³ Cab yhu'ug cab jiøø'xät. Cab chiptúnät. Mee'xxieemy jaduhñ quiapx miädiá'agät. Cab tii yajtsiptá'agät. Cabä xädøñ yhadsógät. ⁴ Pøn jaduhñ tuumb wiindsón maa ja'a Diostøjcän, tsipcøxpä yhuungä tio'oxy hoy miägäpax yhané'emät, weenä yhuunghajxy miädia'agymiäböcy, ween wyiingudsähgø'øyii ja'a yhuung. ⁵ Hix, pønä yhamdsoo huungä yhamdsoo to'oxy hoy ca'a hane'emaamb, cab hoy miähane'ema'añ maa ja'a Diostøjcän. ⁶ Cab jaduhñ yhahixø'øy coo ja'a naamdägø'øbä tiúnät wiindsón maa ja'a Diostøjcän, coo jaduhñ ñä'a niguiumayøøjät. Wehñdä jaduhñ quiumädówät nebiä møjcu'ugong quiumädooyän. ⁷ Pøn jaduhñ tuumb wiindsón maa ja'a Diostøjcän, tsipcøxpä jaduhñ hoy wiädítät maa jäya'ayhagujcän, ja'a hajxy ca'a Diosmädia'agymiäböjpä. Jaduhñ quia'a nähøjøøjät, jaduhñ quia'a yajtu'udägoyyøøjät ja'a møjcu'ugong.

⁸ Jaanä jaduhñduhmbä, ja'a ya'adiøjc-hajxy jim mäbuhbejpä maa ja'a Diostøjcän, tsipcøxpä hajxy hoy jiäya'ayhádät. Cab hajxy ñä'a metscapx ñä'a tægøøgcápät. Cab hajxy yhu'ug cab hajxy jiøø'xät. Cabä jäya'axiädøñ hajxy yhadsógät. ⁹ Tsipcøxpä tøyhajt hajxy miäbögcät ja'a Jesucristocøxpä, ja'a hijty cuyu'uchpä. Howyiinmahñdymøød hajxy jaduhñ miäbögcät. ¹⁰ Pønjetiä jioot tsoj coo hajxy miäbuhbédät maa ja'a Diostøjcän, cab hajxy mdsoj pädá'agät. Ween hajxy jayøjp mhuuc hijxmach pø hoy hajxy hånajty tiuna'añ. Coo hajxy hånajty tøø mhijxmach coo howyiinmahñdy hajxy jiaançh møødä, mänit hajxy mbädá'agät coo hajxy jaduhñ miäbuhbédät. ¹¹ Jaanä jaduhñä to'oxiøjc-hajxypä, ja'a hajxy jim mäbuhbejpä maa ja'a tsajtøjcän. tsipcøxpä hajxy hoy jiäya'ayhájpat. Cab hajxy pøn nähøønó'owät. Cab hajxy yhu'ug cab hajxy jiøø'xät. Hamuumdu'jootä hoybä weenbä hajxy quiudiúnät cøxiä. ¹² Hoorä, ja'a mäbuhbejpädøjc-hajxy, ja'a ya'adiøjc-hajxypä, jagooyyä to'oxiøjc hajxy tu'ug yaghídät. Hoy ja'a yhuungä tio'oxy hajxy miägäpax yhané'emät. ¹³ Ja'a mäbuhbejpädøjc-hajxy jaduhñ hoy tuumbä, cumayáanäp hajxy jaduhñ ja'a mäßjøpädøjc, møød jaduhñä møjjuøhñdy hajxy miøødhádät coo hajxy hånajty miädia'aga'añ coog hajxy miäböcy ja'a Jesucristocøxpä.

¹⁴⁻¹⁵ Jaduhñhöchä njoot jia tsoy cooçh jim möbädajpä nnøcxät maa miichän. Pero cooçh jaduhñ jim nga'a nä'a tsoj nøcxät, páadyhöch hädaa nocy nyajnäjaayø'øy, jaduhñ mnajuø'owät nebiä mäßjøpädøjc-hajxy jim hoy yhídät maa ja'a Diostøjcän. Hoy miänaajä Dios yhity. Hoy miänaajä Dios ja'a mäßjøpädøjcä tøyhajt yajnahixø'øy ja'a Jesucristocøxpä. Hamuumdu'joot hajxy jaduhñ ñäwa'añii. ¹⁶ Jaançh tehñ miøj jaançh tehñ jiaançh hädaa mädia'agy jaduhñ ja'a Jesucristocøxpä, coo hajxy hoy xyajnahwaats xyajcuhwáatsäm. Tehñ tiøyhajt jaduhñ. Cuyu'uchä Dios hädaa mädia'agy hijty yaghity. Mänit hajxy jaduhñ tøø xyajwiinjuøyyäm. Hoorä, coo ja'a Dios jaduhñ miänaañ,

mänitä yHuung yaa quiejxy hädaa yaabä naaxwiin. Ja'a Jesucristo je'e. Jaduhñ je'e jiäya'ayhajty neby højtshájtäm. Mänitä Dioshespíritu jaduhñ yajcähxø'cy coo ja'a Jesucristo yhity hawa'adstuum. Mänitä Jesucristo yhijxä ja'a Diosmoonsä, ja'a hajxy jim tsohmbä tsajpootyp. Mänitä Jesucristo jim ñøcxy tsajpootyp. Mänitä mädia'agy wia'xy ja'a Jesucristocøxpä maa ja'a jäya'ayhajxy chäna'ayän, ja'a ca'a judfoshajxypä. Mänitä jäya'ayhajxy yaa may miäbøjcy ja'a Jesucristocøxpä hädaa yaabä naaxwiin.

4

¹⁻² Hoorä, howyiinjuøñä ja'a Dioshespíritu tøø miäna'añ coogä mäwiinhøhmbähajxy piädø'oga'añ. Jadúhñäc hajxy ñibiäda'aga'añii nebiä hoyhäna'cän. Pero yhamdsoo cuhdújtäc hajxy yajtunaamby. Haxøøgcuhdújtäc hajxy miøødhadaamby møødä haxøøgjuøhñdy. Jadúhñägä mäwiinhøhmbähajxy yajtägø'owa'añii ja'a møjcu'u. Jadúhñäc hajxy ñajtsapxø'owáanäxä nébiägä høhnda'agymiädia'agy hajxy yajnähiø'owät. Mänitägä mäbøjpädøjcä høhnda'agymiädia'agy hajxy nämay yhamädoowhida'añ. Mänitäc hajxy jaduhñ miäbøga'añ. Mänitägä tømüdia'agy ja'a Jesucristocøxpä hajxy ñajtshixø'owa'añ. ³⁻⁴ Jadúhñägä mäwiinhøhmbähajxy hänäjty yhöhnda'aga'añ cooc tyijy yhaxøøgä coo hajxy nbøjcämät, møød cooc tyijy quia'a hahixø'øy coo hajxy cøxiä wiinä njøø'xämät, hoy ja'a Dios cøxiä wiinä tøø jia päda'agy. Hix, tijatiä Dios tøø piäda'agy, haagä hoy je'e. Hahixøøby jaduhñ coo hajxy nguhibøjcämät, pønjetiä tøyhajt mäbøjp ja'a Jesucristocøxpä. Coo hajxy jaduhñ nguhibøjcäm, jaduhñä Dios hajxy nnämáayyämät "Dioscujú'uyäp." Y cab jaduhñ yhahixø'øy coo hajxy nwiingápämät. ⁵ Coo ja'a Dios jaduhñ tøø miäna'añ, møød coo ja'a Dios hajxy nba'yáaxäm, jaduhñä Dios cøxiä wiinä quiunuu'xy.

⁶ Naxy miiçhä mäbøjpädøjc jaduhñ mdehm ñajtsapxø'owät nébiøch cham nmädi-a'aguiän, jaduhñä Jesucristo hoy mbuhbédät, jaduhñä homiädia'agy hoy mjaac habøgät ja'a Jesucristocøxpä, ja'a hajxy nmäbøjcämbä. Je'e miiç mnä'ägä panøcxyhajpy. ⁷ Cabä nähapmädia'agy myajcopcø'owät nebiä teedyhaphajxy wyi'i miädia'aguiän. Höhnda'agymiädia'agy je'e jaduhñ. Jimä mjoot mnä'ägä päda'agät nebiä Diosmädia'agy maas hoy mjaac panøcxät. ⁸ Tsoobaatp jaduhñ siémpräm coo nni'xä ngopc hajxy møc nyaghíjtämät. Pero maas nä'ägädä tsoobaatp coo ja'a Diosmädia'agy hajxy tehngajnä nbanøcxämät. Hix, coo hajxy jaduhñ hoy ngudiúunämät, jaduhñä Dios hajxy tøø xyajwiinwaanøøyyäm coo hajxy hodium xyaghidáanäm hoy miänaajä, møød jäda'ahaty, møød miimnä mejtsnä. Jaduhñ hajxy xyagjyhadáanäm cøjxta'axiøø neby je'e jiugyhatiän. ⁹ Tehm tiøyhajt hädaa mädia'agy jaduhñ. Tsøg hajxy hamuumdu'joot mäbøjcäm. ¹⁰ Coo ja'a Dios hajxy jaduhñ xyaghidáanäm hodium hoy miänaajä, paady hajxy møc nduun nxájjäm. Jujquiä Dios. Coo ja'a miädia'agy hajxy nmäbøjcäm coo ja'a Jesucristo ja'a jäya'ay nägøxiä tøø ñähho'tu'udy, paady hajxy xyajnhwa'ads xyajcuhwa'adsáanäm.

¹¹ Jaduhñä mäbøjpädøjc mwiingapx mjøcaxpø'owät nébiøch naamnä tøø nmädi-a'aguiän. ¹² Tehngajnä hoguiuhdujt myaghídät, jaduhñ pøn xquia'a péxät, hoy jomøjt may mga'a ja møødä; møød jaduhñä mäbøjpädøjc xpiahíxät. Hoy yajxón mgapx mmädiá'agät. Caj mänaa mgapxtägóyyät. Hoy piønä mdsoc mba'häyówät. Hoy ja'a Diosmädia'agy mmäbøgät. Mmøødhädäbä howyiinmahñdy. ¹³ Mäduhñtiøch jim nga'a tsoj nøcxy maa miiçhän, tehngajnä Diosmädia'agy mgapx mmädiá'agät coo hajxy jim naxy mhamugø'øy maa ja'a Diostøjcän. Jaduhñä mäbøjpädøjc myajwiinxiic myajwiingapxø'owät. ¹⁴ Mänaa miiçhä majjaya'adiøjc jim xquiø'ønähgapiän maa ja'a Diostøjcän, mänit miiçhä Dioshespíritu xñägapy cooc miiçhä Diosmädia'agy myajwa'xa'añ. Mänit miiçhä häna'c jaduhñ xñajtsapxøøyyä. Mänit miiçhä Dios mäjaa xmioooy coo ja'a miädia'agy jaduhñ myajwá'xät. Naxy mdehm jahmiejtstá'agät coo ja'a mäjaa jaduhñ xmioooy. Caj mnajtshixø'owät.

¹⁵ Jaduhñä mjoot mbäda'agät coo ja'a Diosmädia'agy jaduhñ hamuumdu'joot myajwá'xät hoy miänaajä. Coo jaduhñ mgudiún mguñáxät, jaduhñä cu'ug xyhíxät coo

jaduhñ hoy myajtu'uyo'oy. ¹⁶ Niyajcopcø'owøø nej mwädity, nej myajnä'hixø'oy. Tehñgajnä jaduhñ mgudiún mguñáxät, jaduhñ mnähwa'ads mguhwá'adsät näguipxy mөөдä jäya'ayhajxy hamädoowhijpä.

5

¹ Cabä majjäya'adiøjc mhoj myá'axät. Mee'xxieemy mwiingapx mjøjcapxø'owät nebiä mhamdsoo teediän. Mөөдä muutsc-häna'c-hajxypä, jaduhñ mmägäpax mhané'emät nebiä mhamdsoo puhya'ayän. ² Jaanä jaduhñä tsø'ødaj mmägäpax mhanéhmbät nebiä mhamdsoo tajjän. Mөөдä to'oxiøjc-hajxy muutspä, jaduhñ mmägäpax mhanéhmbät nebiä mhamdsoo puhdo'oxiän. Caj mmägäpaxtägöyyät.

³ Jii yaamgto'oxyhajxy näje'e, cab hajxy pøn ñä'ägädä mөөдä. Tøyhajt hajxy ñidiuhmhaty. Je'eds hajxy mbuhbédäp. ⁴ Pero ja'a yaamgto'oxyhajxy jaac jimä, pø jimä yhuunghajxy, pø jimä yhoc-huunghajxy, ween hajxy jaduhñ piuhbedyii nägø'ø nädecypiä ja'a yhamdsoo huunghajxy, ja'a yhamdsoo hoc-huunghajxy. Jaduhñä mäßøpädøjc-hajxy quiumayøjät ja'a Dios coo tiaj tieedy hajxy jaduhñ piuhbejtägätsät. Jaduhñ hajxy yajcähxø'ögät coo ja'a tiaj tieedy hajxy jiaančh wiingudsähgø'oy. ⁵ Hix, ja'a yaamgto'oxyhajxy tehñ tiøyhajt nidiuhmhajpä, ja'a Dios hajxy yhajodhajpy. Xøømd-suhñ hajxy miänuu'xta'agy. ⁶ Pero ja'a yaamgto'oxy ja'a Dios hajxy ca'a hajodhajpä, coo ja'a jioot hajxy chógät coo hajxy xyi'ig xioonda'aga'añ, jaduhñä Dios yhixy nebiä ho'ogypiän, hoy hajxy jia jujyñä, hoy hajxy jia tsuxnä. ⁷ Jaduhñä mäßøpädøjc mwiingapx mjøjcapxø'owät coo ja'a homiädia'agy hajxy pedyii ween quiudiuñ, jaduhñ hajxy quiumayøjät ja'a cu'ug. ⁸ Pønjätiä jiuju miägu'ug ca'a hijxp ca'a mähäyoob mөөдä yhuung mөөдä tio'oxy, tøø ja'a Diosmädia'agy hajxy ñajtshixøøñä neby hajxy hijty miäbøquiän ja'a Jesucristocøxpä. Maas haxøøg hajxy jiatcø'oy quejee häna'c-hajxy ca'a nä'ägä mäßøjpä.

⁹ Mgujáhyyäbä yaamgto'oxiä xiøø hajxy pønjäty hajxy mbuhbedaamby. Je'e xiøøhajxy pédäp pønjäty tägøøghii'x jomøjt tøø yhabéjtäxä, mөөд pønjätiä ya'adiøjc tu'uquiä tøø miøødtsäna'ay, ¹⁰ mөөд pønjätiä cu'ughajxy ñänøømby coo ja'a mayhajt hajxy tøø tiúunäxä, mөөд pønjätiä ñøøxä miajc hoy yajxón tøø yajtso'ogy tøø yajyeegy, mөөд pønjäty pu'umiooby coñdymooby ja'a jäya'ayhajxy jim miimb mejtspä maa ja'a tiøjcän, mөөд pønjätiä mäßøpädøjc cø'øbujp tecypiujp, mөөд pønjäty puhbejp ja'a jäya'ayhajxy häyohmbaatpä, mөөд pønjätiä jioot tøø piäda'agy coo ja'a hoybä weenbä hajxy quiudiuñ quiuñáxät hoy ñä'a tiijä. Ja'a yaamgto'oxy hädaa hoguiuhdujt jaduhmbä hajxy yajtuumbä, je'eds hajxy mbuhbédäp.

¹¹⁻¹² Pero ja'a yaamgto'oxy tsaanbä muutspähajxy, cabä xiøøhajxy quiujáhyyäxät, cab hajxy mbuhbédät. Hoy hajxy tøø jia mäna'añ coogä Jesucristo hajxy hamuumdu'joot miäduna'añ maa ja'a tsajtøjcän, mäniä jioot hajxy näje'e piäda'agy coo hajxy piøjtä-gatsa'añ coo hajxy yhuuctägatsa'añ. Cabä Jesucristo hajxy jaduhñ hoy miädunaannä. Y tu'udägöyyäp hajxy jaduhñ. ¹³ Jaanä jaduhñä yaamgto'oxy tsaanbä muutspä hajxy näje'e jiajpä, wi'i ñuuxho'p hajxy, tøjc-tøjc hajxy wiädity. Wi'i miädia'agy-yajnajxp hajxy. Nä'a yaghadsow ñä'a yajpøgø'oy hajxy cøxiä tøø jiaty. Cøxiä hajxy ñä'a pamädia'agy mädyiijaty ca'a jagä hawiinmats. ¹⁴ Jaduhñhøchä njoot jia tsocy coo ja'a yaamgto'oxyhajxy piøjtägätsät, ja'a hajxy tsaanbä muutspä, weenä ñøøxä miajc hajxy jaduhñ jiaac yajtso'ogy, weenä jiøønä tiøjc hajxy hoy yajxón cwieendähaty, jaduhñ hajxy quia'a hoj quia'a ya'axøjät ja'a miädsiphajxy. ¹⁵ Hix, tøø hajxy näje'e tiu'udägøøñä. Tøø ja'a møjcu'ugongä miädia'agy hajxy jijøpøgøyyänä.

¹⁶ Mijts, puhdo'oxytiøjc, pø jim mijtsä yaamgto'oxy mmөөдä maa ja'a mjuju maa ja'a mmägu'ughajxiän, ween hajxy jaduhñ mbuhbety, jaduhñä mäßøpädøjc-hajxy quia'a taj quia'a máyät neby hajxy jaduhñ piuhbédät. Hix, jaduhñä mäßøpädøjcä yaamgto'oxy hajxy hoy piuhbédät, ja'a hajxy pøn ca'a jaančh mөөdpä.

¹⁷ Ja'a majjäya'adiøjc-hajxy, ja'a hajxy jim hoy tuumbä wiindsón maa ja'a Diostøjcän, ween hajxy hoy miäjuyii, mөөдä Diosmädia'agy hajxy yajnä'hixøøbiä. Ween hajxy nä'a

tägø'øbä miäjuyii. ¹⁸ Hix, jaduñä Diosmädia'agy miäna'añ: “Maa ja'a weeyä trigo hajxy hänäjty myajtehndse'ediän, weenä weeyä jaduñ piuhjøø'xy.” Jaanä jaduñ miänaambä: “Weenä cuduumbä cubøjpa miäjuyii.”

¹⁹ Coo ja'a Diostøgootypä wiindsøn ñäxø'øwø'øwøjät, mäniä mäxøhbä miädia'agy miäböjcäxät pø jimä capxtøøbä miøødä mejtstägøøg. Pø cab jaduñ miøødä, cabä miädia'agy jaduñ miäböjcäxät. ²⁰ Ja'a Diostøgootypä wiindsøñhajxy hoy ca'a wädiypä, mhøjäp myä'axäp jaduñ maa ja'a mäbøjpädøjc-hajxy nägøxiä yhamugø'øyän, weenä miäwiindsøñhajxy jaduñ chähgø'øy. ²¹ Miičh nwiingapx njøjcapxøøby coo hädaa cuhdujt jaduñbä tsipcøxp mgudiún mguñáxät. Cabä mmähäna'c nä'ä nägoobä mnä'ä tsaačhtiúnät, ni caj nä'ä nägoobä mbuhbédät. Tu'cuhdujtä häna'c mnä'ä híxät, hoy jaduñ xjia mägu'ughaty, hoy jaduñ xjia mädsiphaty. Xyhíxäbä Dios jaduñ møødä Jesucristo, møødä Diosmoonsähajxy jim tsajpootypä, ja'a hajxy wiimbíyyäbä. ²² Coo pøñ hänäjty tiägø'øwa'añ tuumbä tsajtøjwiindsøn, caj mdsoj cø'ønähgäbät. Jayøjp mwiinmahñdyhädät hodiägaamby pø hoy hänäjty tiuna'añ, pø caj. Hix, coo jaduñ ñä'ä tu'udägóyyät, wehñdä miičhä cu'ug xñänómät cooc tyijy miičh tøø mbuhbety. Howyiinmahñdy myaghídäp hoy miänaajä.

²³ Timoteo, naxy miičh mjootpädø'ogyii. Hahixøøby coo vino weentiä mhú'ugät. Cabä nøøyyähajtiä mhúucnät.

²⁴ Jii jäya'ayhajxy näje'e, coo hajxy mänaa quiädieey, paquiä jaduñ wyiingähxø'ogy, cahnä hajxy hänäjty miøjya'axyii haguyc. Pero jii wiinghäna'c-hajxy, cabä piojpa quiädieeyhajxy choj wiingähxø'ogy, høxtä coonä hajxy hänäjty tøø miøjya'axyii haguyc. ²⁵ Jaanä jaduñduhmbä, jii jäya'ayhajxy näje'ebä, paquiä jaduñ wyiingähxø'ogy coo hojioot hajxy jiaanč tehñ miøødä. Hoy jaduñ quia'a ja tsoj wiingähxø'ogy, tsipcøxp cujegy wyiingähxø'øga'añ.

6

¹ Mijts mäbøjpädøjc, nämay hajxy mhity cudoogø'øy. Naxiä mwiindsøn hajxy mdehñ wyiingudsähgø'øwät. Naxy hajxy jaduñ mdehñ miädia'agymiäböggät. Hix, coo hajxy jaduñ hoy mga'a cudiún mga'a cuñáxät, wehñdä mwiindsøn ja'a Dios haxøøg ñänómät møødä Diosmädia'agy. ² Jaanä jaduñduhmbä, pønjetiä wyiindsønä Diosmädia'agy mäbøjp, cabä mwiindsøn hajxy mbéxät. Pero hamuumdu'joot hajxy mwiingudsähgø'øwät. Maas hoy hajxy jaduñ mmädia'agymiäböggät je'eguiøxp coo ja'a Diosmädia'agy miäbøjpa, møød coo hajxy mmøødničhogyii. Naxiä mäbøjpädøjc hädaa cuhdujt jaduñbä mdehñ wyiingapx mdehñ jøjcapxø'øwät.

³ Jii häna'c-hajxy näje'e, wiing hajxy yajnähixø'øy. Cabä hoguiapxiä homiädia'agy hajxy wyiinjuø'øwa'añ neby hajxy nyajnähixø'øyyäm ja'a Wiindsøn Jesucristocøxpä coo ja'a hoybä weenbä hajxy jaduñ nbáatäm. ⁴ Ja'a häna'c-hajxy jaduñ wiing yajnähixø'øbiä, jaanč tehñ ñiguiumáayyap hajxy jaduñ cooc tyijy hajxy jiaanč tehñ jiaty, cooc tyijy hajxy jiaanč tehñ ñajuø'øy. Pero cab hajxy tii ñä'ägädä jaty, cab hajxy tii ñä'ägädä najuø'øy. Hanaxiä mädia'agy hajxy yajtsip yajma'adø'øy, ja'a ca'a tsoobaatpä. Coo hajxy jaduñ jiatcø'øy, paady hajxy cøxiä wiinä yajcapxiø'øy, paady hajxy miänähøønø'øy, paady hajxy haxøøgjaty ñiñäma'ayii. ⁵ Coo hajxy jaduñ jiaanč tehñ chiptsocy, paady hajxy jiaanč tehñ ñibiamädsibø'øyii. Jaanč tehñ yhaxøøgä wyiinmahñdyhajxy. Tøø ja'a tøyhajt hajxy ñajtshixøøñä. Wi'i yajmäjyuaamb hajxy, paady hajxy ñibiäda'agyii cooc tyijy ja'a Diosmädia'agy hajxy miäböcy, cooc tyijy hajxy yajnähixø'øy. Naxiä häna'c jaduñbä mdehñ piuhwá'adsät. ⁶ Coo ja'a Diosmädia'agy hajxy hoy nmäböjcämät, jaduñä hoyhajtä weenhajt hajxy møj may nbáatämät, jaduñ hajxy jootcujc nhíjtämät. ⁷ Haa ca'a, coo hajxy yaa nmiin ngáhwäm hädaa yaabä naaxwiin, cab hajxy tii nmämiin nmägáhwäm. Nähwa'ads hajxy nmaaxhuunghájtäm. Jaanä jaduñduhmbä, coo hajxy nho'c ndägóoyyäm, mäniä hajxy cøjx nhøxhó'cäm tijaty hajxy yaa nmøødhájtäm hädaa yaabä naaxwiin. Cab hajxy tii hoy nmäsoonáanäm. Tehñ tiøyhajt jaduñ. ⁸ Hoorä, coo wit tucxy hajxy nmøødhájtäm, coo cay hu'ugy hajxy

nmøodhajtäm, paady hajxy jootcujc tsøc hjtäm. ⁹ Pero jii häna'c-hajxy näje'e, jaduñ hajxy wyi'i miäna'añ coo hajxy miäyøøj'owa'añ. Paadiä haxøøgwiiimahñdy hajxy pi-anøcxa'añ. Jaduhñ hajxy haxøøgtuum nøcxy quia'awa'añ. Je'e hajxy yhøxtaaby mädyii jaduñ ca'a howyiimahñdy. Je'e hajxy jaduñ quiumadowáannäp. ¹⁰ Jiiyyä haxøøgpä ca'a hoybä ñä'ägädä tsohnda'agy coo jäya'ayhajxy wyi'i xiädø'øñhadsocy, møød coo hajxy wyi'i wyiinduc-haty. Paadiä Diosmädia'agy hajxy näje'e tøø ñajtshixø'øy. Paady hajxy jiaançh tehñ jiootmayhajnä.

¹¹ Pero miich, coo miichä Dios xquiuguexyhaty, cabä haxøøgpä ca'a hoybä mädyii mgudiñ mguñaxät. Ja'a hoybä weenbä jaduñ mgudiñäp. Ja'a Dios mwiingud-sähgø'owäp. Mmábøjcabä miädia'agy. Mmädsoc mba'häyówäp. Mmee'xtúgäp hoy mja tsaachpøcy. Mee'xxieemy mhäna'c-hädät. ¹² Hahixøøby coo ja'a Diosmädia'agy hamuumdu'joot mmábøgät, jaduñä Dios xyagjugyhädät cøjxta'axiøø neby je'e jiu-gyhatiän. Mänit miichä Dios jaduñ xyajñhdijy coo jaduñ mjugyhädät cøjxta'axiøø mänaa miich nnägapxiän cu'ugwiinduum coo ja'a Diosmädia'agy tøø mmábøcy. ¹³⁻¹⁴ Chaads miich nwiingapx njøjcapxø'øy coo ja'a Dioscuhdujt tehñgajnä mjaac cudiñ mjaac cuñaxät, møød coo mga'a yajtägätsät, jaduñä Dioscuhdujt quia'a nänømøøjät haxøøg, høxtä coonä yhabaadät coo ja'a Wiindsøn Jesucristo yaa quiädaactägatsa'añ hädaa yaabä naaxwiin. Ja'a Dios hajxy jaduñ xyhíjxäm møødä Jesucristo. Ja'a Diósädsä jugyhajt mooby hoy piønä hoy tyiijä. Haa ja'a Jesucristo, coo hñajty jim tøø yajmechii maa ja'a Poncio Pilato wyiinduumän, mänit ñägapxy coogä Dios tøyhajt yHuunghadyii. ¹⁵ Ja'a Dios jaduñ yaghabaadaamb mänaa ja'a Jesucristo yaa quiädaactägatsa'añ hädaa yaabä naaxwiin. Jaançh tehñ jiootcujcä Dios. Nidiuhñ tiuñ Wiindsøn. Nidiuhñ miähane'emy. Ni pøn jaduñ quia'a mäbaady. Nägøxiä gobiernähajxy yhane'emyii møødä reyhajxy. ¹⁶ Hoy miänaajä Dios yhity. Jim maa ja'a Dios yhitiän, jaançh tehñ miøc jim yhajjy. Paady hajxy jim hoy nga'a wiingumedsøøyyäm. Tsøc hajxy hoy miänaajä Wiindsønajtäm.

¹⁷ Pønjaty mäyøø hädaa yaabä naaxwiin, jaduñ miich mwiingapx mjøjcapxø'owät coo hajxy quia'a niguiumayøøjät, møød coo ja'a Dios hajxy yhajodhädät. Møj jaançhä Dios. Cøxiä wiinä hajxy xmióoyyäm, jaduñ hajxy jootcujc nhjtäm. Pero cabä mäyøøjäya'ayä xädø'øñ hajxy yhadsógät. Hix cøjxp tägooby ja'a hajxy miämäyøøhajpiä. ¹⁸ Jaduhñä mäyøødøjc mwiingapx mjøjcapxø'owät coo hojiot hajxy jiaançh tehñ miøødhädät. Weenä häyoobädøjc hajxy piuhbety. Cab hajxy wyiinduc-hädät. ¹⁹ Coo hajxy jaduñ yaa yhojiäya'ayhädät hädaa yaabä naaxwiin, mänitä hoyhajtä weenhajt hajxy møj may piädät Dioswiinduum. Y jaduñ hajxy cøjxta'axiøø yagjugyhädøøjät nebiä Dios jiu-gyhatiän.

²⁰⁻²¹ Timoteo, coo miichä Dios tøø xyajñhdijy coo ja'a miädia'agy myajwá'xät, paady hamuumdu'joot mgudiñät, paady jaduñ mnäwá'anät. Hix, tøø jäya'ayä Diosmädia'agy hajxy näje'e ñajtshixø'øy. Wiingmädia'agy hajxy tøø piadu'ubøcy cooc tyijy miaas yajxonä. Pero cabä mädia'agy jaduñmbä tiøyyä. Cab jaduñ choobaady. Nä'ä nägoobä yhøhnda'agy ja'a Diosøxpä. Cabä høhnda'agymiädia'agy jaduñmbä mmøjpädá'agät.

Ween miichä Dios ja'a tsooctä mayhajt xtiuñä. Amén.

2 Timoteo

¹ Høøch hädaa nocy nhädiuumby, høøch Pablohajpä. Ja'a Jesucristoch jaduhñ xquiuguexyhajp. Ja'a Dios jaduhñ mänaamb coöch jaduhñ xquiuguexyhädät. Coö ja'a Jesucristo hajxy xmiøødhájtäm tu'ugjoot tu'ugwiinmahñdy, paadiä Dios hajxy tøø xyajwiinwaanøøyyäm coö hajxy cøjxta'axiøø xyagjyghadäänäm neby je'e jiugyhatiän.

² Miičh Timoteo, miičhhøch hädaa nocy nyajnäjaayøøby. Jaduhñhøch miičh ndsocy nébiøch nhamdsoo huungän. Ween miičhä Diosteedy mayhajt xtiunä møødä Wiindsøn Jesucristo. Ween xñäxuuch. Weenä hoyhajtä weenhajt xmiø'oy.

³ Hojioot howyiinmahñdymøødhøchä Dios nwiingudsähgø'øyy nébiøchä nhap nébiøchä ndeedyhajxy jecy wyiingudsähgøøyyän. Hoy ñaaghóoc-høchä Dios nba'ya'axy, mänitøch miičh njahmiejsta'agy. Mänitøchä Dios jaduhñ nnäma'ay "Dioscujú'uyäp" ja'a miičhcøxpä. ⁴ Nja wi'i yhiixtägatsáambiøch miičh, jaduhñhøch nxoondaacpøgät. Xøømdsúhñhøch miičh njahmiejsta'agy. Njahmiejchpøch jaduhñ coö miičh hánajty mjaanč tehñ jiootmayhaty mänaa hajxy jim nniwiá'xäm. ⁵ Jaduhñhøch njahmiejtpä coö miičhä Diosmädia'agy hamuumdu'joot mmäbøcy. Ja'a mdajhoc Loida møødä mdaj Eunice, jaaya'ayä Diosmädia'agy hajxy jayøjp mähøjtsohñ. Tøyhajt jaduhñ coö miičh jaduhñ mbamäbøjpä.

⁶ Mänájøch miičh jim ngø'ønähgapiän, mänit miičhä Dios mayhajt xtiunä. Jaduhñ miičh mäjaa xmiøoy coö ja'a tiuung mdúunät. Cham nnäma'ay coö mga'a najtshixø'øwät ja'a mayhajt ja'a Dios mänit xtiunäbä, pero ween hamuumdu'joot mjaac yajtuñ. ⁷ Hiix, jaduhñä Dios hajxy xyajmädsøjcäm coö hajxy nga'a tsähgøøyyämät. Jaduhñ hajxy xyajmädsøjcämbä coö hajxy ndúunämät ja'a miäjaahaam, møød coö hajxy hamiñ haxøpy nničhojc nnibia'häyóowämät, møød coö hojioot howyiinmahñdy hajxy nyajtúunämät. ⁸ Jaduhñds je'e, cab mdsähdiúnät ja'a Dioscøxpä coö ja'a miädia'agy hánajty myajwa'xä. Ni jaduhñ mga'a tsähdiúumbät ja'a høøchcøxpä, hóyhøch yaa nja tsumyčhäna'ay. Páadyhøch yaa ndsumyčhäna'ay coöchä Dios ja'a miädia'agy nyajwá'xäbä. Cab mdsähgø'øwät coö mdsaačhpøgät ja'a Diosmädia'agyquiøxpä nébiøch ndsaačhpøquiän høøch. Hiix, xpiuhbedäbä Dios jaduhñ ja'a miäjaahaam. ⁹ Ja'a Dios hajxy tøø xyajnáhwaats tøø xyajcuhwáatsäm. Jaaya'ay hajxy tøø xpiädáacäm coö ja'a miädia'agy hajxy hoy ngudiúnämät. Paadiä Dios hajxy jaduhñ xyajnáhwaats xyajcuhwáatsäm coö hajxy xchøjcäm, møød coö mayhajt hajxy jecy xtiunäm ja'a Jesucristocøxpä; ca'a jie'eguiøxpä cooc tyijy hajxy hoy nguhdujthájtäm. Cahnä hädaa yaabä naaxwiin hánajty yhawijy tiøø'xta'agy, tøøyyämä Dios ja'a mayhajt hajxy hánajty jaduhñ xtiunäm. ¹⁰ Coö ja'a Jesucristo hajxy yaa hoy tøø xyajnáhwaats tøø xyajcuhwáatsäm, jaduhñä Dios ja'a mayhajt yajwiingähxø'nä, ja'a hajxy jecy xtiunämbä. Coö ja'a Jesucristo hajxy yaa hoy tøø xñähho'túutäm, jaduhñ quiähxø'øgy coö hajxy cøjxta'axiøø xyagjyghadäänäm neby je'e jiugyhatiän. Jaduhñ jiiby myiñ cujaay maa ja'a Diosmädia'agiän.

¹¹ Páadyhøchä Jesucristo jaduhñ xquiuguexyhaty coöchä Diosmädia'agy jaduhñ nyajwá'xät coö jaaya'ay hajxy jaduhñ tøø xyajnáhwaats tøø xyajcuhwáatsäm. ¹² Coöch jaduhñ nyajwa'xy, páadyhøch jaduhñ ndsaačhpøcy. Pero cábøch ndsähdiuñ. Hiix, coöchä Dios ja'a miädia'agy jaduhñ nmäbøjcä coöch jaduhñ xyajnáhwa'adsa'añ, páadyhøchä tøyhajt nmøødä coö jaduhñ hoy cwieendähada'añ pønjátyhøch tøø xyajcø'ødägø'øyy. Paady jaduhñ cwieendähada'añ coö ja'a Jesucristo yaa quiädaactägatsa'añ hädaa yaabä naaxwiin.

¹³ Jaac panøcx ja'a hoguiuhdujt, ja'ačh miičh tøø nyajnáhixø'øyyäbä. Coö ja'a Jesucristo hajxy nmøødhájtäm tu'ugjoot tu'ugwiinmahñdy, paadiä miädia'agy hamuumdu'joot mmäbøjcät, paadiä jäya'ay hamuumdu'joot mdsoc mba'häyówät, ja'a miičh myajnáhixøøbiä. ¹⁴ Hamuumdu'jootä tøyhajt myajwá'xät, ja'a Dios tøø xyajcø'ødägø'øyyäbä.

Caj myajtagátsät. Coo ja'a Dioshespíritu hajxy nmøødhájtäm, paady miich jaduhñ xpiuhbeda'añ.

¹⁵ Tøø miichäda'a mmädoyhaty coochä mäbøjpädøjc nämay tøø xpiuhwaatsnä, ja'a hajxy jim tsohm̄bä Asia-naaxooty, näguipxy møødä Figelo møødä Hermógenes. ¹⁶⁻¹⁸ Pero cábøchä Onesíforo mäbøcy tøø xmiädsähdiuñ, hóyhøch yaa nja tsumyčhänä'ay. Weenä Dios ja'a Onesíforo ja'a yhuungä tio'oxy ñäxuu'tsä. Coo miejch Roma, mänitøch nägø'ø nädecypiä xyhøxtaayy. Y cooch yaa xpiaaty, mänitøch mayhooc xpiuhbejty. Y hamuumdu'joot hajxy jim xpiuhbéjtäm Efeso, túhmäts. Coo yhabáadät coo ja'a Dios hajxy hánajty xyajtøyhajtyegáañäm, weenä Dios ja'a Onesíforo mänit ñäxuučh.

2

¹ Huung Timoteo, weenä Jesucristo xpiuhbety, jaduhñ mga'a tsähgø'øwät mänaa. Coo ja'a Jesucristo hajxy jaduhñ nmøødhájtäm tu'ugjoot tu'ugwiinmahñdy, paadiä mayhajt hajxy jaduhñ xtiúunäm. ² Mänáajøch miichä Diosmädia'agy nyajwiingapxø'øyan, nämayyä jäya'ayhajxy hánajty miämädoona'ay. Jaduhñ miich wiinghana'c mna-jtscapxøødiägátsät, ja'a hajxy hoy cudiumbä, ween wiinghänä'c hajxy jiaac tehñ ñajtsapxøødiägátsägumbä.

³ Ja'a Jesucristocøxpä mmee'xtúgät coo hánajty mdsaačhpøcy, nebiä soldadohajxy miee'xtuquiän. ⁴ Hix, ja'a soldadohajxiä, jaduhñä jioot hajxy piäda'agy coo hajxy ween quiumayii ja'a wyiindsøn̄hajxy. Cab jaduhñ yhahixø'øcy coo wiingtuung hajxy yhøxtá'awät. ⁵ Jaanä jaduhñduhm̄bä, ja'a häyø'pädøjc-hajxiä, coo hajxy jaduhñ hoy yhäyø'øgät nebiä cuhdajt myiñän, mänit hajxy hawiinmats quihäyø'øgät. Pero coo hajxy quia'a häyø'øgät, cab hajxy tii piáadät. ⁶ Jaanä jaduhñduhm̄bä, ja'a yuubä pujxpähajxy hoy cuduumbä, je'edshajxy jaduhñ jawyiin mäjúuyyáp. ⁷ Yajcopcø'øw hoy nébiøch cham̄ nmäna'añ, weenä Dios jaduhñ xquiøxy yajwiinjuø'øy.

⁸ Ja'a Jesucristo, ja'a David jecy yhaphajt yhoc-hajt. Coo ja'a Jesucristo hánajty tøø yho'ogy, mänit jiuypjøjtägajch. Ja'a Jesucristocøxpøch nnä'ägädä yajwiingapxø'øy-haty. ⁹ Coochä Jesucristocøxpä jaduhñ nyajnähixø'øcy, páadyhøch yaa ndsaačhpøcy. Páadyhøch yaa ndsumyčhänä'ay nebiä cahwiindøybän. Pero cabä Diosmädia'agy jaduhñ mänaa yhadugyii. Wiinduhmyhagajpt jaduhñ wia'xy. ¹⁰ Coo jaduhñ hoy miaajä wia'xy, páadyhøch yaa hoy ñejpiä mmee'xtucy, weenä jäya'ayhajxy jaduhñ ñähwaats quihwaatspä, ja'a Dios jaduhñ tøø yajnähdiñjiäbä coo ja'a Jesucristo hajxy miøødhídat tu'ugjoot tu'ugwiinmahñdy, møød ween hajxy yagjyghadyii cøjxta'axiøø nebiä Dios jiu gyhatiän.

¹¹ Hix, coo hajxy nniñähdujcamät coo hajxy nhó'camät nebiä Jesucristo yho'quiän, mänit hajxy jaduhñ njugyhájtämät cøjxta'axiøø nebiä Jesucristo jiu gyhatiän. Møød jaduhñ hajxy jim nhidáañäm maa je'e yhatiän. Tehñ tiøyhajt jaduhñ. ¹² Jaanä jaduhñduhm̄bä, coo hajxy mmee'xtújcämät, mänitä Jesucristo hajxy jim xmiøødhanéhmmämät. Pero coo hajxy nnijogápxämät cooc tyijy hajxy nga'a hixyhájtäm, cab hajxy jim xyajtägøøyyämät maa je'e yhatiän. ¹³ Hoy hajxy nja hønhdáacäm, cabä Jesucristo mänaa yhøhnda'agy. Hoy miänaajä tiømiädia'agyhaty.

¹⁴ Myagjahmiejtstá'agäbä mäbøjpädøjc jaduhñ nébiøch naamnä tøø ngujaayän. Hoorä, jaduhñ myajwiingapxø'øwät coo ja'a capxiä mädia'agy hajxy quia'a yajtsibø'øwät, ja'a ca'a tsoobaatpä. Jaduhñä Dios hajxy xyhanéhmmäm. Cab jaduhñ tiu-ungpaady coo hajxy jaduhñ yajtsibø'øy. Ja'a jäya'ayhajxy jaduhñ hamädoowhijpä, cabä hoguiapxiä homiädia'agy hajxy jaduhñ hoy yhabøga'añ. ¹⁵ Hamuumdu'jootä tøyhajt myajnähixø'øwät ja'a Jesucristocøxpä, jaduhñä Dios xquiumáyät, jaduhñ mga'a tsähdiünät. ¹⁶ Cabä capxiä mädia'agy myajcapxiø'øwät, ja'a ca'a tsoobaatpä. Ja'a jäya'ayhajxy jaduhñ tehngajnä yajcapxiøøbiä, tehngajnä hajxy jaduhñ nøcxy tiu'udägoyya'añ. ¹⁷ Y maas nämayyä jäya'ayhajxy jaduhñ tiu'udägoyya'añ coo ja'a capxiä mädia'agy hajxy jaduhñ miädówät, ja'a jaduhñ ca'a tsoobaatpä. Tøø ja'a Himeneo jaduhñ tiu'udägoonä møødä Fileto. ¹⁸ Tøø ja'a tøyhajt hajxy ñajtsihxøøñä. Jaduhñ hajxy yhøhnda'agy cooc

tyijy hajxy nga'a juyypjōjtāgatsáanām. Ja'a mǎbōjpādōjc-hajxy nǎje'e, coo hajxy jaduhñ wyiinhōōñii, cabā Diosmǎdia'agy hajxy jaduhñ hoy miǎbōgaannā. ¹⁹ Pero tōō ja'a Dios hajxy xpīādācām coo ja'a miǎdia'agy hajxy tehngajnā nbanócxāmāt. Jaduhñā Dios tōō miǎna'añ cooc ñajuō'oy pōñā miǎdia'agy hamuumdu'joot mǎbōjcāp. Jaduhñ tōō miǎnaambā coo ja'a haxōōgcuhdūjt hajxy ween ñajtshixō'oy pōñjaty niñānōōmāp coogā Diosmǎdia'agy hajxy miǎbōcy.

²⁰ Maa ja'a mǎyōōjǎya'ay tiōjcān, madiu'u texy jii by. Jiibiā orotexy, mōōdā platatexy, mōōdā quepychechtexy, mōōdā pochtiexy. Tsoobaatpā orotexy mōōdā platatexy. Cabā quepychechtexy jiaty tsoobaady mōōdā pochtiexy. ²¹ Jaanā jaduhñduhmbā, pōñjatiā haxōōgwiinmahñdy najtshixōōby, hoy ja'a Diosmǎdia'agy hajxy jaduhñ pianócxāt. Hoy hajxy jaduhñ quiudiúnāt waambaty hajxy yhane'emyii ja'a Wiindsón Jesucristo. Jaduhñ hajxy quiumayōōjāt.

²² Pero miich, mnajtshixō'owābā haxōōgwiinmahñdy nebiā muutsc-hāna'c-hajxy naxy yhadsoquiān. Ja'a mǎbōjpādōjcā Dios hajxy hamuumdu'joot pa'yaaxpā, howyiinmahñdy hajxy miōōd. Miǎbōjpiā Diosmǎdia'agy hajxy. Hamiñ haxōpy hajxy ñiichocy ñibia'hāyoyii. Cab hajxy chiptsocy. Jaduhñ miich hamuumdu'joot mbahíxāt. ²³ Caj myajtāgō'owāt maa hāna'cā capxiā mǎdia'agy hajxy nǎ'ā nāgoobā yajcapxiō'oyān, ja'a ca'a tsoobaatpā, ja'a ca'a tuungpaatpā. Ja'a capxiā mǎdia'agy jaduhmbā, ja'a tsipā pleetā yhōjx tiexy je'eduhñ, túhmāts. ²⁴ Pōñjaty yaa moonsāhājāp ja'a Dios hādaa yaabā naaxwiin, cab hajxy tii yajtsiptá'agāt. Hojiōot hajxy miōōdhādāp hoy ñǎ'ā pōngōxpā. Hoy yajxón hajxy yajnāhixō'owāt. Mee'xtúgāp hajxy jaduhñ. Cab hajxy jiootmá'adāt. ²⁵ Mee'xxieemiā miādsip hajxy yhoj miāgāpxāt. Wehñdā Dios jaduhñ miǎnā'anāt coo ja'a miādsipā yhaxōōgcuhdūjt hajxy ñajtshixō'owāt, weenā tōyhajt hajxy jaduhñ wyiinjuō'oy. ²⁶ Ween hajxy jaduhñ wyiinmahñmech, hoy hajxy hānajty tōō jia wiinhōōñii ja'a mōjcu'ugong. Paadiā mōjcu'ugong jaduhñ jia wi'i miǎwiinhōōna'añ; ja wi'i miāhane'emaamb jaduhñ.

3

¹ Pero huuc wiinjuō'ow miich hādaa. Coo hānajty yhabaada'añ coo ja'a Jesucristo yaa quiādaactāgatsa'añ hādaa yaabā naaxwiin, mǎnitā tsō'ty hāyohn jiada'añii yhabeta'añii. ² Haxōōgjatiā jǎya'ayhajxy hānajty jiatcō'owa'añ. Jootmōj hajxy hānajty ñibiāda'aga'añii. Jiaanč tehñ yhadsoogaambiā xādō'ōñ hajxy. Niguiumayāanāp hajxy hānajty. Yajcumayaamb hajxy hānajty. Capxtāgoyyaamb hajxy hānajty. Cabā tiaj tieedy hajxy hānajty wyiingudsāhgō'owa'añ. Cab hajxy hānajty tii yhojiāwō'owa'añ. Cabā Diosmǎdia'agy hajxy hānajty miǎbōga'añ. ³ Cabā yhuungā tio'oxy hajxy hānajty choga'añ. Cab hajxy hānajty pōñ miee'xa'añ. Mānāhōōnō'owaamb hajxy hānajty. Cabā howyiinmahñdy hajxy hānajty miōōdhada'añ. Māhāyoowhixaamb hajxy hānajty. Cabā hoybā weenbā hajxy hānajty choga'añ. ⁴ Tioogaambiā miāgu'ughajpā hajxy hānajty. Cab hajxy hānajty hodiāgaamby wyiinmahñdyhada'añ tii hajxy hānajty tiunaamby. Yhōxta'awaamby hajxy hānajty neby hajxy xioōndá'agāt. Cabā Dios hajxy hānajty wyiingudsāhgō'owa'añ. ⁵ Jaduhñ hajxy hānajty ñibiāda'aga'añii nebiā hāna'cā Diosmǎdia'agy mǎbōjpān, pero cab hajxy hānajty tōyhajt miǎbōga'añ.

Pōñjaty jaduhñ haxōōg jatcōōby, naxy jaduhñ mdehñ piuhwá'adsāt. ⁶ Jii cahwiindōyhāna'c-hajxy nǎje'e, jaanč tehñ yhōhñdaacp hajxy. Naxiā to'oxiōjc hajxy wyiinhōōñ, ja'a hajxy tii ca'a jajp ca'a najuōōbiā. Ja'a to'oxiōjc-hajxy jaduhmbā, cabā howyiinmahñdy hajxy ñǎ'āgādā mōōdā. Hamdsoojoot hajxy jaduhñ yajwiinhōōna'añ. ⁷ Hoy ñǎ'ā mǎdyii mǎdia'aguiā hajxy jaduhñ jia wi'i yhabōga'añ, pero cabā tōyhajt hajxy ñǎ'āgādā wiinjuō'owa'añ. ⁸ Ja'a hāna'c-hajxy jaduhñ hōhñdaacpā, haxōōgā wyiinmahñdy hajxy. Cabā Diosmǎdia'agy hajxy miǎbōga'añ. Jaduhñā tōyhajt hajxy miādsibō'oy nebiā Janes ja'a Moisés hajxy jecy miādsibōōyyān mōōdā Jambres. ⁹ Cabā Janeshajxy jecy miājādaacy. Paady hajxy jaduhñ quia'a mājādaacy coo howyiinmahñdy

hajxy hānajtŷ quia'a mōōdā. Ni hāna'c-hajxy jaduhŷ quia'a mājāda'agaambā, ja'a hajxy jāda'ahaty hōhŷndaacpā.

¹⁰ Hoorā, tōōch miičh xyhixy coōchā tōyhajt nyajnāhixō'ōy, coōch hoy njāya'ay-haty. Howyiinmāhŷdyhōch nmōōd. Nmābōjpiōchā Diosmādia'agy hamuumdu'joot. Mee'xxiéemyhōchā jāya'ay nmāgapxy. Hoy piōnōch ndsocy nmee'xy. Cābōchā Diosmādia'agy mānaa nnānuuxō'ōy. ¹¹ Jaanā jadūhŷhōch miičh tōō xyhijxpā coōch hoy miānaajā nmee'xtucy, hoy ŷējpiōch hānajtŷ nja tsaāchpōcy, nébiōch jim tōō njaty tōō nhabetiān Antioquía, mōōd jim Iconio, mōōd jim Listra. Madiú'ujōch jim ndsaačhpōjcy. Pero cābōchā Dios mānaa xŷajtshixō'ōy. Hoy miānāajōch jaduhŷ xcwieendāhaty. ¹² Haaga jaduhŷ jāya'ayhajxy chaačhpōgaambā pōnjatiā jioot pādaacp maa ja'a Jesucriston coo hajxy jaduhŷ hoy jiāya'ayhādāt. ¹³ Pero ja'a cahwiindōybāhajxy mōōdā hōhŷndaacpāhajxy, maas haxōōg hajxy tehŷgajŷ jiatcō'ōwa'añ. Māwiinhōōnaamb hajxy mōōd hajxy yajwiinhōōnaambā.

¹⁴ Pero miičh, naxiā Diosmādia'agy tehŷgajŷ mjaac tehŷ pianōcxāt, ja'a miičh hamuumdu'joot tōō mmābōquiābā. Haa ca'a, hōōch miičh jaduhŷ tōō nyajnāhixō'ōy, mōōdā mdaj mōōdā mdajhoc. Paady miičh hoy tōō mhabōcy. ¹⁵ Chuucnā miičhā Diosmādia'agy mdāgōōyy capxtaacpā. Jiibiā tōyhajt hajxy nbāatām neby hajxy hoy nnāhwaats nguhwāatsāmāt. Coo hajxy jaduhŷ nmābōjčām ja'a Jesucristocōxpā, jaduhŷ hajxy nnāhwaats nguhwāatsām. ¹⁶ Ja'a Diosmādia'aguīā, cōxiā Dios jaduhŷ yagjahyyā. Jaančh tehŷ tiuŷngpaatpā Diosmādia'agy jaduhŷ. Hahixōōby jaduhŷ coo ja'a jāya'ay hajxy nyajnāhixōōyyāmāt. Jaduhŷ hajxy nhoj nmāgāpxāmāt. Jaduhŷ hajxy nyajwiinxiic nyajwiingapxōōyyāmāt coo ja'a tōyhajt hajxy pianōcxāt, mōōd coo hajxy hoy jiāya'ayhādāt. ¹⁷ Pōnjatiā Dios tōō yajŷndijy coo ja'a miādia'agy yajwā'xāxāt, ween hajxy ca'xy pedyii yhabōcy, jaduhŷ hajxy hoy yajtuŷngpāadāt hoy ŷā'ā maajā.

4

¹ Coo ja'a Jesucristo yaa quiādaactāgatsa'añ hādaa yaabā naaxwiin, mānit tiāgō'ōwa'añ māhanehmbā. Mānitā jāya'ayhajxy nāgōxiā yajtōyhajtŷyega'añii, mōōd hajxy hānajtŷ jujcypīā, mōōd hajxy hānajtŷ tōō yhō'oguiābā. Ja'a Dioscōxpā mōōdā Jesucristocōxpā, jadūhŷhōch miičh nmāgapxy nhane'emy ² coo ja'a Diosmādia'agy hoy ŷā'ā mānaajā myajwā'xāt, mōōd coo ja'a cu'ug myajmābōgāt, mōōd coo mhoj mmāgāpxāt, mōōd coo myajwiingapxō'ōwāt coo hajxy jaduhŷ miābōgāt. Mee'xxieemiā Diosmādia'agy myajnāhixō'ōwāt tehŷgajŷ. ³⁻⁴ Hix, habāatnāp jaduhŷ coo ja'a cu'ugā Diosmādia'agy hajxy quia'a tsogaannā. Cabā tōyhajt hajxy jaduhŷ miādowaannā. Hoy ŷā'ā mādyii mādia'aguīā hajxy hānajtŷ wyi'i miādowa'añ, nāgoo hānajtŷ quia'a tōyyā. Mayyā yajŷnāhixōōbiādōjcy hajxy jaduhŷ yhōxta'awa'añ, ween hajxy hānajtŷ jaduhŷ yajŷnāhixō'ōyii nebiatiā jioothajxy hānajtŷ chocy. ⁵ Pero miičh, tehŷgajŷ howyiinmahŷdy mmōōdhādāt. Mmee'xtūgāp jaduhŷ coo hānajtŷ mdsaačhpōcy. Myajwā'xābā Diosmādia'agy. Hamuumdu'joot mgudiūnāt waambatiā Dios tōō xyhane'emy.

⁶ Hōōch, ja weenjaty quia'a habaady coōch hāna'c xyagho'oga'añ ja'a Jesucristocōxpā. Nāhjōjp tu'ujōjphōch hādaajān. ⁷ Tōōchā haxōōgpā njōjtāna'ay. Tōōch nmājāda'agy. Tōōch hamuumdu'joot ngudiūn waambātyhōchā Dios tōō xyhane'emy. ⁸ Chāmhōch njōbhixy coōchā Wiindsōn Jesucristo jim xpiāda'aga'añ hawa'adstuum. Mānitōch jim xpiāda'aga'añ coo ja'a jāya'ayhajxy hānajtŷ nāgōxiā yajtōyhajtŷyega'añii. Hogu-iuhdujthaamā Jesucristo hajxy jaduhŷ xyajtōyhajtŷyegāanām. Cābōch nidiuhŷ jim xpiāda'aga'añ hawa'adstuum. Pōnjaty jaduhŷ jōbhijxp hamuumdu'joot coo ja'a Jesucristo yaa quiādaactāgatsa'añ hādaa yaabā naaxwiin, nāgōxiā hajxy jim piāda'agāanābā hawa'adstuum.

⁹ Huuc min yaa maačh hōōchān. Mhadō'ōdsāp jaduhŷ. ¹⁰ Hix, tōōchā hāna'c xpiuhwa'ačh nāmāy. Haa ja'a Demas, tōō je'e ŷōcxy Tesalōnica. Paady yaa tōō choōn coo chāna'awa'añ yhāyowa'añ. Haa ja'a Crescente, tōō je'e ŷōcxy Galacia. Haa ja'a Tito, tōō je'e ŷōcxy Dalmacia. ¹¹ Jagōōyyōchā Lucas yaa xjiaac mōōdhity. Tunā mayhajt,

nøcxä Marcos wowø'øg. Yaa mwoomínät. Hóyhøch yaa xpiuhbédät. ¹² Haa ja'a Tíquico, jímhøch tøø nguexy Efeso. ¹³ Coo miičh yaa mmínät, mhuuc túnäbä mayhajt. Høøchä nnähgämem tu'uwíjtsäc. Jímhøch tøø nnähgue'egy Troas maa ja'a Carpo tiøjcän. Møødhøchä nnocy xpiøcmíñät møødä animalhac-hädiúñäbä.

¹⁴ Haa ja'a Alejandro, ja'a pujxthädiuumbä, tøøch cøxypänejpjy xñähøønø'oy. Ja'a Dios jaduhñ yaghawiimbídäp. ¹⁵ Cahwiindø y ja'a Alejandro jaduhñ. Mniyajcopcø'øwø'jöp. Møj may ja'a Alejandro xmiädsiphájtäm coo ja'a Diosmädia'agy hajxy naxy nyajwá'xäm.

¹⁶ Mänáajøch jayøbajt nyajnähø'øwø'øyän, cáboch pøn mänit xñähgapxtuuty. Nägøxiøchä häna'c xpiuhwaach. Pero cab jaduhñ ñejpiä. Weenä Dios jaduhñ miee'xy.

¹⁷ Mäjähñdiúumhøch hänajty. Mänítøchä Dios xñäwaañ. Mänítøchä mäjaa xmiooy, jadúhñhøchä jäya'ayä Diosmädia'agy hoy nyajwiingapxøøyy, ja'a hajxy ca'a judíospä, ween hajxy jaduhñ nägøxiä miäböcy. ¹⁸ Xcwieendähadäämbøchä Dios maa ja'a haxøøg ca'a hoybän. Xyajnähwa'ads xyajcuhwa'adsáambøch jaduhñ. Jadúhñhøch jim xyajnøcxa'añ tsajpootyp maa je'e yhane'emiän. Tsøgä Dios hajxy hoy miänaajä wiingud-sähgøøyyäm. Amén.

¹⁹ Huuc yajpoo'x ja'a Prisca ja'a høøchcøxpä, møødä Aquila, møødä Onesíforo yhuungä tio'oxy. ²⁰ Haa ja'a Erasto, jim je'e miähmøøyy Corinto. Haa ja'a Tróximo, jímhøch nnähgueecy Mileto. Pójcäp hänajty je'e. ²¹ Habáatnäp jaduhñ coo tøøchc yhida'añ. Naxy mdehm myínät. Mhadø'ødsäp jaduhñ. Nägøxiä miičhä mäbøjpädøjc yaa xyajpoo'xy møødä Eubulo, møødä Pudente, møødä Lino, møødä Claudia.

²² Ween miičhä Wiindsón Jesucristo xmiøødhity. Weenä hoyhajtä weenhajtä xmio'oy. Amén.

Tito

¹ Pablohájpøch høøch. Ja'a Dióshøch xmioonsähajp. Ja'a Jesucristøch xquiuguexy-hajp. Jadúhnhøch tøø xwyiinguexy coochä jäya'ayä Diosmädia'agy nyajwiinhixó'owät, pønjetiä Dios tøø wyiimbiy, ween hajxy jaduhñ miäböcy, weenä tøyhajt hajxy jaduhñ miøødhaty, jaduhñä Dios hajxy hoy wyiingudsähgó'owät. ² Jéquiänä Dios hajxy xyajwiinwaanøøyyäm coo hajxy xyagjugyhadáañäm cøjxta'axiøø neby je'e jiugyhatiän. Cabä Dios mänaa yhøhnda'agy, jaduhñä tøyhajt hajxy nmøødhájtäm coo hajxy jaduhñ xyagjugyhadáañäm. ³ Coo yhabaaty, mäniä Dios hajxy jaduhñ xyhawaañäm coo hajxy jaduhñ xyagjugyhadáañäm. Tøøchä Dios jaduhñ xyhane'emy coochä miädia'agy jaduhñ nyajwá'xät. Xtiehm wyiinguéjxhøch jaduhñ. Ja'a Dios hajxy xyajnáhwaats xyajcuhwáatsäm. ⁴ Tito, miíchhøch hádaa nocy nyajnájaayøøby. Tehm tiøyhájthøch miích njuø'oy nébiøch nhamdsoo huungän. Tu'cuhdujt højtsä Diosmädia'agy nmäböjäm. Ja'a Diosteedy møødä Wiindsón Jesucristo, ween miíchä mayhajt hajxy xtiunä, ween miíchä hoyhajtä weenhajt hajxy xmio'oy. Ja'a Jesucristo hajxy xyajnáhwaats xyajcuhwáatsäm.

⁵ Mänáajøch jim nwiimbitiän Creta, páadyhøch miích jim nyajmähmøøyy coo mjaac yaghoyó'owät tijaty højts hánajty nga'a yajpéjtäpnä. Jadúhnhøch miích nhane'emy coo wiindsón mbädá'agät maa tsajtøjcän wiinduhmyhagajpt. ⁶ Je'e mbädá'agäp pøn hoy jäya'ayhajp, pøn to'oxiøjc tu'ug yaghijp, pøn yhuung mäböjpä Diosmädia'agy, pøn yhuung hoy wädijp, pøn yhuung mädia'agymiäböjp. ⁷ Ja'a jäya'ayhajxy jaduhñ tunaambä wiindsón, ja'a Dios hajxy moonsähadáañäp. Howyinnmahñdy hajxy yaghídäp. Cab hajxy jiootmøjhädät. Cab hajxy yhawa'andá'agät. Cab hajxy yhu'ug cab hajxy jiø'xät. Cab hajxy chiptsógät. Cabä jäya'axiädø'øn hajxy yhadsógät. ⁸ Yajtøjtägó'owäp hajxy pønjaty mejtsp maa tiøjc-hajxiän; piu'umió'owäp quioñdymó'owäp hajxy jaduhñ. Chógäp ja'a hoybä hajxy. Cab hajxy choj jootmä'adät. Hoy hajxy jiäya'ayhädät. Hoy ja'a Diosmädia'agy hajxy quiudiünät. Cabä haxøøgwiinmahñdy hajxy yajtúnät. ⁹ Cabä tømiädia'agy hajxy ñajtshixó'owät, ja'a hajxy tøø yajnáhixø'oyíjábä, jaduhñä mäböjpädøjcä hoguiuhdujt hajxy yajwiingapxó'owät. Jaduhñ hajxy yajcähxó'ogät coo häna'c-hajxy yhøhnda'agy, ja'a wiingmädia'agy hajxy yajnáhixøøbiä.

¹⁰ Nämayyä hønndaacpähajxy wiädity. Cabä Diosmädia'agy hajxy quiudiuna'añ. Nä'a nägoodä hajxy jaduhñ ñä'a capxy ñä'a mädia'agy. Jaduhñä häna'c-hajxy nämay jiatcøøbiä, ja'a hajxy jaduhñ mänaambä coo ja'a mäböjpädøjc-hajxy tsipcøxp yajcircularhädät. ¹¹ Tsipcøxp myaghamónät pønjaty jaduhñ wiing yajnáhixøøby. Cabä cuhdujt hajxy miøødä coo hajxy jaduhñ wiing yajnáhixó'owät. Yajmäjuyaamb hajxy, paady hajxy jaduhñ wiing yajnáhixø'oy. Höchähdiuunnä hajxy jaduhñ jiatcø'oy. Haa ja'a mäböjpädøjcä wiingmädia'agy hajxy jaduhñ yajnáhixøøyyäbä, naxy hajxy jaduhñ yajtu'udägoyyii, ja'a hajxy tu'jøøn tu'tøjcpä.

¹² Jaduhñä Cretabäjäya'ay tu'ug tøø yhuuc mänaambä coogä miägunaaxhajxy jiaanç tehñ yhøhnda'agy, møød coog hajxy hanaxiä quiahwiindøyyä, møød coog hajxy jiaanç tehñ quiaxä, møød coog hajxy jiaanç tehñ ñuuxho'ogy. Jaaya'ay jaduhñ tøø miäná'añäbä, profeta hijty tiuumby. ¹³ Tehm tiøyhajt jaduhñ coo ja'a Cretabä-jäya'ayhajxy jaduhñ haxøøg jiäya'ayhaty. Paady miích møc-haamby mhoj mmägápät, weenä Diosmädia'agy hajxy jaduhñ hoy miäböcy. ¹⁴ Cabä hønnda'agymiädia'agy hajxy miøjpädá'agät, ja'a judíoshajxy naxy yajnáhixøøbiä. Møød weenä mädia'agy hajxy quia'a cudiuñ nebiä häna'c-hajxy jia hane'emiän, ja'a tøyhajt hajxy ca'a tsojpä.

¹⁵ Ja'a häna'cä howyinnmahñdy hajxy møødpä, cumáayyäbä Dios hajxy jaduhñ, hoy hajxy quia'a ja cudiuñ nebiä häna'c hønndaacpähajxy jia hane'emiän. Pero ja'a häna'cä Diosmädia'agy hajxy ca'a mäböjpä, caba Dios hajxy quiumayii je'eguiøxpä coo haxøøgwiinmahñdy hajxy jiaanç tehñ miøødä. Cab hajxy tii hoy ñänømy. ¹⁶ Jaduhñ

hajxy jia mäna'añ cooc tyjy ja'a Dios hajxy yhixyhaty, pero coo hajxy haxøøgjaty wyl'i jiatcø'oy, jaduñ hajxy yajcähxø'ogy coo hajxy tøyhajt quia'a hixiä. Cabä Diosmädia'agy hajxy quiudiuna'añ. Cabä hodiunng hajxy ñä'ägädä jada'añ. Paady hajxy xiøøghadyii ja'a Dios.

2

¹ Pero miich, ja'a hoguiuhdujt myajnahixó'owäp, jaduñä mäbøjpädøjcä Diosmädia'agy hajxy hoy quiudiúnät. ² Jaduñä majjäya'adiøjc myajwiinxiic myajwiingapxó'owät coo hajxy quia'a hu'ug quia'a jóø'xät. Cab hajxy nä'a nägoodä ñä'a xi'ig ñä'a hanähätät. Hoy hajxy jiäya'ayhädät. Hamuumdu'jootä Diosmädia'agy hajxy miäbøgät. Hoy ja'a miäjøøn miädøjc hajxy choc pia'häyówät. Miece'xtúgäp hajxy coo hajxy hänäjty chaaçhpøcy. ³ Jaduñä tajhoctøjc myajwiinxiic myajwiingapxó'owäp coo howyiinmahñdy hajxy miøødhädät, jaduñ hajxy hoy quiuhdujthädät. Cab hajxy pøn ñähøønó'owät. Cab hajxy yhu'ug cab hajxy jiøø'xät. Ja'a hoybä weenbä hajxy yajnahixó'owäp. ⁴ Jaduñä tajhoctøjcä miädsaan miädo'oxy muutspä hajxy yajwiinxiic yajwiingapxó'owät coo ja'a yhuung coo ja'a ñä'ay hajxy chógät, ⁵ møød coo hajxy hoy jiäya'ayhädät. Ja'a howyiinmahñdy hajxy miøødhädäp. Hoy yajxonä jiøøn tiøjc hajxy cwieendähädät. Miøødhädäbä hojiot hajxy. Wyiingudsähgø'owäbä ñihyhap hajxy. Coo hajxy jaduñ hoy quiuhdujthädät, jaduñä cu'ugä Diosmädia'agy hajxy wyiingudsähgø'owät.

⁶ Jaanä jaduñduhmbä, jaduñä muutsc-häna'ctøjc myajwiinxiic myajwiingapxó'owät coo howyiinmahñdy hajxy miøødhädät. ⁷ Jaanä jaduñ miichpä, tehngajnä hoy mwädítät, weenä mäbøjpädøjc jaduñ xpiahixy. Howyiinmahñdymøød myajnahixó'owät. Caj nä'a nägoodä mnä'a xi'ig mnä'a hanähätät. ⁸ Ja'a hoguiapxy ja'a homiädia'agy jaduñ myajnahixó'owäp, jaduñ pøn xquia'a jøycapxó'owät. Jaduñä nmädsiphajtämhajxy chähdiúnät, cab hajxy jaduñ hoy xñänóømämät haxøøg.

⁹ Hoorä, ja'a häna'c-hajxy hijpä cudoogø'oyä, jaduñ myajwiinxiic myajwiingapxó'owät coo ja'a wyiindsønä miädia'agy hajxy pedyii quiudiuun quiuñäxät, hoy hajxy nä'a waambaty yhane'emyii. Cab hajxy yhadsoowiimbídät. ¹⁰ Cab hajxy miéedsät. Hamuumdu'jootä wyiindsønä miädia'agy hajxy yajtúunät, ween hajxy jaduñ quiu-mayii, wehñdä wyiindsønä Dios miädia'agy hajxy jaduñ xmiäbøjcät. Ja'a Dios hajxy xyajnahwaats xyajcuhwáatsäm.

¹¹ Hix, tøø ja'a Dios jaduñ yajcähxø'ogy coo ja'a mayhajt tøø tiuñ, coo hajxy nägøxiä xyajnahwaats xyajcuhwáatsäm, mäduhñtiä hajxy yaa nhíjtäm hädaa yaabä naaxwiin. ¹² Jaduñä Dios hajxy xyhanéhmäm coo ja'a haxøøgwiinmahñdy hajxy nnajtshixøyyämät møødä hadsojtwiinmahñdy, møød coo ja'a howyiinmahñdy hajxy nyaghíjtämät møødä hoguiuhdujt, møød coo ja'a Dios hajxy hamuumdu'joot nwiingudsähgøyyämät, jaduñ hajxy hoy nwädíjtämät hädaa yaabä naaxwiin, ¹³ je'eguiøxp coo ja'a Jesucristo hajxy jaduñ njøbhíjxäm coo yaa quiädaactägatsa'añ neby hajxy tøø xyajwiinwaanøyyäm. Xi'ig xon hajxy jaduñ njøbhíjxäm. NDioshíjtäm ja'a Jesucristo hajxy jaduñ. Møj jaançh je'e. Je'e hajxy xyajnahwaats xyajcuhwáatsäm. Yajxon jiaançh tehñ quiäda'aga'añ. ¹⁴ Paady hajxy hoy xñähho'túutäm, jaduñä haxøøg ca'a hoybä hajxy xquiøxy yajnahwaats xquiøxy yajcuhwáatsäm. Jaduñ hajxy xqui'uughájtäm, weenä hoybä weenbä hajxy jaduñ hamuumdu'joot ndúunäm.

¹⁵ Jaduñdsä mäbøjpädøjc myajwiinxiic myajwiingapxó'owät coo hajxy jaduñ miäbøgät. Mmøød miichä cuhdujt jaduñ coo mhoj coo mmägäpxät pøn ca'a mäbøgaamb, jaduñ mga'a yajpéxät.

3

¹ Jaduñä mäbøjpädøjc myagjahmiejtstá'agät coo ja'a gobiernähajxy wyiingudsähgø'owøøjät møødä cuduunghajxy, møød coo ja'a miädia'agyhajxy quiudiúunäxät. Cabä mäbøjpädøjc-hajxy ñuuxhó'ogät. Tiúnäp ja'a cu'ugtuung hajxy. ² Cab hajxy pøn ñähøønó'owät. Cab hajxy chiptsógät. Mee'xxieemy hajxy jiäya'ayhädät. Hoy piønä hajxy wyiingudsähgø'owät.

³ Hix, hijty, cabä Diosmädia'agy hajxy hijty nwiinjuóoyyäm. Cab hajxy hijty ngudiúunäm. Tu'udägoóoyyäm hajxy hijty. Hanaxiä haxøøg ca'a hoybä hajxy hijty nhadsójcäm. Haxøøg hajxy hijty njäya'ayhajtäm. Hadsojtwiinmahñdy hajxy hijty nyaghíjtäm. Xxiøøghajtäm ja'a cu'ug hajxy hijty. Hamiñ haxøpy hajxy hijty nnimiähán nnimiägø'øwhajtäm. ⁴⁻⁵ Pero mänitä Dios yajwiingähxø'cy coo hajxy xñäxúu'tsäm, møød coo hojioot jiaančh tehñ miøødä. Mänit hajxy xyajnahwaats xyajcuhwáatsäm coo hajxy jaduhñ xñäxúu'tsäm, ca'a jie'eguiøxpä cooc tyijy hajxy hoy tøø ngudiúunäm. Jaduhñ hajxy xyajnahwaats xyajcuhwáatsäm coo hawiinjemyjioot coo hawiinjemywyi-inmahñdy hajxy xmióoyyäm, møød coo ja'a Dioshespíritu hajxy xyageem xyajtägájt-säm. ⁶ Coo ja'a Jesucristo hajxy hoy xñähho'túutäm, jaduhñä Dios ja'a yhEspíritu hajxy mõj may xmióoyyäm. ⁷ Paadiä Dios ja'a yhEspíritu hajxy xmióoyyäm, jaduhñ hajxy xpiadáacäm hawa'adstuum. Møjjä mayhajt hajxy jaduhñ xtiúunäm. Møød jaduhñ hajxy xyagjugyhadánäm cøjxta'axiøø nebiä Dios jiugyhatiän. Jaduhñ hajxy tøø xyajwiinwaanøoyyäm. Paady hajxy jaduhñ njøbhíjxäm.

⁸ Tehñ tiøyhajt jaduhñ. Naxy miičhä mæbøjpadøjc jaduhñ mdehñ miägäp mdehñ yhané'emät coo hajxy hamuumdu'joot hoy quiuhdujthädät, ja'a Diosmädia'agy hajxy tøø miäbøquiäbä. Tehngajnä hoybä weenbä hajxy tiúnät. Tsoobaatp jaduhñ. Jaduhñ hajxy ñiyaghoyø'øwøjät. ⁹ Pero caj myajtägø'øwät maa ja'a høhnda'agymiädia'agy hajxy naxy yajcapxiø'øyän, maa ja'a jecyquiuhdujt hajxy naxy yajtsipta'aguiän, maa ja'a jecyjiäya'ay xiøø hajxy naxy yajtøøw yajtøø'xän. Cab jaduhñbä capxy mädia'agy jaduhñ ñä'ägädä tuungpaady.

¹⁰ Jii häna'c-hajxy näje'e maa ja'a tsajtøjcän, wiingjaty hajxy yajnahixø'øy. Y coo ja'a mæbøjpadøjc-hajxy jaduhñ näje'e miäbøcy, tu'udägooby hajxy jaduhñ. Cabä jiamiøød hajxy hoy miøødhijnä tu'ugmädia'agy. Pønjaty jaduhñ wiingjaty yajnahixøøby, mhøjäp jaduhñ tähooc metsc-hooc, ween hajxy yhuuc hamoñ. Y pø cab hajxy jaduhñ yhamona'añ, mänit mga'a mämøjø'øwät mga'a mämayø'øwät. ¹¹ Pønjaty jaduhñ jatcøøby, cabä howyiinmahñdy hajxy miøødä. Haxøøgä wyiinmahñdyhajxy jaduhñ. Paady hajxy haxøøgtuum piäda'aga'añii.

¹² Jímhøchä Artemas nguexa'añ maa miičhän. Coo ja'a Artemas jaduhñ quia'a yajnábaadø'øwät coo jim ñøcxät, mänitøchä Tíquico mæbøcy jim nguéxät. Coo jim miédsät, mänitøch miičh jim nøcxy xpiaady Nicópolis. Jímhøch nhida'añ høxtä coo tøøchpä ñäxät. Mhuuc hadø'ødsäp jaduhñ. ¹³ Jimä Apoloshajxiäda'a wiädity Creta møødä Zenas, ja'a cuhdujtyajnahixøøbiä. Coo hajxy hånajty tiu'ubøga'añ, mänit miičh cøxiä wiinä mmó'owät tijaty hajxy hånajty yajmaajiadaamby. ¹⁴ Jaduhñä njamiøødhajtäm myajwiinxiic myajwiingapxø'øwät coo ja'a hoyba weenba hajxy tehngajnä tiúnät, ween hajxy jaduhñ piuhbety pøn hånajty yajmaajiajp. Cab hajxy ñä'a nuuxhó'ogät.

¹⁵ Ja'a njamiøødhøch hajxy yaa xmiøødhijpä, xyhaagä yajpoo'xp miičh jaduhñ. Huuc tunä mayhajt, huuc yajpoo'x ja'a høøchcøxpä pønjaty højts jim xchojp xpia'häyoob ja'a Diosmädia'agyquiøxpä. Ween mijtsä Dios ja'a hoyhajtä weenhajt xmiø'oy nägøxiä. Amén.

Filemón

¹ Høøch hädaa nocy njahby, høøch Pablohajpä. Tsumyčhänäabiøch cham je'eguiøxpä coočhä Jesucristo miädia'agy nyajwa'xä. Haa ja'a hermano Timoteo, tu'ugwiinmähñdyhöch xmiøødhity coöch hädaa nocy njaay. ² Miičh Filemón, miičh hädaa nocy nyajnguexaamby. Hoy hajxy nničhojç nniibia'häyóowäm coo hajxy nduunmújcäm ja'a Jesucristocøxpä. Nyajpoo'xyp hõjts ja'a hermana Apiahajpä. Jaduhñ je'e njuø'øy nebiä hamdsoo puhdo'oxypän. Njaaná yajpoo'xyp hõjts ja'a hermano Arquipohajpä. Quipxy hõjts je'e xmiøødtuumbä maa hõjts ja'a Diosmädia'agy nyajwa'xiän. Nägøxiä hõjtsä jäya'ay nyajpoo'xy ja'a hajxy jim mejtspä maa miičhä mdøjcän, ja'a Diosmädia'agy hajxy mæbøjpä. ³ Ween mijtsä Dios ja'a hoyhajtä weenhajt hajxy xmiø'oy møødä Jesucristo. Ja'a Dios hajxy nDeedyhajtäm. Ja'a Jesucristo hajxy nWiindsøñhajtäm.

⁴ Naaghóoc-høchhä Dios nba'ya'axy, ngapxpáatypøch miičhä mxøø, Filemón. Nnämäabiøchhä Dios: “Dioscujú'uyäp”, coo miičh hoy mjaanč tehñ tiuñ. ⁵ Tøøch nmädoyhaty coo miičhä Jesucristo miädia'agy hamuumdu'joot tøø mmæbøjcä. Jaduhñhöch tøø nmädoyhajpä coo miičhä jäya'ay mjaanč tehñ chocy mjaanč tehñ pia'häyoy, ja'a Diosmädia'agy hajxy mæbøjpä. ⁶ Coo miičhä Diosmädia'agy hamuumdu'joot tøø mmæbøcy, paady miičhä hojioot mjaanč tehñ miøødä, weenä jäya'ayhajxy jaduhñ jiaac tehñ wyiinjuø'øy nebiatiä Jesucristo ja'a mayhajt tiuñ ja'a hõjtsøxphajtäm. ⁷ Mägu'ughajpä, jaanč tehñ jiootcújc-høch jaduhñ nniijiäwø'oyii coo miičhä jäya'ay tøø mjootcapxmøcpøcy, ja'a Diosmädia'agy hajxy mæbøjpä. Paady miičh jaduhñ tøø mjootcapxmøcpøcy coo miičh mjaanč tehñ chocy mjaanč tehñ pia'häyoy.

⁸⁻¹⁰ Høøch Pablo, tøøch nmäjaaná. Chámhöch jaduhnajtä ndsumyčhänä'ay ja'a Jesucristo miädia'agyquiøxpä. Huuc møødhatä hojioot ja'a høøchcøxpä. Miičh nmänuu'xtaacy coo miičhä mayhajt cu mduuñ ja'a Onésimocøxpä. Coo miičhä hojioot mjaanč tehñ miøødä, páadyhöch miičh jaduhñ nmänuu'xta'agy, hóyhøchhä Jesucristo cuhdujt tøø xjia mo'oy coöch miičh nhané'emät. Jaduhñhöch ja'a Onésimo njuø'øy nébiøch nhamdsoo huungpän, je'eguiøxpä coöch je'e ja'a Diosmädia'agy jaduhñ tøø nyajmæbøcy yaa maačh yaa ndsumyčhänä'ayän.

¹¹ Cahnä ja'a Onésimo hånajty jim piäyø'ogyñä maa miičhän, cab miičh mmädia'agy hånajty xquiudiuunä. Cab hånajty tiuna'añ. Pero coo yaa tøø miech maačh høøchän, jaanč tehñ yhöyhøch yaa xmiøødtuñ. Jaanč tehñ yhoy miičh xmiøødtunaambä. ¹² Nguejxtägatsáambiøch jim maa miičhän, hóyhøch yaa nja tsocy hamuumdu'joot. ¹³ Jaduhñhöch nja mänaañ coöch cu xmiøødmähmøyy yaa maačh yaa ndsumyčhänä'ayän. Cu xpiuhbéjtyhöch jaduhñ maa miičhcøxpän. Ja'a Diosmädia'agyquiøxpøch cham ndsumyčhänä'ay. ¹⁴ Páadyhöch ja'a Onésimo jim nguejxtägatsa'añ maa miičhän, cáboch nnajuø'øy pø mmäna'anaamb miičh jaduhñ coo yaa cu miähmøyy. Pø mdunaambiä mayhajt jaduhñ, ween hamdsoojoot mdúnät; ca'a yhadsipä, ca'a yhajootma'adä; ca'a tii mnajtshäyowø'øy. ¹⁵ Wehñdä Dios jaduhñ tøø miäna'añ coo jim piäyø'øgät maa miičhän, coo yaa yhidät paquiä maačh høøchän. Hix, tøø ja'a Diosmädia'agy yaa miäbøcy. Y coo jim ñøcxtägätsät maa miičhän, cab jaduhñ mänaa xpiuhwa'adsaannä. ¹⁶ Moonsä miičh Onésimo hijty mwa'añ. Pero coo jim ñøcxtägätsät maa miičhän, jaduhñ miičh mjuø'øwa'añ neby hamdsoo huch neby hamdsoo puhya'aybän. Jaduhñ miičh mdsogaambä nébiøch høøch ndsoquiän. Maas hanaxiä miičh mdsoga'añ. Hix, maas hoy miičh mmädia'agy xquiudiunáañänä. Xímnäts mijts jaduhñ tu'ugymädia'agy mhidaañä ja'a Jesucristocøxpä.

¹⁷ Tøyhajt hõjts nniijootpáatäm. Tunxä mayhajt jaduhñ. Tsøc Onésimo jaduhñ møødnijootpáatäm neby hõjts nniijootpáatäm. ¹⁸ Pø tøø miičh xñägädieeyø'øy hoy

ñejpiä, pø xmiänuu'xyhajt miičh jaduñ, høøchä ngüeentä jaduñ. ¹⁹ Høøch nyajnä-hwa'adsaamby mäduññtiä xmiänuu'xiä. Tøyhajt jaduñ. Hamdsoo cø'øháamhøch hädaa nocy jaduñ njaay; jaduñ miičh tøyhajt mmøødhádät cooçh nga'a hønnda'agy. Y jim miičh cueentä mmøødäbä maa høøchcøxpän. Hix, høøch miičh jaduñ tøø nyajmäböcy ja'a Diosmädia'agy. ²⁰ Mägu'ughajpä, coo ja'a Onésimo jaduñ mmøødnijootpaadøød, jaduñ miičh myajcähxø'øga'añ cooçh miičh tøyhajt xjiaančh tsocy. Tunxä mayhajt jaduñ. Hix, näguipxy højts ja'a Jesucristo jaduñ nmøødhíjtäm tu'ugmädia'agy.

²¹ Hamdsoo cø'øháamhøch cham njaay. Nnajuøøbiøch jaduñ cooçh miičh ja'a nmädi-a'agy xquiudiunaanä nébiøch cham tøø nnäma'ayän. Njaanä najuøøbiøch jaduñmä coo miičh hojioot mjaančh tehñ miøødhada'añ ja'a Onésimocøxpä. ²² Chámhøch mayhajt tu'ug nmäyujwa'anáangombä. Høøch maadaact hahixøødiáacäc. Pa'ya'ax ja'a Dios hajxy cooçh ween xyajpädsømy pujxtøgooty. Mäníthøch jim nnócxät maa mijtsän.

²³ Xyajpoo'xp mijts ja'a hermano Epafrashajpä. Yaačh jaduñ xmiøødtsumyčhána'ay ja'a Jesucristo miädia'agyquiøxpä. ²⁴ Xyhaagä nä'ä yajpoo'xp mijts ja'a hermano Marcoshajxy, møødä hermano Aristarco, møødä hermano Demas, møødä hermano Lucas. Xyhaagä nä'ä møødtúumbøch hajxy yaa ja'a Diosmädia'agyquiøxpä.

²⁵ Weenä Jesucristo hoyhajt weenhajt hajxy xmio'oy coo jaaya'ay hajxy jaduñ mmøødhity tu'ugjoot tu'ugjuøhñdy. Amén.

Hebreos

¹ Jecy ja'a Dios quiuguexy quiejxy maa hõjts nhaphájtäm maa hõjts ndeedyhájäm. Diosmädia'agy-yajwa'xpä hajxy quiejxä. Mayhooc hajxy quiejxä. Madiu'u hajxy miädiaacy. ² Tøø ja'a Dios ja'a yHuung hajxy yaa xyajnäguéjxäm hädaa yaabä naaxwiin. Cahnä jiegø'øy coo yaa tøø yhooy. Je'e ja'a Diosmädia'agy hajxy tøø xjiaac hawáanäm. Jequiän je'eduhñ wyiinguejxä coo ja'a xøøwiin naaxwiin yhädiúnät cøxiä møødä xøø, møødä po'o, møødä madsa'a. Mänit yajnähdijjä coo yhané'emät. ³ Jaduhñä Dios yHuung miøjjä jiaančhä nebiä Diosän. Tu'ugjoot tu'ugwiinmahñdy hajxy yhity. Jim hajxy yhane'emy cøxp chaads hädaa yaabä naaxwiin. Tøø hõjts hoy xñähho'túutäm. Tøø ja'a nbojpä ngädieeyhajxy xyajnähwáatsäm. Mänit jim ñcxtägajch tsajpootyp maa ja'a Diosän. Jim je'eduhñ yhanembä jäda'anabaadyñä.

⁴ Ja'a Dios yHuung, maas mõj ja'a cuhdujt miøødä quejee ja'a Dios mioonsä ja'a tsajpootypahajxy miøødä, je'eguiøxpä coo je'e Dyios yHuungä. ⁵ Cabä Dios ja'a mioonsä mänaa ñäma'ay:

Miichhöch jäda'a ndehm yHuunghadaamby.

Ni mädyii mioonsä quia'a nänømy:

Yø'øjøch jaduhñ xTieedyhadaamb;

nHuunghadäämbiøch yø'øduhñ.

⁶ Coo ja'a Dios ja'a yHuung yaa quiejxy hädaa yaabä naaxwiin, mäniä Dios miänaañ:

Wéenhöch nHuung xwyiingudsähgøøyyä ja'a nmóonsøchhajxy, ja'a hajxy jim tsajpootypä.

⁷ Paquiä Dios ja'a miädia'agy quiudiúunäxä ja'a mioonsähajxy, nebiä pojtägoy wiäditiän, nebiä padooy wiäditiän. ⁸ Pero ja'a yHuung, je'eduhñ ñämaay:

MDioshajp miich, homiänaajä miich mhane'emy;

homiänaajä miichä tøyhajt myega'añ.

⁹ Mdsojpy miich ja'a tøyhajtpä;

cabä haxøøgpä mdsocy.

Maas jootcújc-höch miich nyaghity quejee ja'a nmóonsøchhajxy, ja'a hajxy jim tsajpootypä.

¹⁰ Jaduhñä Dios jiaac mänaambä:

Miich jecy mhädiuun ja'a naaxwiimbä møødä tsajpootypä.

¹¹⁻¹² Cuhdägoyyaambä naaxwiimbä møødä tsajpootypä;

tägatsaamb jaduhñ; jaduhñ jiada'añ néjjiämä wit coo tiujnä;

caj tiuungpaadaañä. Pero miich, cøjxta'axiøø miich mhida'añ;

caj miich mjogyhajt mänaa quiøxa'añ.

¹³ Cabä Dios ja'a mioonsä mänaa ñäma'ay:

Yaač miich xmiøødhané'emät. Caj miich mmädsip myajmäjäda'aga'añ.

¹⁴ Ja'a Dios ja'a mioonsähajxy ja'a tsajpootypä, jaduhñ mäwínäts hajxy je'e nebiä pojjän. Cab hajxy quiähxø'øgy. Dios jaduhñ quejxp coo hajxy piuhbédät pønjetiä Dios piäda'agaamby hawa'adstuum.

2

¹ Tsipcøxpä Diosmädia'agy hajxy nyajcopcøøyyämät, ja'a hajxy tøø nmädóowämbä; jaduhñ hajxy nga'a tu'udägóoyyämät. ² Haa ja'a Diosmoonsähajxiä, ja'a tsajpootypä, jéquiänä Diosmädia'agy hajxy yaa yajcädaacy hädaa yaabä naaxwiin. Tøyhajt ja'a Diosmädia'agy jaduhñ; pønjaty ca'a cudiuumb, haxøøgtuum hajxy miähmø'owa'añ. ³ Møjcuhdujtmøødä Jesucristo. Hamdsoo hajxy je'e hoy xyhawáanäm neby hajxy nnähwáatsämät. Haa ja'a hajxy jayøbajt mädoowäbä, tøjiajt ja'a mädia'agy jaduhñ maa hajxy je'ejan. Mänit hõjts jaduhñ xyhawaandägájtsäm. Coo ja'a mädia'agy hajxy nga'a yajtúunämät, cab hajxy jaduhñ nnähwáatsämät. ⁴ Madiu'u ja'a Dios ja'a hijxtahñd tøø

yajcähxø'øgy, ja'a hoy-yagjuøøñäjatypä; jaduñ hajxy nmäbójcämät coo ja'a miädia'agy tøyhajtä. Tøø ja'a yHespíritu hajxy xyajnäguéjxäm coo hajxy jaduñ xpiuhbedáanäm mädyiijaty tuung hajxy xmióoyyäm. Jaduñä jioot chocy.

⁵ Haa ja'a Dios mioonsähajxiä, ja'a tsajpootypä, cabä Dios jaduñ tøø miäna'añ coo hajxy yhané'emät mänaa ja'a naaxwiimbä hánajty wyiimbida'añän. ⁶ Jiiby jaduñ myiñ cujaay maa ja'a Diosmädia'aguiän:

Dios, tiiguiøxpä ja'a jäya'ay coo mjahmiejtsta'agy, coo mbuhbety.

⁷⁻⁸ Maas møc ja'a mmoonsä cuhdujt hijty tøø mmo'oy quejee ja'a jäya'ayhajxy.

Pero mänitä jäya'ay møjcuhdujt mmooyy coo cøxiä yhané'emät tijaty miich tøø mbäda'agy.

Jaduñä Dios ja'a jäya'ay piäda'aga'añ møj jaančh, coo jaduñ ween wyiingudsähgø'øyii. Coo ja'a Dios jaduñ hamdsoo miänaañ, jaduñä tøyhajt hajxy nmøødhjätäm coo ja'a møjcuhdujt hajxy tøø xmióoyyäm coo hajxy cøxiä nhanéhmämät. Pero cajnä quiähxø'øgyñä coo hajxy cøxiä nhane'emáañäm. ⁹ Jaduñä Jesucristo, mänaa yaa yhitiän hädaa yaabä naaxwiin, cabä cuhdujt hijty jiaty møødä nebiä Dios mioonsähajxy miøødän, ja'a hajxy tsajpootypä. Mänitä Dios miänaañ coo ja'a Jesucristo hajxy xñähho'túutämät nägøxiä, je'eguiøxpä coo ja'a Dios hajxy xchójcäm. Coo ja'a Jesucristo yho'cy, paadiä møj jaančh piädaacä, paadiä møjcuhdujt miooyyä coo yhané'emät.

¹⁰ Paadiä Dios cøxiä wiinä piädaacy, weenä jäya'ayä Dios hajxy jaduñ wyiingudsähgø'øy. Chojpiä jioot jaduñ coo ja'a yhuunghajxy jim yhidät nägøxiä maa je'ejän, pønjataiä miädia'agy mäbójcäp. Y jaduñä Dios miänaañ coo ja'a Jesucristo quiumädówät ja'a højtscøxpä. Jiaančh cudiuun je'eduhñ coo hajxy xñähho'túutäm. ¹¹ Ja'a Jesucristo hajxy jaduñ xyajnähwáatsäm. Quipxiä Dios hajxy nDeedyhajtäm møødä Jesucristo. Paadiä Jesucristo hajxy xquia'a mädsähdiúunäm. Hix, hamdsoo miänaañ coo hajxy tu'ugpuhya'ay xmiøødhjätäm. ¹² Jaduñ jiiby myiñ cujaay maa ja'a Diosmädia'aguiän:

Nmøødmädia'agáambiøch nbuhya'ayhajxy ja'a miichcøxpä.

Nguyhøwáambiøch miich jim tsajtøgooty, jim cu'ughagujc.

¹³ Jaduñ jiiby myiimbä:

Ni mänáajøchä Dios xquia'a wiinhøøñ, páadyhøch nga'a tsähgø'øy.

Jaduñ wiingtuum myíngumbä:

Chaačh nhity møødhøch nhuunghajxy;

Dióshøch jaduñ xmiooyy.

¹⁴ Pøn jaduñ tu'que'ex, tu'ugjoot tu'ugnø'ty hajxy jaduñ. Jaduñä Jesucristo hajxy tøø xmiøødhjätäm tu'ugjoot tu'ugnø'ty mänaa yaa yhitiän hädaa yaabä naaxwiin. Paady hajxy jaduñ xmiøødhjätäm, jaduñ hajxy hánajty xñähho'tu'udáañäm. Jaduñä møjcu'ugong hoy quia'a mäjädaacnä. Coo cu miäjädaacy, jaayá'ayädsä mäjaa häxøpy møød coo hajxy cu xyajtu'udägóoyyäm. ¹⁵ Coo ja'a Jesucristo miädia'agy hajxy nmäbójcämät, cabä nho'og hajxy jaduñ ndsähgøøyyänät. Pøn jaduñ ca'a mäbøjp, je'eds ja'a yho'og tsähgøøby mädu'ñtiä jia jugyhaty. ¹⁶ Coo ja'a Jesucristo yaa yhooyy hädaa yaabä naaxwiin, ja'a Abraham yhap yhoc-hajxy yajnäguejxä, neby hajxy jaduñ piuhbedøjät. Ca'a Dyiosmoonsähajxiä yajnäguejxä, ja'a tsajpootypä. Tøyhajt jaduñ. ¹⁷ Y paadiä Jesucristo yaa hoy jäya'ayhaty neby højtshajtäm; jaduñ hajxy hoy xñähgapxtúutäm maa ja'a Diosän; jaduñä nbojpä ngädieey hajxy hoy xñähho'túutäm. Hojioot ja'a Jesucristo miøødhajpy. Pedyii jaduñ quiudiuñ. ¹⁸ Hoyyä Jesucristo jia tsaachpøjcy, cabä møjcu'ugongä miädia'agy yajtu'unäxä. Y coo ja'a møjcu'ugong hajxy hánajty xjia wi'i yajtu'udägoyyáañäm, xpiuhbéjtäm ja'a Jesucristo hajxy jaduñ je'eguiøxpä coo ja'a møjcu'ugong miädia'agy quia'a mäbójcäxä ja'a Jesucristäm.

3

¹ Hermanodøjc, tøø ja'a Jesucristo ja'a nbojpä ngädieey hajxy xyajnähwáatsäm. Tøø ja'a Dios hajxy xyajnähdiájäm coo ja'a miädia'agy hajxy nmäbójcämät. Tsøgä Jesucristo

hajxy jahmiéjtsäm; høxtahm̄ds højts ja'a Dios yaa xyajnäguéjxäm. Jaduhñ hajxy njahmiéjtsämät coo hajxy jim̄ xñähgapxtúutäm maa ja'a Dioswiinduumän. ²Haa ja'a Moisésä, pedyii je'e jecy quiuduuñ maa ja'a Dios ja'a tiöjçän. (Je'eduhñ ñänøømy ja'a judíosahjxy.) Jaaná jaduhñä Jesucristo pedyii quiudiuumbä coo wyiinguejxä coo højts jaduhñ xñähgapxtúutämät. ³Maas hoy jaduhñ coo ja'a Jesucristo hajxy nwiingudsähgøøyyämät quejee ja'a Moisés. Høxtahm̄dsä tøjcojpä, je'eds jaduhñ wiingudsähgøøyyäp; cabä tøjc jaduhñ wyiingudsähgøøyyii. ⁴Cabä tøjc hamdsoo quiojy; häna'c jaduhñ cojçp. Pero ja'a Dios, cøxiä je'eduhñ piädaacy tijaty yaa hijp hädaa yaabä naaxwiin møødä jim̄ tsajpootyp. ⁵⁻⁶Ja'a Moisés, jayøjçpä tøyhajt jaduhñ miädiaactsohñ mädyii ja'a Dios hänäjty cujecy quiapxtøwaamby. Pedyii ja'a Moisés quiudiuuñ maa ja'a Dios ja'a quiu'ugän. Pero cabä møjcuhtdujt miooyä nebiä Jesucristo miøødän. Hix, ja'a Jesucristo, ja'a Dios yhamdsoo Uung je'e. Y pedyii jim̄ quiudiuuñ maa ja'a Dios ja'a quiu'ugän. Pero ja'a Moisés, jaduhñ je'e yhijty nebiä moonsän. Coo hajxy hamuumdu'joot nmäbøjçämät, coo ja'a Jesucristo hajxy jootcujc njøbhíjxämät coo hänäjty miejtstägatsa'añ, mänitä Dios hajxy nägøxiä xquiu'ugnäbøjçämät.

⁷Jaduhñ jiiby myiñ cujaay maa ja'a Diosmädia'aguiän:

Cooch nmädia'agy hajxy jäda'anäbaady xmiädóowät,

⁸⁻⁹hamuumdu'joot hajxy jaduhñ myajtúnät.

Haa ja'a jecyjiäya'ayhajxiä, ja'a mijts mhap mdeedyhajxiä, cábøch nmädia'agy hajxy jecy xyajtuunä, hóyhøch hijxtahnd may nja yajcähxø'cy, mänáajøch hajxy jecy nyajwäditian pactuum juxychägui'xjomøjt.

Cooch nmädia'agy hajxy xquia'a mäbøjçä, páadyhøch hajxy nyajcumädooyy.

¹⁰⁻¹¹Xyagjootmädiägøøyyhøch hajxy je'e. Mänitøch nmänaañ:

“Tøø hajxy jaduhñ mdu'udägoonä. Cábøch nmädia'agy hajxy xyhabøgaanä.

Tøyhajt jaduhñ, cábøch mijts jim̄ nyajmedsaannä maaçh mijts hijty nyajpoo'xa'añän.”

Jaduhñä Dioshëpíritu miänaañ maa ja'a Diosmädia'aguiän.

¹²Hermanodøjç, mnigwieendähadøøjçp hajxy nebiä Diosmädia'agy hajxy mga'a najtshixø'øwät; jaduhñ hajxy mga'a tu'udägóyyät. Jujcy ja'a Dios; ca'a jiaduhñä nebiä jäya'ayhajxy yaabä Dyioshajpiän. ¹³Pero mäduhñtiä hajxy mjugyhaty, mniguiapxmcøpøgøøjçp hajxy jabom-jabom, neby hajxy jaduhñ mga'a tu'udägóyyät. ¹⁴Coo hajxy tehngajnä nmäbøjçämät, neby hajxy tøø nmäbøjtsóhñäm, mänitä Jesucristo hajxy jim̄ xmiødhájtämät tsajpootyp.

¹⁵Jaduhñ jiiby myiñ cujaay maa ja'a Diosmädia'aguiän:

Coo ja'a Diosmädia'agy hajxy mmädóowät jäda'anäbaady, hamuumdu'joot hajxy myajtúnät.

Ja'a jecyjiäya'ayhajxy, cabä Diosmädia'agy hajxy jecy miäbøjçy.

¹⁶Jimä Moisés ja'a jäya'ay hoy wioobädsømy Egiptonaaxooty; je'eds hajxy jecy ca'a mäbøjç ja'a Diosmädia'agy, hoy hajxy hänäjty tøø jia mädooy. ¹⁷Je'eds hajxy hoy tiu'udägoonä. Jim̄ hajxy hoy quiøxy ho'nä pactuum. Je'edsä Dios hoyhoy ñäjootmayhajt juxychägui'xjomøjt. ¹⁸⁻¹⁹Je'edsä Dios jaduhñ ñämaayy coo quia'a yajmedsaannä maa hijty jaduhñ yajpoo'xa'añän, je'eguiøxpä coo hajxy hänäjty quia'a mäbøcy.

4

¹Tsøg hajxy nigwieendähájtäm; jaduhñ hajxy nga'a tu'udägóoyyämät. Coo hajxy ndu'udägóoyyämät, cabä Dios hajxy jiiby xyajtägøøyyämät maa hajxy xyajpoo'xäänäm. Tøø hajxy hijty xyajwiinwaanøøyyäm coo hajxy jiiby xyajtägø'øwäänäm. ²Tøø ja'a Diosmädia'agy hajxy nmädóowäm nebiä jecyjiäya'ayhajxy jia mädooyän. Xiøøbä hajxy jaduhñ jia nä'ä mädooyy, cab hajxy ñä'ä mäbøjçy. ³Højts, tøø højts nmäbøjçäm, paadiä Dios hajxy jim̄ xyajtägø'øwäänäm maa hajxy xyajpoo'xäänäm. Jimä Dios jaduhñ ñänøømy:

Cooch hajxy nnäjootmayhajty, páadyhøch hajxy nnämaayy:

“Tøyhajt jaduhñ, cábøch mijts jim̄ nyajmedsaannä maaçh mijts hijty nyajpoo'xa'añän.”

Coo ja'a Dios ja'a naaxwiimbä yhädiuumbädøøyy, mänit jaduñ pioo'xnä. ⁴Jiiby jaduñ myiñ cujaay maa ja'a Diosmädia'aguiän:

Mänitä Dios hoy pioo'xnä ja'a miäjuxtujxøøbä, coo ja'a naaxwiimbä hänajty tøø yhädiuumbädøøñä.

⁵Wiingtuumä Dios miänáangombä:

Cábøch hajxy nyajmedsaannä maa ja'a poo'xtaactän.

⁶Ja'a jecyjiäya'ayhajxy, ja'a Diosmädia'agy hajxy jayøbajt ja mädóowäbä, cab hajxy ñä'a yajtuuñ. Paady hajxy jim quia'a mejch maa ja'a poo'xtaactän. Pero näje'ejatiä jäya'ayhajxy miedsa'añ maa ja'a poo'xtaactän. ⁷Cujequiä Dios ja'a David yajmänaañ:

Coo ja'a Diosmädia'agy hajxy mmädówät jäda'anäbaady, hamuumdu'joot hajxy mmäbögät.

Je'eduhñ ñänøømby coo hajxy jäda'anäbaady jim ndägøøyyämät maa ja'a poo'xtaactän.

⁸Coo ja'a Josué ja'a judíoshajxy jecy woomejch maa ja'a Palestinanaaxootiän, cabä poo'xtaact hajxy ñä'a paaty. Paadiä Dios jaduñ miäna'añ coo højts jäda'anäbaady ndägøøyyämät maa ja'a poo'xtaactän. ⁹Jimnä ja'a poo'xtaact yhityñä maa ja'a Dios ja'a quiu'ughajxy tiägø'øwa'añän. ¹⁰Pøn jim tægøøby maa ja'a Dios ja'a pioo'xtaactän, jim jaduñ pioo'xaannä nebiä Dios pioo'xnän mänaa ja'a naaxwiimbä hänajty tøø yhädiuumbädøøyän. ¹¹Tsögä Diosmädia'agy hajxy hamuumdu'joot mäbójcäm; jaduñ hajxy hoy ndägøøyyämät maa ja'a Dios ja'a pioo'xtaactän. Cabä Diosmädia'agy hajxy nnajtshixøøyyämät nebiä jecyjiäya'ay hajxy jiatcøøyyän. Cab hajxy miäbøjcy, paady hajxy jim quia'a tægøøyy maa ja'a poo'xtaactän.

¹²Ja'a Diosmädia'agy, tuunnä je'eduhñ. Mäjaamøødnä je'eduhñ. Ja'a Dios hajxy xyajcähxø'cäm ja'a miädia'agyhaam pø nmøødhájtäm ja'a howyiinmahñdy hajxy, pø caj.

¹³Caj tii hayu'uçh hamee'ch mnä'ägädä túnät. Tsipcøxpä Dios ja'a nwiinmahñdyhájtäm hajxy nägøxiä xyhixyhájtäm neby hajxy njäya'ayhájtäm pø hoy, pø ca'a hoy. Pø cab hajxy hoy njäya'ayhájtäm, mänitä Dios hajxy haxøøgtuum xpiäda'agáañäm.

¹⁴Ja'a Jesucristo, ja'a Dioshuung, tøø jim quioody Dioswiinduum. Jim højts xñähgapxtúutäm. Paady, tsögä Diosmädia'agy hajxy hamuumdu'joot panócxäm. Cabä wiinghäna'c hajxy pøn xñähgapxtúutäm jim Dioswiinduum. ¹⁵Ñajuøøbiä Jesucristo neby hajxy yaa ndsaächpójcäm hädaa yaabä naaxwiin. Hix, tøø je'e yaa jäya'ayhaty neby højts yaa njäya'ayhájtäm. Tøø jia yajtägoyya'añii ja'a mõjcu'ugóngäm, neby højts xjia wi'i yajtägoyyáañämbä. Pero cabä Jesucristo mänaa tiu'udägoy. ¹⁶Tsögä Dios hajxy pa'yáaxäm hamuumdu'joot. Xchójcäm Dios hajxy. Miøødhajpiä hojiot je'eduhñ maa højtshájtäm. Xpiuhbéjtäm hajxy jaduñ coo højts tii nyajmaajiájtämät.

5

¹Ja'a teedywiindsøñhajxy, ja'a hajxy jim tuumbä maa ja'a judíos chajtøjc-hajxiän, jaduñ hajxy piäda'agyii coo ja'a cu'ug hajxy ñähgapxtú'udät maa ja'a Diosän, møød coo hajxy cøxiä quiuyoxø'øwät, møød coo animal hajxy yóxät, weenä cu'ug ja'a piojpä quiädieey hajxy jaduñ ñähwa'açh quiuhwa'açh, ²⁻³møød weenä yhamdsoo pojpä yhamdsoo cädieey ñähwaatsnä. Hix, jäya'ayhajp ja'a teedyhajxy neby højtshájtäm. Jimä piojpä quiädieeyhajxy je'ebä. Paady hajxy mee'xxieemy miägapxy yhane'emy pønjaty ca'a najuøøby, pønjaty tu'udägooby.

⁴Cabä teedyhajxy hamdsoo nibiäda'agyii. Dios hajxy jaduñ pädaacp nebiä Aarón jecy piädaacän. ⁵Ni ja'a Jesucristo hamdsoo quia'a nibiädaacä nebiä teedywiindsøñän. Ja'a Dios jaduñ pädaac. Jaduñä Dios ja'a Jesucristo ñämaayy:

Míichhöch jäda'a ndehm yHuunghadaamby.

⁶Wiingtuumä Dios jaduñ miänaañ:

Cøjxta'axiøø miiçh mduna'añ teedy nebiä Melquisedec jecy tiuunñän.

⁷Ja'a Jesucristo, mänaa yaa yhitiän hädaa yaabä naaxwiin, mänitä Dios møc pia'yaaxy. Jøøby hänajty. Miänuu'xtaac ja'a Dios coo piuhbedøøjät mänaa hänajty yho'oga'añän.

Wyiingudsähgøobiä Dios hänajty je'e, paadiä miädia'agy miädóowäxä. ⁸ Hoyyä Jesucristo jia Dioshuungä, quiudiuunä Tieedy miädia'agy coo chaačhpógät. ⁹ Coo miee'xtujcy mänaa chaačhpøquiän, xyajnahwáatsäm ja'a nbojpä ngädieeyhájttäm hajxy jaduhñ pønjetiä miädia'agy mábójcáp. Cøjxta'axiøø hajxy hodiuum xyaghidáanäm. ¹⁰ Mänitä Dios ja'a Jesucristo piädaacy teedywiindsøn nebiä Melquisedec jecy tiuunän.

¹¹ Madiu'u mijts hädaaduhmbä nja wi'i yajmøødmädia'aga'añ tsipjaty, pero caj mijts mwijnjuø'øwa'añ. ¹²⁻¹³ Tøø jegøøñä mänaa ja'a Diosmädia'agy hajxy mmäbøjtsooñän. Hahixøøby hijty jaduhñ coo wiinghäna'c hajxy myajnahixøøñät. Pero jaduhñ mijts tøø mjaty nebiä naamdägø'øybän. Caj mijts ja'a Diosmädia'agy ja'a tsipjatypä mjada'añ. Je'enä hajxy mhabøcyñä ja'a cajpä chipjatiä. Cahnä hoguiuhdujt hajxy mhabøcyñä. ¹⁴ Coo ja'a Diosmädia'agy hajxy hamuumdu'joot mgudiúnät, mänitä tsipjatypä hajxy jaduhñ mwijnjuø'øwät; y coo ja'a hoguiuhdujt hajxy tehngajnä mbanócxät, mänit hajxy mnajuø'øwät mädyii hänajty hoguiuhdujt, mädyii hänajty haxøøgcuhdujt.

6

¹ Tøø mijts ja'a mädia'agy mayhooc mmädoy ja'a Jesucristocøxpä, ja'a cajpä chipjatiä. Tøø hajxy mmädoy coo ja'a mhaxøøgcuhdujt hajxy mnajtshixø'øwät, coo ja'a Diosmädia'agy hajxy hamuumdu'joot mmäbógät. ² Mnajuøøby hajxy tii hajxy coo tøø mnäbety, tii hajxy coo tøø mgø'øniñähgabyii. Jaduhñ hajxy tøø mmädoy coo ja'a ho'ogyjiäya'ayhajxy jiuypigøga'añ, coo ja'a Dios ja'a haxøøgjäya'ayhajxy yajtsaačhpøga'añ cøjxta'axiøø, coo ja'a naaxwiimbä wyiimbida'añ. ³ Pero tsøgä Diosmädia'agy hajxy pedyii jaac habójcäm, pø chojpiä Dios jioot jaduhñ.

⁴⁻⁶ Pønä Diosmädia'agy najtshixøøby, hoyyä Diosmädia'agy tøø jia wiinjuøøñä coo ja'a Jesucristo hajxy tøø xñäho'túutäm, hoyyä piojpa quiädieey tøø jia yajnahwáatsäxä ja'a Jesucristäm, hoy tøø jia puhbedyíjäm ja'a Dioshespíritu, hoy jia najuø'øy coo ja'a Dios ja'a miäjaa quiexa'añ, coo ja'a Diosmädia'agy hajxy jaduhñ ñajtshixø'øwät, cab hajxy hoy miäbøgaannä. Jaduhñ hajxy yajcähxø'øgy coo ja'a Dioshuung hajxy yagho'tägach, coo hajxy näxi'igy hijxwiinduum. ⁷ Pønä Diosmädia'agy hoy cudiuumb, quiumaabiä Dios jaduhñ. Jaduhñ mäwíinäts hajxy je'e nebiä hoñaaxän. Coo tiu'uy, mänit hotyijä jaduhñ tiøømbety, tijaty tøø piäda'agyii, y quiunuu'xypä Dios jaduhñ. ⁸ Pøn hoy ca'a cudiuumb, haxøøgtuum jaduhñ ñä'a nøcxø'øwaambä. Jaduhñ mäwíinäts je'e nebiä naax ca'a hoybän, maa haagä hapyti tiøømbetiän. Ño'py hajxy jaduhñ.

⁹ Hermanodøjc, hoy mijts naamnä weenjaty tøø nja hadsähgø'øy, nnajuøøbiøch jaduhñ coo mijts ja'a Dios jaančh tehñ yhoy xpiuhbeda'añ, je'eguiøxpä coo ja'a mbojpa mgädieey hajxy xyajnahwaatsä. ¹⁰ Jaančh tehñ yhojiäya'ay ja'a Dios jaduhñ. Jiahmiejchp jaduhñ coo mijts hoy mgudiun, coo mijtsä hermanodøjc tehngajnä mbuhbety, je'eguiøxpä coo mijtsä Dios mjahmiech. ¹¹ Jaduhñhöch njoot chocy coo hajxy hoy mgudiúnät mäduhñtiä hajxy yaa mjugyhaty hädaa yaabä naaxwiin. Mänit hajxy jim mnócxät tsajpootyp nebiä Dios hajxy tøø xñäma'ayän. ¹² Cab hajxy mnänuuxø'øwät. Jaduhñ hajxy mgudiúnät nebiä jäya'ayhajxy jecy quiudiuunän, ja'a hajxy jim tøøbä ñócx-iäbä tsajpootyp. Ja'a Dios jaduhñ yajwiinwaanøøyy coo hajxy jim ñócxät, je'eguiøxpä coo ja'a Diosmädia'agy hajxy hänajty hoy miäböcy tehngajnä.

¹³⁻¹⁴ Jéquiänä Dios ja'a Abraham yajwiinwaanøøyy: “Tøyhájthøch miičh nbuhbeda'añ. Nyajpu'uwáambiøch nyaghi'igáambiøch miičh.” Hamdsoo cuhdujtcøxpä Dios jaduhñ miänaañ. Hix, caj pøn møjcuuhdujt miøødä nebiä Dios miøødän. ¹⁵ Yajtøjiajtä Dios jaduhñ nebiä Abraham yajwiinwaanøøyyän, je'eguiøxpä coo Abraham hänajty tehngajnä miäböcy. ¹⁶ Ja'a Dioscøxpä jäya'ayhajxy hamuumdu'joot jaduhñ waambaty miäna'añ; y coo hajxy jaduhñ miäna'añ hamuumdu'joot, cab jaduhñ pøn waamb miänaannä. Tødiägøøby jaduhñ. ¹⁷ Paadiä Dios jaduhñ miänaañ: “Tøyhájthøch tøø nyajwiinwaanø'øy coočh nbuhbeda'añ”, neby hajxy jaduhñ ñajuø'øwät coo hajxy tøyhajt piuhbeda'añii, coo ja'a Dios ja'a wyiinmahñdy ni mänaa quia'a yajtägatsa'añ. Hamdsoo ja'a Dios jaduhñ miänaañ. ¹⁸ Jaduhñdsä tøyhajt hajxy nmøødhájttäm coo ja'a

Dios ni mänaa quia'a hõhnda'agy. Jaduhndsä tøyhajt hajxy hoy nmøødhájtäm coo hajxy homiänaajä xpiuhbedáañäm coo ja'a miädia'agy hajxy nmäbójcämät. ¹⁹⁻²⁰ Jimä Jesucristo hajxy xñhgapxtúütäm tsajpootyp. Je'e jim tuumb teedywiindsón nebiä Melquisedec jecy tiuñän. Cøjxta'axiøø ja'a Jesucristo jim tiuna'añ tsajpootyp. Jaduhnä tøyhajt hajxy hoy nmøødhájtämät coo hajxy jim homiänaajä xyaghidáañäm.

7

¹⁻² Coo ja'a Abraham ja'a reyhajxy hánajty hoy tøø yagho'ogy, mänaa hajxy hoy chip-tuñän, mänitä Melquisedec hoy miøødnijøjcubaadø'oyii. Mänitä Melquisedec miänaañ cooc ja'a Dios ja'a Abraham hánajty piuhbeda'añ. Mäduhñtiä ja'a Abraham hánajty tøø piaady maa hánajty hoy tøø chiptuñän, majc-hit jaduhñ piädaacy tu'cuhdujtjaty. Mänitä Melquisedec piuhmooyy ja'a tu'hitpä. Mejtstu'u ja'a Melquisedec hánajty tiuñ. Tøø ja'a Dios tsajpootypä hánajty piäda'agy coo tiúnät teedy. Y gobiernä hánajty jim tiuumby maa ja'a cajpt xiøhatiän Salem. Jaduhñ miädia'agytiägø'oy coo hajxy jootcuyc yhity. Jaduhndsä Melquisedec xiøø miädia'agytiägøøbiä coo hoy guiobiernähaty. ³ Cab jaduhñ pøn ñä'ägädä najuø'oy pønä Melquisedec tiajhajt tieedyhajt, pøn yhaphajt tieedyhajt. Cab jaduhñ pøn ñajuø'oy mänaa myiñ mänaa quiahy, mänaa yho'cy mänaa tiägooyy. Coo je'e tiuñ teedywiindsón cøjxta'axiøø, jaduhñ mäwínäts je'e tiuñ nebiä Jesucristo tiuñän, ja'a Dios yHuung.

⁴ Cähxø'p jaduhñ coo ja'a Melquisedec møjcuhtdujt hánajty jiaanč tehñ miøødä, je'eguiøxpä coo piuhmooyy ja'a tu'hitpä, mäduhñtiä ja'a Abraham hánajty tøø piaady maa hánajty hoy tøø chiptuñän. Y ja'a Abrahamä, mijts mhap mijts mdeedy je'eduhñ. ⁵ Y ja'a Leví yhap yhoc-hajxiä, ja'a hajxy tuumbä teediä, jaduhñ jim myiñ maa ja'a jecyquihdujtän coo hajxy piuhmo'owøjät ja'a tu'hitpä maa ja'a majc-hitcøxpän. Ja'a miägunaaxhajxy jaduhñ yégäp, hoyyä Abraham hajxy quipxy jia møødhaphaty jia møødteedyhaty. ⁶ Pero ja'a Melquisedec, cabä Abraham hánajty jiuuyhaty miägu'ughaty. Hawiing hánajty tiuñ teedy. Pero puhmooyyä je'e ja'a tu'hitpä. Ja'a Abraham jaduhñ yejc, ja'a Dios hánajty tøøbä yajwiinwaanø'oyäbä coo hánajty yajpu'uwa'añ yaghi'iga'añ. Mänitä Melquisedec ja'a Abraham ñämaayy coo ja'a Abraham hánajty piuhbeda'añijäm ja'a Diósäm. ⁷ Y tøyhajt jaduhñ coo ja'a Melquisedec møjcuhtdujt hánajty jiaanč tehñ miøødä. Cabä Abraham quihdujt hánajty miøjjä nebiä Melquisedec quihdujtän. Hix, ja'a Melquisedec jaduhñ mänaañ coo ja'a Dios ja'a Abraham piuhbedät. ⁸ Haa ja'a hajxy yaa tuumbä teedy jäda'anäbaadyñä, ho'p hajxy, hoyyä tu'hitpä hajxy jia puhmo'oyii ja'a majc-hitcøxpä. Haa ja'a Melquisedecä, jaanä puhmooyyä je'ebä, pero cabä Diosmädia'agy miäna'añ coo tøø yho'ogy. ⁹⁻¹⁰ Hoyyä Levíhajxy hijty jia tuñ teedy, cabä quihdujthajxy hánajty miäbaady nebiä Melquisedec quihdujtän, je'eguiøxpä coo ja'a Abraham ja'a Melquisedec ja'a tu'hitpä hánajty tøø piuhmo'oy. Ja'a Abraham, je'edsä Levíhajxy hánajty yhaphajpy tieedyhajpy.

¹¹ Pero ja'a teedyhajxy, ni mänaa hajxy xquia'a yajnähwáatsämät. Paadiä Dios ja'a Cristo quiejxy coo je'e tiúnät teedy nebiä Melquisedec jecy tiuñän. Cabä tiuñ nebiä Aarónhajxy tiuñän. ¹² Coo ja'a Dios miänaañ coo ja'a Leví yhap yhoc-hajxy quia'a túunnät teedy, mänitä jecyquihdujt yajtägajtspä. ¹³ Coo ja'a Dios ja'a Jesucristo yaa quiejxy, yajtägajts ja'a jecyquihdujt jaduhñ, je'eguiøxpä coo ja'a Jesús tiuñ teedy, hoyyä Leví quia'a ja haphaty quia'a ja teedyhaty. ¹⁴ Hix, ja'a Judá je'e yhaphajt tieedyhajt. Y cabä Moisés waamb miänaañ coo ja'a Judá yhap yhoc-hajxy tiúnät teedy.

¹⁵ Y coo ja'a Jesucristo teedy tiuñ nebiä Melquisedec jecy tiuñän, cähxø'p jaduhñ coo ja'a Dios ja'a jecyquihdujt tøø yajtägajtsnä. ¹⁶ Paadiä Jesús piädaacä teedy coo cøjxta'axiøø jiuuyhada'añ. Cab jaduhñ yhity nebiä yaabä teedyhajxiän. ¹⁷ Jaduhñä Dios ja'a Jesús ñämaayy:

Cøjxta'axiøø miič mduna'añ teedy nebiä Melquisedec jecy tiuñän.

¹⁸⁻¹⁹ Coo ja'a Moisés ja'a jecyquihdujt hajxy xquia'a yajnähwáatsäm, paadiä Dios jaduhñ miänaañ coo quia'a túunnät. Mänitä Dios ja'a Jesucristo yaa quiejxy coo

hajxy hoy xyajnáhwáatsämät. Mänitä Jesucristo hajxy jim xwioonøcxáanäm maa ja'a Dioswiinduumän.

²⁰⁻²¹ Coo ja'a Dios ja'a Jesús piädaacy teedy, mänit miänaañ coo ja'a miädia'agy jiaanč tehñ tiøyhajtä. Jaduhñds jim myiñ cujaay maa ja'a Diosmädia'aguiän:

Ja'a Dios mänaañ coo ja'a miädia'agy jiaanč tehñ tiøyhajtä; cábagä wyiinmahñdy mänaa yajtagatsa'añ:

“Cøjxta'axiøø miäch mduna'añ teedy nebiä Melquisedec jecy tiuñän”, nomä Dios ja'a Jesús ñämaayy.

Pero coo ja'a wiingteedy piädaacä, cabä Dios waamb miänaañ. ²² Coo ja'a Jesucristo cøjxta'axiøø yhida'añ, jaduhñä tøyhajt hajxy nmøødhájtäm coo hajxy maas hoy xyajnáhwa'adsaanäm quejee ja'a Moisés ja'a jecyquihdujt. Cab hajxy je'e xyajnáhwáatsäm. ²³ Ja'a teedyhajxy hädaa yaabä naaxwiimbä, coo hajxy yho'ogy, mänit hajxy ñiguiuwichii. Paady hajxy may tøø tiuunnä. ²⁴ Pero cabä Jesucristo mänaa yho'ogaannä. Cøjxta'axiøø jaduhñ tiuna'añ teedy. Cabä wiinghänä'c ja'a tuung jaduhñ yajmämäh-møøwa'añ. ²⁵ Cøjxta'axiøø ja'a Jesucristo yhida'añ. Hoy jiaanč yajnáhwa'adsaanä pønä jioot tsojp coo ñähgapxtu'udøøjät ja'a Jesucristäm maa ja'a Dioswiinduumän homiänaajä.

²⁶ Coo ja'a Jesucristo jaduhñ tiuñ teedywiindsøn, jaanč tehñ yhoy hajxy jaduhñ xñähgapxtúutäm. Ni mänaa wiinghänä'c hajxy jaduhñ xquia'a ñähgapxtúutäm nebiä Jesúsän. Cabä Jesús tii pojpä tii cádieey ñä'ägädä møødá. Ni pøn jaduhñ quia'a mäbaady nebiä Jesúsän. Nhaagä møødhájtäm pojpä cádieey hajxy. Jimä Jesucristo yhiñä tsajpootyp; møjcuhtdujt jim miøød. ²⁷ Haa ja'a teedywiindsøñhajxy hädaa yaabä naaxwiimbä, jabom-jabomä animal hajxy yoxy. Jaduhñäc tyijy ja'a piojpä quiädieey hajxy ñähwa'ads quihwá'adsät, møødá cu'ug piojpä quiädieeyhajxy. Jayøjp hajxy yoxy ja'a yhamdsoo pojpä yhamdsoo cádieeguiøxpä. Mänit hajxy jiaac yoxy ja'a cu'ug piojpä quiädieeguiøxpä. Pero cabä Jesucristo animal mänaa yoxy. Hix, tähooc jaduhñ ñiñähdujcä coo yho'cy. ²⁸ Ja'a jecyquihdujt jaduhñ mänaamb coo ja'a jäya'ayhajxy tiünät teedywiindsøn, hoyyä pojpä cádieey hajxy jia møødá. Mänitä Dios cujegy miänaañ coo ja'a Jesucristo tiünät teedywiindsøn. Ja'a tøyhajtä Dios jaduhñ yejc coo jaduhñ miänaañ. Ni mänaa ja'a Jesús pojpä cádieey quia'a møødá.

8

¹ Hoorä, jaduhñhøch tøø nmädia'agy coo ja'a Jesucristo hajxy jim xñähgapxtúutäm tsajpootyp. Jim jaduhñ tiuñ teedywiindsøn. Hahooyhaamby jim yhäña'ay maa ja'a Diosän. ² Jim tiuñ tsajpootyp maa ja'a tsajtøjc hoybän, ja'a Dios yhädiuunäbä. Ca'a jäya'ayä je'e hädiuun. ³ Haa ja'a hajxy yaa tuumbä teedywiindsøn hädaa yaabä naaxwiinä, jaduhñ hajxy piäda'agyii coo animal hajxy yóxät, coo hajxy cøxiä wiinä quiuyoxø'owät. Jaduhñäc tyijy ja'a piojpä quiädieey hajxy ñähwa'ads quihwá'adsät. Y coo ja'a Jesucristo jim teedywiindsøn tiuñ tsajpootyp, paady jaduhñ ñiñähdujcä. ⁴ Coo häxøpy yaa yhity hädaa yaabä naaxwiin, cab häxøpy tiuñ teedywiindsøn. Haa ja'a hajxy yaa tuumbä teediä, je'eds hajxy cuyoxøøby nebiä jecyquihdujt yhane'emiän. ⁵ Haa ja'a tsajtøjc yaabä maa hajxy tiuñänä, cab jaduhñ miäbaady nebiä tsajtøjc jim tsajpootypän. Coo ja'a Moisés ja'a wittsajtøjc hanaajty quioja'añ, mänitä Dios ja'a Moisés ñämaayy: “Tsipecøxpä wittsajtøjc jaduhñ mgójt nébiøch jim nyaghiixiän tunguhduum coo mnähguipxtú'udät.” ⁶ Tøø ja'a Dios ja'a hawiinjemybiä yajcuhtducy coo hajxy jim xyaghidáanäm tsajpootyp cøjxta'axiøø. Haa hädaa hawiinjemybiä ja'a Dios yajcuhtújcäbä, maas hoy je'eduhñ quejee ja'a Moisés jecy yéjcäbä. Paadiä Jesucristo maas hoy tiuñ teedywiindsøn quejee ja'a teedyhajxy, ja'a hajxy hädaa yaabä naaxwiimbä. Ja'a Moisés jecy yéjcäbä, cab hajxy jaduhñ xjiaty puhbéjtäm nebiä hawiinjemybiän, ja'a jäda'ahatypän.

⁷ Coo hajxy häxøpy xpiuhbéjtäm ja'a Moisés jecy jia yéjcäbä, cabä Dios ja'a hawiinjemybiä häxøpy tøø ñä'a yajcuhtducy. ⁸ Cabä Dios ja'a jecyjiäya'ayhajxy quiumaayy

je'leguiøxpä coo hajxy hoy quia'a cudiuuñ. Jaduhñ jim myiñ cujaay maa ja'a Diosmädi-a'aguian:

Ja'a Dios jaduñ mänaamb:

Abaadaamb jaduñ cooçhä jäya'ayhajxy nmøodyajcuhduga'añ ja'a hawiinjemybiä, ja'a hajxy jim tsänaabiä judíos-naaxooty møød Judábä-naaxooty.

⁹ Maas hóyhøch jaduñ nmøodyajcuhduga'añ quejéjøch ja'a yhap ja'a tieedyhajxy nmøodyajcuhducän mänáajøch hajxy jim hoy nwoobädsømiän Egiptonaaxooty.

Cab hajxy hoy ñä'a cudiuuñ nébiøch nja yajcuhdujquiän.

Páadyhøch hajxy jaduhyä nnä'a nähgueecnä, nømä Dios miänaañ.

¹⁰ Coo jaduñ yhabáadät, mänítøchhä jäya'ayhajxy nmøodyajcuhduga'añ ja'a hawiinjemybiä, ja'a hajxy jim tsänaabiä judíos-naaxooty, nømä Dios miänaañ.

Nyajnáhixø'øwáambiøch nmädia'agy hajxy hoy, neby hajxy hamuumdu'joot jaduñ wyiinjuø'øwät.

Mänítøch hajxy jaançh tehñ yhoy xwyiingudsähgø'øwa'añ.

Høøch hajxy ngu'ughadáannäp.

¹¹ Nägøxiøchhä nmädia'agy hajxy xmiäbøgaanä ñämaj ñäbetiä.

Haagä mäbøgaamb hajxy jaduñ.

¹² Nyajnáhwa'adsáanäbøch ja'a piojpä quiädieey hajxy. Cábøchhä piojpä quiädieeyhajxy mänaa njahmiedsáanänä.

¹³ Coo ja'a Dios miäna'añ coo ja'a hawiinjemybiä tøø yajcuhducy, jaduñ miänaambä coo ja'a jecypiä quia'a tsoobaatnä, coo quia'a tunaannä.

9

¹ Jaduhñä jecyquihdujt myiimbä mädyii ja'a jäya'ayhajxy quiudiúnäp maa ja'a chajtøjc-hajxiän. ²⁻³ Jaduhñsä wittsajtøjc hajxy jecy yhädiuñ. Coo ja'a wit hajxy yaghadøødiujcy, metscä cuarto jaduñ hoy miähmø'øy. Tu'nax hoy møj miähmø'øy; ja'a cujpä muutsc hoy miähmø'øy. Ja'a cuarto möjpä, je'eduhñ xøhajt "cunuu'xytiøjc"; jiibiä ceratoyøhñdy hajxy yaghijty møødä meexä maa ja'a cunuu'xychajcaagy hajxy hänäjty yujcoñän. Ja'a cuarto muutspä, je'eduhñ xøhajt "cunuu'xytiøjc maa ja'a Dios yhäña'ayän." ⁴ Ja'a orohaltar jiiby hijt maa ja'a poom hajxy hänäjty jioquiän, møødä cuhdujtcajä; oronähwopy hänäjty je'e. Jiiby cajäjooty ja'a orotu'ts yhiyty maa ja'a maná hajxy hänäjty yaghitiän. Ja'a maná, je'edsä tsajcaagy hänäjty xiøhaty ja'a Dios jecy quiéjxäbä. Jiibiä Aarón ja'a quiuhdajt yhiypä ja'a jecy wáamäbä. Jiibiä tsaa yhiypä maa ja'a Dios ja'a cuhdujt jecy yuugjahyyän. ⁵ Cajänähgøxpä querubín yhädiuunnaxyhajxy yhiyty "maa ja'a Dios yhäña'ayän." Jimä quieecthajxy quiäjøjna'ay "maa ja'a Dios pojpä cädieey miee'xiän." Cábøch ngapxtøwa'añ nebiaty hädaaduhmbä hijty tiuñ.

⁶ Coo ja'a wittsajtøjc hajxy hänäjty tøø quiojnä, mänitä teedyhajxy jiiby tiägøøchohñä maa ja'a möjcunuu'xytiøjcän. Jiiby hajxy jabom-jabom tiuunnä. ⁷ Pero jiiby maa ja'a muutscunuu'xytiøjcän maa ja'a Dios hänäjty yhäña'ayän, jagooyyä teedywiindsøn hijty jiiby tiägø'øy. Tähooquiä hajxy hijty jiiby tiägø'øy ja'a tu'ugjomøjtpä. Coo hajxy hänäjty jiiby tiägø'øwa'añ, jayøjpä animal hajxy hijty yagho'ogy. Mänitä animalnø'ty hajxy hijty jiiby nøcxy quiuyoxø'øy muutscunuu'xytiøgooty, ja'a piojpä quiädieeguiøxpähajxy, møødä cu'ugä piojpä quiädieeguiøxpähajxy. ⁸ Jaduhñä Dioshespíritu hajxy xyajwiinjuøyyäm coo hajxy hoy nga'a tägøøyyämät maa ja'a Dioswiinduumän mäduhñtiä ja'a jecyquihdujt hajxy yajtuññä. ⁹ Jaduhñ hajxy jäda'anäbaadyñä nhíjtäm. Je'enä animal hajxy yoxy; je'enä hajxy cøxiä wiinä quiuyoxø'øy. Paady hajxy jaduñ quiuhdujthatyñä, jaduhñäc tyijy ja'a Dios jiaançh tehñ quiumay. Cab hajxy jaduñ nähwa'açh quiuhwa'açh, hoy hajxy jaduñ jia cuhdujthatyñä. ¹⁰ Jagooyyä ja'a quiuhdujthajxy yhane'emy tijaty hajxy quiáyäp yhú'ugäp, neby hajxy ñibiuj ñijie'edsøjät, neby hajxy yaa jäya'ayhadät hädaa yaabä naaxwiin. Pero yø'ø cuhdujt jaduñmbä, cab jaduñ tiuunnä. Tøø ja'a Dios ja'a hawiinjemybiä yajcuhdujnä, mädyii jaduñ tunaamb.

¹¹ Mänitá Jesucristo hajxy hoy xjiaančh teh̄m yajnáhwáatsám. Jaaya'ay jaduh̄n túunnáp teedywiindsón̄ jim̄ tsajpootyp maa ja'a tsajtøjc jaančh teh̄m yhojbän. Ca'a jiäya'ayä hajxy hädiuun hädaa yaabä naaxwiimbä. ¹² Tøø ja'a Jesucristo jim̄ tiägø'øy maa ja'a Dioswiinduumän ja'a tähoocagø'öyyä. Hamdsoo hänajty tøø niñähdugyii coo højts hänajty xñähho'tu'udáanäm. Cabä tii nø'ty quiuyoxøøyy maa ja'a yaabä tsajtøjcän nebiä yaabä teedyhajxy quiuhdujthatiän coo chivo hajxy yoxy, coo waj hajxy yoxy. Coo ja'a Jesucristo hajxy tøø xñähho'túutäm, paady hajxy jim̄ nhidáanäm Dioswiinduum cøjxta'axiøø. ¹³ Jaduh̄nä jäya'ayhajxy quiuhdujthaty, coo hajxy yho'ogø'øy, mänitá chivonø'ty wajnø'ty hajxy yajniñähxänicxyii. Mänitá wajcujiaam hajxy yajniñähwøjyii, ja'a hajxy hänajty tøø ñäno'ogø'öyabä maa ja'a altarän. Jaduh̄n hajxy niyajnáhwa'ačhii. ¹⁴ Hoorä, ja'a chivonø'ty, ja'a wajnø'ty, cabä pojpä cädieey mänaa yajnáhwa'ačh. Ja'a Jesucristo hajxy jaduh̄n xyajnáhwáatsám mänaa hajxy xñähho'túutäm. Cabä Jesucristo tii pojpä cädieey miøødä. Cab jaduh̄n mänaa yho'ogaannä. Hamdsoo jim̄ niñähdujcä maa ja'a Dioswiinduumän. Jaduh̄nä nhaxøøgcuhdujt hajxy xyajnáhwáatsám, nebiä Diosmädia'agy hajxy jaduh̄n maas hoy nmäbøjcämät.

¹⁵ Coo ja'a Dios ja'a hawiinjemybiä tøø yajcuhducy, paadiä Jesucristo hajxy xñähho'túutäm, pønjetiä Dios jaduh̄n wyiimbiiw. Xyajnáhwáatsám ja'a nbojpä ngädieey hajxy nebiaty hajxy tøø njäya'ayhajtäm maa ja'a jecypiä yhiytiän. Y jim̄ hajxy xyajnöcxáanäm tsajpootyp nebiä Dios hajxy xyajwiinwaanøøyyäm. ¹⁶⁻¹⁷ Homiädyii testamentänoquiä, cahnä tiuungpaadyñä, jugyhajpnä jaaya'ay jaduh̄n. Coonä yho'ogät, mänitnä ja'a nocy tiuungpaada'añ. ¹⁸ Paadiä Dios jaduh̄n miänaañ coo animal hajxy yóxät, mänaa ja'a jayøbhajtpä yajcuhduquiän. ¹⁹ Coo ja'a Moisés ja'a cu'ugä jecyquiuhdujt hänajty tøø quiøxy mo'oy, mänitá wajhuung vojxy møødä chivohuung. Mänitá nø'ty hoy ñøødemøøyyä. Mänitá tsaptsmeegpøjt hoy piäda'agy nø'ñøøjooty møødä hisopohaa'x. Mänitá cu'ug ja'a nø'ñøø yajnáhxänicxy møødä jecyquiuhdujttsaa. ²⁰ Mänitá Moisés miänaañ: “Haa hädaa nø'tiä, hijxtah̄nd hädaaduh̄n coo mijtsä Dios xmiøødyajcuhdujcy.” ²¹ Mänitá Moisés ja'a wittsajtøjc ja'a nø'ñøø hoy yajnáhxänicxpä møød tijaty hajxy jiiby yajtuumby mänaa ja'a Dios hajxy hänajty wyiingudsähgø'öyän. ²² Jaduh̄nä jecyquiuhdujt hijty yhane'emy cooc cøxiä ñähwa'ačhii nø'tyhaam. Coogä animal hajxy quia'a yóxät, cábägä piojpä quiädieey hajxy ñä'ä nähwá'adsät.

²³ Haa ja'a wittsajtøjc hädaa yaabä naaxwiimbä, møød tijaty jiiby hijp tsajtøgootiä, animalnø'tyhaamä Moisés yajnáhwaach. Pero højtshajtäm, ni mänaa ja'a animalnø'ty hajxy xquia'a yajnáhwáatsämät. Paadiä Jesucristo hajxy hoy xñähho'túutäm, jaduh̄n hajxy nnähwáatsám. ²⁴ Tøø ja'a Jesucristo jim̄ tiägø'øy maa ja'a Dioswiinduumän. Jim̄ hajxy xñähgapxtúutäm. Ca'a yhädaa yaabä tsajtøgootiä tiägøøyy. Haa ja'a tsajtøjc yaabä, cab jaduh̄n tieh̄m miäbaady nebiä tsajtøjc jim̄ tsajpootypän. ²⁵⁻²⁶ Haa ja'a teedywiindsón̄ hädaa yaabä naaxwiimbä, jomøjt-jomøjt jiiby tiägø'øy maa ja'a muutscunuu'xytiøjcän. Jiibiä animalnø'ty nøcxy quiuyoxø'øy. Pero ja'a Jesucristo, tähooquiä yho'cy. Cabä Dios jaduh̄n miänaañ coo mayhooc yho'ogät. Coo yhabaaty, mänitá Jesucristo hajxy hoy xñähho'túutäm ja'a nbojpä ngädieeyhajtäm. ²⁷ Ja'a Dios hajxy xquiunúu'xäm xpiädáacäm coo højts tähooquiä nho'ogáanäm. Mänitá Dios hajxy xyajtøyhajtyegáanäm. ²⁸ Jaanä tähooquiä ja'a Jesucristo hajxy xñähho'túutämbä ja'a nbojpä ngädieeyhajtäm. Tähoocyajnáhwa'achä hajxy xyajnáhwaats xyajcuhwáatsám. Coo jadähooc quiädaactägatsa'añ, mänit hajxy jim̄ xyajnöcxáanänä maa ja'a Dioswiinduumän, pønjaty hänajty jaduh̄n jii jøbhijxp.

10

¹ Haa ja'a jecyquiuhdujt, hijxtah̄nd hänajty jaduh̄n hijp coo ja'a Jesucristo hajxy hänajty xñähho'tu'udáanäm. Nebiä jecyquiuhdujt hänajty yhane'emiän, jomøjt-jomøjtä animal hajxy jia yoxy. Pero ni pøn hänajty quia'a nähwa'ačh quia'a cuhwa'ačh, pønjaty hänajty ja wi'i tiägø'øwáambäp maa ja'a Dioswiinduumän. ² Coo hajxy häxøpy tøø jiaančh nähwa'ačh tøø jiaančh cuhwa'ačh ja'a piojpä quiädieey hajxy, cabä animal hajxy

haxopy yojxnä. Tähooquiä hajxy jaduhñ cu yojxy, mänit jaduhñ cu yhoyøøyy. Hamdsoo hajxy cu ñajuøøyy coo pojpä cädieey hajxy quia'a móödänä. ³ Pero coo animal hajxy hñajty jaduhñ yoxyñä jomøjt-jomøjt, ñajuøøby hajxy hñajty jaduhñ coo pojpä cädieey hajxy miøødä. ⁴ Hix, ni mänaa ja'a wajno'ty ja'a chivono'ty ja'a pojpä cädieey quia'a yajnahwa'ačh quia'a yajcuhwa'ačh.

⁵ Paadiä Cristo ja'a Dios ñämaayy, mänaa hñajty jaduhñ yaa tøø quiäda'aguiän hädaa yaabä naaxwiin:

Caj miich mjoot jaduhñ chocy coo ja'a animal hajxy tehngajnä yóxät.

Páadyhöch miich yaa xquiejxy hädaa yaabä naaxwiin cooch yaa njäya'ayhadät, nébiöchä jäya'ayhajxy jaduhñ yaa nnähho'tú'udät.

⁶ Caj miich mjoot jaduhñ chocy coo animal hajxy yóxät, coo hajxy ñó'ogät.

Paadiä animal hajxy yoxy, nähwaatspä piojpä quiädieeyhajxy jaduhñ.

⁷ Mänitöch nmänaañ:

“Dios, páadyhöch jaduhñ yaa tøø ngäda'agy nébiöch jaduhñ yaa ngudiúnät nébiöch miich xñämaayyän,

neby jaduhñ jim myiñän cujaay maa miich mmädia'aguiän ja'a høøchcøxpä”,

nömä Cristo ja'a Dios ñämaayy. ⁸ Jayøjpä Cristo miäna'añ cooc ja'a Dios jioot quia'a tsocy coo animal hajxy quia'a yóxät ni quia'a nó'ogät. Ja'a piojpä quiädieey hajxy jaduhñ yajnahwáatsäp yajcuhwáatsäp. Hoyyä jecyquihdujt jia hane'emy coo hajxy tehngajnä yóxät, cabä Dios jaduhñ quiumay. ⁹ Jaduhñ miänáangombä: “Teedy, páadyhöch yaa tøø ngäda'agy nébiöch jaduhñ yaa ngudiúnät nébiöch miich xñämaayyän.” Jaduhñ miädia'agytiägø'oy coo ja'a Cristo hñajty jaduhñ yhane'ema'añ coo animal hajxy quia'a yóxnät, nebiä Tieedy miädia'agy jaduhñ quiudiúunät. ¹⁰ Hoyyä Jesucristo ja'a Tieedy miädia'agy jiaančh cudiunä coo højts jaduhñ tähooquiä xñähho'túutäm; paadiä Dios hajxy xyajnahwaats xyajcuhwáatsäm.

¹¹ Jaduhñä jecyquihdujt hijty yhane'emy coo ja'a teediä animal hajxy jabom-jabom wyl'i yóxät. Hoy hajxy jaduhñ jia cudiunä, cab hajxy jaduhñ ñä'ägädä nähwaach ñä'ägädä cuhwaach. ¹² Coo ja'a Jesucristo ja'a nbojpä ngädieey hajxy hñajty tøø xñähho'túutäm tähooquiä, mänit hoy yhäñaaguiäda'agy maa ja'a Dios yhahooyhaampiän.

¹³ Jim jaduhñ yhahixy coo ja'a miädsiphajxy quia'a mäjäda'aga'añ. ¹⁴ Tähooquiä hajxy tøø xñähho'túutäm. Jaduhñä nbojpä ngädieey hajxy xyajnahwaats xyajcuhwáatsänä.

¹⁵ Jaduhñä tøyhajt hajxy nmøødhájtäm coo tiøyyä, je'eguiøxpä coo ja'a Dioshespíritu jaduhñ miänaambä maa jaduhñ cujaay myiñän:

¹⁶ Coo jaduhñ yhabáadät, mänitöch hajxy nmøødyajcuhduga'añ, nömä Dios miäna'añ:

Nyajnahixø'øwáambiöch nmädia'agy hajxy hoy, neby hajxy jaduhñ hamuumdu'joot wyiinjuø'øwät.

¹⁷ Mänit miänáangombä:

Cáböchä piojpä quiädieeyhajxy mänaa njahmiedsáanänä.

¹⁸ Jaduhñds je'e, tøø ja'a Jesucristo ja'a nbojpä ngädieey hajxy xyajnahwaats xyajcuhwáatsänä tähooquiä. Hoyyä animal hajxy jia yoxyñä, cab jaduhñ choobaatnä.

¹⁹⁻²⁰ Hermanodøjc, maa ja'a jecyquihdujt myiñän, cabä cuhdujt pøn miøødä coo jiiby tiägø'øwät maa ja'a muutscunuu'xytiøgootiän. Pero coo ja'a Jesucristo hajxy tøø xñähho'túutäm, paady hajxy jim hoy ndägø'øwáanänä maa ja'a Dioswiinduumän. Tøø hajxy xyajnahwaats tøø hajxy xyajcuhwáatsäm ja'a nbojpä ngädieeyhájtäm. ²¹ Je'eds hajxy jim xñähgapxtúutäm Dioswiinduum. ²² Entonces, tsøg hajxy jim tægøøyyäm Dioswiinduum. Tsøgä miädia'agy hajxy hamuumdu'joot mábøjcäm coo ja'a cuhdujt hajxy nmøødhájtäm coo hajxy jim ndägøøyyämät, je'eguiøxpä coo ja'a Jesucristo hajxy tøø xñähho'túutäm. Jaduhñä nbojpä ngädieey hajxy tøø xyajnahwaats tøø xyajcuhwáatsäm. ²³ Tsøgä Diosmiädia'agy hajxy tehngajnä mábøjcäm. Cab hajxy nñajtshixøøyyämät. Nmøødhájtäm ja'a tøyhajt hajxy jaduhñ coo ja'a Dios hajxy xmio'owáanäm nebiaty hajxy tøø xyajwiinwaanøøyyäm coo hajxy cøxiä wiinä xmio'owáanäm. ²⁴ Tsøg hajxy niguiapxwiíjäm neby hajxy maas hoy nničhojc nnibia'häyóowämät hamiñ haxopy,

neby ja'a Diosmädia'agy hajxy jaduhñ maas hoy ngudiúunämät. ²⁵ Jaduhñ hajxy nyajnajuoóyyäm coo miäwiingoönä coo ja'a Jesucristo yaa quiädaactägatsa'añ. Paady, tsög hajxy nijootcapxmöcpójcäm. Tehngajnä hajxy nhamugóóyyämät ja'a Dioscöxpä. Näje'e hajxy, cab hajxy jaduhñ ñä'ägädä mejtsnä. Cabä quiuhdujthajxy jaduhñ yhooyä.

²⁶ Coo hajxy tehngajnä haxøøg nwädíjtämät, hoyyä tøyhajt hajxy tøø nja wiinjuóóyyäm, cabä nbojpä ngädieey hajxy jaduhñ ñä'ägädä nähwáatsämät. ²⁷ Haxøøgtuumä Dios hajxy jaduhñ xpiädáacämät maa ja'a jøøn tioyyän, maa ja'a Dios miädsiphajxy yhitiän. Hoçhähgøøñä jaduhñ jiiby. ²⁸ Pøn jaduhñ ca'a cudiuumb nebiä Moisés ja'a jicyquiuhdujt yhane'emiän, pø tøø testigohajxy jaduhñ yhixy mejtstägøøgä, tsipcøxp jaduhñ yagho'oga'añii. ²⁹ Maas hanaxiä hajxy jaduhñ quiumädowaannä pønjaty ja'a Dioshespíritu jaduhñ haxøøg nänøømb, ja'a mayhajt tuumbä, pønjetiä Dioshuung jaduhñ xøøghajp, pønjetiä ñø'ty jaduhñ häyoowhíjxäp, hoy hajxy je'eduhñ tøø xjia nähho'túutäm, hoy hajxy je'eduhñ tøø xjia yajnáhwaats tøø xjia yajcuhwáatsäm. ³⁰ Tøyhajtä Dios jaduhñ miänaañ: "Høøch jaduhñ nyaghawiimbidaamby." Chaadsä Diosmädia'agy miänaangumbä: "Dios quiu'ug jaduhñ yajcumädowaambä." ³¹ Hoçhähgøøñä jaduhñ coo ja'a Dios hajxy xyajcumädóowämät; je'eduhñ jugyhajp cøjxta'axiøø.

³² Naxy hajxy mdehñ jahmiédsät nebiä Jesucristo miädia'agy hajxy mmädoodsohñän. Hamuumdu'joot hajxy mbadu'ubøjcy, hoy hajxy hánajty mja tsaächpøcy hoyhoy. ³³ Näje'e hajxy myaghäyoowhijxy cu'ughagujc. Y mjootcapxmöcpøjpy hajxy hánajty pønjaty hánajty jaduhñ häyoowhíjxäp. ³⁴ Y mnäxuu'chp hajxy hánajty pønjaty hánajty tsumyçhánaaby. Mxoonäacp hajxy hánajty, hoy hajxy cøxiä wiinä xjia pøjcä. Mnajuøøby hajxy hánajty coo hajxy jim mhida'añ tsajpootyp cøjxta'axiøø. ³⁵ Entonces, cab hajxy tii mdájät mmáyät; tehngajnä hajxy mmäbøgät coo ja'a Dios hajxy xyhixyñä. Mjahmiédsäp hajxy jaduhñ coo hajxy nøcxy jim mhidaannä tsajpootyp. ³⁶ Naxy hajxy mdehñ miee'xtúgät, nebiä Diosmädia'agy hajxy jaduhñ hoy mgudiúnät. Jaduhñ hajxy mbáadät tijaty ja'a Dios hajxy tøø xyajwiinwaanøóyyäm coo hajxy xmio'owáanäm. ³⁷ Jaduhñä Diosmädia'agy miäna'añ:

Mobädajpä je'e quiäda'aga'añ pønä Dios jaduhñ quiexaamby.

³⁸ Pønä Diosmädia'agy hoy cudiuumb, miäbøjpy je'eduhñ tehngajnä.

Pero coo ñajtshixø'øwät, cabä Dios quiumayaannä.

³⁹ Pero højtshájtäm, cab hajxy mänaa nnajtshixø'øwáanäm. Tehngajnä hajxy nmäbøjcäm. Paadiä Dios hajxy xyhuuc yajnáhwa'adsáanämbä. Cab hajxy xyajcumädowáanäm.

11

¹ Coo hajxy nmäbøjcäm, mänitä tøyhajt hajxy nmøødhájtäm coo hajxy nbaadäänäm mädyiijaty hajxy njøbhíjxäm, hoy je'eduhñ quia'a ja cähxø'øgyñä. ² Ja'a jecyjiäya'ayhajxy, coo hajxy miäbøjcy, paadiä Dios quiumaayy.

³ Coo hajxy nmäbøjcäm, jaduhñ hajxy nyajnajuoóyyäm coo ja'a Dios ja'a naaxwiin yajwa'añguiojy ja'a miädia'agyhaam, møødä madsa'a, møødä po'o, møødä xøø.

⁴ Coo ja'a Abel jecy miäbøjcy, paadiä Dios quiumaayy. Hix, hoyyä Abel quiudiuuñ coo animal yojxy ja'a Dioscöxpä. Ja'a Caín, caj quiumaayyä je'eguiøxpä coo hánajty quia'a mäböcy. Hix, cabä animal yojxy. Hoy jaduhñ coo ja'a Abel hajxy nbahíjxämät, hoy jecy jia yagho'cä. Hix, miäbøjc ja'a Abel.

⁵ Coo ja'a Enoc jecy miäbøjcy, paadiä Dios quiumaayy. Cabä Enoc ñä'a ho'cy. Jaduhñä Dios yajnøcxy tsajpootyp. Jaduhñ jim myiñ cujaay maa ja'a Diosmädia'aguian.

⁶ Coo hajxy nga'a mäbøjcämät, cabä Dios hajxy xquiumáayyämät. Tsipcøxp hajxy nmäbøjcämät coo ja'a Dios tiømiädia'agy. Y jaduhñ hajxy nmäbøjcämät coo ja'a Dios piuhbeda'añ pønä Dios wiingudsähgø'øwaamb.

⁷ Coo ja'a Dios ja'a Noé jecy ñämaayy coo ja'a nøøgomdägoy ja'a naaxwiin hánajty quiøxy wiinyeegø'øwa'añ, mänitä Noé ja'a Dios miädia'agy jaduhñ quiudiuunä, hoyyä nøøgomdägoy hánajty quia'a ja cähxø'øgyñä. Mänitä barco cruundä yhädiuun. Jiibiä

Noé hajxy choocy mөөдä yhuung mөөдä tio'oxy. Coo ja'a Noé jaduhñ miäbøjcy, paadiä Dios jiaanč tehñ quiumaayy. Pero ja'a wiinghäna'c-hajxy, cab hajxy miäbøjcy. Paady hajxy cөjx quiuhdägoy.

⁸ Coo ja'a Dios ja'a Abraham jecy ñämaayy coo jim chóonät ñaaxooty, coo jäguemnaax ñócxät maa ja'a Dios ja'a Abraham yajnähdiijiän coo chänaadiaacpögät, miäbøjc ja'a Abraham jaduhñ. Mänit jim jiaanč tsohnä ñaaxooty. Nä'ä nägoobä ñä'ä tu'ubøjnä. Cab hänajty ñajuø'øy maa ñócxät. ⁹ Coo ja'a Abrahamhajxy jim miejch maa ja'a Dios hänajty tøø yajnähdiijiän, cab hajxy tiehñ chänaadiaacpøjcy, je'eguiøxpä coo hänajty jiäya'añaaxootiä. Wittögooty hajxy hänajty chäna'ay. Pero miäbøjpiä Abrahamhajxy hänajty coo ja'a naax hajxy hänajty mio'owa'añii, neby hajxy hänajty tøø yajwiinwaanø'øyijän ja'a Diósäm. Jaduhñä Abraham yhuung Isaac ñämäaayyäbä mөөдä yhoc-huung Jacob. ¹⁰ Hiç, ñajuøøbiä Abrahamhajxy hänajty coo hajxy hänajty jim ñöcxa'añ tsajpootyp Dioswiinduum. Cab hajxy hänajty tiajy miay coo ja'a naax hajxy quia'a tsoj mooyä.

¹¹ Jaanä jaduhñä Sara jecy miäbøjpä. Tøø hänajty miäjaanä mänaa ja'a Dios hoy piuhbetiän coo maaxhuung piäadät. Y jaanč huungpaat ja'a Sara jaduhñ je'eguiøxpä coo miäbøjcy nebiä Dios hänajty tøø yajwiinwaanø'øyän. ¹² Y ja'a Abrahamä, hoy hänajty tøø jia mäjaanä, möjjøøyy mayøøyy je'eduhñ. Tøø ja'a yhap yhoc-hajxy jaduhñ jiaanč tehñ miayøøñä. Cab hajxy jaduhñ hoy yajmächowa'añ. Jaduhñ hajxy miayyä nebiä madsa'ajän, nebiä tsabiu'ujän.

¹³ Coo ja'a Abrahamhajxy yho'cy, cahnä hajxy hänajty quiøxy paadyñä mädyiijatiä Dios hänajty tøø yajwiinwaanø'øy. Pero miäbøjc hajxy jaduhñ. Ñajuøøby hajxy hänajty coo hajxy hänajty jim ñöcxa'añ tsajpootyp. Paady hajxy xioondaacy. Ñajuøøby hajxy hänajty coo hajxy hänajty nä'ä nägoobä wiädityñä. ¹⁴ Pønjaty jaduhñ wädijp, cahnä tsänaadiaact hajxy piaadyñä. ¹⁵ Coo ja'a jioothajxy cu chojcy, cu wyiimbijty hajxy, cu ñöcxtägajch hajxy je'e maa hajxy hänajty tøø yhuuc tsohmbän. ¹⁶ Pero jimä jioot hajxy hänajty hamuumdu'joot tøø piäda'agy tsajpootyp maa ja'a chänaadiaacthajxy hänajty tøø yhahixøøyyäxän. Ja'a Dios jaduhñ hahixøøyy. Cabä Dios miädsähdiuun ja'a Abrahamhajxy.

¹⁷⁻¹⁸ Coo ja'a Dios ja'a Abraham yhanehmy coo yhuung yóxät, ja'a Isaac-hajpä, miäbø-gaambiä Abraham hänajty je'eduhñ, hoy ja'a yhuung hänajty jia tu'uquiä, hoyyä Dios hänajty tøø jia mäna'añ: “Møjø'øwaamb mayø'øwaamb miičh mhuing ja'a Isaac-hajpä.” Ñä'ä joodhijx ja'a Dios ja'a Abraham jaduhñ pø jiaanč cudiunaamby hänajty jaduhñ. ¹⁹ Miäbøjpiä Abraham hänajty coo ja'a yhuung hänajty yagujypioğáanäxä ja'a Diósäm. Mänitä Dios miänáangombä coo ja'a yhuung quia'a yaghó'ogät. Jaduhñ mäwínäts ja'a Isaac hoy jiaty nebiä jadähooc tøø jiuypioquiäbän.

²⁰ Coo ja'a Isaac miäbøjcy, paadiä Jacob ñämaayy mөөдä Esau coo ja'a hoybä ja'a weenbä hajxy piaada'añ. ²¹ Coo ja'a Jacob miäbøjcy, paadiä yhoc-huunghajxy ñämaayy coo ja'a hoybä weenbä hajxy piaada'añ. Ja'a José yhuunghajxy je'e. Mänitä Jacob ja'a Dios wyiingudsähgøøyy. Cuhdajtcøxp hänajty ñiguiuhdiyii. Ho'ogáannäp hänajty je'eduhñ. ²² Coo ja'a José miäbøjcy, ñajuøøyy jaduhñ coo yhap yhoc-hajxy hänajty jim cujecy choona'añ Egiptonaaxooty. Paady jaduhñ yhanehmy coo ja'a piajc miänócxäxät. Ho'ogáannäp hänajty je'ebä.

²³ Coo ja'a Moisés myiiñguiahy jaanč tehñ yajxón, yu'učh hajxy yaghijty tögøgp'o. Hiç, tøø ja'a gobiernä hänajty hoy yhane'emy coo ja'a pigäna'c-huunghajxy quiøxy yagho'ogøjät ja'a ya'ayhäna'cpä. Ja'a Moisés tiaj tieedy, cabä gobiernä hajxy hänajty chähgø'øy. Miäbøjpiä Diosmädia'agy hajxy hänajty. ²⁴ Coo ja'a Moisés miøjøøñä, miäbøjc je'ebä. Cabä gobiernä hänajty tieedyhaphadaannä, ja'a hänajty jim tuumbä Egiptonaaxooty. ²⁵ Hamdsoo jaduhñ miänaañ coo ween yhäyoowhixyii mөөдä Dios quiu'ughajxy näguipxy. Cab hänajty jim miähmø'owaannä maa ja'a haxøøgcuhdujt hajxy wyl'i tiuñän. Cab hajxy hänajty ñajuø'øy coo hajxy hänajty jejcy quia'a xoonä'a-gaannä. ²⁶ Cabä Moisés ja'a jioot jim piädaacnä maa ja'a xädø'øñän jim Egiptonaaxooty.

Maas jootcuyc hánajty ñijiáwóoyyänä coo yhäyoowhixóøjät ja'a jäya'aguiøxpä, ja'a Dios hánajty quixaambiä. Ñajuøby hánajty jaduñ coo ja'a hoybä weenbä mio'owa'añijäm ja'a Diósäm. ²⁷ Coo ja'a Moisés miábøjcy, paady jim chohnä Egiptonaaxooty. Hoyyá gobiernä hánajty jia jootma'ady, cabä Moisés ñä'ägädä tsähgøoyy. Tähooctu'ubøquiä ja'a Moisés tiu'ubøjnä. Ja'a Diosmädia'agy hánajty miábøjpy, hoyyá Dios mänaa quia'a ja hixyii.

²⁸ Coo ja'a Moisés miábøjcy, paadiä pascuaxøø yagjajtä. Jaduñ yhanehmy coo ja'a tøghagø'ow nø'ty hajxy yajwiinxänicxø'owät, nebiä judíos quiobhuunghajxy quia'a yaghó'cäxät, ja'a ya'ayhäna'cpä. Ja'a Dios ja'a mioonsä tsajpootypä tu'ug quejx coo ja'a quiobhuunghajxy yaghó'cäxät, ja'a ya'ayhäna'cpä, pønjetiä nø'ty hánajty tøø quia'a yajwiinxänicxø'øy ja'a tøghagø'ow. ²⁹ Coo judíoshajxy jaduñ miábøjcy, mänitä Dios ja'a Tsaptsmejy cuyc yaghawaach maa hajxy jaduñ ñaxó'owät tø'ødstuum. Mänitä Egiptobä-jäya'ayhajxy hoy jia panaxaambä. Mänitä Dios ja'a nøø hoy yajtu'ugmújcombä. Cøjxä Egiptobä-jäya'ayhajxy ñøøho'ogø'øy.

³⁰⁻³¹ Coo ja'a judíoshajxy miábøjcy, paadiä cajpt hajxy juxtujc-hooc jiuhyohwiädijty ja'a xøhajpä Jericó. Mänitä tsaamuuch piuumnä. Je'e hánajty curaahajp wäditiä maa ja'a cajptän. Cøjxä jäya'ayhajxy jiiby yho'nä, ja'a hajxy hánajty ca'a mäbøjpä. Coo ja'a quixy Rahab miábøjcy, hoy hánajty jia tuñ maa ja'a burdelän, paady jaduñ quia'a ho'cy, je'eguiøxpä coo ja'a judíos hánajty tøø yu'uch, ja'a hajxy hánajty wädijpä hixøøbiä woodsøøbiä.

³² Coo cu ñäbaadøoyy, cu nmädiáacyhøch ja'a Gedeón, ja'a Barac, ja'a Sansón, ja'a Jefté, ja'a David, ja'a Samuel, møødä Dios ja'a quiuguexyhajxy. ³³ Coo hajxy miábøjcy, paadiä miädsip ja'a ñaax hajxy hoy miämähmøoyyanä; paady hajxy hoy guiobiernähajty; paadiä Dios hajxy xpiuhbéjtäm nebiaty hajxy hánajty tøø xyajwiinwaanøoyyäm; paady hajxy quia'a leontsu'tsä; ³⁴ paady hajxy quia'a tooyy møjjøønhaajiooty; paady hajxy quia'a cuhbujxä. Ja'a häna'c-hajxy ca'a møcpä, mänitä mäjaa hajxy piaaty mänaa hajxy hánajty chiptuna'añän. Cabä miädsip hajxy yajmäjädacy, hoyyá miädsiphajxy hánajty jia nämayyá. Ñä'ägä yajpäyø'c hajxy je'e. ³⁵ Jii ja'a to'oxiøjc-hajxy hánajty näje'e ja'a yhuung ja'a ya'ay jiuypijøjcy.

Näje'e ja'a Diosmädia'agy hajxy yajcudsaaçhtiunøoyyä. Coo ja'a Diosmädia'agy hajxy hánajty quia'a nä'ägädä najtshixø'owa'añ, mänit hajxy yaghó'cänä. Tøø hajxy hánajty ñajuø'øy coo hajxy jiuypijøga'añ, coo hajxy jim ñøcxa'añ tsajpootyp. ³⁶ Näje'e hajxy wyiinwohnä wiobho'cä. Høxtä yajcudsumøoyyä hajxy näje'e cø'øxoch. ³⁷⁻³⁸ Näje'e hajxy quiuhga'tsä, näje'e hajxy jiøø'wa'xä, näje'e hajxy quiuhbujxä. Jim hajxy hánajty näje'e wiädity pactuum, wiinwa'adstuum, tunjooty. Jim hajxy hánajty näje'e chäna'ay tsaajutjooty. Cabä howyit hajxy hánajty miøødä. Meeghac chivohac hajxy hánajty wyithajpy. Jaguiay hajxy hánajty yhity. Xøøghájtäp hajxy hánajty, häyoowhíxäp hajxy hánajty. Paady hajxy hánajty jaduñ jiaty yhabety coo ja'a Diosmädia'agy hajxy hánajty miábøcy. Jaançh tehñ quiumāayyap hajxy hánajty ja'a Diósäm. Cabä Dios jaduñ quiumay pøn ca'a mäbøjp. ³⁹ Hoy hajxy jia cumaayyá, cab hajxy miooyyá mädyiijatiä Dios hánajty tøø yajwiinwaanø'øy. ⁴⁰ Jäguemiä Dios wyiinmahñdyhajty coo ja'a hoyhajt ja'a weenhajt hajxy xmio'owáanäm. Paadiä jecyjiäya'ayhajxy quia'a tsoj mooyyá, näguipxiä Dios hajxy jaduñ xmio'owáanäm møødä jecyjiäya'ayhajxy.

12

¹ Tsøgä jecyjiäya'ay hajxy jaduñ pahíxäm nebiä Diosmädia'agy hajxy miábøjquiän. Tsøgä haxøøgcuhdujt hajxy najtshixøoyyäm. Tsøgä nhamdsoo cuhdujt hajxy høxhíxäm. Je'eduhñ wiingtuum xjia wi'i wioonøcxáanäm. Tsøg hajxy tehngajnä cudíuunäm nebiä Dios hajxy xyhanéhñäm. ² Tsøgä Jesucristo hajxy hamuumdu'joot pahíxäm. Jaaya'ay hajxy xyajnähixøoyyäm coo ja'a Diosmädia'agy hajxy hoy nmábøjcamät. Höchähdiuunnä ja'a Jesús mähdiøjc jaduñ yho'cy cruzcøxp. Pero

ñajuøby hānajtj je'eduhñ coo hānajtj jim nøcxy xioonnda'aga'añ tsajpootyp. Jim jaduhñ yhāñaañä maa Dios yhaoooyhaampiän.

³ Tsøgä Jesucristo hajxy jahmiejtstāacām coo jiaančh tehñ chaačhpøjcy. Ja'a cahwiindøyhāna'c-hajxy jaduhñ jatcøøyy. Miee'xtujc ja'a Jesucristo jaduhñ. Tsøg hajxy jaduhñ pahíxām; jaduhñ hajxy nga'a jootmayhājtamät. ⁴ Hoyyā haxøøgpä hajxy xjia mädsiphājtam, cahnä hajxy jaduhñ xyaghó'cām. ⁵ Ja'a Dios hajxy jaduhñ xjiootcapxmøcpøjcām maa ja'a miādia'agy cujaay myiñān:

Huung, ca'a mjootma'ady, hoyyā Dios tøø xjia yajcumādoy.

Hoy xjia hojy, ca'a mjootmayhaty.

⁶ Miägaxyp yhanehmbiä Dios pønjaty chojpy;

yajcumādooby pønjaty yhuunghajpy.

⁷ Coo ja'a Dios hajxy xyajcumādówät, mmee'xtúgäp hajxy jaduhñ. Hopiønnä yhuung yajcumādoy. ⁸ Yajcumādoobiä Dios ja'a yhuunghajxy nägøxiä; y pø caj mijts jaduhñ xyajcumādoy, cāhxø'p jaduhñ coo ja'a Dios hajxy tøyhajt xquia'a huunghaty. ⁹⁻¹⁰ Ja'a hajxy ndeedyhājtamä hädaa yaabä naaxwiimbä, nwiingudsähgøøyyām hajxy jaduhñ, hoy hajxy hijty xyajcumādóowām mänaa hajxy tøø nmuutsc-hājtam. Paady hajxy hijty xyajcumādóowām coo hajxy hijty nga'a mädia'agymiäbøjcām. Hoorä, tsøgä nDeedyhājtam hajxy mädia'agymiäbøjcām, ja'a jim tsajpootypä. Mānit hajxy jim xyaghājtamät. Paadiä Dios hajxy xyajcumādóowām, nebiä miādia'agy hajxy jaduhñ maas hoy nmäbøjcāmät, nebiä hawa'adstuum hajxy jaduhñ hoy nhíjtānät nebiä Dios yhiñtiän.

¹¹ Tøyhajt hajxy ndsaačhpøjcām mänaa ja'a Dios hajxy xyajcumādóowām. Nbāatām ja'a tsaačhpä hajxy jaduhñ. Pøn jaduhñ mäbøgaamb hamuumdu'joot, cab jaduhñ waamb miānā'anät, hoy hānajtj jia tsaačhpøcy. Maas hoy jiäya'ayhadaannä. Maas jootcuyc yhidaannä.

¹² Naxy hajxy mdehñ ñijiootcapxmøcpøgøøjät neby hajxy jaduhñ hoy myo'oy mnáxät. ¹³ Mhøxtá'awäp ja'a hodi'u hajxy, nebiä hermanodøjc hajxy jaduhñ hoy xpiawädítät, neby hajxy jaduhñ quipxy xquia'a padu'udägóyyät.

¹⁴ Naxy hajxy hoy mdehñ yhidät tu'ugmädia'agy nägøxiä. Hoy hajxy mjäya'ayhädät. Pøn hoy ca'a wädiyp, cab jim ñøcxa'añ Dioswiinduum. ¹⁵ Tehngajnä hajxy mnigwieendähadøøjät, neby hajxy jaduhñ mga'a tu'udägóyyät. Coo pøn jaduhñ tiu'udägóyyät, je'e jioot ca'a tsojp coo piuhbedøøjät ja'a Diósäm. Cab hajxy mnimiäjootma'adøøjät. Coo hajxy haagä jaduhñ mjatcø'øwät, pues nägøxiä hajxy jaduhñ mmá'adät.

¹⁶ Cab hajxy mhaxøøgwädítät. Cabä Diosmädia'agy hajxy myaghäyø'ogät. Jaduhñä Esaú jecy jiatcøøyy, coo hānajtj yāho'ogyii; yajwiingubøjc ja'a ñādeedy ja'a cay. Paadiä ñādeedy hānajtj miøødä, coo hānajtj quiobhuungä. Mo'owāanäp hānajtj jaduhñ cøxiä mäduhñtiä ja'a tieedy hānajtj miädsāna'ay. ¹⁷ Y coo ja'a Esaú jioot hānajtj chocy coo cøxiä mio'owøøjät ja'a tiéediäm, cab tii ñä'ä mooyyā, hoy jia jøøyy. Hamdsoo jaduhñ quia'a niyaghoyøøyyä.

¹⁸⁻²² Ja'a Moisés hajxy, jequiän hočhähgøøñäbä hajxy jim yhiñxy miādooyy maa ja'a tunän ja'a xøhjäpä Sinaí. Ja'a pojtäxa'a hajxy yhiñx møødä jøøn jim maa hānajtj jiaančh tehñ wyiingoodsän. Mānit hajxy miādooyy nebiä jäya'ay xiu'uxiän. Mānit hajxy miādooyy coo ja'a Dios quiapxy. Hočhähgøøñä ja'a Dios quiapxy. Jaduhñä Dios yhanehmy coo hajxy hotyjatiä quiuhgá'adsät tijaty jim mejtsp maa ja'a tunän, hoy jia animalä. Pero cab hajxy miee'xtujnä. Mānitä Dios hajxy miānuu'xtaacy coo quia'a cápñät. Moisés paady je'e chähgøøñä. “Jaančh tehñ chähgøøbiøch, paady ndsäyuy”, nømä Moisés miānaañ. Pero jim tsajpootyp jim Dioswiinduum, cab jim yhočhähgøøñän. Siön jim xiøhaty maa ja'a Dios yhāña'ayän. Jaduhñ jim xiøhjäpä, ja'a Jerusalén tsajpootypä. Tøø ja'a Dios cuhdujt hajxy xmio'oy coo hajxy mwiingudsähgø'øwät. Milhaamä Diosmoonsähajxy jim xioonnda'agy Dioswiinduum. ²³ Jimä Dioshuung yhaañämähajxy tiu'ugmucy ja'a xiøøhajxy tøøbä yajcujaayíjābä. Ja'a Diósäm hajxy yajnähwaats yajcuhwaatsä. Nägøxiä ja'a Dios hajxy jim xwyiinmahñdyhixānäm.

²⁴ Jimä Jesucristo hajxy xñähgapxtúutäm nebiä Dios hajxy tøø xmiøødyajcuhdújcām

hawiinjemy. Coo ja'a Abel jecy yagho'cä, mänitä Dios yaghawiimbijty. Pero coo ja'a Jesucristo hajxy tøø xñähho'túútäm, xyajnáhwaats xyajcuhwáatsäm ja'a Dios ja'a nbojpa ngädieey hajxy.

²⁵ Coo ja'a jecyjiäya'ay ja'a Diosmädia'agy hajxy yaa quia'a mäbøjcy hädaa yaabä naaxwiin, mänit hajxy yajcumädoowä. Hoorä, coo ja'a Dios hajxy xyhamdsoo hanéh-mäm jim tsajpootyp, maas hanaxiä hajxy jaduhñ njájtämät coo ja'a miädia'agy hajxy nga'a mäbójcämät. Entonces, tsøg hajxy hamuumdu'joot mäbójcäm. ²⁶ Coo ja'a Dios jecy quiapxy, mänitä naaxwiin yajtsäyuuuy. Jaduhñ tøø miänaannä coo cøxiä yajtsäyuyyaannä jadähooc møødä naaxwiin møødä tsajtcøxp. ²⁷ Jaduhñ miädia'agytiägø'øy coo ja'a Dios yajcuhdägoyya'añ tijaty tøø yhädiuñ møødä naaxwiin møødä tsajtcøxp. Pero mädyijaty jim tsajpootyp, caj yajcuhdägoyya'añ. ²⁸ Tsøgä Dios hajxy nämáayyäm Dioscujú'uyäp je'eguiøxpä coo hajxy jim xyaghidáanäm tsajpootyp cøjxta'axiøø. Hamuumdu'joot ja'a Dios hajxy nwiingudsähgøøyyämät. Jaduhñ ja'a Dios hajxy xquiumáayyämät. ²⁹ Yajcuhdägoobiä Dios je'e tijaty jaduhñ quia'a cumaaby.

13

¹ Tsøg hajxy hamuumdu'joot niçhojc nibia'häyóowäm nebiä tu'ugpuhya'aybän. ² Coo pøn miédsät maa ja'a mdøjcän, hamuumdu'jootä mjøøn mdøjc hajxy mmó'owät. Naje'e hajxy tøø tiøjmo'oy ja'a Diosmoonsä tsajpootyp-tsohmä. Cab hajxy hänäjty ñajuø'øy pø Dios mioonsähajxy je'e.

³ Mbuhbédäp hajxy ja'a jäya'ayhajxy hijpä tsumy, møød hajxy häyoowhíjxäbä. Hix, quipxy ja'a Diosmädia'agy hajxy mmøødmäbøcy.

⁴ Ja'a Dios jaduhñ mänaän coo jäya'ayhajxy ñimiøødtsäna'awóøjät ya'adio'oxy. Cab jaduhñ yhooyä coo ja'a mmägu'ughajpä tio'oxiøjc jaduhñ mnä'a wi'i yhäyoowhíjxät, coo ja'a Dios jaduhñ xñä'a yajcumädówät.

⁵ Cabä xädø'øñ hajxy mwi'i piøcjuó'owät. Jootcujcä xädø'øñ hajxy mmähídät, mäduhñtiä hajxy mmøødä. Tøø ja'a Dios jaduhñ miäna'añ cooc hajxy ni mänaa xquia'a nähgue'egáanäm. ⁶ Paady hajxy hamuumdu'joot nmánáanämät:

Ja'a Dióshøch jaduhñ xpiuhbejp.

Cábøch jaduhñ pøn ndsähgø'øy, hoñéjpiøch hajxy cu xjia tun.

⁷ Mbahíxäp jäya'ay hajxy, ja'a Diosmädia'agy hajxy tøø xyajnáhixø'øyäbä. Hamuumdu'joot ja'a Diosmädia'agy hajxy miäbøjcy. Hoy hajxy jiaançh tehñ jiäya'ayhajty.

⁸ Cabä Jesucristo ja'a quiuhdujt mänaa yajtägach. ⁹ Cabä wiingmädia'agy hajxy mbadu'ubógät. Coo ja'a Dios hajxy xchójcäm, maas hoy jaduhñ coo ja'a miädia'agy hajxy nmäbójcämät. Naje'e hajxy ñajtsapxø'øy cooc tyijy yhamajtsä, cábac tii mdsú'udsät mgáyät. Pero yøø cuhdujt jaduhñmä, caj yøø xpiuhbédät.

¹⁰ Tøø ja'a Jesucristo hajxy xñähho'túútäm, paadiä miädia'agy hajxy jaduhñ nbanócxäm. Pero pønä jecyquihdujt panøcxnä, cabä cuhdujt hajxy miøødä coo ja'a Jesucristo hajxy pianócxät. ¹¹ Jegyhajty ja'a teedywiindsøn animalnø'ty hajxy hijty quiuyoxø'øy maa ja'a muutscunuu'xytiøjcän, nebiä piojpa quiädieey hajxy jaduhñ ñähwa'ads quiuhwá'adsät. Mänitä animalho'ogy hajxy hijty nøcxy ño'ogy cajtpa'a. ¹² Jaanä jimä Jesús hoy yho'pä cajtpa'a. Jaduhñ hajxy xyajnáhwaats xyajcuhwáatsäm ja'a nbojpa ngädieeyhájtäm. ¹³ Tsøgä jecyquihdujt hajxy najtshixøøyyäm. Tsøgä Jesucristo miädia'agy hajxy hamuumdu'joot panócxäm, hoyyä cu'ug hajxy xjia xøøghájtäm. ¹⁴ Haa hädaa yaabä naaxwiinä, caj jiega'añ. Pero jim njoot hajxy nbädáacäm tsajpootyp. ¹⁵ Tsøgä Dios hajxy tehngajnä wiingudsähgøøyyäm ja'a Jesucristocøxpä. Tsøg hajxy tehngajnä mänáanäm coo ja'a Dios miøjjä jiaançhä. ¹⁶ Naxy hajxy hoy mdehñ jiäya'ayhädät. Mbuhmó'owäp ja'a wiinghäna'c hajxy tijaty hajxy mmøød. Jaduhñä Dios hajxy xjiaançh tehñ quiumáyät.

¹⁷ Mmäbójcäp ja'a copc-hajpä miädia'agy hajxy. Xcwieendähajp hajxy jaduhñ neby hajxy mga'a tu'udägóyyät. Ñajuøøby hajxy coo hajxy wyiinmahñdyhixa'añíjäm ja'a

Diósäm. Naxy hajxy mdehm miäbögät nebiä mgopc-hajpähajxy jaduhñ yhidät jootcujc. Coö hajxy mga'a mäbögät, cab hajxy hänajty jaduhñ tøø mniyaghoyø'oyii.

¹⁸ Mdúnäbä mayhajt hajxy, pa'ya'axä Dios hajxy ja'a høøhcøxpä. Hóyhøch nwädity. Chójpíøchá njoot coöch homiánaajä hoy nwädítät. ¹⁹ Chójpíøchá njoot jaduhñ coöch jim jadähooc nnøcxtägátsät maa mijtsän. Mänuu'xta'agä Dios hajxy coöch jim ween xyajnøcxy.

²⁰ Jootcujcä Dios hajxy xjiaančh tehñ yaghítäm. Jaayá'ayädsä Jesucristo yagjujyp-iøjtägajts, ja'a nWiindsøn'hájtäm. Jaayá'ayäts hajxy xmiøødyajcuhdújcäm ja'a hawiinjemyguiuhdujt mänaa ja'a Jesucristo hajxy xñähho'túutäm. Cabä jemyguiuhdujt mänaa tiägatsaannä. Homiánaajä ja'a Jesucristo hajxy xñä'ägä cueendähájtäm. ²¹ Weenä Dios hajxy xpiuhbety, nebiä miädia'agy hajxy jaduhñ hoy myajtúunät, ja'a Jesucristocøxpä. Jaduhñä Dios hajxy xquiumáyät. Cøjxta'axiøø tsøg hajxy jaduhñ mänáanäm coö ja'a Jesucristo miøjjä jiaančhä.

²² Hermanodøjc, cab hajxy mdsippadá'agät. Cábøch mijts madiu'u tøø nmägapxy tøø nhane'emy. ²³ Tøø ja'a hermano Timoteo yhawa'adspädsøømnä maa ja'a pujxtøjcän. Coö yaa paquiä miédsät, mänítøch jim nmødhádät maa mijtsän.

²⁴ Yajpoo'x ja'a copc-hajpähajxy ja'a høøhcøxpä møødä hermanohajxy nägøxiä. Ja'a hermanodøjc-hajxy yaabä Italianaaxooty, xyajpoo'xp mijts jaduhñ.

²⁵ Weenä Dios hajxy jaduhñ xjiaac mo'oy ja'a hoyhajt ja'a weenhajt. Amén.

Santiago

¹ Høøch xøhajp Santiago. Ja'a Diostúunghøch nduumby. Ja'a Jesucristo, je'ečh nmäduumby. Hermanodøjc, mijtshajxy nyajpoo'xyp, mijts jäguemnaaxtsohmä.

²⁻³ Coo hajxy mänaa mhäyohmbaadät, cab hajxy mmäná'anät cooc tyijy ja'a Dios hajxy xquia'a hijxnä. Tehngajnä ja'a miädia'agy hajxy mmäbójcät coo hajxy xyhixy. Y coo hajxy mjaac häyohmbaadät, maas hoy hajxy mmäbógät. Tøyhajt je'eduhñ, paady hajxy mjootcugó'owät. ⁴ Coo hajxy maas hoy mmäbógät, pedyii ja'a Diosmädia'agy hajxy jaduhñ mgudiúnät.

⁵ Coo pøn quia'a najuó'owät nebiä wyiinmahñdyhadät, weenä Dios miänuu'xta'agy, mänitä wiinmahñdy mio'owóøjät. Coo ja'a Dios hajxy tii nmäyujwáanämät, mänit hajxy cøxiä xmióoyyämät, y cab hajxy waamb xñämäáyyämät. ⁶ Ween hajxy hamuumdu'joot nmänuu'xtaacäm. Cab hajxy nmänáanämät coo hajxy xquia'a mo'owáanäm. Pøn tu'joot ca'a mabøjp, cabä jiäwøhñdy tu'hityä yaghity. Jaduhñ mäwínäts je'e nebiä mejjiän coo ja'a poj yagja'tsyo'oy. ⁷⁻⁸ Hix, mejtstu'u ja'a wiinmahñdy miøødä. Cabä tu'hityä yhity. Cab hoy wiädity. Cab tii wiinmahñdy mio'owóøjät ja'a Diósäm je'eguiøxpä coo wiinmahñdy mejtstu'u miøødä.

⁹ Mädyii hermano häyoob, coo piuhbedóøjät ja'a Diósäm, jootcugó'owäp je'eduhñ. ¹⁰⁻¹¹ Mädyii hermano mäyøø, coo ja'a mäyøøhadyiibä quia'a hajoodhájnät, nä'ägä jootcugó'owäp je'ebä. Hix, jaduhñ mäwínäts ja'a mäyøøjäya'ayhajxy nebiä pøjjiän. Hoy ja'a pøjy jioob'øy; pero coo quiujyxiøøj'øy, mänit ñii'xnä. Mänit ñähgahnä. Jaduhñdsä mäyøøjäya'ayhajxy quiuhdägoyyaambä. Yhøxho'ogaamby hajxy tijaty hajxy miämäyøøhajpy.

¹² Jootcujc hajxy yhity pønjaty mee'xtujp, pønjaty ja'a møjcu'ugongä miädia'agy ca'a mabójcäp. Pønjaty ja'a Dios jahmiejtsp, cøjxta'axiøø hajxy yagjyghada'añii nebiä Dios jiugyhätian, nebiä Dios hajxy tøø xyajwiinwaanóøyyäm. ¹³ Coo ja'a mjoothajxy chógät coo hajxy haxøøg mjatcó'owät, cab hajxy mmäná'anät cooc tyijy ja'a Dios hajxy xyagjatcø'owa'añ. Hix, cabä Dios mänaaxøø haxøøg jiatcø'øy. Y caj mänaa miäna'añ coo hajxy haxøøg njatcøøyyämät. ¹⁴ Ja'a mhamdsoo copc xyajtägóyyäp. ¹⁵ Hix, ja'a mhamdsoo copcooty ja'a pojpä cädieey piädsømy. Y coo pønä pojpä cädieey tehngajnä tiúnät, jiiby yhäda'aga'añ haxøøgtuum.

¹⁶ Hermanodøjc, ca'a hajxy myajwiinhøøñ. ¹⁷ Ja'a hoybä ja'a mäbaadpä, Dios hajxy pedyii xmióoyyäm, ja'a tsajpootypä. Je'eduhñ cunuu'x ja'a jajpä ja'a tsämaambä. Cabä Dios wyiinmahñdy mänaa tiägach. ¹⁸ Hamdsoojoot ja'a Dios hajxy xpiädáacäm hodiuum je'eguiøxpä coo ja'a miädia'agy hajxy nmäbójcäm, ja'a tøyhajtpä. Paady hajxy jaduhñ xquiumáyyäm.

¹⁹ Hermanodøjc, homiänaajä ja'a Diosmädia'agy hajxy mmädowná'anät; pero hodiägaamby hajxy mdaj mmáyät coo hajxy hñanjty mgapxa'añ mmädia'aga'añ. Y cab hajxy mjootmä'adät. ²⁰ Coo hajxy njootmä'tämät, cabä Diosmädia'agy hajxy nyajtuungpáatänä. ²¹ Cøxy najtshixø'ow ja'a mhaxøøgcuhdujt hajxy, neby hajxy madiu'u haxøøg mjatcø'øyän. Mee'xxieemy ja'a Diosmädia'agy hajxy mmäbógät, ja'a hajxy tøø mmädóyyäbä. Y coo hajxy mjaančh mabógät hamuumdu'joot, mänit hajxy jaduhñ mnähwá'adsät.

²² Mgøxy cudiúnäp ja'a Diosmädia'agy hajxy jaduhñ. Coo hajxy mnähmädoonáxät, cab hajxy jaduhñ mnä'a yajtuunpaaady, hoy hajxy mja mäna'añ cooc tyijy hajxy myajtuunpaaady. ²³ Pønä Diosmädia'agy nähmädoonajxp, cab hoy quiudiuñ. Jaduhñ mäwínäts je'e nebiä jäya'ay ñiyhahijxnaxyijän hijxtjooty. ²⁴ Paquiä jaduhñ ñiyhahijxnaxyii. Pero coo wyiimbijnä, cab jahmiejtsnä nebiä wyiin jiojy quiähxø'øgy. ²⁵ Pønä Diosmädia'agy tehngajnä jahmiejtsp, pøn hoy cudiuumb, jootcujc jaduhñ yhida'añ. Hix, hodiuum piäda'aga'añii je'eguiøxpä coo ja'a Diosmädia'agy miäbøcy.

²⁶ Pønjaty mänaamb cooc tyijy Dios hajxy wyiingudsähgø'øy, y nä'ä nägoodä hajxy ñä'ä capxtägoy, xiøøbä hajxy ñä'ä mäna'añ cooc tyijy Dios hajxy wyiingudsähgø'øy. ²⁷ Cooc ja'a yaamghuung hajxy mbuhbédät mөөdä yaamgto'oxy, cooc hajxy hänäjty tii yajmaajiaty, y cooc hajxy haxøøg mga'a wädítät, mänit hajxy myajcähxø'ogät cooc Dios hajxy mjaanč wiingudsähgø'øy.

2

¹ Hermanodøjc, paadiä Jesucristo miädia'agy hajxy nmäbójcäm cooc jim yhity tsajpootyp maa ja'a jajpä tsämaambä miөөdän. Jaaya'ay hajxy nWiindsøn'hájtäm. Cabä yhahixø'øy cooc pøn mxøøghádät.

²⁻⁴ Tsøg hajxy mädiácäm, cooc jäya'ayhajxy nämetsc miédsät maa ja'a md-sajtøjc-hajxiän, tu'ug mäyøøbä, tu'ug häyoobä, tu'guhdujt hajxy nämetsc mwiingudsähgø'øwät, hoyyä mäyøøbä orocø'øjädsøhñdy hänäjty jia mөөdä, hoyyä howyit hodiucy hänäjty jia mөөdä. Cabä häyoobä hajxy mxøøghádät, hoyyä howyit hodiucy hänäjty quia'a ja mөөdä. Hoorä, coodsä häyoobä hajxy mnämä'awät: "Jii miič huuc täna'aw", o cooc hajxy mnämä'awät: "Jii miič mhäña'awa'añ naaxwiin", y tøø ja'a mäyøøbä hoyhäñaabiejt hajxy hänäjty mmo'oy, myajcähxø'py hajxy jaduhñ cooc ja'a mguhdujthajxy quia'a hoyyä. Cähxø'p jaduhñ cooc ja'a häyoobä hajxy tøø mga'a näxuuch.

⁵ Hermanodøjc, huuc mädown hädaa mädia'agy hajxy. Pønjaty häyoob hädaa yaabä naaxwiin, Dios tøø yajnähdiy cooc ja'a Diosmädia'agy hajxy miäbógät hamuumdu'joot, cooc hajxy jim ñócxät cøxp tsajpootyp. Jim hajxy ñøcxa'añ nägøxiä. Pønjatia Dios tøø jahmiech tøø pia'häyoy, Dios jaduhñ tøø yajwiinwaanø'øy cooc hajxy jim ñócxät. ⁶ Pero mijts, mxøøghajpy hajxy ja'a häyoobädøjc. Hoorä, ja'a mäyøødøjc-hajxy, xchaačhtiuumb mijts jaduhñ. Pawich pajäduty mijts xyajnøcxy hagujc. ⁷ Ja'a Jesucristo miädia'agy hajxy mbanócxäp, y je'e ja'a mäyøødøjc-hajxy wyiinwohmby.

⁸ Dios mänaamb cooc ja'a mmäjøøn cooc ja'a mmädøjc mdsógät mba'häyówät nebiä mni'x nebiä mgopc mdsoquiän. Ja'a Diosmädia'agy jaduhñ miimb. Bueno, pø mjaanč cudiúunäp ja'a Dios miädia'agy jaduhñ, hoy jaduhñ. ⁹ Pero cooc ja'a häyoobädøjc hajxy mxøøghádät, haxøøg hajxy jaduhñ mjäya'ayhaty. Ja'a Diosmädia'agy jaduhñ mänaamb cooc yhaxøögä. ¹⁰ Pønä ley hoy tøø jia yajtuñ, pø weeñtiä tøø tiu'udägoy, jaanč tehñ miøj tøø quiuyo'oyø'øy. ¹¹ Dios jaduhñ mänaañ, cooc ja'a mhamdsoo to'oxiøjc hänäjty jyimän, cabä wiingto'oxiøjc mmөөdhídät. Jaanä jaduhñ miänaambä cooc mga'a jäya'ay-yaghó'ogät. Tsøg hajxy mänáanäm, pø tøø mjäya'ay-yaghø'ogy, tøø ja'a ley jaduhñ mga'a yajtuñ, hoy wiingto'oxiøjc mga'a ja mөөdhity. ¹² Hoy hajxy ngapx nmädiácämät, hoy hajxy njäya'ayhájtmät nebiä Jesucristo hajxy xyhanéhäm maa ja'a miädia'agy myiñän cujaay. Hix, yxhixáanäm jaaya'ay njoot ngopc-hajtämhajxy pø hoy hajxy njaanč jäya'ayhájtmät. Xpiuhbedáanämäp hajxy neby hajxy maas hoy njäya'ayhájtmät. ¹³ Pønjatia jäya'ay näxuu'tsp, je'e hajxy päda'agáanäp hodiuum. Cab hajxy yajcumädowa'añii. Pønjatia jäya'ay ca'a näxuu'tsp, je'eds hajxy yajcumädowáanäp. Cab hajxy näxuu'tstägatsa'añii.

¹⁴ Hermanodøjc, näje'e jäya'ayhajxy miäna'añ cooc tyijy hajxy miäböcy hamuumdu'joot, y cab hajxy hoy wiädity, nébiäc tyijjiäda'aduhñ yhuuc nä'ä nähwá'adsät. ¹⁵⁻¹⁶ Cooc mijts hermano nä'ä nägoobä mnämä'awät: "Nøcx hajxy jootcujc wädit; pägø'øw jocxwit hajxy; hoy hajxy mgay mhú'ugät", y cab hajxy hänäjty tii tøø mmo'oy, hoy hajxy hänäjty tii quia'a ja mөөdä, ni wit ni tucxy, ni cay ni hu'ugy, caj mijts mguhdujt hänäjty yhoyyä. ¹⁷ Cooc pøn miäná'anät cooc tyijy hoy wyi'i pianøcxy, pero cabä quiuhdujt ñä'ä hóyyäbä, xiøøbä jaduhñ ñä'ä mäna'añ cooc tyijy hoy pianøcxy.

¹⁸ Pero cooc pøn miäná'anät: "Miič mahñdy hoy mbanøcxyp; høøch, hóyhøch nguhdujt", høøch hijxtahñd yaghíxäc pø hoy mjaanč panøcxy, hoy mga'a ja yajcähxø'øgy pø hoy mguhdujt. Høøch, cooch nguhdujt yhoyyä, nyajcähxø'piøch jaduhñ cooch hoy njaanč panøcxy. ¹⁹ Miič mänaamb cooc Dios tiu'ugä; hoy hit jaduhñ cooc jaduhñ

mmáná'anät. Pero jaduhndsä möjcu'uhajxy miänaambä y chähgøøby hajxy je'e. ²⁰ Nej, caj miičh mnä'ägädä wiinjuø'owa'añä, xiøøbä mja nä'ä mäna'añ coo mmäböcy, pø cabä mguhdujt ñä'a hoyyä. ²¹⁻²² Abraham hõjts hijty nhaphájtäm ndeedyhájtäm. Mänitä Dios ja'a Abraham ñämaayy coo ja'a yhuung yóxät, ja'a Isaac-hajpä. Paadiaduhñ ñämaayy coo ja'a yhuung yóxät, nebiä Dios jaduhñ wyiingudsähgø'owät. Jiaančh cudiunaambiä Abraham hánajty jaduhñ. Coo jiaančh ja cudiunaañ, paady hodiium piädácänä. Cähxø'p jaduhñ coo ja'a Diosmädia'agy hánajty jiaančh mäböcy. ²³ Tõjiajtä Diosmädia'agy jaduhñ nebiä myiñän cujaay: "Coo ja'a Abraham ja'a Dios ja'a miädia'agy miäböcjä, paadiä hodiium piädácänä." Y Abraham, hamdsoo Dios miänaañ coo Abraham hánajty miägu'ughadyii.

²⁴ Jaduhnds je'e, paadiä Dios hajxy hodiium xpiädácäm coo hajxy hoguiuhdujt nyajtúunäm, coo hajxy hoy nmäböjcäm. ²⁵ Jaduhñä quixy Rahab yhuuc jajpä. Mänitä jäya'ayhajxy mietstaacy maa ja'a Rahab tiøjcän. Hixøøby woodsøøbiä hajxy hánajty wiädity. Mänitä Rahab miäbuhbejty. Mänitä tu'u hajxy wiingpä yajnähixøøyyä. Paadiä Rahab piädácänä hodiium, hoyyä howyiinmahñdy hánajty tøø quia'a ja møødhaty. ²⁶ Entonces, coo hajxy nmánáañämät cooc tyijy hajxy hoy nmäböjcäm, pero cabä nguhdujthajxy yhoyhájtäm, xiøøbä hajxy nnä'ä mänáañäm coo hajxy hoy nmäböjcäm. Cab jaduhñ choobaady coo hajxy nä'ä nägoobä nmánáañämät cooc tyijy hajxy hoy nmäböjcäm; høxtáhmäts ja'a ni'x ja'a copc coo yho'nä, cab je'e choobaatnä.

3

¹ Hermanodøjc, ca'a hajxy mwi'li ñiwyiindsøn'bäda'agyii. Hix, pønjaty hoy ca'a yajnähixøøby, cab hajxy quiumaya'añii ja'a Diósäm. ² Madiu'u hajxy ngapxtägóoyyäm nägøxiä. Pøn ca'a capxtägooby, ca'xiä Diosmädia'agy jiaančh tehñ quiudiuñ. Ni nej quia'a jatcø'øy. ³ Paadiä cuaay freno hajxy nbädácäm coo hajxy ween miädia'agymiäböcy neby hajxy jaduhñ hoy yó'oyät. ⁴ Jaaná jaduhñduhmbä, ja'a barcotimón, chuucpä hajxy yajmäyohby, hoy ja'a barco jia hamøjjä, hoy møc jia pabojoy. ⁵⁻⁶ Y yø'ø haaw, hoy jia muutscä, jaduhyyä jäya'ay ñä'a jaančh tehñ miägapxtägoobiä möj may. Jaduhñ mäwíinäts yø'ø haaw nebiä jøønän. Coo ja'a yuuc tioyø'øgy, tu'lii'ty ja'a padoy chohnda'agy. Yø'ø haaw, jiaančh tehñ miøødä haxøøgpä yø'ø. Paquiä xyajtu'udägóyyät. Y ja'a möjcu'ugong, je'eds hajxy xwyi'li yajcapxtägóoyyäm. ⁷ Hoñä'ä mädyii animalä hajxy hoy nyajmaaxøøyyämät, caa, muuxy, tsahñdy, møødä mejjiooty-tsánaabiä. ⁸ Pero yø'ø haaw, cab hoy miaaxø'owa'añ. Haagä haxøøgpä jaduhñ miøød. Je'eduhñ xya-jtägóoyyäm maa ja'a Dioscøxpän. ⁹⁻¹⁰ Jue'e yø'ø haaw, mejtstu'u myiñ. Je'e hajxy nyajtúunäm coo ja'a Diosteedy hajxy ngapxpátäm. Jaaná je'e hajxy nyajtúunäm coo ja'a jäya'ay hajxy nnähójjäm, ja'a Dios yajmägunuu'xøøyyäbä ja'a yhEspíritu. Hermanodøjc, caj yhoyyä coo hajxy mejtstu'u njäya'ayhájtämät. ¹¹ Hix, maa tu'ugpä nøøgopcän, cabä nøø wiingä tægach xiee'xy. Tu'tu'uyyä ñä'ägädä xee'xy. ¹² Jaaná jaduhñduhmbä, tu'tu'uyyä piids tiøømhaty; cabä aceituna miädøømhadø'øy maa ja'a piidsän. Ni ja'a piids quia'a mädøømhadø'øy maa ja'a tsatypän. Y cabä hoñøø jim mbädät maa ja'a taamdsnøøgopcän.

¹³ Pøn wiinmahñmech maa mijtsän, ween hoy jiäya'ayhaty neby jaduhñ yajcähxø'øgät coo hoguiuhdujt miøødä, coo mee'xxieemy jiäya'ayhaty. ¹⁴ Jii häna'c-hajxy näje'e miäna'añ coo hodiium hajxy mio'owøøjät, coo wiinghäna'c quia'a mo'owøøjät, je'eguiøxpä cooc tyijy hajxy jiaančh tehñ jiaty hoyhoy. Caj mniguiumayøøjät cooc tyijy mjaančh tehñ jiaty. Hix, caj tiøyyä coo mjaančh jaty. ¹⁵ Yø'ø wiinmahñdy jaduhmbä, caj yø'ø jim choñ maa ja'a Diosän. Hädaa yaabä naaxwiin hajxy yajcojy. Ja'a möjcu'ugongä wyiinmahñdy jaduhñ. ¹⁶ Ja'a häna'c-hajxy ca'a niyajmädsójcäbä coo wiinghäna'c hodiium piädät, cab hajxy hoy ñimiøødhidyii. Nijiøhoj nibiahójjäp hajxy jaduhñ. Madiu'u hajxy haxøøg jiäya'ayhaty. ¹⁷ Pero jimä howyiinmahñdy choñ maa ja'a Diosän. Coo hajxy je'e mmøødhädät, hoy hajxy jaduhñ mjäya'ayhädät. Cab hajxy mdsiptsäná'awät, cab hajxy mma'adtsäná'awät. Mee'xxieemy hajxy mhídät. Cabä mhamdsoo wiinmahñdy hajxy

mwi'i yajtúnät. Mmøødhádäp ja'a hojioot hajxy møødá jäya'ay. Cabä mwiinmahñdy hajxy mejtstu'u myajtúnät. Cab hajxy mhøhndá'agät. ¹⁸ Pønjaty ca'a tsiptsojp, jaančh tehñ yhoy hajxy jiäya'ayhaty, møød ja'a hajxy nägøxiä capxcuhgädaacpä.

4

¹ Jim mijts ja'a mdsip myajtsohnda'agy maa ja'a mhaxøøgwiinmahñdyhajxiän coo hajxy naxy mnimiädsibø'oyii. ² Coo hajxy tii mja hadsoga'añ, je'eds hajxy myajniguiuyagho'ogøøyyäp, je'eds hajxy myajniguiumädsiphadøøyyäp. Paady hajxy mga'a paady mädyii hajxy mja tsojpy coo ja'a Dios hajxy mga'a mäyujwa'añ. ³ Y coo hajxy tii mja yujwa'añ, cab hajxy mbaady, je'eguiøxpä coo ja'a mguhdujthajxy quia'a hoyyá. Hix, näjoot hajxy mwi'i yhadún mwi'i yhanäma'awø'øy mädyii hajxy mja yujwaamby. ⁴ Caj mijts Diosmädia'agy hoy mgudiuñ. Nej, cab hajxy mnajuø'øyä coo jaduhñ quia'a hoyyá coo ja'a mjoot ja'a mjuøhñdy hajxy yaa mbädá'agät hädaa yaabä naaxwiin. Coo hajxy jaduhñ mbädá'agät hädaa yaabä naaxwiin, Dios hajxy jaduhñ mmädsiphájnäp. ⁵ Nej, tøgä xiøøbä ja'a Diosmädia'agy ñä'ä mäna'añä: "Tøø ja'a Dios ja'a yhEspiritu piäda'agy maa højtscøxpän. Xjiaančh tehñ chojc xjiaančh tehñ pia'häyóowäm hajxy jaduhñ." ⁶ Jaančh tehñ yhooyä Dios hajxy xpiuhbéjtäm neby hajxy jaduhñ hoy nmäjädaacämät. Jaduhñä Dios miädia'agy myiimbä: "Miädsiphajpiä Dios pøn ja wi'i yajcumayaamb. Pero pøn ca'a yajcumayaamb, piuhbejpiä Dios je'e." ⁷ Mäbøc ja'a Diosmädia'agy hajxy tehngajnä. Høxhixä ja'a møjcu'ugongä miädia'agy hajxy; mänit hajxy jaduhñ xñähguéecnät. ⁸ Hamuumdu'jootä Diosmädia'agy hajxy mbanócäcät; mänitä Dios hajxy xpiuhbejtägätsät. Pønjetiä haxøøgcuhdujt møød, mhøxhixäp ja'a mguhdujt hajxy jaduhñ. Pønjaty mänaamb coo mejtstu'u pianøcxa'añ, møødá Dios, møødá hädaa yaabä naaxwiin, mnajtshixøøñäp ja'a mhaxøøgwiinmahñdy hajxy. ⁹ Mjootmayhádäp hajxy jaduhñ je'eguiøxpä coo haxøøgcuhdujt hajxy mmøødá. Cab hajxy mxoonädaacnät. ¹⁰ Mba'yá'axäp ja'a Dios hajxy hamuumdu'joot. Mnägäpxäp hajxy nebiaty hajxy tøø mhaxøøgwädity. Mänitä Dios hajxy xyajmähmø'owät hodiium.

¹¹ Hermanodøjc, ca'a hajxy mniñähojyii hamiñ haxøpy. Pøn wiinghermano nähojp, jaduhñ miäbaatnä nebiä Diosmädia'agy ñähojjiän. Cabä Diosmädia'agy hoy ñä'ä cudiuñ. ¹² Tu'ugä Dios hajxy xyhanéhmäm. Je'e hajxy xyhixäm pø hoy ja'a miädia'agy hajxy ngudiúunäm. Jaayá'ayäts cuhdujtmøød pø xpiädaacäm hajxy hodiium, pø xpiädaacäm hajxy haxøøgtuum. Pero miich, caj miichä cuhdujt mmøødá coo wiinghermano mnähójtät.

¹³ Huuc mäadow hajxy, näje'e hajxy jaduhñ miäna'añ: "Jäda'a o jaboom højts nnøcxa'añ wiinghagajpt. Jim højts tu'jumøjt nniyhajada'añii. May højts xädø'øñ jim nbaada'añ." ¹⁴ Ni quia'a najuø'øy hajxy tii jaboom jadäänäp. Ja'a jugyhajt, paquiä quiøxy. Jaduhñ miäbaady nebiä näma'ajän coo paquiä tiägoy. ¹⁵ Jaduhñ hajxy mmäná'anät: "Pø mänaambä Dios jaduhñ, mänit hajxy njaac jugyhajtämät. Coo ja'a Dios jaduhñ miäná'anät, hotyijä hajxy njájtämät. Coo quia'a mäná'anät, cab hajxy tii nnä'ägädä jájtämät." ¹⁶ Pero mijts, tehngajnä mijts mwi'i ñiguiumayii. Haxøøg jaduhñ coo hajxy jaduhñ mjatcø'owät. ¹⁷ Pøn najuøøby neby hoy quiuhdujthädät, y cab hoy ñä'ä cuhdujthaty, haxøøg jaduhñ jiatcø'øy.

5

¹ Ween yø'ø mäyøødøjc-hajxy yhuuc yajcopcø'øy. Jø'øwaamb hajxy, tsaächya'axaamb hajxy, je'eguiøxpä coo ja'a tsaächpä hajxy piaada'añ. ²⁻³ Yø'ø hajxy cøxiä miämäyøøhajiä, caj yø'ø choobaadaannä, hoy howyit hodiucxy hajxy jia møødá. Cøxaamb jaduhñ tiägoyya'añ. Coo hajxy miäyøøjä, cähxø'p hajxy coo ja'a häyoobädøjc hajxy quia'a näxuuch. Quiuhäyowø'øwaamby hajxy jaduhñ. Xiøøbä hajxy tøø ñä'ä yajmayø'øy maa hajxy miäyøøhatiän. Hix, mobädajpä naaxwiimbä wyiimbida'añ. ⁴ Cabä mioonsä hajxy ca'xy tøø yhuuc mäjuuñä. Paady hajxy jim ñäxø'øwøøyyänä maa ja'a Diosän jim tsajpootyp. Miädoobiä Dios ca'xy. ⁵ Hoy yajxon hajxy tøø jiaančh tehñ chäna'ay hädaa yaabä naaxwiin. Tøø ja'a miäyøøhadyiibä hajxy jia yajmayø'øy. Pero mobädajpä hajxy

quihäyowø'øwa'añ. ⁶ Tøø ja'a hojiäya'abiä hajxy chaächtiñ. Tøø hajxy yagho'ogy. Cabä hojiäya'ayhajxy ñä'ä niñawaanä.

⁷⁻⁸ Hermanodøjc, mme'e'xtúgäp hajxy jaduñ høxtä Jesucristo cädaactägätsäp. Mobädajpä quiädaactägätsa'añ. Cab hajxy tii mdaj mmáyät. Jaduñ hajxy mme'e'xtúgät nebiä jäya'ayhajxy miee'xtuquiän coo quia'a tsoj tu'uy. ⁹ Hermanodøjc, cab hajxy mniñähöjójät coo Jesucristo hajxy xyajcumädówät. Mobädajpä quiäda'aga'añ. ¹⁰ Mjahmiédsäp hajxy nebiä jäya'ayhajxy jecy chaächpøjquiän, ja'a Diosmädia'agy hajxy jecy yajwá'xäbä. Mee'xtujc hajxy je'e jejcy. ¹¹ Pøn mee'xtujp, hoy jia tsaächpøcy, jootcujc hajxy yhity, nebiä Job jecy miee'xtujquiän mänaa chaächpøquiän. Tøyhajt jaduñ. Y ñäxuu'tstägajts ja'a Dios ja'a Job. Hix, hojiot ja'a Dios jiaanč tehñ miøød.

¹² Hoy hädaa mädia'agy hajxy mmädówät. Cabä Dios hajxy nä'ä nägoobä mgapxpáadät. Coo hajxy jaduñ nä'ä nägoobä mgapxpáadät, mgapxtägóyyäp hajxy jaduñ, y xyajcumädówäp ja'a Dios hajxy. Pø mmøødä tøyhajt hajxy, jaduhyä hajxy mmäná'anät coo tiøyhajtä. Pø caj, jaduhyä hajxy mmäná'anät coo quia'a tøyhajtä.

¹³ Pønjaty tsaächpøjp, weenä Dios hajxy pia'ya'axy. Pønjaty jootcujc, weenä Dioshöy hajxy yhöy ya'axy. ¹⁴ Pønjaty pøjcäp, ween hajxy ñäma'ay ja'a tuungmøødpä maa ja'a tsajtøjcän coo oración hajxy tiuunäxät, coo aceite hajxy yajñähjaaxóøjät ja'a Dioscøxpä. ¹⁵ Pø jaančh mæbøjp hajxy, ja'a hajxy oracióntuumbä, mänitä Dios ja'a pa'amjäya'ay ja'a pia'am yajñähwáatsät, møødä piojpä møødä quiädieey. ¹⁶ Myajniñägäpøjöp ja'a mbojpä mgädieeyhajxy hamiñ häxøpy. Mniñähgapxtu'udóøjöp hajxy hamiñ häxøpy nebiä mba'am hajxy jaduñ xñähwá'adsät. Jaančh tehñ tiuungpaatp jaduñ coo ja'a hojiäya'ay hamuumdu'joot yhoracióntúnät. ¹⁷ Høxtahmsä Elías, ja'a Diosmädia'agy jecy yajwá'xäbä. Jaduñ je'e jäya'ayhajty neby højtshájtämän. Coo ja'a Elías ja'a Dios miänuu'xtaacy coo quia'a yajtú'uwät, tægøøgjumøjt ja cupc quia'a tuuy hädaa yaabä naaxwiin. ¹⁸ Mänitä Elías ja'a Dios jadähooc miänuu'xtaactägajch coo yajtú'uwät. Mänit jadähooc tiægøøyy tuubä. Mänitä jäya'ay piäda'agyhajxy yhöyøyyäxä.

¹⁹⁻²⁰ Hermanodøjc, coo pøn ja'a tøyhajt jiojyohdiú'udät maa mijtsän, tu'udägóyyäp hajxy jaduñ. Pero coo hajxy mjootcapxmøcpógät, mänitä wyiinmahñdyhajxy miédsät. Cøxaambä piojpä quiädieey hajxy jaduñ ñähwa'adsa'añ, y hodium hajxy jaduñ miähmø'øwa'añ. Tøyhajt jaduñ.

1 Pedro

¹ Høøch xøhajp Pedro. Jesucristøch xquiuguexyhajp. Mijts hädaa nocy nyajnä-jaayøøby pønhatiä Diosmädia'agy mäbøjp. Xii yaa hajxy wiingtuumjaty mhadsäna'ay jim maa naax jaduhñ xiøhatiän Ponto, møød jim Galacia, møød jim Capadocia, møød jim Asia, møød jim Bitinia. ² Jequiän mijtsä Diosteedy xwyiimbiyy. Tøø Dios hänajty ñajuø'øy coo mijtsä miädia'agy hänajty mmäbøgaanä. Ja'a yhEspirituhaama Dios hajxy tøø xyaghodiägø'øy, weenä mädia'agy hajxy jaduhñ mmäbøgät ja'a Jesucristocøxpä. Jaaya'ay hajxy tøø xyajnähwáatsäm mänaa hajxy xñähho'túutäm. Weenä Dios ja'a hoyhajtä weenhajt hajxy xmio'oy mõj may.

³ Tsøgä Dios hajxy wiingudsähgøøyyäm. Jaaya'ayä Jesucristo Tieedyhajpy. Højtsä Jesucristo nWiindsønhájtäm. Hojiotä Dios jiaanč tehñ miøød ja'a højtscøxphájtäm, paady hajxy homiänaajä xyagjugyhadáanäm neby je'e jiugyhatiän. Coo Dios ja'a Jesucristo yagjuypiojtägajch coo hänajty tøø yho'ogy, jaduhñä tøyhajt hajxy nmøødhájtäm coo Dios hajxy jaduhñ xjiaanč yagjugyhadáanäm homiänaajä ⁴ jim tsajpootyp. Jimä hoyhajtä weenhajt hajxy mõj may xmio'owáanäm, neby jaduhñ jecy miänaañän cooc hajxy hänajty xmio'owáanäm. Tijaty hajxy yaa nyagjugyhájtäm hädaa yaabä naaxwiin, tsipcøxp jaduhñ quiøxa'añ, tsipcøxp jaduhñ quiuhdägoyya'añ. Pero mädyiijatiä Dios hajxy jim xmio'owáanäm tsajpootyp, cab jaduhñ mänaa quiøxa'añ, cab jaduhñ mänaa mia'ada'añ, cab jaduhñ mänaa quiuhdägoyya'añ. Homiänaajä yajxon yhida'añ. ⁵ Coo mijtsä Dios miädia'agy jaduhñ mmäbøjcä, paadiä Dios hajxy xcwieendähada'añ ja'a miøcmäjaahaam. Cab hajxy jaduhñ mänaa mguhdägoyya'añ. Coo ja'a Dios yHuung yaa quiädaactägatsa'añ hädaa yaabä naaxwiin, ja'a Jesucristohajpä, mänit hajxy jim xya-jnøcxáanäm tsajpootyp Dioswiinduum. Jimä Dios hajxy homiänaajä xyagjugyhadáanäm neby je'e jiugyhatiän.

⁶ Paady mijts jootcujc mhity, hoy hajxy jäda'ahaty madiu'u mja tsaächpøcy. Pero cab hajxy jecy mdsaaächpøga'añ. ⁷ Høxtahñdsä oro, jøønhaamä jäya'ayä oro hajxy yhiixmach pø hoyhoro jaduhñ. Jaanä jaduhñ mijtsä Dios xyhiixmajtspä pø hamuum-du'jootä miädia'agy hajxy mmäbøjcä, hoy hajxy mja jaanč tehñ chaaächpøcy. Jaanč tehñ choobaatp jaduhñ coo hajxy jaduhñ mmäbøgät tehñgajnä. Cabä oro jaduhñ jiaty tsoobaady neby jaduhñ choobaadiän nej mijts homiänaajä mmäbøquiän. Hix, tsipcøxpä oro jaduhñ quiuhdägoyya'añ. Y coo Jesucristo yaa quiädaactägatsa'añ, mänit mijts xquiumaya'añ je'eguiøxpä coo hajxy hänajty tøø mmäbøcy, hoy hajxy hänajty tøø mja jaanč tehñ chaaächpøcy.

⁸⁻⁹ Hoyyä Jesucristo hajxy tøø mga'a jagä hixy, mdsojpy mba'häyooby hajxy jaduhñ, y mmäbøjcäbä miädia'agy hajxy jaduhñ. Hoy hajxy tøø mga'a jagä hixy, coo hajxy jaduhñ mmäbøcy, paady hajxy jaduhñ tøø xyajnähwa'ačh. Coo hajxy jaduhñ tøø xyajnähwa'ačh, paady hajxy jaduhñ mjaanč tehñ xioonda'agy nägø'ø nädecypiä.

¹⁰ Ja'a jäya'ayä Diosmädia'agy hajxy jecy yajwá'xäbä, jia wi'i yajtøøby jia wi'i yajtø'xyp hajxy hänajty neby hajxy piäda'agøøjät hawa'adstuum. Cab hajxy hänajty ñajuø'øy neby hajxy jaduhñ jim piäda'agøøjät. Pero ñägäpax hajxy jaduhñ coo mijtsä Dios hänajty xpiäda'aga'añ hawa'adstuum, je'eguiøxpä coo hojiot miøødä. ¹¹ Yajtøøby hajxy hänajty pøn mijts hänajty min xpiäda'aga'añ hawa'adstuum. Jaduhñ hajxy hänajty yajtøøbä mänaa hänajty myina'añ. Ja'a Dios jaduhñ hawaanä ja'a yhEspirituhaam cooc tu'jäya'ay hänajty yaa min chaaächpøga'añ. Y cooc hänajty tøø yho'nä, mänitac hänajty jiuypiojtägatsa'añ. Mänitac hänajty jim ñøcxtägatsa'añ tsajpootyp maa Dioswiinduumän. Pero ja'a jecyjiäya'ayhajxy, cab hajxy hänajty jaduhñ ñajuø'øy pønä Dios hänajty tøø ñänømy ja'a yhEspirituhaam. Ñä'ä cujahy hajxy jaduhñ nebiaty hajxy jaduhñ ñajtsapxøøyyä. ¹² Mänit hajxy jecy yhawáanäxä coogä Dios jaaya'ay hänajty quia'a tsoj quexa'añ, ja'a mijts hänajty xpiäda'agaambä hawa'adstuum. Cujéquiägä Dios hänajty quixä'añ.

Hoorä, tøø quiejxnä. Jaduhñ tøø yajtøjiajnä coo ja'a yajnahwaatspä tøø quiejxnä. Y tøø mijts jaduhñ mjaančh mädoyhaty coo ja'a yajnahwaatspä yaa tøø yhoj. Ja'a Jesucristøch jaduhñ nnänøømby coo hajxy hoy xñähho'túutäm. Y jaaya'ay mijts xyajmädoyhájtäbä, ja'a Dios ja'a yhEspírituhaam hajxy jaduhñ ñajtsapxøøyyä nebiatiä Diosmädia'agy hajxy yajwá'xät. Tsajpootypä Dios ja'a yhEspíritu yajtsohndaacy coo jaduhñ yaa quiejxy hädaa yaabä naaxwiin. Haa ja'a Dios ja'a mioonsähajxiä, ja'a hajxy jaduhñ jim hijpä tsajpootypä, jiaančh tehñ yagjuøøby hajxy jaduhñ coo Dios ja'a yHuung jaduhñ yaa quiejxy hädaa yaabä naaxwiin, coo højts hoy xñähho'túutäm.

¹³ Y coo Jesucristo jaduhñ yaa jadähooc quiädaactägatsa'añ, mänit hajxy jaduhñ jim xyajnøcxáanäm tsajpootyp maa Dioswiinduumän, pønhatiä Diosmädia'agy hñajty tøø miäböcy. Mänitä hoyhajtä weenhajtä hajxy jim ca'xy xmio'owáanäm. Coo Dios jaduhñ tøø miäna'añ coogä yHuung yaa quiädaactägatsa'añ, jaduhñä tøyhajt hajxy nmøødhájtäm coo jaduhñ tiøjiada'añ. Tsøcxä njoot hajxy pädáacäm maa hoyhajtän, maa weenhajtän, mädyii Dios hajxy hñajty xmio'owáanäm. Tsøcxä hajxy hoy wädíjtäm. Tsøc hajxy jahmiejtstáacäm coo Jesucristo yaa quiädaactägatsa'añ. ¹⁴ Coo Dios hajxy xyhuunghájtäm, paadiä miädia'agy hajxy tsøc mäböjcäm. Cabä haxøøgwiinmahñdy hajxy jadähooc mbadu'ubøjcumbät, neby hajxy hijty mjatcø'øyän coo Dioscapxiä Diosmädia'agy hajxy hijty mga'a mädoyhatyñä. ¹⁵ Ca'a haxøøgjoot ca'a haxøøgwiinmahñdy hajxy myaghity. Hix, cabä Dios haxøøgjoot haxøøgwiinmahñdy ñä'ägädä møødä. Jaaya'ay hajxy jaduhñ xyajnahdíjjäm coo hajxy xquiu'ughadäänäm. Paadiä hojioot hajxy tsøc yaghíjtäm nebiä Dios hojioot miøødän. ¹⁶ Jaduhñ jim myiñ cujaay maa Diosmädia'aguiän: "Høøch, cáböchä haxøøgjoot cáböchä haxøøgwiinmahñdy nnä'ägädä møødä. Høøch hajxy pahijx padúunäc", nømä Dios jecy miänaañ.

¹⁷ Ja'a Dios hajxy nwiingudsähgøøyyäm. NDeedyhájtäm hajxy jaduhñ. Paady hajxy hoy tsøc jäya'ayhájtäm mäduhñtiä hajxy yaa ndsänaayy nhäyóowäm hädaa yaabä naaxwiin. Hix, nnajuøøyyäm hajxy jaduhñ coo Dios hajxy xyajcumädoxäänäm nebiaty hajxy hñajty yaa haxøøg tøø njatcøøyyäm hädaa yaabä naaxwiin, hoy hajxy hñajty näje'e tøø nja mäyøødsänäayyäm. ¹⁸⁻¹⁹ Ja'a nhaphájtäm ja'a ndeedyhájtämhajxy ja'a jegyhajtypä, coo yhamdsoo cuhdujt hajxy hijty hoy quiudiuñ, jadúhñäc tyijy hajxy ñähwa'adsa'añ. Y jaduhñ mijts tøø mbahabøjpä. Pero cab jaduhmbä cuhdujt choobaady. Coo Jesucristo hajxy hoy xñähho'túutäm, ja'a ñø'tyhaam hajxy xpiädáacäm hawa'adstuum. Ni tii hajxy jaduhñ xquia'a pädáacäm hawa'adstuum, ni xädø'øñ. Hix, paquiä xädø'øñ quiøxy. Jagooyyä Jesucristo hajxy xpiädáacäm hawa'adstuum ja'a ñø'tyhaam. Hix, cabä Jesucristo ni tii poj ni tii cädieey quia'a møødä. Paady hajxy je'e hoy xpiädáacäm hawa'adstuum. Coo Jesucristo ja'a poj ja'a cädieey häxøpy miøødhaty, cab hajxy häxøpy tøø xpiädáacäm hawa'adstuum. ²⁰ Jéquiänä Dios ja'a yHuung jaduhñ yajnahdíjy cooc hñajty yaa quixa'añ hädaa yaabä naaxwiin, cáhnäc hädaa naaxwiimbä hñajty yhawijy tiøø'xta'agy. Pero cabä Dios ja'a yHuung choj quejxy. Cujecy jaduhñ quiejxy mänaabä højts hñajty yaa njugyhájtämbä. Højts hoy xñähho'túutäm. ²¹ Coo Jesucristo hñajty tøø yho'ogy, mänitä Dios yagjujypiøjtägajch. Mänit jim jadähooc yajnøcxy maa wyiinduumän. Jim jäda'ahaty wyiingudsähgøøyyii. Y coo Dios ja'a yHuung jaduhñ yagjujypiøjtägajch, paadiä miädia'agy hajxy tsøc mäböjcäm coog hajxy xyagjugyhadäänämbä homiänaajä neby je'e jjugyhatiän.

²² Tøøyyä Dios miädia'agy. Y coo mijtsä miädia'agy hoy mgudiunä, paadiä mjootä mjuøhñdyhajxy nähwa'ads yhity. Naxy hajxy jaduhñ mdehm ñiçhoc mdehm ñimiee'xøøjät hamuumdu'joot. Jaduhñ hajxy mnijiäwø'øwøøjät nebiä tu'que'expäñ nebiä tu'mägu'ugpäñ. ²³ Tøø haxøøgjoot tøø haxøøgwiinmahñdy hajxy nnajtshixøøyyäm. Homiänaajä Dios hajxy xyagjugyhadäänäm neby je'e jjugyhatiän. Jaduhñä hojiootä howyiinmahñdy hajxy xmióoyyäm hawiinjemy, je'eguiøxpä coo miädia'agy hajxy nmäböjcäm. Cabä miädia'agy mänaa quiuhdägoyya'añ. Jaaya'ay hajxy jaduhñ xyagjugyhadäänäm homiänaajä neby je'e jjugyhatiän, ca'a piønä hädaa yaabä naaxwiimbä, ni ja'a ndajhájtäm ni ja'a ndeedyhájtäm. Haa ja'a hädaa yaabä naaxwiimbä

jugyhajtä, tsipcøxp jaduhñ quiøxa'añ. ²⁴ Jaduhñ jim myiñ cujaay maa Diosmädia'aguiän: Høxtahmsä pøjy, hoy jaduhñ jia yajxonä, tsipcøxp je'e ñä'ägä tø'øch.

Jaduhñ mäwiin højtshájtäm, hoy hajxy møj jaanč nja nijiäwøyyäm, tsipcøxp hajxy nnä'ägä ho'og nnä'ägä tägoyyáañäm.

²⁵ Pero ja'a Diosmädia'agy, cab jaduhñ mänaa quiøxy tiägoy.

Ja'a Diosmädia'agy jaduhñ mänaamb coogä Jesucristo hajxy hoy xñähho'túutäm. Tøø mijtsä jäya'ay jaduhñ xyajmädohyaty, ja'a Diosmädia'agy hajxy jecy yajwá'xäbä.

2

¹ Coo Dios hajxy homiänaajä xyagjugyhadaañäm neby je'e jiugyhatiän, jaduhñä hojiootä howyiinmahñdy hajxy tøø xmióoyyäm hawiinjemy. Paadiä haxøøgjootä haxøøgwiinmahñdy hajxy tsøc najtshixøoyyäm cøxiä. Cab hajxy mnä'ägä høhñdá'agät ni weeñtiä. Hamuumdu'joot hajxy jaduhñ tøy mjaanč hojiäya'ayhädät. Jii jäya'ayhajxy näje'e, cabä Diosmädia'agy hajxy hoy quiudiuñ, hoy hajxy jia nidijyii nebiä hojiäya'ayän. Ca'a hajxy jaduhñ mbahixy. Ca'a hajxy pøn cøxiä wiinä myajcuxøøghadø'øy. Cab hajxy mniñähøøn mniñähojøjät. ²⁻³ Tøyhajt jaduhñ coo Jesucristo mayhajt møj may tøø tiuñ maa mijtsøxpän. Mnajuøøby hajxy jaduhñ, túhmäts. Hahixøøbyxiä jaduhñ coo miädia'agy hajxy tehngajnä mbanøcxät. Høxtahmsä maaxhuunghajxy, coo hajxy hñajty chi'idsa'añ, mäniä tsi'tsc hajxy ñäjø'øy. Jaduhñ mäwiin mijtspä, mba'yá'axäp ja'a Dios hajxy coo quiapxiä miädia'agy hajxy ween tehngajnä xjiaac yaghabøcy. Jaduhñ hajxy ca'xy pedyii hoy myajtúnät. Y cab hajxy jaduhñ mänaa mdudägóyyät.

⁴ Tehngajnä Jesucristo wyiinmahñdy hajxy jaac tehñ piahixä jaac tehñ piaduunä. Ja'a Dios jaduhñ jecy wiinmaayy coo højts hñajty jaduhñ xyhuunghadaañäm ja'a Jesucristocøxpä. Ja'a Jesucristo, ja'a Dios yHuung je'e, paadiä cuhdujt jaduhñ miøødä coo hajxy nwiingudsähgøoyyämät. Pero cabä jäya'ayä Jesucristo hajxy näje'e jjøjpxø'øy. Cab hajxy wyiingudsähgø'øy. Xiøøghajpy hajxy jaduhñ. ⁵⁻⁶ Jaduhñ jim myiimbä cujaay maa Diosmädia'aguiän:

Jim maa cajpt jaduhñ xiøhatiän Siön, jímhøchä ndsajtøjc tu'ug ngojy.

Tú'ughøchä tsa nwiimbiiyy coo jim piäda'agøjät maa tøjteecän.

Jaanč tehñ tiuungpaatp yø'ø tsa jaduhñ.

Ja'a Dios ja'a Jesucristo jaduhñ yajmäbaat nebiä tsa ja'a jaanč tehñ tiuungpaatpän, coo jaduhñ yaa quiejxy hädaa yaabä naaxwiin, coo hajxy hoy xyajñhwáatsäm. Jaduhñä Dios miänäängumbä cooc tsipcøxp yajtøjiada'añ coo hajxy jim yajnøcxa'añii tsajpootyp maa Dioswiinduumän, pønjaty jaduhñ mabøjp coo Jesucristo hajxy xyajñhwáatsäm, ca'a wyiinghänä'cä. Coo Jesucristo hajxy tøø xjiaanč yajñhwáatsäm, jaduhñä Dios hajxy tøø xyajñhdíjjäm coo Jesucristo hajxy nmøødhíjtämät tu'ugmädia'agy. Tehngajnä Diosmädia'agy hajxy tsøc hoy jaac tehñ quiudiúunäm. Tsøgä Dios hajxy hoy jaac tehñ wyiingudsähgøoyyäm. Jaduhñä Dios hajxy xquiúääyyämät.

⁷ Coo mijts jaduhñ mmäbøcy coo Jesucristo hajxy hoy xyajñhwáatsäm, paadiä Jesucristo hajxy mdsocy, paady hajxy mwiingudsähgø'øy. Hoorä, jaduhñ jim myíingumbä cujaay maa Diosmädia'aguiän:

Jii tsa tu'ug, cabä tøjmuu'tspädøjc-hajxy hijty hoy yhixy;

cab hajxy hijty yajtuna'añ.

Pero ja'a cudøjc, yajxon yø'ø tsa yhixy, paady jim yajpádaacä maa tøjteecän.

⁸ Jaduhñ wiingtuum myíingumbä:

Jii tsa tu'ug, coo pøn quiuhnepy, cädaab hajxy jaduhñ.

Ja'a Jesucristo jaduhñ yajmäbaatä neby yø'ø tsaajän.

⁹ Højtsä Dios tøø xyajñhdíjjäm coo miädia'agy hajxy nmäbøjcämät, coo hajxy xquiú'ughájtämät. Xyhuunghájtäm hajxy jaduhñ coo hajxy ween hoy njäya'ayhájtämät neby je'e hoy jiäya'ayhatiän. Tøø cuhdujt hajxy xmióoyyäm coo hajxy nDeedyhájtämät nebiä Jesucristo ja'a Dios Tieedyhatiän. Tøø Dios hajxy xyajpádsøømäm haxøøgtuum. Hodium hajxy hoy xpiädaactägájtäm. Jaduhñä miädia'agy hajxy nyajwá'xämät coo

møjmayhajt tøø tiuñ maa højtscøxphájtäm. ¹⁰ Coo mijts hijty mga'a mábøcy, paadiä Dios hajxy hijty xquia'a cu'ughaty. Cabä Dios hajxy hijty xñäxuučh. Pero coo hajxy jaduhñ mmábøjnä, paadiä Dios hajxy jaduhñ xñäxuu'tsnä. Paady hajxy xqui'u'ughajnä.

¹¹ Mägu'ughajpædøjc, hoy hajxy yaa nja hjítäm hädaa yaabä naaxwiin, cabä njoot hajxy yaa tøø nbädáacäm maa hädaa yaabä naaxwiimbän. Jimä njoot hajxy tøø nbädáacäm maa Dioswiinduumän. Tsøcxä haxøøgwiinmahñdy hajxy høxhíxäm, jaduhñä Dios miädia'agy hajxy hoy ngudiúunämät. ¹² Hoy hajxy mja hity maa jäya'ayä Diosmädia'agy hajxy quia'a mábøquiän, hoy hajxy mwädítät. Hoy hajxy jaduhñ mjäya'ayhádät, hoyyä jäya'ay hajxy cu xjia nähøønø'øw. Coo Dios yaa quiädá'agät tøyhajtyajeyjpä, mänit mijtsä jäya'ay hänajty xyhixa'añ coo mijtsä Dios miädia'agy hänajty hoy tøø mjaančh cudiuunä, ja'a Diosmädia'agy hajxy hänajty tøø quia'a mábøquiäbä. Mänitä Dios hajxy wyiingudsähgø'øwa'añ.

¹³ Mwiingudsähgøøyyäbä tuungmøødpä miädia'agy hajxy. Cabä pøn jaduhñ waamb xñänómät. Hix, mbanøcxypä Diosmädia'agy hajxy jaduhñ. Y coo ja'a tuungmøødpä miädia'agy hajxy mga'a wiingudsähgøøyyät, mäna'anaambä jäya'ayhajxy jaduhñ coogä mädia'agy quia'a hoyyä, ja'a mijts jaduhñ mbanøcxypä. Mwiingudsähgøøyyäbä gobiernä miädia'agy hajxypä. Jaaya'ay mõjtuung jaduhñ nä'ägä møød. ¹⁴ Mwiingudsähgøøyyäbä gobiernä mioonsä miädia'agy hajxypä, ja'a hajxy jaduhñ mõjtuungmøødpä. Pønjaty jaduhñ cädiehby, je'e hajxy jaduhñ yajcumädooby. Pønjaty hoy jäya'ayhajp, je'e hajxy jaduhñ quiumaaby. ¹⁵ Jaduhñä Dios chocy coo hajxy hoy mjäya'ayhádät. Jii jäya'ayhajxy näje'e, cabä Diosmädia'agy hajxy ñä'ägädä wiinjuø'øwa'añ. Jaančh tehñ quiuhxex hajxy jaduhñ. Hoy hajxy jaduhñ quia'a jagä wiinjuø'øwa'añ, nøm hajxy wyi'i miäna'añ cooc tyijy ja'a Diosmädia'agy quia'a hoyyä. Hoorä, coo mijts tøyhajt mhojiäya'ayhádät, caj mijtsä jäya'ay hoy xñähøønø'øwät, ja'a Diosmädia'agy hajxy ca'a wiinjuø'øwaambä.

¹⁶ Näje'ejä jäya'ayhajxy miäna'añ cooc tyijy cuhdujt hajxy miøødä coo hajxy hoñejpiä jiatcø'øwät, je'eguiøxpä coogä Jesucristo hajxy tøø yajnähwa'ačhii. Pero cab jaduhñ tiøyyä. Cab jaduhñ yhooyä coo hoñejpiä njatcøøyyämät. Pero tsøgä Dios miädia'agy hajxy cudiuunäm nebiaty hajxy xyhanéhmäm. ¹⁷ Mwiingudsähgø'øwäbä jäya'ay hajxy nägøxiä. Mničhoc mnimiee'xøøjäp hajxy pønjetiä Diosmädia'agy mábøjp. Mwiingudsähgø'øwäbä Dios hajxy, jaduhñä gobiernä hajxy mwiingudsähgøøbiät.

¹⁸ Mijtsahajxy moonsähajpä, mmábøjcäbä mwiindsønä miädia'agy hajxy. Mwiingudsähgø'øwäp hajxy jaduhñ, hoy hänajty yhojiäya'ayä quia'a hojiäya'ayä. ¹⁹ Coo mwiindsøn hajxy xchaačhtiúnät nä'ä nägoobä, hoy hajxy hänajty tøø mga'a jagä cädieey, mmee'xtúgäp hajxy jaduhñ. Mnajuøøby hajxy jaduhñ coo Dios hajxy jaduhñ xquiumáyät. ²⁰ Pero pø tøø hajxy hänajty mjaančh cädieey, hahixøøby jaduhñ coo hajxy mgumädówät. Y cabä Dios hajxy jaduhñ xquiumáyät, hoy hajxy cu mja mee'xtuc. Pero pø cab hajxy hänajty tøø mgädieey, coo mwiindsøn hajxy nä'ä nägoobä xyajcumädówät, y coo jaduhñ mmee'xtúgät, mänitä Dios hajxy jaduhñ xquiumáyät. ²¹ Jaduhñä Dios hajxy tøø xyajnähdíjjäm coo häna'c hajxy nä'ä nägoobä xchaačhtiúunämät nebiä Jesucristo chaačhtiunän. Hix, højts jaaya'ay xñähho'túutäm. Y miee'xtujc jaduhñ. Jaduhñä Dios chocy coo Jesucristo hajxy nbahíxämät neby je'e miee'xtujquiän. ²² Cabä Jesucristo mänaa ñä'ägä cädieey. Ni mänaa quia'a høhnda'agy. ²³ Coo haxøøg jia nämäaayyä, cab haxøøg yhadsoodägajch. Coo chaačhtiunä, cab jaduhñ waamb miänaañ coo hänajty yaghawiimbijtagatsa'añ. Ja'a Dios quiø'øjooty je'e ñibiädaacä. Hix, ñajuøøbiä Jesucristo hänajty jaduhñ coo jäya'ayhajxy hänajty nägøxiä yajtøyhajtyega'añii ja'a Diósäm. Jaduhñä Dios hajxy xyhíxäm neby hajxy njäya'ayhájäm. ²⁴ Coo Jesucristo hajxy hoy xñähho'túutäm cruzcøxp, jaduhñä nbojpä ngädieey hajxy xyajnähwáatsäm. Tsøcxä ja'a haxøøgwiinmahñdy hajxy najtshixøøyyäm. Tsøc hajxy jahmiejtstáacäm coo Jesucristo hajxy nmøødhíjtäm tu'ugmädia'agy mänaa yho'oguiän, mänaa jiuyp-iøjtägachän. Paady hajxy njugyhadaänäm homiänaajä nebiä Dios jiuqyhatiän. Coo hajxy jaduhñ ngudiúunämät nebiä Dios hajxy xyhanéhmäm, mänitä Dios hajxy jaduhñ

xquiumayáañäm. ²⁵Jaduhñ mäwiin hajxy hijty njäya'ayháltäm nebiä meeghajxy tiägow-iäditiän jäguemduum. Cabä mädia'agy hajxy hijty nmäbójcäm ja'a Jesucristocøxpä. Pero tøø hajxy nmäbójcänä. Y xcwieendäháltämä Jesucristo hajxy jaduhñ.

3

¹⁻² Mijts to'oxiøjtøjc, mwiingudsähgø'øwäbä mnihyhap hajxy. Coö mnihyhapä miä-dia'agy hajxy hoy mgudiúunät, y coö Jesucristo hajxy mwiingudsähgø'øwät, wehñdä mnihyhapä Diosmädia'agy hajxy miäbøgät, pø cahnä hajxy hñajty miäbøcyñä, hoy hajxy hñajty waamb mga'a jagä nämä'ay coö hajxy ween miäbøcy. ³⁻⁴ Je'e ja'a Dios jaduhñ quiumaaby coö hojioot hajxy mmøødhádät, coö mnihyhap hajxy mee'xxieemy mmägápxät. Je'eds jaduhñ tsoobaatp coö Diosmädia'agy hajxy jaduhñ mgudiúnät hamuumdu'joot. Y cab hajxy jaduhñ mänaa mdu'udägóyyät. Cab hajxy myajcumáyät pø jii howyit hodiucxy hajxy hñajty mmøødä, pø jii oronaamdsøm, pø jii orotaatstø y hajxy hñajty mmøødä, pø hoyyä mguhwaay hajxy howyit hoguiuhxotshaam hñajty mgu'udy. Cabä Dios yø'øduhmbä jiaty møjpäda'agy, ni jaduhñ quia'a jega'añ. ⁵ Ja'a to'oxiøjcä Diosmädia'agy hajxy hijty jegyhajty panøcxpä, wyiingudsähgøøbiä ñihyhap hajxy hijty. Mee'xxieemy hajxy hijty. Miäbøjpiä Diosmädia'agy hajxy hijty coö hajxy hñajty cwieendähada'añii ja'a Diósäm. ⁶ Jaduhñä Sara ja'a ñihyhap jecy wyiingud-sähgøøyy, ja'a Abrahamhajpä. Mee'xxieemy hñajty miägäpxy. Quiumaay ja'a Dios ja'a Sara jaduhñ. Y mijts to'oxiøjtøjc, jaduhñ mijtsä Dios xquiumáabiät coö mijtsä Sara wyiinmahñdy mbahijx mbadúunät. Hoy hajxy mwädítät ja'a Dioscøxpä. Y cabä mhaa mjoot hajxy myagjádät cooc tyijy ja'a mnihyhap hajxy hñajty mmägäpxtägoy.

⁷ Jaaná jaduhñ mijts nmägäp xhanehmbä, mijts ya'adiøjtøjc. Mdsoc mmée'xäbä mdo'oxiøjc hajxy. Mmøødhádäbä hojioot hajxy jaduhñ. Hix, cabä to'oxiøjcä miäjaahajxy miäbaady nebiä ya'adiøjc-hajxy miøcän. Paady hajxy mgüeendähádät. Hix, xmiooby mijtsä Dios ja'a hoyhajtä weenhajt näguipxy møødä mdo'oxiøjc. Hix, näguipxiä Dios hajxy xyajñähwa'açh møødä mdo'oxiøjc-hajxy. Tiuumbiä Dios mayhajt jaduhñ. Pero coö mdo'oxiøjc hajxy mga'a tsoc mga'a mée'xät, xiøøbä Dios hajxy jaduhñ mnä'ä pa'yáaxñät.

⁸ Mägu'ughajpædøjc, jaduhñ hajxy homiänaajä mnä'ägä niçhoc mnä'ägä nimiee'xøøjät nebiä tu'ugmägu'ug nebiä tu'ugpuhya'ayan. Mniñäxuudsøøjæp hajxy jaduhñ hamiñ haxøpy. Mee'xxieemy hajxy mnimiøødcapx mnimiøødmädia'agøøjät. Jaduhñ hajxy mhídät tu'ugmädia'agy nägøxiä. Jaduhñ hajxy hoy mdsäná'awät nägøxiä. ⁹ Coö mijts pøn cøxypænejpiä xtiúnät, cab hajxy myaghawiimbijtägätsät. Y coö hajxy pøn xwyiinwóonät, cab hajxy mhadsøwiimbídät. Mmänuu'xtá'agäbä Dios hajxy jaduhñ coö ween piuhbedyii ja'a tøø xwyiinwóonäbä. Jaduhñ mijtsä Dios tøø xyajñähdiij coö Dios ja'a hoyhajtä weenhajt hajxy xmió'owät.

¹⁰ Pø mdsojpiä mhoyháyow ja'a mhøçhänä'a hajxy, cab hajxy mänaa mhøhñdá'agät.

Cab hajxy mänaa mgäpxtägóyyät.

¹¹ Mnajtshixø'øwäbä mhaxøøgwiiinmahñdy hajxy.

Hoy hajxy mjäya'ayhádät. Cab hajxy mnimiädsip mnimiäma'adøøjät ni mänaa.

¹² Hix, cwieendähajpiä Dios pøn jatiä miädia'agy mäbójcäp.

Y coö Dios hajxy miänuu'xta'agy, mänit hajxy piuhbedyii.

Pero ja'a häna'c-hajxy haxøøg wädijpä, cab hajxy ñäxuuçhii ja'a Diósäm, nømä Diosmädia'agy miäna'añ.

¹³ Hoorä, coö hajxy hamuumdu'joot mhojiäya'ayhádät, cab hajxy jaduhñ pøn cøxypænejpiä xtiúnät. ¹⁴ Jii jäya'ayhajxy näje'e, mijts xjia wi'i chaächtiunaamb, hoy mijts mja hojiäya'ayhaty. Pero ca'a hajxy mdsähgø'øy; ca'a hajxy tii mdajy mmay. Ja'a Dios hajxy jaduhñ xcwieendähadaamb. ¹⁵ Hamuumdu'jootä Jesucristo hajxy mwiingud-sähgø'øwät. Hix, jaaya'ay hajxy nWiindsønäháltäm. Y coö hajxy pøn xmiäyajtówät tiigu-iøxpä Diosmädia'agy hajxy hñajty coö mmäbøcy, cab hajxy mdsähgø'øwät; mnägäpæp hajxy jaduhñ tiigu-iøxpä hajxy coö mmäbøcy. Mee'xxieemy hajxy jaduhñ mhadsówät, ca'a yhajootma'adä. ¹⁶ Nägüeentä hajxy tehngajnä mwädítät, coö hajxy jaduhñ mnä'ä

cädiéeyät. Jaduhñä tøyhajt hajxy mmøødhádät coo hajxy hánajty hoy mwädity. Hoy hajxy mwädítät, hoyyá jáya'ay hajxy xjia náhojy xjia náya'axy coo Jesucristo miädia'agy hajxy hoy myajtuunä. Coo hajxy jaduhñ hoy mjaančh wädítät, mänitá häna'c-hajxy jaduhñ chähdiuna'añ coo mijts hánajty jaduhñ tøø xñänømy.

¹⁷ Hoy jaduhñ coo hajxy hoy mwädítät, hoy hajxy hánajty mja tsaächpøcy. Hix, ja'a Dios hajxy hánajty tøø xyajnáhdijy coo hajxy táhoocjaty mdsaačhpøgät, hoy hajxy hánajty mja howiädity. Pero coo hajxy hánajty haxøøg mjatcø'øy, cab jaduhñ yhooyä; mgumädowáp hajxy jaduhñ. ¹⁸ Hoyyá Jesucristo mänaa quia'a jagä cädieey, tsaächpøjc je'ebä. Coo hajxy hoy xñähho'túutäm, jaduhñä nbojpä ngädieey hajxy xyajnáhwáatsäm. Y jaduhñ hajxy jim xyajnøcxáanäm Dioswiinduum. Tähooquiä hajxy xñähho'túutäm. Ja'a ñi'xä quiopc-hajtiä jaduhñ ho'c. Pero ja'a jiootä yhEspíritu, cab jaduhñ ñä'a ho'cy; jujyñä hánajty jaduhñ yhity. ¹⁹ Ja'a jiäwøhñdyhaamä Jesucristo yhooyy maa ho'ogyjiäya'ayhajxy hánajty tsumy yhitiän. Jimä hawiinjemybiä mädia'agy hajxy hoy yajwiingapxø'øyii coogä Dios ja'a Jesucristo hánajty tøø quiexy mäyajnähwaatspä. ²⁰ Paady hajxy hánajty tsumy yhity je'eguiøxpä coo Diosmädia'agy hajxy jecy quia'a mäbøjcy mänaa Dios jia nägapxiän coo nøøgomdägoy hánajty tiägø'owa'añ, mänaa Noé ja'a biarco hánajty yhädiuñän. Cabä Dios mänitiä yajtägøøyy tuubä. Jia hahijx jecy pø mäbøgáanäxäbä miädia'agy hánajty. Coo jaduhñ yhijxy coo hajxy hánajty nämay quia'a mäbøga'añ, mänitáts yajtägøøñä tuubä. Mänitá nøøgomdägoy tiägøøñä. Jagooyyä Dios yhijxy coo Noéhajxyhajtiä hánajty miäbøga'añ, ja'a hajxy hánajty näductújiäbä. Jagooyyä Noéhajxy jaduhñ miäbøjcy. Je'eds hajxy jaduhñ jiiby tsooc barcojooty, ja'a hajxy hánajty tøø yhädiuñän. ²¹ Nebiä Noéhajxy jecy chooquiän jiiby barcojooty mänaabä nøøgomdägoy jaduhñ tiägø'øyän, jaduhñ mäwiinäts je'e miäbaady néjjiäm coo hajxy nnäbéjtäm nøøjooty, coo Jesucristo hajxy xyajnáhwáatsäm mänaa jiuyp-iøjtägachän. Paady hajxy jaduhñ nnäbéjtäm nøøjooty, hijxtahnd jaduhñ coo hajxy nnähwáatsäm. Ja'a ngorazonghajxy jaduhñ wáatsäm, ca'a ja'a nni'xä ngopc-hájtäm. Coo hajxy jaduhñ nnäbéjtäm, jaduhñä Dios hajxy hamuumdu'joot nhawáanäm coo Jesucristo miädia'agy hajxy nnä'ägädä panøcxáanäm. ²² Coo Jesucristo hánajty tøø jiuyp-iøjtägach, mänit jim ñøcxy tsajpootyp. Jim yhäñaañä maa Dios quiø'ø hahooyyaampiän. Je'e jaduhñ ñänøømby coo cuhdujt jim miøødä møj jaančh. Hix, wiingudsähgøøyyäbä Jesucristo jim. Ja'a Dios mioonsähajxy, ja'a hajxy jim hijpä tsajpootyp, je'eds hajxy jaduhñ mäwiingudsähgøøby, møødä cuhdujtmøødpähajxy. Høxtä møjcu'ubaadyhajxy yhane'emyii ja'a Jesucristäm.

4

¹ Coo Jesucristo chaächpøjcy, miee'xtujc ja'a tsaächpä jaduhñ. Jaanä jaduhñ mijtspä, coo Jesucristo hajxy mmøødhity tu'ugmädia'agy, paady hajxy jaduhñ mmee'xtújpat, coo hajxy hánajty pøn xyajtsaačhpøcy. Coo hajxy jaduhñ mjaančh tsaächpøjpat nebiä Jesucristo chaächpøjquiän, jaduhñ hajxy myajcähxø'øgät coo mhaxøøgwiiinmahñdy hajxy tøø mhøxhijxnä. ² Coo mhaxøøgwiiinmahñdy hajxy jaduhñ mjaančh høxhixät, hoy hajxy jaduhñ mjäya'ayhada'añ mäduhñtiä hajxy yaa mjaac hida'añ hädaa yaabä naaxwiin. Jaduhñä Dios hajxy xquiumáyät. ³ Jue'e mijts hijty, haxøøg hajxy hijty mjatcø'øy nebiä häna'c-hajxy jiatcø'øyän, ja'a Diosmädia'agy hajxy ca'a mäbøjpä. Cab jaduhñ yhahixø'øy coo hajxy jaduhñ mjatcø'øyän. Hanaxiä hajxy hijty haxøøg mjatcø'øy. Hanaxiä jocnøø hajxy hijty mjaančh tehñ yhu'ugy mjaančh tehñ jiøø'xy coo xøødsuu hijty maa jiadyii. Tsähdiuhndägoy hajxy hijty mjatcø'øy, ya'adiøjc møødä to'oxiøjc. Jáya'ayhadsejtsnaxy hajxy hijty naxy mwiingudsähgøøby møødä jáya'ayhabetnsaxy. ⁴ Y ja'a jáya'ayä Diosmädia'agy hajxy ca'a mäbøjpa, ja'a mijts hijty naxy mmägu'ughajpiä, yagjuøøby hajxy jaduhñ coo mijtsä mhaxøøgwiiinmahñdy mga'a yaghanajxnä neby hajxy hijty myaghanaxiän. Paadiä mmägu'ughajpä hajxy jäda'ahaty xñähojnä. ⁵ Pero coo Dios jaduhñ yajnähdiät coo hánajty tøø yhabaatnä, mänit hajxy hánajty tiøy-hajtyega'añ maa Dioswiinduumän. Mänitá hajxy yajcumädowa'añii ja'a Diósäm, hoy

hajxy hānajtj jia jujyquiiā, hoy hajxy hānajtj tøø jia ho'ogy. ⁶ Hix, jaduhñä Dios jioot chocy coo ho'ogyjiäya'ayä miädia'agy hajxy ween miäbójcäxä, paadiä Dios ja'a yHuung Jesucristo jim quiejxy maa ho'ogyjiäya'ayhajxy hānajtj tsumy yhitiän. Jimä Jesucristo ja'a Diosmädia'agy hoy yajñähixø'oy coogä Jesucristo miäyajnähwa'aäch. Jadúhñägä ho'ogyjiäya'ayä jiäwøhñdyhajxy homiänaajä jiugyhädät nebiä Dios jiugyhatiän, hoyyā ñi'xä quiopc-hajxy hānajtj tøø jia ho'ogy.

⁷ Habáatnöp jaduhñ coo naaxwiimbä wyiimbidaañnä. Paady hajxy tehngajnä mniya-jcopcø'owøøjät nebiä mjoot hajxy yaa mga'a pädá'agät maa hädaa yaabä naaxwiimbän. Jaduhñä Dios hajxy hoy mba'yá'axät hamuumdu'joot. ⁸ Je'e jaduhñ nä'ägä tsoobaatp coo hajxy hamiñ haxøpy mniçhoc mnimiee'xøøjät. Hix, coo hajxy hamiñ haxøpy nniçhójcämät, mänit hajxy hoy nnimiämée'xämät. Jaduhñ hajxy hoy ndsänáayyämät. ⁹ Coo pøn jim quiuyo'oy quiunaxó'owät maa mjøøn maa ndøjc-hajxiän, hamuumdu'joot hajxy myajtøjtägø'owät. Myajcay myaghú'ugäp hajxy jaduhñ hahoy haween. ¹⁰ Cøjwiinduumä Dios wiinmahñdy hajxy xmióoyyäm coo tuung hajxy wiingjaty nmøød-hájtäm. Jaduhñä jäya'ayhajxy nägøxiä piuhbedøøjät, ja'a hajxy hānajtj tøø miäbóquiäbä ja'a Jesucristocøxpä. Jaduhñ hajxy mnibiuhbedøøjät nebiatiä Dios tuung hajxy cøjwiinduum tøø xmio'oyän. ¹¹ Pønjatj tøø tiuungmo'oyii coo Diosmädia'agy hajxy yajwá'xät, hoy hajxy quiapx miädiá'agät nebiä Dios quiapxy miädia'aguiän. Pønjatj tøø tiuungmo'oyii coo hajxy miäbuhbédät, ween hajxy jaduhñ hamuumdu'joot miäbuhbety. Ja'a Dios jaduhñ puhbédäp. Coo hajxy hānajtj tijaty mduna'añ, hoy hajxy mdúnät; jaduhñä jäya'ayhajxy miäbógät coo Dios miøjjä jiaançhä. Wyiingudsähgø'owaambiä Dios hajxy jaduhñ je'eguiøxpä coo Jesucristo hajxy hoy xyajñähwáatsäm. Cøjxta'axiøø ja'a Dios wyiingudsähgø'owa'añii. Cøjxta'axiøø møjcuhtdujt miøødhada'añ. Amén.

¹² Mägu'ughajpädøjc, cab hajxy myagjuó'owät coo tsaächpä hajxy naxy xpiaady møc-haampiä. Hix, tsipcøxpä tsaächpä hajxy xñä'ägä paada'añ. ¹³ Jaduhñ quiähxó'ogät pø hamuumdu'jootä Diosmädia'agy hajxy mjaançh mabøcy ja'a Jesucristocøxpä, pø caj. Hix, maas hanaxiä Jesucristo chaächpøjcy mänaa hajxy hoy xñähho'túutäm. Hix, coo Jesucristo hajxy jaduhñ mmøødhity tu'ugmädia'agy, paady hajxy jaduhñ tsipcøxp mbadsaächpøjpät. Y coo Jesucristo hānajtj yaa quiädaactägatsa'añ hädaa yaabä naaxwiin, mänit hajxy hānajtj mjaançh tehñ xioonnda'aga'añ. Paady hajxy jäda'ahaty mxoondáacnät, hoyyā tsaächpä hajxy jaduhñ xjia paady. Pero cabä tsaächpä hajxy jaduhñ myagjuó'owät. ¹⁴ Coo hajxy pøn xñähójät ja'a Jesucristocøxpä, cab hajxy myagjuó'owät. Pero mxoondá'agäp hajxy jaduhñ. Hix, jaduhñä Dios ja'a yhEspírituhaam hajxy xpiuhbédät møødä wyiinmahñdyhaam. Coo mijtsä jäya'ay xyhíxät coo hajxy mmee'xtucy coo hajxy hānajtj mdsaaächpøcy, mänitä Dios hajxy wyiingudsähgø'owa'añ. ¹⁵ Hahixøøby jaduhñ coo hajxy mdsaaächpøgät, pø tøø hajxy hānajtj mmäjäya'ay-yagho'ogy, pø tøø hajxy hānajtj mmämeech, pø tøø hajxy hānajtj myajtägø'oy maa cueendä hajxy hānajtj mga'a møødän. Cab jaduhñ yhooyä coo hajxy jaduhñ mjatcø'owät. ¹⁶ Pero je'e mabøcypä caj chähdiuhñdmøødä coo hajxy mdsaaächpøgät je'eguiøxpä coo Jesucristo hajxy hānajtj mwiingudsähgø'oy. Jootcuyc hajxy jaduhñ mhídät. Mnämä'awäbä Dios hajxy “Dioscujú'uyäp” ja'a Jesucristocøxpä.

¹⁷ Tøø yhabaatnä coo Dios hajxy xyajtøyhajtyegáañäm. Coo Diosmädia'agy hajxy nmäbójcäm, paady hajxy jayøjp xyajtøyhajtyegáañäm, paady hajxy jayøjp xyajtsaaçhpøjcäm. Pero ja'a häna'cä Diosmädia'agy hajxy ca'a mabøjpä, coo hajxy hānajtj tiøyhajtyega'añ, maas hanaxiä hajxy hānajtj chaächpøga'añ. ¹⁸ Siémprämä hojiäya'ayhajxy chaächpøga'añ. Maas hanaxiä ca'awiindøyhäna'c-hajxy chaächpøga'añ, ja'a Dios hajxy ca'a wiingudsähgøøbiä. ¹⁹ Coo hajxy hānajtj pøn xyajtsaaçhpøcy nä'ä nägoobä, cab hajxy mmøjpädá'agät. Tehngajnä hajxy hoy mjaac jäya'ayhädät. Hix, ja'a Dios hajxy hānajtj tøø xyajmädsocy coo hajxy mdsaaächpøgät.

5

¹ Mijts majjäya'adiøjc-hajxy, ja'a hajxy jim tuumbä tsajtøgooty, mijts cham nmä-

gapx nhande'emaamby. Nmóødhøchä cuhdujt jaduñ cooçh mijts jaduñ nmägapx nhande'emät, je'eguiøxpä cooçh tøø nmäjaabä, møød cooçh jim nduumbä tsajtoogoty. Nhijxhó'c-høchä Jesucristo jim cruzcøxp. Y coo Jesucristo yaa quiädaactägätsät hädaa yaabä naaxwiin, näguipxy hajxy hänäjty jim xyajnøcxäänäm tsajtootyp, høøch møød mijts. Jimä hoyhajtä weenhajt hajxy xmio'owäänäm pedyii. ² Mijts majjäya'adiøjc, hoyyä Diosmädia'agy hajxy myajnähið'øwät hamuumdu'joot, ca'a yhadsip ca'a yha-jootma'adä. Hamuumdu'jootä cu'ug hajxy mmägapx mhande'emät. Hix, ja'a Dios hajxy tøø xpiäda'agy coo cu'ug hajxy jaduñ myajnähið'øwät, møød coo hajxy mmägapx mhande'emät. Cab hajxy xädø'øñguiøxpä myajnähið'øwät. ³ Cab hajxy møc møc mhande'emät. Mee'xxieemy hajxy myajnähið'øwät. Hoyyä Diosmädia'agy hajxy myajtúnät; jaduñä cu'ug hajxy xpiahix xpiadúnät. ⁴ Y coo Jesucristo yaa quiädaactägätsät, ja'a hajxy nWiindsønhtëmbä, mänit hajxy xquiumaya'añ pø tøø hajxy hänäjty hoy myajnähið'øy. Mänit hajxy hänäjty jim xyajnøcxa'añ tsajtootyp. Cøjxta'axiøø hajxy hänäjty jim mhida'añ.

⁵ Møød mijts muutsc-häna'c, jaduñ mijtspä, mwiingudsähgø'øwäbä majjäya'ay hajxy. Coø hajxy waamb xmiägäp xyhané'emät, mgudiúnäp hajxy jaduñ. Hahoy haween hajxy mnibihbedøøjtät hamiñ haxøpy, hoy miøjjä hoy miuutscä. Hix, coø hajxy jootmøj mnibiäda'agøøjtät, xyajcumädówäbä Dios hajxy jaduñ. Pønjaty capxp mädiaacp mee'xxieemy, je'edsä Dios piuhbejpy. Móoyyäbä hoyhajtä weenhajt hajxy jaduñ. ⁶ Coø Dios hajxy jaduñ mänaa xyajtsaaçhpøgät, cab hajxy mmøjpädá'agät. Jim hajxy mnibiäda'agøøjtät maa Dios quiø'øba'c tiēcypia'cän. Møcmäjaa Dios jiaançh tehñ miøød. Hix, cujequiä Dios ja'a tsaachpä hajxy xyajnähwá'adsät. Mänit hajxy jootcuyc xjiaançh tehñ yaghida'añ. ⁷ Coø hajxy hänäjty tii mnädajy mnämäy, mmänuu'xtá'agäbä Dios hajxy jaduñ coø hajxy ween xyaghoyøøyyä. Hix, homiänaajä Dios hajxy xcwieendähaty.

⁸ Mniyajcopcø'øwøøjöp hajxy; jaduñä Jesucristo miädia'agy hajxy hoy mbanøcxät tehngajnä. Jaduñä møjcu'ugongä wyiinmahñdy quia'a mäjäda'agät. Hix, ja'a møjcu'ugong, homiänaajä hajxy jaduñ xmiädsiphajtäm. Xjia wi'i yajtu'udägoyyäänäm hajxy jaduñ. ⁹ Cabä møjcu'ugongä miädia'agy hajxy mmäbøjcät. Hamuumdu'jootä Diosmädia'agy hajxy myajtúnät tehngajnä. Hix, pønjataiä Diosmädia'agy mäbøjp wiinduhmyhagajpt, jaduñ hajxy chaaçhpøjpä nej mijts mdsaaçhpøquiän. ¹⁰ Cab hajxy jejcy mdsaaçhpøga'añ. Coø Dios ja'a tsaachpä hajxy hänäjty tøø xyajnähwä'açh, mänitä Dios hajxy hamuumdu'joot xyajmäbøgaannä ja'a Jesucristo miädia'agy. Ca'xy pedyii Dios ja'a wyiinmahñdy hajxy xyajnähið'øwa'añ. Ja'a Diøsäts hajxy jaduñ xcwieendähajtäm, hoy hajxy nej cu nja jajt cu nja habéjtäm. Tiuumbiä Dios mayhajt jaduñ maa højtscøxphajtäm. Jaaya'ay hajxy jaduñ tøø xyajnähdijjäm coø Jesucristo hajxy jim xyajnøcxäänäm tsajtootyp. Cøjxta'axiøø hajxy jim nhidäänäm. Hix, cøxiä Dios ja'a hoyhajtä weenhajt hajxy jaduñ xmiøoyyäm. ¹¹ Cøjxta'axiøø ja'a Dios hajxy tsøc wiingudsähgøøyyäm. Cøjxta'axiøø ja'a Dios møjcu'uhdujt miøødhada'añ. Tøyhajt jaduñ.

¹² Ja'a mägu'ughajpä Silvano hädaa nocy jahby. Høøch nnajtscapxøøyyäp. Cab hädaa nocy jiaty yoñä. Hoyyä Silvano Diosmädia'agy jiaançh tehñ yajtuñ. Tøyhajtthøch cham tøø ngapxy tøø nmädia'agy nebiä Dios tøyhajt wyiinmayyän. Tøø Dios møjmayhajt tiuñ maa højtscøxphajtäm. Tøø hajxy jaduñ xyajmädsøjcäm coø hajxy jim xmiøødhijtämät tsajtootyp.

¹³ Ja'a jäya'ayhajxy yaa tsänaabiä Babilonia, ja'a Diosmädia'agy hajxy mäbøjpä ja'a Jesucristocøxpä, xyajpoo'xp mijts jaduñ. Nej mijtsä Dios xyajnähdijjiän coø miädia'agy hajxy mmäbøjcät, jaanä jaduñä jäya'ayhajxy yaabä yajnähdijjäbä coø hajxy miäbøjpät. Jaduñ mijtsä mmägu'ughajpä Marcos xyajpoo'xpä. Nébiøchä nhamdsoo húungänä Marcos njuøpy. ¹⁴ Coø hajxy hänäjty mhamugø'øy Dioswiingudsähgøøbiä, hamiñ haxøpy hajxy mniyajpoo'xøøjtät. Jaduñ hajxy myajcähxø'øgät coø hajxy tøyhajt mniçhocy mnibia'häyoyii hamuumdu'joot.

Pønjataiä Diosmädia'agy panøcxp ja'a Jesucristocøxpä, weenä hoyhajtä weenhajt hajxy mio'oyii ja'a Diøsam. Amén.

2 Pedro

¹ Høøch xøhajt Simón Pedro. Høøch hädaa nocy njahby. Ja'a Jesucristøch nmøødtuumby. Jaayá'ayhøch tøø xwiinguexy coochä miädia'agy nyajwá'xät. Tøø mijtsä Jesucristo xyajnähdijy coo hajxy hoy mmäbögät jaduñ mäwiin neby højts xyajnähdijjään. Tu'cuhtujt hajxy jaduñ xquiumáayyäm nägøxiä je'eguiøxpä coo hajxy tu'cuhtujt nmäbøjcäm coo tiøyyä. Jaduñ yajnajuø'øy coo Jesucristo yhojiäya'ayä. Jaaya'ay hajxy nDioshajtäm. Tøø hajxy xpiädäacäm hawa'adstuum. ² Ween mijtsä Dios ja'a hoyhajtä weenhajt xmio'oy mõj may coo ja'a tøyhajt hajxy nmøødä ja'a Dioscøxpä møødä Jesucristocøxpä, ja'a hajxy nWiindsøn'hajtämbä.

³ Coo ja'a tøyhajt hajxy nmøødhajtäm ja'a Jesucristocøxpä, paadiä Dios hajxy madiu'u xpiuhbéjtäm ja'a miäjaahaam, jaduñ hajxy hoy njäya'ayhajtämät. Mänitä Dios hajxy jaduñ xquiumáayyämät. Jaanä miäjaahaamä Dios hajxy xyagjyhadäänäm homiänaajä neby je'e jjugyhatiän. Coo Jesucristo miøjjä jiaančhä, coo jiaanč tehñ yhojiäya'ayä, paady hajxy tøø xyajnähdijjäm coo hajxy hoy njäya'ayhajtämbät. ⁴ Coo Jesucristo jaduñ miøjjä jiaančhä, paadiä mayhajt mõj may tiuna'añ maa højtscøxphajtäm. Jaduñ jim myiñ cujaay maa Diosmädia'aguiän coogä Dios mayhajt may tiuna'añ maa højtscøxphajtäm. Homiänaajä hajxy xyagjyhadäänäm neby je'e jjugyhatiän. Y tøø hojiotä howyiinmahñdy hajxy xmióoyyäm hawiinjemybiä. Jaduñ hajxy hoy nmøødhajtämät tu'ugmädia'agy. Jaduñä haxøøgpä hajxy yaa hoy njøjyohdiúutämät hädaa yaabä naaxwiin. Ja'a häna'c-hajxy yaa ca'a mäbøjpä, hadsojwiinmahñdy hajxy miøød. Coo yhaxøøgwiinmahñdy hajxy jaduñ quia'a najtshixø'øwa'añ, paady hajxy jiiby quia'awa'añ haxøøgtuum. ⁵⁻⁷ Paadiä Diosmädia'agy hajxy tsøc mäbøjcäm. Tsøc hajxy hojiäya'ayhajtäm hamuumdu'joot. Tsøc hajxy jaac habøjcäm ja'a Dioscøxpä. Tsøc hajxy hjjtäm najuø'øyaamby. Tsøc hajxy mee'xtújcäm. Tsøgä Dios hajxy wiingudsähgøoyyäm. Tsøc hajxy ničhøjcäm nebiä tu'ugpuhya'ayän, neby højtsä Jesucristo xchøjcäm. Tsøgä jäya'ay hajxy nägøxiä tsojc méé'xäm, hoy hajxy näje'e quia'a jagä mäböcy.

⁸ Coo hajxy jaduñ hamuumdu'joot ngudiúunämät nébiøch naamnä tøø nmädia'agy, mänit hajxy nhoyøoyyämät. Mänitä Jesucristo tiuung hoy ndúunämät. Nmøødhajtämä tøyhajt hajxy jaduñ ja'a Jesucristocøxpä. ⁹ Hix, pønjaty jaduñ ca'a cudiuumb nébiøch naamnä tøø nmädia'agy, jaduñ mäwínäts hajxy je'e nebiä wiinds nebiä xoodspän je'eguiøxpä coo hajxy tøø jahdiägoy coo piojpä quiädieey hajxy tøø ñähwa'ačhii neby hajxy hijty jegyhajty jäya'ayhatiän. Jaduñ hajxy tøø jahdiägoobiä coo Dios jioot chocy coo hajxy hoy jäya'ayhädät. Paady hajxy jaduñ jia yajnähwaatsä. ¹⁰ Hoorä, mägu'ughajpädøjc, tsøc hajxy hamuumdu'joot cudiúunäm nébiøch naamnä tøø nmädia'agy. Jaduñ yajnajuø'øwa'añ coo Dios hajxy tøø xyajnähdijjäm coo hajxy xquiu'ughadäänäm. Coo hajxy jaduñ ngudiúunämät, cab hajxy jaduñ mänaa ndu'udägóoyyämät. ¹¹ Jaduñ hajxy hoy yajxon nnócxämät Jesucristo wyiinduum maa cøjxta'axiøø yhane'emiän. Jaaya'ay hajxy nWiindsøn'hajtäm. Tøø hajxy jaduñ xyajnähwáatsäm.

¹² Homiänájäts mijts jaduñ nyagjahmiejtsta'aga'añ nébiøch naamnä tøø nmädia'aguiän. Tøyhajtthøch jaduñ tøø nmädia'agy. Hoy hajxy jaduñ mjaty. Cab hajxy mdsoj jahdiägoyya'añ. ¹³ Hawiinmats jaduñ cooch mijts jaduñ nyagjahmiejtstá'agät tehngajnä, mäduhñtiøch njaac jugyhaty. ¹⁴ Hamdsóojøchä Jesucristo xñämaayy cóogøch mobädajpä nho'ogaannä, ja'a hajxy nWiindsøn'hajtämbä. ¹⁵ Pero cooch hånajty tøø nho'ogy, hoy hajxy jaduñ mjaac capxtá'agät nébiøch cham nmädia'aguiän. Jaduñ hajxy hoy mjahmiejtstá'agät.

¹⁶ Tøø højts mijts nyajwiingapxø'øy coo Jesucristo møcmäjaa miøødä, y coo yaa jadähooc quiädaactägatsa'añ hädaa yaabä naaxwiin. Tøyhajt højts jaduñ nmädiaacy. Cab højts hamdsoo nyajcojy. Diosmädia'agy hädaa jaduñ. Ca'a ñä'a cueentä nebiä

jäya'ay cueentä hajxy yajcojjiän. Hamdsoo hõjtsä Jesucristo nhijxy coo mœcmäjaa miøødä, coo je'e Dyiosä. ¹⁷⁻¹⁸ Mänaa hõjtsä Jesucristo hänajty jim nmøødän maa tunän, mänitä Diosteedy jim quiuhgapxnajxy tsajpootyp: “Høøch nhamdsoo Huung yø'ø. Njaanč tehñ chõjpiøch yø'ø. Jaanč tehñ jiootcújc-høch nnijwiø'øwyii maach nHuungcøxpän”, nœmä Jesucristo ñänøœmä. Njaanč mädoow hõjts jaduhñ. Mœcmä-jaahaamä Dios jaduhñ quiapxy. Jaanč tehñ yajxonä Jesucristo piädaacä ja'a Tiéediäm, nebiä hajajpän. Paady hõjts yø'ø tun nyajxøøbejty: “Ja'a tun maa Dios ñägapxiän coogä Jesucristo yHuunghaty.”

¹⁹ Tøyhajt jaduhñ jiaanč jajty nébiøch cham nmädia'aguiän. Hamdsoo hõjts nhijxy nmädooyy. Hahixøøby jaduhñ coo hõjts mijts nmädia'agy xmiäbõjcat. Maas hahixøøby jaduhñ coo Diosmädia'agy hajxy mmäbõjpat, ja'a jäya'ayhajxy jecy quiujähyyäbä. Jaduhñ mäwiinädsä Diosmädia'agy miäbaady nebiä jøøn tioyyän hagoodstuum. Hix, xyajwiinjuøøyyäm hajxy jaduhñ tijaty hajxy hoy hamdsoo nga'a wiinjuø'owäänäm. Hahixøøby jaduhñ coo hajxy homiänaajä nyajcopcøøyyämät. Coe Jesucristo yaa quiädaactägätsät hädaa yaabä naaxwiin, mänit hajxy cøxiä xyajwiinmädiaagø'owäänäm. Jaduhñ hajxy hoy nwiinjuø'owäänäm cøxiä. ²⁰⁻²¹ Huuc wiinjuø'ow hajxy jaduhñ, coo jäya'ayä Diosmädia'agy hajxy jecy quiujahy, cab hajxy hamdsoo yajcojy. Näje'e hajxy jaduhñ quiujahy tijaty hänajty jadäänäp tunäänäp. Ja'a Dios je'e najtscapxøøyy ja'a yhEspirituhaam waamb hajxy quiujäyät.

2

¹ Jii jäya'ayhajxy hijty näje'e jegyhajty miäna'añ cooc tyijy Dios hajxy hänajty ñajtscapxøøyyäbä. Pero hõhndaacp hajxy hänajty jaduhñ. Ja'a Dioscu'ug hajxy hänajty jia wi'i wyiinhøønaamby. Jaanä jaduhñä hõhndaacpähajxy jiiiby wiäditaambä maa mgajpthajxiän. Cabä cu'ug ñajuø'owa'añ pø wiinhõhñäp hajxy hänajty jaduhñ. Høxtä mäna'anaambä hõhndaacpähajxy jaduhñ cooc tyijy ja'a Jesucristo hajxy tøø xquia'a nähho'túutäm. Paquiä hajxy yajcumädowa'añii. Pønjetiä hõhnda'agymiädia'agy mäbøgaamb, tu'udägoyyaamb hajxy jaduhñ. Ja'a häna'c-hajxy jaduhñ hõhndaacpä, niyhamigähadäänäp hajxy jaduhñ. ² Pahixäänäp hajxy jaduhñ nämay. Ja'a häna'c-hajxy mäbahixaamb, ja'a tyijy ja'a Diosmädia'agy hajxy mäbõjpa. Coe hajxy jaduhñ hoy quia'a hida'añ, ni häna'c-hajxy hõhndaacpä, ni häna'c-hajxy mäbahijxpä, paadiä cu'ugä tøyhajt hajxy quia'a tsoga'añ ja'a Jesucristocøxpä. ³ Ja'a hõhndaacpähajxy, xädø'øñ hajxy piøcjuø'owaamby. Hõhnda'agymiädia'agyhaamby mijts xyajnahixø'owa'añ; jaduhñä xädø'øñ hajxy xjia wi'i piøgaanä. Jéquiänä Dios tiägøøyy mänaandaacpä coogä häna'c-hajxy quiumädowa'añ, ja'a hõhnda'agymiädia'agy hajxy yajnahixøøbiä. Jaduhñä Dios jecy miänaandaacpä cooc hajxy quiuhdägoyya'añ.

⁴ Hix, yajcumädoobiä Dios je'e pønjaty ca'a mäbøgaamb. Coe mioonsähajxy näje'e jim jecy quia'a mäbøjcy tsajpootyp, paady hajxy jecy quiumädooyy. Haxøøgtuum hajxy hoy quiuhjuijpnaxyii maa jiaanč tehñ quiøøcän, maa yhagoodstuumän. Jim hajxy yhida'añ høxtä coonä yhabaadät coo Dios jaduhñ miänä'anät nebiaty hajxy jii jiaac tsaächtiuna'añii. ⁵ Jaanä jaduhñä Dios ja'a jecyjiäya'ay yajcumädoobä, ja'a hajxy jecy tøø quia'a mäbøquiäbä. Mänitä Dios nøøgomdägoy quiejxy. Jayooyyä Noéhajxy choocy møødä yhuung møødä tio'oxy ja'a näductujcpä. Jaduhñä Noé ja'a cu'ug hänajty tøø jia yajwiingapxø'oy coogä yhaxøøgcuhdujt hajxy ñajtshixø'owät, coogä Dios hajxy wyiingudsähgø'owät. ⁶ Jaanä jaduhñä jecyjiäya'ayhajxy jiajpa, ja'a hajxy hijty jim tsänaabiä maa cajpt hijty jaduhñ xiøhatiän Sodoma møødä Gomorra. Cabä Dios hajxy hijty ñä'ägä wiingudsähgø'oy. Paady hajxy jøønhaam yajcuhdägooyyä. Cøjxä haxøøghäna'c-hajxy yho'ogy. Haagä cujiaam hajxy jiajnä møødä quiajpthajxy. Hijxtahñd ja'a Dios jaduhñ piädaac coo haxøøgjäya'ayhajxy nägøxiä yajcumädowa'añii. ⁷⁻⁸ Mänaa Dios ja'a jecyquijajpt jaduhñ yajcuhdägoyyän, jagooyyä tu'jäya'ay yajtsoocä, ja'a hänajty xøhajpa Lot. Paadiä Lot yajtsoocä, je'leguøxpä coo hänajty hoy jiäya'ayhaty. Mänitä Dios ja'a Lot yhawaanä coogä quiajpt hänajty quiuhdägoyya'añ. Paadiä Lot

jim chohñ. Jaančh tehñ jiootmayhajpä Lot hänajty jaduhñ coo cu'ughajxy hänajty haxøøg jiatcø'øy jabom-jabom hijxwiinduum. ⁹ Nebiä Dios ja'a Lot jecy yajtsooquiän, jaanä jaduhñä Dios ja'a quiu'ug yajtso'ogaambä coo hajxy hänajty chaačhpøcy. Tøyhajt jaduhñ. Jaanä jaduhñ tiøyhájtäbä coo Dios yajcopcø'øy nebiatiä haxøøgjäya'ayhajxy jiatcø'øyän. Jéquiänä Dios jaduhñ miänaañ cooc hajxy quiumädowa'añ. Coo jaduhñ yhabáadät, mäniä Dios miäna'ana'añ nebiaty hajxy jii chaačhtiuna'añii. ¹⁰ Nägø'ø nädequiä Dios yajcumädowa'añ pøn yajnähixøøby hønnda'agymiädia'agyhaam, pønä Diosmäjaa xøøghajp. Jaančh tehñ chähdiuhñdägoy hajxy ñibiäda'agyii, ja'a hønnda'agymiädia'agy hajxy mäwädijpä. Jootmøj hajxy jaduhñ ñibiäda'agyii. Cab hajxy pøn wyiingudsähgø'øy. Haa jaaya'ayhajxy mõjtuungmøødpä maa Diosmädia'agy myññänä, wiingapxéjtäp hajxy je'ebä. ¹¹ Haa ja'a Diosmoonsähajxy jim hijpä tsajpootypä, maas mõcmäjaa hajxy miøødä quejee ja'a hønnda'agymiädia'agy hajxy mäwädijpä. Pero cabä Diosmoonsä ja'a mõjtuungmøødpä hajxy wyiingapxepety maa Dioswiinduumän; ni cab hajxy ñähojy.

¹² Jaduhñä hønndaacpähajxy ñibiäda'agyii nebiä yuughanimalän coo hajxy tii quia'a wiinjuø'owa'añ ja'a Dioscøxpä. Hix, cabä yuughanimalhajxy tii wyiinjuø'øy ja'a Dioscøxpä. Mädyijjatiä hønndaacpähajxy quia'a wiinjuøøby, je'e hajxy ñäxiicypy. Paquiä hajxy yajcuhdägoyya'añii nebiä animalhajxy paquiä quiuhdägoyyän coo hajxy yagho'ogyii. ¹³ Tsaächtiunáanäbä hønndaacpähajxy jaduhñ je'eguiøxpä coo hajxy hänajty tøø miädsaačhtiunñ. Xoonndaacp hajxy jaduhñ coo hajxy cøxypänejpiä jiatcø'øy xøømbaady. Høxtä jiiby hajxy yajtägø'øy maa mijts naxy mgaamiuquiän ja'a Jesucristocøxpä. Ja'a Jesucristo miädiä'aguiäc tyijy hajxy pianøcxäp. Pero haxøøgjaty hajxy wyi'i jiatcø'øy mijts mwiinduum maa hajxy hänajty mgaamiuquiän. Høxtä jiiybypiaady hajxy je'e yhønndaacpä.

¹⁴ Homiädyii to'oxiøjcä hajxy jaduhñ yhixy, yhadsojpy hajxy jaduhñ. Homiänaaja hajxy jaduhñ haxøøg jiatcø'owa'añ. Wyiinhøhmby hajxy pønjatiä Diosmädia'agy hoy ca'a habøjpnä. Hadsojwiinmahñdy hajxy ñä'ägä yajtuumbä. Tsipcøxp hajxy jaduhñ ñä'ägä cumädowa'añ. ¹⁵ Tøø tødiu'u hajxy jiojwa'ačh. Tøø hajxy jaduhñ tiu'udägoy. Ja'a Balaam hajxy jaduhñ piahijxyp, ja'a Beor yhuung. Jeguiajtiä Balaam hänajty quiudiuna'añ ja'a quia'awiindøguiøxpä møødä xädø'øñguiøxpä. ¹⁶ Mäniä Balaam wyiinhojnaxä tiic jaduhñ coo jiatcø'owa'añ. Ja'a mõjc burra jaduhñ mähoj. Jaduhñ quiapxy nebiä jäya'ayän. Mäniä Balaam ñajuøøñä coo jaduhñ quia'a hoyyä. Jaduhñä burra miädia'agy miäbøjcäxä.

¹⁷ Yø'ø häna'cä hønnda'agymiädia'agy hajxy mäwädijpä, jaduhñ mäwiin hajxy miäbaady nebiä nõøjut tøø tiø'øčhpän. Jaduhñ mäwiin hajxy miäbaatpä nebiä joc pi-ojwäditypän coo hänajty quia'a nä'ägä tu'uy. Hix, cabä tøyhajt hajxy ñä'ä yajnähixø'øy. Cøjxta'axiøø hajxy jiiby yhida'añ maa haxøøgtuumän. Ja'a Dios jaduhñ mänaañ cooc hajxy jiiby yhida'añ. ¹⁸ Yoñ hajxy jia mädia'agy. Ja wi'i yajcumayaamb hajxy jaduhñ. Pero cabä miädia'agy hajxy choobaady. Ja'a hønnda'agymiädia'agyhaam hajxy wyiinhøøñ pønjatiä Diosmädia'agy naamdägø'øy habøjp. Jøjcapxøøyyäp hajxy jaduhmbä, ween hajxy haxøøg jiatcøøguiumbä neby hajxy hijty jiatcø'øyän. ¹⁹ Jaduhñä hønndaacpähajxy yajnähixø'øy cooc tyijy quia'a nejpiä coo haxøøg mjäya'ayhadät. Hix, jaduhñ hajxy yajnähixøøbiä cooc tyijy ja'a Dios hajxy xquia'a hanéhmänä coo jecymiädia'agy hajxy ngudiúunämät, jaduhñ jia mänaambä cooc hajxy hoy njäya'ayhájämät. Jaduhñ hajxy yhønndaacpä cooc tyijy hajxy jaduhyyä nnähwáatsäm. Ni je'e hajxy tøø quia'a nähwa'ačh je'eguiøxpä coo yhaxøøgwiinmahñdy hajxy tøø quia'a najtshixø'øy. Paady hajxy nõcxy quiuhdägoyyaannä. Jaanä jaduhñ højtshájämäbä, coo nhaxøøgwiinmahñdy hajxy nga'a najtshixøøyyämät, jaduhñ højts nõcxy nguhdägoyyaanämbä. ²⁰ Coo Jesucristo hajxy njøjpøgøøyyäm, ja'a hajxy nWiindsøn'hájämäbä, paadiä nhaxøøgwiinmahñdy hajxy xyajnähwáatsäm, neby hajxy yaa nmøødhájäm hädaa yaabä naaxwiin. Pero, coo Jesucristo miädia'agy mähdiägøøyyät, y coo mhaxøøgwiinmahñdy jadähooc mbadu'ubøgät, maas haxøøg jadähooc mjada'añ. ²¹ Hix, pønjatiä Diosmädia'agy jaduhñ jahdiägooby,

maas hoy haxøpy coo hajxy cu quia'a mæbøjcy. Hix, coo hajxy jaduhñ yhøxhíxät, maas hanaxiä hajxy jaduhñ quiumädowa'añ. ²² Jaduhñ hajxy jíádät nebiä hädaa mädia'agy miäna'añän: "Ja'a huc-hajxy, coo hajxy yhøøch, ja'a yhamdsoo høøch hajxy ñäwiimbijpy, nøcxy hajxy jadähooc jíøø'xø'øgy. Jaanä jaduhñä hädsømhajxy jiatcøøbiä, naamnä hajxy hånajty tøø chi'iy, mänit hajxy jadähooc nøcxy yajtsnä tiøø'pnä mo'ondsooty." Tøyhajt jaduhñ.

3

¹⁻² Mägu'ughajpædøjc, miämetsc-hoocpä mijts chamñ nnäjaayø'øy. Jaduhñ mijts chamñ miämetsc-hoocpä nmägapxy nhane'emy coo mädia'agy hajxy mjahmiejtstá'agät, ja'a Diosquexypähajxy jecy quiujáhyyäbä. Jaduhñä howyinnmahñdy hajxy mmøødhädät. Huuc jahmiets hajxy jaduhñbä nebiatiä Jesucristo hajxy xmiägäp xyanéhñäm. Jaaya'ay hajxy tøø xñähho'túutäm, paady hajxy nWiindsøñhájätäm. Ja'a Jesucristo quiugapxyhajxy, je'e mijts tøø xyhawaanä nebiatiä Jesucristo hajxy tøø xmiägäpxy tøø xyhane'emy.

³ Naxy hädaa mädia'agy hajxy mdehñ wyiinjuø'øwät nébiøch chamñ nmädia'aguiän. Coo naaxwiimbä hånajty wyiimbida'añ, mänitä jäya'ayhajxy quiähxø'øga'añ coo Dios hajxy ñänøma'añ. Haxøøg hajxy jiatcø'øwa'añ nebiatiä yhamdsoo joot hajxy hånajty chocy, neby hajxy hånajty ñä'ägä cuhdujthatiän. Xñäxi'igaamb mijts jaduhñ. ⁴ Jaduhñ hajxy miäna'ana'añ: "Cab jaduhñ tiehñ tiøjiada'añ coo Jesucristo wyiimbijtägatsa'añ neby jaduhñ tøø yhuuc mänaambä. Hix, caj tii mänaa tiägach. Je'enä cøxiä wiinä jaduhñ yhityñä mänaa naaxwiimbä jecy yhawijy tiøø'xta'aguiän, mänaa jecyjiäya'ayhajxy yho'oguiän", nømñ hajxy yhøhñda'aga'añ. ⁵ Pero tøyhajt jaduhñ coo naaxwiimbä jiaançh tägach. Pero ja'a høhñdaacpähajxy, cabä tøyhajt hajxy wyiinjuø'øwa'añ. Hix, Haagä nøø hijty jegyhajty. Mänitä Dios ja'a tsajt jecy yhädiuunñ møødá naaxwiin. Jiibiä naaxwiimbä yajcojy nøøjooty. Mänit hoy piäda'agy nøøhagujc. ⁶ Mänitä Dios nøøgomdägoy cujecy quiejxy. Mänitä naaxwiimbä quiuhdägøoyy. Cøjxä jäya'ayhajxy yho'ogy. ⁷ Ja'a tsajt møød hädaa yaabä naaxwiin, tøø Dios jaduhñ yajnähdiy coo quiøxy toya'añ. Mänitac jaduhñ tioya'añ coo Dios ja'a jäya'ay yajcuhdägøoyya'añ, ja'a Diosmädia'agy hajxy ca'a mæbøjpä.

⁸ Mägu'ughajpædøjc, tsøc hajxy jahmiéjtsäm coo Dios tu'xøø jaduhñ ñänømy jadu'miljomøjtpä; y jadu'miljomøjtpä, tu'xøøyyä jaduhñ ñänømy. ⁹ Näje'e jäya'ayhajxy miäna'añ cooc tyijy ja'a Jesucristo quia'a tsoj yajtøjiada'añ coo yaa quiädaactägatsa'añ, coo haxøøgjäya'ayhajxy yajcumädowa'añii. Pero cab jaduhñ tiøyyä neby hajxy jaduhñ jia wi'i yhøhñda'agy. Hix, mee'xtujpä Jesucristo ja'a mijtsøxpä. Cabä jioot chocy coo pønñ quiuhdägøoyyät. Jaduhñä jioot jia tsocy coo haxøøgcuhdujt hajxy nnajtshixøøyyämät.

¹⁰ Jaguiapxy yhabaada'añ coo Jesucristo yaa quiädaactägatsa'añ, coo haxøøgjäya'ayhajxy yajcumädowa'añii. Cabä pønñ jaduhñ ñajuø'øy mänaa jaduhñ jiaançh habaada'añ. Mänitä tsajt quiuhdägøoyya'añ. Jaduhñ yajmädowa'añ nebiä hänee møc ya'axiän. Cøxaambä xøø tioya'añ, møødá po'ø, møødá madsa'a, møødá naaxwiimbä, møød tijaty yaa hijp hädaa yaabä naaxwiin.

¹¹ Coo cøxiä wiinä jaduhñ quiuhdägøoyya'añ, paady hajxy tsøc hoy jäya'ayhájätäm. Tsøcxä Dios hajxy hoy wiingudsähgøøyyäm. Tsøcxä Diosmädia'agy hajxy hoy cud-iuunäm. ¹² Tsøc hajxy jøbhíjxäm coo Jesucristo yaa quiädaactägatsa'añ. Mänitä Dios ja'a tsajt yajtoya'añ, møødá xøø, møødá po'ø, møødá madsa'a, møødá naaxwiimbä. Tsøgä jäya'ayä Diosmädia'agy hajxy yajmøødmädiácäm nämay, ween hajxy miäbøcy; jaduhñä Dios paquiä yaghabaadät. ¹³ Tøø Dios jaduhñ miäna'añ coogä hawiinjemyçhajt yhädiuna'añ, møødá hawiinjemyñnaaxwiin. Jimä njoot hajxy nbädácäm coo Dios hajxy jimñ xyajnøcxáanäm. Cabä haxøøgpä jaduhñ jimñ mänaa tiägø'øwa'añ maa ja'a hawiinjemybiä tsajtän, ni jimñ maa hawiinjemybiä naaxwiimbän.

¹⁴ Mägu'ughajpädøjc, tøyhajt jaduñ coo Dios hajxy jim xpiäda'agáanäm, paadiä haxøøgpä hajxy tsøc najtshixøøyyäm hamuumdu'joot; jaduñä Jesucristo hajxy xpiäatämät coo pojpä cädieey hajxy hänajty nga'a møødhájtäm, coo yaa quiädaactägát-sät. Tsøc hajxy jootcujc nimiøødhíjtäm nebiä tu'ugpuhya'ay nebiä tu'ugpuhdo'oxypän. Jaduñä Dios hajxy hoy xyhíxämät coo hajxy hänajty hoy ndúunäm. ¹⁵ Mjahmiédsäp hädaa mädia'agy hajxy jaduñ. Paadiä Jesucristo jaduñ miee'xtucy, weenä jäya'ayhajxy may miäbøcy, ween hajxy jaduñ may ñähwa'açh. Ja'a mägu'ughajpä Pablo, jaduñ mijts tøø xñäjaayøøbiä. Ja'a Dios ja'a tøyhajt najtscapxøøyyä. Ja'a tsipjatypä ja'a Dios ja'a Pablo yajwiinjuøøyy. Jadúñhøchä Pablo njuø'øy nébiøchä nhamdsoo puhya'ayän. ¹⁶ Naaghooc mijtsä Pablo xñäjaayø'øy, jaduñ ñä'ägä mädia'agyhaty nébiøch cham njaayän. Tsipjatiä Pablo siémpräm miädia'agy. Ja'a häna'cä tøyhajt hajxy ca'a tsojpä, wiingä Pablo miädia'agy hajxy yajnähixøøyyä. Cab hajxy jaduñ yajnähixø'øy nebiä Pablo jia mänaañän. Wiingatiä Diosmädia'agy hajxy yajnähixø'øy. Cabä tøyhajtpä hajxy miäbøga'añ. Paady hajxy quiuhdägoyya'añ.

¹⁷ Mägu'ughajpädøjc, mnä'ägä najuøøby hajxy jaduñ coo hønndaacpähajxy jii wiädita'añ. Cabä tøyhajt hajxy chocy. Haxøøg hajxy jiaançh tehñ jäya'ayhaty. Mnigwieendähadøøjöp hajxy; jaduñä tøyhajt hajxy mga'a najtshixø'øwät. Cab hajxy myajwiinhøønät coo hajxy jaduñ mnä'ä tu'udägóyyät. ¹⁸ Jaac habøcxä hajxy jaduñ ja'a Jesucristocøxpä, ja'a hajxy nWiindsønhájtämbä. Jaaya'ay hajxy xñähho'túutäm. Tehngajnä miädia'agy hajxy mmäbøjcät; jaduñä mayhajt møj may tiúnät ja'a mi-jtscøxpä. Tsøc hajxy homiänaajä capxpáatäm møj jaançh. Tsøc hajxy tehngajnä wiingudsähgøøyyäm. Amén.

1 Juan

¹⁻³ Jue'e hõjts mijts nyajnájaayøøby, ja'a Jesucristo. Dioshuung je'e. Jíyyäm je'e hånajty møødä Dios mänaa hädaa yaabä naaxwiin yhawijy tiøø'xta'aguiän. Jaayá'ayäts hajxy xyhawáanäm nebiä Dios wyiinmay. Jaayá'ayäts hajxy tøø xñähho'túutäm neby hajxy jaduñ njugyhájtämät nebiä Dios jjugyhatiän cøjxta'axiøø. Tøø hõjts nhamdsoo hixy; tøø hõjts nhamdsoo mäday. Tøø hõjts nnähdoñ cø'øhaam. Tøyhajt jaduñ. Paady hõjts mijts jaduñ nhawáanäm neby hajxy jaduñ nhíjtämät tu'ugmädia'agy, neby hõjts ja'a Dios xmiøødhitiän tu'ugmädia'agy møødä yHuung. ⁴Paady jaduñ nhawáanäm neby hajxy jaduñ jootcuje nhíjtämät tehngajnä.

⁵ Hoyyä Dios ja'a wyiinmahñdy; cabä pojpa cädieey nñ'ägädä møødä. Jaduñ hõjts ja'a Jesucristo tøø xyhawaanä, y jaduñ mijts nhawaandägájtsäm. ⁶⁻⁹ Coö hajxy hoy nwädíjtämät nebiä Dios yhitiän, tu'ugmädia'agy hajxy jaduñ nhíjtämät, je'eguiøxpä coö ja'a Jesucristo hajxy tøø xñähho'túutäm ja'a nbojpa ngädieeyhájtäm cøxiä. Xyajnähwáatsäm hajxy jaduñ coö ja'a nbojpa ngädieey hajxy nnägápxämät. Tøyhajt jaduñ. Cabä Dios yhøhnda'agy. Howyiinmahñdy je'eduhñ miøød. Pero coö hajxy nwädíjtämät haxøøgtuum, cabä Dios hajxy nmøødhíjtämät tu'ugmädia'agy. Høhndaacäm hajxy jaduñ y cabä tøyhajt hajxy nnä'ägädä møødhájtäm.

Jaana jaduñduhmbä, coö hajxy nnä'ä mänáanämät cooc tyijy pojpa cädieey hajxy nga'a møødhájtäm, niwyiinöhñäm hajxy jaduñ, ¹⁰ y cabä Dios miädia'agy hajxy nmøødhájtäm, ja'a tøyhajt. Coö hajxy jaduñ nmänáanämät, jaduñ yajmadowa'añ cooc tyijy ja'a Dios yhøhnda'agy. Hix, je'e jaduñ mänaamb coö pojpa cädieey hajxy nmøødhájtäm.

2

¹ Mägu'ughajpædøjc, cábøch njoot chocy coö hajxy haxøøg mjatcø'øwät. Páadyhöch mijts hädaa nocy nyajnájaayøøy. Coö pøn jaduñ jiatcø'øwät, nähgapxtu'udøøjap je'e Jesucristäm jim maa Diosän. Cabä Jesucristo pojpa cädieey mänaa miøødä. ² Tøø ja'a nbojpa ngädieey hajxy xñähho'túutäm nägøxiä hädaa yaabä naaxwiin.

³ Coö hajxy ngudiúunämät nebiä Dios hajxy xyhanéhñäm, mänitä tøyhajt hajxy nmøødhájtämät coö je'e hajxy nhixyhájtäm. ⁴ Pøn jaduñ nä'ä mänaamb: "Nhixyhájpæch je'e", hoy quia'a ja cudiuñ, høhndaacp je'eduhñ. Hix, ja'a Diosmädia'agy je'eduhñ quia'a tsojpy. Tøyhajt je'e. ⁵ Pero pøn jaduñ cudiuumb, cähxø'p jaduñ coö ja'a Dios jiaanç tehñ jahmiech. Jaduñ hajxy nyajnajuøøyyämät coö hajxy nmøødhíjtäm tu'ugmädia'agy. ⁶ Pøn jaduñ mänaamb coö ja'a Dios miøødhity tu'ugmädia'agy, tsipcøxp wiädítät nebiä Jesucristo hijty wiäditiän.

⁷ Hädaa mädiä'agyhøch cham nyajnáhixøøbiä, tøø hajxy hijty mmäday mänaa hajxy mmäbøjtsooñän. ⁸ Pero hädaa mädia'agy jaduñ, jaduñ mäwínäts hädaa nebiä hawiinjemybiän. Hix, jaduñ hajxy mniçhocy mnibia'häyoyii nebiä Jesucristo hajxy xchójcäm. Tøyhajt jaduñ. Coö ja'a Jesucristo yaa tøø yhoy hädaa yaabä naaxwiin, mänitä homiädia'agy hajxy xyajwiinjuøøyyänä. Cab hajxy jaduñ nwädíjtänä hagoonstuum.

⁹⁻¹¹ Pøn ja'a y'hermano tsojp pa'häyoob, hoyyä Diosmädia'agy jaduñ quiudiuñ. Coö hajxy jaduñ ngudiúunämät, cab hajxy ngädiéhyämät. Pero pøn ja'a yhermano mähanhajp, hoy jia mäna'añ cooc tyijy quiudiuñ ja'a Diosmädia'agy, je'enä wiädity hagoonstuum. Jaduñ wiädity nebiä wiindspän. Cab jaduñ nñ'ägä niyaghoyøøyii.

¹²⁻¹⁴ Hermanodøjc, mjtshøch hädaa nocy nyajnájaayøøby. Mhixyhajpiä Dios hajxy, ja'a nDeedyhájtäm. Jaaya'ay ja'a nbojpa ngädieey hajxy tøø xyajnähwáatsäm je'eguiøxpä coö ja'a Jesucristo hajxy tøø xñähho'túutäm. Mijts majjaya'adiøjc, mhixyhajpiä Jesucristo hajxy jaduñ. Jíyyäm jaaya'ay hånajty mänaa hädaa yaabä naaxwiin yhawijy tiøø'xta'aguiän. Y mijts muutsc-häna'c-hajxy, xmiøøbiä Dios ja'a mäjaa hajxy coö ja'a

Diosmädia'agy hajxy tehngajnä mbanøcxy. Cabä møjcu'ugong hajxy tøø myajmäjäda'agy.

¹⁵ Cabä mjoot hajxy mbädá'agät hädaa yaabä naaxwiin. Coö pøn jaduhñ piädá'agät, cabä Dios hoy jahmiédsät, ja'a nDeedyhajtäm. ¹⁶ Ja'a møjcu'ugong jaduhñ mänaamb coö hajxy cøxiä wiinä nhadsójcämät hädaa yaabä naaxwiin, ja'a haxøøgpä. Jaanä jaduhñ miänaambä coö hajxy nyajcumáayyämät. Pero cabä Dios jaduhñ miäna'añ. ¹⁷ Cuhdägoyyaamb hädaa yaabä naaxwiin møødä haxøøgpä yaabä. Pero pøn cudiuumb nebiä Dios miäna'añän, cab jaduhñ mänaa quiuhdägoyya'añ. Jim yhida'añ maa ja'a Diosän cøjxta'axiøø.

¹⁸ Hoorä, habáatnäp jaduhñ coö ja'a naaxwiimbä wyiimbida'añ. Tøø hajxy mmädoyhaty coö ja'a Cristo miädsip quiähxø'øga'añ. Y tøø ja'a miädsiphajxy may quiähxø'øgy. Jaduhñ hajxy nyajnajuóyyäm coö yhabaatnä. ¹⁹ Xmiøødhjítäm ja'a Cristo miädsiphajxy hijty. Pero coö hajxy tøø xpiuhwáatsäm, cähxø'p jaduhñ coö hajxy hijty tehñ tiøyhajt xquia'a møødhjítäm hamuumdu'joot. Coö hajxy häxøpy hijty xmiøødhjítäm, cab hajxy häxøpy tøø xpiuhwáatsäm.

²⁰⁻²¹ Pero mijts, ja'a Jesucristo hajxy tøø xyajnäguexy ja'a Dios yhEspíritu. Mmøødhajpiä tøyhajt hajxy jaduhñ cøxiä. Paady mijts hädaa nocy nyajnäjaayø'øy. Y mnajuøøby hajxy coö ja'a tøyhajt hajxy quia'a møødä, ja'a häna'c hønndaacpähajxy.

²² Je'eduhñ ñänøømby, pøn jaduhñ mänaamb cooc tyijy ja'a Jesús tøø quia'a quexyii ja'a Díósäm. Ja'a Cristo miädsip je'e, pøn jaduhñ ca'a capxpaatp ja'a Dios møødä yHuung. ²³ Pønä Dios yHuung jaduhñ capxpáatäp, miøødhijpiä Dios je'e. Pero pønä yHuung jaduhñ ca'a capxpáatäp, cabä Dios jaduhñ miøødhity.

²⁴ Mgudiúnäp ja'a Diosmädia'agy hajxy tehngajnä neby hajxy mbanøcxtsohñän. Coö hajxy jaduhñ mgudiúnät, mänitä Dios hajxy tehngajnä mmøødhídät tu'ugmädia'agy møødä yHuung. ²⁵ Y cøjxta'axiøø hajxy xyagjugyhadáanäm neby je'e jiugyhatiän neby hajxy tøø xyajwiinwaanøøyyäm.

²⁶ Naxy hajxy mdehñ wyiinjuó'øwät coö mijts ja'a Cristo miädsiphajxy xjia wi'i wyiinhøøna'añ. ²⁷ Mijts, cabä yajnähixøøbiä hajxy myajmaajiaty. Mmøødhajpiä DioshEspíritu hajxy. Xyajnähixøøbiä tøyhajt hajxy cøxiä. Cab yhønnda'agy. Mmøødhídäp hajxy jaduhñ tu'ugmädia'agy neby hajxy tøø xyajnähixø'øyän.

²⁸ Hoorä, tu'ugmädia'aguiä Jesucristo hajxy mmøødhijnät neby hajxy jaduhñ mga'a tsähdiúnät coö quiädaactägátsät. ²⁹ Mnajuøøby hajxy coö ja'a Jesucristo pojpa cädieey quia'a møødä. Jaduhñ hajxy mnajuøøbiät coö ja'a Dios yhuunghaty pønjaty hoy wädijp.

3

¹ Xjiaançh tehñ chójcäm ja'a Dios hajxy. Hamuumdu'joot hajxy xyhuunghajtäm. Tøyhajt jaduhñ. Pero cabä jäya'ay hajxy xñajuóøyyäm coö ja'a Dios hajxy xyhuunghajtäm. Hix, cabä Dios hajxy yhixyhaty. ² Hoorä, tøø ja'a Dios hajxy xyhuunghajtäm. Cahnä yajnajuø'øy neby hajxy xyaghidáanäm. Pero coö ja'a Jesucristo quiädaactägátsät, nnajuóøyyäm hajxy coö hajxy jaduhñ nhidáanäm neby je'ejän. Nhixáanäm hajxy jaduhñ neby jaduhñ yhitiän. ³ Pøn hamuumdu'joot mæbøjp, hoy jaduhñ wiädity nebiä Jesucristo hoy yhitiän.

⁴ Pøn haxøøg jatcøøby, cabä Diosmädia'agy quiudiuñ. Je'e jaduhñ xøhajp ja'a haxøøgpä coö ja'a Dios miädia'agy mga'a cudiúunät. ⁵ Paadiä Jesucristo yaa tøø yhoy hädaa yaabä naaxwiin nebiä nbojpa ngädieey hajxy xyajnähwáatsämät. Pero cab jaaya'ay pojpa cädieey ñä'ägädä møødä. Tøyhajt jaduhñ. ⁶ Pønä Jesucristo tu'ugmädia'agy møødhijp, cab jaduhñ haxøøg jiatcø'øy. Pøn jaduhñ jatcøøby, cabä Jesucristo miädia'agy ñä'ägädä mæbøjcä. ⁷ Mägu'ughajpædøjc, cab hajxy myajwiinhøønät. Pøn hoy wädijp, cabä pojpa cädieey ñä'ägä møødä, nebiä Jesucristo quia'a møødän. ⁸ Pøn hoy ca'a wädijp, pianøcxäp je'e ja'a møjcu'ugongä miädia'agy. Homiänaajä ja'a møjcu'ugong haxøøg jiatcø'øy. Mänit jiatcøøçhohñ mänaa hädaa yaabä naaxwiin yhawijy tiøø'xta'aguiän. Paadiä Dios yHuung yaa tøø yhoy, nebiä møjcu'ugong jaduhñ quia'a mäjädá'agät. ⁹ Pønä

Dios teh̄m̄ tiøyhajt Teedyhajt, cabä jioot chocy coo jaduñ jiatc'owät, je'eguiøxpä coo je'e miøødhidyijäm ja'a Diósäm. Coo je'e Dyios yhuungä, paady haxøøg quia'a jatc'øy. ¹⁰ Jaduñ myajnuj'owät pøn Dioshuung. Entonces, pøn hoy ca'a wädiyp, pønä miägu'ughajpä ca'a tsojp ca'a pa'häyoob, ca'a Dyios je'e yhuungä. Pero pianócxäp ja'a møjcu'ugongä miädia'agy je'e.

¹¹ Mänaa ja'a Diosmädia'agy hajxy mmäbøjtsooñän, jaduñ hänajty miäna'añ coo hajxy nniçhojc nnibia'häyóowämät. Høxtä jäda'anäbaadyñä jaduñ miäna'añä. Cab jaduñ mänaa tiägach. ¹² Cab hajxy njatc'øyyämät nebiä Caín jecy jiatc'øyyän coo yhamdsoo puhya'ay yagho'cy. Paady jaduñ yagho'cy coo howyiinmahñdy hänajty quia'a møødä, nebiä piuhya'ay howyiinmahñdy hänajty miøødän. Hix, pianócxäp ja'a møjcu'ugongä miädia'agy hänajty je'e.

¹³ Entonces, hermanodøjc, cab hajxy myagju'owät coo häna'c hajxy xmiähänhájätm̄. ¹⁴ Højtshájätm̄, cøjxta'axiøø hajxy jim̄ nhidäänäm tsajpootyp. Cab hajxy mänaa jiiby nhäda'agø'owáanäm haxøøgtuum. Nmøødhájätm̄ ja'a tøyhajt hajxy jaduñ je'eguiøxpä coo hajxy hamiñ haxøpy nniçhojc nnibia'häyóowäm. Pønä miägu'ughajpä ca'a tsojp ca'a pa'häyoob, je'eds jiiby häda'agø'owaamb haxøøgtuum. ¹⁵ Pønä miägu'ughajpä mähanhajp, jaduñä wyiinmahñdy je'e nebiä jäya'ay-yagho'pan. Y cabä jäya'ay-yagho'pahajxy cøjxta'axiøø jiugyhada'añ nebiä Dios jiugyhatiän. Tøyhajt jaduñ. ¹⁶ Coo ja'a Jesucristo hajxy tøø xñähho'túütäm, jaduñä tøyhajt hajxy nmøødhájätm̄ coo ja'a Dios hajxy xjiaançh teh̄m̄ chójcäm. Hawiinmats hit jaduñ coo hajxy hamiñ haxøpy nniñähho'túütämät. ¹⁷ Coo ja'a mäyøøjäya'ay ja'a häyoobä quia'a näxúudsät, cab jaduñ quiudiuñ nebiä Dios hajxy xyhanéhm̄äm coo hajxy hamiñ haxøpy nniçhojc nnibia'häyóowämät. ¹⁸ Mägu'ughajpädøjc, tsøgxä hajxy hamuumdu'joot niñäxúu'tsäm. Jaduñ hajxy nyajcähx'ócämät coo hajxy hamuumdu'joot nniçhojc nnibia'häyóowäm. Coo hajxy nga'a niñäxúu'tsämät, cab jaduñ tiuna'añ coo hajxy nja mänäänämät cooc tyijy hajxy nniçhojc nnibia'häyóowäm.

¹⁹ Hermanodøjc, coo hajxy hamuumdu'joot nniçhojc nnibia'häyóowämät, jaduñä tøyhajt hajxy nmøødhájätm̄ coo ja'a Dios hajxy xyhuunghájätm̄. ²⁰ Y coo ja'a njoothajxy hamdsoo miänäänämät cooc tyijy hajxy hoy nga'a jäya'ayhájätm̄, tsipcøxp ja'a Diosmädia'agy hajxy nmäbøjcämät. Cabä nhamdsoo wiinmahñdyhajxy nyajcopc'øyyämät. Hix, xjioodhíjxäm ja'a Dios hajxy. Cøxiä hajxy xñajuøyyäm. ²¹ Y coo ja'a njoothajxy waamb quia'a mänäänämät, jaduñä tøyhajt hajxy nmøødhájätm̄ coo ja'a Dios hajxy xyhuunghájätm̄. ²² Xmióoyäm ja'a Dios hajxy tijaty hajxy nmäyujwáanäm, je'eguiøxpä coo hajxy ngudiúnäm nebiaty hajxy xyhanéhm̄äm. Paady hajxy xquiumáayyäm. ²³ Jaduñä Dios hajxy xyhanéhm̄äm coo ja'a yHuung Jesucristo miädia'agy hajxy nmäbøjcämät, coo hajxy hamiñ haxøpy nniçhojc nnibia'häyóowämät, nebiä Jesucristo hajxy hamdsoo tøø xyajwiingapx'øyyäm. ²⁴ Pønä Dios miädia'agy cudiúnäp, tu'ugmädia'aguiä Dios jaduñ miøødhity. Y jaduñä tøyhajt hajxy nmøødhájätm̄ coo ja'a Dios hajxy tu'ugmädia'agy xmiøødhájätm̄, je'eguiøxpä coo ja'a yhEspíritu hajxy tøø xyajnäguéjxäm. Ja'a yhEspirituhaam hajxy xyhawáanäm coo hajxy tu'ugmädia'agy xmiøødhájätm̄.

4

¹ Hermanodøjc, nämayyä hønndaacpähajxy jii wiädity. Cabä tøyhajtpä hajxy ñä'ägädä yecy. Entonces, cabä hoñä'a mädyii mädia'aguiä hajxy mmäbøgät nä'a nägoobä. Pero jawyiin hajxy mhuuc mädia'agyhíxät pø Diosmädia'agy jiaançh møød. ² Jaduñä tøyhajt hajxy nmøødhádät pø Diosmädia'agy jiaançh møød. Pø mänaamb jaduñ cooc ja'a Dios yHuung Jesucristo tøø jiaançh jäya'ayhaty hädaa yaabä naaxwiin, pues Diosmädia'agy jaduñ jiaançh møød. ³ Pero pø cab jaduñ miäna'añä, cabä Diosmädia'agy miøødä. Ja'a Jesucristo miädsip miädia'agy jaduñ. Tøø hajxy mmädoyhaty coo ja'a miädsip yaa quiähx'øga'añ hädaa yaabä naaxwiin. Bueno, yaadsä miädia'agy jaduñ wiädijnä hädaa yaabä naaxwiin.

⁴ Pero mijts, ja'a Dios hajxy xyhuunghajp. Tøø hajxy mga'a yajmäjäda'agy ja'a häna'c yø'øduhmbä höhnda'agymiädia'agy yajwädijpä. Hix, maas mäjaamøødä Dios quejee ja'a mõjcu'ugong miøødä, ja'a yaa hanehmbä hädaa yaabä naaxwiin. ⁵ Yø'ø höhndaacpähajxy jaduhmbä, ja'a mõjcu'ugong miädia'agy hajxy quiudiúunäp; paadiä mõjcu'ugongä miädia'agy hajxy miädiaacä. Y paadiä miädia'agyhajxy yaa yajcopcøøyyäxä hädaa yaabä naaxwiin. ⁶ Pero højts, ja'a Dios hajxy xyhuunghajtäm. Y cab pøn nmädia'agyhajxy xyajcopcøøwáanäm. Jagooyä hajxy yajcopcøøwa'añ pønä Diosmädia'agy mäbøjp. Jaduhnä tøyhajt hajxy nmøødhajtäm pøn tøyhajt Dioshuung. Pønä nmädia'agyhajxy xyajcopcøøyyäm, Dioshuung je'e. Pøn jaduhñ xquia'a mädoowäm, ja'a mõjcu'ugongä miädia'agy jaduhñ quiudiúunäp.

⁷ Hermanodøjc, tsøg hajxy tehngajnä niçhojc nibia'häyóowäm hamiñ haxøpy, je'eguiøxpä coo ja'a Dios hajxy xchójcäm. ⁸ Pero pøn xquia'a tsojc xquia'a pa'häyóowäm, cabä Diosmädia'agy miäböcy. Xchójcäm ja'a Dios hajxy jaduhñ. Jaduhñ miäna'añ coo hajxy nniçhojc nnibia'häyóowämät. ⁹⁻¹⁰ Coo ja'a Dios hajxy xchójcäm, paadiä Dios ja'a yHuung Jesucristo hajxy yaa tøø xyajnäguéjxäm hädaa yaabä naaxwiin, neby hajxy jaduhñ xñähho'túutämät ja'a nbojpa ngädieeyhajtäm, neby hajxy jim nhjítämät tsajpootyp cøjxta'axiøø. Ca'a jie'eguiøxpä coo ja'a Dios hajxy njahmiéjtsäm.

¹¹ Coo ja'a Dios hajxy xjiaançh tehñ chójcäm, paady hajxy hamiñ haxøpy nniçhojc nnibia'häyóowämät. ¹² Tøyhajt jaduhñ, cabä Dios mänaa yhixyii. Pero cab jaduhñ ñejpiä. Hoyyä Dios hajxy mänaa nga'a híjxäm, coo hajxy hamiñ haxøpy nniçhojc nnibia'häyóowämät, jaduhñä tøyhajt hajxy nmøødhajtäm coo ja'a Dios hajxy homiänaajä xcwieendähajtäm. Y coo ja'a Dios hajxy xchójcäm, maas hoy hajxy nniçhojc nnibia'häyóowäm. ¹³ Bueno, coo ja'a Dios ja'a yEspíritu hajxy tøø xmióoyäm, jaduhñä tøyhajt hajxy nmøødhajtäm coo hajxy nmøødhajtäm tu'ugmädia'agy. ¹⁴ Y hamdsoo ja'a Jesucristo hajxy tøø nhjixäm mänaa ja'a Dios yaa tøø quiexiän, mänaa hajxy tøø xñähho'túutäm. Tøyhajt jaduhñ. ¹⁵ Pøn jaduhñ mänaamb cooc ja'a Jesucristo Dyioshuungä, tu'ugmädia'agy ja'a Dios jaduhñ miøødhity.

¹⁶ Jaduhñä tøyhajt hajxy nmøødhajtäm coo ja'a Dios hajxy xchójcäm. Nmäböjcäm hajxy jaduhñ. Xchójcäm ja'a Dios hajxy jaduhñ, paadiä Dios tu'ugmädia'agy miøødhity pøn homiänaajä jahmiejtsp ja'a Dios. ¹⁷ Coo ja'a Jesucristo hajxy xchójcäm, maas hoy hajxy nniçhojc nnibia'häyóowämät hädaa yaabä naaxwiin. Y coo hajxy jaduhñ nniçhojc nnibia'häyóowämät, cab hajxy jaduhñ ndsähgøøyyämät mänaa ja'a Jesucristo miñ chaaçhtiuna'añän ja'a hajxy ca'a mäbøjpa. ¹⁸ Pønä Dios hamuumdu'joot ca'a jahmiejtsp, tsähgøøby je'eduhñ je'eguiøxpä coo yajcumädowa'añii. Pero coo ja'a Dios hajxy hamuumdu'joot njahmiéjtsämät, cab hajxy jaduhñ nnä'ägä tsähgøøyyämät. Hix, pøn jaduhñ tsähgøøby, cähxø'p jaduhñ coo ja'a Dios hamuumdu'joot quia'a jahmiech.

¹⁹ Jayøjpa Dios hajxy xchójcäm, paady hajxy jaduhñ njahmiejtsägájtsäm. ²⁰ Pøn jaduhñ nä'ä mänaamb: "Njahmiéjchpøchä Dios", hoyyä miägu'ughajpä jia mähanhatty, höhndaacp je'eduhñ. Pø cabä yhamdsoo mägu'ughajpä ñä'ä tsocy ñä'ä pa'häyoy, cabä Dios hoy jiahmiédsät. Haa ca'a, yhixypä miägu'ughajpä homiänaajä, pero cabä Dios mänaa yhixy. ²¹ Hamdsoo ja'a Dios hajxy xyhanéhmäm coo ja'a nmägu'ughajpä hajxy ndsojc nba'häyóowämät, jaduhñ mäwínäts nebiä Dios hajxy njahmiéjtsäm.

5

¹ Pøn jaduhñ mäbøjp coo ja'a Jesucristo Dyiosquexiä, miäböjpiä Diosmädia'agy je'e. Y pønä Dios jaduhñ jahmiejtsp, chojpy pia'häyoooby je'e pønatiä Diosmädia'agy mäbøjp. ² Coo ja'a Dios nDeedyhajtäm hajxy njahmiéjtsäm, coo ja'a miädia'agy hajxy ngudiúunäm, jaduhñä tøyhajt hajxy nmøødhajtäm coo hajxy nniçhojc nnibia'häyóowäm, je'eguiøxpä coo ja'a Dios hajxy xyhuunghajtäm. ³ Coo ja'a Dios hajxy njahmiéjtsäm, je'eduhñ ñänøømby coo ja'a miädia'agy hajxy ngudiúunäm. Y cabä Dios tsipjaty yhane'emy. ⁴⁻⁵ Coo ja'a Dios hajxy xyhuunghajtäm, coo ja'a miädia'agy hajxy

nmäbójcäm, paadiä mójcu'ugong hajxy jaduhñ nga'a yajmäjädaácäm, je'eguiøxpä coo hajxy nmäbójcäm coo ja'a Jesucristo Dyioshuungä.

⁶ Tøyhajt jaduhñ coo ja'a Jesucristo ñäbejty. Jaaná tøyhajt jaduhmbä coo yho'cy cruzcøxp. ⁷ Jaduhñä Dioshespíritu miäna'añ cooc ja'a Jesucristo Dyioshuungä, y cabä Dioshespíritu mänaa yhøhñda'agy. ⁸ Coo ja'a Jesucristo jaduhñ ñäbejty, coo yho'cy cruzcøxp, y coo ja'a Dioshespíritu jaduhñ miäna'añ, jaduhñä tøyhajt hajxy nmøødhájtäm coo ja'a Jesucristo Dyiosquexiä. ⁹ Maas tsoobaatpä Dios ja'a miädia'agy quejee ja'a jäya'ay ja'a miädia'agyhajxy. Y jaduhñä Dios miäna'añ cooc ja'a Jesucristo yHuunghaty. ¹⁰ Pønä Jesucristo miädia'agy mäbójcäp, miøødä tøyhajt jaduhñ coo ja'a Jesucristo Dyioshuungä. Hix, ja'a Dios jaduhñ hawáanäp. Pero pønä Dios ja'a miädia'agy ca'a mäbójcäp, jaduhñ je'e miäna'añ cooc tyijy ja'a Dios yhøhñda'agy. Hix, cabä Dios ja'a miädia'agy miäbójcäxä coo ja'a Jesucristo yHuunghaty. ¹¹ Paadiä Dios hajxy tøø xpiädaácäm hawa'adstuum coo ja'a Jesucristo hajxy tøø xñähho'túutäm. Paady hajxy jaduhñ njugyhadaänäm nebiä Dios jiugyhatiän cøjxta'axiøø. Tøyhajt jaduhñ. Ja'a Dios jaduhñ mänaamb. ¹² Pønä Dioshuung ja'a miädia'agy mäbójcäp, hodium je'eduhñ yhity. Cøjxta'axiøø jiugyhada'añ nebiä Dios jiugyhatiän. Pero pøn jaduhñ ca'a mäbøjcp, cab jaduhñ jiugyhada'añ nebiä Dios jiugyhatiän.

¹³ Mijts, mmäbójcäp ja'a Dioshuungä miädia'agy hajxy. Míjtshøch hädaa nocy nyajnäaayøøby nebiä tøyhajt hajxy jaduhñ mmøødhádät coo hajxy hodium mhity, coo hajxy mjugyhada'añ nebiä Dios jiugyhatiän cøjxta'axiøø.

¹⁴ Coo ja'a Dios hajxy tu'ugmädia'agy nmøødhájtämät, jaduhñä tøyhajt hajxy nmøødhájtäm coo hajxy xmiädoowämät coo hajxy tijaty nmäyujwáanämät. ¹⁵ Paadiä tøyhajt hajxy jaduhñ nmøødhájtäm coo hajxy xmio'owáanäm.

¹⁶⁻¹⁷ Ja'a häna'c-hajxy haxøøgwädiipä, haagä haxøøgtuum hajxy ñøcxø'owa'añ. Y pø miøødä mmägu'ughajpä pojpä cädieey, mmänuu'xtá'agäp ja'a Dios coo ween yajnähwa'açhii. Pero coo ja'a mmägu'ughajpä ja'a Diosmädia'agy tehngajnä quia'a mäbógät cøjxta'axiøø, haxøøgtuum jaduhñ ñä'ägä hídät; y cabä piojpä quiädieey mänaa ñähwáatsnät. Y cabä Dios mmänuu'xtá'agät coo ja'a mmägu'ughajpä yajnähwa'adsójät, je'eguiøxpä coo ja'a yhamdsoo wiinmahñdy jaduhñ yajtuñ.

¹⁸ Pønä Dios Teedyhajp, cab jaduhñ mänaa yhaxøøghäna'c-haty. Cueendähájtäp je'eduhñ ja'a Jesucristäm, ja'a Dioshuung. Cabä Jesucristo ja'a mójcu'ugong jaduhñ mänaa yajmäjäda'agy. Tøyhajt jaduhñ.

¹⁹ Jaduhñä tøyhajt hajxy nmøødhájtäm coo ja'a Dios hajxy xyhuunghájtäm. Pero pønä Dios ca'a Teedyhajp, tøø quia'a yajmäjäda'agyijäm ja'a mójcu'ugóngäm.

²⁰ Jaaná nmøødhájtäm ja'a tøyhajt hajxy jaduhmbä coo ja'a Jesucristo ja'a Dioshuung hajxy hoy tøø xyajnähixóyyäm ja'a Diosmädia'agy, coo hajxy jaduhñ nmäbójcämät coo ja'a Dios tiu'ugä. Y tu'ugmädia'aguiä Dios hajxy nmøødhájtäm møødä yHuung Jesucristo. Hodium hajxy tøø xpiädaácäm. Cøjxta'axiøø hajxy njugyhadaänäm nebiä Dios jiugyhatiän. ²¹ Mägu'ughajpädøjc, cab hajxy tii mwiingudsähgø'owät, ni quepychech, ni naaxpoch, ni tii. Jagoo ja'a Dios hajxy mwiingudsähgø'owät, ja'a jim hijpä tsajpootyp. Amén.

2 Juan

¹ Juánhøch nxøhaty. Høøch hädaa nocy nhädiuumby møød hajxy nägøxiä ja'a tøyhajtmøødpä. Mijts høch hädaa nocy nyajnäjaayøøby pønjetiä Dios tøø wyiimbiy, pønjetiä Diosmädia'agy mäbøjp. Tøyhájthøch mijts ndsocy nba'häyoy, ² je'eguiøxpä coo ja'a tøyhajt hajxy nmøødhájtäm. Cøjxta'axiøø hajxy jaduhñ nmøødhadäänäm. ³ Weenä Dios nDeedyhájtäm hoyhajt weenhajt hajxy xmióoyyäm møødä yHuung Jesucristo. Nmøødhájtäm ja'a tøyhajt hajxy jaduhñ. Hamiñ haxøpy hajxy jaduhñ nniçhojc nnibia'häyóowäm.

⁴ Jootcujc-høch nnijiäwø'øyii coo ja'a tøyhajt hajxy näje'e mjaançh panøcxy nebiä Dios hajxy tøø xyhanéhmäm. ⁵⁻⁶ Hoorä, hermanodøjc, tsøg hajxy niçhojc nibia'häyóowäm nebiä Dios hajxy tøø xyhanéhmäm. Coo hajxy jaduhñ ngudiúunämät, cähxø'p jaduhñ coo ja'a Dios ja'a miädia'agy hajxy njaançh mäbøjcäm.

⁷ Nämayyä høhndaacpähajxy yaa wiädity hädaa yaabä naaxwiin. Cab hajxy jaduhñ miäna'añ cooc tyijy ja'a Jesucristo hoy tøø jiäya'ayhaty hädaa yaabä naaxwiin. Ja'a møjcu'ugongä wyiimahñdy hajxy miøødhájtäp; ja'a Jesucristo miädsip je'e. ⁸ Mnigwieendähadøjöp hajxy. Cabä høhndaacpä miädia'agy hajxy mmäbøjcät coo ja'a tøyhajt hajxy mnä'ä najtshixø'øwät, nébiøch mijts tøø nyajnähiçø'øyän. Coo ja'a høhndaacpä miädia'agy hajxy jaduhñ mga'a mäbøjcät, xpiädá'agäp ja'a Dios hajxy hodiium. Cøjxta'axiøø hajxy jim mhídät tsajpootyp.

⁹ Pønä Jesucristo miädia'agy najtshixø'øyäp, cabä Dios tu'ugmädia'agy miøødhity. Pero pøn jaduhñ ca'a najtshixøøby, tu'ugmädia'agy ja'a Dios miøødhity møødä yHuung Jesucristo. ¹⁰ Homiädyyii yajnähiçøøbiä hajxy myajtøjtägø'øwät coo jim miédsät maa ja'a mjøøn maa ja'a mdøjc-hajxiän. Pero coo miäná'anät cooc tyijy ja'a Jesucristo miädia'agy quia'a tøyyä, cab hajxy myajtøjtägø'øwät, ni mga'a yajpóo'xät hajxy, ¹¹ coo ja'a cu'ug jaduhñ ñä'ä mäná'anät cooc tyijy myiich mjamiøød je'eduhñä, cooc tyijy miich jaduhñ mbayajnähiçøøbiä.

¹² Madiú'ujøch mijts nja hawaanäänäm, pero cábøch njaayaannä. Ja wi'i chøjpiøch njoot jaduhñ coøch jim nnøcxät maa mijtsän. Mänit hajxy haawhaam nmädiácämät; jaduhñ hajxy maas jootcujc nhíjtämät.

¹³ Xyajpoo'xp mijts ja'a hermanodøjc-hajxy yaabä. Tøø hajxy je'e wyiimbíiwäbä ja'a Diósäm. Amén.

3 Juan

¹ Juánhøch nxøhaty. Mägu'ughajpä Gayo, míichhøch hädaa nocy nyajnäjaayøøby. Tøyhájthøch miičh ndsocy nba'häyoy.

² Ween miičhä Dios hoyhajt weenhajt xmio'oy. Nnajuøøbiøch jaduñ coo miičh hoy mwädity. ³ Tøøchä hermanohajxy hoy näje'e xyhawaanä coo miičhä Diosmädia'agy hamuumdu'joot mbanøcxy. Páadyhøch jootcujc nnijiäwø'oyii. ⁴ Cooch nmädo-yhaty cooch njamiøødä Diosmädia'agy hajxy hamuumdu'joot pianøcxy, jaančh tehñ xioondáacpøch jaduñ.

⁵ Hoy miičhä Diosmädia'agy mgudiuñ coo ja'a hermanohajxy mbuhbety, ja'a hajxy jäguemgajpt-tsohmä. ⁶ Tøø hajxy ñägäpxy maa ja'a tsajtøjcän coo miičh hajxy mjaančh tehñ chocy mjaančh tehñ pia'häyoy. Y coo hajxy hñajty jiaac tu'ubøgaannä, mmó'owäp hajxy tijaty hajxy hñajty yajmaajiajpy. ⁷ Hix, ja'a Jesucristocøxpä hajxy wiädity. Ja'a Diosmädia'agy hajxy yajwa'xyp. Y cab hajxy tii miäyujwa'añ ja'a Diosmädia'agy hajxy ca'a panøcxpä. ⁸ Paady jaduñ yhahixø'oy coo ja'a hermano hajxy nbuhbéjtämät; jaduñ hajxy hoy nmøødtúunämät maa ja'a Diostuung jaduñ myiñän.

⁹ Tøøchä hermano nocy hajxy tu'ug nja yajnäjaayø'oy, pero cábøchä Diótrefes nmädia'agy xquiudiunaanä, je'eguiøxpä coo ja'a yhamdsoo mädia'agy jaduñ yajtuna'añ maa ja'a hermanohajxiän. ¹⁰ Haxøøgjátyhøch naxy xñänømy. Y maas haxøøg jaduñ jiatcø'oy coo ja'a hermano cuhdujt hajxy quia'a mo'oy coo hajxy jiojpoøgø'owät ja'a Diosmädia'agy hajxy yajwa'xpä. Y coo pøn hñajty jiojpoøgø'owa'añ, mänitä Diótrefes miäna'añ coo yajpädsøømänät maa ja'a tsajtøjcän. Cooch jim nnøcxät maa mijtsän, mänitøch ngøxy nägäpxät nebiaty jiatcø'oy. ¹¹ Miičh mägu'ughajpä, cab jaduñ mänaa mbajacø'owät. Pøn jaduñ jatcøøby, cabä Diosmädia'agy miäbøcy. Pero pøn hoy wädijp homiänaajä, miäbøjpiä Diosmädia'agy je'e. Jaduñ miičh mbahíxät.

¹² Pero ja'a Demetrio, cab jaduñ jiatcø'oy nebiä Diótrefes jiatcø'oyän. Tøyhajtä Demetrio ja'a Diosmädia'agy pianøcxy hamuumdu'joot. Cumáayyap jaduñ nägøxiä, y ngumáabiøch høøchpä. Mnajuøøby miičh jaduñ coochä tøyhajt nmøødä.

¹³ Madiú'ujøch miičh nja hawaanäanäm. Pero cábøch njaayaannä. ¹⁴ Chójpiøch njoot jaduñ cooch jim nnøcxät maa miičhän. Mänit haawhaam nmädiáacämät.

¹⁵ Ween miičh jootcujc mmähmø'oy. Xyajpoo'xp miičh ja'a mmägu'ughajpähajxy yaabä. Tunä mayhajt, yajpoo'xác højts nmägu'ughajpähajxy jimä nägøxiä.

Judas

¹ Høøch xøhajp Judas. Ja'a Jesucristøch ja'a tiuung ndúunäp. Høøch nbuhya'ay je'e ja'a Jacobo. Mjftshøch hädaa nocy nyajnäjaayøøby. Tøø højts ja'a Diosteedy xyajnähdfjäm coo ja'a miädia'agy nmäbójcämät. Xchójcäm hajxy jaduhñ. Tu'ugmädia'agy hajxy xyaghjítäm møødä Jesucristo. ² Ween mijts ja'a Dios hoyhajt weenhajt xmi'oy tehngajnä. Tsøg hajxy jahmiéjtsäm coo ja'a Dios hajxy xchójcäm tehngajnä.

³ Mägu'ughajpädøjc, jadúhñhøch mijts hijty nyajnäjaayø'owa'añ coo ja'a Jesucristo hajxy tøø xñähho'túutäm. Pero maas hawiinmats jaduhñ cooçh mijts nmänuu'xtá'agät coo ja'a Diosmädia'agy hajxy tehngajnä mbanócxcät, nebiä Dios hajxy tähoocmo'oyyä tøø xmióoyyäm. Cab hajxy myajwiinhóønät. ⁴ Hix, ja'a häna'c høhñdaacpähajxy, hamee'ch hajxy näje'e tøø yajtägø'owø'oy. Ja'a Diosmädia'agy jecy mänaañ cooc ja'a høhñdaacpähajxy quiumädowa'añ. Jaduhñ hajxy yhøhñda'agy, cábac jaduhñ tyijy ñejpiä coo mhaxøøgwädítät, hoyyä Dios ja'a mbojpa mgädieey tøø xjia yajnähwaatsä. Cabä Jesucristo hajxy quiapxpaatnä, ja'a nWiindsøn'hájtämbä. Tu'uquiä Jesucristo hajxy nWiindsøn'hájtäm.

⁵ Mnajuøøby hajxy jaduhñ, hoy ja'a Dios ja'a judíos jim jia woobädsøømy Egiptonaaxooty, mänit yajcuhdägoonä pønjaty hñanjty ca'a mäbøjp. Mjahmiédsäp hajxy jaduhñ cøxiä. ⁶ Haa ja'a Diosmoonsähajxiä, coo hajxy jim näje'e chohñ tsajpootyp maa ja'a Dios hñanjty tøø piäda'aguiän, paady hajxy jii by quiejxä tsumyçhñanaabiä hagogdstuum ja'a Diósäm, høxtä coo yhabáadät coo hajxy hñanjty yajcumädowa'añijäm ja'a Diósäm. ⁷ Høxtähmäts ja'a jecyjiäya'ayhajxy jiajty, ja'a hajxy hijty jim jegyhajty tsánaabiä maa ja'a cajpt hijty xiøhatiän Sodoma møødä Gomorra, møødä jimbä ja'a cajpt mäwiingonbä. Coo hajxy jiaançh tehñ yhaxøøg jiäya'ayhajty, paady hajxy jøønhaam yajcumädoowä ja'a Diósäm. Hix, høxtä ya'adiøjcpaady hajxy hijty yhaxøøgijatcø'oy. Hijxtahñd ja'a Dios hajxy jaduhñ xmióoyyäm.

⁸ Jaduhñä høhñdaacpähajxy jiatcøøbiä. Cabä tøyhajt hajxy miøødä. Haxøøg hajxy wiädity. Cabä Diosmädia'agy hajxy miäböcy. Haxøøgä Diosmoonsä hajxy ñänømy, ja'a hajxy tsajpootypä. ⁹ Ja'a Diosmoonsä møjhajpä, ja'a xøhajpä Miguel, cabä møjcu'ugong haxøøg ñämaayy mänaa ja'a dijunto Moisés hajxy hñanjty yajtsipta'aguiän. Jagooyyä ñämaayy: "Ja'a Dios xyhójäp." ¹⁰ Pero yø'ø høhñdaacpähajxy, hotyijatiä hajxy haxøøg ñänømy, hoy hajxy tii quia'a ja najuø'oy. Nä'ä nägoobä hajxy jaduhñ jiatcø'oy nebiä animalhajxiän. Paady hajxy quiumädowaannä.

¹¹ Haxøøg hajxy jiada'añ yhabeta'añ, je'eguiøxpä coo ja'a Cañ hajxy piahixy piaduñ. Jaduhñä Balaam hajxy piahixpä. Tu'udägooyy ja'a Balaam jecy je'eguiøxpä coo xädø'øñ hñanjty jiaançh tehñ piøcjuø'oy. Yajcumädowaanäp hajxy je'eguiøxpä coo ja'a Dios miädia'agy hajxy quia'a cudiunaanä nebiä Coré jecy quia'a cudiuunän. Yhamdsoo cuhdujt hajxy jia wi'i yaghidaamby. ¹² Jaançh tehñ yhoçhähdiuunä ja'a høhñdaacpähajxy jiatcø'oy maa mijts ja'a cay ja'a hu'ug myagjadyijän. Nä'ä pahuuc nä'ä pajøø'xpä hajxy jim miech. Jaançh tehñ jiootmøj hajxy ñibiäda'agyii. Cab hajxy pøn ñä'ägädä wiingudsähgø'oy. Cabä Diosmädia'agy hajxy hoy yajnähixø'oy. ¹³ Jaançh tehñ chähdiuhñdägoy hajxy jaduhñ. Coo hajxy tøø tiu'udägoonä, paady hajxy yaghidäänänä cøjxta'axiøø hagogdstuum.

¹⁴ Haa ja'a Enocä, ja'a Adán ja'a yhap yhoc je'e ja'a miäjuxtujcpä. Jecy ja'a Dios ja'a Enoc yajmädiaacy ja'a häna'c høhñdaacpæcxpä. "Huuc mäadow, milhaamä Dios ja'a mioonsä miøødcäda'aga'añ. ¹⁵ Cøxäänäm ja'a Dios hajxy xquiøxy yajtøyhajtyegäänäm. Mänit yajcumädowa'añ pønjaty haxøøg jäya'ayhajp, ja'a Diosmädia'agy hajxy ca'a mäbøjpä, ja'a Dios hajxy haxøøg nänøømbä." ¹⁶ Yø'ø høhñdaacpähajxy, jaançh tehñ wyiinhec hajxy jaduhñ. Cab hajxy tii quiumay. Ja'a haxøøgpä hajxy jiaançh tehñ yhadsojpy. Jaançh tehñ ñiguiumäayyap hajxy jaduhñ. Nä'ä mänaamb hajxy jaduhñ cooc tyijy ja'a

jäya'ay hajxy jiaančh tehṁ wyiingudsähgø'ø. Paady hajxy jaduhṁ miäna'añ, coo hajxy yajcumaya'añ.

¹⁷ Mägu'ughajpädøjc, mjahmiejchp hajxiäda'a coo ja'a nWiindsønähjtäm Jesucristo quiuguexyhajxy jäguemiä miänaañ: ¹⁸“Coo hänajty yhabaadaañnä coo ja'a naaxwiimbä hänajty wyiimbida'añ, mänitä jäya'ay ja'a Diosmädia'agy hajxy näje'e wyiinwoon-a'añ. Ja'a haxøøgpä hajxy hänajty jiaančh tehṁ yhadsogaamby.” ¹⁹ Jaančh tehṁ chipyajpädøøgaamb hajxy maa ja'a hermanodøjc-hajxiän coo ja'a hermanodøjc hajxy tu'ugmädia'agy quia'a híjnät. Haxøøg hajxy jiaančh tehṁ wiädity. Cabä Dioshespíritu hajxy ñä'ägädä møødä. ²⁰ Pero mijts mägu'ughajpädøjc, tehṁgajnä ja'a Diosmädia'agy hajxy maas hoy mjaac panócxät nebiä Dios hajxy tøø xmióoyyäm. Mba'yá'axäp ja'a Dios hajxy ja'a yhEspíritucøxpä. ²¹ Hoyyä Diosmädia'agy hajxy mjaančh tehṁ yajtúnät; mänitä Dios ja'a mbojpä mgädieey hajxy xyajnáhwa'ads xyajcuhwá'adsät. Xchójcäm hajxy jaduhṁ, paady hajxy xyajnáhwa'ads xyajcuhwa'adsáanäm. Jimä mjoot hajxy mbädáacnät tsajpootyp coo ja'a Jesucristo hajxy jim xyajnøcxáanäm. Jim hajxy xyaghidáanäm cøjxta'axiøø. Hojioot jiaančh tehṁ miøødhajpy møødä højtsøxpä.

²² Mjootcapxmøpcógäp hajxy pønjaty hamuumdu'joot ca'a mäbøjp. ²³ Naxiä jäya'ay Diosmädia'agy hajxy mdehṁ yajmäbógät; jaduhṁ hajxy quia'a cá'awät haxøøgtuum. Mnäxúudsäp hajxy pønjaty hänajty haxøøg wädiyp. Pero nägueentä hajxy mmøød-mädiä'agät, neby hajxy jaduhṁ mga'a pahadägoonáxät.

²⁴⁻²⁵ Tu'ugä Dios jaduhṁ. Jaaya'ay hajxy xyajnáhwáatsäm ja'a Jesucristocøxpä ja'a nWiindsønähjtäm. Je'eds mäjaamøød neby hajxy jaduhṁ xcwieendähjtämät. Jaduhṁ hajxy nga'a tu'udägóoyyämät. Wa'ads hajxy jim xyajmedsáanäm tsajpootyp. Mänit hajxy jim nxoonnda'agáanäm. Tsøg hajxy mänáanäm cøjxta'axiøø coo ja'a Dios miøjjä jiaančhä. Homiänaajä ja'a cuhdujt jiaančh tehṁ miøødä. Amén.

Apocalipsis

¹ Hädaa mädia'agy, yu'učh hijty jaduħn yhity. Mänitä Dios ja'a Jesucristo ña-jtscapxøøyyä coo ja'a Jesucristo ja'a mioonsähajxy yhawaandägájtsät tijaty hánajty mobädajp jadáanäp tunáanäp. Mänitä Jesucristo ja'a quiuguexy jim quiejxtägajch maa ja'a Juangän. Hoy ja'a Juan jaduħn yhawaandägájtsäxä. ² Jaduħnä Juan yajwiinhijxä. Y yejc ja'a Juan ja'a tøyhajt jaduħn mäduħñtiä wyiinhijxy, coo ja'a Diosmädia'agy tiøyyä nebiä Jesucristo hánajty tøø ñägapxiän.

³ Jootcujc hajxy yhity pønjaty hädaa nocy capxp, pønjaty jaduħn mädoob, pønjaty jaduħn hoy cudiuumb nej myiñän cujaay. Hiħ, mobädajp jaduħn jiada'añii tiuna'añii.

⁴ Høøch Juan hädaa nocy nhädiuumby. Mijts hädaa nocy nyajnäjaayøøby pønjatiä Diosmädia'agy panøcxp jim Asianaaxooty maa ja'a juxtujcpä cajptootypän. Weenä Dios ja'a hoyhajt ja'a weenhajt hajxy xmio'oy. Homiänaajä ja'a Dios ñä'ägädä hity. Y ja'a juxtujcpä juøhñdy jim hijpä Dioswiinduum, jaduħn ja'a hoyhajt ja'a weenhajt hajxy xmioobiä. ⁵ Y ja'a Jesucristo, jaduħn ja'a hoyhajt ja'a weenhajt hajxy xmioobiä. Yejpiä Jesucristo ja'a tøyhajt jaduħn. Jaayá'ayäts jayøjp jujypiøjc. Jaayá'ayäts rey nägøxiä haneħmb. Xchójcäm hajxy jaduħn. Tøø hajxy xñähho'túutäm. Tøø hajxy xyajnahwaats xyajcuhwáatsäm ja'a nbojpä ngädieyhájtäm. ⁶ Jaduħn hajxy tøø xpiädáacäm nebiä reyän, nebiä nähgapxtuutpä; jaduħn ja'a Dios hajxy hoy nmäduunämät. Tsøg hajxy jaduħn cøjxta'axiøø møj jaančh pädáacäm. Amén.

⁷ Huuc mädoħ hajxy; mobädajpä ja'a Jesucristo miänaca'añ jocjooty. Nägøxiä jäya'ay-hajxy yhixa'añ, møød hajxy je'e tøøbä miäyaghó'oguiäbä. Coo hajxy jaduħn yhixa'añ, mänitä jäya'ayhajxy nägøxiä jiø'owa'añ xiuuds'añ wiinduhmyhagajpt. Tøyhajt jaduħn.

⁸ “Høøch cøxiä nyajtsoħndaac. Y høøch cøxiä nyajmayáangombä”, nømä Dios miänaañ. Jaduħn miädia'agytiägø'øy coo ja'a Dios homiänaajä ñä'ägä hity. Ja'a Dios møjcuhdujt cøxiä møød.

⁹ Høøch Juan, haguípxyhøch mijts ja'a Diosmädia'agy nmøødpanøcxy; haguípxyhøch mijts tøø nmøødtsaačhpøcy. Tøø ja'a Jesucristo mäjaa hajxy xmióoyäm neby hajxy jaduħn nmee'xtújcämät. Coochä Diosmädia'agy-yajwa'xyiibä nga'a najtshixø'owa'añ, møødä Jesucristo miädia'agy, páadyhøch häna'c yaa mädsibø'øbä tøø xquiexy maa xiøhatiän Patmos. Nebiä tsúmybiänøch jaduħn yaa nhity. ¹⁰ Mänitøchä Dioshespíritu xñägädaacy. Näxøø hánajty jaduħn. Mänitøch nmädooyy møc quiapxy njøøxcø'ømám-biøch. Jaduħnhøch nmädooyy nebiä xuuxtän. ¹¹ Mänitøch je'e xñämaayy:

—Høøch cøxiä nyajtsoħndaac; høøch cøxiä nyajmayaamby. Tijaty miičh mwiinhix-aamby, jaduħn mgujáayät librojooty. Mänit jim mguéxät maa ja'a hermanodøjc-hajxiän jim Asianaaxooty, maa ja'a juxtujcpä cajptootypän. Jaduħnä juxtujcpä cajpt xiøhaty: Efeso, Esmirna, Pérgamo, Tiatira, Sardis, Filadelfia, Laodicea.

¹² Mänitøch nwa'wiimbijty. Je'ečh hánajty nhixaamby pønħøch hánajty xmiägapxp. Mänitøchä ceratoyøhñdy juxtujc nhijxy, haagä orohädiuñ. ¹³ Jimä Jesucristo hánajty tiäna'ay maa ja'a ceratoyøhñdy ñähmøjcän. Yoñä wyit hánajty miøødä. Orowøønhaam hánajty quiaačhwøñä. ¹⁴ Jaančh tehñ piøobä quiuhwaay hánajty. Jaduħnä wyiin hánajty quiähxø'øgy nebiä jøønhaayän. ¹⁵ Jaduħnä tiecy hánajty yhaambä chämaambä, néjjiämä hobiujxt coo mbó'odät. Jaančh tehñ miøc hánajty quiapxy, nebiä mejy jiädi-tiän. ¹⁶ Juxtujcä madsa'a hánajty quiø'ogonhaty maa ja'a yhaøoguiø'øjän. Yhaawjootiä pejyhespada hánajty miøødä, mejtsnaxä jiøjpä. Jaduħnä wyiin jiøjp hánajty quiähxø'øgy nebiä xøø møc yhañän.

¹⁷ Cooch jaduħn nhijxy, mänitøch nwiingugädawøøyy nebiä ho'ogypiän. Mänitøch xquio'ønähgajpy ja'a yhaøoguiø'øhaam. Mänitøch xñämaayy:

—Ca'a mdsähgø'øy. Høøch ja'a jayøbajtpä, høøch ja'a jaac høxhaambä. ¹⁸ Jújcyhøch hánajty, tøøch hijty nho'ogy. Mänitøch nujyipiøjcombä. Cábøch mänaa nho'ogaannä.

Høøchä cuhdujt jaduñ nmøød maa ja'a ho'ogyiibä myinø'øyän, maa ja'a ho'pähajxy ñähgäda'aguian. ¹⁹ Mgujáayäp jaduñ nebiaty mwiinhixa'añ, tijaty jájtäp túunäp jáda'ahaty, møød tijaty jádaanäp tunáanäp. ²⁰ Jaduñ miädia'agytiägø'øy ja'a tøøbä mhíxiäbä. Ja'a juxtujcpä madsa'ajä, ja'a näjuxtujcpä Diosquexyhajxy je'e, ja'a Dios jim quiejxypä maa ja'a hermanodøjc-hajxiän, maa ja'a cajpt juxtujcpän. Y ja'a juxtujcpä orotoyøhñdiä, ja'a hermanodøjc-hajxy je'eduhñ, ja'a hajxy jim Diosmädia'agy panøcxpä maa ja'a cajpt juxtujcpän.

2

¹ 'Jaduñä Diosquexy myajnäjaayó'øwät, ja'a tøø quiexyíijäbä maa ja'a hermanodøjc-hajxiän jim Efeso: "Ja'a Jesucristo, ja'a juxtujcpä madsa'a quionhijpiä, jim je'e tiäna'ay maa ja'a ceratoyøhñdy ñähmøjcän; je'eds jaduñ mänaamb: ²⁻³ Nnajuøøbiøch jaduñ coo hajxy hoy mgudiuñ, coo hajxy møj mmee'xtucy, coo hajxy tøø mdsaaçhpøcy ja'a høøchcøxpä, coo ja'a ca'awiindøybä hajxy mga'a mee'xy. Tøø hajxy mmädia'agyhixy ja'a häna'c-hajxy jaduñ mänaambä cooc tyijy hajxy tøø quiexyii ja'a Diósäm. Tøø hajxy mnajuø'øy coo hajxy yhøhnda'agy. Hoy hajxy mmee'xtucy. ⁴ Je'eçh nga'a hojwiøøby coo hajxy mga'a nijiootpáatänä neby hajxy jecy mhøxtägøøyyän. ⁵ Tii hajxy hoy coo mga'a nijiootpáatänä. Naxy hajxy mdehmñ nijiootpaadøøjät neby hajxy myajtsohndaquian. Pø caj, nøcxáambøchä mceratoyøhñdyhajxy nbøgáanäm. Cähxø'p jaduñ cooçhä nmädia'agy hajxy jaduñ xquia'a panócxänä. ⁶ Je'eds hoy coo ja'a nicolaíta miädia'agy hajxy mga'a mee'xä nébiøch jaduñ nga'a mee'xiän. ⁷ Hamädoowhit hajxy nebiä Dioshespíritu ñäma'ay ja'a hermanodøjc-hajxy maa ja'a juxtujcpä cajptän. Pønjaty mäjädaacp, je'eçhä cuhdujt hajxy nmo'owaamby coo hajxy jim ñøcxät maa ja'a Dioswiinduumän. Jimä tøømdsa'am hajxy jiøø'xa'añ ja'a jugyhajtyejpä."

⁸ 'Jaduñä Diosquexy myajnäjaayó'øwät ja'a tøø quiexyíijäbä maa ja'a hermanodøjc-hajxiän jim Esmirna. "Ja'a Jesucristo, ja'a jayøbajtpä je'e møødä høxhaambä. Tøø hijty yho'ogy; tøø jádähooc jiuypjøjtägach. Je'eds jaduñ mänaamb: ⁹ Nnajuøøbiøch jaduñ coo hajxy mjaançh tehñ chaachpøcy, coo hajxy mjaançh tehñ yhäyoy. (Høøch mijts ja'a hoyhajt ja'a weenhajt nmooby.) Nnajuøøbiøch jaduñ coo mijtsä judíoshajxy haxøøg xñänømy. Jue'e hajxy jaduñ, ja'a møjcu'ugongä miädia'agy hajxy miäbøjcäp. Ja'a hóybäc tyijy hajxy je'eduhñ wyi'i miäbøjpy; cab jaduñ ñä'ä tóyyäbä. ¹⁰ Cab hajxy mdsähgø'øwät hoy hajxy nej cu mja jat cu mja habet. Myajtsumaamb hajxy näje'e ja'a møjcu'ugongcøxpä. Xñä'ä hijxmdsaamb hajxy jaduñ pø tøyhajt hajxy jaduñ mjaançh mabøcy. Majcxøøyyä hajxy mdsaaçhpøga'añ. Cooçhä nmädia'agy hajxy hamuumdu'joot xquiudiúunät, hoy hajxy cu mja ho'og, høøch mijts ja'a cuhdujt nmo'owaamby coo hajxy jim mnøcxät Dioswiinduum. ¹¹ Hamädoowhit hajxy waambä Dioshespíritu ñäma'ay ja'a hermanodøjc-hajxy maa ja'a juxtujcpä cajptän. Pønjaty mäjädaacp, cab hajxy ñä'ägädä tsaächtiuna'añii ja'a Diósäm; cab hajxy piäda'aga'añii møjcu'uhaam."

¹² 'Jaduñä Diosquexy myajnäjaayó'øwät ja'a jim tøø quiexyíijäbä maa ja'a hermanodøjc-hajxiän jim Pérgamo: "Ja'a Jesucristo yhaawjooty ja'a pejyhespada miøødä, mejtsnaxä jiøjpä. Je'eds jaduñ mänaamb: ¹³ Nnajuøøbiøch cooçh mijts nmädia'agy hoy xquiudiunä homiänaajä, hoyyä Satanás jim jia gobiernähaty maa mijts mhitiän, hoyyä Antipas jim tøø jia yagho'ogyii. Paady yagho'cä cooçh nmädia'agy hijty xya-jwa'xä. Ni wéeñtiøch nmädia'agy hajxy xquia'a høxhixä. ¹⁴ Je'eçh mabøcy nga'a hojwiøøby coo häna'c wiingmädia'agy hajxy näje'ejaty yajñähixø'øy nebiä Balaam jecy yajñähixøøyyän. Je'edsä Balaam jøjcapxøøyy coo ja'a judíoshajxy ñäma'awøøjät cooc tyijy jaduñ yhooyä coo hajxy ñiyhamigähamädoowøøjät, coo hajxy quia'y yhú'ugät tijaty hajxy tøø yoxy maa ja'a quepychechwiinduumän. ¹⁵ Jii häna'c-hajxy näje'ebä, cabä nicolaíta miädia'agy hajxy ñajtshixø'øwaanä. Cábøch mabøjñäbä ja'a mädia'agy jaduñmäbä nmee'xy. ¹⁶ Weenä mädia'agy jaduñmäbä hajxy ñajtshixø'øy. Pø caj, nøcxáambøch nmädsibø'øwa'añ pønjaty jim haxøøg yajñähixøøby maa mijtsän. Hädaa pejyhespada

yaaby nmóødpøch nhaawjooty, hädáajøch nmädsiptunaamby. ¹⁷ Mhamádoowhídäp hajxy waambä Dioshespíritu ñäma'ay ja'a hermanodøjc-hajxy maa ja'a juxtujcpä cajptän. Pønjaty mäjädaacp, je'eçh nyajcayaamby ja'a maná jim yu'uçhpä. Móødøçhä poobtsaa nmo'owa'añ. Jimä jemyxiøø yuugjaayä poobtsaanähgøxp. Ni pøn jaduhñ quia'a høxcapy quia'a najuø'øy. Jagooyyá yhøxcapy ja'a tøøbä mio'oyíjábä.”

¹⁸ 'Jaduhñä Diosquexy myajnäjaayó'øwät ja'a jim tøø quiexyíjábä maa ja'a hermanodøjc-hajxiän jim Tiatira; “Ja'a Jesucristo, jaduhñä wyiin quiähxø'øgy nebiä jøønhaayän. Jaançh tehñ yhaamb jaançh tehñ chämaambä tiecy néjjiämä hobiuajt coo mbó'odät. Jaayá'ayäts jaduhñ mänaamb: ¹⁹ Nnajuøøbiøch jaduhñ coo hajxy hoy mniçhogyii, coo hajxy hoy mmäbøcy, coo hajxy hoy mgudiuñ, coo hajxy møj mjaançh tehñ miee'xtucy. Jaduhñhöch nnajuøøbiä coo hajxy jabom-jabom maas hojiaty mgudiuñ. ²⁰ Je'eçh mäbøcy hoy nga'a mänijwiøøyyäp coo ja'a to'oxiøjc jii tu'ug maa mijtsän ja'a xøhajpä Jezabel. Ja'a Dioscøxpäc tyijy miädia'agy. Pero xjiøjcapxøøyyäbøch nmoonsähajxy. Jaduhñ yhöhñdaacpä cooc tyijy yhooyä coo hajxy ñiyhamigähamädowøøjät, coo hajxy quia'y yhú'ugät tijaty hajxy tøø yoxy maa ja'a quepychechwiinduumän. ²¹ Tøøçhä Jezabel mayhooc nja näma'ay coo ja'a mädia'agy jaduhñbä ñajtshixøøñät. Pero cab jaduhñ ñä'ägädä najtshixø'øwa'añ. ²² Nyajpa'ambedáambiøch je'eduhñ møødä yhamigohajxy, pø cabä yhaxøøgcuhdujt hajxy ñajtshixø'øwa'añ. Hoyhöyhøch hajxy nyajtsaaçhpøga'añ. ²³ Ngøxy pøgáanäbøçhä yhuungä jiuçyhajthajxy. Jaduhñä hermanodøjc-hajxy nägøxiä ñajuø'øwa'añ maa ja'a juxtujcpä cajptän cooçhä wyiinmahñdy hajxy nnajuøøyyä. Coo hajxy hoy mguhdujthädät, nmo'owáambiøçhä hoyhajt ja'a weenhajt hajxy jaduhñ. Pø cabä, nyajtsaaçhpøgáambiøch hajxy jaduhñ. ²⁴ Pønjaty jim jaac hijp Tiatira, ja'a haxøøgmädia'agy hajxy ca'a panøcxpä, ja'a Satanás miädia'agy hajxy ca'a panøcxäbä, cábøch hajxy waamb nhanehmnä. (Tøyhájtäc tyijy ja'a Satanás miädia'agy jaduhñ.) ²⁵ Jagóoyyøch hajxy njaac näma'ay coo hajxy hoy mgudiúnät neby hajxy naxy mnä'ägädä cuhdujthatiän, høxtä cóonøch yaa ngädaactägätsät. ²⁶ Pønjaty mäjädaacp, pønjátyhøçhä nmädia'agy hoy xyajtúunäp homiánaajä, je'eçhä cuhdujt hajxy nmo'owaamby coo hajxy guiobiernähädät wiinduhmyhagajpt, ²⁷ nébiøch nDeedy xquihdujtmooyän. Møcä cuhdujt hajxy miøødhada'añ. Coo ja'a miädia'agy hajxy quia'a mäbøjcäxät, manit hajxy chaächtuna'añii, ja'a hajxy ca'a mäbøjpä. Jaduhñ hajxy chaächtuna'añii néjjiämä tu'ts mwojpú'uwät varillaam. ²⁸ Nmo'owáambiøçhä jaxiøøm hajxypä. ²⁹ Mhamádoowhídäp hajxy waambä Dioshespíritu ñäma'ay ja'a hermanodøjc-hajxy maa ja'a juxtujcpä cajptän.”

3

¹ 'Jaduhñä Diosquexy myajnäjaayó'øwät ja'a jim tøø quiexyíjábä maa ja'a hermanodøjc-hajxiän jim Sardis; “Ja'a Jesucristo, je'edsä Dioshespíritu møødhajp ja'a juxtujcpä, møødä madsa'a juxtujcpä. Je'eds jaduhñ mänaamb: Nnajuøøbiøch cooçh nmädia'agy hajxy xquia'a yajtuunä, hoy häna'c-hajxy jia mäna'añ cooc tyijy mijts hoy mgudiuñ. ² Naxiä mwiinmahñdy hajxy mdehñ yajmédsät. Cabä Diosmädia'agy hajxy hoy mjaty cudiuñ. Je'eçh jaduhñ nja tsojpy coo hajxy pedyii mgudiúnät, coo hajxy jaduhñ mga'a nä'ägä tu'udägóyyät. ³ Mjahmiédsäp ja'a homiädia'agy hajxy jaduhñ, ja'a hajxy hijty tøø mhabøquiäbä. Je'eds hajxy myajtúunäp tehngajnä. Najtshixøøñä ja'a mhamdsoo wiinmahñdy hajxy jaduhñ. Pø cabä, jaguiápxyhøch mijts nyajcumädowät. Cab hajxy hánajty mnajuø'øy mänáajøch mijts nyajcumädowa'añ. ⁴ Jim häna'c näje'e maa mijtsän jim Sardis, cab hajxy nej jiatcø'øy. Coo hajxy hoy wiädity, páadyhøch hajxy xmiøødwädita'añ poobwitmøød. ⁵ Pønjaty mäjädaacp, poobwit hajxy miøødhadaamby. Cáboçhä xiøøhajxy nbo'odaanä maa hajxy myiñän cujaay librojooty. Jim hajxy ñøcxa'añ maaçh nDeediän, maa ja'a Diosmoonsän. Mänítøch hajxy jim ngapxpaada'añ, pønjetiä xiøø hánajty miimb cujaay librojooty. ⁶ Mhamádoowhídäp hajxy waambä Dioshespíritu ñäma'ay ja'a hermanodøjc-hajxy maa ja'a juxtujcpä cajptän.”

⁷ Jaduhnä Diosquexy myajnäjaayó'owät ja'a jim tøø quiexyíjábä maa ja'a hermanodøjc-hajxiän jim Filadelfia: "Ja'a Jesucristo, cabä tii pojpä tii cädieey miøødä. Ja'a tøyhåjtäts jaduñ ñä'ägä møød. Miøødhåjtäbä rey David yhawaatst je'eduhñ. Coö hånajty tii tøø yaghawa'açh, ni pøn jaduñ quia'a hagó'owät. Y coö hånajty tii tøø yhawägüiich, ni pøn jaduñ quia'a yaghawá'adsät. ⁸ Jaayá'ayäts jaduñ mänaamb: Nnajuøøbiøch coöch nmädia'agy hajxy hoy xyajtuunä, hoyyä møcmäjaa hajxy jaduññtiäbaady mga'a ja møødä. Jaduhñhøch nnajuøøbiä coöch mijtsä nxøø xquiapxpáatäbä. Páadyhøch mijts jaduñ nguhdujtmø'oy coö hajxy jim mnócxät Dioswiinduum. ⁹ Pønjetiä møjcu'ugong ja'a miädia'agy jaduñ mäbøjcäp, ja'a judíoshajxy, jaduñ hajxy miänaambä cooc tyijy ja'a Diosmädia'agy hajxy hoy pianøcxpä. Cab jaduñ ñä'ä tóyyäbä. Nä'ä hønndaacp hajxy jaduñ. Nyajmedsáambiøch hajxy maa mijts mwiinduumän. Mänitøch hajxy jim nyagijcäda'aga'añ, neby hajxy jaduñ ñajuó'owät coöch mijts jaduñ ndsocy. ¹⁰ Tøøch nmädia'agy hajxy xyajtuunä coö hajxy mmee'xtúgät. Páadyhøch mijts ngüeendähada'añ mänaa ja'a tsø'ty ja'a häyohn hånajty ñaxa'añän wiinduhmyñaaxwiin. Mänitä jäya'ayhajxy nägøxiä chaachpøga'añ. ¹¹ Mobädájpech jii by nhäda'aga'añ. Tehñgajnä hajxy jaduñ hoy mgudiúnät. Jaduhnä cuhdujt hajxy ni pøn xquia'a pójcät coö hajxy jim mnócxät maa ja'a Dioswiinduumän. ¹² Pønjetiä mäjädaacp, cøjxta'axiøø hajxy jim yhida'añ Dioswiinduum. Ni mänaa hajxy jim quia'a tsoonaannä. Ja'a nDeedyhøchä xiøø, jímhøch nyuugjaayaana maa ja'a wyiinnähgøpcøxphajxiän, møødä Dioscajptä xiøø, møød høøch njemyxiøø. Ja'a Dioscajptä, ja'a Jerusalén jemybiä je'e. Jim je'e choona'añ tsajpootyp maa ja'a Diosän. ¹³ Mhamädoowhídäp hajxy waambä Dioshøspiritu ñäma'ay ja'a hermanodøjc-hajxy maa ja'a juxtujcpä cajptän."

¹⁴ Jaduhnä Diosquexy myajnäjaayó'owät ja'a jim tøø quiexyíjábä maa ja'a hermanodøjc-hajxiän jim Laodicea: "Ja'a Jesucristo, tøyhajtyejp je'e. Ni mänaa quia'a hønnda'agy. Je'e cøxiä yajtsohndaac mäduhñtiä Dios yhädiuun. ¹⁵ Jaayá'ayäts jaduñ mänaamb: Nnajuøøbiøch jaduñ coöch nmädia'agy hajxy hamuumduljoot xquia'a panøcxä, hoy hajxy mja mäna'añ cooc tyijy hajxy mmäbøcy. Maas hoy coö hajxy cu mnä'ägä mänaañ coö hajxy mga'a mäbøcy. ¹⁶ Entonces, coö hajxy hamuumduljoot mga'a mäbøcy, páadyhøch mijts jaduñ nxøøghada'añ. ¹⁷ Jaduhñ hajxy mmäna'añ cooc tyijy hajxy tii mga'a nä'ägädä yajmaajiaty, cooc tyijy hajxy hoy mjaançh tehñwiädity. Pero cab hajxy jaduñ mnajuø'oy coö hajxy tijaty mga'a møødä. Jaduhñ mäwínäts hajxy mhity nebiä häyoobän, nebiä wiindspän, nebiä nähwa'ads høxwa'adspän. ¹⁸ Nhuuc yajmädoogyhøch mijts oro hoybä, møødä poobwit, møødä wiindsooy. Jaduhñ hajxy hoy mhíxät. Coöch mijts xmiänuu'xtá'agät, mänitøchä mbojpä mgädieey hajxy nyajnähwáatsämät. Jaduhñ hajxy hoy jim mnócxät Dioswiinduum; cab hajxy jaduñ mnä'ägädä tsähdiúnät. ¹⁹ Ndsøjpiøch mijts, pero pø cáboch nmädia'agy hajxy xquiudiunaana, mänit hajxy nyajcumädowa'añ. Nmägapxaamby nhane'emaamby hajxy jaduñ. Entonces, naxiä mhaxøøgcuhdujt hajxy mdehñ ñajtshixó'owät. Hix, coö hajxy jaduñ mnä'ä cumädówät. Hamuumduljootä nmädia'agy hajxy xquiudiúunät. ²⁰ Huuc hamädoowhit hajxy, nja wi'i miänuu'xtáacypiøchä jäya'ayhajxy jaduñ coöch hajxy xjiøjpøgó'owät. Mänitøchä piojpä quiädieey hajxy nyajnähwáatsät. Mänitøch hajxy jaduñ nmøødhijnät tu'ugmädia'agy. ²¹ Pønjetiä mäjädaacp, nmo'owáambiøchä cuhdujt hajxy jaduñ coöch hajxy xmiøødgobiernähádät. Jaduhñhøch tøø nmäjädaacp; páadyhøch nDeedy jaduñ nmøødgobiernähajpä. ²² Mhamädoowhídäp hajxy waambä Dioshøspiritu ja'a hermanodøjc ñäma'ay maa ja'a juxtujcpä tsajtøjcän."

4

¹ Mänitøchä tsajpootyp nwiinhijxy coö yhawa'adsä. Mänitøch jaaya'ay xmiägápxcombä, ja'a jayøbåjthøch hånajty tøøbä xyhuuc mägapxpän. Jaduhnä yo't yajmädooy nebiä xuuxtän. Mänitøch xñämaayy:

—Huuc pet yam; nhuuc yaghíxyhøch miich tii jaduñ jadäänäp.

² Mänítøchä Dioshespíritu xñägädaacy. Mänítøchä Dios nwiinhijxy; jim hänajty yhäña'ay tsajpootyp. ³ Haamb tsämaambä Dios hänajty nebiä tsaa hoybän, nebiä jaspen, nebiä cornalinan. Yajxonä hi'inch hänajty quiähxø'ogy maa ja'a Dios hänajty yhäña'ayän. Nebiä esmeraldatsaajän hänajty yhañ chämamy. ⁴ Jímhøchä majjäya'ay nhijxy nähii'xmädaaxc. Wäditiä ja'a Dios hajxy hänajty jiuhhäñaawiädity. Poobwitmøød hajxy hänajty. Oro hajxy hänajty quiuhjenhajpy. ⁵ Jimä wädsuc hänajty piädsømy maa ja'a Dios hänajty yhäña'ayän. Jädijpä hänee hänajty jim. Juxtujcä jøøn hänajty jim tioy Dioswiinduum. Dioshespíritu je'eduhñ ja'a juxtujcpä. ⁶ Haa jim ja'a Dioswiinduumä, jaduñnä mejy hänajty jim quiähxø'ogy nebiä hijxt jaanč tehñ tiø'xypän.

Mädaaxcä animal ja'a Dios hajxy hänajty jim jiuhhäñaawiädity. Cøxiä ñi'x quiopc-hajxy hänajty wyiinmøødä, jayøjp jioøxcø'ømhaambiajpy. ⁷ Tu'ug hänajty quiähxø'ogy nebiä leóngän; tu'ug nebiä wajjän; tu'ug nebiä jäya'ayän; tu'ug nebiä jäyøobiä wiistän. ⁸ Haagä queectmøød hajxy hänajty tädujcjaty. Cøxiä ja'a wiin hajxy hänajty miøødä møød nähgøxp møød joodooty. Xøømdsuhñ hajxy hänajty wyl'i miäna'añ:

Jaanč tehñ wia'adsä Dios;

je'e hajxy nWiindsøn_hájtäm. Cøxiä mäjaa miøødä;

homiänaajä ñä'ägädä hity cøjxta'axiøø.

⁹ Jaanč hijpä Dios cøjxta'axiøø. Naaghoocä animal ja'a Dios hajxy wyiingudsähgø'øy, ¹⁰ mänitä majjäya'ay ja'a Dios hajxy hänajty wyiinjjicäda'agy, ja'a nähii'xmädaaxpä. Mänitä Dios hajxy hänajty jiaanč tehñ wyiingudsähgø'øy. Mänit hajxy hänajty wyl'i ñiguiuhjeendu'udyii. Mänitä quiuhjén hajxy hänajty jim ñajtsconø'øy Dioswiinduum. Mänit hajxy hänajty miäna'añ:

¹¹ Dios, højts miich nWiindsøn_hajpy.

Hahixøøby jaduñ coo højts miich nwiingudsähgø'øwät, coo højts nmänä'anät coo miich ja'a mäjaa mmøødä, coo miich mmøjjä mjaančhä.

Cøxiä wiinä miich mjaanč tehñ quiunuu'xy mjaanč tehñ piäda'agy.

5

¹ Mänítøchä Dios nhijxy coo nocy hänajty quiø'øbøc-haty haxädsach, ja'a quiø'ø hahooyhaampiä. Mejtsnaä nocy hänajty jiaayä. Juxtujc-hit hänajty yhahoochä.

² Mänítøchä Diosmoonsä tu'ug nhijxy, ja'a mäjaa jaanč tehñ miøødpä. Mänit je'e miänaañ:

—Pøñ cuhdujt møød coo yø'ø nocy yhahoo'tstú'udät.

³ Ni pøñ cuhdujt hänajty quia'a møødä coo ja'a nocy hajxy yhahoo'tstú'udät, coo hajxy yhéebät, ni ja'a jimä tsajpootypä, ni ja'a hädaa yaabä naaxwiimbä, ni ja'a jiipiä møjcu'uhaambä. ⁴ Mänítøch njaanč tehñ jioøyy, coo pøñ cuhdujt hänajty quia'a møødä coo ja'a nocy hajxy yhéebät, coo hajxy quiápxät. ⁵ Mänítøchä majjäya'ay tu'ug xñämaayy:

—Ca'a mjøøñä. Ja'a Jesucristo, je'eds mäjadaac. Je'e cuhdujtmøød coo yø'ø nocy yhahoo'tstú'udät. Ja'a David ja'a yhap yhoc je'e, ja'a jecy jim gobiernähájtäbä Judánaaxooty. Paadiä Jesucristo xiøhaty ja'a León de Judá.

⁶ Mänítøchä Meeghuung tu'ug nhijxy. Jim hänajty tiäna'ay Dioswiinduum, maa ja'a animal nämädaaxpä, maa ja'a majjäya'ay nähii'xmädaaxpä. Cähxø'p hänajty coo hänajty tøø yagho'ogyii. Juxtujcä quiaa'pt hänajty; juxtujcä wyiin hänajtypä. Haa ja'a wyiin juxtujcpä, ja'a Dioshespírituhajxy hänajty je'eduhñ ja'a juxtujcpä. Jim hajxy hänajty wiädity wiinduhmyhagajpt. ⁷ Mänitä Meeghuungä nocy hoy piøjtsoy. Ja'a Dios jaduñ yejc; yhahoguiø'øhaamby hänajty tøø quiø'øbøc-haty. ⁸ Mänitä Meeghuung wyiinjjicädaacä. Ja'a nämädaaxpä animalhajxy mäwiinjjicädaac møødä nähii'xmädaaxpä majjäya'ayhajxy. Cødu'ugä harpa hajxy hänajty miøødä. Jimä poom hajxy hänajty miøødä orojoønebøhñdiooty. Haa ja'a poom jaduñmä, ja'a Diospa'yaaxøøc je'eduhñ. Ja'a Diosmädia'agy hajxy mäbøjpä, je'edsä Dios hajxy hänajty pa'yaaxp.

⁹ Mänitä jemyhøy hajxy yhøøyy:

Miičh cuhdujtmøød coo yø'ø nocy mhahoo'tstú'udät.

Miičh højts xñähho'tuut. Paady højts cuhdujt nmøødä coo højts yaa nhídät Dioswiinduudum.

Wiinduhmyhagajpt højts ndsooñ. Cøjhayuuc højts ngapxy.

¹⁰ Miičh højts cuhdujt xmiooyy coo højts jim ngobiernähädät naaxwiin.

Diostuung højts ndunaamby nebiä teediän.

¹¹ Mänitøchä Diosmoonsä nhijxy jaančh tehṃ miay. Ja'a Dios hajxy hānajtj jiuhdānaawiädijpy møødä animalhajxy møødä majjäya'ayhajxy. ¹² Mänitä Diosmoonsähajxy møc jiaančh tehṃ yaaxy:

Yø'ø Meeghuung, yø'ø tøø yagho'ogyii.

Yø'øds cuhdujtmøød coo jiaančh tehṃ wyiingudsähgø'øwøjät.

Hahixøøby jaduṃ coo højts nmānānāmät coo cøxiä wiinä miøødä, møødä mājaa, møød coo quiuhwijjiä, møød coo miøjjä jiaančhā.

¹³ Mänit hajxy miānaañ nāgøxiä mädyiijaty ja'a Dios tøø quiunuu'xy, ja'a jimbā tsajpootypä, møødä hädaa yaabä naaxwiimbä, møødä jiipiä møjcu'uhaambä, møødä jiipiä mejjiootypä:

Tsøgä Dios hajxy wiingudsähgøøyyām møødä Meeghuung.

Cøjxta'axiøø hajxy yhida'añ møj jaančh. Møjmäjaa hajxy miøød.

¹⁴ Mänitä nämädaaxpä animalhajxy miānaañ:

—Tsøc.

Mänitä nähii'xmädaaxpä majjäya'ay ja'a Dios hajxy wyiinijcādaacy. Wyiingudsähgøøyy hajxy jaduṃ.

6

¹ Mänitøchä Meeghuung nhijxy coo ja'a nocy tu'hit yhahoo'tstuuty ja'a hānajtj juxtujc-hithahoočhpä. Mänitä animal tu'ug miānaañ:

—Miṃ huug hiṃ.

Coo ja'a animal jaduṃ miānaañ, jaduṃ yajmädooyy nebiä hānee jiäditiän.

² Mänitøchä craa tu'ug nhijxy coo tøpxt hānajtj tu'ug miøødä. Poobcuaañähgøxp hānajtj yhäña'ay. Mänitä cuhjén miooyyā. Mänit tiu'ubøjcy tsiptuumbä. Mäjäda'agaamb hānajtj jaduṃ.

³ Mänitä Meeghuung ja'a nocy yhahoo'tstuuty ja'a miämetsc-hithahoočhpä. Mänitä miämetspä animal miānaañ:

—Miṃ huug hiṃ.

⁴ Mänitøchä craa tu'ug nhíjxcombä. Tsaptscuaañähgøxp hānajtj yhäñaabiä. Mänitä cuhdujt miooyyā coo ja'a jäya'ayhajxy nøcxy yajnimiädsibø'oyii hädaa yaabä naaxwiin, coo ja'a jäya'ayhajxy nøcxy yajniyagho'ogyii. Mänitä yoñhespada tu'ug miooyyā.

⁵ Mänitä Meeghuung ja'a nocy yhahoo'tstúutcombä ja'a miädägøøghithahoočhpä. Mänitä miädägøøgpä animal miānaañ:

—Miṃ huug hiṃ.

Mänitøchä craa tu'ug nhíjxcombä coo ja'a quipxt hānajtj tu'ug miøødä. Jiñg-wiaañähgøxp hānajtj yhäñaabiä. ⁶ Mänitøchä mädia'agy nmädooyy maa ja'a mädaaxpä animalhajxy hānajtjān:

—Møjyuu jaduṃ jadāanāp. Ja'a trigo tu'kilobä, mägooxmil chowhada'añ. Y ja'a cebada tægøøgkílobä, jaduṃ chowhadaambä mägooxmil. Pero cap yø'ø hon myaghäyówät ni yø'ø vino.

⁷ Mänitä Meeghuung ja'a nocy yhahoo'tstúutcombä ja'a miämädaaxc-hithahoočhpä. Mänitä miämädaaxpä animal miānaañ:

—Miṃ huug hiṃ.

⁸ Mänitøchä craa tu'ug njaac híjxcombä, ja'a hānajtj xøhajpä ja'a mäyagho'pä. Cuaañähgøxp hānajtj yhäña'ay ja'a poob-lómnäbä. Høxhaamä møjcu'uhaambä hānajtj piamiñ. Mänitä cuhdujt hajxy miooyyā hädaa yaabä naaxwiin coo jäya'ay

hajxy yaghó'ogät tu'mädaaxc-hitpä. Hadsip hajxy hänajty miäyagho'oga'añ, yuuhaam, pa'amhaam, caahaam.

⁹ Mänitä Meeghuung ja'a nocy yahoo'tstúutcombä ja'a miämägooxc-hithahoočhpä. Mänitöčhä háañmähajxy jiiby nhijxy altarpa'c, ja'a hajxy hänajty tøø yagho'ogyíjábä ja'a Diosmädia'agyquiøxpä. Paady hajxy yagho'cä coo hajxy hänajty hoy tøø jiaančh tehñ quiudiuñ. ¹⁰ Mänit hajxy møc yaaxy:

—Dios, miich hõjts nWiindsøn_hajpy. Miičhä tøyhajt mmøød. Mänaa hõjts nnø'ty xyaghawiimbjätät jiiby naaxwiin.

¹¹ Mänitä poobwit hajxy cødu'ug miooyä. Mänit hajxy ñämaayyä coo hajxy ween jiaac poo'xy hõxtä coonä hänajty pedyii tøø yagho'ogyii ja'a hermano ja'a Jesucristo hajxy mäduumbä.

¹² Mänitä Meeghuung ja'a nocy yahoo'tstúutcombä ja'a miädädujc-hithahoočhpä. Mänitä hujx møc ñajxy. Mänitä xøø jyiñøoyy nebiä jiñwitän. Mänitä po'o quiähxø'cy nebiä nø'tiän. ¹³ Mänitä madsa'a tsajtcøxpä quiahya naaxwiin jaančh tehñ miay; jaduñ quiahya nebiä piidstøøm piojca'ayän. ¹⁴ Mänitä tsajt yhadägooyøøñä nebiä nocy yhaxädsachän. Mänitä tuñ cøxiä wiingtuum ñäl'ä yajnøcxä møødä naax hänajty hijpä mejyquiujc. ¹⁵ Mänitä jäya'ayhajxy nägøxiä jiiby ñiguiuyu'tsä tsaajutjooty, møødä jimhä tsaadunjootypä, møødä reyhajxy, møødä jäya'ayhajxy mõjhajpä, møødä mäyøøjäya'ayhajxy, møødä soldadowiindsøn_hajxy, møødä jäya'ayhajxy ja'a mõjcuhdujtmøødpä, møødä nä'ä pajäya'ayhajxy. ¹⁶ Mänitä tsaadun hajxy ñämaayy:

—Hõjts nähgahbéjtäc. Jaduñ hõjtsä Dios xquia'a híxät ja'a jim häñaabiä tsajpootyp. Jaduñ hõjtsä Meeghuung xquia'a yajtsaačhpøgät.

¹⁷ Tøø yhabaatnä coo hõjts hajxy xyajtsaačhpøgaannä nägøxiä. Cab hõjts hoy nmee'xtuga'añ.

7

¹ Mänitöčhä Diosmoonsä mädaaxc nhijxy coo hajxy hänajty jim tiäna'ay hanidiuhmjaty mäduñjatiä naaxteec. Mädaaxnax hajxy hänajty tiäna'ay. Yhadujpiä poj hajxy hänajty, jaduñ quia'a pójnät naaxwiin ni mejywyiing ni quepyquiøxp. ² Mänitöčhä Diosmoonsä tu'ug jadähooc nhíjxcombä coo hänajty piedø'oy xøøbädsømypiä, coo ja'a Diossello hänajty miøødä. Mänit hajxy møc miøjyaaxä, ja'a nämädaaxpä, ja'a hajxy hänajty tøø quiuhdujtmø'oyíjábä coo hajxy quiädiéeyät, coo hajxy cøxypänejpiä jiatcø'owät hädaa yaabä naaxwiin møødä jim mejjiooty. Mänit hajxy ñämaayyä:

³ —Cab hajxy mgädiéeyät jim naaxwiin ni jim mejjiooty, ni yø'ø quepychaa hajxy nej mga'a túnät, hõxtä coonä hõjtsä jäya'ayhajxy hänajty tøø nseñapäda'agy wyiinnähgopcøxp, ja'a hajxy Diosmäduumbä.

⁴ Mänitöčhä mäčhohnd nmädooyy coo ja'a Israel yhap yhoc hajxy hänajty yajseñapäda'aga'añ nämägo'x-cujuxychägui'xmädaaxmilpä. Nämajmetscjaty hajxy hänajty yajseñapäda'aga'añ. ⁵ Nämajmejtsmil hajxy hänajty yajseñapäda'aga'añ ja'a Judá yhap yhoc-hajxy, møødä Rubén yhap yhoc-hajxy, møødä Gad yhap yhoc-hajxy, ⁶ møødä Aser yhap yhoc-hajxy, møødä Neftalí yhap yhoc-hajxy, møødä Manasés yhap yhoc-hajxy, ⁷ møødä Simeón yhap yhoc-hajxy, møødä Leví yhap yhoc-hajxy, møødä Isacar yhap yhoc-hajxy, ⁸ møødä Zabulón yhap yhoc-hajxy, møødä José yhap yhoc-hajxy, møødä Benjamín yhap yhoc-hajxy.

⁹ Mänitöčhä majiäya'ay nhijxy. Wiinduhmyhagajpt hajxy hänajty chooñ. Cøjhayuucjaty hajxy hänajty miädia'agy. Ja'a Dios hajxy hänajty jim jiuhdänaawiädijpy maa ja'a Meeghuungwiinduumän. Jaančh tehñ miay hajxy hänajty jaduñ; cab hajxy hänajty hoy yajmäčhowa'añ. Poobwitmøød hajxy hänajty. Møødä xi'iwhaay hajxy hänajty quiø'ogaphaty. ¹⁰ Mänit hajxy nägøxiä yaaxy møc:

Xyajnähaats hõjtsä Dios møødä Meeghuung. Gobiernähajpä Dios jaduñ.

¹¹ Nägøxiä ja'a Diosmoonsä ja'a Dios hajxy hänajty jiuhdänaawiädity. Møødä majjäya'adiøjc-hajxy hänajty jiuhdänaawiädjätäbä møødä animalhajxy ja'a nämädaaxpä.

Mänitá Dios hajxy wyiinjjicádaacy; wyiingudsähgøøyy hajxy jaduhñ. ¹² Mänit hajxy miänaañ:

Tsögä Dios hajxy jaanč tehñ wyiingudsähgøøyyäm cøjxta'axiøø.

Tsög hajxy mänáañäm coo miøjjä jiaančhä, coo quiuhwijjiä, coo miäjaamøødä.

Tsög hajxy nämáayyäm: “Dioscujú'uyäp.”

¹³ Mänitøchä majjäya'ay tu'ug xmiäyajtøøyy:

—Pønäda'a yø'øduhñ poobwitmøød. Maa hajxiäda'a chooñ.

¹⁴ Mänitøch nhadsooyy:

—Wiindsøn, cábøch nnajuø'øy. Miičhäda'a mnajuøøby.

Mänitøch xñämaayy:

—Yø'ø jäya'ayhajxy, tøø hajxy jiaanč tehñ chaächpøcy. Tøø hajxy ñähho'tu'udyii ja'a Meeghúungäm. Jaduhñ hajxy tøø yajnähwáatsäbä. ¹⁵ Paady hajxy jim tiäna'ay Dioswiinduum. Xøømdsuhmä Diostuung hajxy jim tiuñ. Cueendähájtäp hajxy ja'a Diósäm. ¹⁶ Cabä yuu hajxy mänaa yagjuø'øwaannä, ni cab hajxy tiødsø'øwáañänä. Cab hajxy xiøøno'ogáañänä, ni cab hajxy yhanho'ogáañänä. ¹⁷ Ja'a Meeghuung, jim yhity maa ja'a Dios yhäña'ayän. Je'e hajxy cweendähadaamb yajxon. Cab hajxy jiø'øwaannä xiuudsaañä je'eguiøxpä coo hajxy yajxoonda'aga'añii ja'a Diósäm.

8

¹ Mänitá Meeghuung ja'a nocy yhahoo'tstúutcombä ja'a miäjuxtujc-hithahoočhpä. Mänit jim yhamooñ tsajpootyp cupc-hora. ² Mänitá Diosmoonsä juxtujc nhijxy coo ja'a Dios hajxy hánajty jim wyiindäna'ay. Mänitá xuuxť hajxy miooyyä cødu'ug. ³⁻⁴ Mänitá Diosmoonsä wiingpä miejtspä. Jimä orojøønebøhñdy hánajty miøødä. Mänit hoy tiänaaxiøpy maa ja'a orohaltar mäwiingonän, jim mädøyyä maa ja'a Dios hánajty yhäña'ayän. Mänitá poom may miooyyä coo jim jiógät ja'a orohaltarnähgøxp. Coo'pä ja'a poomjoc hánajty jim maa ja'a Diosän. Jimä Dios hajxy hánajty pia'ya'axy, ja'a Diosmädia'agy hajxy hánajty mabøjpä. ⁵ Mänitá Diosmoonsä ja'a jøønebøhñdy quionø'cy. Mänitá jøømbajc hoy quiuwobø'øy, ja'a hánajty jim hijpä maa ja'a altarän. Mänit quiuhga'tsnajxy naaxwiin. Mänit wiädsujcy møødä hänee yaaxy. Mänitá hujx ñajxy.

⁶ Haa ja'a näjuxtujcpä Diosmoonsähajxiä, ja'a xuuxťmøødpä cødu'ugä, mänit hajxy ñiyhahixøøyyänä coo hajxy hánajty xiu'uxa'añ.

⁷ Mänit tu'ug xiuuxy. Mänitá caandøøtstuu quiahy hädaa yaabä naaxwiin møødä jøøñ møødä nø'ty. Mänitá naaxwiin tiooyy ja'a hánajty miädägøøghitpä cøxiä, møødä quepychaa møødä hujtshaay.

⁸ Mänitá Diosmoonsä ja'a miämetspä xiuuxy. Mänitádsä tun crúundäbä hoy quia'ay mejjiooty. Tooby hánajty je'e. ⁹ Mänitá miädøøgpä mejy ñø'tiøøyy. Cøxy ho'c ja'a animalhajxy jaduhñ. Cøjxä barco qyiñ.

¹⁰ Mänitá Diosmoonsä miädägøøgpä xiuuxy. Mänitá madsa'a crúundäbä quiahy jim tsajpootyp. Tooby hánajty je'ebä. Mänit hoy quia'ay maa ja'a miädägøøghitpä mõjnøøjän, maa ja'a miädägøøghitpä nøøgopcän. ¹¹ Jaduhñä madsa'a hánajty xiøhaty Tahñ. Mänitá nøø miädägøøghitpä tiahmøøbiä. Mänitá jäya'ayhajxy may yho'cy.

¹² Mänitá Diosmoonsä miämädaaxpä xiuuxy. Mänitá xøø tu'nax yho'cy maa hánajty yhawijtstuquiän ja'a miädägøøghitpä. Jaduhñä po'o jiajpä møødä madsa'a. Mädaaxc-hora ja'a xøø hánajty quia'a hañ xøøm; mädaaxc-hora ja'a po'o hánajty quia'a hañ coods.

¹³ Mänitøchä wiistä tu'ug nhijxjäyøøyy tsajtcøxp. Mänit møc yaaxy:

—Coo ja'a Diosmoonsähajxy jiaac xú'uxät ja'a jaac tægøøgpä, mänitá jäya'ayhajxy jiaanč tehñ chaächpøga'añ, ja'a hajxy jiiby tsánaabiä naaxwiin.

9

¹ Mänitā Diosmoonsä miämägooxpä xiuuxy. Mänitōchā madsa'a tu'ug nhijxahy, naaxwiin hoy quia'ay. Mänitā madsa'a hawaatst miooyyā coo ja'a jut jaduhñ yhawāguii'tstú'udät ja'a jaančh tehñ quiøøcpä. ² Mänitā jut yhawāguii'tstuuty. Mänitā jøøn joc qui'ixc piädsøømy. Mänit cøxp chajpejty. Mänitā xøø cøjx wyiindägø'øyii. Mänitā tsajt cøjx jiaty jøøn jocjooty. ³ Mänitā mamiu'u jocjooty piädsøømy. Mänit hajxy yaa tiägøøyy jäyøøbiä hädaa yaabä naaxwiin. Mänitā mu'u tøjpt hajxy miooyyā nebiä caa'ptiøjptän. ⁴ Mänit hajxy yhanemä coo hujtshaay hajxy quia'a jøø'xät ni quepychaa. Je'e hajxy tiøbäp pøn jatiä Diosseñä hānajty ca'a møød wyiinnähgopcøxp. ⁵ Coo pøn jaduhñ tiøbøøjät, jaduhñä mu'udøjpt jäwø'øwa'añ nebiä caa'ptiøjpt jäwø'øyän. Mägooxpo'o ja'a mu'uhajxy hānajty miädøba'añ. Pero cabä cuhdujt hajxy miooyyā coo jäya'ay hajxy yaghó'ogät. ⁶ Ja wi'i yho'ogaambä jäya'ayhajxy hānajty, pero cab hajxy jaduhñ ñä'a ho'oga'añ.

⁷ Jaduhñ mäwínädsä mu'uhajxy hānajty quiähxø'ogy nebiä tsiptuumbä cuaayän. Jim hajxy hānajty miøødä quiuhduum nebiä orocuhjenbän. Jaduhñä wyiin jøjphajxy hānajty quiähxø'ogy nebiä ya'adiøjcän. ⁸ Jaduhñä cuhwaay hajxy hānajty miøødä nebiä to'oxiøjcuhwaayän. Jaduhñä tiu'tsthajxy hānajty quiähxø'ogy nebiä leöntu'tstän. ⁹ Nähbujxt cuhbujxt hajxy hānajty nebiä hacxpøjtän. Coo hajxy hānajty jäyøy, jaduhñ hajxy hānajty jäädity nebiä tsiptuumbä cuaaguarretän. ¹⁰ Jaduhñä tøjpt hajxy hānajty miøødä nebiä caa'ptiøjptän. Jaduhñä cuhdujt hajxy hānajty miøødä coo jäya'ay hajxy tiøbät mägooxpo'o. ¹¹ Haa ja'a mu'u wyiindsøn hajxiä, jutjooty hānajty chāna'ay, ja'a jaančh tehñ quiøøcpä. Jegyhajty hijty je'e tiuñ Diosmoonsä; tøø yhøxquejxänä. Abadón hānajty xiøhaty hebreohayuuc-haamby. Apolión hānajty xiøhaty griegohayuuc-haamby. Jaduhñ miädia'agytiägø'øy, ja'a mäyajcuhdägoobiä.

¹² Jaduhñä tsø'ty tu'ug jiajtä. Metscä tsø'ty hānajty quia'a pedyiinä.

¹³ Mänitā Diosmoonsä miädädujcpä xiuuxy. Mänitōchā mädia'agy nmädooyy coo jäya'ay jim quiapxy maa ja'a orohaltarän, jim Dioswiinduum. Hamädaaxteecä orohaltar hānajty. ¹⁴ Mänitā Diosmoonsä miädädujcpä ñāmaayy, ja'a hānajty tøøbä xiu'uxiä:

—Nøcx ja'a Diosmoonsähajxy mädaaxpä mäguejø'øw, ja'a jim cuxochpä maa ja'a Eufratesmøjnøjän.

¹⁵ Mänit hajxy hoy miäguejø'øyii. Mänit hajxy wyiinguejxä coo jäya'ay hajxy yaghó'ogät tu'ug tægøøgpuxy. Jäguemiä hajxy hānajty tøø yajnähdiyii coo hajxy miäyaghó'ogät. Coo ja'a miädädujcpä Diosmoonsä jaduhñ xiuuxy, habaat jaduhñ coo hajxy jiatcø'øwät. ¹⁶ Mänitōch nmädooyy coo mejtsmägo'xmillón soldado hajxy hānajty miøødä; haagä cuaayhäñaaby hajxy hānajty jaduhñ.

¹⁷ Haagä caächpujxtä soldadohajxy hānajty. Jaduhñä pujxt color hānajty miøødä, møødä tsaptspä, møødä hucypiä, møødä pu'tspä. Jaduhñä cuaay quiopc-hajxy hānajty nebiä leóncopcän. Tægøøgtu'u hānajty jiiby piädsøømy yhaawjooty, møødä jøøn, møødä joc, møødä azufre. ¹⁸ Jaduhñä jäya'ayhajxy yaghó'cä ja'a tu'ug tægøøgpuxypä, jøønhaam, joc-haam, azufrehaam. ¹⁹ Jimä cuaay mäjaa hajxy hānajty miøødä maa yhaawhajxiän møødä jiiby maa tiu'tsthajxiän. Jaduhñä tiu'tsthajxy hānajty quiähxø'ogy nebiä tsahñdy-copc møødpän. Ja'a tiu'tsthaama jäya'ay hajxy hānajty yajtsu'učh.

²⁰ Pero ja'a jäya'ayhajxy ja'a mähmøøyyäbä, cabä haxøøgcuhdujt hajxy ñajtshixøøyy. Møjcu'ugong hajxy hānajty jiaančh tehñ wyiingudsähgøøñäp, møødä oronähwopy, møødä platanähwopy, møødä hobijxtnähwopy, møødä tsaahädiuñ, møødä quepychec. Cab yø'øduhmbä ñä'a hixy, ni quia'a mädoy, ni quia'a yo'oy. ²¹ Wi'i jäya'ay-yaghó'pnä ja'a jäya'ayhajxy hānajty. Wi'i miäbädaacnä hajxy hānajty haxøøgwiiinmahñdyhaam. Wiingä tægachä to'oxiøjc hajxy miøødtsäna'ayñä. Møød hajxy hānajty wyi'i mieechñä.

10

¹ Mänítøchä Diosmoonsä tu'ug nhijxy jaančh tehṃ miäjaamøød. Jimṃ hānajty miānacy tsajpootyp. Jocjooty hānajty miānacy. Jimä hi'inčh hānajty miøødä quiuhduum. Jaduhṃnä wyiin jiojṃp hānajty jiajy nebiä xøøjän. Jaduhṃnä tiecy hānajty quiähxø'pä nebiä toobiän. ² Jimä nocyhuung hānajty quiø'øbøc-haty ja'a haxädsajststu'udypä. Mänitä yha hoodiecy piädaacy mejywyiing. Mänitä yhanajtyiecy piädaacy tø'ødstum. ³ Mänit møc yaaxy nebiä leóngän. Mänitä hänee ja'a juxtujcpä yaaxwiimbijty. Capx hajxy jaduhṃ. ⁴ Mänítøch nja tægø'øwaañ cujahbiä waambä häneehajxy quiapxy. Mänítøchä jäya'ay tu'ug xñämaayy jimṃ tsajpootyp:

—Cab jaduhṃ mgujäyät nebiä häneehajxy quiapxiän. Ni pøn jaduhṃ mga'a yajmøød-mädiä'agät.

⁵ Haa ja'a Diosmoonsä hānajty jimṃ tänaabiä mejywyiing møød jimṃ tø'ødstum, mänit yha hooguiø'ø chajxajy. ⁶ Mänit miānaañ:

—Cøjxta'axiøø ja'a Dios ñäl'ägädä hity. Cøxiä quiunuu'xy møødä tsajt, møødä naaxwiin, møødä mejy, hotyehṃ miädyijatiä. Ja'a Dios jaduhṃ mänaamb cooc tøø yhabaatnä. ⁷ Coø yhabaadät coø ja'a miäjuxtujcpä Diosmoonsä xiu'uxa'añ, tøø ja'a Dios hānajty yajtøjaty nebiä quiuguexyhajxy hānajty jecy tøø yhawaanän. Cabä wiinghäna'c yhawaanä; ja'a quiuguexiähajtiä yhawaanä.

⁸ Mänítøchä jäya'ay jimṃ tu'ug xñämáaguiombä tsajpootyp:

—Nøcx ja'a nocyhuung pøjtsow ja'a haxädsajststu'udypä, ja'a Diosmoonsä quiø'øbøc-hajpiä.

⁹ Mänítøchä Diosmoonsä ja'a nocyhuung hoy nmäyujwa'añ cooch xmió'owät. Mänítøch xñämaayy:

—Pøc; pu'uy. Pa'ag mhaawjooty mjuø'øwa'añ nebiä møjtsiinnøøjän. Pero coø jiiṃy quiäda'aga'añ maa mjøø'xytiøjcän, mänit mjuø'øwa'añ coø tiahmä.

¹⁰ Mänítøchä nocyhuung hoy njaančh pøjtsoy. Mänítøch njaančh puhy. Pá'aghøch jaduhṃ njaančh juøøyy nhaawjooty nebiä møjtsiinnøøjän. Pero coø jiiṃy jiaančh cädaacy maačh njøø'xytiøjcän, mänítøch njaančh juøøyy coø tiahmä. ¹¹ Mänítøch hajxy xñämaayy:

—Tsipecøxp mnägapxtägätsät nebiä jäya'ayhajxy jiada'añ yhabeta'añän, ja'a hajxy jimṃ tsänaabiä wiinduhmyñaaxwiin, ja'a hajxy wiinduhmyhayuuc mädiaacpä, møødä gobiernähajxy.

11

¹ Mänítøchä paxyquipxt hajxy xmiøoyy. Mänítøch hajxy xñämaayy:

—Nøcx ja'a Diostøjc quipx møødä altar. Mächow ja'a jäya'ayhajxy, nänaagä Dios hajxy wyiingudsähgø'øy. ² Pero cab jaduhṃ jimṃ mguipxät Diostøghaguuy. Ja'a jäguembä-jäya'ay ja'a cuhdujt hajxy tøø mio'oyii coø hajxy jimṃ guiobiernähädät maa ja'a Dioscajptän juxychägui'xmejtspo'o. ³ Nguexäämbiøchä nguguexy metscä coø hajxy jimṃ miädiä'agät ja'a høøhcøxpä juxychägui'xmejtspo'o. Jiñwitmøød hajxy wiädita'añ.

⁴ Haa ja'a Dioscuguexyhajxy nämetspä, ja'a olivoquepy hajxy je'e ja'a metspä, møødä ceratoyøhñdy metspä, ja'a jimṃ tänaabiä Dioswiinduum. Ja'a Dios ja'a naaxwiin cunuu'x.

⁵ Coø ja'a Dioscuguexyhajxy hānajty cøxypänejpiä jia tuna'añii, mänitä jøøn hajxy yhøxpäxujja'añ yhaawjooty. Cøxy toyaambä miädsiphajxy hānajty jaduhṃ. Jaduhṃ hajxy yho'oga'añ. ⁶ Cuhdujtmøødä Dioscuguexyhajxy hānajty coø hajxy quia'a yajtú'uwät, naagxøø hajxy hānajty miädiä'aga'añ ja'a Dioscøxpä. Jaduhṃnä cuhdujt hajxy hānajty miøødäbä coø nøø hajxy wia'añdiünät, yajnø'tycójat. Jaduhṃnä cuhdujt hajxy hānajty miøødäbä coø ja'a jäya'ay hajxy yajpa'ambädät hädaa yaabä naaxwiin, coø häyohn hajxy yagjadøjät, naaghoocä jioothajxy hānajty chocy. ⁷ Coø hajxy hānajty tøø miädiaacpädøøñä, mänitä animal jiiṃy tu'ug piädsøma'añ maa ja'a jut jaančh tehṃ quiøøcpän. Mänitä Dioscuguexyhajxy yagho'oga'añii. ⁸⁻⁹ Tägøøgxøø ja nähgupc hajxy jimṃ wyijtsna'awa'añ møjcajptooty maa ja'a Jesús jecy miøjpahbejtän cruzcøxp. Haa

ja'a cajptjäya'ayhajxiä, haxøögä cuhdujt hajxy hänäjty miøødä nebiä jecyjiäya'ay ja'a cuhdujt hajxy hijty miøødän, ja'a hajxy hijty jim jegyhajty tsänaabiä Sodoma møødä Egipto. Cabä cuhdujt hajxy nä'ägä yega'añ coo ja'a ho'ogyjiäya'ayhajxy jim yajnaaxtägø'øwøjät. Minaamb hajxy yheeba'añii. Wiinduhmyhagajpt hajxy choona'añ. Cøjhayuuc hajxy miädia'aga'añ. ¹⁰ Jaančh tehñ xioonnda'agaambä jäya'ayhajxy hänäjty coo ja'a Dioscuguexyhajxy hänäjty tøø yho'ogy. Paady hajxy hänäjty jootcujc ñijiäwøyyänä, cab hajxy hänäjty yhadsibáañä. Paady hajxy hänäjty hotyijä nä'a nimio'owa'añii hamiñ haxøpy. ¹¹ Coo tægøøgxøø ja nähgupc hänäjty tøø yhabety, mänitä Dios ja'a quiuguexyhajxy hänäjty yagjuypioğa'añ jadähooc. Pønjaty hänäjty hixaamb, mänit hajxy hänäjty chähgøøbioga'añ. ¹² Mänitä Dioscuguexyhajxy miädowa'añ coo hajxy hänäjty møc miøjya'axyii jim tsajpootyp:

—Pet hajxy yam cøxp.

Mänit hajxy jocjooty ñøcxa'añ tsajpootyp. Hixáañp hajxy ja'a miädsípäm. ¹³ Mänitä hijx jaančh tehñ miøc ñaxa'añ. Mänitä tøjc may piuma'añ ja'a miämajc-hitpä jim cajptooty. Juxtujcmilä jäya'ayhajxy yho'oga'añ. Ja'a hajxy hänäjty tøø jiaac mäh-mø'øyäbä, jaančh tehñ chähgø'øwaamb hajxy jaduñ. Mänitä Dios tsajpootypä hajxy wyiingudsähgø'øwa'añ.

¹⁴ Jaduhñ ja'a tsø'ty ñajxy ja'a miämetsc-hoocpä. Paquiä yhabaadängombä coo ja'a miädägøøgpä ñaxáangombä.

¹⁵ Mänitä miäjuxtujcpä Diosmoonsä xiuuxy. Mänit hajxy jim møc yaaxy tsajpootyp: Ja'a Jesucristo hajxy nWiindsønhájtäm.

Tøø je'e miøjtägø'øy wiinduhmyñaaxwiin.

Cøjxta'axiøø guiobiernähadaañä.

¹⁶ Jimä nähii'xmädaaxpä majjäya'ay ja'a Dios hajxy hänäjty jiuhhänaawiädity. Mänitä Dios hajxy hoy wyiinjiçäda'agy. Wyiingudsähgøøyy hajxy jaduñ. ¹⁷ Mänit hajxy miänaañ:

Dios, højts miičh nWiindsønhajpy.

Cøxiä miičh mäjaa mmøødä. Cøjxta'axiøø miičh mhity.

Dioscujú'uyäp coo miičh tøø mmøjtägøøñä, coo tøø mdägøøñä gobiernähajpä.

¹⁸ Tøø ja'a jäya'ayhajxy nägøxiä jia jootma'ady. Pero tøø yhabaady coo miičh myajcumä-dowaañä.

Tøø yhabaady coo miičhä ho'ogyjiäya'ayhajxy myajtøyhajtyegaañä, coo myajcuhdägoyyaañä pønjatiä jäya'ayhajxy yaa yajtu'udägooby hädaa yaabä naaxwiin.

Jaduñ tøø yhabaatpä coo miičhä hoyhajt ja'a weenhajt hajxy mmo'owa'añ pønjaty miičh tøø xquiapxpaady, møød pønjatiä mmädia'agy hamuumdu'joot tøø xyajtuunä,

møød pønjaty miičh tøø xwyiingudsähgø'øy, hoyyä møjtuung hajxy tøø quia'a ja møødhaty.

¹⁹ Mänitä Diostøjc jim yhawaach tsajpootyp. Mänitä caja jiiby quiähxø'cy tøgooty møødä contrato, ja'a Dios jecy yajcuhdúçäbä. Mänit tiägøøyy wädsujpä. Mänitä hänee møc jiädijty; møødä hijx møc ñajxy. Mänitä caandøtstuu may quiahy.

12

¹ Mänitä hijxtahñd jim quiähxø'cy tsajtcøxp jaančh tehñ hoy-yagjuøøñä. Jimä to'oxiøjc hänäjty tu'ug yhajajy nebiä xøøjän. Jimä po'o hänäjty yajtehmbety. Majmetscä madsa'a hänäjty quihjenhaty. ² Tøø hänäjty tiehñ yhabaatnä coo yhuungpaada'añ. Paady hänäjty wyi'i ya'axy. ³ Mänitä hijxtahñd wiingpä wyiingähxø'combä. Tu'ugä dragón hänäjty cruundä. Tsaptsä ñi'x hänäjty. Juxtujcä quiopc hänäjty haagä cuhjenmøød. Majcä quiaa'pt hänäjty. ⁴ Tiu'tsthaamä madsa'a tu'ug tægøøgpuxypä yajcahy naaxwiin ja'a tsajtcøxpä. Mänitä dragón hoy wyiindänaaxiøpy ja'a to'oxiøjc ja'a hänäjty huungpaadaambä. Nägooyyä yhuung hänäjty myina'añ, mänit hänäjty chu'udsa'añ. ⁵ Mänitä ya'ayhäna'c myiñ. Je'e hänäjty tunaamb gobiernä wiinduhmyñaaxwiin. Møc hänäjty jaduñ jiaančh tehñ yhane'ema'añ. Mänit jim yajnøcxä Dioswiinduum.

⁶ Mänitä to'oxiøjc piäyø'cy. Pactuum ñøcxy. Jimä Dios hänajty tøø yajnähdijy coo jim yajcayøøjät mil cumejtsmägo'x cudägøøghii'xxøø.

⁷ Mänitä tsip jim piädø'nä tsajpootyp. Ja'a Miguel hänajty tuumb Diosmoonsäwi-indsøn. Je'e ja'a Diosmoonsähajxy miøødpädø'c. Ja'a dragón ja'a mioonsähajxy møødpädø'pä. Mänit hajxy ñiñämejtsä. ⁸ Cabä dragónhajxy ñä'ä mäjädaacy. Mänit hajxy quia'a cuhdujtmóoyänä coo hajxy jim jiaag hídät tsajpootyp. ⁹ Mänitä dragónhajxy jim yhøxquéjxänä; yaa hajxy miänajnä hädaa yaabä naaxwiin. Haa ja'a dragónhajpä, ja'a møjcu'ugong je'e, ja'a jecychahñdy je'e. Jaduhñ je'e xiøhajpä Satanás. Je'e hajxy yaa xwiinhøhñäm hädaa yaabä naaxwiin.

¹⁰ Mänitä jäya'ay jim møc yaaxy tsajpootyp.

—Tøø ja'a Dios miäjäda'agy. Gobiernä je'e tiunaamby møødä Jesucristo. Tøø ja'a møjcu'ugong yhøxquéjxänä. Xøømdsuhñ højts nmägu'ughajpähajxy hijty jim yajnähdsoymii Dioswiinduum. ¹¹ Paady højts nmägu'ughajpähajxy tøø miäjäda'agy, coo ja'a Meeghuung hajxy tøø xñähho'túutäm, møød coo ja'a Dios hajxy quiaapxpaady. Hoy hajxy hänajty jia ho'oga'añ, cab hajxy hänajty chähgø'øy. Hamdsoo hajxy jaduhñ ñiñähdujca coo hajxy yhó'ogät. ¹² Mxoondá'agáp hajxy, pønjaty jim tsánaaby tsajpootyp. Pero pønjaty jii by tsánaaby naaxwiin, haxøøg hajxy mábøcy mjada'añ mhabeta'añ, je'eguiøxpä coo ja'a møjcu'ugong hajxy jii by tøø xñägäda'agy. Hawa'anda'agaambä møjcu'ugong jaduhñ. Najuøøby jaduhñ coo cuhdujt jejcy quia'a møødhada'añ coo cøxypänejpä jiatcø'øwät.

¹³ Coo ja'a dragón yhiijy coo hänajty tøø quiäda'agy naaxwiin, mänitä to'oxiøjc tiägøøyy päboobiä, ja'a hänajty tøø yhuungpáadiäbä. ¹⁴ Mänitä to'oxiøjc wiistäqueect metsc miooyä møjaty, neby jaduhñ jäyøy ñøcxtät pactuum maa hänajty yajcay'añiijän tægøøgjomøjtä cupc. Jäguemä dragón miähmø'øwät. ¹⁵ Mänitä dragón nøø com yhøxpäxuy nebiä to'oxiøjc jaduhñ ñøøgomdsømøøjät. ¹⁶ Mänitä nøøgom cøjx yhuugø'øy naaxooty. Puhbejtä ja'a to'oxiøjc jaduhñ. ¹⁷ Mänitä dragón ja'a to'oxiøjc jiaanč tehñ ñähawa'andaacy. Mänitä dragón tiägøøyy tsiptuumbä møødä to'oxiøjc yhuunghajxy, ja'a hajxy hänajty yaa tsánaabiä hädaa yaabä naaxwiin, ja'a Diosmädia'agy hajxy hänajty mábøjpä, ja'a Jesucristo hajxy hänajty capxpaatpä.

13

¹ Jimhøch hänajty ndäna'ay mejypia'a. Mänitøchä animal cruundä nhijxpädsøømy mejjiooty. Juxtujcä quiopc hänajty haagä xøømøød. Haa ja'a xøø jaduhmbä, haagä haxøøgjatiä Dios hajxy ñänømy. Majcä quiaa'pt hänajty haagä cuhjenmøød. ² Jaduhñä ñi'x hänajty nebiä cuxiøøbøjtän. Jaduhñä tiecy hänajty nebiä osotequiän. Jaduhñä yhaaw hänajty nebiä leónhaawän. Mänitä animal møjcuhdujt miooyä møødä møcmä-jaa. Ja'a dragón jaduhñ yejc; yhamdsoo je'e jaduhñ. ³ Tu'ugä animal quiopc hänajty quiähxø'øgy nebiä cuhbuxypän. Tøø hänajty chóoccombä. Mänitä jäya'ayhajxy nägøxiä jiaanč tehñ yagjuøøyy. Mänitä animal hajxy tiägøøyy pawädiipä. ⁴ Mänitä dragón hajxy wyiingudsähgøøyy, je'eguiøxpä coo ja'a animal møjcuhdujt hänajty tøø mio'oy. Jaanä ja'a animal hajxy wyiingudsähgøøbiä. Jaduhñ hajxy hänajty miäna'añ:

—Ni pøn mäjaa jaduhñ quia'a møødä nej yø'ø animal mäjaa miøødän. Ni pøn jaduhñ quia'a mäjädá'agät coo yø'ø animal hajxy ñä'ä mädsibø'øwät.

⁵ Mänitä animal cuhdujt miooyä coo ja'a Dios haxøøg ñänómät. Jaduhñ quiuhdujtmóoyäbä coo yhané'emät juxychägui'xmejtspo'o. ⁶ Jaanč jatcøøyy jaduhñ. Haxøøgä Dios jiaanč nänømy, møødä Dios tiøjc, møød hajxy jim hijpä tsajpootyp. ⁷ Jaduhñ quiuhdujtmóoyäbä coo miädsibø'øwät ja'a Dioshuunghajxy, coo ja'a Dioshuunghajxy quia'a yajmäjäda'agøøjät. Mänit quiuhdujtmóoyäbä coo ja'a jäya'ayhajxy yhané'emät nägøxiä, ja'a hajxy yaa tsánaabiä wiinduhmyñaaxwiin. ⁸ Je'eds hajxy jaduhñ animalwiingudsähgøøyy, pønjatiä xiøø hänajty jim ca'a miimb cujaay nocyquiøxp, ja'a Meeghuung miøødpä, ja'a højts xñähho'túutämbä. Pønjaty cøjxta'axiøø jugyhadaamb nebiä Dios

jiugyhatiän, je'edsä xiøøhajxy jim miimb cujaay nocyquiøxp. Tóøyyämä xiøøhajxy hānajtý quiujáhyyäxä coo ja'a naaxwiimbä yhawijy tiøø'xtaacy.

⁹ Naxy hajxy hädaa mhuuc tehñ wyiinjuó'øwät. ¹⁰ Pønjatý mädsuumb, yajtsu-umdagatsaamb hajxy je'ebä. Pønjatý mäyagho'p espadahaam, jaanä jaduhñ hajxy yagho'tägatsaanäbä espadahaam. Hix, pønjatý jaduhñ Dioshuung, tsipcøxp hajxy miee'xtúgät; tsipcøxp hajxy miäbøgät.

¹¹ Mänitøchä animal wiingpä nhijxnaaxwiimbädsømy. Jaanä cruundä je'ebä. Metscä quiaa'pt hānajtý je'e nebiä meeghuungcaa'ptän. Wiing hānajtý quiapxy miädia'agy nebiä dragóngän. ¹² Jaduhñdsä møjcuhtujt hānajtý miøødäbä nebiä jayøbajtpä møjhanimalän. Quipxy hajxy hānajtý yhane'emy nämetscä. Mänitä miämetspä møjhanimal yhanehmy coo ja'a jayøbajtpä wyiingudsähgø'øwøjät, ja'a hānajtý cuhbuxypä tøø ch'oguiäbä. ¹³ Haa ja'a møjhanimal miämetspä, madiu'u hijxtahñd yajcähxø'cy haagä hoy-yagjuøñäjatý. Hijxwiinduumä jøøn yajcahy naaxwiin. ¹⁴ Coo ja'a jaya'ayä hijxtahñd hajxy yhijxy, yaghijxmañøyyä hajxy jaduhñ. Mänit hajxy ñāmaayyä coo ja'a animal hajxy yhädiuunnäxät, ja'a hānajtý tøø quiuhbuxyíjábä. ¹⁵ Mänitä miämetspä animal quiuhdujtmooyyä coo ja'a animal yhädiuunnaxy yagjuypiógät, yajcapxø'ogät. Jaduhñ je'e quiuhdujtmooyyäbä coo yajyagho'ogøjät pønjetiä animalhädiuunnaxy ca'a wiingudsähgø'øwaamb. ¹⁶ Mänitä tsaangu'ughajxy nägøxiä yajseñapadaacy maa yhahooguiø'øhajxiän, o maa wyiinnähgopcøxphajxiän, miøjjä miuutscä, miäyøø quia'a mäyøøjä. ¹⁷ Pøn hānajtý ca'a señamøød, pønä animal xiøø hānajtý ca'a møødhajtäp, o ja'a ñúmero, cabä cuhtujt hajxy hānajtý mio'oyii coo hajxy jiúyät, coo hajxy tióogät. ¹⁸ Pøn cuhwijy, pøn wiinjuøøby, ween yhuuc najuø'øy nebiä animal ñúmero miädia'agytiägø'øy. Jaduhñ je'e nebiä jäya'ay ñumeron. Jue'e ñúmero jaduhñ, tädujmägo'x cudägøøghii'xtädujc.

14

¹ Mänitøchä Meeghuung nhijxy coo jim tiäna'ay Sióntunnähgøxp. Jimä jäya'ayhajxy hānajtý piadānaabiä nämägo'x cujuxychägui'xmādaaxc mil. Yhaagä møød hajxy hānajtý cujaay wyiinnähgopcøxphajxy ja'a Meeghuung xiøø møødä Tieedy xiøø. ² Mänitøch jim nmādooyy tsajpootyp nebiä møjnøø may jiäditiän, nebiä hänee møc ya'axiän. Jaduhñ hānajtý yajmädoobä nebiä harpa may miäna'añän. ³ Ja'a nämägo'x cujuxychägui'xmādaaxc milpä jäya'ay, ja'a hajxy hānajtý tøø yajnähwa'açhíjábä hädaa yaabä naaxwiin, jemyhøy hajxy hānajtý jim yhøøby Dioswiinduum. Haa ja'a nämādaaxpā animalhajxiä, jim hajxy hānajtý piahāna'ay møødä majjāya'adiøjc-hajxy. Cabä wiinghāna'c-hajxy jiada'añ ja'a jemyhøy jaduhñbä. ⁴ Haa ja'a nämägo'x cujuxychägui'xmādaaxc milpä jäya'ayhajxiä, cabä wiingto'oxiøjc hajxy hānajtý tøø miøødtsāna'ay. Jaanç tehñ yhoy hajxy hānajtý jiäya'ayhaty. Majatiä Meeghuung hānajtý ñøcxø'øy, pianøcxyp hajxy hānajtý jaduhñ. Jayøbajt hajxy yajnähdijjä coo hajxy yajnähwa'adsøjät, coo hajxy yhuunghadøjät ja'a Diósäm møødä Meeghúungäm. ⁵ Ni mänaa hajxy quia'a hønñda'agy. Cab hajxy tii poj tii cädieey miøødä jim Dioswiinduum.

⁶ Mänitøchä Diosmoonsä wiingpä nhijxy; jim hānajtý jiäyøøwiädity tsajtcøxp. Ja'a Diosmädia'agy hānajtý yegaambý ja'a ni mänaa ca'a tægajtspä. Nägøxiä ja'a jäya'ayhajxy hānajtý mio'owa'añii, ja'a hajxy yaa tsānaabiä wiinduhmyhagajpt, hoy hajxy wiinghayuucjatý jia møødä. ⁷ Mänitä Diosmoonsä møc miānaañ:

—Wiingudsähgø'øw ja'a Dios hajxy. Nāma'aw hajxy jaduhñ coo miøjjä jiaançhä. Tøø yhabaady coo ja'a Dios jäya'ay yajtøyhajtyega'añ. Je'eds cøjx yhädiuñ tsajpootyp møødä naaxwiin, møødä mejy, møødä nøøgopc.

⁸ Mänitä Diosmoonsä tu'ug jiaac mänaañ:

—Tøø ja'a møjcajpt Babilonia quiuhdägoy, je'eguiøxpä coo ja'a quiuhdujt jiaançh tehñ yhaxøøgä. Tøø ja'a jäya'ayhajxy nägøxiä piajatcø'øy ja'a Babilonia quiuhdujt.

⁹ Mänitä miädägøøgpä Diosmoonsä møc miānaañ:

—Põnä animal wiingudsähgøøby møødä yhädiuunnaxy, põñ yajseñapadaacp wyiinnähgopcøxp o quiø'øgøxp, ¹⁰ hoyhoyyä Dios jiaanč tehñ yajcumädowa'añ. Jøønjooty, azufrejooty hajxy chaächpøga'añ Diosmoonsäwiinduum møødä Meeghuungwiinduum. ¹¹ Cøjxta'axiøø hajxy chaächpøga'añ xøømdsuhñ, põñjatiä animal wiingudsähgøøby møødä yhädiuunnaxy, põñjatiä seña jim møødhájtáp. ¹² Pøñjatiä Diosmädia'agy mäbøjp møødä Jesucristo miädia'agy, ween hajxy tehngajnä miee'xtucy.

¹³ Mänitøchä jäya'ay jim tsajpootyp xñamaaay:

—Cujaay jaduñ: “Pøñjatiä Diosmädia'agy mäbøjp, coo hajxy yhö'ogät, jootcujc hajxy yhida'añ.” Tøyhajt jaduñ. Poo'xáannäp hajxy jaduñ. Jiahmiedsaambiä Dios jaduñ coo ja'a Diosmädia'agy hajxy hoy tøø yajtuñ. Nøñä Dioshespíritu miäna'añ.

¹⁴ Mänitøchä jäya'ay tu'ug nyuughijxy. Poobjocøxp hñajty yhäña'ay. Orocuñjén hñajty quihjenhajpy. Arrozsujt hñajty quiø'øgaphajpy jaanč tehñ jøjyp. ¹⁵ Mänitä Diosmoonsä tu'ug piädsøømy maa ja'a Diostsajtøjcän. Mänitä jäya'ay miøjyaaxä møc, ja'a hñajty häñaabiä jocøxp:

—Tøø yhabaady coo ja'a päda'agy myajpädø'ogät jiiby naaxwiin. Tøø ja'a tiøøm miäjay. Nøcx yajpädø'og.

¹⁶ Mänitä päda'agy hoy jiaanč yajpädø'ogy arrozsujthaam hädaa yaabä naaxwiin. Jaduhñ miädia'agytiägø'øy coo ja'a jäya'ayhajxy yajcumädowa'añii, ja'a hajxy haxøøgcuhdujtmøødpä.

¹⁷ Mänitä Diosmoonsä wiingpä piädsøømgombä maa ja'a Diostsajtøjcän. Jimä arrozsujt hñajty quiø'øgaphajpä jaanč tehñ jøjyp. ¹⁸ Mänitä wiing Diosmoonsä piädsøømy maa ja'a altarän. Je'e cuhdujtmøød maa ja'a jøøngøxpän. Mänitä Diosmoonsä møc miøjyaaxä ja'a arrozsujt cabhijpä:

—Tøø ja'a tsaatyp jiiby cha'amy naaxwiin; nøcx yajpädø'og arrozsujthaam.

¹⁹ Mänitä tsaatyp hoy jiaanč yajpädø'ogy arrozsujthaam hädaa yaabä naaxwiin. Mänit hoy piäda'agy maa ñähhädiunø'øyän maa hajxy tiehñdse'ediän. Jaduhñ mäwíñädsä Dios yajtsaächpøga'añ ja'a hajxy tøø quia'a mäbøquiäbä. ²⁰ Cajtpa'a ja'a tsaatyp hajxy hoy tiehñdse'edy. Comä nø'ty piädsøømy maa ñähhädiunø'øyän. Møjwiinä nø'tymejy quiojy tægøøgmägo'x kilómetro. Coo'pä nø'ty hñajty maa ja'a cuaay frenon.

15

¹ Mänitøchä wiinghijxtahñd jim nhijxy tsajpootyp jaanč tehñ yhamøj, hoy-yagjuøøñä. Juxtújc-høchä Diosmoonsä nhijxy haagä häyohnmøød. Je'eduhñ ñänøømby coo ja'a Dios juxtujc-hooquiä jiaac yajtsaächpøga'añ ja'a hajxy yaa ca'a mäbøjpä hädaa yaabä naaxwiin.

² Mänitøchä hijxt nhijxy. Jim hñajty hamøj quioonna'ay. Nebiä mejjiän hñajty quiähxø'øgy. Jaduhñ hñajty quiähxø'pä nebiä toobiän. Jimä jäya'ayä hijxt hajxy hñajty wyiindäna'ay, ja'a animal hajxy hñajty tøø quia'a yajmäjädá'aguiäbä møødä seña, møødä xiøø, møødä ñúmero. Jimä harpa hajxy hñajty miøødäbä. Ja'a Dios jaduhñ yejc. ³ Jaduhñ hajxy hñajty yhöy nebiä Moisés jecy yhöøyyän. Je'e ja'a Dios jecy mäduun. Jaduhñ hajxy hñajty yhöøbä nebiä Meeghuung yhöøyyän:

Wiindsøn Dios, cøxiä miich cuhdujt mjaanč tehñ miøødä. Møj jaanč miich mjaanč tehñ tiuñ.

Jaanč tehñ yhöy miich mguhdujt jaduñ. Miich mhanehmby wiinduhmyhagajpt.

⁴ Caj miich tii pojpä tii cädieey mmøødä. Nägøxiä miichä jäya'ayhajxy xwyiingudsähgø'øy.

Nägøxiä hajxy miäna'añ cooc mmøjjä cooc mjaančhä. Minaamb miich jäya'ayhajxy nägøxiä xwyiingudsähgø'øwa'añ,

ja'a hajxy wiinduhmyhagajptpä, je'eguiøxpä coo hajxy tøø yhixy tøø miädoy coo miich mguhdujt jiaanč tehñ yhöyyä.

⁵ Mänitõchä Diostsajtøjc nihjxhawaach jim tsajpootyp maa ja'a Dios yhäna'ayän. ⁶ Mänitä Diosmoonsähajxy jiiby piädsøomy, ja'a häyohnmøødpähajxy ja'a näjuxtujcpä. Poobwit hajxy hänajty miøød jaanč tehñ wia'ads. Jimä orowøøn hajxy hänajty miøødä chi'tsnähgøxp. ⁷ Mänitä orotsim hajxy cødu'ugjaty miooyä. Tu'ugä animal jaduhñ yejcy ja'a nämädaaxpähajxy hänajty jim häñaabiä Dioswiinduum. Hujtsjatiä orotsim hänajty. Je'eduhñ ñänøømby coo ja'a Dios ja'a jäya'ayhajxy jiaanč tehñ yajcumäowa'añ, ja'a hajxy ca'a mæbøjpä. Cøjxta'axiøø ja'a Dios ñä'ägädä hity. ⁸ Jiiby Diostsajtøgooty, haagä joc jiiby pu'xwädijp. Jimä joc choon maa ja'a Dios mõj jaanč yhitiän. Caj pøn jiiby hoy ñä'ägädä tægø'øwa'añ tsajtøgooty høxtä coonä ja'a Dios hänajty juxtujc-hooc tøø yajtsaächpøcy ja'a jäya'ayhajxy ca'a mæbøjpä.

16

¹ Mänitøch nmädooyy coo jäya'ay mõc quiapxy Diostsajtøgooty. Mänitä Diosmoonsä näjuxtujcpä ñämaayyä:

—Nøcx hajxy cuhmänactemñ jiiby naaxwiin ja'a orotsimjootypä. Je'eduhñ ñänøømby coo ja'a Dios jiaanč tehñ yajcumäowa'añ ja'a hajxy ca'a mæbøjpä.

² Mänitä Diosmoonsä tu'ug hoy quiuhmänactemy hädaa yaabä naaxwiin ja'a yhorotsimjootypä. Pønjetiä animalseñä hänajty møød ja'a hamøjpä, pønjetiä yhahädiuunnaxy hänajty wiingudsähgøyyäp, nägøxiä haxøøgpu'uds hajxy piaatä ja'a jaanč tehñ piahmbä.

³ Mänitä Diosmoonsä miämetspä hoy quiudemø'øy mejjiooty ja'a yhorotsimjootypä. Mänitä mejyñøø jiajty nebiä ho'ogyjäya'añtiän. Cøjx yho'ogy mädyijaty jiiby tsänaaby mejjiooty.

⁴ Mänitä miädägøøgpä hoy mõjnøøjooty quiudemø'øy ja'a yhorotsimjootypä møød jim nõøgopcjooty. Mänitä nõø jiajty nebiä nø'tiän. ⁵⁻⁶ Mänitä Diosmoonsä ja'a nõøgüendähajpä miänaañ:

—Wiindsøn Dios, caj miič tii pojpa tii cädieey mmøødä. Cøjxta'axiøø miič mhity. Hoy jaduhñ coo miičhä jäya'ayhajxy tøø myajtsaächpøcy, coo nø'ty hajxy tøø myaghu'ugy, je'eguiøxpä coo miič mgu'ug xyajpuhho'cä møødä miič mmädia'agy hajxy tøø xyajwá'xäbä.

⁷ Mänitä tu'jäya'ay miänaañ maa ja'a altarän:

—Tøyhajt jaduhñ. Wiindsøn Dios, hoy jaduhñ coo miičhä jäya'ayhajxy tøø myajtsaächpøcy. Miič cuhdujt cøxiä mmøød.

⁸ Mänitä Diosmoonsä ja'a miämädaaxpä ja'a xøø yajwiingutemøøyy ja'a yhorotsimjootypä. Mänitä xøø quiuhdujtmooyy coo ja'a jäya'ay ñø'ogät. ⁹ Hoyhoyyä jäya'ayhajxy cøxiä tiooyy. Pero cabä yhaxøøgcuhdujt hajxy hänajty jia najtshixø'owa'añ. Haxøøgjatiä Dios hajxy ñänøømy ja'a jim tsajpootypä. Cabä Dios hajxy piädaacy mõj jaanč, hoyyä Dios cuhdujt jia møødä maa ja'a häyohngøxpän.

¹⁰ Mänitä Diosmoonsä miämägooxpä quiudemøøyy maa ja'a animal hänajty yhäna'ayän, ja'a yhorotsimjootypä. Mänit cøjx wyiingoodsø'øy majatiä animal hänajty yhane'emiän. Mänitä jäya'ay tiots hajxy yajtsu'udsøøyy je'eguiøxpä coo hajxy hänajty jiaanč tehñ chaächpøcy. ¹¹ Paadiä Dios hajxy haxøøgjaty ñänøømy. Cabä yhaxøøgcuhdujt hajxy hänajty jia najtshixø'owa'añ.

¹² Mänitä Diosmoonsä ja'a miädädujcpä jiiby quiudemøøyy Eufratesmøjnøøjooty, ja'a yhorotsimjootypä. Mänitä nõø tiøøch. Jaduhñä reyhajxy hänajty hoy ñaxø'owa'añ, ja'a hajxy hänajty jim tshonda'agaambä maa ja'a xøø piädsømiän.

¹³ Mänitõchä haxøøgjuøhñdy tægøøg nihjxpädsøomy. Jiiby hajxy piädsømøøyy maa ja'a dragón yhaawjootiän, møød maa ja'a animal yhaawjootiän, møød maa ja'a miämetspä animal yhaawjootiän, ja'a mõjcu'ugongä miädia'agy hänajty yajwá'xäbä. Jaduhñä haxøøgjuøhñdy hajxy hänajty quiähxø'øgy nebiä yocchän. ¹⁴ Hiç, mõjcu'uhajxy je'e. Hoy-yagjuøøñäjaty hajxy hänajty yajcähxø'øgy. Mänitä reyhajxy hoy nägøxiä wioyii, ja'a hajxy hädaa yaabä naaxwiimbä, coo hajxy nøcxy chiptuna'añ møødä Dioscøxpä,

mánaa ja'a Dios yajnáhdijjiän coo chiptuna'añ. Mäjaamøødä Dios jaduñ. ¹⁵ Jaaya'ay jaduñ mänaamb: “Cab jaduñ pøn ñä'ägädä najuø'øy mänáajøch hánajty ngäda'aga'añ. Jootcujc je'e pønä Diosmädia'agy hánajty hamuumdu'joot mäbøjp. Jaduñ mäwíináts hánajty yhida'añ nebiä jujcypiän. Cabä hánajty chähdiunaannä.” ¹⁶ Mänitä reyhajxy yhamugøøyy maa xiøhatiän Armagedón ja'a hebreohayuuc-haamy.

¹⁷ Mänitä Diosmoonsä ja'a miäjuxtujcpä cøxp quiuhdeemnajxy ja'a yhorotsimjootypä. Tu'ugä jäya'ay møc quiapxy maa ja'a Dios yhäñaadiaactän jim tsajpootyp:

—Tøø jaduñ miaañä.

¹⁸ Mänit wiädsujcy møødä hänee yaaxy. Mänitä hujx møc ñajxy. Cabä hujx jaduñ mänaaxøø ñaxy neby jaduñ tøø ñaxiän. ¹⁹ Mänitä møjcajpt ñiwia'xä. Tägøøghit jaduñ hoy miähmøøñä. Mänitä tøjc cøjx piумы wiinduhmyhagajpt. Mänitä Dios jäya'ayhajxy chaachtiiuñ hoyhoy, ja'a hajxy hánajty jim tsánaabiä Babilonia-cajptooty. ²⁰ Mänitä tun cøjx yhadägoyyø'øy møødä naax ja'a hánajty jim hijpä mejyquijc. ²¹ Mänitä jäya'ayhajxy quiuhga'awøøyyä caandøtstuu hamøjjaty. Juxychägui'x kilo hánajty näje'e jiemchä. Coo hajxy jiaanč tehñ chaächpøjcy, paadiä Dios hajxy haxøøgjaty ñämaayy.

17

¹ Mänitøchä Diosmoonsä tu'ug xñämejch, ja'a hajxy hánajty näjuxtujcpä, ja'a orotsim hajxy hánajty miøødäbä. Mänitøch xñämaayy:

—Jam nyajnáhixø'øy coo ja'a cuhhiñdo'oxiøjc ja'a møjpä yajtsaačhpøga'añii, ja'a jim häñaabiä mejywyiing. ² Tøø ja'a rey ja'a to'oxiøjc hajxy yaa miøødtsána'ay hädaa yaabä naaxwiin. Ja'a to'oxiøjcøxpä ja'a jäya'ayhajxy nägøxiä yaa yhaxøøgwädity hädaa yaabä naaxwiin.

³ Mänitøchä Dioshespíritu xyajwiinhijxy. Mänitøchä Diosmoonsä jim xyajnoxcy maa pøn quia'a tsána'ayan. Mänitøchä to'oxiøjc tu'ug nhijxy. Animalnähgøxp hánajty yhäña'ay. Tsaptsä animal ñi'x. Jimä mädia'agy hánajty miøødä cujaay ja'a ñi'xcøxp. Haxøøgjatiä Dios hánajty ñänømy. Juxtujcä quiopc hánajty je'e y majcä quiaa'pt. ⁴ Ja hucy ja tsaptsä to'oxiøjc wyit hánajty je'e. Oro hánajty ñaandsømhajpy møødä hočhaa møød perlas. Orotsim hánajty quiø'øgø'øwhajpy. Madiu'u haxøøgpä hánajty jiiby yhity orotsimjooty. ⁵ Jim hánajty miøødä wyiinnähgøpcøxp cujaay: “Ja'a møjcajpt Babilonia hädaa. Ja'a cuhhiñdo'oxiøjc tiajahajxy hädaa. Ja'a haxøøgpä yhöjxä tiecy hädaaduhñ ja'a hädaa yaabä naaxwiimbä.” Cab jaduñ yhowyiinjuøñjä. ⁶ Mänitøch nnajuøøyy coo ja'a to'oxiøjc hánajty miu'ugyii. Ja'a Dioshuung ñø'tyhajxy hánajty tøø yhúucäxä møød hajxy tøø yagho'ogyíjábä je'eguiøxpä coo ja'a Jesucristo miädia'agy hajxy miäböjca. Cooch jaduñ nhijxy, njaanč tehñ yagjuøøyyhöch jaduñ. ⁷ Mänitøchä Diosmoonsä xñämaayy:

—Tii jaduñ coo mwi'i yagjuø'øy. Nhawaanáanäbøch miič ja'a to'oxiøjcøxpä møødä animalcøxpä, ja'a to'oxiøjc yaghäñaabiejpiä, ja'a juxtujcpä quiopc, ja'a majcpä quiaa'pt. ⁸ Yø'ø animal tøø mwiinhíxiäbä, jugyhajp hijty yø'øduñ. Hoy tøø jia cuhdägoy, jutpädsømaamb jadähooc. Mänit nøxcy yho'ogaannä. Pønjetiä xiøø jim ca'a miimb cujaay librojooty, coo ja'a animal hajxy yhíxät coo tøø jiutpädsømy, mänit hajxy hoyhoy yagjuø'øwa'añ. Pero pønjetiä xiøø jim miimb cujaay librojooty, je'eds hajxy cøjxta'axiøø jugyhadaamb nebiä Dios jugyhatiän, je'eguiøxpä coo ja'a xiøøhajxy jim quiujáhyyäxä mänaa ja'a naaxwiimbä yhawijy tiøø'xta'aguiän.

⁹ Pøn jaduñ wiinjuøby, ween hädaaduhñ hoy yhuuc wiinjuø'øy: Yø'ø quiopc juxtujcpä, jaduñ mäwíináts hajxy yø'ø nebiä juxtujcpä tunän. Jimä to'oxiøjc yhäña'ay. ¹⁰ Jaanä jaduñduhmbä, jaduñ mäwíináts hajxy yø'ø nebiä juxtujcpä reyän. Nämä-goøxc hajxy jaduñ tøø quiuhdägoøñä. Tu'ug jäda'ahaty guiobiernähajnä. Jatu'ug, cahnä je'e tiägø'øyñä. Coo hánajty tøø tiägøøñä, cab jaduñ jiega'añ. ¹¹ Haa ja'a animal tøø quiuhdägóyyäbä, tu'ugä näjuxtujcpä rey jaduñ. Miämetsc-hoocpä jaduñ tøø piädsøømgombä. Mänit nøxcy yho'ogaannä.

¹² 'Haa ja'a majcpä quiaa'pt tøø mwiinhíxiäbä, nämajcä reyhajxy jaduhmbä. Cahnä hajxy tiägø'øy gobiernähajpä. Jaduhñä møjcuहुदुज्त hajxy mio'owa'añii tu'hora quipxy mөөдä animal. ¹³ Tu'ugmädia'aguiä reyhajxy yhity ja'a nämajcpä. Mänitä animal cuहुदुज्त hajxy mio'owa'añ mөөдä mäjaa. ¹⁴ Mänit hajxy tiägø'øwa'añ tsiptuumbä maa ja'a Meeghuungcøxpän. Mäjäda'agaambä Meeghuung jaduhñ. Hiḡ, je'e ja'a møjcuहुदुज्त nä'ägä mөөд. Pønjaty je'e jiamiøødhajpy, Dioshuunghajxy je'eduhñ. Pedyii hajxy miäböcy.

¹⁵ Mänitøchä Diosmoonsä xñämáaguioimbä:

—Yø'ø mejy tøø mwiinhíxiäbä maa ja'a to'oxiøjc hijty yhäña'ayän, jaduhñ mäwíñäts yø'ø nebiä wiinduhmyhagajpt-tsohmñän. Madiu'u hayuuc hajxy quiapxy. ¹⁶ Y yø'ø animal quiaa'pt tøø mwiinhíxiäbä ja'a majcpä, mänitä to'oxiøjc hajxy miähanhada'añ. Nähwa'ads høxwa'ads hajxy jaduhñ ñähgue'egaannä. Chu'udsaaḡby hajxy jaduhñ; mänit hajxy ño'oga'añ. ¹⁷ Ja'a Dios jaduhñ tøø wyiinmahñdymo'oy coo hajxy jaduhñ quiudiúnät nebiä Dios tøø yajñahdijjiän, coo hajxy tu'ugmädia'agy yhidät, coo ja'a animal hajxy quiuhdujtmó'owät, høxtä coonä hñajty tøø yhabaady nebiä Dios yajñahdijjiän. ¹⁸ Haa yø'ø to'oxiøjc tøø mwiinhíxiäbä, jaduhñ mäwíñäts yø'ø nebiä møjcajptän maa ja'a reyhajxy nägøxiä xiøønaxiän.

18

¹ Mänitøchä Diosmoonsä tu'ug njaag hijxy coo hñajty miänacy tsajpootyp. Mayyä cuहुदुज्त hñajty miøødä. Haamb tsämaamb hñajty jaduhñ. Hajaj jaduhñ hädaa yaabä naaxwiin. ² Mänit møc yaaxy:

—Tøø ja'a møjcajpt Babilonia quiøxy pumy. Jimä møjcu'uhajxy chänaañä, mөөдä haxøøgjuøhñdy madiu'ubä, mөөдä haxøøghanimalhajxy jäyøøbiä. ³ Tøø ja'a jäya'ayhajxy nägøxiä quiøxy pahijxpä nebiä Babilonia haxøøgcuhdujt miøødän. Tøø ja'a reyhajxy miøødtsäna'ay. Tøø ja'a hajuubiädøjc-hajxy miäyøøjøøñä je'eguiøxpä coo ja'a Babilonia hijty cøxiä wiinä yaghøxhäyoy.

⁴ Mänitøchä jäya'ay nmädooyy coo hñajty jim quiapxy tsajpootyp:

—Pønjátyhøch nhuunghajpy, mdsóonäp hajxy jim maa yø'ø cajptän, neby hajxy jaduhñ mga'a pajatcø'øwät, neby hajxy jaduhñ mga'a padsaaçhpøgät. ⁵ Haa ja'a jäya'ayhajxy jim tsänaabiä Babilonia, tøø hajxy møj may jiaançh tehñ quiädieey. Hoyhoyyä Dios jiaançh tehñ yajtsaaçhpøga'añ. ⁶ Jaduhñä Babiloniatsohmbä hajxy mduundägätsät nebiä wiinghänä'c hajxy tøø tiuñän. Mejtsjaduhñtiä hajxy myajtsaaçhpøgät. ⁷ Tøø hajxy hanaxiä jiaançh tehñ ñiguiumayii. Cøxiä wiinä hajxy tøø jiaançh tehñ yaghøxhäyoy. Paady hajxy mjaançh tehñ yajtsaaçhpøgät. Jaduhñ quiopcooty jia wi'i miäna'añ: “Jaduhñhøch chaa nhäña'ay nebiä møjcuहुदुज्तmiøødpän. Nä'ä jäjtäböchä nnihyhap jim. Cábøch jaduhñ mänaa nnä'ägä jootmayhada'añ.” ⁸ Coo jaduhñ miäna'añ, paquiä chaaçhpøga'añ. Piaadaambiä yuu mөөдä häyohn mөөдä ho'og tägoy. Toyáannäp je'eduhñ. Ja'a Dios jaduhñ mänaan coo jaduhñ chaächtiunøjät. Jaayá'ayäts møjcuहुदुज्तmiøød.

⁹ Haa ja'a reyhajxy, ja'a to'oxiøjc hajxy hñajty tøø miøødtsäna'ayäbä, coo hajxy jaduhñ yhíxät coo hñajty tiooñä, mänit hajxy ñäjø'øw ñäxuudsä'añ.

¹⁰ Tsähgø'ø-tsähgø'ø hajxy hñajty jäguem tiäna'awa'añ. Mänit hajxy miäna'ana'añ:

—Miiçh Babiloniacajpt, may miiçh cuहुदुज्त hijty mjaançh tehñ miøødä. Pero paquiä mjaançh tehñ quiuhdägooyy.

¹¹ Mänitä hajuubiädøjc-hajxy ñäjø'øw ñäxuudsaaḡbä, je'eguiøxpä coo ja'a tioogyhajxy quia'a nä'ägädä juyáañäxä. ¹² Madiu'u toogy hajxy hñajty miøødä: oro, mөөдä plata, mөөдä hoçhaa, mөөдä perlas, mөөдä howyit, mөөдä linowit, mөөдä sedawit, ja hucy ja tsapts. Jaduhñä quepy hajxy hñajty madiu'u miøødäbä ja'a pa'agxuu'pä, ja'a tsowjatypä, mөөдä tijatiä elefantetøødshadeeñdiuc-hädiúñäbä, mөөдä hobiujxt, mөөдä pujxt, mөөдä mármoltsaa. ¹³ Jaduhñä canela hajxy hñajty miøødäbä, mөөдä jøø'xychooy ja'a jaançh tehñ pia'agxuu'pä, mөөдä poom, mөөдä mirra, mөөдä perfume, mөөдä vino, mөөдä hon, mөөдä harina hoybä, mөөдä trigo, mөөдä jäyujc, mөөдä waj,

møødá meeg, møødá cuaay, møødá carreta, møødá moonsädøjc jamiäjüyyäbä. ¹⁴ Mänitä hajuubiädøjc-hajxy miäna'ana'añ:

—Tøø miich xquiøxy pøjcä tijaty miičh mhadsojpy møødá mmäyøøhadyíjábä.

¹⁵ Näjø'ow ñäxuudsaañbiä hajuubiädøjc-hajxy, ja'a hajxy hänäjty tøø miäyøøj'oyäbä maa yø'ø cajptän. Tsähgø'ø-tsähgø'ø hajxy hänäjty tiäna'ay jäguem. ¹⁶ Mänit hajxy miäna'ana'añ:

—Tøø yø'ø møjcajpt jiaančh tehñ chaačhpøcy. Jaduhñ hijty je'e nebiä to'oxiøjc howyitmøødpän ja hucy ja tsapts, møødá oromøødpä, møødá hočhaamøødpä, møødá perlasmøødpä. ¹⁷ Paquiä ja'a miäyøøhadyíjábä tøø quiøxy pøjcäxä.

Haa ja'a jäya'ayhajxy hänäjty wädijpä barcojooty, jäguem hajxy hänäjty tiäna'awaambä, møødá wyiindsønñhajxy, møøð hajxy nä'ä wädijpä. ¹⁸ Coø hajxy yhijxy coø ja'a cajpt hänäjty tiooñä, mänit hajxy yaaxy:

—Cab mädyii cajpt ñä'ägädä mäbaady nej yø'ø møjcajpt hijtiän.

¹⁹ Mänit hajxy tiägøøyy jøøbiä xuu'tspä. Mänit hajxy yáaxcombä:

—Tøø yø'ø møjcajpt jiaančh tehñ chaačhpøcy. Haa ja'a cubarcohajxiä, tøø hajxy jia mäyøøj'øñä coø yø'ø cajpt hijty jiaančh tehñ miäyøøjä. Paquiä tøø quiuhdägooñä.

²⁰ Pønjaty jim tsänaaby tsajpootyp, ween hajxy nägøxiä mxoonda'agy, møødá Diosquexy møødá Dioshuung, je'eguiøxpä coø ja'a Dios yø'ø cajpt tøø yajcumädoy.

²¹ Jaančh tehñ miøcä Diosmoonsä tu'ug. Mänitä cruundätsaa yajpädø'cy. Mänit miejyquia'adsøyy. Mänit miänaañ:

—Jaduhñsä Babiloniacajpt jiadaambä yhabetaambä. Cab jaduhñ mänaa ñä'ägädä cähxø'øgaannä. ²² Cab jaduhñ jim pøn xiu'uxaannä. Caj pøn jim tiunaannä. Cab hajxy jim jiødsaañä. ²³ Ni jøøn jim quia'a toyaannä. Cab hajxy jim piøgaannä yhu'ugaannä. Paadiä Babiloniacajpt jaduhñ jiada'añ yhabeta'añ je'eguiøxpä coø ja'a cu'ug jiaančh tehñ miäyøøjä. Tøø ja'a jäya'ayhajxy nägøxiä piahixy ja'a Babilonia yhaxøøgcuhdujt.

²⁴ Haa ja'a Diosquexy møødá Dioshuunghajxiä, ja'a hajxy yaghó'cäbä, jimä ñø'tyhajxy tøø miähmø'oy maa yø'ø cajptootiän. Hix, cu'ug jaduhñ jatcøøyy.

19

¹ Mänitøch nmädooyy majiäya'ay hänäjty jim ya'axy tsajpootyp:

Møj jaančhä Dios jaduhñ. Jaaya'ay hajxy xyajwaats xyajtséjcam.

Tsøg hajxy wiingudsähgøøyyäm coø møcmäjjaa miøødá.

² Hoyyä Dios quiudiuuñ coø ja'a cuhñdo'oxiøjc hoy piäda'agy haducytium, je'eguiøxpä coø ja'a yhaxøøgcuhdujt piahíjxäxä ja'a jäya'ayhajxy nägøxiä, y coø tøø yagho'ogy ja'a Diosquexypä møødá Dioshuung.

Coø ja'a Dios ja'a ca'awiindøybä yajcumädowa'añ, yepjiä tøyhajt jaduhñ; cab nä'ä nägoobä yajcumädoy.

³ Mänitä majiäya'ayhajxy miänáangombä:

Møj jaančhä Dios. Cøjxta'axiøø yø'ø cuhñdo'oxiøjc yhatoy yhapøgø'owa'añ.

⁴ Mänitä majiäya'ay ja'a Dios hajxy wyiinijcädaacy, ja'a hajxy nähii'xmädaaxpä møødá animalhajxy ja'a nämädaaxpä. Mänit hajxy miänaañ:

—Tøyhajt jaduhñ, møj jaančhä Dios.

⁵ Mänitä jäya'ay jim tu'ug quiapxy maa ja'a Dios hänäjty yhäña'ayän:

Näma'aw ja'a Dios hajxy coø miøjjä coø jiaančhä, pønjaty Diosquexy, pønjatiä Dios wiingudsähgøøby, miøjjä miuutscä.

⁶ Mänitøch nmädooyy coø majiäya'ay hänäjty quiapxy. Jaduhñ yajmädooyy nebiä mejy møc yhahøøchän, nebiä hänee møc ya'axiän:

Møj jaančhä Dios jaduhñ. Tøø tiägøøñä gobiernähajpä.

Jimä møjcuuhdujt miøødá.

⁷ Tsøg hajxy jootcugøøyyäm, tsøg hajxy xoondáacäm. Tsøgä Dios hajxy møj jaančh pädáacäm.

Tøø yhabaatnä coø ja'a Meeghuung piøgaannä. Tøø ja'a jaxie'eb ñiyhahixøøyyänä.

⁸ Howyit jaduñ jaanč tehñ yajpog'owáanäp, wa'adspä, haambä tsämaambä, nömä majiäya'ayhajxy miänaañ. Haa ja'a howyitä, je'eduhñ ñänøomby coo ja'a Dioshu- unghajxy hänajty hoy tøø wiädity hädaa yaabä naaxwiin.

⁹ Mänitöchä Diosmoonsä xñämaayy:

—Cujaay jaduñ: “Jootcujc hajxy yhity pønjaty tøø yajwoy tøø yajwich maa ja'a Meeghuung pioga'añän.”

Mänitöch xñämäguiombä:

—Tøyhajtä Diosmädia'agy jaduñ.

¹⁰ Mänitöchä Diosmoonsä nja wiinjicädaacy. Nja wiingudsähg'owáanhöch jaduñ. Mänitöch xñämaayy:

—Ca'ačh xwyiingudsähg'øy. Høøchä Dios xmioonsähajp nej mijts xmioonsähajpän, coo mijtsä Jesucristo miädia'agy hoy myajtuunä. Ja'a Dios mäböcy mwiingud- sähg'owäp.

Tøyhajtä Jesucristo miädia'agy. Tu'ugmädia'agy hajxy yhity, pønjatiä Jesucristo miädia'agy yajwá'xäp, pønjatiä Jesucristo capxpaatp.

¹¹ Mänitöch tsajpootyp nhijxy coo tøø yhawa'ačh. Mänitöchä jäya'ay tu'ug nhijxy coo ja'a ca'awiindøybä hoy yajcumädowa'añ, coo hoy chiptuna'añ. Paady xiøhaty ja'a hoguiudiuumbä, ja'a tøyhajtyejpä. Poobcuaañähgøxp hänajty yhäñ'aay. ¹² Jaduhñä wyiin hänajty quiähx'øgy nebiä jøøn tioyyän. Mayyä cuhjén hänajty miøødä cuhduum. Jimä xøø hänajty miøødä cujaay. Ni pøn hänajty quia'a najuø'øy tii xøø je'e. Je'eduhñ nidiuhñ najuøøby. ¹³ Nø'tiä wyit hänajty tøø yaghucy. Ja'a Diosmädia'agy hänajty xiøhaty. ¹⁴ Jaanč tehñ miäjiäya'ay hänajty panøcpx Haagä poobcuaañähgøxp. Poobwit hoybä hajxy hänajty miøød, jaanč tehñ pioob jaanč tehñ wia'ads. ¹⁵ Jim yø'øya'ay espada jaanč tehñ jøjp hänajty miøødä yhaawjooty. Je'e ja'a jäya'ay hänajty yajpux- aamby. Jaanč tehñ miøc guiobiernähada'añ. Hoyhoyyä jäya'ay chaačhtiuna'añ nebiä Dios ja'a jäya'ay yajcumädoyyän. ¹⁶ Jimä xiøø hänajty miøødä cujaay wyitcøxp møødä piuguioxp: “Hädaa møjcuहुdujt møød; ni pøn møjcuहुdujt jaduñ quia'a møødä.”

¹⁷ Mänitöchä Diosmoonsä tu'ug nhijxy coo hänajty jim tiäna'ay maa ja'a xøøjän. Mänit jaanč tehñ miøc yaaxy. Ja'a luudhajxy møyjaaxä, ja'a hajxy cøxp jäyøøwiädijpä:

—Min hajxy tsu'uds. Ja'a Dios hajxy jaduñ xmio'owaamb. ¹⁸ Jäya'ay hajxy nägøxiä mdsu'udsamby, miøjjä miuutscä, hopiønä, møødä rediøjc-hajxy, møød hajxy tuumbä soldadowiindsøn, møød hajxy møcmäjaamøødpä, møødä cuaay, møød hajxy cuaayhäñaabiä.

¹⁹ Mänitöchä animal nhijxy. Møødä reyhajxy hänajty jim choonä møødä quiu'ughajxy. Tsiptunaamb hajxy hänajty jaduñ møødä jaaya'aguioxpä ja'a cuaañähgøxp wädijpä møødä quiu'ug. ²⁰ Mänitä animal miajtsä møødä craa ja'a jaanč tehñ jiäya'awyi- inhøhmbä. Tøø ja'a craa hänajty yajcähx'øgy hoy-yagjuøøñajaty maa ja'a animal wyiinduumän. Jaduhñä craa hänajty tøø wyiinhøøñ pønjaty yø'ø animal seña hänajty møødhajtäp, pønjaty yø'ø animal yhädiuunnaxy hänajty tøø wyiingudsähgøøyyä. Mänit hajxy nämetsc jøønjuipøøyyä maa azufre hänajty tioyyän. ²¹ Mänitä quiu'ughajxy yaghó'cäxä. Jaaya'ay jaduñ mäyagho'c, ja'a hänajty cuaayhäñaabiä. Espadahaam miäyagho'cy, ja'a jaanč tehñ jøjpä, ja'a hänajty jim miøødpä yhaawjooty. Mänitä ho'ogyjäya'ayhajxy chu'tsä. Ja'a luudhajxy jaduñ mädsu'ts jaanč tehñ quiu'uxiä.

20

¹ Mänitöchä Diosmoonsä tu'ug nhijxy. Jim tsajpootyp hänajty miänacy. Jimä juthawaatst hänajty quiø'ogonhaty, ja'a hänajty jaanč tehñ quiøøcpä. Jimä cadena hänajty quiø'øwitshajpä. ² Mänitä møjcu'ugong miajtsä, ja'a xøhajpä Satanás. Ja'a dragón je'e møødä jecychahñdy. Mänit quiø'øxojtsä tiecyxiojtsä cadenaam. ³ Mänit quiujuipøøyyä jutjooty. Mänit yhawäguii'tsä. Mänitä Diosmoonsä yhäho'ch maa ja'a juthaawän. Mil jomøjtä møjcu'ugong hänajty jiiby yhida'añ, nebiä jäya'ay jaduñ quia'a

wiinhóhnnät. Coo hánajty mil jomøjt tøø yhabejnä, mänit yhøxmadsa'añii. Pero cab hánajty jejcy yajwädita'añii coo hánajty tøø yhøxmačhii.

⁴ Mänitøch nhijxy coo cu'ughajxy hánajty yháña'ay. Haagä møjcuहुdujtmøød hajxy hánajty coo hajxy nägøxiä yajtøyhajtyégät. Mänitøchä jäya'ayä yháñämähajxy nhijxä, pønjaty hánajty tøø yo'puxyii. Paady hajxy yo'pujxä coo hajxy hánajty tøø Dyiosmädia'agy-yajwa'xy coo ja'a Jesucristo Dyioshuungä. Cabä animal hajxy hánajty tøø wyiingudsähgø'øy, ni ja'a yhädiuunnaxy. Ni cab hajxy hánajty tøø piädäcäxä ja'a animal seña, ni wyiinnähgopcøxp ni quiø'øgøxp. Mänitøch nhijxy coo hajxy jiuypijøjnä. Mänitä Jesucristo hajxy miøødtägøøyy gobiernähajpä. Mil jomøjt hajxy hánajty tiuna'añ. ⁵⁻⁶ Jayøjp hajxy jiuypijøjtsohñ. Jootcujc hajxy yhity. Nebiä teediän ja'a Dios hajxy miøødtuñ. Cab hajxy chaačhtiuna'añii. Coo mil jomøjt hánajty tøø yhabety, mänitä jäya'ay yháñämähajxy jiaac juyypigogaambä nägøxiä, ja'a hajxy hánajty hoy tøø quia'a wädítiäbä. Mänit hajxy yajcumädowa'añii.

⁷ Coo mil jomøjt hánajty tøø yhabejnä, mänitä Satanás yhøxmadsa'añii. ⁸ Mänit tiägø'øwa'añ jäya'awyiinhøhmbä wiinduhmyhagajpt. Yajwiinhøønaambä Gog møødä Magog. Mänit hajxy yhamugø'øwa'añ møødä quiu'ughajxy coo hajxy hánajty chiptuna'añ. Jaanč tehñ miay hajxy hánajty jaduñ. ⁹ Wiinduhmyhagajpt hajxy choona'añ. Mänitä Dioshuunghajxy jiuħbic jiuħgodø'øwa'añii. Mänitä Dios jøøn yajca'awa'añ. Cøxy toyaambä Magoghajxy jaduñ. ¹⁰ Mänitä møjcu'ugong jøønjuipøøyyä maa ja'a azufre hánajty tioyyän, maa ja'a animalhajxy hánajty tøø jøønjuipø'øyijän, møødä craa hánajty tøø jiäya'awyiinhøøñäbä. Cøjxta'axiøø hajxy jiiby chaačhpøga'añ xøømdsuhñ.

¹¹ Mänitøchä Dios nhijxy coo hánajty yháña'ay. Poobä yháñaabiejt hánajty cruundä. Mänitä naaxwiimbä yhadägoyyøøyy maa ja'a Dioswiinduumän møød tsajtcøxp. ¹² Mänitøchä háañämähajxy nhijxy miøjjä miuutscä. Jim hajxy hánajty tiäna'ay Dioswiinduum. Mänitä Dios ja'a libro yaghawaach møødä libro wiingpä. Jiibiä xiøøhajxy hánajty myiñ cujaay ja'a hajxy jugyhadaambä cøjxta'axiøø nebiä Dios jiugyhatiän. Mänitä Dios ja'a libro quiapxy pø hoyyä háañämähajxy hánajty tøø jiäya'ayhaty, pø caj. ¹³ Mänitä háañämähajxy jiiby piädsøømy mejjiooty, ja'a hajxy hánajty jiiby tøø yhó'oguiäbä. Jaduhñ hajxy jiiby piädsøømbä naaxpa'c. Ja'a hajxy hánajty hoy tøø jiäya'ayhātiäbä, hawa'adstuum hajxy hoy miähmøøñä. Ja'a hajxy hánajty hoy tøø quia'a jäya'ayhātiäbä, haducytium hajxy hoy miähmø'øy. ¹⁴⁻¹⁵ Mänitä møjcu'ugong jøønjooty piädaacä. Mänitä háañämähajxy jøønjooty quiujuipøøyyä, pønjetiä xiøø hánajty ca'a miimb cujaay librojooty. Cab hajxy cøjxta'axiøø jiugyhada'añ nebiä Dios jiugyhatiän.

21

¹ Mänitøchä tsajpootyp jemýbiä nhijxy møødä naaxwiin jemýbiä. Tøø ja'a tuctsajpootyp hánajty tiägoonä møødä tucnaaxwiimbä. Møødä mejy hánajty tøø tiägoobiä. ² Mänitøchä Dioscajpt nhijxy, ja'a Jerusalén jemýbiä. Jim hánajty miänacy tsajpootyp. Jim hánajty tøø choon maa ja'a Diosän. Yajxon hánajty quiahxø'øgy nebiä jaxie'eb ñiyhahixø'øyijän coo hánajty piøga'añ. ³ Mänitä jäya'ay møc jiaanč tehñ quiapxy jim tsajpootyp:

—Huug hix, jimä Dios tøø chánaadiaacpøcy maa ja'a jäya'ayhajxiän. Quiu'ughadaambiä Dios ja'a jäya'ayhajxy. Wiingudsähgø'øwáañap ja'a Dios jaduñ. ⁴ Jaduhñä Dios miäna'ana'añ coo ja'a jäya'ayhajxy quia'a jóøñät. Cab hajxy pia'ambedaannä, yho'ogaañnä. Cab hajxy jiø'øwaannä xiuudsaañnä. Tøø yø'øduhmbä hánajty quiøxy cuhdägoonä.

⁵ Mänitä Dios miänaañ:

—Tøøch cøxiä wiinä nhädiuundägach.

Mänit miänangombä:

—Cujaay jaduñ. Tøyhájthøch nmädia'agy jaduñ. Cábøch nhøhnda'agy.

⁶ Mänitøch xñämaayy:

—Tøø jaduñ miaañ. Høøch nyajtsoñdaac; jaanä høøch nyajmaabiä. Pøñä jioot hamuumdu'joot tøø piäda'agy coo jiugyhada'añ cøjxta'axiøø nébiøch njugyhatiän, nguhdujtmó'owäbøch jaduñ coo jaduñ jiugyhádät. ⁷ Pøñ mäjädaacp, je'e jugyhadaamb cøjxta'axiøø nébiøch njugyhatiän. Høøch cøjxta'axiøø xTieedyhadaamb. Nhuunghadáambbiøch jaduñ. ⁸ Haa ja'a hajxy jaduñ ca'a mäjädaacpä, jøønjooty hajxy nøcxy quia'awa'añ maa ja'a azufre tioyyän. Jiiby hajxy cøjxta'axiøø chaaçhpøga'añ, møød hajxy ca'a mäbøjpä, møød hajxy ca'awiindøybä, møød hajxy jäya'ay-yagho'pä, møød hajxy amigähamädoobä, møød hajxy mäwijts mäbäxujpä, møød hajxy quepychechwiingudsähgøøbiä, møød hajxy høhñdaacpä.

⁹ Mänítøchä Diosmoonsä tu'ug nhijxy, ja'a hajxy näjuxtujcpä, ja'a orotsim hajxy miøødpä cødu'ug. Jimä tsø'ty häyohn hänäjty miøødä ja'a juxtujcpä orotsim. Mänítøch xñämaayy:

—Jamä jaxie'eb nyajnähixø'øy ja'a Meeghuung tio'oxiøjc-hadaambiä.

¹⁰ Nwiinhíxypøch hänäjty; ja'a Dioshespíritøch hänäjty xyajwiinhixp. Mänítøchä Diosmoonsä xwioonøcxy maa ja'a cøxptunguhduumän. Mänítøchä Dioscajpt xyanähixøøyy. Jerusalén xiøhaty. Jim hänäjty miänacy tsajpootyp maa ja'a Diosän. ¹¹ Jaanç tehñ yhaamb jaanç tehñ chämaambä cajpt hänäjty nebiä Diosän. Jaduñ hänäjty yhaambä chämaambä nebiä høçhaa jaanç tehñ chowbän, nebiä jaspetsaajän. Jaduñ hänäjty tiø'xiä nebiä hijxtän. ¹² Piquiä ja'a cajpt quiuraa hänäjty yhamuu'd-sø'øguiä. Jaanç tehñ quiøxp hänäjty yhamuu'dsø'øguiä. Majmetscä curaahaaw hänäjty miøødä. Majmetscä Diosmoonsähajxy hänäjty jim yhadäna'ay. Cødu'ugjaty hajxy hänäjty yhadäna'ay maa ja'a curaahaawän. Tu'ugjatiä curaahaaw hänäjty miøødä cujaay nebiatiä judíoshajxy xiøhaty ja'a nämajmetscjatypä. ¹³ Tägøøgä curaahaaw hänäjty xøøbädsøømypiä; tägøøg hänäjty tsuxpojejpä; tägøøg hänäjty jøømbojmanajpä; tägøøg hänäjty xøøguhñajxpä. ¹⁴ Majmetscä tsaä hänäjty jiiby maa hänäjty miuu'dsø'tsooñän. Jim tsaagøxp hänäjty quiujaayä nebiatiä Meeghuungä quiuguexyhajxy hänäjty xiøhaty, ja'a nämajmetspä.

¹⁵ Haa ja'a Diosmoonsøch hänäjty xmiøødmädiaacpä, jimä oropaxyquipxt hänäjty miøødä. Je'e ja'a cajpt hänäjty yajquipxaamby møødä curaahaaw møødä yhamuu'd-sø'øgy. ¹⁶ Haa ja'a cajpt, hamädaaxteec hänäjty je'e. Jaduñtiä yoñä nebiä yhoocän. Mänitä Diosmoonsä ja'a cajpt qyipy ja'a oropaxyquipxthaam. Mejtsmil cumejtsmägo'x kilómetro hänäjty yoñä; jaduñ hänäjty quiøxpä; jaanä jaduñ yhooc hänäjtypä. ¹⁷ Haa ja'a yhamuu'dsø'øguiä, tägøøghii'x cumädaaxc metro hänäjty quiøxpä.

¹⁸ Haagä jaspetsaahädiuñ ja'a hamuu'dsø'øgy hänäjty. Haagä oro ja'a cajpt hänäjty. Jaduñ hänäjty quiähxø'øgy nebiä hijxt jaanç tehñ tiø'xypän. ¹⁹ Haa ja'a majmetspä tsaä hänäjty jiiby hijpä maa ja'a yhamuu'dsø'øgy miuu'dsø'tsooñän, haagä høçhaa hänäjty miøød. Haa ja'a jayøjpä tsaajä, jaspe hänäjty miøød; ja'a miämetspä, zafiro hänäjty miøød; ja'a miädägøøgpä, ágata hänäjty miøød; ja'a miämädaaxpä, esmeralda hänäjty miøød; ²⁰ ja'a miämägøøxpä, ónice hänäjty miøød; ja'a miädädujcpä, cornalina hänäjty miøød; ja'a miäjuxtujcpä, crisólito hänäjty miøød; ja'a miäductujcpä, berilo hänäjty miøød; ja'a miädaaxtujcpä, topacio hänäjty miøød; ja'a miämajcpä, crisoprasa hänäjty miøød; ja'a miämajtu'ugpä, jacinto hänäjty miøød; ja'a miämajmetspä, amatista hänäjty miøød. ²¹ Ja'a majmetspä curaahagø'ow, haagä perlahädiuñ hänäjty cødu'ugjaty. Haa ja'a mõjtu'u, orohädiuñ je'e. Jaduñ hänäjty quiähxø'øgy nebiä hijxt tiø'xiän.

²² Cábøch tsajtøjc jim nnä'ägädä hijxy maa yø'ø cajptän, je'eguiøxpä coo ja'a Dios jim chäna'ay møødä Meeghuung. Møjcuñdujtä Dios miøød. ²³ Haamb tsämaambä Dios jim yhity møødä Meeghuung. Paadiä xøø jim quia'a hañ ni ja'a po'o. ²⁴ Coo ja'a Dioshajxy jim yhañ chämamy, paadiä jäya'ayhajxy jiiby wiädita'añ, ja'a hajxy hänäjty tøø ñähwä'açhäbä. Møødä reyhajxy jiiby wiäditaambä. Yajmedsaamby hajxy mädyijjaty hoy yajxon. ²⁵ Cabä curaahaaw mänaa yhaduga'añ. Cab jaduñ mänaa wyiingoodsø'øwa'añ maa yø'ø cajptän. ²⁶ Medsaambä jäya'ayhajxy jim Dioswiingudsähgøøbiä. ²⁷ Cabä haxøøgpä jiiby mänaa tiägø'øwa'añ cajptooty, ni ja'a jäya'ayhajxy ca'awiindøybä ni ja'a

høhndaacpä. Jagooyä jäya'ayhajxy jiiby tiägø'owa'añ pønjatiä xiøø jiiby miimb cujaay librojooty ja'a Meeghuung miøødpä. Jaaya'ayädhajxy cøjxta'axiøø jugyhadaamb nebiä Dios jugyhatiän.

22

¹ Mänitøchä Diosmoonsä möjnøø tu'ug xyajnähihøøyy jaančh tehñ tiø'xy nebiä hijxtän. Jim hänajty piädsømø'øy maa ja'a Dios ja'a Meeghuung hänajty miøødhäña'ayän. Ja'a möjnøø jaduħmbä, yejpiä jugyhajt jaduħñ. ² Møjtu'ugujcä möjnøø hänajty piäyø'øgy. Mejtsnøøba'a ja'a quepychaa hänajty tu'ug tiäna'ay, ja'a jugyhajtyejpä. Majmetshoocä quepychaa hänajty tiøømbety tu'jomøjtpä. Wiindu'ugäpo'ojaty hänajty tiøømhaty. Ja'a yhaayhaamä jäya'ayhajxy ñähwa'ačh wiinduhmyhagajpt. ³ Cabä haxøøgpä jim yajpaada'añ. Hix, jimä Dioshajxy yhäña'awa'añ møødä Meeghuung. Jimä mióonsäm wyiingudsähgø'owa'añijäm. ⁴ Jaduħñä wyiin jiojphajxy yhixáanäxä. Haa ja'a Dios xiøøhajxiä, jim cujaay miøødhadaanäxä maa ja'a mioonsä wyiinnähgopcøxpän. ⁵ Cab jaduħñ mänaaxøø wyiingoodsø'owaannä. Cabä xøø jim yhanaannä, ni jøøn jim quia'a hajajaannä. Ja'a Dios jim hajajaamb cudøø'xaamb. Haa ja'a hajxy jim tsänaabiä, cøjxta'axiøø hajxy jim guiobiernähada'añ.

⁶ Mänitøchä Diosmoonsä xñämaayy:

—Tehñ tiøyhajt hädaa mädia'agy jaduħñ. Haa ja'a Diosä, quiejx ja'a quiuguexy jaduħñ coo ja'a mioonsä nøcxy yhawáanäxä coo miäbodhaty tijaty jadaänäp tunäänäp. Ja'a Dios jaduħñ najtsapxøøyy —nømhøchä Diosmoonsä xñämaayy.

⁷ —Mobädájpøch jiiby nhäda'aga'añ —nømä Dios miänaañ.

Jootcujc yhity pønjatiä Diosmädia'agy hoy cudiuumb nej yaa myiñän cujaay hädaa librojooty.

⁸ Høøch jaduħñ tøø nhixy tøø nmädooy, høøch Juanhajpä. Cooch nwiinhixpædøøyy, mänitøchä Diosmoonsä nwiinjicädaacy, ja'ačh hänajty tøø xyajwiinhixiäbä; nja wiingudsähgø'owáanhøch jaduħñ. ⁹ Mänitøch je'e xñämaayy:

—Ca'ačh xwyiingudsähgø'øy. Høøchä Dios xmioonsähajp nej mijts jaduħñ xmioonsähajpän coo ja'a Diosmädia'agy hajxy myajwa'xy. Pønjaty hoy cudiuumb nej yaa myiñän cujaay hädaa librojooty, moonsähajtäp hajxy je'ebä ja'a Diósäm. Ja'a Dios mäböcy hajxy mwiingudsähgø'owäp.

¹⁰ Mänitøch xñämäaguimbä:

—Tøø miäbodhaty coo ja'a Diosmädia'agy tiøjiada'añ nej yaa myiñän cujaay hädaa librojooty. Paady, cabä Diosmädia'agy yu'učh myaghídät. Naxy mdehñ yajwá'xät.

¹¹ Weenä ca'awiindøyhäna'c-hajxy jiaac jatcø'øy haxøøg. Weenä hoyhäna'c-hajxy jiaac cudiuñ hoy nebiä Dios yhane'emiän. Dioshuung hajxy je'eduhñ —nømhøchä Diosmoonsä xñämaayy.

¹² —Tøyhajt jaduħñ. Mobädájpøch jiiby nhäda'aga'añ. Nøcxáambøchä jäya'ayhajxy nbäda'aga'añ hodiuum, ja'a hajxy hoy tøø quiidiuñäbä. Haa ja'a jäya'ayhajxy tøø quia'a cudiuñäbä, haxøøgtúumhøch hajxy nøcxy nbäda'aga'añ. ¹³ Høøch cøxiä nyajtsohndaac. Høøch jadahooc cøxiä nyajmayáangombä —nømä Dios miänaañ.

¹⁴ Jootcujc hajxy yhity pønjaty nähwaatsp. Je'edshajxy jiiby tægø'owaamb Dioscajptooty. Je'edsä cuhdujt hajxy mo'owáanäp coo ja'a tømmdsa'am hajxy jiøø'xät ja'a jugyhajtyejpä. ¹⁵ Pero cabä ca'awiindøyhäna'c-hajxy jiiby tiägø'owa'añ, ni ja'a mäwijtspä ni ja'a mäbäxupähajxy, ni ja'a amigähämädoobähajxy, ni ja'a jäya'ay-yagho'pähajxy, ni ja'a quepychechwiingudsähgøøbiähajxy, ni ja'a høhndaacpähajxy.

¹⁶ —Høøch Jesucristo, tøøchä nguguexy nguexy coo ja'a hermanohajxy cøxiä yhawáanäxät. Høøchä rey David nhaphajpy nhoc-hajpy. Y xyhaphajp xyhoc-hájjpøch je'ebä. Høøch, jaxiøømhájjpøch høøch —nømä Jesucristo miänaañ.

¹⁷ Jaduħñä Dioshespíritu miänaambä:

—Min —jaduħñä Meeghuung tio'oxiøjc miänaambä.

Pøn jaduħñ mädoob, ween jaduħñ miänáambät:

—Min.

Pønä jioot pädaacp hamuumdu'joot coo cøjxta'axiøø jiugyhada'añ nebiä Dios jiugyhatiän, yagjugyhadaänäp jaduuhñ nebiä jiugyhatiän. Cab jaduuhñ yagjuya'añii.

¹⁸ Pønjatiä Diosmädia'agy hamädoowhijp nej yaa myiñän cujaay hädaa librojooty, nnämäabiøch jaduuhñ coo ja'a mhamdsoo mädia'agy hajxy mga'a yajmäjaayø'øwät. Coö hajxy jaduuhñ mjatcø'øwät, mänitä Dios hajxy xjiaančh tehñ yajtsaačhpógät nej yaa jaduuhñ myiñän cujaay hädaa librojooty. ¹⁹ Y coö hajxy näje'ejaty mbuhgónät, cabä Dios hajxy xyagjugyhádät cøjxta'axiøø neby je'e jiugyhatiän, nej yaa myiñän cujaay hädaa librojooty. Cab hajxy jiiby xyajtägø'øwät Dioscajptooty.

²⁰ Jaaya'ay jaduuhñ mädiaacpä, je'eduhñ mänaamb:

—Tøyhajt jaduuhñ. Mobädájpøch jiiby nhäda'aga'añ —nømä Dios miänaañ.

Amén. Min paquiä Jesucristo. Miičh højts nWiindsønñhajpy.

²¹ Ween mijtsä Jesucristo ja'a hoyhajt ja'a weenhajt nägøxiä xmio'oy. Amén.